




DR Cevdet Ahmet, paşa  
557 Tarihi Cevdet  
C48  
1891  
cilt 7-8

**PLEASE DO NOT REMOVE  
SLIPS FROM THIS POCKET**

---

**UNIVERSITY OF TORONTO  
LIBRARY**







Digitized by the Internet Archive  
in 2009 with funding from  
Ontario Council of University Libraries

فهرست جلد سابع

صحنه	موضوع
۴	بقیة وقایع سنه ۱۲۱۳
۰	روسیه وانگلتره دولتریاه اتفاق مکالمه سنه باشلانیدی
۶	روسیه نك قره دکنز دونمائی در سعادت کلوب آقد کزه کیتدیکی
۸	صدر جدیدک در سعادت و رودی و بعض توجیهات و دیگر وقوعات
۰	جزائر یونانیه ایله بعض سواحلک فتحی
۹	دولت علیه ایله روسیه وانگلتره دولتری میانه لرنده عقد اتفاق
۱۰	کعبه مکرمه پوشیده سنک در سعادتده اعمالی . و عزل و نصب
۱۱	وقایع مصر و بر الشام
۱۵	یونانپارته نك بر الشام طرفه هجومی
۱۶	عیش قاعه سنک یونانپارته یه تسلیمی
۱۷	غزه ویافه ورمه و حیفا نك کیفیت استیلاسی
۱۸	عکا محارباتی
۲۳	امارت حاج مصرک الغامی
۲۴	فرانسزلرک انهرامی
۲۵	یونانپارته نك رجعتی
۲۷	بعض حوادث حجاز و بر الشام
۲۸	وقایع در سعادت
۳۰	سجایاتین دولتیله عقد اتفاق اونیدی
۳۲	لحسا وقوعاتی
۳۵	صدراعظمک مصر اوزرینه حرکتی
۰۰	وقایع سنه ۱۲۱۴
۴۰	ابو خور وقعه سی
۴۲	حوادث اوروپا
۴۴	وقایع شتی
۰۰	پاسبان اوغلنک وزارتی
۴۵	اخراج مواجب و تطیف قائم مقام پاشا

راتب افدینک ترجمه حالی	۴۶
جزارک بعض احوالی	۴۷
صدارت عظمی قائم مقاملغنگ تبدیلی و بعض و فیات	۴۹
عسا کر معلمه نك تکثیری و ارکان حربیه ترتیبی	۵۰
جزائر سبعة جمهوریتک تشکیلی و تقلیدسک روسیه یدینه کدیکی و بعض وقایع عراق	۵۱
حیدر علی خان ایله تیو سلطانک ترجمه حالاری	۵۲
وقایع مصریه	۵۶
پوناپارته نك مصر دن فراری اوزرینه بعض مطالعات	۵۷
دمیاط وقعه سی	۵۹
عریش وقعه سی	۶۱
مصرک تخلیه سی حقیقده مقاوله	۶۷
پوناپارته نك باش قونسلوس اولدینی	۶۸
تخلیه مقاوله سنک فسخی	۷۲
اردوی هایونک انهزامی	۷۶
درون مصرده ظهوره کلان محاربات	۷۸
عسا کر عثمانیه نك مصر دن خروجی	۸۱
بعض وقایع مکة مکرمه	۸۲
وقایع سنه ۱۲۱۵	۸۳
قوجه یوسف پاشانک ترجمه حالی	۹۰
قاه برک اعدامی	۸۵
کوسه مصطفی پاشانک وفاتی و قپودان پاشانک در سعاده عودتی	۸۷
امرای مصریه نك اطوار و مشواری	۸۸
اسماعیل پاشانک انجم احوالی	۸۹
جبل لبنانک بعض احوالی و شریف پاشانک ترقین رتبه سی و تیمورک وزارتی	۹۱
وقایع در سعادت	۹۲
تبدل مشیخت و تکثیر عسا کر نظامیه و حسن افدینک اردو قاضیسی اولدینی	۹۰
وقایع روم ایلی	۹۴
پاسبان اوغلانک رفع وزارتی و طیار پاشانک روم ایلی یه مأموریتی و بعض وقایع	۹۵
بطل پاشانک وفاتی و شریف پاشانک ابقای وزارتی و دیگر و فیات	۹۶


عارف و خلیل و صادق افندیلرک ترجمه حاللری	۹۸
بختکرای خان ایله کامل افندیکنک ترجمه حاللری	۹۹
وقایع شتی	۱۰۰
درس حضور و دیگر بعض وقایع علمیه	۱۰۱
هنددن هدایا و رودی	۱۰۳
احوال دول اوروپا و بعض احوال مصریه	۱۰۵
روسیه دونماسنک قره دکزه عودتی	۱۱۰
روسیه نك هند حقیقده اولان تصوراتی و فرانسه ایله آوستریانک مصالحه سی	۰۰۰
روسیه ایمپراطوری پاولونک اعدامی	۱۱۵
انکلیز عسکرینک ابوخوره چیقیدینی	۱۱۷
اسکندریه نك محاصره سی و رشیدک استخلاصی	۱۱۸
رحمانیه نك ضبطی و سردار اکرمک بلیسه و رودی	۱۱۹
مراد بکک و فاتی و فرانسنزلرک بعض احوالی	۱۲۰
وقایع سنه ۱۲۱۶	۱۲۳
قیودان پاشانک و سردار اکرمک مظفریتلری	۰۰۰
فرانسزلرک قاهره مصری تخلیه ایتدکاری	۱۲۶
وقایع درسعادت	۱۲۸
رؤس امتحانی و وقایع سائره و فتح اسکندریه	۰۰۰
امرای مصرک احوالی	۱۳۲
بعض احوال عربستان و جبل لبنان	۱۳۶
مصالحه عمومیه اوروپا	۱۳۸
غالب افندیکنک پارسه اعزامی	۱۴۲
بعض وقایع . قائم مقام پاشانک و فاتی	۱۴۳
ملک پاشانک و فاتی	۱۴۵
روم ایلینک احوالی	۱۴۶
حق پاشانک ینه روم ایلییه ماموریتی . بلغراد محافظینک قتلی	۱۴۹
تپه دلنی علی پاشانک روم ایلی سرعسکر و والیسی اولدینی	۱۵۴
قوه عسکریه یه دائر بعض افادات	۰۰۰
وقایع سنه ۱۲۱۷	۱۵۵



	صحیفه
۱۵۶	معلم سواری ترتیبی و مصرده عساكر معلمه ترتیبه شروع اولندیغی و محمد علینك كوله منلر ایله محاربه سی و اجمال احوالی
۰۰۰	وقایع روم ایلی
۱۵۹	افلاق و یوده سنك فراری
۱۶۰	بعض وقایع در سعادت
۱۶۱	صدر اعظمك در سعادت و ورودی و پاسبان اوغلنك ابقای وزارتی
۰۰۰	مملکتین بکلرینك بعض امتیازات ایله نصبی و فرانسه ایله عقد مصالحه
۱۶۲	صدقی افندیك لوندریه اعزامی و وقایع سائر
۱۶۴	جزارك بعض احوالی و بعض و فیات
۱۶۵	وقایع عراق . کر بلا و قعه سی
۱۶۶	بغداد و الیسنك وفاقی
۱۷۲	علی پاشانك بغداد و الیسی اولدیغی
۰۰۰	وقایع متنوعه
۱۷۴	بقیه وقایع روم ایلی
۱۷۵	حالت افندیك پارس ایلیجیسی اولدیغی و بعض و فیات و سائر وقوعات
۱۷۸	انكلیزلرك اسكندریه دن چیقدقلری و فرانسرلر ایله بوزشدقلری
۱۸۲	مذهب و هابینك کیفیت ظهور و انتشاری
۲۰۷	وقایع سنه ۱۲۱۸
۲۰۸	سعود و هابینك مكیه دخولی و آدم افندی ایله ملاقاتی
۲۱۳	شریف غالب ایله شریف پاشانك مكیه استخلاص ایتدكلری
۲۱۵	تبدل مشیخت و دیگر بعض توجیهاات علمیه
۲۱۶	مصرك احوال اختلالیه سی و وقایع سائر
۲۲۰	مصر و الیسی خسرو پاشانك فراری و طاهر پاشانك قائم مقامانی
۲۲۲	كوله منلرك مصره عودتلیری و طاهر پاشانك اعدامی
۲۲۵	رجائی افندیك ترجمه حالی و مصرك شكل اداره سی
۲۲۸	وهابی رساله لرینك مصره ورودی
۰۰۰	طرابلسلی علی پاشانك مصر و الیسی نصب اولندیغی . و هبابی مسئله سی
	حقننده مشورت
۲۳۳	دمیاطك ضبطی و خسرو پاشانك اخذ و توقیفی و علی پاشانك اسكندریه به وصولی

	صيفه
رشيدك ضبطى وسيد على قبودانك اخذى واسكندريه سدينك هدمى	١٣٥
وقايع شام وعراق	١٣٧
بقية وقايع مصريه	٢٤١
رئيس وهايانك اعدامى	٢٤٤
مصر واليسى على پاشانك اعدامى وبيوك الفينك احوالى	٢٤٦
امراى مصريه نك مصر دن اخراجلرى وخسر و پاشانك رومه ارسالى	٢٥٤
وقايع روم ايلي	٢٥٥
وقايع اناطولى	٢٥٧
احوال اوروپا	٢٥٩
وقايع شتى	٢٦٢
بهجت افدينك حكيم باشى اولديغى	٢٦٣
غريبه	٢٦٤
وفيات اعيان	٢٦٥
حسين وشريف پاشالرك ترجمه حاللرى	٢٦٧
وقايع سنه ١٢١٩	٢٦٨
جزارك وفاتى اوزرينه سوريه نك احوالى وقبودان پاشانك عزلى	٢٧٠
وهايلرك بعض احوال وحركاتى	٢٧٥
وقايع مصريه	٢٧٧
بعض وقايع عربستان	٢٨٠
روم ايلي وقايعى وصر بلولرك عصيانى وجزائر سبعة وير كوسنك ورودى	٢٨٢
بعض وقايع استانبول . وفات عاشر افدى	٢٨٦
ترسانه دقتدارلغنك احدائى	٠٠٠
احوال عسكرىه حقهده بعض مطالعات	٢٨٨
خلاصه الكلام فى رد العوام	٢٨٩
ذيل	٣٠١
يوسف پاشانك صدارتنه دائر خط هايون	٠٠٠
عاشر افدى به خطاباً خط هايون	٣٠٣
روسيه اتفاقنامه سى	٣٠٤
انكليز اتفاقنامه سى	٣٠٧

صحیفه	
شریف غالبك مکتوبی	۳۱۱
سجلیاتین اتقاقامه سی	۳۱۳
اخراج مواجب حقنده خط هایون	۳۱۷
دوبره و نیکك رسم کمرکی حقنده فرمان عالی	۳۱۸
جنرال قله برك معروضاتی	۳۲۱
پوسایجك معروضاتی	۳۲۶
تخایه مصر ایچون یاپیلان مقاوله نامه	۳۳۷
بحر سویشدن انکلیر ایلیچیسنه تخریرات	۳۴۱
هندستان حقنده روسیه لونك لایحه سی	۳۴۳
بكلك سفینه لرك عددینی مبین جدول	۳۴۹
مملکتین بکلرینه بعض امتیازاتی حاوی ویریلان فرمان	۳۵۲
فرانسه مصاححه نامه سی	۳۶۱
عصمت بکك رئیس افندی به تذکره سی وسعود وهاینك اماننامه سی	۳۶۳
عصمت بك ایله رئیس افندیك مخبره تذکره لری	۳۶۵





ترتیب جدید

جَلَدِ بَاصِع

(از)

نَالِ مَخْرُوجِ



معارف نظارت جلیله سنک رخصتنامه سیاه

(ایکینجی طبعی)

در سعادت

(مطبعة عثمانیه)

۱۳۰۹



DR  
557  
C48  
1891  
cilt

بِسْمِ اللَّهِ الرَّحْمَنِ الرَّحِيمِ



نحمد الله على نعمائه \* ونصلى على سيدنا نبيه \* وعلى اله واصحابه واوليائه \*  
بعد اذ اقم پریشان رقم جودت خلاصه حال حاضرى بوجمله حكایت  
ایدر که در دست تصنیف اولان تاریخ عبرت شمار یخك جمع وتالیفی  
اثنا سنده عصر محاسن حصر همایونی سر نامه متن سعادت \* ودور ترقی  
کور معارف مشحونی شرح شرفنامه شان ومفخرت اولان پادشاه  
حقایق اکتناه وشهنشاه عدالتپناه \* سلطان عزیز المنال \* وخاقان  
جزیل النوال \* السلطان \* عبدالعزیز خان \* افندمر حضر تلرینک  
جلوس همایون میامن مقرون ملوکانه لری شرف وقوعیله \* تنظیم  
واصلاح امور ملکیه وعسکریه یه پک زیاده مسارعت \* وفوق العاده  
براهمیت ایله شروع \* ومصالحك شعبات مهمه سنده تأسیس وترتیب  
اصول وفروع اولنه رق هر خصوص ایچون تحریء اهل وارباب \*  
وهر ایشه سرکاران لیاقت پیشه انتخاب ایله مدت یسیره ظرفنده  
احیاء ملک وملته مدار \* ودیباچه طراز جرائد روزکار اوله جق نیچه  
آثار موفقیت دثار وکرامت شعار جناب جهانبانی منظور دیده هر قاصی  
ودانی اولمسيله برابر بوعبدکینه وضعیف \* کاه برای ایتمار واستیمار امور  
عالی نظران عاظم صدور ایله انیس والیف \* وکاه مطیه ران میادین مساعی

( اولان )

اولان مأمورین استقامت کزینہ قرین وردیف اولهرق کندی حال  
 و اقتدار نجه خالصانه و عاجزانه مصالح عامه مطالعه سنه حصر افکار \*  
 و فلق بامدن شفق شامه و ارنجه کیمت خامه حمیت علامه ناچیزانه  
 او وادیلرده اثاره غبار آثار ایده کلدیکی حالده انتشار علوم و فنون  
 امر اهنده مشهور عیون اولان رغبات همایون حضرت خلافتناهی یه  
 بناء مساعداً زمانیه یه تصادف اولندجه سمت تألیف کلامه دخی  
 عطف عنان اهتمام ایله کچن سنه جلد سادس بالتتمیم حضور مراحم  
 نشور ظل الهی یه تقدیم اولمش ایدی \* بو دفعه رونما اولان وقت  
 فراغ عزالت مساعده دعای مفروض الادای حضرت شهریار ی ضمیمه  
 ورد مخصوص رقیق کذار ی و تمیمه کردن خلوص عجز شعاری قیلنوب  
 بو اوقات دعوات مفروضه اثناسنده جلد سابعک دخی پیرایه بخش  
 صحائف انتشار و اشتهار و جالب اعتبار اولی الابصار اولمسی تمنا سیله  
 بمنه تعالی تسوید و تبیضنه حصر لیل و نهار و وقف خامه وقایع نکار قیلندی .  
 { منه التوفیق و نعم الرفیق }

جلد سابع  
(از)

# تاریخ مختصر

بِسْمِ اللَّهِ الرَّحْمَنِ الرَّحِيمِ

بقیة وقایع سنه ۱۲۱۳

جلد سادسه بیان اولدنی اوزره جنرال پوناپارته مصری استیلا ایلمش اولدیغندن دولت علیه دخی فرانسه جمهورینه اعلان حرب ایتمش و بعض دول اوروپا و علی الخصوص انکلتره و روسیه دولتری ایله فرانسه علیه عقد معاهده اتفاقه قرار ویرمش ایدی .

حتی صدور عظامدن عصمت بك افندی ایله رئیس الکتاب عاطف افندی مکالمهیه مأمور اولمش ایدی و اگر چه هنوز مصلحت ختام بولمامش ایسه ده اساس ماده تعیین ایدرک اوج دولتک برلکده فرانسه علیه حرکت ایده جککاری تقرر ایلمش اولدیغندن قره دکردده کی روسیه دونماسنک آقدکزه کچمک اوزره بوغازه کیش اولدیغنی روسیه ایلیجیسی طمارا طرفندن اخبار اولنغله هان تبدل صدارت کونی عصمت بك و رئیس افندی بیک بانجه سنده طمارا ایله ملاقات ایدرک مذکور روسیه دونماسنک صورت حرکتی مذاکره اولنمشدر .

ربیع الاولک یکریمی دردنده دخی سالف الذکر روسیه دونماسی قره دکز بوغازندن

( دخول )



دخول ايله بيوك دره ده لنگر انداز اولمشیدی بودونما دولت علیه دونمسیله متفقانه  
 حرکت ایتک اوزره آقدکزه چیقہ جغندن صورت حرکتلرینه دائر بالدفعات  
 رئیس افندی ايله روسیه ایلیچسی و امیرالی و انگلیز مصلحتگذاری میانه لرنده  
 مکالمات و مخبرات جریان ایدوب انگلیزلرک مطمح نظری مصرک و روسیه لولرک  
 غرض اصلیلری جزائر یونانیه نیک استخلاصی اولدیغندن انگلیز مصلحتگذاری  
 فرانسه دونمسی هر تقدیر مضمحل ایدلمش ایسه ده نلسونک یاننده اینجه دونما  
 اولدیغندن اسکندریه لیمانه کیرمه مدیکی جهته لیمانده کی فرانسه سفینه لری احراق  
 اولنه مدی و ابو خوردن بر قاچ فرانسز کیمیلری فرار ايله فرانسه یه کیتدی حال  
 بوکه اسکندریه سواحلی ابوقه ایدن انگلیز سفائی دخی تعمیر وسیله سیله  
 یا خود فورتنه ملبسه سیله بر طرفه کیتمک احتمالی وار در بو آره ده فرانسزلر  
 اسکندریه یه امداد و اعانه ایتملری ملحوظدر اولوقت ایش کوچلشور دیو دولت  
 علیه و روسیه دونمسی همان بر مقدار عساکر بریه ايله اسکندریه یه واروب لیمانده کی  
 فرانسز کیمیلرینک احراقی و قره یه عساکر چیقاریله رق اسکندریه نیک استخلاصی  
 الزم واقدم اولدیغنی بیان و روسیه لولر دخی فرانسزلرک اسکندریه لیمانده قیلان  
 سفائن حریره سی بر از کچوک کیمیلردن عبارتدر و حسب الموسم مصر آچیقارنده  
 اینجه دونما کز دیرمک مشکلدن حال بوکه فرانسزلر آرنودلق و مورده طرفلرینه  
 تعرض ایده بیلور لر بوراده کی دونمالر همان جزائر یونانیه نیک فرانسه لویندن  
 نزع و استخلاصی ایچون (کورفز) قور فو طرفه کیتملری و شاید نلسون طرفندن  
 اعانه یه احتیاج کوستریلور ایسه اولخالده بو دونمالردن بر مقداری افراز ايله اول  
 طرفه کوندرملری مناسب اوله جغنی در میان ایتیلرله نتیجه مباحتاده دونمای  
 هایون ايله روسیه دونماسندن برر ایکشمر فرقتین و قوروت افراز اولنه رق دولت  
 علیه طرفندن ترتیب اولنان اون قطعه شالوپه لر ايله برابر ردوسه و آندن ردوسلی  
 مرابط زاده حسن قبودان معیتله اسکندریه یه واروب قره یه عساکر دوکه رک  
 اسکندریه نیک ضبطنه همت اولتق و باقی کیمیلر قور فو طرفه کوندرملک اوزره قرار  
 ویرلمش اولدیغندن ربیع الآخرک سکننجی کونی روسیه دونمسی بیوک دره دن  
 حرکت ايله آقدکزه عزیمت ایدوب فرداسی دخی بشکطاش اوکنده لنگر انداز  
 اولان صغیر و کبیر اوتوز قطعه سفن هایون اکا قفادار اولوب آقدکزه بوغازنده لنگر  
 انداز اولان دونمای هایونه التحاق ایدرک قبودانه هایون قبودانی قدری بک  
 باشبوغلیله جمله سی قور فو طرفه عزیمت ایتمشدر .  
 خواجکان دیوان هایوندن محمود رائف افندی که مقدا مکتوبیء صدر عالی خلفاسندن

ایکن مورہ لی یوسف آگاہ افندی اقامت ایلیچلیکیه لوندره یه کوندرلدکده اودخی سرکاتی نصب ایله برلکده کوندرلمش او لمسیله اول طرفده لسان افرنجی او کره نوب علم جغرافیایه دخی کرکی کبی آشنا اولمش وعودتنده فی الاصل مستندی اولان ابراهیم نسیم افندی کتخدای صدر علی بولنق حسیله خواجکان دیوان هایون سلکنه ادخال ایدلمش ایدی بوکره دونمای هایونده احوال پولتیقه اوروپایه آشنا برذاتک بولمنسی لازم کلد بکندن مستشارلقه دونمای هایون باشبوخی معیتنه مأمور وارسال قانمشدر . تپهدلنی علی پاشا دخی ارناودلق سواخانک محافظه سنه واول سواحدله واقع اولوب وندکلودن فرانسه لوی دینه کچمش اولان محللرک بر آفتح و تسخیرینه مأمور اولمشیدی . روسیه دونماسی بر قاچ کچوک کیملردن بشقه اوله رق بش قطعه بیوک قپاق قالدیرر قالیون ایله اتی قطعه فرقتیندن عبارت ایدی .

دولت علیه نک کرک بودفده استانبولدن حرکت ایدن و کرک آفدکز بوغازنده بولنان دونمالرنده شالوپه وقرلغنج کبی کچوک سفینه لردن وانکلتره دونماسی رفاقتنه کوندریلان ایکی قوروتدن بشقه اوله رق اتی قطعه قالیون وطقوز قطعه فرقتین ودرت قطعه قوروت وار ایدی .

بو ائناده انکلتره دولتی طرفدن دولت علیه یه اوتوز قطعه طوپ و بیگ عدد قره بنا و بشیوز واریل باروت و برچوق مهندس و کوپری آلات و ادواتی و عربه بارگیری قوشوملری و معدن اصاغه سنه دائر خیلی اجزای متنوعه اهدا و ارسال قانمشدر . جمادی الاولانک اون بشنجی پنچشنبه کونی صدر جدید ضیا یوسف پاشانک در سعادت و رودی متحقق اولغله یوم مزبورده اسکدارده واقع محمد پاشا قصرنده ترتیب ضیافت اولنوب شیخ الاسلام عشارفندی وقائم مقام درویش پاشا و صدرین و نقیب الاشراف و سائر ارکان دولت علیه و رجال سلطنت سنیه و اوجاقلر ضابطانی و دیگر حضوری لازم کلان ذوات بالاجتماع رسم استقبالی اجرا ایتدکلرند نصکره صدر جدید ایله شیخ الاسلام سرای هایونه کیدوب و خرقة شریفه او طه سننده حضور هایونه کیروب بعده رسم معتاد اوزره باب عالی یه کیشلردر .

تبدل صدارته دائر ضیا پاشایه خطاباً صادر اولان خط هایونک صورتی ذیلده (۱) و عاشر افندی یه خطاباً اصدار و ارسال بیوریلان خط هایونک صورتی (۲) رقلریله اتیان قننور .

یوسف پاشانک صدارتنه سروری افندی تاریخ تام اولمق اوزره (بادشه معدنده بولدی مهرینه لایق کهر) مصراعنی و بطل حسین پاشا زاده طیار پاشا دخی مهماندن اوله رق (نقطه صیغمز حاصلی طیار بوتاریخه هیج . نورددر یوسف ضیا پاشا که ویردی صدره فر) تاریخی سویلمشدر .

تصادفات نادره دندركه قوجه يوسف پاشا كورجى الاصل اوله رق ايكي دفعه صدر اعظم و سردار اكرم اولديغى كى اشبو ضيا يوسف پاشا دخى كذلك كرجى الاصل اولوب ايكي دفعه صدر اعظم و سردار اكرم اولمشدر .

وبواننده مصر اوزرينه حركت ايده جك اردونك اكمال لوازمانه اقدام اولمقده اولديغندن مصر استخلاص اولنقدقه مصر دفتردارى اولمق اوزره عبد الكريم افدى دامادى محمد افدى مصر اردوسى دفتردارى نصب اولنه رق مصر سر عسكرى معيته كوندرلمشدر .

مصر ك استيلاسى سلطان سليمه بك زياده تاثير ايتديكندن مؤرخ واصف افدى باب على يه جبله بر تسليتامه قامه آلسمى كندوسنه امر اولمش ايدوكندن در حال مستحضرى اولان وقايع تاريخيه دن خلاصه اوله رق بر جزء قدر بر رساله ترتيب و تقديم ايلمشدر . بو رساله ده ملت اسلاميه نك دوچار اولوبده صاوشدرمش اولديغى وقايع جسيمه عبرتماي وادى تسليتمه تعداد و بيان ايتدكن صكره خاتمه سنده دخى كوله منلر اقليم مصر ك بونجه حاصلات و منافع جسيمه سنى نفسلرينه حصر ايله اتلاف ايتدكندن بشقه حين فتحده حرمين شريفين اهاليسنه تخصيص اولنان غلال ايله دولته ارسالى معتاد اولان اموالى دخى انواع مكر و آل ايله چوريله كلوب مملكتمك بوه قوله جبار به النده بولنمى حسييله مواقع لازمه نك استحكامدن خالى قالمش اولمى دخى بو وجهله بغته استيلاسنه سبب اولديغندن دولت عليه همت تامه و عزيمت صادقه ايله مصر ك ضبط و تسخيرينه موفق اولوز ايسه مجدداً بر مملكت عظيمه الفوائد مالك اوله رق امرا و عبيدك عرفى قطع ايله سدثغور و احكام حصون ايتدكن صكره اقليم مصرى اوچ ايالت فرض ايدرك بر مدبروزر ايله ايكي ميرميرانه توجه و نفس مصرده اولان مناصب كه يكر مى درت بكه منحصر ايدى . در دولته پرورده اولمش رجال و اوجاقلويه اوچ سنه ده بر على طريق المناوبه تفويض و الان بصره ده جارى اولديغى كى مختصر جه بردونما دخى اسكندريه ده احداث اولنديغى حاله كافه منافع مصر به غير از مرتباب داخل خزينه دولت اولوب اعدانك مصره استيلاسى بو صورت حسنه نك مرآت حصوله جلو كر اولمسنه سبب عادى اولمش اولور ديو ختم كلام ايلمشدر .

دولت عليه ايله روسيه و انكلتره دولترى بيننده در دست اولان معاهده اتفاق مكالمه سى بواننده ختام بولمسييله مكالمه به مأمور اولان عصمت بك افدى به مكافاه روم ايلي صدارتى پايه سى احسان بيورلمشدر . لکن هنوز عهدنامه لر طرفيندن امضا اولمدين دولت عليه ايله روسيه دونمارينك آقد كزده مظفر يت متفقانه لرى خبرى آلمشدر .

شویله که : بالاده بیان اولندیغی اوزره ایکی دونما برلکده آقدکرده بادبانکشای عزیمت اولوب انجق اولجه جزائر یونانیه اهاالیسنک جب و تألیفی موجب مزایا درجیله مطبوع بیاننامه لر نشر اولنشدی . دونمالر ابتدا چوقه آطه سنی ضبط و اوراده موجود اولان برفرانسز تکنه سنی اخذ ایتملی اوزرینه زانطه و کفالونیا آطه لری اهاالیسی ایچلرنده مستحفظ بولنان فرانسز عسکرینی قید و بندایله موره و الیسنه ارسال ایتملیله بویکی آطه دخی بلا محاربه اله کچمشدر .

تبه دلتلی علی پاشا دخی دلونیه یه قریب محله فرانسزلرله براز جنک ایتد کدنصرکه جمادی الاولی اواسطده اوغلی مختار پاشایی التی بیک سواری ایله سوق ایدوب کندوسی دخی ایکی بیک پیاده ایله آرقه سندن حرکت ایدرک پروزه اطرافنده اجتماع ایدن فرانسزلر اوزرینه هجوم ایتدکده غالب ومظفر اوله رق فرانسزلرک اکثری کشته شمشیر وبقیه سی برجنرال ایله برابر اسیر اولمغین علی پاشا مقتوللرک رؤس مقطوعه لرینی اشبو بقیه السیوف اولان اسرا اللرینه و یروب در سعاده تقدیم ایتمکله مکافاة عهده سنه رتبه والای وزارت ویرلمشدر .

ایشته بوصورتله پروزه و پارغه وویجه و پوتریتونام درت قلعه دولت علیه یدینه کچمشدر . و بو ائنده دولتین متفقین دونمالری دخی قورقه آطه سنی تسخیر ایدوب قلعه سی دروننده برچوق اسلحه و مهماندن بشقه اوچ یوز یکریمی قطعه طونج و یوز سگسان درت قطعه تیمور طوپ و یکریمی برقطعه طونج آبوس و طقسان ایکی قطعه طونج و اون اوچ قطعه تیمور هاون بولمشدر .

بو آوانده مصرده کی فرانسز اردوسندن الی قدر فرانسز پوناپارته نک اذنیله فرانسه یه عودت ایتمک اوزره رعای دولت علیه سفینه لرندن برینه را کبا قورقه جزیره سنه یاخود وندیك کورفزنده واقع اتقونه لیمانته عزیمت ایدوب اثنای راهده هوا مخالف اولمغله کمی قبودانی فرانسز لری سفوس جزیره سنه اخراج و القا ایله کیفیتی خفیه اهلای جزیره یه اخبار ایتدکلرنده اهلای لمصاحه اوراده بولنان حسن چاوش ایله بالاتفاق فرانسز لری اخذ واسیر ایدرک اوائل جمادی الآخره ده در سعاده کتور دکارنده حسن چاوش ایله ایکی نفر آدمنه چلنک و کورک و عطیه لر و سفوس قوجه باشیسیله کمی قبودانه سمور کورک ایله عطیه و یکریمی بر نفر کمی طائفه سنه بر قپوت ایله کذلک عطایا احسان بیورلمش و بوصورتله طائفه نصاردان اولان تبعه دولت علیه نک مرکز صدق واستقامتده پایدار اوللرینه نمونه مکافاة کوسترلمشدر .

دولت علیه ایله روسیه وانکلتره دولتری بیتلرنده بوجه بالا در دست تنظیم اولان عهدنامه اتفاق بو ائنده ختام بولوب رجبک یکریمی التیسنده روسیه و یکریمی سکنزنده

انکلتره عهدنامه لری امضا اولمشدر . صورتلری زیرده (۳) و (۴) رقم لریه قید اولنور . دولت علیه فرانسه سفری ایچون هر طرفدن عسکر ترتینه اقدام ایتمکده اولدینی حالده سالنیکده برطاقم زوربالرظهور و سفره کیتمکدن امتناع ایله و دینده کی پاسبان اوغلی طاقنه تقلیداً ایچلرندن برینی ناظر و دیکرینی اعیان ایتمک کبی اطوار باغیانیه اجتسار ایتلریله سالنیک والیسی ابوبکر پاشا خارجدن اوچ بیک قدر سکبان جلب ایدرک قوسی خلیقه برابر اشقیا اوزرینه هجوم ایله طقوز کون طقوز کیجه مقاتله ایدوب اشقیادن اکیکوز قدری اتلاف و اوک ایاق اولنردن بعضیلری اخذ ایله فتنه باصدیرلمشدر .

اشبو سالنیک وقعه سی ذاتاً کچوک برشی اولوب انجق او یله چار چاپق باصدیرلماش اولسیدی بویله قاریشق بروقده اودخی پاسبان اوغلی ایشی کبی برعظیم مسئله اولوردی بناءً علی ذلک شراره ایکن سوندیرلمسی موجب ممنونیت اولمشدر . مقدا فرانسه لو اوزرینه اعلان سفر اولدینی اثساده فاس حاکنه نامه هایون کوندردیکی کبی بوکره دخی طرف مشارالیه نامه هایون ارسال ایله کیفیت بیان اولنورق انکلتره لو یدنده اولان جبلتیه ذخیره نقله ممانعت اولنماق وانکلتره لونک اولطر فلرده تجاری ترویج اولنق ایله برابر فرانسه لو طرفه ذخیره اخراجی یساع ایدلک خصوصلری اخطار اولدینی کبی بو مآلده جزائر غرب او جاقلرینه دخی اوامر علیه تسیر اولمشدر .

بودن بشقه روسیه ایلچیسینه تنظیم اولنان دیکر برقطعه معاهده خیفه ایجابجه لدی الاقتضا طرف دولت علیه دن طلب اولدینی کبی ممالک محروسه یه داخل اوله رق طرفینک انضمام رایلری ایله حرکت ایتمک اوزره روسیه دولتی سکسان بیک نفر دن مرکب براردو تهیسه ایدرک طورله نهرینسک جانب یمینه مرور ایتدیک کوندن اعتباراً تعییناتنک طرف دولت علیه دن اعطاسی تعهد اولمشدر .

غرائب احوال پولتیقه دندر که مقدا دولت علیه روسیه و اوستریا دولتلرندن امین اوله میوب بونلره قارشو لدی الحاجه فرانسزلردن امداد و اعانه امید ایدر ایکن آزوقت ظرفنده اوروپا پولتیقه سی متغیر اوله رق دولت علیه بر طرفدن انکلتره دولتنک اعانه سیله مصری فرانسزلرک ایادی استیلا سندن تخلیصه صرف مساعی ایلدیک حالده بر طرفدن دخی روم ایلی قطع مسکن امر محافظه سی ایچون ک زیاده قوجوندینی روسیه دولتن استعانه یه محتاج اولمشدر .

کچوک اسپانیا یعنی سیچلیاتین دولتی دخی دولت علیه ایله اتفاقه راغب اولدیغندن بو اثناده عصمت بک و رئیس افندی سیچلیاتین ایلچیسی قسطنطین لو دولف ایله مکلمه مواد اتفاقه مامور اولدیلر .

بواشاده جهله دن نواب استخدام اولنمیوب قضاشره اهل واربابی اتخاب قلمق و بلا امتحان ملازمت ویرلامک و اموال ایتم و صی به تسلیم اولنمیوب بزازستانه وضع اولنق و بردفعه شرعاه فصل و حسم اولنان دعاوی تکرار استماع قلماق و امامت و خطابت جهتلی ناهله توجیه اولنماق کچی بعض نظامات خیریه وضع ایدلدی . بهر سنه طرف دولت علیه دن تجدیدی معاد اولان کعبه مکر مه پوشیده سی قاهره مصرده نسج و اعمال و حجاج مصر ایله ارسال اولنه ککش ایسه ده مصرک فرانسه لو یدنده بولنسی حسیله بوسنه در سعادتده نسج و اعمالی لازم کلمکین سلطان احمد جامع شریفک شادروان حویلینده اعمالته مباشرت اولنمشیدی بواشاده ختام بولغین رجبک اون برنجی کونی آلا ی ایله سرای هایونه نقل اولنوب فرداسی نجشینه کونی صره هایون ایله برابر اسکدره امرار قلندی .

مقدما مصر سرعسکر لکنک جزار پاشایه توجیهی تذکر اولنمشیکن آندن صرف نظرله شام والیسی ابراهیم پاشا عهده سنه توجیه ایله جزار پاشایه دخی سواحل سرعسکر لکی احاله قلمشیدی انحق جزار پاشا طرفدن ابراهیم پاشانک مساویسی تصریح ایله سرعسکر لکنک آندن صرف و تحویلی تلمیح سیاقده تحریرات توار دایتمکله و جزارک اول حوالیده درکار اولان نفوذ و اقتدارینه نظرأ بحسب الحال مصر سرعسکر لکی اکا منحصر کچی کورلمکله رجبک اون یدنجی کونی ابراهیم پاشانک عزلیله امارت حاج و شام و ملحقایه طرابلس ایالتلی و قدس و نابلس سنجاقلی و مصر سرعسکر لکی جزار پاشا عهده سنه توجیه و بالذات کندو یا خود قوی الاقدار بر باشبوغ ایله مصرک استخلاصنه سعی ایتمی با امر عالی توصیه و تنبیه بیوردلی و نفس نفیس هایونه مخصوص کورکلردن بر ثوب فروه سمور و مجوهر قبضه لی بر عدد پاله ویرلانته ایله مزین بر چفت پشتو کوندرلدی .

و برده ترحاله سنجاغی متصرفی کوسه مصطفی پاشا ترتیب اولنان بر فرقه به باشبوغ نصب اولنهرق در علیه دن بحرأ کوندریله جک طوپ و جبخانه و لوازمات ساره طرفه واصل اولدینی کچی مأمور معیتی اولان عساکرایله سفینه لره سوار اولهرق طوغری مگری لیمانه و آندن اسکدریه یقه سنه گذار ایدوب جزار پاشا ایله بالخباره مصره و ارمق اوزره مأمور ایدلدی .

مدت و افره دن برو بیوک تذکره جیلکده مستخدم اولان عارف افندی که اولو عارف افندی دیومعروف اولوب یکخان سلطانک کتبخانق خدمتده دخی مستخدم ایدی غره شعبانده بیوک تذکره جیلکدن عزل ایله یرینه کچوک تذکره جی عونى افندی تعیین اولندی .

فائق افندی مجموعه سنده و سفینه الرؤسا ذیلنده دیرکه اولو عارف افندی بیوک  
تذکره جی ایکن شاعر پرتو افندی صدر اعظم یوسف ضیا پاشا که برکوزی  
کوردر آنک و صفنده مطای

\* بیت \*

دل غمیده نك برداخی خندان اولدیغن كوردك \* اونا شادك هله بر کره شادان اولدیغن كوردك  
یتتی اولق اوزره كوردك قافیه سنده بر قصیده انشا ایلیوب مشار الیهه عرض ایچون  
عارف افندی به ویرمش اول دخی شاعر ماهر و مدقق ایکن بصیرتی باغلا نوب من غیر  
تفکر قصیده بی ضیا پاشایه و یروب سز شاعر اولدیغکن دن کوزل قرائت ایدرسکنز  
او قویك دکلیه لم دیمکله عارف افندی مواجهه مشار الیهده قرائت ایلیوب تکمیل ایدنجه  
قطعاً خاطرینه نکتته تعریض کلامکله ضیا پاشا قصیده تکمیلنده کمال افعالندن بو پرتو  
افندی ماشاء الله کوزل شاعر ایتمش زیرا بز دن احسان امیدیه یابدیغی قصیده به قافیه  
بوله میوب کورلکمزی یوزمزه اورده جق لفظ قییحی اختیار ایلمش حیثیتی معلوم  
اولدی لکن سز شاعر ایکن فرق و تمیز ایتمیوب حضورمزه عرض ایلمکنز  
و باخصوص قرائت ایتمکنز قصده مقرون اولدیغنده شبهه قالمدی دیوب تعبس  
ایتمکله پرتو افندی به جائزه احسان ایتمدیکندن ماعدا عارف افندی بی تذکره جیلکندن  
عزل ایلدی . بو اولو عارف افندی خوش لهجه ذکی و فطین شاعر ماهر ایدی  
اصلندن دارالسعاده اغاسی یازمیچاغندن نشئت ایتمش اولمغله بر کون دارالسعاده اغاسی  
بولنان ادریس اغایه سوز آره سنده عرفه کونی یلان سویلیان بیرام کونی یوزی  
قاره اولور دیمش اولمغین اغا بوسوزینه انفعال ایله عزل ایلدی لکن کندوسی  
بو قضیه بی صورت آخردن نقل ایله دیر ایدی که اغانک حضورنده بو مثل مشهوری  
تقوه ایدر ایکن سهو لسان ایلدیکم خاطریمه کلوب عرفه کونی یلان سویلیان بیرام  
کونی ینه سویلر دیدم بویله سویلمشیکن عفو ایتمی ممکن اولیوب قهرراً بی عزل  
ایلدی افندی مومی ایله بو خطاسنی بو وجهله تعمیر ایلدی لکن یوسف پاشا ماده سنه  
برشی بوله مدی او بصیرتسر لکی یوکاندی تجاوز الله عن سیئاته .

\* وقایع مصر و بر الشام \*

فرانسزلرک مصری استیلا ایلدکری خبری حرمینه واصل اولدقده اهالی پک زیاده  
مکدر و محزون اولوب مکة مکرمه مجاورلرندن شیخ کیلانی مغربی دخی خلقه  
وعظ و نصیحت و امر جهاده متعلق بر کتاب تألیفیه اهل اسلامی جنکه تشویق  
خصوصنه تشمیر ساق غیرت ایتمکله التیوز نفر شجعان مسلمین سفره حاضرله رق

مغربی مرقوم دخی آنلره باشبوغ اولوب خلال رجبه مصر غزاسی نیتیه جده دن حرکت ایتدکلر نده ینبوع اهلایسندن ومغار به رجالدن برچوق خلق آنلره التحاق ایله صعید طرفنه کذار وفرانسزلر ایله محاربه یه ایتدار ایتشلر ایسه ده اویله باشی بوزق عسکرله عساکر نظامیه نك آتشنه قارشو طور مق قابل اولمیدندن جمله سی منهزم وپریشان اولمشلر در لکن فرانسزلر دخی کرک مقدهما مراد بک ایله واقع اولان محاربه لرده وکرک بویله اوفق وتفک مقاتله لرده خیل عسکر ضایع ایتشلر ایدی . واکر چه مراد بکک مصرده قالان قالیونجیلر ندن ونزاری طائفه سنندن بر مقرداری اوائل شعبانده فرانسه خدمت عسکر یه سنه آنلره ق جبر نقصانه چالیشلمش ایسه ده فرانسه دن امداد لری کله مدیکندن کوندن کونه مصرده فرانسه عسکر ی آزالمقده ایدی . وبواننده طاعون علتندن خیلی فرانسزلر تلف اوله رق بوجهتله دخی پوناپارته نك قوتی تدنی بولمقده اولوب حتی بر آراق صالحیه ده کی فرانسه عساکری اعاده اولمش ایدی حالوکه بونلر اعاده اولندینی کبی ابراهیم بکک در حال اون بیک عسکرله اولطرفه توجه ایتدیکی خبر آلمش ایدی .

دولت علیه ایسه فرانسزلرک حقندن کلک اوزره برأ و بحر آ تدارکات کثیره یه تشبث ایدوب پیدرپی جزار پاشا اردوسنه تقویت ویرمکده ایدی جزار پاشا دخی ذاتاً اولحوالیده صاحب نفوذ و قدرت بر ذات اولدینی حالدیه بوکره بروجه مشروح مصر سر عسکر لکی عنوانیه برابر بتون شام و بر الشام قطعه لری کندوسنه تودیع اولمش ایدو کندن فرانسزلردن اخذ نارایتک اوزره حاضر لمقده ایدی .

واکر چه پوناپارته اقالیم مصریه یی قبضه انضباطه آله رق جزار پاشا ایله امرای مصریه نك سوزلری هپ یلاندر فرانسه لو دولت عثمانیه ایله متفقدر دیواهل اسلامی اغفال ایده کلش ایسه ده آنک بسوزلری هپ یلان اولدینی جمله نك معلومی اولوب اهالی مصریه کندولرینی اسارتدن تخلیص ایتک اوزره شام طرفندن دولت اردوسنک ورودینه دیده دوز انتظار ایدیلر .

قالدیکه فرانسزلر اولوجهله مصری قبضه تحکم وتغلبلرینه آلمش اولدق لری حالدیه دکزلری انکلیزلر آبلوقه ایتش اولدق لردن کندولری دخی مصرده محصور حکمنده اولوب پوناپارته اوروپا بولتیقه سنندن واستانبولک احوالندن خبر آله میوردی .

بناء علیه پوناپارته بوشام نام بر فرانسه تعلیمات مخصوصه اعطاسیله بالاده بیان اولندینی اوزره اسکندریه ده بولنان ریاله هاپونه ارکاب وسوارسی اولان ادریس قپودان ایله برابر در سعادت کیتمک اوزره اسکندریه لیماندن اخراج ایلمشدر .

مذکور تعلیماتک خلاصه مؤداسی بودر که ریاله هاپونه را کباً قبریسه واروب اوراده



محبوس اولان فرانسه قونسولسیله سائر فرانسلرک دمیاطه ارسال اولمارینی ادریس قبودان ایله برابر قبریس محافظنه تکلیف ایلیه سین وهان اوراده ایکن شام طرفک احوالی وانکلیر و روسیه دونمالریله دولت عالیه دونماسنک حرکاتی وقور فهنک حانی واستانبولک و پاسبان اوغلنک حوادثی و برای قدر ابوخور سواحلنده امرار وقت ایدن حسن بکک زیر قومانده سنده کی انجه دونماتک اطوار و حالاتی و اورویایه دائر شایع اولان حوادثی تحقیق ایلیه سین و انشای راهده کچوک قایقلر ایله بکا تحقیقاتکی بیلدیره سکز استانبوله مواصاتکده ایلچیمز ایله ملاقات ایدوب برلکده دولت عالییه اقلعه سعی ایله شامده توقیف اولنان فرانسلرک تخلیه سیبانی مصرانه تکلیف ایلیه سکز و مصرک ضبطندن مراد من الحق کوله منلر ایله انکلیرک تادینندن عبارت اولدیغی سویلیه سین و برده نمچه و روسیه ایمراطورلرینک ممالک دوات عالییه مقاسمه خصوصنده اولان نیتلرینه ممانعت نیتنده اولدیغیمز تفهیم ایده سین و اگر ایلچیمز محبوس ایسه انکلیرلو ایله سویلشمکه چالیشه سین بعده مصره عودت ایدوب الحاله هذده دولت عثمانیه ده جاری اولان احوال ملکیه و حربیه ده دائر بزه معلومات کتوره سین فرانسلر مصری ترک ایده جکلرمی دینلور ایسه ایکی ایمراطور پاسبان اوغلنک عصیانده ختام و یروب روم ایلیده کی ممالک عثمانیه نی مقاسمه سوداسندن و از کچرلر ایسه فرانسلر دخی مصری ترک ایدرلر دیه سین دولت عالییه بواکی ایمراطورک سوء قصدندن تخلیص ایچون لازم کلان حرکته قصور اولمیه جقدر . فقط محبوس اولان فرانسلرک تخلیه سبیلی بوماده نک تسویه سنه اساس اتخاژ اولنه جقدر و تخایه اولندقلری تقدیرده شامه هجوم ایتیه جکمه متکفل اولمیه جگیزی و سز دخی توقیف اولنور ایسه کز غضب و غارت ایتدار ایده جکمی اعلان ایده سین و یانه طریقیه پارسه بر پوسته چیقاروب خصوصات لازمه نی جمهوره اشعار ایده سین اگر دولت عالییه شمعی یه قدر اعلان حرب ایتدیه کانه مصر ایله سائر ممالک دولت عالییه بیننده تجارتک سرستی جریانی استدعا ایچون کیتمش اوله جقسین و اگر اعلان حرب اولنوبده ایلچیمز حبس اولمش ایسه حسن و فالفک اعاده سنه فرانسه جمهورینک خواهشکر اولدیغنه دلیل اولمق اوزره ریاله هایونک اعاده اولندیغنه دلیل اولمق اوزره ریاله هایونک اعاده اولدیغنی افاده ایله حقمزده انکلتره و روسیه دولتلرینک القا آتی تکذیب ایده جکسین دیو پوناپارته طرفدن بوشامه امر اولمشدر .

حالبوکه ریاله هایون ایله بوشام دکزه آچلدیغی کی بلوقه یه مأمور اولان تروریج نام انکلیر قبودانی بوشامی توقیف ایله تحت الحفظ در سعاده کوندر مشدر . تروریج

طرفدن اوائل رمضانده در سعادته مقيم انكليز ايلچيسنه كوندريلان تحريراتده  
( سفن هايوندن ريباله سفينه سي اسكندريه ليانندن كيجه لين چيقيم نيتنده اولديني  
مسموعم اولدقده كيجه وقتي كمي كچورتتم ديو خبر كوندرديكمدن اول تدبيردن  
فراغت لازم كلدي وريپاهه هايون ايله رادوسه قدر كيتمك اوزره بركي تعيين  
اولنوب ادريس قودانه لازم كلان ذخيره نك اعطاسنده دخی قصور اولنمدي سفينه  
هايون دروننده بولنان بوشام نام فرانسز توقيف اولنوب مرقوم جاسوس كبي  
برشخص اولديغندن صلماً جزاسي ترتيب اولنمق لازم كلور ایدی . آنجق حقتده  
دولت عليه نه درلو معامله رأی ايدر ايسه اجرا ايتمك اوزره بودفعه استانبوله  
كوندرلدي ) ديو محرر بولنمشدر .

ايشته پوناپارته نك بوتصوراتي اولوجهله برشيئي مفيد اوليوب كندوسنجه برمدت  
دها مصرده طوره بيلمك ايجون جزار پاشايي دخی برآراق ازمكدن غيري  
چاره قالماش ایدی .

چونكه بروجه مشروح مراد بكي وبعده شيخ كيلاني ايله كلان حجاز عسكيري  
پريشان ايدوب اگرچه حجاز عسكيري بعد الانهزام جر جا ناحيه سنه چكيله رك برقاچ  
دفعه دهافرانسزلر ايله محاربه ايتمشلر ايسه ده آز قالدقلى جهته برشي يابه ميه جقلى  
آكلاشديغندن بوناپارته نك اول جهتن احترازي قاليوب فقط جزار پاشا طرفدن  
وسوسه سي غالب اولغله اول طرفده دولت اردوسي قوتلشوبده مصره هجوم  
ايتزدن مقدم كندوسي جزار پاشا اردوسني بوزوبده شام جهته دهشت انداز  
استيلا اولمق صورتنه قرار ويره رك زيرده بيان اولنه جنى وجهله همان عسكيري  
طوپلايوب بر الشام طرفه هجوم ايلمشدر .

شويله كه : بوناپارته اقطار شاميه يه عزيمت ايتمك اوزره تداركات سفريه يه ابتدار ايله  
بليس وصاله بلده لرنده مهمات و ذخيره جلب و جمعنه و طاقم عسكر سووقنه  
باشلايوب حر كته حاضر اولمق اوزره عسكريته امر و ير مش و كيفيت جزار پاشانك  
مسموعى اوليجق در حال اودخى بر طرفدن عكا قلعه سي استحكاماتي اكمل ايله برابر  
بر طرفدن دخی حيفا و يافا طرفلرينه طوب و عسكر ارساله استحكام ويره رك  
مقدمه الجيشي عريش قلعه سنه قدر كلوب مدافعه يه مهيا اولمش ایدی .

اواخر شعبانده بوناپارته نك اردوسي بليس وصاله طرفده اجتماع ايله حر كته  
مهيا اولدقلى كبي ديماط محافظي جنرال قله بر دخی اول طرفده كي فرانسز  
عساكيري استصحاب ايدر ك قطيه طريقيه برآ حر كت ايتمك واسكندريه لياننده كي  
فرانسه سفاتي قى صره كيتمك اوزره ترتيب ايديلوب ومصر قلعه سنه مقدار كفايه

عسکر بر اغلوب الحاصل پوناپارته تمام حرکته مهیا اولدقن صکره اوائل رمضانده دیوان اعضاسی اولان علمایی وقاضی بلده پشمقچی زاده افندی ایله مقدمجه امیرالحج نصب اولسان مصطفی کتخدایی ویکچیری اغاسنی وضبطه واحتساب مامورلرینی وسائر لازم کمنلری جلب ایله عقد مجلس ایدرک جمله به خطاباً بنم قلیجمدن فرار ایدن کوله منلر جزار پاشایه التجا ایدوب او دخی آنلره عسکر ویرمکله بو طرفه کلوبده قتل عباد و تخریب بلاد ایتمک اوزره عریشده طوپلانمشلر بو ایسه بنم غیرتمه طوقونمغله جناب حقه استخاره ایتدکن صکره عزم ایتدمکه اول طرفه کیدهیم وعون باری ایله آنلری عبره للسائرین ومملکتی شر وفسادلرندن محفوظ وامین ایدیم ای حضار سزه ده لازم اولان بودرکه مملکتک آسایش وامنیتنه اهتام ایدم سز برایی آیه قدر کیدوب کلورم شایدکه غیابمده عسکره قارشو ادنی بر حرکت وقوعه کاور ایسه طوپ وخمیره ایله شهیری تخریب ایتمک اوزره مامورلره امر ویرمشمدر دیمسی اوزرینه حضار مجلس طرفدن کندوسنه تعهد وکفالت یولنده تأمینات لازمه ویرلمشدر .

پوناپارته بو وجهه اهالی مصریهی اخافه ایله برابر هر کیمک دعاوی شرعیه سی وار ایسه علما وقاضی بلده به کیتسون دیو دلالر ندا ایتدرمک کبی اهل اسلامک ممنونیتی موجب اوله جق بعض اجرا آته دخی تشب ایتمشیدی .

قاضی افندی ومصطفی کتخدا ایله سفره مأمور اولان بعض علما و صوف عسکریه طاقم طاقم مصردن چیقهرق خیمه کاهه کیدوب بعده پوناپارته دخی رمضانک بشنجی کونی آلائی ایله مصردن چیقهرق صالحیه طرفنه عزیمت ایتمشیدی انجق صالحیه به واردقیرنده علما بز چوللرده وطاغلرده کشت وکذاره مقتدر دکاز دیو اعتذار ایتملری اوزرینه پوناپارته دخی کندولرینه رخصت ویرمکله اورادن مصره عودت ایتمشلر ایدی .

صوف عسکریه دن بعضیلری لزومنه مبنی کندولرینک دوه لرینی آلوب صکره اسباب نقلیه تدارکنده دخی صعوبت کورلمکله ویوللرده امنیت مسلوب اولمغله متفرق اوله رق ایچلرندن بعضیلری کندولرینه باقلمیوب پریشان اولملرینه مصطفی کتخدا سبب اولدیغندن بحثله مصره شکایتنامه یازمش اولدیغندن فرانسزلر مصطفی کتخدا حقدنه شبهه به ذاهب اوله رق دیوان مصرده آنک اهاتی موضوع بحث اولمغه باشلامشیدی .

بو صورتله سالف الذکر علما طاقی عربین طرفنده براز مکث وتوقفدن صکره برر بر مصره کلشدر ایسه ده قاضی بلده ایله مصطفی کتخدا عودت ایتماشلردر

مصر اهالیسی ایسه آنره مائوس و مائوف اولوب هر خصوصده آنره مراجعت ایدر وهر ایشلرنده آنلری واسطه ایدینور اولدقلرندن آنلرک غیوبت و مفار قتلرندن مکدر و محزون اولمشلردر .

فرانسزلر ایسه مصطفی کتخدایه خان نظر یله باقوب اودخی بوکا مطلع اولدیی کبی آرتق مصره کلکدن خوف ایله نهایت جزیره عربانه دخیل دوشه رک بالطبع فرانسزلرک علیهنده حر کته مجبور اولمشدر کله لم فرانسز اردوسنک احوالنه .

پوناپارته نک بوکره بروجه مشروح برالشام اوزرینه سوق ایتمش اولدیی قوه حربیه سی بش آلائی معلم پیاده ودرت آلائی معلم سواری بیگ نفر باشی بوزوق سواری و بیگ التیوز طوبجی و بر طاقم استحکام نفراتی اولمق اوزره جمعا یکرمی بر بیگ در تیوز نفر اولوب دونخامی دخی التمش دردر پاره طوب چکریدی قطعه فرقتین والقی قطعه قوروت و اوچ قطعه بریق و اون پاره شالوپه ویدی پاره غولت ایله اونیدی پاره نقلیه سفائندن عبارت ایتمش قله بر فرقه سی دهیا طدن طوغری عریش اوزرینه حرکت ایتمشیدی یولی شاشیرب اوچ کون ذخیره سز قالمیر یله آت و دوه آتی بیه رک کوچ حال ایله یول بولوب عریشه وصولر نده جزار باشا طرفدن عریش قطعه سنه ذخیره کتورن بر مقدار عسکر فرانسزلی کوروب فرار ایتمیر یله قله بر بو ذخیره یی آلوب ممنون اوله رق اوچ کون بونکله عسکرینی اداره ایتمکدن صکره پوناپارته یتشوب عریش قلعه سی پیشکاهنده اردوسنی قورمشدر .

قلعه ده یدی سکز بیگ عسکر اولوب مشاهیر امرای مصریه دن بعضیلری دخی اوراده ایدی فر داسی پوناپارته قلعه نک تسلیمی ایچون خبر کوندر کده امتناع ایتمیر ی اوزرینه طوب و خبره ایله قلعه یی دوکمه ک باشلا یوب سکز کون محاربمه تمتد اولدقن صکره محصورینک ذخیره و جبخانه لرینه ندرت کلکله پوناپارته دن امان استدکارنده سلاح سز قلعه دن چیمق اوزره امان و یروب آنلر دخی بوشر طی قبول ایده مدکارندن تکرار مدافعه یه قیام ایدوب ایکی کون صکره امرای مصریه دن قاسم بک المسکوبی بر مقدار عسکر و جبخانه ایله امداده کله رک کیجه قلعه یه کیرمک اوزره قلعه دن اوزاق بر محله طور مش ایدی حالبوکه اول کیجه فرانسزلر آنلری باصوب قاسم بک و کاشفلر دن بعضیلری ایله کوله منلر دن نیجه لرینی اعدام ایدرک کتور مش اولدقلری جبخانه یی دخی اخذ ایتمیر یله کیفیت محصورینسک معلومی اولیجق جمله سی متحیر قلوب تکرار سلاح لر یله چیقوب کیتملری ایچون پوناپارته دن امان ایستملری اوزرینه آرتق اودخی بوضورته موافقت ایدرک استیمان ایله قلعه یی تسلیم ایتمشلردر .

بونک اوزرینه پوناپارته نک برالشام اهالیسنه خطاباً نشر ایلمش اولدیی اعلاننامه سنده

بزم بوطرفاره عزیمتمز انجق سزك اوزریكزذن كوله منلر ایله جزار پاشا عسكرینك دفع و طردی ایچوندرکه جزار پاشا یافه ورمله و غزه طرفلرینه هجوم ایله عریشه قدر عسکر کوندرمسی بزمه محاربه غرضنه مبنی اولدیفی اكلاشادی ایشه بزآنكله محاربه به حاضر بزم سزله ضررمنز یوقدر همان سزله رلرکزده مستریج اولكز قضا و نواب رلرنده وظیفه لر یله مشغول اولسونلر دین اسلام دائما عزیز و محترم و جوامع و مساجد عبادات و طاعات ایله مزین و مكرم طو تلسون دیو تحریر ایتمشدر عریشك استیلاسی خبری مصره واصل اولدقده اهل اسلام مكدر و محزون و قبط و نصاری سائره بالعكس ممنون اولمشلردر .

رمضانك اون طقوزنده پوناپارته عریشدن خان یونسه حرکت ایدوب فرداسی صباحین مقدمه الجیشی غزه یه واصل اولدقده امر محافظه ده بولنان مصر و الیسی عبدالله پاشا برمقدار كوله من عسکر یله قارشوكله رك جنرال مورا ایله جنكه ابتدار ایلكری صرده جنرال قله بر دیگر طرفدن غزه یه كیرمش و عبدالله پاشا دخی مقاومتیه مقتدر اوله مدیغندن معینده کی عسکر ایله كیرو چكیلوب كیتمشدر .

رمضانك یكرمی اوچنده پوناپارته غزه دن چیقوب رای و امان ایله رمله یی آلدقندن صكره یكرمی بشنده یافه یی لدی المحاصره قلعنه ك تسلیم اولنمسی ایچون ایچرویه خبر کوندر دكده بوكا موافقت اولتمقندن بشقه كیدن ایلچی اعدام اولنغله بوندن طولانی پوناپارته زیاده غضبناك اوله رق سلخ رمضانده صباحین قلعنه ك اوزرینه شدتلو آتش ایدرك ساعت طقوزه قدر طوب و خبره ایله دوکوب خیلی رخنه دار ایتدكدن صكره هجوم قوماندسی ویرمكله فرانسه عساکری بر شدتلو هجوم ایله قلعیه كیرب یقه یقه یك خونریزانه برمقاتله وقوعه كمش و نهایت اهل اسلام عاجز قله رق سلاحلرینی بر اقمشلر ایسه ده فرانسه لر قلعیه یوروش ایله كیرمش اولدقندن صباحه قدر اولكرینه كلانی اعدام وافنا و بولدقلمنی غضب و یغما ایله مشغول اولدقندن بشقه فرداسیكه عید رمضان ایدی اول کون دخی اخشامه قدر اسلحه قاطعه ایشلمش و یغما كرلك ایشی دوام ایلمشدر بوضورتله عساکر و اهالیدن کلی تلفات و وقوعه كلوب برحیات قالانلر دخی کیمی مجروح و کیمی عریان و حیران اوله رق برکوشه مذلتده مطروح ایدی .

ایکنجی کونی درت بش بیك قدر اسرا پوناپارته نك حضورینه كتورلدكده ایچلرندن مصرلی و شاملی اوله رق براز کیمسه لری سچوب مملکتلرینه کوندرمش و باقی بقدر هواره وازناود وار ایسه جمله سنی قورشونه دیزدیروب اعدام ایتدیرمشدر . ایشه بومعامله و حشیانه پوناپارته نك جریده اوصافی قاب قاره ایتمشدر زیرا غرض

اخذنارایسه یورویس ایله یاقابه کیرن فرانسز عسکر لرینک اتمدیکی معاملات وحشیانه و خونریزانه قالمشیدی یوق اکر روایت اولدینی اوزره اکر بونلری اسیر اوله ورق یاننده ایقا ایده جک اولسه محافظه لری ایچون عسکرینک بر مقرداری معطل قالمق لازم کلور و صالیور ره جک اولسه بر طرفده طویلانوبینه فرانسه لویه قارشو سلاح طوتار لر دیو غائله لرندن امین اولمق ایچون بونلری اعدام ایدیورمش ایسه بودخی ملل متمدننده ایشیدلماش برطور جنکیزانه در اوروپا لولره نسبتله ارناودلر وحشی بر قوم اولدق لری حالده سلاحسز آدمک اوزرینه سلاح چکه مزلر ایکن پوناپارته کبی دعوی حریت و مسلك تمدنه دعوت ایله میدانه چیقان بر تربیه لو و معلوماتلی ذاتک بوقدر بیک الی باغلو بیچارکانی اعدام ایدیورمسی معذرت قبول ایتمز و عفوی قابل اولماز بر حرکت وحشیانه و خونریزانه در و فرانسه اختلالنک نه مرتبه اخلاقی اخلال ایلمش اولدیغنه بودخی بر دلیلدر .

قالدیکه پوناپارته نك بو معامله و وحشیانه سی طوته لم که اول کون ایچون کندو ایشنه موافق کورلمش اولسون قاعده دوراندیشی و احتیاطه مغایر بر حرکت ایدی زیر ا یافه کندو سنجه هدف الحركات اولیوب غرض اصلیبی عکایی تسخیر ایله بتون شام و برالشام اراضیبی استیلا ایدی حالبوکه آنک بو حرکت وحشیانه سی اوزرینه بوندن صکره تضییق ایده جکی عسا کر اسلامیه آرتق جان ویرمدکجه تسلیم سلاح ایتملری امور طبیعیه دندر و بلکه متعاقباً عکاده کوردیکی مقاومت شدیدیه آنک بو حرکت غدارانه سی سبب اولمشدر دینله بیلور .

بوندن صکره پوناپارته اردوسی طاغ یولیه یافدن ایلرویه حرکت ایتدکده قاقون ناحیه سنده جزار پاشانک عسکری قارشولیوب لدی المحاربه طرفیندن خیلی تلفات وقوعیه نهایت فرانسزلر غالب کلهرک حیفایه مواصلت لرنده اولجه بوراده کی طوب و جبخانه لر عکایه جلب اولمش ایدو کندن اهالیسی پوناپارته یی استقبال ایله مملکتی تسلیم ایتمش اولدق لری جهتله فرانسزلر بوراده آله جق برشی بوله میوب فقط ساحلنده کی برانکلیز صندالندن براز کله یمشدر .

چونکه بوحوالیده عکادن بشقه فرانسزلره سدر اه اوله بیله جک بر محل اولدیغندن اوراده ثبات ایله مقابله یه قرار ویریلهرک انکلیز امیرالی اسمیتک اخطاری اوزرینه حیفاده کی طویلر عکایه نقل اولنمشیدی بوکا دائر اسمیتک درسمعادتد مقیم انکلیز ایلیجیبی اولان برادرینه یازمش اولدینی تحریر اتسنده ( عکاده موجود اولان استحکاماتک جمله سنی معاینه ایتدم هرقدر ایشه یارار بر محل دکل ایسه ده بر شهر عظیم و بوحوالیده دشمنه کرکی کبی سپر اوله جق بر محدر جزار پاشانک معتبر

آدمرله شهرک دورینه چیقوب تعمیرى ممکن اولان قصورلری کندولرینه سويلدم  
 و ممکن اولمیانلری دخى فتورلرینه باعث اولماق ایچون آغزیمه آلمدم قالدیکه حین  
 مدافعهده ظهوره کلهجک صعوبتلك طریق تسهیلنى کرکی کبی کندولرینه تفهیم  
 ایلدم طوبلری چوقدر لکن چاپلری یکدیگره مخالفدر وطوب عربهلرینک جمله سی  
 فنادر شالوپلری دیزمک ایچون اسقاندیل ایله صولری اولچدم لکن استدیکم کبی  
 برمناسب محل بولدم شهرک پویراز طرفده دخى صولری یوقلا یوب اول طرفده  
 صدالار من کرکی کبی قییه یناشمق و ایش کورمک ممکن اولدیغندن بشقه لیانلق  
 برهواده بیوک کمیلر دخى تقرب ایده بیلهجک بر محل بولدم بوندن صکره جزار  
 پاشا ایله کوریشوب انئای مصاحبته شهره اوچویز و دکز طرفه بشیوز آدم  
 مسافهده قیا اوزرنده واقع کچوک برقلعه نك محافظه سنى کندو آدملم ایله التزام  
 ایدرم دیو کندولرینه افاده ایتدم و برده حیفا قلعه سی دشمنک تسلطنه طیانه جق  
 قلعه دکل ایسه دروننده بولنان طوپلر اعدایه کچمامک ایچون بو طرفه جلب اولتق  
 صورتی رأى صواب ایدوکی پاشای مشار الیه افاده و حیفا پیشگاهنده تقدیر کچوک  
 قایق و ارایسه اوصولدن چکملری لازم کلهجکی کندوسنه انها قلمشیدی .  
 بوکون علی السحر حیفانک مزارستانی طرفده دشمنک چرخه جیلری ظهور  
 ایدوب بن دخى صندلمده اولان اون برپاره طوپله آتش اندازلغه مباشرت ایدرک  
 اول طرفدن دشمنی قاچردم جزار پاشا ایله واقع اولان مذاکره مک مقتضای  
 اوزره حیفا بی. بوش بولدیلر ) دیو مسطوردر .

بعده پوناپارته حیفان حرکتله عکا پیشگاهنه کلوب ابو عبته نام محله نصب خیام  
 ایله محکم متریس لر انشاسنه ابتدار ایلمشدر .

پوناپارته نك آز وقت طرفده بو قدر یری ضبط ایدرک عکایه قدر کلسی هر طرفه  
 دهشت و یروب آنک پنجه قهر و استیلا سندن عکانک دخى قورتیلمیه جنی اعتقادى  
 اهل اسلامک یاس و فتورینه بادی اولمش و اول حوالی اهالیسی خواه و ناخواه  
 پوناپارته یه انقیاد و مطاوعته حاضر لانوب فقط جزار پاشانک انجم حالته منتظر بولنش  
 اولدیغی حالده پوناپارته بیاننامه لر نشر ایله اول حوالیده کی مشایخ و رؤسای استیانه  
 دعوت ایتمش و جنرال قله بر ایله جنرال منوی ناصره بلده سنه کوندرمش ایدی .

الحاصل پوناپارته عکا پیشگاهنده متریس حفرینه اقدام ایله برابر شام طرفدن کلهجک  
 مضر تک دفعنه اهتمام ایتکده اولدیغی حالده جزار پاشا مدافعه یه مهیا اوله رق قوه  
 حربیه سنى تعیبه ایله مشغول اولوب انکلیر امیرالی اسمیت دخى دوننادن طوپچی  
 و مهندس اخراج ایدرک بعض مواقع مهمه نك محافظه سنه غیرت ایدیور ایدی .

پوناپارته متریسلری اکل ایتدکن صکره شوالک بشنجی کونی عکا اوزرینه غایت شدتو آتش ایتکه قیام و جزار پاشا دخی قویاً مدافعه یه نصب نفس اهتمام ایدوب لیمانده کی عثمانلو وانکلین کیمیلرندن دخی طوپ و خبره لر ایشلمکه باشلامغله آتش حرب فوق الغایه مشدد و یکر می درت ساعت بلا فاصله متمد اولمش و محصورینه خیلجه خوف و دهشت کلش ایسه ده پوناپارته دخی بورایه عریش و یافا کی قولایلقه ظفر یاب اوله میه جغنی اکلامش و بواننده کندو اردوسنه جبخانه کتورمک اوزره دمیاطدن حرکت ایدن اوچ قطعه فرانسز کیمیلری انکلیز لرک اخذ ایلدکری خبری آدیغی کی پک زیاده متأثر اوله رق همان یافته ده کی جبخانه نک جلبنه مسارعت ایلمش ایدی . در سعادتن جزار پاشایه کوندرلش اولان جبخانه یوکلو ایکی کمی بواننده یافا قیدیلرینه کلوب یافا وقعه سندن خبردار اولدق لری حالد اوراده مستحفظ بولنان فرانسز لر طرفدن عثمانلو سنجانی کشاد اولنغله آنر دخی آلدانوب لیمانه داخل اولدق لری کی فرانسز لر اوزر لینه هجوم ایله ایکسینی دخی ضبط ایدرک درونلرنده موجود اولان طوپ و خبره و جبخانه ایله برابر جزار پاشایه کوندرلش اولان او توزالتی بیک آلتون دخی فرانسز لر یدینه کچمش اولدیغندن پوناپارته بونکله تسلیمت بولمش ایدی .

برده بروجه بالا جوارده بولنان مشایخی استیانه دعوت ایتمش اولمی اوزرینه مشایخ متاوله کلوب بلاد بشاره ده کندولرینک زیر تصرفلرنده اولان یرلری و طاهر عمر اوغلی شیخ صالح کلوب بلاد صفدی پوناپارته یه تسلیم ایتدیلر و جبل لبنان اهالیسنک اکثری جزارک تسلطدن آرتق قورتملق املیله پوناپارته نک قدمندن ممنون اوله رق فرانسه اردوسنه ما کولات و مشروبات کتوروب اخذ و اعطایه باشدیلر اما مشایخ و عقال دروز فرانسز لرک عربستانه استیلالری خوف و اندیشه سیله حلب و جبل اعلی و حوران طرفلرینه رحلته عزیمت ایلدیلر پوناپارته طاهر عمر اوغله اکرام ایدرک پدرینک ممالکنه متصرف اولمق اوزره یدینه بیورلدی و یردیگی کی متاوله مشایخنه دخی بلده لرینک حکومتی و یرمکله آنلر دخی صور بلده سنه واروب فرانسه اردوسنه ذخیره ارسالیله عرض خدمت ایدر اولدیلر .

بوواننده جزار پاشا طرفدن جبل لبنان حاکی امیر بشیره بیورلدی تحریر ایله استمداد اولندقه امیر بشیر طرفدن جبل اهالیسی دائره انضباط و انقیاد دن چیقمش اولدق لرنده کندو آلتدق لری بیانیله اعتذار اولمش ایدو کندن جزار پاشا امیر بشیر حقدنه اضمار غیض و کین ایتمش ایدی . حالبوکه پوناپارته بروجه مشروح مشایخه بیاننامه لر کوندر کده امیر بشیره دخی تحریرات مخصوصه کوندر مش ایسه ده جواب آله مدیغندن تکرار عتاب آمیز برقطعه تحریرات کوندر روب بوتحریرات ایسه



صیدا متسلمنك انه كچمكله عكايه ایصال اولمغین جزار کیفیته لدی الاطلاع امیر بشیرك بوحر كتیدن ممنون اوله رق کندوسنه ستایشنامه کوندرمش ایدی بونکله برابر شامدن جزاره امداد ایچون جبل طریقله صیدا طرفه مرور ایدن عسا کر اسلامییه دخی امیر بشیر ذخیره اعطاسیله خیلی معاونت ایتمش ایدی فقط جزار صکره ینه کندوسندن استعانه ایتدکده امیر بشیر منوال مشروح اوزره تکرار اعتذار ایلدیکندن جزارک غیظ و کینی تجدد ایلمشدر .

شامدن کلان عسا کر اسلامییه نك حاله کلنجه مقدا ابراهیم بك ايله برلكده شام طرفه کیتمش اولان کوله منلر ايله عشایر عرباندن مرکب برفرقه اجتماع ایدرك بوآننده عکایه امداد ایچون مرج ابن عامر نام محله کلدکرنده بروجه بالا ناصره یه کیتمش اولان جنرال قله بر معیتده کی عسکر ايله آنلرك اوزرینه واروب عسا کر اسلامییه آنلره نسبتله خلیجه زیاده اولدیغی حالده جعلی اوله رق صورت انهزام کوسترمکله فرانسزلر دخی آلدانوب آنلری تعقیب ایدرك استیلان موقعه کلدکری کبی عسا کر اسلامییه فرانسزلی احاطه ايله اوزرلرینه هجوم ایدوب انجق اقدمجه عسا کر اسلامییه نك کثرت اوزره اولدیغی ناصره اهالیسندن بعضلری پوناپارته یه اخبار و قله برک حال خطرده اولدیغی اخطار ایتمش اولمسیله پوناپارته مقدار کافی عسکر استصحاب ايله امداده شتاب ایلمش ایدو کندن بروجه مشروح عسا کر اسلامییه هنوز قله بری احاطه ایتمش ایکن پوناپارته مرج ابن عامره واصل اولدقده بریو کسك تپه اوزرینه چیقوب کوریرکه عسکر اسلامییه برحرائك اورطه سنده قله بر فرقه سنی احاطه ايله همان محایمک اوزره در در حال عسا کرینی برقاچ فرقه یه تقسیم ايله برقاچ طرفدن عسا کر اسلامییه اوزرینه دفعه طوب آتمغه باشلادیغی کبی عسا کر اسلامییه بردن بره بوکلان امدادک مقدارینی اکلایه مدقلرندن کویا بتون فرانسز اردوسی کلوبده کندولرینی احاطه ایتمش ظننه ذهاب ايله دفعه منهزم اولمشلر ایشه پوناپارته اویله برخدعه حربیه ايله جنرال قله بری تخلیص ایتدکدن بشقه بوزغون عسکر دن دخی خوفی اولماغله آرتق شام طرفدن امین اوله رق همان عکا پیشگاهنه کلوب حصر و تضییقه دوام ایلمشدر .

فقط بو اوآننده فرانسز اردوسنده طاعون ظهور ایدرك یومیه خیلی عسکر لری تلف اولدیغندن بشقه محاربه تمتد و مشتمد اوله رق کاه فرانسزلر قلعیه و کاه عسا کر اسلامییه قلعهدن چیقوب فرانسزلرک متریسلرینه هجوم ایده کلدیکندن پیدر پی طرفیندن تلفات کلیه وقوع بولمقده ایدی .

وبالاده بیان اولندیغی اوزره مصر لولرك ابوالخشیبه دیدکری جنرال کفارلی دخی بو محاربه لرده یاره لنوب وفات ایتمکله فرانسه جمهوری اویله ماهر ومثلی نادر

بر مهندس غائب ایتمش اولمقدن ناشی پوناپارته پک زیاده متأثر و متأسف اولمشیدی .  
 وینه بومهاجات متوالیه آرسنده جنرال بون فرقه سی فدایلیک طورنده قلعه اوزرینه  
 بر شدتو هجوم ایدرک و ایچرودن یاغمور کبی یاغدیریلان کله و خبره و تفنک دانه لیرینی  
 قید ایتمسه رک قلعه دیوار بنه دک واروب درون قلعه یه کیرمکه اقدام ایستدکر نده  
 ایچرودن طاش وال خبره سی ایله مدافعه اولنمغه جنرال بون دیواره صاریلوب  
 شابقه سنی ایچرویه آتمش و بومرتبه جرأت و صولتی هر کسی حیران ایتمش اولدینی  
 حالد ایچرودن باشنه برطاش ایله اولدینی کبی یره دوشمکله فرانسزلر آتی یرندن  
 قالدیروب کتور مشلر ایسه ده یا شامیوب اودخی فوت اولمشدر .

پوناپارته نک فرانسه ایله مخبره سی منقطع اولدیغندن اردوسیه عربستانده محصور  
 حکمنده اولوب انجق عکایی ضبط ایتمسه بتون اقطار شامیه انه کچه رک آرتق آتی  
 اورالردن چیقارمق مشکل اوله جغنی بیلدیکندن هر نه اولور ایسه اولسون عکا  
 قلعه سی آلسون دیو وار قوتی بازویه کتوروب عکانک تسخیرینه فوق العاده اقدام  
 و بوجهته فرانسزلر عکا قلعه سی اوزرینه متوالیا امثالی سبق ایتمش صورتده  
 فداکارانه هجوم و اقتحام ایتمش ایسه ده جزار باشانک عکادن چیقمنسی بالغک صودن  
 چیقمنسه مائل بر کیفیت اوله رق عکانک استیلاسی کونی عمرینک صوکی دیمک  
 اوله جغندن صوگ نفسه قدر عکانک محافظه سیله اوغراشمغه مجبور اولدینی جهته  
 هر درلو اسباب مدافعه یه بذل وجود و عسا کر اسلامییه جنکه حث و تحریض  
 ایچون انواع تشویقاته صرف مجهود ایدر و کله دن منهدم اولان قلعه دیوار لرینک  
 آرقه سنده کی خانه دیوار لرینه مزغال آچوب سپر اتخاذا ایلر ایدی عسا کر اسلامییه  
 دخی یافاده طرح سلاح ایله کندولرینی پوناپارته نک آغوش انسانیت و مروتنه تسلیم  
 ایدوبده صکره قصابخانه ده کی قیونلر کبی اعدام اولنسان بیچاره هواره وارناودلرک  
 حالی دوشونه رک الی باغلو و جکر حیتی داغلو اولمکدن ایسه محافظه ناموس ایله  
 دین و دولت اغورنده جان و یرمکی ترجیح ایلمش اولدقلرندن فرانسزلرک  
 فوق الغایه شدتو هجوم لرینه قارشو کوکس کره رک بالاتفاق فدایلیک یولنده  
 محاربه و مدافعه یه تشمیر ساق ایتمش ایدی .

بناءً علیه فرانسزلر عجیب و مهیب صورتده ابراز ایستدکری جرأت و جسارت لرینه  
 قارشو اهل اسلامک پک شدید و غریب مدافعه و مقاومت لرینه دوچار و بوندن  
 طولانی پوناپارته عظیم کدر و اندیشه یه گرفتار اولمشدر .

حالبوکه پوناپارته نک بر الشام طرفنده مکث و توقیفی مصر طرفنده درلو حوادثک  
 تگونه بادی اوله رق فرانسزلر حقتده افکار عمومیه تعیره باشلادیغندن فرانسزلر

مصر طرفده اعلاننامه لر نشریله پوناپارته عکا قاعه سنی خراب ایتش و جزار پاشا  
مجر و حاً فرار ایدوب کیتمش کبی اهالیء مصری برمدت دهآ آلدادوب آووده جق  
سوزلر اشاعه ایدر لر دی لکن پوناپارته نك عکاپیشکاهنده طیانوب قالمسیله انظار ناسده  
قدری پست و اولکی فانوس عظمت و اقبالی شکست اولمشیدی .

اول انشاده امرای مصر یه دن الفی محمد بک بر طاقم کوله منلر ایله مصرک جانب شرفیسنده  
کشت و گذار ایله فرانسلرک قافله و قطار لرینه ایصال خساره باشلامشیدی .

وبالاده اشعار اولندیغی اوزره امیر الحاج مصطفی کتبخدا که فرانسلر دوسنک بر الشام  
طرفه خر و جنده قاضی بده و مشایخ ایله برابر چیقمش و مشایخ صالحیه دن  
بالاستیدان مصره عودت ایتمشیکن کندوسی عودت ایتماش ایدی فرانسلر آنک  
بوحر کتبی اهانته حل ایدرک همان مصطفی کتبخدانک خیانت و عصیانندن بنحاه امارت  
حاج منصبنک الفا اولندیغی و سویشده کیملر حاضر اولغله حجه کیتمک ایستیانلرک  
صره و کسوه ایله بجزراً عزیزیمتلی لازم کله جکئی اعلان ایتملر ایدی .

بو انشاده ایسه بحر احمدده کشت و گذار ایدن چند قطعه انکلیز سفینه لری سویشی  
ابلوقه ایتش اولدقلرندن فرانسلرک اوصولرده اصلا حکمی جاری دکل ایدی بناءً  
علی ذلک بوسنه مصردن دأب درین اوزره صره و کسوه کیده میوب مصرک  
دولت علیه تصرفه کچدیکی زماندنبرو بلا فاصله اجرا اولنش مناسک حج بوسنه  
ترک اولمشدر . ایشته بو کیفیت اهل اسلامه پک کران کله رک بر مرتبه دهآ  
فرانسلر حقدده اضمار غیظ و کین ایتملردر .

مصطفی کتبخدا دخی فرانسلر عنددنه مبعوض و مطرود اولدیغی جزم ایتدیکی کبی  
جزیره عربانه دخیل دوشمکله اوائل ذی القعدة ده الفی محمد بک جمعیتی تفریق  
ایچون مصردن برمقدار فرانسلر عسکری سوق اولدیغی انشاده مصطفی کتبخدا  
اوزرینه دخی بشقهجه عسکر کوندر مشلر ایدی الفی ایسه طاغ آردندن صاوشوب  
جزیره عربانیله برلشمش و یانسه اجناس مختلفه قاتیلوب اول طرفده فرانسلر  
برغانله پیدا اولمش ایدی .

ینسه اول آوانده بر طاقم عربان اجتماع ایله دمنهوری اوروب و اورادن رشید  
ورحانیله طرفلرینه واروب غارت و یغما و اول حوالیده مستحفظ بولنان فرانسلرک  
اکثرینی اعدام و افنا ایلدکلرندن فرانسلر اول طرفله دخی طاقم عسکر  
سوقه مجبور اولمشدر .

پوناپارته عکا نك اطرافسده دو کدیکی قانلرک نتیجه بخش مرام اولدیغی کوره رک  
دلخون و بر طرفدن دخی مصر جهنتک اولوجهله اهتراز و اغنشاشی کندوسنه داغ

درون اولدینی حالدہ مقدما قورفہ فرانسه لو یندن نزع اولمش و دولت علیہ  
 دو نغاسی تمجیز و کوسہ مصطفی پاشا سر عسکر تعیین اولنہرق اسکندریہ جانبہ کملک  
 اوزرہ بولمش اولدینی و فرانسه ینہ بر فنا حالہ دوشوب انکلترہ دولتک دخی دول  
 اورویانی فرانسه علیہنہ تحریکہ میدان بولدینی حوادثی آلیجق گرفتار آلام و افکار  
 کونا کون اولدیغدن همان ناصره دن قله بری جلب ایله وار قوتی بازویہ کتورہ رک  
 غایت شدید بر هجوم ایتمک اوزرہ اکا امر ویرمکله قله بر عکا اوزرینہ اویله شدتلو  
 بر هجوم ایتمشدرکہ جهانک وقایع معدودہ سندن بریدر .

شویہ کہ : فرانسرلر فدایلیک یولندہ هرچه باد آباد زمزمہ سیلہ هر طرف دن شدتلو  
 آتش ایدرک عکا اوزرینہ هجوم و اقتحام و جزار پاشا دخی قویاً مدافعہ یه اقدام  
 و اہتمام ایدرک آتش حرب و ستیز اشتداد و امتداد ایله نمونہ روز رستاخیز اولدینی  
 حالہ فرانسرلر اخشامدن صکرہ طرف بطرف برج و بارولرہ یوروش ایدوب  
 و برج علی نام قله یی دخی لغم ایله رخنہ دار ایدرک یول بولوب ایچرویہ کیرمش و عکا  
 قلعه سی بر حال خطر ناکہ گرفتار اولمش ایکن اهل اسلام صبر و ثبات ایله ہر نہ طرف دن  
 دشمن باش کوستر دیسہ مدافعہ یه شتاب ایدرک بر طرف دن طوپ و تفنگ ایشلمکدہ  
 و بر طرف دن دخی قلیچ و بیچاق ایله یقہ یقہ یه خونریزانہ مقاتلہ لر دوام ایلمکدہ ایدی .  
 الحاصل اول کیجہ روز هولناک محشر دن بر نمونہ اولہرق زہرہ لر چاک و یقہ لر  
 چاچک اولوب ایشتہ شو حالہ فرانسرلرینہ پیدر پی هجوم و اقتحامدن کیرو  
 طور مدقلری جہتلہ جزار پاشا تہلکہ نک بر مرتبہ دہا تقرب ایتدیکنی کور بچک همان  
 ( آخر الدواء الکی ) و ققجہ ایکی یردن لغملرہ آتش ویرمکله بر خیلی فرانسرلر  
 ہویاہ پران اولوب قلعه ایچندہ قالانلر اوزرینہ دخی عسا کر اسلامیہ قلیچ و یتاغانلر  
 ایله هجوم ایدرک اکثرینی اعدام ایتمشدر .

امیرال اسمیت اول کیجہ فرانسرلرک بویله شدتلو هجومی و جیخانہ لرک اشتعالی  
 کور بچک قلعه دن ناامید اولوب سر پندیسی کندوسنہ طوقو تمامق ایچون کیمیلرینی  
 آلا رغا ایتمش ایدی . فرانسرلرک منکسر و منہزم اولدقلری تحقق ایتدکدہ انکلیزلر  
 دخی کمال تعجب ایله نمون اولمشلدر .

اول کیجہ فرانسرلر منہزماً قلعه دن چقدقلرندہ بر ایکی یوز مقداری شاشیروب  
 قالدقلرندن درون عکادہ واقع جامع مشہورہ قنوب باروتلری تمام اولنجیہ دک  
 جنک ایدرک صباح اولدقدہ خلق اطرافتہ بریکوب امیرال اسمیت دخی کلمش اولدیغدن  
 اکا تسلیم اولمشلدر . یوناپارتہ نک یافادہ ایتدیکی غدار لغہ نظر آورادہ کی ارناودلر  
 جامع ایچندہ محصور قالان فرانسرلری بوغازلہ مش اولسہ یوناپارتہ نک بر دیہ جکی

اوله مازدی لکن عثمانلور عذندده اولیه مردلکه منافی بر معامله و حشیه هیچ بروقده تجویز اولنه ماز .

بومحاربه ده فرانسزلرک کلی ضایعاتی و ضابطان و نفرا تجه پک چوق مجروح و تلفاتی اولدیغندن پوناپارته نك اردوسنه تزلزل و قوتنه خیاییدن خیلی تنزل ککش ایسه ده شو حالده مصره عودت ایته اثنای راهده اهل اسلامک تعقیبی ایله پک زیاده پریشانلغه کر قنار اوله جغنه و بومحاربه لرله قلعه ده دخی مجال قالماش او لمسنه مبنی فرداسی فرانسزلرینه هجوم و اقتحامه قیام ایتمدیلر .

اول کون ایسه ردوس متصرفی حسن بک ایله درسعادتن کوندرلمش اولان بر مقدار نظام جدید عسکری یتیشوب میدانه چیقهرق فن حرب اوزره طابورلرین تعیبه و ترتیب و صنایع آتشیازی اجرا سنده تمام مقابله بلمثل قاعده سنجه قویاً مدافعه ایدرک فرانسزلری متریسلرینه قدر تعقیب ایتمدیلر .

اشته بونک اوزرینه فرانسه عسکرینک کوزلری ییلوب آرتق قلعه به هجومدن امتناع ایدر اولدقلرندن و مصردن بورایه کلنجیه دک چوللرده آچلقدن و صوسزلقدن انواع تعب و مشقت چکه رک اثنای راهده خسته و هلاک اولنلرند ناعدا عکاده طاعوندن دخی برخیلیسی تلف اولمش و عکا سورینک اطرافنده نیجه بیک فرانسز عسکری قالمش اولدیغنه بناءً پوناپارته نومید اوله رق همان ذی الحجته نك اون برنجی کیجه سی ثقیل الحجم و عسیر النقل اولان ادوات حربیه سنی یره کوموب و صباحه قارشو اردوسنی قالدیروب عکا پیشکاهندن حرکت ایدرک زمزمه حیف و صد حیف ایله حیقایه جان آتوب کیتمشدر .

بونک اوزرینه جزار پاشا صبا حلین قلعه قبولرینی کشاد ایدرک فرانسزلرک تعقیبینه مسارعت ایتمشدر فرانسز اردوسنده پک چوق خسته و مجروح اولدیغندن پوناپارته اخشابدن تابوت شکلنده تذکره لر یابدیروب و ایچلرینه خسته و مجروحینی قویوب هر برینی دردرکشی او موزلرنده طاشیمق و یدنده اسیر بولنان او چیوز قدر اهل اسلامی بو ایشده قوللامق اوزره ترتیب ایدرک دوشه قالغه یافیه واروب اوراده برآز نفس آلق ایچون متریس و طابیه لر انشا و عرش و غزه طرفندن عسکر جلب و جمع ایله تحفظه قرار و یرمش ایسه ده کیرودن عسا کر اسلامیه پیدرپی آقوب کلمکه باشلادیغندن یافاده طوره میوب همان کیجه لین زوائد اشیا سنی احراق بالنار ایدرک غزه یه واردیغنده ینه عسا کر اسلامیه تعقیبدن کیرو طور مدینگی جهته غزه دن دخی حرکته عریشه مواصلت ایلمشدر .

لکن بورایه کلنجه فرانسزلرک چکمش اولدقلری تعب و مشقت و دوچار اولدقلری

بلا وفلاکت تعریف اولنماز راده ایدی بر طرفدن عقبکیران اسلام راست کلدکاری اعدام ایدر اولدینی حالد بر طرفدن دخی طاعوندن یومیه بر چوغی خسته اولوب اسباب نقلیه لری ایسه ناقص اولدیغندن پوناپارته بومثلو آغرخسته لرینه آفیون روحی ایچوره رک او بودوب اعدام ایله تخفیف بار ایدردی اشته بودخی پوناپارته نک حقنده ایکنجی لکه درکه مقدا یافده بوقدر بیک اسرای اسلامییه محافظه غائله سندن قور تلمق ایچون اعدام ایتمیکی کبی بوکره کندی اوغرنده بذل تاب وتوان ایدرک خسته و بیتاب اولان همشهریلرینه باری صوگ نفسده بر مکافات اولق اوزره مداوات و محافظه لرینه اعتنا اتمک بورجی ایکن تخفیف بار ایچون قاعده انسانیه منافی ودأب مرؤتک بتون بتون خلافی اوله رق بیچاره لری آفیون روحیه تسمیم واعدام ایلردی .

بوناپارته سانتالنه آطه سنده ایکن کندو وترجه حالی حقنده یازمش اولدینی رساله ده (ابوخورده فرانسه دونماسی منهزم اولمغه انکلینر دکزده مستقل قالدقندن اولوقدنبرو بوسفرک نتیجه سی خیر اوزره اولیه جغه کسب اطلاع ایتمد زیرا وقتاً بوقت تجدید و تکمیلی تمکن اولمیان عسکرک لامحاله تسلیم واستیانه مجبور اولدینی بی اشتباهدر هر نه حال ایسه مجبوریت الورنجیه دک مصرده قالمغه غیرت ایدرک معیتمده اولان عسکری اشغال ایچون مملکتک تسخیرینه ارسال ایتمدم ومصرده ایشم قالدقده ارض فلسطین جاننه عزیمت ایله بوراسنک ضبط و تسخیرینه مباشرت اتمک آرزوسی کلدی انجق موانع وحوائلنه کرکی کبی مطلع اولدقده مقدار کفایه عسکرک استصحابنده قصور ایش اولدیغی اکلادم وبادیه نک اورطه سنده ایکن عکا طرفنده عسکرک تجمعندن خبردار اولدم ایسه دخی عکا اوزرینه واریلوب عکا قلعه سی فرانسه مهندسلرندن بر ماهر مهندسک دلائلیه محافظه اولنه رق مقاومت ومدافعه یه آماده اولمغه ناچار محاصره دن کف ید و فراغت وکمال صعوبتله کیرویه عودت اولندی ) دیو محرردی .

عکاده اولوقت فی الواقع برازفرنک مهندسلری بولنه رق استحکاماتک انشاسنده وسوق وتعییه عسکر خصوصنده کندولرندن چوق فائده کورلمش ایدی لکن فرانسه عساکری بروجه مشروح اولیه علم و صنعت ایله اجرا اولنان تدابیری هپ چکنه یوب عکا قلعه سی درونه کیرمشلر ایدی فقط مات اسلامیه نک فوق العاده مقاومت دلیرانه لریه کیرویه پوسکور تدرلمش ایدیلر شو حاله نظر آ نتیجه حر بک قزانلمسنه سبب اصلی ملت اسلامیه نک مسبوق بالمثل اولمیان مقاومت فداکارانه لری ایدی .

هر نه حال ایسه یونایارته بر وجه مشروح کوچ حال ایله عریشه کلوب اوراده خسته و مجروحلرینی ترك ایله قله بری دمیاطه ارسال ایتمش و کندوسی دخی طوغری مصره کیتمشدر .

بر و طرفده جزار پاشا غالب و مظفر قاهره اطراف و انخانک ضبط و ربطنه اهتمام و چونکه غوائل حربیه حسیه جرده ایشنه باقیله میوب حجاجک موسم عودتی ایسه تقرب ایله یکنیدن همان امور جرده بی اکمال ایله خطب جسم حبی استکماله اقدام ایتمشدر .

و چونکه حج موسمنده جزار پاشا عکاده محصور بولندیغندن دیوان افندیسی محمد افندی بی امیرالحاج ایدوب محمل شامی آنکله کوندرمشیدی انجق محمل مصر کیتدیکنیدن بوسنه کسوه بیت معظم بالاده بیان اولندیغی اوزره در سعادتده نسج و اعمال ایله خلاف معتاد اوله رق شام طریقیله کوندرمش اولمغین حجاج مسالمین قاباً متأثر اوله رق عرفه کونی کمال خضوع ایله وقفه کیر تضرع اولمشلر ایدی اول کون ایسه بر وجه مشروح یونایارته جانب مصره رجعت و فرار ایتمش اوزره متبیه اوله رق بر کون صکره عکا پیشکاهندن قالقوب انواع سفالت و مشقت ایله جای سلامت آرایه رق مصره طوغری حرکت و عودت ایتشیدی .

مقدما یونایارته مصری استیلا ایتدکن صکره عربستانک هر طرفه تحریرات ارسال ایله اهل اسلامی اغفال قیدنده بولنه رق جزار پاشایه دخی مأمور مخصوص ایله تحریرات کوندرمش ایسه ده جزار پاشا قطعاً التفات ایتیوب مأموری حضورینه بیله چیقار مقسزین کلدیکی کبی اعاده ایتشیدی امیرمه شریف غالب افندی ایسه فتح باب مسابله و مساله ایدیورمش و ۱۸ ذی القعدة ۱۲۱۳ تاریخیه مورخ اوله رق مصر قائم مقامی پوسلیک نام فرانسز جنرالنه یازمش اولدینی مکتوبی ذی الحجه نك اونالتجی کونی مصره واصل اولمشدر صورتی و ترجمه سی زبرده (۵) رقیله ایراد اولنور .

اول اوانده برمنوال مشروح فرانسه اردوسنک اضطران کلاله و مصر جهتی دخی بر حال اهتزاز و اختلالده بولندیغندن تسکین و اغفال اذهان انام ایچون شریفک بو مکتوبی طبع ایله مصرده زقاق باشلرینه یاپشدرمشیدی . بناءً علیه حجازدن بحر آسویشه و اورادن برأ مصره قهوه و سائره کلکه باشلامش و فرانسزلر طرفندن شریفه مساعدده کوستریله رك آنک قهوه سی رسم کر کردن معاف و مستناطو تلمشیدی لکن متعاقباً انکلینز کیلری کلوبده سویشی ابلوقة ایتدکر نده جده دن سویشه کلان تجار کیلرینی توقیف ایدوب مؤخرأ شریف

طرفدن کوندریلان تخریرات اوزرینه صالیورمشلر ایسه ده شریفک قهوه سی  
دخی مستتا اولماق اوزره تماما رسم کمرکلرینی اخذ واستیفا ایتمشلر در .  
اول عصرده جزار پاشایه عاصی و سرکش بر آدم دیو نظر اولتمقده ایکن شریف  
غالب حضر تلیرینک طور وحر کتته نظر آ آنک بو وجهله ثبات و متاتی شایان  
دقت مواددندر و شریف غالب بر مقدار قهوه نك رسم کمر کفی قز اتمش ایسه ده  
اهل سنت و جماعتدن اولان بونجه اهل اسلامک اعتراضه هدف اولدیغندن اگر  
مکتوبنک بویله اعلان اولنه جغنی بیلسیدی بو ایسه کیرشمزدی ظن اولنور .

بالاده اشعار اولدینی اوزره پوناپارته عکایی محاصره ایتدکده جبل لبنان حاکی امیر  
بشیر کندوسنه انقیاد ایتماش ایسه ده عکایه دخی امداد ایده مدیکندن حقنده جزار  
پاشا منفعل اولمشیدی انکلیر امیرالی اسیمت امیر بشیرک حسن صیتی ایشیدوب  
بر آراق کندوسیه مخابره ایتدکن بشقه کورشمک اوزره کندوسنی بیروت  
جوارینه دعوت ایدوب و بیروته چیقوب امیر بشیر دخی دیر القمردن عین عنوب  
قریه سنه کله رک اوراده ملاقات و مصاحبت ایتدکلرنده امیر بشیر جزار پاشایی  
کندو حقنده مغیر الخاطر بر اقامه سنی اسمیته رجا ایدوب او دخی بو باده کندوسنه  
وعد قوی و یرمش و بیروتدن عکایه کلوب امیر بشیر حقنده حسن معامله اولنسنی  
جزار پاشایه افاده و توصیه ایتمش ایسه ده جزار پاشا قبول ایتدیکندن اسمیت  
کوجنوب جزاردن منفعل و متفر اولدینی حالد عکادن قاللوب کیتدکن صکره  
امیر بشیری در سعادتیه توصیه ایدرک شاید حقنده جزار پاشا طرفدن برکونه  
معامله جبریله اجراسنه قیام اولنور ایسه بوماده دولتین بیتنده پایدار اولان عهد  
و مواتیق اخلال ایده بیله جکینی دخی اشعار ایتمشیدی جزار پاشا ایسه اسمیتک  
حرکتدن صکره عکاده بولنان امیر یوسف اوغلارینی امیر بشیرک یرینه حاکم  
جبل نصب ایتک اوزره صیدا طرفنه سوق عسکره ابتدار ایلمشدر و بیت عماد  
مشایخی امیر یوسف اوغلارینک طرفداری اولدیغندن امیر بشیر آنلری خارجه  
براغرق سائر مشایخ جبلی نزدینه جلبله مدافعه به حاضر اولمشدر .

### \* وقایع در سعادت \*

بر منوال مشروح پوناپارته نك بر الشام طرفنه تجاویزی هر طرفه دهشت و یردیکندن  
سلخ شوال مکرمده صدر اعظم و شیخ الاسلام و قبودان پاشا و صدور عظام و سائر  
علمای اعلام و رجال دولت و او جاقلو حاضر اولدقلری حالد حضور هایونده  
عقد اولنان مجالس مشورتده فرانسزلرک اطوار تجاویز کاریمی در میان و هر کسک



بو باده مافی الضمیرینی طوغر بحجه سویلمسی امر و فرمان بیورلمسی اوزرینه آشنای  
 حقایق امور اولان ارباب تمکین و شعور محله موافق و مصلحته مطابق کلمات جامعه  
 ایله عاقلانه و ادیبانه بیان افکاره تصدی ایدرک حقارنده حسن ظن انامی جلب  
 و بعضی آرای غیر معقوله ایله ذاتلرنده محتمل و موهوم اولان درایت و رویتی  
 سلب ایلدکری صره ده بعضی دخی میدان بولوب و یکران فکرینه جولان  
 و پروب انجامکارک و خامتی موضوع بحث ایدرک بعض متحیزان و متمولانی سفره  
 مأمور ایتمک کبی صورتلرله عالم خیالدن ترتیب جنود و خزینه غنیه دن تدارک  
 نقود ایتلریله افکار و آراده تشنت پیدا و برطاق تدابیر عقیمه هویدا اولیجق  
 صدر اعظمک قانسه هیجان و عرق حیمته نبضان کلکین همان کندوسنی اورته یه  
 آتوب مصر سفرینه بالنس سبکبارجه کیتمک اوزره سلطان سلیم خان حضر تارندن  
 رخصت استدکده آرای حضاره لدی المراجعه صدر اعظمک بالذات کیتمسی بالاتفاق  
 ترجیح و تنسیب اولمغله همان تدارک امور سفری یه یه مباشرت ایلمسی ایچون طرف  
 پادشاهیدن امر و فرمان بیورلدی و بوقرار اوزره فاتحه او قونوب مجلسه ختام ویرلدی .  
 ذی القعدنه ک بشنچی چهارشنبه کونی قبودان پاشا و اناطولی محاسبه سنه قدر بالمله  
 رجال دولت و ارکان سلطنت و اوجاق اغالری باب عالی یه دعوت اولنوب جمله سی حاضر  
 اولدینی حاده طرف شاهانه دن صدر اعظمه برتوب سمور و برقبضه مجوهر شمشر  
 و بررأس دونامش رخش مسرت بخش ایله استقلال خط هایونی کلوب او قوندی .  
 صدر اعظمک مصر سفرینه سبکبارجه عزیمتی قرار داده اولدیغندن معیت آصفانه لریله  
 بالنس یکچیری اغاسی و جبه جی باشی و اوجاق کتخدالرندن بعضی و باب دفتریدن  
 یالکز دفتردار افندی و باب آصفیدن دخی لزومی اولنلرک کیتلری تصویب اولمغله  
 ذی القعدنه ک سکنزنجی کونی سالف الذکر تشریفات سنیه نک تشکری ضمننده رکاب  
 واقع اولوب بعد العوده ایراد جدید دفترداری مصطفی رشید افندی دفتردار و سانی  
 ایراهیم افندی ایراد جدید دفترداری نصب اولندی .

اشبو مصطفی رشید افندی بین الناس کوسه کتخدا دیمکله معروف اولان ذاتدرکه  
 مکرراً کتخدای صدر عالی اولمش و خیل خدمات مهمه ده قوللانمشدر . فن کتابت  
 و انشادن بی بهره اولوب معارفدن و ایه سی یالکز مرانی افاده ایده جک قدر نامربوط  
 انشا و کندویه مخصوص خط و املا یه منحصر ایکن قوه بخت و فطانت و جرزه عقل  
 و کیاست ایله بولندیغی ایشلرده موفق و ممدوح اولوب عسا کر شاهانه نظامی و طوپخانه  
 انتظامی و تکمیل ایراد و توفیر مهمات جهاد خصوصلرنده واقع اولان خدمت و صداقتی  
 نزد هایونده مقبول ایدی بو کره ضیا پاشا زور بازوی اقدام و اصرار ایله خاکپای  
 هایوندن بالاستیدان خواه و ناخواه قوپاروب اردوی هایون دفترداری ایتشدر .

ذی القعدة نك طقوزنجی كونی دخی چاوشباشی عثمان افندی كتخدا و سلفی ابراهیم افندی كتخدا و کیلی و اولوقت دفتر امینی اولوب بعد مدة وزیر اولان شریف افندی دفتر دار و کیلی و بیوک روزنامهچه راسخ افندی رئیس الکتاب و سلفی عاطف افندی رئیس و کیلی و سابقاً چاوشباشی عزت پاشا زاده سعید بك ینه چاوشباشی و اسبق مکتوبی صادق افندی مکتوبی و سلفی رفیق افندی مکتوبی و کیلی و رئیس الکتاب راسخ افندی زاده عبد الشکور افندی رئیس کیسه دارغلیه معاً تشریقاتی و سلفی احمد بك تشریقاتی و کیلی و سابقاً تشریقاتی عفت عبدالله بك كتخدا کاتبی و سلفی طیفور افندی کاتب و کیلی و دیوان عالی کتبه سندن صفی افندی بکلکچی و سلفی صاحب افندی بکلکچی و کیلی و مکتوبی خلفاسندن بلوغ افندی آمدی و سلفی غالب افندی آمدی و کیلی و مطبخ امینی حسن اغا اردو نزل امینی نصب و تعیین اولنوب منحل اولان دفتر اماتی فیضی بك زاده محمد بکه و بیوک روزنامهچه اناطولی محاسبه جیسی و اصف افندی یه و اناطولی محاسبه سی آمدی اسبق ابو بكر افندی یه و مطبخ اماتی شاه سلطان كتخداسی عزیز افندی یه توجیه قلندی .

ذی القعدة نك اون اوچنجی پنجنه كونی دخی ركز طوغ آصفی رسمی اجر اقلنوب ركاب هاپون قائم مقاملغه دخی سالنیک والیسی ابو بكر پاشا تعیین بیورلمغه دعوتی ایچون طرف صدر اعظمیدن سلام اغامی ارسال اولنوب اوزرنده اولان سالنیک سنجانغی كورجی عثمان پاشایه و آنك اوزرنده اولان بوسنه ایاتی اقدمجه وفات ایدن سلحدار مصطفی پاشانك كتخداسی وانی محمد اغایه بارتبه وزارت توجیه بیورلدی . و بواننده طاغلی اشقیاسنك بقیه سی غلیانه كیش اولدیغندن ادرنده یا خود خاصكویده اقامت ایتمك اوزره اول حوالیده بر وزیرك و جودی لازم كلكله روم ایلی والیسی زینخنلی حسن پاشانك الحاقا عهدسنده بولنان چرمن سنجانغی تراله متصرفی اولوب الیوم اول حوالیده بولنان سید یوسف پاشایه بروجه آرپهلق توجیه اولدیغنی كبی قبریس و طرابلس شام طرفلرینك امر محافظه سنه اعتنا اولمق دخی لازمه خالدن اولدیغنه مبنی قره حصارده چفتلكنده مرفوع الوزاره مقیم اولان ترنج زاده سلیمان پاشایه دخی بشیوز نفر پیاده ایله قبریس محافظه سنده بولمق اوزره وزارتق ابقاسیله قره حصار صاحب سنجانغی و از میرده مرفوع الوزاره مقیم اولان عظم زاده یوسف پاشا دخی سریعاً از میردن بجرأ طرابلسه كیدوب خدمت محافظه یه قیام ایتمك اوزره وزارتق ابقا اولنهرق خلال ذی القعدة ده تواریخ مختلفه ایله خلعتلری حضور صدر عالیده قبو كتخدالرینه كیدیرلدی .

سیچلیانین دولتیله در دست مذاكره اولان اتفاق معاهده سی دخی بواننده اتمام و امضا اولمشدر صورتی زیرده ( ۶ ) رقمیله ایراد اولنور .

\* لحسا وقوعاتی \*

برمنوال سابق بر الشامده فرانسزلرله جزار پاشا محاربه ایتدیکی اثناده لحساده دخی وهابیلرله بغداد عسکری حرب وجدال اوزره ایدی شو یله که : رئیس وهابیان اولان عبد العزیزک اوغلی سعود بیک ایکیوز اون برسنه سنده عسا کورکلیه ایله لحسا اوزرینه کیدوب عنوة لحسا بلده سنی تسخیر وایکیوزدن متجاوز علماسنی اعدام وساحل بجرده واقع قطیف وعبیره دک کافه قرا ومضافاتی ضبط ایله اهلایسنی پایمال ایلدیکی خبرینک ورود وشیوعی اول اثناده عهدهنه منتفق مشیختی توجیه اولنان ثوینینک بصره یه وصولی زمانه تصادف ایتمکله ثوینینک غیرت مذهبه وحیت عربیه سی هیجانه کلهرک لحسا اوزرینه حرکت ضمننده بغداددن لدی الاستیدان کندویه رخصت اعطا اولندقدن بشقه تقوی ایچون معینته بصره موظفه سندن بلوج تفنکچیلری وبش قطعه طوپ وبغداددن بیرون اغالرندن حجازی احمد اغا تعین وارسال اولنغله ثوینی جمله متفق عشائری وبنی خالد شیخلری محمد العربی ایلرله بر اکی و ذکرا اولنان قوه معاونه یی استصحاب ایدرک لحسایه طوغری توجیه ایدوب بصره دن اون ایکی قوناق اشاغیده واقع شبک نام موضعه وصول ایله استراحت ایچون نزول ایتدکده چادرنده محمد العربی ایلرله او توررایکن بغته برسایه عرب ظهور والنده کی خشت ایله الله اکبر دیهرک ثوینینک کوکسنه اولیه ضرب ایتمش که آرقه سندن اوج کوسترمش و ثوینی درحال وفات ایتمش اول عربی دخی درحال طوتوب قتل ایتمشلر الحق کیمک آدمی اولدیغی اکلاشیه مامشدر بعضیلر عبدالعزیزک آدمی اولمق ظننه ذاهب اولمشلر ایسه ده اکثر خاق براکک عربی اولمق اعتقادنده بولمشلردر چونکه لحسانک استیخلاصنده حکومته محمد العربی ایلر ابرکدن هر برینک طمعی اولدیغی حالده ثوینی اورالره تقرب ایتدکده بعض اماراتدن لحسانی عربره ویره جکی محسوس وبراک بوندن مایوس اولدیغندن ثوینی بووجهله اعدام ایتدرمش اولدیغنه اکثر ناس ذاهب اولمشلر هر نه حال ایسه بونک اوزرینه آرتق ایلرویه حرکتدن فراغت واردو ایله کیرویه عودت اولنوب ایکی قوناق برویه کلندکده براک بغته کیتلو وهابی عسکر یله ظهور ایتدیکی کی ثوینینک برادرلری ومنتفق متشخصلری بلوج عسکر یله طوپلری براغوب کللر یله وهابیلر بلوج عسکرینی قتل عام وطوپلری ولوازمات سائره یی اخذ واغتنام ایدرک درعیه یه کیتمشلر .

بوکدرلی خبر بیک ایکی یوز اون ایکی سنه سنده بغداده ورود ایله بغداد والیسی سلیمان پاشا کتخداسی علی پاشایه زیاده تأثیر ایتدیکندن همان وهابی سفرینه نیت

ایدرك سليمان پاشا دن رخصت آلوب تدركات حريميه مباشرت ايتمش ومنتفق  
 ميشختي دخي حمود الثامرہ توجيه اولنش ایدی .  
 علی پاشا اسباب سفریه بی اجمال ایتد کدن صکره اشبو اون اوچ سنه سی ربع الآ خرینک  
 یکر می ایکنجی کونی بغداد دن حرکت ایتدی بعض مواقعه اجمال تدارکات ایچون  
 بشر اون کون توقف ایدرک بصریه واروب اوراده دخی اعداد اولنان ادوات  
 و ذخائر کلیه نك نقله لازم اولان دوه وسفینه تدارکی ایچون اون کون توقدن  
 صکره قالقوب قصبه حضرت زبیرک جانب شرقیسنده اولان در بهیمیه نام محله  
 نزول ایلدی و نجاهد دن اجرت ایله جلب اولنان بش بسک تفکجی بی دخی  
 اورایه جلب واستصحاب ایدوب لحسا طریقتدن ایسه بورادن طوغری و هایلرک  
 مرکز حکومتی اولان درعیه یه وارلق دها قریب بریول اولدیغندن طوغری  
 درعیه اوزرینه حرکت اولتمق ایجاب مصلحته اوفق ایسه ده لحسا یولنده قوناق  
 محلی اولان صوقویلیرینک مابینی یکر میشر ساعت اولوب درعیه طریقتده ایسه  
 صوقویلیرینک مابینی اوچ کون اوچ کیجه سیر ایله قطع اولنه بیله جکندن و صوف  
 عساکر و مختلف عشاژدن مرکب بر آغر اردو ایله اوچ کون اوچ کیجه یول  
 کیدوبده بردغه نزول اولتمق مشکل اولدیغندن بشقه درعیه یولنده دکزدن  
 اردویه ذخیره نقلی قابل اولدیغندن ابتدا لحسا آلتوبده بعده اورادن درعیه یه  
 وارلق ایجاب حالدن کورلدیکنه مبنی همان لحسا اوزرینه حرکت و سفوانه  
 مواصلت اولندی فرداسی قوناق یری اولان روضتین نام محله صوبولمندیغندن  
 سفواندن قربه و طولملرایه لزومی قدر صو قالدیر بیه روق روضتینه و اورادن چهره یه  
 وارلدیکه بوراده قوییلر وار ایسه ده صولری دکز صویی کبی آجی ایدی بصره دن  
 بحر آ سفان ایله تسیر اولنان ذخائر دخی چهره حداسنه کلش ایسه ده غرابلر  
 ساحله یناشه مدیغندن کویت شیخنک معرفتیه لحسایه قریب عجیر نام محله دک  
 کوچک سفینه لر استکرا و غرابلرده کی ذخائر و ادوات آنلرک دروننه نقل ایله  
 چهره یه اون کونلک مسافه سی اولان و ساحل بجرده بولنان بلبول نام محله  
 اردویه یتشمک اوزره قرار ویرلدی و چهره دن بلبوله دک اون کونلک ذخیره  
 برابر بولنان عشاژدن استکرا اولنان بشیک دوه یه یوکلدلدی و بلبوله وارلدقه  
 سفینه لر دخی کلکله اوراده اون کون اقامت و بر ایلق ذخیره دوه لره تمحیل ایله  
 اورادن دخی حرکت اولنوب تمام اون کون چوللرده و وادیلرده قطع مسافه اولنورق  
 لحسا قراسندن نطاع نام محله مواصلت ایله اون کون دخی اوراده استراحت اولندقدن  
 صکره اورادن دخی حرکت ایله لحسا حوالیسنه وارلدی .

اقدجه لحسا اهالیسی اتقیاده دعوت اولنملری اوزرینه عرض مطاوعت ایتمشلر  
ایسهده لحساده بری مبرز و دیکری هفوف دینکله معروف ایکی قلعه اولوب  
بونلرده عبدالعزیز طرفندن مأمور سلیمان بن ماجد و حاج ابراهیم ابن عفیضان  
بر مقدار وهابی عسکریه تحصن ایلمش اولدقلرندن علی پاشا بوایکی قلعه آراسنده  
اردوسنی قوروب ابتدا مبرز نام قلعه نك حصر و تضیقینه مباشرت ایتمشدر .

اردودن قلعه یه طوب و قلعه دن اردویه تفنك آتیه رق یکر می کون محاربه تمتد  
اولدی قلعه نك دیوارلری پك مستحکم اولدیغنه مبنی طوب ضربندن خلل پذیر  
اولدی و چند دفعه پیاده ایله یوروش اولندیسهده و هابیلرک تفنك ایله مدافعه سندناشی  
ایچروسنه کیریله مدی و بر آراق لغم حفرینه اقدام اولندیسهده بودخی  
کارکر اولدیغندن مجرد لنگر انداز اولان ذخیره غرابنده کی برقطعه بالیز  
طوب هزار تکلف ایله اون کون ظرفنده اردویه جلب و قلعه یه حواله ایله آلمغه  
باشلایوب هر دفعه سنده قلعه یه بر مقدار رخنه ویره رك قتی امید ی رونما اولمش  
ایکن اول طوب دخی پاره لندیکندن و آنک کله لرندن پیدا اولان رخنلری دخی  
و هابیلر درحال تعمیر ایله سد ایلدکلرندن امید منقطع اولدی واردوده بش بیک  
میری دوه سی و بش بیک اجر تلی دوه اولدیغی حالده اوت و علف اولدیغندن دوه لر  
قیرلغه باشلایوب بواون بیک دوه دن انحق بیک دوه قدر قالمش و برابر بولنان  
عشارك دخی کلیتو دوه لری تلف اولمش ایدی ساحل دن اردویه ذخیره نقلی  
ایسه کلیتو دوه یه محتاج ایدی .

بناءً علیه آرتق لحساده اقامتک امکانی کورلمدیکندن هان عودت اولندی فقط  
احمال و اتقالک نقلنه کافی دوه بولنمدیغندن معدنیات دن اولان ادوات و اوانی دشمنه  
قالماسق ایچون زیر زمینه دفن و اشیاء سائره احراق ایدلدی و طوبلر دخی پیاده لره  
چکدیلمک اوزره قرار ویرلدی و کمال ضرورت و مضایقه چکیله رك اون درت  
کون ظرفنده ثویننک مقتلی اولان شبك نام محله مواصلت میسر اولدی فقط  
بوکره عودنده عسکر بر او تلی یول بولغله الده بولنان حیوانات اثنای راهده  
بول بول رعی اولسه رق دیکر عافه احتیاج کورلمدی و منزل مذکورده زاد  
و ذخیره تمام اولمش ایدیسهده بر قاق قطعه ذخیره کمیسنک ساحل مجرد واقع  
عمائر جزیره سنه وصولی استخبار اولنسی اوزرینه آتو و دوه ارساله موجود  
اولان ذخیره اردویه نقل اولندی بر کونلک ذخیره ظهور ایدوب عسکره تقسیم  
اولندقدده حصه سنه بر بطمان آرپه اصابت ایدن کیسه سه ثروت و سامانه مالک  
اولمش کی سونوردی .

ایشته حال بوموال اوزره ایکن وهایلرک منزل مز بوره کلمک اوزره اولدقلری  
 خبر آندی. شویله که : اردونک لفسادن عوتنده علی پاشانک عسکری ذخیره سزلکدن  
 طاغلدی کندیبسی بر شرمه قلیله ایله فرار و عودت ایلدی تمام وقت فرصتدر دیو ابن  
 عیضان طرفدن عبدالعزیزه اخطار اولنغله اودخی عسا کر کلیه ایله اوغلی سعودی  
 کوندرمش ایدی مرادی یورغون و متفرق عسکری اوروب طاغتمق و بولدیغی  
 حیوان وسائر اشیایی اغتنام ایتمک ایدی وهایلر ایله بولشعق ایسه علی پاشانک تمام  
 آرادیبی فرصت ایدی . زیرا عسا کر موجوده وهایلرک حقتدن کلمکه کافی ایدی .  
 بناءً علیه سعودک کلدیکنی ایشتیکی کبی علی پاشا ممنون اوله رق همان عسکری بندر روب  
 اوزر لرینه یوریدی سعود اردونک سطوت وشوکتی برکال اولدیغی کور یجک  
 آلدانوب کلدیکنه نادم اولمش ایسه ده کندو سنجه عودت دخی قابل اولمدیغدن چاره سز  
 محنات نام محله نزول و اطرافه متریس اعمال ایله تحفظی حر کته مجبور اولوب علی  
 پاشا دخی قارشوسنده وتاج نام محله نصب خیام ایتردی اول کون اخشامه دک  
 طرفینک چرخه جیلری میدان مبارزه ده مطارده ایدرک وهایلرک متشخصلرندن  
 بر قاقچی برو طرفدن دخی متفق شیخی حمودک برادری خالد الثامر تلف اولدی  
 وهایلر میدان جنکته چیقهمیوب نهایت مدافعه دن عاجز اوله جقلرینی دخی درک  
 ایدرک استدعای مصالحه ایله سعود طرفدن علی پاشایه کوندریلان تخریراتده (سزک  
 لفسایه ورود کزک سببینه بیاهمدک نیچون کلدیکنر لفسا اهالیسی بر طاق ملعون رفضیلر در  
 آنلری بز قلیج ایله مسلمان ایتمک لفسا برقریه اولوب رومک حکمنده داخل  
 دکدر سزدن اوزا قدر آندن سزک زحمتکنزه مقابل شی حاصل اولمز بالمله لفسا  
 و ملحقانتک آقچه سی طو پلانوب سزه ویرلسه یالکنر بوسفرده ایتمدیکنر مصارفه  
 معادل اولماز وسزکله بزم بینمزه بادی مجادله یالکنر ثوبنی ایدی اودخی تجاوز  
 ایتمدی و جزاسنی بولوب کیتدی شمعی مأمولمز مصالحه در بوده هم سزه وهمده  
 بزه خیرلورد و الصلح سید الاحکام ) دیو یازلشیدی الحاصل وهایلر بر حال خطرناکه  
 دوچار اوله رق مصالحه ایله تخلیص کریبان املنه دوشمشلر ایدی علی پاشانک  
 عسکری ایسه آنلره جنکه حر یص وخواهشکر ایدی لکن وهایلرک موقع  
 و متریسلری تحفظه مساعد اولدیغدن طوپ استعمالی لازم کلوب حالبوکه لفسادن  
 حرکت اولندقدن اسباب نقلیه اولمدیغی جهتله طوپ ادواتی یره دفن اولمشیدی .  
 شو حاله نظرآ وهایلرک اطرافی احاطه اوله رق حصر و تضییقلری لازم گلشیدی  
 اول حوالیده ایسه بر ایجیله جک صو اولوب اورایه دخی وهایلرک متریسلری  
 تصادف ایتمدی و دیگر صولر پک آجی اولدیغی جهتله عسکر صوسزلقندن مضطرب

اولاً قلرندن بشقه ذخیره و علف دخی قالماشیدی بناءً علیه برو طرفدن دخی مسالمه موافقت اولمق لازم ککله ثوبی وقعه سنده و هایلرک یدینه کچمش اولان طویلر رد اولمق و حجاج و ابنای سبیله تعرض اولمامی شرطلریله عقد صالح و مسالمه اولنوب علی پاشا درلو صعوبت و ذخیره جه پک چوق مضایقه و ضرورت چکهرک بصره یه و اورادن بغداده عودت و عزیمت ایلمشدر .

\* وقایع متنوعه \*

تبریک عید انخادان صکره صدر اعظم و سردار اکرم اولان ضیا یوسف پاشا استانبولدن اسکدازده کذار و ابو بکر پاشا رکاب هایون قائم مقاملغنده قرار قیلوب بعده اکمال لوازم سفر یه اولنهرق اردوی هایون ایله سردار اکرم جانب مصره عزیمت ایلمشدر .

ایشته اول اوانده فرانسزلر دخی عکاده منهزم اولهرق پریشان حال ایله جانب مصره عودت ایدوب کیدیورلرایدی که متعاقباً جزار پاشا طرفندن بروجه آتی مژده جیلر کلهرک مظفریت واقعه یی تبشیر ایتمشدر .

( وقایع سنه ۱۲۱۴ )

جزار پاشا مظفریت واقعه یی تبشیر و متعاقباً جرده امورینک اکلنه نوجهه تشبث ایلدیکنی تذکیر ایچون باش چوقدارینی در سعاده کوندرمش اولدیغندن در سعاده لدی الوصول کندوسنه بر اعلا سمور کورک و بر قطعه آلتون چلنک و نمالو بر زعامت و قبریس اسهامندن بر سهیم و اقدجه ورود ایدن قحاق تانارلره دخی عطیلهر و خلعتلر احسان بیورلمشدر .

و جزار پاشانک بو خدمتی زیاده مقبول و فوق العاده مشکور اولهرق تحسین و آفرینی حاوی خط هایون ایله مزین بر قطعه امر عالی و سراسره قابلو بر ثوب سمور و سراپا مرصع بر آلتون چلنک و اداره امور سر عسکری ایچون مقدمه ار سال اولنان اوچیوز کیسه دن بشقه بودفعه دخی بشیوز کیسه آچه واردو قاضیمی دباغزاده افندی یه مکه پایه سی و قبور یکلو بر ثوب قائم کورک واردو دفتر داری محمد افندی یه و ردوس متصرفی حسن بکه بر آلتون چلنک ایله برر ثوب قبور یکلو قائم کورک و انکلین دو تنمسی باشبوغی امیرال اسمیته بر ثوب سمور ایله کرانبها بر آویزه کوندرلمشدر .

اکبر جزار پاشانک بومظفریتی اولیوبده بالعکس بوناپارته عکایه ظفر بولسیدی بتون اراضیء شامیه اله کیرر و سردار اکرم اردوسی پک چوق مشکلاته اوغزار و مصلحت بتون بتون بشقه صورت کسب ایدرایدی اما مایوساً رجعتی حسبیله

شام جهتی استخلاص ایدلمش اولدقدن بشقه فرانسنزلرك دخی بو طرفده زمان ادباری باشلامش اولدی و بوجهته جزار پاشا بك زیاده صیت و شهرت بولدی و فرانسنزلرك بومغلو بیتلردن انكلتره ایله اكا طرفدار اولان ام و مال دخی زیاده سیله ممنون اولمشدر .

پوناپارته بومغلو بیتك مصرده حاصل ایده چکی تأثیراتی دفع ایتمك اوزره حقیقت حالی اهالیء مصردن ستر ایتمك یولنی طوتوب بو وادیده ایکییوز اون اوچ سنه سی ذی الججه سنك اون بری تاریخیله مؤرخاً و دیوان مصره خطاباً کوندرمش اولدیغی تخریراتنده ( برالشامدن مصره عودتمی سزه بو وجهله اخبار ایدر مکة تاریخ مکتوبدن اوچ کون صکره قیام ایله مسارعة اون بش کون ظرفنده عکادن آلان اسرا و بیراقلر ایله طرفکزه واریرم عکا دیواری منهدم و خبره ایله بلده خراب اولوب دروننده طاش اوزره طاش قالدی جمله سکانی منهزم اولدی جزار پاشا دخی مجروح اولوب دائره سی خاقله دکنز طرفنده بر برجه صوقولدی یاره سی تهله که لودر جزاره امداد ایچون کلوب عسا کر ایله مشحون اوتوز قطعه سفینه لردن اوچنی طوب ایله غرق و دردیغی اخذ ایتمك و بودرت کمی مقدماً بزدن آلمش فرقتیلردر باقیلر دخی تلف و معدوم اولدی سزله ملاقاته اشتیاق اولدیغندن آرزوی مشاهده کز ایله مصره عودت ایتمك اوزره ایم) دیو محرر اولوب بو مکتوب اشبو ایکییوز اون درت سنه سی محرری غره سننده مصره واصل اولغله فرداسی پنجشنبه کونی ترتیب دیوان اولنهرق حضاره قرائت اولمشدر .

پوناپارته ایسه عکایه کیدوب کلنجیه دك عسکرینك همان نصفی غائب ایتمکدن صکره خائب و خاسر و آتش یأس و کدر تنور دروننده مضمهر و مستتر اوله رق عودت ایتمشدر . منتظم اردو ایله چوللرده طولاشمنك نه درجه صعوبتلو اولدیغی بو کره پوناپارته بك اعلا اکلادی فرانسنزلرك بودفعه یوللرده آچلقدن و صوسزلقدن چکدکلی محن و مشقت قابل شرح و بیان دکدر و التمش درت کون تمتد اولان عکا محاصره سننده فرانسنز عسا کری انواع متاعبه کرفتار و عودت لرنده درلو بلالره دوچار اوله رق کیمی خسته و مجروح و کیمی بکنزی صراروب بدنلرینه ضعف و هزال کلکله مانند جسم بی روح اولوب خسته لقدن تلف و دانة طوب و تفنکه هدف اولنلره غبطه ایده جک برحاله کلشدر ایدی . و محرک او تنجی کونی پوناپارته آلائی والا و دبده بی همتا ایله مصره داخل اولدقده عسا کرینك یوزلرنده غبار تعب و انکسار و ناصیه حاللرنده آثار کدر و اغبرار کون کبی نمایان و آشکار ایدی . مع هذا پوناپارته اصلاً اثر فتور کوسترمیوب کویا مظرفراً عودت ایتمش کبی اوزبیکده



واقع سراینه نزول ایتدکده بالورل ترتیبیه مشغول اولمشدر . حالبوکه بعض شعرای عرب طرفدن جزارک مظفریتنه دائر نظم اولنان اشعار لطاقشعار عربستانده داستان اولهرق السنه انامده تذکار اولتمقدمه ایدی . بعده دیوان مصر طرفدن اولوق اوزره بالجمله بلاد مصریه اهالیسنه خطابا عکا سفیرینک تفصیلاتنه دائر یوناپارتهنک قلمه آدرمش اولدینی بیاننامه طبع وتمثیل ایله محرک اون طقوزنجی کونی زقاق باشلرینه یاشدرلمشدر .

خلاصه مؤداسی بودرکه جناب حق قرآن کریمده ( ولاتبعوا خطوات الشيطان ) وینه برحمانده ( ولا تطیعوا امرالمسرفین الذین یفسدون فی الارض ولا یصلحون ) بیورمش اولدیغندن عاقل اولان برفالغه دوچار اولزدن مقدم امورنده تدبیر ایتک کرکدر ای معاشر مسلمین سزه خبر ویریرزکه یانجیسارک کلامنه قولاق آصمیه سز زیرا ایشلیدیکنزه صکره نادم اولورسکنز امیرالجیوش الفرانسایه محبالملة الاسلامیه یوناپارته عادلیه عسکریه نازل وبابالنصردن مصره داخل اولدی جمیع علما وواجقو وارباب اقلام واعیان تجار کندوسیه برابر اولوب اهل مصر دخی سیرینه عازم اولدقلرنده اولکی کوردکبری یوناپارته حضر تلرینک شخصی حاضر ومشاهد بولدقلمی کبی ناسک یلانلری ظاهر اولدی . ( شرح الله صدره للاسلام ) آنک حقنده اخبار کاذبه نشر ایدنلر اسافل عربان ایله برطاقم فراریلدر بوندن مرادلری رعیهنک هلاکی واهل اسلامک تدبیری وواردات دیوانیهنک تعطیلدر آنلر عبداللهک راحتق ایستمز لر حالبوکه شدت ظلملرندن ناشی جناب حق آنلرک دولتی ازاله ایلمشدر ( ان بطش ربک لشدید ) وبزه خبر ویرلمشدرکه الفی بک اشقیای عربانی وبرطاقم اهل طغیانی باشنه جمع ایله شرقیه اهالیسنی افساده اجتسار ودولت علیه اردوسی حاضر دیو نشر اراجیفه ابتدار ایدیورمش حالبوکه دولت علیه اردوسی حاضر دکلدن بوخبرک اصلی یوقدر آنک بوندن مرامی خلقی تغلیط ایله مهلکهیه دوشورمکدر ننه کیم ابراهیم بک دخی غزهده ایکن بووادییه سلوک ایله ساخته فرمانلر نشر ایدرک خاقتی مصائبه دوچار ایتمش ایدی صعید اهالیسی مملکتلرندن فراریلری طرد ایتدیلر زیرا اشقیا قرینلریله برابر طوتیلور بوجهتله اهل صعید عقل ورویتجه اهل بحریدن دهاکوزل طورامش اولدیلر وینه سزه خبر ویریرزکه جزار احمد پاشانک جزار دیو تلقیب اولنسی قتل نفوسه زیاده منهمک اولدینی واخیار واشرافق فرق ایتدیکی اچوندن اشرار عربان واسافل عشایردن وفراریلردن باشنه برطاقم خلق بریکدیروب مرادی مصری استیلا ایدی آنلرک اجتماعی دخی خلقک اموائی اخذ ایله هتک عرض

غرضه منی ایدی لکن تقدیر الهی اکا مساعد اولدی ( والله یفعل ما یشاء ویختار )  
 و جزار پاشانک برولره تجاوز ایتمک اوزره عرشه عسکر کوندرمسی اوزرینه  
 سر عسکر پوناپارته دخی توجه و جزارک عسکرینه غلبه ایدرک عرشه ضبط ایتدکن  
 صکره غزه یه واروب اهلایسنه رای و امان ویره رک شعائر اسلامیه نیک اقامه سنی امر  
 وتنبیه و علما و تجار و اشرافه اکرام ایلدی بعده رمله یه واروب اوراده موجود  
 اولان پکسماد وارز و شعیر ایه جزارک مصره کک ایچون تمیئه ایلمش اولدینی ایکی  
 بیکنن زیاده قربه لری اخذ ایتدی صکره یافه یه توجه و اوچ کون محاصره ایدوب  
 اهلایسی تحت اطاعتنه داخل اولدقارندن قلعه سنی خراب ایتدکن صکره آنلره  
 غضب ایدوب درت بیکنن زیاده سنی قتل ایلدی و یافه دن جبل نابلسه توجه ایه  
 اوراده کی عساکری دخی قلم نام محله منهزم ایتدکن صکره واروب عکا قلعه سنی  
 هدم ایتدی صکره ایکی سیدنناشی مصره عودت ایتدی بری بوکه درت آبه قدر  
 کک اوزره بزه و عد ایتمش ایدی و عد ایسه احرار ناس غننده دیندر ایکنجی  
 سبب دخی عربان و فراری طاقنک بو طرفده فتنه ایقازنه سعی ایتدکارینی استماع  
 ایلمش اولمسیدر فی الواقع کلدیکی کبی فتنه ساکن و اشرار و اشقیائیل اولدی  
 آنک مصره محبتی بر امر غریبدر عقل و فکری دائما اهالیء مصر حقنده خیرلو  
 شیر یایمق و مصرده کوزل صنعتلر احداث ایتمکدر و مصره ورودنده دین اسلامه  
 محبت و نبی ذیشانه حرمت و هر کون قرآن کریمی تلاوت ایلدیکنی و مصرده بی نظیر  
 بر جامع شریف بنا ایدوبده دین اسلامه داخل اولق نیتنده اولدیغنی بزه بیلدیردی .  
 پوناپارته نیک بو اعلاندن غرض اصلیمی عکا مغلوبیتک افکار عمومیه ده حاصل ایتدیکی  
 تاثیراتی ازاله و اهل اسلامک قلبینی جلب و استماله اولوب حالبوکه بو عکا سفری  
 اشناننده مصر ملاسی فرار ایلمش اولدیغندن پوناپارته بوکره ملا افندینک اوغلی  
 حبس و تضییق ایتدکده اهل اسلام منکسر اولوب حتی مصر علماسی کندوسنه  
 مراجعتله پدری کیتدی ایسه اوغنک نه قباحتی وار و برده عثمانلویه دوستر  
 دیورسکنز ایشته بوده درسعادتن کیش اصلزاده بر چلبیدر آنک حقنده بویله  
 حقارت و قوعی سوزکنزی تکذیب ایدر و انظار عامه ده سوء ظن دعوت  
 ایلر دیو عفو و اطلاقنی رجا ایتلری اوزرینه پوناپارته علمانک شفاعتته طیانه میوب  
 مومی الیهک سیلینی تخلیه ایتمش ایسه ده مصر دن چیقوب کیتمسی امر ایلمش  
 و بووقته قدر ملا افندینک اوغلی کندی یرنده وکیل و نائب مقامنده طوتیلور ایکن  
 بونک اوزرینه بر بشقه سنک نصی لازم کلکله پوناپارته طرفندن شیخ احمد عریش  
 مصر قاضیسی نصب ایدلمشدر .

بر بلده به قاضی نصبی ایسه حکدارینک حقوق مقدسه سندن اولدینی حالدہ شیخ  
 عریش ایچون در سعادتن فرمان جلی قابل دکل ایدی فقط پوناپارته مصره کله لیدنبرو  
 اهل اسلامی اغفال ایچون دولت علیه ایله متفق اولدینی افاده ایده کیش ایسه ده  
 بو افاده سنک خلاف واقع اولدیغنه هر کس مطلع اوله رق ارتق ایشک کیزلیه جاک  
 یری قلامش ایدی و دونمائی هایون ایله کوسه مصطفی پاشا اسکندریه به چیقماق  
 اوزره اولدیغندن عثمانلور ایله فرانسزلر بیننده وقوع محاربه زمانی تقرب ایتمش  
 ایدی . بناءً علیه بو کره انتخاب و نصب قاضی بچشته دائر پوناپارته طرفندن دیوان  
 مصره اجرا اولنان تبلیغاته دولت عثمانیه نك آرتق مصره حکمی قالدی و عثمانلورک  
 حکومتی کوله منلرک اداره سندن اشد و ظالمیری آنلرک مظلاندن ازیددر دیو  
 بیان و اعلان اولمشیدی .

وینه خلال محرمدہ بحریه جهتتده دنهور جوارنده بر مغربی ظهور ایدرک مغاربه  
 وهواره عربانندن باشنه بر چوق خلق طوپلانمغله اوزر لرینه بر مقدار عسا کر  
 فرانسویه سوقیله جمعیتلری طاعدلمش و غائله هنوز بر طرف اولمش ایکن پوناپارته  
 صفرک اون ایکنجی کونی اخشام طعامنده اولدینی حالدہ اسکندریه دن تخریرات ایله  
 برهچان کلوب تخریراته نظر ایتدکله اسکندریه پیشکاهنه سکسان قطعه عثمانلور  
 کیسی کلوب و طوپ و خمبره نك کثرتندن اسکندریه لیمانه یناشه میوب ابو خور  
 اوزرینه عزیمت ایتمش اولدق لرینه مطلع اولیجق زیاده تلاش ایله یرندن صیچرایوب  
 همان آتمی چکیکز دیو امر ایتمش و جنرال لرینه نشر اوامر ایله رحمانیه ده کندوسنه  
 یتشم لرینی وقاه برک دخی ده میاطندن برآ ایلرو حرکت ایلمسینی امر ایله عسا کر  
 خاصه سنی استصحاب ایدوب کیتمش ایدی رحمانیه به وصولنده دونمائی هایونک  
 ابو خوری ضبط ایله عسا کر اسلامیه کاملاً قره به چیقوب انکلیزلرک اعانه سیله  
 جسیم متریسلر انشا و هر طرفه بیورلدیلر نشر ایله اهلایی فرانسه علیهنه قیام  
 و حرکته تشویق و اغرا ایتمش و ترکرک و رودیله جمله اهل اسلام نمون اوله رق  
 اول حوالی مشایخی کلوب مصطفی پاشادن کورک کیمش اولدق لری خبر لرینی آلدقده  
 پوناپارته بتون بلاد مصره به اهل سنک قیامندن خوف ایله همان اورادن صفرک اون بش  
 تاریخیه مؤرخ اوله رق دیوان مصره خطاباً بر مکتوب کوندر مشیدی .

خلاصه مؤداسی بودر که ( لا اله الا الله محمد رسول الله ) ای اهل دیوان معلومکن  
 اولسونکه اسکندریه پیشکاهنه صغیر و کبیر سکسان قطعه کمی کلوب قلعه نك متانتی  
 کوردکلر نده استیلادن مایوساً ابو خور جانبنه رجوع و قره به عسکر دوکمه که ابتدار  
 ایلمشلر . اوزر لرینه دفعهً هجوم ایتیبو حاللری اوزرینه ترک ایلدم تا که کیلردن

تمامیاه چیقوب کرکی کبی یرلشسونلرده جمعیتلری اوزرینه هجوم ایله اطاعت  
ایتمیلری اعدام و مطیع اولنلری زنجیر بند اوله رق مصره ارسال ایله کسب نام ایده می  
بودونماک کلیشدن غرض کوله منلری و عربانی جمعه نهب بلاد واضرار عباد در  
و بودونماده برچوق موسقوعسکری واردرکه موحدین عنسدنده نصل مکروه  
برقوم اولدقلری ظاهر و آنلرک اهل توحیده عداوتلری امر باهر در بونلراهل  
اسلامی کریه کوروب قرآنه احترام ایتمزلر و کفر وضالئلری حسبیه اوج اله اعتقاد  
ایدوب الله ثالث ثلثه در دیرلر تعالی الله عن الشركاء لکن قریبا بوئلکه انلره قوت  
و کثرت الهه فائده و یرمدیکنی کوررلر زیرا انلرک بواعتقادی باطلدر بلکه موحدینه  
نصرت و یرن انجق واحدصمد اولان اللهدر ای معاشر مسلمین سزه خبرو یریرزکه  
آنلره مصاحب اولنلر کفره لئام اولان خار جیلرله اتفقلری سببیه نبی ذی شان  
علیه السلامک وصیتته مخالفت ایتمکلری ایچون (مغضوب علیهم) وصفه محل اولورلر  
اسلامک دشمنلری اسلامه نصرت ایلمز واه اول کسه لرک حائنه که الههک دشمنلری  
واسطه سیله نصرت طلب ایدرلر حاشا که کفار دن استمداد ایدنلر مؤید اوله بر مسلم  
نصل صلیب یرانغی آلتنده اولان برکمی به بنوبده هر کون فرد صمد اولان الله تعالی  
حضر تلرینک حقنده کفارک خرافات و حقاراتی استماع ایلر شوخالده اول مسلمک  
ضالانده کافر اصلیدن اشنع واقیح اولدیغنده شبهه یوقدر (دیو پوناپارته برمدت جزئیّه  
ایچون اولسون افکار اهالینک حرکت و هیجانی تأخیره مسارعت ایلمشدر .

بعده رحمانیه ده عسا کری مجتمع اولدیغی کبی ابوخوره واروب عسا کر اسلامییه  
متیس آرقه سنندن قالد رmq مشکل اولدیغی تخطر و حالبوکه بونلری دفع ایتمک  
کندوسنجه بر مسئله حیاتیه اولدیغندن هر نصل اولور ایسه اولسون بوکا بر چاره  
بولق فریضه خالدن اولدیغی و بوکا فدایلیک یولنده بر هجوم واقبحامدن غیری چاره  
اولدیغی تذکر ایله اول امرده سواری بی کوزندن چیقاروب شوپله که جنرال  
مورا سواری ایله متریسلر اوزرینه هجوم ایتمک و دوشنه قالانه باقیموب هان ایلرو  
کیتمک اوزره ترتیب ایتمشیدی .

جنرال مورا دنیا ده برنجی سواری ضابطانندن صحیحاً جسور بهادر بزات اوله رق  
اولوجهله فداکارانه هجوم ایتمکده متریسلردن دخی شدتلو آتش ایلمکله فرانسه  
سواریسی پک زیاده قیریلوب و حیواناتک اکثری اوریلوب اوزرلرنده کی عسا کر  
کیمی مجروح و کیمی بی روح اوله رق یره دوشمکده اولدقلری حالده صاغ قالانلرینه  
ایلرو کیتمکده اولدقلرندن عسا کر اسلامییه سوارینک مدافعه سنه حصر نظر ایدوب  
پوناپارته ایسه بوآننده پیاده سنی صاغ و صولدن سرعت ایله هجوم ایتمیره رک بغته

فرانسزلر متریسلر ایچنه داخل اولیجق عساکر اسلامیه شاشیروب منهزم اوله رق  
برمقداری مصطفی پاشانک اوغلیله برابر ابو خور قلعه سنه قیامش و باقیسی کیمی  
شهید و مجروح و کیمی مصطفی پاشایله برابر اسیر اولمشدر .

مصطفی پاشا مجروح اولدیغی حالدده پونا رته نك حضورینه کتورلد کده پونا پارتیه جیندن  
مندیلنی چیقاروب و یاره سنی صاروب یاننده اجلاس ایله اکرام ایلمشدر . بعده  
ابو خور قلعه سنی درت کون طوپ و خمیره ایله دوکد کدن صکره ایچنده کیلر رای  
وامان ایله قلعه یی تسایم ایتملر ایله مصطفی پاشانک اوغلی دخی طوتیلوب پدرینک چادرینه  
کوندرلمشدر بونک اوزرینه پونا پارتیه مجروحینی کیلره وضع ایله مملکتلرینه کوندروب  
صاعلم اولتلیری تحت اسارتده آلیقومه مشدر معلم نیکولانک تحریرینه نظر آ بو صورتله  
دوچا اسارت اولان عساکر اسلامیه نك عددی اوچ بیکه بالغ ایتمش .

بو وقعه صفرک یکریمی دردنده واقع اولوب پونا پارتیه طرفدن درحال مصرده کی  
قائمقامنه تبشیر اولنمغله مصرده اوچ کون شهر آیین ایلمشدر .

فقط بو محاربه ده برخیل عساکر فرانسویه ایله برابر جنرال ترکوتلف اولوب  
جنرال مورانک دخی چکه سنه بر قورشون اصابتیله یاره لشمش و مورا نادر الوجود  
بر جنرال اولوب یاره سی ایسه خطرلو اولدیغندن پونا پارتیه پک زیاده کدرلشمش ایدی .  
مع مافیله بو غلبه ایله پونا پارتیه برمدتجک ده ا مصرده طوره بیله جک بر حال اقتدار  
حاصل ایتمش و بو وقعه مصر الکاسنده اک صکره کی مظفریتی اولمشدر .

اوائل ربیع الاولده پونا پارتیه اسرایی استصحاب ایله مصره کلوب سائره عبرت  
و کندوسنجه نشانه مظفریت اولمق اوزره اوزبیکه میداننده آنلری خلقه تاماشا  
ایتدیرمش و مصطفی پاشانی مکرماً جیزه یه کوندرمشدر .

مصر اهالیسی کندولرینی اسارتدن تخلص ایچون کلش اولان دینداشلرینک بویله  
کرفتار بند اسارت اولدق لری کوردکلر نده پک زیاده ملول و محزون اوله رق آثار  
حزن و کدر یوزلرنده نمایان ایدی حتی تبریک قدوم ایچون پونا پارتیه نك دیوانه  
کلان علما و مشایخ و اعیان و مأمورینک ناصیه حاللرندن دخی بو حالت حزن و اغرار  
احساس و استشعار اولنمغله پونا پارتیه جمله یه خطاباً (ای علما و اشراف تعجب ایدیورمکه  
بنم مظفریتدن ناشی سز می معوم و محزون کور یورم حالا بنم قدریمی بیلمیورسکز  
بن سزه کرات ایله مسلم موحد اولدیغمی و محمد علیه السلامه حرمت و مسلمینه محبت  
ایتدیکمی سو یلدم سز حالا تصدیق ایتمیورسکز سز صانیورسکز که بنم بو سوزلرم  
سزدن قورقدیغم ایچوندر حالبوکه بنم قوت بطش و اقتداریمی کوز کزله کوردیکز  
وقولا غکزله ایشدکز و فتوحات و مظفریتی تحقیق ایتدیکز بنه سزه سوزم بودر که بن

محمد نبی سورم شونك اچون كه او دخى بنم كې بر شجيع ذات ايدى وآنك ظهورى دخى بنم ظهورم كبيدر بلكه بن آندن دها بيوكم زيرا بنم غزواتم آندن زياده در بوندن صكره اوله جق مظفر يت وقتو حاتمى دخى كوره جك و ايشيده جكسكز اكر سز بنم قدرىمى بيلمش اولديكز بكا عبادت ايدر ديكز وسزلر ذليل و ايتديكز ه پشيمان و بزم كونا رمزه متحسر و كريان اوله جغكز وقت كله جكدر بن نصارايه بغض ايدوب آنلك دينى ترك وكليسالىنى هدم و پاپاسلىنى قتل و حاجلىنى كسر ايلدم بونكله برابر كوره يورمه كه آنلر بنم نمونيتمه نمون و حزن و كدرمله مخزون اوليورلر ينه نصرائته عودت ايله مرتمدى اولديغى استيورسكز مرتمد اولسم سز بوندن برفانده كوره مزسكز اوليله ايسه آرتق بو حاللى ترك ايديكز و اللهك امرينى قبول ايليكنز و فريخ و مطمئن اولكز كه صلاح و فلاح بوله سكز حالبوكه بن سزه بك چوق نصيحتلر ايتمش ايدم مقتضاسيله حركت ايدر سكز فلاح بولورسكز و اكر خلافه كيدرسكز نادم اولورسكز ) ديمى اوزرينه حضارك جمله سى متحير اوله رق كمنه طرفندن جوابه تصدى اولتماشدر چون كه پونا پارتنه نصرائتي ترك ايتمسيه مسلمان اولديغنه اينانيلو يرسون ديمك ايستيوردى مع هذا كه هر حال و قالى بروفق (بانك عصيان ميزند ناقوس استغفار ما) ديسزلكنى ايما ايدبور و نبوتى هيچ بر مسلمانك قبول ايدمه چكى بر نوع ملحدلك يولنده تفسير ايدرك نصرائتي ترك ايتمسيه دين اسلامدن دخى صد مرحله اوزاق دوشديكنى اعلان ايتمش اولديغندن بشقه ميدان محاورده ده عنان مقالى ضبط ايدمه ميوب فرعون كې الوهيت مرتبه سنه قدر حقيشيمور ايدى . بناء عليه حضار طرفندن اكا لا ونعم بر جواب و يرملك مشكل ايدى :

### \* دول اوروپايه دائر بعض وقايع \*

جد سادسه اشعار اولنديغى اوزره اوستريا دولتيه فرانسه جمهورى ميانه لرنده كې روابط اتفاقه دائر قاموقور ميوده بر عهدنامه امضا اولنوب جرمانيا مسائلى بشقه جه مذاكره اولنق اوزره راستاد شهرنده بر مجلس مكمله عقد اولمش ايدى . اوستريا دولتى ايسه پونا پارتنه دن كورديكى مغلوبيتك انتقامى آلىق و غائب ايتديكى نفوذى يرينه كتورمك اوزره اول وقتدنبرو حاضر لانتقمده اولوب نهايت راستاد مكمله سندن چكيله رك اسويچرده ده واقع غريزون قطعه سنى ضبط ايله فرانسه جمهورينى اعلان حرب به مجبور ايتمشيدى و روسيه دولتى دخى اوستريايه اعانه التمش بيك عسكرله مشهور سواروف نام جنرالى كوندركمكه فرانسزلر بوايكى دولتك قوتنه طيانه ميوب اوچ آى طرفنده پريشان اوله رق ايتاليان ال چككمه مجبور

اولمشدر فقط فرانسه‌نك مشهور ماسينا نام جزالی اسويچره ده طيانوب طور مقده ایدی .

فرانسه عساكرينك بوججه وقوعه كلان مغلوبتلى فرانسه اهاليسنه پك زياده اندیشه و خلجانى موجب اوله رق پوناپارته نك ايام فتوحاتى ياد ايله عامه نك نظرى اكا ميل و توجه ايتمكده ایدی .

جنرال سواروف بو غلبه لر ايله مغرور اوله رق متفق اولان اوستريالولرى هيچه سايار اولديغندن و آنك بومثللو اطوار متكبرانه سى اوستريالولرك كوچنه كلك حسييله ميانه ده حاصل اولان اتفامز لقدن ناشى روسيه و اوستريا عسكرلى آرو آرو جنك ايتمكه باشلامش و برده مالطه جزيره سنك ضبطى روسيه لولرك امل اولوب بوايه انكلتره پولىتقسه مغاير اولديغندن انكلتره دولتى دخى روسيه اردوسنك ساحل بچردن تباعدى ايتردى . بناءً عليه سواروف اسويچره اوزرينه سوق اولمغله بيك ایدی يوز طقسان طقوز سنه عيسويه سى ايلونده ماسينا ايله جنكه طوتش دقده مشهور زوربخ محاربه سنده مغلوب و مهزم اوله رق اون بش كون ظرفنده يكرمى بيك روسيه لو والتى بيك اوستريالو تلف اولمشدر .

غريبدركه پوناپارته عكاده مهزم اوله رق شرق طرفنده كى شهرته نقيسه كلديكى كى المانيا و ايتاليا طرفلرنده كى فرانسز اردولرى دخى مغلوب اوله رق فرانسه پولىتقسه سى خيلى اشاغى دوشمشيكن پوناپارته نك ابوخور و قعه سنى قزانوبده مصر جانبنده اعاده نفوذ ايتديكى ائنده ماسينا دخى اشبو زوربخ محاربه سنى قرانوب فرانسه پولىتقسه سى يكيدين قوت آلمشدر .

سواروف بومغلوبتدن پك زياده محجوب اوله رق بونى اوستريالولرك سوء تدبير و تكلسنه حمل و اسناد ايتمكه روسيه ايله اوستريا ميانه لرينه بر مرتبه ده تفرقه و برودت دوشهرك دولتينك اتحادينه ضعف و سكتته عارض اولوب بودخى فرانسه جمهورينه كوره بريوك محاربه قرايمقدن ده زياده منفعتلو ایدی .

فلمنك طرفنده دخى انكلتر و اوستريا عسكرلى فرانسزلر اوزرينه هجوم ايدر ك ايلك دفعه لرنده غالب كشمش ايسه ده مؤخرأ فرانسزلر غلبه ايتمشدر بو صورتله فرانسه جمهورينك اقبالى تجدد ايتمش ايسه ده ايتاليانى لندن چيقارمش و اولكى عظمت و شانى تماميله يرينه كاه ماش ایدی .

دول اوروپا بربرر انكلتره اتفاقه داخل اولمقده اولدقلى حالد اسپانيا دولتى منحصرأ انكلتره عليه نه اوله رق فرانسه جمهوريله متفق اولوب دولت عليه ايسه انكلتره و روسيه دولترييله فرانسه جمهورى عليه نه عقد اتفاق ايلمش اولديغندن

اسپانیا دولتیه قطع رسته مساله ایتسفی در سعادتده بولتان انکلتره و روسیه ایلیچیری اشبو اون درت سنه سی اوائلنده مصرانه تکلیف ایتلیله در سعادتده مقیم اسپانیا مصلحتگذاریه ممالک محروسه ده کی قونسلوسلرینک اون بش کون طرفنده مملکتلرینه کیتملری جانب باب عالیدن امر و تنیه بیورلمشدر .

خیلی وقتدنبرو انکلیزلر مالطه جزیره سنی ابلوکه ایتمکه اولدقلری حالده قوه بریهلری درجه کفایه ده اولدیغندن هنوز فتحنه ظفریاب اوله مامشدر حالبوکه فرانسه لونک آفدکنده کی قوتی بتون بتون کسر ایتمک ایچون بو آظه نك الارندن نزعی اهم ایدی بناء علیه قورفده بولتان دولت علیه و روسیه دونماری دخی بو ائاده اول طرفه کیتمک اوزره ایتالیا سواحلی طولاشه رق پارمو ساحلنه لدی الوصول سیچلیا قرالی طرفدن رسم مهمانوازی اجرا و ذخائر ولوازمات سائر اعطاسیه شریطه اتفاق ایفا اولنوب انجق اول خلالده دونمای هایون لوندا تندن بعضیلری شهره چیقهرق اخذ واعطایه ابتدار ایتدکلرنده الارنده کی آچه لک کیفیت و کیتی اهلینک مجهولی اولمق حسیه وارد اولان سوال وجواب معارضه و مشاجره یه منجر اوله رق طرفیندن بر قاج کشی تلف اولدقدنصرکه ضابطان معرفتیه غوغا باصدیرلمش ایسه ده بونک اوزرینه لوندا ت هان کیلره رکوب ایله قورفیه عودت ایتشدر و دونما عسکری یکر می آیدنبرو مستخدم اولمق حسیه بیتاب اوله رق عودت آرزوسنده بولندقلری قپودانه احمد بک طرفدن انها اولنغله همان عودت لرینه رخصت و یرلمش اولدیغندن دونمای هایون مالطه سفرنده اعمال اولنه مامشدر .

### \* وقایع شتی \*

بالاده اشعار اولندیغی اوزره و دین اردوسنک انهمای ائناسنده مصر مسئله سی ظهور ایتمکن ناشی دولت علیه فرانسه سفرینه حصر افکار ایتمک لازم کلوب بو جهته قپودان حسین پاشا دخی در سعادتده کلشیدی . و آرتق و دین جهتی ایله اوغراشمغه وقت مساعد اولیه جفی اکلاشدیغندن اول حوالایی پاسبان اوغلی عثمان آغانک یدتحمکنده بر اقق امور ضروریه دن اولدیغنه بناء مقدما ازاله سنه مأمور اولان قپودان پاشانک توسطیه عفو اولنهرق عهده سنه قپوجی باشلیق رتبه سی و متعاقباً اشبو اون درت سنه سی محرمنک اون یدیسنده رتبه وزارتله و دین محافظتلی توجیه اولنمشدر .

بر منوال سابق سردار اکرم مصر سفرینه سبکار اوله رق عزیمت ایتمکه او جاقلو در سعادتده قالمش اولدقلرندن بو ائاده موجب معینه لری چیقوب اوائل صفرده



دور واقع اولمغین قائم مقام پاشایه خطاباً بر قطعه خط هایون اصدار بیولمشدر .  
صورتی زیرده (٧) رقیله ایراد اولنور .

فائق افندی مجموعه سنده دیر که طرف حضرت پادشاهیدن مواجده دور کورکی  
وخط وخنجر کلوب خط هایون قرائت اولندقدنصکره بولنان صدر اعظم یاخود  
قائم مقام هر قغیسی اولور ایسه اولسون عرض او طه سنه کیده جک اولدقده سر کیده  
برابر قعود ایدنردن دفتر دار و سپاهییر اغاسی بولنانلر قولتوغنه کیروب عرض  
اوطه سنه قدر کتورمک رسوم معتاده قدیمه دن اولوب اوانلده جزائرلی قبودان  
حسن پاشا قائم مقام و بیکی حسن افندی دفتر دار واکر بیوزلی بکر پاشا سپاهییر  
اغاسی بولنوب رسم مذکور اجرا اولندقده حسن افندی بر متعظم حریف اولغله  
جانی صیقیلوب قائم مقامی رینه اجلاس ایلدیکی ائناده ایشته افندم بوده بویله  
بر رسم ایمش دیمش حسن پاشا امی آدم اولغله بولکلامک معناسنی تفهم ایده میوب  
لکن ابوبکر پاشا بیکی حسن افندی به اول زمان در جه سز غیظ ایتمش نیجه زمان  
مرورنندنصکره بکر پاشا قائم مقام اولوب شریف پاشا دفتر دار اولغله رسم مذکور  
اجرا اولندقده در عقب مشارالیه بوقضیه یی طوتدیروب حسن افندی کمال تعظمندن  
رتبه وزارت و قائم مقاملق مسندینی استحقار ایله حسن پاشایه شویله بر معامله ایلدی  
وزرایه بویله معامله دفتر دار مقوله سنه یاقیشورمی دید کده شریف پاشا و بولنانلر  
کولوشوب بکر پاشا بونجه علم و معارف و عرفان صاحبی ایکن تبسملرینک سببنی فهم  
ایده مامش دفتر دارلق مراتب سامیه دن ایکن اول رتبه به مقوله تعبیر اولننجه سائر  
رتبه لک زره قدر اعتباری اولماق لازم کلور دیره ک بوققره یی بیلان طرفا مناسبت  
کلدکجه لطیفه معرضنده سن نه اولدم دیرسین دخی رئیس و دفتر دار مقوله سی سین  
دیرلر و قائم مقام مشارالیهی تخطئه ایدرلر حالا قضیه معلومی اولان خواص  
بیننده جاریدر .

بو اوانده قبودان دریا حسین پاشا دخی آق دکرزه بادبانکشای عزیزت اولمشدر .  
انجق بالاده بیان اولندیغی اوزره ابوخور وقعه سنده عساکر اسلامیه نیک منهزم و کوسه  
مصطفی پاشانک اسیر اولدیغی خبری ارکان دولت علیه یی مکدر ایتمشیدی . قبودان  
پاشا دخی بوسفرنده قلیجینی ابتدا راتب افدینک سرفلا کتزدده سنه دنه مشدر .  
شویله که : جلد سادسده بیان اولندیغی اوزره راتب افندی اصحاب فضل وهنردن  
اولوقتک حکمنجه پک دکرلی بر ذات اولدیغی حالده خصمائی کندویه بعض مفتریات  
اسنادیله بیک اکیبوز اون بر سنه سنده ریاستدن عزل ایله ردوسه نفی ایتدیر مشلر  
ایدی واکا دخی قناعت ایتیبوب بوکره قبودان پاشا معر قتیله اعدام ایتدیر مشلردر .

مومی الیه فی الاصل طوسیہ ساکن لرندن وزمرهٔ علمادان چلنگیر علی افندی نام ذاتک صلبندن تولد ایدوب سن تمیزه بلوغنده بر تقریبه در سعادتہ عازم و دیوان ہایون آمدجیسی ادھی افندی دائرہ سنہ ملازم اولہرق او قویوب یازمغہ شروع ایله آزوقت ظرفندہ بر مقتضای استعداد ذاتی تحصیل کمال ایتمش وقلمہ دوامندہ هنر و معارفہ شہرت بولمشیدی . خلیل حمید پاشا آمدجیاکنندہ حیثیت ذاتیہ سنہ اعتباراً آدمی او طہ سنہ مأمور و خلیل پاشا تذکرہ جیلکہ نقل اولدقدہ یرینہ آمدجیلک ایله منظور اولیای امور اولمشیدی . بعض وسائط ایله سلطان سلیمک توجه مخصوصہ مظهر اولہرق مقام ریاستہ کتورلمسی ملتزم شاہانہ لری اولدینی خالدہ خلاف کیرانی مانعت ایدہ کلوب نہایت بومنصبہ نائل اولمش ایسہدہ خصمائی علیہنہ قیام ایله بر منوال سابق عزل و نفی ایتدیردکن بشقہ بوکرہ اعدامنہ سبب اولمشدر فقط کندوسی اولوقتہ کورہ نادرالوجود بز ذات اولدینی خالدہ کندویہ خصمانک اسناد ایتدیکی جنحہ وقصور دن بریء الذمہ اولدینی درکار اولمسلیہ سبب اولنلرہ اصحاب وقوف و معارف الی الان دشنام ایتمکدہ درلر دیو فائق افندیکن ذیل سفینہ سندہ محرردر سر مقطوعی در سعادتہ کد کدہ سیاستکاہہ وضع ایله تشہیر اولنمیوب بوغاز ایچندہ قاکلیجہ نام محلہ کندوشیخی اولان شیخ عطاء اللہ نقشبندی زاویہ سندہ مدفوندر (ایلیہ راتب افندی مسکن مولی جنان) مصر اعی وفاتنہ تاریخدر . بوئنادہ روم ایلی والیسی زینخہلی حسن پاشا حلول اجل موعودیلہ وفات ایلمش اولدیغندن بعض توجیہات وقوعہ کلمشدر .

وینہ بوئنادہ مشاہیر علمادان منیب افندی سیر کبیر ترجمہ سنی اتمام ایتمش وعاصم افندیکن اترخامہ سی اولان برہان قاطع ترجمہ سی طبع و تمثیل ایتدیرلمشدر . فرانسزلرک مصری استیلا وبعده برالشام طرفنہ تجاوز ایتلری حسبیلہ حوالیء شامیہنک اختلال احوالی ابو حمزہ نام شخص فرصت اتخاڈ وشام شریف مفتیسی محاسنی زادہ ایله مفتیء سابق شیخ مراد زادہنک رأی و موافقتی ویرلی قول اغامی علی اغانک اتفاقی ایله تنفذ ایدرک قلعه بی ضبط ایله شام شریفندہ کیف ماشا تصرف داعیہ سنہ دوشمش و محاسنی زادہنک یوناپار تہ ایله کیزلی مخبرہ سی طویلمش اولدیغندن سردار اکرم اردوی ہایون ایله شام شریفہ موصلتندہ ابو حمزہ ایله علی اغانی اعدام و محاسنی زادہنی بیرة الفراندہ قلعه بند و مراد زادہنی حلبہ نفی ایتمشدر . بالادہ بیان اولدینی اوزرہ جزار پاشا امیر بشیری عزل ایله یرینہ امیر یوسف اوغلرینی کچورمک املندہ اولوب بناءً علیہ صیدا جانبہ عسکر سوق ایلمش اولدیغندن امیر بشیر دخی مشایخ جبلی جبلہ مدافعہ قیدینہ دوشمش ایدی انکلکز امیرالی اسمیت ایسہ امیر بشیری فوق العادہ تصحب ایدرک بو یولہ در سعادتہ

تحریرات مخصوصه کوندرمشیدی جزار پاشا امیر بشیر حقنده اولان افکارنده اصرار اوزره بولندیغی حالده سردار اکرم اردوی هایون ایله برآ کلمکده اولدیغی شایع اولیجق توقف ایله اجرای مافی الضمیرینی تأخیر ایلمشیدی سردار اکرم حلب جوارینه ورودنده امیر بشیر برآمور مخصوص ایله چند رأس اسب تقدیم ایدوب مأمور مومی ایسه حلب جوارنده سردار اکرم ایله لدی الملاقاة جزارک مظلّم و تعدیانندن و امیر بشیرک صدق و عبودیتندن بحث ایلمش و سیاق افادهسی امیرال اسمیتک اشعاراتنه توافق ایتمش اولدیغندن امیر بشیر حقنده اظهار میل و توجه ایتدکن بشقه حمایه وصولنده امیر بشیر طرفندن اردوی هایونه کینلو ذخیره یتشدیرمکله زیاده ممنون و منشرح اوله رق شامه وصولنده امیر بشیره التفتانامه تحریر ایله تلطف ایتمش و بقاع قریه لرینه بیک غراره بغدادی توزیع ایلمسینی امر ایلمش اولدیغنه مبنی امیر بشیر دخی مخصوص مباشر لر ارساله بو ذخیره یی طوبایوب شامه کوندرمشدر .

جزار پاشا ایسه ذاتاً سرکش برآدم اولدیغی حالده بروجه مشروح پونا پارتیه غلبه ایله بر بیوک شان و شهرت قزانوب بو جهته غروری ایتزاید ایتمشیدی . متعاقباً ضیا پاشا سردار اکرمک ایله اول طرفه توجه ایدیحک بالطبع سرعسکر لکک حکمی قالمش اولدیغنه و کندوسی متغلبه دن اولمق حسینه جانب دولتدن امین اوله مدیغنه مبنی سرعسکرک ایله امارت حاجدن استعفا ایلدیکندن شام ایالتیه امارت حاج عظم زاده عبدالله پاشایه و مصر ایالتی نصوح پاشایه توجه و جزار پاشایه دخی اردو ترتیبانندن معیتنده موجود عسکر و مهماتی ارسال و ذخائر و جهات سائر ایله اردوی هایونه اعانه ایلمسینی اشعار و تنبیه اولمش ایسه ده ترتیباتک ارسالندن اغماض و امر اعانه دن اعراض ایلمسینی اوزرینه سردار اکرم پک زیاده غضبناک اوله رق مظفر مصر دن عودتنده اردوی هایون ایله جزار پاشا اوزرینه حرکتی تصمیم ایتمش و امیر بشیره خلعت ارسال ایله جبل دروز و وادی تیم و بعلبک و بقاع و بلاد جلیل امارتنده کندوسی تقریر وابقا و فیما بعد جبل لنانه صیدا و الیرلی طرفندن مداخله اولنیموب معن اوغلارینک زماننده اولدیغی کبی حاکم جبل طرفندن بو مقاطعاتک اموال میریه سی هر سنه طوغریجه خزینئه دولته تقدیم اولمشینی امر و تنبیه و نابلس طرفنک امر محافظه سنی دخی اول طرفده فرط شجاعتله مشهور اولوب جزاردن بر نقطه قدر فرقی اولان جرار اوغلنه و سائر طرفلری دخی بویله برر ذاته احاله و توجه ایلدکن صکره اردوی هایون ایله جانب مصره کیتمشدر .

جزار پاشا اول حوالیجه زیاده قوت و نفوذ مالک اولدیغی حالده اطوار باغیانه

ایله سردار اکر مدن بیکانه طور دیغندن پوناپارته محاربه سنده کی مظفر بتدن طولای  
 نظر دولته قزاقمش اولدینی حیز و اعتباری ضایع ایلمشدر واقعا اول عصرده  
 برآدمک اثبات جنایتنه چندان اعتنا اولتمسزین بعض ظنون وافکار اوزرینه آدم  
 اعدام ایدیورمک دخی اصول جاریه دن اولدیغنه و هرکس جانی محافظه امرنده  
 اتخاذ ایتدیکی حرکتده معذور کورلدیکنه نظراً جزار پاشانک دخی معذورتی جای  
 بحث و مطالعه در فقط جزار پاشا یرنده ثبات ایله ذاتجه امین و مستریح اولدینی  
 حالد اردوی هاپونه معاونت ایدرک دولت و ملتته صداقتی و ارایسه ابرازو اثبات  
 ایده بیوردی حالبوکه سردار اکر م شام شریفدن جانب مصره حرکت ایتدکن صکره  
 جزار پاشا اوامر علیه مخالفت ایله سرکشانه حرکتدن خالی اولماشدر .  
 از جمله امیر بشیر سردار اکر م بروجه مشروح واقع اولان امر و تنبیهی اوزرینه  
 ارتق جزار طرفندن کندوسنه تسلط اولنه میه جنی ظنیه بر معتاد اموال میریه نک  
 استیفا سی ضممنده دیر القمردن حرکت ایله مشایخ بنی عماد قریه لرینه مواصلتنده مشایخ  
 مومی الیهیم نواحی بقاعه فرار و حاصییا و وادی التیم حاکمی اولان امیر قاسم شهبانی ایله اتحاد  
 ایدرک امیر یوسف اوغلرینه معین اولمق شرطیله کندولرینه امداد اولنسی ایچون جزاره  
 خبر کوندرملری اوزرینه جزار پاشا خاصیه بیه بر مقدار عسکر کوندر مکله کرده مخالفین  
 عساکر جزار ایله برلکده بقاعه وارد قلمزنده امیر بشیر طرفندن دخی شیخ بشیر  
 جنبلط ایله شوف عسکری بقاعک جانب غریبسنه کوندرلش اولدیغندن طرفین برکون  
 اخشامه قدر جنک ایدوب کیچه ایرشمکله لرلرینه عودت ایتشلر و امیر بشیر شام و ایسی  
 عظم زاده عبدالله پاشادن عسکر استه مش اولوب اودخی حماده بولنان دلیل باشی ملا  
 اسماعیله امر نامه ارسال ایله امیر بشیر دولتجه جبل حاکمی نصب اولنمش ایدوکنه مبنی  
 کندوسنه اعانه لازم اولدیغنی تعریف و توصیه ایتکله ملا اسماعیل در حل بقاعه  
 واروب عساکر جزارک سر کرده سنه کلدکلری یره عودت ایتلری ایچون خبر  
 کوندر کرده دلیل باشی او جاغنده کندوسی اسکی برآدم اولوب جزار پاشا عسکرینک  
 ایلرو کلنلری هپ آنک چراغلری اولدیغندن همان دونوب عکایه کیتمشلر جزار  
 پاشا کیفیته مطلع اولدقده بر آتش غضب اوله رق همان بالجه عسکرینی امیر یوسف  
 اوغلر یاه جبل لبنان اوزرینه سوق ایدوب جبل اهالیسنک اکثری دخی عرض  
 مطاوعت ایتکله امیر بشیر چاره سز بلاد جیله صا ووشوب شام و ایسی ایله مخبره بیه  
 مبادرت و سردار اکر مه عریضه ارسالیه عرض شکایت ایلدیکی ائنده امرال اسمیت  
 طرفندن کندوسنه بر قطعه تسلیمه کشیدی امیر یوسف اوغلری ایسه دیر القمره  
 جیقوب جبل حکومتی ضبط ایله جزار پاشایه اعطاسنی تعهد ایتدکلری اموالک  
 توزیع و استیفا سی ایله مشغول اولشلر .

جزار پاشانك قبوكتخداسى وآرپه امينى اولان مكلف زاده مصطفى بك حداثت سنى  
وتجر به سزلك اثرى اوله رق جرى اللسان وبالا پرواز اولوب سردار اكرمك  
استقلالته مغاير سوزلره اجتسار ايدر اولديغى جهنمه در سعادتده طور مسمى استانبولده كي  
وكلاى دولتك مطالعه سنه الويرمديكندن معنى حسن صورته استانبولدن دفعى  
وظاهرآ جزار پاشايه بعض وصايانك تبليغى ضمننده عكايه كوندرلمشيدى متعاقباً  
اردوى هايوندن احضارينى متضمن اوامر شريفه نك تواردنده حال وحركتك  
مقدمات ونتايغى مطالعه ايله غريق بحر فكرت اوله رق عارض اولان علت نزول  
ايله وفات ايلمشدر .

يدى ماهه قريب صدارت عظمى قائم مقاملغنه بولنان سامى ابو بكر پاشانك رؤيت  
امورده بطاى مشهود وذاتاً سردار اكرم دخى كندوسندن ناخشنود اولمغله  
رجبك اونجى بازار كوني عزل ايله بوغاز بحر سفيد محافظه سنه مأمور اوله رق يرينه  
سابقاً چاوشباشى اولان و صدر اعظمك مؤتمن و مرضيسى بولنان عمر پاشا زاده الحاج  
عبدالله بك صدارت عظمى قائم مقاملغنه تعيين و سلفنك متصرف اولديغى اناطولى  
اياتى دخى عهدده سنه توجيه قلندى .

ابو بكر پاشا بعدالعزل چند روز در سعادتده اقامت ايلديكى اناده دانلىرى اولان  
اصناف گروهى آله جفلىنك تحصيلى ايجون جمعه كوني ركاب هايونه عرضحال تقديميله  
بث شكوى ايتسذكرينه بناءً اموالندن حقوق ناس استيفا اولنمق اوزره مرفوع  
الوزاره اوله رق تكفور طاغنه نى واجلا قلنمشدر .

روم ايلي صدارتى پايه لولرندن كيچه جى زاده صالح افدى كه كبار علمانك دهاتندن  
جر يزه لو و جرى اللسان بر ذات ايدى خلال رمضانده طى طريق حيات و ختم  
مباحث خطايبات وجدليات ايدوب كيتمشدر .

وينه بو اناده اغريسوز محافظى وزير محمد پاشا وفات ايتمكله بعض توجيهات وزرا وقوعه  
كلديكى كجى متعاقباً عيد فطردن صكره معتاد اولان سنه توجيهاتى دخى اجرا اولنمشدر .  
لوند چقتلكنده موجود معلم عسكرك او جاق اوله رق حين تنظيمنده براغا وبركاتب  
واون ايكي بلوك اعتباريله مع ضابطان بيك التى يوز ايكي نفردن عبارت اولمق اوزره  
بر اورطه تنظيم اولنمش اولوب انجق نفرات مرقومه نك بعون الله تعالى تكثيرى  
ولاقل اون ايكي بيك نفره ابلاغى قانوننامه هايوننده مندرج ومذكور اولديغندن  
غيرى بونوع معلم عسكرك دولت عليه هربار لزومى دركار وباخصوص بودفغه جمله  
عندنده تجربهمسى نمودار اولمقندن ناشى بونك تكثيرينه همت وكلاى دولته واجبه  
ذمت اولمغين بو عسكرك لوند چقتلكندن بشقه ادرنه وچورلى وسلورى حواليلرنده

املاك هايون اولان چقتاك و انچه مثلو محالرده وسائر مناسب اولان والير معيتلارنده دخى ترتيب و تنسيق خصوصنه بعده بالذاكره قرار و يرلك اوزره شمديلك طشره دن ترتيب اولنان جديد نفرات كلدكجه الحاله هذه لوند چقتلكنده موجود اولان اورطه دن ماعدا ديكر بر اورطه نك مجدداً كشادينه بار اداه سنيه ابتدار اولنمشدر و بو وجهله اورطه تعدد ايلديكندن اشبويكي او چاغه مجدداً بر كتخدا نصب اولنوب قاج اورطه اولور ايسه جمله سنه حكمي جاري و كندوسى بيك باشيلرك فوقنده و او جاق اغاسنك تحتنده ضابط مطلق اولق اوزره كندويه سنوي التي بيك غروش معاش و تعيينات بها تخصيص قلمشدر و بوندن بويه او جاق اغاسندن بشقه ملتحي بولنماق و هر اورطه يه بيكباشينك مادوني اوله رق بر كتخدانصي قانوننامه ده مندرج ايسه ده فيما بعد بو كتخدالقي اعتباري الغايله كتخدالقي او جاق كتخداسنه منحصر اولق و او جاق كتخدالقي منحل اولدقده بيكباشيلردن قغيسي اسكي ايسه يويله كتخدا نصب اولنق و بيكباشيق منحل اولدقده اغاي يمين و يساردن كذلك قغيسي اسكي ايسه بيكباشي اولق فقط بونلرك جمله سى يويله اسكيه رك ترفيع اولنوب اكر اهليت و استعدادى يوق ايسه مادوني مستعد بولندقده تقديم قانمق و استعدادى مساوى بولنورسه اسكيلكي سبب ترجيح اولق و بو عسكره و يرلان كسوه نك نصفي قرمزى و نصفي مائى اولوب انجق بودفعه ايكي اورطه اولمرياه بوندن بويه بر اورطه قرمزى و ديكر اورطه مائى كسوه ايله تميز ايدلك شرائطي اشبو ايكينوز اون درت سنه سى جامدى الآخره سنك يكرمى دردنچي كوني تاريخيله قانوننامه هايونه ذيل و علاوه ايدلمشيدى .

انجق بويه تعيلم و مرتب عسكرك ايچنده مخصوص مهندسلر بولنق لازمه دن و على الخصوص بر محله مأمور اولدقلارنده اردو قورمق و متريس حفر ايتديرمك و ذخاير و مهماتى نفراتك عددينه كوره توزيع و بونلري بر محلدن محل آخره نقل ايتمك و لى الاقتضا كوپرى يانق و طرفين عسكرينك كيفيت و كميتنى موازنه و زمان و صورت هجومى و مواقع حربى عسكره ارأئه و ارض و هوا و مياهى كشف و معاينه و الحاصل فن هندسه يه دائر اولان دقايق سفر و حضرده اجرا ايلمك ايچون مهندس بولنق فرائض اموردن اولمسيه بو ائاده اشبو ايكي اورطه ايچون هندسه خانه خواجه سى عبدالرحمان افندى معرفتيله هر اورطه يه صاغ و صول اعتباريله ايكيشر مهندس و ايكيشر ملازم انتخاب و تعيين اولنمش و بونلر اولوقتك حكمنجه اركان حرب ضابطانى مقامنده اوله رق رتبه لرى صاغ و صول اغالرينك مادوني وسائر ضابطانك مافوقى اولق اوزره ترتيب ايدلمشدر .

سنه سابقه وقایعی صره سنده بیان اولندیغی اوزره قپودانه بك قومانده سنده کی  
 دوئمای هایون ایله روسیه دوئنامی بالاتحاد آقدکزه حقیقه رقمانی ونیدک جمهورى  
 تصرفنده ایکن فرانسه جمهورى یدینه کچمش اولان جزائر و سواحلی ضبط  
 ایتشلر ایدی بورالرك صورت اداره سی حقدنه دولت علیه ایله روسیه دولتی بیننده  
 جریان ایدن مذا کرانك نتیجه سنده قورقه و کفالونیه وزانطه وایاماوره وانا کی  
 ویا قسوو چوقه و سائر موره وار ناودلق سواحلی قارشوسنده واقع اولوب بودفعه ضبط  
 و تسخیر اولنان صغیر و کبیر و معمور و غیر معمور و ندیکدن منفک هر نقدر جزائر  
 واریسه جزائر سبعة مجتمعه جمهورى نامیله روسیه دولتنك تحت ضمان و کفالتنده  
 اوله رق دولت علیه نك (واسالی) یعنی تابع و محکوم و محیسی و دولت علیه آنلرك  
 (سوزرنی) یعنی حاکم و حامی و متبوعی اولمق و کافه ضوابط داخلیه و خارجیه لرنده  
 بعینه دوبر و ونیک جمهورینك نائل اوله کدیکی حقوق و امتیازاته مظهر قانمق  
 و جمهور مذکور طرفندن تزايد و نقصان قبول ایتماک شرطیه بروجه مقطوع اوج  
 سنه ده بر کره یتش بش بیک غروش جزیه ویرلمک و بشقه برکونه ویرکوايه مکلف  
 اولماق و قره ده و ندیکدن منفک پروزه و پارغه وویجه و پوتریتنو و بونلرك توابع  
 و ملحقاتی ممالک محروسه خاقانیه به ضم و الحاق اولمغله بونلر فیما بعد دولت علیه  
 تصرفنده قالمق خصوصلرینه بوائنده قرار ویریلهرك بوکادائر تنظیم اولنان عهدنامه  
 اشبو بیک ایکی بوز اون درت سنه سی ذی القعدة سنك سکزنجی کونی امضا اولمشدر .  
 عهدنامه مذکورک خلاصه مؤداسی مجدداً تشکیل اولنان جزائر سبعة جمهورینك  
 دوبره ونیک جمهورینه ویرلمش اولان امتیازات و مساعداته مظهر بتدن عبارتدر .  
 و دوبره و نیکولولرك رسم کرکری حقدنه احسان بیورلمش اولان مساعدات بیک  
 یتش اوج تاریخنده اصدار بیوریلان فرمان عالیده مندرج بولنسیغندن صورتی  
 زیزده (۸) رقمه ایراد اولنور .

مقدما تقلیس خانی ارکلی خان روسیه حمایه سنه کیروب اکرچه بونکله مملکتی  
 روسیه به ترک ایتش دکل ایدی . لکن بوکره وفاتی وقوعنده ورثه سی بیننده  
 ظهور ایدن منافسه درون مملکتده بادیء فترت و اختلال اولدیغندن وجوه و اعیان  
 بلده روسیه امپراطوری پاولویه ارسال مرخصان ایله روسیه دولته اظهار تبعیت  
 ایتلری اوزرینه پاولو دخی کر جستانک ارکلی خان تصرفنده بولنان قطعه سنی روسیه  
 ممالکنه الحاق ایلمش اولدیغی بوائنده برقطعه بیاننامه ایله اعلان ایلمشدر . و بوائنده  
 دول اوروپا فرانسه اختلالیله و دولت علیه مصر سفریه مشغول اوله رق جمله سی  
 پاولونك جلب و تطیب خاطرینه سعی ایتمکه اولدقبری جهتله بر طرفدن اعتراض

واقع اولقسزین بوکوره روسیه دولتی قافقاس طاغلیرنیک جانب جنویسنه آیاق باصمشر .  
 فی الاصل شامیه عربانندن اولوب بروقتدنبرو ذخیره الملق اوزره جانب عراقه آمد  
 وشد ایدن عتزه عشائری بوآناده حله طرفه نزول ایله جوارنده کی عشائره ایصال  
 مضرت ایلدکلر نندن بغداد والیسنک کتخداسی علی پاشا اوزرلرینه واردقده عربان  
 هر قومه عراق عشائرنندن اولان القشع والاسلم والرفیع عشیرت لرینه دخیل دوشوب  
 آنلر دخی شیمه عربیه ایجابجه حمایت ایدرک اوج بیک دوه والی آت ویرمک اوزره  
 عفولرینی رجا ایتملریله اولوجهله عفواولنه رق آنان حیوانات بغداده کوندرلمشدر .  
 دخیل دوشنه صحابت ایتمک عربانجه عادت لاتغیر حکمنده اولوب مشایخک بو یولده  
 اولان استدعالرینه مساعده دخی لازمه حالنددر . فقط بومقوله لرك عفونده برنجی  
 شرط رعیه سلکنده بولنان عشائر مطیعه دن آدقلمی اموالک استردادای اولوب  
 بوشروط اجرا اولغندجه جانب میری ایچون آنلردن حیوان قبول ایتمک فک فبایشدر .  
 هندستانده انکلیرلره قارشو فرانسه طرفدارای اولان تیپو سلطانک دولتی بوآناده قرین  
 زوال اولغله کرک کندوسنک وکرک پدربنک ترجمه حاللری بومقاده بیان اولنور .

\* حیدر علی خان ایله تیپو سلطانک ترجمه حاللری \*

حیدر علی سیادت ادعا سنده اولان برخانندان ظهور ایتمشدر که خاندانی پنجابدن  
 دکن اقلیمنک مضافاتندن اولوب مؤخرآ حیدر آباد تسمیه اولسان بدنور الکا شه  
 کله رک پدیری سرا والیسی اتباغندن اولدیغی حالده کندوسی ۱۱۳۱ سنه سنده تولد  
 ایدوب هنوز اون یدی یا شنده ایکن برکروه عسکره سر کرده اولمش ایدی .  
 مؤخرآ نواب صفدر علی خان خدمتنه کیروب بنکلور قلعه سنی ضبط وما یصور حاکمی  
 ویرکو اعطاسنه مجبور ایلمش وکرناتک حاکمیه عقد اتفاق ایدرک استقلال داعیه سنه  
 دوشمش واوانساده انکلیرلورله فرانسرلرک جنسک وجداللری اولمق حسیله  
 فرانسرلره اعانه یوللو برکروه انکلیر عسکرینی پریشان ایتمش ایدی بعده بالامور  
 حاکمی بقته باصوب حسابه کلز خزینه سنی ضبط ایله اول هنگامده متبوع رسمیمی  
 اولان مایصور حاکمه یالکر بعض اسلحه کوندرمش وآچقهی عسا کره توزیع برله  
 بتون بتون کندو طرفه جلب ایدوب مقرر حکومت مایصور اولان سرینغاپانام  
 شهر عظیمی بقته اوره رق هندو نری پریشان ایتمکدن صکره برحکومت اسلامیه  
 تشکیل ایدوب بهادر عنوانی طاقمشدر . بو حالده ینه بعضاً فرانسر عسا کرینه  
 معاونت یوللو نظرنده قوتلوجه ومضرجه کورینسان انکلیرلری اولحوالیدن دفع  
 صدندده بولنمسلیله برابر برطرفدن مهرته لره پیدر پی غلبه ایدرک قوت عظیمه  
 پیدا ایلدکن صکره اطرافده بولسان حکومتلره کاه کیزلوجه فسادلر وکاه



آچیدن آچیه هجو ملر ایله تعرضدن خالی اولمدینی حالده چونکه اولوقت شاه هندستان اولان مغول شاهی اکر چه دهلیده تخت نشین ایسه ده رسمی بر شاپ اولوب نفوذ و حکومت بومقوله اطرافده بولنان حکمدازلر السده اوله رق ال بیوکری دکن الکاسی سپهداری اولان نظام الملک ایدی . ایشته آنک واسطه سیله حیدر علی بر طرفدن دخی شاهک ارکان وعونه سنی جلب وبوصورتله مایصور وسرا حکومتلرینی ضبط ایدوب ۱۱۶۷ سنه سنده نواب علی حیدر خان بهادر عنوانی قزاقمشدر .

ودها صکره لری کالیکت سامریسی یعنی حاکم هندوسی کبی دهانجه بیوجک حکمدارانه غلبه ایله مملکتلرینی در دست ایلمش ومسقط یعنی مسکت عربلرندن مییله نامیله مخصوص سواری عسکری ترتیب ایدرک بر طاقم جزائی دخی زیر ضبطنه آمشدر وانکلزلرک تکلیفات ومستدعاتی اصغا ایتیه رک وچند دفعه وقوعبولان جنکرده کاه غالب وکاه مغلوب اوله رق مدرس جوارینه قدر ضبط ایدوب آندن مهرته حاکم لریله دخی مدت مدیده اوغراشه رق نهایت کراتک اقلیم عظیمی دخی ضبط ایلمشدر . فقط صکره انکلزلرک قوتلوجه هجو ملرینه پکده طیانهمیوب کالیکت ومنکلور قاعه لرینک دشمن اننه کیردیکنی ایشتدکده تحفظی حرکته مجبور اولدینی ائنده سر طمان دیدکاری علتیه اوغرایوب ۱۱۹۷ سنه سنده ارکت شهرنده وفات ایتمکله یرینه تیپو صاحب لقبیه معروف اولان اوغلی فتح علی خان جلوس ایتمشدر . ممالکی تربیعاً ۲۷۰۰۰ ساعت وعسکری یوز آتمش بیک ووارداتی ایکی کرور ربیعه که بر میلیون مجار آلتونی دیمکدر .

تیپو سلطان مایصورک اک صکره کی نوایدرکه ۱۱۶۲ سنه سنده تولد ایدوب اولا فتح علی خان تسمیه اولنش ایدی . تیپو صاحب لقبی ختانشده یاخود اون آلتی یاشنه کیردیکنده آمشدرکه اولوقت باباسی حیدر علی طرفدن بدنوره والی نصب اولنش ایدی . پدرینک ایام سلطنتده پک چوق آثار بسالت ومردانکی اظهار ایتدکن صکره بر منوال محرر (۱۱۹۷) سنه سنده تیپو صاحبکی تیپو سلطانغه تحویل ایتمشدر . فقط پدرینک وفاتسنده کندوسی بر مقدار عسکرله تابخورده بولمغین پدری مقامنه جلوس ایچون عودت ایتدکده انکلزلرلر بو ایام خالییی فرصت ائخاذ ایدرک بش آلتی قدر مملکتلرینی تسخیر وتیپو سلطانک بعض اقباسنی اسیر ایتمشدر ایسه ده تیپو سلطان در حال طاورانوب ویاننه فرانسزلردن بر مقدار عساکر معاونه آلوب بدنور قاعه سی پیشکاهنه حاضر اوله رق انکلزلری رجعتیه وخیلی آچه لرینی دخی آلوب نهایت طلب صلحه مجبور ایلمش و (۱۱۹۹) سنه سنده طرفیندن عهدنامه لر امضا ایلمش وتیپو سلطان دخی کراتک الکاسندن چکلمشدر .

بعده پدری کبی اطرافده بولنان حکمرانلری حسن تدبیر واستالته قوللانمقدن فراغتله حرباً و جبراً زیر اطاعته آلمغه ابتدار ایلیوب وساطان و پادشاه عنوانلرینی آله رق آشوری آلایش و دبده به وهر یوزدن مصارفی آرترمغه باشلیوب عساکری دخی ایکیوز بیکی متجاوز اولدیغندن واردانی کفایت ایتمز اولدقندن بشقه کوندن کونه نقصان بولمغه یوز طو تدینی حالدله مغول شاهلری کبی بتون هندستانه حکمران اولمق افکارندن کچه میه رنک اول امرده انکلیرلری دفع صره سنده بصره طریقله درسعدته و فرانسه یه ایلیچیلر کوندرمشیدی درسعدته کلان ایلیچیلری جلد رابعده ایکیوز برسنه سی وقایعی صره سنده بیان اولندیفی اوزره فیضی افندی ایله بر کره عقد مجلس مکمله ایتمشایدی فرانسه یه کوندرمش اولدینی ایلیچیلری دخی درسعدت و مارسیلیا طریقله پارسه وارمشلر ایسه ده اولوقت فرانسه قرالی اولان اون التنجی لویی حکومتک ضعفی سببیه تیویه اغانه رینه ۱۲۰۳ سنه سنده سفیرلرینه عالی و مکمل ضیافتلر ویره یلمش و مجدداً رسمی بر معاهدۀ اتفاق عمدیله ایلیچیلری اعاده یلمشدر .

فرانسه قرالندن معاونت مأموله به صورت موافقت کوسترلماسی تیوه سلطانتک کوجنه کلوب حرب مراقی دخی کندوسنی راحت برآمدیغندن فرانسه متفقلرندن فامنکلونک ملابار سواحلنده اولان حصارلرینی ضبطه قالمش و بومناسبتله تروانکر اجه سنه یعنی حکمدارینه دخی هجوم ایتمش و بر طرفدن دخی کر ناتکه صارقیدیلق ایلمش ایدی لکن انکلیرلر ایشک اصانی اکلیوب راجه به معاونته قیام برله مشهور لورد قونوالیس نام انکلیر قوماندانی بر کره سرینغا پاتنام پیشکاهنه قدر کیرمش و صکره تیوه سلطان فرانسه لودن عساکر معاونه جالبه چالش مقده ایکن لورد قونوالیس نظام الملکتک و مهرته راجه سنک عساکرینی دخی برابر آله رق تکرار بعض قلاع فتحیه سرینغا پاتنامه تیوه سلطانی محصور و ۱۲۰۷ سنه سنده طلب صلحه مجبور ایلیوب املاکنک نصفی و حرب تضمیناتی و رهن صورتیه ایکی اوغلانی آلمش و بوجنکده تیونک سکر یوز پاره قدر طوپ و زنبورکاری والی بیسک قدر عساکری تلف اولمش ایدو کندن ارتق دارالسلطنه سی ماوای یأس واضطراب اوله رق اسکی فر وشو کتدن اثر کورلیوب کندوسی دخی کیجه و کوندوز انکلیرلره دشمن پیدا ایتمک افکاریه مشغول بولمشدر حتی ۱۲۱۲ سنه سی او اخرنده خرسیتانلری هندستاندن طرد و بالجمله هند و حکومتلرینی قلع وقع ایله هندده سلطوت اسلامیه ی یکیدن درجه کمال اقتداره ترفیع ضمنده اولاد تیموردن بر شهزاده نک کر چکدن حکمران اولمق اوزره دهلی به اقعادیله عقد بیعت

طرفین مبادرت اولمسی تکلیفیه کابل حاکمی شاه زمان افغانه ایلیچی کوندرمش ایسه ده اولطرفین بر جواب شافی آله مدیعدنینه فرانسه جمهورینه حالندن اشتکا ایتمشیدی . بناءً علیه برطاقم جمهور مراقلیسی سرسریلر باشنه بریکوب جمهوریت بیراقلربی آنچه رق شنلکار اجراسیله اضاعه وقت ایتمکده ایکن انکلزولور پوناپارته نك مصر طرفین تیویه ککش اولان مکتوبرینی طوتوب ارأه و خصمزمزله مخابره ایدیورسین دیو بهانه ایدرک ایکی طرفین بیچاره تیونک اوزرینه هجوم و چنددفعه وقوعبولان محاربه لر دنصکره یینه سرینغا پاتنامی محاصره ایتدکارنده تیو سلطان اولنجیه دکن محاربه ایتمکدن غیری بر چاره کوره مدیکندن برآی قدر دلیرانه وغیورانه مقاومت ایتدکن صکره بیک اکیوز اون درت سنه هجر یه سی نیا سنک اواسطنده وقوعبولان بر هجومده مجروحاً وفات ایتمشدر . دیاتی خلق ولایت آره سنده مشهور اولوب انحق فرط کبر و غرضی چوق قبالقلر دعوت ایتمشدر و پدری هند حکمدارلربی مدارا ایله قوللانه کلشیکن کندوسی اول امرده آنلری پریشان ایتمکله انکلزولورک اغراضه خدمت ایلمش اولوب کندو دولتی دخی بو یوله الدن کیتمشدر . کاکته انجمن دانشنه انکتره دولتی طرفین اهدا اولنان ایکی بیک جادی حاوی کتبخانه سنده کندو خطیبه کافه افیکار و آمانتک مفصل و مشروح روزنامه سی اولوب حتی رؤیالربی دخی شاملدر . تیونک وفاتندن صکره آرتق فرانسز حکومتته هندده چاره نجات و ثبات قالمیوب انکلزولر بتون ولایته تسلط ایده بیلمشدر .

نادر شاهک هجومیه هندستان حکومتلری متزلزل اولوب عودتنده اگرچه دهلیدن چیقمزدن مقدم محمد شاهی تختنده ایفا ایتمشیدی لکن سپهدارلق نامه اداره اولنان طقوز اون ایالتک اولوقنده مناصب مذکوریه متصرف بولنان سپهدارلربنک خاندانربنه ارثیت اوزره انتقال ایتسنی شرط قلمشیدی دکن سپهدارلربی که برمنوال محرر متصرفی نظام الملک یعنی صدراعظم مقاننده در مهرته و کناره و مایصور و کرناک حکمدارلقاری کبی نیجه ممالک جسمیه یی و حتی کلیمکوت سامریلکی یعنی حکومتی کبی همان بسبتون استقلال صورتنده بولنان نیجه ولایتلری و ارکت ولایتی مثللو سنجاق صورتنده اولان و حاکمربنه نواب دینلان برطاقم حکومتلری حاوی ایدی . ایشته صفدر علی خان بوارکت ولایتک نوابی اولوب حیدر علینک متبوع اولی ایدی و اکثر عساکری پتن یعنی افغاندن عبارت ایدی حیدر علی برمنوال سابق خروج ایله بونجه مدت اوغراشهرق تشکیل ایتش اولدینی حکومتی چوق سورمیوب اوغلی ننده زواله وارمش و هندستان حکومتلربنک جهت وحدت استنادلری اولیوب

بویه تشتت حالده بولملاری سببیه بونجه ممالک وسیعه وجسیمه مدت قلیله ظرفده اجنبی اله کیرمشدر . بزینه وقایع مصریه به کلهلم .

\* وقایع مصریه \*

بروجه مشروح پوناپارته ابوخور وقعه سنی قزانقدن صکره مصره کلدیکنده کوسه مصطفی پاشانی بر بیوک قوناقده اسکان ایله مظهر اکرام فراوان ایتشیدی . کندوسنک فرانسه دن امدادی منقطع اولوب دولت علیه ایسه کلی تدارکات سفریه به تثبت ایلدیکندن مصر ایشنک باشه حقیقه میه جغنی درک وتیقن وبواننده دول متفقنه ننگ غلبه سی وفرانسه یه برقاریشق حاله دوچار اوله رق مدیران جمهورک تدنی نفوذی حوادتی آلوب فرانسه ده تمام کندوسنک آت اویناده جغنی وقت فرصت الویرمش اولدیغنی تظنن ایتدیکنه وسانته الهده کندو قلمیله یازمش اولدیغنی ترجمه حالده بیان ایلدیکی اوزره فرانسه لرنک مصری ترک ایدوب کیتملری ایچون یاپلمسی لازم گه جک عهد نامه نی هر قنغی جنرال اولسه امضا ایده بیله جکی مطالعه سنه بناء بر تقریب دلفریب ایله مصر دن صاوشوب کیتمه که قرار ویرمش واول امرده دولت علیه ایله مخبره قپوسنی آچق اوزره کوسه مصطفی پاشانی واسطه اتخاذا ایتش ایدی .

شویله که : فرانسه لرنک دولت علیه به اولان صداقت قدیمه لرندن بختله دولت علیه ننگ مصلحتنه اوفق اولان خطبه وسکه کماکان نام پادشاهی به اولمق ومعتاد اوزره قافاهه حجاج کیدوب کلک ومرتبات میری به ویرملک اوزره فرانسه لرنک مصرده ابقاسیدر دیو مصطفی پاشا واسطه سیاه بویولده دولت علیه به بر مصالحه تکلیف ایلمشدر .

وعسا کر خاصه سنی وجنرال علیکساندری ایله جنرال مورانی استصحاب ایدرنک دور ممالک بهانه سیله اسکندریه به ورودنده فرانسه به اوج قطعه کوچک کئی کوندرمک اوزره امیرال اسمیتدن رخصت استدعا ایدوب اودخی مساعده ایتمه که همان پوناپارته معیتده کی آدم لریله برابر ربیع الاولک یکریمی برنجی کونی بوکیلره را کبا برصیقی روزکار ایله اسکندریه لیماندن چیقوب کیتمشدر .

امیرال اسمیت کیفیتدن خبردار اولدیغنی کئی آرقه سندن سکر دوب تعقیب وتخری به شتاب ایلمش ایسه ده یتیشه میوب بوضورتله پوناپارته انکلیزلرنک الدن قورتلمش و سالماً فرانسه به واصل اولمشدر .

پوناپارته ننگ مصرده مدت اقامتی اون درت آی اولوب بومدت ظرفده وقوعه کتوردیکی ایشلر بالاده طاقم طاقم بیان اولمشدر . وبوکره کئی به رکوبندن مقدم بروجه مشروح دولت علیه ایله بر مخبره قپوسی آچش ودبباط قوماندانی جنرال قله بر کندوسنه خلف اولمق اوزره تدابیر لازمه نی وکندوسی فرانسه به واردقدن

صکرة قریباً مصر اردوسنه امداد ایده جکینی وشایدکه درت آیه قدر امداد ایده من  
ایسه انکلیز واسطه سیله عقد اتفاق ایدرک مملکتی اهل اسلامه تسایمه مأذون  
اولدینغی متضمن تعلیمات یازوب براقش وسائر جنراللره دخی بو یولده تحریرات  
کوندرمش ایدی .

ایشته بوصورتله یوناپارته مصر دن تخلیص کر بیان ایدوب کیتمش وقله بر باشنه کله جک  
بلایه انتظار ایتمک اوزره مصره کلوب یوناپارته نک اصول ومسلکینی تغییر ایتمیرهک  
تدبیر اموره ابتدار ایتمشدر .

یوناپارته نک بو کره فرانسه یه عودتنده مصرده قالان فرانسزاردوسی بکرمی سکرز  
بیگ بشیوز نفر اولوب دبو یلرنده دخی مقدار کافی البسه واسلحه واری ایدی  
وجنرال دیزه مزاد بکه غلبه ایدرک صعید قطعه سنی قبضه تصرفه آلوب بر الشام  
حدودنده طولاشان ابراهیم بک طاقنک قوتی دخی فرانسزله بادیء خوف  
وهراس اوله جق مرتبه ده دکل ایدی . لکن سردار اکر مک بر جسیم اردوایله  
کلمک اوزره اولدینغی حوادثی فرانسزله بادیء اندیشه اولمقده ایدی . و ذاتاً  
فرانسزله فتور کلمش اولدینغی حالدله یوناپارته نک او یله کمنسته یه خبر ویرمکسزین  
صاوشوب کیتیمی خیانتنه حمل اولنهرق مصرده کی فرانسزله جمله سی آتی  
ذم وقدح ایدر اولمشلر ایدی .

قله بر دخی فرانسه ده کی تبدل احوال دن بیخبر اوله رق فرقه مصریه نک حال خطر  
وتهلمکده بولندینغی و بونک مسؤولیتی یوناپارته یه عائد اولدینغی و یوناپارته نک  
بو بایده متهم ایدوکنی مدیران جمهوره عرض وانها ایتمشیدی . صورت انهاسی  
زیرده (۹) رقمیله ایراد اولنور . و اولوقت مصرده کی فرانسه اردوسنک اداره  
مأموری بوسلیچک مدیران جمهوره تقدیم ایلدیکی تحریراتی حقیقت حالک اتضاحنه  
مدار اوله جغندن اودخنی ذیلده ( ی ) اشارتیه اتیان قننور .

یوناپارته ایسه بروجه مشروح انکلیزلرک شیکه محاصره سندن قورتیلوب وقفسدن  
فرار ایدن قوش کبی اوچوب وفرانسه یه جان آتوب کیتمشیدی مقدا ایتمیله کی  
فوجاتی اوزرینه مؤخرأ مصرده ظهوره کلان اجرا آتی کندوسنک تزید شان  
وشهرته بادی اولدینغی حالدله بویه خلاف مأمول اوله رق انکلیزلرک الدن قورتیلوبده  
فرانسه یه چیقویرمی فوق العاده بردرایت وجسارته دلیل و کندوسنجه مورث وقع  
وشان بی عدیل اوله رق پارسه موصلتنه قدر اوغرادینغی شهرلرده اهالی طرفندن  
فوق العاده اکرام واحترام کورمش ایدی . و چونکه اول ائناده مدیران جمهورک تدنیء  
نفوذ واققدارلری حسیله حکومت منززل وفرانسه نک امر اداره سی پک فنا برحاله

متحول او لمش ایدو کندن بو فالفلرک دفعی ایچون طاقم طاقم تشکل ایدن جمعیت خفیه لر پونا پارتیه کبی بر مستد قوی به محتاج اولدیغندن هر فرقه کندوسنه مراجعته مجبور اولدیغی جهتله پونا پارتیه پارسه واردیغنده تبریک و تهنیته کانلردن و کندوسی ایچون ترتیب اولنان ضیافتلردن کوز آچه مازدی وهان اصول اداره نی ایستدیگی شکله و قابله قوی بوده حکومتی قبضه استقلالنه آلق ایچون اسباب لازمه سنی استکماله چالیشوردی .

شمدی پونا پارتیه نک اشبو مصر سفر نده کی نفع و خسارینک حسابی کوره لم ( پونا پارتیه نک بوسفر دن ذاتجه ضیاعاتی واری ) خیر ( برشی قزاندمی )

بروجه مشروح ایتالیا ده کسب ایتمش اولدیغی شان و شهرتی بوسفر ده تزید و کندوسی میدانه چیقاران مدیر انک حکمنی احیاه مدار اوله بیه جک در جه تأیید ایلدی .  
( وطن و ماتی ایچون نه قزانندی ) هیچ ( نه زیان ایتدی ) پک چوق .

از جمله فرانسزلرک بووقته قدر ممالک شرقیه ده هر سوزلری قلیچ کبی نافذ ایدی .  
ودوات علیه احوال پولتیقه ده هر دولتدن زیاده فرانسه نک اخطاراتی اصعا ایلردی .  
بیک یوزسکسان ایکی سنه سنده مجرد فرانسز ایلچینسک اخطاراتیه روسیه اوزرینه سفر ایتدیگی دخی بوکا دلیدر اما پونا پارتیه قورصانلق یولنده بغته کلوبده مصری استیلا ایدیجک شرق اهلینسک فرانسزلر حقنده امنیتلی منسلب اولوب آندن صکره فرانسزلرک ممالک شرقیه ده نفوذلری سلا حارینک قوتی قدر کچر اولدی .  
انکلیزلر ایه بالعکس اولکیدن زیاده امنیت و اعتماد مظهر اولدی یعنی فرانسزلرک غائب ایتدیگی نفوذی دشمن جاناری اولان انکلیزلر قزانندی .

اولوقت فرانسزلر بتون عالمی حریت و مدنیته دعوت ایدرکن عربستان طرفده خونریزک و غدارلق ایله شهرت بولدیله علی الخصوص پونا پارتیه نک یافه ده ارنادولر حقنده اجرا ایلدیگی وحشیلک اک وحشی عشائرک اجرا ایتدیگی برنوع قصابلق اولدیغندن باجمله ملل متمدنه واقوام وحشیه نظر نده منفور اولدیله .

بوسفر ده پونا پارتیه بونجه بیکناه اهل اسلامک اعدامنه سبب اولدیغی کبی بیهوده یره فرانسه نک بر بیوک دو نمناسنی احراق ایتدردی . و اوتوز بیکدن زیاده فرانسز قیر دردی و بالاده بیان اولندیغی اوزره عکادن منهزما عودتده کندو اوغورنده جان و یرن عسکرینک خسته لر نی آفیون روحیه تسمیم ایتمش اولسیله دخی جریده اوصافی لکه لدردی .

الحاصل پونا پارتیه صیت و شهرتی تزید ایچون کندو ملتک دخی خیلی خسارینه سبب اولدی حالبوکه ملتک خساری ضمننده منافع ذاتیه قزانمق بیوکک دکیل در

بيوكلك انجق كندو منافعی منافع ملت اوغورنده فدا ايتمكدر . واقعا ناپليون بك آزكلش جنرالردن بريدر لکن آنی پروسیاقرالی مشهور فرهدریق کبی فرانسزجه ( لوگران ) عنوانيله یاد اولنان اولو کشیلر صره سنده تعداد ایده میز زيرا پوناپارته ذاتجه ترقی داعیه سنده ایدی فره دریق وامثالی صاحب قرانلر ایسه دولت وملتربینک ترقیسی ایچون ترك حضور ایدوب کیتمشلردر . آنک قزانجی مدت قلیله ظرفده بر هوا اولوب بونلرک قرانلیغی ایسه نیجه زمانلر جریده عالمده پایدار قالور . کله لم وقایع مصریه یه .

مقدماً کوسه مصطفی پاشایی ابوخوره چیقاروبده عسکرک انهنزامنده اورادن آچیلوب کیتمش اولان سفن هایوندن و برازده انکلیر کیلرندن اولمق اوزره الی قطعه کی یدی سکر بیک قدر عساکر اسلامیه یی حامل اولدقلمری حالد بو ائئاده دمیاط بوغازینه کله رک اوراده دکزه طوغری متمد برونه عسکر چیقارمغه ایتدار ایدوب انجق عسکرک هنوز نصفی قره یه چیقارلمدن جنرال قاهر برینه دمیاط قوماندانی اولان جنرال وردیه صباحلین ارکندن موجود معیتی اولان عسکرکله بغته هجوم ایتمکله عساکر اسلامیه منهزم اولدیغندن کیلرده کی عسکر اخراج اولنه میوب قره ده کیلرک دخی کمی شهید وکیمی صندالاره سکر دوب بونلرک دخی برخیلمی دکزه دوشه رک غریق اولمش ورؤسادن زورنازن باشی مجروح اولدیغی حالد بر قاج یوز نفرله برابر اسیر اوله رق دمیاطه کتورلمش و یاره سی التیامپذیر اوله میوب اوراده وفات ایلمشدر . پوناپارته نک برمنوال مشروح عودتی اوزرینه فرانسزلرک مصرجه شان ونفوذ لرینه خلل کیشیکن بو وقعه کندولرینه ینه قوت ویرمش ایسه ده شام طرفنده تجمع ایتمکده اولان سردار اکرم اردوسی هر طرفه دهشت ویرمکده ایدی .

وپوناپارته نک برمنوال مشروح فرارندن مقدم مصالحه استدعاسنی متضمن یازمش اولدیغی مکتوبی مقدماً کوسه مصطفی پاشایله برلکده قیداسره کرفتار اولان خواجهکان دیوان هایوندن رشدی افندی ایله ارسال اولتمشیدی . مؤداسی دولت عالییه اغفال ایله منفرداً استیناف عهد قدیم سیاقده اولوب منفرداً مصالحه ایسه دولت عالییه ایله انکلتره وروسیه دولتلمری میانه لرنده منعقد اولان معاهده اتفاقه مغایر اولدیغندن ودول متفقه دن آیرلمق شویله طورسون آنلری تبرید ایده جک حل وحرکته تصدی بیه دولت عالییه نک پوتلیقه سنه الویرمدیکندن او یوله مذاکره ومکالمه یه کیرشمک قابل اوله میه جنی جهتله طرف سردار اکرمیدن بوه مکتوبه او یوله جواب مناسب یازیله رق رشدی افندی ایله ارسال اولتمشیدی . رشدی افندی

مصره ورود ايله پونا پارتنه يرنده قله برى بولوب جوابنامه يي اكا تسليم ايتد كده قله بر  
 رشدى افندى ايله عقد مجلس مكالمه ايدرك بينلر ننده جريان ايدن مذاكره  
 اوزرينه ينه او بولده برمكتوب يازوب رشدى افندى ايله سردار اكرمه ارسال  
 ايلمشدر . رشدى افندى اردوى هايونه كلد بكنده اولنان سؤال وجوابده قله بر  
 ايله بينلر ننده روسيه به دائر سوزلر جريان ايلديكي اكلاشيلوب بودر لوشيلرك متفقلردن  
 كتم واخساسى ايسه اتفاقه وهن كتوره بيله جك حالاتدن اولسيه شايد كيفيت  
 روسيه طرفنه منكس اولوبده موجب توحش اولور مطالعه سنه مبنى لدى الايجاب  
 احتجاجه صالح سند اولور ملاحظه سيله لاجل المصلحه رشدى افندى ساقز  
 جزيره سنه نفى اولمشدر .

قاهر دخى سالفنك اثرينه اتباع ايله سردار اكرمى سوزله اقتناع ايدرك  
 كندو اغراضه موافق برمصالحه عقد ايلمك داعيه سنده بولنوب حالبوكه  
 بوقدر يوز سنه دنبرو نزد دولت عليه ده فرانسه ملتك قزائمش اولدينى  
 امنيت واعتمادى پونا پارتنه نك قورصانلق يولنده مصره هجومى وقعسه يي  
 دفعه سلب ودرحل بر بيوك امنيتسزلك جلب ايلمش وبونك اوزرينه دولت عليه  
 بعض دول ايله اتفاقه مجبوريت كورمش ايكن شمعى برقاچ لاقردى ايله آلدانوبده  
 متفقلىنى فدا ايديورمك احتمالدن بعيدر كيفيت ايدى بوخيلاي خامك فعله كله ميه جكي  
 قله بر ك مجزومى وبوندنصكره مصرده طورده ميه جنى دخى معلومى اولوب بناء عليه  
 كشاد اولنان باب مراسله يي سد ايدده ميه رك سردار اكرم ايله مخبره و برطر فدن دخى  
 مصرده مقيم اولان كوسه مصطفى پاشا ايله مذاكره دن خالى اولمازدى انجق مصطفى  
 پاشا حال اسارتده بولنديغدن مذاكره مصاحته مداخله سى مناسب اوله ميه جنى كندوسنه  
 اخطار وقه بره دخى اشعار اولمشدر .

بو ائنده سردار اكرم يوما فيوما ايلر وليه رك بر جسيم اردو ايله غزه سحر اسنه واصل  
 اولمشيدى واكر چه اردوى هايونده يكيچرى وسائر قوقولى دينيلان دولت عسكرى  
 آز اوله رق اكثرى نفير عام دينيلان متفرق عساكر وهن طرف مغلوب اولورايسه آنى  
 يعغايه مألوف اولان قبائل وعشائر دن عبارت اولوب بويله متفرق ودرتى عسكره  
 چندان كوه نيله من ايسه ده مصر دن شام طرفنه فرار ايدن كوله منلر هب اردوى  
 هايونده مجتمع اولدق دن بشقه صعيد طرفنده بولنان مراد بك دخى معيتمده كي كوله منلر ايله  
 سويش طرفنه ايتمش ايدى كه بعده عريش طرفنه كله رك اردوى هايون ايله بر اشمشدر  
 كوله منلر ايسه جند بلكده يكتا اولوب وزرانك قبولرى خلقيله بعض دره بكر ينك  
 معيتملى نفراق دخى اولوقته كوره ايجه ايشه برار بر نوع عسكر ايدى وار دوى



هایونک ارکان حربی یعنی مهندسری ایچنده برقاچ انکلیز ضابطانیله برابر فرانسه ملتجیلرندن دخی بعض ضابطان وار ایدی و بیوک اردو طوبولرندن بشقه انکلیزلرک معرفتیه قاتر قوشیلور بر نوع سرعت طوبولری یادیرلمشیدی .

فرانسزلر ایسه ذاتا یأس وقتور کتوره رک فرانسه یه عودت آرزوسیه دلفکار و پوناپارته نک تعیین ایلمش اولدینی درت آی مدت مرور ایله هنوز امداد اماره سی رونما اولدینی جهته مختل الافکار اولدقلرندن قله بر چاره سز برمتازکه ایله مصری ترک ایدوب کیتمک صورتی بالترجیح انکلیز امیرالی اسمیته مراجعت ایتمکله مکالمه یه قرار ویریله رک قله بر طر فندن جنرال دیزه ایله قومیسر سلیج و جانب سردار اکر میدن دقتدار رشید مصطفی و رئیس الکتاب راسخ مصطفی افندیلر مرخص نصب و تعیین ایله اسمیتک را کب اولدینی اوچ انبار لیده مکالمه یه ابتدار ایدوب قرار ویریلان بعض مواد اساسیه سی سردار اکر مه قبول ایتمک اوزره اسمیت اردوی هایونه عزیمت ایتمشیدی .

ایشته بو ائشاده یعنی رجبک اون طقوزنجی کونی عریشده بروقه هائاه ظهوره گلشدر . شویله که : سردار اکر م اردوی هایون ایله غزه یه کلد کده عریشک فتحی تصمیم ایتمشیدی چونکه مصر اوزرینه دکزدن کله جک برارد و اسکندریه سواحلندن بشقه محله دفعه کیتلو عسکر چیقاره میه جنی کبی برالشام چولندن مرور ایده جک اردو دخی عریش پوکار لرندن صولاتغه محتاج اولدیغندن بونلر مصرک ایکی مفتاحی حکمنده بولندیغنه منبی پوناپارته اسکندریه یه جسم استحکاملر یادیردینی کبی عریش قلعه سنه دخی کرکی کبی متانت و یروپ و کلی مهمات و ذخیره ایله تشحین ایدوب محافظه سنی قازال نام بر جسور ضابطک رفاقتنده اولان اوچوز نفر سچمه عسکره احاله ایتمشیدی بو جهته ضبط و تسخیری قولای اولدیغندن ابتدا صالحیه طرفندن مخابره سنی قطع ایتمک اوزره بر مسعودیه نک ضبطی اقدام کورلمکله اردوی هایونده موجود اولان وزرادن مصر والیسی نصوح پاشا و دکر منچی اوغلی دیو معروف اولان مرعش والیسی ارناود مصطفی پاشا و الفی محمد بک و دیگر امرای مصر یه دن بعضیلری و جرار اوغلی ایلرویه سوق اولنه رق بر مسعودیه ضبط اولدقدن صکره سیواس و الیسی رجب پاشا باشبوغ نصب اولنه رق معینته مقدار کافی عسکر ترتیب ایله عریش قلعه سنک فتحه مأمور ایدیلوب بعده مشار الیه ارناود مصطفی پاشا دخی اشبو عریش فرقه سنه الحاق اولنمشیدی انکلیز میرآلابی دوغلاس دخی بوفر قده ایدی .

قلعه ده مستحفظ اولان فرانسزلر دیلکلری محله کیتمک اوزره قلعه یی تسایم ایتملری کندولرینه تکلیف اولدقدنه قبول ایتمکلرندن عساکر اسلامیه قلعه یی حصر و تضییقه

ابتدار ایتملری اوزرینه فرانسزلر قاعه دن طیشارو برهجوم ایتشلر ایسه ده عساکر اسلامییه تاب آور مقاومت اوله مدقلرندن استیان ایتدکلرینه بناء سر کرده لر یله یوز الی نفری اسیر و باقیدی علف دهن شمشیر ایدلمشدر .

اول ائنده سردار اکرم دخی سبکبارجه عریش فرقه سی نزدیکش اولدیغندن ارناود مصطفی پاشا بواسرای حیضور سردار اکرمییه کتوروب تلبس خلعت ایله مظهر عنایت اولدوقدن صکره زوایای قاعه ده مختفی اولان اسرای اخذ وجه خانه و مهماتی قبض ایچون قاعه یه ارجاع اولمغله واروب بررجه صعود و طبل و زورناسی چالدیره رق اظهار رسم طرب و سرود ایلدیکی ائنده قاعه نك جبه خانه سی آتش آلوب مصطفی پاشا ایله دائره سی خالق هوایه پران اولمشدر .

واصفك مسوداتنده کیفیت بومنوال اوزره مسطور اولوب انحق عساکر اسلامییه ابتدا قاعه یه نصل کیردی وجه خانه نوجهله آتش آلدی بورالره دائر تفصیلات یوقدر . موسیو تیر تاریخنده دیرکه انکلیز امیرالی اسمیتك سردار اکرم یانه عزیمتی ائناسنده عثمانونك چرخه جیلری عریش پیشکاهنه لدی الوصول میر آلی دوغلاس قلعه نك تسلیمی قوماندان قازاله رسماً تکلیف ایلدی و بوتکلیف رسمی یی تبایغ ایدن برتبدیل فرانسز ماتجیسی ایدی قریباً مصرک تسلیمی مقرر اولدیغندن شمدی مقاومته قالقشوق کندو جانلرینه آجیماق دیمک اولدیغی فرانسز عساکرینه افاده اولدی .

ضابطانك فرانسز اردوسنه القا ایلمش اولدقلری سوء افکار اولوقت پاتلاق ویردی که عریشده مستحفظ بولان عساکر فرانسویه سلاحه طاورانیه جقلرینی و قلعه نك تسلیمی چاره سنه باقق لابد اولدیغی افاده ایتدیلهر قوماندان قازال بوندن مضطرب اوله رق بتون عسکری اطرافنه طوبایوب لسان مؤثر ایله ایتدیکی خطابنده (اگر ایچکنز ده نامرد وار ایسه بزدن آیریلوب عثمانلو طرفه کچسون ممانعت اولماز بن مرکز صداقتده پابرجای استقرار اولان عسکرله صوگ درجه یه قدر طیانه جغ) دیمسی مستحفظینك قبلرنده کی نائره شجاعتی یکیدن اشغال ایتمکله قلعه نك تسلیمی طلبنه رد ایله جواب ویردی عثمانلور طایبه لر دن بریسنك اوچنه قدر صیجان یوللری آچمشار ایدی قلعه نك قوماندانی آنلری طرد و دفع ایچون طیشارو برهجوم ایتدردی بوکا مأمور اولان یوز باشی فره ایله اوچ نفر دن ماعدا عسکر چیقمدیغندن دو نمکه مجبور اولدی بو ائنده عاصی طاقی فرانسه سنجغانی اشانی آلمشار ایدی لکن براونباشی تکرار سنجغانی چکدیکندن واقع اولان منازعه آره سنده تسلیم اولمق ایستیانلر برقاچ عثمانلو عسکرینه ایپلر صارقتدیلهر بو وحشی دشمنلر ایسه یوقارو چیقدقلری کی کندولرینی

ايجرو آلان خيئرلك اوزرينه هجوم ايدوب بر چوغنى قايجدن كچورديلر كپرو  
قالانار عقلرى باشلرينه كاوب مایوسانه مقاومت كوستردك اكثرىبى قيرلدى  
طوپچيلردن برىبى ارقداشلرينك بو حال وحركتلردن انفصال ايدرك ناموس  
عسكرى انتقامنى آلمق اوزره جبه خانه مغازه سنك ايجنه قانوب آتش ويردى كندو  
تلف اولمقنه برابر بر چوق عثمانلو اولدرمك تسليسنه نائل اولدى صاغ قالان بر قاچ  
فرانسز ميرالای دو قلاسك هميله جانلرينى قورتاره بيلدیلر .

ايشته تيرك تاريخنده مندرج اولان تفصيلاتك خلاصه سى بودر اودخى عساكر  
اسلاميه نك قلعه يه دخوللرى كيفيتى بروجه مشروح بك مبهم ومشوش بر صورتده  
يازمشدر زيرا خلاف رأیده بولسان فرانسز عساكرينك بر قاچ عثمانويه ايب  
صارقتدقلىرى يازدقدن صكره همان بونلرك اول فرانسزلر اوزرينه هجوم ايله بر  
چوغنى قليجدن كچوردكارينى بيان ايديبور حالبوكه بويله ايب ايله ايجرو النان بر قاچ  
عثمانونك عموماً فرانسزلر اوزرينه هجوم ايله قلعه يي استيلا ايدوبيرملرى عقلك  
قبول ايدميه چكى بر كيفيتدر واقعا يقه يقه يه كلوبده قليج و بچاق جنكته ابتدار  
اولندقدن عثمانلو عسكرى خارق العاده ايشلر كوررلر لکن ايلرله يوقارو آلان  
بر قاچ عثمانلو عساكرينك در حال كندولرينى يوقارو آلانلر ايله برابر مخالفلرينه  
دخى غابه ايدوبده قلعه يي ضبط و تسخير ايدوبيرملرى قابل اوله ماز مكر كه موسيو  
تيرك بروجهله قبول ايدميه چكى بر نوع كرامت قيبانندن اوله قالديكه جبه خانه آتش  
آلدقده ارنابود مصطفى پاشا دخى دائره سى خالقيله برابر شهيد اولمشيدى بونلر قلعه يه  
هپ ايلرله مى چيقارلدى و برده شرق احوالى و عثمانلورلك مزاج و اطوارينى بيلنلر  
بيلوركه عثمانلورلك دهشت و شدتى انجق حال مدافعه ده اولوب يوخسه ترك و تسليم  
سلاح ايدنلره قليج چكمز لر زده قالديكه كندولره ايب صارقيدوبده معاونت  
ايدنلرك اوزرينه سل سيف ايدلر ممالك عثمانيه ده اك وحشى اولان عشائر عربان  
اعدام ايجون تجسس ايتدكارى دوشمنلردن برى كندولرينه دخالت ايتسه اكا  
سوء قصد ايدمزلر روم ايلي قطعه سنده اك وحشى عد اولنان ارنابودلر دخى قان  
دوكمكدن هيچ چكمنز سر كش بر طائفه اولدقلىر حالده ترك سلاح ايله اظهار  
عجز ايدنلره ايصال خسار ايتزلر واقعا يافده سلاح غدر ايله مقتول اولان اسراى  
اسلاميه نك انتقامنى آلمق سوداسى عساكر اسلاميه نك سويداى درونلرنده بر داغ  
آتشين ايدى على الحصوص قان دعواسى كندولرينه طبيعت نانيه اولان ارنابودلر  
همشهريلرينك قاننى آلمق ايجون فرانسزلرك قاننى ايجمكه تشنه ايديلر لکن بونلرى  
سلاحلري اوزرلرنده ايكن اولدرمك ايسترلردى يوخسه معاونت كوردكلرينه

قايچ چككى روا كورمز لر دى بود قه لره نظر اولتماز ايسه نظره اولاده خاطر لره كله بيلور كه پونا پاره ته كبي تربيه لو ومعلوماتلو بر ذاتك يافده كي غدار لغنه نظر آ بر طاقم وحشى ونادان آدم لرك يايمة جنى يوقدر ظنمه موسيو تيرك فكري دخى بو اولمق كر كدر كه خاتمه مقاله سنده ( صاع قالانلر دو قلاسك همتيله جانلر نى قورتاره بيلد يلر ) ديوكوي اكه دو قلاس اولسيدي اسير اولان فرانسز لرى عثمانلور اعدام ايده جك ايدى ديمك ايستيور بو ايسه پك ياكلش بر زهابدر عثمانلور ايچنده نقدر وحشى آدم لر بولنسه ينه پونا پاره ته نك يافده ايتديكي غدار لنى اجرا ايده جك برسر كرده بولتماز اهل اسلامك وجدانى اوبله بيكلر جه اسرايى دفعه اعدام ايتمك كبي مروت انسانيه نك ضد تامى اولان بر فعل مكر وهه رخصت ويرمز .

معلم نيقولا دخى بووقعه يي بتون بتون بشقه بر طرز غريب اوزره يازمشدر . شويله كه : مصالحه صد دلرى بين الناس شايع اولدينى ائنا ده عسا كر اسلاميه دن بعضيلرى قلعه يه كيدوب مصالحه نك انعقادندن بحث ايدرلر وفرانسز لر دخى قلعه دن نزول ايله اهل اسلام اردوسنه كلوب كيدرلر ايدى ارناود مصطفى پاشا ايله قوماندان قازال بيننده دخى الفت پيدا اولغله قازال قلعه ده بر ضيافت ترتيب ايله مصطفى پاشايى دعوت ايتديكنه بناء اودخى قلعه يه كيدوب انجق كندوسى قلعه يه داخل اولدقن صكره عسكر ينك بغته قيويه هجوم وقلعه يي ضبط ايله ايجروده كي فرانسز لرى اعدام ايتلر يه خصوصى كندولره تعليم وتنيه ايتمشيدي وقلعه نك اطرافى دائرا مدار خندق اولوب قيونك او كنده ايجانه كوره وضع ورفع اولنور بر متحرك كوپرى وار ايدى مصطفى پاشا قلعه قپوسندن ايجرو كيردكن صكره بو عسكر بغته قيويه هجوم وفرانسز لر كوپرى يى قالد ير مغه وقت بوله ميوب عسا كر مرقومه ايجرويه دخول ايتلر يه ايكي عسكر آره سنده قليچ اوينامغه باشلادى فرانسز لر بو خيانتكار لنى كوردكلرى كبي ايجلرندن بر يسي قوشوب جبه خانه يه آتش القا ايدمك جبه خانه وعسكر وبونجه اينه وآتار هپ هوايه اوچدى وپك چوق عثمانلو عسكرى محترق اولدى وقلعه نك ديوارى قپو طرفه دورلدى مصطفى پاشا دخى آتش ايله يانوب تلف اولدى وفرانسز لردن يالكز يوز نفر قالب آللرى دخى تجمع ايدن عسكر اخذ واسير ايتدى قله بر بو كيفيتدن خبردار اولدينى كبي پك زياده غضب نك اوله رق همان صالحيه طرفه چيقيمق اوزره اردوسنى حاضر لغه باشلامغه برابر كوسه مصطفى پاشايى جليله سرزنش سياقنده وقعه يي بيان وار ترق طرف اسلامياندن امنيت منسلب اولديغنى درميان ايتدكه مصطفى پاشا عسا كر اسلاميه نك جهالتدن ويوكار ينه عدم اطاعتدن بحثله اعتذار ايدرك قله بر ك

غضبى براز تسكين ايلمس ايسده قله بر نيتنده اصرار ايدرك اردوسيله صالحيه طرفنه چيقدى لكن بليسيده كي قوماندان عسكروه حركت ايچون امر ويردكده امتناع ايلمس اولدقلى خبريني آلديني ائشاده دمياط قوماندانى جنرال ورديه قطيه طرفنه حركت ايچون بورى چالديرده عسكرك اصغا واطاعت ايتمكلى و ماذوناً فرانسه يه كيمك اوزره اسكدر يه واران فرانسر مأمورلرينك كيمسنة عسكرم مانع اوله رق كيديله جك ايسه هپ برابر كيدرز يوخسه سز كيدوبده بز بوراده تعب و مشقت چكلم بو اوله مز ديدكلى وطنظه اوزرندن مرور ايدن اوچ بيك قدر فرانسز عساكرى اوزرينه براز عربان چيقدقه فرانسزلى جنك ايتك ايتمكلى اخبار موخشمسى تعاقب ايتمشدر .

ايشته نيقولانك تاريخنده مندرج اولان رواياتك خلاصه سى بوندى عبارت اولوب مصرده كي فرانسز لردن ايشتيكي حكاياتى بلا تأمل يازمشدر . مصرده كي فرانسه رؤساسى ايسه وقوعاتى دائماً واقعت خلافى اوله رق اعلان و اشاعه ايدمكلكلرندن شايدان وثوق و اعتماد دكلدر قالديكه بر آدمك ضيافته كيدوبده حقهده سوء قصد ايتك مردلكه مغاير اولديغندن ارناود مصطفى پاشان بويله بر حركتك صدورى مستبعد اولدينى شو بيله طورسون عسكرك آرقه دن هجومنده كندوسى فرانسزلىك الله بولمنش اوله جنى جهته هيج بر باشبوغ كندوسنى بويله بر حال خطر و تهلكه يه قويه ماز . شوحاله كوره نيقولانك نقلياتى دخى نفس الامر موافق اولماز مكر كه مصطفى پاشانك بونده مدخلى اولمقسزىن مجرد معيتمده كي ارناودلىر يافه وقعه فغيعه سنك انتقامنى الملق ايچون بووقى فرصت اتخاذايله خود بخود قلعه يه هجوم و دخول ايتمش اوله لر و اكر چه بر فرقه عسكريه جسم واحد حكمنده اولغله بر باشبوغك وظيفه ذمتى جمله نفراته شامل اولمق لازم كله جكنه نظراً بوروايت صحيح فرض اولنسه ارناودلىك بوكا مخالف حركتلى جهته متهم طوتلملىرى لازم كئوب فقط بونلر وحشى بر طائفه اولدقلى حالده عندلرنده اخذ انتقامدن الذواعز برشى اولديغنه نظراً عجباً معذور اولورلىمى (جواب) اكر بوناپارته كى تر بيه لوو معلوماتلو برذات يافده اسراى اسلاميه حقهده مروت و انسانيته بتون بتون ضد و مخالف اوله رق ايتديكى غدر و خيانتنده معذور طوتيله جق ايسه بو ارناودلىك بتون بتون معفو اوله جقلىرلى جاي بحث اوله ماز بلکه عريشه بروجه مشروح اسير اولان فرانسزلى اعدام ايتمكلىرندن طولايى مدحه شايدان اولورلىر . و اكر بوناپارته اول حركت غدارانه سندن ناشى مؤبداً مقدوح و مذموم اوله جق ايسه بو ارناودلىر دخى اول حركتلرندين ناشى علم تاريخجه نظر حقانيتنده باشبوغلىرينك حال

و موقعلرینه رعایتسز لکله یعنی بر نوع اطاعتسز لکله متهم طوتلملری لازم کلور ایسه ده بونلرک جرمی پوناپارتهنک جنایتنه نظرآ پک خیفدر .

الحاصل اردوی هایون غزده ده ایکن مقدمه الجیش حکمنده اولان بر فرقه سی عریش قلعه سی پیشکاهنه کلوب فرانسز عساگری ایسه حال یأس و فتوره دوشمش اولدقلرندن بر متارکه ایله فرانسه یه عودت آرزوسنده اولدقلری خالد امیرال اسمیتک توسط ضمنده اردوی هایونه کلش اولسی حوادثی عریشده محصور اولان مستحفظلر کوش ابتهاج ایله استماع ایدرلردی . بئرمسعودیه ضبط اولنوبده صالحیه طرفیله مخبره لرینک انقطاعی کندولرینه زیاده تأثیر ایلمش اولدیفی خالد ویره ایله قلعه نک تسلیمی تکلیف اولدیفی کی بوکا دفعه اظهار میل و رغبت ایتشلر ایکن قوماندان قزالک عناد و اصراری بونک اجرانسه مانع اولمش ایسه ده عساگر اسلامیه نک صیجان یولیه قلعه دروننه تقر بلری عساگر فرانسیویه بیننده اختلاف و منازعه بی موجب اولوب بوصردد عساگر اسلامیه قلعه نک ایچنه کیرمشلر و ارناود مصطفی پاشا فرانسه عساگردن ایستیمان ایدنلری اسیر و مقابله ایدنلری کشته شمشیر ایتش و جبهه خانه مشتعل اولمغله معیتی نفراتیه برابر کندوسی دخی بر هوا اولوب کیتمشدر . و عنوة بر قلعه یه کیریشده عسکره بالطبع عارض اولان حرص و هیجان حسیه خلاف معتاد اوله رق درلوفنالقلر و قوعی مجربادن اولدیفی و ارناودلر یافده مغدوراً شهید اولان همشهر بلرینک انتقامی المغه پک زیاده حریص اولدقلری خالد بویه بر قارغشلق و قتده ارناود مصطفی پاشانک اله اسیردوشن فرانسیز عساگرینه بر ضرر کتورلماش اولسی عساگر اسلامیه نک فتوت و انسانیتنه دلیل واضحدر آنجق بوآرده جبهه خانه مشتعل اوله رق غالب و مغلوب اکثری دفعه معدوم اولدیفندن طوغری خبر آلق مشکل اولدیفی جهتله فرانسزلردن قوماندانلرینه مخالف رأیده بولنانلر ایپ صارقیدوب عساگر اسلامیه بی یوقارو آله رق بو صورتله عساگر اسلامیه قلعه یه یول بولوبده می ایچر و کیردیلریوخسه فرانسز عساگرینک بینلرنده کی اختلاف و مباینتی فرصت اتخاذا ایدرک یوروش ایله می قلعه یه داخل اولدیلر و اسیر اولان فرانسزلراولجه قلعه دن چیقوبده کندولکلرندمی مصطفی پاشایه تسلیم اولدیلر یوخسه ایپلرله کندولرینی برجلردن اشاغیمی صارقتدیلر بورالری لایقیله معلوم اوله مامش و بوجهتله و اصف افندی اردوی هایوبندن درسعادته کلش اولان تخریرانک و موسیو تیر صکره دن ظفریاب اولدیفی مسموغانک خلاصه لرینی یازوب نيقولا دخی مصرده دوران ایدن حوادثی درج و تخریر ایتش و بناء علیه اوچنک نقلیاتی یکدیگره مابین بولنمشدر .

هر نه حال ایسه مصرک قره طرفدن کلیدی حکمنده اولان عریشک اهل اسلام  
النه یکمسی قله بره تأثیر ایدرک هان اوائل شعبانده اردوسیه صالحیه طرفنه حرکت  
ایتمش ایسه ده عسکر نده جنکه خواهش اولیوب جمله سنک فرانسه یه عودت آرزوسنه  
دوشمش اولدقلرینی و بر متارکه عقدیله مصری ترک ایدوب کیتمک هر حالده خیرلو  
اولدیغنی تحقیق و تصدیق ایتمش ایدی .

سردار اکرم دخی ذاتاً مصری متارکه و مسالنه یولیه استخلاص ایتمک املنده  
اولوب عریشک دخی بویه خراب اوله رق اله کچمسندن چندان ممنون اولمامش  
ایدی . امیرال اسمیت دخی بومصلحت مهمه کندو الیه تسویه پذیر اولوبده کسب  
نام ایتمک آرزوسنده اولدیغندن اشبو عریش وقعه سیله در دست اولان سر رشته  
مکالمه نك قیرلامسنه سی ایدیوردی .

بنساء علیه مقدمه قرار ویرلدیکی اوزره مرخصلر اجتماع ایله مصرک تخلیه سی  
شرائطک مذاکره سنه بالابتدار یکرمی ایکی ماده یی حاوی برقطعه تخلیه شرطنامه سی  
تنظیم ایله شعبانک یکرمی سکرنجی کونی امضا ایدوب تصدیقنامه لری حضور  
سردار اکرمیده مبادله اولمشدر .

صورتی زیرده (۱۱) رقیله ایراد اولنور .

بوصورتله غائله حربیه برطرف ایدلمش اولدیسه ده پوناپارته بوقدر یوز سنه لردنبرو  
مرعی و محترم طوتیلان عهد و شروطی چکنه یه رکه بغته مصری استیلا ایلمش  
اولسنه نظر آق له برک بومعاهده سنه تمامیه اعتماد اولنه میه جغنه و مصرک ضبطدن صکره  
دخی کافی السابق کوله منلرک نچئه تغلب و تحکمنه دوشیمه جک صورتده قبضه ضبط  
و تصرفه آلمسی کیتلو عسکره محتاج اوله جغنه مبنی بو ائساده اناطولینک بعض  
محللر نده چپان اوغلی و سائر متعینان مملکت معرفتلیله اون بیک سواری و یکرمی  
بیک پیاده تحریر اولندقدن بشقه عربستان ورقه و سیواس و معدن اطرافده دخی  
کلی عسکر ترتیب اولمشدر .

پوناپارته نك احواله کلنجه بالاده بیان اولندیغنی اوزره فرانسه یه عودتنده پک  
زیاده نفوذ و اعتبار بولمش و اولوقت فرانسه جمهورینک تبدیل شکل و طوری  
لازمه حالدن اولمش ایدی . انجق پوناپارته خود بخود بونی باشه چیقاره میه جغنی  
جزم ایله مدیران جمهور ایچنده اک مشهور و معلوماتلی اولان سیزی جاب ایتمک  
استیوب سیز دخی پوناپارته یی اله بر آلت اتخاذا یله حکومته استدیکی کبی نظام  
ویرمک املنه دوشهرک پوناپارته ایله بالاتفاق هیئت حکومتک تبدیلنه قرار ویرمشلر  
و ابتدا قدما مجلسنک اکثریتی قزائمشر و کویا بعض اصحاب فساد طرفندن مجلسی

طاغتمق صورتی تصمیم اولمش دیو امر محافظه‌سی پوناپارته‌یه حواله اولنغله اودخی پارسده کی عسکرک قوماندانه‌سی اله آلوب و کندوسیله هم افکار اولان ضابطانی یانه جلب ایدوب تدابیر لازمه‌نی تأسیس ایتدکن صکره قدما مجلسنده برقاچ اعضا طرفندن واقع اولان تکلیف اوزرینه هیئت حکومتک تبدیلی و شرطنامه ملتک تجدیدی و اوچ موقت قونسلوس نصب و تعیینی خصوصی در دست مباحثه ایکن پوناپارته ایچرو کیروب برنطق ایراد ایدرک متردد اولان اعضایی دخی اقع ایله بو خصوصی تصدیق ایتدیرمش و کندوسیله سیزک و برده روزه دوکونک موقت قونسلوس اولملرینه قرار ویردرمشدر و بوقراری بشیوزلر مجلسنده دخی قبول ایتدیرمک اوزره پوناپارته اورایه واروب نطقه باشلادیغنده مخالف رأیده بولان اعضا آنک سوزنی کسدیروب بز جبار استمیز دیو یاغاره ایدرک پوناپارته‌نک اوزرینه هجوم ایتملریله نطقی طوتیلوب نه پایه‌جغنی شاشردینی ائنده عسکر بو حالدن خبردار اوله‌رق ایچرو کیروب جنرال‌لرینی تخلیص ایتمشلر و بونک اوزرینه پوناپارته عسکرینی ایچرو یوریدوب مجلسی طاغتمش وهان قدما مجلسنک قراری اوزره مجلسلرک اوچ آی تعطیلی ایله یکیدن بر شرطنامه یاپلمق اوزره اوچ موقت قونسلوس نصبی قرار کیر اولوب مؤخرأ پوناپارته‌نک طرفدارانی غلبه ایدرک بشیوزلر مجلسی دخی بوقراری تصدیق ایتمشدر بو هنکامه‌ده سیز و تالیران کی خیلی مشهور ذاتلر پوناپارته‌نک طرفدارانی بولمشلر ایدی .

بونک اوزرینه مدیران حکومتی فسخ اوله‌رق پوناپارته و سیز و روزه دوکون موقت قونسلوس نصب اولنوب سیز یاپیله‌جق قانوننامه دولت ایله و پوناپارته اداره امور حکومت ایله مشغول اولمق اوزره بیتلرنده قرار ویرمشلر ایدی .  
 و اولوقت جمهوریت مفرطه طرفدارانی ایله قرالیت غیرتکشانی درلو فسادلره تصدی ایدر اولدقلرندن فرانسه‌نک امور داخلیمی رهین تشویش و اختلال و مضایقه مالیه‌سی ایسه برکال ایدیه‌ده قونسلوسلرک حکومت موقته‌سی مطلق و مستقل اولدیغندن بوله‌جقلری چاره‌لرک اجراسنه بر مانع و حائل قالماشیدی و ابتدا اشبو اکیبوز اون درت سنه‌سی جمادی الاولاسنده واقع تشرین ثانیء افرنجینک اون برنجی کونی اجتماع و پوناپارته‌نی کندولرینه رئیس نصب ایدرک ایشه مباشرت ایتشلردر .

پوناپارته‌نک امور عسکریه‌ده مهارتی مسلم اولوب بو کره اصلاحات ملکیه و مالیه ایشلرنده دخی ید طولی کوستردی چونکه آدم طایمق کندوسنده مزیت جبلیه اولدیغندن کامباسرس نام مشهور ذاتی عدلیه ناظری و تالیرانی خارجه ناظری



و بر تبه بی حربه ناظری نصب و تعیین و سائر مأمورینتری دخی بویله عصرک اک  
 دکولو و درایتلو آدملرینه و الحاصل هر ایشی اهل و اربانه تفویض ایتمکله مدیران  
 دورنده فرانسه ده رونما اولان مشکلات ملکیه و مالیه دفعه کسب خفت ایلدی .  
 و اولوقت پروسیا ایله اسپانیادن معادا دول اوروپا هپ فرانسه ایله محارب اولوب  
 انکلتراه لومالطه و اسکندریه نك محاصره سنه دوام و اوستریالو ایتالیا نك ضبط و تصرفی  
 امرینه اهتمام ایتمکده ایدیه ده روسیه ایمپراطوری پاولو بالاده بیان اولندیغی  
 اوزره اردوسنک اسویچره ده پریشان اولدیغی خبرینی آلدقه بونی اوستریالونک  
 سوء قصد و خیانتنه حل ایدرک متفقارندن صوغومغه باشلامشیدی و انکلتراه و اوستریا  
 دولترلی پاولونک اتفاده دوامی ایچون میسل و توجهنی جلب ایده جک نوازش  
 و احترام خصوصنه سعی ایتمشرایسه ده عندنده مقبول اولیوب معنی اتفادن آیرلمش  
 کبی ایدی پوناپارته بودقیقه نی تظن ایدرک همان پاولوی کندو طرفه جلب ایتمک  
 اوزره پروسیا دولتی توسط ایلمشدر .

پوناپارته بومثللو امور داخلیه و خارجیه ایله مشغول اولدیغی ائنده سیز دخی  
 مباشرت ایلمش اولدیغی قانوننامه اساسی لایحه سی اکل ایتمشیدی بوقانوننامه حکمنجه  
 فرانسه تبعه سندن اولوب یکر می بر یاشنه و اصل اولنلر حقوق مدنیه نائل اوله رق  
 بونلر بش التی ملیون نفوسدن عبارت اولدقلری حالدیه هیئت ملت عد اولنوب  
 ایچلرندن اونده بر حسابیه انتخاب ایده جکلری بش التی بوز بیک کیسه مختاران صنفی  
 و انلرک کذلک کندو ایچلرندن اونده بر حسابیه انتخاب ایده جکلری الی التمش بیک آدم  
 معتبران ایالت و آنلرک کذلک بونسبت اوزره انتخاب ایده جکلری بش التی بیک ذات  
 معتبران ملت صنفلری اولق و جزاللق و محاسبه جیک و ایلچیک کبی معلومات مخصوصیه  
 محتاج اولان مأمورینتر مستتئا اوله رق سائر مأمورین درجه لرینه کوره بوصفلرندن  
 انتخاب و تعیین قذمق لازم کلدیکندن سیز بوقانوننامه بی ( امنیت ادناده حکومت  
 بالاده اولق کر کدر ) کلامیه خلاصه ایتمشیدی و بو اساسه تطبیقاً قوانین و نظامات  
 متفرعه بی تنظیم و محافظه ایچون متعدد مجلس و دیوانلر ترتیب ایله جمله سنک فوقده  
 ( سنا ) مجلس رؤسای ملت بولنه جنی کبی اجرا مأمورلری درجه درجه مذکور  
 صنفلرندن انتخاب و تعیین ایله حکومت اجرائیه نك فوقده اولق اوزره سنا طرفندن  
 بر منتخب اعظم انتخاب اولنوب بونک وظیفه مأموریتی صلحه و دیگری حربه مأمور  
 اولق اوزره ایکی قونسلوس انتخابندن عبارت اولمسیله برابر کافه مأمورینک انتخابی  
 و مصالحک اداره سی بویکی قونسلوسه و ایلچی قبول ایتمک و عهدود و قوانینی امضا  
 ایلمک کبی مصالح جسمیه دخی منتخب اعظمه عائد اولق و سنا مجلسی لزوم کوردیکی

حالدہ منتخب اعظمی و ہرکیم اولورایسہ اولسون نفوذ و تفردی حسبیلہ جمہورہ خوف و اندیشہ و یرہ جگ ماموری عزل و تبدیل ایدہ بیامک خصوصاری قانوننامہ مذکور اقتضاسندن ایدی .

بورالری ایسہ غایت تفرد و استقلالہ مائل اولان پوناپارتنک ایشنہ الویرمدیکندن بقانوننامہ ی قبول ایدہ مدیکی جہتلہ سسینز ایلہ میانہ لرنده اختلاف واقع اولسی اوزرینہ برچوق مباحثاندنصکرہ یکیدن برقانوننامہ تنظیمی بحثنہ کیریشیلوب بوکا دائر قومسیونلرده جریان ایدن مذاکراتک نتیجہ سننده سینزک لایحہ سی جزئی تیسیرات ایلہ قبول اولنوب فقط منتخب اعظم ماموریتی الغا و آنک یرینہ باش قونسولسوق ماموریتی وضع ایلہ دیگر ایکی قونسولسوک اکا معاون اعتبار اولنسی وباش قونسولسوک نام و عنوانجہ قرالدن فرقی اولوب انجق وکلا و مامورین سائرہ ی نصب و تعیین و صلح و حربی اعلان و عہدنامہ لری امضا ایلمک آنک وظائفندن اولسی خصوصالرینہ قرار و یرلمش و اون سنہک اولمق اوزرہ پوناپارتنہ باش قونسولوس وقامبا سرز ایلہ لبرون ایکنجی و اوچنجی قونسولوس انتخاب و تعیین ایدلمش و سسینز دخی سنارئسی نصب اولنہرق بیک ایکیوز اون درت سنہ ہجرہ سی شعبانہ مصادف اولان بیک سکنز یوز سنہ میلادیہ سی اوائلندہ ہیئت حکومت اکمل ایلہ قونسولوسلر دوری باشلامشدر .

الحاصل پوناپارتنہ باش قونسولوس عنوانیہ فرانسه حکمداری اولوب کمال سرعت ایلہ اجرا آتہ باشلامشدر فقط ایتالیا دہ اوستریالولر غالب و عموماً دکرلر دہ انکلیزر متحکم و متغلب اولوب بوکامقابل جمہورک مقدار کفایہ عسکر و مهماتی بوق و مضایقہ مالیہ ایسہ برکال اولدیغندن پوناپارتنہ بومثللو مشکلاتہ باقہرق صاحہ رغبت ایتمش ایسہ دہ انکلترہ باش وکیلی مشہور ( پیت ) حربک دوامی افکارندہ بولندیغندن خواه و ناخواہ پوناپارتنہ دخی استکمال اسباب حربیہ یہ اقدام و یواننادہ ایتالیا طرفندہ فرانسه و اوستریا جنراللری بینلرنده محاربه دوام ایتمکدہ اولدیغندن پوناپارتنہ بالذات اولطرفہ کیتمک اوزرہ براردو ترتینہ بذل جہد و اہتمام و بونکلہ برابر مالطہ و اسکندریہ نیک انکلیز آبلوقہ سنندن تخلصی ایچون بعض تدابیر بحریہ یہ دخی قیام ایتمش و قلابرہ تعلیمک ارسالیلہ برابر امداد کوندرمک اوزرہ اولدیغنی حوادثی دخی و یرمشدر .

قلہ بر ایسہ فرانسدہ کی تبدل احوالدن بیخبر اولہرق بروجہ مشروح سردارا کرم ایلہ برمتارکہ مقالہ سنہ ابتدار ایتمکلہ برابر مدیران جمہورہ خطاباً یازدیغنی تخریراتدہ مصر الکاسنندہ بولان فرقه عسکر یہ نیک درجہ اضطراب و مضایقہ سی

بك مبالغه‌لى اوله‌رق عرض و اعلام و بونك مسؤلىتى پوناپارته‌يه عائد اولديغى بيان‌يه  
و ديكر عزويات علاوه‌سييله پوناپارته‌يي اتمام ايتمش ايدى .

و بوتجر يرات انكليزلرك يدينه دوشه‌رك انكلتره‌يه كوندر يلوب اوراده قله‌برك  
مبالغه‌لو سوزلرينه تاميله اعتماد اولمغله فرانسزلرك بويله فوق‌العاده پريشانلقلرندن  
طولاي انكليزلر ممنون اولوب جمله‌سنى تماماً اسير ايتك طمعنه دوشه‌رك هان  
مصرده‌كى فرانسزلر حقدنه جمله‌سنى اخذ واسير ايتكدن غيرى معامله ايتماك  
اوزره اميرال اسميته امر كوندرلش ايدى .

واكرچه سرداراكرم ايله قله‌بر بيننده امضا اولنان سالف‌الذكر متاركة‌نامه  
اقتضاسنجه اسميت دخى متبوعى اولان انكلتره دولتيه روسيه دولتى دونخالىرى  
آره‌سندن سر استجه كچمك اوزره فرانسزلره مرور تذكروه‌لى ويره‌جك  
ايديسه‌ده اسميتك بويله برتعهد رسمى اجراسنه مازونيت كافيه‌سى يوغيدى فقط  
فرانسز جنراللىرى فن ديپلوماتيده معلوماتسز اولدقلرندن بودقيقه‌يي درك و تفظن  
ايدهميوب بويله هوايى برسوزره الدانه‌رق اسميتدن بوبابده برامضا طلب ايتك  
بيله خاطرلرينه كلامشيدى .

بناءً عليه انكلتره دولتى بوبابده برتعهد رسمى تحتنه كيرمش اولديغى جهته‌له  
فرانسزلى حرب اسيرى ايتك اوزره بوجه مشروح اسميته امر ويرمشدر .  
مع‌مافيه بوكيفيتدن اسميت زياده‌سييله محجوب و كمال حجاب ايله قله‌بره بيان حال ايتك  
مجبور اولمشدر . حالبوكه هوارلك فنانغى جهته‌يه بوامرك اسميته وصولى تاخر  
ايدرك اولوقته قدر متاركة‌نامه‌نك اكثر موادى موقع اجرايه قونلمشيدى .

شويله‌كه: غرهٔ رمضانده قله‌بر عدليه‌يه عودت و سرداراكرم اغلرندن برابر  
كتورمش اولديغى محمد اغايى مصره ارسال ايله محتسب حسن اغا خانه‌سنه قوندريله‌رق  
اكرام اولمسنى توصيه و تنبيه ايلمش اولديغندن محمد اغا بعد‌العشا آلاى ايله مصره  
دخولنده خلق سيرينه چيقه‌رق چوقدنبرو كورمدكلرى دولت عليه آدميك  
مشاهده‌سييله فرنج و دلشاد اولمشلر و حسن اغانك خانه‌سنه نزولنده رسم خوش  
آمدى اجراسنه كمشلر فرداسى علما و اوچاقلو و بلده‌نك اشرف و اعياننى و قبط  
وسائر نصارانك معتبرانى بالاجتماع طرف سرداراكرميدن كلان ايكي قطعه امر  
شريف قرائت اولمشدر . برى محمد اغانك ديوان مصره ناظر نصب اولنديغنه  
و ديكرى سرداراكرمك مصره و رودينه قدر اوراده بولنان كوسه مصطفى پاشانك  
قائم‌مقام تعيين قلنديغنه دائر ايدى .

اهالىء مصر بوندن فوق مائتصور ممنون اولوب فرانسزلر دخى مواشى واسلحه

وامتعه به دائر زوائد اشیا لرینی صاتمغه باشلامشار و شرائط مساله قرار کیر اولدقدن  
 صکره تدایر سفریه بر طرف ایدیلهرک سردارا کرم طوب و وجه خانه و سائر احوال  
 و اتقالی عریشده براغوب چونکه خلال شوالده مصرک تخلیه سی مقاوله اقتضاسندن  
 اولسیله رمضانک یکرمی ایکسینده سکنارجه بلیسه کلوب حتی مصطفی پاشا قله بردن  
 بالاستیدان علما و اشرف و اعیان مصر ایله بلیسه عزیمت و اولا مصر والیسی  
 نصوح پاشا و بعده سردارا کرم ایله ملاقات ایدرک رسم خوش آمدی نی اجرا  
 ایلمشار بعده نصوح پاشا و امرای مصریه خانکه قریه سنه و اورادن مطریه قریه سنه  
 گلشار و مراد بک دخی صعید جانبدن طولاشوب بوجهته گلش اولدیغندن  
 سردارا کرم حضورینه دخول ایله مظهر اکرام اولمشیدی . و فرانسزلرک تخلیه  
 ایتدکلری یرلره طاقم طاقم عسکر کوندرلمکده و عساکر اسلامیه دن برکروه دمیاط  
 و منصوره طرفلرینه طاغیلوب برطاقمی دخی فوج مصره کلوب کیتمکده  
 ایدی . و صعید والیسی نصب اولنان درویش پاشا خارج مصره کلهرک براز اقامتدن  
 صکره قلیه جانبه کیتمش و داو و ایله دیره نام جنرالر فرانسه یه عودت ایتمش ایدی .  
 مصرک تخلیه سی ایچون تعیین اولنان مدت تمام اولدیغندن شوالک اون سکنرنجی  
 چهارشنبه کونی قله بر مصر قلعه سنک تسلیمه قرار و یروب کوسه مصطفی پاشایه  
 خبر کوندردکده معلم نیقولانک تحریرینه کوره اول کون یوم نحسدر دیو مصطفی  
 پاشا قلعه نک تسلیمندن ابا ایدرک فرداسی پنجشنبه کونسه تأخیر ایتمکله بوباظلم  
 اعتقادک عظیم سیئه سی کورلمش و (الطیر لایؤخر) مضمونسه رعایت ایدلمدیکنک  
 بک چوق ندامتی چکلمشدر .

شویله که : پنجشنبه کونی قلعه نک تسلیمی مقرر اولدیغندن فرانسزلرک چوغنی چیزه  
 طرفه کچوب مصرده قله بر ایله برابر آز کیمسه قالمشیکن اول کیجه امیرال اسمیتدن  
 قله بره وارد اولان مکتوبده مصرک تخلیه سی ایچون سردارا کرم ایله عقد اولنان  
 مقاوله انکلتره دولتی طرفسندن قبول و تصدیق ایدلماش اولدیغنه مبنی بوکره  
 انکلتره دن کلان تعلیمات حکمنجه فرانسزلرک مصردن فرانسه یه عودت لرینه مساعده  
 ایده میوب جمله سنی اخذ و اسیر ایدرک انکلتره یه کوندرمکه مأمور اولدینی مندرج  
 بولمغین قله بر آتش غضب اوله رق در حال جنراللری و سائر امرا و ضابطان و مأمورین  
 فرانسه و یه بی جمعه عقد ایلدیکی مجلس مشورتده بو مکتوبی قرائت ایدیلجک حضار  
 مجلس فوق الغایه مکدر و منفعل و جمله سنک کانون دروننده آتش الم و غضب مشتعل  
 اوله رق بو وجهله اسارتی اختیار ایتمکدن ایسه بودیاردده هلاک اولمق اولادر دیو  
 براغزندن انکلیزلرک بو تکلیفلرینی رد ایتلری اوزرینه قله بردخی عسکرک اطاعتسزلک

مسلكنه سالك و ترك حرب ايله فرانسه يه عودته حريص و مهتلك اولدقلرندن بختله بن بومصالحه يي ذاتاً سزك تذبذب واضطر ابكزدن ناشي قبول ايتمشيدم ديمكله جمله سي بز انجق شروط منعقدله اوزرينه بورادن چيقه بيلورز بزم ايچون بشقه يول يوقدر هان صدر اعظمه تبليغ ايت كه شام حدودينه عودت ايتسون و شروط منعقدله يه رعايت اولنه جغنه دائر انكلتره دولتي طرفندن اسميته تعليمات جديده كتورتسون يوخسه بزي بورادن چيقارمق دشمنلر مزك پنجه سنه تسليم ايلمك ديمك اوله جفتدن بو صورتده بز دخي آنكله محاربه يه مجبورز ديمشلقه بر ذاتا بك جسور بر ذات اولوب حضارك بويله متانتني كوريجك صوك درجه يه قدر بذل تاب و توان ايتمكي قويا تصميم ايدرك فرانسه يه عودتدن فراغت اولنديغنه واسكندريه يه كيمك اوزره حركت ايتمش اولان عسكرك اعاده سنه دائر هر طرفه امرلر كوندرمش واسميتدن كلان تحريراتي (عسكرك بويله كستاخاقلره مظفريت ايله جواب ويرملي هان جنكه حاضر اولكنز) كلاه يله بالتذليل طبع و تمثيل ايتديره رك عسكرينه نشر ايتدرمش و بونكله برابر كوسه مصطفى پاشاني يانته جلباله صدر اعظم عريش حدودينه چكيلوبده بر موجب مقاوله فرانسولر ك سالماً فرانسه يه عودتارينه رخصت اعطاسيچون انكليزولر ايله مخابره ايلمسي خصوصنك كندوسنه تبليغ اولمسني تنيه ايلمش و مصطفى پاشا كندوسنك دخي مدخل و توسطي اولديني حالده رشيد مصطفى وراسخ مصطفى افنديلرك عقد ايلمش اولدقلري مقاوله نك انفساخيله ايشك كسب مشكلات ايده جكني درك ايدرك عظيم اندیشه و حيرت ايله قله بر ك يانندن چيقوب در حال كيفيتي سردار اكرمه انها ايتشدر .

سردار اكرمك املي محاربه سزجه مصري استخلاص ايلمك صورتني اوله رق بوملاحظه اوزرينه عقد متار كه اولنش ايدو كندن بيوك طوپلري و لوازمات سائره يي كيروده بر اقوب سبكار جه كمش و معيتمده كي عسكرك چوغني شورايه بورايه طاغلمش اولوب اكر چه باشنده ينه كليتلو غلبه لك وار ايسه ده ياننده يكيچري كبي اولدقجه بر حمله آز چوق ثبات ايده جك عسكرك آز اولوب سائر غلبه لك هپ عشائر و نفير عام كبي درتي مقوله سي عسكردن عبارت اولديني جهته جنكه كيرشمك ايتتمز ايسه ده اردويه هر طرفدن كليتلو خلق كلوب تجمع ايتمش و بر او جي عادليه كاهرك مصره اوچ ساعت قدر تقرب ايلمش اولديني و سردار اكرم دخي بليسدن چيقوب خانكه قريه سنه كلك اوزره بولنديني حالده مصطفى پاشانك تحريراتي كندوسنه واصل اولغله كيرويه عودت درلو اراجيفه علت اوله جغنه و بونجه كوله من و عشائر عربان و سائر باشي بوزوق عسكردن مركب و مخلوط وغير منتظم و نامضبوط بر اردونك

همان اعاده سی ذاتاً مشکل بر کیفیت اولدیغنه منی همان قله بره خطاباً (مادامکه مدت تمام اولدی چاره سز مصردن چیقمکز لازم کلور فقط چیزه طرفنده اقامت ایدیکز و بزدن امین و مطمئن اولکنز بز سزی کیلریمزه ارکاب ایله مملکتکنزه ایصال ایلر ز انکلیزلر طرفندن دخی برشی یاپیله من اما چیقمه جق اولور ایسه کز بن بونجه عساکری کیرویه اعاده ایده مم صکره کندو قانکنزه کندو کز کیرمش اولورسکنز) دیو وعد و وعیدی حاوی برقطعه تحریرات سامیه کوندروب قله بر بوتحریراتی لدی القرانه غصبه کلهرک (بونه دیمک بزم یاپدیغمز معاهده منقوض اولدی زیراً انکلیز امیرالی بزم فرانسه یه عودتمزی تصدیق ایتمشیکن دولتندن آلدینی امر اوزرینه بزى اسیر ایده جکئی رسماً بیان ایدیور بزم شو حالده بورادن چیقمانز محالدر هیچ اولماز ایسه سزهمان بلیسه عودت وانکلیزلر ایله مخبره یه مبادرت ایدیکز) دیو رد جواب ایتمکله سردار اکرم متأثر و چونکه بو قدر غلبه لکله فهای مصره تقرب ایتمشیکن عودت عیب و یاننده کلی عسکر وار ایسه ده بویه درتی مقوله سی عسکرله حالندن مایوس بر منتظم اردویه غلبه محل شک و ریب اولدیغندن امرین بیننده متردد و متحیر اوله رقینه منوال مشروح اوزره قله بر ایله مخبره یه دوام و بونکله برابر منفرق عسکرک جمعنه اقدام ایتمکده اولوب قله بر ایسه بویه مخبره ایله کچن کونلری غنیمت بیلهرک یوله روان اولان عسکرینی اعاده و مهمات و ذخائرینی تدارک ایله ایشلرینی تسویه و اسباب حربیه سنی تهیسه و اتمام و مصر قلعه سنه و اوز بکده کی قوناغنه بر مقدار عسکر وضع و باقیسنی جمع ایله خارج مصر ده نصب خیام ایتدکدنصکره شوالک یکر می التجی پنخشنبه کونی کوسه مصطفی پاشایی و برده بو اوانده فرانسه جمهوریه محارب بولنان اوستریا دولتک قونسلوسنی حبس و توقیف ایدوب همان اول کیجه اردوی هایونی باصمق نیتله تدابیر لازمه یه تشبث و وقت حرکتی بیلدیر مک اوزره اوچ طوب آلمسنی ترتیب ایلمشدر .

معلم نيقولا قله برک اردوسنی اون سکنز بیک و سردار اکرم اردوسنی التمش بیک اولمق اوزره تحریرات ایدر موسیو تیر قله برک اردوسنی اون بیک و سردار اکرم اردوسنی یتش سکسان بیک ایدی دیر لکن قله بر اقدجه مصر ایله اسکندریه دن ماعدا مواقع عسکریه نی تخلیه و تسلیم ایلمش اولدیغنه و اسکندریه محافظه سنده کلی عسکر اولیوب باقی عسکر ایسه هپ مصر ده مجتمع اوله رق بوندن مصر قلعه سیله اوز بیکه ده کی سر اینک محافظه سنه بر اقدینی عسکر نهایت ایکی بیک راده لر نده بولندیغنه نظر ا بو کره جنکه سوق ایلدیکی عسکرک مقداری یکر می بیک قدر اولمق لازم کلدیکندن نيقولانک روایتی صحته اقر بدر سردار اکرم اردوسنی دخی فی الواقع یتش سکسان بیک راده لر نده ایدیه ده

مقدما بر خیلسی شورایه بورایه طاغلمش اولدیغندن سردار اکرم یاننده مجتمع اوله رق قالان عسکر احتمالک التمش بیکه بیله بالغ اوله ماز ایدی مع مافیه عسا کر اسلامیه عددجه فرانسزلردن زیاده ایسه ده معلم ومنتظم اولمیان عسکر هر نقدر چوق اولسه معلم ومنتظم بر اردویه معادل اوله میه جنی درکاردر .

قله بر عسکرینی فن حرب اوزره تعبیه و سواروی هجومه مقاومت ایده بیله جک صورتده متعدد مر بعلره منقسم اوله رق حرکت ایتک اوزره ترتیب و تهیئه ایستدکن صکره عسکرینه خطاباً ( یولداش لر مصر الکاسنده شو ایاقلمزک باصدیغی یر لردن بشقه برشیئه مالک دکلز بر ادیم کیر و کیده جک اولورسه کز ) نابدید اولورسکزر دیدیکنده فرانسز عسکر ی بوندن متأثر وهرچه باداباد یولنده فداکارانه حرکت ایتک اوزره امره منتظر اولمش ایدی الحاصل فرانسزلر اهل اسلامه نسبتله عددجه آز ایسه لرده فن حربده مهارت لری زیاده و کیروده کندولری ایچون جای سلامت اولدیغنی بیلدک لردن هر بری فداییلک یولنده جنسه آماده ایدی .

اردوی هایونک مقدمه سی مقاننده بولنان مصر والیسی نضوح پاشا فرقه سی اول کیجه اردوی هایونک ایلروسنده مصره قریب محله بولنوب کوله منلرک دخی چونغی برابر ایدی آنلره قریب محله واقع مطریه قریه سنده دخی اوچ درت بیک یکچیری متریس آلوب یانلرنده بر قاچ بیک سواروی دخی وار ایدی .

قله برک ترتیبی اوزره برنجی وایکنجی طوب آتلدقده چونکه کوله منلر فرانسزلر ایله پک چوق محاربه لر ایلمش اولدقلرندن فرانسه اردوسنک اصول حرکتنه ایجه کسب اطلاع ایلمش اولملری حسبیله متیقظ اوله رق هان مراد بک نضوح پشایه ( فرانسزلر بزه یقیندر بو طوپلرک آتلیشنه باقیلور ایسه بز ی باصق نیتنده اولمق کر کدیرلر غفلت ایتیه لم عسکر حاضر بولسون ) دیو خبر کوندر مسی اوزرینه نضوح پاشا ( بو قدر عسکر اوزرینه فرانسز هجوم ایده مز بیهوده تلاش ایتیمکز ) دیو رد جواب ایلدیکی انشاده حرکت امرینه علامت اولان اوچنجی طوب دخی آتلغله و فرانسزلرک حرکت و هجوملری تعین ایتمکله عسا کر اسلامک حاضر اولسی ایچون امر یرلمش ایسه ده طلوع فجر دن مقدم فرانسزلر یتیشوب چاتمش وهان مطریه قریه سنه هجوم واقتمام ایتمشدر .

ایشته عسا کر اسلامیه یی ابتدا فرانسزلرک بویه خلاف مأمول اوله رق طلوع فجر دن مقدم بقتّه حرکت و هجوملری شاشر تمشیدی فقط نضوح پاشا معیننده کی عسا کر سریع الحرکه و بهادر عثمانلو و کوله من سوارسی اولوب هان نهر نیل ایله فرانسز اوردوسی آره سندن مصره طوغری سکر تملریه قله بر بونلرک اوزرینه بر مقدار

سوارى ارسال ايله سد راه اولمق استمش ايسه ده فرانسز سواريسى عثمانلو و كوله من سواريسنه مقابل اوله ميوب عساكر اسلاميه بونلرى احاطه ايدرك قليججه طوغرامغه باشلاقلرندن قله بر آنلرى تخلص ايجون امدادلرينه اوجى و دراغون بلوكلرينى كوندرمشدر لکن كيرودن اردوى هايون ايله سردار اكرم كلوب يتشمدن مطريه قريه سنى آلتق كندوسنجه اهم واقدم اولديغندن اول جهته اهميت ويرهرك جنرال رينيايى مطريه اوزرينه سوق ايتدكده يكيچريلر اظهار جلادت ايله قريه دن چيقوب و جنرال رينيا فرقه سى اوزرينه هجوم ايدوب فرانسزلر ايسه كسكين آتش ايتكله يكيچريلردن بر خيلى نفرات شهيد و مجروح اولمش ايكن يوز چويرميوب كوكس كوكسه كلهرك قليج و بجاق اوينامغه باشلامش ايسه ده فرانسزلرك برقولى سونكى ايله يكيچريلرك جبهه سندن هجوم ايتديكى حالده برقولى دخى ياندن حركت ايتمريه يكيچريلر بوزيلوب طاغلمشدر . وايكى قول برلشوب مطريه قريه سى اوزرينه هجوم ايدرك سونكى ايله عساكر اسلاميه اوزرينه دوشدكلى كې طرفيندن بر جوق تلفات و قوعيله عساكر اسلاميه منهزم اوله رق فرانسزلر مطريه قريه سنى ضبط ايتمشدر . و بوراده بوزيلان عساكر اسلاميه دخى اوله ره طاغيلوب نصوح باشا فرقه سيه برلشهرك مصره طوغرى كيتمشدر . بونك اوزرينه قله بر كيرودن كلكده اولان سردار اكرم اردوسنه سدراه اولمق اوزره يكيچريلرك مطريه قريه سنده براقدقلىر طوپلرى چيويه يوب همان ايلرو حركت ايتمش و عسكلى درت مربع قولره منقسم اوله رق ايكى قولى جنرال رينيا و ديكر ايكيلى جنرال فريسان قومانده سنده اولمق اوزره ايلرو يورتمش ايدى .

سردار اكرم فرانسزلرك بروجه مشروح مطريه قريه سنه هجوم ايتدكلى خبر آلدغى كې امداده يتشمك اوزره ياننده كى عساكر ايله سريعا حركت ايلمش ايسه ده آنك وصولندن مقدم فرانسزلر مطريه قريه سنى ضبط ايله ايلرويه حركت ايلمش اولدقلىرندن مرج و سرقوس قريه لرى آره سنده طرفين يكديكره مصادف و مقابل اوله رق ابتدا طوپ چنكهنه مباشرت اولندقدنه بالاده بيان اولندغى اوزره بيوك طوپلر طاقيله كيروده براغلمش اولديغندن و موجود چوپچيلرك طوپچيلقده مهارتلى اولديغندن طرف اسلامياندن آتيلان كلهرك فرانسزلره چندان تاثيرى اولميوب فرانسز طوپچيلارى ايسه غايت ماهر اولدقلىر جهته له بزم طوپلرمزى معطل ايتملى اوزرينه هجومدن غيرى چاره اولماغله بر فرقه عثمانلو سواريسى جنرال فريبانك مربع الشكل قوللرى اوزرينه ييلديرم كې هجوم ايتمش ايسه ده صيجاغك شدتندن يرلر درين درين يارلمش اولديغندن آتلىر استيلان سرعته



ایشلمیوب تمام صالحم منزله کلککری کبی فرانسزلر طرفدن دفعه یاغور کبی صالحم و مسکت یاغدیرمغله بوسوارینک چونغی دوشوب شهید اولمشدر . بونک اوزرینه سردار اکرم طرفدن عموماً یوروش امری ویرملکه عساگر اسلامیه درت نعل سکر دوب فرانسزلرک مربع قلعه لرینی احاطه وهر طرفدن هجوم ایتمشلر ایسه ده بوقلعه لر درت طرفدن آتش پوسکور مکه عساگر اسلامیه بونلری بوزوب طاغیده مدیغندن رجعته مجبور اولمشلر .

اردوی هایونک بو وجهله انهزامنده عشار عربان همان عساگر اسلامیه نک ترک ایلدیکی ذخائر و مهمات و سائر نک یغمانسه قویولمشلردر .

کوله منار مصرک فرانسه لویندن استخلاصنی استرلر ایسه ده کماکان کندو قبضه تغلب و تکمیلرینه کچور مک آرزوسنده اولوب اردوی هایونک مظفرانه مصره کیرمسندن دخی اندیشه ناک ایدیلر علی الخصوص مراد بک مصرک فرانسزلر یندنه بولمسندن تقدر منفعل ایسه عساگر عثمانیه نک غالبانه مصره کیرلرندن دخی اولقدر متأثر و متألم اولدیغندن بو محاربه ده کندو عسکر یله اردوی هایونک برجاننده سیرجی کبی بولنه رق اصلا محاربه به کیرشمیوب واردوی هایونک انهزامنده دخی عسکر یله چول طرفسه کیدرک کوزدن نهان اولوب قله بر ایله اویوشه جغنی فرانسزلره اکلتمشدر .

الحاصل بو محاربه ده صادقانه سعی ایدن یالکز عثمانلو عسگری اولوب فقط ابراهیم بک معیتنده کی کوله منار ایله نصوح پاشا فرقه سنه التحاق ایدرک مصره عزیمت ایتمشدر . هر نه حال ایسه اردوی هایونک اول وجهله تفرق و تشتتی اوزرینه سردار اکرم دخی چاره سز بلییسه رجعت ایله متفرق عسگری اوراده طوپلامغه چالشمش ایسه ده قابل اوله مدیغندن صالحیه به رجعت ایله بوزغون عسکرک بر مقدارینی اورالده توقیف ایده بیلمشدر .

قله بر ایسه اولوجهله غلبه به نائل اولدقدن صکره اصلا توقف ایتمه رک عساگر اسلامیه بی تعقیبه مسارعت و اول کیجه خانکه قریه سنه بر مقدار آرام و استراحت و کیجه یاریسی قالقوب صباحلین بلییسه موصلت ایله قلعه سنی ضبط ایتدکن صکره صالحیه به طوغری عزیمت ایلمش ایدی .

شویله که : ایلروده جنرال رینیا و آنک آرقه سنه بالذات قله بر واک آرقه ده جنرال بلییار فرقه لری مرتب اوله رق کیتمه کده ایدی سردار اکرم دخی صالحیه ده توقف ایله اورایه بش ساعت قدر مسافه سی اولان قرین قریه سنه بر مقدار سواری کوندرمش اولدیغندن فرانسز اردوسی اورایه واصل اولدقده مذکور سواری

فرقه سی جنرال رینیا فرقه سی احاطه و تضییق ایدیجک قله بر آنلرک امدادینه شتاب ایتیمی اوزرینه عسا کر اسلامیه جنرال رینیایی براغوب قله بر اوزرینه غایت شدتلو بر هجوم و فرانسزلرک طوپلری باتریا شککنده دیزملرینه وقت ویرمیوب طوپجیلرینی قایجدن کچوره رک طوپلری ضبط ایله قله بری اورتیه آلوب همان طاقیه اتلاف و احما تمک اوزره ایکن بر طرفدن جنرال رینیا و بو طرفدن جنرال بلیار یتیشه رک قله بری تخلیص ایشلر .

و بونک اوزرینه عسا کر اسلامیه دخی ثبات ایده میوب صالحیه یه رجعت و آنلرک پریشانقله رجعتی اوراده کی عسا کره سرایت ایتیمکن ارتق صالحیه ده دخی ثبات اولنه میوب جمله قطیه طریقیه عریشه و اورادن غزه یه عودت اولمشدر .

قله بر دخی او یله بر عظیم محاطره دن قورتلقدن صکره ینه توقف ایتیه رک همان صالحیه عزیمت ایدوب آنک وصولندن مقدم بر وجه مشروح سردار اکرم غزه طرفه کیمش اولدیغندن بلا مزاحم صالحیه یی دخی ضبط ایتدکن صکره عسا کر اسلامیه تک تکرار کلوب کچه ماملری تدابیرینه تشبث ایدرک برالشام یوللرینه بر قول عسکر تعیین و عسا کر اسلامیه الدن دمیاطی آلق اوزره جنرال لانوسی و دمیاط ایله اسکندریه آره سنک ضبط و ربطی ایچون جنرال رامپونی ارسال ایدوب کندوسی دخی باقی عسکر یله عودت و مارت افرنجینک یکر می یدیسندنه مصره مواصلت ایلمشدر . کله م مصرک احواله .

بروجه بالا مطریه ده واقع اولان محاربه دن صکره نصوح پاشا و کتخدای صدر عالی عثمان افندی وجه جی باشی معتلرنده کی سواری و بیگ قدر دالقیلیج نفرات ایله و ابراهیم بک ایکی بیگ قدر کوله منلر ایله برلکده اوله رق طاغ یولیه مصره عزیمت ایتیلر ایدی .

مصر اهالیسی ایسه طوپ و تفنک سسلرینی لدی الاستماع کوشه بکوشه تجمع ایتمهک باشلادقلرندن تقیب الاشراف سید عمر افندی و امشالی اشراف بلده دخی اهالیدن و مغاربه دن حرب و ضربه قادر اولنلری استصحاب ایله باب النصر خارجنده واقع طابیه لرده انجامکاره منتظر اولوب طور مشلر ایدی ایشته بو حوالده نصوح پاشا و عثمان افندی و ابراهیم بک باب النصر دن مصره دخول ایله همان بولدقلری فرانسزلری دپهلمکه باشلاقلرندن فرانسزلر قلعیه چکیله رک طوپ و تفنک ایله مدافعه یه قیام ایتشلردر . بوضره ده برطاق سرسری مقوله لری سائر خرستیانلره و بلکه فرانسه خدمته کیرمش اولان اهل اسلامه دخی تعرض ایتدکلرندن نصاری طائفه سی کار کیر محللره قانوب مدافعه یه ابتدار ایلمشدر .

اول کججه مصر بویه برقرار یشق خالد بولنه رق فرداسی عثمان افندی یکچیر یلرک مطریه ده براغوبده فرانسزلرک چیویله مش اولدقلری طویلردن اوچ قطعه سنی جلب و فایله دلیکلرینی آچدیروب اوز بکیه یه نقل ایله پونابارته زماندنبرو سرعسکر سرائی اتخاد اولنان الفی محمد بک قونانچی اوزرینه طوپ آتمغه مباشرت ایتمشیدی که بوراسی فرانسزلرک حکومت مرکزی اولمق حسبیله بوراده برقاچ یوز مستحفظ نفر برایشلرایدی چونکه قلعه نیک ضبیطی صعوبتلا اولدیغندن اول امرده بوراسنک ضبیطله مستحفظلرینک ازاله سی الزم کورلمشیدی وفی الواقع بونلر ایچون جای نجات یوغیدی لکن قله بر مرج قریه سی پیشکاهنده ایکن مصر جانبندن طوپ سسی ایشیدوب نصوح پاشا طاقنک مصره کیرمش اولدقلرینی استدلال ایدرک درحال جنرال لاغرائثری درت طابور عسکرله مصره اعاده ایتمکله فرداسی اویله وقتی لاغرائثر مصره یتشوب عساکر اسلامیه نیک اوز بکیه ده کی مهاجمه سنی منع ایتمشدر وقلعه دن دخی جابجا جمالیه محله سی کبی جمعیت عسکر اولان محلاره طوپ آتیه رق عساکر اسلامیه ازعاج اولتمقده ایدی .

عثمان افندی اصحاب حرف و صنایعی جمعه درون مصرده بولنان طوپلرک فایله دلیکلرینی تعمیره ویکیدن باروت اعمالنه عظیم همت ایدرک جبه خانه استیانلره هان باروت وقورشون ایله برابر براز خرچلق دخی ویرردی امرای مصریه دن جداوی حسن بک صباحه دک قول کزکزک شهری محافظه ایله خلقی جنکه تشویق ایدردی وقعه نیک ایکنجی کونی الفی محمد بک دخی یتشوب نصوح پاشا و ابراهیم بک ایله برابر اوز بکیه ده مترس ایدرک معینده کی کوله منار خیلی غیرت وشجاعت کوسترمشیدی بالاده بیان اولندیغی اوزره حجاز عسکریه کلوب صعید ایچنده فرانسزلرله خیلی محاربه ایتمش اولان شیخ کیلانی دخی بوکره میدان چپقه رق محاربه لرده خیلی اقدام وغیرت ایلمشدر . انجق قلعه فرانسزلرک یدنده اولدقدن بشقه اوز بکیه ده کی مستحکم یرلرده دخی تحصن ایلمش اولدقلرندن واهل اسلام یدنده بیوک طوپ وخبرلر اولدیغندن عساکر اسلامیه نیک دلیرانه هجوملری مشر ومؤثر اوله ماز ایدی وقله بر بروجه مشروح بلیسه مواصلتسده اهل اسلامک مصری ضبیط ایلدکلرینی استخبار ایتمکله جنرال فریانی دخی بش طابور عسکرله امداده کوندرمش ایدوکنندن مصرده فرانسزلر قوت بولمشیدی .

متعاقباً قله بر دخی کلوب اوز بکیه ده سراینه داخل اولدقدن صکره شهری احاطه وخارج ایله مخابره سنی قطع ایله تصدیقه ابتدار ایلمشدر .  
وبرالاق مصرده کی اهل اسلامه امداد ایچون اردوی هایبوندن دخی عسکر

کوندلمش ایسه ده طرق و معابر مسدود اولدیغندن مصره واصل اوله ما مشدر .  
 بالاده اشعار اولندیغنی اوزره مراد بک اردوی هایونک بر جناخنده بولمیش ایسه ده  
 جنک ایتمیوب اردونک انهمزمنده دخی دیرالطین ناحیه سنه فرار ایتمشیدی . بوکره  
 مصره ورود ایله امداد ایلمسی ایچون کندوسنه خبر کوندردلکده بولندیغیم موقعک  
 محافظه سیله مشغولم واردوی هایونه خبر کوندردم آنک جوابنه منتظر م دیو اعتذار  
 ایتمشیدی . حالبوکه خیانت جبلیه سی اقتضاسنجه فرانسزلرله خفی مخابره یه ابتدار  
 ایدوب بر مقدار مقطوع ویرکو اعطا ایتمک شرطیه صعید وایللیکی کندوسنه احاله  
 اولتمق اوزره قله بر ایله اتفاق ایلمش و بوضورتله صعید قطعه سی کندوسنه ترک و تسلیم  
 اولمشدر . بونک اوزرینه مراد بک فرانسزلرله برلشوب عسا کر اسلامیه علیهنده  
 حرکت ایدرک درویش پاشایی صعیدن چیقارمق اوزره اولطرفه عزیمت ایلمشدر .  
 و فرانسزلر درون شهره طوب و خنبره آتمقدن خالی اولدقلری جهتله بک چوق  
 ابنیه عالیه خراب اولدیغندن اهل اسلام کینسکاه و سوراخرده اقامته مجبور اولمشلر  
 ایدی و مصره بر طرفدن کلوب کیدن اولدیغندن زیاده سیله حقط و غلاظهور ایتمشیدی .  
 مصر شهری سکز کون بویله هر ج و مر ج اولدقندن صکره قله بر طوب و تفنک  
 اعمالندن فراغته عثمانلو عسکری مصر دن چیقوب سالماً اردوی هایونه ایصال اولتمق  
 اوزره عقد مقاوله ایچون بعض مشایخی جبله عثمان افندی یه خبر کوندرمش و اودخی  
 مقاوله یه کیرشمش ایسه ده سوز ایاغه دوشوب اهالی جنک ایسترز دیو مشایحک  
 اوزرینه هجوم ایستکلرندن متارکه قابل اولیوب ینه کوشه بکوشه درون مصرده  
 محاربه یه باشلانندیغنی کچی بولاق اهالیسی دخی متریسار اعمالیله جنکه قیام ایتمشدر .  
 بو ائناده ایسه بحر یه قطعه سی تحت اطاعته کیرمش اولدیغندن جنرال رینبا دخی  
 معیتنده کی فرقه عسکر یه و مهمات کثیره ایله مصره واصل اوله رق فرانسزلرک قوه  
 حربیه لری اکمال اولتمشیدی . بناء علیه قله بر همان بولاق اوزرینه بر هجوم ترتیب  
 ایتمکله فرانسزلر یوروش ایله بولاق دروننه کوروب اهالی دخی مدافعه ایدرک  
 هر محله ده بر قانلو و شدتلو محاربه باشلامش و بواره ده حریق ظهور یله هر طرفه  
 سرایت ایدرک بولاق قصبه سی سرتاسر آتش کسپله رک اهالی یی شاشیرمش اولدیغندن  
 چاره سز اهالی ایستیان ایدوب قله بر دخی امان ویرمش ایسه ده فرانسز عسکری  
 بولاقده بولدقلری اموال و اشیایی یغما ایدرک اهالی یی عریان ایتمشدر .  
 مصر اهالیسی بو حالات مده شهینی قارشودن تماشایدرک متأثر اولدقلری حالده  
 فرانسزلر مصر اوزرینه دخی شدتلو هجوملر ایدوب غایت شدتلو بر محاربه یه  
 باشلانندیغنی ائناده اوز بکیه جوارنده بعض رؤسای اسلامک مرکز اجتماعی اولان

برخانه‌ی فرانسز لر لغم ایله آتوب برچوق اهل اسلامی اتلاف ایله برابر هر طرفدن مملکت اوزرینه هجوم ایتدکلر ندن کوشه بکوشه شدتلر محاربه لر وقوعیله طرفیندن بک چوق آدم لر تلف و درتیوز قدر خانه محترق اولمشدر . وکیجه ایریشوب محاربه توقیف اولمش ایسه ده آرتق اهالیده دخی تاب وتوان قالدیوب صلحه رغبت ایلدکلر ندن وقله بر طرفدن دخی اوچ کون مهل ایله متارکه اولنهرق مصالحه تکلیف اولندیغندن نصوح پاشا و عثمان افندی و ابراهیم بک عثمانلو عسکر یله برابر مصر دن چیقمق اوزره قرار ویر یاهرک واسط نیسانه مصادف اولوب ذی الحجّه غره سی اولان جمعه کونی عثمانلو طاقیله برابر امرا و ضابطان و بعض اعیان مصر دخی مصر دن چیقوب (بونوبهارده انجق آجلدی لاله و داغ . کشاد غنجه دل قالدی بر بهاره دخی) زمره سیله اردوی هایون جانبنه عازم اولمشدر .

اوچ کون متارکه ایله برابر ایام محاربه و محاصره اوتوز یدی کون اولوب بومدت ظرفده اهالی مصرک چکدکلری تعب و مشقت قابل تعریف و بیان دکدر هاله مصر ده بونجه ابنه عالیه و آثار قدیمه نك منهدم و شهرک خراب اولسی عظیم تأسفی موجب اولان حالاندر .

فرانسز لر حریت و مدنیت داعیه سیله میدانه چیقمش ایکن مملکتلرنده بوقدر قان دوکدکلرینه قناعت ایتیموبده بر قاچ شخصک و بلکه بر ذاتک اغراض مخصوصه سی ایچون مصر چوللرنده افنای وجود و بونجه آثار عماری خراب و نابود ایلملری غریب معنادر . بوصورتله مصرینه فرانسز لرک قبضه تصرفه کچهرک قله بر طرفدن اهالی حقنده عفو عمومی اعلان اولندی انجق اون میلیون فرانق نفس مصر دن و سکنر میلیون فرانق دیگر قضا و ناحیه لر دن جریمه آلمش و بومبالغت استیفا سی ایچون اهالی حقنده بک زیاده ظلم و تعدیلر وقوعه کیشدر و بواننده مراد بک دخی درویش پاشایی صعیددن طرد ایدوب اردوی هایون ایچون درویش پاشانک جمع ایلمش اولدیگی اموال کثیره ایله برابر درت بیک قویون دخی قله بره تقدیم ایلمشدر و برمنوال سابق مصرک تخلیه سی ایچون یایلمش اولان مقاوله نامه حکمنجه فرانسز لر ی آلوب کوتورمک اوزره سردار اکرم طرفدن ترتیب اولنان یتمش قدر سفان تجاریه بر چوق اموال و اشیایی حامل اولدقلری حالد اسکندریه لیانته کیرمش اولدقلر ندن قله بر بونلری دخی ضبط و فروخت ایتدیرمش ایدی .

بوصورتله قله بر مضایقه مالیه سنی دفع ایدوب اداره دائمیه سنه کافی واردات دخی ترتیب ایدرک اسکندریه ده استحکامات جسمیه انشاسنه و سائر قله و طابیه لرک تعمیرینه ابتدار یایلمش و طابور لرینک نقصاتی قبطی و سائر نصاری طائفه سندن

و دارفور دن اشتر اولنان سیاہ کولہ لردن تدارک ایلدیکی نفرات ایله تماملامش و پونا پارتہ نك فرانسه ده سرکاره کچدیکی خبری آلهرق قریباً مصره امداد ایده جکی امید ی ایله فرانسز اردوسی یکیدن مصرده یرلشمشدر .

انکلتزه دولتی بروجهمشروح قله برك مبالغه لو تحراتنه آلدانهرق سردار اکر مک عقده ایلدیکی مقالوه ی ردایله مصر الکاسنده کی فرانسز لری کاملاً اسیر ایتمک امانه دوشمسی اوزرینه ایشک بو پر سه یه کلدیکنی لدی الاستخبارار تق امیرال اسمیتک انهاسنه اعتماد ایله بر موجب مقالوه فرانسز لری فرانسه یه عود تلرینه راضی اولهرق اسمیته بویولده مآذونیتی حاوی تعایمت کوندر مش ایسه ده بو کره فرانسز لر مصری ترک ایتمکدن فراغت ایدوب پونا پارته فرانسه دن مصره امداد ایده بیامنک چاره سنی جستجو ده بولنمشدر .

وقوعات مشروحه دنناشی بوسنه دخی مصر دن محمل شریف کیده میوب کسوۀ بیت مکرم ینه درسعادته اعمال ومحمل شام ایله ارسال وامیرالحاج عظم زاده عبدالله پاشا ایله ارسال اولنمشدر .

جمادی الاولی غره سنده معجنده کی حجر احمر سرقه اولنوب همان اول کون مکه مکرمه ده خسته لک ظهور ایله هر کون وفیات وقوع بولغه باشلادی و کیتدکچه زیاده لشهرک اواخر رمضان شریفده وفیات یومیه نك مقداری قرقه بالغ اولدی اواخر ذی القعدده مذکور حجر مبارک مجذوب الشکل بر شخصک ترکه سنده ظهور ایله یرینه وضع اولنجه دک بوبلیه مرتفع اولدی دیومکه مؤرخنی عبدالشکور افندی بیان ایتدکنصکره ثقه دن اولمق اوزره روایت ایدوب دیرکه مقدما بردفعه بیت مکرمک طاشلرندن برینی بر شخص سرقه ایتمکله هر طرفده و با ظهور ایدرک بولنوبده یرینه وضع اولنجه بر طرف اولمامش اولدینی مرویدر هله بو حجر احمر وقعه سنی کوزمز ایله کوردک اهل مکه دخی شاهدر و بونی سرقه ایدن علت سودایه مبتلا بر شخص اولوب فقرا یه پک چوق مال تصدق ایدردی شوخاله نظراً حجر احمری سرقه ایتسی مجرد سوء عقل و رویتی حسبیله تبرک غرضنه مبنی اولمق کرک ایدی نه حال ایسه وفاتنده حجر مذکور ترکه سنده ظهور ایله معجنه وضع اولنوب بوبایه زائل اولدی .

معجن باب بیت مکرمک جانب یسارنده برچقور محل اولوب حضرت ابراهیم علی نبینا و علیه السلام حضرت لری بیت مکرمی بنا ایدر ایکن چامورینی بوراده یوغور یر ایش دیو مرویدر و بو محل شمعی مرمر ایله مفروش اولوب وسطنده دخی حجر احمر موضوع و مرکوزدر . وحالا صاریاق علتته دوا اولمق اوزره خالق آتی دیلاری ایله لمس ایلمکده در .

برمنوال مشروح فرانسزلر آرتق مصردن چقماق اوزره استحکامات لازمه انشاسنه قیام وقوه حر بیله رینک اکلنه اقدام ایدوب سردار اکرم دخی تکرار مصره هجوم ایتمک اوزره اردوی هایونک اکل ولوا زمانته اهتمام ایتمکده ایدی . فقط بوانساده وهاییلرک قوت وسطوتی تزیاید ایدرک حرمین طرفه تخطی یه باشلامشدر .

(وقایع سنه ۱۲۱۵)

بناءً علی ذلك اشبو اون بش سنه سی خلالنده امیرمکه وهاییلرک خوفندن ناشی طائف قلعه سنی تعمیر ایتمک مکمه مکرمه طاعلرینک بعضیلرنده برجلر یادر مق ایله مشغول بولمشدر .

وسنه مرقومه محرمنده جده والیسی و مدینه منوره محافظی صدر اسبق قوجه یوسف پاشا وفات ایتمشدر . وهاییلرک حرمین جانبته تخطیء باغیانه لری آنک زماننده ظهوره ککش اولدیغندن بوکره وفاتیه حرمین اهالیسی اظهار ممنونیت ایتمشدر .

متوفای مشارالیه کرجی الاصل اولوب ترسانه عامرده بیک یوز التمش برسنه سی هنکامنده لیمان رئیس حسن قبودانک عبد مشتراسی اولدیغنی حالده حسن خدمته مکافاة آزاد اولمش ایسه ده افندیسنک وفاتنه قدر خدمته مواظبت ایله اثبات صدق و ثبات ایلمش وبعده قیشین قاسم پاشاده کائن زنجیرلی قویوده قهوه جیلک ایله تعیش ایدر ویازین دونمای هایون ایله کیدوب کلهرک تجارت ایلر و بعض اصحاب سرمایه ایله عقد شرکت مضاربه ایدرک مصره دخی کیدوب کور ایتمش سکن سنه سنه سنده غازی حسن پاشا ریا له قبودانی ایکن مشارالیه سرمایه و یروب تجارتی بکنمکله قبودان پاشا اولدیغنده کندویه خزینه دار وبعده قوجی باشلیق رتبه سی ایله قو کتخداسی ایدوب بومناسبتله مابین هایونه آمد وشد ائناسنده خزینه وکیلی عثمان اغایه انتساب ایدرک آنک همتیله طقسان طقوز سنه سنه عهده سنه رتبه وزراته مورده محصلغنی توجیه بیورلمش وایکیوز تاریخنده مقام صدارت عظمایه ککش ایدی .

کندوسنک وقوفسزلغنی و همزبانی اولان شیخ الاسلام مفتی زاده احمد افندیسنک تعصب باردی حسبیله ایکیوز برده روسیه سفرینی آچوب و نهمچولو دخی اعلان حرب ایتمکله نه طرفه حرکت ایده جکنی شایروب نهایت نهمچه اوزرینه حرکت ایله بدایت امرده غلبه یه مظهر اولمش ایسه ده نتیجه سنه سرمایه دن ضرر ایتمش و سلطان سلیمک جلوسندن ایکی آی صکره عزل و عهده سنه سیواس ایالتی ایله ودین سرعسکرلکی احاله قلمش ایدی . غازی حسن پاشا صدارته کلد کده صاحب ترجمه عهده سنه دریا قبودانغنی توجیه ایلمش ایسه ده در سعادتجه تنکیء وقت بهانه سیله

فپودانلغندن صرف نظر اولنه رق و دین سر عسکر لکنده ابقا و بش سنه سنده عهده سنه بوسنه والیلکی توجیه ایدلمشکن چوق کچمکسزین ثانیاً صدارت عظاما ایله کامروا قامغله کشادینه باعث اولدینی سفری قبادوب التی سنه سی خالانده در سعاده عودت ایتدکن صکره متعاقباً عزل ایله اناپه محافظی نصب اولمشیدی . ایکیموز یدیده مأموریتی جده والیاکنه تحویل ایله عهده سنه مدینه منوره محافظانی احاله اولنوب بوکره بوجه بالا اوراده اجل موعودیه وفات ایلمشدر .

جاویدک حدیقه الوزرا ذیلده مشار الیهک ارتکاب و مظالمندن بحث ایدر وثقه دن منقولدرکه ایکیموز اون یدی عدد ازاله بکره موفق اولدم دیر ایش دیو مبحث قدح و ذمئی تذیل ایلر تجاوزالله عن سیئاته و العهده علی الراوی مکة مؤرخی عبدالشکور افندی دخی مشار الیهک مدینه منوره وفاتی خبرینک مکة مکر مهیه و رودینی بیان صره سنده دیرکه یوسف پاشا حرمینک خرابنه باعث اولان و هایلرک تقویتنه بادی اولدیغندن آنک وفاتیه هرکس ممنون اولدی . انتهى . لکن کندوسنک کتخداسی اولوب مؤخرأ رتبه میرمیرانی ایله مدینه منوره محافظی اولان محمد سعید پاشانک در سعاده کشش اولان برقطعه تحریراتده یوسف پاشانک و هایلیری تلطیف واستمال یولنده قوللانهرق حسن خدمت ایلمش اولدینی مندر جدر .

و بحر سویشده کی انکلیز امیرالندن اولوقت در سعاده مقیم انکلیز ایلیچیسنه کشش اولان تحریراته نظراً یوسف پاشانک وفاتی اوزرینه اولحوالیده نفوذ دولت علیه نک خیلی تدنی ایلمش اولدینی اکلاشیلور تحریرات مذکورنک صورتی زیرده (۱۲) رقمیه ایراد اولنور .

هرنه حال ایسه یوسف پاشانک وفاتی اوزرینه اصحاب اقتداردن برینک جانب حجازه مأمور و اعزامی لازم کلوب انجق مصر یولی مسدود و جزیره العربیده دخی و هایلرک تسلطی کوندن کونه متراید اولدیغندن چول احوالنه و عشائر عربانک طور و مشوارینه و قوفلی و زرادن برینک مأموریتنه لزوم کورملکله سردار اکرمک تلخیصی موجبجه مع ایالت حبش جده سنجانچی و مدینه منوره محافظانی دیار بکر والیسی شیخزاده ابراهیم پاشایه توجیه بیورلمشدر .

الحاصل سنه سابقه ده مصرک احوالی حرب و اختلال اوزره کدار ایلمش اولدینی کبی حجاز طرفی دخی راحتسز برحاله بولنمشدر .

و فرانسزلر تکرار مصرده برلشمش اولدقلرندن قله بر طرفندن ینه احمد عریشی مصر قاضیسی نصب اولنه رق محرک بکر می برنجی کونی فرانسز امرا و کبراسی آلی ایله کندوسنی محکمه یه ایصال ایلمشدر .



واول کون بروقعۀ غربۀ نادره ظهور، کاشدر . شویله که : جنرال قله بر اوز بکیده  
 ساکن اولدیغی خانۀ تک تعمیر کی کیفیتنی اردو معمارینه تعریف ایدرک بغچه ده  
 کررکن بر شخص ظهور ایله مصاحبتلو طرزنده قله برک یانه یافلاشوب عرضحال  
 ویرمکله قله بر بوکاغده حاله نظر ایتدیکی ائنده یاننده محفی اولان خنچر ایله بر قاج  
 دفعه کوکسنه ضرب ایتدکده معمار ائنده کی دکنک ایله بر قاج کره مرقومک باشنه  
 ضرب ایلمش ایسه ده مرقوم آنی دخی خنچر ایله یازه لیوب قاشدر قله بر بیهوش  
 اوله رق یره دوشوب بر قاج دقیقه صکره فوت اولمشدر قاتل ایسه اورادن فرار ایله  
 جوارده واقع بر بوستانه کیروب اختفا ایتمشیدی معمارک فریادنی ایشیدن عساکر  
 یتشوب کیفیته مطلع اولدقلرنده هان اطرافه طاغیله رق اوکله یینه کلانی طومغه  
 باشلاقلری صره ده پنجه دن بر قاری قاتلک فرار ایتدیکی محلی کوروب خبر  
 ویردیکندن هان قاتلی اخذ واحضار ایتلریله لدی الاستطاق اسمی سلیمان ومولدی  
 حلب وسنی یکریمی درت وکندوسی برکاتب عربی اولوب مقدمه بر دفعه ده مصره  
 ورود وواج سنه اقامت ایله جامع ازهرده تحصیل علوم ایلمش ایدوکنی حکایه  
 وسردار اکرمک بونده مدخلی وارهیدر دیوسؤال اولندقدده آنک خبری اولیوب  
 مجرد کندو صنعی اولدیغنی افاده ایلدکنصکره ضرب واشکنجه اولنمی اوزرینه  
 اردوی همایون مصر دن شامه رجعت ایتدکده قله بری قتل ایچون یکچیری اغاسنک  
 تعلیمیله غزه یه کلوب اورادن محبان ایله مصره کلش ووتوز کون مرورنده بوایشی  
 ایشله مش اولدیغنی سویلمش واهالی مصر دن کسنه یه افشای سر ایدوب ایتدیکی  
 لدی السؤال جامع ازهر مدرسیندن سید محمد قدسی وسید احمد ولی وشیش عبدالله  
 غزنی ایله شیخ عبدالقادر غزنی نام درت ذاته سویلیوب وآنار اگر چه بوایشدن  
 واز کج دیو نصیحت ایتمشلر ایسه ده آلری دکلیوب اجرای مراسم ایلدیکی افاده  
 ایلمش اولمسلیله مدرس افندیلر لدی التحریری اوچی دردست اولنوب دردنجیسی  
 بولنه مامشدر بونک اوزرینه سلیمان اغانک حیاً برالی احراق اولندقدن صکره قازیغه  
 اورمش وبوواج مدرس دخی فرانسه لویه اخبار کیفیت ایتدکاری جهته جانی عد  
 اولنه رق باشلری کسامشدر . رحمة الله علیهم رحمة واسعة  
 فرانسرل حریت ومدنیت دعواسلیله جهانی الت اوست ایتمکه قالشدقلری حالده  
 عربستان جانبنده چول عشیرتلرینک ایتدکاری پک چوق معاملات وحشیانه اجرا  
 ایلدکاری کی بوکره دخی سلیمان اغایه عظیم اشکنجه ایتدیله حال بوکه اشکنجه تحتده  
 اولان استنطاقه اصلا امنیت اولنه ماز بناء علیه ابتدا کسنه نک بونده مدخلی اولدیغنی  
 بیان ایتدکن صکره یکچیری اغاسنک تعلیمیله اولدیغنی سویلمسی اشکنجه المندن

قور تلمق ایچون اولمق احتماله منبی اولدیغندن شایان وثوق واعتماد اوله ماز وسلیمان اغانک اعدامی هر دولتک قانوننه موافق ایسه ده یاقق وقازیغه اورمق قاعده مدینت وانسانیتک خلافی ومدرس افتدیلر سلیمان اقایه بونیتدن واز کج دیونصیحت ایلمش اولدقلری تحقق ایتمشکن جانی عدیله اعداملری مال متمدنه قانونلرینه منافیدر دیلم که اول وقتک حکمنجه سائر عبرت اوله حق اجرا آته لزوم کور مشلر بوکا سلیمان اغانک اعدامی کافی ایدی وطوته لم که فرانسزلر کندولرینه جاسوسلق ایتمک اوزره مصر اهالیسنی مجبور ایتمک ایچون مدرس افتدیلر حقتده دخی ولوکه بغیر حق اولسون بر جزا ترتینه لزوم کورمش اولسونلر باری حبس ونفی ایله تهدید ایتمدیلر یوخسه بونلرک اعدامنه قدر کیتمکه انسانیتمزلکدن ومرحمتمزلکدن بشقه بروجه بولنه ماز .

عنغنه ایله مضبوط اولان روایات محلویه نظر آ اشبوسلیمان نام مرد دلیر حاب شهرنده واقع مستدام بک محله سنده ساکن عثمان اغا نام ذاتک اوغلی ایتمش وبونلرک اجدادی کلیس قضاسنه تابع جوم ناحیه سنده واقع کوکن قریه سنده قباد بک خاندانندن اولدیغنی حالده بیوک بابالری حلبه کلوب اولوقتک اصحاب نفوذندن چلبی اقدی یه خدمت ایدرک بومناسبتله حلبده توطن ایدوب قالمشدر سلیمانک والده سی وفات ایندکده پدیری عثمان اغا بر جاریه آلوب سلیمان اغا ایسه برسیدن طولای جاریه یه کوچنه رک النده کی قلمتراشی آتمش وقضارا قلمتراش جاریه نک بوغازینه اصابت ایله جاریه فوت اولدیغندن سلیمان اغا نادم والندن بویله بر قضا ظهور ایتمدیکندن ناشی مکدر ومتالم اوله رق ترک دیار ایدوب کیتمش ومصره واروب برمدت جامع ازهرده تحصیل علوم ایتمش ایدی بو ائانده بر الشام طرفده سرسری کررکن اردوی هایونک منهزماً عودتنده دین قرنداشلرینک دوچار اولدقلری فلاکت واضطرابی کوروب متأثر اوله رق جمله سنک انتقامنی آلمق وبووجهله کندوسنک جرمنی عفو ایتمیره جک بر عمل خیر ایشامش اولمق اوزره فرانسزلرک سرعسکرینی اعدام ایتمکی تصمیم ایدرک مصره کلوب بروجه مشروح قله بری اعدام ایله اجرای مرام ایتمشدر فقط بو اوغورده جامع ازهر مدرس لرندن اوچ بیکنانه ذات دخی آنکله برابر شهید اولوب کیتمشدر .

معلم نیقولا تاریخنده دیرکه اردوی هایونک تفرق وانهزامی ممالک اسلامیه یه دهشت وار تجاج کتورمکله اهل اسلامک اوزرندن بو عاری ازاله ایچون عصرک عقلاسی چاره آرامغه باشلادیلر اولوقت قدسده حلب اهالیسندن ویکچیری اغالرندن احمد اغا نامنده بری اولوب فرانسزلرک سرعسکرینی بر تقریبه اعدام ایتمیرمک اوزره

بر فدایی آراردی اول ارالق حلبی سلیمان نامنده برینی بولدیکه ارسلان کبی جری وفتاک و قپلان کبی وثاب و چالاک بر مرد نبرد بی پاک ایدو کندن بر خدمت دینه اولوق اوزره بو امر خطیری متعهد اولدی و بو نیت ایله قدسدن غزه یه کله رک ینه حلب اها لیسندن و یکچ جری اغوانندن یاسین اغا ایله کوروشوب مافی الضمیرینی اکا کشف ایتدکده یاسین اغا دخی آنی تشجیع ایله کندویه قرق عدد اسدی غروش ویرمشیدی ایشته بو حال ایله سلیمان اغا مصره کلوب جامع ازهره داخل اولدقدن صکره قله برک آرقه سنده طولاشرق فرصت کوزتمکده اولدینی حالد بروجه مشروح شیخ عریشی بی قاضی نصب ایله آلائی ایله محکمه یه کوندردیکی کون بغچه ده تنها قالدینی وقتی سلیمان اغا فرصت اتخا ذ ایله نیتنی اجرا ایلمشدر .

قله برک اعدامی اوزرینه رشید قوماندانی اولان جنرال عبدالله منو قدمنه بناء سر عسکر لکه اتخاب اولنغه مصره کلوب حل و عقد اموره مباشرت ایلمشدر بو جنرال منو مقدا جعلی اوله رق مسلمان اولوب حتی رشید قصبه سندن بر اهل اسلام قزینی دخی تزوج ایتمشیدی بناء علیه عبد الله دیو تسمیه اولمشدر .

بوندن صکره فرانسزلر بر مرتبه دها اهل اسلامدن تحاشی و احتراز اوزره اولوب عبدالله منو دخی خانه سنه قپانه رق مشایخ ایله چندان کورشمز اولدی و جامع ازهره فته ایقائنه بر مشور تکاهدر دیو مجاورینی اورادن طر دایله قپولرینی قپاتدی و حاکم بامر اللهک باب النصر قربنده اولان مشهور جامعنی هدم ایله یرینه بر بیوک برج بنا ایتدیردی و مصر اها لیس اوزرینه آغر ویر کولر طرح ایله امر استیفاسنده اولقدر جور و تعدی اولنمشکه اها لی مصر بیاغی جانلرندن بیزاز اولمشرایدی .

ایمان و اشراف بلده دن بعضیلری دیار اخرایه هجرت ایتکله اها لیدن چونغی شورایه بورایه هجرت ایتک اوزره جمال و بغال تدارکنه قالدشد قلمی معلوم اولیجق جنرال منو طرفندن منع اولنه رق هر کیم بلا رخصت مصر دن چیقوب کیدر سه اموال و املا کی مصادره اولنه جنی اعلان اولمشدر .

الحاصل جنرال قله بر پونا پاره تک متخدی اولان مسلک و اصوله اصلاخلل کتور میهرک اداره امور جمهور ایدردی اما جنرال منو بو اصولک چونغی تغیر ایله خود سرانه بر مسلک اتخا ذ ایتدی آنک بو طوری ایسه فرانسه رؤسای بیئنده تفرق کله و اختلاف آرابی موجب اولمشدر .

خلال ربیع الاولده کوسه مصطفی پاشا دمیاطه کوندر یلوب بر از وقت اوراده اقامتدن صکره وفات ایلمشدر .

شجع و مقدم بر ذات اولوب ابو خور و قعه سنده شجاعتنی اعداسی بیله پسند ایتمشیدی

نه چاره که کرک آنک و کرک معینده کی عسکرک شجاعتری پوناپارته نك اجرا ایتدیکی  
 مناوره لره وکل مهارته کوستردیکی صنایع حربیه قارشو مشمر و مفید اوله مدی .  
 و بر عسکر تقدیر شجاع اولسه معلم و منتظم عسکر قارشو سنده نتیجه حربی قزانه بیلمسی  
 پک مشکدر یکچریلر نظام عسکرینک ایجابینی استمز لردی لکن بو کره ظهوره  
 کلان فرانسز محاربه لرنده دخی تعلیم و انتظامک لزوم و فائده سنی رأی العین کوروب  
 تصدیق ایتدیلر و دوات علیه نظام جدید عسکرینی تکثیر ایتدکجه اعداسنه مقابله  
 ایده میه جکی جمله عندنده تحقق و تعیین ایلدی .

قپودان دریا حسین پاشا اوچ آی قدر دونمای هایون ایله اسکندر به اطرافده  
 طولاشوب سفائنه صو و ذخیره آلمق ایچون فنکه لیمانه عودتی لازم کلدیکندن احوال  
 اعدایی تفتیش ایچون ایجه بک نام قپودانی بادنصرت نام سفینه و ایکی قوروت ایله  
 اوصلورده طولاشوق اوزره مأمور ایتشیدی اوچنجی کونی که ربیع الاولک یکر می  
 برنجی صالی کونی ایدی برشدید فورتنه ظهور ایله بادنصرتک مایستره و ترنکته  
 ستونلری شکست اوله رق سیر و حر کدن عاقل و کیجه ساعت ایکیده ابوخور  
 صیغرینه دوشوب اداره و تخلیصی مشکل اولدیغی دشمن مشاهده ایتمکه درحال  
 طوب انداختنه مباشرت ایدرک سفینه نك بعض محاربینی رخنه دار ایتدکن بشقه  
 جریملره بنوب اوزر لرینه وارملر یله سفینه دن دخی مقابله و برقاچ ساعت محاربه  
 اوله رق عساکرک برازی شهید و باقیسی بی مجال اولدیغی ائنده قوروتلر یتشوب  
 برآز آدم تخلیص اولندقدن صکره سفینه احراق و ایجه بک ایله رؤسای سآرهدن  
 برازی دوشمن طرفدن اخذ و اسیر ایلدیکی خبر مکدری اواسط ربیع الآخرده  
 در سعاده واصل اولمشدر .

واصف افندی دیر که قوروتلرک امداد یله ایجه بکک تخلیص نفس اتمی ممکن ایکن  
 اسارتی اختیار اتمی خوف مجازات و همیه دن نشأت ایلدیکی بدیداردر . فورتنه به  
 اوغرا یوبده قضاذه اولان برکینک قپودانی حقتده برشی دینه مز بونکله برابر  
 اولوقت محاکمات جزائییه اعتنا اولمدیغندن ایجه بک قوروتلره چیقوبده تخلیص  
 نفس اتمش اولسیدی قپودان پاشانک بر حدتلی وقتنه تصادف ایله اعدام اولنیویرمسی  
 احتمالدن بعید دکل ایدی ایشته بوکا بناء اسارت صورتی ترجیح ایلمش اولسی  
 محتلمدر و کمیسنک احتراقنه قدر صبر و ثبات ایدن بر قپودان حقتده خیر ایله یاد  
 ایتدکن بشقه برشی دینه مز .

قله بر مراد بک ایله اتفاق ایدرک بالاده اشعار اولدیغی اوزره مقطوع بر ویرکو  
 ویرمک اوزره صعید قطعه سنی اکا تسایم اتمش و فرانسزلر مصردن چیققدده

مصری دخی اکا تسلیم ایده جکنی وعدایلمش ایدی سردار اکرم بروجه مشروح قله برك اعدام اولندیغی لیدی الاستخبار ابراهیم بکی یانه دعوت ایله مادامکه انکلیز لر بحر آسکندریه یی بلوقه ایتمکله فرانسلرک فرانسه ایله مخبره لری منقطعدر و برآ دخی عساکر اسلامیه هجوم ایتمک اوزره در فرانسلر بیهوده اوغراشیور لر صلح و سلامتله چیقوب کیتملری هر حالده حقلرنده خیرلو اولور بورالینی نصیحت سیاقنده جنرال منویه افاده ایتمک اوزره مراد بکه تخریر ایلمسنی ابراهیم بکه امر ایتمش و بو طریق ایله فرانسلر چیقوب کیدرسه مصری کافی السابق کوله مناره تسلیم ایله استانبوله عودت ایده جکنی وعدایلمش اولدیغندن ابراهیم بک بوسیاقده مراد بکه تخریرات کوندرمکله مراد بک بو تخریراتی آلدینی کبی طرفندن بردیسی عثمان بکی جنرال منویه کوندروب اودخی مصره ورودایله سردار اکرمک اراده سنی جنرال منویه تبلیغ ایتمکده جنرال منو فرانسلر مصردن چیقماق نیتده دکدر لر و چیقہ حق اولدقلری حالده وعدلری اوزره مصری مراد بکه تسلیم ایده جکاردر قالدیکه مراد بک فرانسه جمهورینک ارکانندن معدود اولمشدر مصلحت ذاتیه سندن بشقه شیئه صرف افکار ایتمسون دیو جواب ویریشیدی مراد بک ایسه طرف دولت علیه دن امین و مطمئن اوله مدینگی حالده صعیدده رفاه و راحت اوزره کچنمکده اولدیغندن سردار اکرم طرفنی قید ایتمه رک جنرال منونک جوابنی آلدینی کیجه ابراهیم بکه یازمشدر .

سردار اکرم ایله متفق اولان ابراهیم بک طاقنه کانجه : بونلر دخی جانب دولتدن تمامیه امین اوله میوب فرانسلردن مصر الکاسی استخلاص اولدینی حالده سردار اکرم وعدندن نکول ایله کوله منلری مصر حکومتدن محروم ایدر اندیشه سیله یینلرنده بلندا کره ویردکاری قرار موجبنجه انکلیز لره التجا ایتملریله امیرال اسمیت آنلرک حالی دولت علیه یه عرض ایله آلدینی وعد اوزرینه کندولرینه تأمینات لازمه ویرمشیدی . بناءً علیه مراد بک فرانسلره تابع اولدینی کبی ابراهیم بک دخی بو وجهله معنی انکلتره لو حمایه سنه کیرهش اولدی .

بالاده بیان اولندیغی اوزره مرعش والیسی مصطفی پاشا عمر بشده شهید اوفات ایتمکده دائره سی خلقی پریشان اولماق ایچون منصبی کندوسنک کتخداسی اسماعیل اغا عهده سنه بارتبه وزارت توجیه اولنه رفق اردوی هایون ایله مصره عازم اولمشیدی اردوی هایون بوزیلوب عودت ایتمکدن صکره مصرده محصور اولان عساکر اسلامیه یه امداد ایتمک اوزره اشبو اسماعیل پاشا مأمور ایدلکده کندوسنک تعلیمات خفیه سی اوزره معیتده کی عسکر کندویی طوتوب کویا جبراً حزار پاشا طرفنه کوتور مشلر ایدی اجرای مجاراته زمان مساعد اولدینی جهتله تجاهل

عارفانه یولنده معامله اولته رق همان منصبه عزیمتی ایچون امر عالی اصدار اولنسی  
 اوزرینه برقاچ بیک طاغلی وارناود وسائر اشخاص ایله واردینی محالرده اهالی بی  
 ازعاج ایدرک مرعشه تقربنده اهالیسی بویله جلالی صورتنده حرکت ایدن عسکرک  
 مظالنه طاقت کتوره میه جکارینی درپیش ایدرک اولیه غلبه لکله شهره داخل  
 اولور ایسه بر فساد تکون ایتمک ملحوظ اولدیغنی کندوسنه اعلام ایتدکارنده  
 نماعت اولنور ایسه شهره جبراً کیره چکی بیانیله همان ایلرویه حرکت ایتسی  
 اوزرینه اهالی دخی مدافعهیه مجبور اوللریله لدی التقابل اسماعیل پاشا عسکری  
 مغلوب اولغله عینتابه عودت ایتشیدی بو حادئه ایکی طرفدن سردار اکر مه عرض  
 وانها اولندقدده ظاهرده اهالی تکدیر ووالیرینی شهره ادخال ایلملری کیندولرینه  
 صورت قطعیه ده تحریر و خفیه اسماعیل پاشانی بر تقریب ایله شهره ادخال ایله تدمیر  
 ایلملری وجوه بلده یه افاده وتذکیر ولطائف الحیل حکیمانه ایله ایتی اجرا  
 ایتدر مک اوزره سردار اکر مک جبخانه جیسی تسیر اولنمشیدی بونک اوزرینه  
 اسماعیل پاشا عینتاب و یوه ده سی حسین اغایی استصحاب ایدرک مرعشه عزیمت ایله  
 شهره تقرب ایتدکه مرعش وجوهی عینتاب و یوه ده سنی بو جمعیتدن تفریق  
 ایچون پاشانک یالکیز قوسی خلقیله شهره دخولنی صورت نیازده اشعار ایتلری  
 اوزرینه پاشا دخی بوشرطی قبول ایتمکله حسین اغا عینتابه عودت ایدوب کندوسی  
 دخی مطمئن القلب اوله رق مرعشه داخل اولور ایکن مقدمه طاغردن وعشائر  
 خلقتدن جلب وترتیب اولنمش اولان سواری و پیاده پاشانک عسکرینی احاطه  
 واکثرینی اعدام ایتمکله کندوسی برقاچ آدمیله کاور طغانی طرفته فرار و پیاس  
 طرفه کذار ایله یینه جزار پاشایانه وارمق اوزره کوچک علی اوغلنه دخیل دوشمشدر .  
 جزار پاشا بالاده اشعار اولندیغنی اوزره اردوی هایونک جانب مصره حرکتدن صکره  
 سرکشالک یولنی طوتوب بو مثللو فراریلری نزدینه قبول ایدر اولدیغنی کبی جبل  
 لبنان حقتده طرف سردار اکر میدن ویریلان او امره دخی مخالف حرکت ایدرک  
 سوق عسکر ایله امیر بشیری قاچردقندن صکره جبل حکومتی امیر یوسف اوغلرینه  
 تسلیم ایتشیدی انکلیز امیرالی اسمیت ایسه بشیره اغانه ایتمک اوزره برالشم ساحلنده  
 برقطعه بکلک سفینه براقش اولوجهله جبل حکومتدن انفصالی اوزرینه آنی سردار  
 اکر ام ایله کورشدرمک اوزره غزه جاننه دعوت ایلمش ایدو کندن امیر بشیر  
 طرابلس ساحلنده انکلیز بکلکنه را کباً عریشه واروب اسمیت وبعده سردار  
 اکر ام ایله ملاقاتنده حقتده طرف سردار اکر میدن پک زیاده اکرام والفتات  
 اولندقدن بشقه چونکه اولوقت قله بر ایله متارکه خصوصی دردست مذاکره

اوله‌رق اردوی هایون ایله سردار اکرم مصر جانبنه عزیمت اوزره بولندیغندن بعد اتمام المصلحه اردوی هایون ایله جزارک اوزرینه حرکت ایله کندوسنی جبل حکومتنده تقریر وابقا ایله جگنی دخی و عدا ایله مصر جانبنه حرکت ایدوب امیر بشیر دخی انکلیز دو نماسنه کتمشیدی متارکه نک انفساخی اردوی هایونک انهمزای اوزرینه سردار اکرمک جبل لبنان ایشنه باقه جق وقتی اولدیغندن امیر بشیر دخی خائباً و خاسراً طرابلس شامه عودت و اورادن بلاد حصنه عزیمت و وادیء راویده اقامت ایله انجامکاره منظر اولمشدر .

و بوجه مشروح بر الشامه عودتنده جزار پاشایه عریضه تقدیمیه عفوینی رجا ایدوب جزار پاشا طرفندن وارد اولان جوابده عفوندن فضله جبل حکومتک کندویه تفویض اولنه جغنی دخی علاوه اولنش ایسه ده امیر یوسف اوغللرینک متعهد اولدقلری تکالیفک ایفاسی شرط قلمش اولوب امیر بشیر ایسه بوتکالیفک ایفاسندن جبل لبنان اهالیسینک عجزینی بیلدیکی جهتله برطاق مظالمه واسطه اولمقدن ایسه بو وجهله جوارده اقامتی ترجیح ایلمشدر .

وفی الواقع جبل اهالیسی بوتکالیفک ایفاسنه طاقت کتوره میوب بوانشاده امیر یوسف اوغللری دخی اعتذار ایتمکده ایدیلر جزار پاشا ایسه تضییقندن خالی اولدیغنی جهتله جبل اهالیسی یزار اوله‌رق فیما بعد امیر بشیردن بشقه حاکم قبول ایتمامک و جمله سی تلف اولنجیه دک جزار ایله جنک ایلمک اوزره بینلرنده اتفاق ایله امیر بشیری جبله دعوت ایتملریله اولدخی اوائل تشرین نائیده جبل لبنانه ایاق باصدیغنی کچی جبل اهالیسی کندوسنه مطاوعت و عساکر جزاری اورادن طرد ایله امیر یوسف اوغللری بلاد جبلیده حکومت ایتمک و امیر بشیر جبل دروز حاکمی اولمق اوزره بینلرنده اتفاق ایتمشدر جزار پاشا بوندن پک زیاده منفعل و مغیر اولمش ایسه ده بتون جبل اهالیسی بویله یکدل و یکجهت اولدقلری حالده برشی یاپه میه جغنی بیلدیگندن هان عسکرینی عکایه اعاده ایله ینه ایچلرینه بر نفاق و شقاق براغوبده بوندن استفاده ایتمک اوزره فرصت کوزتمکده بولنمشدر .

سردار اکرم ارضروم و الیسی ایکن جلد سادسده بیان اولندیغنی اوزره آنک انهاسیاه سلیمان پاشا زاده شریف پاشا چلدرا ایالتندن عزل ایله برینه ثابت پاشا نصب اولتوب شریف پاشاعهده سنه دخی آطنه ایالتی توجیه بیور لمشیدی بو مناسبتله شریف پاشا اردوی هایونده بولتوب انجق ماجرای سابقی تذکر ایله سردار اکرم مدن مطمئن اوله مدیغندن بالاستیدان منصبی جانبنه کیتمک اوزره بوانشاده اردوی هایوندن مفارقتنده چونکه آطنه جانبنده کندوسنه طرفدار اوله جق طائفه اولدیغندن اورایه کیتمکه جسارت

ایده میوب اخسخنه طرفده ایسه پک چوق طرفداری اولمق حسیله پدیری منصبی اولان چادر ایالتی ضبط ایتمک اوزره اول طرفه حرکت ایلمش اولدیغی لدی الاستخبار دفتر وزرادن اسمی تر قین وتوقادده کندوسنه مکان اقامت تعیین ایدلمش وثابت پاشایه امداد ایتمک اوزره ارضروم وقارس ووان محافظلرینه وایزید متصرفه اوامر علیه کوندرلمش ایسه ده شریف پاشا سیر مربع ایله واروب اخسخنه تقریب ایندیگی کبی ثابت پاشا مقاومته مقتدر اوله میه جغنی درک ایدرک اخسخنه دن چیمغله شریف پاشا کلوب اهالی دخی کندوسنی استقبال ایله بلامزاحم اخسخنه کیرمشدر .

ثابت پاشا دخی خارجدن قوت وجمعیتی تکثیر ایله کلوبده اخسخنی ضبط ایتمک اوزره ارضروم طرفه چکلمشدر دولت علیه ایسه مصر سفریله مشغول ایکن بوئانده روم ایلیک احوالی دخی دقت نظری جلب ایده جک درجهیه کمشیدی . بنه علیه شریف پاشا اخسخنده یراشوب ثابت پاشا دخی اطرافده طولاشمقده بولنمشدر .

مقدمای میللو عشرتی بکی تیمور عصیان ایتمکله اوزرینه مأمور اولان بغداد والیسی سلیمان پاشا اوتوز بیک عسکرله رقه اوزرینه حرکت ایدرک جمعیتی پریشان ایلمش اولسی اوزرینه تیمور بک سلیمان پاشایه دخالت ایدرک وبغداده کیدرک اولوقدنبرو اوراده اقامت ایتمکده ایدی بوکره سلیمان پاشانک عرض وانهایسی اوزرینه تیمور بک عفو اولنهرق عهدسنة رتبه وزارت ایله رقه ایاتی توجیه قلنمشدر .

### \* وقایع در سعادت \*

اواسط صفرده شیخ الاسلام مصطفی عاشر افندی عزل ایله بروسه نفی اولنهرق یرینه صمانی زاده عمر خلوصی افندی شیخ الاسلام اولدی . چند ماه مرورنده عاشر افندی عفو واطلاق ایله در سعادت کتورلمشدر .

نظام جدید عسکر بک لزوم تکثیری بوکره مصر سفرنده دخی واضح وعیان اولدیغندن در سعادتده لوئند چفتلکننده کی ایکی اورطه معلم عسکردن بشقه اسکدارده در دست انشا اولان قشلهده مجدداً دهها بر اورطه نك کشادینه بوکره قرار ویرلمشدر .

وربع الاولده قلملره قید اولنان بر قطعه علم وخبیر مطالعه سندن اکلاشدیغنی اوزره طوائف عسکریه نك استعمال ایده کلدکلری اسلحه دن اکری قلیج وششخانه تفنگ وپشتو وپچاق مختراعات عصریه وفنون حریمه جدیده یاننده هپ اسلافده استعمال اولنان تیروکجان وکرکز ووسنان کبی متروک اسلحه عداینه مالحق اولمشدر زیرا اکری قلیج چالنه کلدکجه کسمز وششخانه تفنگ میدان محاربه سنده بر دفعه دن زیاده



آب‌ماز حلبوکه قنئی طرف برزیده آتارسه اوقازانور و پشتو و بچاق ایسه میدان جنکده هیچ ایشه یارامدینی و بونلر تعلیملو عسکرک بر بویده و بر درهمده و بر فقیده آیلان طوب و تفنکدرینه مقابل اوله میه جنئی مثبت و مجزوم اولدینی حلاله عسکرک پشتو و بچاق طاشیماری مجرد یانلرنده خیفیجه بر سلاح بولنوبده شهر لرده ادبسرک ایتمک ایچون اولدینی اکلاشلمشدر . بناء علیه بوندن بویله نظام جدید عسکرینک پشتو و بچاق قوللاملری قویاً یساغ ایدلمشدر .

بالاده اشعار اولدینی اوزره پوناپارته نك مصره و رودنده مصر ملاسی بولنان پشمقچی زاده ابراهیم ادهم افندی بر آراق شام طرفه هجرت ایلمش اولدیغندن مؤخرأ مصر اردوسی قاضیسی نصب اولمشیدی بواننده افندیء مومی الیه فوت و مکة مکرمه مولوبتدن انفصال الیه عودت ایدن عبدالکریم افندی دخی شامده ذائق شربت (کل نفس ذائقة الموت) اولمسلیله در سعادتدن برینک اردو قاضیسی نصب وارسال بیورلسی لازم کلکیکن کوستندیلی طاهر افندی یه تکلیف اولندوقده استانبول پایه سی احسان بیوریلور ایسه قبول ایده جگنی افاده ایدوب حلبوکه براق آی مقدم مکه پایه سی آلمش اولدیغندن متعاقباً استانبول پایه سی اعطاسی نزد شیخ الاسلامیده استکثار اولدیغنه و بواننده موالیء دوریه دن سابقا بغداد قاضیسی نوشهرلی حسن افندی نك برشی ایستمیوب حسبی عزیمته خواهشکر اولمسی شیخ الاسلام افندی یه خوش کلدیکنه منی همان طرف شیخ الاسلامیدن تقدیم اولنان تاختیص موجبنجه جمادی الاولی غره سندن اعتبارأ اردوی هایون قاضیانی مومی الیه حسن افندی عهده سنه توجیه بیورلدی .

فی الاصل قاضی عسکرک اردو قاضیانی دیمک اوله رق منتهای مراتب علمیه اولدیغندن قاضی عسکرلر استانبول قاضیسنه تقدم ایده گمشدر طریق عامیه نك وضع اصلیسنه نظراً بوکره سردارا کرم اردوسنه بر قاضی عسکر کوندرلمک و کیده جک قاضی عسکر یوق ایسه کوندریلان هرکیم ایسه قاضی عسکر اعتبار ایدلمک لازم کلوردی لکن صکر دلری مراتب عامیه هپ پایه دن عبارت اوله رق بتون بتون وضع اصلیسندن چیقمش و خدمت فعلیه ده بولنانلرک قدر و اعتباری تدنی ایدرک نهایت قاضی عسکرک وظیفه سی طریق خارجنده اعتبار اولنان دوریه موالیسندن برینه کوردیرلمک درجه سنه قدر ایتمش ایدی ایشه بودخی انقلابات زمانیه نك نتایج عبرت نماسیدر .

اردوی هایونده بالفعل رئیس الکتاب بولنان راسخ مصطفی افندی در سعادت عودت ایتمک اوزره تحصیل رخصت ایلمش اولدیغندن رکاب هایونده بکاکچی و کیلی اولوب فن جغرافیایه ولسان افرنجی یه آشنا اولق ملابسه سیله انکلیز محمود افندی

دیو معروف اولان رائف محمود افندی اردوی هایون جانبه کوندرلمشیدی اوائل ربیع الآخرده اردوی هایونه واصل اولدینی کبی بالفعل رئیس الکتاب نصب وتعیین بیورلمشدر و رئیس سابقک اوغلی عبدالشکور افندی که یازدیغنی اوقوبه مامق درجه سنده جهل ایله مشهور و بوکا دائر نظر فای عصرک لسانلرنده نیجه حکایه لر مذکور اوله رق حقدنه ( کیمدر دیو صور رسه ک جهالک ارجمندی . راسخ افندی زاده عبدالشکور افندی ) بیتی دخی نظم اولتمشیدی پدری رئیس الکتاب اولق ملا بسه سیله اودخی رئیس کیسه داری و تشریفاتی اوله رق اردوی هایون ایله عزیمت ایتمشیدی اقدجه بالاستیدان در سعادته کلوب خدمتی متروک و عزیمتی مشکوک اولدیغندن و بوکره بوجه مشروح پدرینک انفصالی وقوع بولدیغندن اودخی عزل اولمغه اردوی هایونده تسلسل وقوعیه بعض توجیها ت جزئیه دخی اجرا ایدلمشدر .

مؤخرآ کتخدای صدر عالی عثمان افندی منحرف المزاج اوله رق در سعادته عودت استدعا سنده بولمش ورجاسنه مساعده اولمش اولدیغندن بومناسبتله دخی اردوی هایونجه بعض توجیها ت اجرا ایدلمشدر .

حلب نقیب الاشرافی اولان مدرسیندن قدسی افندی بوسنه غزایه نیت و حلب اشرافی تشویق ایدرک جم غفیر ایله اردوی هایونه عزیمت ایلمش اولدیغندن طریقجه کندوسنه مکافات اولتمسی طرف سردار اکر میدن اشعار بیورلمش ایدوکنه مبنی اوائل رجبده عهده سنه بابایه مخرج ارضروم مولوتی توجیه بیورلمشدر .

### \* وقایع روم ایلی \*

بروجه بالادولت علیه مصر ایشلریله مشغول ایکن روم ایلیک احوالی اغتاشاش اوزره ایدی .

شویله که : روم ایلی جانبنده سرسری کشت و کدار و اهالی به ایصال رنج و خسار ایدن اشقیانک رفع وازاله لر ی ضمتده سلستره والیسی موسی پاشا ایله تر حاله متصرفی پلاسی محمد پاشا تعین اولمغه براق دفعه وقوعبولان محاربه لرده گروه اشقیانک منهزم اوله رق محمد پاشا جمع اشقیانک اولان طرنوی بی ضبط ایلمش ایسه ده و دین محافظی پاسبان اوغلی عثمان پاشانک اشقیایه اعانه سی اولق حبسیله اشقیانک محله منهزم اولورلر ایسه دیگر محله تحشد و اجتماع ایدرلر ایدی . ولو فجه اهالیسی امر مدافعه ده یکدل ویکجهت اولدقلرندن بوکره دخی اشقیایی مملکتلرینه اوغرا تاممش ایسه لرده دیگر قشارده (الحکم لمن غلب) قاعده سی جاری اولدیغندن طرنویده منهزم اولان اشقیانک پلونه و برقوقجه و نیکیولی قصبه لرینه دخول ایله اوراده یرلشدکلرندن موسی

پاشا خلال ربیع الآخرده نیکبولی اوزرینه حرکت ایله ترسنگلی اوغلی اسماعیل اغایی دخی قله بی ضبط ایتمک اوزره قارشو طرفه کچوردی . موسی پاشا نیکبولی واروشنی ضبط ایتمکله اشقیبا قلعه ده تحصن ایتمک لرندن بلونه طرفدن امداد لری کلش ایسه ده آنلرک اوزرینه دخی دولت عسکری هجوم ایله غلبه ایتمک لرندن برازی قلعه یه کیره بیلوب برازی دخی اتلاف اولمغله بقیه السیوفی تسلیم سلاح ایتمدیلر برهفته محاصره دن صکره جمادی الاولی غره سنده یوروش ایله قلعه دخی ضبط اولندی . فقط بومثللو اشقیانک ماجا و پناهی پاسبان اوغلی اولمغله آنک برچاره سی بولمغجه اولحوالینک انضباط وانتظامی قابل اوله میه جنی درکار اولدیغندن شیخ الاسلام قوناغنده مجلس مشورت عقد ایله وویریلان قرار موجبجه پاسبان اوغلنک وزارتی رفع وودین محافظی تعین ایدنجه دیک و دین اغایی قائم مقام نصب اولنهرق سرحدلویه بیان کیفیت ایتمک اوزره اوجاق طرفدن برقول چاوشی کوندردی و نیکبولی سنجانی جمادی الآخره نک یکر می برنجی کونی الحاقاً سلسسته و الیسی عهده سنه توجیه بیورلدی .

و بطل پاشانک اوغلی اولوب طربزون و الیسی بولنان طیار محمود پاشا مصر اردوسنه کتمک اوزره بو ائساده بحرآ در سعادت کیش اولدیغندن مأموریتی روم ایلی جانبه صرف و تحویل اولنهرق جمادی الآخره نک در دنجی کونی موجود معیتی اولان عسکرله ادرنه جانبه کوندلمش ایدی .

طیار پاشانک در سعادت و رودی اقدجه استعجال بیورلمش ایدو کندن همان یاننده موجود اولان عسکری استصحاب ایله عجاله در سعادت کلوب باقی عسکری دخی آرقه دن یتشمک اوزره ترتیب اولنمشیدی . بو ائساده کیروده قلان عسکرندن اوج یوز مقداری قره دکزده فورتنه یه طوتیلهرق غرق اولدقلری خبری زیاده حزن و کدری موجب اولدی .

رجبک بشنجی کونی ازمیدده دخی غایت شدتلو برقبه روزکاری اسوب ساحله بولنان کیلر باندقدن بشقه برقاچ مناره و ساحله قریب بیوت و افره منهدم اولمشیدی . طیار پاشا ادرنه یه وصول ایله بالقانک برو طرفده تحشد ایدن اشقیانک تدمیری اسبابنه تشبث ایلدیکی ائساده جکر جی اوغلی و عیسی اوغلی نام سر کرده لر برچوق طاغلو اشقیاسی ایله ادرنه یه بش ساعت مسافه سی اولان سکبان قریه سنه ورود ایتلری اوزرینه همان طیار پاشا ادرنه بوستانجی باشیسی سر کرده نصب ایدرک مقدار کافی عسکر ایله ارسال ایتمکین واروب قریه مزبوره بی بالمحاصره اشقیایه غلبه هنکامنده هوا قراروب کوز کوزی کورمز اولدینی حالده پک شدتلو برروزکار اسوب

انسان و حیوان طورہ مز اولدیغندن و غایت شدید بریغمور یاغوب قازیلان متریسر  
صو ایله طولدیغندن و ادرنه اعیانی قره احمدک اشقیا ایله اتقاقی میانہ عسکرده شیوع  
بولدیغندن عسکر اورادن عودت ایدوب کیفیت طیار پاشایه لدی الاخبار ایکی بیک  
آدم ایله کتخداسنی امداده کوندرمکله اودخی واروب و متفرق عسکری طوپلایوب  
اشقیا ایله اخشامه قدر جنک ایلمش ایسه ده ظلام شب مانع حرب و ضرب اولغله  
یارم ساعت مسافه ده واقع برقریه به چکیله رک صبحا ح انتظار اوزره اولوب بو محاربه ده  
ایسه الی التمش قدر اشقیا ایله جگر جی اوغلی تلف اولدیغندن بقیه اشقیات  
ایده میوب دوشن لاشه لری احراق بالنار ایدرک فرار ایلمش اولمبله کتخدا  
دخی عسکرله ادرنه به عودت ایلدی . بونک اوزرینه مرقوم ادرنه اعیانی اعدام  
اولندی و ادرنه بوستانجی باشینک دخی بو محاربه ده رخاوتی کورلمکله عزل اولنه رق  
یرینه ادرنه ده بولنان خاکیلردن آق باش زاده حسن اغا تعیین قلندی .

ترحاله متصرفی پلاسی محمد پاشا تکیل اشقیا خصوصده موفق اوله میدیغندن جفتلکنده  
اقلمت ایتمک اوزره بو ائنده وزارتی رفع اولنه رق ترحاله سنجاغی الحاقاً تپه دللی  
علی پاشا عهده سنه توجیه بیورلدی .

ادرنه محافظی بولنان وزیر اغا حسن پاشا دخی بو ائنده وارنه محافظه سنه مامور  
ایدلشیکن پاسبان اوغلی طرفدن قافلات یقه سنه امرار اولنان عسکرک قرا یوده  
طوغری حرکتی استخبار اولدیغندن اغا حسن پاشانک مأموریتی افلاق جانبنه  
تحویل اولندی و روسیج جانبندن قارشویه مقدار کفایه عسکر کچور یلوب افلاق بکی  
دخی بکرشدن حرکت ایتمکله واقع اولان محاربه لرده پاسبان اوغلی طاقی منهزم و کیمی  
مقتول و کیمی اسیر اوله رق افلاق طرفی بو وجهه اشقیا بدندن تخلص قلندی .

وینه بو ائنده موسی پاشانک ساجداری مقدار کافی عسکر ایله خلال شوالده  
پلونه اوزرینه حرکت ایدرک اشقیا به غلبه ایله قصبه یی ضبط ایتدکن صکره لوم  
ورحوه اوزرینه حرکت اولتمق ایچون تدابیر لازمه به تشبث ایدلمشدر .

مدت میده دنبرو گاه کلیبولیده و گاه تکفور طاغنده منفیاً مقیم اولان خلیل پاشا  
دخی اشقیا ایله اتقاق ایدرک فلبه طرفنده اجتماع ایدن قره فیضی و چنکجی اوغلی  
وسا سر کر دکان اشقیا ایله همدست فساد و شقاوت اولدیغندن همان فته باغیه نک ازاله  
واستیصاللری ایچون بو ائنده طیار پاشایه قطعی المفاد امر عالی کوندرلمشدر .

ایشته طیار پاشا طاغلو اشقیاسیله بونا و اغراشمقده ایکن ارضروم والیسی و جانیک  
محصلی اولان پدروی بطل حسین پاشا اواسط ذی القعدده وفات ایتمکله بروجه  
مالکانه عهده سنده اولان جانیک سنجاغی شروط مقررده اوزره اوغلی طیار پاشایه

احسان و ارضروم ایالتی ثابت پاشایه توجیهیله شریف پاشایی اخیسخه دن چیقارمغه سعی و غیرت ایلمسی کندوسنه امر و فرمان بیورلمش ایسه ده ثابت پاشا بو وقته قدر برقاچ دفعه شریف پاشا اوزرینه حرکتمده منهزم و منکسر اوله رق عودت ایتمکله اول حوالیجه وقع و حیثیتنه خال کله رک ارضروم اهالیسی کندوسی شهره اوغرا تفاق احتمالی تحظر و بطل پاشانک و فاتی و اوغلی طیار پاشانک روم ایلی طرفنده مشغولیتی حسبیلله اول حوالیده ذی نفوذ و قدرت بر ذات قالمیوب شریف پاشا ایسه محلنجه پک زیاده نفوذلی بولندیغی و دولتک مشاغل کثیره سی اولمق حسبیلله اورایه مستقل اردو سوق ایتمکله وقت و حال مساعد اولمندیغی تذکر اولنمقده اولدیغی حالده شریف پاشا روان خانی توسط ایله عفوئی استرحام ایلمش اولدیغندن شریف پاشانک عفو و ابقاسی ایجاب حالدن کوریلرک اشبو اون بش سنه سی ذی الحججه سی او اخرنده ابقای وزارتیه عهده سنه چلدر ایالتی توجیه اولنوب ارضروم ولایتی دخی سابقا قاضیسی و حالا مفتیسی اولان عبدالرحمن افندی عهده سنه بارتبه وزارت توجیه بیورلمش و ثابت پاشا دخی بوشده قالماق ایچون مرعش ایالتیه قایرلمشدر .

بوسنه والیسی وانی محمد پاشا اداره امور ایالتدن عاجز اولدیغنه منی عزلیله یرینه اغریبوز محافظی وزیر حقی محمد پاشا بوسنه و ایلمکنه تعیین قانمشیدی . انحق روم ایلمک احوال اختلالیه سی کوندن کونه تراید ایتمکده اولدیغندن اصلاحی تدابیر عظیمه یه محتاج اولوب روم ایلی والیسی کرجی عثمان پاشانک بو امر خطیره کفایتی اوله میه جنی دخی نزد اولیای امورده تعیین ایتمکله حقی پاشانک بوسنه و ایلمکندن صرف نظرله عهده سنه روم ایلی ایالتی بالتوجیه عثمان پاشا دخی محافظ عنوانیه برقوقجه ده بولمق اوزره عهده سنه ساستره ایالتی احاله بیورلمشدر .

\* وفيات \*

شیخ الاسلام اسبق دری زاده عارف افندی بیکده واقع ساحلخانه سنده کوشه کزین اقامت ایکن اشبو اون بش سنه سی جمادی الاول سنک یکرمنجی پنجشنبه کونی بعد العصر وفات ایتمشیدی .

مرحوم مشارالیه دری زاده مصطفی افندینک صابندن یوزالی اوچ تاریخنده تولد ایله یدی یاشنده ایکن ملازمت کاغدی و التمش یدی تاریخنده مدرسه رؤسی آلمش و پدرینک مشیخت ثانیه سی هنکامی اولان سکسان تاریخنده یکشهر و درت سنه صکره پدرینک اوچنجی دفعه سنده با پایه مکه بروسه و طقسان درتده بالفعل استانبول قاضیسی و طقسان التیده نقیب الاشراف و برادری عطاء الله افندینک

مشيخته اناتولى و متعاقباً روم ايلي قاضيسكرى و طقسان طقوزده شيخ الاسلام اولمش ايدى التى آى مرورنده يوسف پاشانك صدرتنه وضع انكشت دخل و اعتراض اتمكله عزل اولنوب ساحلخانه سنده اقامت اوزره ايكن ايكويوز درت تاريخنده علمای اعلامه عارض اولان بحران و انقلاب زمانسده طائفه نفي اولنوب بعد الحج آرپه نفي اولان کوتاهيه و آندن ساحلخانه سته عودت ايله نائل راحت و حضور و ايكي يوز التى سنه سى ذى القعدة سنده مكرراً مشيخته نائل و اون اوچ سنه سنده منفصل اوله رق بروسه ده اقامته مأمور و اوچ آى صكره ساحلخانه سته عودت ايله مسرور و واشبو اون بش سنه سنده بالاده بيان اولنديغى اوزره عالم هستيدن دور اولمشدر . اصيل و عريق و اصول آشنای طريق عذب البيان و طلق اللسان برذات ايمش . رحمة الله عليه

دوچه المشايخ ذيلنده منيب افندى مرحوم مشار اليهك ايكنجى مشيخته كى اجرا آتى بيان صره سنده ديركه بودفعه لرنده اخراج دانشمندان مدرسه سلطان بايزيد خان ايجون ايكي دفعه و ادخال طريق تدريس ايجون بردفعه عقد مجلس امتحان و ارباب علوم و طلاب ذوى الفهم مدن نيجه مستمندانى رؤس و ملازمتله چراغ فروزان ايلمشدر و دانشمندان مدرسه دن ازقديم هر آلى آيده ايكيسى اخراج اولتمق معتاد ايكن بونلر هر اوچ آيده اخراجلرين اعتياد و بوقاعده مستحسنه نى وضع و ايجاد ايله نيجه اهل دانش و استعدادى دلشاد ايلمشدر در انتهى . اياصوفيه شينى مارديني خليل افندى دخى او اواخر رجبه وفات اتمكله كرسى شيخلرنده سلسله وقوعبولوب ذيل اعتباريله خنبره خانه ده كى والده سلطان جامع مشيختى محلول اوله رق لدى الامتحان اقران و امثالى بيننده كسب تميز ايدن قيصر يه لى ابراهيم افندى به توجه بيورلدى .

سراطباى سابق محمد صادق افندى كه فى الاصل بلاطده ساكن حاجى عبدى چلينك صابندن بيك يوزالى بر سنه سنده تولد و دايسى اولان حكيم قبور عباسك حجر تر بيه سنده تحصيل طبابت ايتد كدن صكره طقسان درت تاريخنده يكيشهر ملاسى مسعود زاده يه كتيخدا و طقسان يديده مدرس و ايكويوز اوچده رئيس الاطبا و بوشده از مير و يديده ادرنه ملاسى اولمش و طقوزده مكه پايه سى آلمش ايدى اون بر سنه سى رمضانده حكيم باشيلقدن انفصال ايله خانه سنده اقامت اوزره ايكن اون درت سنه سنده استانبول قاضياغنه بحسب الطريق مستعد بولمغله طرف شيخ الاسلاميدن استمزاج اولندقدن قبول ايتديكى جهتله مادونى اولان محمد افندى استانبول قاضيسى نصب اولنوب صادق افندى ايسه استانبول قاضياغنى قبول ايتديكنه

صکړه دن نادم اولمغه بوندن طولايي تفکر و تأسف ايدوب کيدړک مراق و مال خو ليا علتته مبتلا و برمدت اسواق و بازارده کشت و کذارايتد کدن صکړه کندويه سکونت کله رک کوشه کزين ازوا و شعبانک اوننجي جمعه ايرتسي کيجه سي عازم دار بقا اولمشدره اول کون مکه پايه لولرندن و فضلاي عصر دن سابقا شام قاضي سي ويران شهرلي حسن افندي دخي تکميل نسخ انفاص معدوده ايدوب کيتمش ايدی .  
سابقا قوبان خاني اولان بختکراي خان دخي رهضانک اون اوچنجي کوني وفات ايلمشدر .

مرحوم مشاراليه قريمکراي خانک اکبر اولادي اولوب پدري نیک خانلغنده يديصان قبيله سي سرعسکري و قپلانکراي خان ثاني زماننده نورالدين و مقصودکرايک دفعه ثانيه سنده قالغاي سلطان اولمش وايکي يوز اوچ سنه سنده عهده سنه رتبه ساميه خاني توجيه اولندوقده برادري محمدکراي قالغاي و سعادتکراي خان احفادنن بهادرکراي نورالدين ايدوب مقتضاي مأمورتي اوزره بوجاق جانبنه عزيمت ايتمش ايدی .  
بعد المصالحه بيک ايکيوز التي سنه سي او اخرنده درسعادت عودت و بر دفعه بيک بفتح سنده صدر اعظم ملک محمد پاشا ايله ملاقات و مصاحبت ايتد کدن صکړه قنديه قلعه سنه نفی و اجلا و آندن مدلولو و ساقز جزيره لرينه و بعده کليبولي و تکفور طانغه نقل ايله تبديل منفا اولنه رق نهايت چفتلکي اولان پاشا قريه سنده اقامته مأذون اولمشيکن تکرار مدلولو جزيره سنه نفی اولنوب نوکړه اوراده اتمام مسافه حيات ايتمشدر عقل و دراي و فن تاريخده مهارت صاحبي برذات اولوب اوائل حالنده طالعي مسعود و متالي و او اخر ايامنده ( بز بختي مساعد ديو مشهور ايدک اول )  
مصراعى ماصدق حالى ايدی سنى الی الی و خانانغى مدتی اوچ سنه سکز آيدر .  
ذی الحجه نیک طقوزنجي چهارشنبه کوني دخي شيخ الاسلام اسبق سيد محمد کامل افندي وفات ايتمشدر .

مرحوم مشاراليه صدر روم اسبق قره بکر افندي زاده عثمان افدينک صلبندن بيک يوز قرق ايکي سنه سي محرمنده متولد و دايسي فيض الله افندي زاده مصطفي افدينک مشيختنده اون بش ياشنده ايکن مدرس و بعده غلظه و طقسان تاريخنده مصر و طقسان ايکيده مدينه منوره ملاسي و ايکيوز تاريخنده نقيب الاشراف و ينه سنه مزبور خالنده اناطولي پايه سيله مکلمه يه مأمور و ايکيوز برده صدر اناطولي و ايکيده شيخ الاسلام اولوب اون يدي آي مرورنده سلطان سليم خان جلوس ايتد کده عزل ايله کسانه نفی اولمش و مدت مشيختي قدر منفاده طور دقن صکړه اطلاق ايله ساحلخانه سنده اقامت اوزره ايکن بروجه مشروح اشبو اون بش سنه سي او اخرنده طی طومار حيات ايدوب کيتمشدر .

\* وقایع شتی \*

حضرت خالد بن زید الانصاری رضی عنه الباری جامع شریفی خرابه مشرف اولدیغندن اوتوز آی مقدم مجدداً تعمیرینه مباشرت اولنوب بو ائنده ختام بولمش اولمسیله جمادی الآخره نك بشنجه جمعه کونی سلاماق رسمی جامع شریف مذکورده ادا بیورلدی .

اوانلده کمیلر قرده انشا ایله بجره تنزیل و محتاج تعمیر اولانلر انواع صعوبت ایله دار آغاچلرنده تعمیر اولنور ایکن دول بحریه اوروپا ترسانه لرنده بیوک حوضلر یابوب سهولت ایله سفینه انشا ایدر اولدقلرندن ترسانه عامرده دخی اوله حوض کبیر انشاسنی سلطان سایم اراده ایتکله مقدا اسوجلو برمههندس معرفتیه انشاسنه مباشرت اولمشیدی بو ائنده اودخی ختام بوله رق ترسانه اموری بر مرتبه دها کسب صلاح و سهولت ایلمشدر .

استانبولده جاریه فروخت اولندقده برفندق آلتونی رسم پنچک آلتوق عادت اولوب بو ائنده ایسه دولتک مصارفی تزیاید ایلدیکندن اکا کوره وارداتک تکشیری لازمکلمکله سائر اموال تجارت کبی جواری فروخته دخی یوزده اوچ رسم پنچک آلتوق و تخمینا فضله حاصل اوله جق اوتوز بش بیك غروش مال کمرکه ضم ایله اسهام قلمق خصوصه قرار ویرلمشدر .

اسفار سابقه ده اولدینی کبی بو کره دخی مقاطعات و اسهامدن جبهلو اخذ و اخراجنه قرار ویریلوب شویله که : ایکی یوز یدی سنه سنده ویریلان مقاطعات نظامی تاریخندن اول توجیه اولتان مقاطعات معجلاتندن بیکده اوچ نفر و بعد النظام توجیه اولتان مقاطعاتک اوچ سنه مرور ایتشارندن بیکده ایکی نفر و جمله اسهامک غیراز توجیهات جدیده برر سنه لکنک فائضلرینک نصفی علی السویه جبهلو تعیریه اخذ اولتوق اوزره نظام ویریلهرک بوندن حاصل اولان التی بیك التمش کیسه مصارف سفریه یه قارشولق اتخاذا ایدلمشدر .

بو ائنده استانبول قضاسنک بحسب الطریق مکه پایه لولرندن مضروب زاده احمد افندی یه توجیهی لازم کلوب حالبوکه سنی یتشه یتمش اولوق حسبیه بالفعل امور قضایی اداره دن عاجز اوله جنی درکار کوریلهرک کندویه استانبول پایه سی احسان بیوریلوب امین پاشا زاده محمد امین بک افندی دخی بالفعل استانبول قاضیسی بیورلمشدر . وینه بو ائنده پایه لر اعطاسیه طریق علمیه احتجابندن نیجه ذوات ممنون و مبتهيج اولمشدر . بوسنه دخی کعبه مکر مه نك کسوه شریفه سی سلطان احمد جامع شریفی رواقده نسج



واعمال اولنه رق رجبك او چنجي پنجنه كوني آاي ايله سراي هايونه نقل اولنوب  
بعده صرة هايون ايله جانب حجازه كوندرلمشدر .  
دأب مستحسن دولت عليه اولديغي اوزره اوائل رمضان شريفده هر كون حضور  
هايونده حضور درسي عنوانيله بر مجلس ترتيب اولنهرق هر مجلسده افخم علمادن  
بر مقرر ايله مدرسندن يديشرسكزر مخاطب بوانوب تفسيرقاضيء بيضاوي قرائت  
ايديلور وبعده جمله سنك صره لري ويريلور اولوقت سفر لر تقر بيله عطاياي ساآره  
كبي بوصره لر دخي قبول تنزل ايتشيكن سلطان سليم الببال حضر تلري عامايه ميل  
وتوجهلرين اظهار ايله بوصره لري يوزر غروشه ابلاغ ايدوب والده سلطان  
طرفندن دخي بشقه جه يوزر غروش احسان بيوريلور اولدي بودرسلرده اوتدنبرو  
بعض اسئله واجوبه ايراد اولنه كلوب انجق مباحثاتك رسم ادبه رعائته اجراسي التزام  
اولنه كمش ايكن برمدتنبرو خواجه افنديلردن بعضيلري دائرة ادبدن چيقهرق  
تفرد و مكابره واديسنده معارضه و مشاجره يه قيام ايدر اولديلر ايشته اشبو بيك  
ايكي يوز اون بش سنه سي رمضانده دخي خواجه منيب افندي مأذونلردن قدسي  
افندي مقرر اولديغي حالده مخاطبلردن بعضيلري وظيفة اولي الالباب اولان اصول  
آادبدن چيقوب وعنان بحث و مناظره ي واديء عناد و مكابره ده طريق جدله چويروب  
بو وجهه واقع اولان مجادله حضور هايونه ياقشميه جق صورتده منتج مشاتمه اولمشدر .  
بو وقعه يي بيان صدندنه واصف افندي ديركه اوفرقة سعادت منذك بعضيسي درسك  
بختدن بالكليله خلونجي روا كورميه رك بلا معارضه اسئله سهلة الاجوبه ايراد ايدوب  
بعضيلري دخي دعوای تفرد و عناد يولنده مقرر لر ايله بيوجه مناقشه و اطالاه لسان  
ايله آغاز مناشه ايده كلدكلري بهر سنه مسموع و بو معارضه نابر جانك سيئسي ابو الشارب  
محمد افندي كبي براهل علمي بالاي طاق التفاتدن حضيض ادباره متهافت ايلديكي  
واصل درجه شيعو اولوب قصه دن حصه آلمق لازم ايكن بودفغه مجالسك برنده مقرر  
بولنان قدسي افندي يه طاعستاني عبدالرحمن افندي و اخسخه لي على افندي وقسطموني  
عمر افندي على العموم صولت انداز هجوم و حاصل بحثلري مؤدئء مباحضه و شتوم  
اولوب مقرر هر تقدر رفقه خطاب و بين اللطف و العتاب سؤالرينه ايراد جواب  
ايتديسه دخي طائفة عناديه لانسلم آوازه لر ين عيوقه رسا و كلام حقي قبولدن امتناع  
و ابا ايدوب حضور هايون محل ادب و خضوع و مقام مسكنت و خشوع ايكن كلات  
لاغيه و اعتراضات واهيه ايله مقرر ي بغير حق تحقير وازدرا خيلياسنده اولدقلري  
مرآت تماثيل حقايق اشيا اولان طبع كيتي انجلاي ملوكانه ده رونما اولغله في الحال  
نقض مجلسه ايما بيورديلر . و معتاد اولان عطيه لري اكر چه بودفغه اعطا اولندي لكن

مذکور الاسامی اوچ نفر مدرس لک حضور در سندن ممنوعیت لری فتوای پناه جناب لری  
 اشراب و تنبیه قلندی . مجلس مذکورده جریان ایدن بختلر و تحدث ایدن نابجاسوزلر  
 عربی عبارہ برسالیہ درج اولمش ایدو کندن مناقشه و مشاتمہ یہ دائر اولان سوزلری  
 طی ایله یالکز مباحثی بومحلہ درج اولنور . شویله کہ : مقرر قدسی افندی (ام کتم  
 شہداء اذ حضر یعقوت الموت اذ قال لبنیہ مات بعدون من بعدی قالوا نعبد الہک والہ  
 ابائک ابراہیم واسماعیل واسحق الہا واحدا ونحن لہ مسلمون) آیت کریمہ سنی قرائت  
 ایتد کد نصرہ ام کلمہ سنی اشراب معناسہ اولان بل ایله تفسیر ایتد کہہ قسطنونی عمر  
 افندی ( بل معناسی زہ دن آندی ) دیمکلہ مقرر ( بیضاوینک ام کلمہ سی منقطعہ  
 واندہ کی معنای ہمزہ انکار در دیدیکی ایراد ایله ہمزہ یی متضمن اشرابیہ اولوب  
 بل اکتہ شہداء معناسی افادہ ایدر ) دیکک عمر افندی ( حضرت یعقوبک اوغلارینہ  
 ملت اسلامہ مداومت ایدک دیو ایتدیکی وصیتک فائدہ سی اولدی . زیرا وصیتی ایله  
 متنبہ اولدیلر ) دید کہہ مقرر ( بو اشراب مہمدن اہمہ انتقال قیلندندر . شوسیدن کہ  
 طائفہ یہود حضرت رسول اگر مہ دیدیلر کہ یعقوبک حضور مودہ اولادینہ یہودیت  
 توصیه و تنبیه ایلدیکی بیلمز میسین پس قوم مر قومی توبیخ ضمنندہ بو آیت نازل  
 اولدیغنی قاضی تصریح ایتشد ( دیمسی اوزرینہ ) خطاب اگر مؤمنلر ایچون ایسہ  
 بو آیتدہ نکتہ ندر ) دیو تکرار سؤالہ ایتدار ایتکین مقرر دخی ( حق تعالی بیوردی  
 ایدیکہ اسلامدن عبارت اولان ملت ابراہیمدن اعراض ایدنلر جاہل و سفیہلر در .  
 بوندن اہمہ اشراب و مؤمنینہ امتنان بیوروب شویله کہ : وصیت یعقوبہ حاضر  
 اولدیغکز خالدہ مطلع اولدیکز بو کیفیتی افضل رسل اولان نیککڑ معجزاتندن  
 اولان وحی ایله بیلدیکز پس بعثی ایله معتم و حق متابعت اوزرہ اکا تابع اولک تاکہ  
 فلاح بولہ سز و سز دن اول کلانلر کی اول وصیتہ مخالفلر دن اولیہ سز ) دیو جواب  
 ویردیکندہ سائل ( بو جواب باطلدر . زیرا باری تعالی حقندہ امتنان صفت نقصاندر )  
 دیمسہ جواباً مقرر ( قل لاتمنوا علی اسلامکم بل اللہ یمن علیکم ان ہدکم  
 للایمان ) آیتی تلاوت ایله ( امتنان انسانہ کورہ صفت نقصان اولوب باری تعالی  
 طرفندن ظہور ایدن امتنان محض عنایت واحساندر ) دیو سائلی الزام ایدرک  
 بوملابسہ ایله مقررہ فسحت ہنکام و فرصت مجال کلام الویروب اولدخی حضارہ  
 خطاب و ( موت مقولاتدن قنی مقولہ دندر ) دیو استجواب ایتد کہہ آخسختلی  
 علی افندی ( موت مقولاتدن دکلدر . زیرا مقولات اقسام موجوداتندر موت  
 ایسہ عدم محضدر ) دیمسی اوزرینہ مقرر ( الذی خلق الموت والحیوة ) آیت  
 کریمہ سنک تفسیرندہ بیضاوی تقدیر یا خود ایجاد معناسن اشعار ایدوب تفسیر اولہ

نظراً موت عدم الحیوة عما من شانه ان يكون حیا مفهومندن عبارت امر عدمی اولوب پس بوکا ایجاد متعلق اولمز اما تقدیر موجوده تعلق ایستیکی کبی معدومه دخی تعلق ایدر . زیرا بوصورته موت ایله مراد حیات اوزرینه مقدم اولان موتدر . نته کیم حق تعالی (وکنتم امواتا) بیوروب بیضاوی دخی وقدم الموت ایله اشارت وعدم صرف ازلی اولدیغنه تنبیه ایلدی ایشته بوموته خلق تعلق ایتمز ایتسه حادث اولمق لازم کلور تفسیر ثانی به نظراً موتدن مراد عدم الحیة عن انصف بها مفهومیله معرف اولان موتدر و بوتعریف قبل الحیة اولان موته متناول دکدر بویله اولنجه ماقبل الحیة اطلاق مجازدر بوتقدیرجه خلقک موته تعلق ظاهر در زیرا موت مالکانه مضاف اولان عدمات قیلندن اولمغله بوصورته کندویه خلق تعلق ایدر نته کیم (وجمل الظلمات والنور) آیتنه جعل تعلق ایستیکی کبی وظلمت نوره مضاد عرضدر زعم ایدن بوآیت ایله احتجاج ایلدی حالبوکه عمی کبی عدم الملکه اولوب کندویه جعل تعلق ایتمیان عدم صرف اولدیغنی بیلمدی دیوبجئه فیصل ویردکن صکره طاغستانی ایله اخسختلی وجه اخر ایرادینه شدنطاق وموتک جوهر اولمسندۀ اتفاق ایدرک یوم قیامتده موتک صورت کبشده ذبح اولنجهنی روایتیه استدلال ایلایلر مقرر دخی کبش وذبح قضیه سی عدم موتدن کنایه در ولا سلم یوم قیامتده معانی معقوله قیلندن اولوبده خارجه وجودی اولمیان اعمالک وزن ایچون صورت جوهرده خلق اولنجهنی کبی موت دخی اول کون جوهر اولسون وکبش صورتده ذبح اولسون سؤال انجق دنیاده اولان موتدندر دیمکله بااراده سینه مجلس بحثه ختام و سررشته مناقشه و معارضه به انفصام ویرلدی .

دیار هندده واقع ارفوت نام مملکتک حاکمی بهادر خان یدی سنه مقدم سلطان سلیم خان حضر تیرینه هدیه اولمق اوزره برقاچ بوغچه اقمشه هندیه ترتیب و نامه مخصوص ایله بحرأ انکلتراه به و آندن استانبوله ایصال اولمق اوزره برکمی به وضع وتسییر ایلمش انشای راهده کبی بی بر فرانسز قورصانی اخذ ایدوب بعده انکلز بکلک کیلرندن بری اول قورصانه تصادف ایله سفینه بی آلمش و در و ننده کی هدایا انکلتراه به کوندرلمش و بر مدت صکره هندده کی انکلز مأمور لری طرفندن بو خصوصه دائر انکلتراه به اشعار وقوع بولمش اولدیغندن هدایای مذکورۀ ایله بهادر خانک تحریراتی انکلتراه دولتی طرفندن در سعادتۀ کوندریلوب اشبو اون بش سنه سی خالانده انکلتراه ایلیچسی طرفندن باب عالی به تسلیم اولنمشدر فارسی العبارة نامه سی ترجمه ایستدیرلده کده کندوسی عبدالقادر جیلی اولادندن اوله رق نسبی سلاله طیبۀ حضرت فاروقی به منتهی اولدیغنی ایما و حرمین محترمیندن آبا واجدادینه ارزان قلنمش اولان فراشت ایله سرفراز اولمسی و کعبه مکر مه نک بعض محلمری

زرحل ايله طرفدن نكاسته قلمسنة و هند حاجيلرى رنجيده اولمىوب قصد مجاورت ايله اقامت ايدن لردن برى فوت اولدوقده تركه سنة شرفا وولات وبيت المال طرفدن تعرض ايدلميه رك ورتنه سنة و يرلك اوزره رفقاسنه تسليم اولمق خصوصه مساعده بيورلمسى استدا اولمىش ايدو كندن قيوده لى المراجعة مقدا اهالى هنددن سراج الدوله محمد على خان محلولندن محمدعلى خان بهادره و محمد نظام الدينه فراشت شريف براتى و يرلدىكى مقيد ايسه ده بو وقتك حكمنجه خان موسى اليه فراشت براتى اعطاسى مناسب كورلمىوب و كعبه مكرمه دخى زرحل ايله نقش و نكاردن مستغنى بولنوب فقط زوار و مجاورلرى حقنده واقع اولان مسؤلاتنه مساعده اولنهرق امير مكه مكرمه و حرمين شريفين قاضلرينه و جده و ايسنه و شيخ الحرم نبوى به خطاباً اوامر عليه اصدار و ارسال بيورلمشدر .

واصف افندى بو حكايه يى منوال مشروح اوزره يازدقندن صكره لطافتدن اولمق اوزره برفقره تجر بر ايدوب ديركه: راغب پاشا صدارتنده هند اقلمينده كائن طوائف ملو كدن برى كعبه مكرمه يى ستراچيون كسوه ارسال اتمك اوزره رخصت استدعاسى ضمننده بر مأمور مخصوص كوندرمشيدى مكه مكرمه نك كسوه شريفه سنة صرف اولنجه مقبالت ايسه مصارف مرتبه دولت عليه دن اولوب بهر سال تجنيد ايله اول بقعه مباركه يه ارسال اولنجه كمشدر انجق اقليم هنددن سنوى بر قاج بيك قدر عريان هندولر افتان و خيزان تمالك محروسه يه منتشر اولوب صنعت دريوزه كرى ايله نامى تعجيز و تصديع و سائر سئاهيه مقيس اولمىوب طلبده حقوق نابتة اسحاني كى خلقى آزرده و تقرييع ايتمار ياه او مقوله عريان و سر كردان هندولرى بو طرفه كلكدن منع ايله او طرفده اطعام و اكسا قصد و نيت ايلدكارى خيزدن اولاد دريو جواب و يرلدىكى ياد داشته نهادر فرانسه سفري نك بدايت ظهورنده طرفين ممالكننده بولمغاه توقيف ايديلان و محارب به لرده طوتيلان اسرانيك مبادله مى طرفين حقنده خيرلو اولديغندن جمله سنك طرفيندن تخليه سيللرينه بو ائنده قرار و ير ياهرك در سعادتده مقيم دائيارقه مصلحتكندارى ايسى بو خصوصه دولت عليه ايله فرانسه جمهورى بيننده واسطه محابره اتخاژ اولمشدر .

عرب او جاقلىرى مالطه قواليرلرينه قارشو مجاهد برر هيئت عسكرىه اوله رق قورصالنقاه نائل اولدقلىرى مكاسب كشيردن خزينه مالىه نك بر حصه معينه سى اولمىوب يالكوز اوچ سنده بر كره باب دولته جزئيات قيبيلدن اوله رق برر مقدار شى تقديم ايدرلدى . فقط دولت عليه هر قنقى دولته محارب اولورايسه در حال جنكه ابتدار ايدرك مقدمه ظفر اولورلردى بر مدت نبرو نظام و رابطه لرى خلل پذير اولمغاه

مزاج و مشوارلرینه موافق اولان او امر دولت علیه مطاوعت ايله طبعترينه ملايم  
 گليان زواج و نواهيدن اغماض عين ايدر اولمشلر ایدی . بو کره فرانسه سفیرینک  
 ظهورنده فرانسه علیه قورصان سفینه لری چیقار دیلر ايسه ده صکره لری فرانسزلره  
 اويوشورق آنلره ذخيره و سائره بيع و فروخت ایدوب علی الخصوص تونسلیلر  
 فرانسز پوسته لرینه برقه جانبدن یول ویرملریله انکلیرلر آق دکزی ابلوقه ایشیکین  
 فرانسه نك اول طرفدن مصر ايله مخابره سی کسيله مامش اولدیغنه دولت علیه مطلع  
 اولدقده دلکیر اولسیله بو کره در سعاده بر معناد وارد اولان مقدمه لری قبول  
 بیورلیوب فرانسزلره کلیاً مناسبتی قطع ايله او امر و نواهی دولت علیه تمامیه  
 توفیق حرکت ایتدکجه مظهر عفو اوله میه جقلری اعلان اولمشیدی بو او جقلرک  
 سطوتی ايسه ذاتاً سایه دولت علیه ایدی . و کیلرینی ممالک محروسه دن تدارک  
 ایتدکاری کبی قورصانلقدده قوللاندقلری عسکرک اکثریسی دخی ازمیر کبی  
 ممالک محروسه ساحلرندن رخست دولت ايله طویلا دقلری نفرات ایدی . بناء علیه  
 دولتک بومعامله تکدیریه سندن اندیشه ناک اولوب همان فرانسزلر ايله اولان مقاوله لرینی  
 فسخ ایدرک هر حال و کارده او امر پادشاهی به توفیق حرکت ایدد جکلرینی عرض  
 واسترحام ایتدکارینه مبنی خطیئات سابقه لری عفو ايله اوائل ذی القعدة ده مقدمه لری  
 قبول بیورلمشدر .

### \* احوال دول اوروپا و بعض وقایع مصریه \*

بالاده اشعار اولندی اوزره پوناپارته باش قونسولوس اولدقده صالحه راغب اولمشیکین  
 انکلتره لو حربک دوامی التزام ایدوب اوستریا دولتی دخی اکا پیرو اولغله پوناپارته  
 دخی کمال مسارعت اوزره اسباب حربیه سنک تدارکنه اقدام ایدرک وبالذات براردو  
 ايله ایتالیا به کیدرک اشبو بیک ایشیوز اون بش سنه می اوائلنده مارنغو نام قریه  
 جوارنده اوستریالور ايله واقع اولان محاربه جسیمه نی قزائمشدر .  
 بو وقعه مارنغو محاربه سی دیومشهور اولوب بونده اوستریالونک سکنز بیک عسکر یله  
 بر چوق جنرال و ضابطانی تلف و مجروح و درت بیک قدری اسیر و فرانسزلرک  
 التي بیک مقداری تلف و بیک قدری اسیر اولمش ایدی فقط مقدا مصرده سعید  
 قوماندانی بولنوب بو کره اشبو مارنغو مظفریتک قزائلمسنه سبب اولان جنرال  
 دیزدنک دخی اوریلوب وفات ایتدی پوناپارته نك عظیم کدر و تاسفنی موجب اولمشدر .  
 بو غلبه نك نتیجه سی اولوق اوزره بتون ایتالیا پوناپارته نك قبضه حکم و تصرفه کجوب  
 و بتون جهانه عظیم تأثیری اولوب فرانسزلرک تزیاید و ترقی نفوذینی موجب اولمشدر .  
 بونک اوزرینه پوناپارته عسکرینی ایتالیا نك مواقع مناسبه سنه یرلشدیر دکدن صکره

فرانسز جمهورينك يوم احدائ اولان تموز فر نكينك اون دردنجي كونده اجرا اولنه جق شهر آينده بولتمق اوزره پارسه كيتمش وبوئانده المانپاده بولنان فرانسه اردوسي قوماندان مورادخي اوستريالولره غلبه ايتمشدر .

برايجي آي ظرفنده بو قدر جسيم ايشلك كورلمسي پوناپارته نك فوق العاده برآدم اولديغنه دليل اولمسيه فرانسه ده افكار عموميه اكا مائل ومتوجه اولمش وپوناپارته دخي مارنغو مظفريت جسيمه سندنصكره اوروپا قطعه سنده بيوك ايشلره مقتدر اوله جني درك وتفظن ايتكله دائره آمال وافكارى پك زياده وسعت بولمشدر .

وجعيت بشر به ايچون بردينك لزومني ويكيدن دين وآيين احدائ قابل اولديغني وتشكيلنه تشبث ايلديكي حكومت جديده نك براساس قوي اوزرينه بناسي دين ومذهبه موقوف اولديغني درك وتفظن ايدرلك فرانسه ده دينسزلكلك احساسيه قاتولك مذهبك احساسى خصوصى امل ايدرايدى ومقدما ريمپا فرانسه به جلب اولمش ايدوكندن اوراده محبوس اولديغني حالده مديران جمهور زماننده وفات ايتكله ونديك بلده سنده اوتوزبش قاردينال تجمع ايدرلك يرينه يدنجي بيوس ناميله قاردينال كياراموتي ني پالغه انتخاب ايتمشرايسه ده روما الده اولمديغندن مشاراليه انقوننده اقامته مقرر حكومتك تخليه سنه چالشمقده ايدى مارنغو محاربه سندنصكره پوناپارته آنكله محرمانه خبرلشوب اكر پاپا ايجاب حال وزمانه موافق برطور منصفانه كوستر ايسه كليسا ايله فرانسه جمهوريتنى بارشديروب پاپاي اسكى حال وموقعنه كتورمكه سعي واقدام ايده جكنى وعد ايلمش وبوندن صكره پوناپارته برچوق مشاغل داخله وغوائل خارجيه ايله مشغول اولديغني حالده اموردنيه نك تنظيمى مسئله سنى دخي الدن براقيوب پاپا ايله مخبره دن وپاپانك پارسده كي مرخصيه كيزلوجه مذاكره دن خالى اولمامشدر .

حالبوكه پوناپارته نك قونسولوسنى مستقل حكمدارلق رنگنى آلدېغندن كتدكجه قوت بوله رق جمهوريتك بتون بتون الغامى انديشه سيله جمهوريت طرفدارانى پوناپارته ني اعدام ايتك افكارينه دوشمشل ايدى قراليت طرفدارانى بدایت حالده خوشنود كورينوب حتى مقتول فرانسه قرالى اون التنجى لوينك برادري اون سكرنجي لوتى كه فرانسه نك خارجنده طولاشه رق نهايت انكلتره ده استقرار ايتمشيدى پوناپارته نك قرال ياخود ايمراطور عنوانيه حكمدار مستقل اولمق درجه سنه قدر طمع ايده جكنى تخطر ايده ميه رك پوناپارته به تحيرات ارساله اكر بوربون سلسله سنك فرانسه قراليتنده ايقاسنه معاونت ايدرايسه كندوسنه بيوك ودائى مسندلر ويره جكنى وعد ايلمش وبوكا جواباً پوناپارته طرفندن بيك سكرىوزسنه ميلاديه سى ابلول فر نكيسنك يديسنده يازيلان مکتوبده بوربون سلسله سنك فرانسه به عودتى

بشوز بيك لاشه اوزرندن كچمكه توقف ايدرديو بوسودادن واز كچمسي كندوسنه نصيحت سياقده بيان ايتمش اولديغندن قراليت طرفدارلري مأيوس اوله رق آنلر دخي پوناپارته نك اعدامي چاره سني تحري يه باشلامش ایدی .

بناءً على ذلك سنة مرقومه كانون اول فرنيكسنگ اون دردنجي كوننك اخشامي پوناپارته تيارويه كيدر ايكن كچه چكي زقاق اوزرنده حفر ايدلمش اولان وقورشون وتيمور پارچه لريله مملو بولنان لغمه آتش ويرلد كده ضربندن برقاچ خانه خراب اولمش وزقاق مقتول ومجروحلر ايله طولمش ايكن پوناپارته نك عربه سي ده اولجه سرعته بولغمك حذاسندن صاوشمش اولديغي جهته قورتيلوب تيارويه كيتمش واصلا فتور كوسترميوب برمدت تماشا ايلد كدن صكره سراينه عودت ايتمشدر پوناپارته بووقعه يي جمهوريت طرفدارلرينك سوء قصدينه حمل ايله بونلرك معتبرانندن پك چوق كيمسه لري بلا حاكمه حبس ونفي ايتمشيدي برآي صكره بوني احداث ايدنلر قراليت طرفداراني اولدقلى ميدانه چيتمشدر كرك جمهوريت وكرك قراليت طرفدارلرندن پوناپارته نك برخيلي خصاسي اولديغي اكلاشيلوب حالبوكه كافه عساكر واكثر اهالي حكومت حاضره دن خوشنود اولدقلى جهته بووقعه دن صكره افكار عموميه نك پوناپارته يه ميل وتوجهي ده زياده اولمش ونفوذ واستقلال ي بر مرتبه ده قوت بولمشدر .

اسپانيا قرالى اداره امور دن عاجز وطولاب اداره يي اله آلان باش وكيل دخي لياقتسز اولديغي حالده قراليجه نك علاقه كرده سي اولمق حسبه منفذ اولديغندن پوناپارته اسپانيا دولتي ايتيديكي كبي قوللانه بيله جك برحاله كتورش ايدوكندن بو ائنده اسپانيا ايله مكللمه كيريشهرك فرانسه دونماسي ايله اسپانيا دونماسي برلشديرو بده مالطيه ومصره امداد ايلمك اسبابنه تشبث ايتمشيدي واقد كرك باشلوجه ليمانلرندن كيملر استيجار ايدرك انواع مهمات و ذخائر تحمیل ايله اسكندريه يه كوندروب بونلرك برازی انگليز لر يدينه كچمش ايسه ده اكثر ي اسكندريه يه واصل اولمغله مصر الكاسنده بولنان فرانسه اردوسنه خيليدن خيلي قوت ويرمشدر .

پوناپارته مارنغو صحراننده ايكن اولقانو محاربه نك آثار و خيمه سندن بختله مصالحه يه دعوتى متضمن امپراطور ژوزفه بر نامه يازمشيدي بونامه ويانه يه واصل اولدقه امپراطور مقدما پوناپارته طرفدن تكليف اولنان مصالحه يي رد ايتسنده نصل غلط وخطا يلمش اولديغي اكلامش ايسه ده مارنغو محاربه سنده عسكرينك مغلوب ومنهزم اولديغي حوادثي آلديني كون انكلتره دولتدن ايكي بچق مليون ليرا اعانه قبول ايدرك مقابلنده ده ايدى آي مدت فرانسزلر ايله عقد مصالحه ايتماك اوزره بر عهد نامه

امضالمش بولندی . و بوجهته انکتره دولتسه مربوط بولندیفی حاله قلبا پوناپارته ایله عقد مصالحه آرزوسنه دوشدیکندن فصل صیفی مکله ایله چکور و بده موسم شتاده انکتره لو دخی برابر اوله رق بر مصالحه نامه تنظیم ایده بیلمک املنده بولمغله عقد اولسان متارکه مدتده تنظیم مواد مصالحه ضمنده پارسه مأمور مخصوص کوندرمش و فرانسه خارجیه نظری طایران ایله بالذا کره بعض مواد اساسیهی حاوی بر مقاوله نامه دخی تنظیم و امضا اولمش ایسه ده بواساسک قبولی انکتره دولتیاه منعقد اولان مقاوله یه مغایر اولدیغندن اوستریا دولتجه قبولی ممکن اولدیغنی جهته انکتره دولتی دخی برابر اولدیغنی حاله بر مجلس مکله کشاد اولمشی ایمپراطور طرفندن تکلیف اولدقدده پوناپارته بوکا دخی موافقت ایلمش ایسه ده لیمانلردن ابلو قه قالدیریلوب سفآن حربیه سر بستهجه استیلان محله کیده بیلمک اوزره بر متارکه بحر یه عقدینی شرط ایدوب حالبوکه انکلیر لرجه مالطه نك ضبط و تسخیری و فرانسرک مصر دن طرد و دفعی ماده لری اک مهم مسائلدن اولمسیله انکتره دولتک ایله بر متارکه بحر یه عقدینه یناشمی قابل اولدیغندن طرفینینه تدارکات حربیه باشلادی . مع مافیه اوستریا دولتی فرانسه ایله بر مذاکره یه دها کیرشمک ایستدیکندن مدت متارکه بر از تمدید اولنه رق ینه طرفیندن مرخصلر تعیینه قرار ویرلمشدر .

فرانسزک لرایتالیاده و المانیاده بروجه مشروح موجب استغراب اولان مظفر بتلری بتون اورویایه تأثیر ایدوب علی الخصوص اونه دنبرو بیطرفلق اصولنه رعایت ایدن پروسیا دولتی روش و قوعاته نظراً پوناپارته یه ارأئه روی توجه ایدرک رین نهرینک صولقیلرینه فرانسه نك متصرف اولمسنه ممانعت ایتمه جکنی وغرور و کبر ایله مالوف اولان اوستریا دولتک شکستیء نفوذندن ممنون اولدیغنی کتم ایتمز اولدی .

روسیه ایمپراطوری پاولو دخی بالاده بیان اولدیغنی اوزره عسکرینک ایتالیاده انهزامی اوزرینه اوستریا دولته کوجنوب بالطبع پوناپارته جانبه میل و توجه ایتمکه باشلامش ایدی . پوناپارته بودقیقه لره مطلع اولدیغنی کبی پاولوینی بتون بتون متفقلردن تفریق ایله کندو طرفته جلب ایتمک اوزره فرانسه ده موجود اولان اتی یدی بیك قدر روسیه اسیرلرینه روسیه البسه سی اکسا و سلاح و سنجاق اعطا و روسیه لولرک شجاعت و مردلکنی مدح و ثنا ایدرک جمله سنک بلا بدل رد و اعاده سنی پاولو یه عرض ایتدی . و بونلرک شمدی یه قدر اسارتده قالملری روسیه ده فرانسه اسراسی اولمیوب دول متفقه نك دخی روسیه اسیرلرینی بالمبادله استخلاصه همت ایتمدکلرندن نشئت ایلمش اولدیغنی اشعار یله بونلری پاولو یه بک کوزل صاودی .



برده مالطه آطه سی درت بش بیک قدر فرانسر عسکر یله محافظه اولنمقده ایسه ده انکلیزر بوراسنی صیق محاصره تحتسه آلوب کوندن کونه ذخیره لری آزالمقده اولدیغندن یقین وقته تسلیمه مجبور اوله جقلری امر مجزوم اولمسیله پوناپارته بونی پاولویه پشکس چککرك انکلتزه دولتیله آره سی بوزمغه نعم الوسیله اتخاذا ایلدی . شویله که : بالاده اشعار اولندیغنی اوزره قوالیرلر پاولوی کندیولرینه (غرمان متر) اتخاب ایلمش اولدقلرندن پوناپارته مادامکه سز قوالیرلرک رئیس اولدیکز مالطه آطه سنک حق تصرفی دخی سزه عأددر . مأمور کوندریکز مالطه یی تسلیم ایتسون دیو پاولویه خبر کوندرمشیدی .

وپاولو سبکسر بر ذات اولدیغندن بونلری تمامه دکلیوب هان فرانسه ده کی اسیرلری آلهرق پوناپارته یه تشکر ایتمک ولوجلر تسلیم مالطه یه کیتمک اوزره پارسه بر جنرال کوندر مکله بو جنرال پارسه کیدرک اسرای الوب پوناپارته یه عرض شکرانیت ایلدیکی ائنده یعنی اشبو اون بش سنه سی ربیع الآخر نده انکلیزر مالطه اطه سی ضبط و تسخیر ایتمشلر ایدی بونک اوزرینه پاولو انکلتزه دولتمدن مالطه یی ایستیوب بو ایسه انکلتزه لوجه قبول اولنور مواددن اولدیغنی جهتله جواب رد ویرلمسی اوزرینه پاولو غضبه کلوب روسیه لیمانلر نده اولان اوچ یوز قدر انکلیز کیلیرینی توقیف ایتدیرمشدر . بونک اوزرینه پوناپارته روسیه ایله فرانسه نک منفسخ اولان معاهده لیرینی تجدید ایده بیلمک اسبابنه تشبث ایلمشدر .

وبووجهه پوناپارته دول شمالیه یی جلب وتالیفه چالیشدیغنی ائنده انکلتزه لو آنلره متحکمانه معامله ایتمکده اولدیغندن آنلر دخی انکلتزه دن صوغومغه باشلامشلا ایدی زیرا اول عصرده حقوق ملل قواعدی شمیدیکی قدر معین ومحدود اولیوب بی طرف دولتلر یعنی پروسیا واسوج وداتیمارقه دولتلری تجارت بحریه لیرینی محافظه ایتمک اوزره برطالم حقوق اتخاذا ایدوب شویله که : ایکی دولت میانه سنده کی عداوت ومحاربه بی طرف دولتلرک معاملات تجاریه سنه سکتته ایراث ایده میه چکندن بی طرف دولت کیسی محارب اولان دولتلرک حقیقه وفعلا محاصره اولمش لیمانلرندن ماعدا کافه لیمانلره کیره بیلمک ویالکیز اساجه ومهمات حربیه نک اخذ واعطاسی ممنوع اولوب امتعه سائر سر بست اولمق وبکلک سفینه لریله محافظه اولنان کیلر بی طرف دولتلرک ممالکی حکمنده طوتیلوب محارب دولتلرک سفائن حربیه سی بونلری معاینه ایده مامک خصوصلیرینی اصول اتخاذا ایتمشلر ایدی . بو حقوقی فرانسه وروسیه دولتلری قبول ایدوب انکلتزه دولتی ایسه بونی بروجهه قبول ایتیمه نک بی طرف دولتلر کیلیرینی معاینه ودشمن لیماننده بولدیغنی حالده هر نه درلو امتعه یی حامل

اولور ایسه اولسون ضبط ایده جکنی اعلان ایتمش و موجبنجه حر کته قیام ایله مخالفت ایدنلر حقهده معاملات جبریہ اجراسنه باشلامش ایدی .

انکلتره دولتک بو مثللو اطوار متحکمانه سندن دول شمالیه منفعل اوله رق بیطرفلق حقوقک محافظه سی ایچون بینلرنده عقد رابطه اتفاق ایتمک لزومنی درمیان ایدوب پاولو دخی انکلتره لونک بو حرکاتندن روسیه تجارتنه عارض اوله جق زیانه مقابل روسیه ممالکنده موجود اولان انکلتره لو سرمایه لریک توقیفی امر ایتمکدن بشقه سائر دول شمالیه نک انکلیزلو حقهده اولان انفعالی عین فرصت اتخاذا ایدرک قترینه زماننده انکلتره یه قارشو پالمش اولان بیطرفلق اتفاق بحر یسنگ تجدید و تشدیدنی آنلره تکلیف ایتمکده اسوج ودانیمارقه دولتلری درحال قبول ایدرک بیطرفلق حقوقک محافظه سی ایچون لدی الاقتضا سلاح ایله بربرینه معاونت ایتمک اوزره پاولو ایله برعهده نامه امضا ایدوب متعاقباً روسیا دولتی دخی بو اتفاقه داخل اولمشیدی .

بناءً علی ذلك مقدا پاولو فرانسه علیه دولت علیه وانکلتره و اوستریا ایله عقد اتفاق ایدرک قره دکزده کی دونمائی در سعاده کلوب و دولت علیه دونمائیله برلکده قورقه یه کیدوب فرانسه علیهنده اعمال اولمقده ایکن بو ائنده دونمائیسنک عودتی امر ایتمکله مذکور دونمائیله اولی اوائلنده در سعاده کلره قوم قپو پیشکاهنده توقف ایله تعییناتی آلدقندن صکره قره دکزه عزیمت و عودت ایلمشدر .

بروجه مشروح دول شمالیه نک بیطرفلق اتفاقنی امضا و اعلان ایتملری علی العموم دول متحاربیه بر بیان نامه عمومی نشرندن عبارت اوله رق خصوصیت اوزره بر دولت علیهنده اولمدیغندن انکلتره دولتی بو قارشو سکوت ایتمیدی کندو حقهده بیطرف دولتلر طرفندن اعلان خصومت لازم کلزدی لکن حقیقت حالده بو اتفاقه هدف انکلتره دولتی اولدینی معلوم اولوب انکلیز مائی ایسه اوته دنبرو درکار اولان وقار و عظمتی حسابیه بو درلو معاملاتدن مسامحه و اغماض عین ایده میه رک همان بو بیطرفلق معاهده سنه جواب اولمق اوزره انکلیز لیمانلرنده تقدر روسیه و اسوج ودانیمارقه سفان تجاریه سی وار ایسه توقیف ایلمدیکنندن انکلتره دولتیله دول شمالیه آراسنده خصومت رونما اولدی . و پاولو درحال انکلتره علیهنده تدارکات جسمیه یه تشبث ایلدی وانکلتره ایله متفق اولان دولتلری دخی تهدیده باشلادی و برده قترینه نک هندستان حقهده اولان تصوراتی فعله کتوروبده انکلیزلری هنددن طرد ایلمک اوزره عجم ایچندن هندستانه سوق عسکر ایتمک قیدینه دوشوب بو خصوصک اسباب لازمه سنی استحصال و استحضاره اقدام و بورالری ایسه انکلتره دولته باعث اندیشه اولغله زبرده بیان اولنه جنی وجهله مستعد فساد اولان روسیه و کلاسنی

پترسبورگده کی (و پتورت) نام ایلیجیسی معرفتیه پاولو علیهنه تحریریکه قیام ایتمشدر . هندستان حقدنه روسیه لو طرفندن بیان اولنان تدایری و ناپلیونک اسئله سی اوزرینه در میان اولنان مطالعاتی حاوی لایحه مشروحه نك صورتی زبرده (۱۳) رقیله ایراد اولنور .

بالاده بیان اولدیغی اوزره ایمراتور ژوزف تکرار فرانسه ایله مکالمه یه قرار ویرمش ایدوکندن خلال جمادی الآخرده طرفین مرخصلری اجتماع ایتمشدر ایسه ده فرانسه مرخصی ابتدا اوستریا مرخصندن انکلتزه لو مداخله ایتمسه رك معاهده امضاسنه مأذونیمسین و معاهده یالکیز اوستریا نامه می اوله جق یوخسه بتون المانیا داخل اوله جقمی دیو سسؤال ایدیک اوستریا مرخصی انکلتزه لو داخل اولدیجه عهدنامه تنظیمنه صلاحیتی اولدیغی درمیان وایکنجی سؤالک جوابنده ییندن تعایمت جالبه محتاج اولدیغی بیان ایتمسبله مکالمه یه کیریشبله میوب مدت متارکه نك انقضاسنده جنکه ابتدار اولنه جنی پوناپارته طرفندن افاده اولنمی اوزرینه ایمراتور سر رشته مصالحه یی بتون بتون الدن چیقارما مق اوزره الك صوك برتدبیره قیام ایدوب شوپله که : شباط فرنگینک ابتداسنه یعنی اواسط رمضان قدر مخفی طوتلمق اوزره انکلتزه دن آبرو اوله رق عقد مصالحه اولنق و فقط مجلس مکالمه ده انکلیز مرخصی بولنوبده صورتا مواد مصالحه مذاکره اولدیغی حالده اصل عهد نامه کیز لوجه تنظیم قانمق صورتی پوناپارته یه تکلیف ایلمش ایسه ده بونی دخی پوناپارته رد ایتمکله چاره سز طرفندن حرکات حربیه یه تشبث اولنمشیدی . پوناپارته نك اوستریا یه قارشو مواقع متعدده ده اوچ یوز بیك عسکری اولوب اوستریا دولتنگ ایسه بوکا مقابل ایکی یوز یکرمی درت بیك قدر عسکری وار ایدی . محاربه ابتدا آلمانیا طرفنده باشلایوب خلال جمادی الآخرده واقع اولان جنگده اوستریا عسکرندن سکز بیکی تلف واون ایکی بیکی اسیر اوله رق اوستریا اردوسی منهزم اولدی و فرانسزلر یدینه برخیلی مهمات ایله سکسان یدی پاره طوب کچدی بوندنصرکه اوستریا اردوسنگ سائر قوللری دخی بوزیله رق اوستریانک آرتق طیامنغه مجالی قالمیجق ایمراتور ژوزف چاره سز انکلیز اتفافی ترک ایله منفرداً مصالحه یه قرار ویرمکله لونویل بلده سننده طرفین مرخصلری مکالمه یه بالابتدار تنظیم اولنان مصالحه نامه اشبو اون بش سنه سی رمضان شریفده امضا اولنمشدر . اشبو لونویل عهدنامه سنده اسویچره دن فلمنکه قدر رین نهرینک صوك یقه سی وبلجیقا قطعه سی وایتالیاده واقع میلان ایاتی وایتالیا ایله اسویچره اره سننده کی اراضی فرانسه یه قالمق ووندیک قلعه سی اوستریا یه ترک اولنه رق ایتالیا ده اویش

نهری اوستریا به حدود اعتبار ایدلمک و پو و طنسار و نهر لری کنار لری و ندیک دکزینه قدر فرانسه حمایه سنده اولان جزا لینا جمهورینه ترک اولنه رق اوستریا دولتی فلانک و اسوچرده و جزا لینا و جنوه جمهور لری به مصالحه ایتش اولمق و رین نهرینک صول طرفنده نمالکنی غائب ایتش اولان حکمداران به صاغ طرفندن زیان بدلی یرویرلمک خصوصاری مندر جدر .

بوصورتله پونا پارتته نیک برابر غائله سی قالمیوب نظر دقتی کاملاً انکلتزه طرفنه اماله ایلدی وانکلتزه لونک دول اوروپا ایچنده ناپولی و پورتکیز دولتلرندن بشقه متفق قالدیغندن پونا پارتته جنرال مورافرقه سنی ناپولی اوزرینه سوق ایدرک ناپولی قرالی فرانسه پولتیقه سنه موافق بر عهد نامه امضاسنه مجبور ایتدی و اسپانیا ایله اولان اتفاقیه توفیقاً بر محتاط فرقه عسکریه نیک پورتکیز اوزرینه سوقی مقرر ایدی . بونک اوزرینه انکلتزه دولتی قود بجزیه سنی مواقع مختلفه طاعتمه مجبور اولوب پونا پارتته دخی بونی فرصت اتخاذا ایله فرانسه و ایتالیا و اسپانیا و فلانک لیمانلرندن صغیر و کبیر بکلیک و تجار سفینه لرینه آچه و مهمات و انواع ما کولات تحمیل ایله مصره کوندرمکه باشلادی و اقعاً بونلرک خلیجه سی انکلیزلر دیدینه چکی ایسه ده بهر هفته اسکندریه به بر ایکی قطعه سی واصل اوله رق اوراده کی فرانسلر له موجب غیرت و تسلیمت اولوردی .

و مصره کی فرانسلر عسکرینک مقداری یکریمی التی بیک راده سنده اولوب طابورلرینک نقصانی روم و قبطی طائفه لر به سیاه کوله لر دن تدارک اولنان نقرات ایله اکیال اولتمقدله اولدیغندن و سواری آلایلری اوروپا تعلیمنه کوله من تعلیمی دخی علاوه ایدرک عرب آتلینه راکب اولوب طوپ طاقلری ایسه منتظم بولدیغندن و دودلی بلوکلر تعلیمه آلسدقلرندن فرانسلر بتون بتون مصری بنسه مش ایدیلر و جنرال عبدالله مناو صورتاً اسلامی قبول ایدرک بوصورتله اهل اسلامی اغفالله ایتدار ایدوب حتی تزوج ایتش اولدیغی بر اهل اسلام قزندن اشبو اون بش سنه سی شعباننده بر اوغلی اولمغه سید سلیمان دیو تسمیه ایدلمش و فرانسه رؤسانسک اخطاری اوزرینه کندوسنه مشایخ طرفندن تبریکنامه لر یازلمشیدی . و سردار اکرم بر مدتنبرو اکیال اسباب سفریه به اقدام ایتکده ایکن اقطار شامیه ده حط و غلا ظهوریه اهالی ییه جک بوله مز اولدقلرندن اطرافدن جلب اولنان عسکرک ایداره سی پک مشکل اولدیغی حالده بو حال مضایقه بی بر شدتلو طاعون خسته لغی تعقیب ایدرک اهالی و عسکریدن پک چوق کیمسه لر وفات ایتدی و اولطرفده بولنان امرای مصریه و کاشقلر دن اک مشهور جندیبلرک اکثری فوت

اولدی بو وجهله اردوی هایونه عظیم پریشانلق کلدی و بر آراق قبودان پاشا اردوی هایونه کیدرک و سردار اکرم ایله ملاقات ایدرک مصر اوزرینه حرکتی بینلرنده لدی المذاکره حسب الحال تصور اولتان حرکات بریه و بحریه نك اجراسنده صعوبت کورلمکله بر لکده مصر اوزرینه حرکت و هجومه قرار ویره مامشار ایدی قالدیکه قبودان پاشا اوته دنبرو فرانسه لو طرفه میال اولوب حتی سردار اکرم بوجهته کندوسنی اتهام ایتشیدی .

بناءً علیه قبودان پاشا سردار اکرمی سومیوب سردار اکرمک دخی اکا امنیتی یوغیدی فقط قبودان پاشا نزد شاهانه ده مقبل و مقبول اولوب حقنه سردار اکرمک نفوذی مؤثر و مثمر اوله مزدی ایشته بودخی متحدانه حرکته مانع ایدی . بناءً علیه قبودان پاشا برمدت مصر آچیقارنده اولطه اوروب هوالر سر تلشدیکی کبی دونمای هایون ایله درسعادته عودت ایتشیدی و ایام شتاده شدتلو فورتنه لر ظهوریله انکلیز لرك بلوقه یه مأمور اولان کیملری طاعلمغه مجبور اولدقلرندن پوناپارته بوآراقده اسکندریه یه بر مقدار عسکر و مهمات ایصال ایتک اوزره یدی قطعه قپاق و چند قطعه فرقتین و بر یقندن مرکب بردونما ایله امیرال غاظومی مأمور ایتمش ایسه ده غاظوم طوغری اسکندریه یه یول ویرمه که جسارت ایده میوب برمدت طولون لیمانده مکث و توقفدن صکره سار دنیا آطه سی سواحلنه طوغری کیتمشیدی بوآنساده انکلیز دولتی دخی انکلیز و المان و اسویجره و مالطیز نفراقی اوله رق اون سکز بیک عساکر بریه ترتیب ایله اسکندریه یه کیتمک اوزره یوله چیقارمش اولوب انجق فورتنه یه تصادف ایتدیکندن رادوس جزیره سنک قارشوسنده واقع مگری لیمانه کیروب آرام ایتمکده ایدیلر وبعده اسکندریه جانبنه روان اولدیلر انکلتره دولتی بوندن بشقه سویشه کلک اوزره هنددن دخی التی بیک عسکر ترتیب ایتمش ایدی . و قبودان پاشانک دخی دونمای هایون ایله اول جانبه حرکتی انکلیز لر طرفندن استعجال اولنمغله قبودان پاشا لوند چفتلککنده و اسکدارده تعلیم اولتان نظام جدید عسکر نندن وقلاع تسع یماقلرندن اوچ بیک قدر معلم عسکر و اوچ بشیوز قدر باشی بوزوق پیاده ایله براورته طویجی و یارم اورته عربه جی بی دونمای هایونه ارکاب ایله ماه شوالده اسکندریه جانبنه حرکت ایدوب و تپه دللی علی پاشا معرفتیه لحریر اولتان ایکی بیک ارناود عسکری دخی ارناودلق سواحلنده سفینه لره راکب اولوب کیتمش و بوآنساده بروجه مشروح اردوی هایونک ذخیره و سائر جه مضایقه سی برکال اولوب موجودی دخی اون بیک عسکر دن عبارت ایسه ده فرانسزلرک قوتی تفریق ایچون برأ دخی حرکت فرائض حالیه دن اولمسینه سردار اکرم ممکن اولدینی قدر تدارک

کوروب همان اواخر شوالده اردوی همایون ایله عرش طرفه حرکت ایتش ایدی .  
اون سکز بیک اوروپا عسکرینک عسکر اسلامیه ایله برلکده بولمسی مصرک  
امر استخلاصنی تسهیل ایده چکی درکار ایسهده قودان پاشانک انکلیزلره امنیتی  
اولیوب شایدکه مصری ضبط ایتدکرنده دولت علیه یه ویرمامک طمعنه دوشرلر  
دیو اندیشه ناک ایدی حالبوکه بالاده اشعار اولندیغی اوزره سردار اکرم دخی  
ذاتنجه آندن امین دکل ایدی .

بروجه بالا دول اوروپانک اکثری پونا پارتیه ایله اتفاق ایدرک انکلتره دولتی یالکز  
قالدینی حالده انکلتره ده برعظیم قحط وغلا ظهور ایتمکله انکلتره اهالیسی زیاده  
صیقیلوب بو احوال مکدره نکل ظهوری باش وکیل بولنان مشهور پیتک تعدینه  
وسوء تدبیرینه حمل اولمغله بواننده مشار ایله استعفا ایدرک یرینه موسیو ( آدنیقطنون )  
باش وکیل اولمشیدی مع مافیه انکلتره دولتی محاربه دن کیرو طور میوب امیرال  
پارکرونلسون قومانداسیله بحر بالطفه قرق یدی پاره سفینه دن مرکب بردونما  
کوندرمشیدی ابتدا دانیارقه دولته دول شمالیه اتفاقدن آیرلمسی تکلیف اولندقه  
ردایله جواب ویردیکندن انکلیز دوتناسی حربا صوند بوغازندن دخول ودانیارقه نکل  
بای تختی اولان قوپنهاکه وصول ایله برخیلی حرب وخسارت وقوعندن صکره  
دانیارقه یی انکلتره پولتیقه سنه موافق بر معاهده نامه امضاسنه مجبور ایتدیکی وقت  
روسیه امپراطوری پاولونک اعدامی خبری قوپنهاکه واصل اولمغله دانیارقه نکل  
انکلتره دن اخذ انتقام داعیه سی دخی بر طرف اولدی .

چونکه پاولو غایت تیز و تیتیز وهر خصوصه افراط اوزره شدت انکلیز اولوب  
بو اخلاق ایسه عامه حقنده وعلی الخصوص استقلال اوزره حکومت ایدن حکمداران  
حقارنده نتیج ندامت ووخامت اوله کلشدرایشته پاولو دخی بویولده اعدام اولمشدر .  
شویله که : کندوسنک بو طور و مزاجندن ناشی بتون پترسبوغ اهالیسی متوحش  
واندیشه ناک اولوب واک زیاده مقرب و محرم اسراری اولنلر بیله کندوسندن امین  
اوله میوب سبره نفی اولمق قورقوسمی خاطر لرنده مستقر ایدی پاولو ایتدالری  
فرانسه جمهوری حقنده فوق العاده اظهار خصومت ایتمشیکن صکره موجب تعجب  
اوله جق صورتلره تبدیل افکار ایدرک پونا پارتیه میل و توجه خصوصنده دخی  
سراینک هر او طه سنه تصویرینی تعلیق ایتمک و رسمی ضیافتلرده عشقنه شراب  
ایچمک کبی صورتلره زیاده افراط ایدر اولدی وانکلتره یه اعلان حرب ایتسی  
روسیه اصلزاده کاننک چفتلکاتی محصولاتنک سورمنه مانع و عظیم ضرر وخسار لرینی  
موجب اولدیغندن جمله سی دلکیر اولدقلری حالده پاولو کیتدکجه اطوار غدارانه

و خود سرانه بی تزیید و پترسبورغده کی انکلیز ایلچیسی بو حالاتی فرصت آنخاذا  
ایدوب مستعد فساد اولان روسیه وکلاسنی تحریک ایله پاولو حقنده اولان انفعاللری  
تشدید ایتکین پاولوی خلع ایله اوغلی علیکساندری بی اجلاس ایتمک اوزره بینلرنده  
قرار و یروب آنچه و مواعید ایله وکلادن و سائر دن وافر طرفدارلر پیدا ایتدکری  
ائتاده ایچلرندن پاولونک محرم اسراری و پترسبورغ والیسی و پولس ناظری اولان  
قونت پاهان دخی عرض صداقت یوزنده پاولونک صادق و خیر خواهی اولان  
کیسه لری غمز و نفاق ایله خدمتدن طرد و کندوسنک مخالفی اولان باش و کیلی  
دخی عزل ایتدیردکن صکره یکر می قدر متفقلر برلشوب مارت فر نیکنک یکر می  
اوچنجی کیجه سی نصف الیلده سرایه ورود و شهرده حریق وار دیوایمپراطورک  
دائرهنه دخول ایله ایمپراطور لقدن قصر یدی متضمن مقدمه قلمه آلمش اولدقلری  
استغفانامه نک امضاسنی پاولویه تکلیف ایتدکلرنده رد ایله جواب قطعی و یردیکندن  
آنلر دخی اوزرینه اوشوندی ایدرک اعدام ایله یرینه اوغلی علیکساندری بی اجلاس  
ایتمشدر بووقه نک اوروپا پوتلیقه سنه عظیم تأثیری اولمشدر .

بو ائتاده روسیه نک در سعادت ایلچیسی اسوچ ایلچیسی استحصاب ایله سلیمانیه جامع  
شرفی کورمک اوزره کیدوب طول و عرضی مساحه ایتدیردیکی ائتاده عادت فر نکانه  
اوزره کیدوب توکورمش اوراده بولنان بعض طلبه ایسه بونی بر نوع اهانت مخصوصه یه  
حمل ایله غضبناک اوله رق همان الفاظ درشت و ضرب سله و مشت ایله کرک ایلچی بی  
و کرک معیتده بولنانلری سوروب جامعدن چیقارمشلر بو ائتاده ایسه پاولو مقدمه  
متفق اولان انکلتره لو علیه نه اعلان حرب ایدرک بو باده کندوسیه له اتفاق ایتیمان  
دولتلی تهدید ایله بیطرف طور انلره دخی اعلان حرب ایتمک اوزره بهانه آرا مقدمه  
اولدیغندن و دولت علیه دخی بو او ائده فرانسه محاربه سیله مشغول اوله رق انکلتره  
دولتنک اتقاقی ترک ایده میه جکی کبی روسیه دولتک عداوت و خصومتدن دخی  
متحاشی بولندیغندن بو کیفیت باب عالیجه زیاده تلاشی موجب اولدیغنه منی بو عریبه یه  
سبب اولان طلبه در حال طوتیلوب کیمی ضرب و کیمی نفی ایله روسیه سفارتنه  
ترضیه لازمه اعطا اولمشدر بو هنکامده ایسه بروجه مشروح پاولونک اعدامی  
وقوع بوله رق پوتلیقه دوله خیلدن خیلی تغیر و تبدل ایتمشیدی .

پاولونک بروجه مشروح وفاتی بیطرفلق اتقاقه ضعف و خلال و پونا پارتیه نک انکلتره لو  
اوزرینه مسلط ایتمش اولدیغنی دولتله قنور و کسل کتوروب مع مافیه انکلیزلر  
دخی بونجه و قندنبرو متمد اولان محاربه غوائلندن اوصانه رق مصالحه آرزو سنده  
بولندقلرندن لوندره ده فرانسه مرخصی موسیو اوتو ایله مکالمه مواد مصالحیه

کیریشلمش ایسه ده انکلتره لو بحرأ و فرانسه لو برأ غالب مطلق اوله رق هربری غالبانه عقد مصالحه املنده بولندقلری جهته طرفینک آرزولرینی برلشدیرمک پک مشکل و علی الخصوص فرانسزلر بر مصالحه عقد اولوبده بو وسیله ایله مصر الکاسی الرانده قالمق طمعنده اولوب انکلتره لونک بوکاموافقتی ایسه ممکن دکل ایدی بناءً علیه مکالمه جریان ایتمکه برابر محاربه یه دوام اوله رق ایکی طرف دخی سیف ایله حل مشکل ایتک اوزره روش وقوعاته انتظار اوزره ایدیلر .

موسیو تیرک تحرینه نظراً انکلیز دوئمناسنده موجود اولان اون سکنز بیک عسکره هنددن کله جک التی بیک عسا کر هندیه ایله قبودان پاشا معیتنده کی التی بیک ارناود عسکری و صدر اعظم معیتنده کی اون بیک عسکر و بیکرمی بیک باشی بوزوق عسا کر عثمانیه علاوه اولندیغی حالدہ مجموعی التمش بیکه بالغ اولمق لازم کلور .

معلم نیقوله دیرکه سردار اکرم اردوسیه هنددن کله جک عسکر دن بشقه اوله رق مصره هجوم ایدن عثمانلو وانکلیز عسا کرینک مجموعی اوتوز بش بیک ایدی .

بالاده دخی اشعار اولندیغی اوزره انکلیز دوئمناسنده کی عسکرله هنددن کله جک عسکرک مجموعی بیکرمی درت بیک اولوب دوئمنای هایونده موجود اولان اوچ بیک معلم عسکر دن بشقه بر قاج یوز باشی بوزوق پیساده ایله ایکی بیک قدر ارناود عسکری و بر مقدار طویچی و عربه جی نفراتی وار ایدیکه بونلرک مجموعی نهایت التی بیکه بالغ اوله بیلوردی و سردار اکرم معیتنده کی اون بیک نفر بونلره علاوه اولندقدہ جمله سی قرق بیک نفره بالغ اولمزدی بونلر دن بشقه اوله رق مراتب اولان باشی بوزوق عسا کر عثمانیه نک مقداری ایسه کرکی کبی معلوم دکلر هر نه ایسه دولتین متقیننک ترتیباتی مصرده کی فرانسزلرک ایکی قاتی یا خود ده ازیاده اولمق کرک ایدی فقط بونلرک چونغی معلم و منتظم اولیوب معلم اولنلر دخی ملل مختلفه دن مرکب و مخلوط ایدی فرانسزلر ایسه الرانده کی قلعه لرک محافظه سنه بر مقدار مستحفظ بر اقدقدنصره اون سکنز بیک قدر کنزیده و جنکاور عسکر دن مرکب بر اردو سوق ایده بیلور لردی بویه پیشکین و یک وجود اولان بر فرانسز اردوسی ایسه کیندوسندن عددجه بر قاج قات زیاده اولان عسکره مقابله و مدافعه ایده بیله جکی امثال سابقه سیله مثبت اولدیغندن و کوله منسارک بر طاقی دخی فرانسه جنراللری عدادینه ملحق اولان مراد بک معیتنده بولندیغندن فرانسزلر ایتدالری دولتینک بوترتیباتندن او قدر تلاش ایتدکلرندن بشقه بروجه بالا امیرال غانطوم ایله کوندر دکاری تازه عسکرک اسکندر یه یه وصولنده غلبه ایتک امید قویسنده ایدیلر .

معلم نیقوله تاریخنده دیرکه : اون بش سنه سی صفر نندن شواله قدر سکنز آی ظرفده



مصرده بر حرکت اولیوب بومدت سکون واستراحت اوزره مرور ایتدی ورمضانک  
سکزنجی کونی وسط نهاردده شمس ایله قر برلکده ظهور ایتدی و نیرین یعنی  
شمس وقر ظاهر و تابان اولدقلمری حالده قمرک قربنده دخی آتش کبی پارلار ییلدیزلر  
وار ایدی ایشته اهل جفر طرفدن (اذا ظهر النیران بمیقات واحد یلطف الله  
باهل الکنیایة) یعنی شمس ایله قر بروقتده ظهور ایتدکده الله تعالی اهل مصره لطف  
ایدر دیوسویلنلمش اولان کلامک سری ظاهر اولدی و خلال شوالده انکلیز دو نملسی  
اسکندریه پیشکاهنده کورنمکله محافظ بولنان جنرال فریبان تلاشه دوشه رک سرعسکر  
منویه اعلام حال ایله استمداد ایلدی .

انکلیز دو نملسی اسکندریه پیشکاهنه کلدکده استحکاماتک قوت وجسامتنه نظراً  
اورایه یناشه میوب وهو الپک سرت اولدیغندن چند روز روز کارک سکوننه انتظار  
ایله دکزده اولطه اوروب شوالک اواخرینه مصادف اولا بیک سکز بوز برسنه  
میلا دیه سی مارت فر نکیسنک سکزنجی کونی ابوخور لیمانه یناشوب اوچ یوزیکرمی  
قطعه صداله بش بیک عسکر وضع وایکی طرفلی طوب صدالریله محافظه اولنه رق  
قره یه چیقارلمشدر .

جنرال فریبان بیک بشیوز نفر ایله مدافعه یه قیام وانکلیزلر اوزرینه هجوم واقتمحام  
ایتمش ایسه ده صدالر قره یه طوقنور طوقمز انکلیزلر طیشارو فر لایوب وهان  
قومسال اوزرنده صاف باغلیوب اطرافه یاییلمغه باشلامشدر وفرانسزلر تقدر شدتلو  
هجوم ایتمشدر ایسه انکلیزلر دخی او قدر ثبات کوسستردکارندن فرانسز برخیلی  
تلفات ویردکن صکره منهزما رجعته مجبور اولمشدر .

رحمانیه ده بولنان فرانسزلر جنرالی لانول انکلیزلرک ابوخوره چیققلریخی ایشدیکی  
کبی موجود معیتی اولان اوچ بیک عسکرله اسکندریه طرفنه عزیمت و جنرال فریبان  
دخی قره غولارده کی عسکری جمع وموجودینی ایکی بیکه ابلاغ ایله ایکسینک موجودی  
بش بیکه بالغ اولدیغی حالده اون سکز بیک نفره بالغ اولان انکلیز اردوسی اوزرینه  
هجومه جسارت ایدرک ماده یولنده واقع تپلری طوتوب انکلیزلرک ورو دینه  
منتظر اولمشدر ایدی انکلیز اردوسنک صول قولی ایسه ماده طریقیله حرکت ایدوب  
ماده کولدن طوب صدالریله محافظه اولنه رق ایلروله مکده اولدیغی حالده اورته  
قولی فرانسز آتلوسندن تحفظ ضمننده مربع الشکل اوله رق حرکت ایتمکده وصاغ  
قولی دکز طرفنده کی جاده ایله یورییوب بوکادخی برطاقم طوب صدالری رفاقت  
ایلمکده ایدی جنرال لانوس انکلیز اردوسنک اک ایلروده بولنال صول قولی کوله  
دو کمک طمع خامیله هجوم ایتدیکی صره ده ناکاه اورته قول ظهور ایدمچک لانوس

مناوره بی تبدیل واورته قول اوزرینه هجوم ایله جنکه طوئش دینی ائنهاده انکلیز اردوسنک صاغ قولی بئشمکه لانوس کیرو چکلمکه مجبور اولدینی کبی اولا اکاباقرق اووه یه اینوبده صاغقول اوزرینه حرکت ایتمش اولان جنرال فریبان دخی رجعت ایتشدر بو محاربه ده طرفیندن واقع اولان تلفاتک مجموعی ایکی بیگ قدر ایدی .

سرعسکر منورینه جنرال بلیاری قائم مقام نصب ایله مصرده براغوب کندوسی بش بیگ عسکرله حرکت واولل ذی القعدة ده اسکندریه یه مواصلت ایله حقیقت حاله مطلع اولدقده بر دیوان حرب تشکیل ایدرک لدی الاستشاره ویریلان قرار موجبنجه مارت فر نکینگ یکر می برنده فرانسه عساکری اون بیگ نفر دن عبارت اولدینی حاله انکلیزلر اوزرینه هجوم ایتشله ایه ده غلبه ایده میوب ایکی بیگ نفر یله جنرال لانوس و جنرال اورواز تلف و دیگر اوچ جنرال دخی مجروح اوله رق مغلوبانه رجعت مجبور اولمشدر . بو محاربه ده انکلیزلرک دخی بر جنرال ایله ایکی بیگ قدر عسکر لری تلف اولمشدر .

بونک اوزرینه جنرال منو اسکندریه ده تحصن ایدوب فقط رشید طرفدن امین اولمق اوزره رحمانیه ده مریسلر انشا ایتدیره رک اوراده دخی بر فرقه عسکر یه براقش ایدی . انکلیزلر دخی اسکندریه استحکاماتی اوزرینه هجومه جسارت ایده میوب حصر و تضییق ایله ضبط واستخلاص صورتی بالتزجیح اسباب محاصره بی اجمال ایچون (مادیه) کولنی یاری قوریش اولان ماریوتیس کولنه آتقمق اوزره بو ایکی کول اراسنده واقع اولوب رحمانیه دن اسکندریه یه کیدن جدول نیلک سد و بندلرینی کسیدیلر و اگر چه مادیه کولنک ماریوتیس کولنه نسبتله طقوز قدم ارتفاعی اولدیغدن ماریوتیس کولنک طولسی ایچه و قته محتاج اوله رق بو وجهه انکلیزلر بر آئی قدر وقت ضایع ایتدیلر ایه ده نهایت بو ایکی کول برلشدیکی کبی اسکندریه بی طوب صندالریه تضییقه مبادرت ایتدکلر ندن بشقه اسکندریه نک یالکر عجمی طرفی آجیق قالب مؤخر آ طوب صندالریه عسکر وضع واولطرفه اخراج ایله مرابط قاهسنی احاطه و تضییق ایدرک اول جهتی دخی محاصره ایله اسکندریه نک هر طرفدن طریق مخبره سنی قطع ایلمشدر .

عجمی اسکندریه نک اتی میل بحری طرف غریبسنده و مرابط قله سنک بولندینی آطه نک قارشوسنده واقع بر دیلر .

انکلیزلرک اولوجهه اسکندریه بی محاصره یه مبادرت ایلدکلری ائنهاده قپودان پاشا دخی کبیر و صغیر یتش پاره سفینه ایله ابوخور سواحله کله رک قره یه اخراج ایلدیکی اتی بیگ عساکر اسلامیه اوزرینه کتخداسی خسرواغالی باشبوغ نصب ایدوب

بوناره بر مقدار انگلیز عسکری دخی ترفیق ایله رشید اوزرینه سوق اولمشلرایدی .  
اشبو خسر و اغا حسین پاشا ایله برلکده اندرون هایوندن چیقوب جزیره لو  
وجندیلکده ماهر بر مرد دلیر اوله رق حسین پاشا آتی کندوسنه کتخدا ایتشیدی .  
زیرده بیان اولنه جفی وجهه متعاقباً مصر والیسی اولوب وبعده مدت مدیده وزارتله  
دور مناصب ایدوب پک چوق معمر اوله رق سلطان محمود خان ثانی عصرنده  
قپودان دریا و سرعسکر و جلوس عبد الحمید خانیده صدر اعظم اولمشدر .

خسر و اغا ابتدا لوند چفتلکی طاقندن صول قول اغاسی عبدالله اغایی بر مقدار نظام  
جدید نقراتی و بر از انگلیز عسکری ایله برأ رشید اوزرینه سوق و ارسال ورشید  
بوغازینه دخی اون قطعه شالوپه ادخال ایله رشیدک تسلیمی فرانسزلره تکلیف  
ایتدکده متهورانه جواب رد ویرملری اوزرینه برأ و نهرأ طوب و خمبره ایله درت  
کون علی التوالی تضییق اوله رق فرانسزلرک آرتق ثبات و مقاومته اقتدارلری  
قالمدیغندن تسلیمه مجبور اولملریله اوائل ذی الحجده رشید قلعه سی ضبط اوله رق  
مستحفظ بولان عساکر فرانسویه کافه انگلیز دونماسنه نقل اولمشلردر .

بو وجهه رشیدک ضبطندن صکره برأ و نهرأ یوقاری طوغری حرکت ایچون یوللر  
آچیلمش اولدیغندن قپودان پاشا و انگلیز جنرالی هان رحمانیه اوزرینه حرکت ایله  
ذی الحجده نیک یکرمی بشنجی کونی رحمانیه به بر ساعت مسافه سی اولان فوه نام  
قریه به مواصلتلرنده فرانسزلر قارشولیوب عساکر متفقه اوزرینه شدتلو بر هجوم  
ایدرک بر قاج ساعت تمتد اولان محاربه خونریزانه ده عساکر اسلامیه دن بشیوز قدر  
و انگلیزلردن دخی برخیلی تلف و مجروح اولوب انجق فرانسزلرک پک چوق تلفاتی  
اوله رق بقیه السیوفی منهزماً رجعت ایتدکلری ائنده ظلام شب کندولرینی ستر  
ایتمکله هان مصره طوغری قاچوب قور تلمشدر .

فرداسی رحمانیه قصبه سنده تحصن ایدوب قالانلر استیان ایتمکله آنلره دخی امان  
ویریه رک رحمانیه قصبه سی تسخیر و درووننده بولسان خیلی طوب و مهمات اخذ  
و ضبط اولندقدن صکره مصره طوغری حرکت اولمشدر .

ایشته بو ائنده سردار اکرم دخی اردوی هایون ایله نیک صاغ طرفندن مصره  
طوغری یوریمکده اولوب شویله که : میر میراندن طاهر پاشا چرخه جی و وزیر  
محمد پاشا سرعسکر نصب اوله رق طاهر پاشا ایلروده و محمد پاشا آنک آرقه سنده  
و سردار اکرم اک کیروده اولمق اوزره علی الترتیب حرکت ایتمکده ایدیلر و جنرال  
بلیار اولجه صالحیه ایله بلیسی تخلیه ایتش اولدیغندن خلال ذی الحجده ده سردار  
اکرم دخی بلیسه کلشیدی .

چونکه بالاده بیان اولدیغی اوزره سرعسکر عبدالله منو اسکندریه به حرکت ایتدیکنده مصرده طوپلو بولنق اوزره اطرافده متفرق اولان فرانسر عسکرینک طوپلانسی امر ایلمش اولدیغندن یرینه قائم مقام اولان جنرال بلیار کرک صعید ایچنده و کرک بلیس طرفده کی عسکری جمع ایتمشیدی بناء علیه سردار اکرم بلامانع بلیسه قدر ککش واردوی هایونک بو قدر مصره تقر بنده دخی جواردی بولنان قری اهالیسی وعشار عربان هپ سلاحنه رق فرانسرلر علیه قیام ایتش ایدی وعبدالله منونک اسکندریه طرفه حرکتده فرانسر ضابطان ومأمورینی تالاشه دوشه رک درون مصرده وجیزده اولان قوناقلردن خروج ایله قلعه واستحکاماته دخول ایدوب آنلرک بویه تالاش کوسترملری ایسه انظار عامه ده ضعف ومغلوبیتلرینه دلالت ایتکله اهالی مصر دخی سرکشکه قیام ایتشلر ایدی حال بومونوال اوزره ایکن مصرده طاعون ظهور ایله یرلودن وفرانسزلردن پیدر پی تلفات کثیره وقوعی فرانسز لری بر مرتبه ده شاشر تمشیدی .

عسکرک مجتمع بولمنسی فن حرب قواعدی اقتضاسندن اولدیغنه منی جنرال منو اسکندریه به عزیمتده متفرق عسکرک بروجه مشروح مصرده مجتمع اولسنی تنیه ایتش وجنرال بلیار دخی اکا توفیق حرکت ایدرک اطرافده کی عسکری هپ مصره جمع ایلمش ایدی وبروجه بالارشید ایله رحمانیه ضبط اولدقدن صکره فرانسر عساکری ایکی محله مجتمع اولوب قالدی انجق بونک برطاقی سرعسکر منو معیتله اسکندریه ده محصور اولوب بر طرفله مخبره ایده مزیدی ودیکر فرقه سی دخی مصرده مجتمع اولدق لری حالده وجه مشروح اوزره یأس وفتوره دوچار اولشلر ایدی . بناء علیه جنرال بلیار مراد بکی دعوت ایدوب اودخی مصره کلور کن ذی الحججه نک دردنجی کونی مطعونا صنهاجده وفات ایلدی .

میر مشار الیه ابو الذهب محمد بکک کوله لر ندر محمد بک آنی بیک یوز سکان ایکی سنه سنده بیوک صالح بکک وفاقی کونی اشتر ایدرک چوق کچمکسزین اعتاق ایله امرا سلکینه ادخال واقرائی اوزرینه تقدیم ایتمشیدی آنک اوزرینه صالح بکک زوجهمی ست فاطمه بیی زوج وانک جسم قوناغنده اقامت ایله صاحب دارات وحشمت اولوب بعده علی بکک وفاتنده آنک زوجهمی خیر ایله مذکوره ومشهوره اولان ست نفیسه بیی دخی زوج ایلدی ابو الذهب محمد بک امارت مصرده کسب استقلال ایتدکده امراسنک اکبری ابراهیم بک ایله صاحب ترجمه مراد بک اولدیغندن ابو الذهب طاهر عمر اوزرینه حرکت ایتدیکنده ابراهیم بکی مصرده یرینه قائم مقام براغوب مراد بکی برابر کتوز مشیدی ابو الذهب عکاده وفات ایدوب اوراده بولنان

امرانك اتفاقيله مراد بك رياسته انتخاب اولنمغله مصر اردوسنى آلوب مصره  
كديكندنه ابوالذهب محمد بكك امراسى اجتماع و مشاوره ايدرك اقدليلرينك استخلاف  
ايلمش اولدينى ابراهيم بكى صاحب تدبير و تمكين اولدينى اجلدن شيخ البلدلكه  
انتخاب ايتمشل ايدى انحق مراد بك دائماً كندوسنه شريك نفوذ اوله رق واردات  
مصريه نك ياريسنى و بللكه ده از ياده سنى كندو طرفه حصر و تخصيص ايتمشدى  
و متعدد قصرلر و بفقچلر تنظيم ايليه رك اكلنجه سيابه مشغول اولوب جزائرى غازى  
حسن پاشانك مصره و رودنده صعيده صعود ايله درت سنه او طرفه اقامت  
ايتدكن صكره تكرار كلوب مصرده اسكى حالى كسب ايتدى و صكره لرى چيزه ده  
ترسانه ياپوب سفان ميريه انشا ايتدى و بوسفينه لره نصاراي رومدن برچوق  
قاليونجى ترتيب ايله اوزرلرينه دخى نيقولا نامنده بررومى رئيس نصب ايدرك  
اكاك چوق نفوذ و حيثيت و يردى و صكره لرى كرك اهل اسلام و كرك افرنج  
تجارى حقتنده بك زياده ظلم و تعدى ايدر اولوب فرانسلرك مصر اوزرينه  
حركتلرينه بر سبب دخى آنك فرانسه تجارى حقتنده واقع اولان تعدياى ايدى  
پوناپارته چيزه يى ضبط ايتدكده آنك اوراده ادخار ايتمش اولدينى مهمات و لوازمات  
لا تحصى هپ فرانسلر يدينه كچدى و قاليونجيلرينك چوغى فرانسه خدمت عسكريه سنه  
كردى و پوناپارته مصرى ضبط ايتدكده كندوسى صعيد ايجنه چكيلوب بعده  
سردار اكرم ايله اردوى هايون ايله مصر اوزرينه حركت ايتدكده او دخى اردوى هايونه  
كله رك سردار اكرم ملاقات ايتدى ايسه ده واقع اولان محاربه ده سيرجى كچي طوروب  
اردوى هايونك رجعتنده فرانسلره عرض تبعيت ايله دولت و ملتته اعلان اهانت  
ايتدى بوكره بوجه مشروح جنرال بليار بك زياده صيقلوب كندوسنى مصره  
دعوت ايتمكله برمنوال سابق اثنائى راهده وفات ايله دار مجازاته كيتدى ايام  
حياتنده دولت و ملتته وفاتندن اعلى خدمتى سبق ايتماشدر حين وفاتنده ممالكنى  
جمعله جمله سنك اوزرينه كوله سى طنبورجى عثمان بكى رئيس نصب ايدوب خزينه سنى  
دخى ديكر مملوكى برديسى عثمان بكه تسليم و يكديكر بيله متحد اوله رق جمله سى بيوك  
ابراهيم بكك اطاعتنده بولملىرى نصيت ايتمش ايدى فرانسلر دخى عثمان بكك  
رياستنى تصديق ايتديلر ايسه ده عثمان بك صعيده بولندينى حالده معنى سردار  
اكرم معيتنده بولنان مشار ايله ابراهيم بكه مربوط اوله رق فرانسلرك مامولى  
وجهله كندولرينه خدمت ايتيوب بالعكس غيرت اسلاميه سنى اظهار ايله اردوى  
هايونه معاونت قيدنده بولنمشدر بناء عليه صعيد ايجنده بولنان كوله منلر  
دخى برتقريبه رشيد طرفه اينوب قبودان پاشا ايله ملاقات و عثمانلو عسكريه اتحاد  
وانكليلر ايله اختلاط ايدرك جمله فرانسلر عليه ده حر كته قيام ايتمشلدر .

وجه مشروح اوزره فرانسزلر هرجهته یأس وقتوره دوچار اولوب فقط مقدمجه امیرال غانطومک تازه عسکرله مصره کلک اوزره طولوندن چیقمش اولدیغنی استخبار ایلدکلرندن برمدت بونکله متسلی اولمشلردر امیرال غانطوم ایسه فی الواقع واسط ذی القعدهده طولوندن حرکت ایلدی ایسهده ساردنیا آطه سنک قار بونارا بروننده معینده کی قباقلردن ایکیسی بربرینه چاتوب سقطلانداقلردن دونماسیله طولونه عودت ایتمش ایدی مصر واسکندریهده کی فرانسزلر بوندن بی خبر اوله رق کاه امیرال غانطوم کله جک دیو امید امداد ایله کندولرینه تسلیت ویررلر وکاه قطع قطع امید ایله یأسه دوشرلر ایدی .

وامیرال غانطوم بروجه بالا سقطلامش اولان ایکی قباغنی تعمیر ایتدکلر صکره پونا یارته نک زوریله تکرار طولوندن حرکت ایله جانب اسکندریهده عزیمت ایلدیکی ائساده طائفه لرنده بر علت ساریه پیدا اولغله دونماسنی ایکییه بولوب خسته لرینی اوچ قطعه قباغه وضع ایله طولونه اعاده ایتدکلر صکره باقی سفینه لرنده ایکی بیک قدر عسکر موجود اولدیغنی حالده اسکندریه جانبه یول ویرروب انجق انکلیزلردن خوفله طوغری اسکندریه لیمانه وارمغه جسارت ایدهمدیکندن درنه لیمانه ورود ایله عسکرینی اورایه چیقاروبده آنچه ایله عربلری اطماع ایدرک اسکندریهده نقل وایصال ایلمک املیه عسکرلی فلیقه لره وضع ایله قرهیه چیقارمغه باشلامش ایسهده فلیقه لر قرهیه یناشور یناشمز اهالی فرانسزلر اوزرینه شدتلو آتش ایتمکه باشلادقلرندن اگر حرباً درنه بی ضبط ایدوبده جبراً عسکرینی اسکندریهده نقل ایده جک اولسه اورایه نهایت نصفی کوچ حال ایله ایصال ایده بیله جکنه وآچیقده انکلیز دونماسی دخی مشاهده اولدیغنه مبنی همان فلیقه لرینی کیرو آلوب وتیمور خلاطلرینی کسوب ینه طولونه عودت ایتمک اوزره دکزه آچلمشیدی ائسای راهده تصادف ایتدیکی انکلیز بکلککری طرفدن اخذ وضبط اولمشدر اشته بوجهته امیرال غانطوم ایفای مأموریتیه موفق اوله مامشدر لکن اولسه دخی بروجه مشروح رحمانیه ضبطه فرانسه اردوسی ایکییه تقسیم ایدلمش اولدیغندن غانطومک اسکندریهده کتوره جکی ایکی بیک نفر ایله برایش کوریه مز ایدی .

فرانسزلرک برتسلیسی دخی بوایدی که روسیه امپراطوری پاولو فرانسه جمهوریهه اتفاق ایدوب حتی سلطان سلیمه فرانسه محاربه سنندن کفید ایلمسنی وایلمز ایسه کندوسی دخی استانبول اوزرینه یورویه جکنی یازمش اولدیغندن دولت علیه نک مصر سفرندن فراغت ایتسی لازم کلدیکی پونا یارته طرفندن یازلمش

اولدینی مقدا جنرال منو طرفدن اعلان اولمش ایدوکنه مبنی عساگر اسلامیه فرانسزلر اوزرینه آرتق تفنک آه مز دیو مصر طرفده برزعم باطل پیدا ولمشیدی .  
 حالبوکه بوئانده پاولونک وقوع وفاتیه اوروپا پولتیقه سی تغیر وتبدل ایتمشیدی .

(وقایع سنه ۱۲۱۶)

بالاده اشعار اولدینی اوزره قبودان دریا حسین پاشا برفرقه انکلیز عسگریه برابر رحمانیه بی بعدالتسخیر مصره طوغری حرکت ومصره اون سکنر ساعت مسافه سی اولان پنکلی قریه سنه مواصلت ایله غره غرای محرم اولان پنچشنبه کونی اورادن دخی قیام ایله ایلرو حرکت اولمش ایدی . مصر قائمقامی جنرال بلیار رحمانیه نك ضبط اولدیغندن بی خبر اوله رق امداد ایچون رحمانیه به کوندرمش اولدینی برفرقه عسگریه یوم مرقومده قبودان دریا اردوسنک قره غوللرینه تصادف ایله درحال جنکه مباشرت اولنوب کیفیت قبودان پاشانک معلومی اولیجق هان طولو صداللر ایله ایجه دونمائی ایلرویه سوق ایتدکن صکره بالذات موقع حربه حاضر اوله رق عساگر اسلامیه بی جنکه تشویق ایدوب دائره سی خلقندن اوتوز قدری شهید وبر اوقدری دخی مجروح اولمش ایسه ده فرانسزلر بتون بتون منہزم اوله رق یتمش قدری تلف وایکی یوز مقداری ضابطلر ایله برابر اسیر اولوب اون یدی قطعه جریمه محمول مهمات وادواتلری دخی ضبط اولمشدر وبواسیرلر دخی انکلیزلویه تسلیم قلمشدر .

جانب شرفیدن سردار اکرم وجانب غریبیدن بروجه مشروح انکلیزلرله قبودان پاشا مصر اوزرینه یوریمکده اولدقلرندن جنرال بلیار اول باول مجموع قوتیه سردار اکرم اوزرینه حرکت ایله اردوی هایونی باصوب بوزمق خلیاسنده بولنه رق قبودان پاشا طرفنی اشغال ایچون دخی التی یوز نفری فرانسز وباقیسی قبطیان مصر ونصارای رومدن مرکب ومجموعی درت بیکه بالغ اولمق اوزره برفرقه ترتیب ایله جانب غریبه سوق وارسال ایتمشیدی . قبودان پاشا نهرأ وطوائف عسگریه برأ ایلرو حرکت ایلمش اولدقلری حالده قبودان پاشا اردوسنه آتی ساعت بعدی اولان دیرشیخ قریه سنه محرمک دردنجی بازار کیجه سی مذکور فرانسز فرقه سنک ککش اولدینی جاسوسلر طرفدن خبر ویرلمکله واردوی اسلام ایکی ساعت ایلروده بولمغله فی الحال کیفیت اردویه اخبار و دشمنک اطرافی احاطه اولمق صورتی تدبیر واطظار بیورلمش ایدی . ذکر اولنان فرقه فرانسویه قبودان پاشانک بولدینی ساحله طوغری کلکده اولدینی لدی المعاینه قبودان پاشا درحال ساحله چیقوب جنکه حاضر وشالوپه لرده کی طویجیلر دخی قتل در دست اوله رق امره منتظر اولدقلری

انساده کتخدا خسرواغا وانکلیز جنرالی معیتلرنده کی سواری یتشوب دشمنی هر طرفدن احاطه ایتملیله دشمن واله وحیران اولهرق هان تخلیص جان ایچون تسلیم سلاح ایلدکلرندن درت بیک نفردن مرکب اولان فرقه مذکورہ تمامیه اسیر ایدیلوب طوب و جبہ خانہ لریله برابر ایکی بیک قدر هین ودوه لری اخذ و اعتمام قلندی .

فرانسزلر بروقتدنبروقبطیان مصر وسائر نصارادن عسکر یازوب آنلرله طابورلرینک نقصانی اکل ایدرلردی بوکره زیاده صیقاقلری جهته بونلردن برخیلی عسکر ترتیب ایله تعلیم و تربیه لرینه ایجه امک صرف ایدرک معلم ومنتظم صورته اوله برفرقه تشکیل ایتمشلرایدی حالبوکه اوله عسکر لیکه مألوف اولیان طوائف مختلفه ایله طابورلرک نقصانی اکل اولندقدہ اگرچه قوه اصلیه به معین اوله جقلری جهته برنوع فائده در واز چوغه تابع اولور قاعده سنجه عنصر اصلینک قوتنه ضعف کتورمز اما اکثریت اوزره آنلردن مرکب اولان برفرقه نیک ایشه یرامیه جنی درکارایدی اوله مدت مدیده محکومیتہ آلمش اولان خالقک پیشکین عسکر اولسی خیلی وقته محتاجدر (بسیار سفر باید تاپخته شود خامی) بناء علیه فرقه مزبورہ التي یوز فرانسزک اسارتنه و بونجه اسلحه و مهماتک الدن چیمسنه سبیتدن بشقه فرانسه لونک برایشنه یرامدی . کلام اردوی هایونک احواله .

بالاده اشارت اولندیغی اوزره اردوی هایون ایله سردار اکرم بلیسه کله رک مقدمه الجیشی مصره تقرب ایلمش اولدیغندن جنرال بلیار مقدما قله برک یادیغی کی اردوی هایونی اوروب طاغتمق اوزره محرمک دردنجی بازار کونی سکز بیک کزیده فرانسز عسکر یله مصردن چیمشیدی اردوی هایون ایسه قله برک وقعه سندن درس آلهرق متنه اولدیغندن اولکی کی غفلتده دکل ایدی و سردار اکرم معیتده ماهر مهندس لر و براز اوروپالو ضابطلر بولنوب اردوی هایونک حرکتی ممکن مرتبه قواعد فن حربه توفیق اولهرق فرانسزلرک دسایس حربیه سنه آلدانماق اوزره احتیاطکارانه حرکت ایدیوردی و سوارسی فرانسه سواریسنه نسبتله زیاده وغالب اولدیغندن معرکه ده طویلجه فرانسزلرک آتشنه هدف اولمقدن ایسه آوجی طرزنده یاییلهرق فرانسزلی شاشیره جق صورته مناوره لر ترتیب اولمشیدی . بناء علیه جنرال بلیار بروجه مشروح مصردن چیقوبده (خانقاه) خانکه طرفه و آندن بلیس اوزرینه حرکت ایتدکده درحال چرخه جی طاهر پاشا و آرقه سندن چند قطعه طوب ایله سرعسکر محمد پاشا حرکت ایله جنکه قیام و عساکر اسلامیه فرانسزلر اوزرینه ارسلان کی هجوم و اقتحام ایتدکلی هنکامده سردار اکرم



شیخ زاده ابراهیم پاشایی مرکز اردوی هایونده براغوب وثابت قدم اولسنی ایداً توصیه وتنبیه ایدوب کندوسی موقع حربه ایریشهرك عسا کر اسلامیه بی صبر وثباته تشویق وترغیب وسواری نی یایوب هر طرفدن فرانسزلی احاطه ایله تهدید وترهیب ایلدیکندن فرانسزلر شاشیروب طرفیندن تلفات کثیره وقوعندن صکره مغلوباً رجعته مجبور اولملریله جنرال بلیار مصره عودت وتحصن ایتمک اوزره خارج شهرده متریس حفرینه مبادرت ایتدی سردار اکرم دخی غالبانه ایلرو حرکت ایدرک نیلک دمیاط ورشیده منقسم اولدیغی شلقان نام محله کلوب مظفریت واقعه بی قپودان پاشایه تبشیر وآنک دخی ایلرو حرکتی تذکیر ایلدی .

اوائل صفرده اردوی هایون عادلیه کلوب قپودان پاشا ایله انکلیزلر دخی جانب غریبند انباهیه واصل اولدیلر ونیلک ایکی طرفده چادرلرینی قوروب سفائن صغیره واسطه سیله اختلاطه باشلادیلر .

فرانسزلر کاه جانب شرقیه وکاه جانب غربیه صکرده رك محاربه ومقاتله دن خالی اولیوب بووجهله صفرک سکنزنجی کونی صباحدن اخشامه قدر جانب غریبه محاربه ممتد اولدی وائثنای محاربه ده اون بش نفر عثمانلو مصره دخول وورود وحسینیه ده قهوه بیکه لرینه صعود ایله نان وکهمک ییوب قهوه چپوق ایچدکن صکره یینه اردوی هایونه عودت ایتشملر ایدی .

وینه اول کون فرقه غربیه یعنی قپودان پاشا ایله انکلیزلر چیزه یه کلدکلرندن جنرال بلیار اولطرفه سکر دوپ چند روز اول جهته محاربه یه دوام ایلدی فرقه غربیه ایسه چیزه یه کلدکلر قبله جانبنه یاییلوب اولطرفدن دخی مصری محاصره ایلدکلرندن آرتق خارجد آمد وششد منقطع اوله رق درون شهرده ما کولات ومشروبات بولنماز اولدی .

جنرال بلیار بووجهله ایکی آتش آره سنده قلوب اردوسیله اسیر دوشه جکنی تظنن وهرصل اولور ایسه اولسون بعض شرائط ایله مصری ترك ایدوب کیتمک طریق اسلم اولدیغنی تیقن ایتمکله تشکیل ایلدیکی دیوان حر بده لدی المذاکره بره مقاوله ایله مصری تخلیه ایتمک اوزره قرار ویرلش اولدیغندن سردار اکرم طرفندن عثمان بك وقپودان پاشا طرفندن اسحق بك وانکلیزلو طرفندن امیرال اسمیت مرخص تعیین اولنوب فرانسز مرخصلریله لدی الاجتماع فرانسزلر درجه ضعف ومایوسیتلرینی ستر ایدرک کمال تمکین ووقار ایله آغر تکلیفلر درمیان ایتدکلرندن جرح وتعدیل ایله اوغراشیلوب نهایت فرانسزلر کندولرینه مخصوص اشیا واسلحه وچرخه طوبلری وجبه خانلری ایله رشیده واورادن فرانسه لیمانلرینه

سالمًا ایصال ایدمک و فرانسه یه وارنجیه دک مصر فلری دولتین متفقین طرفدن ویرمک شرطیه اون ایکی کون ظرفده مصری تخلیه ایتلرینه قرار ویر یله رک فرانسه جمهوریتک تشکیلی تاریخک طقوزنجی سنه سنک شهر مسیدورنده واقع بیگ سکز یوز برسنه میلادیه سی حزیران فرنیکنسک یکر می یدنجی کوننه مصادف اولان بیگ ایکی یوز اون التی سنه سی صفر ینک اون التنجی کوننده استیمان سندلری امضا و سردار اکرم و قبودان پاشا و انکلیز باش امیرالی جام استونسون ایله جنرال بلیار طرفلرندن تصدیق اولمشدر .

حالبوکه فرانسلرک درجه یأس و فتورلری بیلنوبده بر پارچه طیانلمش اولیدی تسلیم سلاح ایتمهک مجبور اوله جقلری درکار ایدی لکن مقدا سردار اکرم ایله قله برک بیننده منعقد اولان شرائط تخلیه یی انکلتره دولتی قبول ایتدیکنه نادم اوله رق صکره دن اول شرائط ایله فرانسلرک مصری تخلیه ایتلرینه راضی اولدیسده اولوقت دخی فرانسلر چیمق ایسته میوب مصری بنسه دیلر فقط فرانسه دن مصره امداد ایده مدکلری جهته مصرده کی قوه عسکر یه لری چوریوب مرتبه اضمحلاله یاقلاشدی واکر قله برک راضی اولدینی شرائطی انکلتره دولتی قبول ایتش اولیدی ده اولوقت مصر غائله سی بتوب بوکره مصر اوزرینه سوق ایلدیکی قوه عسکر یه یی بشقه جهته ده اعمال ایله آوروپاچه تأثیر نفوذی ده ازیاده اولور و جنرال بلیارک عسکرینه مصارف نقلیه اعطاسنه محتاج اولمز ایدی صکره دن انکلزلر اول شرائطی قبول ایتدکلر نده دخی فرانسه لو موافقت ایتش اولیدی مصرده کی قوه عسکر یه سنی بومرتبه پریشان و خسار دیده اولمقسزین شان و ناموسی ایله فرانسه یه چکوب بر مهم ایشده قوللانه بیلوردی الحاصل ایکی طرف دخی واقع اولان عناد و نمر دلرندن ضرر کورمش اولدقلری جهته بودفعه هر فصل اولور ایسه اولسون مصرک تخلیه سنه موافقت فکرینه دوشوب فقط جنرال بلیار حال ضعفی کتم ایله اساحه و جبه خانه سنی آلدقن بشقه مصارف نقلیه سنی دخی دولتین متفقینه تحمیل ایلمشدر .

بر موجب مقالله صفرک یکر می سکزنجی کونی فرانسلر مصری تخلیه ایله جیزه یه چکلمهک باشلادقلر نده اهل اسلام تعریف اولمز مرتبه ممنون و مستشر و فرانسه لو غیرتی کوردن نصاری غایت ملول و متکدر اولدیلر فر داسی جامع ازهر آچیلوب تنظیم قلندی وبعده عساکر اسلامیه فوج فوج مصره کلوب کیتمهک باشلادی و غره ربیع الاولده سردار اکرم و قبودان پاشا و حلب والیسی ابراهیم پاشا و دیار بکر والیسی ابراهیم پاشا و ابومرق محمد پاشا و ارناود طاهر پاشا و یکیچری اغالری و رجال دولت علیه

وامرای مصر به دن بیوک ابراهیم بك و متوفی مراد بك كوله لرندن طنبورچی و بردیس عثمان بككر والفی و امثالی امرا ایله برخیلی كاشفله مصره داخل اولدیله .  
 مشار ایله ابومررق محمد پاشا فی الاصل اولاد عربدن و غزه اهالیسندن بیانی بر آدم اولدیغی حالدده قدری یاور اوله رق رتبه وزارت نائل اولوب سردارا كرمك مؤتمن و منظوری اولدیغندن بو كره عهده سنه مصر ایالتی دخی توجیه بیورلمش ایدو كنه مبنی روجه مشروح مصره داخل اولدقدن صكره همان اداره امور ایالته مباشرت ایلمشدر .  
 مصر اهالیسی سردارا كرمك آلائی عظیم ایله شهره دخولندن و شعائر اسلامیه نك اعلا و اعلانندن افراط اوزره ممنون اوله رق عروق غیرت و حمیتلری هیجانه كلوب فرانسه لو و قتده دلگیر اولدقلری نصارانك قتل و اعدامی استدعا سیاقده عرفخاللر تقدیم ایلدیلر سردارا كرم ایسه تامیله عدالت مسلكینی اختیار ایله بودر لو داعیه لری یساغ ایدوب یهود و نصاریه علی العموم امان ویرد كدن بشقه فرانسه لو زماننده ظهوره كلان و قوعانك كائن لم یكن حكمنه قونلمسنی امر ایله بونلردن طولایی میدانه قویلان دعاوینك استماعنی منع ایلدی صدر اعظم سائر خصوصارده دخی شاهراه عدالتسه سلوك ایتدیكنندن عامیه امنیت و تجارتیه وسعت كله رك آز وقت ظرفنده اقطار مصریه ده عظیم فیض و برکت و لهجه انامده آثار سرور و بهجت رونما اولدی .  
 فرانسه لر درت كون جیزه ده اقامتدن صكره رشید ساحله كیتمك اوزره حرکت ایتدكدرنده انكلیز لر جیزه یی تسلیم ایله اوراسنی كندولرینه اردوكاه اتخاذا ایلدیلر .  
 و فرانسه اردوسنك او كنده بر مقدار انكلیز عسكری كیدوب و آرقه لرندن دخی قبودان پاشا كندو عسكریله حرکت ایدوب فرانسه لر بو ایگی عسكرك اورتاسنده اوله رق رشیده وار مشلدر .

مقدما قبودان پاشا مصره كلوركن دمیاطه ریاله بك ایله بر قاق سفینه كوندروب اردوی هایونندن دخی بر مقدار عسكرك كوندولسنی سردارا كرمه تحریر ایلمش ایدو كندن سردارا كرم دخی ایگی بیك قدر ارناود كوندركله دمیاط قصبه سی و ثغر دمیاطده اولان برجلری ضبط اولنش اولدیغی حالدده مستحفظ بولنان فرانسه عسكری ایزبه قلعه سنه قیانوب قالمش ایدی . بو كره سردارا كرم آنلری رای و امان ایله ایزبه دن چیقارمق اوزره میرمیران احمد پاشایی دمیاطه كوندرمش و احمد پاشا مأموریتی موجبجه كندولرینه امان ویرمش ایسه ده فرانسه لر امین اوله میوب كیجه لین قلعه یی ترك ایله فرار ایدرك رشیده واروب كندولرینی انكلیز عسكرینه تسلیم ایتمشلدر .

یاقه وقعه سندن برو ارناودلر فرانسه لر حقه ده اضمار غیظ و كین ایدوب كندو

همشهری‌بری حقنده پوناپارته‌نک ایتدیکی غدیری تذکار ایله اخذ نثار قیدنده اولملری امر طبعی اولسیله برابر رای و امان و یریلانلر حقنده تجبه‌لک ایتلمی محتمل دکل ایدی لکن فرانسزلر مت اسلامیه‌ده رای و امانک نه‌درجه قوت و تأثیری اولدیغنی و دکل اویله سردار اکرم طرفندن مأمور بر پاشانک رای و امانی نقض ایتک بر اراؤد سرکرده‌سنگ و یردیکی بسه‌بی بیله بوزمق محتمل اولدیغنی بیلمدکلرندن بیهوده یره کیجه یولاره دوشه‌رک کندولرینه ده‌ا زیاده دشمن اولان انکلیز عساکرینه تسلیمه مجبور اولمشلردر .

جنرال بلیار عسکریله برابر دولتین متفقین طرفندن تدارک اولنان سفائنه را کبا ربیع الاول غایتنده فرانسه‌یه عزیمت ایلمشدر . آنک امضا ایلدیکی شروط ایله جنرال منونک دخی اسکندریه‌نی تخلیه‌سی تکلیف اولندقدنه منوفرانسه‌دن امدادکلور امیدینه اغتراراً جواب رد اعطاسیله مدافعه‌یه قرار و یردیکندن بلیار فرقه‌سی کیتد کد نصکره قپودان پاشا دخی اول طرفه کیدرک عساکر اسلامیه ایله انکلیزلر اسکندریه‌نی تضییق ایچون اول طرفده اجتماع ایتدکلری کبی سوبش دکزندن قصیر طریقیه مصره کلان عساکر هندیه دخی چند روز جیزه‌ده اقامتدن صکره اسکندریه طرفه سوق واعزام اولمشلردر .

### \* بعض وقایع استانبول \*

محرک اون بشنده رؤس امتحانی آچیلوب تلخیص المفتاحک مسند بحثنده واقع (ولو للشرط فی الماضي) عباره‌سندن درس کوستریله رک اثبات لیاقت ایدن خواجه اقدیلر رؤس ایله بکام اولدیلر بونلردن بریسی پالایبق محمدافندینک برادری اولان مشهور عبدالرحیم افندیدرکه مدت مدیده فاتح طرفنده نشر علوم ایله مشغول اولدقدن صکره اواخر عمرنده اختیار عزالت و انزوا ایدن و شهرت شایعه‌سی تعریفدن معنی اولان برذات جلیل الصفات اولوب آندن صکره رؤس امتیجانلرنده اویله برذات سرنمای ظهور اولمامشدر .

بو ائنده هر کسک قولاغی مصر طرفنده اولوب سردار اکرم و قپودان پاشا طرفلرندن مظفریت خبرلری کدکجه خلقک لهجه‌سنده آثار مسرت بدیدار اولمقده ایدی و سردار اکرم ایله قپودان پاشانک بوجه مشروح مظفریتلری اخبار ساره‌سی در سعادت و واصل اولیجق طرف شاهانه‌دن سردار اکرمه برقبضه مجوه سیف و قپودان پاشایه مجوه برقبضه یتغان و انکلیز باش قوماندانلرینه ایکی قطعه مجوه حج کوندرلمشیدی قپودان پاشا کتخداسی خسرو اغا دخی محاربات واقعه‌ده ابراز لیاقت و بسالت ایلدیکندن

عاهده سنه رتبه وزارتله از تكميد سنجاغى توجيه اولوب چوق چككمسز ين يعنى اوائل جمادى الاولاده مصر واليسى اولمشدر .

اردوى هايونده كتخدای صدر على ايكن تصحيح مزاج ضمننده استعفا ايله در سعادتله كلش اولان عثمان افندى ينه كتخدای صدر على نصب اولنه رق ربيع الاولك يكرمى ايكنجى كوفى باب عاليده قائم مقام پاشا حضورنده الباس خلعت قلندقدن صكره حضور هايونه جلب ودعوت بيوريله رق طرف شاهانه دن سردار اكرم ايله قبودان پاشايه شفاهماً افاده سى لازم كلان خصوصات خفيه كندوسنه افاده و تلقين بيورلدى .

وينه اول كون ميراخور اول زهدى اسماعيل بك عهده سنه مجدداً رتبه وزارتله قرمان ايالتى توجيه اولغله عزت پاشا زاده سعيد بك ميراخور اول اولدى .

و چونكه مصر ك امور ملكيه وماليه سى مجدداً تأسيس اولنه جنى جهتله اعاضم رجال دولت عليه دن برذاتك مصر دفتردار لغيله اعزامى لازمه حالدن بولنديغنه مبنى سابقا ترسانه عامره امينى شريف افندى مصر دفتردارى نصب اولندى و چند روز مروزنده عثمان افندى ايله برابر بشقه بشقه سفينه لره راكباً جانب مصره عزيمت استديلر وينه بو اوانده سابقا يكيشهر قاضيسى دباغزاده مصطفى افندى دخى مصر قاضيسى نصب وتعيين بيورلمشدر .

دولت عليه نك مقدما اسپانيا دولتيه اولان مناسبات رسميه سنى قطع ايلمسى مجرد روسيه ايله انكلتره دولترينك الحاح و ابرامنه مبنى اولوب يوخسه دولت عليه ايله اسپانياو بيننده بادیء ميانيت اوله جق بشقه بر ماده يوغيدى واسپانيا نك فرانسه جمهوريله اتفاقى انكلتره لو عليه نه منحصر ايدى حالبوكه مؤخرأ روسيه دولتى انكلتره اتفاقدن آرملغه اوروپا وولتيقه سى تغير ايلدى وانكلتره لو ايله فرانسه لو بينلرنده محاربه دوام ايتمكده ايسه ده لوندرده طرفين مرخصلرى مواد مصالحه مكالمه سنه دخى دوام ايتمكده ايدى واكرچه حالا اسكندريه ده محاربه باقى ايسه ده قريب العهده آنك دخى نهايت بوله جنى اكلاشلى و اسكندريه ايشى نتيجه پذير اولدوقده بالطبع فرانسه لو ايله مصالحه اولنديغى كجى اسپانيا دولتيه دخى تجديد مناسبات اولتمش اوله جفته و اويايه فرانسه مصالحه سنه تبعاً اسپانيا لو ايله تجديد مناسبت اولتمقدن ايسه شمديدن بو مناسبتك تجديدى ايجاب حال و مصلحته اوفق كورلديكنه مبنى بو ائنانده اسپانيا مصلحتكندارى در سعادتله كله رك ديوان هايونه دخول ايله تجديد معاملات رسميه ايدلمشدر .

\* اسكندريه نك فتح و تسخيرى و وقايع سائره \*

بروجه مشروح جزال منو فرانسهدن امدادكلور اميديله اسكندريه ده تحصن ايدرك

مدافعه‌یه قیاس ایلمش ایسه ده اسکندریه‌یه امداد کتورمک اوزره دکنه چیقار یلان فرانسز کیلری بالاده بیان اولندیغی اوزره ایقای مأموریته موفق اوله میوب ونه‌ایت درنه سواحلنه کشیکن قره‌یه عسکر چیقاره میوب نتیجه سنده انکلتاره لو یدینه اسیر دو شمشدر وانکلیرلر مادیه کولیه ماریه تیز کولی آره سنده کی جدولک سدلرینی کسوب ایکی کولی برلشدره رک طوبلی صندالار ایله عجمی طرفنه دخی عسکر دو کدیلر بونک اوزرینه دولت علیه شالو به لری دخی ماریه تیز کولنه کیروب دولتین عساکری هر طرفدن اسکندر یه بی طوب و خنبره ایله دو کیمکه باشا دیلر بوضورته عجمی طایبه سی فتح و تسخیر اولندقدن صکره فرانسز لر یک زیاده صیقلدی و فرانسهدن امداد کیمک امیددی دخی منقطع اولدیغندن جنرال منو دخی چاره سز استیمان مجبور اوله رق ربیع الآخرک اون التتجی چهارشنبه کونی شرائط تخلیه بی مذاکره ایتمک اوزره اوچ کون متارکه طلب ایتمکله همان شرائط تخلیه بالمکمله قرار کیر اوله رق استیمان سندلری امضا اولندقدن صکره اوآخر ربیع الآخرده فرانسز لر اسکندریه بی تخلیه و تسلیم ایله فرانسه‌یه کیتمشلدر .

انجق جنرال منو مقدا جنرال بلیارک تخلیه مصر ایچون امضا ایلمش اولدیغی شرائطی قبول ایتمامشیکن صکره اول شرائطی طلب ایلدیکی حالد بکره دخی برو طرفدن قبول اولندیغی جهتله فرانسز لر یالکیز سلا حلرینی و ذاتلرینه مخصوص اشیا لرینی آلوب کتورمکه و برده در درو یا خود سکرز رقیه لک چاپنده اوله رق اونر آتمق جبه خانلر یله اون قطع طوب استحصاب ایلمکه مأذون اولوب فرانسه جمهورینه متعلق سائر شی کتورمک رخصتنه نائل اوله مدقلری جهتله ماعدا نقدر طوب و خنبره وار ایسه کافه سنی مهمات و جبخانه لر یله و اسکندریه لیاننده موجود اولان بالمله فرانسز کیلرینی بولندقلری حال و هیئت اوزره و اقطار مصر یه ده جمع ایلدکلری کتب و رسائل و عتقه و تصاویری اسکندریه قلعه سنک خریطه لر ی و مملکتک رسملری ایله برابر و الحاصل فرانسه جمهورینه متعلق نقدرا موال و اشیا وار ایسه تامیله دولتین متفقین مأمورلرینه تسلیم ایدوب کیتدیلر و آنلر چیقوب کیتدکن صکره بوغنائم عظیمه بی دولت علیه ایله انکلتاره لو مقاسمه ایستدیلر اکر جنرال منو مقدا جنرال بلیارک شرائطی قبول ایتمش اولیدی بونجه طوب و مهمات و سفائن و اموال و اشیا ی و فیره هپ فرانسه‌یه نقل ایدلمش اوله جق ایدی ایشته جنرال منونک عنادی دخی فرانسه لو حقدنه بوندن بشقه برشیئی منتج اولدی .

اسکندریه نک استخلاص خبری سردار اکر مه واصل اولدقدن مصرده شهر آیین یاپلمشدر و قودان پاشا طرفدن بومژده ایله اسکندریه محاربه لر نده ابراز لیاقت

و بسالت ایلمش اولان احمد قپودان وانکلیز قومانداننک برادری حاجنسون نام اوخیال  
در سعادتہ اعزام قلمش اولدقفلرندن مواصلتارنده احمد قپودانه طرف شاهانه دن  
سنوی بش کیسه فائضلو برسهم وچانک و فروء سمور ووالده سلطان طرفندن  
سنوی طقوز کیسه فائضلو دارالوکاله حلب مقاطعه سی و حاجنسونه طرف هیایوندن  
کردنه تعایق ایتمک اوزره دائره سی الماس ایله محاط و مرکز دائره سنده آی شکلی  
منقوش بر قطعه آویزه ایله یکر می بش بیگ ووالده سلطان طرفندن اون ایکی بیگ  
بشیوز غر و شلق آلتون احسان واهدا بیورلمش وانکلیز امیرالی ایله عساکر بره سی  
جنرالنه مرصع شریدر و سائر ضابطلرینه دخی مناسب هدیه لر کوندرلمشدر .

بروجه مشروح اسکندریه نك فتیحی خبری در دولته واصل اولدقده بیراملرده  
اولدینی کبی رکاب اولوب شیخ الاسلام افندی وقائم مقام پاشا حضور هایونه مشول  
ایله تبریک فتوحات ایستدکرندن صکره درت کیجه شهر آیین ترتیب اولندی وبوغاز  
ایچینک ایکی طرفنده واقع ساحاخیانه لر شمع وقنادیل رنگارنگ ایله تزین و تنویر  
قلندی وروی دریا بیکارجه سیرجی قایق لریله مزدحمکاه سیر و تماشای اولوب سوبسو  
صدای سازونی فلک زهره یه ایصال ترانه هی هی و طرف بطرف ولولهء دلساز  
یالیل تهزیز ایوان سهیل ایدرک ( غم فردایی کولدن چیقاروب ذوق ایدم \* می  
ونیه دل غم دیده یی پر شوق ایدم \* اولم ملک شادی یه عنانریز و صول \* کدری  
منزل نسیانده براز عوق ایدم ) زمزمه سیله درت کیجه پیرو برنا واعلا وادانی  
نشئه یاب مساری احصا اولدی .

وساطان سایمک القابنه ( من جهز غازیاً فقد غزنا ) مقتضاسیجه غازی عنوان مفخرت  
نشانی علاوه اولنه رق جمادی الاولانک اون التبحی جمعه کونی خطبه لرده غازی  
دیو یاد اولندی .

برقاج سنه دنبرو کعبه مکرمه نك کسوه شریفه سی سلطان احمد جامع شریفی رواقده  
نسج و اعمال ایله شام طریقندن ارسال اولنوب بوسنه مبارکده مصر قاهره فرانسه لرک  
یدندن استخلاص ایدلدیکندن شام طریقندن ارسالنه حاجت قالیوب بوئانده اعمالی  
دخی ختام بولغله اوائل جمادی الاولاده آلی و الا ایله سلطان احمد جامع شریفندن  
سرای هایونه نقل و ایصال وبعده بجزاً جانب مصره واورادن مکة مکرمه یه  
ارسال ایدلمشدر .

جمادی الآخره نك یکر می بشنجی کونی قپودان پاشا طرفندن اسکندریه قلعه سننک  
انتخارلری باب عالی یه وارد اولغله برکون صکره شیخ الاسلام افندی وقائم مقام پاشا وقضات  
عساکر و مناصب سسته رجالی وعموماً اوجاق اغالری موجود اولدق لری حالده

دأب دیرین دولت علیه اولدینی اوزره ترتیب اولنان آلائی والا ایله مذکور  
مفتاحلر سرای هایونه کتور یلوب طوپ قپوده واقع و بین الناس باغ ارم دیو  
معروف اولوب تاریخ اتمائی (باغ طرب) اولان موقع دلنشینده وقفه کیر آرام  
اولدقارنده سلطان سلیم دخی قصر جدیدی تشریف ایدرک مفتاحلر کندویه  
عرض و تسلیم قلندی .

اقطار مصریه نك فتح و تسخیری ایچون دریا دونماسی ترتیبی مقرر اولدیغندن  
اوجاقلر یکدیگره مسابقت داعیه سیله صنعتلرینی بربرندن اخفا ایدرک حاضر اولدقارنده  
رجبک سکنزنجی کیجه سی بدأ ایله برقاچ کیجه صالار اوزرنده انواع پوسکورمه  
وهوایی فشنکار اشعال و ایقاد ایله صنایع غریبه ایجاد ایدوب سیر و تماشا ضمنده  
سلطان سلیم خان یالی کوشکنی تشریف ایله وکلا ایچون دخی اطرافنده چادرلر  
قورلمش و طرف شاهانه دن اوجاقلره عطایای و فیره احسان بیورلمشدر .

مصرک احواله کنجه اوتهدنبرو کوله منلر دولت علیه یاری عاصی یاری مطیع اولهرق  
مصرده متغلب و متحکم اولوب اقطار مصریه ده کیف مایشاء تصرف داعیه سننده  
بولورلر و مصرده حکومت سنیه قوتلو بولندیغی وقت برطاقی عرض مطاوعت ایله  
مصرده قالورلر ایسه ده برطاقی دخی اول حالده صعیدا یچنه چیقوب تعقیب ایچون  
اوزرلرینه عسکر سوق اولندقده دخی مقابله و مدافعه ایدرک مقاومتدن عاجز قالورلر  
ایسه سودانه قدر کیدرلر و عسکرک عودتنده آنلر دخی اشاغلیره عودت ایدرلر و بعضاً  
یینلرنده اختلاف و مجادله و قوعیله غالب کلان طرف مصرده متغلب و مغلوب اولان  
طرف اولوجهله صعیدا یچنه ذاهب اولورایدی بوکره پوناپارته مصری ضبط ایتدکده  
ابراهیم بك طاقی جانب شامه هجرت ایدوب باقی کوله منلر دخی مراد بکله برابر  
قاعدۀ قدیمه لری اوزره صعیدا یچنه کیده رک بالاده بیان اولندیغی اوزره فرانسزلرله  
بک چوق محاربه ایلدیلر و اگرچه فرانسزلر غالب کله رک صعیدی ضبط ایتدیلر  
ایسه ده مراد بکی اله کچوره میوب نهایت بروجه مقطوع برویرکو ویرمک اوزره  
صعید قطعه سنی اکا ترک ایتمکک مجبور اولدیلر مصرک فرانسزلردن نزع و استخلاصنده  
کوله منلری دیار اخرایه طرد ایله بوراسنی ایالات سائره طرزنده اداره ایلمک نزد  
دولت علیه ده مقرر اولدیغی حالده قله بر ایله واقع اولان محاربه ده اردوی هایونک  
تفرق و انهمزای ایشی مشکلات و تأخراته دوشوردی قله برک اعدامندن صکره  
سردارا کرم صلحاً مصرک تخلیه سنی جنرال منویه تکلیف ایتمک اوزره ابراهیم  
و مراد بکلری واسطه اتخاذ ایتدیگی وقت بویولده خطۀ مصریه اله کچدکن صکره  
امرائی کما فی السابق مصرده ایقا ایله کندوسی استانبوله عودت ایده جکنی وعد



ایلمش ایسه منو تکلیف مزبوری قبول ایتدیکی جهتله دولت علیه وانکلیر  
 اردولری متحدانه حرکت ایدرک حرباً مصری آلمش اولدقلرندن وعد مذکورک  
 حکمی قالمش ایسهده امرا دولتن امین اوله مدقلری جهتله دها اولوقت انکلیرله  
 دخالت وطلب حمایت ایدوب انکلیرلر دخی بوبابده کندولرینه سوز ویرمش  
 ایدیلر . بناء علیه اولوقت مراد بک فرانسه لویه تابع اولدینی کی ابراهیم بک طاقی  
 دخی معنی انکلیرلر حمایه سنه کیرمش ایدی مؤخرأ مراد بک وفات ایتدکده آنک  
 طاقی دخی ابراهیم بکه تابع اولهرق عساکر اسلامیه ایله برلکده فرانسزلر علیهنده  
 حرکت ایتدیلر ایسهده جمله سی انکلیرلرک حمایه معنویه سنده بولندیلر ومصرک فتح  
 وتسخیرنده کافی السابق اقطار مصر یهده کیف مایشاء تصرف ایتک اوزره سردار  
 اکرمک هان درسعاده عودته منتظر ایکن سردار اکرمک مصرده زیاده جه مک  
 وتوقف ایتدیکندن طولای بعض مرتبه شبهه ده دوشمشار ایدی حتی النی محمد بک  
 بواندیشه ایله متوحش بولندیغندن جلب ذخائر بهانه سیله سعید جانبسه کیدوب  
 ابودیاب سلیم بک دخی منیده احتیاط اوزره بولنه یوردی .

وفی الواقع امرای مصر یه نك اخذ وکرفت ایله مصر دن طرد وتبعیدلری ایچون  
 درسعادتدن امرککش ایدوکنه مبنی سردارا اکرم ایله قبودان پاشا بینلرنده مخابره  
 ایدرک بوانشاده مصر والیسی اولان خسرو پاشایی آلی ایله مصره کتورمک  
 وائشای راهده بعض عشائر عربانی تأدیب ایلمک بهانه سیله امرادن بعضیلری قبودان  
 پاشا طرفندن اسکندریه یه جلب اولمش وتعیین اولنان یوم معهودده جمله سنک دفعه  
 اخذ وحبس اولنملری جانب سردارا کر میدن قبودان پاشایه اشعار قلمش ایدی  
 جامدی الآخره نك اون برنجی صالی کونی حضور سردارا کر میده عقد وترتیب  
 اولنان دیوانه مصرده بولنان امراکلرکرنده جمله اخذ وتوقیف اولنوب انجق  
 ابودیاب سلیم بک قضیه دن آگاه اولدینی کی جیزهده بولنان انکلیرلرک یانته فرار  
 ایله استحما ایلمش اولدیغندن اموال واشیاسی مصادره اولتمشدر اسکندریه ده کی  
 امرانک اخذ وکرتلرنده دخی انکلیرلرک حمایه وصحابته قیام ایده جکلری درکار  
 اولدیغندن وانکلیر باش قوماندانی چند روز صکره مالمه یه کیتمک اوزره بولندیغندن  
 آنک عزیمتدن صکره بوامرک اجراسنی قبودان پاشا تصمیم ایلمش ایسهده بوجه  
 مشروح مصرده کی امرا اخذ وکرفت ایدلمش اولدقلرندن اسکندریه ده کیر  
 طویدقلری کی فرار یاخود انکلیرلردن حمایه طلبنه ابتدار ایده جکلری امر آشکار  
 اولمسیله هان اخذ وکرتلری چاره سنه باقلمق لازم کلدیکنه مبنی قبودان پاشا  
 جامدی الآخره نك اون دردنچی کونی اسکندریه بلده سنی تماشایه عزیمت ایدر کی

اولتر فده کی امرای دعوت واستصحاب ایدرک اسکندریه به کیدمک اوزره فامکله  
ایله ماریه تیز کولنده لنگر انداز اولان فرقه به موصلت اولندیغی هنکامده مقدا  
ترتیب و تنبیه اولندیغی اوزره استانبولدن تحریرات کلدی دیو آرقه دن آدم کلوب  
قپودان پاشا دخی کو یاکه مال تحریراته مطلع اولوق ایچون رجعت ایتکله امرا  
فرقه ایله اسکندریه به عزیمت اوزره ایکن فرقه یولندن چیقوب دونمهای هایونه  
متوجه اولیجق متوفی مراد بکک کوله لرندن جر جاوی عثمان بک پشتو ایله  
قالیونجیلردن برینی اعدام وباله ایله برینک الی قطع ایدوب سائر امرا دخی  
سل سیف ایله مقاتله به قیام ایلدکرندن قالیونجی زمره سی دخی ناچار آنلرک اوزرینه  
هجوم و جر جاوی عثمان بک و بیسوک ابراهیم بکک کوله لرندن اشقر عثمان بک  
وملوانی محمود بک و کوچک مراد بک ایله ابراهیم کتخدانی قتل و اعدام و عثمان  
بک و شرفاوی محمد بک و کیلاری احمد بک ایله عثمان و علی و سلیمان کاشغلی ای اخذ  
و گرفت ایله اوج انبارلی قالیون هایونه نقل و ایصال ایلدکرینی اتباع امرا انکلیز  
قوماندانه اخبار و افاده ایله طلب حمایه ایتلری اوزرینه اودخی در حال حمایه قیام  
ایدرک عسکرینی جمع ایله حربه حاضر لانیغه باشلادیغی قپودان پاشانک معلومی  
اولیجق بالنفس انکلیز اردوسنه واروب دولت علیه نک امرا حقه سده سوء نیتی  
یوقدر فقط مصرده بقالری مصاحت ملکیه سنه مضر اولدیغندن جمله سی حالرینه  
کوره معاش و رتبه لر ایله قایلوق اوزره مصردن تبعیدلری مطلوبدر و ادیسنده  
اسلوب حکیمانه ایله الزام و اقساعه قیام ایلمش ایسه ده انکلیز قوماندانک بومثللو  
سوزلر ایله اقتاعی قابل اولیوب دولتی طرفندن بکلری حمایه و تصحبه مأمور  
اولدیغندن اوج ساعته قدر بکلرک سبیلی تخلیه ایله کندوسنه تسلیم اولتماز ایسه  
حرکات خصمانه به قیام ایله سفائن دولت علیه اوزرینه کله آتیه غنی قطعاً بیان ایتمشدر  
حالبوکه بومحاوره ایله اخشام اولوب اوج ساعته دک بکلرک ارجاع و تسلیمی قابل  
دکل ایدی فقط فرداسی صباحین تسلیم اولنوق اوزره قپودان پاشا تعهد و قوماندان  
قبول ایدرک دفع بلا اولنمشدر مع مافیه اول کیجه اسکندریه اردوسی انکلیزلر  
طرفندن احاطه ایله بکلر ویرلمدیکی تقدیرده محاربه به ابتدار ایده جکلری ایما  
اولنسیله بروجه مشروح اوج انبارلیده توقیف اولنان امرا علی الصباح انکلیز  
قوماندانه تسلیم قلمشدر .

مصرده سردارا کر مک توقیف ایلدیکی امرا دخی انکلیز قوماندانک اصراری  
اوزرینه جیزه ده کی انکلیز اردوسنه تسلیم اولنماغه کوشه بکوشه اختفا ایتمش اولان  
آدملری باشلرینه بریکرک اسکی حال و هیئتلرینی بولدیلر اسکندریه ده کی امرا دخی

كلوب بونلره التحاق ايله جمله سى عادت قديمه لرى اوزره صعيد ايجنه چيقوب كيتديلر فقط ابوسيف قاسم بك آنلردن منفك اوله رق ايكيوز قدر كوله منلر ايله دولته عرض دخالت ومطاوعت ايلمش ايسه ده مصره وصولنده منحرف المزاج اوله رق وفات ايتشدر . صاحلى عثمان بك دخى صعيد جمعيتدن انفكاك ايله صورت اطاعتده مصره كلوركن ارناود عسكرى يدنده تلف اولمشدر .

انكليز اميرالى مالطيه عزيمة ايدوب ايام شتا دخى تقرب ايتمك حسييله قويدان پاشا اواسط رجبده اسكندريه دن حركت واوائل شعبانده استانبوله مواصلت ايلمشدر . مصر واليسى خسرو پاشانك قوجيلر كتخداسى اولوب رتبه ميرميرانى ايله جرجه حاكمى نصب اولنان حسن پاشا برفرقه عسكريه ايله صعيد جانبنده كى امرا اوزرينه سوق اولندقدن صكره سردار اكرم طاهر پاشا ايله سائر ميريلو عسكرى خسرو پاشا معيتنده براغوب ومصر ك اجمال مصالح باقيه سنى كتخدای صدرعلى عثمان افندى يه حواله ايدوب وچونكه بالجه طوائف عسكريه نك نقلنه كافي سفائن اولديغندن سفائن موجوديه يالكر اوجاقولوي اركاب وارسال ايلوب عساكر سائر ايله كندوسى شوالك بشنجى كوفى مصر دن حركت وبرا در سعادتده عودت ايتمكه خسرو پاشا مصرده و امراى مصر يه صعيد ايجنده قالدى وام دنيا ينه برطاقم ولد زナルك غائبه سندن آزاده سر اوله مدى واكرچه مقصد اصلى مصرى فرانسزلرك يدندن تخليص ايدى وبوده حصول بولدى ليكن بونجه مصارف وتكلفات اختيار ايله بو قدر اوغراشلمش اولديغى حالده بوراسنك متغلبه دن دخى تطهيرى نزد شاهانه ده مصمم وملتمز اولديغندن امرا ايشينك بوشكله كيرمسى سلطان سليمك انفعاله بادی اولدى .

فرانسزلرك مصرده بقاسى انكلتره دولتك پولىقه سنه غايت مضر اولديغندن بحراً سواحل مصرى ابلوقه ايتدكدن بشقه يكرمى بو قدر بيك عساكر بر يه دخى سوق وتسيار وبويوزدن بريوك معاونت ايله دولت عليه ني منتدار ايلمش ايسه ده بكبرى حمايه ايله امورداخليه يه مداخله سى حقوق ملل قواعدينه مغاير وخطه مصر يه امرا نك پنجه تغلبنده قالمقدن ايسه مالك مشروعى اولان دولت عليه نك ايالات سائر سى كى اداره اولتىق انكلتره پولىقه سنه دخى موافق ايكن بكبرى حمايه ايلمسى برنوع استيلاى معنوى فكرنده بولديغى مشعر اولديغنه مبنى دولت عليه انكليز لونك معاونتدن متشكر اولمسيه برابر بوياله امورداخليه يه مداخله سندن ناشى دلگير اوله رق شوخالده مصر ك انكليز مداخله سندن تخليصى چاره سنى آرامغه مجبور اولمشدر ودولتين ميانه سنه برنوع برودت كيرمشدر واقعا بر دولت ويرديكى سوزدن دونما ايدر زيرا برتلون ايله برمصاححت قزانيلور ايسه بوندن نشئت ايدن امنيتسزلك ايله صكره

بيك مصاحت فوت اولور و بويولده انكليزلك ثبات و متانتلری هر عصرده مدح و ثنا اولنه كشمدر لكن تبعه دولت عليه دن اولان برصنف متغلبه يه حمايه وعد ايلمكه انكليزلك حقی یوغیدی مع ما فيه مادامكه اولوقت انكليزلك بيوك اردوسی اسکندريه ده و برفرقه عسکريه سی جيزه ده بولديني حاله بحر سفيد و احمر دخی اللرنده ایدی بو خصوصه انكليزلك نه مرتبه اصرار ایده جککری اکلایلو بده بککرقنده اکا کوره معامله اولمق لازم کلور ايکن انجمکار ملاحظه ايدلمکسزین بقته بککراخذ و کرفت اولنه رق در عقب انکيلز لولره تسليم ايه رذالت کوسترلمش و بوجهته ناموس دولت پایمال ايدلمشدر و بککرقنده بو وجهه معامله اولنسی در سعادتن امر اولتمش اولوب بودخی مرکز دن مسافه بعيده ده بولنان براردونک ايشنه مداخله اولنمسن دن اولوقت دولت عليه ده فن ديپلوماتينک هنوز شايع و منتشر اولمامس دن نشئت ايلمشدر .

الحاصل خطه مصریه فرانسزلی یدندن نزع و تخليص اولوب سردار اکرم ضياپاشانک اجراءات عادلانه و متعادلانه سيله آثار آسایش و امنیت رونما و آنک عودتدن صکره مصر والیسی خسرو پاشا دخی بويولده حرکت ایدرک آز وقت ظرفده مصرک زراعت و تجارتنده وسعت و برکت پیدا اولدی لکن امرای مصریه صعيد ايجنده رهنورد وادی عصیان و سرکشی اولدقیرینه و انکيلز لره هنوز بورادن ال چکلمدکیرینه نظراً مصر غائله سی بتون بتون تمامشیدی و جبه جی باشی محمد طوسون اغا اسحاب علم و فضل دن و مجرب الاطوار ذواتدن اوله رق بارتبه وزارت جده والیسی نصب اولمغله مصر دن جانب حجازه کوندرلدی و قو کتخداسی دینلمکله معروف اولان عثمان بك امير الحجاج نصب اولنه رق بر معتاد محمل مصر غایت رونقلو بر آلاي ايه اخراج و ارسال ايدلمش و کسوة بیت مکرم مقدمجه در سعادتن مصره کلوب اودخی احترامات فائقه ايه کوندرلمش اولديغندن اهالی مصریه پک زیاده نمون و منشرح اولدی .

مشار ايه طوسون پاشا مکء مکرمه ده ايکن کندوسنک جده ده کی عسکر يه امير مکه شريف غالبک عسکری بيننده محاربه ظهوره کلوب جده نک وجوه و معتبرانی آره يه توسط ايه اصلاح ذات البين ايتمش ایدی بعد الحج طوسون پاشا سنی التمشه یتمش اولديني حاله وفات ایتمکله وزارت تک ثمره سی اسقاط فريضة حج ايلمکدن عبارت اولمشدر بعده شام والیسی عبد الله پاشانک عسکر يه امير الحجاج مصر عسکری میانه لرنده جنک و غوغا ظهور ایتمکله شريف غالب توسط ايله رک غوغایي باصدر مشدر .

و بواتناده و هاببارك قوت و سطوقى تزايد ايدرك اطرافه تجاوز ايدر اولدقارندن  
بو جهته عربستان غائله سی تجدد ایتمکده ایدی .

بالاده بیان اولدنیغی اوزره جبل لبنان اهالیسنک اتفاقی حسینیه جزار پاشانک جبل  
لبنانده حکمی جریان ایده مز اولدنیغی جهته جزار پاشا پک زیاده متالم اوله رُق  
امرای شهابیه آرسنه بر نفاق القاسیله ایچلرندن برنی جلب ایدوبده جبل امورینه  
مداخله یه وسیله آرمقده ایدی حالبوکه جبل دروز اهالیسی ایکی قسمه منقسم  
اولوب بری جنبلاطیه و دیگرى یزبکیه دیومعروف اولان مشایخ بنی العماد طاقدیر  
و طوائف سائر هپ بو ایکی قسمدن برینه منسوبدر بروجه مشروح امیر یوسف  
اوغللری ایله امیر بشیر اتفاق ایتشلر ایسه ده امیر بشیرک جنبلاطیه مشایخه میلی ده  
زیاده اولدیغندن مشایخ بنی عماد بونی چکه میوب اشبو اون التی سنه سی اولئنده بنو  
شهابدن عباس نام بردلی قانلو ایله اتفاق ایدرک و آئی جبل حاکمی نصب ایتدرمک  
اوزره برلکده عکبه کیدرک جزاره مراجعت ایتدکارنده جزارک تمام ارادنیغی  
بر فرصت اولدیغندن کمال ممنونیت ایله امیر عباسه خلعت اکسا و جبل حکومتی احاله  
ایدرک عساکر و افیه ایله جبله کوندرمشیدی و جزارک کوله لرندن ایکن اکا عصیان  
ایله جبله چکیلوب بعده حلب طرفنه صاوشمش اولان سلیمان پاشا جانب حجازه کیدرک  
بر مدت اول طرفده طولاشدقندن صکره جزارک یانته عودت ایتمکله اودخی کندوسنی  
عفو ایدرک صیدا متسلمی نصب ایتمشیدی بو کره بروجه مشروح جبل لبنان اوزرینه  
کوندردیکی عساکر اوزرینه آئی باشبوع نصب ایدرک کرک امیر بشیری و کرک امیر  
یوسف اوغللری جبلدن طرد ایله حکومتی امیر عباسه تسلیم ایلمسنی کندوسنه تنبیه  
ایتشدر لکن اهالیء جبل امیر بشیر ایله برلکده مدافعه یه قیام و خلال رجیده واقع  
مچار بده عساکر جزاری دوچار انهزام ایتلریله جزار پاشا نائل امل اوله میوب  
عسکر بنی عکبه اعاده ایتمکله امیر بشیر دخی مظفر آمرکز حکومت اولان دیرالقمره  
عودت ایلمشدر .

وینه بالاده اشعار اولدنیغی اوزره سردار اکرم مظفر آمرکز عودتده اردوی  
هایون ایله جزارک اوزرینه حرکته امیر بشیری جبل حکومتده تقریر و ابقا  
ایده جکنی کندوسنه وعد ایتمشیدی امیر بشیر ایسه اهالیء جبلک اتفاقیه آملنی حاصل  
ایتمکله بوکا کرچه حاجت قالمش ایسه ده جزار تک طور میوب دائماً اجرای مرام  
ایچون بوحوالیده محاربده دن خالی اولیه جنی درکار اولدیغندن آنک تخطیاته سد  
اولق وایلروده امیر الحاج نصب اولتمق اوزره غزی ابو مرق محمد پاشانی یافاده ترک ایله  
اول حوالینک محافظه سنی اکا حواله ایتدکدن صکره سردار اکرم شامه حرکت ایتشدر .

قالديکه اردوی هايونك بوحوالیده مدت سير وسفری مأمولندن زیاده ممتداولدیغندن سردار اکرم برمحله زیاده توقفی موجب اوله بيله جک بروقه احدانندن مجتنب اوله رق برآن اقدام درسعادته مواصلت ایله پک اهم اولان روم ایلی اصلاحاتیه مشغول اولوق اوزره بریرده ایلشمیه رک عودت املنده ایدی .

بناءً علیه ذی القعدة نک یکر می برنده شامه وذی الحجه نک اون اوچنچی کونی حمایه مواصلت واول حوالینک بعض امورینی رؤیت ایتدکنصکره هان شاهراه اولان انطاکیه وبیلان وپپاس طریقیه حرکتی لازم کلورکن پیاسده کمیشکیر وادیء سرکشئی اولان کوچک علی اوغلینک یوردندن کچلمک وبالایجاب تأدیپ وتریه سنه قیام ایدلمک وشقیء مرقوم ایسه بوتقدیرجه بالطبع کاور طاغنه چکله جکندن اوزون اوزادییه بر طاغ محاربه سنه کیریشلمک لازم کله جکندن جبل مذکورک اصلاحاتنه بعده بر وقت مساعدهه باقلمق اوزره طریق مذکور ترک اولتهرق طوغری حلب اوزرندن حرکت ایلمشدر .

اشبوکاور طاغنه مقدم ومؤخر نفوذ حکومت جاری اولیوب وآنذنصکره دخی چوق وقتلر اصلاحی قابل اوله میوب نهایت قریب العهدهه قوزان اصلاحاتنه مأمور اولان فرقهء اصلاحیه ایله اولطرفه کیدلدکده بوراسی دخی تحت انضباطه آلمشدر .

جزار پاشایه کلنجه برالشامده کندوسندن بشقه بر مقتدر ذاتک بولغنی آنک مطالعه سنه الویرمدیکندن ایل آلتندن یافا وقدس شریف اهالیسنی تحریک ایتمکله ابومرق محمد پاشا حقنده اهالیء مرقومه طرفندن دولته عرض شکایت اولنوب حتی مصر والیسنه بيله برقطعه محضر تقدیم ایدلمشیدی وبوکا دائر جزار پاشا ایله محمد پاشا میانهلرنده جریان ایدن مخابره بادیء محاربه اولوب جزار پاشا سردار اکرمک حلب حدودندن ایلروصاوشدیغنی خبر آلدیغی کچی سالف الذکر سلیمان پاشا ایله فراری اسماعیل پاشا قومانده سنده اوله رق یافا اوزرینه براردو ترتیب وارسال ایلمشدر .

ویو آوانده دول اورویا میانهلرنده مصالحهء عمومیه منعقد اولوب بوندن دولت علیه دخی حصه دار امن وآسایش اولدیسدهه روم ایلینک احوال اختلالیه سی ترقی بولمش ایدی بوراده ابتدا مصالحهء عمومیه مبحثی بیان ایتدکن صکره وقایع سائر ایله روم ایلی وقوعاتنه نقل کلام ایده لم .

### \* مصالحهء عمومیه اورویا \*

اشبو اون التی سنه سی اوائلنده یوناپارته آقدکزی انکلیز حکمندن قورتاروبده مصره کیتلو امداد ایرشدرمک اوزره فرانسه واسپانیا کمیرینی برلشدره رک یکر می قطعه قالیوندن مرکب بردونما تجهیز ایلمش ایسه ده دونمانک امیرالی انکلیز لرک قورقوسندن

وهو الرک مخالفین ناشی بوامرک اجرا سنه موفق اوله مامشیدی اول ائنده ایسه جنرال بلیار نفس مصری تخلیه و تسایم ایتمشیدی .

اول آوانده فرانسه مرخصی لوندره ده مکلمه مواد مصالحه ایله مشغول ایسه ده فرانسه جمهوریه انکلتزه دولتنک مرام و مقصدلری قابل جمع و تألیف اولیه جق صورتده یکدیگره مناقض اولدیغندن ایکی طرف دخی مظفریتله تحصیل مرام ایتک اوزره حرص و شدت ایله حربه دوام ایتمکده ایدی . و فرانسزلر متفقلری اولان اسپانیولار ایله برلشهرک پورتیکز ممالکنی استیلا ایتشار ایدی بووجهله پوناپارته انکلیزلرک بر اوروپاده نفوذلرینی بتون بتون کسر ایتش اولوب مصر وقوعانندن دخی بی خبر اولدینی جهته لوندره مکلمه سنده غالبانه عقد مصالحه امانده ایدی و علیکساندرینک تحت ایمراطوری به جلوسندن بروروسیه دولتی انکلتزه لویه اظهار خصومت ایتامکده بولنش ایسه ده پوناپارته نک معاملاتنه دخی مخالفت ایتوردی پوناپارته ایتالیاده واقع طوسقانه غراندوقه لغنی قرالیته تحویل ایله اسپانیا قرالی خانه دانندن مودینا دوقه سی لویی بی طوسقانه قرالی نصب ایلمش ایدو کندن بواننده لویی سوسقانه به کیدرکن پوناپارته ایله کورشمک اوزره پارسه کلدیکنده احبترامات فاتحه ایله قبول اولنش و بوربون سلسله سندن کندو معرفتیه قرال اولان برذاتک لاجل الزیاره کندوسنه کلسی پوناپارته نک درجه نفوذ و اقتدارینه دلیل اولان وقوعانندن معدود بولنش ایدی .

انکلتزه دولتی اون سنه دنبرو فرانسه جمهوریه محاربه ایدوب بوقدر مال و جان تلف ایتدکن صکره نتیجه سنده فرانسه دولتنک کسب ایتش اولدینی شان و عظمتی معاینه ولوندوره ده ظهوره کلان قحط و غلا و کساد اخذ و اعطایی مطالعه ایدرک صاحبه مائل اولدینی مملو فرانسه جمهورى دخی اسکندریه نک الدن چیقمامسنه وسیله اوله بیلور مطالعه سیله برآن اقدم عقد مصالحه به خواهشکر اولمغله برابر طرفیندن حربه دوام اولته یوردی و فرانسه لونک بولونیا پیشکاهنده بولسان ایجه دونماسنک انکلتزه به عسکر دوکه جکی حوادتی اعلان اولنوب بحر بالظفدن جانب اولنان انکلیز امیرالی مشهور نلسون دخی بودونما اوزرینه ایکی دفعه شدتلو هجوم ایتش ایکن مظهر غلبه اولمامش ایدو کندن انکلیزلر براز یلکتلری صویه ایندیروب کبر و ادعالزندن واز یکمش و فرانسزلر دخی اسکندریه ده محصور اولان جنرال منو فرقه سندن برفنا خبر کلدن مکلمه به برکوزل نتیجه ویرمک امانه دوشمش ایدیلر عهدنامه نک تنظیم ایسه وقته محتاج اولدیغندن بعده تفرعاتی بالمکلمه قرارلشدیر یلوبده اکا کوره عهدنامه سی یابلمق اوزره مواد اساسیه مصالحه به قرار ویریلرک اشبو اون آتی

سنه هجریه سی جمادی الاول اسنه مصادف اولان بیک سکز یوز بر سنه سی تشرین اول فر نکسینک ایکنجی کونی بر اساس معاهده سی امضا قلمشدر .

شویله که : انکلیزلرک امریقاده اسپانیا دولتندن آلمش اولدقلری تر پنیته آطه سی وهندستانده فلمنک جمهورندن آلمش اولدقلری سیلان آطه سی انکلتره دولتنده قالب بوندن ماعدا انکلیزلر بومحاربه ده فرانسه واسپانیا وفلمنکنقدریر آلمش ایسه بونلری صاحبزینه اعاده ومالطه آطه سی قوالیرلره رد و ترک ایتمک وفرانسزلر دخی ناپولیدن وپورتکیزدن چیقماق وممالک مصریه دولت علیه رد وتسلیم اولنوب دولت علیه نکل ممالک واراضیسی بوچکندن اول اولدینی کبی تمامها محفوظ قالمق وجزائر سبعة مجتمعه جمهوری فرانسه لو طرفندن تصدیق اولنق شرائط اساسیه سی اون بش کونه دک لوندره شهرنده تصدیق اولنقدن صکره طرفندن مرخصلر تعیین ایله عامیین نام شهرده مصالحه عهدنامه سنک تنظیمنه مبادرت قلمق اوزره طرفیندن تعهد اولنمشدر .

اولوقت ایسه جنرال منو اسکندریه یی تخلیه وتسلیم ایتمش ایدی . لکن بوکا طرفینک وقوفی اولدیغندن خطه مصریه دن فرانسزلرک ال چکمی بر ماده اساسیه اوله رق قید اولنمش ایدی . واکر چندروز بومعاهده نکل امضاسی تاخیر ایدلمش اولسیدی اسکندریه نکل فتحی خبری آلمش اوله جنی جهتله بوکا مقابل انکلتره دولتی بشقه بر ماده اساسیه قزانه بیلوردی وبلکه مالطه نکل ترکنه موافقت ایتمزدی زیرا انکلتره دولتته کوره مالطه آطه سنک نه درجه لرده مهم اولدینی بیانه محتاج دکلد .

معاهده مذکوره فرانسزلر حقنده فاندلو اوله رق پوناپارته یه موجب شان وشهرت وانکلیزلره دخی بادی استراحت اولمسيله همان مواد عهدنامه نکل تنظیمی ایچون طرفیندن مرخصلر تعیینیه فرانسه نکل عامیین شهرنده مکالمه یه باشلامش واول ائنده فرانسه جمهوریه پورتکیز وبویاره وروسیه دولتری میانه لرنده دخی صلحنامه لر تنظیم وامضا اولنمش اولدیغندن بووجهله رونما اولان مصالحه عمومیه فرانسزلره مورث انشراح وابتهاج اوله رق شنلکلر وضايفلر ایله اظهار شادمانی ایتدکلری هنکامده برچوق انکلیزلر پارسه کلدکلرنده فرانسزلر طرفندن مظهر حسن قبول اوله رق طرفینک یکدیگر حقنده اولان التفات وموالاتی کورنلر بوالفت واتحادک حرص شان بلاسیله برسنه ظرفنده مبدل شقاق وعداوت اوله بیله جکنی تخطر ایده مزدی .

مصر مسئله سی اوزرینه دولت علیه فرانسه جمهورینه اعلان حرب ایتدکده پارس سفیری بولنان مورهلی سید علی افندی درسعادته عودت ایتمک اوزره فرانسه جمهورندن مکرر آرخصت ایسته مش ایسه ده درسعادته کی فرانسه ایلیجیسی توقیف



اولئش ایدو کندن اکا مقابل علی افندیئک عودتته دخی رخصت ویرلمدیکی جهتله یارسده کوز حبسنده کبی قالمشیدی نهایت فرانسه ایلیچیسلیه مبادلہ سنه قرار ویرلمش ایسه ده آنک اجراسنه دخی وقت مساعد اولدی مؤخرآ فرانسرلر یندن مصر الکاسی استخلاص اولندیغی کبی ارتق میانه ده باعث جدال اوله جق برشی قالدیغندن فرانسزلر علی افندی یه کافی السابق ایلیچی معامله سی ایدر اولدیلر وبروجه مشروح لوندرده انکلتره لویایه فرانسه لو بیننده عقد اولئان اساس مصالحه نامه سنک امضاسندن برهفته صکره یعنی تشرین اول فر نیکنک طقوزنده فرانسه خارجیه ناظر ی طایران یارسده علی افندی ایله دخی بر اساس معاهده سی عقد ایتشلر ایدی شویله که : بتون مصر اقلیمی فرانسه عساکر ندن تخلیه ودولت علیه یه رد وتسلیم اولنورق دولت علیه نک ممالک واراضیسی بوجنکدن مقدم اولدیغی وجه اوزره تمامها محفوظ قالمق ومصرک اولوجهله تخلیه سندن صکره طرف دولت علیه دن آخر دول حقنده هر نه مساعد اولور ایسه فرانسه لو حقنده دخی جاری اولق وجزائر سبعة مجتمعه جمهورینک وقبره ده کائن سابقاً وندیکلو محالیرینک نظامی فرانسه جمهوری طرفندن قبول ایله نظام مذکورک وقایه سنه فرانسه جمهوری ضامن وکفیل اولوب فرانسه جمهورینک بوضمان وکفالتی روسیه دولئنک کفالتی کبی جانب دولت علیه دن تصدیق وقبول قلمق وقبل السفر طرفین میانه لرنده جاری اولان شروط معاهده تمامها معتبر طوتلمق شرائط اساسیه سی حاوی بر معاهده نامه امضا ایلمش ایدی متعاقباً جزائر وتونس اوجاقلریله فرانسه دولتی بینلرنده دخی فرانسه تجار سفائنه تعرض اولئماق اوزره برر مقاله نامه امضالئمشدر .

انجق بروجه بالا انکلترده امضا اولئان اساس مصالحه نامه سنه انکلتره لو طرفندن مصر وجزائر سبعة حقنده ایکی ماده درج ایدلمش اولدیغندن دولت علیه مصالحه سنه وضع اساس ایدلمش دیمک اولدیغی جهتله پارس اساسندن صرف نظرله دولت علیه نک عهد وشروطی لوندره اساسنه بنا اولئماق اوزره دولت علیه مصالحتک دخی مکالمه یه مأمور اولان انکلیز مرخصنه احاله اولئمسنی در سعادتده کی انکلیز ایلیچیسلی باب عالی یه تکلیف ایدوب حالبوکه دولت علیه ایشنی بر اجنبی مرخصنه احاله ایتمک قطعاً جائز اوله میه جغندن باب عالی انکلیز ایلیچیسنک بوتکلیفی کوش قبول ایله اصغایده مدی وعامیین نام بلده ده عقد مصالحه ایچون تشکیل اولئان مجلس مکالمه ده دولت علیه مرخصنک دخی انکلیز مرخصیه بر لکده بولئمسنی انکلتره لو طلب ایتدکده بوکا دولت علیه موافقت ایدوب حتی سید علی افندی محل مکالمه یه کیدرک انکلیز مرخصنک معرفتی وروسیه مرخصنک انضمام رأی ایله عقد مصالحه ایلمسی ایچون کندوسنه

رخصت نامه کوندلمش و کرك فرانسه جمهورينك و كرك انكلتره دولتنك در سعادتده كي سفارتلرينه دخي بويولده برر قطعه تقرير و يرلمش ايديسه ده بوكا دخي فرانسه لو موافقت ايتامشيدى و پارس اساسنك تصديق اولتامسندن ناشي پوناپارته منفعل اوله رق طاليران طرفدن رئيس افندى يه كلان تحري رانده فرانسه جمهورى دولت عليه اياه مصالحه يه راغب ايديسه ده آخرك توسطنى استيموب منفرداً عقد مصالحه يه خواهشكر اولديغندن بجهله پارس اساسنك تصديق اولتمشى مصرح اولوب انكلتره دولتى دخي انكلتره اساسنك معتبر طو تلمسندده اصرار ايلردى .

دولت عليه ايسه هيچ بريسيلاه بوزشمق استمزدي زيرا انكلتره لو هنوز اسكندريه يي تخليه ايتيموب روسيه عسكرى دخي حالا جزائر سبعة دن چيقمامش اولدقلى جهته دولت عليه كندو متفقلى حقنده شبهه يه دوشه رك آنره قارشو فرانسه يي دخي بتون بتون الدن چيقارماق ايستردى . بناءً عليه آمدى و كيلى غالب افندى پارسه كيدو بده اوراده انكلتره و روسيه مرخصلرينى ارضا ايدر ك شان دولت عليه يه موافق صورتده عقد مصالحه ايلمك اوزره بارخصتنامه هاپون فرانسه يه كوندردلى واردوى هاپون در سعادتده كلك اوزره اولوب اولخالده ايسه آمدى و كالتى بالطبع لغو اوله جغندن غالب افندى عهدسنة اصالة آمدجيك مأموريتى بالتوجيه اردوى هاپونده اصالة آمدجى اولان ماهر افندى آمدى و كيلى اعتبار ايدلمشدر .

پوناپارته بروجه مشروح مصالحه عموميه جسمانيه ايله استراحت عامه يي حصوله كتورديكى كجى مصالحه روحانيه يي دخي حاصل ايتك يعنى فرانسه اهالي سيلاه پاپانك حكومت روحانيه سنى بارشدير مق اسبابنه صرف مساعى ايتمكده ايدى چونكه پوناپارته محاربات ايله مشغول اولديغى ائنهاده اصلاحات داخليه دن دخي كرو طور ميوب يوللارك تسويه سنه و قتاللر كشادينه و ضبط و ربط مملكته اقدام ايدر ك خارجاً و داخلأ نائل اولديغى نتايج مقبوله و مشكوره فرانسه اهالي سنى خوشنود ايديكى سره ده پاپاس كروهنى دخي تلطيف ايدر ك پاپا ايله محرمانه مخبره دن خالى اولزدى فقط وكلا و مأمورين كروهى و اهالينك متحيزان و متشخصانى دينسرلكده ثابت قدم اولدقلى رندن دين و مذهب حقنده بر نظام ايسته ميوب رؤساي روحانيه حقنده نهايت كندولرينه حقارت ايدلمه رك سربست براغلملى ايله اكتفا اولغى افكارنده بولندقلى رندن پوناپارته اول امرده جمهورك بازار تعطيلنه دائر اولان يساغنى رفع ايدر ك استيان بازار كوني و استيان جمهوريت سالنامه سنده مقيد اولان اونجى كون تعطيل ايلمك اوزره خلقه سربست و يرمش ايدى يعنى قاتواك مذهبنى تأسيس و اعلا ايتديسه ده خريستيانلغك يساغ اولديغى بيلدير مشيدى .

واگر چه پوناپارته نك اطوار استقلال كاریسندن طولای جمهوریت افكارنده متعصب اولان طاقم كندوسنه خصم جان اولدق قری كبی خاندان قرالیت طرفدارانی دخی علیهنده حرکت ایتمكده ایسه لرده پوناپارته بخت و طالعنه اعتماد و خالقك كندو طرفه اولان میل و توجهنه استناد ایله مستریج البال اوله رق فرانسه نك ترقیاته صرف مساعی ایتمكله برابر امور دینیسه نك دخی تنظیمنه بذل مجهود ایدرك پاپانك پارسده کی مرخصیه بو ائشاده بر قرار نامه تنظیم واهضا ایدوب بو كا اگر چه فرانسه مجلسلری اعضاسی مخالف بولمشلر ایسه ده پوناپارته بودرلو مخالفلره قولاق آصیوب سوز صاحب لرینی اقناعه چالشمقده ایدی .

ایشته بو ائشاده بروجه مشروح لوندرده معاهده اساسیه امضا اولمغله پوناپارته نك شان و نفوذی بر مرتبه ده تزايد ایدرك آرتق مذکور قرار نامه نك اعلاننه مانع قلامش ایسه ده بعضی اعضای مجلس طرفندن بو كا مخالفت اولنه جنی شیوع بولمغله اعلان رسمیی بر مدت ده تأخیر اولمق لازم كمشدر .

وینه اصلاحات ملكیه آره سنده پوناپارته عصرینك اك مشهور قانونخیلرینی جمع ایله بر ( قودسیوبل ) یعنی حقوق قانوننامه سی تالیقنه باشلامشدی بو ائشاده قانوننامه مذکور ختام بوله رق لاجل المعاینه شورای دولته ویریلوب قریباً نشر و اعلانی مقرر ایدی .

الحاصل پوناپارته لفظا باش قونسلوس اولدینی حالده معنی بر حکمدار مستقل اولوب كوندن كونه حكومت استقلالیه سی قوت بولمقده و خصماسی طرفندن آثار عداوت و مخالفت كورلدكجه افكار عمومیه نك كندوسنه میل و توجهی متزايد اولمقده ایدی .

### \* بعضی وقایع \*

عسس اورته سنك او طه باشیسی عبدالله آغا شهر رمضانك اون طقوزنجی كونی صباحلین ایاصوفیه جامعنه كلوب صباح نمازی ادا اولندقدن صكره سل سیف ایدرك بر كیمسه نی مجروح ایتدكدن صكره صوغوق قویی قپوسندن خروج ایله قارشوسنه كلان برصینی دخی جرح ایتدیكنی حربه جیار لدی المشاهده آرقه سندن صوبه ایله اوروب یره دوشورمك اخذ و كرفت ایله باب عالی به احضار ایتدكدرنده لدی الاستطاق عقلمه خالی كتورمش اولدینی تحقق ایتمكله سلیمانیه دارالشفاسنه كوندرلمشدر .

قائم مقام صدر عالی عبدالله پاشا عید فطرك ایكنجی كونی رسماً كلخانه به واروب عودتنده كندویه شدتلو نزول اصابت ایتمشیدی . فرداسی كه سنه توجهاتی كونیدر كمال ضعف و بیتابی ایله یتاغندن قالقوب و كورك او طه سنه چیقوب دعوتلو اولان ارباب مناصب حلول وقت توجهاته مترقب اولدق قری حالده قپودان پاشانك

قدومی اخبار اولنسی اوزرینه بالضروره قائم مقام پاشا کورک او طه سندن خروج و عرض او طه سنه دخول ایله دهلیزه وصولنده یوزی اوزرینه دوشمکله فی الحال کورک او طه سنه نقل و اعاده اولندقدنه نفس واپسین ودم انکشاف احوال یقینده حکیم باشی یتشوب قان آلمش ایسده تأثیری اولمیوب دران ساعت وفات ایله ترک منصب حیات ایلدیکی طرف پادشاهی به لدی العرض انتظار توجیهایت ایله مسلوب الاضطبار اولنلره قپودان پاشا الباس خلعت ایتمک اوزره اوراده اراده سنیه صادر اولدیغندن خط هایون ایله موشح دفتر موجنبجه قپودان پاشا الباس خلعت ایله ارباب مناصبی خدمت لرینه مأمور ایدوب بودهشت و حیرت ایله هر کس خانه سنه عودت ایلدی . متوفای مشار الیه دخی حکیم اوغلی علی پاشا مزاری قربنده دفن اولدی .

واصف افندی دیرکه بو کیفیت غرائب نوائب روز کاردن معدود اولسه سزا و غشاوۀ غفلت ایله روپوش عبرت اولنلره سبب تیقظ و ابتناء اولسه روادر سنه ده بر کره اجتماعی ممکن اولان ارباب حل و ربطه و اصحاب قبض و بسطه جناب قهار قدرت قاهره و عظمت باهره سنی اظهار و او مقوله لری خواب غفلتدن بیدار ایتمک ایچون تعیین ماده تخویف و انذار ایتمشکن حاضر اولنلرک اکثریسی قابل اتعاظ اولمیوب صور مطلوبه لری ذهلر ننده تصور و جهت تحصیل حطام دنیای توسیع دائرۀ امل ایله تفکر ایلدکلر ندن فضلله فلان منصب قاپه جقمی فلان دعوت اولنشمی عجا حال لر نیه منجر اوله جق مطلوب قلیل طالب کثیر دیره رک سویلشوب اطرافنی ار اشیدردقلری رأی العین مشهود و انسان نه درجه لرده مککور حرص و غفلت اولدیغی بودفغه دخی تجربه کذار ارباب شهود اولدی .

مشار الیه عبدالله پاشا اطنه لی وزیر عمر پاشانک صابندن یوز التمش ایکی تاریخنده تولد ایدوب پدری جده دن معز و لاء شامه کلدیکنده وفات ایتمکله استانبوله بالورود مرحوم حکیم زاده علی پاشا کریمه سنی تزوج ایتمک ملاسه سیله در سعادتجه کسب معرفیت و طشره خدمت لرینه مأمور اولوب واردینی یرلرده عاقلانه حرکت ایدرک بین الاقران نامدار اولسی اوزرینه در سعادت خدمت لر ننده دخی تجربه اولنسی طرف شاهانه دن امر اولنغله باشباقی قولغیله و متعاقباً چاوش باشلیق ایله بکام و بر سنه دن زیاده چاوش باشلیق ایتمکدن صکره ارتکابه دائر بعض احوال ایله اتهام اولنه رق عزت پاشا صدارت نده عزل ایله تلحکام اولمشیدی سامی ابوبکر پاشانک قائم مقام لمدن عزل نده رتبه وزارت ایله قائم مقام صدر عالی اولدی عاقل و مدبر و حسن خاتی حسبیله صغیر و کبیر کندوسندن خشنود و متشکر ایدی . و اصف افندی دیرکه مشار الیه حقدنه اسناد اولنان بخل و امساک دخی بی معنی اولوب خلق جمیع مالی بذل و تبذیر و اسراف

و تقیر ایتماک ایله تعیب و تعمیر اولماز جود و سخا و بذل و اعطا هر نقدر صفات  
مدوحه دن ایسه ده بین الافراط و التفریط اولماق لازمدر موجودی اتفاق ایله اصحاب  
ثروته عرض احتیاج ضعف تدبیردن منبعث برکار مذموم و عموم ناسک استخفاف  
و نقرته باعث برطور مشؤمدر .

برمنوال محرر عبدالله پاشانک وفاتی اوزرینه چاوشبائی مصطفی بك حضور هایونه  
دعوت ایله عهدہ سنه رتبه وزارت ایله صدارت عظمی قائم مقامنی توجیه بیورلدی .  
شوالک اون بشنجی پنجنه کیجه سی صدر اسبق شیخ الوزرا ملک محمد پاشا وفات  
ایدرك حلیه سی زینب سلطانک صوغوق چشمه مقابلنده بنا ایتدکری تر به ده مرحومه نك  
یانه دفن اولمشدر .

متوفای مشار ایله بیک یوز اوتوز ایکی تاریخنده میر میراندن بوسنوی الاصل اولان  
فدقلیلی سلیمان پاشانک صلبندن متولد و قرق سکزده پدروی طمانده قبودان ایکن  
امرای بحریه سلکنه داخل وعودتنده برمدت ترسانه کتخدانی ایتدکن صکره  
التمش بشده رتبه میر میرانی ایله قبودان دریا و التمش التیده رتبه وزارت نائل و سکزده  
عزل ایله استانکویده اقامته مأمور و طقوزده وزارتی بالابقا سالنیک سنجاغیله بکام  
و تمش برده سلطان مصطفانک جلوسی آواننده استانبوله دعوت اولنهرق زینب سلطان  
ازدواجیله شادکام و تمش ایکیده یانیه سنجاغی و توقیعی رتبه جلیله سی ایله قبه نشین  
و تمش یدیده و دین و سکزده بلغراد محافظه سنه مأمور و در عقب استانبوله دعوت  
ایله سلطان سراینده اقامت اوزره ایکن صدر اعظم اولان محسن زاده روم ایلیدن  
کنجه ده ک قائم مقام و طقوزده روم ایلی و ایسی اولهرق محل مأمور یته روان و سکسان  
تاریخنده قبودان دریا و سکسان برده عزل اولنهرق نشانچلیق ایله حایله لری سراینده  
مقیم و سکسان ایکی سفری ظهورنده قائم مقام صدر عالی و جلوس عبدالحمید خانیده  
قبودان دریا و طقسان سکزده عزل اولنهرق طشره منصب برنده طولاشمقده ایکن  
ایکیوز ایکیده عمل مانده پیردر دیهرک وزارتی رفع و املاکی مصادره ایله ساقزده  
اقامته مأمور و سلطان سلیمک جلوسنده وزارتی ابقا و قدیه منصبی ایله یکیدن احیا  
اولنوب ایکیوز التیده کندوسی دلسوخته ایدن یوسف پاشا اوزرینه صدر اعظم  
اولمش و سلفی حقنده هر درلو سعایته مقتدر ایکن عفو ایله معامله ایدرك کندو  
دخواهی اوزره جده و الیکله اکرام ایتمش ایدی ایکیوز طقوزده صدارتدن  
انفصال ایله یالیسنده اقامته مآذون اولوب بوکره بروجه بالاعازم داربقا اولمشدر .  
وجیه و ووقور و عادل و حلیم و سلیم و منصف و معتدل لطائفه مائل و اداره کلام  
و فقرات بدیع الانسجامده سبحان وائله مماثل بروزیر دریادل ایدی فقط افراط

اوزره این الجانب و متفذان عصر ایله اوغراشمقدن بغایت متجانب اوله رق مصالحی شوکا بوکا کوردیروب کندوسی اوزاقدن سیرجی کبی نظر ایدرجه سنه تساهل و قیدسزلق ایله تعیب اولنوردی رحمة الله علیه .

### \* روم ایلیک احوالی \*

روم ایلی اختلالنک مقدماتی بیک یوز سکسان ایکی سنه سنده واقع روسیه سفرندن بدأ ایله ایکیموز سنه سی سفرندن صکره آثار و خیمه سی کورلمکه باشلادی . شویله که : مقدا انظار اهلیده وزرانک مهابتی زیاده اولوب اعیان و دره بکلری برطرفدن باش کوستره مزلردی .

سکسان ایکی سفرنده بیکباشی و ذی قدرت نامیله اردوده تحشد ایدن اعیان و دره بکلری فی الاصل نامی لسانه آلمغه جسارت ایده مدکلری رجال دولت علیه ایله الفت ایدوب اولوقف بحسب الاقتضا وزرانک کرفتار اولدقلری تنکدستی و اقتدارسزلق سببیه طوائف عسکریه بیننده شان و نفوذلری قالدیغنی دخی مشاهده ایتمایله نظر لرنده مهابت وزرا قالدیغندن آرتق وزرای صایماز و ایجابنه کوره آره صره طوغریدن طوغری به در سعادته مراجعت ایلر و استانبولده کی رجال و کبار و مأمورین سائره دخی بو طریق ایله طشره ایشلرینه مداخله ایدر اولدیلر .

رفته رفته بو مداخله بر مرتبه به واردی که در سعادته کی کتبه اقلامدن بر قضاده درت بیک آقچهلق بر تیماره متصرف اولان بر افندی اول قضانک امور شرعیه و عرفیه سنه مداخله ایدر اولدی و اسافلدن بعضیاری بعض محال عالییه انتساب ایله برر محلك قپوکتخدالغنی آلوب طشره لردن جلب ایتدکلری هدایا و عطایا ایله اعظم رجال دولت علیه به تقلیداً استانبولده حشمت و دارات ایله قپوقپو کزوب هدیه و عطیه سی آلدقلری اشخاصک حقنده مداحلق ایتدکلرندن بشقه مباشر لکله طشره لره کیدن اوشاقلرینه برر کورک یا برر بارکیر و برنلر دخی بو یولده مدح و ثنا اولنور و بالعکس بو مقوله اتباعه اکر امده تقصیر ایدنلر خیانت و زور بالقی ایله اتهام قانور ایدی .

بناء علیه اعیان و دره بکلری گروهی استانبولده بررال پیدا ایدوب پیدرپی بو اوغورده ویردکلری عطایا و هدایانک بدلنی قات قات فقرا ورعیه دن تحصیل و استیفا ایدر لردی بو جهته وزرا و میر میرانک قدر و اعتبارلری پست و بو سببه طشره لرده ناموس حکومت شکست اولدی .

سفر مذکورده لوازم حریه نک تدارکنده قصور ایدلمش اولدیغندن و طوائف عسکریه نک نظاماتی مختل و رابطه و ضابطه عسکریه منحل اولمش ایدوکندن رونما اولان

پريشانقلر اوزرينه مدارای اسافه مجبوریت الویروب دلیل و تفنگچی ولوند  
طافندن مثلاً بش بیك غروش بخشش اعطاسیله مكافات اولنه كلان بردر لویرارلق  
ایدنلره میرمیرانلق و بعضیلرینه دفعه وزارت و یریلوب بومقوله لر ایسه اوقویوب  
یازمامش و تربیه کورماش دولت نولدییغنی بیلمز برکروه ظلمه دیمک اولدقلرندن  
ایشلری اضرار عباد و تخریب بلاد ایتمکدن عبارت ایدی وزرانک بو صنفی نزد  
دولتده مجرب الاحوال آدملر اولیوب کندولرینی دولته توصیه و تقدیم ایدنلر  
مجرد آچه و بوغچلرینی آلان مأمورین ایدی .

و سفر مذکوردن صکره نظر دولتده مستقل اولان خدمه دولتدن بعضیلری  
وزارتله درسعادتن طرد و تبعید اولنهرق وزارت بر نوع نفی و تأدیب حکمنه  
قولمغله طشره لرده بویله بر صنف وزرا دخی پیدا اولدیکه بونلر در دولتده تربیه  
اولنش ذاتلر ایسه ده استانبولجه مستقل اولدقلرندن واردقلری یرلرده اجرای  
نفوذ ایده مزلردی .

اعیان و دره بکلری بو ایکی صنف وزرای هیچه صایوب نفوذجه آنلره غلبه ایچون  
استانبولده متنفذ اولان بعض ذواته بولجه هدیه لر کوندرمکه و بو یولده خصمنه  
غلبه ایده میانلر دخی زوربالغه قیام ایله معیتلرنده بر مقدار سکبان بسلمکه باشلادیلر  
و چونکه وزرا و میرمیرانک نفوذلری قالدیغندن اعیان و دره بکلری رفته رفته  
طوائف ملوک طورینی طوتوب یکدیگری اوزرینه سفرایدرک بر لرینک مملکتلرینی  
ضبط و تصرف ایدر اولدیلر .

حتی کیفیت وفاتی بالاده مذکور اولان قائمقام عبد الله پاشانک مساعده سیله روم ایلی  
دره بکلرندن مشهور یلیق اوغلی سلستره اعیانی اولمشیکن روسجق اعیانی ترسنکلی  
اوغلی اسماعیل اغا یانی باشنده اویله بر یراماز رقیبک وجودینی استقال ایله اوزرینه  
سفر ایدرک آنی طرد ایله سلستره یه کندو طرفندن اعیان نصب و ارسال ایلمشدر .  
ایشته بو جهته هر بری زیاده عسکر بسلمکه مجبور اولدی و آرتق عسکره علوفه  
اعطاسندن عاجز اوله رق بونلری اهالی یه مجاناً اداره ایتدرمک و ایتدکاری  
یغما کرلکدن انغماض عین ایدیو یرمک طریقیه ادرنه جوارنده واقع قیرجه لی  
طاغلی و طونه یالینده واقع دلی اورمان اهالیسندن و ارناود طائفه سندن برطاق  
اشقیانی استفاده مجبور اولدیلر بو صورتله هر طرفده طاقم حیدود و اشقیای  
فرقه لری پیدا اولدی .

و بونلرک ایچنده ابتدا شهرت بولانلر قیرجه لی طاغلرندن ظهور ایدن طاقم اولدیغندن  
قیرجه لی و طاغلی اشقیاسی دیو زبازد اولدیلر یوخسه بونلر انواع طوائف و اقوامدن  
مرکب ایدی .

رجال دولت وسائر خدمه سلطنت منوال مشروح اوزره طشر دلردن آنچه و بوغچلر جلب ایله استانبولده زیاده ترین واحتمشامه قوبلدیلر بو کیفیت طریق علمیه سرایت ایله آنلر دخی آرپهلق ومعیشتر ایله اتباع ومتعاقباتلری اوزرینه توجیه ایتدرمش اولدقلری قضا منصبلرینی بیع من یزید یولنده زیاده آنچه ویرنله انابه ایدر وایتدیرر اولدقلرندن طشر دلرده یازی او قویه میان نأبلر پیدا اوله رق قدر و شان دولت کبی ناموس شریعت دخی بر باد اولدی واحقاق حقوق عباد امر اهمی بالطبع اعیان ودره بکی کروهندن اولان متغلبه یدینه کچدی .

اول عصرده قپوجی باشلیق وزارتیه موصل بررتبه رفیعه اولدیغندن بر مهم مصالحت ایچون طشر دلره بر قپوجی باشی مأمور اولدقده هر کس آنی صیار و صاقور ایکن بروجه مشروح اعیان ودره بکلری استانبولده برر ال پیدا ایدرک کیمی قپوجی باشلیق رتبه سی و کیمی بیوک امیر اخور پایه سی آلمش اولدقلری جهته در سعادتدن مأموریت مخصوصه ایله طشر دلره کوندریلان قپوجی باشلیرک قدر و حیثیتی قالمیوب او مقوله متغلبه کروهی هر ایشی استدکاری کبی کسوب بیچر اولدیلر و آرتق فرمان عالیلرک دخی حکم و تأثیری قالمدی .

الحاصل استانبولک طشره امورینه مداخله ده واقع اولان سوء استعمالاتی حسیبیه دولتک ایکی الی مثابه سنده اولان وزرا و حکامک قدر و نفوذی قالمیوب طشر دلرده بر طاقم متغلبه پیدا اولدی و آنلرک یک دیگره تغلب سو داسیله بر طاقم اشقیایی استخدام واستصحاب ایتلرندن طاعلی اشقیایی نامیله محل بمحل حیدود فرقه لری تگون ایتدی صکره لری آنلر دخی بو اشقیانک اداره سندن عاجز قاله رق روم ایلیده کی قصبات وقرانک اکثری پایمال اولدی .

نهایت دولت علیه بوکا بر چاره ارامغه مجبور اولدیغندن اشقیانک رفع وازاله سنه قالدیشوب حالبوکه بونلرک اوزرینه سوق ایتدیکی سر کرده لر دخی متغلبه کروهندن اولمغه اشقیانک استیصالندن صکره نوبت کندولرینه کله جکنی درک ایتدکلرندن ایشی بتورمک شویله طورسون اولکیدن زیاده اخلال ایلدیلر .

بو اختلالانک تر ایدینه بر سبب دخی دولتک تلون و ترددی ایدی . شویله که : متغلبه دن بریبی همان برسوز اوزرینه فرمانلوا ایدیلوب و اوزرینه سوق اولنان قوه عسکریه مغلوب اولیجق در حل عفو ایله ابقا اولنوب اول متغلب ایسه دولتک او امرینه امثال ایله کندو علیه نده بولنانلر دن اخذ انتقامه قیام ایدردی بونک اوزرینه آرتق اهالی دخی متغلبه و اشقییا کروهه ضروری اعانت ایدر اولدیلر و بومثللو احوال دیگر لره سوء امثال اوله رق نیجه اهل عرض کیمسه لر دخی متغلبه و اشقییا کروهه التحاق



ایلدیلر دولتجه اجرا آتده نقدر مسارعت لازم ایسه ایشه مباشرتده اولقدیر دور اندیشانه حرکت و مطالعه انجام و عاقبت لازمدر ایشه بودقیقه به رعایت اولمدیغندن روم ایلیده کی آتش فتنه و اختلال باصدمغه چالشدجه زیاده اشتعال بولدی و اولنان تدابیر بوفتنه او جاقلرینه کویا که برر کورک اولدی .

مقدما استقلال تام ایله حتی پاشا روم ایلی والیسی اولوب ادرنه حوالیسنگ اولدجه امنیت و آسایشی اعاده ایتمشیکن عزل اولنهرق مصلحت ینه طشره دن یتشمه حرب و ضرب اسحابی اولان وزیرایه حاله اولندی فقط و دین سرحدی بموقوله اشقیانک یومه سی اولدیغندن اول امرده پاسبان اوغانک استیصالنه ابتدار اولنوب بو ایسه دهها بیوک برغانله اولدیغندن قبودان پاشا سر عسکرلک عنوانیه و دین اوزرینه کیدوب انجق آنک معیتنده کی سرکرده لرك دخی اکثری هپ متغلبه دن اولدقاری جهته اجرای مراره موفق اولهمدی . و اول ائشاده مصر سفری ظهور ایدرک آرتق و دین مسئله سیله اوغراشمغه وقت مساعد اولدیغندن رتبه و زرات ایله پاسبان اوغلی و دینده ایقا اولندی لکن شر و مضرتی دهها زیاده و طاغلو اشقیاسنگ طغیانی فوق العاده اولدیغندن هنوز مصر سفری باقی ایکن روم ایلینگ اصلاح احواله اهتمام اولنق مجبوریتی الویردی و بالاده بیان اولدینی اوزره طیار پاشا دخی ادرنه جانینه کوندرلدی .

فقط تشبثات واقعه اتمام مصلحته کافی اوله میوب پاسبان اوغلی اوزرینه مأمور اولان روم ایلی والیسی کرچی عثمان پاشا دخی موفق و مظفر اوله مدیغندن ینه در دولته پرورده اولمش اسحاب و قوف و معلوماتدن بردانک روم ایلی جاننه تعیینه بوایشه باشلو برتدیر اولنق لازم کلدیکنه بناء سنه سابقه و قایبی صره سنده بیان اولدینی اوزره حتی پاشا بوسنه والیکنه تعیین اولمشیکن مأموریتی روم ایلی والیکنه تحویل اولنوب سانق کرچی عثمان پاشا محافظ عنوانیه برقوقجه ده اقامت ایتک اوزره عهدده سنه سلستره ایالتی توجیه بیورلمشیدی .

پاسبان اوغلی ایسه برکیجه بغته برقوقجه بی باصوب مدافعه و مقابله به میدان و یرمدیکندن عثمان پاشا اورادن فرار و کلوب راحوده استقرار وز زیاده آتاق و تعیینات و عدیله اطرافده طولاشان قپوسزلری باشنه طوپلامغه ابتدار ایلدیکی و اصل سمع دولت اولیجق آرتق اورالرده طولاشمی تخریب بلاددن بشقه برشیئی مفید اوله میه چیی معلوم اولدیغندن منصبی جاننه عودت ایلمسی کندویه امر و اشعار اولندقده باشنده کی سکا نلرک متراکم ایلقاری و یرلمدجه یرندن حرکت ایده میه چیی بیسانیه اعتدار ایتدیکندن و استدیکی مبالغه ایفاسنه خزینه دولتک حالی مساعد اولمدیغندن

سکبانلرک حال ودرجه لرینه کوره برر پارچه سرپشیدیره رک ارضا ایله اللردن  
 یقه سنی صیرمق اوزره کندوسنه درتیوز کیسه آچه کوندرلدی و آرتق روم  
 ایلیده بقاسی مناسب کورلیوب اناطولی سمته امراری لازمه خالدن کورلدیکنه  
 مینی اشبو اون التی سنه سی ربیع الاولک یکرمی بشنجی کونی عهده سنه دیار بکر  
 ایالتی و سلفی حسین پاشایه مرعش ایالتی و اغا حسین پاشایه دخی نیکبولی قلعه سی  
 محافظه سی شرطیله سلاستره ایالتی توجیه بیورلدی .

بو اختلالات حسبیله بلغراد محافظی مصطفی پاشانک عسکری فتح الاسلامده بولنوب  
 خیلی و قدنبرو خدمت دولدن مطرود اولان بلغراد یماقلری دخی بو وقت فترتی  
 فرصت اتخا ایدرک هان لیلای بلغراد قلعه سنه هجوم و دخول ایله قودان و آلائی  
 بکنی و محافظ پاشانک دیوان کاتبی اعدام و کندوسنی حبس ایلدیلر و پاشالردن  
 شکرانیتی و سکبان طاقنک مظالمندن شکایتی حاوی مزور و مصنع محضر لر ترتیب  
 ایدرک مخصوص آدملر ایله در سعادت کوندر دیلر بونلرک تادیبی لوزام امور دن ایسه ده  
 اول طرف دن دخی بر محاربه قپوسی آحق جائز اولمدیغنه مینی ایلروده بر چاره سنه  
 باقماق اوزره موقتاً اغماض و مسامحه یولنده معامله اولنق لازم کلدیکندن محافظ  
 پاشا ایله آر لربینی اصلاح ایتمک اوزره سابقاً سواری مقابله جیسی شامی راغب افندی  
 و محضراغا و کیلی حسن اغا او امر علیه و او جاق مکتوبی ایله بلغرا ده ارسال اولندیلر .

وروم ایلینک اصلاح احوالنه یته روم ایلی و ایسی حتی پاشا مأمور ایدیلهرک بش  
 سنه روم ایلیدن عزل اولنماسی ایچون صادر اولان خط هاپون ایله موشح امر عالی  
 کتخدای سر بو این حضرت شهر یاری عزت پاشا زاده محمد سعید بک ایله کندوسنه  
 ارسال اولندی و روم ایلینک بالجمله افراد عسکریه سی معینه مأمور ایدلر کدن بشقه  
 طوائف عسکریه حقنده شکر و شکایتی مشر و مؤثر و بلکه لدی الاقتضا بلاستیدان  
 تادیب و تلطیف لری رأینه مفوض و منحصر اولدیغی هر طرفه اعلان قانندی . و قدر  
 و شانی ترفیع ایچون سر عسکرلک عنوانی و یر یلهرک سر عسکر لکنی حاوی بشقه جه  
 امر عالی کوندرلدی .

بوسنه و ایسی وانی محمد پاشا علت رنده ابتلا ایله اداره مملکتدن عاجز قالدیغنه مینی  
 کلیویله اقامت ایتمک اوزره اوائل جمادی الاولاده عزل ایله یرینه آغریبوز محافظی  
 ابوبکر پاشا بوسنه و ایسی اولدی و منحل اولان آغریبوز سنجاغیله بندر محافظی  
 وزیر احمد پاشا بکام بیورلمش ایسه ده حتی پاشا طرفه و یریلان استقلال حسبیله  
 آغریبوز سنجاغنی احمد پاشا دن تحویل ایله په لوان زاده محمد پاشایه توجیه ایتر مشدر .  
 وینه بو ائنده سر بست زاده محمد اغا ادرنه بستانجی باشیسی نصب اولنمشیکن حتی

پاشا تکفور طاغلی عثمان اغایی بستانچی باشی نصب ایدرک محمد اغایی آینوروز طرفنه  
نقی و تغریب ایلمشدر .

و پاسبان اوغلنک تجوزاتنه ممانعت ایله اظهار ثبات و صداقت ایتمکده اولان افلاق  
ویوهدهسی علسکساندری بک بو ائناده نامزاج اولوب بو حالدده ایسه اداره امورده  
مقتدر اوله میه جنی بیانیله استعفا ایلدیکندن در سعادته کلوب خانه سنده اقامت ایتمک  
اوزره جمادی الاخره نیک اون ایکنجی کونی عزل ایله برقاچ سنه لر دنبرو افلاق  
رعایای پاسبان اوغلی سببیه خسار دیده اولدقلرندن مقدمات برقاچ دفعه افلاق  
ویوهدهسی اولان میخال بک رعایای مرقومه بی تجریم و تغریم ایتمک و مباشریه دن  
غیری عواید و زوئاد اولماق اوزره افلاق ویوهدهسی نصب اولنه رق بحر آوار نه یه  
واوردان بکرش جانینه کوندرلدی .

بروجه مشروح حقی پاشا سرعسکرک عنوانیه و استقلال تام ایله روم ایلینک اصلاح  
احواله مأمور اوله رق ادرنه ده اقامت ایله ایفای وظیفه مأموریته مبادرت ایدوب حالبوکه  
فی الاصل کندوسنک کبر و تعظمندن اکثر ارکان دولت دلگیر اولدینی حالدده بودفده  
روئما اولان اطوار و اوضاعی جمله سنه کران کلدی و بالاده بیان اولدینی اوزره  
بروقدنبرو و طشره لک کوچک و بیوک ایشلرینه استانبولدن مداخله اولنمغله  
آیشلمش اولدینی حالدده بردنبره بور و ابیطی قیرو بده طوغریدن طوغری یه  
هرایشی کندو کورمکه و توجهاتی ایستدیکی وجهه اجرا ایتدیرمکه قیام ایلمسی  
داخل و خارجه ده چوق کیمسه لک منافعه طوقوندی قالدیکه روم ایلینک اصلاح  
احوالی طاغلی اشقیاسنک ازاله و استیصالی دیمک ایسه ده بونده متغلبه نیک کسر  
نفوذ و تحکمی معناسی دخی مستر اولوب بوا یسه روم ایلی اعیان و دره بکلرینک  
معاملاتنه و آنلرک در سعادته منتسب اولدقلری یرلرک تمتعانه طوقونور بر کیفیت  
اولدیندن داخل و خارجه ده بوا اصلاحاتی ایستیمانلر چوق ایدی حقی پاشا  
ایسه ایشه اول قدر شدت خود سرانه ایله باشلادی که اکا حال وزمانک تحمل  
و مساعده سی یوق ایدی .

مع هذا بالاده بیان اولدینی اوزره کرچی عثمان پاشا عهده سنه دیار بکر ایالتی توجیه  
اولنمش ایسه ده عثمان پاشا دولتدن امین اوله مدینی جهته اناطولی جانینه کچمک  
استمیوب باشنه برچوق قپوسر ارادلی جمع ایله طونه یالینسده اودخی بیانی بر باغی  
صورتنده کورنمکله شاید ادرنه جانینه کلور اندیشه سیله حقی پاشا تلاش ایدرک  
کندوسنی ادرنه ده محافظه ایچون بر طاقم سکیان جمعیه قیام ایدوب بو وجهه تلاشه دوشمسی  
دخی حامل اولدینی منصب ساعی سرعسکرینک شاننه خلل کتورمش ایدی .

بناءً عليه بش سنه عزل اولنماق اوزره نصب اولمشيكن بش التي آى ظرفنده عزله لزوم كوريله رك مقدما كندوسنك كيتخداسى اولان فله اعيانى عمر اغا عهدده سنه شوالك يكرمى دردنده رتبه وزارتله روم ايلي واليلى بالتوجيه ظاهرده بلغراد محافظلى عنوانيله روم ايلي به كوندريلوب حقى پاشا ايسه فى الاصل مستشعر اولديغى حالده بوقضيه دن دخى شهبه به ذاهب اوله رق عمر پاشايى ادرنيه اوغرا تمامق طورنده كورنديكندن عمر پاشا تكفور طاغنه كيدوب حقى پاشانك رفع وزارتيله مالنك مصادره سى وكندوسنك ساقز جزيره سنه نفى واجلاسى حقمده اصدار بيورلمش اولان امر على بنى تبه دلى على پاشانك مخدومى اولوب ادرنده حقى پاشا معيتمده بولنان ميرميران مختار پاشايه خفيه ارسال اتمسى اوزرينه مختار پاشا امر على بنى حقى پاشايه ارانه ودرحال كندوسنى ساقز جزيره سنه ارسال ايله ايفاي مأموريتيه مسارعت ايلمش ايسه ده ادرنده بولنان ارناود عسكرى گذشته علوفه ليرنى مطالبه ايله حقى پاشانك اكثر اموالى يغما ايتدكرندن مختار پاشا بر مقدارينى استرداد ايله مشغول اولديغى ائشاده عمر پاشا ادرنيه كله رك دفع غائله به اهتمام ايلمش ايسه ده ارناود لر علوفه طليله غلو ايدوب سهولته اسكانلى قابل اوله مديغى جهته اوزرلرينه ادرنه اهايمسى تسليط اولمغله آنر دخى برقاچ محله تحصن ايدر ك شهره آتش القا ايله جنكه قيام ايتدكرندن ناچار عمر پاشا علوفه ليرنه محسوباً بر مقدار آچه واشيا ويرمكله ارناود لر بونلرى قبض ايدوب عمر پاشانك اوغليده رهن آله رق خارج شهره چيقمش اولدقلى خبر دهشت اثرى اواسط ذى القعدة ده در سعاده واصل اولدى .

بالاده بيان اولنديغى اوزره مأموريت مخصوصه ايله بلغرا ده كوندريلان راغب افندى ايله او جاق مباشرى بلغرا ده وارد قلدنده قول لين ايله يماقلى الزام ايدوب آنر دخى رضاي دولته توفيق حركته سوز ويرماريله راغب افندى او جاق مباشرى در سعاده عودت ايتشار ايدى .

مع مافيه بوندن بويله مصطفى پاشانك بلغرا ده بقاسى موافق حال ومصاحبت اوله ميه جغندن مأموريتى اسماعيل محافظه سنه تحويل و اسماعيله بولنان محمد پاشا عهدده سنه سلسره ايالتيله ودين ونيكبولى سنجاقلى ونيكبوليده اولان وزير حسن پاشايه بلغرا ده محافظلى توجيه بيورلمش ايدى .

ايشته بوائشاده او جاق طور ناچيلرندن بلغرا ده اغاسى اولان خليل اغا بلغرا ده يماقلى اخلال واضلال وبلغرا ده قاضيسى نعمان پاشا زاده سعاده افندى بنى جمعيت اختلافيه ادخال ايله مصطفى پاشايى اعدام ايتديروب اموال واشياسنى ميانه لرنده بايلاشمش لر در .

بلغراد یمقلربنک بووجهه غلو وطغیانلری خبری ارکان دولتی یحضور ایدوب تأدیب و تربیهلری فرض اولمش ایسه ده و دین طرفی پاسبان اوغلتک ید تغلبنده اولوب بر طرفدن دخی طاغلو اشقیاسی طاقم طاقم طولاشمقده اولدقلرندن بلغراد اشقیاسنک تأدیب و تربیهلرینه بریول اولمیوب فقط ذخیره یوللرینی قطع ایله تضییقلری وودین اشقیاسیله برلشاملری ایچون بوسنه والیدی وزیر بکر پاشا نیش موقعنه تعیین وسائر طرق و معابر سد و تحصین اولندقدن بشقه قارشو طرفدن ذخیره ویرلما سیچون اوستریا دولته دخی اشعار کیفیت ایدلدی .

الحاصل بحسب الوقت اشقیانک تأدیب و تربیه سنه بشقه چاره اولمدیغدن مجرد ذخیره سز لکله تضییقلرینه ابتدار اولندی . اشقیای مرقومه دخی مصطفی پاشا قضیه سی کندوبی بیلمز و معقول سوزی دکله مز بر طاقم دلی قانولرک ایثی اولمغله در حال اخذ و گرفت اولنهرق جزالری ترتیب اولندیغی و قضیه ده مدخلی اولنلردن بر ایکی شخص فرار ایتمش ایسه ده هر نه وقت بلغراده کلور لر ایسه اخذ و ازاله لری میانلرنده قرار کبر اولدیغی عرض و افاده سیله چبودان پاشایی شفیع اتخاذا یدرک باب دولته التجا و عفو و صفح ایله معامله بیورلمسنی نیاز ورجا ایتلری اوزرینه فیما بعد ایراد جدید خزینه سی وارداتنه تعرض ایتاملری وودین طرفه ذخیره وسائر ویراملری و محافظ جدید حسن پاشانک امرینه اطاعت ایله هر خصوصه رضای دولته توفیق حرکت ایلملری شرطیله عفوی ناقابل اولان جنایتلری حقنده حسب الحال عفو ایله معامله بیورلدی و سابقاً اسپارته متسلمی قپوچی باشی حسین اغا بلغراد محصلی تعیین بیوریله رق اول جانبه کوندردلی .

کرك خليل اغانك و كرك سعدالله افنديك ترتيب جزالری الزم کورلمکله کویاکه یمقلرک تالیف و اسمالتنده سعدالله افنديك حسن خدمتی سبق ایتمش یوللومکافاة عهدده سنه اسکدار مولوتی توجیه ایله وقت ضبطی تقرب ایتدی کل منصبکی ضبط ایت دیو در سعادت دعوت اولنمشیدی . سعدالله افندی سیئات سابقه سی تذکر ایله بو باده تردد ایتمش ایسه ده کوستریلان صورت تأمینیه اوزرینه در سعادت کلدیکی کبی اشارت شیخ الاسلامی ایله ردوس جزیره سنه نفی و اثنای راهده تسمیم ایله اعدام اولنمشدر . خلیل اغانک اعدامنده عسرت کورلمکله وقت فرصته انتظار اولنهرق ایکی سنه صکره اودخی ادرنده اعدام اولنمشدر . شویله که : بلغراددن بوسنه اغالغنه طالب اولدقده استدعاسنه مساعده اولنوب انجق اوراده دخی اعدامی ممکن اوله مدی بعده ینه کندو استدعاسی اوزرینه ادرنه اغاسی نصب اولنوب ادرنه یر ورونده مقدمجه اصدار اولنان امر عالی موجبنجه مخنوقاً اعدام قانمشدر .

برمنوال مشروح روم ایلیده طرف طرف رونما اولان آثار قتنه وفسادك دفعنه چالیشدیجه ازیادی بولدیغندن وكرك اشقیا ایچنده وكرك آنلك علیهنده استخدام اولنان سكبائلر آره سنده بولنهرق جراد منتشر کبی روم ایلیك هر طرفنه یایلمش اولان علوفه لو ارناود عسکرینك اکثری تپه دلنی علی پاشایه منسوب اولان طوسقه طائفه سی اولدیغندن آنلك رغبه آورهته روم ایلیدن اخراج ایله مملکتلرینه اعاده لرینه وزیر مشار ایله مقتدر اولدیغندن بروجه محرر ادرنه ده ظهوره کلان وقعه جیغیه اوزرینه روم ایلی ایاتی انضمامیه سرعسکرلك مشار ایله تپه دلنی علی پاشا عهده سنه توجیه بیورلدی آنجق علی پاشا برو طرفله حرکته کغعلق طرفندن اندیشه واحتراز اوزره بولدیغنه مبنی اشقودره متصرفی وزیر ابراهیم پاشا ایله میانه لرینی اصلاح ایتمک اوزره خواجکان دیوان هایوندن اکیلی مصطفی افندی اول جانبه کوندرلدی طاغلو اشقیاسی ایسه تپه دلنی علی پاشانك کندو اوزر لرینه مأموریتدن خوف ایدرك فیابعد اسکان اولنه جقلری محالرده عرض وادب لر یله استقرار ایتمک وتمعینلرندن اوچویوزقدر کیمسه یی رهن اوله رق کندوسنه تسلیم ایله دولتی تأمین ایلمک اوزره اکا دخالت والتجا ایدوب او دخی کیفیتی باب عالی یه عرض ایتمکله روم ایلی ده کائن متنفذان مملکت بر محله عقد جمعیت ایدرك اشقیا میانه داخل اولان یرلورلی تفریق ایله بیانجیلری طرد و دفع ایلمک اوزره علی پاشایه خطاباً فرمان عالی اصدار بیور یابوب انجق بو امر اهمه نظارت ایتمک اوزره اعظام رجال دولت علیه دن برینك مأموریتی دخی لازم کلکین چاوشباشی عثمان افندی مجمع اتخاذ اولنه جق محله وارمق اوزره مأمور ایدلدی .

\* قوه بجزیه و بریه یه دأر بعض افادات \*

زیرده (۱۴) رقیبه درج اولنان جدولده محرر اولدیغی اوزره بوئانده دولت علیه ترسانه سنده موجود اولان ایجه دونمادن بشقه اوچ انبارلی و قالیون و فرقتین و قوروت اولمق اوزره التمش بر قطعه جنك سفینه سی اولوب بودخی اولوقتك حکمنجه ایجه بر قوت ایدی واکر چه بونلری اداره یه کافی اوله جق قدر معلوماتلو ضابط و معلم نفرات بجزیه یوغیدی مع مافیه اولدجه ایشه یارار عساکر بجزیه یتشدرمه دخی سعی اولنه یوردی اما اولوقت دولت علیه نك قوه بریه سی برطاق متغلبه واشقیادن عبارت اولوب بونلری یکدیگری علیه نه سوق ایله بیهوده یره قیردرمه قد ایدی واکر چه ترتیبه تثبت استدیکی نظام جدید عسکری لوند چختلکننده واسکدارده تعلیم اولنمقده ایسه ده بونلر درجه کفایه ده دکل ایدی و بو عساکر

معلمه نك تزديدن بشقه دولت عليه جه چاره اولديني برمرته دها واضح وعيان اولديغدن همان بو خصوصه حصر همت اولمق اوزره قويا عزم ونيت اولمشيدي .

( وقايع سنه ۱۲۱۷ )

كرك لوند چفتلكنده و كرك اسكدار قشاه سنده تعليم اولنمقده اولان نظام جديد عسكرى پياده اوله رق معلم سواري ترتيبى دخی لازمه حالدن ايسه ده سواري بسلمك مصارف كلييه موقوف اولوب ايراد جديد خزينه سى ايسه بوكا متحمل اولديغدن شمدي به قدر تأخير اولمشيدي كيفيت بين الوكلا كراراً مشاوره اوله رق مقدمه اولدجه تحت انتظامه ادخال اولنان ارباب زعامت وتيمارك اشكينجى لرى نظام جديد اوجاغنه الحاق ايله يكي دن بر مصرف قپوسى آچلمقسز ين معلم سواري ترتيبه قرار ويره رك اول امرده بولى سنجانغى لوند چفتلكنه و خداوندكار سنجانغى اسكدار قشاه سنه ربط ايله تشويقات لازمه اجرا اولدقدن صكره عموماً اناطولى و قرمان ايا لترلنده واقع الويه نفراتى نظام جديد اوجاغنه ربط اولنمغه الويه مرقومه نك باجمله ارباب زعامت وتيمارى فوج فوج لوند چفتلكنه و اسكدار قشاه سنه كله رك سواري تعليمه دخی مباشرت اولدى و نظامات متفرعه لر ينك اجرا آتى معلم عسكرى ناظرى رشيد افندي به حواله قاندى .

مصر واليسى خسرو پاشا صعيد ايجنده رهنورد وادى عصيان اولان امرای مصر به اوزرينه خيلى عسكرى سوق ايتمش ايسه ده بو كره ارمننده واقع اولان محاربه ده كوله منلر غالب كلوب آنك اوزرينه عربان دخی آنلره اتفاق ايدرك طريق وانجايى سد ايتلر يله مصر ك انبارى مئابه سنده اولان صعيددن ذخيره گلز اولديغى جهته مصرده ذخائر ك بهاسى بك غالى اولمشيدي .

واكر چه خسرو پاشا معيتمنده كى عسكرى كوله منلره نسبتله ده ازياده ايدى لكن ضابطه و رابطه لرى اولديغدن كوله منلر ك غلبه سى كوندن كونه آرتقمده ايدى خسرو پاشا باشى بوزوق عسكركله بوجه مطلوب ايش كوريله ميه جكنى جزم ايلديكندن بو اننده دنخواه دولته موافق اوله رق مصرده بر طاقم يبا نجي لردن و بر آزده سپاه كوله لردن مركب و مخلوط اولمق اوزره نظام جديد عسكرى ترتيب ايله تعليم و تربيه لر ينه شروع ايلدى واشبو عسا كر معلمه ايجون بر قشله انشاسنه مباشرت ايله اتمامنه آشورى مرتبه همت و مسارعت ايده يوردى .

جمادى الثانيه ده كوله منلر ك زياده غلبه سى تحقق ايتكله اوزر لر ينه مصر دن مجدداً بر فرقه سوق اولدى بو فرقه نك باشموني سر چشمه محمد على ايدى كه مؤخر ا شرط توارث ايله مصر واليكنى قزائمش اولان مشهور محمد على پاشادر .





امریله اول طرفه کوندرملکله واروب کندوسیله لدی الملاقاة طور وحرکتی بکنمدیکندن برتقریب ایله یانندن صا ووشوب درسعاده کله رک کیفیتی عرض و بیان ایتمکده تکرار نصح وپندی شامل تحریرات ارسال و بوحرکت نابجادن غرضی نه اولدینی سؤال اولندیغنه جواباً وارد اولان تحریراتنده ارناودلر آیلقلربی آلمدقجه سبیلنی تخلیه ایتیمه جکلربی اشعار ایتسیله سوء نیتی میداننه چقدیغندن باب عالیده و حضور هایونده بعض خواص ایله لدی الاستشاره توغ و سنجاجی رفع ووزارتی ترقین اولمق و مخالفت ایتمدیکی تقدیرده حقدنه معامله جبرییه اجرا قلمق اوزره قرار ویریلهرک بومألده صادر اولان امرعالی زعم مباشرتیه طرفه کوندرلدکده امرعالییه اطاعتنی تذکار ایتمکله برابر زره یه کیدرسه برابر کیتمک اوزره باشنده کی اشقیانک عهد و پیمان ایلمش اولدقلربی و شهریه لربی طلب و اخذ ایتمک اوزره کندوسنی جبراً استانبوله طوغری کوتورمک قصدنده بولندقلربی و کندوسی آنلرک اللرنده اسیرکبی قالب بوبابده مجبور و معذور ایدوکنی انها و اشعار ایتسی اوزرینه وکلای دولت دمبسته حیرت اولهرق همان کرک عثمان پاشانک و کرک هوادارلرینک ازاله و جودلری امرنده اطراف و اکنافه تحریرات کوندرلدی . و ادرنده مقیم ته دلنی زاده مختار پاشا برغوس موقعنه تعیین بیورلدی واکرچه عثمان پاشا فرقه سی عصیان حالده بولمشلر ایهده طاغلو اشقیاسنک بونلره دخی امنیتی اولمدیغی جهتله یینلرنده اتفاق حصولی چندان مأمول اولماغله برابر بوقارغشه لقدمه طاغلو اشقیاسی فرجه بوله رق تکفور طاعنی قولدن شاشقنلق ویرملری ملحوظ اولدیغندن از نکمید متصرفی وزیر عثمان پاشا اول حوالی عسکریه چورلی طرفه کچورلدی لوند چقناکننده و اسکدارده کی عساکر معلمه دخی سلوری طرفه چیقارلدی بعده اشقیای ویزه و سرای جوارنده واقع قریه لره منتشر و عثمان پاشا بوکار حصارنده مستقر اولدقلری تحقق ایدیجک حضور هایونده بالاستشاره بوخصوصه تعیین اولنان عسکرک اداره سنه قوی الاقدار برذاتک مأمور ایدلمسنه قرار ویریلهرک همان قبودان پاشا مأمور بیوریلوب اطرافدن جلب اولنان عساکردن بشقه معینه بش اورته یکیکچری و مقدار کافی طوبجی و عربه جی و خنبره جی دخی ویرلدی عثمان پاشانک مقدما قبودان پاشایه وارد اولان تحریراتنه جواب اولمق و حقیقت حالده بووسیله ایله برآز وقت قزانلمق اوزره قبودان پاشا بوطورک سوء عاقبتی بیان و باشنده کی جمعیتی تفریق ایله منافسانه عزیمت ایدوبده امر پادشاهی برینی بولدقدنضکره بر منصب ایله رتبه و وزارتی ایفا اولنه جغنی و عدینی درمیان ایدرک یازوب کوندردیکی تحریراتنه جواباً عثمان پاشا طرفدن تقدیم اولنان مکتوبده

ینه اوضاع ناهموارک ظهوری امر ضروری اولدیغنی واختیاری التده اولسه امر پادشاهی به هر وجهه کردن داده اطاعت اوله جغنی بیان ایتدیکی کبی معیتنده کی ارناودلر طرفندن کندولرینک امر تعیشلری عسکرلکه منحصر و آیلقرینی آله مدقلری تقدیرده معذور الحال اوله جقلری ظاهر اولدیغندن بختله استرحام سیاقنده محضرلر کلشیدی .

بونک اوزرینه وکلای دولت وارکان سلطنت بوامرک تدیرنده ایکی فرقه اولوب بعضیلری ارناودلرک بر مقدار شی اعطاسیله اراضی و عثمان پاشانک دخی جرمی عفو ایله طلبکار اولدیغنی سلستره والیلکننده ابقاسی صورتنی تذکر و بعضیلری دخی قوه موجوده ایله اوزرینه واریلهرق مستحق اولدقلری مجازانک اجراسیله شان دولتک محافظه بیورلمسنی تدیر ایدوب لدی الموازنه رأی ثانی شان دولته اوفق ایسهده اجراسنه جسارت اولنه مدیغنی جهته رأی اول اوزره حرکت اولنهرق عطیه نامیله ارناودلره اوچ بیک کیسه آخچه و عثمان پاشایه دخی ابقای وزارتیه سلستره ایاتی ویریلهرک اگرچه غائله سکونت بولدی لکن ناموس دولت پایمال و سائر اشقیایه سوء مثال اولدی .

حالبوکه عثمان پاشا بونک اوزرینه دولتدن امین اوله مدیغنی کبی باشنده کی ارناودلر دخی برحال تفرقه به دوشدکلرنده برر برر دوچار نخچه مجازات اولمق خوفیه آنک باشندن طاغلمق ایستمیوب بو حال ایله بر مدت اسلمیه جانبنده کشت و کنار ایتدیار نهایت پلاسی محمد پاشاکه بواننده وزارتی ابقا اولنوب قیوسنی تنظیم ایله ادرنه جوارینه کلش و عهدسه آغریبوز سنجاغنی توجیه ایدلمش ایدی آنک طرفندن عثمان پاشا معیتنه اوچ بیک قدر عسکر کوندریلهرک و کندوسنه تأمینات قویه ویریلهرک بو عسکر قوتیه باشنده کی ارناودلر کوچ حال ایله اقتاع و یوللرده یم ویه جکلری ویریلهرک مملکتلرینه ارجاع اولندقلدن صکره کرجی عثمان پاشا دخی منصبی جانبنه حرکت ایلمش ایسهده بونک اوزرینه کندوسنده اطمینان تام اولدیغنی جهته دائره سی خلقی مکمل اولهرق حرکت ایدوب روسجق اهالیسی دخی بویه غلبه لکله اورایه وارمسنی ایستمدکلرندن وزرای سائره کبی معتدل دائره ایله شهره کیرمسنی رجا و اخطار ایتلری اوزرینه میانهده مبانیت رونما اولدیغندن چند ماه صکره عثمان پاشایه اناطولی ایاتی بالتوجیه منحل اولان سلستره ایاتی دخی وزیر یوسف پاشایه احاله ایله تسویه مصاححت ایدلمشدر .

دولت علیه بروجه مشروح کرجی عثمان پاشا غائله سی ایله مشغول اولوب طاغلی اشقیاسی اوزرینه مأمور اولان روم ایلی والیسی تپه دلتلی علی پاشانک دخی اوچ آیدنبرو یرندن حرکت ایتامسی گروه اشقیانک شمار مسنه سبب اولمسیله پاسبان

اوغلی طاقی قوت بولدیغدن طونه یالیسندہ طاعلی اشقیاسنک برفرقہ سی افلاق  
 جانہ کذار ایله غارت ویغما یہ ابتدار ایتمری اوزرینہ محافظہ یہ مأمور اولان آیدین  
 پاشا ایله ابرائیل ناظری قارشو کلہرک اشقیانک براقچ یوزینی اعدام ایله دفع صائلہ  
 اہتمام ایتمش لر ایدی . انجق افلاق ویوہ دہ سی میخال بک محافظہ مملکت ایچون  
 مقدجہ روم طائفہ سندن جمع ایلمش اولدیغی ایکی بیک نفر ایله بکرش پیشکاہندہ  
 بولدیغی خالدہ بروجہ مشروح اشقیانک افلاقہ دخولاری خبری بکرشہ وارد  
 اولدیغی کبی اشبوروم طائفہ سی بکرشی یغما ایدرک طاعلمش اولدقلرندن میخال بک  
 دخی بکرشی ترک ایله اوستریا طرفہ صاوشمش وبکرشک ذی قدرت اولنلری ترک  
 وطن ایتمش اولدقلری وبونک اوزرینہ حسن پاشا ایله ترسنکلی اوغلی افلاق یقہسنہ  
 کذار ودفع اشقیایا ایله ضبط وربط مملکتہ ابتدار ایلدکری سمع دولتہ واصل  
 اولدقدہ بو اختلالک دفع ورفغہ باقلمق وتیزالان افلاقہ بر ویوہ دہ کوندرملک  
 لازمہ حالدن اولسایہ دلی قسطنطین بک افلاق بکلکنہ انتخاب اولندیسہ دہ ضعف  
 حالی سببیلہ طائفہ عسکر یہ نک تراکم ایدن آیلقلرینی ایفا ایدہ میہ جکی جہتلہ بغداد  
 ویوہ دہ سی طرفندن یوز بیک غروش اعضاسیلہ اعانہ اولتمق خصوصی قپوکت خدالریہ  
 لدی الافادہ کثرت دیون ومرتبندن بختلہ بغداد ویوہ دہ لغندن یوز بیک غروشک  
 اداسی قابل اولمہ جغنی بیان وفقط ایشار یولنہ کیرنجیہ دک افلاق ویوہ دہ لغنی بغداد  
 ویوہ دہ لغنہ الحاق اولنور ایسہ حسن ادارہ مملکتہ اہتمام اولنہ جغنی درمیان ایتملریلہ  
 افلاق ایاتی موقتاً بغداد ویوہ دہ لغنہ الحاق اولندی وهر طرفدن اشقیایا اوزرینہ هجوم  
 اولنہرق آرتق اشقیایا قارشو طرفدہ طورہ میوب خائباً وخاسرا بروطرفہ مرورہ  
 مجبور اولملریلہ فتنہ باصلدی ومیخال بک دخی تاملین واستمالت ایله درسعادتہ کتورلدی  
 روم ایلی والیسی تپہ دللی علی پاشا مخدومی مختار پاشانک تر حالہ سنجاغیلہ بکام بیورلمسینی  
 استعدا ایدوب عہدہ سنہ محول اولان حطب جسم سرعسکری حسبیلہ بومثللو  
 مستدعیاتنہ مساعدہ اولتمق لازمہ حال ومصاحتدن کورلمکله اواسط ربیع الاولدہ  
 تر حالہ سنجاغنک مختار پاشایہ توجیبی باخط هایون ارادہ بیورلمش ایسہ دہ صدر  
 اعظمک درسعادتہ وصولی تقرب ایلمش اولدیغدن قائم مقام پاشا بونک اجراسینی  
 قدوم صدر عالی بہ تعالیق ایله تأخیر ایتمشیدی و چونکہ علی پاشا سرعسکر لکله روم ایلی  
 والیسی اولہلی خیلی وقت مرور ایتمشیکن یرندن حرکت ایتمیوب اوزاقدن تدبیر  
 امور ایله یانہ طرفدہ یرلشمک واوغلنیدہ جوارینہ جلبلہ یرندہ کولکشمک کبی  
 شہہ بی دعوت ایدہ بیلہ جاک بر حال وطور دہ کور ندیکندن قائم مقام پاشانک بونی  
 تأخیر ایتمسی سببسر دکل ایدی فقط قپودان پاشا مخصوصاً بوایش ایچون باب عالی یہ

كلهرك خصوص مذکورك سبب تأخیری استفسار وقائم مقام پاشا صدر اعضك ورویدینه تعلیق النسب اولدیغنی بیان واطظار ایدوب بوندن طولایی بینلرنده ظهوره کلان مناقشه اوزرینه قبودان پاشا نفوذ و اقبالنه استناداً هان رئیس وکیلنی جلبه توجیه امرینی یازدر دقن صکره ترسانه یتمشدر .

\* بعض وقایع در سعادت \*

دول اجنبیه تبعه سنك ادخالات و اخر اجاتده ویره جككری رسم كمرک عهدنامه لرده مصرح اولوب اما محصول بلده اوله رق بر محلدن محل آخره نقل و فروخت ایله اجرا ایتدككری تجارت داخلیه ده تبعه دولت علیه ایله مساوات اوزره رسم ویرملری لازم كلور ایكن اجنبیلر بونده دخی تجارت خارجه كبی یالكز عهدنامه لرده مصرح اولان رسم كمرکی و یروب مقدا اجنبیلرک ممالك محر و سده تجارت داخلیه لری جزئیات قییلندن اولمسيله بوكا چندان اهمیت ویرلمز ایدی لکن بو اوانده تبعه اجنبیه نك تجارت داخلیه ایله اشتغاللری تككز ایتدیككندن و تبعه دولت علیه تجارت داخلیه لرنده آنلردن زیاده رسملر ویره كلوب بومساواتسزلق ایسه تبعه دولت علیه نك تجارتی اخلال و تعطیل ایلدیككندن تبعه اجنبیه بوندن بو یله ممالك محر و سده ایده جككاری تجارت داخلیه لرنده عینیه رعایای دولت علیه دن اولان تجارك و یردكاری كمرک وسائر رسومی اعطا ایلماری اشبو اون یدی سنه سی اوائلنده نظامه ربط اولنه رق مقام ریاستدن سفارتلره رسمی تقریرلر ویرلمشدر .

ربیع الآ خرك اوچنجی كونی صدر اعظم حیدر پاشا حراسنه و اورادن آلائی والا ایله اسكدار اسكله سنه كلوب شیخ الاسلام افندی ایله برابر صندال سوار و قبودان پاشا ایله قائم مقام پاشا دخی آنلره قفادار اوله رق بشكطاشه كذار ایله حضور هاپونه چیقدرلرنده صدر اعظم طرف شاهانه دن عظیم التفاته مظهر اولدقن صکره صدارت عظمایه متفرع اولان امورك اجراسنه مباشرت ایتمشدر .

ربیع الآ خرك التتجی كونی كتخدای صدر عالی مورهلی عثمان افندی و چاوشباشی عارف افندی عزل ایله حبوبات ناظری احمد عاطف افندی كتخدای صدر عالی و سابقاً صدر اعظم كتخداسی سعدالله افندی چاوش باشی و شهر امینی سید محمد افندی حبوبات ناظری و درویش افندی زاده مصطفی بك شهر امینی و رفیق مصطفی افندی مكتوبی صدر عالی و سابق حمید افندی تذکره جی اولدی قائم مقام مصطفی پاشا دخی دخی اوائل ربیع الآ خرده منصبی اولان مورهل جانبنه عزیمت ایلدی .

ترسانه طرفنده كی ذخیره انبارلرینك بعضیسی بالاده بیان اولندیغنی اوزره مجدداً انشا اولنان حوض کبر ساحه سنه آلتقی لازم كادیككندن احمد عاطف افندی نظارتیه

اسکدار طرفده در تیوز یکر می بیک کیله ذخیره استیعاب ایدر بر انبار انباشته  
مباشرت اولنمشیدی بو کره عاطف افندی کتخدای صدر عالی اولدیسده باشلامش  
اولدینی ابنه نیک اتمامی ینه آنک عهده سنه حواله اولنمش و آرزو قظ طرفده اتمام قلمشدر  
اتمانه تاریخ اولمق اوزره سروری افندی (حق بوانبار بلندی ایده کنز البرکات)  
مصراعنی نظم ایلمشدر .

صدر اعظمک شفاعتیه پاسبان اوغلی عثمان پاشانک دخی واسط ربیع الآخرده وزارت  
ایفا ایله طرف صدر اعظمیدن کندوسنه تنیسات لازمه بی حاوی امر نامه سامی یازلدی .  
بالاده بیان اولدینی اوزره میخال بکک بکرشدن فراری اوزرینه افلاق اهلایسنک  
دوچار اولدینی تلاش واضطراب روسیه لویه باعث سؤال وجواب اوله رق بوباده  
خیلی تعریض و اعتراضه استدار و افلاق و بغداد بکاری بلا سبب عزل و نصب  
اولنه بوردیو بروقتدن برو شکایت ایتمکده اولدینی حالده بو کره دخی اول بجئی تکرار  
و مملکتین بکاری نیک قید حیات ایله یاخود یدی سنه مدت ایله نصب اولنملری امرنده  
اصرار ایتمکدن ناشی وکلای دولت بر طرفدن دخی بوماده نیک مباحثه و مکمله سیاه  
مشغول اوله رق چوق مناقشه لردن صکره مملکتینک امتیازات قدیمه سی تأیید اولنمغه  
برابر یدی سنه کچمدکجه بکارک عزل اولنماسی و بومدت طرفنده تهمتی ظهور ایله  
عزلی لازم کلورسه روسیه لویه بالخبره طرفیندن تحقیق ماده اولنه رق ثابت  
اولدقن صکره عزل اولنه بیلمسی کبی بعض امتیازاتک علاوه سنه قرار و یریله رک  
دفع قیل و قال ایدلمش اولدینغه و پاسبان اوغلی نیک عفو و اطلاق حسبیله افلاجه امنیت  
حصوله کیش دیمک اولسنه مبنی مقدا بغداد و یوده لغنده استقامتی مجرب اولان  
ایسلانی علیکساندرینک اوغلی قسطنطین بک دخی جمادی الاولانک ایکنجی کونی  
افلاق و یوده سی نصب ایدلدی .

کندوسنه خطا باصا در اولان فرمان عالینک صورتی زیرده (۱۵) رقمه ایراد اولتور .  
بغدا نه دخی افکاری تأمین ایده جک احتجاب لیاقت و حیثیتدن برینک و یوه ده نصبی  
لازمه حالدن اولسنیله برقاچ دفعه تجربه سی سبق ایتمش اولان قسطنطین بک زاده  
الکساندری مروز ی بو ائنده بغداد بکی نصب اولنمشدر .

بالاده بیان اولدینی اوزره فرانسیه کوندریلان آمدی غالب افندی پارسه موصلت  
و فرانسه خارجیه ناظری طالیران ایله مکمله یه مبادرت ایله رونما اولان مشکلاتک  
حل و تسویه سنه موفق اوله رق صفرک یکر می در دنجی کونی مصالحه نامه نیک طرفیندن  
امضا اولنمش اولدینی خبری بو ائنده بالورود موجب مسار نامعدود اولمشدر .

بو عهد نامه ده شروط و عهود سابقه تأیید اولنمغه برابر قره دکر ده فرانسز تجار

سفینه لرینگ سیر و حرکته دخی رخصت ویرلمشدر . صورت عهدنامه زیرده (۱۶)  
رقبیه ایراد اولنور .

بووجهله فرانسه لویه قره دکتر یولی آچلدینی حالده انکلیز لره قبالو طور مق قابل  
اولیه جغندن بینه اول ائنده انکلیز تجار سفینه لرینگ دخی سر بست اوله ر ق قره دکتر ده  
کشت و کذار ایتملی ایچون رسما رخصت ویرلمشدر .

زرد دولت عایه ده غالب افندینک بوسعی مشکور اوله ر ق طرف شاهانه دن کندوسنه  
بش کیسه فائضلو برسهم احسان بیورلدی .

بروجه مشروح فرانسه لویه ایله عقد مصالحه اولدینی کچی یدی قله ده موقوف اولان  
فرانسه مصالحتکنذاری موسیو روفن فرانسه جمهوری طرفندن در سعادت ایلیچیبی  
تعیین اولنان موسیو بورونک ورودینه قدر کما فی السابق مصالحتکنذاری ق  
وظیفه سنی ایفا ایلمشدر .

خلال محرمدیه مصر طرفنده کی انکلیز عساکری جیزه دن حرکت وقصیر وسویش  
طریقیه هندستان جانبنه عودت ایتمشدر ایدی . بو صورتله دولت علیه غائله خارجه دن  
قورتلدیسه ده انکلیز لره اسکندریه نی هنوز ترک ایتململی بادی فکر واندیشه  
ایدی واسکندریه ده کی دولت علیه مأمور لریله منازعه لری اکسک دکل ایدی  
ورده دولت علیه امرای مصریه به بشقه دیارده منصب ومأموریت وعد ایدرک  
مصری کوله منلرک لندن قورتار مق املنده اولوب امرایسه کما فی السابق مصرده  
متحکم اولمق وهیچ اولماز ایسه سعید قطعه سی تماماً کندولرینه ترک اولمق خصوصده  
اصرار ایدیلور لردی انکلیز لره دخی آنلری تصحب وحمایه داعیه سنده اولملری  
مصر حقیقده در دست اولان نظاماتک اجراسنه مانع اولمقده ایدی .

بناءً علیه اسکندریه نکل تحلیه سنی طلب ایتمک اوزره بو ائنده خواجکان دیوان همایوندن  
صدق افندی مأموریت مخصوصه ایله لوندره به کوندردی وانکلتره دولتی بر موجب  
معاهده مالطه نی تحلیه ایتمک ایستمدیکندن انکلیز وفرانسز ملتلی میانلرنده بینه  
برودت وینونت ظهوره کله رک طرفین یکدیگری غزته لرنده فصل ومذمته باشلایوب  
حتی پونا پارتیه انکلیز غزته لرینگ فرانسه به دخولنی یساع ایلمدیکی والحاصل طرفینده  
امارات مختاصه رونما اوله ر ق مصالحه عمومیه خلل پذیر اولمق اوزره بولسدینی  
ایشیدلمکده ایدی .

ومقدما وهران ساحلنده قضا زده اولان بر فرانسز کیسندن خلاص بولان الی نفر  
فرانسز ملاحلری جزیره تابع عربان یدنده اسیر اولوب بو آنه قدر صالیویرلماش  
اولدقلرندن ودیکر بعض مواد دن طولانی فرانسه جمهوریله جزائر اواجی بیننده

برودت تحذیر ایلیکی خالدہ علی روایۃ انکلتہ لو طرفدن جزائرلو تشجیع و تشویق اولنگلہ فرانسه لو طرفہ جواب رد و اظهار معاملہ بد اولدیغندن بوکا دائر فرانسه امور اجنبیہ سی ناظری طالیران طرفدن آمدی غالب افندی یہ ویرلمش اولان تقریری غالب افندی باب عالی یہ کوندرمش ایدوکنہ مبنی درسعادتہ مقیم فرانسه ایلیچسیلہ مذاکرہ و بین الوکلا مشاورہ اولندقدن صکرہ غرب او جاقلرینہ نظارتی اولان قبودان پاشا طرفدن سوز اکلار برذاتک مأموریت مخصوصہ ایلہ جزائرہ کوندرلمسنہ قرار و یریلہ رک اجراسنہ تثبیت اولندیغی صرہہ جزائرلور ایلہ فرانسلو بیندہ عقد مصالحہ ایلہ غائلہ نک برطرف اولدیغی خبری آلمشدر .

بوآواندہ سردارلر کاتبی محمد صادق افندی صرہ امینی نصب اولتمش ایسہدہ قدرتسز لکنندن بحملہ صورت اعتذارده بولندیغندن عزل ایلہ یرینہ صدر اعظمک قیوجیلر کتبخناسی اولان صبغة الله افندی نصب ایلہ طرف شاهانہ دن و منتظم الحال اولان عظمای رجال دولت علیہ طرفلرندن کندوسنہ برر مقدار اعانہ اولتہرق ایفای مأموریت ایدہ بیلہجک درجہ اقتدارہ کتورلمشدر .

مصر دفترداری محمد شریف افندی مصر والیسی خسرو پاشانک اطوار و احکامندن خوشنود اولہ مدیغی جہتلہ استعفا ایلمش اولدیغندن اوائل جمادی الآخرہ ده عزل ایلہ یرینہ اولطرفک احوالہ و قوفی اولان دفتردار سابق محمد رجائی افندی نصب اولدی . لیکن شریف افندیکن ہر حال و حرکتدن مصر اہالیسی ممنون و متشکر بولندقلری جہتلہ عزلنی خبر آدقلری کبی کوچوکی و بیوکی پک زیادہ مکرر اولمشدر . و مصر خزینہ سنک اجمال محاسباتی ضبط و امور حسابیہ سنی برقاعدہ منتظمہ یہ ربط ایلہ برابر امور اوقافہ دخی نظارت ایتمک اوزرہ اصحاب درایت و لیاقتدن برذاتک مصر دفترداری معیتہ مأموریتی ایجاب مصالحندن کورلمکلہ مدرسین کر آمدن اولوب اردوی ہایون قاضیسنہ نیاتی اوانندہ ماہیتی معلوم صدرعالی اولان رامز عبداللہ افندی اوائل رجبہ طریق علمیہ دن اخراج و خواجکان دیوان ہایون صنفسہ ادخال و ادراج ایلہ بو مأموریتہ تعیین ایدیلہ رک و کولہ منلرہ دائر کندوسنہ تعلیمات خفیہ و یریلہ رک ابتدا اسکندریہ یہ چیقوبدہ انکلیز جنرالی ایلہ ملاقات و مذاکرہ مصلحت و محصول مذاکراتی درسعادتہ عرض و انہا ایتدکدن صکرہ مصرہ واروب ایفای وظیفہ اصلیہ یہ مبادرت ایتمک اوزرہ کندویہ جانب میریدن مقدار کفایہ خر جراح اعطاسیلہ اولطرفہ کوندرلدی .

دیار بکرک داخل و خارجندہ برطاقم قنالقلر وقوعہ کلککہ باشلا یوب زہدی اسماعل پاشا دفع فساد و اختلالہ مقتدر اولدیغندن اواسط جمادی الاولادہ مأموریتی سیواس والیکنہ

تحويل ايله سيواس واليسى مصطفى پاشا ديار بكر واليسى نصب اولمش ايدى .  
متعاقباً ايکسى دخی وفات ايتمکله ديار بكر اياتى يافه ده محصور اولان ابو مرق  
محمد پاشايه توجيه بيورلمشدر .

چونکه سنه سابقه وقايى صره سنده بيان اولديغى اوزره جزار پاشا طرفدن يافا  
اوزرينه سوق اولنان اردو يافا حراسنه واردقده محمد پاشانك عسکريه لى التقابل  
محمدپاشانك قوه الظهرى اولان حواری عسکرى جزار پاشا طرفنه دوئمکله محمدپاشا  
يافا قلعهسنه کيروب تحصن ايدرك وقوع حالى در دولته عرض ايلديكى ائشاده امارت  
حاج منصبى دخی کندوسنه توجيه اولمشيدى . حالبوکه محمد پاشايه امداد واعانه اولنوبده  
جزارک نچه سندن تخليصى قابل اولسه دخی زمان مروريه امور حاجک عقده  
تاخيره دوچار اوله جنى درکار اولديغدن کماکان امارت حاج ايله شام اياتى عظم  
زاده وزير عبدالله پاشايه واوزرنده اولان قرمان اياتى متصرف سابق وزيرعلاءالدين  
پاشايه ابقاء توجيه اولندى . وجزار پاشايه دخی يافانك محاصره سندن فارغ اولسى  
ايچون امرعلى کوندرلمش ايسهده جزار بونى اصفا ايتميرک برأ و بجرأ يافاي حصر  
وتضييق ايتمکله محمد پاشا مأيوس اولديغى حالده اول صولرده کشت و کذار اوزره  
اولان دونمى هايون باشوغى طوب صداسنى استماع وهان يافايه کلوب کيفيته کسب  
اطلاع ايديجک جزارک قايتلرينى اورادن دفع وطر د ايله ذکر طرفنى کشاد ايتدکن  
بشقه درسعادتن دخی بجرأ الی يوز ارناود عسکرى کوندرلمش اولديغدن  
ارناودلرک وصولنده محمدپاشايه قوت قلب کلهرک مدافعه يه ايچه استعداد حاصل ايتمش  
اوله جنى درکار ايسهده امارت حاج منصبک عهده سندن صرف و تحويلى نفوذينه  
خلل وهمتته کسل کتوره جيکى ملحوظ اولديغدن برآى اول وفاتى خبرى ککش اولان  
سالف الذکر مصطفى پاشا عهده سنده بولنان ديار بكر اياتى ابو مرق محمد پاشا عهده سنه  
وانک اوزرنده بولنان قدس شريف سنجاغى متصرفانى ديماط محافظى وايچ ايل  
سنجاغى متصرفى اولان ميرميران احمد پاشايه الحاقا توجيه اولمشيکن زهدى پاشانك  
دخی وفاتى خبرى کلمکله سيواس اياتى علاءالدين پاشايه وقرمان اياتى از نکميد  
متصرفى ميرميران ظاهر پاشايه توجيه قلندى .

متوفاي مشار اليه زهدى پاشا ميرآخور اول ايکن کندو طباي اوزرينه عهده سنه  
رتبه وزارت ايله ديار بكر اياتى توجيه اولنوب انجق ديار بكرک هواسيلاه امتراج  
ايدميه رک اداره مملکته دخی کرکى کي موفق اوله مديغدن بروجه بالا مأموريتى  
سيواس ايلته تحويل بيورلمشيکن سيواس واليکنک خبرى هنوز کندوسنه واصل  
اولدن جمادى الاولى اواسطنده وفات ايلمشدر امى عامى ايکن مجلسه مناسب سوز  
بولمقده ماهر وضرب نطق ايله خصمى الزامه قادر بردات ايتمش حتى ميرآخور اول



ایکن قوجیلر کتخداسی بولسان شمس الدین بکک زیاده مقبل و مقبول اولدیغنی و کندو منصبه طالب ایدوکنی بیلوب دائماً آندن مستشعر و متفکر اولدیغنی حالده شهر رمضان شریفده عظمای دولتدن برینک افطارینه واروب صاحب خانه یاقیسی دکشدرمک اوزره ایکن او طهیه کیردکارنده کندوسنه خطاباً صاحب خانه نک بک افندی سزکده یاقکز وارمی دیمسنه جواباً اقدم بنده کرده پهوان یاقیسی واردر دیمی اوزرینه زره کده دیجک ارقه مده دیدیکی تلمیح ملیح قیلندن اولمق اوزره اولوقت بین الظرفا زبازد اولدیغنی مرویدر سنی الی یه بالغ اولدیغنی حالده می و محبودن دستشوی فراغت اوله مدینی جهته بعضاً (ایام عمر واصل اولوب حد غایته \* حیفاهوس کسامدی محبوب و باده دن) یتنی یاد ایله اظهار تأثر ایدرمش تجاوز الله عن سیئاته .

برالشم احواله کلنجه بروجه مشروح جزار پاشا یافانک محاصره سنه دوام ایلدیکندن کندوسنک مغضوب پادشاهی اولدیغنه واکا تابع اولنلرک اطاعت پادشاهیدن چیقمش اوله جقلری جهته دملری هدر اوله جفته دائر و اهل اسلامک آنکله مقابله سی مشروع اولدیغنی جهته اوزرینه دونمائی هایون ایله عساکر و افیه کوندرملک اوزره اولدیغنی مشعر و اول جوار اهالیسنک جزارک طاقیه اختلاط ایتماملرینی آمر اول حوالی یه فرمانلر کوندرلدی .

بونک اوزرینه جزارک خلا فیکرانی چوغالمغله امیر بشیری اله آلمق اوزره بعض کساننی توسط ایدوب اودخی دفع بلا ضمنتده بر مقدار آنچه ارسالنه مبادرت ایلدیکی صره ده مشایخ یزبکه امیر بشیرک عزلی ایچون جزاره مراجعت ایتمش ایه ده یافا ایله مشغول اولدیغندن مسؤلارینه مساعده ایده میوب یافانک محاصره سنی تشدید ایلمش ویافاده ذخیره قالمیوب اهالیسی آتاتی میکه مجبور اولدقلرندن محمد پاشا چاره سز قبریسه فرار و اورادن دخی حلب طریقله منصبی اولان دیار بکره کیتمک اوزره لازیمه کذار ایتمش اولدیغندن جزار یافایی ضبط ایتدکن صکره امیر بشیری طرد ایله امیر عباسی جبل حکومتته اعاده عزیمت ایلمش ایه ده اولوقت بلاد نابلس صاحبی اولان یوسف جرار ایله آره سی بوزلدیغندن جزارک عسکری سانور قلعه سنده یوسف جراری محاصره ایدرک پک شدتلو محاربه لر و قوعیه طریفندن پک چوق آدملر تلف اولمش و بوجهته امیر بشیر بوسنه دخی بلا معارض جبل حکومتده استقرار بولمشدر .

### \* وقایع عراق \*

اشبو اون یدی سنه سی اوائلنده و هایلر کر بلایی اورمش اولدقلرندن طولایی دفع مضر تلی و برده اوریلان محل ممالک محروسه دن اولدیغنی حالده شیعیلرک مطاف

وزیارتکاهی واهالیسی شیعی اولمق حسیله ایرانیلر بغداد اراضیسندن مرور ایله وهابیلردن اخذنار ایتمک سوداسنه دوشملری ملحوظ اولدیغندن اولطرفی اسکات ایله بیلهجک برتدبیر اولنسی دردست تذکر ایکن بغداد والیسی سلیمان پاشانک وفاتی خبری آلمشدر .

تفصیل حال بومنوال اوزره درکه بیک اکیوزاون درت سنسندنه نجف اشرفه کلان خزاعل عشیرتی زواریله اخذ واعطا ایچون ککش اولان وهابی قافله سی میانه لرنده منازعه ظهور ایدرک خزاعل زواری اوچوز قدر وهابی قتل واعدام ایلمش اولدقلری خبری بغداد والیسی سلیمان پاشایه واصل اولدقده وهابیلرک بوندنطولایی اخذناره قیام ایله جکاری ملاحظه سیله بووقعه نی خوش کورمامشیدی قالدیکه خزاعلدن السلمان فرقه سی طریق فرمان بریدن انحراف ایله ابنای سیله ایصال خسار ایدر اولدقلردن اون بش سنه سی خلاننده اوزر لرینه سلیمان پاشا کتخداسی علی پاشاسفر ایدرک اشقیای مرقومہ نی اوروب خیلی ماللری اغتنام ایدرک دائرۃ انقیاده کتورمشیدی . مذکور نجف وقعه سی رئیس وهابیان اولان عبدالعزیزک مسموعی اولیجق بونی مقدا لحسا سفر نده اوغلی سعود ایله عقد اولنان مصالحه نک نقض ایدلمش اولمسنه حمل ایله مقتول اولان اوچوز نفرک دبت کامله لری طرفه ارسال ایله ادا اولنمز ایسه کندوسی دخی نقض عهده مجبور اوله جغنی جانب بغداده تحریر ایلمش اولدیغندن شرائط مسالمنی تجدید ایچون شایزاده لردن عبد العزیز بک سلیمان پاشا طرفندن عبدالعزیز وهابی جانبه کوندرلمشیدی . عبد العزیز بک هر قدر ایشک سلم وصال ایله تسویه سنه سعی ایش ایسه ده عبد العزیز وهابی موافقت ایتوب نجف وقعه سنه بدل اولمق اوزره عنه مقاطعه سندن بصره یه قدر شامیه جهنتک کندویه ویرلمسنی مطالبه والانقض عهده ایله جکنی افاده ایلمش اولدیغندن وهابیلرک سوء نیتلری اکلاشلمش وجانب عراقه تعرض ایتمک اوزره حرکتلری ایشیدلمش اولدیغندن کتخدا علی پاشا اون التی سنه سی صفرینک اوائلنده احتیاطاً عساکر کلیه ایله هندیه جانبه حرکت ایتدکده شفاتہ طرفه وهابیلرک برفرقه سی ککش اولدیغنی استخبار ایدرک شایزاده محمد بک معیتله ایکی بیک قدر عسکر سوق ایدوب عساکر مرقومه شفاتہ جوارنده بیک قدر وهابیلرک تصادف ایتشلر ایسه ده وهابیلرک تفنک انداز اوله رق دوه لرینی چوکدیروب متریس اتخا ایله مدافعه یه مهیا اولملریله و بغداد عسکری قارشولرینه نزول ایله وقت ظهره قدر طور مشار ایسه ده وهابیلر میدانه چیقه میوب بغداد عسکری دخی صوسزلقدن عودته مجبور اولدقلری جهته طرفین بالاحرار به یکدیگر دن آیرلمشدر . علی پاشا چندماه اول حوالیده اقامت ایله اطراف وانحانک محافظه سنه احاله نظر دقت

ایتد کد نصره مذکور اون التي سنه سی جمادی الاولی سنه بغداده عودت ایتمش  
 و بو ائناده هفک و جلیحه عشیرت لری طریق عصیانه سلوک ایلمش اولدقلرندن متعاقباً  
 بغداددن چیقوب بر ایکی آی قدر بونلرک تربیه سیله اوراشمش ایدی و بو ائناده بابان  
 پاشا لرندن اولوب بغدادده مقیم اولان عبدالرحمن پاشا تک طور میوب برادری و کوی  
 و حریرر سنجاقلری متصرفی اولان سلیم بکک دخی کوی سنجاغنده خلاف مرضی  
 حرکتی ایشیدلمکله عبدالرحمن پاشا اخذ و حبس و برادری سلیم بک عزل و جلب  
 اولنه رق ایکیسی بردن حایه نفی اولنمش و کوی و حریرر سنجاقلری تیمور پاشا زاده  
 محمود پاشا اوغلی محمد بکه پاشا لک عنوانیله توجیه قلمش ایدی و سنه مرقومه او اخرنده  
 طاعون ظهور ایله بغدادده یومیه التمش یتمش نفوس تلف اولدینی جهته حکومت  
 مأمور لرینه زیاده شاشقنلک کش اولدینی حالد سلیمان پاشا و جمع مفاصله مبتلا اوله رق  
 بتون بتون عملدن قلمشیدی و اگر چه اولوقت هرايش کتخدا علی پاشا یدنده ایدی  
 لکن عرب و کرد و ترک جمله سنک جهت وحدت انضاطی والی اولد یغندن آنک تکدر  
 احوالی مصالحک عمومته فنا تأثیر ایلردی قالدیکه بونجه سنه لر دنبرو اولحوالیده صیت  
 و شان قزائمش اولان بروالینسک ضعف حالی مصاحتجه نه درجه لرده مضر ایدوکی  
 بیاندن مستغیدر .

ایشته اول ائناده عبدالعزیز وهابی اوغلی سعودی عساکر کلیه ایله جانب عراقه  
 کوندرمش اولدینی منتفق شیخی حمود الثامر طرفندن اشعار اولمغله کتخدا علی  
 پاشا هندیه یه کیتمک اوزره بر مقدار عسکرله دوره منزلته واروب بعض عساکر  
 و عشائرک التحاق و اجتماعه انتظار اوزره ایکن اشبو اون یدی سنه سی او ائلنده  
 وهابیلرک کر بلای اوروب ایکی بیکن متجاوز نفوسی اعدام ایلدیکری خبری آلمشدر .  
 چونکه وهابیلرک غرضی شیعیلر دن نجف و قعه سی انتقامی آلمق خصوصی ایسه ده  
 نجف قصبه سنک اطرافی سور ایله محاط اولدینی جهته اورایه کیره میه جنک لری  
 بیلدکلرندن اکا بدل کر بلا قصبه سی اوره غه عزم ایدرک شیعیلرک ماتم کیجه سنه  
 مترصد اولوب اهالی قصبه اول کیجه مألوف اولدقلری مشغله ماتم ایله بی تاب  
 و توان و سربالین خواب کران اولدقلری حالد وهابیلر قصبه یه دخول ایله اوکلرینه  
 کلانی اعدام و افنا و بولدقلری اموال و اشیایی غارت و یغما ایتد کد نصره حضرت  
 حسین رضی الله عنه مشهده معلق اولان سیم وزر قنديللری و سائر تحف  
 و یادکار لری اخذ ایله جانب درعیه یه عودت ایتمشدر .

کتخدا علی پاشا دوره منزلنده بو خبر موحشی آلدینی کبی شاويزاده محمد بکی  
 بغداده تسیر و کیفیت سلیمان پاشایه اشعار و اخبار ایله برابر کندوسی دخی یاننده کی

جزئی عسکره کر بلایه طوغری الغار ایلمش ایسه ده و هایلر قوشاق وقتنه قدر یاهه جقلرینی یاهدکنصره صاوشوب کیتمش اولدقلری خبری اثنای راهده واصل اولغاه علی پاشا بعض مصالح ضمننده حلهده توقف ایتمشدر .

بغدادده طاعون عاتی مستمر و سلیمان پاشا وجع مفاصلدن متألم و متأثر اولدیغی حالده بوخبر موحشی آلیجق بر مرتبه ده دخلون و خسته حال اولدی وهان کیفیتنی باب عالییه عرض و انها ایله برابر ایران شاهنه دخی بیان حال ایلدی . علی پاشا ایکی بوچق آی قدر هندیه طرفنده اقامت و کر بلانک اطرافنه سور انشاسنه و حله قصبه سنک اطرافنه خندق اعمالنه مباشرت ایله اکلنه مأمور لر تعیین ایتمکدنصره نجف و کر بلاده برر مقدار عسکر براغوب کندوسی بغدادده عودت ایلمشدر و بو ائناده سلیمان پاشانک دامادی سلیم اغا دخی بصره متصرفلغندن منفصلا بغدادده کیشدر .

کر بلا و قعه سی حکمدار ایران اولان فتحعلی شاهک سمعنه واصل اولیجق بتون ارکان دولته ماتم البسه سی کیدردی و سلیمان پاشایه اولجه محافظه قیدنده اولدیغی ایچون توخینامه یازوب و هایلردن اخذ ناز ایتمسنی توصیه و اشعار و الا کندوسی عسا کر کلیه ایله کلوب و هایلری استیصال ایتمکدنصره بغداد اوزرینه هجوم ایده جکنی اخبار ایلمشدر .

سلیمان پاشانک خسته ایکی ایسه کوندن کونه مشتمد اوله رق حال احتضاره کلدکده بیوک دامادی کتخدا علی پاشا ایله دیگر دامادلری اولان خزینه داری داود اغا و مومی ایله سلیم اغا و قبوجیلر کتخداسی نصیف اغانی احضار ایله امور ولایتی علی پاشایه وصیت و دیگر لرینک اکا اطاعت و یکدیگره تظاهر و معاونت ایتملری ایچون جمله سنه پند و نصیحت ایتمکدنصره اشبو اون یدی سنه سی ربیع الآخرینک سکنزنجی کونی عازم دارالسلام اولمشدر .

متوفای مشارالیه ماردین و یوهده سی محمد افندینک کوله لرندن اولوب وافندیسنک و فاتنده بغداد و الیمسی قوجه سلیمان پاشا دائره سنه انتساب ایدوب او دخی وفات ایتمکده بغداد و الیمسی اولان عمر پاشا کندوسی اندرون چوقداری ایتمکدنصره ناصیه حائنده آثار مردانکی و رویت مشهود اولدیغنه بناء ارسال لیمه ایتمدیره رک بصره متسلمی نصب ایتمشیدی عمر پاشا وقعه سننده ظهوره کلان تبدلات و لاهه حسینیه بغدادک امر اداره سنه عارض اولان اختلال و فترت زند کریم خانه بادیء جرات اوله رق بعض وسائل و اهیه ایله بصره یه هجوم و صاحب ترجمه برمدت مدافعه ایتمکدنصره انجامکار ایرانیلر بصره نی استیلا ایله کندوسی قید اسره

کرفتار و اصفهان و شیراز سمتلرینه تسیار ایتمشلر ایدی بر زمان اورالرده اقامت ایتدکن صکره زند کریمک و فاتنده سبیلی تخلیه ایله بصره یه کوندرلیدیکی ائناده بغداد والیسی حسن پاشانک هجوم اهالی ایله بغداددن اخراج اولندیغنی استعایدیجک انکلیرلر واسطه سیله باب عالی یه تقدیم ایلدیکی عریضه سنده سرگذشتی بیان ایله مستحق مکافات اولدیغنی و بغداد و بصره ایالتلری عهده سنه توجیه و احسان بیورلدیغنی حالد خدمت دولته مادام العمر جانسپارانہ چالیشه جغنی در میان ایدوب بغداد قپو کتخداسی سلیم افندی دخی بونی ترویج ایتمکله بیگ یوز طقسان اوچ سنه سی شوالنده عهده سنه ابتدا بصره ایالتی احاله و چند روز صکره بغداد ایالتی دخی توجیه و علاوه اولمشیدی خلا فیکیر اولان محمد خلیل اوغلی ایله زنیکبار طرفلرنده محاربه یه کیریشه رک بوندن خیلی زحمت چکمش ایسه ده نهایت آ کاغالب کاهرک بلا مزاحم بغداد والیلکنده استقرار ایتدکن صکره بر آزالق خزاقل و منتفق عشیرتلری عصیان ایتمشلر ایسه ده آنلره دخی غلبه ایدرک ایکسینده دائره اقیاده کتورمشدر .

یکرمی اوچ سنه دن متجاوز بغداد و بصره و شهر زور ایالتلرینه متصرف اوله رق دنیادن کام آلمش و نفس بغدادده مدارس و کتبخانه بنا و خارج و داخنده نیجه آثار خیریه تعمیر و انشا ایله ابقای نام ایلمشدر .

وفاتنده سنی سکسانه قریب ایدی سعید بک و صالح بک و صادق بک نام اوچ اوغلی ایله درت کریمه سی قالمشیدی حال حیاتنده بونلردن برینی کتخداسی علی پاشایه و دیکرینی سلیم بکه ترویج ایلمش اولدیغنی کبی دیگر ایکسینی خزینه داری داود اغا ایله قپوجیلر کتخداسی نصیف اغایه عقد ایلمش ایدو کندن و فاتندن صکره آنلرک دخی زفافلری اجرا اولمشدر .

زماننده امنیت طرق و مسالک برکال ایدی و دائماً خیره ساعی بر وزیر کریم الخصال ایدی بهر سنه طرف هایونه و ارکان دولته هدایای و افره تقدیم ایله دولتک حسن نظرینی تجدید ایلردی و مصر سفری مصارفه مدار اولوق اوزره خزینه دولته ایکی بیگ کیسه تقدیم ایتمشیدی بو جهته و فاتی کرک عراقجه و کرک دولتجه بادیء کدر و اسف اولمشدر .

و بوجه مشروح و فاتنده وصیتی اوزره اتفاق و جوه بغداد ایله کتخداسی و بیوک دامادی مومی الیه علی پاشا ولی قائم مقام اغنه انتخاب اولنه رق عهده سنه بارتبه وزارت ایالتک توجیهنی استدعا ضمنده در سعادتہ عرض و محضر کوندر دیلر . بو صورتله علی پاشا ولی مقامنه کچه رک تمشیت امورده ابتدار ایله آثار توجیهات

پادشاهی ظهورینه انتظار اوزره ایکن مکرکه یکچیری اغاسی احمد اغا ظاهرأ علی پاشایه عرض متابعت ایلدیکی حالده قلبی بشقه اولوب سلیم بکک ریاست وایالت آرزوسنده اولدیغنی دخی بعض قرائن واماراتدن تفرس واستدلال ایدرک لدی الاستمزاج ظننه موافق وافکارینی کندو اغراضنه مطابق بولمغه ایکیسی بینلرنده اتفاق ویرر صورتله یکچیریلردن ال پیدا ایتملریله نیجه صافدلرر دخی بو بونده آنلره التحاق ایتمشله .

بونک اوزرینه احمد اغا صورت حقدن کلهرک علی پاشایه اهل عراق نصل اهل نفاقدر بیلورسکز رخصت ویرر ایسه کنز ایچ قلعهیه اعتماد ایتمدیکم کیمسه لری ادخال ایله کرکی کبی ضبط ایدهلم دیوب علی پاشا دخی حقیقت حالدن غافل اولدیغندن رخصت ویرمکله احمد اغا ایچ قلعهیه داخل دائره نفاق اولان طاقمدن برچوق اشخاص املا وپولری سد وکوپری بی قطع ایتمدکن صکره میدانه چیقوب مافی الضمیرینی اعلان وقلعه نک طوپلرینی سرای اوزرینه حواله ایتمکله علی پاشا دخی برقاچ محلهه متریس آلدیره رق مدافعهیه قیام ایلدیکندن وقت نحدان وقت عصره دک مقاتله تمتد اولمش وبتون اهالی مسلحاً زقاقلره دو کیلوب آره ده سفک دمدان بشقه دکان وخانه یغما ایلمک کبی پک چوق فناقلرر دخی وقوعبولمشدر .

علی پاشا بو حالک امتدادی تقدیرنده پک چوق تلفات وضایعات وقوعکله جکفی جزم ایله کر غرض بنم سرکارده بولنماق ایسه بکا امان ویرلسون ایشدن کف ید ایدهیم وچکیلوب قوناغمه کیدهیم دیو یکچیری اغاسنه خبر کوندروب اولظر فدن دخی امنیت ویرلمکله علی پاشا کندو قوناغنه واروب استراحت ایتمی اوزرینه یکچیری اغاسیله طرفدارانی سایان پاشا زاده سعید بکه بدل اولمق اوزره داماد سلیم بکی ریاسته انتخاب ایله مرکز قائمقامی یه اقعاد ایتمشله . وحله ده منفی اولان سابق بانان متصرفی عبدالرحمن پاشا ایله برادری سلیم بکی اطلاق ایله بغداده کتورمشله آنلر بغداده کلدیکی کبی یکچیری اغاسی تبدیل طور ایدرک علی پاشا قوناغنده اولدجه خاتمه امنیت کلیوب چیقوب عبدالله پاشا قوناغنه کیتسون دیو نصیف اغا ایله کندوسنه خبر کوندرمکله علی پاشا دخی اخشامدن صکره برقایق کتور دوب قارشو یقهیه عبور ایلمشدر لکن یکچیری اغاسی بدایت امرده داماد سلیم بکی سرکاره تقدیم ایلمش ایسهده نتی بشقه اولوب ساعت بساعت قلب طور وحرکتی سوء نیته دلیل اولمغله حقدنه خلق اشتباهه دوشمش اولدیغندن قارشو یقهده صنوف عسکریه واکثر اهالی تجمع ایدرک بروجه بالا کوپری کسلمش اولدیغنی جهته طاقم طاق قایقلره را کبا کجه لین برو طرفه کچوب میدانده بولنان یکچیریلری پریشان

ایتملیه عبدالرحمن پاشا و سلیم بکر ایچ قلعه‌یه قاجمشلر خانه لر نده مستر اولان عثمانلو یعنی کوله من طاقی دخی همان اول کیجه محل بمحل طویلانوب سرانی ضبط ایتدکارنده ایچ قلعه ده مجتمع اولان غلبه لک طاغیلوب قاجدقلری جهته عبدالرحمن پاشا ایله سلیم بکر قلعه ده براز آدملیله قالمشدر . علی الصباح قلعه‌یه یوروش اولدینی کبی آنلر دخی طیانه میوب عبدالرحمن پاشا برادری سلیم بک موصله طوغری فرار و عبدالرحمن پاشا ایله داماد سلیم بک قصبه اعظمیه ده ویکچری اغاسی بر محله اختفا واستتار ایتمشدر . بونک اوزرینه علی پاشا دخی برویقه عبور ایله مقامنده استقرار ورؤیت امور جمهوره ابتدار ایتمش و عسس باشی سعدالله اغا یکچری اغاسی نصب ایدلمشدر . و عبدالرحمن پاشا ایله داماد سلیم بک قصبه اعظمیه ده طوتیلوب عبدالرحمن پاشا لمصلحه عفو اولمش ایسه ده سلیم بک بصره یه نفی ایله اوراده اعدام قلمشدر . یکچری اغاسیله همپاری دخی برر اله کتوریلرک جزایری ترتیب اولمشدر . بر منوال مشروح بغداد و الیلکنک علی پاشا عهده سنه توجیه بیورلمسی استدعاسنه دائر بغداد دن تقدیم اولمش اولان عرض و محضر باب عالی یه وارد اولدقده همان قائم مقامق امری تخریر و تسیار و سلیمان پاشانک مخلفاتی حقنده و خصوصات سائر ده ابراز صداقت ایلر ایسه بکام بیوریله جنی کندویه اشعار بیورلمشیدی .

اواخر جمادی الآخره ده انکلیز ایلیجیسی رئیس افندی ایله کورشمک استمسیله رئیس افندی نیک قوناغنده لدی الملاقاة ایلیچی کلامه ابتدار ایله بغداد دن تخریرات کلدی . بین الاهالی منافسه و مناقشه ظهوریله نارفته مشتعل اولمشیکن کتخدا علی پاشا فتنه یی تسکین و مملکتی تأمین ایلمش رقباسنه غالب و اهالی دخی کندو طرفه مائل و منجذب ایش شو حاله نظر آ و زارته جمله دن ایق اولدینی و کر بلا ماده سی ایرانیلرک شکایتیه بادی اوله رق امر محافظه ده دولت علیه یه عز و قصور ایده جک لری جلی و عیاندر . و هابیلرک تکرار ممالک دولت علیه یه هجوملری ایسه وارسته کلفت بیاندر انکلتزه دولتی دولت علیه ایله متفق و متحد اولدیغدن مسموعات و معلوماتی عرض و اعلامه مجبورم بغداد و ملحقاتی رتبه وزارت ایله علی پاشایه ویرملک اصبودر دید کد نصکره صدد آخره عطف کلام ایدرک هند مناسبتی ایله بوندن اقدام ایرانیلر ایله بینمزده معاهده تقرر ایتمشیدی . دولت علیه دخی ایرانیلر ایله انفاقه رغبت ایدرسه اول طرفه اولان قونسلوسمزه یازه یم و مواد اتفاقک تنظیمه چالیشه یم دولت علیه عسکر یله عساکر ایرانیه بالاتفاق حرکت ایدرلر ایسه و هابیلرک تأدیپ و تدمیری ممکندر دید کده بوکاجو ابا رئیس افندی وزرای عظامک متصرف اولدقلری ایالات والویه ده میری ایله دادوستد لری اولوب حین انتقاللر نده ترکه لرندن دیون

نابت‌لری استیفا اولمق اصول مرعیه دندر باخصوص سلیمان پاشا یکر می درت سنه قدر اوج ایالته بالاستقلال تصرف و مقاطعات و سائر واردات دولتدن ذمتده مبالغ کلیه تراکم ایتدیکی جهتله مخلفاتی دولته انتقال ایتمشکن بو مخلفاته وجواژ و سائر معیناته دائر علی پاشا برشی یازمامش اولدیغندن ایش مخاברה یه دوشدی و بوبابده اظهار صداقت و اراده دولته توفیق حرکت ایلدیکی حالده طرفه وزارتله بغداد و ملحقاتی توجیه اولنه جنی و عدیله قائم مقامق امری کندوسنه کوندرلمشیدی قالدیکه دولت علیه ایله ایرانیلرک هنکام مصالحه سنده مشهد امام حسینه بو طرفدن سور انشاسی درمیان اولندوقده ایرانیلر بونی زیارتدن ممنوعیتلرینه و هر طرفه براب اختراعیه کیدرک رسم زیارت نامیله برشی طلبنه حمل ایدوب نزاعلری تمتد و اصرارلری مشدد اولدیغندن برج و بارو بناسنی الغا و مطلوبلری اوزره فصل مدعا اولنوب مشهد امام علی کبی مشهد حسین رضی الله عنهما دخی سور ایله احاطه و احکام ایدلسیدی مضرت خوارجدن امین اولوردی قضایی دعوت و طلب ایله بو خسارته کندولری سبب اولدی کندو کندولرینه لوم ایتلمسدرلر مع مافیله ایرانه بر مأمور مخصوصی ارسالی مصممدر فقط بوبابده ایرانیان ایله اتفاقدن فائده ملحوظ دکدر زیر اوهابیلر اوزرینه بشقه یوللری اولمدیغندن بهر حال دولت علیه طوبراغندن مروره محتاج اولورلر آنلرک اول حوالی یه ایاق باصملری ایسه مصالحت دولت علیه یه موافق دکدر و هابیلرک تأدیبی ایچون دخی تدابیر لازمه یه تشبث اولمش و تبلیغات لازمه ایفاسیچون مقتدر برآدمک کوندرلمسی مصمم بولنمشدر دییجک ایلچی بنم مرادم دخی بورالری اخطار ایدی مادام که بوتدایره تشبث قلمش و علی پاشایه بغداد و عد اولمش حصل المطلوب دیوب مجلسه ختام ویرلمشدر و تعلیمات مخصوصه ایله محمود افندی جانب ایرانه مأمور ایدلمشدر .

بوکره علی پاشا طرفدن وارد اولان تحریراتده بدل مخلفات اوله رق جانب میری یه یدی بیک بش یوز کیسه و عوارض وزارت اولمق اوزره بیک کیسه ورجال دولته توزیع اولمق اوزره بش یوز کیسه که غیراز عوائد جمعا طقوز بیک کیسه اعطا ایده جکئی تعهد ایتمکه رجبک اون دردنجی کونی عهدده سنه رتبه وزارت ایله ایالت بغداد و ملحقاتی توجیه بیورلمشدر .

الحاصل علی پاشا میر میران اولمق حسبیلله ایکی توغنی حامل اولوب بر توغدها الملق ایچون طقوز بیک کیسه اعطاسنی تعهد ایللمشدر .

\* وقایع متنوعه \*

سنین سائر ده اولدیغی کبی بوسنه دخی استانبولده بالدفعات حریرقر وقوعه کلش



ایسهده استانبولده حریق وقوعی وقایع عادیه حکمنه کیرمش اولدیغندن مفردات  
وجهله تفصیلاتنه حاجت کورلماشدر .

جمادی الآخره نك یکرمی طقوزنجی صالی کونی ساعت نهاری یدی بچقده ایکن  
حرکت ارض واقع و برایکی دقیقه متمد اوله رق چار شوده بعض کمر لر رخنه دار و کهنه  
خانلردن بعضیلری سقوت وانهدامه مشرف اولمغله اسحابی دوچار خسار اولدی .

موسم صیف گذار ایدرک هوالرده آثار برودت پیدا اولدیغندن سلطان سلیم خان  
حضر تلری جمادی الآخره نك اون التنجی پنجشنبه کونی بشکطاش ساحلسر ایندن  
طوب قپو سرای هایوننه نقل بیورمشیدی چراغان یالیسی بوندن اقدم بکخان  
سلطان طرفندن بدل معین مقابلنده طرف شاهانه یه ترک اولمغله ایام صیفده  
ذات شاهانه بعض مختصر دائره ایله اوراده اقامت بیورردی . فقط مابین هایون  
دائره سی بولمیدیغندن مرحوم ردوسلینک استغلالا صراف یدنده بولنان یالیسی  
استغلالدن فك وثقی ادا ویتیملرینه دخی یکرمی کیسه آچیه به برخانه اشترا اولنه رق  
مابین هایون دائره سی اتخاذ بیورلمش واشبو ساحلسر ایک مجددآ تعمیر ی منویء ضمیر  
شهر یاری ایکن سفر ملباسه سیله تأخیر ایدلمش اولدیغنه صدر اعظم لدی الاطلاع  
کرک چراغان ساحل سرای هایوننک و کرک ردوسلی یالیسینک اساملردن هدملر یله  
مجددآ بر ساحل سرای بی همتا بنا اولنمق اوزره رسمی پایدروب تقدیم ایتدکده  
هر نقدر مصر سفری بر طرف اولدیسهده بروجه مشروح ممالک محروسه نك هر طرفده  
بر کونه غائله اولدیغندن ودولتک اس اساس اقتداری اولان صنوف عسکر یه سنک  
مجددآ اصلاحنه چالشمقده ایدو کندن او یله کلیتو اینیه ایشی آچیلماستی سلطان سلیم  
تجویز ایتوب مجرد چراغان ساحلسر اینک بعض محللری محو واثبات ایله تعمیر  
وردوسلی یالیسی هدمله مستقلا بر مابین هایون دائره سی بنا اولنمستی امر ایتمکله  
رجبک بشنجی بازار ایرتسی کونی صدر اعظم ضیا یوسف پاشا اورایه واروب اختیار  
اولنان وقت سعده وضع اساس ایلدی .

بالاده اون بش سنه سی وقایع صره سنده بیان اولدیغنی اوزره شریف پاشا جبراً  
اخسخه ایالتی ضبط ایدوب دولتک دها بیوک غائله لری اولدیغندن آنک اوزرینه  
عسکر سوقیله تأدینه حال وزمان مساعد اولمامشیدی فقط محلنجه عایهنده خصما  
تدارکنه ایتدار اولندقدنه اجاره متسلمی ممش زاده سلیم بکده آنک حقندن کیکه لیاقت  
واهلیت کورلمکله شریف پاشانک استیصالنه موفق اولدیغنی حالده کندوسنه وزارته  
چادر ایالتی توجیه اولنجه فی وعد اولنمشیدی بونک اوزرینه سلیم بک شریف پاشا  
عایهنه قیام ایتدیکی کبی کندویه محلنجه برچوق طرفدار لر پیدا اوله رق لدی المحاربه

شريف پاشانك عسكرى براقچ دفعه منهزم اولدقده اخسختهلى آرتق كندوسنه اعانهدن واز كچملىره اردهان قلعهسنه فرار وقلعه ديزدارى سد باب ايله ممانعت ايلديكندن اورادن دخى حركت ايله واروب اولتیده قرار ايلديكى قارص محافظى وارضروم واليسى طرفلرندن اشعار اولتمسى اوزرينه ترتيب جزاسى ايجون ارضروم واليسنه وسائر لازم كلنلره اوامر عليه اصدار اولمغله شريف پاشاخوف مجازات ايله اختفا ايتمش وچلدر اياتى سيواس واليسى ايكن مصر سفرنده وزارتى رفع اولنان زارهلى زاده رجب پاشايه وزارتى ابقاسيله توجيه بيورلمشدر .

وينه بالاده تفصيل اولنديغى اوزره سرعسكرلك عنوانيله طاغلو اشقياسى اوزرينه مأمور اولان روم ايلي واليسى تپه دلى على پاشانك كلتياو عسكركله برو طرفلره حركت ايتديكى اشقيا كوردكلى كچي صوفيه يه قريب محله على پاشايه دخالت والتجا وفيما بعد خانلرنده اقامت ايتك اوزره رهن ويمين ايله دولتى تأمين ايله جكلى بيانيه عفورلر ايتدعا ايتلى اوزرينه فيما بعد تعيين اوله جق يرلرده عرض وادبلياره اقامت ايتك شرطيله استبانلرى قبول اوله روق قره فيضى وچنگجى اوغلى خاصكو يده وقره مصطفى مسقط رأسى اولان فله قضاسنده اسكان واقعا اوله روق واشقيانك باشلوجه قوتالظهر استنادلى اولان ارناودلى دخى على پاشا كندو دائرهسنه آلهرق جمعيت اشقيا تفریق اولدقندن صكره روم ايلي وناطولى اهاليسندن اولوب برتر قريب ايله اشقيايه التحاق ايتمش اولنلر بالتدریج ملكتلىنه تبعدايله تسويه مصلحت اولتمق اوزره على پاشا خزينه دارى بر مقدار عسكركله فله طرفنده براغوب كندوسى منصبى جانبته عزيمت ايلمشدر .

شوحاله نظراً طاغلو اشقياسى دلخواه دولت اوزره استیصال اولمش اوليوب فقط فقرا ورعایانك تنفسلرینه مدار اوله جق صورتده مصلحته برصورت تسويه ویرلش اولدى .

مع مافیه ايجلرندن يبايجيلرك تفریقيله محللرینه اعاده لى فقرا و رعایا حققرنده ايجه فائده لو بر مصاحت اولديغندن بصورتك فعله كنورلمسى ايجون مؤخرأ چاوشباشى عثمان افدى دخى مأموریت مخصوصه ايله روم ايلي جانبته كوندولمشدر .

برمدنبرو تكفور طاغنده وکليبوليده مستوفى معاش ايله اقامت ايتمكه ايكن بالاده اشعار اولنديغى اوزره برغوس امدادى ناميله بلا استيدان محاندن حركت ايله اشقيا ايجنه دخول ايدرک برلكده كزمكه بولنان خليل پاشا دخى عفو اوله روق برسنجاق ايله قايرلسى على پاشا طرفندن عرض وانها قلمش اولديغندن اوائل

شعبانده وزارتی ابقا ايله عهدہ سنہ اینہ بختی محافظہ سی بالتوجیہ سانی وزیر مصطفی پاشا دخی خانہ محافظی نصب ایدلدی .

فقط چند روز صکرہ مصطفی پاشانک وفاتی خبری کلکله خانہ محافظہ سی درکاه عالی قوچی باشیرندن جبہ جی باشی عثمان بکه بارتبہ وزارت توجیہ بیورلدی .  
وخایل پاشانک اما طولی جانبته تبعیدی اصوب کورلمکله چند ماه صکرہ عهدہ سنہ قره حصار صاحب وسلطان اوکی سنجاقلری توجیہ بیوریلهرق اینہ بختی محافظہ سی وزیر سید موسی پاشایہ احاله اولمشدر .

متوفای مشارالیه مصطفی پاشا کرچی الاصلی اولوب خزینہ دار علی پاشانک خزینہ داری ایکن افندی سنک وفاتندن صکرہ ایکی یوز ایکی سفرنده وزیر اغا حسین پاشایہ کتبخدا اولهرق قوچی باشیاق رتبه سنہ نائل وسفر عودتنده لغمچی باشی وبعده مورہ محصلی اولوب ایکی توغ ایلہ وچوق کچمدن رتبه وزارت ایلہ بکام اولمشیدی متدین وصالح واقرانته راجح سیر وحرکتی معتدل وسنی عقد ستینہ واصل ایدی دیو واصف افندی تاریخنده محرردر .

بالاده بیان اولندیغی اوزره فرانسه جمهور یله عقد مصالحه ایدلمش اولدیغی جهتله اصحاب درایت وقابلیتدن برینک سفارته تعیینی لازم کلدیکندن شهر رمضان شریفک دردنجی کونی حالت افندی یه خلعت الباس ایلہ عهدہ سنہ پارس ایلچیلکی توجیہ اولندی . مؤخرآ سلطان محمود خان ثانی عصرنده مستشار سلطنت اولان مشهور حالت افندی بوذاقدر اقدجه فرانسه جمهوری طرفدن تعیین وارسال اولمش اولان یکی ایلچی دخی بوآئاده درسعاده واصل اولدی .

شوالک بشیجی کونی بر معتاد واقع اولان سنہ توجیهاتنده ارضروم ایالتی سیواس والیسی وزیر علاءالدین پاشایه و سیواس ایالتی سانی وزیر سید عبدالرحمن پاشایه وسلانیک سنجاغی وزارتی ابقاسیله وانی سید محمد پاشایه وقوجه ایل سنجاغی جبہ جی باشیاقدن مخرج وزیر عثمان پاشایه توجیہ قلندی .

واول کون مکه مکرمه پایهلورلندن ومشاهیر فضالادن اسمعیل مفید افندی سنی سکسان بشه وارمش اولدیغی حالدہ تکمیل نسخه حیات ایتمکله داود پاشا جابعی حظیره سنده دفن ایدلدی .

متوفای مومی ایلہ بیگ یوز اوتوز ایکی سنه سنده جامع مذکور قربنده ساکن عطار علی نام کسبه نیک صلیبندن بیگ یوز ایکی تاریخنده تولد ورقته رفته مقدمات علومی تعلم واکری قپولیدن وسائر خطاطلردن تمشق ایلہ صنعت کتابتی پک کوزل تحصیل

و محدث قدسی افندیدن علم حدیثی اخذ و تلقی و افکرمانی محمد افندینک درسند دوا  
ایله علوم عالیهدده خیلیدجه ترقی ایله قنوی اسمعیل افندیدن اجازت و جوار حضرت  
خالدهدده کوشه کزین ارشاد اولان نقشبندی شیخی ندای عبدالله افندیدن دست  
انابت آلمش و یتیمش ایکی سنهسی امتحاننده مدرس و ایکیوز برسنهسنده اسکار  
واون برده ادرنه قاضیسی اولمش و علم و فضلی و اصل سمع هایون اولمغله کندویه  
مکه پایهسی احسان بیورلمش ایدی .

ایام شتاده خانهسنده و ایام صیفده اناطولی حصارنده واقع ساحلخانهسنده اقامتله نشر  
علوم و تصنیف کتبه بذل همت ایلردی علم و فضل ایله معروف و صلاح و تقوی ایله  
موصوف شعر و انشایه قادر برذات مدوح المأثر ایدی .

اربعین امام نووی و دلائل الخیرات و شمائل شریفه و اخلاق عضدییه و قصیده نونیه  
و برده شریفه اوزرینه بر شرح و تفسیر بیضاوی و بشقهجه سورۀ نبأ اوزرینه  
حاشیه یامش و شرح فناری و استعاره عصامی و طاشکپری زادنک آداب  
شرحی اوزرینه تعلیقات یازمش و ابن ملکک منار شرحی و کترالعمانی اختصار  
و قدوری ایله فقه کیدانی بی و جامینک لویحی لسان ترکیه ترجمه ایتشد .

شوالک اون طقوزنجی کونی دخی روزنامهچۀ اول فردوسی محمد امین افندی وفات  
ایتمکله روزنامهچۀ اول منصبی دفتر امینی مصطفی راسخ افندییه و دفتر امانتی  
اناطولی محاسبه جیسی حسن افندییه و اناطولی محاسبهسی صالح پاشا زاده حسین  
بکه توجیه بیورلدی .

متوفای مومی ایله رؤس کیسه داری ابراهیم افندینک خدمتندن نشئت و قلمه  
مداومت ایدرک بیک یوز سکسان ایکی و ایکیوز برسفر لرنده بعض مناصب دیوانیهده  
استخدام اولنوب ایکیوز درت سنهسنده تذکرۀ ثانی و عبدالله بری افندی  
مکلمهیه مأمور اولدقده رئیس وکالتی ایله کامیاب و ایکی یوز طقوزده رئیس الکتاب  
اولمشیدی .

حطب جسیم ریاستی ادارهیه مقتدر اوله مدیغندن چوق کچمکسزین عزل اولنوب  
آندن صکره وفاتنه قدر مناسب مناصب ایله قایریلوب کچنیدرلمشدر .

مرحوم سلطان مصطفی کریمهسی شاه سلطان دخی ذی القعدۀ اون یدنجی  
کونی عازمه سرای عقبی اولمغله جوار حضرت خالدهدده مقدا احضار ایلدگری  
لحدهدده دفن اولندی .

بیک یوز یتیمش درت سنهسی رمضانک اون بشنجی ائین کیجهسی تولد ایدوب  
هنوز سن تمیزه رسیده اولمدین صدر وقت اولان مصطفی پاشایه و بعده سردار اکرم

اولان محمد امین پاشایه عقد نکاح اولنمش ایسهده ایکسی دخی فواصل قریبه ایله فوت اولدقلرندن سلطان عبدالحمید خانک اوائل سلطنتنده وزیر مصطفی پاشایه تزویج اولنمشیدی .

مشاریلیها عابده وزاهده معین فقرا و دستگیر ضعبا برسلطان علیةالشان ایدی جوار حضرت خالدده تر به وسیل و مکتب بناسیله دخی ابقای نام ایلمشدر .

مقدما روم ایلی والیسی نصب اولنان قبلهلی عمر پاشا بو مأموریتنده موفق اوله مدینی کبی مؤخرأ اناطولی والیسی نصب اولندقدده دخی کوتاهیبه خاندانندن کر میان زاددهی اعدام و برر بهانه ایله شونک بونک اموالنی مصادره یه قیام ایلدیکندن بوئانده مرفوع الوزاره از میرده اقامت ایتمک اوزره عزل اولنمشیدی . از میره وصولنده اسمی دفتر وزرادن تر قین و اموالی مصادره اولندقدن صکر منفیاً از میرده اقامتی امر اولنمشدر .

بالاده بیان اولندیغی اوزره سیواس والیسی ایکن عهده سنه دیار بکر ایالتی توجیه اولندیغی انصاده وفات ایدن مصطفی پاشانک توغ و سنجانغی مع الوزاره مخدومی ولی الدین بکه احسان بیورلدیغی حالده بدل مخلفات و جائزه وزارت و عوائد سائر اوله رق بش یوز کیسه قدر جانب میری یه خدمت ایده جکنی طریزون والیسی و جانبیک محصلی اولان طیار پاشا انها ایلمش ایدیسهده مصطفی پاشانک ضربخانه یه و جانب میری یه خیلی دیونی اولدیغی حالده درجه ثروت و یساری صدراعظمک معلومی اولدیغندن بالتحقیق مخلفاتنک مقدارینی طاهره چیقارمق اوزره اولطرفه مباشر مخصوص کوندرمشیدی تحقیقات محلیه و مخبرات جاریه نک نتیجه سنده دین میری و بدل مخلفات و جائزه وزارت و سائر جمعاً ایکی بیک درتیوز قرق بش کیسه یه قطع اوله رق التیوز کیسه سی مؤده وزارت و رودنده مباشر مومی ایله تسلیم و اوچیوز قرق بش کیسه سی منصبه دخولنک التمش برنجی کونی ادا و باقی بیسک بشیوز کیسه سی ایکیوز اون سکر سنه سندن اعتبارا سنوی بشریوز کیسه اعطا ایله اوچ سنهده تمیم اولنمق شروطی تنظیم اولنوب اواسط ذی الحجهده مومی ایله ولی بک عهده سنه سیواس ایالتی توجیه اولنمغله سلفی عبدالرحمن پاشایه قرمان ایالتی و آنک سلفی عثمان پاشایه قندیه ایالتی و آنک سلفی درویش عبدالله پاشایه رسمو و خانیه سنجاقلری توجیه قانمشدر .

بروقدنبروزی و تلبسه ادنی اعلایه تقلید ایله هر کس کفتلو البسه یادر مغه و مجوهرات و مرصعات قوللانمغه هوس ایدرک حد معروفی تجاوز ایتمک لرندن محتاج اولدقلری مصارفه قارشولق پاره بولمق ایچون خدعه و دیسیسه یوللرینه

صاوب بوايسه استانبول خلقنك اخلاق عموميه سنه كلى تغير كتوره جكندن بشقه داخلدن ديار اجنيه به كليتو نفودك چيقوب كيمسنه سبب اولديغنه بناء بوانساده هرصنك كسوه سى درجه سنه كوره تعين ايله اسراف وسفاخته دائر اولان بدعتلر منع ويساغ ايدلشدر .

\* انگليزلرك اسكندريه دن چيقدقلى و فرانسه لو ايله بئلدنده \*

\* برودت ظهور ايتديكى \*

خلال ذى القعدة ده انگليزلرك اسكندريه يي تخليه ايله مالطه جانبه كيتدكلى و دولته مخالف اولان كروهدن الفى محمد بك ايله اون بش قدر كوله منلرك برلكده عزيمت ايتدكلى خبرى آندى .

انگليز عسكرىنك اسكندريه ده امتداد مدت مكث و توقفلى دولت عليه به باديء اندیشه ايدوكندن اولوجه صاويشوب كيتلملى موجب انشراح اولمشيدى فقط انگليزلرك مالطه يي تخليه ايتدكلى جهته فرانسزلر ايله ميانلرنده برودت پيدا وينه محاربه اماره لرى هويدا اولديغندن هر كس بو مقدماتك نه تيجه ويره جكنى وافق بولتيقه ده رونما اولان بولو تارك نه درلو باران بلا ياغديره جغنى دوشونمكده ايدى . چونكه آميين نام محله فرانسه وانكلتره دولترى بيننده عقد مصالحه اوله ليدنبرو فرانسهنك ترقى اقتدار وانتظام احوالى وداخلاً حسن اداره حسيله وخارجاً ايتاليا جمهورى رياستى پوناپارته به احاله اولنه رق ايتاليانك برفرانسه سنجانغى حكمنه كيرمش اولسى و (پيه مون) ساردنيا ممالكنك وپارمه قطعه سنك فرانسه به ضم والحاق ايدلسى وزيرده بيان اولنه جغنى وجهله المانيا ايشلرينه فرانسه نفوذيله نظام ويرلسى جهتلى به هنگام محاربه دن زياده ايام مصالحه ده پوناپارته نك تزايد اعتبار واقبالى انگليزلرك جكر كاهنه تاثير ايتمشيدى وبعد المصلحه تجارت بحريه سربست اولقى حسيله محاربه وقتنده انگليز تجارينه مخصوص اولان منافع تجارته ملل سائره دخى حصه دار اولمغه باشلا ديغندن انگليز تجارى شكايه ايدر اولديلر انكلتره وكلاسى مصالحهنك دوامنه خواهشكر ايسه لرده اول موسمده اسن روزكارك اوكنه دوشوب كيتمكده يعنى انكلتره اهاليسنك آرزوسنه اتباع ايتمكده ايديلر .

پوناپارته انگليزلرك بو طور ندن منفعل اولديغى حاله انكلتره وكلاسى بر معاهدهء تجارت تنظيمى كندويه تكليف ايتدكلرنده اودخى بومثللو مقاولات خالصانه به تشبث اولنقى ايچون اول امرده انگليز دولتلك فرانسه حكومته سوء قصد ايدلره ويرديكى معاشرى قطع و فرانسه قراليتى خاندانندن اولوب انكلتره ده بولنان

پرنسری طرد و دفع وانکلتره غزته لرنده فرانسه عایهنه یاز یله کلان ترهاتی منع ایتمی لازم کلور دیو جواب و یرمش وانکلتره و کلاسی بوتکالیفک اجر اسنه انکلتره قوانین و نظاماتنک مساعد اولدیغی بیانیله اعتذار ایتدکارنده پوناپارته دخی فرانسه غزته لرینی انکلیزلر علیهنه تشویق ایله قلماً محاربه و مجادله یه کیریشلمش ایدی .

بو وجهله ایکی دولت بیننده وقوعبولان برودت اول ائنده ظهوره کلان اسویچره وقعه سندن طولانی تر اید ایدرک منتیج خصومت اولمشدر .

شویله که : فرانسلر استیلا ایتدکاری ممالک سائرده یاپدقلری کبی اسویچره ده دخی اصول قدیمه مملکتی تغییر ایله فرانسه اصوله موافق بر صورتیه قویشلر ایدی . فرانسه عسکری چکلده کده اصول عتیقه طرفدارانی ایاقلانوب و تنظیمات جدیدیه یی محایتمک اوزره اسویچره اهالیسنی تحریک ایدوب حکومت حاضره دخی بونلرله باش ایده میه جکنی اکلامغله فرانسه دن استعانه ایتمی اوزرینه پوناپارته گروه مخالفینه خطاباً بر بیاننامه نشر ایدوب بومنازعه نیک مصلحانه تسویه سی ایچون طرفینک کندو نزدینه مرخصلر کوندرمی لزومی بیان وشاید که مخالفت وقوعیله عصیانه دوام اولنورسه فرانسه عسکرینک اسویچره یه کیدوب سلاح قوتیله اعاده آسایشه قیام ایده جکنی اعلان ایتمشدر . بوکا قارشو مخالفین طاقی دخی دول سائرده مراجعت وفرانسه نیک اسویچره مصالح داخله سنه مداخله سی حقتده برشدتلو ردیه یازوب طلب حمایت ایتمشلر . بونک اوزرینه انکلیزلر فرانسلر حقتده زباندرازلق ایتمکه باشلادیلر وانکلتره دولتی اسویچره نیک استقلالندن بحثله فرانسه نیک مداخله فعلیه سنه قارشو پروتستو ایتدکنن بشقه رؤسای مخالفین ایله کسب مناسبت ایتمک اوزره اسویچره یه برضابط کوندردی وآمین معاهده سی حکمنجه انکلیزلر مالطه یی تخلیه وقوالرلره تسلیم ایتمک اوزره بولنمشلر ایکن بعض اسابدن طولانی بوتخلیه و تسلیم ایشی اشبو اون یدی سنه سی رجه نیک تأخیر اولنمشیدی . ایکی ملت میانه سنده اولوجهله رونما اولان مجهول نتیجه بر مبیانت انکلتره و کلاسنک اذهاننده مالطه آطه سنی بتون بتون ضبط ایتمک فکرینی تولید ایتمکه اول ائنده مالطه نیک تسلیم اولنمامسیچون اوراده بولنسان انکلیز قومانداننه دخی امر کوندرلش ایدی .

واسویچره مسئله سی اوزرینه انکلتره و کلاسی بر طاقم وعدلر ایله اوستریا و روسیه و پروسیا دولتریخی فرانسه علیهنه تحریک ایتدیلر ایسه ده اول آوانده دول مشارالهمک فرانسه ایله دوست اولمق پولتیقه لری اقتضاسندن اولمسیله برشیئی مفید اولدی . پوناپارته ایسه انکلیزلرک اسویچره حقتده اولان طور و حرکتلرندن زیاده سیله حدتلوب انکلتره و کلاسنک پروتستوسنه قارشو غایت آغر بر جواب

و یردی وانکلتره دولتندن امیسان معاهده سنک تمامیله موقع اجرایه قونلمسنی صورت  
 قطعیهده طلب ایلدی انکلتره دولتی دخی امیسان مصالحه سندن صکره اوروپاچه  
 بر جوق احوالک تبدل ایتمدیکی بهانه ایدرک صورت تردد کوستردی وبومثللو  
 محابرات آرسنده فرانسز عسکری اسویچریه کیروب وقوه جبریہ اعمالیله اختلالی  
 باصدیروب پوناپارته نک دلخواهی اوزره مملکته نظام و یرلدی .  
 بو انساده دولتین میانه لرنده بروقتی مورث بر کیفیت دها حادث اولمشیدی .  
 شویله که : پوناپارته آق دکرک وهند یولنک مقالیدینه مالک اولان دولت علیه پولتیقه سنه  
 وممالک شرقیهده فرانسه نفوذینک ترقیسنه زیاده اهمیت و یرمکده اولدیغندن اک معتمد  
 مأمورلرندن میرآلای سباستیانی که مؤخرأ در سعادت ایلجیسی اولان مشهور جنرال  
 سباستیانیدر احوال شرقیهنی تفتیش ایتمک وانکلیزلردن اسکندریه نک تخلیه سنی  
 استمک اوزره مأموریت مخصوصه ایله آنی جانب شرقه کوندرمشیدی سباستیانی  
 ابتدا طرابلسه کیدوب بکلر بکیسندن فرانسه وایتالیاسفان تجارتیه سنه تعرض اولنماق  
 ایچون سوز آلدقندن صکره اسکندریه ومصر وعکایه واروب فرانسیسه عودتنده  
 تحریر و تقدیم ایلدیکی تقریرنده انکلیزلر مصرده یرلشمک آرزوسنده اوله رق  
 عثمانلوری کوله منلرله اوغراشدیرمقده واهالی فرانسز لری آرزو ایتمکده اولدقلرینی  
 وسواحل مصریهده بولنان انکلیز عسکری درت بیک درت یوز اوتوز نفر دن عبارت  
 اولدیغنه ومصر والیسنک خدمتنده بولنان اون التی بیک بو قدر پیاده وسواری  
 وطوپجی عساکری اسکندریه و ابوخور ورشید ورحانیه ومنوف ومصر وبولاق  
 وجیزه وسویش موقعلرنده متفرق بولدیغنه نظراً الحاله هذمه مصرک یکیدن ضبطنه  
 همان التی بیک فرانسز عسکرینک کافی اوله جغنی وصعید طرفنده امرای مصرک  
 عسکری طوپجیاق خدمتنده استخدام ایتمک لری سکسان نفر فرانسز فراریلریله  
 برابر اون بیک نفره بالغ اولوب هر نه طرفده مقابله وقوع بولمش ایسه دولت  
 عسکرینه غلبه ایتمک لرینی وجزار پاشانک اون درت بیک قدر عسکری اولوب آنجق  
 طقوز بیکی یافه محاصره سنه مأمور بولندقلرینی ومصرده اولدیغنی کبی ایالات شامیهده  
 دخی اهالی عثمانلودن متفرق اولوب دولت علیه نک بوحوالیده معاملاتق منقطع  
 حکمنده اولدیغنی انها واعلام واسکندریهده کی انکلیز قوماندانی استوارک  
 سوء احوال وحرکاتندن بحثله مومی الیهی پک فسا صورتده قدح واتهام ایتمکله  
 ناپلیون پوناپارته بوتقریری اشبو اون یدی سنه سی شوالنه مصادف اولان بیک  
 سکنز یوز اوج سنه عیسویه سی کانون ثانی فرنکیسنک اوتوزنده فرانسه نک رسمی  
 غزته سنه طبع ایتمدرمشیدی .



متعاقباً انگلیزر اسکندریهی ترک استدیلا ایسهده سبستیاینک اولوجهله تقریرینک اعلانی انگلیزره بک زیاده تأثیر ایدرک جملهسنی فرانسزلردن انتقام آلمق داعیهسنه دوشوردی .

انگلیزرک بو اطوارندن دخی پوناپارته منفعل اولهرق بومشکوک حاله برنتیجه ویرلسنی لوندرده کی ایلچیسنه امر ایتمکله انگلتره دولتندن لدی السؤال انگلتره خارجیه ناظری ( آمین مصالحه سندنبرو فرانسه برطاقم یرلر ضبط ایلدیکندن انگلتره دولتی بونلره قارشولق طلبنه کسب صلاحیت ایتمشکن بوصولیتنی استعمال ایتموب مالطه آطهسنی تخلیه ایتمک نیتنده ایکن میرآلای سبستیاینک تقریرینک نشری انگلتره نك امنیتی سلب ایتمدی اولا تقریر مذکور ایله انگلیزر اردوسی حقننده اولسان حقارتدن طولایی ترضیه لازمه وئانیاً مصر حقننده پوناپارته نك نیتنه دائر تأمینات کافیه ویرلمدکجه مالطه نك ترکی ممکن اوله میه جق ) دیو بیان حال وفرانسه خارجیه ناظری طالیران طرفندن مصلحانه تسوییه مصلحته ابتدار اولتمش ایسهده انگلتره وکلاسی مراملرنده اصرار ایدرک تکلیفلی قبول اولندینی تقدیرجه مدار تأمین اولمق اوزره مالطه نك انگلتره دولتته ترکی لازم کله جکی بیانیله اظهار مافی البال استدیلا .

بونک اوزرینه پوناپارته دخی حدتله نك کندوسنی ضبط ایده میوب سفرانک برملاقات کونی جمله مواجهه سنده انگلیز ایلچیسنه اصول وعادتک خارجنده برآغر معامله ایتمکله اشبو اونیدی سنه سی اوخرینه طوغری طرفین تدارکات حربیه به مباشرت ایلدی . بونکله برابر پوناپارته دول سائره نظرنده حق قزانمق ولنظار عمومیهده کندوسنی مسؤولیتدن قورنارمق اوزره روسیه وپروسیا دولترینی توسط ایله بو باده ویره جکلی قراری قبول ایده جکنی وعد ایتمشیدی قابل اولسه انگلتره وکلاسی دخی مصلحه نك بقاسنی استرلردی لکن بووقوعادن صکره مالطه نك ترکی صحیحاً انگلتره نك ناموسنه طوقونوردی .

بناءً علیه خلال ذی الحجهده انگلتره لو طرفندن یازیلان تقریرده ( پوناپارته نك مصر حقننده اولان تصوراتی انگلتره دولتک عظیم اضطرابی موجب اولمغه مدار تأمین اولمق اوزره مالطه قلعهری مؤبداً انگلتره دولتی یدنده قالمق اوزره مالطه نك یالکز اداره داخلیه سنک قوالیرلره حاله سنه ویاخود اون سنه مدتله مالطه جزیره سی انگلتره لو یدنده قالمق ومدت مرقومه مرورنده قوالیرلره ویرلیوب اهالیسنه ترک اولمق صورتنه فرانسه لو راضی اولمیلدر ) دیو مصرح اولوب پوناپارته نك ایسه مالطه نك انگلتره لو یدنده قالمسنه موافقت ایتمک احتمالی اولمدیغندن وانگلتره وکلاسی

روسیه و پروسیا دولتیرینک توسطنی قبول ایتدیکندن رستهٔ مصالحهٔ همان قومیق اوزره اولدینی جهته طرفین تدارکات حربیه دوام ایتکده ایدیلر .  
ایشته اول اتاده انکلتره دولتی اسکندریه نی تخلیه ایتمش اولدیغندن دولت علیه بوجهته بر غائله دن قورتلش ایسه ده انکلتره و فرانسه دولتری بینده بوجه مشروح جریان ایدن مجادلانده مصر قطعسه سی موضوع بحث اولدیغندن بوراسی دولت علیه یه موجب فکر و اندیشه ایدی .

ورده بو اتاده و هابیلرک تحطیات و تجاوزاتی اغماض و مسامحه اولنه جق مرتبه نی کچوب اول طرفدن دولت علیه یه بر یکی غائله آچلمشیدی .  
بناء علیه بومقامده و هابیلرک مبادی ظهوریه جزیرهٔ العربی نه وجهه استیلایه قیام ایتدیکنرینک بیانه مبادرت اولنور .

### \* مذهب و هابینک کیفیت ظهوری و انتشاری \*

و هابیلرک سر مذهبی اولان شیخ نجدی یعنی محمد بن عبد الوهاب که فی الاصل نجد اهالیسندن و مذهب حنبلی علماسندن اولوب اهل سنت و جماعته مخالف بر مذهب احداث ایتمشدر شام شریفده تحصیل علوم ایتدیکن صکره دیار نجده عودت و (۱۱۴۳) سنه هجریه سنده مسیلمه الکذابک بلادی اولان یمامه نواحیسندن عینه بلادنده خلقی کندو مذهبه دعوته مباشرت ایلمشدر .

اولوقت نجد عربانی ظلمات جهل و نادانی ایچنده قاهره کندیورنده اسلامک یالکز رسمی و ایمانک همان بر اسمی قالب مرقومک سوزلرینی رد و قبوله محک اوله جق معلومات اولدیغندن کیمی شام شریفده تحصیل علوم ایتمش علمادن بر ذات اولدینی جهته سوزینی قبول ایدر و کیمی تابع اولدقلمری مذهب حنبلی یه مخالف کورتمک حسبیه اکا مسیلمه الکذاب نظریه بقار ایتمش .

و شیخ نجدی آلتوز سنه دنبرو ناس ضالانده قالدی شمدی اهل اسلام دینلان طوائف هب مشرکدر دملری هدر و ماللری موحدینه ( یعنی کندو مذهبنده اولنره حلالدر ) دیو خلقی اضلاله قیام ایدوب یغما کرکک یولنده ناسک اموانی آلق دخی عربانک مزاج و مشوارینه موافق اولدیغندن بو داعیه کندو مذهبنک رواجنه سبب اوله جق بر قضیه ایدی ایسه ده بر عصبه قویه یه مستند اولمدقه مذهبنک قولایلقله منتشر و مشتهر اوله میه جغنی درک ایله وادی حنیفه سکانی اولان درعیه شیخی محمد بن سعودک یانه کیدرک بنم مذهبه اتباع ایدر و دیدیکم یوله کیدر ایسه ک آز وقت ظرفنده بیوک قوت و سطوته مالک اولور سکز دیو آنی اضلال ایله کندو مذهبه ادخال ایتدیکنه مبنی درعیه اهالیسی دخی اکا اتباع ایتمشدر و سوزده دینی احیا و حقیقتده حطام دنیا ایچون بوره نارفته یه کیتمشدر .

وهابيلرك اساس اعتقادلرى بودر كه جناب حقه طوغرىدن طوغرى به عبادت ايتمك فرض اولديغندن بوبابده برشيئى وسيله اتخاذا ايلمك جائز دكلدر ودعاخ عبادت اولديغندن جناب حقدن غىرى به دعاواستغانه (ان الله لا يغير ان يشركه به) مؤداسنجه قابل مغفرت اولميان شركك بر نوعيدر وابندا مشركينى توحيدده دعوت ايدن نوح عليه السلامدر كه مقدما صلحادن ودوسواع ويغوث ويعوق ونسر نام ذواتك وفاتلر نده احتراماً خلق آنلرك رسملرينى يايوب كيدر ك آنلره عبادت ايدر اولدقلر ندن حضرت نوح عليه السلام آنلرى توحيدده دعوت ايجون مبعوث اولدى لکن آنلر كلام حقى قبول ايتيوب بواصنامه عبادتده مصر اولديلر نهايت خاتم الانبيا عليه الصلاة والسلام حضرت تلىرى آنلرى توحيدده دعوت ايلدى ينه قبول ايتيوب بز بواصنامك شفاعتى اومارز وآنلره عبادت ايله اله الا له اولان جناب بارى تعالىه تقرب ايسترز ديديلر انحق آنلرك بودرلو تاويل واعتذارلرى قرين قبول اوله ميوب عليه الصلاة والسلام حضرت تلىرى آنلرك اوزرينه سفر واول اصنامى شكست ايله زير وزبر ايلدى . بناءً عليه انبىا واوليادن بز يني ياد ايله استمداد ايدنلر ونذر وصدق ايله وسائر وجوهله تر بهلره حرمت ايليانلر هپ مشركدر وبز آنلرك شفاعتى اومارز وآنلرى جناب حقه وسيلهء تقرب ايلرز ديملىرى كندولرينى شر كدن تخليص ايلمز وعصر سعادتده كى مشركلر (واذا غشيهم موج كالظلل دعوا الله مخلصين له الدين) منطوقجه وقت شدت وابتلاده جناب حقه اخلاص ايله دعاونياز ايدوب فقط باشلرى سلامتده ايكن ملائكه واوليا واصنامه دعا ايدرلردى عصر مزده كى مشركين ايسه وقت مصيبتده دخى فلان پيرى فلان شيخي ياد ايله استمداد ايدرلر بناءً عليه عصر مزك مشركينى مشركين اوليندن دها اشنعدر ديرلر ومشايجدن برينه توجه ايله استمداد ايدنلر شويله طورسون يارسلو الله بكاشفاعت ايت يامداد ايله ديانلرى بيله تكفير ايدرلر .

محمد بن عبد الوهاب بو عقائد باطله يني تعليم وتلقين ايجون رساله لر تدوين ايدوب كله توحيدى كندو مذهبده كوره تفسير ايله كندو زعمنجه خلقك هپ مشرك اولديغنى تذكر ايدر ك بو مثللو رساله لرله وبعض محللره مکتوبلر ارساليه جمله يني دين اسلامه دعوته قيام ايتميشدى .

اكا مقابل علماء اهل سنت طرفندن دخى خيلى رديه لر يازلمشيدى از جمله سليمان بن عبد الوهاب نام ذاتك حسن بن عيدانه نصيحتنامه اولوق اوزره مذهب وهابينك رد وجر حى حقدده مفصل برساله سى واردر كه (حجة فصل الخطاب من كتاب رب الارباب و حديث رسول الملك الوهاب وكلام اولى الالباب فى ابطال مذهب محمد بن عبد الوهاب) ديو معنون ومسادر . ومشهور رديه لر دن برى دخى بصره علما سندن قبانى ديمكمله

شهر اولان ملاعلی ابن ملاعبادی زاده احمد افندیك ( فصل الخطاب فی رد ضلالات ابن عبد الوهاب ) نام شرحیدرکه محمد بن عبد الوهابک بر رساله‌سی بصره‌یه وارد اولدوقده رديه اوله‌رق مومی الیه احمد افندی آتی شرح ایلمش ایدی بونک متن و شرحی مطالعه کذار فقیر اولدوقدن بشقه محمد بن عبد الوهابک کندو اتباعنه خطاباً مشرک زعم و اعتقاد ایلدیکی سائر اهل اسلام ایله مجادله و مباحثه‌لرینه مدار اوله‌جق بر طاقم سفسطه و مغالطه‌لری حاوی ( کشف الشبهات عن خالق الارض و السموات ) نام بر رساله مختصره‌سی دخی منظور فقیر اولمشدر .  
 و فی الاصل مصر علماسندن اولوب اولوقت مکّه مکر مه‌ده مقیم اولان شیخ عبد الوهابه مذهب وهابی حقیقده بعض اسئله ایراد اولمشدر ایدو کندن اودخی رديه اولمق اوزره بر رساله مفصله یازمشدرکه مومی الیه قبانی احمد افندی مذکور فصل الخطاب نام شرحی تألیف ایتدکن صکره بورساله‌یه دسترس اوله‌رق بالمطالعه پسند ایتمکله و بیک یوزالی یدی سنه‌سنده بعض علماء نجد طرفندن ابن عبد الوهابک دین ایله تلاعبندن ونجه مسلمینی اضلال ایلمسندن ناشی شکایتی حاوی بصره‌یه وارد اولان تخریراتده بعض خصوصات استعمال و استیضاح اولنغله بوکا جواب اولمق اوزره احمد افندی سالف الذکر فصل الخطاب نام شرحی اختصار و بوکا مومی الیه عبد الوهاب مکینک مذکور رساله‌سندن دخی بعض مواد علاوه ایدرک ابن عبد الوهابک مذکور رساله‌سنی تکرار شرح ایدوب بودخی ( کشف الحجاب عن وجه ضلالات ابن عبد الوهاب ) دیو تسمیه اولمشدر .

انجق احمد افندی بوایکنجی شرحی هنوز اکیل ایتدین بعض علماء نجد طرفندن تکرار بعض اسئله توارد و تعاقب ایتمکله بونلرک اجوبه لازمه‌سنی دخی اشبو شرح ثانی‌یه خاتمه اولمق اوزره تخریر و تدبیل ایتمشدر .

شویله که : سلیمان بن محمد بن سحیم طرفندن بالجمه علماء اسلامه خطاباً نشر اولنان رساله‌ده ( بزم دیار مزده مبتدع و جاهل و ضال و مضل بر آدم ظهور ایتدی کندوسندن یک فنا ایشلر ظهوره کلوب آنک احوال شیعیه‌سیله قولاقلر طولدی و اگرچه هنوز بزم بلده مزه سرایت ایتدی انجق بونی ورثه سیدالمرسلین اولان علماء مسلمینه نشر و اعلان ایتمک ایستدک تاکه آنک بدعت و ضلالتلرینی رد و جرح ایله شریعت اسلامیه‌یه نصرت ایله‌لر ) مقدمه سیله بحثه کیریشه‌رک ( مرقوم مبتدع و مضلک بدعت و ضلالتلرندن بری بودرکه اصحاب رسول‌اللهین جیبه‌ده مدفون اولان زید بن الخطاب و سائر شهداء اصحاب کرین رضوان الله علیهم اجمعین حضرانک قبرلرینی هدم ایتدیروب آنلری ایسه خالد بن ولید ایله سائر اصحاب کرام دفن ایتمشلر و فقط اوراسی طاشلق اولمق حبیبیه حفری قابل اولمدیغندن برآرشون قدر قبرلرینی

ترفع ایلمشل ایدی وینه اوراده بولسان جامع شریفی دخی هدم ایترمش بونده ایسه هواسنه اتباعدن بشقه بر سبب وداعی شریعی یوقدر وجمعه کیجه لرنده وکونلرنده معتاد اولان صلات و سلام بدعتدر دیوترکی امر ایتمش ودلائل اخیرانده سیدنا و مولانا تعبیرلری اولدیغندن بوکتاب شریفی احراق ایلدیکی کبی روض الراحین نام کتابی دخی روض الشیاطیندر دیواحراق ایلمش و حجره نبویه ظفریاب اولسم آئیده هدم ایدردم و بیت شریفه ظفریاب اولسم آتون اولوغنی آوب یرینه اخشابدن اولوق قور ایدم دیر ایمش الله بلاسنی ویرسون (ومن یعظم شعائر الله فانها من تقوی القلوب) آیت کریمه سنی ایشتیمدیمی و برده التیوز سنه دنبرو ناس هپ ضالانده در دیدیکی محققدر وهر دیدیکی تصدیق ایدنلره فاسق اولسه دخی موحد دیوب کندوسنی بر خصوصه تصدیق ایتمانلرک قطعاً کفرینه حکم ایدرمش و ابن فارض ایله ابن عربینی تکفیر ایلرمش و برده اولاد رسولدن اولان سیدلری کندولرینه کوندر یلان ندرلری قبول ایستکلری ایچون تکفیر ایستدکن بشقه آنلری تکفیر ایتمانلری دخی تکفیر ایده یور و کندوسنه اختلاف ائمه رحمتدر دینلر کده آنلرک اختلافی نعمتدر دیمش اولدینی دخی محققدر انواع بدع وضالانسدن بری دخی وقفلرک قطعاً فسادینه حکم ایدرک رسول اکرم صلی الله علیه وسلم ایله اصحاب کزین رضوان الله علیهم اجمعین حضراتک وقف ایستکارینه دائر اولان روایتلری تکذیب ایتمسیدر و خطبه لرده نام پادشاهینک ذکرینی دخی ترک ایلمشدر و مقدم و مؤخر قاضیلرک حق ایله حکم ایستکلرنده دخی آلدقلری رسم هپ رشوت اولدیغنه قائل اوله یور و برکیمسه بسم الله دهرک الله ایچون قربان کسوب انجق جنی شریعی دفع ایتمک غرضی دخی قارشدرسه کافر اولور و اول قربانک اتی دخی حرامدر دیو حکم ایده یور علمانک بیانی ایسه بونک منهی اولسنه منحصردر) دید کدنصرکه (ای علماء مسلمین دین اسلامه نصرت ایچون بونلره ادله ایله جواب و یریکز اکر ابن عبدالوهاب دیدیکی صواب کور رسه کز بیان بیوریکز بزده آنک قولنه رجوع ایدم و اکر خطا کور رسه کز آتی رد و زجر ایدیکز و خطا اولدینی خلقه بیان ایدیکز که آنک مملکتنده نیجه خاق آنک سببیه ضالالت یولنی طوتدی بو مذهب باطل هنوز اذهان ناسده یرلشمدن چاره سنه باقلیدر اللهم ورسولنک حکمنی بیلانلردن هر کیم بو موادده واقف اولورسه جواب و یرمکه بور جلیدر (وتعاونوا علی البر والتقوی ولا تعاونوا علی الاثم والعدوان) دیو ختم کلام ایلمشدر .

ایشته مومی ایله قبانی احمد افندی بومسائلی برر برر اجوبه سیله برابر بسط و بیان ایدرک سالف الذکر کشف الحجاب نام شرحه خاتمه قیلمشدر .

مذهب وهابینک ردو باطالی حقنده یازیلان اجناسک خلاصه احکامنه کنجه بومذهبک  
 مأخذی علماء حضایه دن ابن تیمیه ایله اکا تابع اولان ابن قیمک بعض مسائل شرعیده  
 طریق اعتدال دن انحراف ایله وادی افراطده یا کلش ذهابلر بدرکه شیخ نجدی کویا  
 آنلرک اثرینه اقتفا ایدرک وادی غلو و افراطده برره نارفته یه صاپوب کندویه  
 مخصوص بر مذهب احداث ایلمشدر .

ابن تیمیه نکه بو بایده اولان خلاصه افاداتی بودرکه کرک نهر و قینار جه اولسون و کرک  
 شجر و جبل و مغاره اولسون شرعک مستحب قیلمدیغی محله امید خیرایله قصد ایتمک  
 منکر اتدندر و اک فساسی بومقوله محلله نذر ایتمکدر قبوره و اهل قبوره نذر ایتمک  
 دخی نذر معصیت اولوب اکا وفا جائز دکدر و بو یولده نذر اولنان شی فقرادن  
 مستحقینه تصدق اولنق عندالله ده خیرلوردر و روضه مطهره یه قنبدیل نذر اولنسه  
 بدلی حیران نبی علیه السلامه صرف اولنمیلدر ممالک اسلامیه ده پک چوق قبرلر واردرکه  
 خلق آنلره کیدوب و دعا و نیازلر ایدوب کنهه کیرلر و سنه نکه ایام معینه سنده  
 برچوق خلق حجه کیدر کبی بعض مقبره کیدرلر و کیمی خسته اولوب فلان تر به یه  
 قربان نذر ایدر و کیمی غزه یه چیقده یا خود کیمی یه بنمشیدم فلانک قبرینه یافلان  
 شیخه نذر ایتمد دیر کویا حصول مطلوب و دفع مرهوبلرینه انحق بو نذرلر سبب  
 اولمشدر دیوا اعتقاد ایدرلر بو صورتله شرعا حرام اولان بر طاقم نذرلر تر به دارلره  
 و بعض مجاورین قبوره ما کل اولمشدر بو نلرایسه شرعاً هی منهدر ایشته نبی علیه السلام  
 حضر تلرینک نهی ایتمدیکی او مثلوقبرلر یاننده اجرا اولنان معاملاتدر احمد بن حنبل  
 حضر تلرینک انکار ایتمدیکی دخی بو ایشلردرکه خلق بو خصوصده پک افراط ایتمدی  
 دیمش و قبر حسین عندنده اجرا اولنان ایشاری ذکر ایتمشدر مصرده نفیسه نکه  
 و سائرلرینک قبرلری یاننده و عراقده قبرعلی دیرکمری یرده و سائر قبور لاحتصاده  
 یاسیلان ایشلر دخی بو قیلدندر .

زیارت قبور حقنده ابن تیمیه بو وجهله تشدید انکار ایتمکدن بشقه انبیا و اولیادن  
 بر حاجت دیله مک خصوصده زمان حیات و وفاتلرینی تفریق ایدوب دیمشدرکه  
 آنلره حیانه ایکن کمنسه عبادت ایده مزدی و آنلر حضورلرنده کمنسه نکه تشریکنه  
 میدان و یرمیوب بوندن نهی ایله عتاب ایدرلردی بو جهته آنلر حقنده اشراک  
 انحق و فاتلرنده و حال غیبتلرنده اولور نته کیم مسیح ایله عزیر حقنده بعضیلر  
 شرکه قائل اولمشدر سلف ائمه ایسه علیه السلام حضر تلرینک مرادی ماده شرک  
 حسم و قطعیه توحید بارینک تحقیق و دینک جناب حقه اخلاصی اولدیغنی بیلدکرندن  
 انبیا و صالحینک قبرلرنده نماز قیلمازلر و آنلردن سؤال و استغانه ایتمزلر ایدی .

ابن قیم دخی بوبابده ابن تیمیه تابع اوله رق بلاد اسلامیہ نیک هر طرفنده قبرلره  
سجده اولتیق وقبرلرده قربان کسلمک واهل قبوردن استغانه واستمداد ایدلمک  
کچی پک فنا ایشلر یاللمقده در دیوزیارت قبورک رد وانکاری حقنده غایت شدتلو  
لسان قوللا تمشدر . وشرکک مبدأ ومنشی بو کیفیت اولدیغنی بیان سیاقنده دیرکه  
فی الاصل ناسک جمله سی دین وطریق هدایت اوزره ایکن اگ ابتدا قبرلره ملازمت  
واهل قبورک تصاویرینه حرمت جهتندن یوللرینی شاشیروب مزلقه شرکه دوشمشلر درکه  
ودوسواع ویغوث ویعوق ونسرنام ذوات کرامک وفاتلرنده تصویرلری یایلوب  
حیاتلرنده ایکن اوتوردقلری محلمره وضع ایله کندولرینه احترام اولنه کلدیکی حالده  
مرور زمان ایله بونلر نه ایتمش ونیچون یاللمش اولدیغنی بیلنلر منقرض اولدقدن  
صکره خلق بو اصنامه عبادت ایتمکک باشلادقلرندن جناب حق آنلری توحیده دعوت  
ایچون حضرت نوح علیه السلامی کوندردی آنلرایسه ایمان ایتمکک نردن باری تعالی  
حضرتلری آنلری طوفان ایله هلاک ایلدی صکره عمرو وبن عامر قوم نوحک اصنامه  
دریا کنارندن اخراج ایله عربی آنلرک عبادتنه دعوت وآنلر دخی اکا اجابت ایتدی  
وبرمدت صکره بکنندکلری شیلره عبادت ایدر اولدیلر بوضورتله طوائف عرب  
بت پرست اولوب ایچلرنده ملت ابراهیم علیه السلامدن یالکز بر حج ایله بیت  
مکرمه تعظیم مسئله سی قالدی وحین تلبیه ده ( لیک لاشریک لک الاشریکا هولک  
تملکه وما ملک ) دیرلردی خاتم الانبیا علیه افضل التحایا حضرتلری مبعوث  
اولدقده ( اجعل الآلهة آلهة واحدا ان هذا لشیء عجاب ) دیدیلر وبعضیلری بر  
طرفه کیدرکن برقوناق محلنه نازل اولدقده درت طاش آلوب اگ کوزلنی کندوسنه  
رب اتخاذا ایله اوچنی طعام پیشوره چکی چوملک آتته وضع ایدر واورادن قالقوب  
دیگر منزله نزول ایتدکده ینه بو اصول اوزره حرکت ایلر ایدی فتح مکه ده کعبه  
مکرمه اطرافنده اوچیزو تمش صنم بولندی جمله سی امرنبوی ایله اخراج واخلراق  
اولندی مشرکینک صنوف عدیده سی اولوب کیمی قوم نوح کچی تصاویر بشره وکیمی  
حیواناته یا حجر وشجره عبادت ایدر وبرطاقی دخی شیطانه طیار ( الم اعهد الیکم بانی آدم  
ان لاتعبدوا الشيطان ) شمسه عبادت ایدنلر دخی برنوع بت پرستدرکه شمسک نفس  
وعقلی اولوب ملک فلکدر وملائکه دن بر ملکدر وبوجهته سجده وتعظیمه  
مستحقدر دیو اکا مخصوص بر صنم اتخاذا وصنمخانه بنا ایدوب کونده اوچ دفعه  
اوراده نماز قیلارلر ودعا ایدرلر وشمسک طلوع وزوال وغروبنده جمله سی سجده یه  
وارلرلر دیگر بر طائفه دخی عالم سفلینک تدبیری قره مخصوصدر دیو آنک ایچون  
صنم یاپوب عبادت ایدرلر وهر آیک ایام معلومه سنده آنک ایچون صنم اولورلر

و برطاقی دخی کوا کبک عالمده تأثیرینه قائل اوله رق و آنلری اله اتخاذا ایدرک آنلر ایچون عظیم معابد و هیاکل یایدیلر ایشته بونلر هپ پت پرستدر مشرکینک برطاقی دخی آنشی اله اتخاذا و آنک ایچون معبدلر بنا ایتدیلر بونلر آتسک اطرافنده طواف ایدرک عبادت ایدوب بعضیلری دخی زیاده تقرب ایچون کندوسنی یاخود اولادینی آتسه آتمق کبی غریب حاللری واردر و برطاقی صویه طاوب هر شینک اصلی اودر دیرلر آنلرک دخی کندولرینه مخصوص تسبیح و تمجید کبی آینلری واردر مشرکیندن بعضیلری دخی عالمک نقائصدن منزّه و مقدس برصانع حکیمی واردر فقط اکا وصول ایچون بزّه یول یوقدر مکرکه برطاقم و سائط ایله اوله بناء علیه بزّه کوره لازم اولان بودرکه اکا قریب اولان روحانیاتک توسطیله اکا تقرب ایتلی یز شویله که : بز آنلره و آنلر ایله اکا تقرب ایلرز آنلر بزم ارباب و آلهه من و رب الارباب واله الالهه عندنده شفعا مندر بز آنلره عبادت و عرض حاجت ایدرز آنلر دخی بزم و آنلرک الهی اولان رب الاربابه شفاعت ایدرلر و بزّه واسطه اولورلر بوا یسه آنلره صلوات و زکات و ذبح قرابین ایله تضرع و استهاله موقوفدر دیرلر ایشته مذاهب و مناسیح مشرکین بونلردر بونلر هپ رسل عظام علیهم السلامی تکذیب ایله تعظیم و عبادته استحقاق خصوصنده مخلوق خالقه نظیر و شریک قیایدیلر (ولم یکن له کفواً احد) و (لیس کتبه شیء) آیت کریمه لیه رد وردع و (فلا تجعلوا لله انداداً) نص شریفیه نهی و منع اولندیلر و عالمده شرکک اصل و مبنی علیهی اولان اشبو تشبیهدن حذر ایچون رسول اکرم صلی الله علیه و سلم حضرتلری مخلوقه سجده یاخود یمین ایتمک کبی حالاتدن نهی بیورم شددر .

انتهی

الحاصل تر به لره تعظیم حقنده خلقک افراطنه مقابل ابن تیمیه ایله ابن قیم دخی افراط ایدرک علی العموم زیارت قبوری منع ایله تر به لره قربان کسمک و اهل قبوردن استغانه و استمداد ایتمک کبی افعالی شرک قیلندن عد ایتدیلر حالبوکه قبرنی علیه الصلاة والسلامک زیارتی واجبیدر یاخود مندوبیدر مجتهدین انحق بوراسنده اختلاف ایتمشردر یوخسه روضه مطهره زیارتنه شد رحل ایتمک موجب اجر عظیم و جالب شفاعت نبی کریم اوله جفی جای بحث دکدر و اهل اسلامی بوندن منع ایتمک کبی مقاله شیعیه ابن تیمیه ایله ابن قیم کبی اکا تابع اولنلردن غیری کسنه جرأت ایتام شددر آنلری بومز لقه یه دوشورن دخی (اشتد غضب الله علی قوم اتخذوا قبور انبیائهم مساجد) حدیث شریفی اولوب بونک مؤداعی ایسه اصنامه سجده ایدرجه سنه نیلرینک قبرلرینه سجده ایدنلرک مظهر غضب الهی اولمسندن عبارتدر و ابن تیمیه نک (ائمه سلف انبیا و صالحین قبرلری یاننده دعا و استغانه ایتدی) کلامی سلفدن وارد



اولان روایات صحیحہ ایہ مردود در امام نووی دیرکہ زیارتی اکثر ایتک و اهل خیر و فضلك قبرلری یانده مکث و توقف ایلمک مستحدر امام سبکی دیرکہ نبی علیہ السلام مدد و شفاعت استمک و آنکله جناب حقہ توسل ایلمک بر امر حسندر بونی ابن تیمیہ یه کنگجه سلف و خلفدن کیمسه انکار ایتدی ابن تیمیہ کلوب آندن اول علمادن برینک قائل اولدینی بربدعت چیقاردی و بین الاسلام هدف طعن و تشنیع اولدی . ایشته شیخ نجدی بووادیلرده یولنی شاشیرب ابن تیمیہ ایله ابن قیمک شرعا ممنوعدر دیدکاری افعالی هپ کفری موجب اولان اعمالدن عد ایتدی و تر به لره نذر یادعا و یاخود اطرافنده طواف ایتک یا استارینی اوپمک و یا تبرکاً طپراق آلمق کبی افعال ایله تعظیم ایدن و اهل قبوردن استمداد ایلسان کیمسه لر کافر اولدینی کبی آنلری تکفیر ایتیمانلر دخی کافر اولوردیدی کفر ایسه انجق جناب حقیق وجود و وحدانیتی کبی ضروریات دینیہ بی و رسالت نبویہ بی و نمازک فرضیتی کبی امور ظاهرہ بی انکار ایله اولور یوخسه رسول علیہ السلامی مقرر اولان مسلم بر شبه خضیه یه مستند اولدججه تکفیر اولنه ماز زیرا اهل سنت و جماعت مذهبی اسلامه منتسب اولنلری تکفیردن تحاشی و احتراز ایتمکدر بناءً علیہ ائمه اهل بدعتک ضررلری دفع ایچون قتللری امر ایتمکله برابر کندولری تکفیر ایتزلردی .

وا کرچه ابن تیمیہ ایله ابن قیم دخی او مثللو افعالہ شرک دیمشدر ایسه ده آنلرک بوندن مرادلری شرک اصغر دیمک اولوب یوخسه ( ان الله لا یغفر ان یشرک به ویغفر مادون ذلك ) آیت کریمه سنده مذکور اولان شرک اکبر دکلدز زیرا جناب حقیق مغفرت ایتیمه چکی شرک اکبر دین اسلامدن چیقماق دیمکدرکه اصنام یاخود آتش یا صوکی شیلره عبادت ایله مخلوقادن برینی خصائص ربوبیتده جناب باری تعالی یه شریک و نظیر اتخاذ ایتمکدن عبارتدر بوکا شرک جلی دخی دینلور اما شرک خفی که جناب حقدن غیر یه التفات دیمکدر نوع بشر بروقتده بوندن خالی اولماز رسل و انبیای عظام علیهم السلام شرک جایدن مبرا اولدقلری حالده شرک خفیدن تخلص ایچون جناب حقہ تضرع و نیاز ایده کمشلدر ابراهیم و اسمعیل علیهما السلامک ( واجعلنا مسلمین لك ) و حضرت یوسف علیہ السلامک ( قتوفی مسلما ) دیو دعا ایلملری دخی بو معنایه محمولدر الحاصل شرک خفینک انواعی اولوب ( افرأیت من اتخذ الهه هوا ) آیت کریمه سی اقتضاسنجه نفس و شهوته اتباع ایتک بر نوع شرک خفی اولدینی کبی ریا دخی شرک خفیدر عملی ابطال ایدر دیرلر لکن مرآتیلر هپ کافر اولوب دملاری هدر و ماللری حلالدر دین یوقدر .

بناءً علی ذلك علماء اسلام شمس و قمر و کوکب و صنم کبی اله اتخاذ اولنسان شیلره

سجده ایتمک کفر در دیدیلر و بونلردن بشقه سنه سجودی کبائر محرماندن عد ایتدیلر و بومقوله معبود اتخاذا اولنان شیرل ایچون قربان کسمک کفر اولدیغنی بیان ایله برابر لغیرالله ذبح ایتمک و تربه لره نذر ایلمک کبی افعالی بعضیلر محرمات باینده و بعضیلر دخی تبرکا تربهلردن طوپراق آلمق و تربهلرک اطرافنده طواف ایتمک کبی مکر وهات صره سنده ذکر و ایراد ایتمشلردر شیخ نجدی ایسه بونلرک هپ کفر و شرک جلی اولدیغنی ادعا ایله شو قدر یوز سنه دنبرو بتون اهل اسلامک ضالانده قالدقلری زعمنده بولنوب (اذا قال الرجل هلك الناس فهو اهلكهم) بالرفع او الفتح \* حدیث شریفنک سرینه ماصدق اولمشدر .

ملعون شیخ نجدی بونجه عصر دنبرو کلوب کچمش اولان بو قدر علماء اعلامی تضلیل ایتدیکنه قناعت ایتمیوب کبار اصحاب کرامدن نیجه ذواتی دخی تحطئه به جرأت ایلمشدر . شویله که : ابو بکر الصدیق رضی الله عنه حضر تلرینک اوائل خلافتنده خالد بن الولید رضی الله عنه حضر تلری امیرالجیش اوله رق مسیلمه الکذاب اوزرینه سوق اولنان عساکر اسلامیه مسیلمه به غلبه ایدوب انجق اصحاب کرامدن زید بن الخطاب ایله دیکر بعض ذات شهید اولدقلردن خالد بن الولید ایله برحیات قالان دیکر اصحاب کرام آنلری جسیله ده دفن ایتمشلر ایدی انجق اوراسی طاشلق اولمق حسیه لزومی قدر حفر اولنه مدیغندن قبرلرینک اوزرلری بر آرشون قدر ترفیع اولمشیدی شیخ نجدی بو قبرلرک اوستی بر قارش ترفیع اولنمق لازم ایکن زیاده ترفیعلری بدعتدر دیو بو قبرلری هدم ایتمشدر حالبوکه بز احکام شرعی بی اصحاب کرامدن اخذ وتلقی ایتدک و (اصحابی کالنجوم بایهم اقتدیتم اهتدیتم) حدیث شریفنک اقتضاسنجه آنلره اقتدا ایله مأمورز حال بو یله ایکن بیک یوز بو قدر سنه صکره بر متعصب مضل نجدی مجتهد مطلق اولمق دعواسیله چیقوبده بو قدر اصحاب کرامی تحطئه ایلمسی نصل فاحش بدعت وضالات اولدیغنی درکاردر و مسیلمه الکذابک یرنده ظهور ایتمسی و مسیلمه محاربه سننده شهید اولان اصحاب کرامک قبرلرینی هدم ایلمسی قضیه لری مسیلمه الکذابه بئس الخلف اولدیغنه شاهد عادل اولدیغنی ادنی ملاحظه ایله معلوم اولور آز مطالعه ایتسیدی کندوسی دخی بونی تفظن ایده بیلوردی اما نه چاره جناب حق بر شخصک بصر بصیرتی قپارسه کونش کبی ظاهر اولان شیرلی درک و تشخیص ایدمز (ومن یضلل الله فلا هادی له)

قالدیکه باب اجتهاد شرعاً مسدود دکل ایسه ده مجتهد مطلق درجه سنه وارمق حسب الحال متعسر و بلکه متعذر اولدیغندن عرفا بو قوسد اولمشدر فقط هر یرده جاری بر مذهب اجتهاد ایله پیشوای عامه علیمان اولمق سوداسی شیخ

نجدينك افكاريني صارمش اولديغندن حق و باطلی فرق و تمیز ایتمز اولوب وقت سعادتدن صکره نقدر مخترعات وار ایسه رفی داعیه سنه دوشمشیدی .

حالبوکه بدعت سیئه ایله بدعت حسنه یی فرق و تمیز ایتمک لازمدر صکره دن ظهور ایتمه نیجه شیرل واردرکه حسناندن معدوددر وانسان مدنی الطبع اولدینی جهتله بر راده ده طور میوب فنون و صنایع مخترعه حسیه عالم تر قیده قطع مسافه ایده کلدیکندن شیخ نجدينك بوروشی طبیعته قارشو بر حرکت ایدی و فی الاصل حریده بدویلر مدنیله غالب ایکن صنایعک تر قیسی حسیه طوب و تفنک ایجاد اولنه لیدنبر و مدنیت بو خصوصده بدویته غالب اولغه و کوندن کونه بو غلبه نك درجه سی تزاید و ترقی بولغه باشلامش ایدی شو حاله نظراً شیخ نجدينك بر حقیقماز یوله صاپمش اولدینی درکار ایدی چه فائده که و هابیلرک اطرافنده کی خلق آنره مسلم مبتدع نظریله باقوب اصلاح حاللرینه چالشمده ایکن آنر جمله سنه کافر و مشرک نظریله باقوب و دملرینی هدر و ماللرینی کندولرینه حلال بیلوب بو اعتقاد عربانک مزاجنه دخی موافق کلدیکندن در حال بو مذهب باطله میل ایله بیهوده یره بر چوق قان دوکلمکه سبب اولمشلر در .

بناءً علیه حجاز و عراق آره سننده بر وجه مشروح مباحثات علمیه جریان ایتمکده اولدینی حالد و هابیلر دین اسلامه دعوت یولنده جوارلرنده کی عشائر و قبائل غلبه ایدرک دائره حکومتلرینی توسیع ایتمکده و مذهب و هابی کوندن کونه اطرافه منتشر اولوب کیتمه ایدی و درعیه شیخی محمد بن سعود زکات مالندن بشقه کسنه دن برشی ایستمیوب فقط اموال غنائمک حسنی آلوردی بناءً علیه قبائل و عشائر قولایلقله کندوسنه اتباع ایدر اولدقلرندن آز وقت ظرفنده قوتی تزاید ایدرک بو مذهب جدید سایه سننده بر جزیره العرب حکمدارلنی تشکیل ایتمک سوداسنه دوشمشیدی فقط دولت علیه نك سطوت قاهره سنندن خوف ایتمدیکی جهتله معموره لره تعرضدن اجتناب ایلردی و برده اولوقت نادر شاهک صیت سطوتی اول حوالیده منتشر اولدیغندن شیعیلرله بر وقعه چیقارمقدن دخی صاقینوردی لکن وفاتنده اوغلی عبدالعزیز یرینه کچوب یوماً فیوما متراید اولان قوت و سطوته اغتراراً دولت علیه دن دخی تحاشی و احتراز ایتمز اولوب بر وجه آتی بر طرفدن حجازه و بر طرفدن بلاد عراقه تعدی و تجاوز ایتمکه باشلامشدر .

و محمد بن عبدالوهاب پک چوق وقت معمر اوله رق عبدالعزیز دخی پدری کبی کندو مذهبک ترویج و اعلانه تشویقندن خالی اولدینی کبی کندوسنک وفاتنده دخی بر چوق اولاد و احفادی قالوب اکبر اولادی کندوسنه بس الخلف اوله رق پدرینک مذهبنی خلقه تعلیم ایله مشغول اولدی .

وهابيلر بك متعصب اولدقلرى جهتله مبدأ ظهورلرندنبرو اسقاط فريضة حج ايتك املنده اولدقلرندن مذهب واعتقادلرى اكلاشلق اوزره علمای وهابيه دن مکه مکر مهيه اوتوز کشی کوندر مشلر واولوقت امير مکه اولان شريف مسعود بن سعيد دن حج ايتك اوزره رخصت استيوب بوبابده بر مقدار آچه اعطاسنه دخی رضا کوستر مشلر ایدی علمای مکه بونلرک مذهبی لدی التفیش بر چوق عقائد باطله یی مشتمل اولدینی کوریلنجه قاضی مکه طرفدن بونلرک کفری حقنده اعلام ویرلمکله جمله سی حبس اولندیلر شریف مسعودک بیک یوز التمش بش تاریخده وفاتیله برادری شریف مساعد امیر مکه مکر مه اولدقده وهابیلر حج ایچون آندن استیدان ایتمش ایسه ده اودخی راضی اولمدينی جهته جوارده بولنان بعض عربان ایله مقاتله یه باشلادیلر شریف مساعدک ایامی منقرض اولوب بیک یوز سکسان درت سنه سنده برادری شریف احمد امیر مکه اولدقده ینه علمای وهابيه دن بعضیلری مکه مکر مه یه کلوب مذهبلری بر نوع الحاد اولدیغنه حکم اولنغله (انما المشرکون نجس فلا یقر بوا المسجد الحرام) مقتضاسنجه وهابیلر مکه مکر مه یه کلکدن منع اولندیلر .

بیک یوز سکسان التی سنه سنده امیر مکه اولان شریف سرور بن مساعدک زمان امارتنده وهابیلر تکرار حج ایچون استیدان ایتدکلر نده شریف سرور کمنه ایله مذاکره ایتمکسزین بکا یوز آت ویرر ایسه کز عجملردن الله کلدیکی وجهله هر سنه کلان آدمکلر کزدن ویرکو آلتق اوزره حج ایچون سزه رخصت ویریرم دیو جواب ویروب انجق اعجامه قیاساً ویرکو اعطاسنه موافت ایده مدکلرندن ارتق توسیع دائره اقدار ایله قلیجلیری سایه سنده حج ایتک املنه دوشدیلر . وفی الواقع کوندن کونه سطوت وقوتلرینی تزید ایتمکده اولدیلر آنلرک بوروشلری ایسه امیر مکه یه موجب اندیشه اولدقندن بشقه وهابیلرک حریمه هجوم ایده جکلری حوادثی اهالی حریمه بادی تلاش اولدیغندن یوقاروده بیان اولدینی اوزره بیک یوز طقسان سنه سنده شریف سرور در سعاده تحریرات مخصوصه ارسال ایله وهابیلرک قهر و تدمیری ایچون قوه کافیه ایله اقدار اولنسنی انها واستدعا یلمش اولسی اوزرینه کیفیت جده و شام و بغداد والیرندن استعلام اولنمشیدی . طقسان بر سنه سنده بونی مؤید حریمندن ینه بعض تحریرات کلش ایسه ده جده والیسنک تحریراتنده کیفیت اولقدر شدتلو یازلامش اولدینی جهتله ایشه چندان اهمیت ویرلماش ایدی و برده محمد بن عبدالوهاب امیر مکه طرفدن حقنده اولوجهله در سعاده انها واشتکا وقوعنی لدی الاستماع شام والیسنه مخصوص آدم کوندروب

( طایفه درس ویرمکن بشقه مشغولیتی اولدینی و تحصیل شامده اولمق مالبسه سیله اوراجه حالی معلوم ایدوک و امیر مکئک دیدیکی کبی فساد ایقاعنه قدرتی اولدینی ) بیایله امیر مکئک انہاسنی تکذیب ایلمش اولدیغندن مؤخر آشامدن کلان جوابنامہده بورلری بسط و بیان اولنہرق مرقوم برقبیلہ رئیس دکل کہ بغی و عصیان ایدہ بیاسون دیو محرر اولمسیله امیر مکئک انہاسی مبالغہیہ حمل اولنہرق مصاحبت مجرد بر اعلام واستعلام درجه سنده قالمشدر .

حالبوکہ محمد بن عبدالوہاب فی الواقع برقبیلہ رئیس دکل ایدیسہده بروجه مشروح درعیہ شیخی محمد بن سعودی اوکنہ قاتوب آنک الیہ بر جمعیت قویہ تشکیل ایتمشیدی . فقط بوجمیت کرکی کبی تأسس ایدنجیہدک دولتجه اوزر لرینہ بر حرکت وقوعندن احترازاً دولت علیہنک دقت نظرینی جاب ایدہ جک حرکتدن برمدتجک دها اجتناب ایله تستر حالندہ بولمقی ایستردی اولوقت مأمورین دولت علیہنک دخی بومثللو خصوصات پولیتیقیہده غفلتری برکمال اولدیغندن وهابیلرک هدف مقاصدی نہ اولدیغنی تظن ایدہ مامشدر ایدی و امیر مکہ روش حالہ نظر آ ایشک فنایہ منجر اولہ جغنی درک و تفہم ایلمش ایسہده وکلای دولته تفہیم ایدہ مامشیدی .

بوجہتہ وهابیلر بلا مزاحم دائرہ حکومتلرینی توسیع ایتمکده اولدیلر . فقط امیر مکئک دخی عشائر عربان اوزرندہ زیادہ نفوذی اولدیغندن حجاز طرفہ پکدہ تعدی ایدہ میورلر ایدی و شریف سرور ذاتاً احباب کفایتدن بر ذات اولدینی خالدہ بیگ یوز طقسان اوچ سنہ سنده فاس حاکمی مولی محمد کریمہ سنی اکاتر ویج ایتک اوزرہ ایکی اوغنی ایله برابر مکئ مکرمہ یہ ارسال ایدوب بو صرہده بر چوق ہدایا و عطایا دخی کوندرمش و موسم حجدہ مشار الیہا شریف سرورہ عقد نکاح ایدلمش اولدیغندن شریف سرورک اقطار حجازیہده بر مرتبہ دها صیت و شہرتی تراید ایتمشیدی امیر مکئ مکرمہنک بویله تراید سطوت و اعتباری ایسہ و ہابیلرک اولطرفہ ترقی نفوذ لرینہ مانع مزاحم ایدی .

بیگ ایکیوز ایکی سنہ سنده شریف سرور وفات ایله یرینہ شریف غالب بن مساعد امیر مکئ مکرمہ اولدقدن صکرہ و ہابیلرینہ حج ایچون استیدان ایتدکلرندہ اودخی رخصت ویرمدکن بشقہ ایکیوز بش سنہ سنده برکزیدہ فرقہ عسکریہ ترتیب و برادری عبدالعزیزی باشبوغ نصب ایله و ہابیلر اوزرینہ سوق ایلدی . جانب شرقہ بولنان عشائرک اکثری و جبل شمر قبائلی شریف طرفہ میل و مطاوعت ایتدی حرب قبائلنک دخی چوغنی کلوب التحاق ایلدی بوجہلہ شریفک اردوسی کسب جسامت ایدرک ہر طرفہ دہشت ویردی سید عبدالعزیز بواردو ایله نجد

ایچنه دخول ایتدکده نجد قریه لرندن بعضیلری عرض مطاوعت ایلدیسهده اکثری طاغیلوب فرار ایلدیلر بعده سام ناحیه سنده واقع بریده قریه سنه واریلوب قلعه سی محاصره اولدیسهده آلات قلعه کیری اولدیغندن تسخیر اولنه مدی . سید عبدالعزیز آنی حال اوزره ترك ایله ایلرویه حرکت ایتمک ایستدیسهده سائر اشراف ذخیره نك قلتنی بهانه ایدرک عودته قرار ویردکلی ائنده سعود بن عبدالعزیز وهاپینک مطیر طرفه هجوم ایتدیکی خبری آنغین سید عبدالعزیز اردوسیله سرعیاً اولطرفه حرکت ایتکله وهاپیلرک منهزم اولوب کتدکلی تحقق ایلدی بونک اوزرینه سید عبدالعزیز دخی اردوسیله جانب حجازه عوت ایتدی .

بوئنده شریف غالب حضر تلی دیگر براردو تجهیز وخبیره والی طوب استصحاب ایدرک نجد اوزرینه حرکت وسنه مرقومه رمضاننده شعرا قریه سنه مواصلت ایلدی لکن قریه مزبورده مستحکم اولوب دروننده کی وهاپیلر دخی قویاً مدافعه ایتدکلر نده طوب وخبیره ایله خیلی مدت ضرب وتضیق اولدیسهده تسخیری قابل اولدیغنی جهته لغم حفرینه مباشرت اولنوب الحقیق ک قوملق بر محل اولسیله بودخی کارکر تأثیر اولدی موسم حج ایسه تقرب ایتدیکندن شریف غالب بونی حالی اوزره ترك ایله رجعته مجبور اولدی .

بوندن صکره شریف غالب آره صره نجد اوزرینه فرقه فرقه عساکر ارسال ایله جنک وجدال دن خالی اولدی لکن بو مثللو فرقه لر نجد طرفته الغار ایله وهاپی مذهبنه داخل اولان قرانی اوروب راست کلدکلی وهاپیلرله جنک ایدرک عودت ایدرلردی وثمره مظفریت بر از مال غنائم المقدن عبارت ایدی هالبوکه وهاپیلر اوزرینه باشلوجه بر حرکت لازم کلوب بو ایسه دولتک همته موقوف اولدیغنه مبنی شریف غالب ایله امیر الحلاج اولان جزار پاشا طرفندن کیفیت در سعاده انها اولنش ایدوکندن بالاده بیان اولدیغنی اوزره ایکی یوز سکنر سنه سنده بومسئله ایچون عقد اولنان مجلس مشورته مقدمه مولویتله حر مینه کیدوب کلش اولان صدور عظامدن بعضیلری ( محمد بن عبدالوهاب کلام قدیم تلاوتی ترك ایله جلب دنیا ایچون دلائل الخیرات او قومق معصیتدر وقبه و مناره بدعتدر وقاشیق ایله ییمک ییمک صدر اولده یوغیسی ال ایله ییمک لازمدر و شرفای مکّه زیدیه مذهبنه اولدقلرندن عمل واعتقادلی شرعه مخالفدر دیو امر بالمعروف ونهی عن المنکر وادیسنده اعتراضلر ایدیور بویله ظاهر حالده طریق حقه دعوت ودالات داعیه سنده بولنان کیمسه یه شرعا و عرفانه لازم کله چکی جای تأملدر ) دهرک شیخ نجدی طرفندن وکالت ایدرجه سنه دفع دعوا یه تصدی ایتسنه مقابله بعضیلری دخی اصحاب فیل کبی

مکه مکرمه یی تخریب فکرنده اولان شخصک خارجی اولدیغنده نه شبهه وار هان تأدی لازم کلور دیمکله وحضاردن بعضیسی دخی مرقومک بو حرکتی مجرد امیرمکه ایله بینرنده کی مبانیتدن ناشی اولمق کر کدر دیو بر کره بغداد طرفندن استعلام اولمسنی رأی ایتمکله وبوغائلهنگ بغداد طرفندن رفع وازاله سی ممکن اولور دیو ظن و تخمین ایلمکله کیفیت بغداد والیسنه حواله اولمشیدی بونک اوزرینه بغداددن وارد اولان جوابنامه ده وهابیلرک دفع مضرتی قولای برایش اولدینی وشرلرندن تحرز ایچون احتیاطانجف قصبه سی کی بعض محللره استحکام ویرلدیکی ولحسانک ضبطنه ابتدار ایتمکرندن بی خالد عشرتک لاجل الحافظه لحمایه دخول ایتمش اولدینی مندرج بولمشدر .

دولت علیهنگ فصل محظاره لو زمانلر آشورمش اولدینی بوندن دخی معلوم اولورکه بونجه سنلر مقدم تبعه سندن برینک احداث ایلدیکی بر مذهب جدید حقتنده پک چوق سنلر مباحثات علمیه جریان ایدرک حجاز وعراق علماسی طرفلرندن متعدد کتابلر تألیف اولمش اولدینی حالده نهایت دینک وطن اصلیمی اولان جزیره العربده بومذهبک تأثیراتی حسیله درعنه شیخی خروج ایدرک بر حکومت مستقله تشکیل ایلمش ایکن دولتک مرجع مشکلات اموری اولان مجلس مشورتنده بوکا دائر معلومات اولوب وبومذهب جدید سایه سنده برقیله شیخنک بر حکمدار قوی الاقتدار اولدینی بیانمیوبده حالا وهابیلرک مرامی نهدن عبارت اولدینی صدور عظام بیننده بادیء بحث ومجادله اوله یور واکر چه دولت علیه صنف علمایه فوق العاده اعتبار ایدرک بوصنفک درجه علیاسنده بولنان ذواتی کندو ارکانندن عدایده کلدیکی حالده بویله الی التمش سنه دنبرو سورینوب کلان وداخل ملکنده بر حکومت مستقله تشکله سبب اولان بره سئله مذهبییه دائر هنوز معلومات صحیحه آله مامسی اینانلمیه حق بر کیفیتدر .

لکن اول وقتک حقیقت احوالنه کسب اطلاع اولدینی حالده پکده استبعاد اولنه من زیرا اول وقت درسعادنده طریق علمیه یه منسوب اولنلر اوچ قسم اولوب بری مراتب علمیه اصحابی اولان علماء رسمیه وایکنجیسی فعلا خدمات شرعیده بولنان حکام وکتبه و اوچنجیسی مدرسه نشین اولان اساتذده وطلبه ایدی و صنف اول ایچنده معلومات اصحابی پک نادر اولوب صنف ثانینک سرمایه معلوماتی دخی دعاوی واقعه یی کتب فتاواده مندرج اولان مسائله تطبیق ایله اعلاملرک سبکی اصول صکه توفیقندن عبارت اوله رق مباحثه علمیه داعیه سندن بعید ایدیلر صنف ثالث اصحابی ایسه بویکی صنفه جاهل نظر یله باقدقلری حالده علوم شرعیهنگ نظریات و عملیاتندن

محرورم اوله رق کاه افکار فلسفیه نك وکاه عقائد معتزله نك جرح وابطالنه حصر اوقات ایتمکه و مأمورین دولتن خارج برصنف مخصوص مشابه سنده بولدقلرندن احتمالکه بونجه سنه لر دنبرو جزیره العربده جریان ایدن مباحثات مذهبه یه هنوز واقف اولما مشلر ایدی طریق علمیه احسابنک حالی بووجه اولوب مأمورین ملکیه ایسه چولده کی مذهب منازعه سیله برطاق تعصب بارد احسابندن اولان واعظلرک مبالغه لی سوزلرینی فرق و تمیز ایده مزلردی واکرچه وهابیلرک حجاز وعراق طرفلرینه تجاوزه باشلادقلرنده مشاهده ایتدکلری مخاطرات اوزرینه تیقظ واتباه باشلامشلر ایسه ده مرکز سلطنتده هنوز ایشک مزایاسنه واریله میوب مقدما تعصب وادیسنده آتوب طومتش و برمدت چکه یاریشی ایدوب کیتمش اولان قاضی زاده لیلره قیاساً اشبو وهابی مسئله سنه کرکی کچی اهمیت ویرلیور ایدی .

ایشته بومثلو احوال دن وهابیلر استفاده ایدرک کندولرینه جزئی مخالفت ایدن عشائر و قبائلی اوروب یغما وغارت وکوندن کونه توسیع دائره مکت ایلمکه ایدیلر واکرچه شریف غالب طرفدن پیدرپی کوندریلان فرقه لر جابجا وهابیلری اوروب برآز حیوانات اغننام ایله عودت ایدرلردی لکن بومثلو الغارلرده آنک عسکرندن دخی ایچه تلفات وقوع بولمده ایدی وایکی یوز اون سنه سنده سید ناصر بن سلیمانک قومانده سیله جانب شرقه کوندریلان برفرقه عسکر یه شاس نام محلده وهابیلره غلبه ایلمش ایسه ده آنک طرفدن دخی پک چوق آدملر تلف اولمشیدی متعاقباً سید فهید قومانده سیله سوق اولنان فرقه عسکر یه دخی روغ النعام نام محلده وهابیلرا ه بریوک محاربه ایدوب طرفیندن کلی تلفات وقوعه کلد کدن صکره سید فهید خیلی مظفریتلره مظهر اولمشیکن عسکره بوزغونلق ویباغلق کلهرک ایلرویه حرکت ایتدکلرندن اودخی چاره سز مکه مکرمه یه عودت ایلمشدر .

وهابیلر ایسه جانب حجازده بویه جنک وجدال ایله مشغول اولدقلری حالده جانب عراقده دخی توسیع مملکت قیدینه دوشمشلر ایدی ومقدملری محمد بن سعود دولت علیه نك قوه قاهره سندن احتراز ایله حجاز وعراقه تجاوزدن اجتناب ایدرکن رینه کچن اوغلی عبدالعزیز جزیره العربده نائل اولدینی مکت روز افزون ایله شماروب آرتق هیچ برشیئی قید ایتمه رک جهانکیرک داعیه سنه دوشدی وبالاده بیان اولدینی اوزره عساکر کلیه ایله اوغلی سعودی کوندروب لحسا وقطیف طرفلرینی ضبط ایتدی ولحسانک استخلاصنه کیدن منتفق شیخک اردوسنی بوزدی وبصره حدودینه قدر اولان یرلری کاملاً قبضه تصرفه آلدی .

وبوانساده قبائل عربدن پک چونخی وهابی مذهبه دخول ایده کلوب حتی حرب



قبائلندن دخی بعضیلری بونلره ملتحق اوله رق جانب مجازده دخی وهابیلرک قوتی ترقی ایتمکده ایدی .

بناء علیه ایکی یوز اون ایکی سنه سنده شریف غالب بنی حربدن وهابی مذهبه کیرنلرک اوزرینه عسکر سوق ایتدکن بشقه بر جسم اردو تجهیز ایله بالذات وهابیلر اوزرینه سفر ایتدی لکن خر مه قریه سنده ایکن وهابیلر سیل منهر وجراد منتشر کی کلوب اوزرینه هجوم ایتلریله واقع اولان محاربه عظیمه ده طرفیندن ایکی بیک قدر تلفات وقوع بولدی ویالکتر شرفادن قرق بوقدر ذوات معتبره شهید اولدی ونه ایتنده وهابیلر غلبه ایدرک شریف غالب مغلوباً مکّه مکر مه یه رجعت ایلدی .

بونک اوزرینه ایکی یوز اون اوچ سنه سنده شریف غالب ایله رئیس وهابیان اولان عبدالعزیز بیننده بومصالحه عقد اولنه رق برو طرفدن وهابیلرک حج ایچون مکّه مکر مه یه کلوب کیتلرینه رخصت ویرلمک وانلر طرفدن دخی جانب ین وشامده شریفه تابع اولان عربانه تسلط اولتاماق شرط قلمغله بونک اوزرینه وهابیلر مکّه مکر مه یه کلوب کیدر اولدیلر .

فقط بالاده بیان اولدنی اوزره بغداد والیسنک کتخداسی علی پاشا بواننده لاسا اوزرینه حرکت ایتمکله سعود بن عبدالعزیز اوراده مشغول بولمغین بوسنه حج ایده میوب موسم حجه وهابیلرله رؤسای وهابیاندن حمد بن ناصر کلدی .

واون درت سنه سنده سعود بن عبدالعزیز کلیتلو وهابیلرله مکّه مکر مه یه کلوب حج ایتدی واون بش سنه سی موسم حجه یه سعود یکر می بیک قدر وهابی ایله کلوب شریف غالب دخی احتیاطاً مکّه مکر مه اطرافنه بر جلر انشاسیله استحکام ویرمش وکندویه تابع اولان قبائل نزدیکه جلب ایلمش ایدی . بناء علیه موسم حجه پک زیاده غلبه لک اولدی . وادای حج عقینده شریفک عسا کری ایله وهابیلر میانه لرنده مقاتله ظهور ایدوب کوچ حال ایله باصدیرلدی .

اول ائنده وهابی مذهبی عسیر طرفندن تهامه یمنه دخی سرایت ایتمشدر . شویله که: ابتدا ریش قریه می شیخی معد بن شار مذهب وهابی به کیرمکله جمله اهالیسی وهابی اولمشلر شریف غالبک کتخداسی اولوب تهامه یمن طرفنک محافظه می ضمنده قفنده ده بولنان ابوبکر بن عثمان ریش قریه سنی اوروب غانما قفنده یه عودت ایتمش ایه ده معد بن شار اطرافنده کی قبائل ایله اتحاد ایدرک کسب قوت ایدوب بارق اهالیسی دخی مذهب وهابی به کیرمکله شریف غالب طرفدن سوق اولنان فرقه عسکر یه واروب وقفنده ده کی مستحفظ عسکر یله برلشهرک عصائی اوروب غالب

ومظفر اولمشیکن اول ائناده حلی ناحیه سی اھالیسی دخی عصیان ایتمکله ایکی یوز اون آتی سنه سنده مکہ مکرمه دن سوق اولنان فرقه عسکر به عصانه غلبه ایدرک حلی مشایخی اطاعته کتورمش ومذهب وهابیدن واز کچورمش اولدینی حالده یدی سکرز آی صکره تکرار وهابی اولدیلر ومذهب وهابی بروطرفه دخی سرایت ایدرک قنفده ایله مکہ مکرمه آرد سنده کی قبائلک چونغی وهابی اولمغه تکرار شریف غالب طرفدن سوق اولنان فرقه عسکر به ام اخلشبه نام محله آل دمنه وآل غامد الفرغا ایله بالمحاربه غلبه به مظهر وینه اول ائناده ابوبکر بن عثمان دخی قنفده دن چیقوب اول جواردی بولنان وهابیلرله لدی المحاربه معتم ومظفر اولمش واشبو ایکی یوز اون یدی سنه سنده معدبن شار کنانه وغامد الفرغا ایله سائر قبائلدن اون ایکی بیک عسکر جمعله قنفده اوزرینه هجوم ایتمکده ابوبکرک عسکری آنلره نسبتله اقل قلیل ایکن بغته شبخون ایدرک جمله سنی تارمار ایدوب خیلی غنائم آلمش ایسه ده آندن صکره اول طرفده کی قبائل دخی پیدر پی مذهب وهابی به داخل وآتش فتنه باصدیرلغه چالیشدیجه مشتعل اولمغه باشلادیغدن وعبدالعزیز وهابی ایله میسانه ده مصالحه باقی ایکن شریف غالب تمامه ده بویله کندو عربانیله مشغول جنک وینکار اولوب ونهایت اوکی آله میوب مذهب وهابی اولطرفلرده دخی زیاده انتشار بولدیغدن شریف غالب عاجز ومتحیر قالدی .

وبو ائناده وهابیلر جانب عراقه دخی تعدی وتجاوزدن خالی اولمیوب بغداد والیسی تدابیر تحفظیه به مجبور ایتمکدن بشقه بالاده بیان اولدینی اوزره شیعلردن اخذ تار ایچون کر بلا قصبه سنی اوروب خراب ایلمش اولدقلمی جهتله اولطرفدن اوزرلرینه عسکر سوقله تربیه لری دردست تصور ایکن بغداد والیسی سلیمان پاشانک وفاتی اوزرینه بغدادده اختلال ظهور ایلدی ونهایت کتخدا علی پاشا اختلالی باصدیروب عهده سنه بغداد ایالی توجیه اولنه رق کوچ حال ایله آسایش مملکت اعاده اولنه بیلدی .

اشبو کر بلا وقعیه سی بونجه سنه لر دنبرو حر مینده توارد ایدن فریاد نامه لرک مضمونی مؤید اوله رق مصالحتک اهمیتتی میدانه قویمش اولدیغدن برقاچ دفعه حضور صدارتیناهیده کیفیت مشاوره اولندیسه ده ایش اولکی درجه سنده قالمیوب پک زیاده بیومش ویوماً فیوماً بیومکده بولمش اولدیغدن قولایلقله تسویه سی قابل اولمدینی تعین ایتمکله بوبابده برقرار قطعی ویریه مدی .

چونکه وقتیه درعیه اوزرینه برسبکار فرقه مفرزه سوق ایدلمش اولسیدی اطرافنده کی عربان وعشائر هب الهه بولمش اوله جنی جهتله وهابیلرک استیصالی

قابل ایدی . لکن وھابیلر کاملاً دیار نجدی وبتون بلاد جبل شمری الیدلر وبلاد بحرین ولسانی ضبطلہ بصرہ و بغدادی تھدید ایدوب بر طرفدن دخی بلاد ہجر و عمانی استیلا ایلہ مسقطہ نخطی ایدر اولدیلر و برمنوال سابق حجاز و تھامہ یعنی قبضہ تصرفلرینہ کچوردیلر و جانب شمالدن دخی ملک حراری و قبائل حرب و جھینہنی و بعدہ مدینہ منورہ ایلہ شام و حلب آرہ سندہ کی عشائری الہ کتوردیلر الحاصل جزیرۃ العربک ہر طرفدہ عبدالعزیز و ھابینک حکمی جریانہ باشلا یوب و ہر طرفدن حر مینی احاطہ ایلوب امیر مکہدن بشقہ کندوسنہ مانع و مزاحم قالمدی اودخی بروجہ مشروح دوچار عجز و حیرت اولمش ایدی . شو حالہ سبکبار فرقلر ایلہ و ھابیلرک دفع مضرتی ناقابل و چوللار دہ جسیم و اغر اردو کزدیرمک دخی امر مشکل اولدیغندن ایشک چارہ سی پک کو چلشمشیدی .

بناءً علیہ مجلس مشور تہ کرار کیفیت مشاورہ اولندقدن صکرہ معظمات امور دینہدن اولوق حبیبیلہ صدور علمانک اجتماعیلہ مذاکرہ مصالحتہ لزوم کورلمش ایسہدہ صدور عظام حاضر اولدیغنی حلالہ عقد اولتہ جق مجلس عمومہ شاید کہ اجراسی ناقابل بر صورت قرار بولیوریر و صکرہ مجلس مشورتک قراری تنفیذ اولنددی دیو موجب قیل وقال اولور ملاحظہ سنہ مبنی اول امر دہ صدور کرام ایکشر ایکشر حضور شیخ الاسلامی بہ جلب ایلہ شریفک تحریراتی قرائت و مطالعہ لری استکشاف اولندقدن صکرہ عقد انجمن مشورت قلمق صورتی تنسیب اولتمغلہ صدور عظام اول و جھلہ طاقم طاقم نزد شیخ الاسلامی بہ جلب اولنہرق من غیر رسم مذاکرہ مصالحت اولندقدہ بوباغینک دفع مضرتی من کل الوجوہ اہم ایسہدہ عسکر کشیف سوقی دشوار اولدیغندن شمذینک تیز الدن حدود دولت علیہنی محافظہ ایلہ دفع سائل ضمنندہ مدینہ منورہ بہ یدی سکز یوز آدم ایلہ بر محافظ تعیین اولتمق و جدہ کمر کنہ کاملاً مستولی اولان شریف مکہنک تعرضی دفع و اول حوالی بی محافظہ ایلہ شرور بغاتی منع ایدر بروزیر دخی جدہ بہ کوندر ملک لازم کلہ جکی کبی بغداد ملاسی ہبہ اللہ افندی اہل علم و عربنی تکلم ایدر بر ذات اولوب و ھابیلرہ شوکت دولت علیہنی بیان ایلہ آنلرک مضمیر ضمیر لرینہ مطلع اولمشی دخی فائدہ دن خالی اولمز دیدک لری طرف شیخ الاسلامیدن اشعار اولتمغلہ اشبو اون یدی سنہ سی جمادی الآخرہ سی اواخر ندہ خانہ فتوی پناہیدہ عقد اولنان مجلس مشور تہ دخی بوتدیر اساساً قبول اولنوب فقط و ھابیلرک بغداد مأمور لرینہ عداوتی وار ہبہ اللہ افندی دخی بغداد ملاسی اولمق تقریبیلہ جانب بغدادن مأمور وارسال قلممش نظریلہ باقرق اصرار وقت ایلملری محتملدر دیو آنک مأموریتدن صرف نظر لہ یرینہ علماء و ھابیہ ایلہ

بجث و تکلم ایدرک میانه دن سلب نفاق و جلب مایه اتفاق ایده جک عامادن دیکرینک  
انتخاب و تعیینی قرار گیر اوله رق مجلسه ختام ویرلدی .

و بوقراره توفیقاً بوجه بالا هنوز مصر دفتر دار لغندن منفصلاً اول طرفده بولنان  
محمد شریف افندی عهده سنه رتبه وزارتله جده سنجانغی و حبش ایالتی بالتوجیه  
مکمل قیوسی خلغنندن بشقه مصر قاهره دن بیک نفر عسکر تحریر و مصر طوبیخیلرندن  
براورته و مقدار کافی سرعت طوبیری و جبه خانه استصحاب ایلمسی امر و اشعار اولندی .  
متوفی قوجه یوسف پاشا کتخداسی محمد سعید اغا دخی برمدت مدینه منوره ده  
قائم مقامق ایله اقامت و اهالی ایله الفت و دفعات ایله و هابیلر جانبنه مبعوثاً کیدوب  
کلره آنلره دخی کسب موانت ایلمش اولدیغندن عهده سنه رتبه میر میرانی  
ایله مدینه منوره محافظلی توجیه قلندی .

و هبه الله افندی یرینه کبار مدرسین کر آمدن آدم افندی بالانتخاب عهده سنه ادرنه  
پایه سیاه قدس شریف قضاسی بالتوجیه امر شریفی رجبک یکرمی یدنجی کونی یدینه  
تسلیم و خر جراحی جانب میریدن تنظیم ایله همان جانب نجه اعزام قلندی .

آدم افندی شهر زور مضافاتندن اربیل نام قصبه ده تولد و صغر سننده پدر ایله حلبه  
هجرت و اوراده تحصیل علم و معرفت ایتدکن صکره در سعاده و ورود ایله دوائر کبارده  
طولاشوب هم بزم مصاحبت و مطایبه اوله رق هنکام سفرده بخاری خوانق ایله  
داخل سلاک مدرسین و بر ایکی دفعه اوقاف مفتشلیکی ایله کامین اولمشیدی . بو کره  
و هابیلر ایله بجث و جداله قادر بری تحریر اولندوقده بعض کبرانک سوقیله عهده سنه  
قدس شریف مولوتی توجیه اوله رق بوجه مشروح جانب حجازه کوندرلمشدر .

و پیدر پی امیر مکه مکرمه طرفندن توارد ایدن محررانه نظر ا و هابیلرک مدینه منوره ده  
تسلطری احتمال قریب اولمسیله بوجه مشروح مدینه منوره محافظی نصب اولنان  
سعید پاشانک کافی اوله میه جنی اکلاشلدیغندن عن اصل ایچ ایل متحیزانندن اولوب  
مصر سفرنده مستخدم و مجرب اولان میر میراندن دمیاط محافظی احمد پاشا رتبه  
وزارتله مدینه منوره محافظه سنه تعیین و ارسال اولمغله و مصر جانبنده دخی او ایله  
برذاتک بولتمسی لازمه هالدن بولمغله آنک یرنده استخدام اولمق اوزره مقدمما جرده  
باشبوغاغنده و مؤخرأ مصرده اثبات لیاقت ایلمش اولان ابراهیم اغایه مصر والیسی  
خسرو پاشا طرفندن میر میرانق خلعتی ایلمش ایله تعیین و یرلمش اولدیغنه مبنی آنک  
میر میرانغی دخی در سعادتند تصدیق و تأکید اولندی .

و برمنوال سابق جده والیسی نصب اولنان محمد شریف پاشانک خلال شوالده  
مصر دن حرکتله جانب حجازه عزیمت ایلدیکی ائشاده و هابیلرک تعدیاتندن عرض

شکایت ضمننده شرفای مکه دن بعض ذوات معتبره در سعادتہ کلمک اوزره مصره توارد ایتمکده ایدیلر .

الحاصل بالاده بیان اولندیفی اوزره محمد بن عبد الوهاب بیک یوز قرق اوچ سنه سنده ظهور ایدرک متعدد رساله لر تألیف ایله خاتی کندو مذهبه دعوتہ باشلامش و اتباع ایتمانلرک کفرینه حکم ایدرک دملری هدر و ماللری کندو مذهبداشرینه حلال اولدیغنی اعلان ایلمش ایدی . درعیه شیخی محمد بن سعود دخی بومذهب باطلک تر ویجیه قیام ایدرک بو وسیله ایله جزیره العربده بر حکومت مستقله تشکیل و وفاتنده اوغلی عبدالعزیز بو حکومتی توسیع ایدرک حرمینک جانب شرقی و شمالیسنی کاملاً ضبط و استیلا ایش و یمن طرفنه دخی ال اوزاتمش اولدیغندن حرمین شریفین بر حال خطرناکه دوشمشیدی . و عبدالعزیزک او اخر ایامی اولوب عظامم امورده اوغلی سعود کورینور اولدیغنه نظراً حکومت و هابیه نك قرن ثالثی باشلامش کییدی و عبدالوهابک مبادی ظهورنده یجیه سنه لر حجاز و عراق علماسی انی رد و جرح ایله مشغول اوله رق بو بایده خیلی کتابلر تألیف ایلمش ايسه ده کارکر تأثیر اولیوب مذهب و هابی جزیره العربده منتشر اوله رق بو او انده محمد بن عبد الوهابک اولاد و احفادی بومذهب باطلک تلقین و تعلیمی ایله مشغول ایدی . ايشته حال بوراده یه کلمش اولدیغنی حالده بیچاره قاضی عسکر افندیلر هنوز حقیقت حاله واقف اولمقلندن مباحثه علمیه ایله و هابیلری الزام و نیتلری نه اولدیغنی استکشاف و استعمال ایتمک اوزره بروجه بالا علمادان برینک نجه کوندرلمسنی تدبیر ایتدیلر و آدم افندی بی کوندردیلر واقعا بو یله بر آدمک نجه کوندرلمسنده فائده اولوردی لکن التمس سنه اول کوندرلمک کرک ایدی یوخسه ایش بوراده لره کلد کد نصکره قلم و لسان ایله ایش تیموب اعمال سیف و سنان ایله تسویه مصاحته مجبوریت الویرمشیدی . فقط بوداهیه دهیابی دفع ایده بیله جک بر قوه کافیه نك اولطرفه سوقی امر دشوار اولدیغندن اول امرده دولت علیه تدارکات تحفظیه یه تشبث ایلمشیدی .

عبدالعزیز ايسه مذهب و هابینک بروجه بالا سرعت اوزره یمن طرفنده شیوع و انتشاره باشلا مسیله اقلیم یعنی دخی سهولتله ضبط و تسخیر ایده بیله جکنی درک ایله دیکندن طائف ایله عسیر آره سنده واقع و شمندی عسیره تابع اولان بیسه ناحیه سنک شیخی سالم بن شقباتی زهران اوزرینه تسلیط ایلمشیدی سالم بن شقبات یمن طرفنی افساد و شریف غالب ایله عبدالعزیز بیننده منعقد اولان مصالحیه مغایر اوله رق قبائل یعنی شریف غالبک عربانی اوزرینه تسلیط ایدر اولدی . بونک اوزرینه شریف غالب عاجز قاله رق عبدالعزیز ایله اوغلی سعوده تحریرات ارسال ایله عهدہ وفا اولمسنی

اخطار و تکلیف ایتدکده بومقوله خبر لر نقض صاح ایچون عربانک صنیعه سیدر برآدم کوندر زهرانده اقامت ایله حقیقت حاله واقف اولسون دیو جواب ویرملریله شریف غالب زهرانه بر مأمور کوندر ووب حقیقت حاله مطلع اولدقدنصکره حرکات واقعه نك نقض صاحی موجب اولدیغنی تفهیم ایچون زوجه سنک برادری و کندوسنک الک زیاده مؤتمن و محرم اسراری اولان عثمان بن عبد الرحمن المظایفی ایله اشرافدن بعض ذواتی درعیه یه کوندردی اورایه واردقلر نده عثمان مظایفی وهابی مذهبه دخول و عبد العزیز ایله محرمانه ملاقات و رفقاسی اولان شرفادن خفی اوله رق مصاحبت و مکة مکره نك ضبطی اکا و عدایدوب عبدالعزیز دخی اکا طائف و حوالیسنک امارتی ویرمش اولدیغندن شرفالیلکر بر دفعه عبدالعزیز ایله صورت رسمیه ده ملاقات ایتدکن صکره کویا ایش عثمان ایله بالندا کره قرار کیر اولمش کبی درعیه دن چیقوب طائفه طوغری کلور ایکن اثنای راهده عثمان رفقاسی اولان شرفایه وهابی مذهبی مدح و ثنا ایدر اولدیغنی حالده طائف جهننده شاهق جبلده واقع عیلات نام قلعه یه دخول و کندو قبیله سی اولوب اولجوارده متوطن اولان عدوان قبیله سنی باشنه جمع ایله هان عداوت و شقاوت بیراغنی کشاد و اطرافنده کی قبائل دخی کندوسنه اتباع و انقیاد ایتدی و شریف غالبک برادری اولوب اولوقت طائفده بولنان سید عبدالمعینه خبر کوندر ووب وهابی مذهبی قبول ایتسنی تکلیف ایلدی و کندویه اتباع ایتیمان قبائل ایله جنکه باشلادی . بونک اوزرینه سید عبدالمعین اوچ بیگ قدر عسکر جمع ایدوب عثمانک اوزرینه یوریدی اودخی قلعه سندن چیقوب وادی العرج نام محله لدی التقابل عثمانک عسکری منهزم اولوب حیوانات و اشیایی اخذ و اغتنام اولندی و عبدالمعین غانماً طائفه کلدی بعده شریف غالب بالذات اول شقینک اوزرینه کیدوب عیلات قلعه سنی طوپ و خمبره ایله خلیججه ضرب و تضییق ایلدیه سه تسخیر ایدمه یوب عثمانی اولخاده ترک ایله طائفه عودت ایلدی .

الحاصل شریف غالب یمن جهننده کی اختلالاتک اوکنی آلهیم دیرکن طائف جهتی گرفتار اختلال اولیجق نه یاپه جغنی شاشیروپ تکرار دولت علیه عر ضحال ایتمکن بشقه چاره سی قالمدی و مخاطره نك بر مرتبه ده تقر بندن ناشی مکة مکره اهالیسی دخی خوف و تلاشه دوشدیلر و دولته عرض شکایت ایتک اوزره اشرافدن بعضیلری مکهدن چیقوب استانبوله عزیمت ایتدیلر .

بو وقوعاتدن سلطان سلیم خان حضر تلری زیاده متأثر و منفعل اوله رق باب عالی یه برقطعه خط هایون ارسال ایله ( وهابیلرک الحاله هذه ذروه عصیانه عروجدن غرضلری مجهول و بغض و عداوتلری شریف مکیه می محصور و یاخود دعوای تعین

و تفرد ایه مجرد خلقی اضلال و افساد می محمول حاصلی نه ایسه علمای عظام و رجال دولت ایه مذاکره و بو امر مشکک چاره سی کور ملک بانبند اداره پرکار مشاوره اولنسون ( دیوامر ایتمش اولدقلرندن ذی القعدة نك اون اوچنجی کونی صدر اعظم و صدور عظام و رجال باب عالی و یکیحیری اغاسی و دفتردار افندی و سائر ارباب شوری خانه فتوی پناهیده عقد انجمن مشورت ایدوب اشبووهانی مسئله سی در میان و شمدی یه قدر بوکا دائر اولنان تدبیرلر حضاره افاده و بیان اولنه رق حضاردن استعمال رأی اولندقده روم ایلی قاضیعسکری شمس الدین افندی ( بوشقیارک حرمین شریفینه سوء قصدلری تبیین ایتمکله اوزرلرینه کلی عسکر تعینای مقتضای دیانت اولوب سرد اولنان تدابیر ایسه تسوید اوراقدن عبارتدر بوماده عظیمه یه فعلا اقدام واجبدر ) دیچک صدر اعظم ( بحسب الامکان جانب مصردن عسکر و آستانه سعادتدن طوب و مهمات ترتیب و قبودان پاشا معرفتیه سفینه یه تحمیل و تسیر اولندی ) دیر ایکن قاضیعسکر افندی ( بومهماتک و مصردن ترتیب اولنان عسکرک واره جنی نه دن معلوم ) دیمکله صدر اعظم دخی اکا جواباً ( اوراسنی بیامک طوق بشرک خارجنده در وصول و عدم وصولی حکم قدره وابسته در ) دیوب صدور عظامدن عصمت بک افندی دخی ( تجری الریاح بما لاتشهی السفن ) مصراعنی قرائت ایه صدر اعظمک کلامنی تأیید ایلدی .

صدور عظامدن ملاجق زاده دخی ( عطاء الله افندی وقته کوره همتمده قصور اولنماش انجق طرف آخردن دخی عسکر سوق و ارسال ایه و هاییلر اشغال اولنسه فائده دن خالی اولماز ) دیوب بغداد طرفندن دخی سوق عسکر اولنسنی تلمیح و اخطار ایتمی اوزرینه صدر اعظم بغداد والیسنک دخی و هاییلر اوزرینه بالذات کیتیمی یاخود کتخداسنی ارسال ایتمی کندوسنه امر و اشعار اولندقدن بشقه حجاز طرفنده کی عشائر و قبائله دخی عربی العبارة فرمانلر و امر نامه لر کوندرلمش اولدیغنی بیان و حکایه ایتمکده عصمت بک افندی ( شمدی یه دک بقدر الطاقه البشریه لازم کلان تدبیرده قصور واقع اولیوب و هاییلرک قبل شرع انوردن حقلرنده ترتب ایده جک احکام الهیه تتبع و استقرا اولندقدن صکره فتوایه مراجعت و مقتضای شرع اوزره حرکت اولنسون ) دیمکله کتخدا بک ( و هاییلرک خوارج نوعندن اولوب حقلرنده جاری اولان حکم باری فی الواقع معلوم اولمیدر ) دیمسی اوزرینه عصمت بک یه کلامه ابتدار ایه خوارج عن اصل بر سلطان قاهرک تحت اطاعتده ایکن شق عصای مسلمین ایدرک اطاعت سلطانیدن خروج ایدنلره اطلاق اولندیغنی و و هاییلر عن اصل بر متسلط قاهرک قبول امر و نهینه مجبور اولیوب

بادیه نشین و سرآزاد بر قوم اولدقلربی توصیف و لفظ خارجی بی تعریف و مستقلاً دشمن فرضیه دفع صائل لازم کلدیکنی تصریح و عبد الله بن زبیر و حجاج قضیه لرینی ایما و تلمیح ایلدی و بعده رئیس العلماء ولی افندی زاده محمد امین افندی (وهابیلرک یکر می بش سنه دنبرو دماغلرینه بخار غرور و نخوت صعود ایله قلوب ناسه القای هواجس و خلیجان ایلدکاری ایشیدیلور غرضلری نه اولدیفنی بیلنه میور ایسه ده شرفای مکه ایله منافسه لر می مشهور و متواتر در ) دیدکده دخی ( شریف مکه ایله معارضه و مناقشه سنی تسلیم ایده لم دشت کر بلایه واروب امام حسین حضر تلیرنک قبه سنی هدم ایله دروننده اولان بونجه تحف و یادکار اعجابی نهب و غارت ویدی سکز یوز قدر خلقی قتل و اعدامه جسارت ندن اقتضا ایشیددی) یوللو مقابله اولنوب کیدرک قیل و قال اوزامغله نهایت عصمت بکک دیدیکی کبی وهابیلر حقنده لازم کلان حکم شرعی تتبع و استقرا اولنه رق مقتضاسیله عمل و حرکت اولنق قرار کیر اولوب بونکله سوزه انجم و مجلسه ختام ویرلدی دیو تاریخ و اصفده مقید در .

وهابیلرک اوزرینه الی الشمس سنه اول حرکته ازاله و استیصاللری لازمه حال و مصالحتدن ایدی دولت علیه نک بوبابده واقع اولان اهل و تکاسلندن وهابیلر استفاده ایدرک توسیع دائره مکتت ایلدیلر بونک اوزرینه آرتق توقف جائز اولمیوب همان روم ایلی قاضی سکرینک دیدیکی کبی قوه کافیه ایله اوزرلرینه وارلق واجبات اموردن ایدی فقط دولت علیه نک درکار اولان مشکلاتی حسبیه در حال او یله بر قوه کافیه سوق ایتمک امر دشوار اولدیغندن بر منوال سابق بادیه امرده حرکت تحفظیه ایله اکتفا و حرمینک محافظه سنه اعتنا ایشیکن وهابیلرک طائف طرفه تجاوزلری سلطان سلیم حضر تلیرینه خلیجان ویردیکی کبی وکلای دولت دخی ملاحظه انجام کار ایله دوچار اندیشه و حیرت اوله رق ایشی میدانه قومیغه مجبور اولدیلر .

اما رئیس العلماء اولان ولی افندی زاده نک بوبابده معلوماتی شوندن بوندن ایشیدیکی اخبار عامیانه دن عبارت اوله رق هنوز حقیقت حاله واقف اولدیغندن وهابیلرک بودرلو اطوار تعصب کاریلرینی شرفای مکه ایله بیلنرنده کی منافسه یه حل ایله دین و دولتجه مهم بر مسئله اولدیغنی درک و اذعان ایده مامشیدی . چونکه ولی افندی زاده غایت زنکین بر ذات اوله رق استانبولک سائر میراث یدیلری طورنده امرار اوقات ایده کلدیکندن کندوسنجه باشلیجه سرمایه معلومات دائره سنه متردد اولان قصه خوان و دالقا و قلردن ایشیدیکی حکایات و روایاتدن عبارت ایدی .

عصمت بک افندی ایسه حدید بر ذات اولدیغنه مبنی بروجه مشروح مجلسده جریان ایدن مباحثه ده شدتلو لسان قوللاندیغندن شایدکه صدراعظمی کوچندر دم دیومراق



ایتمکله صدر اعظمه کوسترملک اوزره رئیس افندی یه بر اعتذار نامه یازمشدرکه صورتی زرده (۱۷) رقیله ایراد اولنور .

ولی افندی زاده نك بوکره بوجه مشروح مجلسده پریشان سوزلر سویلمسی وعصمت بکی سرتجه جوابلر اعطاسنه مجبور ایلمسی ایسه مجلسه ایچه صغوقلق ویرمش وکندو شان وحیزینه خیلیدجه نقیصه کتورمش ایدی . واکرچه کندو حقنده سلطان سلیمک توجه مخصوصی وارایدسهده عصمت بکک دخی دولتجه بک بیوک حیثیت و اعتباری وارایدی زیرا اولوقت مجالس مکالمه ده صدوردن بری بولنور ودولتک اسرارینه محرم ایدیلور حتی باب عالینک معروضاتی بیله کندوسنه کوستریلور ایدی ایشته بوماموریت اول ائاده عصمت بک اوزرنده اولهرق حقنده سلطان سلیمک دخی زیاده توجهی وارایدی .

قالدیکه ولی افندی زاده بروقدنبروشیخ الاسلام افندی ایله دخی مناقشه ومنافسه دن خالی دکل ایدی بوجهته کندوسنک علمایه یاقشمازاطوارایله اشتھاری سمع سلطانی یه القا ایله حقنده مستمر اولان توجهات پادشاهی یه تغیر کتورلمشیدی . بناءً علیه ذی الحجه نك یکرمنجی کونی بروسیه نفی واجلا قانندی .

بالاده بیان اولندیغی اوزره شریف غالبک خواص قرناسندن ایکن وهابی مذهبنه دخول ایتمکله کندوسنه عبدالعزیز وهابی طرفندن طائف جانبی امارتی ویرلمش اولان عثمان مظافی ایله رؤسای وهابیه دن اولوب جانب یمنه مسلط اولان سالم بن شقبان شوالک یکرمی بشنده عساکر کلیه ایله کلوب طائفی احاطه ایتملیله وشریف غالب دخی اوراده بولمغله جنکه قیام اولنهرق وهابیلر طرفنده بک چوق تلفات وقوعه کش ایسهده شریف غالبک عربانی دخی طاغلمغله وطائفک سور وبرجلرنده رخنه لر پیدا اولمغله شریف غالب ملاحظه انجام کار ایله دافنکار ایکن سید عبدالله بن سروردیکر شریفلری کندویه اویدیروب کیجه لین طائفی ترک ایله مکیه کتدکری معلوم اولتجه شریف غالب حیرت وتردده قالدیغی ائاده وهابیلرک بفرقه سی مکء مکرمه یه متوجه اولدقلری بعض جواسیس طرفندن اخبار اولنمی اوزرینه شریف غالب طائفندن چیقوب آنلردن اول وارمق اوزره برکسدرمه یول ایله مکء مکرمه جانبنه کتیدی وطائفندن چیقارکن امر مدافعه ومحافظه ده ثبات وممانت اولنمی تنیمه وتوصیه ایتدی حالبوکه آنک خرووجندن صکره طائفنده قلان عسکر واهالی طاقم طاقم چیقوب فراره یوز طوتدیلر وهابیلر ایسه بوحواله واقف اولدقلری کبی هرطرفدن طائف اوزرینه هجوم ایدوب بوجه مشروح طائفندن خروج ایله فرار ایدنلرک اکثری وهابیلر یدینه دوشه رک تلف اولدقلری کبی درون طائفنده کبی بقیه اهالی

دخی عاجز و ناچار قالملیریه و هایلر طائفه کیروب آنلری قتل عام و بولدقلری اموال و اشیایی اغتنام ایتدیلر .

و هایلر طائفده بولنان اموال و اشیایی اردولرینه نقل ایدوب طاغیر کبی بیغدیلر یالکنز کتابره رغبت ایتیموب بونلری زقاقلره آتدیلر . بناءً علیه بخاری و مسامک صحیحینی و سائر کتب احادیث و مذاهب اربعه اوزره مؤلف کتب فقه و ادبیات و فنون سائر دن بیکلرجه کتابلر آیاقلر آلتنده سورینور اچلرلنده مصحفلر دخی بولنور ایدی لکن کمنه بونلری قالدیرمغه جسارت ایده مزدی مدت مدیده بونجه کتب شریفه و آثار معتبره بویله ایاقلری آلتنده قالدی اموال سائر نک خمسنی امیرلری ایچون بعدالاجراج باقیسنی اول و وحشیلر بینلرلنده تقسیم ایتدیلر .

و بعضیلری بواننده بعض مواقعی حفر ایدرکن براز مال بولدیغندن طائفک آلتنده مال و ارایمش دیو بالمله خانقلری حفر ایله طائفک التی اوسته کتوردیلر و او ایله دلشین و معمور برقصه بی کاملاً خراب ایلدیلر .

بعده سالم بن شقبان درعیه یه کیدوب عثمان مظالمی نام ناکس مشؤم دخی مانند بوم بوخرابه ده امیر اوله رق قالدی .

سعود اول ائنده زعمنجه غزا نیتله عراق طرفنه کیتمشیدی بووقوعاتی ایشتیکی کبی نمون اوله رق درعیه یه عودت و سالم ایله ملاقات ایتدکد نصرکه جمعیت عظیمه ایله مکّه مکرمه یه متوجه اولدی و مکّه مکرمه یه اوچ قوناق محله و رودنده اهالی مکّه اورکوب بوسنه حج ایتماکی قوردیلر و بوسره ده هر طرفدن فوج فوج حجاج کلکه باشلادی از جمله جده و ایسی شریف پاشا و امیرالحاج شامی عظام زاده عبدالله پاشا و امیرالحاج مصری کورجی عثمان بک و اصل اولدیلر و مغربدن اون بشیک قدر حجاج کلوب مسقط امامی سلطان بن سعید ایله مکلا نقیبی دخی بوسنه حج ایتدیلر بناءً علیه بوسنه موسم مجده هیج برسنه کورلمدک صورتده ازدهام و غلبه ک اولدی سعود بوغلبه لکدن اورکوب اولدیغی یردن حرکت ایتدی و حجاج و قفه یه طور دقلرلنده و هایلر دن اثر کورلمدی حجاج مناسک حبی اتمام ایله مکّه مکرمه یه عودت ایلدکارلنده کفتکچو غالدی و سعودک مکک و توقفی بجر دخلقک کثرتندن ناشی اولدیغی اکلاشلدی بناءً علیه شریف غالب زواری فی سبیل الله جهاده دعوت و تشویق ایلدی و خارج شهره چیقلمسی ایچون دلالرلر ندا ایتدردی . بونک اوزرینه جمله دن اول جده و ایسی شریف پاشا چیقوب خارجده اردو قوردی لکن سائرلری چیقمیوب امیرالحاجلر ذخیره سز لکدن و وقتک عدم مساعده سندن بئله اعتذار ایلدیلر و برکزه سعوده یازلم و طریق صوابی کوسترلم قبول ایتز ایسه اولوقت اوزرینه وارمق واجب اولور دیدیلر و هریری برآدم کوندروب

سعودی اخافه ایتدیلر وسوز دکله مز ایسه دولت علیه نك قلیچنه کله جکئی بیلدر دیلر وبالاده بیان اولندیغی اوزره طرف دولت علیه دن مأموریت مخصوصه ایله جانب نجده کوندرلش وبو کره قافله حجاج ایله مکه مکر مه یه کیش اولان آدم افدینک درعیه یه می کوندرلسی لازم کلور یوخسه اردولرینه کوندرلسونمی دیو سعوددن استمزاج ایتدیلر سعود بونلره متکبرانه جوابلر و یروب بوجعیت ایله عز یتمز دن غرض خلقک عقائدینی اصلاح ومکه مکر مه واطرافدن منکرات اموری رفع ایله ارأئه طریق فوز وفلاحدر حجاجه وسکنه مکه مکر مه یه ظلم وتعدی طرفزدن ممنوعدر شام ومصر طرفلرندن متوارد اولان حجاج بالامن والسلامه رجوع ایتسونلر دولت علیه مبعوثی دخی برقاچ کون ظرفنده طرفه جلب ایتک نیتده یم دیمش وبعده مأمور مخصوص ایله آدم افندی نی جلب ایلمشدر فقط برو طرفدن تکرار مخبره یه ایتدار اولندقده اوچ کون ظرفنده کیدنلره رأی وامان واردر آندن زیاده مکه ده قالان اولورسه قتل عام ایدرم دیو جواب قطعی و یردی بوندن هر کس اور کدی وشریف غالبک تشجیع واغراسی کار کر اولدی .

( وقایع سنه ۱۲۱۸ )

اکابر واعیان مکه عبدالله پاشایه اون کوندها اقامت ایتک اوزره رجا ایتدیلر ایسه ده مفید اولیوب محرک بشنده حرکت ایتدی التیسنده دخی امیرالحاج مصری چیقوب کیتدی بونک اوزرینه شریف غالب ایله شریف پاشا دخی مکه مکر مه اهلینسی اللهه اصهارلیوب جده یه کیتدیلر .

فقط شریف غالبک برادری سید عبدالمعین مکه مکر مه ده قالمش وسعود بن عبدالعزیزه مکتوب یازوب وبرقصراق اهدا وارسال ایدوب جیران بیت الله ایچون رأی وامان دیله مش ایدی . اهل مکه دخی افاضل علمادان ایلیچیلر کوندرمش ایدیلر مکه یه ایکی قوناق مسافه سی اولان سیل نام محله ایلیچیلر سعود ایله ملاقات ایتدیلر واهل مکه ایچون امان ایتدیلر آنلره جواباً سعود ( بن سزه آنجق بونک ایچون کله مکه یالکز اللهه عبادت ایده سکز واصنامی هدم ایله اللهه برشیئی شریک ایتیه سکز ) دیحک ایلیچیلر دن شیخ طاهر ( بز اللهدن غیریه عبادت ایتیز ) دیو بجه کیرشمک ایسته دیسه ده سعود شریف غالبک مکه دن چیقوب کیتمش اولمسندن ناشی پک زیاده نمون ومنبسط اوله رق همان مکه مکر مه یه کیرمک آرزوسی کندوسنک صبر و آرامی سبب ایلمش اولدیغندن چندان سوزی اوزاتمق ایستیموب همان آنلره النی اوزاتدی و ( اللهم ورسولنک دینی اوزره سزکله معاهده ایتدم آتی سونلری سووب دشمنلرینه دشمن اوله سز ) دیوب آنلر دخی بوسوز اوزرینه معاهد ایتدیلر

و در حال سعود رای و امان کاغدی یازوب و یردی صورتی زیرده ( ۱۸ ) رقیبه ایراد اولنور .

مطالعه سندن معلوم اوله جنی و جهله اهالیء مکة مکرمه بی طائفه یهود منزله سنه تنزیل ایله دین اسلامه دعوت ایدرک حیت اسلامیه لرینه طوقونه جق و جهله خطاب ایلمش ایسه ده طائف و قعهء نجیعه سندن برو خاق پک زیاده اورکمش اولدیغندن محرک یدنجی جمعه کونی بوکاغده مکة مکرمه به بالوصول جمعه نمازندن صکره جمله اهالی اجتماع ایدرک قرائت اولندوقده هرکس بوخبر امن و سلامت ایله ممنون و مستبشر اولمشدر .

ایشته بو ائنده سالف الذکر آدم افندی سعودک اردوسنه کیتمش ایسه ده بروجه مشروح سعودک مکة مکرمه به عزیمتی اوآنه تصادف ایتمکله ملاقات ایده میوب فقط اردویی تماشا ایتمسی ایچون بریوکسک تپه اوزرنده کندوسنه برچادر قوردیرلمش ایدی . آدم افندی چادرده اقامت ایدوب ناکاه ایکیشر اوچر برر مخینه سوار اولمش برچوق و وحشیلر ظهور ایدوب ولولهء مخصوصه لرله کویا ( انا الذیرالغریان ) مزایاسنی کویان اوله رق سعود دخی منفرداً بر مخینه سوار اولوب چکرکن آدم افدینک برایی ساعت کیرودن مکة مکرمه به کلسنی امر ایلمش اولدیغندن وهابی اردوسنک آرقه سی التذقدن صکره آدم افندی دخی معایده نام محله ده کی خیمه سنه کتورلمشدر .

سعود ایسه اول کون یعنی محرک سکزننجی کونی آدم افدینن اوچ ساعت اول عسکر یله مکة مکرمه به داخل اولدینی کبی در حال بیت شریفی طواف ایتمکدن صکره چیقوب خیمه و خرگاهنه کیندی و یارین قوشاق وقتنده هرکس مسجد شریفه کلسون دیو دلالر ندا ایتمیرمکله هوجبنجه سید عبدالعین وقاضی وهفتیلر و بالجمله علما و سائر ناس مجتمع اولدوقلرندو سعود کلوب باب صفانک الک یوکسک باصه مانغه چیقدی و صاغ طرفه حنفی مفتیسی عبدالملک افندی بی وصول طرفه قاضی بلده بی آلوب سائر ناس دخی قات قات اطرافنه دیزلمش اولدینی حالده ( الحمد لله الذی نصر عبده واعز جنده وهزم الاحزاب وحده ) جمله حمدله سیله مصدر اولان خطبه حضرت فخر الانبیایی قرائت ایتمکدن صکره خاتمه سنده ( جناب حقه تشکر ایلم سزى اسلامه هدایت و شرکدن خلاص ایلدی و سزى یالکنز اللهه عبادت ایدوبده بولندیکیز حال شرک و ضالالتدن فراغته دعوت ایلم و شریعت اسلامیه اوزره اللهی سونلره دوست واللهک دشمنلرینه دشمن اولمق اوزره سزدن بیعت استرم ) دیدکدن صکره او طوروب النی اوزاتدی و هرکس کلوب بیعت ایتمدی و بعده آتیه بنوب و ( یا اهل

مکه ایکندی نمازندن صکره مسجد حرامده اجتماع ایدرک رکن ایله مقام آرسنده بکا منتظر اولکنز تا که سزه شرائط اسلامی بیان ایدهم (دیوب خرکاھنه عودت ایتدی . وقت عصرده خاق طوپلانندی سعود دخی زمزم شریف آرقه سنده کی مقام اوزرینه چیقدی و مکّه مکر مه اھالیسنی درعیه عربانی کی برشی ییلمز ظن و قیاس ایلدیکندن قیون چو بانلرینک بیلدیکی مسائلی خالقہ تعلیم ایتمکه باشلادی و هر مسئله یی بیان ایتدکجه مفتی حنفیه عبدالملک افندی یه خطابا خالقہ تفھیم ایت تا که جهله دخی اکلاسون دیر ایدی حالبوکه مکّه مکر مه اھالیسنک اک جاهلی بومثالو مسائلده وھابیلرک علماسندن اعلم ایدی واک ابتدا تعلیم و تلقین ایلدیکی مسئله خمر و زنا حرام اولدیغنی بیاندن عبارت ایدی که عبدالملک افندی ( ایھا الناس معلومکنز اولسون امیر سعود دیورکه خمر حرامدر زنا حرامدر و یارینکی کون چیقوب قہلری ہدم ایدیکز و بتلری آتکنز یارین اللہدن بشقہ معبود اولسون ) دیو عامیہ خطاب ایتدی فرداسی وھابیلر ایله آنلرہ پیرو اولنلر مساجد و مآثر صالحینی ہدم ایتمکه باشلادیلر و مولدنی ایله ابو بکر و عمر و علی و فاطمہ رضی اللہ عنھم حضر اتنک مولدلرینی و حضرت خدیجہ رضی اللہ عنھا حضر تلرینک خانہ سننی و اصحاب کثرین رضوان اللہ علیھم اجمعین حضر اتیلہ اولیا و علما مقابرینی کاه تغنی ایدرک و کاه ( انھی الاسماء سمیتموھا ) دیہرک تماماً ہدم ایتدیلر و اوچ کون ظرفندہ اول حر مزادلر ام القرانی بیاغنی درعیہ قریہ سنہ بکنز تدیلر .

آندن صکرہ سعود مسجد حرامده تکرر و تعدد جماعتی نہی و هر کس بر امامک آرقہ سنده نماز قیلحق اصولی دستور العمل طو تلمق اوزرہ امر ایتدی . بناء علیہ جماعت اسلام ایله صباح نمازینی شافعی و صلات ظھری مالکی و صلات عصری حنبلی و اخشام نمازینی حنفی اماملری قیلوب یتمو نمازینی دخی راست کلان قیلار ایدی . و محرک اون دردنجی جمعہ کونی سعودک امریلہ اعلم علماء مکہ اولان حنفی مفتیسی عبدالملک افندی خطبہ او قویوب جمعہ نمازنده امام اولدی سعود دخی اکا اتباع ایتمکله اول کون کرک اھل سنت و جماعتدن اولان اھل اسلام و کرک طاقتہ وھابیان برامامہ اتباع ایتدیلر .

بعده سعودک امریلہ مکّه مکر مہدہ تقدیر چوق و نارکیله و ساز انوعی و ارایسہ طوپلانیلوب احراق اولندی .

و برکون سعود اذان او قونور ایکن مسجد حرامہ کلد کده مؤذنلرک صلات و سلام کتور دکلرینی و اصحاب کرامہ ترضیہ ایتدکلرینی ایشیدیکجک غضبہ کلوب ایشته بوشرک اکبردر دیوبو عادت مستحسنہ یی یساغ ایتدی و کشف الشبھات نام رسالہ نک تدریسی امر ایتمکله مع الکراھہ علماء مکہ بونی تدریسہ و ناس دخی استماعہ مجبور اولدیلر .

بواشاده سعود آدم افدينك جهت مأموريتي اكلامق ايچون جلب واحضار ايتكله  
 آدم افندي بي بر كهنه وچوك چادره كتوردكلر نده ايچنده او طور انلرك زى وقيافتي  
 بر اولديغندن قغيسى سعود اولديغنى فرق ايده ميوب برندن لى السؤال اشارتدن  
 قغيسى اولديغنى استدلال ايله بعدالمصاحفه دعای عمر و شوكت پادشاهی بي ادا و مکتوب  
 صدر اعظمي بي بعدالتقييل كندويه اعطا ايتدكده سعود مکتوبي قرائت ايتدكدن  
 صكره ( دولت عليه سزك كبي لسانمزه آشنا بر ذاتي بزه كوندرمش اولديغندن ممنون  
 اولدق ) ديمسى اوزرينه آدم افندی ( في الحقیقه بحسب الرتبة قدومز ووجوه تميز ايله  
 سزه مأمور تميز اخلاف واعقابكزه وسيله شرف و اعتبار و شمدي به قدر آبا و اجداد كزه  
 طرف سلطنت سنيه دن آدم ارسالی مسبوق اولديغندن بو اختصاص سزه دستمایه  
 افتخار اولسه سزادر ) ديوب سعودك قولانغى ايسه بويلاه تعبيرات رسميه دوليه به  
 آشماش اولديغندن طور مغرورانه ايله كلامه اغاز ايدرك ( بن وبابام صغر سنمز دنبرو  
 عنایت الهیه به اعتماد ايله فرد آفریده دن احتراز ايتمكسزین جهلك استیلا سندن ناشی  
 حادث اولان استمداد عن الاموات اعتقادی كه محض شر كدر بوندن طولايي خلقی  
 دینه دعوت ايچون صرف مقدرت ايده گلشزدر و قرار كاهمز اولان در عيه ده انجق  
 بشيوز آدم موجود ايكن تدریجی او حوالیده بولنان قبائلی بصريه دك و بر قولدن  
 يمه دك شرف اسلام ايله مشرف ايدوب امور مزه بر مرتبه نظام و يردك كه قبائله هر نه  
 زمان بر شقه ارسال ايتسهك تعيين اولنان و قنده زاد و ذخيره لريله بلا امهال حكمنزه  
 امتثال ايدرلر و هر نه طرفه توجه ايتدك ايسه خصمنزه ظفرياب اولدق بوايسه  
 تأييد حق قيلندندر قالدیکه رضاء اللهه مخالف بزدن بر حرکت ظهور ايتماشدر كه  
 اعتراضه علت اوله ) دیدكدن صكره آدم افندی به بر مستعمل فروه ايله بر شال  
 و اوغله كندك بر فروه و آدملرينه بر انتاری اعطا ايله چادرينه كوندرمش آدم افندی  
 دخی بالمقابله ايكي قات جامه شوی و بر صوف جبه و بر مقدار شكرمه و يرمش و فرداسی  
 سعود يوز ريال ارسال ايله آدم افدينك خاطريني استفسار ايتديرمش وارد و سنده  
 بولنديغى مدتجه هر كون بر قواطه پلاو كوندروب آنی و آدملرينی اطعام ايله اخطار  
 ايام صيام ايلرمش بر كون صكره شريف غالبك باغچه سنده تكرار آدم افندی ايله ملاقات  
 ايدرك صدر اعظمك مکتوبنده كر بلا وقعه سنك سببی استعلام بيورلمش اولديغندن  
 سعود بونك جوابنه تصدی ايدرك ( بغداد واليسى بزه تعرضدن خالی اولميوپ كاه  
 منتفق قبيله سنی و كاه كتخداسنی اوزر مزه تعيين ايله راحت مزى سلب ايتدی حتی کلی  
 عسكر ايله كتخداسی التمش كون لحسابی محاصره ايدوب نهایت غلبه طرفزده نمایان  
 و عسكر بغداد پریشان اولدی بونك اوزرينه بغدادی استیلا امر سهل ايكن قلب شاهانه به

کدر کلامک ایچون بو عزیمدن استنکاف و ابا و فقط مشهد حسینک یغماسیله اکتفا  
 و محاربه به تصدی ایدنلر افنا اولندی قالدیکه مشهد حسینده متمکن اولان اعجام سب  
 شیخین و قذف صدیقہ بی اعتیاد و زیارت مشهدی طواف مکدن افضل اعتقاد ایتدکاری  
 جهته دملری و ماللری مذاهب ار بعده حلال و بو رفتار مزه طعن ایدنلر مستحق  
 وبال اولوب عجملرک بو کیفیتلری پادشاهک معلومی اولسه بو حرکتتمز قرین تحسین  
 اوله جفی ظاهر در و اگر عجملرک طرفدن بلاد شاهانه به تعدی ایله مضرت تری  
 خاطره کلورسه دولت علیه نك اعانه سنه محتاج اولقسزین قوم مذکورک دفع مضرتنه  
 خود بخود تکفل ایدرم) دید کده آدم افندی ( بغداد والیسی طرفدن تجاوزات  
 وقوعولسه بیله دولت علیه به بث شکوی و نقل ماجری ایله آنی معاتب ایتدیرمک لازم  
 ایکن بو فعل صوابدن عدول ایله ممالک عثمانیه تجاوز و کر بلایي اوروب دروننده  
 موجود و مدخرات بیت المال مسلمیندن معدود اولان بونجه اموالی یغما ایتمک سبب  
 تحریک حمیت سلطنت اولسه روا و اموال مذکوره نك ردی باعث تحصیل رضا و مقدمه  
 انابت و استغفار) دید کدن صکره دولتک درجه قوت و سطوتی بیان و افهام ایتسنه  
 مقابله سعود ذکر اولنان ماللر ایادی غارتکران عربانده تلف و مضمحل جمع و استرداد  
 بغایت مشکل اولدیغی بیانیله صد آخره نقل کلام ایدرک ( مرقد ابن عباسه براغیلان  
 ورقه لر در میمان اولندی کیمسی اولاد و مال و کیمسی رفاه حال استمداسندن  
 عبارت اولدیغی نمایان اولدی بومقوله مطالبی مخلوق معدومدن استتمک ایسه شرک  
 صریحدر) دیوب بومدعاسنی اثبات ایچون (ولاندع من دون الله مالا یضعفک ولا یضربک)  
 و (فلاتدعوا مع الله احدا) ایتلریله (الدعاء مخ العبادة) حدیث شریفی ایراد ایتمکه آدم  
 افندی مباحثه به قیام ایدرک (آیت کریمه ده منهی اولان دعا اصطلاحا دعادرکه بودعا  
 جناب باری به مخصوصدر اما داعی مدعوک خالق لم یزل و مؤثر حقیقی و فاعل مطاق  
 اولدیغی بیلرک انبیا و اولیایه توسل ایله روحانیتلرندن استمداد ایتمک جائزدر  
 و آنلر قبرلرنده حی و بعدالمات کر امتلری باقیدر دینلری شرکه نسبت عظیم جسارتدر  
 و خلقک اول ذواته توسانی (و یعبدون من دون الله مالا یضعفهم ولا یضربهم) آیت  
 کریمه سیله (و یقولون هؤلاء شفعاؤنا عند الله) آیتینک ماصدقنه قیاس ایله او مقوله لر  
 تکفیر ایدیورسکنز بو ایسه قیاس مع الفارقدر زیرا اهل شرک جناب حقک نافع و ضار  
 و فاعل مختار اولدیغی اقرار ایتسه لرده لات و عزایه و ملائکه به سجده و ذبح و نذر  
 ایله دعا و تقرب الی الله مراد ایدرلر دی لفظ عبادتک دعایه و دعانک غیر یسنه شمولی  
 وار و حضرت فخر انبیا و سائر اولیا و اصفیایه سجده و ذبح و نذر وقوعنی کسنه  
 مشاهده ایتما مکله دعوا کز لغو و دلیلکز صددن خار جدر و برده (یا رسول الله الشفاعة)

عبارہ سنک معناسی (انادیک بحسب محبتی الیک ان یرزقنی الله الشفاعة) دیمکدر بونده حذف مجازی اولوب (واستل القرية) کی آیات کریمه ده امثالی چوقدر وبالقرض بعض ناسک دعالری اصطلاحی اولوبده شرکاربینه حکم اولنسه بیله بونکله کله حکم اولنورمی) دیدکده بوکا جواباً سعود دخی (منعنه عدم تقید رضا حکمنده اولوب رضا بالشرك ایسه شرکدر) دیحک آدم افندی آنک بوسوزخی یعنی عدم منعدن رضا لازم کلدیکنی منع وجرح ایچون (مرید الخیر والشیر القبیح \* ولكن لیس یرضی بالحال) بیتنه استناد و تأییدسند مقامنده حجر اسعد حکایه سنی ایراد ایلمشدر شویله که: حضرت عمر رضی الله عنه طواف ایدرکن حجر اسعد خطاب ایدوب دیمشکه (والله سنک نفع و ضررک یوقدر لکن عندالله بندن اکرم اولان فخر عالم علیه السلامه اقتداء سنی تقییل ایلم) بونک اوزرینه حضرت علی کرم الله وجهه رسول اکرم صلی الله علیه وسلم حضرتلری (جناب حق اعمال ناسی حجر اسعد دروننه وضع ایتمشدر تا که روز قیامتده خلألق اوزرینه شاهد اوله) دیو بیوردی و بو حدیث شریفه نظر آ نافع و ضار اولور دیمکله حضرت عمر (ارشدتی یا علی) دیو حضرت علی یه عرض شکرانیت ایتمشدر بو تقدیرجه برحجره نفع و ضرر اسنادی صحیح اولدوقده انیا واولیا حاشاکه (ولاتدع من دون الله مالا ینفعک ولا یضرک) حکمنه مظهر اوله لر خصوصاً که قاضی بیضاوی فلا تدعوا مع الله آیتک تفسیرنده تدعوا لفظ شریفی تعبدوا ایله تفسیر ایتمشدر) دیو سوزه ختام و یرمشدر . سعود بو تفصیلاتی لدی الاستماع (اشته سزک بودرلو تاویلاتکنز خاقی هاوییه شرکه دوشور مشدر) دیوسوزی کسدرمش و مجاسه ختام و یرمش و آدم افندی یه تکرار یوز ریال ایله هینلر ارسال ایدرک در سعادتیه عودتی تیبیه ایلمشدر بونک اوزرینه آدم افندی جدیه کلوب واقع حلی برقطعه عریضه ایله در سعادتیه بیلدرمشدر .

وهابیلر کندو مذهبلرینه داخل اولمیانلره امان وزمان و یرمیوب قتل ایدرلر و داخل اولنلردن دخی نکال نامیله دخولیه اوله رق بر مقدار پاره آلورلر ایدی سعود بو وجهله بلا مزاحم مکة مکرمه یه داخل اولیجق اطرافده کی عشائر و قبائل خواه و ناخواه کندوسنه اطاعت ایلدیکندن بو کره نکال نامیله کلیتو مال جمع ایلدی رضاسیله بو باطل مذهبه کیرنلر اولیه بر جریمه و یرمکه مستحق ایدیه ده ضروری سکوت ایله مماشات ایدنلر بو بایده مظلوم و مغدور ایدی .

سعود اون درت کون مکة مکرمه ده اقامت ایلدیکی اثناده بو وجهله هر خصوصی اساسدن تبدیل و تغیر ایدوب رفع بدعت داعیه سیله بر چوق بدعتلر احداث ایتدی و جبل اوزرنده کی قلعه یه اراذل عرباندن ایکویوز محافظ وضع ایله اوزرلرینه سالم بن شقیانک برادری فهیدی امیر نصب ایلدی .



و بو ائناده عثمان مظافينك برادری علی بن عبدالرحمن ایله جده اهاالیسنه مکتوب کوندروب آنلری کندو طاعتنه دعوت ایتدکده آنلر دخی هزل واستهزا وادیسندله یازدقلری جوابنامه ده ( بزلر شریف حضر تلرینک جماعتدنز بزم اطاعتنر آنک اطاعتنه منوطدر فرض ایت که سنک زعمک او زره شمده یه قدر مشرکیندن اولدیغمز ی اقرار ایله اکاعاصی وسکا مطیع اولالم بزدن پاره استیه جکمیسین مقدارینی تعیین ایتلمسین یوخسه سنک دینکه پاره سز کیرمک صحیح اولورمی ) دیو مندرج اولمسیله احق سعود بوسوزلری جدی ظن ایدرک هان ایکویوز بیک ریال والتمش بیک آلتون والتی بیک ریاللق اینجه قاش جریمه قطع وتعیین ایله جده یه تحصیلدار کوندردی و محرک یکرمی ایکنجی جمعه کونی هان بو اموالی قبض ایچون کندوسی دخی جمعه نمازندن اول بنوب جده یه متوجه اولدی ساحل جده یه وصولنده مأمولنک خلاقی اوله رق طوب وتفنک ایله مقابله اولندیغنی کوریمک هان عسکرینی جده سوری اوزرینه هجوم ایتدیردی اول کون وهابیلر خیلی طوب وتفنک دانه لری بیوب آجی کلدیکندن چادرلرینه چکلدیلهر سکز کون بو منوال اوزره صباحدن اخشامه قدر قلعه وسور اوزرینه هجوم ایله خائبا وخاسرا چادرلرینه دونرلر ایدی بو وجهله سعودک ایتدیکی ریال وآلتوندن زیاده کله وقورشون صرف اولندی وپک چوق وهابی عسکر ی تلف اوله رق سعودک اردوسنه ضعف کلدی ونهایت بختی معکوس وعلمی منکوس اوله رق وکندوسنی بوایشه تشجیع ایدن عثمان مظافینی یه سب ولغت ایدرک جده پیشکاهندن قالقوب مکة مکرمه یه اوغرامقسنزین جانب نجه کیتدی فقط ابراهیم بن سامان البرکاتی بی امیر وادی مر اولق اوزره امر محافظه ده براقدی . شریف غالب ایسه در حال جده ده موجود اولان عسکرله بنوب وادی مر اوزرینه الغار ایدرک مر قومی اورادن قاچردی وعسکرینک چوغنه شراب مر مرک ایچوردی ومظفراً جده یه عودت ایلدی بونک اوزرینه جوارده بولنان قبائل وعشائر کلوب شریف غالبه دخالت وعرض مطاوعت ایلدیلهر .

وهابیلر بر وجه بالا جده دن خائبا وخاسرا عودت لرنده مسقط امامی اوزرینه حرکت ایدرک آنک مملکتی تخریب ایله مشغول اولمشلر ایدی .

وهابیلرک بیوک رؤساسندن اولان وحجاز وین امیری بولنان عبدالوهاب ابو نقطه بو ائناده کایتلو عسیر عسکر یله مکة مکرمه یه کلدیسه ده متبوعی اولان سعود بر وجه مشروح جده دن صاوشوب کیتمش اولدیغندن اودخی معایده ده واقع بوستانده در تیوز نفر مستحفظ براغوب بقیه عسکر یله عسیر جانبه کیتمشیدی .

شریف غالب ایله جده والیسی شریف پاشا ایسه بر خیلی عرب وتربک عساکر یله

جده دن حرکت و ربیع الاولک یکر می ایکیسندہ مکہ مکرمہ یہ مواصلت وہان قلعہ دہ و بوستان سالف الذکرده کی و ہابیلری حصر و تضیقہ مبادرت ایستدیلر فقط بوستان دخی قلعہ کبی مستحکم اولدیغندن و ایکیسندہ دخی مقدار کافی زاد و ذخیرہ ادخار اولنمش ایدو کیندن و ہابیلر قویاً مدافعه ایتملریلہ یکر می بش کون قدر محاصره تمتد اولدقدنصکرہ قلعہ دہ کی و ہابیلر بر کیجہ قلعہ یی ترک ایلہ فرار ایلدکارنده مذکور بوستانده کی عسیر عسکری دخی رای و امان ایلہ چیقوب طائف جانبہ کیندیلر . بو صورتلہ مکہ مکرمہ ایادیء خوار جدن خلاص بولدی . بونک اوزرینہ شریف غالب جواردہ کی قبائل مطیعہ یی جانب ایلہ طائف محاصره ایستدروش ایسہ دہ سعود طرفندن عساکرکیلہ ایلہ سعد بن قرمہ ارسال ایلہ امداد اولدیغندن طائفک استخلاصی قابل اولہ مامشد .

خلال محرمدہ موسم بہار حلول ایتمک حسینلہ سلطان سلیم خان حضر تلیر بشکطاش ساحسرای ہایوننہ نقل ایلہ ہنوز تماشای کل و استماع صوت بلبل صفاسنہ طالمش و چراغان یالینسک تعمیریلہ سنہ سابقہ و قایغندہ بیان اولدیغی اوزرہ انشاسنہ مباشرت اولنان مابین ہایون دائرہ سنک بو ائنادہ ختامندن طولانی طبع ہایونلرینہ کشایش و انشراح کلمش اولدیغی حالده عربستانک آجی خبر لریلہ تاخکام و مکدر اولمشیدی .

شویلہ کہ : بروجہ مشروح و ہابیلرک خلال شوالده طائفی استیلا ایستدکاری خبر تأسف اثریلہ برابر شریف غالب مکہ مکرمہ دہ حفر متریس ایلہ مشغول اولدیغی و و ہابیلرک برفرقہ سی مدینہ منورہ اوزرینہ کلوب خارج شہری نہب و غارت وسید الشہدا حضرت حمزہ رضی اللہ عنہک قبہ شریفہ سنی ہدم ایلہ تربہ شریفہ سنک پوشیدہ سنی قطع و تفریق و مدینہ منورہ یی حصر و تضیق ایلمش اولدقلری حالده امیر الحاج پاشانک مکہ مکرمہ یہ کیدرکن اورایہ تقر بنسندہ حجاجک یولی اوزرندہ واقع مدرج و عوالی نام محلہ چکیلہ رک جنکہ آمادہ اولملریلہ امیر الحاج پاشا حجاجک حرب و ضربہ مقتدر اولنلرینی سچوب کندو جمعیتہ الحاق ایلہ اوزرلرینہ واردقدہ لدی الحار بہ فئہ باغیہ منہزماً فرار ایتمشلر ایسہ دہ مدینہ منورہ اہالیسی مدت مدیدہ محاصره یہ طیانہ میہ جقلرندن ذخیرہ و عسکرلہ امدادہ محتاج اولدقلری اخبار مکدرہ سی جانب سلطت سنیہ یہ زیادہ تاثیر ایتمش اولوب انحق بعد مسافہ حسینلہ استانبولجہ درحال برچارہ بولنحق قابل اولدیغندن همان حجاز ترتیباتنک علی جناح الاستعجال ارسالی ایچون بو ائنادہ مصر والیسی خسرو پاشایہ اوامر اکیده کوندرلدی . اول کونلر ایسہ بروجہ مشروح سعود اردوسیلہ مکہ مکرمہ یہ کیروب برچوق

خباثت اجرا ایندکن صکره چیقوب جدہ بی حصر و تضیق ایله مشغول ایدی .  
 واکرچه وهابیلرک مکہ یه دخول وجدہ بی محاصره ایتدکلی هروز خبر آلمامش  
 ایدسه ده طائفک استیلاسی و شریفک مکہ ده متریس حفریله مشغول اولسی دولته  
 زیاده تأثیر ایدرک استانبولده سوز چوغالدی و مجالسده مذهب وهابی اوزرینه  
 بختلر جریان ایتکه باشلادی لکن بالاده بیان اولندیغی اوزره طریق علمیه دن  
 احبابندن مجالس دولنده وایش ایچنده بولنانلرک اکثری اومثلو مباحث علمیه دن  
 یخبر اولوب فکر و نظرلری رسم و عادت طریقک محافظه سی و بویوزدن منافع  
 مخصوصه لرینک خللدن وقایه سی خصوصلرینه منحصر ایدی .

و شیخ الاسلام عمر خلوصی افندی دائره سی خفیف و آره بق محصلونه و جانب  
 میریدن ویریلان شهریه معینه قناعت و تجملات و تزیناتدن مجانبت ایدر غایت عقیف  
 برذات اولدیغی حالده توجیهاتده سماحت ایتمز و شفاعت قبول ایلمز اولوب طریق  
 علمیه اصحابی ایسه اوته دنبرو رجا و شفاعت ایله ایش کوردر مکة آلممش اولدقلرندن  
 و آنک حقتده دخی بر دیه جک سوزلری اولدیغندن همان گوشه کیر تأثر و انفعال  
 اولمشلر ایدی . الحاصل تنسد و بغیض و زمانه نك تحمل ایده میه جکی صورته فظ  
 غلیظ برذات اولدیغندن بتون طریق علمیه اصحابی کندوسندن دلکیر ایدی بویله  
 محتل و مشوش بر عصرده ایسه بر طریق اصحابنک منفعل و منقبض بولملری موافق  
 حال و مصاحبت کورلمدیکنه بناءً محرک ساخنی سبت کونی عمر خلوصی افندی  
 مستریحاً ساحلخانه سنده اقامت ایتمک اوزه عزل اوله رق یرینه صدارت روم ایلی  
 معزوللرندن محمد صالح افندی زاده احمد اسعد افندی شیخ الاسلام اولدی .  
 و برآی صکره صدور عظامدن منقیماً بروسه ده مقیم اولان ولی افندی زاده عفو  
 و اطلاق ایله در سعاده کتوردلی .

فحول علمادن و مکة مکر مه پایه لورندن محمد منیب افندی شیخ الاسلام سابق زماننده  
 دلخواهی اوزره ملتفت اولدیغی جهته آنک خلاف کیرانندن اولدیغی حالده مقدا  
 سیر کیر اوزرینه یازمش اولدیغی حاشیه سنی شیخ الاسلام جدید واسطه سیله عرض  
 ایدرک ترفیع پایه سنی استدعا ایتمکله خلال ربیع الاولده عهده سنه استانبول پایه سی  
 توجیه بیورلدیغی کبی اول ائنده اجرا اولنان توجیهات علمیه ده مخدوم مشیختپناهی  
 محمد صالح افندی دخی مکة مکر مه پایه سیله ممتاز الاقران اولمشدر .

قبه کاه اسلام اولان مکة مکر مه بی جمله یه مشرک نظریه باقان وهابیلرک محاصره  
 ایتدکلی خبری کلش اولدیغندن علمایه کوره بینلرنده کی نفسانیتی براغوبده  
 بوراسنی دوشنمک لازم کلوردی آنلر بر بریله اوغراشدقلرندن بوجهتک مطالعه سی

دخی باب عالی رجائه قلوب جانب حجازه بر قوه کافیه و هابیلرک رفع مضر ترینه  
 صرف افکار ایتمکده ایدیلر .

حرمینک محافظه سی مرتب ذمت خلافت اولدینی جهتله وهابی مسئله سنه دخی  
 اعتنا اولنق لازم کلدیکندن بو باده بر وجه مشروح مصر والیسی خسرو پاشایه  
 تنبیهات لازمه اجرا اولمش ایدی . بو ائنده ایسه ام دنیانک تولید ایلدیکی فتنه لر دن  
 طولای خسرو پاشا نفسی محافظه دن عاجز قالمشدر .

\* مصرک احوال اختلالیه سی و وقایع سائره \*

صدراعظم ضیا پاشانک در سعادتیه عودتنده مصرده کلی عسکر قلمش ایدی . بونلرک  
 بر طاقی اناتولی جانبندن مرتب یکچیر یلر اولوب بر طاقی دخی روم ایلیدن  
 مرتب باشی بوزوق عسکری اوله رق اکثری ارناود اولغله جمله سنه ارناود نظریه  
 باقلوب باشوغلری میرمیراندن ارناود طاهر پاشا ایدی .

فقط قواله لی محمد علی اغا دخی سر چشمه اولوب روم ایلیلر هپ اکا مربوط ایدی  
 و طاهر پاشا پک جسور و جنکاور بر ذات اولدینی حاده مشایخ و مجاذیبه معتقد  
 و اصول و رسوم متصوفیه مقلد ساده دل و سیاق و سباق احوال زمانه دن غافل  
 بر ذات اولوب محمد علی ایسه غایت دور اندیش و فطین و دلیر و مدبر بر مرد  
 صاحب تمکین اولدیغندن معنی بو عسکرک قوماندان حقیقیسی اوله رق آت اویناده جق  
 بر مساعد زمانک و رودینه مترصد و مترقب ایدی .

مصرده بویه کایتلو عسکرک ابقاسی امرای مصریه نک دفع تسلطاری ایچون  
 اولوب حالبوکه امرانک جانب دولتدن تعیین اولنان جهت معاش ایله اسوانده  
 تعیش و اقامتاری نظامه ربط اولندیغندن بو عسکرک لزومی قالمش اولدینی مصر  
 دفترداری رجایی افندی طرفدن لدی الاخطار مصر والیسی خسرو پاشا کندوسی  
 ایچون فرانسز عسکرینه تقلیداً بر از نظام جدید عسکری ترتیب ایدوب بونلره  
 کور و تمکده اولدیغندن تخفیف مصارفه مدار اولق اوزره دفتردارک بورائی تحسین  
 ایله مذکور ارناود عسکرینک قطع معینانه قرار و یروب حالبوکه مال صندوقده  
 آنلرک گذشته معاشلرینه وفا ایده جک قدر آنچه یوغیدی و خسرو پاشا عسکرینک  
 نظامی خام اولوب خود بخود امر محافظه یه مقتدر اوله جق راده یه کلامش ایدی .

بناء علیه تجاردن استقراض ایله گذشته معاشلرینک برازی و یریلوبده هان  
 مصر دن دفع اولنق اوزره عساکر مرقومه نک خر جلی کسیلوب آنلر ایسه  
 علوفه لری تماماً و یرلمدجکه بر طرفه حرکت ایتیه جکلری بیانیه محرک غره سی  
 اولان جمعه ایرتسی کونی غلو ایدرک دفتردارک یانیه کیتدکلر نده علوفه لری کز محمد

علیده در آنک یانه کیدیکز دیمکله آنلر دخی محمد عاینک قوناغنه واروب علوفه لرینی لدی المطالبه بن خزینه دن برآچه آلمدم دیمش وارناودلر طرفندن فنا سوزلر سویلنمکله طرفیندن مشاتمہ و مشاجرہ یه ابتدار اولنوب واروده تفنک پاتالایوب عسکر بربرینه کیرمش و عریبدنک اصلی نه اولدینی بیلنمیوب خلق ایچنه خوف ودهشت دوشهرک مصرده و بولاقده دکانلر قاتمیش اولدیغندن نہایت برہفتہ یه قدر عسکرک علوفه لری ویرملک و عدیله غوغا باصدرلمش ایدی .

محرک یدنجی جمعه کونی عسا کر مرقومه قالقوب دفتردار افندیکنک قوناغنه واردیلر و حولیسنه طولوب ایچلرندن درت نفری دفتردارک اوطه سنه دخول ایله وعدک انجاز و ایفاسی استدیلر دفتردار افندی یانمده آلتمش بیک غروش طوبولاندی بوکون آنی الکنز و باقیسی ایچون بر قاق کون صبر ایدکز دیدکده سوز ایاغہ دوشدی آرتق علوفه لریک تأخیری قابل دکدر بوکون تسویه اولنمیدر دیملریه دفتردار افندی خسرو پاشایه تذکره یازوب آنک یانمده کی خزینه دن بر مقدار آچه ارسالی استدا ایتدکده پاشا بر آچه ویرم و برشی ویرلمسنه رخصتم دخی یوقدر یا بولده دن حقیقوب کیتسونلر یاخود جہاسنی قتل ایدرم دیو خبر کوندر مکله دفتردار افندی قوناق عسکرله تولدی بر چاره سنه باقیکنز دیو تکرار بر آدمیله پاشایه خبر کوندردی بونک اوزرینه خسرو پاشا رد جواب دخی ایتمکسزین هان دفتردار قوناغنه طوب آدرمغه باشلادی و هرکس دکانلرینی قیابوب و سلاح لانوب محله شیخلریه برابر پاشانک یانه کیتسونلر دیو دلالر ندا ایتدردی .

شوالده اختلال ظهوره کش و ضبط و ربط مملکت خلل پذیر اولمش دیمک اولدیغندن عسکری طائفه سی یغما کر لکه قالقیشور و بلکه خانلره دخول ایدرلر دیو اهالیء بلده خوف و خشیتہ دوچار اولدیلر و محلاتی محافظه ایچون طرف طرف متریسلر انشاسنه باشلادیلر و یکیکچری اغاسی و سائر اوجاقلو و اختیارلر خسرو پاشانک یانه کیدوب اقدام بویله بر حال اختلالده هرشیدن اول قلعه نیک محافظه سنه اہتمام اولنمیدر دیملریه پاشا قلعه ده خزینه دار وار بن اکا قلعه نیک محافظه سنی و قپولرینک قیادیرلمسنی تنبیه ایتدم دیدکده هر قپونک خارجنہ بر مقدار یکیکچری دخی قویملی بز دیملری اوزرینه اوراسی سزک اوزرینکره لازم دکل سز بنم عسکریمی تفریق ایتمک استیورسکنر وارینکر اهالی یی سلاحلندیروب بورایه کتوریکز و همان بنم امرم اوزره حرکت ایدیکز دیو صاومش ایدی .

حالبوکه خسرو پاشانک خزینه داری فی الواقع قلعه ده ایدی . لکن یانمده بر مقدار ارناود و سائر باشی بوزوق طاقی وار ایدی پاشا ایسه غفلتدن ناشی یالیکز

خزینہ دارینک قلعہ دہ بولنسیہ محافظہ سندن امین و مطمئن اولوب فارغ البال اوله رق  
الفی محمد بک قوناغندہ اوتور مقدمه ایدی .

بو ائنادہ ارناود طاهر پاشا تجسسکارانه اورایه کلدکده خسرو پاشا کندوسنی یانته  
چیقارمیوب وارسون قوناغندہ قبانوب اوتورسون و برایشه قارشمسون دیودفع ایلدی .  
اول کون اخشامه قدر دفتردار قوناغی اوزرینه طوپ آیلوب قوناغک اخشاب محللری  
آتش آلهرق یانغه باشلامغه دفتردار اقدی مخزنه اینوب تحفظ ایلمش و زربانلر آلتندہ  
کیجه له مش ایدی . ارناودلر دخی کیمی دفتردار قوناغندہ و کیمی محمد علینک قوناغندہ  
و کیمی اوزبک جامعندہ و سائر کارگیر محللر دہ تترس و تحفظ ایتشلر ایدی .

فرداسی خسرو پاشا عسکرینی نظام جدید اصولی اوزره طاہور طاہور ایدوب اشبو  
باشی بوزوقلر اوزرینه هجوم ایتدردکده ارناودلر دفترداری واوراق ودفتری آلوب  
طاهر پاشا قوناغنه کتوردیلر و او جهتده منہزم اولدیلر ایسده جامع اوزبک جهتده  
تترس ایله مدافعه قیدینه دوشدکلری هنگامده پاشا عسکرینی دفتردار قوناغنه واردقلری کچی  
یغما یه قونیلوب نظام و رابطه لرینی فسخ ایتلریله کندو کندولرینی بوزدیلر باشی بوزوقلر  
ایسه آنلرک بویله یغما کر لکله تفرقه حالته دوشدکلرینی کوریحک فرصتی غنیمت  
بیلوب همان دونوب اوزرلرینه بر شدتلو هجوم ایله جمله سنی تارمار ایتدیلر .

خسرو پاشا جری و جز بزمی برذات ایسده هنوز کرم و سرد روزکاری کرکی کچی  
تجربه ایتماش اولدیغندن ترتیب ایتدیکی بر مقدار نظام جدید عسکرینه کوکونوب  
و تعلیم کونلرنده آنلرک حرکات منتظمه سنه باقهرق مصرده کوردیکی فرانسز طاہورلری  
کچی منتظم اولدی صانوب بوقوت ایله باشی بوزوق عسکرینک خرجنی قطع ایدرک  
مصر دن چیقارمق داعیه سنه دوشدی حالبوکه آنک ترتیب ایتدیکی عسا کر معلمه  
خام اولوب انتظام عسکر دن مطلوب اولان انضباط هنوز آنلر دہ حصوله کلامشیدی .  
بناءً علیه بادیء امرده باشی بوزوقلره غلبه ایتشیکن دفتردار قوناغنه واردقلری  
کچی یغما جیلغه قویلهرق فسخ نظام ایتلری اوزرینه باشی بوزوقلر دونوب بر هجومده  
آنلری پریشان ایتدیلر .

بو ائنادہ طاهر پاشا میدان چیقوب عصات ایله برلشدکده اختلال بر مرتبه دها  
قوت بولدی . و بر قراچ کوندنبرو طاهر پاشانک همشیره زاده سی کیفسزک بهانه سیله  
قلعه دہ بولنوب یاننده براز ارناود عسکرینی دخی وار ایدی اوملابسه ایله بو کره  
ارناودلرک بر طاقی قلعہ یه چیقوب اوراده کی همشهریلریله برلشهرک قوت بولدقلری  
کچی خزینہ دار دن قلعہ نک اناحدار لرینی آلوب طاهر پاشایه قبولری آچمشلر  
و خزینہ داری حبس ایتشلر . و قلعہ دن طوپ و خمیره و جبخانه آلوب اوز بکده کی  
جمعیت کاهلرینه کتور مشلر .

خسر و پاشا بو و قوعاندن بی خبر اولدینی حالدہ قوناغنه کله کلمکه باشا ایلیحق بونه دیمکله قاعه نك ارناودلر اننه کچدیکی اخبار اولدینی کبی عقلی باشندن کیدوب نه یاپه جغنی شاشردی طاهر پاشا ایسه قاعه دن اینوب یاننده بردلال ایله خلقه امان و اطمینان ویره رک دکانلریکنزی آچیکز اخذ و اعطا کرله مشغول اولکنز سزه برضرر یوقدر دیو ندا ایتدیره رک شهری یاروب کچمش وهان عادت مستمره سی اولدینی اوزره تر به لره و مشایخ و مجازیبه واروب زیارت ایله امداد روحانیلرینی طلب ایلمش در .

بونک اوزرینه اهالی بیطرف طور دی و برینک حقتده عسکری جانبندن تعرض و قوعوبلمدی و عسکری طائفه سی تجار و اصنافدن نه آسه لر تمامیه آنچه سنی و رروب اصلا غدر و اذا ایتدکارندن اهالی او یله وحشی عسکردن بویله خلاف مامول بر معامله عادلانه کوردکاری کبی ممنون و تمامیه امین و مطمئن اولملریله عسکرک ما کولات و سائر جه هراستدیکی ایاغنه کلور اولدیغندن برشیدن طولایی صیقندی چکمز لردی و اهالیدن بعضیلری بونلرک جمعیتلری ایچندن مرور ایتدکارنده لطفله معامله ایدرک بزم بر بریمزله نزاعمز وار سزرعیه سکنز بزم سزکله برعلاقه مز یوقدر دیرلر ایدی و طاهر پاشانک کاری انجق برمنوال سابق طور مجذوبانه ایله مملکتی طولاشوب دکانلریکنزی آچکنز و کوردیکی فلاحلره ذخیره کتوریکز آلیش و یریش ایدیکز دیمک و مشایخ و مجازیبک همتلرینی نیاز ایتک خصوصلرندن عبارت اوله رق اییک اوجی محمد علینک النده اولوب بونه اوره لری هپ او چویر یوردی و (طاش یرنده اغر اولور) قاعده سنه رعایتله مقامنده ثابتقدم اولوب فقط اهالیدن کندوسنه مراجعت ایدنلرک در حال یانلرینه آدملر ترفیق ایله و صور سائر ایله مشکللرینی حل ایدویرردی .  
بناءً علیه عامه نك قلوبی آنک طرفنه میل ایتمکه باشلامشیدی .

ایشته بو صورتله اهالی کندو ایشلریله مشغول اولدقلری حالدہ جمعه ایرتسی کونی فریقین میانه لرنده محاربه متمد و بازار کیجه سی دهامشتد اولدی .

فرداسی یعنی محرک طقوزنجی بازار کونی ارناودلر مصرک اکثری مواقعی و بولاق قصبه سنی ضبط ایتدیلر و نیلده کی قبطان قلیوننه کیروب انبایه یقه سنه کچدیلر و نقدر میری ذخاری وار ایسه اله کچوردیلر و بر فرقه سی قصر عینی به کیدوب خسر و پاشانک اوراده کی کوله لرینی اخذ و گرفت و اوز بیکه ده پاشایه متعاق اولان بعض ذواتک خانهلرینی غارت ایدیلر بونک اوزرینه اول جوارده کی اهالی کیمی طاهر پاشایه و کیمی محمد علی به مراجعت ایدرک یانلرینه عسکر آلوب اموال و اشیا لرینی معرکه دن

بعید محالره نقل ایدر لر دی . خسرو پاشا ایسه هر طرفدن محصور اولمغه اول کیجه ا مک بوله میوب یکسمات ایله چکنمشیدی .

اشبو بازار کونی ارناودلر یاغلی پچاوره ایله پاشا قوناغنده بر محلی طوتشدیر دیلر ولاجل الاطفا صو کتوره جک سقا بولنه مدیغندن قوناغک سائر طرفلرینه دخی آتش سرایت ایتکله پاشا آلت قاته اینوب تحفظ ایلمش ایسه ده آرتق پایدار اوله میه جغنی جزم ایلدیکندن هان وقت عصر دن اولجه دلیل وهواره سواریلریه حرملرنی جزیره بدران جهته حیقاروب آرقه لرندن کندوسی دخی باقی قیوسی خاتی وکوله لریه چقه رق فرار ایلدی .

پاشانک فراری شایع اولدینی کبی ارناودلر قوناغنه کیروب آتش حریق کوکلره طوغری چقمقده اولدینی حالده آنلر دخی نهب وغارات ایله مشغول اولدیلر وبر فرقه سی خسرو پاشانک تعقیبنه سکر تدکلر نده پاشا ایکی دفعه دونوب آنلری بوزدی والرنندن قورتیلهرق کیجه قلیوبه واورادن وجده یه واروب حرمنی واحمال واقفالی کینره ازکاب ایله بنها طرفنه کیندی وآنک فرارندن صکره مصرده دلالیر ندا استدیریلهرک خلقه امنیت واطمینان ویرلدی .

خسرو پاشانک والیلکی مدتی بر سنه اوچ آی ویکرمی برکون اولدی جبرتی تاریخنده دیرکه اداره سی فنا ومائل سفک دما بر وزیر سیء التدییر ایدی وواخر مدتنده کندوسنه غرور کلوب وسوء قرینه مبتلا اولوب مظالم وتعدیانه ابنتار ایتمشیدی هله مقهوراً مصر دن چیقدی وظالمندن عبادالله قورتادی .  
والعهده علی الراوی

بروجه مشروح خسرو پاشانک فرارنده حریق علو کیرا اولمقده ایدو کندن ارناودلر سکر دوب آتشدن قورتاره بیلدکلری اموال واشیایی یغما ایله مشغول اولدکلری ائنده حریق دخی تمام حکمنی اجر ایدرک بونجه ابنیه عظیمه وقصور عالیه کافه محترق اولدی .  
بو قوناغک محلی فی الاصل سیروتزهری اولوب بر قصر واطرافنده قهوه لر وسائر دکانلر وار ایدی بیک ایکیوز اون بر سنه سنده النی محمد بک آتی اشتر و اساسندن هدم ایله غایت جسیم ومکلف برقوناق انشا ایلدی وهنوز اتمام ایتمشیکن پوناپارته مصره کلوب بوراده اقامت ایدرک اودخی برآز علاوه لر یاپدردی بعده قله بر وعبدالله منوخیلی توسیع ومحو واثبات ایله طرز فرنگانه اوزره اعمار وانشا آتدن خالی اولمدیلر مؤخرأ خسرو پاشا مصره کلدکده اودخی بوراده اقامت ایله بر مرتبه ده تعمیر واصلاحنه بذل همت ایلدی غریبدرکه قله برک زماننده فرانسزلر بو قوناغده تحفظ ایتلریه اهالی وعساکر عثمانیه اوتوز التی کون بو قوناغی حصر وتضیق ایدوب



برطاشی یرندن اوینامامشیکن بو کره ارناودلرک یاغلی پچاوره لر یله طوشوب برکیجه نك  
ایچنده محو وتلف اولدی کذلک دفتردار قوناغی که رضوان کتخدا قوناغیدر اودخی  
غایت مکلف ومصنع برسرای جسم ایکن یانوب دیوارلرندن بشقه اثر قلمدی .

حرمک اونچی بازار ایرتسی کونی عسکری طائفه سی فرد افریده یه اذا ایتسون  
وهرکیمه عسکریدن ادنی مرتبه جفا ایریشور ایسه محله سنده کی قره غول ضابطنه  
شکایت ایله خصمنی طاهر پاشا قوناغنه احضار ایلسون دیو دلالر ندا ایتدیرلدی  
واون دردنجی جمعه کونی مشایخ وقاضی بلده طاهر پاشانک یانه کیدرک عقد دیوان  
اولندوقده وایلیک امری یاخود دیکر والی کلنجیه دک طاهر پاشانک قائممقامنی بالتنسب  
قاضی ایلدی برکورک کتوروب طاهر پاشایه الباس ایلدی وعرض ومحضر ایله  
واقع حالی درسعاده عرض ایلدیلر .

بووجهله طاهر پاشا قائممقاملوقده قرار قیلدوقده خسرو پاشا طرفداری عد اولنالردن  
بعضیاری حبس اولندی فقط مشایخک شفاعتلر یله کندولرندن برر مقدار جریمه  
آلنه رق سییلاری تخلیه قلدی .

ومصردن مطروداً جانب اسوانده مقیم اولان امرای مصریه کویاکه پرده آرقه سندن  
بووقوعاتی تماشا ایدیورلر ایش که طاهر پاشانک بروجه سابق قائممقامق کورکی  
کیدیکی کون طرفلرندن وارد اولان تخریراتده مقدمما (اطیعواالله واطیعوا الرسول  
واولی الامر منکم) آیت کریمه سیله استدلال ایدرک بزى دولت علیه یه مخالفتدن  
تخذیر واخله ایش ایدیکر لکن بوکولرک آلتسندن خر وجزی امر وکندو  
کندومزى تهله کیه القا ایشک واجب اولدیغنه دائر برر آیت ذکر ایتدیکر خسرو  
پاشا ایسه بزلی قطر مصردن اخراج ایلیمک امرنده مصر اولدی حالبوکه فلک  
دونر وجناب حق لیل ونهاری تقلیب ایلر) دیومندرج اولمغله حضار تعجب ایتدی  
وطاهر پاشا آنلره یازدیغی جوا بنامه ده واقع حالی اشعار وشایدکه معاونه احتیاج  
مس ایلر دیو مصره قریب محله کلربیخی اخطار ایلدی وچند روزسکره کوله منلرک  
مصره طوغری عزیمت ایلدیکی خبر آلدی .

وخسرو پاشا مصردن بروجه مشروح خروج ایله منصوره یه واردوقده اهالیسی  
اوزرینه طقسان بیک ریال فرده یعنی ویرکو توزیع وجوارنده کاشن قریه لردن دخی  
مقتدر اولدیغی قدرآچه تحصیل ایلدیکی استماع اولمغله طاهر پاشانک برادری حسن بک  
برفرقه عسکریه ایله حرمک یکر می التیسنده اولطرفه کوندرلسی اوزرینه خسرو پاشا  
اولطرفدن حرکت ایله واروب دمیاطی ضبط ایدرک اوراده تمکن وتحفظ ایلمشدر .  
مقدمما جانب حجازه کیتیمک اوزره جبخانه ایله مصره برمقدار یکیچری عسکری

كلوب جامع ظاهرده اقامه واسكان اولمشلر ایدی خسرو پاشا آنلری تجهیز ایله جانب حجازه اعزام ایتمك اوزره ایكن بالاده مشروح اولان وقوعات اوزرینه بولندقلری حال اوزره قالدیلر . طاهر پاشا تغلب ایدوبده ارناودلری یوزه چیققدقلرنده یکیچریلره چشم حقارت ایله نظر ایدر اولدیلر یکیچریلر ایسه كندولرینی دولتک الی وایانچی مثابه سنده بیلوب اومثللو حیاطه لره آنقلی خدمتکار نظر یله باقدقلرندن یکیچری طاقیله روم ایلی عسکرلری بیننده برعداوت پیدا اولمشیدی طاهر پاشا بعض نابی مصادره و تحویل اموال میریهه اعتنا ایدرک جمع ایلدیکی مبالغی هپ کندو عسکرینک گذشته معاشرینه محسوباً صرف واعطا ایدر و یکیچریلر علوفه لرینی ایستدکجه ( بن کندو والیلکم زمانندن صکر سنی بیلورم دها اولنه قارشیم واکر سزک گذشته علوفه لریکز واریسه واریکر خسرو پاشادن استهیمکر ) دیو جواب ویرر ایدی یکیچریلر بومعامله دن دخی دلکیر اوله رق اول ائشاده جانب حجازه کیتمک اوزره مصره ککش اولان مدینه منوره محافظی وزیر احمد پاشا ایله خفی مذاکره دن صکره صفرک دردنچی چهارشنبه کونی ایکیموز الی نفر مقداری اولدقلری حالده جامع ظاهر دن مساحا حرکت ایله طاهر پاشانک قوناغنه كلوب علوفه استدارنده کما فی السابق بم سزه برویره حکم یوقدر جوابی ویرمسی اوزرینه مطالبه ده اصرار ایتلریله طاهر پاشا بولری سب و تکدیر ایدجک ایچلرندن بریسی سکر دوب طاهر پاشانک باشنی بدنندن تفریق ایله پچره دن طیشارویه آتمش و دیگرلری دخی طاهر پاشانک اتباعی اوزرینه هجوم ایله بر خیلینسی اعدام ایتمش اولدقلرندن ایکی عسکر میاننده ظهوره کلان جنک وجدال دن طولانی اهالی اورکمکله دکانرینی قیایوب خانلرینه قانیدیلر متعاقباً دلالر احمد پاشا نامه اوله رق امن وامان ایله ندا ایتدیلر بعده ارناودلر بتون مملکتدن طرد و اخراج اولمق اوزره یرولی یکیچریلر وسائره ایله احمد پاشا یانه تجمع ایتسون دیو دلالر ندا ایتمکله خلاق محل بمحل تجمع ایدرک طاقم طاقم یوریدیلر ارناودلر دخی اوز بکیمه طرفنده و کندو قوناقلرنده طویلانیدیلر .

بوائنده یکیچریلر ایله ارناودلر یکدیگری طوتدینگی کبی اعدام و طاهر پاشا قوناغنه حریق دوام ایلردی و طاهر پاشانک چشه سی بر طرفه آتمش اولدینگی حالده قلوب اتباعندن بری آنی اخذ ایله دفته جسارت ایده مزدی باشنی دخی یکیچریلر دن بعضیاری نجشش آلق اوزره خسرو پاشایه کورتورمشلر ایسه ده آرقلرندن ارناودلر یتشوب و آنلری اعدام ایله باشی آلوب جسدیه برابر دفن ایتدیلر .

اشبو طاهر پاشا فی الاصل روم ایلیده واقع بهاشه قضا سندن و ارناودلرک توسطه قسمندن و پلاسلی محمد پاشانک بیکباشیلرندن اولوب و دین سفیرلرنده انکله برابر

بولمش غایت شجاع بر ذات اولدینی خالدہ پلاسیدن آریلوب ضیا پاشا ایله مصر  
سفر لرنده بولمش و بوجهته میرمیران اولوب ضیا پاشانک عودتنده روم ایلی عسکری  
باشبوغلغیله مصرده قالب فقط ارناود صنفندن اولمیان روم ایلی عسکرینک  
سرچشمه سی دخی سالف الذکر قواله لی محمدعلی اغا ایدی .

جبرتی تاریخده دیرکه طاهر پاشانک مدت غلبه سی یکرمی اوچ کوندر اگر ده  
زیاده معمر اولسیدی حرث و نسلی اهلک ایلردی اسمر اللون نحیف البدن واسود  
اللحیه اولوب عربجه شوویه طورسو ترکیه بیله آز تکلم ایلردی اکثریا تکلمی  
ارناود لسانی اوزره ایدی . درویشلره و مجذوبلره مائل اولوب مجلسنده غریب  
الشکل آدم لر بولنوردی و بوجهله شهرت بولدقده برطاقم ارادل و او باش دخی اکا  
چاتق اوزره درلو درلو درویش قیافتلرینه کیره رک و اهل وجد و حال طورنده  
کورینه رک کلمات صوفیه دیوفنا فنا سوزلر سویلمکه باشلامش ایدی .

طاهر پاشانک اولوجهله اعدامی اوزرینه احمد پاشا واقع حالی خسرو پاشایه اشعار  
و علی جناح الاستعجال مصره کلمنی اخطار ایتدکنصکره مشایخی جمعه واروب  
محمدعلی بی اطاعته دعوت ایللمرینی تنبیه ایتمکه آنلر دخی واروب محمدعلی به بوامری  
تبلیغ ایتدکنرنده محمدعلی ( احمد پاشا مصر والیسی دکدر بوراده مسافر بر آدمدر  
آنک مصرده برعلاقه سی یوقدر اما طاهر پاشا طرف دولت علیه دن مصرده محافظ  
ایدی او ملبسه ایله بز اکا اتباع ایدرک آنی قائم مقام ایتمشیدک احمد پاشاده او یله  
بر ملبسه و مناسبت یوقدر او یکچیری بی آلب خارج بلده چیقسون و آنلری  
تجهیز ایله محل مأموریتنه کیتسون ) دیو جواب ویرمکه مشایخ بوجواب ایله آنک  
یانندن چیقیدیلر و یکچیری طاقی کافی السابق نهب و غارت ایله مشغول اولدیلر  
ارناودلر دخی اخشامه قدر بولندقلری برلرده متریس اعمالدن خالی اولدیلر .

فرداسی احمد پاشا دفتر دار ایله روزنامه چی عبدالله رامز افندی بی و پاشا کتخداسی  
یوسف اغابی و سائر مأمورینی یانه طوبلادی محمد علی ایله ارناودلر ایسه قلعه  
کندو لارنده اولدیغندن ایشارینی تنظیم ایله مشغول اولدقلری خالدہ مصره کلوب  
کیرمک اوزره اولان امرای مصریه ایله مخبره ایتمکه ایدیلر و اول کون  
کوله منلردن بعضیلری مصره کلوب زقاقلرده کز مکه باشلادیلر محمد علی دخی جیزه  
یقه سنه کچوب امرا ایله کورشدی و کوله منلرک برخیلیسی برطاقم عربان ایله برابر  
مصره کیردی .

و اول اثناده یکچیریلرک بر فرقه سی رمیله جهته حرکت ایتدکنرنده قلعهدن  
اوزرلرینه طوب آلمغه باشلادینی کبی رجعته مجبور اولدیلر و احمد پاشا بیوک علی

بلك داو دیده ده کی خانه سنده ساکن اولوب آنک اوزرینه دخی طوپلر آلمغه باشلادی  
 کبی یاننده کی جمعیت برربر چوزلدی ویرلو یکچیریلرک چونخی طاغدی .  
 ایکندیدن اولجه ابراهیم بک احمد پاشایه برقطعه تخریرات کوندروب طاهر پاشانک  
 قاتلرینی تسلیم ایتمک و کندوسی دخی ساعت اون برهدک بلدهنک خارجه چیقمق  
 خصوصلرینی صورت قطعیه ده تکلیف ایلدی احمد پاشا مصر دن صاوشوب  
 کیتمکن بشقه چاره اولمدیغی جزم ایله بوتخریراتی کتورن آدمه قاتلری تسلیم  
 ایتمک قابل دکدر فقط ابراهیم بکه سلام ایت دوه کوندرسون چیقیم دیدکده  
 شمدی دوه احضاری قابل اوله ماز فقط سز چیقکوز دوه لر دخی کیجه یاخود  
 صباحلین کلور و اشیا کز تحمیل ایله کیرودن سزه یتشدیریلور دیوب بشقه چاره  
 دخی اولمدیغندن احمد پاشا وقت عصرده بنوب دفتردار و کتبخدا و روزنامه جی  
 آندن آریله رق محمد علینک یاننه واروب اکا التجا ایتدکرنده اظهار بشاشت ایله  
 حسن قبول کوستردی .

احمد پاشا ایسه آغر لغنی قوناغنده ترک ایله خفیف شیلری اتباعی اوموزلرینه یوکتمش  
 اولدیغی حالده پک فنا و پریشان صورتده خارج مصره چیقدیغی کبی ارناودلر  
 کلوب قوناغنی یغما ایتدیلر و باب فتوح دن خارج شهره چیقدیغنده ارناود و عربان  
 و کوله منلردن برچوق خلقک کندوسنه کوز دیکمش اولدقلرینی کوریلجک  
 معیتده کی یکچیریلر ایله برابر قلعه ظاهره کیروب قپولری قپاندی ارناود و عربان  
 و کوله منلردن مرکب بر جمعیت دخی آنی احاطه ایدرک اطرافده کیجه لیلر .

اخشامدن صکره و الی شرطه یعنی امور ضابطه مدیری اوکنده بردلال اولدیغی  
 حالده درون مصرده کزوب حاکم ولایت ابراهیم بک ایله افندمن محمد علینک  
 تنبیهی اوزره جمله یه امن و امان دیوندا ایتدیردی .

اول کون ارناودلر پاشا کتخداسی یوسف اغانک قوناغنی نهب و غارت ایلدیلر  
 و یوسف اغا دفتردار افندینک قوناغنه کیتمکله فرداسی عسکر اورایه کیدوب  
 ایکسینک دخی باشلرینی قطع ایتدیلر متعاقباً محمد علی کلوب و یغمایه کلش اولان خلقی  
 طاغدوب اوراسی تمهیر ایتدکن صکره کندو قوناغنه کیتدی متوفالرک دفته  
 رخصت ویردی لکن عسکری طائفه سی ایکسینک دخی باشلرینی جیزه ده بولنان  
 امراه کونوروب اعاده ایتدکرندن باشسز اوله رق دفن اولدیلر .

قلعه ظاهرده محصور اولنلرک حالنه کلنجه بروجه مشرح بونلری ارناود و کوله من  
 و عربان عساکری احاطه ایلمش اولدیغی حالده طرفین یکدیگره تفنک آتدق  
 برایکی کون محاربه ممتد اولوب انجق محصورینک مأکولات و مشروباتی اولمدیغندن

ارناودلر قلعه دن طوب ایندیروب کله ایله دوکمهک باشلادقلندن چاره سز طلب رای و امان ایله قبولی آچدیلر و احمد پاشا ایله بو یکچریلرک ضابطلری و طاهر پاشانک قاتلیری اولان اسمعیل و موسی اغالر برلکده چیققدقلرنده ارناودلر احمد پاشایی قصر عینی به کوندردیلر و بو اغالری جیزه به کورتوردیلر بعده ایکسینک دخی ناصریه ده بیونلرینی اوروب باشلرینی طاهر پاشانک حرمنه عرض و اراؤه ایتدکن صکره برادرینه تقدیم ایتک اوزره قلعه به چیقاردیلر و قلعه ظاهرده قالان یکچریلرک ساحلرینی و اشیلرینی آلدقن صکره صالحیه طرفه تسیار ایتدیلر یانلرنده باقی شیلرینی دخی یولده عربان آغله بونلر بشیوز قدر یکچیری اولدقلری حالده عربان اوله رق یوله روان اولوب کیتدیلر .

ایشته بوخلالده دلالر ابراهیم بک و بردیسی عثمان بک ایله محمد علی نامنه اوله رق خاقه اعلان امن و امان ایتکده و یکچریلره منتهی اولان ترکار علی العموم مصر دن طرد ایدلمکده و کوله منلر فوج فوج درون مصره کیرمکده ایدیلر .

صفرک اون برنجی کونی محمد علی و روزنامه جی عبدالله رامز افندی و ابراهیم بک کتخداسی رضوان بک برمنوال سابق قتل اولنان دفتردار محمد رجائی افندینک خانه سنه کلوب ترکه سنی ضبط ایتدیلر او چیوز کیسه لک نقودی و تخمیناً بیک کیسه لک مجوهرات و اشیاسی چیقدی .

متوفای مومی ایله رجائی افندینک ترجمه حالی بیان سیاقده و اصف افندی دیرکه مومی ایله کوتاهیه اطرافده ساکن برشخص فقیرالحالک اوغلی اولوب حال صباوتنده جراح پاشاده ساکن طلبه دن برینک حجر تریبه سنده بر مقدار تحصیل علوم ایتدکن صکره سلیمان فیضی پاشایه و بعده محمود بک دائره سنه انتساب ایدوب محمود بکک و فاتنده مکتوبی خلفاسی سلکنه داخل اوله رق برارالق بر خدمت ایله معدنه واردینده یوسف ضیا پاشایه دیوان کاتبی اولمشیدی . آنچه قزانق یوللرینی بک اعلا بیلور چاقور پنجه لی برذات اولوب آزوقت ظرفنده خلیجه ثروت پیدا ایلدی ضیا پاشا صدراعظم اولدقده استانبوله کلوب قالیونلر کاتبی و مصر سفیرینک بدایتنده مکتوبی باش خلیفه سی و صادق افندینک و فاتنده آنک یرینه مکتوبی صدرعالی و دفتردار سعیدالله افندی کتخدا اولدقده آنک یرینه بالفعل دفتردار اولدی مصر فتحنده اله بک چوق مال کچمکله کندویه غرور کلدی و سوء اطواری حسیلله عزل اوله رق استانبوله عودت ایلدی شریف افندی مصر دفتردارلغندن استعفا ایله وزارتیه طالب اولدقده صاحب ترجمه تکرار دفتردارلق ایله مصره اعزام اولندی سعی میری قضیه سنه رعایه عسکرک قطع معیناتی خسرو پاشایه

اخطار ایدوب اودخی تخفیف مصارفه مدار اولور مطالعه سیله عسا کر مر قومه نك  
 خر جلبرنی قطع ایتدکده ظهوره کلان اختلاک مبادیسنده خسر و پاشا مصر دن  
 فراره مجبور اولوب صاحب ترجمه مصر ده قالدی و نهایت ارناود لرك النده مقتول  
 اولدی . غایت جسور و ظلم و غدر ایله مشهور مال جمعنده مهارتی مسلم و آقپین  
 یاغدن قیل چکر کبی تحصیل ایدر بر آدم اولوب اوج بش سنه ظرفنده الی بیک  
 غروش ایراد پیدا ایتدکن فضله نقد و قوناق و سائر تحف و طرائفی بیک کیسه لک  
 راده سنده او لغله آز وقت ایچنده بو قدر مال جمعی عقلایه حیرت و یردی دیمک  
 اوله یورکه بویله قاریشق و قتلرده هر کس عملنک جزاسنی چکیور و زمانه نك بویله  
 دلوز و جکر سوز اولان و قوعاتی هپ انسانلرک سوء اعمالندن نشئت ایدور  
 (ان الله لا یغیر ما بقوم حتی یغیروا ما بانفسهم) .

صفرک اون ایکنجی بخشبه کونی بردیسی عثمان بک ابراهیم بک ایله محمد علی ایچون  
 قصر عینیده برضیافت ترتیب ایدوب جمعیت طانیله جنفی وقت محمد علی ایله رفقاسی  
 اولان سر کرده لره خلعتلر اکسا و هدیه لر اعطا ایدلدی فرداسی جمعه کونی دخی  
 طاهر پاشانک برادر لری حسن بک و عبدی بک ایله آرقداشلری ایچون دخی برضیافت  
 و یردی و آنلره ده خلعتلر الباس ایله هدیه لر و یرلدی . و قلعه ارناود لرك النده  
 اولدیغندن خلقه اطمینان کلامکله امرای مصر یه بونک چاره سنی آرا مقده ایدیلر  
 صفرک اون بشنجی کونی طاهر پاشا برادر لری و آنکله برابر اولان ارناود سر کرده لری  
 قلعه یی امرای مصر یه تسلیم ایدیلر و قلعه ده یالکتر حسین قپودان ایله بر مقدار  
 ارناود عسکری قالدی .

الحاصل خطه مصر یه ینه کوله منار یدینه کچدی و ابراهیم بک کما فی السابق شیخ البلد  
 و پیشوای امرای مصر یه اولدینی حالده والی قائم مقامی اولدی فقط مقدا مراد بک  
 کندوسنه شریک نفوذ ایکن بو کره مراد بکک یرینه بردیسی عثمان بک کچدی و برده  
 بو کره ایش یالکتر کوله منار النده اولیوب آنلره قارشو بر قوه عسکریه وار ایدی که  
 بکلرک مصره کیر مسی دخی بروجه مشروح آنلرک سایه سنده ایدی بو قوه عسکریه  
 بالاده اشعار اولندیغی اوزره مقدا یوسف ضیا پاشا و قپودان دریا حسین پاشا ایله  
 مصره کیدن باشی بوزوق عسا کر یدر که هر طرفدن مصره عسکر کوندرلر کده  
 بونلر دخی روم ایلیدن کوندرلش ایدی روم ایلیده حال عصیانده بولنان و طاغلو  
 اشقیاسی دینلان گروه متغلبه کبی بونلر دخی هر طرفدن طویلاشم عثمانلو عسکری  
 دیمک اولدینی حالده بک چونغی ارناود بولنوب باشبوغلری اولان مقتول طاهر پاشا  
 دخی ارناود اولدیغندن وهر نه اولسه میدانده ارناود سر کرده لری کورلدیکندن

اشبو روم ایلی عسکرینه مصرده ارناود نامی ویرایوب استانبولجه دخی حقیقت حاله اطلاع اولدیغندن بونلرک جمله سنه ارناود نظریه باقیایوردی حالبوکه بونلرک ایچنده برچوق غیور وجسور قیرجه لی وسائر روم ایلی عسکری وارایدی و بونلرک باشی هپ قواله لی سرچشمه محمد علی اغایه باغلوایدی علی الخصوص قیرجه لی عسکری آنک همشهریسی و خاص یولداشلری ایدی برمنوال سابق طاهر پاشا اعدام اولندقده یرنده برادری حسن بك قالمش ایسه ده تدبیر مملکتجه محمد علینک مهارتی کوروب هیچ بروقده آنک رفاقت و معاونتندن مفارقت ایتمامک اوزره آنکله بسه ایتمش اولدیغندن بتون روم ایلی عسکرینک اداره سی محمد علی انده قالب کندیوسی دخی سرچشمه عنوانیه یاد اولنقده ایسه ده حقیقت حالده طاهر پاشانک مقامنه قائم اوله رق معنی مصرک محافظی اوایدی .

بو عسکرک التمش بیک خرج آلدینی واصف تاریخنده مقیدر فقط اولوقتک اصولجه سرکرده لرک آلدقلمی خرج ایله نفراتک موجودی بیننده کلی تفاوت اولدیغندن بو عسکرک حقیقه نه مقدار اولدینی معلوم دکدر الحاصل مصرده محمد علینک باشنده مجتمع اولان قوه عسکرینه نک غلبه سی ایله یکچیریلرک قوتی کسر اولنوب خطه مصریه اشبو روم ایلی عسکریه کوله منلرک دست تغلبنده قالدی ویکچیریلره منتمی اولنلر برر برر مصردن طرد اولنغاله یالکزر روم ایلی عسکری قالدیغندن مصرک اداره سی معنی اوچ کشینک یعنی ابراهیم بك و بردیسی ایله محمد علینک یدنده ایدی وناسک مهم وحقه مقرون برایشی ظهور ایدوبده محمد علی یه مراجعت ایته رؤیت ایدیور دیکندن یوما فیوما شان و اعتباری ترایدایتمکده ایدی . مصرک امر اداره سی بو شکله کیردکده در سعادته تقدیم اولنان محضرده خسرو پاشا وقعه سی وبعده احمد پاشا ایله یکچیریلرک احداث ایستکلری فتنه اوزرینه اهالی دوچار اضطراب اوله رق اکر امرای مصریه قریب اولوبده یتشمامش اولسه ایدیلر بتون بتون مملکت خراب اوله جق ایدی درج و تسطیر اولنشدیر .

بوئانده طاهر پاشا برادری حسن بك دمیاط اوزرینه کیدوب خسرو پاشا ایله لدی المحاربه منهزم و پریشان اولدینی خبری امرای مصریه نک انفعاله بادی اولدی و بردیسی عثمان بك کوله من و عربان وارناودلر دن کلی عسکر استصحاب ایله اولطرفه کیتدی محمد علی دخی برابر عزیمت ایستی .

اقدمجه حجاج مصر کلوب محمل مصر درون شهره آندی ایسه ده امیر الحاج معیتده کی عسکر خسرو پاشایه منسوب اولدیغندن درون مصره ادخال اولنمیوب خارجده براغلمش ایدی مصر دن جمع اولنان یکچیریلر بونلرله برلشدیریلرک جمله سی

ایکی بیک بشیوزہ بالغ اولدقلری حالده مدینہ منوره محافظی احمد پاشا بونلری استصحاب ایله اوائل ربیع الاولده مصردن چیقوب کیتدی .  
 بوکره حجاجک عودتنده وهابیلرک رساله لری واعلاننامه لری مصره واصل اولوب علمای مصر آنلری مطالعه ایتدکلر نده مصرده بوندن طولای خیلی مباحثات مذهبیہ وقوعه کلدی ومصرده ایکی فرقه پیدا اولوب بری وهابیلره کافر وخارجی دیو حکم ایتدیله بعضیلری دخی آنلرک سفسطه وعبارات مووه لرینی لایقیله اکلامیوب ابن تیمیه وابن قیم وامثالی علماء سالفه نك اقوالی دائره سنده اعتبار ایدرک تمام مسلمانلق بودر دیدیلر . مورخ جبرتی دخی وهابیلره مائل اولان فرقه دن اولدینی سیاق افاده سندن مستبان اولور . وهابیلر ایسه بالاده تفصیل اولدینی اوزره جمله یه مشرک نظریله باقوب بو باده پک زیاده افراط ایله طریق حقدن انحراف ایتشلر ایدی .

برمنوال سابق وهابیلرک طائفی استیلا ایتدکلری خبری درسعاده واصل اولدقده حرمینک عسکر و ذخیره ارسالیله استکمال اسباب محافظه لری خسرو پاشایه حواله اولمش ایکن مصرده اختلال وقوعیله خسرو پاشانک دمیاط جانبیه فرار ایتدیکی خبری وکلای دولته موجب تلاش وحیرت اولدی وخسرو پاشایه سلانیک سنجانغی توجیه بیورلدی و طاهر پاشانک کماکان امر محافظه ده بردوام ومصره یکی والی کیدنجیه دک اولطرفده بولنان مدینہ منوره محافظی احمد پاشا قائم مقام اولق خصوصلری متضمن اوامر علیه کوندرلدی .

بو اوامرلر مصره و اواخر صفرده واصل اولوب اولوقت ایسه طاهر پاشا و احمد پاشا دورلری کچرک کوله منلر مصره کیرمش وقائم مقاملوق مقامنده ابراهیم بک بولمش اولدیغندن اوامر مذکورہ نك مصرجه هیچ حکم و تاثیرى اولماشدر .

بویله بر مختل ومشوش وقتده مصرک ضبط وربطه مقتدر والی بولمق مشکل بر مسئله اولدیغندن بروجہ مشروح خسرو پاشا وقعہ سی ظهورنده مناسبی تحری اولدینی صره ده میرمیراندن طرابلسلی علی پاشا مصره دائر اولان معلومات سابقه سندن بحث ایدرک وشویله کسرم وبویله بیچرم خزینہ دولته بو قدر واردات بولیویریرم دیهرک ایالت مصره طالب اولدقده چونکه اولوقت خزینہ نك مضایقه سی اولدیغندن تزید واردات سوزینه طیانیه میوب رتبه وزارتله عهده سنه مصر ایالتی توجیه اولدی .

اشبو طرابلسلی علی پاشا دینلان ذات ایسه فی الاصل جزائر بکلر بکیسی محمد پاشانک کوله سی اولوب محمد پاشانک وفاتنده یرینه دامادی کچرک آنی معروضات ایله استانبوله کوندرمشیدی برادری سید علی اولوقت ترسانده معتبر ومتنفذ بر ذات بولنوب آنی



قپودان دریا حسین پاشایه توصیه ایتمکله قپودان پاشا دخی آنی طرابلس بکیر بکیسی نصب ایتمیره رک و کندوسنه عسکر و کمی ویره رک طرابلسه کوندرمش ایدی واروب تونس بکیر بکیسی حموده پاشانک برادری اولان طرابلس بکیر بکیسی ایله چندماه محاربه و نهایتنده غلبه ایدرک بکیر بکی تونس فرار ایتمکله علی پاشا طرابلسی ضبط ایتمکده اهالیسنه پک زیاده ظلم و تعدی و انواع فسق و فجوره تصدی ایتمدیکندن جمله سی زوالنی تنی ایتمکده اولدقلری حالدده حموده پاشا برادری عسکر جمع ایدرک طرابلسه عودت ایله آنی محاصره و اهالی دخی علیهنه قیام ایتملری اوزرینه و جوه زاده لردن کویارهن صورتیه ایکی دلی قانلی آلب برکمی به راکباً اسکندریه به فرار و مراد بکه التجا ایدوب اودخی کندوسنه مستقلاً قوناق اعطا ایله اکر ام ایلمش ایدی . ایکویوزیدی سنه سنده حجه کیدوب مکه مکرمه ده دخی مذکور ایکی دلی قانلو ایله فسق و فجوره طالمش اولدیغندن طرابلس حجاجی کلوب آنی بو حالدده کوردکلری کبی وقوع حالی امیر الحلاج پاشایه انها ایله لندن اول چوققلری المشلر و یوزینه تو کورب صقالتی یولملر بونک اوزرینه علی پاشا بحراً سویشه چیقوب ینه مراد بکک حمایه سنه دخالت ایتمش و بعده فرانسلر مصره کلده مراد بکک ایله برابر محاربه لرده بولنوب برارالق اورادن فرار ایله سردار اکریم ضیا پاشا اردوسنه کیتمش ایدی اردوی همایونک بالاده بیان اولدنیغی اوزره منهزما رجعتده ضیا پاشا کندوسنی تحریرات ایله در سعادتده کوندرمش اول وقتدنبرو در سعادتده قالمش ایدی .

عربستان طرفلرنده بو وجهله سوء شهرت قزانمش ومدت مدیده مراد بکک دائره سنده سورنمش اولان برشخصک بویه و قتده مصر والیسی نصب اولنمش هیچ مناسب دکل ایدی و کندوسی دخی بوکا طالب اولماملیدی فقط کوله منلرک هنوز مصره کیرمش اولدقلری استانبولجه معلوم اولیوب حالامصرده عثمانلوعسکرینک نفوذی جاری ظن ایتمدیکندن دولتک قوق سایه سنده مصرده یرلشه بیلورم دیو ظن ایدوردی .

بو ائنده ایسه برمنوال مشروح مصرینه کوله منلر انه کچمش و صنوف عسکر به مصردن چیقاریله رق یالکز روم ایلی عسکر ی قلوب آنلر دخی کوله منلر ایله برلشمش ایدی و آنلرک سر چشمه سی اولان محمدعلینک طائر فکری پک یو کسکلرده اوچوب صید امل ایچون قوردنیغی طوزاقلره قایلوب طوتلما مق پک مشکل ایدی . نه حال ایسه علی پاشا بحراً مصره کیتمک اوزره حاضر لقمده اولدنیغی ائنده بوجه مشروح و هاییلرک مکه مکرمه به کیروب نه وجهله هنک حرمت ایتملری حقنده شریف مکه ایله جده والیسی شریف پاشانک تحریراتی و بو طائفه شقاوت پشه نک

مذهب و مراعاتی نه اولدیغنه دائر آدم افندینک معروضاتی در سعادت و اصل اولدوقده دولتک بر مرتبه دها تأثر و انفعاله بادی اولدی . و ارتق و هابی مسئله سنک تصویرنده قاضی عسکر افندیلرک دخی بحث و ترددی قلمدی .

سلطان سلیم خان حضر تلی ایسه و هابیلرک مکّه مکر مہی استیلا ایتدکر ندن ناشی پک زیاده متالم اولدیغندن هر نصل اولور ایسه اولسون باری مدینّه منوره نک اسباب محافظه سی اکل اولسون و بو وهابی غائله سنه بر چاره بولسون دیو قطعاً امر و فرمان ایتمکله صفرک یکر می طقوزنجی بازار کونی شیخ الاسلام قوناغنده عقد مجلس مشورت اولدوقده عربستانک احوالی میدانه قونیلوب هر کس رأیی بیان ایلسون دیندی .

صدور عظامدن عززاده محمدعارف افندینک صدر اعظمه خطاباً ( جزار احمد پاشا هر نه قدر سزی کوجندیردی ایسه ده برای مصلحت تلطف و مدینّه منوره یه ذخیره و سائر ایه امداد ایلمسی باخط همیون طرفه امر و اشعار ایه تشریف اولنسه شایدکه انصاف ایدوبده مقدما استلاف اوزره اولدیغی مشایخ عربان واسطه سیله مدینّه منوره یه بر مقدار ذخیره ادخال ایلمه ) دیمسنه جو ابا کتخدا بک بوتدیرک اجرا اولمش اولدیغنی سوبلدکده حضاردن بعضیلری ( جزار پاشا جبلتده مرکوز اولان تلونی ترک ایه صحیحاً امداد قیدینه دوشر ایسه مصاحتی بروجه سهولت رؤیت ایدر ) دیدیکی عقبنده صدوردن اسحق افندی زاده احمد مختار افندی صدر اعظمه توجه ایدرک ( جناب دولتکنرک هر وضع و طوری نزد شاهانه ده مقبول اولوب استقلال تامه مظهر اولدیغکز حالده بلا مشارکت امور دولت احسن وجهه رؤیت اولنه جغندن بشقه شوکتلو افندیمز بعضا خرقة شریفه او طه سنده تضرع و نیاز بیورسه لرصوری و معنوی تدبیر حصولیله مواد دولت کسب سهولت ایده جکی ظاهر در ) دیحک صدر اعظم دخی ( طرف همیوندن بو عبسده عاجزه و یریلان استقلال بروجه کمال اولوب شمدی به دک معروضاتک جمله سی مساعده سنیه مقرون اولدیغندن غیري خرقة شریفه او طه سنده و سائر اماکن متبرکه ده جناب حقّه تضرع و نیازده دقیقه فوت ایتیمور لر ) دیو مختار افندی یه جواب و یردکدن صکره تیزالدن مدینّه منوره یه اعانه لاقردیسی تکرار اولدوقده صدر عظامدن امین پاشا زاده محمد امین بک افندی ( مدینّه منوره یه اعانت و مکّه مکر مہ یه سوق عسکر ایه و هابیلرک دفعنه همت انجق مصر قاهره طرفندن اوله بیلور والی جدیدک عجاله کوندرلمسی لازمه خالدن کورینور ) دیمکله صدر اعظم ( مصر و الیسی حاضر و مهیادر برایکی کون طرفنده سفینه یه راکباً کیتمک اوزره در فقط خسرو پاشانک

مصر دن چيقماق نيتده اولديغى بعضيلر روايت ايدييور بوصورته ايسه ايشلر بتون بتون بر عكس اولور ) ديمسى اوزرينه ترسانه اميني رشيد مصطفى افدى ( خسرو پاشا مصر دن چيقماز ديو بين الناس شايع اولمش ايسه ده قبل العزل او طرفده اولان معارضلرينك ابراميله چيقمدن امتناع اوزره اولوب يوخسه مصر دن عزل ايله آخر منصبه نقل اولنديغى معلومى اوليجق امره امتثال ايتمى اغلب احتمالدر ) ديدى واکر خسرو پاشا مصر دن چيقماز ايسه بومصالح مهمه معطل اوله رق دولته عظيم رخنه و يرمش اوله جغنى هر کس اعتراف ايتدى بعده رشيد مصطفى افدى ( مصره آچه ارسال اولنوبده بر مقدار ذخيره اشترا وسویشدن ينبوع اسکله سنه و آدن مدينه يه ايصال اولتمق ممکندر ) ديدکده صدر اعظمک ( مصرده اولان ارناودلر حاضر نقدى کوريجک تغلبا اخذ ايله ادعا ايتدکلرى شهر يه لرينه محسوب ايدرلر هم آچه تلف اولور و همده ايش تأخر ايلر ) ديمسنه مقابله رشيد مصطفى افدى ( دولت عليه نك بوقدر آچه سى تلف اولوب کيدييور احتمال که ذخيره مصلحتى حصوله کله کمن ايسه وارسون بوآچه ده ضايع اولسون ) ديرکن حضاردن بر ينک ( فرض ايدلم که ذخيره اشترا ايله ينبوع اسکله سنه ايصال اولندى ينبوع ايله مدينه منوره نك مايدنى خصم طرفدن قطع اولنور ياخود ينبوع اسنيلا اولنش بولنور ايسه ذخيره ارسالنک نه فائده سى وار ) ديمسنه جواباً ( مصر طرفدن اوچ بشيوز آدم تجرير ايله ذخيره بي محافظه ايدرك مدينه يه ايرشدرمک ممکندر ) دينا دکده دخى ( سويشک موسمى کچدى شمدى بوقدر ذخيره ني و اوقدر آدمى استيعاب ايد ه جک قدر کمى بولمق قابل اولماز ينه شام طرفدن آچه قوتيه ذخيره ايصالنک چاره سى بولنسه مناسب اولور ) دينا مسى اوزرينه صدوردن بکر افدى زاده ( مصر اولماز شام اولور ) ديحک بعضيلر ( ذخيره نقلى بهر حال حيواناته محتاجدر شامدن مدينه منوره مسافه بعيده اولمغه محمول انجق حاملک غداسى اوله جنى ظاهر ايسه ده شايد بر مقدار ذخيره استخلاص و ايصالى قابل اوله ) ديه رك صدر آخره عطف کلام ايله و هابيلرک هر طرفدن تضيق اولتملرى بحثى درميان اولندوقده شيخ الاسلام افدى اول حوالى احوالنه واقف اولنلردن بعضيلرينه خطاباً و هابيلر نوجهله تضيق اولنه بيلور ديمکله بغداد واليسى على پاشا اقدار اولنديغى حالده و هابيلرى کلى اشغال ايدر دينا مسى اوزرينه صدر اعظم ( بغداد واليسى معارضلرينى کيروه براغوبده خطه عراقک خارجه چيقه بيلورمى ) ديحک ( بغداد واليسنه ظاهرده بر معارض مزاح قالمدى و هابيلرک تاديى ايرانيلرک اجل مطالبى اولديغندن او طرفدن دخى وسوسه اولتماز و مرحوم سليمان پاشا درعیه اوزرينه حرکت ايتمک

نیټیله اوچ بش بيك قدر قربه ياديرمش وپك چوق دوه واستر اشترا ايتمش ایدی و فائتدن صكره بونلرك بر مقداری تلف اولديسهده باقيسی موجود اولمق كر كدر علی پاشا اقدار و تشويق اولنسه ديارنجك پك چوق محللرني تاراج و خصمی خيلیدن خيلي اشغال و ازعاج ايدر) دینلده كه بوتدير حضار طرفندن تصویب و تحسین اولدینغی صرهده ينه صدور دن اسحق افندی زاده عطاءالله افندی (كر بلا و قعه سندن طولایي ايرانيئر و هایلرك خصم جانی و دشمن بی امانی اولوب جهت و وحدت اسلامیه ملابسسه سیله آنلر دخی بر طرفندن و هایلر اوزرینه تسلیط ایله اغرا اولنسه لر نه ضرر وار) ديحك حذا سنده بولسا نلردن بعضیلری (ایران خلقنك ديارنجده وصولری خاك پاك بغداددن عبوره موقوفدر حدودی تجاوز لری ایسه محل خطر و بصره و قعه سی مثللو برغانه حدوئی مقرر در) دیوجواب ویرمكله عطاءالله افندی (یا اوراسی معلوم دكل ایدی) دیوب سسنی كسدی .

بو منوال اوزره وافر بحثلر كذران ایتدكدن صكره صدر اعظم (مناسب كوریلور ایسه بر تدبیر ایدهیم بغداد والیسی منفردا بوایشه مباشرت ایتمز شام والیسی اول حوالیده صاحب نفوذ و اعتبار و خاندان قدیمدن اولمق حسیله بین العشائر صاحب وقع و اشتهار اولوب اودخنی سرعسكرلك ایله مأمور ایدلسه و مقدا بغداد والیسنه یازیلان اوامری مؤكد اولهرق تکرار مأموریت ویریلوب و سرعسكرلك عنوانیه قدری ترفیع ایدیلوبده یكدیكریله مخابره ایدرك بر طرفندن خصمی تضیق ایتسه لر مناسب اولورمی) دیدكده جمله حضار طرفندن صدر اعظمك بوتدیری تصویب اولهرق مجلسه ختام ویرلمشدر .

ایشته اولوقت دولت علیه نك مركز و مرجع مصالح مهمه سی اولان مجلس مشورت بودر بونده در میان اولنان رأی و تدبیرلك حل مشكلات عصره كافل و کافی اولمیه جنی و كلای عصرك دخی معلومی ایدی نه چاره كه ایش كسب نزاكت ایلمش وهر نه تدبیر اولنسه تحتنده بر چوق محاذیر مستتر بولنش اولدیغندن و كلا دخی كندولرینی مسؤلیتدن تخلص ایچون بو هیئته مراجعته مجبور ایدیلر .

بر منوال سابق و هایلرك مكه مكرمه یه داخل اولدقلى و مدینه منوره ی تضیق ایلدكاری خیر تأسف اثر لرینك در سعادتجه نه مرتبه موجب الم و كدر اولدینغی رئیس الكتآب افدینك صدور دن عصمت بك افندی ایله واقع مخابره سندن كوزلجه منفهم اوله جغندن ایكى قطعه مخابره تذكره لری زیرده (۱۹) رقمه ایراد اولنور .

بر منوال مشروح حرمینه امداد ایده جك اولان مصر ایالتده اختلال وقتنه ظهور ایله اوراسی دخی اصلاحه محتاج اولدیغنه بناءً مجلس مشورت قرار یله شام و بغداد

وایلرینه سرعسكرلك عنوانی ویریلرک ایکی قولدن وها بیلر اوزرینه هجوم ایتمک اوزره مأمور قیلندیلر مصرک اصلاحی دخی طرابلسلی علی پاشادن امید اولنه یوردی .  
 حالبوکه ربیع الاولک اون دردنچی کونی بردیسی عثمان بك ایله خسرو پاشا بیننده واقع اولان محاربه ده خسرو پاشا مغلوب اوله رق عزبه قلعه سنه قیاندی بر دیسنگ  
 عسکری عنوة دمیاطه دخول ایله یغما و عزبه قلعه سنی حصر و احاطه ایتدیلر خسرو  
 پاشا ناچار طلب رای و امان ایله کندوسنی بردیسی به تسلیم ایتدکده مقدهما کندو  
 خدمتده بولنان بر طاقم ارناودلر ایله کوله منلر آنی آلوب مصره کتوردیلر .

بوآننده مصر والیسی اولان طرابلسلی علی پاشا اسکندریه به واصل اولوب امرای  
 مصریه به خطاباً مصره کوندردیکی تحریراتده ( طاهر پاشانک و فاتندن و سزک مصره  
 دخولکنزدن دولتک خبری اولمیوب طاهر پاشا ایله احمد پاشانک و هابیلرله محاربه  
 ایچون حجازه کیتلمرینه دائر بنم یاننده امرلر واردر اسکندریه به مواصلتمده طاهر  
 پاشانک وفاتی وارناودلرک اعانه سیله سزک مصره دخولکنز ورجال دولت ایله برچوق  
 یکیچیریلرک قتلی وبقیه سننگ صورت نامرضیه ده مصردن اخراجی معلوممز اولدی  
 بو حاللرک سزدن صدورری ایسه مناسب دکلدر و بز بوکا راضی اولمز سزکاه معاشرت  
 سابقه و موالات قدیمه مز اولق حسبیله ایولکنزی استرز و وطنلرکنزده راحتکنز  
 اسبابی ارار و حسن صورتله حصولنه سعی ایدرز مناسب اولان بو ایدیکه دولتک  
 اذنی اولدقجه سز شهره کیرماملیدیکنز مخالفت و عصیان صورتی راحتسز لکنزی  
 موجب اولان حالاتدنر ز یرا دولتک قلیچی اوزوندر و طاقت کتورمیه چکنز  
 بعض مخالفینی دخی اوزریکنزه تسلیط ایده بیلور ) دیو محرراولغله بوکا جواباً امرای  
 مصریه طرفدن یازیلان تحریراتده ( خسرو پاشا والی اوله لیدنبرو مرحمتی رجا  
 ایتدیکه قوت و شدتی زیاده اوله رق خطه مصریه ده اقامتمزه رخصت و یرمیوب  
 پیدر پی اوزریمزه عسکر سو قدن خالی اولدی جناب حق دخی بزه نصرت و یردی  
 نهایت کندوسیه عسکری بیننه وحشت و منافرت دوشدی و علوفه لرینی و یرمدیکی  
 جهته اوزرینه قیام ایتدیلر و طاهر پاشانک اعانه سیله آنی مصردن چیقاردیلر بعده  
 یکیچیریلر قیام و طاهر پاشایی ظلماً و غدرا اعدام ایتدیلر و عسکر بر برینه کیردی  
 و بز دخی مقدهجه طاهر پاشانک استدعاسی اوزرینه چیزه طرفه کیشیدک او مقتول  
 اولیجق مملکت ضابطه سز قالدی و اهالی عسکرک مظالم و تعدیاتندن خوف ایتملریه  
 علما و مشایخ و وجوه بلده کلوب بزدن استعانه ایتدیلر بز دخی عسکر کوندروب  
 مملکتک ضبط و ربطنه مقید اولدق اما خسرو پاشا دمیاطه متوجه اولوب یولده خاقه  
 ظلم و تعدی ایلدیکندن اهالیء قرایی تأمین ایچون بردیسی عثمان بك کیدوب خارج

دیاطده اقامت ایستد کده خسرو پاشا آنک اوزرینه هجوم ایتمکله واقع اولان محاربه ده مغلوب اوله رق طوتیلوب مصره کتورلدی ایشته بزغفومز حقنده فرمان کنجیه دیک بو حال اوزره یز اما سزک سوز کزله مصردن چیقمق ممکن دکلدز و بو خصوصه بزم عسکرمنز بزه مطاوعت ایتمز ویز اللهدن بشقه بر طرفدن استعانه ایتمیز انجق طلب عفو ایچون درسعادته تقدیم ایستدیکمز عمر خالک جوانسه منتظرز) دیو محرر بولمشدر.

ومصرده کوله منلر ایله روم ایلی عسکر نندن بشقه ییانیجی بولندیرماسنه قرار ویریلهرک بو ائانده شام و حلب و اناطولی اهللسندن تقدیر عرب و ترک وار ایسه اوچ کونه قدر مصردن چیقوب کیتلمری دلاللز واسطه سیله اعلان اولمشدر .

بو ائانده مصرده برغریب وقعه ظهوره کلشدر . شویله که : خسرو پاشا ظاهر حالده مکرم ایسه ده معنی کوز حبسنده اولدینی حالده مصرده اقامت اوزره ایکن برکون ابراهیم بکدن استیزان ایله تنزه وشم هوا ایچون ظاهریه خارجه چیقوب کندو کوله لر یله آنلره بنه رک قارغی او یینامقده ایکن جمله سی بردن اطلاق عنان ایدوب کیتدکر ننده نظارته مأمور اولان کوله منلر ابتدا بونلر آت یارشی ایدورلر ظن ایتمشدر ایسه ده کوزدن نهان اوله جق درجه ده اوزادقلر نندن کوله منلر دخی آرقه لرینه دوشمشدر و ابراهیم بکه اخبار کیفیت اولدینی کبی در حال اطرافه کاشف لر طاغیدوب قلعه ننگ و اطراف شهرک محافظه سی ایچون طاقم عسکر لر کوندر مکله حقیقت حال کمنسنگ معلومی اولدینی حالده ارناودلر ایله کوله منلر ییننده محاربه ظهور ایتمدی ظنیه اهالی عظیم تلاش ایتمدی خسرو پاشا ایسه طوغری اوزبکیه و واروب محمد علینک سرکرده لر نندن احمد بکه دخیل دوشمشیدی احمد بک ایله دیکر ارناود سرکرده لری خسرو پاشایه بو حرکتدن طولانی توبیخ ایدرک طوتوب احمد بک آنی ابراهیم بکه کتور مکله خلکک تلاش واضطرابی بر طرف اولدی .

خسرو پاشانک بو حرکتی احمد بکه دخیل دوشهرک ارناود عسکرینی غیرته کتور دکده کوله منلره ویرمز لر آنلر دخی آلمق استر لر بوندن طولانی میانه لر ننده ظهور ایده جک مجادله دن کندوسی استفاده ایدرک ارناودلرک قوتیه کوله منلره غالب اولوب کافی السابق مصر والیدکننده استقرار ایلر مطالعه سنه مبنی ایدی و اول عصرک عادتق اوزره احمد بک پاشایی کوله منلره ویرمامک داعیه سنه دوشیدی فی الواقع مصرده بریکی غائله تحث ایلردی لکن بوسرکرده لرک عنان اختیار لری سرچشمه محمد علینک الوده اولوب اودخی بو ائانده بر دیسی ایله یکجهت کورینوردی

و مرام خفیندن کمنه آگاه دکل ایدی . بناءً علیه خسرو پاشانک بوتصوراتی  
برشائی مفید اولیوب بوندن صکره عاده قره غول آلتنه آلتشدر .

الحاصل خسرو پاشا محمد علینک غایت عمیق ودقیق اولان تصوراتی درک واذعان  
ایده میوب ارناودلری کوله منلر علیه دوشورمک ایچون ایتدیکی تدبیر کندوسنک  
قره غول آلتنه التمنسندن بشقه برشائی منتج اولدی .

رشید قصبه سنده بر مقدار عثمانلو عسکری بولندیغندن بو ائناده سایمان کاشف کیدوب  
رشیدی محاصره ایتشیدی ناکاه سید علی قپودان کلوب کندوسنک ورودینی ومصر  
والیسی علی پاشانک کلدیکنی اخبار ایدیک سایما کاشف رحمانیه طرفه چکلمش وسید  
علی کلوب رشیده دخول ایتش ایهده متعاقباً بر دیسی رشیده کیتمکله سید علی  
برج مغیزلده تحصن ایلدی ویکرمی بوقدر کون میانلرنده محاربه تمتد اولدی نهایت  
سید علی امرادن قبه لک ظهور ایتمز ظنیه مکمله ایتک اوزره یانلرینه ایدی  
حالبوکه عودت ایده جک اولدقده اخذ وتوقیف ایتدیلر وبونک اوزرینه برج  
مغیزلده کی عسکری چیقاروب اسیر ایلدیلر .

سید علی قپودان که کوله جنسندن اولوب بو کره مصر والیسی اولان علی پاشانک  
برادریدر وسید تعیری شریف دیمک اولیوب بلکه مغاربه اصطلاحاتندر که افندی  
وبک مقامنده استعمال ایدر لر مومی الیه اصحاب درایت و بسالتدن ومشاهیر امرای  
بحریه دن اولمق حسبیه اوائل جمادی الاولاده مصره کتورلدکده ابراهیم بک کندوسنه  
آت و جاریلر اعطا ایله بک زیاده اکرام ایلمشدر .

رشیدک استیلا سندن صکره بر دیسینک اسکندر یه اوزرینه هجومی ملحوظ قوی  
اولدیغندن کچه جکی یولاری صویه غرق ایتک اوزره علی پاشا ابو خور سیدینی  
کسر ایتشدر .

سد مذکور آثار متینیه قدیمه دن اوله رق اوته دنبرو تعبیر واحکامنه اعتنا اولنه کلشیکن  
صکره لری احوال مملکت مختل واسباب معموریت متروک ومهمل اولمق حسبیه  
بعض محللرنده رخنه لر پیدا اوله رق اون التی سنه دنبرو مزارع قرا اوزرینه  
طوزلی صولر لککه باشلامشیدی مؤخرأً انکلیز لر کادکده بالاده بیان اولدینی  
اوزره فرانسزلرک یولارینی قطع ایچون بحریه جهتدن دخی بوسدی هدم ایتلریله  
طوزلی صولر دمنهوره قدر جریان ایدی و اشرفیه خلیجه قارشیدی ونیجه قریه لر  
خراب ونیجه مزرعه لر آفت زده سیلاب اولدی واسکندر یه نک قره یولاری منقطع  
واسکندر یه نیل صوینک وصولی تمتع اولدی فرانسزلر مصر دن چیققدن صکره  
بوسدک بناسیچون طرف دولت علیه دن صالح افندی مأمور اولوب بر بچق سنه

قدر بذل مقدور ایدرک اتمامی قوهٔ قریبه به کتورمش و اهالی به فرح و انشراح  
و یرمش ایکن بوکره علی پاشا تکرار آنی هدم ایتمکله حالت اولاسنه رجوع ایدرک  
صالح افدینک بو قدر سعی و امکی هبا اولدی بونک اوزرینه آرتق اسکندریه به  
نیل صوبی کله مز اولدیغندن اهالینسک اداره سی صهر یجبار ایله قویولره منحصر  
اولدی . بناءً علیه اسکندریه اهالینسک اکثری از میر وردوس و قبریس کی بعض  
سواحل و جزائر هجرت ایستدیلر اسکندریه ده یالکز بر طرفه حرکت ایده میان  
عجزه و فقرا گروهی قالدی آنلر دخی علی پاشانک پنجهٔ مظلوم و تعدیاتنده از یلوب  
جانلرندن یزار ایدی .

و علی پاشا عسکرینک بر مقدرینی نظام جدید طرزینه قویوب هر کون بوناری منشیه  
طرفه چیقارر وصف باغلا دوب تعلیم ایستدیرر ایدی حالبوکه نظامک برنجی شرطی  
عسکرده انضباط حصولیه ضابطانه اطاعت و انقیاد دن عبارت اولوب یوخسه یالکز  
عسکری صره ایله دیزه رک ایلر و کیر و آرش ایتمکله مطلب حصوله کلز علی  
پاشانک عسکرنده ایسه اصلا انضباط یوغیدی بناءً علیه بر کون تعلیمدن عودت لرنده  
فرنک محله سندن کچر کن بر معناد پنجره دن باشلرینی چیقاروبده آنلری تماشا ایدن  
فرنکاره اشاعیدن قورشون آتدقلرنده فرنکار دخی آنلره مقابله ایستدکلرندن  
عسا کر مرقومه همان فرنک اولرینه کیروب غارت و یغمایه اجتسار ایتملریله  
اسکندریه ده مقیم قونسولوسلر لیمانده لکر انداز اولان ریاله کمیسنه کیدوب وقوع  
حالی استانبوله یازمشلر بونک اوزرینه علی پاشا تلاشه دوشه رک همان اسکندریه  
محافظی خورشید پاشایی قونسولوسلره کوندروب اعتذار و تلفاتی تضمین ایتمک  
اوزره خاطر لرینی استجلاب ایله شهره اعاده ایلمشدر الحاصل علی پاشانک  
اسکندریه ده کی طور حکومتی کرک اهالی و کرک اجانب نظرنده مقدوح ایدی .  
بو ائساده نیک جریاننده نقصان فاحش کورنمکله مصرده دفعهٔ قحط  
و غلا ظهوره کلدیکی علما و مشایخ طو پلانوب ابراهیم بکه عرض و افادهٔ حال  
ایستدیلر بیان عجزدن بشقه تسلیت و یره جک بر جواب آله مدیلر بحریه طرفنده  
دخی بو وجهله ذخیره مضایقه سی اولوب بر وجه مشروح سد مذکورک هدمیله  
یوللر دخی منقطع اولدیغندن بر دیسینک اسکندریه اوزرینه حرکتی اشاعه  
اولنمشیکن آدن صرف نظرله مصره عودت وارد وسیله برابر اوائل جمادی الآخره ده  
جیزه به مواصلت ایستی فرداسی محمد علی عسکر یله مصر طرفه کچدیکی کی بردیسی  
دخی کچدی اهالی مصر ایسه ذخیره مضایقه سندن مضطرب اولدقلرندن تجمع  
ایدرک محمد علی به و بردیسی به بث شکوی ایله فریاد ایلدیلر بونک اوزرینه



برذیسی بولاقدہ کی ذخیرہ انبار لرنی آچدیروب خلقہ فیثات معینہ سیلہ ذخیرہ  
ویردرمکله خلقک برآز کوزلری طویوب متسلی اولدیلر .

### \* وقایع شام و عراق \*

بالادہ بیان اولدیغی اوزره مجلس مشورت قراریلہ شام و بغداد والیرینہ سرعسکرک  
عنوانی ویریلہ رک و هابیلر اوزرینہ مأمور ایدلمشیر ایدی .

بونک اوزرینہ شام والیسی عظم زاده عبدالله پاشا طرفندن وارد اولان تحریرات  
جوابیہ ده مدینہ منورہ یه بر مقدار ذخیرہ کوندرہ حکم و بشیوز نفر عسکر دخی  
دخی تدارک ایدہ حکم انجق طریق سلطانیدن کیده مز مصر جاده سنندہ کائن  
حویطات قیلہ سی شیخلرنی جلب ایدرک آنلرک کفالت و ضمانیلہ کوندریم مدینہ منورہ یه  
وجده محافظنه اوله رق کلان فرمانلری نجاب ایله کوندردم شام حوالیسنده اولان  
عزہ عربانسه کلان فرمانلری دخی کوندروب شیخلرنی جلب ایدلم بونلرک  
ایچلرنده وهابی یه تبعیت ایتمشلری وار ایسه دخی ضروریدر قوه قاهره دولت  
علیهی کوردکلرنده جمله سی دولت بنده لکنی اجرا ایدرلر دیو محرر بولنمشدر  
حالبوکه بر وقتدنبرو مدینہ منورہ محصور حکمنده و ذخیرہ جه حال مضایقه ده  
بولندیغندن ایشک درجه اهمیتته نظر آ شمدی یه قدر شام والیسنک کلی اعانه ایش  
اولسی لازم کالورکن حالا ذخیرہ کوندریلہ جک و قبائل اعانه ایدہ جک و ایدیلرنده  
مألسمز سوزلر ایله وقت کچوروب ایشه اعتنا ایتمیور دیو عبدالله پاشا حقدہ حسن ظن  
ملوکانه متغیر اولدیغنه منی بالادہ تفصیل اولدیغی اوزره یافه وقعہ سندن طولای  
مبعوض دولت اولان جزار پاشا ایله بالخباره حال حاضر اوزرینہ کندوسندن  
رای صورلغه مجبوریت کورلمشیدی .

و بو کیفیت سلطان سلیمک زیادہ تأثر و انفعالی موجب اولوب وکلای دولتدن  
دخی کمنه ایشی اوزرینہ آلق ایستمدیکندن واسط ربیع الآ خرده ارکان دولت  
حاضر اولدقلر حالده حضور هایونده عقد اولنان مجلس خاصده جریان ایدن  
مذا کر آنک نتیجه سنده جزار احمد پاشانک اول حوالیده درکار اولان صیت و نفوذینہ  
بناء بو ایشه مأموریتی تنسیب اولنوب انجق اولجه بوماده یه دائر اصدار بیوریلان  
خط هایون ایله طرفه خاصی کوندرلمش اولدیغندن جوابی کلنجیه دک صبر و توقف  
اولنق اوزره قرار ویرلدی .

و مصر یولی مسدود اولدیغندن مدینہ منورہ یه بحرا بصره دن ذخیر ارسالی مناسب  
اوله جنی جزار پاشا طرفندن اخطار اولنقله اجرای ایجابی بغداد والیسنه اشعار  
ایله برابر درعیه اوزرینہ حرکتی دخی اخطار ایله مأموریت سابقه سی تأکید ایدلدی .

جزار پاشایه خاصی ایله ارسال بیورلمش اولان اراده سنییه جواباً وارد اولان عریضه سنده کندوسنه مصر وشام ایالتلری توجیه بیورلدیغی خالد هم مصری نظامنه قویوب همده خارجیسلمری استیصال ایدیوره جکئی عرض ایلمش ایسه ده بتون عربستانی کندوسنه تسلیم ایتکه دخی جسارت اولنه مدیغی جهته شهمدیلك مصر دن قطع نظرله شام وتوابی وحجاز سرعسکرلکی اوائل رجب شریفده جزار پاشا عهدسنة توجیه بیورلدی .

حالبوکه بر وقتدنبه جزار پاشا مبعوض پادشاهی اولوب شام والیسی عبدالله پاشادخی آنک اوزرینه مأمور بولنمش ایدوکنندن بو عزل ونصب کندوسنه کوچ کلمکله وشامک جزاره توجیهنده طرابلس شامده بولنمغه جزاری شامه اوغراتمامق اوزره هان طرابلسدن حرکته شامه عزیمت ایلمش ایسهده اهالی کندوسنی شامه اوغراتمدقلمرینه وبوحالده دولته دخی اطاعتسزلك ایتش اولدیغنه مبنی همان اورفه طرفه فرار ایله اولطرفه بولنان بغداد والیسی علی پاشایه دخالت والتجا ایتش وجزارک متسلمی شامه دخول ایله جزاره مخالف طاقدن اولان مفتی مراد زاده علی افندی ایله دفتردار حسن افندی بی اعدام ایلمشدر .

بغداد والیسنگ اولطرفه بولنسنه سبب بوایدیکه بغداد مضافاتندن جبل سنجارده متوطن یزیدی طائفهسی که واصف افندیکن بیاننه کوره شیخ فخر نام شخص ضلالت پیشیه اتباع ایله شیخ عدی نام شخصه منسوب اولوب میانه لرنده متلو وانواع کفر والحاد ایله ملو اولان جلده نام کتاب ایله عامل وتناسخ مذهبه قائل وصوم وصالاتک وجوبی انکار ایله انسانه لازم اولان انحق طهارت وصفای بال ویزیدیلره سائرلرک مالی حلالدر دیمک کبی برچوق مواد باطله یه معتقد اولان برقوم زال ومضدر بروقتدنبه رسالک شاهق عصیان اولملریله تأدیب و تربیه لری لازم کلش ایسهده بو ائنده دولت علیه ایله ایران دولتی حدودنده متوطن اولوب کاه بو طرفه وکاه او طرفه ایصال خسار ایدن بلباس عشیرتندن بو ائنده حکمران ایران اولان فتحعلی خان شکایت ایتدیکنه وایرانیلرک کر بلا وقعهسی اوزرینه وهابیلردن شکایتی میدانده ایکن برده بویله حدود اوزرنده کی عشائرک تعدیلرندن طولایی اشکالرینه سررشته ویرلمک مناسب کورلمدیکنه مبنی بغداد والیسی علی پاشا ابتدا بلباس عشیرتی اوزرینه حرکت وانلری تأدیب ایله بغداده عودت ایتدکدنصکره ایکیوز اون یدی سنهسی خلاننده یزیدیلر اوزرینه حرکت ایله سنجاره مواصلتنده باغ وباغچلرینی تخریب و صرب طاغیر اچینده کندولرینی تضییق ایله عرض مطاوعته مجبور ایدوب مظفرأ عودت واشبو ایکیوز اون سکنز سنهسی او ائنده بغداده مواصلت ایتشیدی بالاده بیان

اولدینبی اوزره سلیمان پاشانک و فاتنده علی پاشا قائم مقاملغه اتخاب اولندقدہ علیهنه حرکت ایله بغدادده فتنه احدانسه جسارت ایدن یکچیری اغاسی احمد اغا وقعه سنده شاوزاده لرك دخی ید ومدخلی اولدینبی علی پاشانک معلومی اولمغه و بو کره آنلر دخی اردوده برابر بولمئریله سنجار سفرندن عودتده شاوزاده محمد بك ایله برادری عبد العزیز بکی اعدام و برابر بولنان صغیر اوغلرینی حبس و توقیف ایدوب فقط محمد بکک بیوک اوغلی جاسم بك العمید عشرتیله برلکده فرار و خابور طرفنده قرار قلدیغنه ورقة والیسی تیمور پاشا ایله العمید عشرتی میانه لرنده عداوت قدیمه اولدیغنه مبنی تیمور پاشاهان اوزر لرینه واروب لدی المحاربه بك فنا حالده منهزم اوله رق بالجمله اموال و اشیاسی یغما و غارت اولنمش ایدو کندن بغداد والیسی علی پاشا اردوسیله خابور طرفه ککش ایسه ده العمید عشرتی آنک حرکتی استماع ایدیجک جاسم بك ایله برابر فرات نهرینی عبور ایله شامیه یاقه سنه مرور ایلمش اولمسیله علی پاشا دخی عودت ایتمش ایدی .

ایشته بو اثناده عظم زاده عبدالله پاشا اردویه کلوب علی پاشایه التجا ایتدکده کندوسنه علی پاشا اکرام ایدرک در سعاده عرض وانها ایله عفو ایتدیره جکنی وعدا ایتمشدر .  
 و بو اثناده خلیل نامنده بری دیگر بعض اشخاصی اغفال ایله درون بغدادده فتنه احدانسه اجتسار ایتمکله علی پاشانک قائم مقامی اولان درویش اغا ارباب اختلالک جمعیتی طاغیدوب مرقوم خلیل ایله دیگر اوک ایاق اولنلری اخذ و گرفت ایدرک علی پاشادن تحریراً استیدان ایله کیمنی اعدام و کیمنی نفی و تعزیر ایلمشدر .  
 خفیف عسکرله و هابیلرک حقندن کنه میوب صوسز و ایصسز چولارده جسیم اردو کزدرمکده اولان مشکلات دخی مقدا علی پاشانک لحسا اوزرینه حرکتده بالتجربه معلومی و بو مثللو برخطب جسیمک اجراسی و الیلرک و سمندن خارج اوله رق دولتک همت کلیه سنه منوط مواددن ایدوکی مجزومی اولدیغندن بر موجب اراده سنه و هابیلرک اوزرینه حرکت ایده جکنی بیان ایتمکله برابر اولحوالینک صعوبت طریقتی بیان ولا اقل ذخیره و صونقلی ایچون التمش بیک دوه تدارکی و بغدادک موجودی اولان بش بیک سواری و بش بیک پیاده دن بشقه موصل و دیار بکر ورقة و حلب طرفلرندن دخی بش بیک پیاده تحریری و مهمات تسیری لازم کله جکنی و بو عسکر و دوه لرك التي آلق مصارفی اون سکر بیک کیسه یه رسیده اوله جفندن بو بایده محتاج اعانه اولدیغنی در میان ایدرک باب عالی به برقطعه عریضه تقدیم ایتمشیدی .

حالبوکه استان بولجه در عیه چولارینک مشکلات و صعوبتی و جزیره العربده سعود

اوغلرینک درجه نفوذ و مکتبی لایقابه معلوم اولدیغندن شام و بغداد والیرلی  
ایکی قولدن حرکتله و هابیلری احما ایدیور لر ظن اولنه یوردی .

بناءً علیه عظم زاده عبدالله پاشا حقنده توجهات علیه متغیر اوله رق شامدن عزل  
اولتمش اولدینی کبی علی پاشانک بومعروضاتی دخی موجب انفعال اوله رق هم  
و هابیلر اوزرینه حرکت ایده جکم دیور و همده مادهی اعظام ایله طاقت کلیه جک  
اسباب و مهمات ایستیور ایکی کلامی بیننده تناقض وار دیو اعتراض ایدلمش وهان  
و هابیلر اوزرینه حرکتی ایچون تأکید حای امر عالی کوندرلمش ایدی .

ورده مقدما میلوتیمورک اعدام و ازاله سنه اراده سنیه صادر اولمشیکن بغداد والیسی  
مرحوم سلیمان پاشانک شفاعتی اوزرینه عفو اوله رق عهدده سنه رتبه وزارت ایله رقه ایاتی  
توجیه اولتمش ایسه ده اور فیه کلد کده مقدما دلگیر اولدینی ذاتلردن اخذنار  
داعیه سنه دوشمکله وجوه بلده کندوسندن متوحش اولدیغندن بدایت مأموریتدنبرو  
قیل و قال و معارضه و جدال اکسک اولیوب بو جهتله نظام مملکت مختل اولدیغنه  
و کندوسی ذاتاً اشقیا کروهندن بولندیغنه مبنی بر آرائق فرصتی دوشور یله رک  
ازاله مضرتی متصور اولدینی حالده بو کره بغداد والیسی علی پاشاعهدده سنه درعیه  
سر عسکر لکی توجیه اولندقدده اشبو تیمور پاشا دخی آنک معیتنه بالتعین بو ایشه بذل  
مقدور ایلر سه فیها واکر بو باده دخی اظهار رعونت ایلر سه همان اعدامی خصوصی  
علی پاشایه حواله بیورلمشیدی .

العید عشرتی محاربه سنده تیمورک انهمزاحی کندو حقنده متصور اولان معامله نک  
اجراسنه فرصت کافیه ایسه ده علی پاشا هنوز نائل اولدینی بغداد والیلکننده ثبات  
و استقراری اسبابنک استکمالیه معارض و رقیبیرینک دفع و ازاله سنه حصر نظر ایتمکده  
اولدیغندن کندویه معارض بیلدیکی شایوزادلردن جاسم بکک حامیسی اولان  
العید عشرتینک قهر و تنکیلی کندوسنک مطمح نظری اولدینی حالده بونلرله  
محاربه ده مغلوب اولان بر آدمک ازاله سنی تجویز ایده میه جکی درکار ایدی فقط  
بوراسی دولتک مرضیسنه مخالف اولدیغندن علی پاشا العید عشرتی اوزرینه  
حرکتی بعض تأویلات ایله در سعاده عرض و انهایه مجبور اولمشدر .

شویله که : تیمورک ازاله سی مراد ایسه و زرادن برینه محول اولمق لازم کلوب  
یوخسه افراد ناسک بوکا مداخله سی جائز اوله میه جفی بیانیه العید عشرتینک  
جسارتی تقبیح و اوزر لرینه حرکت ایده جکتی تلمیح ایتمشیدی .

علی پاشا ایسه درعیه سر عسکری اولوب همان و هابیلرک اوزرینه هجوم ایده جکنه  
انتظار اولنور ایکن بو امر اهی تأخیر ایله رقه طرفنده کی العید عشرتی اوزرینه  
حرکت ایده جکم دیمسنه در سعاده استغراب اولتمشیدی .

حالبوکه علی پاشا در عیبه قدر کیمکه مقتدر دکل ایدی فقط بوراسنی اولیای امورہ  
اکلادہ میوب عظم زادہ عبداللہ پاشا دخی کندوسنہ اورنک اولدیغندن چارہ سز  
مہما امکن بر نماشہ مجبور اولدینی جہتلہ بروجہ مشروح بغداددہ اختلال ظہور  
ایتمشکن خابور سفر نندن طوغری بغدادہ کیدہ میوب مشہد جہتہ عبور ایلہ عثمانلو  
و کرد و عرب طائفہ لرندن مرکب بر فرقہ ترتیب و فارس الجربا ایلہ جبل شمر  
اوزرینہ سوق و تسریب ایتمشیدی انجق و ہابی فرقہ لرینہ تصادف ایدہ میوب عودت  
ایتملایہ علی پاشا دخی اردو ایلہ حلہ یہ کلوب و عظم زادہ عبداللہ پاشایی اورادہ  
براقوب کندوسی اوائل رمضانہ بغدادہ کلشدہ .

دیار بکر والیسی محمد پاشانک اکثر اتباعی حمادن تلف اولوب کندوسی دخی آب  
و هوای امد ایلہ امتراج ایدہ مدیکندن دیگر بر ایالتہ تحویل مأموریتی استدعا ایتمکدہ  
اولدیغنے و تیمور پاشانک بروجہ مشروح العید محاربه سندہ انہزاجی اوزرینہ اورادہ  
بقاسی تجویز بیورلمدیغنے مبنی اوائل شعبانہ مأموریتی سیواس ایالتہ تحویل و سانی  
ولی الدین پاشا عہدہ سنہ دیار بکر ایالتی الحاقیلہ رقہ ایالتی توجیہ بیورلمشدر .

بوغائلہ لر آرہ سندہ ( زاد فی الطنبور نغمہ اخری ) فحواسنجہ بردہ چلدہر مسئلہ سی  
ظہور ایتمشدر . شویلہ کہ : سنہ سابقہ و قایعندہ بیان اولدینی اوزرہ جبراً  
اخسخنیہ دخول ایلہ چلدہر ایالتی ضبط ایتمش اولان شریف پاشا اوزرینہ اجارہ لی  
تمش زادہ سلیم بک تسلیط اولنہ رقہ اخسخندن قاجیرلمش و اولوقت سلیم بک دخی  
وزارتہ چلدہر ایالتی وعد ایدلمش ایدی . شریف پاشا دیار ایرانہ فرار ایلہ روان  
خانہ التجا ایدوب بر اراقینہ اخسخنیہ کلک اوزرہ فرصت کوزتمکدہ اولدینی  
بیانیلہ سبق ایدن وعدک انجازی استدعا سنہ دائر سلیم بکک درسعادتہ معروضاتی  
کلککلہ اشبو اون سکنز سنہ سی ربیع الآخرینک یکریمی التبعی کونی چلدہر ایالتی  
رتبہ وزارتہ سلیم بک عہدہ سنہ توجیہ اولتمشیدی روان خانی دخی شریف پاشانک  
عفوینہ دائر مقام صدارتہ بر قطعہ تحریرات کوندروب بوندہ ایسہ مخذور مطالعہ  
اولنہ رقہ لیت و لعل ایلہ امرار وقت اولتمقدہ ایکن روان خانی شریف پاشا معیتہ  
بر مقدار عسکر ترفیق ایلہ چلدہر ایالتہ کوندرمکلہ شریف پاشاینہ جبراً اخسخنیہ  
کیرمک اوزرہ اخسلکلک طوغری کلکدہ ایکن والی جدید سلیم پاشا قارشولیوب  
لدی المحاربه شریف پاشا منہزم اولمغلہ خائباً و خاسراً کلدیکی طرفہ عودت ایلمشدر .

\* بقیہ وقایع مصریہ \*

تفصیلات سابقہ دن مستبان اولدینی اوزرہ بوآنادہ دولت علیہ جہ اک مہم بر مادہ  
وہابیلرک تأدیسی مسئلہ سی اولدینی خالدہ عربستان حوالیسندہ طرف طرف غائلہ لر

پیدا و علی الخصوص مصرک اختلالی دوبالا اولغله وهاپیلر اوزرینه بر طرفدن حرکت تعرضیه اجرا اولنه مدیغندن بشقه مدینه منوره نك اسباب محافظه سی استکمال اولنه مدی .

زیرا حرمینه مهمات و ذخیره سوق وارسالی ایچون شاهراه انجق مصر الکاسی اولدیغندن اول امرده بورانك اصلاحی لازم ایدی . بوجهته برارالق اشقودره متصرفی ابراهیم پاشا ایله مصرک احواله دائر مخبره اولندقده عهده سنه مصر ایالتی توجیه بیورلدینی حالدده کیدوب نظامنه سعی وورزش ایده جکئی اظهار شوق وخواهش ایله انها ایتمش و مصره دائر تقدیم ایتدیکی لایحه سی باب عالیجه شایان قبول کورلمش ایدی .

و بو ائناده مصرده تغلب ایدن ارناودلرک مملکتلرینه عودت لری ایچون اشقودره متصرفی ابراهیم پاشا و سائر ارباب تعین طرفلرندن مصره آدملر ارسال و مخالفت ایتدکاری تقدیرده ارناودلقده کائن اولاد و عیال لری استیصال و مسکن و مأواری پایمال قلنه جنئی خبر لری کندولرینه تحریر و ایصال ایتدیرلمش ایسه ده بو تهیداتنك اصلاح حکم و تأثیری کوریه مامشدر .

چونکه امرای مصریه اسکی اصول اوزره مصرده متحکم اوله رق ارناود عسکرینک معاش و تعییناتی کندو طرفلرندن ویرلمک و علی پاشا ایکی اوج یوز آدمیله مصره کله رک اولکی مصر وایلری طرزنده رسما مقامنده اقامتله محمولاتدن عائد اوله جق حصه ایله کندوسنی اداره ایلمک اوزره علی پاشای مصره دعوت ایتمش ایدی .

علی پاشا ایسه استانبولده دولته سوز ویردیکی اوزره کوله منلرک مداخه سی اولمقسزین مستقلاً مصرده حکومت ایتک املنده اولوب قریب العهده بونجه امکلر صرفیه اله کچمش اولان خطه مصریه بی نه کوله منلرک نجه تغلبنه دوشورمک دخی باب عالی یه کران کلدیکندن ضیا پاشانک براق دینی حال اوزره مصرک ینه ترک عسکر یله اداره سی چاره سی آرانیوردی و بوکا میدانده مانع ارناودلر اولدیغندن بوجه مشروح اشقودره متصرفی ابراهیم پاشانک تهیدیه بونلرک روم ایلی جانبنه اعاده لری تدیر اولنمشیدی .

بو عسکر ایسه بالاده بیان اولدینی اوزره انواع طوائفدن مرکب و مخلوط برهیئت اولوب ایچلرنده اشقودره دن و کعه لغک سائر طرفلرندن و بلکه روم ایلینک هر طرفنده آدم وارا دیره ده چونغی اشقودره بی بیلمز و ارناودلرک اکثری طوسقه عسکری اولوب آنلر دخی کعه لغک بر قسمی اولان اشقودره متصرفی طایماز ایدی . بناءً علیه بو تدبیرک هیچ فائده سی کولممشدر .

وعساكر مرقومه برطاقم درتی مقوله سی باشی بوزوق و نامضبوط بر هیئت ایسه ده ابتدا کوله منلره وبعده یکچیر یلره قارشویک وجود اولوب اویله اوزاق بر محله همشهر بیلک غیرتی دخی اتفاق و اتحاد لرینه قوت ویره رک جمله سی جسم واحد کی متحد اولدقلری حالد محمدعلی بو هیئتی روحک تدبیر و تصرفی کبی اداره ایلردی و میدانده کورینسان بر چوق ارناود سر کرده لری بوجسمک الی وایاغی حکمنده اولغله مصرده بو هیئته عموماً ارناود نظریه باقلمقده اولوب حالبوکه محمد علینک کورر کوزی وایشیدر قولاغی سائر روم ایلیر وعلی الخصوص قیرجه لی طاقی ایدی و استانبولجه ایشک حقیقتی بیلنه میوبده ابراهیم پاشانک تهدیدیه عساكر مرقومه نک روم ایلیه اعاده سی تدبیر اولندیغنه محمدعلی بیق آلتدن کولردی .

وعلی پاشانک باب عالییه وارد اولان تحریراتنده ارناود لر بکاری آدم برینه قویمیوب امور مصره مستولی و بکلمر میانه ده الت ملاحظه بلکه تعیینات و علوفه لرینی اداره ایچون عمال و تحصیلدار صورتنده اولدقلری و ساده تدبیر ایله ضبط مملکت ممکن اولیوب قوه قاهره دولتته محتاج اولدیغی بیانیله برابر حیاتده اولدقجه اسکندریه نک محافظه سنه بذل جهد ایده جکی مندرج ایدی .

شوحاله نظراً مصره اوزرینه طرف دولت علیه دن ینه بر مکمل اردو سوقی لازم کلوب حالبوکه وهابی غائبه سنک دفعی اهم و اقدم اوله رق بوغائله مندفع اولدقجه مصرک اصلاحاتی ایچون لازم کلان تدارکات کلیه نک حیز فعه ایصالی مشکل ایدی . و ارناود لر ایله کوله منلر یکدیگره ضد ایکی فرقه متمایزه اولدقلرندن چوق کچموب میانه لرینه مبیانت دوشه رک ینه ایش حکومتک الیه کچر امیددی بادیء تسلیت اولدیغی حالدده بو ائشاده ارناود لر شیخ البلد ابراهیم بکک قوناغنه طوپلانوب تعیینات ایچون کورلدی ایتدکاری استماع اولمغله بو امید و تمنی قوت بولمش وعلی پاشا اسکندریه ده ثبات ایله ارناود لر ای کوله منلرک عالیهنه دوشورمنک چاره سنی جستجو ایدرک انجامکاره منتظر اولمش و کوله منلرک عفوی ایجاب حال و مصاحبتدن کوریلهرک عفو واطلاق لر ی فرمانی علی پاشایه و آنک طرفندن مصره کوندرلش ایدی .

بو فرمان اوائل شعبانده مصره ورود ایله علناً قرائت اولدقده کوله منلر ممنون و منشرح اوله رق تشکر نامه لر تحریر و تقدیم ایله صورت اخلاص و رضاجوییده علی پاشایی مصره دعوت ایتدیلر .

حالبوکه زیرده بیان اولنه جنی وجهله روم ایلیده کی طاغلو اشقیاسی مصالحتنه بر نتیجه حسنه ویریه میوب قوی الاقنادر بروزیرک مأموریتنه لزوم کورلدیکنه بناء اشقودره متصرفی ابراهیم پاشانک مصره مأموریتندن صرف نظر اولنه رق عهده سنه سر عسکرلک انضمامیه روم ایلی ایالتی توجیه اولمشدر .

باشاده درعیده بروقه غریبه ظهور ایشدر . شویله که : وهایلرک کوندن کونه  
ترقیء مکتت وسطوتی ورئیسلری اولان عبدالعزیزک تزايد صیت وشهرتی هر طرفه  
مورث خوف ودهشت وکربلا وقعسی جملهیه وبالخاصه شیعیلره باعث غیظ وغیرت  
اولدیغه مبنی وهایلردن اخذ انتقام آرزوسی جایکیرضامراً خاص و عام اولدیفنی حلد  
افغانی الاصل عثمان نامنده برفدایی درعیده واروب جامعهده نمازقیلار ایکن خنچر  
ایله عبد العزیزی اعدام ایلمش وآنک خدمه سی دخی عثمانی یاره لمش اولدقلری  
خبری کویت قصبه سندن بغداده واورادن استانبوله وارد اولان تحریر اتدن معلوم  
اولدقده بادئی انشراح خواطرا نام اولمش ایسه ده یرینه اوغلی سعود کچوب بروقدنبرو  
ذاتاً ایش آنک النده اولدیغندن پدرینک اعدامیله وهایلرک ترقیاتنه سکنه کما مشدر .  
بزینه صد دیمزه کله لم .

بالاده بیان اولدیفنی اوزره باشی بوزوق عسکرینک قوتیه کوله منار مصره کوروب  
متعاقباً علی پاشا اسکندریه به کله رک دولت علیه مصر اوزرینه قوه کله سوق ایدر  
و بلکه اجنیلری سزک اوزریکزه تسایط ایار دیو اخافه ایده کلوب ایکی بیکن  
متجاوز انکلیز عسکرینک قصیره کلدیکی حوادتی دخی خلال شعبانده مصرده شایع  
اوله رق قیل وقاله باعث اولمش ایدی .

علی پاشانک تهیدداتی امرای مصریه به تأثیر ایتیموب نهایت عفو واطلاقلری فرمائی  
دخی کوندریله رک مصرده برلشمشر ایدی .

فقط علی پاشا اسکندریه ده متحصن اولوب طور دجه مصرده استقلال اوزره حکومت  
قابل اولمیه جغندن علی پاشا خدمه مخصوصه سیله مصره کله رک ولات سابقه مثلوه  
قلعه ده او طور مق واسکندریه طرفی دخی اغیاردن خالی قالمق اوزره علی پاشائی  
مصره دعوتدن خالی اولمازلردی .

علی پاشا دخی محمد علی وارناود سر کرده لری و مشایخ عربان ایله محرمانه مخبره  
ایدرک انواع وعد ووعید ایله جمله سنی طرفه جلب واستمالیه ابته دار ایدوب  
سر کرده لر ایسه محمدعلینک معرفتیه بورازی کوله مناره کشف ایدرک برتقریبه  
علی پاشائی دامه دوشورماک اوزره بالاتفاق قرار ویردکن صکره ( سن بر مقدار  
کزیده عسکرله مصره عزیمت ایت شلقانه ورودکده برطرفدن سن وبرطرفدن  
بز کومناری اورتایه آلوب ایشارینی بتوره لم ) دیوجوابنامه ارسال ایله کرکی کبی  
اغفال ایتلمری اوزرینه علی پاشا دخی مصره کلک اوزره خیلجه عسکر ایله  
اسکندریه دن چیقدی بو عسکر یکیکجری وطوائف سائر ددن مرکب و مخلوط اولوب  
اکثری مصردن مطرود اولان پراکنده برغلبه لکن عبارت ایدی وبرلکده علی  
پاشانک احوال و اتقالی ایله محمول آلتش قدر کمی اولوب ایچارنده برخیلی عسکر دخی  
اولدیفنی حالد اردوسی ایله برابر نهرأ مصره طوغری کلکده ایدی .



غرّه شوالده علی پاشا شلقانه و رودنده متریس آلوب و عسکرینی طابور طابور  
ترتیب و هر طابوره بر بیکباشی نصب و تعیین ایله تعبیه ایدوب کیملرینی دخی  
اردوسنک حذاسنه کتوردی .

ابراهیم بك ایله بر دیسیدن بشقه بالجمله امرای مصریه استقباله کیدوب شبره ده کی  
اردوگاهلرینه وارمشلر و محمد علی دخی ارناود و سائر سرکرده لر ایله چیقوب فقط  
قوناقلرنده بر مقدار عسکر بر اقمشلر ایدی .

شوالک بشنده هپ ارناودلرک اردویه چقمسی امر اولوب فرداسی بر دیسی دخی  
چقیدی و الحاصل ابراهیم بکدن ماعدا بالجمله امرای و سرکرده لر چقمشلر ایدی .  
کوله منلرک اردوسی جبل طرفنه طوغری متمد اولوب محمد علی دخی اردوسی  
نهر نیل کنارینه قورمشیدی امرانک قوه نهریه سی بغته علی پاشانک کیملرینی  
احاطه و اوزرلرینه طوب و تفنک دانه لری یاغدره رق ایچارنده کی عساکرک چوغنی  
تلف ایتدکن صکره کیملری اخذ و تسخیر ایله جیزیه طوغری چکوب کتوردکلری  
اثناده کوله منلر علی پاشانک اردوسی احاطه ایله ( بوغلبه لک ندر بو قدر جمعیت ایله  
کلك مساله ایشی دکلدر و الیلر از قدیم اتباع و خدمه خاصه سیله کلور بز سکا بونی  
اسکندر یه ده ایکن اشعار ایتمشیدک ) دیدکلرنده علی پاشا ( بو عسکر شریف پاشایه  
اعانه ایچون حجازه کیده چکلدر و بز قلعه ده استقرار ایتدی کمزده آنلرک علوفولرینی  
ویروب کوندره چکلر ) دیسی اوزرینه ( قلعه یی فرانسزلر خراب ایتدی سنرک  
اسکانکزه الویرمز سنرک ایچون قصر عینی حاضرلندی . فقط بو عسکر سنرکله برابر  
کیرمسون آنلر آریلوب برکة الحاجه کیتسونلر بز آنلرک لوازماتی تدارک ایله کوندریز  
بوده سزدن خوف و احترازه مبنی بر کیفیت دکلدر لکن مملکتده قحط و غلاوار  
عثمانلی عسکرینک دخی حالی معلومدر ارناودلرله اویوشه مازلر آرده بر فئالق اولور )  
دیملریله پاشا ( اویله ایسه بن اسکندر یه عودت ایده یم ) دیچک ( یوق بو اوله ماز  
و عودت ایده چک اولورسک صوکی فنا اولور ) دیدیلر .

بو وجهه مخبره متمد اولوب نهایت کوله منلر پاشانک اردوسی احاطه ایتلریله پاشا  
دخی مدافعه ایچون عسکرینه امر ایتدکه ( بزم کیمی ارقداشلر من اسیر اولدی  
و بز علوفه آلمدق بو حال اوزره امرای مصریه ایله جنک ایده میز ) دیو جواب  
ویرملری اوزرینه علی پاشا ناچار خدمه خاصه سیله بنوب امرانک اردوسنه ورود  
ایله کندوسنی آنلره تسلیم ایلدی و کندوسندن آیریلان ایکی بیک بشیوز قدر  
عسکرک یا نلرینه بر مقدار کوله من سوارسی ترفیق ایله بلیس جاننه کوندرلدی .  
علی پاشا بر قاج کون بردریسینک چادرنده او طوروب حقدنه هر درلو لوازم اعزاز

واکرام اجرا اولنوردی لکن نه بردیسی کندوسنه کورندی ونده ابراهیم بک  
ایله کوریشه بیلدی .

علی پاشا محمد علی نی جاب ایله کوله منلری طوزاغه دوشورمک قیدنده ایکن کندوسی  
دام بلایه طوتلمش اولدیغنی اکلا دیسه ده نه چاره ایش ایشدن کچمشیدی معافیله  
امرای مصریه ایله حقوق قدیمه سندن وعلی الخصوص متوفی مراد بکله یک نخت  
ویکوجود اولدیغندن بجه کندولرندن کورمش اولدیغنی مهمانوازلغه مقابله  
بوکره عفو واطلاقلری خصوصه سنی ایش اولدیغنی بیان ایش کی مقدمه لر  
سرد ایدرک امرای اغفال ایله برابر آنلرک خلا فیکرانسندن اولوب قناده بولنان  
وحسن بک کوله لرندن اولان عثمان بک امارت مصری وعد ایله سر یعاً کلوب  
امدادینه یتشمسی ایچون برحمان ایله خفیه مکتوب ارسال ایشیدی حمان ایسه  
یولده طوتلوب مکتوب مذکور امرای مصریه یدینه کچمکله بونی آوب پاشانک  
حضورینه کتوره رک ( بزرگه باریشمش ایدک سز ایسه جانب قبایده خلا فیکر من  
اولان بکلر ایله مخا بره ایدیورسکیز ) دیدکلر نده ( خیر اول طرفه هیچ مخا بره م  
یوقدر ) دیو جواب ویریحک مکتوبی ابراز ایشلریله ( اوت بونی بن اسکندر یه ده  
ایکن یازمشیدم ) دیسی اوزرینه ( بونی دونکی کون قره قولار طوتدی تاریخی  
دخی یکیدر ) دیدکلری کی پاشا فکره واروب مبهوت اولمغین ( بیورک ) دیدیلر  
( زویه ) دیدی ( غزه یه ) دیدیلر وهمان بر مقدار کوله من سوارسی ایله آنی دخی  
بلیس طرفه کوندر دیلر .

اراضی قرینه واروب نزول ایشکلر نده کوله منلر بقته علی پاشا ایله اتباعی اوزرینه  
هجوم ایدرک کندوسنی وهمشیره زاده سی علی بکی وکتخدا سنی واتباعنک اکثری  
اعدام ایش اولدقلری حالده مصر ده کویا که علی پاشا مقدا اول طرفه کوندرلش  
اولان عسکرینه تقرب ایشدی کی یاننده کی کوله منلر ایله جنک ایش نیتده اولدیغنی  
تحقیق اولمغله آنلر اولجه طاورانوب میانه ده وقوع بولان عربده ده پاشا مجروح  
ومقتول اولمش دیو اعلان ایشدی علی پاشانک زوالندن کوله منلر ممنون اولدیغنی  
کی اسکندر یه ده ایشدی کی ظم و تعدیسی یاد ایله مصر اهالیسی دخی وفاتندن  
ممنون دلشاد اولمشلر ایدی .

اواخر شوالده علی پاشایه خطا با در سعادتدن مصره وارد اولان امر عالیده  
وهابیلرله محاربه ایچون مصر دن جانب حجازه درت بیک عسکرله اوتوز بیک اردب  
ذخیره کوندرلسی اراده و اشعار و بغداد طریقله دخی عسکر کوندر یله چکی و جزار  
پاشانک دخی وهابیلر اوزرینه مأمور اولدیغنی حکایه و اخبار بیورلشیدی .

بو امر عالی دیوان مصرده قرائت اولندیسهده بر منوال سابق مخاطبی اولان علی پاشا مقتول اولوب مصرک حالی ایسه پریشان ایدی . حتی بر آ قافله حاجک ارسالنه امکان اولمدیغندن محمل مصرک سویس طریقیله بحر آ ارسالنه قرار ویرلش و کیده جک حجاجه کیفیت اخبار و اعلان ایدلمش ایدی .

جزار پاشا دخی بو اوآنده خسته اولوب رکوب و نزوله اقتداری قالدیغندن و هابیلر اوزرینه حرکت شویله طورسون قافله حاج ایله کیده میوب کوله سی سلیمان پاشایی امیرالحاج نصب و ارسال ایتمشیدی .

در تیوز قدر ارناود عسکر یله قاعه محافظه سنده بولنان حسین قپتان غره ذی القعدده قلعهدن ایندیریلوب بولاقده اسکان اولنغله قاعه بتون بتون امرای مصریه یدنده قاهره بر قاتدها کندولرینه امنیت کلدی . واکرچه مصرده روم ایلی عسکری انره مقابل بر عظیم قوت ایدیسهده بر دینیک محمد علی به امنیت کامله سی اولدینی و مصره دخولاری بو عسکر سایه سنده ایدوکی جهتلرله بو عسکری کندو قوه عسکر یه لرندن معدود بیلور لر ایدی . بنساء علیه امرای مصریه کمال فراغ بال ایله یاییلوب جلب منافع و ادخار امواله اشتغال ایتشلر ایدی .

ایشته حال بو منوال اوزره جاری ایکن بیوک الفی دیدکری الفی محمد بک انکلتره دن عودت ایله مصره کلک اوزره اولدینی خبری آلدی . حالبوکه امرای مصریه نک همان نصفی آنک ممالکندن بولدینی جهتله مصره و رودنده بالطبع نفوذجه سائره غلبه و بر دینی یه دخی تقدم ایده جکی درکار اولمسیله امرای مصریه نک چونغی و علی الخصوص بر دینی آنک کلینشدن محظوظ اولیوب ظاهرده کله جکی خبری اوزرینه اظهار بشاشت و انبساط ایتلریله برابر کرک کندوسنک و کرک اکا منسوب اولان امرانک اعدام و ازاله لرینی تصمیم و اجرا آت متفرعه سنی ترتیب ایلدیلر . شویله : بیوک الفینک اک ایلرو کلان ممالکندن کوچک الفی بک ایله بر لکده استقباله کیتمک اوزره کیجه دن چیقماق اوزره بر دینی منسوب اتندن اولان بر چوق کوله منسلر خارج بلدهده چادر لر قوروب و مشعله لر یاقوب حاضر اندقبری حالد کذلک بیوک الفینک خواص منسوب اتندن وشاش دیو معروف اولان حسین بکی دعوت ایتلری اوزرینه اودخی بر چوق کوله لر یله حاضر اولدقده سن نه طوره یورسین قرداشکنز بیوک الفی کلیور آنک استقباله کیده یورز دیملریله اودخی بو تدارکاتی کورینجک صحیحاً استقباله کیده جکلر ظن ایدوب و حقنده خیانت ایده جکلری اصلا خاطرینه کلیوب همان آتلرینی کتورمک اوزره معیتده کی کوله لرینه امر و یردی آنلر دخی آتلری کتورمکه کیدوبده کندو سی یالکنز قالدینی کبی اوزرینه اوشوتی ایدرک مومی الیهی اعدام و کیفیت بر دینی یه اخبار و اعلام ایلدیلر .

محمد علی ایله سائر سر کرده لری ایسه کیجه لین جیزه نك جانب قبلینه گذار و کوله منلر آره سنده برقان دوشمکه انتظار ایله کیزلنوب اشارته مترقب اولدقلرندن بوخبر کندولرینه اصل اولدینی کبی در حال کوچک الفی بکک قصرنی حصر و احاطه ایتدیلر . الفی بک واقع خالدن خبردار اولدینی کبی فرار ایتمکه محمد علینک طاقی آنک اموال و اشیا سفی غارت ایتدکن صکره اکا متعلق اولنلرک خانه لرینه کیدوب یغما ایله مشغول اولدیلر اهالیء مصر بو وقعه دن متوحش و متفکر و حقیقت حالی بیلمدکلرندن متحیر و فرداسی کیمسه دکاتی آچیبون انجا مکاره منظر اولدی . ابراهیم بک دخی قوناغده اقامت ایله هرشیدن متعافل و محمل حاجی سویش طریقیه کوتور مکه مأمور اولان محمود چاوشی جلب ایدرک صره حسابیه مشغول اولوب کلنلره نه خبر دیو متجاهلانه استفسار حال ایلردی .

بیوک الفی بکک احواله کلنجه : آنک رشیده وصولنده بر فرصتی دوشوریلره رک اعدامی خصوصی بر دینک ممالکندن اولوب رشید متصرفی بولنان یحیی بکه بردیسی طرفندن تحریر اولنشدی الفی ایسه رشیده وصولنده انکلیز قونسولوسنه مسافر اولوب قونسولوس طرفندن کندوسنه انکلیز کاری بر قایق اهدا اولنغله اکا راکباً جانب مصره عزیمت ایتشیدی . وچوک الفی بک آنک کوله لرندن اولنغله اقدیمی ایچون مصرده قنجه تعیر اولنور بر صندال تهیه وارسال ایدوب آنکله برابر الفینک اصدقا سندن بعض ذوات دخی کیتمش ایدی . اثنای راهده بیوک الفی ایله کوریشوب بر لکده منوقه ورودلرنده الفی چیقوب براز آرامدن صکره بنوب ظهیره کلدکلر نده بر مقدار ارناود عسکری کلوب قونسولوسک الفی یه اهدا ایلمش اولدینی قایغه دخول ایله ایچنده کی اموال و اشیا یی یغما یه قویولدیلر . الفی بو حالی کوروب فکر و اشتباهه دوشمکه همان قنجه یه بنوب سرعت ایله فراره یوزطوتدی و سائر قایقلری کیروده بر اقلغه عسکرک بونلری یغما ایله مشغول اولدینی کوروب صیقی کورک چکدیره رک فراره سرعت و استعجال ایلردی ایشته بو ائنده بردیسی طرفندن الفینک اخذ و اعدا منه مأمور اولان ایچی کبی دخی نهرا یوقارودن اشاغه طوغری کیدرکن ایلروده کی غلبه لکه حصر نظر ایدوب کیتدکلری جهته الفینک قنجه سنی کورمدیلر و کورن اولدیسده الفی اولق احتمالی خاطره کتورمدیلر الفی ایسه چاله کورک یوقارویه طوغری خلیجه مسافه قطع ایدوب اثنای راهده کندویه منسوب اولان کاشفلردن برینک آدمنه راست کله رک مصرده کی وقوعاتدن خبردار اولدینی کبی همان یاننده کی آدملریله شبره ده قره یه چیقوب سیر سریع ایله قرنقیل ناحیه سنه بالوصول بر عرب خاتوننه دخیل دوشه رک آنک یاننده اختفا

ایلدی بواننده بردیمی ایله محمد علینک عسکری هر طرفه منتشر اولوب الفی بی اولقدر تجسس ایدرلردی که قوش اولسه اوچامازدی والفینک دخیل دوشدیکی عرب قبیله سنه کلوب اوراسنی دخی تحری ایدرلردی لکن جناب حقک خلاص ایده جکنی طوتمق قابل اولدیغندن بر بیکس خاتونک یاننده مخفی قالب بوله مدیلر والفی بک اول خاتونک تدارک ایتدیکی بر آته سوار اوله رق اورادن ایکی هیجان ایله بر لکده چیقوب کوله لری دخی آرقه سننده یورو یه رک خانکه جوارینه اصل اولدقلرنده بر عرب طائفه سی بالتصادف آنی احاطه ایتلریه کوله لری آنلره غوغایه کیرشمکین الفی آنلری براقه رق یالکز جه جبل ناحیه سنه فرار ایدوب کیدرکن بردیمی اول جوارده بولوب کوله لرله عربانک محاربه سنده آتیلان تفنک سسلرینی استماع ایدیجک سرعت ایله معرکه کاهه واردقده الفی بی بوله مدیغندن لدی السؤال بوراده ایدی شمدی بزدن آیرلدی دیملری اوزرینه بردیمی معیتنده کی کوله من و عربان عسکرینی طاغیدوب الفی بی زرده بولور ایسه کز بلا سؤال اعدام ایدیکنز دیو امر ویرمکله طاقم طاقم طاغیلوب تحری و تجسس اقدام ایتدیله بریسی راست کله میوب فقط عرب مشایخندن سعد ابراهیمک طاقمی دیگر لرینک بیلمدیکی بر یولدن کیدرک الفی بی تصادف ایتدکده یاننده کی کورک والبسه و آلتون و مجوهراتی بر بر آرقه سنه آتدقجه معقبیلر آنلرک یغما سیله مشغول اولدقلرندن بوضره ده الفی غیبوت ایدوب قورتلمشدر .

الفی بک بر منوال سابق قنجه یه بنوبده فرار ایتدکده کیلرده کی اشیا سنی عسکر یغما ایتلریله انکلاتره قرال و کبراسنک الفی بی بر کذار اوله رق ویرمش اولدقلری والفینک دخی اشترایلمش اولدینی بک چوق نادیده تحف و تفاریق هپ عسکر کچدی قرالک کندویه اهدا ایلمش اولدینی مرصع تصویری دخی بو یادکارلر ایچنده ایدی عسکری طائفه سی بومثللو شیلرک قدر و قیمتتی بیلمدکلرندن او جوز بها ایله چارشوده ساتیاغه چیقاردیلر اکثریسی بردیمی اشترایلمشدر .

الفینک بو وجهله فرار ایتیمی اوزرینه صعید ایچنه طوغری چیقوبده کوله منلرک اصول قدیمه لری و جهله اول طرفده باشنه تجمع ایده جک طرفدارانی ایله بالاتحاد بر هیئت عصیانیه تشکیل ایلمی ملحوظ اولدیغندن ابراهیم بک و بردیمی طرفلرندن جرجه متصرفی سلیمان بک ایله قسا متصرفی عثمان بکه تحریرات کوندریله رک بیوک و کچوک الفی بکلر اولطرفلره کلورلر ایسه قهر و تنکیللری خصوصنی مؤکداً اشعار و تنیه ایلدیله و فراریلری تجسس و کرفت ایچون کوله من عسکرینی طاقم طاقم اطرافه طاغندیله .

چوك الفی ایسه جانب قبله به کیدوب اولطرفده اهالی اوزرینه آغری ویرکولر طرح ایله ایفاده اختیار تراخی ایدن قرایی نهب واحراق ایتمکده اولدیغندن هان آنک اوزرینه مصردن بر فرقه عسکریه ترتیب وار سال اولتمق اوزره تدارکاته مبادرت اولندی . انکلیز قونسلسوسی بو وقوعا تندن منفعل اوله رق بن بویه مملکتده اوتوروم دیو ذی القعدة نك اون اوچنجی جمعه ایرتسی کونی مصردن چیقوب کیتدی بلده نك اختلال احوالنه نظراً فرانسه قونسلسوسی دخی کیده جک اولدیه ده امراء مصریه آنی منع ایله آلیقویدیلر .<sup>۴۰</sup>

الفی بکلرک تجریسی ایچون کوله من عسکرلی اطرافه طاغیلوب امرانک مصرده قوتلری آزالدیغندن انظار عسکریه ده مهابتلری قالدی . وقاعه ده وبرجلرده کی طوپیجی ومستحفظلر اگرچه بردیسینک خدمتده ایسه لرده هپ روم ایلیلی اولدقلرندن بونلر دخی معنی محمد علی به مربوط ایدیلر و بردیسی محمد علی ایله قرداش اوله رق هر وقت آنی برآلت کی قوللانه بیلور زعمنده اولوب حالبوکه کندوسی محمد علینک اغراضنه خدمت ایتمکده اولدیغندن غافل ایدی .

بناءً علیه ذی القعدة نك یکریمی ایکنجی کونی ارناودلر علوفه مطالبه سننده اصرار ایتملری اوزرینه محمد علی آریه کیروب امرا ایله مذاکره ایدرک اوچ کونه قدر علوفه لرك اعطاسی وعدیله عربده برطرف اولدی اوچ کون مرورنده طوائف عسکریه محمد علینک قوناغنه طوپلانوب کورلدی ایتدکارنده بعض محللاردن حواله لر کوستریله رك یته غوغا باصلدی فرداسی اشبو علوفه بمجندن طولای عسکر ایچنده اختلال ظهور ایله قلعه نی آلمق ایستیوب موفق اوله مدیلر ایسه ده اهالی تلاشه دوشه رك دکانلر قباندی و درون مصرده غلغله پیدا اولدی فقط محمد علی بنوب خاقه امن وامان دیو دلالار ندا ایتدیردی .

بونک اوزرینه بکلر املاک اوزره بر ویرکو طرح ایدوب نصفی املاک صاحب لردن و نصف دیکری مستأجر لردن آلتق اوزره هان تحصیلنه مبادرت ایتدکارنده اهالی فریاده باشلادی وبتون قادینلر زقاقلره دوکیلوب امرایه وعلی الخصوص بردیسی به سب ولعت ایدر اولدیلر بو عربده آره سننده عسکریدن برطاقی ناس ایچنده کزه رك بز سزکله برابرز سز فقرا ورعیه سکر بزده عسکرز بو ویرکویه بزده رضامن یوقدر بزم علوفه لرمن میری اوزرنده در سزده بر آلاجغمز یوقدر دیرلر واهالی ایله مخلوطاً کز لرل ایدی . ایشته بو آرده محمد علینک کتخداسی جامع ازهره کلوب او دخی بو مآلده سوزلر ایراد ایله خلقه تسلیت و بوسیاق اوزره دلالار ندا ایتدیره رك عامه به امنیت ویرمکله در حال عامه ناس

امرادن روگردان اولوب مقدم و مؤخر ارناودلر آره صره شونك بونك باشلردن  
 صارق و كلاه لرینی قامقده و بعضاً راست كلدكلری ذواتك جبراً آچق لرینی آلمقده  
 اولدقلى حالد بچاره اهالى بونلری اونوتدی و در حال طرف عسكری یه میل  
 و محبت ایتدی بومثلو وقع لر ایسه هپ محمد علینك دسیسه لری ایدی .  
 چونكه تاریخ جبریده اشعار و سیاق و سباق و قایعدن استدلال و استشعار اولندیغنه  
 كوره محمد علی چوقدنبرو بالاستقلال مصرده والی اولینی ذهنده قرارلشدیرمش  
 ایدی . آنجق مقتول طاهر پاشا کبی بردنبره کندوسنی اورتایه آتوبده صوکنده  
 بلایه اوغراماق ایچون اولجه مشکلات ملحوظه یی برر دفع و رفع ایله صید  
 املنك مقتضای حال و مصالحت اوله رق طبعیتیه کندو ایاغنه کلسنی ایستردی  
 و بونیت مضمهره سنی مکتوم طوته رق بو یولده غایت احتیاطکارانه و دور اندیشانه  
 حرکت ایدردی بناءً علیه ابتدا عسكری خسرو پاشا علیه تحریك ایدوب طاهر  
 پاشا قوتیه آنی مصردن چیقارتدی بعده یکچر یلر واسطه سیله طاهر پاشانك  
 اعدامی اوزرینه احمد پاشا میدانه چیققدقه کوردی که یکچر یلرک قوتی کولکشورسه  
 کندو طاقی مصرده استقرار ایده میه جکدر . امرای مصر یه یی جلبله یکچر یلرک  
 قوتی کسر ایتدی واحد پاشایی مصردن چیقارتدی و کندو پولتیقه سنه مضر  
 کوردیکی دفتدار و کتخدایی اعدام ایتدیردی و خسرو پاشا دمیاطده تحفظ ایله  
 مصره برکوز طاعی اولدیغندن کدلك کوله منارله بالانفاق دمیاط اوزرینه حرکت  
 ایله آنی طوتدیروب مصرده توقیف ایتدیردی کبی متعاقباً مصر والیسی اولان  
 طرابلسلی علی پاشایی دخی اغفال ایله اسکندریه دن مصره کتوردهرک قضایه  
 اوغراتدی و اولوقت کوله منارک قوتی مجتمع و قلعه و قپولر هپ الارنده اولدیغندن  
 احوال آتیه لرینی تأمین ایچون محمد علینك قوتی تفریق ایدرک هیئت مجموعه سیله  
 مصره دخوانی تجویز ایتملری مقتضای حال و مصالحلردن ایکن محمد علی بردیسی به  
 مخلص و متخصص کینوب اودخی محمد علینك طاقنی کندو خده مخصوصه لری  
 حکمنه قومشیدی چونكه محمد علی ابتدا ابراهیم بکه صوقلوب آنکله کرم الفت  
 اولمش ایسه ده ابراهیم بکک غایت محترز و احتیاطکار اولدیغنی کوره رک آنکله  
 برایش بجر میه جکنی اکلادیغندن بردیسی به یناشوب و آنکله قرداش اوله رق  
 کویا کندوسنی عسكریله برابر آنک معینه و یرمش کبی کورینوب بردیسی دخی  
 آنک دسیسه لرینه آلدانه رق و آنی کندوسنه محب صادق و یار موافق بیلهرک کندو  
 آرقداشلردن زیاده آکا امنیت ایلردی و کندوسنه رقب بیلدیکی الفینك علیه نده  
 دخی محمد علینك عسكرینی قوه الظهر اتخاذا یتشیدی محمد علی ایسه هم عسكرینی

نچه ضبطنده طومتغه مدار اولمق اوزره بومثللو وقوعات آره سنده یغما کرک ايله  
 آنره براز مال قز اندرمق وهمده کوله منلری برینه قیردیره رق ضعیف دوشورمک  
 ایچون غایت اینجه وطولایلی پولتبقه لر قوللانوردی و بویولده اولان تدابیر  
 و مساعیسی مشر و مفید اولمشیدی که بر وجه مشروح بیوک الفی فرار ايله زره  
 کیتدیکی معلوم اولدیغندن بردیسی آنی تجسس و تحری ایچون بتون کوله من  
 عساکرینی اطراف واکنافه طاغندی بونک اوزرینه عسکر علفه طلبنده اصرار  
 ایدیحک امرای مصریه دفع غائله ایچون بر آغمر ویرکو طرحنه ابتسار ایدوب  
 بو ایسه ال آلتده مجرد بردیسی به حمل ايله خلق فریاده باشلایحق عسکری  
 طائفه سی اهالی به طرفدارلق یوزنده کورنمکله اهالی عسکره میل ایدرک امرایه  
 و باخلاصه بردیسی به سب و لغت ایتکه باشلادیلر بردیسی دخی خلقک بو طورینه  
 کوجنوب مصر دن خروج ايله اسکی مصره طوغری کیدرکن علنا اهالیء مصره  
 لغت ایلردی و باق آنره بن نه یارم برسنه لک ویرکو اعطاسنه راضی اولدیلر بنده  
 آنردن اوچ سنه لک ویرکوی دفعه آلهیم دیو سویلردی .

ایشته بونک اوزرینه ابراهیم بک ايله بردیسی الفی تحری ایچون اطرافه متفرق  
 اولان کوله منلرک مصره گلری ایچون سریعاً خبر کوندردیلر و صید ورشید  
 و دیماط متصرفلرینک دخی باجله کشف و عسکر لریه مصره گلرینی امرایتدیلر .  
 محمد علی ایسه آنلرک بوتشباتندن اگاه اولیجق تدابیر لازمه به مسارعت ایلدی .  
 شویله که : ذی القعدة نك یکر می سکننجی بازار کونی همان وقت عصرده عسکری  
 طائفه سی اوزبکیه ده اجتماع ايله برطاقی ابراهیم بکک و برطاقی بردیسینک قوناقلرینی  
 احاطه ایتدیلر و دیگر برطاقم فرقه لر دخی سائر امرای و کاشفرلرک قوناقلرینی  
 محاصره به کیتدیلر .

قلعه ده و برجلرده طویجی و مستحفظ بولنان عسکرا کرچه بردیسی طرفندن موظف  
 ایدیلر و بردیسینک قوناغنده دخی خدمه خاصه سندن اولمق اوزره برچوق ارناودلر  
 وار ایدی انجق بونلر هب روم ایلی خلقی اولمق حسیه به معنی محمد علینک آدملری  
 ایدی بناء علیه بردیسی قلعه و برجلر و قره غولخانه لر هب کندو ضبطنده ظن ایدوب  
 حالبوکه مصرک مقالیدی و بلکه کندو قوناغنک مداخل و مخارجی حقیقت حالده  
 هب محمد علی یدینه کچمش اولدیغنی درک و تفتن ایده مامشیدی بو کره اخشام اوستی  
 خانه سنک محاصره اولندیغنی کوریحک یانسنده بولنان کوله منلره سز اوتوریکز بن  
 چیقوب بو ایشه بر تدبیر ایدهیم دیهرک طیشارویه چیقدیغنده هر طرفدن اوزرینه  
 تفنک آتلغه باشلایحق ناچار یاننده کی خدمه مخصوصه سیله اسکی مصر طرفنه  
 فرار ایلدی .



عسکر ایسه قوناغک آرقه طرفدن دیواری دلوب ایچریه داخل اوله رق کوله منلرک اوزرینه هجوم ایتدکر نده بر دیسینک خدمتمده وقوناغک محافظه سنده بولنان ارن اولدر دخی آنرله برلشه رک قوناغی یغما ایلدیلر و اوکیجه کوله منلردن بر خلیسنی اخذ و گرفت ایله اموال و اشیا لرینی نهب و غارت ایتدیلر .

شوحالده حکومت مصریه بتون بتون محمد علینک انه کچمش دیمک اولدیه سه ده کندوسی دولتجه ذی رتبه اولدیغی جهته له والی مقامنه کچسه کندوسنه غاصب و عاصی نظریله باقیله جغندن و کندوسی ایسه صورت مشروعه ده بومه قامه کچوبده نابت و مستقر اولوق سودا سنده بولندیغندن اسکندریه محافظی خورشید احمد پاشایی مصره دعوت ایتمش ایدی و اشبو بازار ایرتسی کیجه سی ساعت یدیده محکمه یه بر مقدار عسکر کوندر و بر کویا مصر ایالتنک خورشید پاشا عهد سنه توجیه بیورلمش اولدیغنه دائر امر عالی گلش اولدیغی بیانیله قرائت اولتوق اوزره ملا افندی نک صباحلین مشایخی جلب ایلمسینی امر ایلدی ملا افندی صباحلین مشایخی دعوت ایتدکده هنوز فتنه و اختلال باقی ایکن جمعیت جائز اولمز دیو جواب و یرملری اوزرینه خورشید پاشانک والی اولدیغی بیان و بین الناس کیفیت بو وجهله اعلان اولندی . و اول کیجه ابراهیم بک قوناغنده محصور اوله رق عسکر ایله محاربه و مدافعه ایتمش ایسه ده بر دیسینک فرار ایلمش اولدیغی خبرینی آلدیغی کبی اودخی طوره میوب همان صباحلین خانه سنندن خروج ایله فرار ایلمش و حین فرارده هر طرفدن اوزرینه قورشون یاغدی رملغه خارج مصره چیقنجه دک معیتنده کی کوله منلردن پک چوغنی اوریلوب کیمی مقتول و کیمی مجروح اولمشدر .

اماقعه ده کی کوله منلر وقت نضایه دک طیبانوب عسکرک اوز بکیده کی قوناقلری اوزرینه طوب آتمش ایسه ده بر دیسی ایله ابراهیم بکک فرار لرینی خبر آلدقلری کبی آنر دخی قاعه دن چیقوب ابراهیم بکه پیرو اولدیلر و محمد علینک عسکری کوله منلرک بالمله اموال و اشیا سنی یغما ایله مشغول اولدیغی ائنده کوله منلر قاچوب جانلرینی قورتاره بیلدیلر .

و اولوجهله قاعه خالی قالیق محمد علی قاعه یه چیقوب خسرو پاشایی یانه آله رق اوکرنده دلال خلقه امان ایله ندا ایدر اولدیغی حالده قوناغنه کلدی . و خسرو پاشانک ولایته عودت ایلدیکی بین الناس اشاعه اولندی .

و مشایخ و اعیان بلده محمد علینک قوناغنه کلوب خسرو پاشایه ولایتی تبریک ایلدیلر . خسرو پاشانک مدت حبس و توقیفی تمام سکنز آیی اولوب بو وجهله حبس دن خلاص بولدیغنه متشکر اولدیغی حالده صحیحاً مصر و ایلیکنه عودت ایتدی ظنیه اولقدر

نمنون اولديکه محمد علی به نصل رعایت واکرام ایده جگنی بیلزدی محمد علینک قونانی خراب اولدیغندن درحال معمارانی جالبه تعمیرینی امر ایلدی محمد علی ایسه آنک مصرده اقباسی نیتده اولمیوب فقط لمصلحه آنی استصحاب ایله خلقه ابراز ایلمشیدی. یوخسه محمد علینک قوه الظهری مقتول طاهر پاشانک برادرلری و آنره منسوب اولان سرکرده لر اولوب بونلرایسه خسرو پاشایه ضد و مخالف اولدیغندن آنی ابقا ایسه ارناودلر کندوسندن روگردان اولق لازم کلوردی. قالدی که محمد علی به مصر و ایلمکی توجه ایدنجه دک مصرده اسایشک استقراری آنک پولتیقه سنه میان ایدی. و بو قدر وقوعات متسلسله ایله مصری قبضه تصرفه آلمشکن مقدماً معیتده بولندینی بروزیرکینه معیتنه کیروبده مصری اکا تسلیم ایتمی امر بعید ایدی لکن خسرو پاشا هنوز آنک منوی ضمیرینه واقف اوله ماش اولدینی بو طورندن اکلاشیلور.

حالبوکه: ذی الحجه نك ایکنجی چهارشنبه کیجه سی خسرو پاشا بولاقه ایندی ربه رک بحریه جهتته ارسال اولندی ایشته اولوقت مصلحتک رنگنی اکلامش اولمی ملحوظدر. خسرو پاشانک بودفعه کی برقاچ کونلک حکومتی طاهر پاشانک اعدامنده جده والیسی احمد پاشانک حکومته شبیه بر حکومت کاذبه در.

اتفاقات غریبه دندرکه طاهر پاشا خسرو پاشانی مصردن قاچردقده یکریمی ایکی کون بر حیات اولدینی کبی امرای مصریه دخی بو کره الفی حقدنه وجه مشروح اوزره معامله ایتدکن صکره کذلک مصرده یکریمی ایکی کون قالوب بعده باشلرینه بولیه کلشدر.

امرای مصریه بروجه مشروح عربان و پریشان اوله رق مصردن چیقوب اول کیجه بستانلر ایچنده اجتماع ایدرک فرداسی حلوان طرفته کیتدیلر و آنلرک حالی بوشکله کیردکده الفی محمد بک دخی بلیس طرفنده کوشه اختفادن چیقدی و طرفنداری اولنلر کندوسنه آت والبسه و سائره کوتوروب دائره سنی مهما ممکن تنظیم ایتدیلر. ذی الحجه نك طقوزنده اسکندریه محافظی خورشید پاشا کلوب آلائی ایله مصره دخول و کندوسی ایچون تهیه اولنان قوناغه نزول ایلدی.

امرای مصریه بوآرده اجتماع ایدوب یانلرینه بر مقصدار عربان دخی آله رق مصر اوزرینه کلش اولدقلرندن ذی الحجه نك یکریمی ایکسینده محمد علینک عسکری برغربی به کچوب متریس آلدیلر و چند روز محاربه تمتد اولوب طرفیندن خیلی و فیات وقوع بولدیسه ده کوله منار متریسله کیره مدکلرندن نهایت صاوشوب کیتمشلردر. مصرک وقایع مشروحه سی اوزرینه استانبولجه اتخاژ اولنان تدابیره کانه بر منوال سابق علی پاشانک اعدامی خبری در سعاده واصل اولیجق مصر ایالتی جزار احمد

پاشایه توجیه بیورلمشیدی . جزار پاشا ایسه بوخلالده نامزاج اوله رق سفر آخرته متهیی عزیمت اولغله یرندن حرکت ایده میه جکی معلوم اولدقده وکلای دولت بومصر مسئله سنده دمبسته حیرت ایکن محمد علی بووقوعاتی اوصورتله استانبوله عرض واعلام ایتدردی که کویا ارناودلرک ید ومدخلی اولقمسزین علی پاشا حقنده وقوعه کلان معامله غدیره دولت بنده لکی حسسیله عرق حمیتلرینه طوقونه رق کوله مندر علیهنه قیام ولدی الحاربه غلبه ایدوب آنبری مصر دن طرد و اخراج ومملکت پادشاهینک ضبط وربطی ایچون اسکندریه متصرفی خورشید پاشایی دعوت ایله اداره امور مملکتی آنک یدینه تسلیم ایلمش اولدقلمری بیانیله مصر ایالتنک خورشید پاشا عهده سنه توجیهی عرض وانها وخسرو پاشایه دخی مصر خزینه سندن الی کیسه خر جراه اعطاسیله ردوس جانبنه کوندلمش اولدیغندن ابقای وزارتیه عهده سنه بر منصب احسان بیورلمسی نیاز واستدعا اولمشدر .

ارناودلره اسناد اولنان بو وضع اخلاصکارانه مزاج حال وعصره موافق کورینه رک اولنان استدعا وجهله مصر ایالتی رتبه وزارت ایله خورشید پاشا عهده سنه توجیه اولنوب خسرو پاشایه دخی دیار بکر ایالتی احسان بیورلمشدر .

### \* وقایع روم ایلی \*

دولت علیه بروجه بالا عربستان طرفندن متوارد اولان آجی خبر لر ایله متألم اولدیغی حالده روم ایلی جهتده دخی عظیم غائله لر ایله مشغول ایدی .

شویله که : کچن سنه روم ایلی والیسی تپه دللی علی پاشانک فله جانبنه حرکتی طاعلی اشقیاسنه موجب خوف وتلاش اوله رق فیما بعد برر محمله اسکان ایله شقاوتدن فراغت ایده جکلرینه سوز و یروب فقط اول بهارده اجرا آتیه قرار و یر یله رک علی پاشا ولایتنه عودت ایله چاوشباشی عثمان اغاروم ایلی جانبنه کوندلمشیدی .

چاوشباشی اسکجه یه واروب روم ایلی اعیانلرینی جمع ایدرک رؤسای اشقیادن علی ملا ایله قره فیضینک اسکالنری خصوصی مذاکره ایتدکلرنده علی ملانک فرده اقامتی درمیان اولمش ایسه ده متحیزان اعیان روم ایلیدن اولان توقاتجقلی بونی مناسب کور میوب تپه دللی علی پاشانک تکرار بروطرفله حرکتی ایسه کلی منازعه ظهورینه وفقرا وضعفانک خسار دیده اولملرینه بادی اوله جنی وروم ایلی اغواتی عموما علی پاشادن دلکیر اولوب مقدما فله ده ارناودلر ایله واقع اولان محاربه دن طولانی آنک اخذ انتقام داعیه سنه دوشمسی اغلب مأمول ایدوکی وروم ایلی ایالتی منصف ومعتدل روزیره توجیه اولنسه طرفندن تعیین اوله جق باشبوغ ایله بالاتحاد جمله اشقیانک طرد و دفعنی مومی الیهم تعهد ایدرک بومالده برقطعه محضر دخی تمهیر ایلمش

اولدقلىرى و بشقه صورتله تسويه مصاحت قابل اولديني جهته چاوشبشى در سعادت  
 عودت ايلدى .

شوحاله نظر آتیه دلنليک ابقاسنده اصرار اولنسه بتون روم ايلي اعيانلرى اوزرينه  
 سفر آچق لازم کلوب حالبوکه بروجه بالا برطر فدن وهابى غائله سى و برطر فدن  
 فرانسسه وانکلتره بيننده ظهوى ملحوظ اولان محاربه نك نه درلو و قوعاى منتج  
 اوله بيله چكى مطالعه سى ميدانده ايکن روم ايلي طرفنده دخى باشلو بر مسئله چيقارماق  
 موافق حال و مصاحت دکل ايدى .

بناءً على ذلك اشبو اون سكرسنه سى اوائلنده روم ايلي واليلى تپه دئلى عهده سندن  
 صرف و تحویل ايله سالنيك سنجاغى متصرفى وزير وانى محمد پاشايه توجيه اولنمشدر .  
 بالاده بيان اولديني اوزره روم ايلي اعيانلرى طاغلو اشقياسى غائله سنى بر طرف  
 ايتمکه معهد اولوب حالبوکه اشقياي مرقومه دن مناو ابراهيم کندوسنه تحصن ايدمك  
 بر محل اولمق اوزره بوائناده طوترقان قصبه سنى ضبط ايدرك افلاقدن كلى آچه  
 و ذخيره مطالبه واکر و يرلمز ايسه افلاقه مرور ايلرز ديو تضييق و اخافه ايلمس  
 اولديغنه مبنى افلاق و يوده سندن باب على يه فر ياد نامه کلديكى کي بکر شده کي روسيه  
 قونسلو سندن دخى بوکادائر در سعادتده کي روسيه سفارتنه شكايتمه گلش اولديني جهته  
 روسيه ايلچيسى عظيم شكايته ابدار ايلديکندن بو دخى باب عاليجه بر مسئله مهمه  
 اولدى برکت و يرسون ترسنکلى اوغلى در حال روسجقندن حرکت و اشقيايى احاطه  
 ايله جنکه مباشرت ايتدکده اشقيانك بر چوغى تلف اولدقندن صکره مناو ابراهيم  
 ايله بقیه عوننه سى ترسنکلى اوغلندن طلب رای و امان ايله تحليلص کر بيان ايتمشدر  
 ايکن مناو ابراهيم ينه تک طور مدیغندن و ترسنکلى اوغلنه سرفر و ايتمک ايتسمدیکندن  
 چوق کچمکسز ين ترسنکلى اوغلى بر تقريله کرک مناو ابراهيمى و کرک هوا دارلر ينى  
 اله کچوروب اعدام ايله سر مقطوعلر ينى در سعادتده کوندرمشدر .

ويته اول ائنده طاغلو اشقياسى رؤساسندن اولوب قلبه و بازار جق طرفلرنده  
 يغما کرک ايله مشغول اولان قره فيضى اوزرينه دخى سيروز اعيانى قپوجى باشى  
 اسمعيل بك هجوم ايله جمعيتنى بر يشان ايتشيدى .

فقط اشقيانك بر طاقى دخى فره و ملغره طرفلرنده فرجه ياب شقاوت و سرکشى اولدقندن  
 اوزرلرينه سالنيك متصرفى وزير عثمان پاشا مامور ايدلمس و معيته نظام جديد  
 عسکرندن بر مقدار معلم بياده و بر سر چشمه معيته مقدرارى كافي سواری کوندرلمش ايدى .  
 باشى بوزوق عسکرک واردقلى يرلرده اهالى يه ظلم و تعدى ايلدکلى  
 معلوم اولديغندن بر وقتدنبرو در سعادتده تعليم اولنان نظام جديد عسکرنده

عجايب الضباط حقيقى حاصل اولديمى يوخسه آنلر دخى ديكر طوائف عسكريه كې سر كشلكه متصدى وائناى راهده اهالى به تعدى ايده جكارمى ديو هر كس فكر وانتظارده اولوب حتى بوكره عساكر مرقومه نك در سعادتن سوق وارساللانده دول اجنيه سفر اسندن بعضيلرى آرقه لرندن مأمورلر كوندر مشلر ايدى .

عساكر مرقومه ايسه ضابطلرينه كايبنغى مطاوعت وائناى راهده اهالينك بر خالانه تعرضدن مجانبت ايدرك تمام عسكركه لايق اوله جق وجه مستحسن اوزره سير وحركت ايتدكلى كورلدكده عسكرك بو طورندن هر كس نمون اولدى واشقيا اوزرينه واروب باللى نام قرينه ده جنكه طوتشده قلدننده اشقيا بونلرى سائر طوائف عسكريه به قياس ايله اوزرلرينه هجوم ايتدكلى كې عساكر مرقومه موزيقه سنى چالهرق مناوهر سنى اويدىروب وديواركې متانت اوزره طوروب اشقيا اوزرينه آتش افشان اوليجق اشقيا طيانه ميوب منهزم وپريشان اولمشلردر .

بروجه بالا روم ايلي اعيانلرينك تعهدى اوزره روم ايلي ايالتى تپه دنلى على پاشا عهده سندن صرف وتحويل ايله وانى محمد پاشا عهده سنه توجيه اولتمش ايسه ده روم ايلي اصلاحاتنه وانى پاشانك اقتدارى كافى اولمدينى اكلاشلدى .

تپه دنلى على پاشا ايسه طوسقه لى جهته ده كى خاندانلرى بربر امحا ايدرك يانيه طرفنده كسب استقلال داعيه سنده ايدى . واوجهته واقع سوليوتلكه جنكاور بر طائفه در جمله سى خرستيان اولدقلى حالده چاملق بلكريه بالانحداد اون بش سنه دنبرو على پاشايه مقاومت ايلمكده اولدقلى حالده على پاشا بو اننده كرك آنلره وكرك چاملق بلكرينه غلبه ايله يانيه جهته ده اغياردن خالى قلمش وبو وجهه حاصل ايتديكى اقتداره استناد ايله باب عالينك بعض اوامرينه طيانور اولمش ايدى . آنك بو حال وطورى ايسه دولتجه نظر دقتى جلب ايتمكده ايدى .

بناءً على ذلك هم طاغلى اشقياسنى تأديب ايتمك همده تپه دنلينك قوتنه مقابل وموازن كلك اوزره خلال شعبانده روم ايلي ايالتى سرعسكرك انضماميله اشقودره متصرفى ابراهيم پاشايه بالتوجيه روم ايلجه كندوسنه وسعتلى رخصت وزياده حيثيت ويرلدى . سلفى وانى محمد پاشايه دخى خلال رمضانده موره ايالتى توجيه ايدلدى . وموره به مواصلته دكين سلفى قائم مقام سابق مصطفى پاشانك عزل اولتماش كې موره ده اقامتيله ايالتى اداره ايلمسى امر واشعار بيورلدى . بعده شوالده واقع توجيه انده مصطفى پاشا عهده سنه دخى خانه محافظلى احسان بيورلشدر .

\* بعض وقايع اناطولى \*

اناطولى واليسى كرجى عثمان پاشا كه مقدا طاغلى اشقياسى اوزرينه مأمور اولمق

حسبيله مدت مديده روم ايلي بي تحريب ايدرک نهايت کندوسى دخى دولته بر بلا اولديغندن برتقريب ايله اناطولى جانبه آشورلمش ايدى . آنک دلى باشيسى اولوب روم ايلیده ايکن برتقريب ايله ميرميران اولان عمر پاشا جسور و سرکش بر شخص اولديغنه و عثمان پاشانک قوتى تقليل ايله بر آراقى فرصتى دوشوريله رک ايشى بتورلمک مصمم بولنديغنه مبنى آنک دائره سندن تفریق اولنمق غرضيله عمر پاشا عهده سنه قيصريه سنجانى توجیه اولنهرق ترتيب جزاسى محرمانه جبار زاده يه احاله اولنمشيدى . قيصريه يه داخل اولديغى کون جبار زاده نك آدملىرى فرصت بولوب کندوسنى اعدام ايتلريه عثمان پاشانک برقنادى قيرلمش اولدى .

بعده عثمان پاشانک دخى ترتيب جزاسنه مقدمه اولمق اوزره اناطولى ايالتدن تبعيدى ضمننده چلدرحواليسنده تولد ايدن اختلاک دفعى ايجون قوى الاقتدار پروزيک ارضرومه تعيينى لازم کيشدر ديو عهده سنه اضروم ايالتى توجیه اولنوب سانى علاء الدين پاشايه دخى اناطولى ايالتى ويرلمشدر . عثمان پاشا ارضرومه کيدوب کيما مکده ابتدا تردد ايلمش ايسه ده علناً مخالفته دخى جسارت ایده مديکندن چاره سز قلقوب ارضرومه روان اولدى حالبوکه ارضروم ايالتى الحاقاً طر بزون واليسى طيار پاشا عهده سنه بالتوجیه عثمان پاشانک اعدامى دخى کندوسنه احاله بيورلمش ايدو کندن طيار پاشا عساکر کليه جمع ايله عثمان پاشانک اولحوالى به ورودنده اطرافى احاطه ايديجک عثمان پاشا هان ارضرومه کيروبده تحصن ايتک خصوصى تصميم ايله اولحوالیده بغى وشقاوت ايله معروف اولوب اعدامى بابتده برقاچ دفعه اراده سنيه صدور ايتمش اولان حسن قلعه لى مى اوغلى نام شخصدن استمداد ايدوب اودخى غيرت جنسيت ملايسه سيله عثمان پاشايه امداد ايتک اوزره عسکر چکمش اولديغنه مقابله طيار پاشا اون بيک قدر عسکرله کتخداسنى تعيين و کردستان پاشالردن موش متصرفى مراد پاشا ايله محمود پاشا وسائرنى اکاتريفق ايتمش ايدى . عثمان پاشا ايله مى اوغلى ايکي قولدن ارضرومه کيرمک اوزره هجوم ايتدکلرنده طيار پاشا عسکرى مدافعه يه ابتدار ايتدکلرى کي ارضروم اهاليسى دخى چيقوب عثمان پاشا اوزرينه هجوم ايتلريه عثمان پاشانک عسکرى منهزم اولوب کندوسنى دخى مراد پاشا اخذ و گرفت ايتمش وباب عاليدن وارد اولان امر اوزرينه باشى کسوب طيار پاشايه واودخى استانبوله کوندرمشدر .

وبو آوانده دولتجه اعدام وازاله سى ملتزم اولنلردن برى دخى قره حصار صاحب سنجانى متصرفى خليل پاشا اولغله عثمان پاشانک ارضرومه عزيمتدنصکره اودخى اعدام ايدلمشدر .

مقتول مشار الیه خلیل پاشا فی الاصل بوزجه آطهلی اولوب جزائرلی غازی حسن پاشا دآره سنه اتساب و کیدرک ساجدارلق خدمتی اکتساب ایتد کدنکره افندیسنک اسماعیل سرعسکر لکنده عهدہ سنه سپاه اغالنی و یوسف پاشا صدر تنده رتبه وزارتہ اغریوز سنجانغی توجیه بیورلمش ایدی . واقع اولان مظالم و تعدیاتندن ناشی مغضوب پادشاهی اوله رق اعدای اراده اولنمش ایکن فرار و اختفایدوب برمدت مرورنده عفو ایله وزارتتی ابقا و سفر ختامنده کافی الاول وزارتتی الغا و بش یوزغروش معاش ایله کلیبولیده اقامت اوزره نفی و اجلا ایدلکده امور مملکته مداخله ایدرک کلیبولی و جو هیله معارضه و مجادله دن خالی اولماغله تکفور طاغنده اقامتی فرمان ایدلمش ایدی . طاغلو اشقیاسنک قرق کلیسایه و رودلرنده اهالی به امداد زمینده بلا استیدان او طرفه روان اولوب اشقیایا ایله بالاتحاد اهالی مطیعیه ایصال خسار ایلدیکندن مستحق مجازات اولمش ایکن تپه دنلی علی پاشانک شفاعتیله جرمی عفو اوله رق اینه بنجی سنجانغیله وزارتتی ابقا اولندقدن صکره قره حصار صاحب سنجانغه نقل اولنمش ایدی . لکن دولت علیه یه اولان اسائی فراموش اولنور حالاتدن اولماسیله ترتیب جزاسی مصمم اولدینی حالده قرب و جوارنده بولنان کرچی عثمان پشایه موجب وحشت اولماق اوزره اجراسی تأخیر قلمش ایدی . بوجه مشروح عثمان پاشا ارضروم جانبنه مأمور اولدقده بواصر مهمک اجراسی قره حصار اعیانی منلا اوغانه بالامر عالی حواله اولنغله خلیل پاشا وائل جمادی الاولاده برکیجه سرایک خارجنده کی حرم دآره سنه کیدرکن پوصوده اولنلر هر طرفدن اوزرینه قورشون آتهرق کندوسنی اعدام ایتمشلردر . منلا اوغلنک بوخدمته مقابله کندوسنه قوجی باشلیق و اوغانه ساجشورلق رتبه لری احسان بیورلمشدر .

### \* احوال اورویا \*

بروجه بالا دولت علیه بیوک بیوک غائله داخله لری ایله مشغول اولدینی حالده انکلتزه دولتیه فرانسه جمهوری بینلرنده کشا کشته قلمش اولان بعض مسائلدن طولانی اولملکده اولان رشتہ مصالحه بوائتاده منضم اوله رق طرفین میانلرنده ینه آتش محاربه مشتعل و اوروپاده هنوز یرلمش اولان امنیت عمومیه زائل اوله رق بوندن طولانی دول اورویا تلاشه دوشدکلری کبی دولت علیه دخی فکر و اندیشه یه دوچار اولمشیدی زیرا مصر سفرنده اعانه کلیه سی اولان انکلتزه دولتک بحق دولت علیه یی اتفاقه دعوت ایتمی ملحوظ اولوب دولت علیه ایسه اورویا محاربه لرنده بیطرف طور معنی التزام ایلمش اولدیغندن بونیتی انکلتزه دولتته افهام ایله او طرفدن آزاده سر اولمش ایدیسه ده پوناپارته نک دخی مقدمات دولت

علیه ایله فرانسه جمهوری بیننده ضمان ممالک دائر جریان ایدن بعض مقاولاتی  
 سررشته ایدرک دولت علیه بی بو محاربه ده معاونته دعوت ایتسی مأمول و مقدا  
 کندوسی مصره تعدی ایدرک بالجمله عهود و شروطی پایمال ایتدیکی جهتله اگر چه  
 هیچ برشی دیمکه حتی اوله میه جنی درکار ایسه ده کندوسنه بو مثللو حقه مقرون  
 سوزلر سویلند کده دسیسه کارلق وادیسنده نه درلو وسیله و بهانه لر سردایده چکی  
 مجهول بولندیغدن دولت علیه پوناپارته طرفدن نه دینیله چکنه قولاق طوتماقده ایدی .  
 خلال ربیع الاولده مکالمه یه مأمور اولان عصمت بک افندی ورئیس الکتاب  
 افندی فرانسه وانکاتره ایلیچیلر یله بشقه بشقه اجتماع و مکالمه ایتدکر نده فرانسر  
 ایلیچسی فرانسه جمهورینک دولت علیه یه صفوتندن بحث ایدرک انکلیزلرک  
 مالطه بی تخلیه دن امتناع ایتلمی هند یولنی یا قلاشیدیر مق غرضنه مبنی اولوب امرای  
 مصره بی تحریک ایله مصرک اختلالی اسبابی ترتیب ایتلمی والی محمد بکی بیوک  
 ایلیچلیک ایله لوندره یه کوندرملری دخی بوندن ناشیدر بو غرض خفیلرندن  
 دولت علیه غفلت ایتیموب تدارکات عسکریه یه اهتمام ایتلیدر دیدکده اول عصرک  
 دیپلوماتلری بیننده مستعمل اولان تعبیرات مبهمه ایله دنلوازانه جوابلر ویرمشر  
 بعده انکلیز ایلیچیسیمله کورشدکر نده اودخی انکلتزه دولتنک دولت علیه ایله انفاقندن  
 وکال صفوتندن بحث ایتد کد نصره فرانسه لونک مالطه بی تخلیه امر نده تهالک واصراری  
 ممالک محروسه یه و با خصوص مصر قاهره یه تعدی اسبابی استحضار ایچون اولدینی  
 انکلتزه لونک معلومی اولغله مالطه بی تخلیه دن ابا ایلدی و دولت علیه یه محاربه ده  
 مشترک اولق تکلیفی ایتیموب انجق بیطرف قالسنی استر دیوب بیطرفله دائر طرف  
 صدر اعظمیدن انکلتزه دولته بر مکتوب یازلسنی طلب ایتدکده برو طرفدن دخی  
 انکلتزه لو حقنده دولت علیه نک صفوت و انجذابنی بسط و بیان و مصر مسئله سنده  
 انکلتزه لودن کوردیکی وفادارلق فراموش اولنور حالاتدن اولدینی در میان اولنهرق  
 بو یولده تحریرات ارسالی حاصلی تحصیل قیلندندر وادیسنده عرض خلوص  
 وموالات اولندقدن صکره الفی محمد بک حقنده اولان شایعه کاذبه کندوسندن  
 استفسار و استیضاح اولنسی اوزرینه الفی اگر ایلیچلیک عنوانیله استصحاب اولنسیدی  
 حقنده سفراه مخصوص مراسمک اجراسی لازم کلوردی حالبوکه نظردن ساقط  
 اوله رق لوندره ده بر محله اقامه اولنمقده در واقلم مصر ملک موروث پادشاهی  
 اولوب امور خارجیه و داخلیه سنه انکلتزه لونک وجها من الوجوه تعرضی یوقدر  
 دیو جواب ویرمش و دولت علیه نک بیطرف طوره جفته دائر اولوجهله بر مکتوب  
 یازلسنی ایچون تکرار استدعا و اصرار ایلمش اولدیغدن مقام صدارتدن اوله بر قطعه  
 مکتوب تحریر ایله تأمینات لازمه اعطا ایدلمشدر .



و بواناده و هابی غائله سی میدانده ایکن فرانسه وانکلتره میانه لرنده ظهوره کلان  
 محاربه دن ناشی اوروپانک قاریشقلنی دولت علیه بشقه جه براندیشه اولمشدر .  
 شویله که : اوستریا و پروسیا و روسیه دولتری مالطنک انکلتره لویدنده قالمسی  
 استمدکاری حالده فرانسه دن ایسه انکلتره به دهامیل ایدیلر زیرا کندولری  
 دول بحریه دن معدود اولدقلمری جهتله انکلتره نك بحریه جه ترقیاتی قیدایتمزلرایدی  
 اما فرانسه جمهورینک بر اوروپاده ترقی نفوذ وسطوقی کندولرنجه بادی فکر و اندیشه  
 اولدقدن بشقه افکار سربستی و جمهوریتک کندو مملکتلرینه سرایتدن دخی خوف  
 و احتراز اوزره ایدیلر و پروسیایه هم محدود اولان هانورا مملکتی اول ائانده انکلتره  
 قرانک زیر دست اداره سنده بولمغله یوناپارته بر مقدار عسکر سوق ایله اوراسنی  
 ضبط ایلمش اولدیغندن بوماده پروسیایه بادی خلجان اولمشیدی و روسیه ایمراطوری  
 عکسکاندردی بو اوانده دولتی سائر دول متمدنه اوروپا شکلنه قویمق اوزره اسباب  
 لازمه یه تشبث ایدوب بومثللو اجرات ایسه وقت فراغ و آسایشه موقوف اولدیغندن  
 بواناده اوروپا جه محاربه ظهور ایلمسندن دلکیر اولمشیدی و فرانسه نك قوه بریه سی  
 زیاده ایسه ده انکلتره لونک قوه بحریه سنه غلبه قابل اولدیغندن یوناپارته انکلتره  
 امان دیدرمک اوزره انکلتره یه یوزالی بیگ عسکر کچورمک ایچون کلیتلو سفائن  
 نقلیه تدارکنه تشبث ایلدی انکلترلر ابتدا بوکا چندان اهمیت ویرمدیلر ایسه ده  
 یوناپارته نك فوق العاده جسم تدارکاتی کوریمک تلاش ایتمکه باشلابوب انکلتره نك  
 محافظه سی ایچون لدی الحاجه اون یدی یاشندن الی بش یاشنه قدر اولان اهالینک  
 خدمت عسکر یه ده استخدا ملرینه قرار ویریلهرک انکلتره نك هر طرفنده طابورلر  
 ترتیب ایله تعلیمه مباشرت ایتدیلر فرانسه ایله اسپانیا بیننده منعقد اولان معاهده  
 اقتضاسنجه انکلتره محاربه سی ظهورنده اسپانیا دولتی فعلاً یاخود نقداً امداد ایلمک  
 لازم ایکن بوکره اسپانیا دولتی بوشرطک ابقاسنده تردد ایدر اولدیغندن فرانسه  
 ایله میانه لرنده برخیلی مخبرات جریانندن صکره نهایت اسپانیا ظاهر آبی طرف  
 قالمده ماه بماء فرانسه یه التیشر ملیون فرانق ویرمسنه قرار ویرلمشیدی .  
 بویله برقاریشق و قنده دولت علیه دخی احتیاط اوزره بولمق لازم کلدیکندن بشقه  
 بوقارغشه لقدمه یوناپارته بالورانه عهده سنه فرانسه حکمدار لغنی کچورمک اوزره اون  
 سکزنجی لویی دیو مشهور اولان فرانسه ولی عهدینه فرانسه قرالنی حقوقدن  
 قصرید ایتدیرمک اوزره عهده سنه لهستان قرالنی احاله اولمق و بدل تضمینات  
 اوله رق پروسیایه هانوره مملکتی و یاخود المانیان دیکر یرلر ویرلمک و روسیه  
 و اوستریا دولتلرینه ممالک عثمانیه دن مناسب محللر آلیویرلمک خصوصنده پروسیا

قرانی توسط ایلمش اولدینی حوادی بوآناده برلین طرفدن آلمغله دولت علیه فوق العاده احتیاطه رعایت ایتک لازم کلوب خزینه تک مضایقه سی ایسه برکال اولدینی حالده تجار اجنبیه دن آنان مهماتک اثمائی تأخیر قبول ایتدیکنه مبنی بر مقدار فضله آنچه بولمق فریضه دن کورلمکین مسکوکاتک عیمارینه کوره جزیه شرعیه تک ادناسنه اون و اوسطنه یکریمی واعلاسنه قرق پاره ضم اولنهرق بروجه او جلق امتعه ودخان کمرکرینه الحاق ویوز سهم اعتباریه طالبلرینه فروخت اولنق اوزره قرار ویریلوب اجرایی ضمننده خلال رجیده اراده سینه صادر اولغله هر سه می بشر کیسه فائضدن قرق کیسه معجله ایله طالبلرینه صالتدی وبوصورتله خزینه بر مقدار نفس آلوب موقتاً شدت مضایقه دن قورتلدی .

\* وقایع شتی \*

بیگ ایکیموز اون برسنه سننده سفارته پارسه کیدوب ظهور محاربه ملبسه سیله بووقته قدر اوراده قالمش اولان سید علی افندی اقدیجه عودت ایدرک اشبو اون سکر سنه سی اوآننده در سعاده واصل اولمشدر سرگذشتی حاوی تاریخچه قافلئ برقطعه سفارتنامه قامه آلمش اولدیغندن تفصیلاتی استیانلر اکا مراجعت ایلسون .  
صفرک سکرنجی بازار کونی کتخدای صدر عالی احمد عطف افندی واون ایکنجی کونی دفتر دار حسن تحسین افندی عزل ایله مقدمه بالاصاله وبالوکاله کتخدالقی ایتمش اولان ابراهیم نسیم افندی کتخدای صدر عالی وتوقیعی سید فیضی افندی دفتر دار اولدی .

نسل جنکیز یاندن اولوب برمدتدنبرو ماوراءالنهرده حکمران اولان خانلرک صوکی اولان فیض الله خان بلاوارث فوت اولدوقده خاندانه انتساب دعواسنده اولنلر ییننده منازعه ومجادله ظهور ایتمکله بخارا خلقی دفعا للزاع بونلرک جمله سنی اعدام ایتمکدن ناشی بیگ ایکیموز اون اوج سنه سننده مملکت حاکمز قالمغین بخارا نقیب الاشرافی عبدالرحیم خانی خاللق مسندینه انتخاب ایتمشدر اودخی ایکی سنه حکومت ایتدکن صکره وفات ایتمکله سالف الذکر فیض الله خانک وزیر و دامادی اولان معصوم غازی بی انتخاب ایدوب اودخی مدت قلیله طرفنده فوت اولیجق سادات حسینه دن اولان اوغلی و فیض الله خانک نیره سی میرحیدر بخارا تختنه جالس اولدوقده اخبار جلوس ایچون ایش محمد دیوان بکی وبرادر زاده سی محمد یوسفی سفارته در سعاده کوندر مکه روسیه طریق ایله کلورلر ایکن بخارا ایله موسقو دیاری آره سننده قزاق طاقه سی بونلری نهب ایله هدایای ملوکانه بی اخذ وغصب ایلمش اولدقلرندن ایش محمد برادر زاده سی محمد یوسفی بخارایه ارجاع ایله

کندوسی در سعادته کلوب اشبو اون سکز سنه سی ربیع اولنده ترتیب اولنان دیوان عالیده حضور هایونه دخول ایله مظهر التفات اولمشیدی .

بخارا طرفندن سفارت نامیله کلنلرک اکثری بویله اثنای راهده نهب وغارت اولندقلرندن بحث ایده کلدکلری و بعضیلری دخی نامه سز اوله رق ورود ایلدیکی حالده طرف دولت علیه دن مظهر حرمت و اکرام اوله کلشاردر ایش محمدک ایسه عرض ایده جکی هدایا ضایع اولمش ایسه ده یدنده نظر اعتباره شایان نامه سی وار ایدی . بناءً علیه سلطان سلیم خان طرفندن حقننده حرمت لایقه اجرا بیوردلقدن بشقه عظمای دولت طرفندن برردفعه در سعادتك نزهتگاهلرنده ترتیب ضیافت و برر هدیه ایله اجرای لازمه مروءت قلمقم ایچون صادر اولان اراده سنیه موجبنجه ابتدا صدراعظم و ثانیاً شیخ الاسلام و بعده سائر ارکان سلطنت طرفلرندن سفیر مومی الیهه مکلف ضیافتلر ترتیب و هدیه لر اعطاسیله تطیب قلممشدر .

بخارادن بعض دول نزدیکه کوندریلان سفرا ذاتاً رجال دولتلرندن اولمیوب بلکه امرا سلکنه داخل اولمق آرزوسنده بولنان بعض تجار مصارفی کندو طرفندن ایفا اولمق و بومقابله ده کندویه برپایه ویرملک اوزره سفارته تعیین اولنه کلدکلری تاریخ واصفده مندرجدر .

ربیع الآخرک یکریمی یدنجی کونی در سعادته ساعت نهاری بش بچقده ایکن حرکت ارض و قوعبوله رق هر کسه عظیم دهشت ویرمشدر .

ینه ماه مرقومده پارمق قپو بیشکاهنده واقع شرتجی دکاندن آتش ظهور ایله پشمالجی خانی ویول کچن و کرپیچ وقاضی خانلری و اوتوز قدر دکان سوزان اولمشدر .

ینه ماه مرقومک یکریمی طقوزنجی چهارشنبه کیجه سی ساعت التیده آیدین اوغلی تکیه سی قربنده واقع میری دلالی حافظک خانه سندن آتش ظهور ایله برقولی باب عالی جوارینه و برقولی خواجه پاشا قوللغنه منتهی اوله رق برچوق یرلر یانمشدر .

موالی دوریه دن ابراهیم افندینک اوغلی عبدالعزیز افندی بروقتدنبرو تحصیل فن طبه مکب اولوب حکیم باشی نعمان افندینک دائره سنده حل و ترکیب اجزا ایله مشغول ایکن حکیم باشی برماده دن طولانی انفعال ایله کندوسنه استتقال ایتمکین عبدالعزیز افندی دخی آنک دائره سندن آرمش ایسه ده جهت تعیشی طبایته منحصر اولدیفندن کندوسنه مراجعت ایدن خستکانه باقوب کیدرک اندرون هایون اغالرندن بعضیلری آنک ادویه سندن فائده کورملریله حذاقت و مهارتی دار السعاده اغا سنه افاده و اطبای خاصه کروهه الحاق بیورلمسنی رجا ایتملی او وزینه دار السعاده اغاسی دخی حکیم باشی یه افاده ایتمکده موافقت ایتمیوب حالوکه کندوسی دخی اغانک

احساندیده لرندن بولندیغنه مبنی اغا کوجنوب کندوسنی تکدیر ایتدکن بشقه سلطان سلیمه عرض شکایت ایدرک حکیم باشینک تبدیلنه رخصت آلیجق همان خیرالله افندیکن حفیدی مصطفی بهجت افندی بی احضار ایله ریاست اطبا خلعتی اکسا و عبد الغزیز افندی بی دخی اطبای خاصه سلکنه نقل ایله کامروا ایلمشدر . نعمان افندی به کوره دأر سندن مستقلاً چیمش اولان برآدمی اغانک امریله رسماً معینه آلمق فی الواقع طبعه کران کلور بر ماده ایسه ده اول عصر لرده دار السعاده اغالرینک نفوذ لری مؤثر اولوب حکیم باشیلر دخی انلرک معیت لری مأ مور لرندن معدود اولدینی حالده اغانک بویله اراده حکمنده اولان شفاعتی دفع ایتمک قضا و بلائی دعوت قیلندن اولدیغنه مبنی یالکنز عز لیله اکتفا اولنمی اولوقنک اصولنه نظر آبر نوع لطف و مروت ایدی .

بو ائشاده بوسنه ایلتنده واقع بهکک قاعه سنه ایکی ساعت مسافه سی اولان بر محله هوادن بر بیوک شی دوشدکده اهالی پک زیاده اورکمش اولدق لری حالده ایچلرندن بعض قوی القلب کیمسه لر یانه واره رق بر بیوک چادر اولدیغنی کوروب کیمی علامت قیامتدر و کیمی بشقه بر معنا یه دلالتدر دیه رک حقیقت حالده نه اولدیغنی اکلا یه مدقلرندن بوسنه والیسی ابوبکر باشایه لدی الاعلام فر نکلرک قوت اجزا ایله اطاره ایتدکلری خیمه اولدیغنی افهام ایتمش ایسه ده بهکک لولر بودرلو شیرلی ادرا کدن عاجز اولدق لری جهتله درلو او هام و خیالاته باعث و بوسنه ده پک چوق کفتکو حادث اولقدن ناشی ابوبکر پاشا چادری تراونیکه جلب ایله اهالی به ارئه ایدرک حقیقت حالی تفهیم قیدینه دوشمش اولدیغنی باب عالی به عرض وانها ایلمشیدی لدی المطالعه فی الواقع اورو پالولرک قریب العهدده اختراع ایلدکلری بالون اولدینی وارد خاطر اولمش ایسه ده بوخلالده حدوده قریب محللردن بالون اطاره اولنوب اولندیغنی نمنجه لودن استفسار اولندقده ایتالیا الکاسنده واقع بولونیه شهرنده حکمای افرنجدن بعضیلری بر بیوک بالون اوچوروب ایکی نفر آدم دخی بالونه مربوط اولان صنداله را کبأ طیران ایلمش اولدق لری حالده وندیگ کور فزنده واقع انقونه پیشکاهنده دریاه نازل اولدق لرنده فی الحال بالونه مربوط اولان اپی قطع ایله بجره دوشملر یله تصادف ایدن بر نمنجه کیمی مرقوملری آلوب قورتارمش وبالون ایسه صندال دن تفریق اولندقده کسب خفت ایتمکله بر هوا اولوب کیدرک بهکک قریبنده یره دوشمش اولدیغنی ترجمانلر افاده ایتمشدر . کچن اون یدی سنه سی ایلولنده ایکی انکلیز معرفتیه یاپدیریلان بر بالون طولمه بنجه ده اوچورلمش ایدو کندن استانبولجه بالون معلوماتی اولمغله اشبو بهکک وقعه سنه استانبولده اینانان اولمش ایسه ده

نیجه کیمسه لر دخی بونی محالاتدن عد ایدرک راویسنی تکذیب ایتمکله استانبولک رمضان کیجه لرنده اشوبالون وقعه سی مجلسلرده مدارکلام وموضوع بحث انام اولمشدر .

### \* وفیات اعیان \*

جمادی الاولانک اون دردنچی کونی روزنامچه اول راسخ افندی وفات ایتمکله منحل اولان منصبی وقعه نویس واصف افندی یه احسان بیورلدی .

راسخ افندی بازرگان باشی زاده اولوب بر مدت مکتوبی قلمنه مداومت وسکسان اوچ تاریخنده خواجه لک رتبه سیله کسب رفعت وبعده رکاب همایون کتخدالغی وموسقو سفری غایتده روم ایلی بکار بکیلیکی پایه سی و بیولک ایلیجیلک ایله تزید سرمایه شان وشهرت وروسیه دن عودتنده طریق سابقته عودت ایله دفتر امینی وبر مدت مرورنده رئیس الکتاب وبعد العزل روزنامچه اول وحبوبات نظارتی کبی بعضی مناصب ایله ومصر سفری ظهورنده مکررا ریاست کتابت ایله کامیاب اولمشیدی . بر مدت صکره مأذونا درسعاده عودت ایتدکده توقیعی وتکرار دفتر امینی وروزنامچه اول اولوب بوکره سنی متناظر عقد ستین ایکن اسمی روزنامه حیاتدن ترفیق اولدی فن محاوره ده کامل وزیب وزینته مائل چلبی مشرب ومدوح الثمائل برذات ایتمش .

بو مقامده واصف افندی بر مقاله استطراذیه ایراد ایدوب دیرکه مراتب دولت علیه نیک اکثری دول سالفه اسلامیه دن اخذ اولوب روزنامه جیلک منصبی دخی زمان فاروق اعظم دن قالدینی بالتبع والاستقرار معلوم اولغله تفصیلی بو محله قید اولندی . خلیفه والاجناب یعنی عمر بن الخطاب رضی الله عنه زماننده بحرین واطرافنده واقع ممالکک جزیه واعشاری عامل نصب اولنان ابو هریره وساطیه مدینه منوره یه کتوریلوب حاضر وغائب مسلمینک اسامیلری وحقوق وعطایانک دفاتری مرتب اولدیغندن تقسیم امرنده مشقت چکیلوب کبار اصحاب کزیندن خالد بن ولید حضرتلری جوابه کلوب اقلیم شامده روم ایراد ومصارف ومواجب عسکر ایچون ترتیب دیوان ایدوب مدون دفتر طوتمق عادتلری اولدیغنی بیان وهر زمان بویله مشقت چکمکدن ایسه بزلر دخی بو اصوله رعایت ایلسک مناسبدر دیدیکنی حضرت عمر استحسان بیوردقلرندن فضله وزرای فرس دن استبان ایله مدینه منوره ده بولنان هر مرزاندن دولت کسرویه نیک مصارف وایرادی نوجهله ضبط اولدیغین سؤال ایتدکلرنده خصوص مذکورده اولان دقت وتصرفی کاینبنی افاده ایتمکله فی الحال عظمای اصحاب ایله مشورت ووضع دیوان ایلیوب کتاب قریشدن فن حساب واستیفاده اهلیتی ظاهر اولان عقیل بن طالب ومخرمه بن نوفل وجبیر بن مطعمی

دعوت ایدوب ابتدا عسا کر اسلامک علی الاسامی دفتر لری و ارزاق و عطا یا وثیقه لری  
 تحریر و تدوین اولنق خصوصی امر ایدوب اشراف مهاجرین و انصاری و سائر  
 آحاد مسلمینی قرابت نسب و تقدم اسلام التزامیه و احدا بعد واحد ترتیب و علی  
 تفاوت مراتبهم ثبت دفتر ایدیلر و هر کسک حال و شاننه کوره نفقات و وظائف تعیین  
 ایدوب ابتدای امر ده بود فترده مجاهدین و متقاعدین داخل اولوب بعد ذلك متقاعدین  
 بوجه دن افر از اولنغله بشقه جه بر قلم اولدی و مجاهدین دخی بر قاج قسمه منقسم اولوب  
 خواص و مقابله دفاتری ظهور ایتدی و یوماً فیوماً ایراد و مصرف بیت المال  
 نه اولور سه آنی ضبط و تحریر و معمول به تمسک و یرمک مصلحتی ایچون بشقه دفتر  
 طو تیلوب زهد و امامتی جمله یه غالب اولان حضرت جیر بن مطعمی قلم مزبوری  
 اداره یه تعیین ایدیلر بو خدمت حالا روز نامچه اول دیمکله معروف اولوب جمله  
 اقلامک و امور مالیه نك اوزرینه ناظر و محاسب اولان قلمدر و روز نامه جیلرک  
 پیری مومی الیهدر و تمسکات جمله اقلامده تمهیر اولنور ایکن روز نامه قلمنده مهر  
 استعمال اولنماسی بود فترک قدم وضعنه و اربابنک کمال اعتماد ایه عظم شاننه دلالت ایدر  
 و ایوم ملفوظ اعداد حسانی عربی اولق دخی قدمنی تایید ایدر انتهى .

بر و قد نبرو قبودان دریا حسین پاشا نامزاج اوله رق و جودینه ضعف و هزال کیش  
 اولدیفی حالد شعبانک یکر می او چنجی چهارشنبه کونی قبیل مغربده وفات ایتکله  
 جوار حضرت خالد ده دفن ایدلدی و بر ایکی کون مرورنده قبودانه بولسان  
 عبدالقادر بک عهدده سه رتبه وزارتله دریا قبودانغی توجیه بیورلدی .

متوفای مشار الیه فی الاصل چرکس کوله لرندن اولوب افندیسی اولان وزیر  
 ساحدار ابراهیم پاشا طرفندن بیک یوز سکسان بر سنه سنده سلطان مصطفی خانه تقدیم  
 اولنغله سلطان سلیمک برادری شهزاده سلطان محمدک خدمتته و یرلمشیدی سلطان  
 سلیمک جلوسی کونی مابینجیلک و تبدیلیجیلک ایه خانه خاصه یه نقل اولنوب بش  
 التی آی صکره خلاف طریق اندرون اوله رق باش چوقدار اولوب طرف هایونه  
 تعلق و ارتباط مخصوصه مبنی کسب نفوذ و تحیز ایدرک ایکیوز التی سنه سی رجبنک  
 اون یدنجی کونی رتبه وزارتله قبودان و اسما سلطانک شرف ازدواجیله بر مرتبه  
 دها رفیع الشان اولمشیدی بهادر و مدبر کارگذار و مقتدر وزیر جلیل المأثر اولوب  
 ترسانه امورینه کوزل نظام و یره رک هر نه زمان امر اولنسه مقدار کفایه دونما  
 حاضر و مهیا بولنوردی و آقدکزده قورصانلق ایه مشغول اولان مشهور قره چقان  
 ایه لدی المحاربه غالب کله رک قره چقانی اسیر و کمیلرینی بسته زنجیر بند و تسخیر  
 و ظنین صیت و سطوتی خلیجه عالمکیر ایتمش ایدی فقط تهور مفرط

و غضب نابرجا ايله عظمای عصر دن بر چوق اعدا قز انوب و دین سر عسکر لکنده موفق اوله مامسی دخی بو علتدن ناشی ایدی و رقیاسنه غلبه ايله محافظه اقباله او قدر حریص و منهمک ایش که اولوقتک حکمنجه ذروه نفوذ واجلاله چیقمشیکن کندوسندن بشقه کسنه نك ذات شاهانه یه تقریبی چکه میوب پیدرپی سلم اقباله وضع قدم ایدنلرک باب سلطنتدن دفع و اخراجی داعیه سیله مشغول اولدیغندن عمر نده راحت ایده مامشدر و زمان اقبالی متمد اولدیغندن اله نك چوق مال و اشیا کچمش ایسه ده نهاب و هاب اولدیغندن و فائنده ترکه سی دیوننه و فایدر ایتمز راده ده ظهور ایتمشدر .

بالاده تفصیل اولدینی اوزره ضیا پاشا برآ و صاحب ترجمه بجزراً مصره و اروپ فرانسزلی اخراج ایتمکاری کبی کوله منار دخی مطرود اولغنه خطه مصریه طوغریدن طوغری یه تصرف دولت علیه یه کچمش ایسه ده کوله منار عادت قدیمه لری اوزره سعید ایچنه چیقوب عواقب اموره منتظر بولندقلرندن نتیجه مصلحت هنوز لایقيله تأمین ایدیله مامش اولدینی جهته آتیده ظهور ایده جک احوالک نیک و بدی والیه و بالواسطه انی انتخاب ايله نصب ایتمیرن ذات عالی یه عائد اوله جنی مطالعه سنه نظراً اوله عاقبتی مجهول اولان بر حال و زمانده برینی مصر و الیلمکنه سوق ایتمک قاعده دور اندیشی و احتیاطه مغایر ایکن صاحب ترجمه اقباله مغرور و بومثلو خصوصاً جهور اولدیغندن کتخداسی خسرو اغایی بیانی صورت تعهدده مصر والیسی نصب ایتمیر مشیدی بر وجه بالا خسرو پاشانک موفقیتمن محروم اولشی حسین پاشا علیه نده اعداسنک سوز سویلمسنه پک بیوک سر رشته اولدیغندن بو جهته حقدنه درکار اولان توجهات پادشاهی یه خلل کلوب مشارالیه ایسه مألوف اولدینی فرط التفات و نوازشک منحط اولدینی کور یحک خسته لکی بر مرتبه ده افزون اوله رق مکدر و دلخسته اولدینی حالده تخمیناً قرق التی یاشنده ایکن ترك مشغله اقبال و ادبار ایدوب کیتمشدر .

ترکه سنده بر وجه مشروح کلی مال چیقمامش ایسه ده پک چوق کوله و جاریه و نیجه اقبشه و مرصعات و نادیده تحف و تفاریق ترك ایتمشدر .

بو اووانده جده والیسی شریف پاشا حلول اجل موعودیه وفات ایلمش و مدبر و مقتدر بر ذات بولوبده جده یه کوندرمک خیلی دشوار بر ایش اولدیغندن و هابیلرک تأدیی چاره سی دوشونیلور ایکن آنک وفاتی خبری دخی وارد اولدقده باب عالیجه فکر و اندیشه یی موجب بر کیفیت اولمشدر .

متوفای مشار الیه استانبول سکانندن زعیم علی اغانک اوغلی اولوب یوز التمش اوچ صفر نده تولد ایتمشدر بر مدت حرمین محاسبه سی و بعده دفتر دار مکتوبیحیسی

قلمریه مداومت ایدرك اوفق تفك مأموریتلرده بولندقدن صكره ايكیوز بش  
صفرنده اردوی هایونده شق اول دفترداری وایکیوز یدیده معزول وایکیوز  
سکرده کتخدای صدر عالی اولمشیدی .

بر مدت صكره عزل ایله بعض مناصبه استخدام اولنه رق ايكیوز اون درتده  
ترسانه امینی وبعده مصر دفترداری وایکیوز اون یدیده رتبه وزارتله حبش  
والیسی اولوب جدهنك امرمحافظهسندده حسن خدمت کوستردی صدق واستقامت  
ایله بنام وسخی وکولر یوزلی اولمق حسبیله مقبول انام اولوب انجق اداره  
بیتیه سنجه مسیب اولدیغندن مصرده انه کلی مال کچمشیکن ینه دائره سنك  
ادارهسندده زحمت چکرمش نه حال ایسه یرینه برینی بولوب کوندرمك کوچ  
اولدیغندن حجازك بویله هنكام اختلالنده وفاتی دولتجه بادیء کدر اولمشدر .

بوآئنده شام وطرابلس وصدایالتلری والیسی وامیرالحاج اولان جزار احمدپاشادخی  
امیدسز حالده خسته اولغله وفاتنده متروکاتی قبض ومیرییه تسلیم ایتمك اوزره حلب  
والیسی اولان قطار اغاسی ابراهیم پاشا عهدهسندده امارت حاج ایله شام وطرابلس  
ایالتلری توجیه اولنهرق امر عالیسی خفیاً کندوسندده کوندرلمش واوغلی محمد بکه  
دخی بارتبه وزارت حلب ولایتی احسان بیورلمش ایدی .

( وقایع سنه ۱۲۱۹ )

جزار پاشا خلال محرمدده وفات ایتمش وبالاده بیان اولدینی اوزره شام ایالتك  
حلب والیسی ابراهیم پاشایه توجیهنه دائر اولان امر عالی اولجه ابراهیم پاشایه  
وصول بولمش ایدوکندن جزارک وفاتی خبر آلدینی کبی لازم کلنلره بیورلدیلر  
تحریر ایله برابر شام طرفنه کیتمشدر .

جزارک مسقط رأسنده اختلاف اولنوب بعضیلر و دین و بعضیلر نیش طرفندن  
ظهور ایتمش اولدیغنه قائل اولمشلر ایسهده بوسنهلر اولدینی شایع ومشهوردر اوائل  
حالنده حکیم اوغلی علی پاشا دائره سنه انتساب ایدوب علی پاشا ثانیاً مصر والیسی  
اولدقده آنکله برابر مصره کیدرك اوردان حجه کیتمك اوزره لدی الاستیذان علی  
پاشادخی آئی امیرالحاج مصر اولان صالح بکه توصیه ایتمش اولدیغندن صالح بك  
دخی آئی اعزاز واکرام ایله حجه کوتوروب کتورمش ایدی مصره عودتنده علی  
پاشا منفصل اولوب کیتمش ایدوکندن صاحب ترجمه کوله من زی ویقاقتنه کیرهرك  
مصرده مشهور علی بك تملیکندن اولان عبد الله بکه انتساب ایدوب کوله منارک  
اصولی اوزره جندیلك تعلم ایلمشدر .

عبدالله بك برفرقه عسکریه ایله علی بك طرفندن بحیره عربانی اوزرینه کوندرلده



اعدام اولمغله آنک اخذ انتقامی ایچون علی بک صاحب ترجمه بی بحیره کاشفی ایدوب اودخی بحیره عربانندن یتیمش بو قدرینی اعدام ایله عبدالله بکک انتقامنی آمش و بوجهته جزار دیومشهور و معروف اولمشدر .

فرط شجاعت و کفایتی ایچون علی بک کندوسنه محبت ایدرک آئی امرا سلکنه ادخال ایله هر خصوصده اکا اعتماد ایله کلمشکن مصرده استقلال سوداسنه دوشه رک دفع رقبایه قیام ایتدیکی صره ده صالح بکی دخی اعدام ایتدیرمک استیوب بو خصوصده دخی جزاری قوللانمق استه مش ایسه ده جزار مقدا صالح بکدن پک چوق عنایت وافندیلک کورمش اولدیغندن اکا سوء قصد ایله مامش و ابوالذهب معرفیه صالح بک اعدام اولندوقده آرتق مصرده طوره میوب جزا ائری قیافتنه دخول ایله مصردن جانب رومه فرار ایتدکن صکره برارالق بحیره یه عودت و هنادی عربانندن قیز آلهرق آنلرک ایچنده اقامت ایدوب حتی علی بک ابن حیب ایله هنادی اوزرینه برفرقه کوندردکده جزار دخی برلکده بولنهرق کوله منارله محاربه ایتشیدی .

بعده شام طرفه کیدوب و اقطار شامیه ده ظهوره کلان محاربات و انقلابات ایچنده یوارلوب برطام کوله لر اشترا ایله و قوسوزلردن باشنه براز خلق بریکدیرمکله یاننده برعصبه قویه پیدا اوله رق اول حوالیده صاحب نام و شان و بعض متفذان عصرک صحابته بیک یوزسکسان برتار یخنده میرمیران و سکسان طقوزده روم ایلی بکر بکلکی پایه سیله متمساز الاقران و عکاده واقع طاهر عمر و قعه سنده یارارلقی نمایان اوله رق غازی حسن پاشا سایه سنده سنه مرقومه ذی الحججه سنده بارتبه وزارت صیدا ایالتیه کامران اولمشیدی .

صیدا و الیسی اولدیغی کبی عکا قلعه سنه استحکام و یروب اوراسنی کندوسنه مقراتخاذ ایلدی بعده مکرراً شام و الیسی و امیر الحاج اولوب اقطار شامیه ده صیت شهرتی ترقی بولدی و شام و الیسی اولدیغنده دخی صیدا و عکا النده اولوب شامدن انفصالنده ینه صیدا و الیلکیه عکاده اقامت ایلردی .

یونانارته اقطار شامیه بی استیلا قصدیه مصردن چیقوب عکاده آئی محاصره ایتش ایسه ده طفریاب اوله میوب بروجه بالا منهزما فرار و عودت ایتکله جزار پاشانک شان و شهرتی دوبالا اولدی و مقدا عهده سنه مصر سرعسکر لکی احاله بیورلمش اولدیغندن یونانارته بی بوجهله پریشان اوله رق مصره اعاده ایلمش اولسی اوزرینه آرتق مصر مسئله سنده کندوسنه استقلال تام و یرلمک انتظارنده ایکن سردار اکرم ضیا پاشانک اول طرفه کیتیمی و بوجهته کندوسنک مصر سرعسکر لکی بالطبع ملغا حکمنه کیرمش اولسی کندویه کران کلکله سردار اکرم اردوسنه معاونت ایتیه رک کاهلاً

بی‌کانه طور و حتی سردار اکرم اردوسنده ایکن واقع اولان سوء حرکتیه مبنی  
مرعشده اعدامنه سعی اولدینی جهته اورادن فرار ایله عکایه کلان ارناود اسماعیل  
پاشایی مکرم و ملتفت اوله رق یاننده آلیقومشیدی جزارک بو وضعی ضیا پاشایه کران  
کله رک مصر دن عودتنده ترتیب جزاسنی تصمیم ایتمشیدی لکن عودتده بوکا وقتی  
اولیوب همان در سعادتیه روبراه عزیمت اوله رق فقط جزاره کوزطانغی اولمق اوزره  
ابومرق محمد پاشایی یافه طرفنده بر ایشیدی حالبوکه ضیا پاشا حلب حدودندن  
مفارقت ایتدیکی کبی جزار پاشا بر الشامده کندوسنی کوستروب واشبو ارناود اسماعیل  
پاشایی باشبوغ نصب ایدرک بر اردو ایله یافه اوزرینه کوندروب محمد پاشایی حصر  
و تضییق ایلدی و نهایت اول حوالی بی قبضه تصرفه آلدی و اسماعیل پاشانک محمد  
پاشا طرفنه میل ایتدیکنی تحقیق ایدرک آنی زندانه وضع ایتمشیدی .

جزارک بو حرکتیه دولتجه نظر عصیان ایله باقلمشیکن و هایلرک فرط غلو و تعدیلری  
اوزرینه عنو اوله رق یینه عهدده سنه حجاز سرعسکر لکی ایله شام ایالتی توجیه ایدلمش  
و ذاتاً متغلبه کر و هندن اولمق حسسیله دولتک کندوسنه امنیتی اولدینی حالدیه متعاقباً  
طرابلسلی علی پاشانک اعدامی اوزرینه ناچار خطه مصر یه نیک اصلاحاتی دخی اکا  
احاله بیورلمش ایسه ده کندوسنی خسته و عمل مانده اوله رق قافله حجاج ایله دخی  
چیقه میوب حجاج ایله کوله سی سلیمان پاشایی کوندرمه ک مجبور اولمش و کندوسنک بقای  
حیاتندن یاس کلمش اولدینی جهته و فائنده هم اقطار شامیه بی اختلالدن وقایه ایتک  
و همده جزارک بونجه سنه لردنبرو ادخار ایتدیکی بی نهایته اموالی ضبط ایله خزینده ولته  
ادخال یلمک اوزره بروجه بالا منصبی حلب والیسی ابراهیم پاشایه توجیه بیورلمشیدی .  
جزار پاشا غایت خونریز و غدار اولدینی حالدیه پک متجسس و خرده شناس اولدینی  
جهته پک چوق ایشلرک کیفیتنی قبل الوقوع کشف ایدر اولدیغندن بو مثلوه احوالنه  
کیمی کرامت و کیمی استدراج دیوب بعضیلر دخی علم جعفرده مهارتنه قائل  
اولورلر ایدی .

الحاصل مورخینک تحریرینه نظر آغایت قیاق و انجامین بر وزیر و زر آیین اولوب  
سنی یمش ایله سکسان آره سنده اولدینی حالدیه اجل موعودیه وفات ایلمشدر .

### \* وقایع سوریه \*

بروجه بالا جزار پاشا وفات ایدیک دأره سنده اک زیاده متحیز و متمیز اولان شیخ  
طه سالف الذکر اسماعیل پاشایی زنداندن چیقاروب جزارک دأره سنی اکا تسلیم  
ایلدی و کویا جزار پاشا مقامنی اکا وصیت یلمش دیوخالقه اعلان اولندی بو وجهله  
اسماعیل پاشا جزارک البسه سنی کیوب میدانه چیقدی و جزارک بی نهایته خزان

واموالنی ضبط وعسکرک یدی بیک کیسه یه بالغ اولان گذشته علوفه لری اعطا ایله کندوسنه جلب و ربط ایتدکن صکره هر طرفه بیورلدیلر نشر ایله جزارک مقامه قائم اولدیغنی اعلان ایتدکه داخل ایالتده بولان قصبات وقری اهالیسی جزارک ظلمندن خلاص بولدقلرینه تشکراً پک اعلا دیدیلر وشعرا معرض شکر ایتده پک چوق شعر لر نظم ایتدیلر .

فقط بیروت اهالیسی جزارک زمانده جبل لبنان اهالیسیله پک چوق معارضه و مجادله اوزره بولندقلرندن بوکره جبل طرفندن بیروته تعرض اولنور اندیشه سنه دو شمشلر ایدی حاکم جبل اولان امیر بشیر ایسه شهر وقری اهالیسی حایه و ابنای سبیلی تسلط اشقیادن وقایه ایچون طرق و مسالکک محافظه سنه اعتنا ایتشیدی و جزارک وفاتی اوزرینه شامده کی متسامی تلاشه دوشه رک ممالک و مسالکک محافظه سی ایچون امیر بشیردن استمداد ایتدکه اوامر دولت علیه نک ورودینه قدر اطراف و انجانی محافظه یه غیرت وبعده جزارک یرینه تعیین بیوریه جوق ذاته اطاعت ایلم اما اسماعیل پاشا حقه ده دولتک اراده سنیه سی کلدکجه آنک اوامرنی طانیهم دیو امیر بشیر طرفندن جواب ویرلشدر امیر بشیرک بویه رضا جویانه طورى بعده دولتک معلومی اولدقه حقه ده باب عالینک تزیاد امنیت و اعتمادینه بادی اولشدر .

و جزارک وفاتی خبری حبله واصل اولدیغنی کبی بالاده اشعار اولندیغنی اوزره ابراهیم پاشا حلب والیسی اولان اوغلی محمد پاشایی حلبده براغوب کندوسی شامه عزیمت ایدرک هر طرفه بیورلدیلر نشریه جزارک وفاتندن مقدم منصبک کندوسنه توجیه بیورلمش ایدوکنی اعلان ایلدی متعاقباً استانبولدن دخی اول حوالی یه اوامر علیه کوندریله رک حجاز سرعسکر لیکله شام و طرابلس و صیدا ایالتلرینک ابراهیم پاشا عهده سنه توجیه بیورلمش ایدوکی اعلان بیورلدى .

انجق ابراهیم پاشانک حلبدن خر و جندن اوچ کون صکره حابلو عصیان ایدرک محمد پاشایی حلبدن طرد و اخراج ایلدیلر اهالینک دلخواهنه موافقت اولنسه دهها زیاده شماروب حکومت اسافل اله کچه جکندن و جبراً والی جدیدی شهره ادخال ایچون برقوقه عسکریه سوقته دخی حال و زمان مساعد اولدیغندن اصلاح ذات البین ایچون در سعادتدن مباشر مخصوص کوندریلوب بوکا بذل مساعی ایتک اوزره حلب متفذلرندن جابری زاده یه دخی امرنامه سامی کوندردى .

ابراهیم پاشا شامه واصل اولدقدن صکره جزار پاشا کتخداسی و امیر الحاج وکیلی اولان میرمیران سایان پاشا دخی قافله حجاج ایله حجازدن عودت ایدرک شامه کلوب

ابراهيم پاشا ايله كورشدي و ميانه لرنده حسن الفت و امتزاج حاصل اولدي .  
بعده قلعه سانور صاحبي اولان يوسف جرار دخي شامه كابوب جزارك زماننده  
سليمان پاشا ايله ميانه لرنده كي ماجر الر كان لم يكن حكمنه قونيله رق سليمان پاشا كندوسنه  
اكرام و التفات ايله كا كان جبل نابلسك امر و اداره سني آكا حواله ايلدي .  
و بو ائساده امير بشير طرفندن شامه كوندر يلان مأموره دخي ابراهيم پاشا طرفندن  
خلعت الباس ايله اكرام اولندي .

شام و حلبك توجيه امر لرني ايصاله مأمور اولان مير اخور ثاني فيضي بك عهده سنه  
بو ائساده رتبه وزارتله وان محافظني توجيه بيورلمغله هان وان جانبسه عزيمتي  
كندوسنه اشعار بيورلمشدر .

بروجه مشروح اسماعيل پاشايي زندانندن اخراج ايله حكومتى كندوسنه تسليم  
ايتمش اولان شيخ طه جزارك بر خيلى اموالني اختلاس ايدرك عمي زاده لر ينه  
توديعاً بر كمي يه قويوب آشورمش و صيدا متسلمي بر بر مصطفى اغا آنره تصحب  
ايدوب شيخ طه نك جنكه عزيمتي دخي شيوع بولمش اولديغندن اسماعيل پاشانك  
سر كر ده لرى بالاتفاق شيخ طه يني و اوغاني و كرد طائفه سندن اولان بر چوق اتباعني  
اعدام ايلمشر ايدى .

اسماعيل پاشا ذاتاً فرارى بر شخص اولديني حالده بو وجهله عكايي ضبط ايتسي  
بني و عصيان شككنده بر حركت ايسه ده حسب الحلال كندوسنه استمالت يولنده معامله  
اولنه رق اكر جزارك مخلفاتني كاملاً تسليم ايدر و عرض واديله عكادن چيقوب  
كيدر ايسه اناطولى قطعه سنده ايتديكي ايالت ايله وزارتني ابقا و جرائم گذشته سي  
عفو ايله حققنده مضى ماضى معامله سي اجرا اولنمق و مخالفت ايلر ايسه اعدام  
قلمق اوزره بر آ شام و اليسى ابراهيم پاشا و بجرأ دخي دونماي هايون ايله قبودان  
دريا عبدالقادر پاشا مأمور اولديلر .

قبودان پاشا دونما ايله عكا يشكاهنه كلديكي كبي ابراهيم پاشا دخي سليمان پاشا ايله  
برلكده عكايه واصل اولدق لرنده برأ و بجرأ قلعه يني محاصره ايتديلر و طرفين  
بيننده خيلى محاربه لر وقوع بولديسه ده قلعه بك متين اولديغندن تسخير ايده مدكلرى  
جهتله حصر و تضيقه دوام ايلديلر .

و موسم حيج و روونده ابراهيم پاشا قافله حجاج ايله حجازه كيتمك اوزره شامه  
عودتنده سايمان پاشا قلوب عكالك محاصره سنه دوام ايلدي و بو ائساده جده  
و اليسى ابو مرق محمد پاشا دخي بر مقدار عسكر ايله اورايه كلدى .  
محمد پاشانك اورايه و رودينه سبب بو ايدى كه و هاييلرك تجاوزاتي دولت عليه يه

بر عظیم غاٹہ اولدیغی خالدہ مدینہ منورہ محافظی میر میران سعید پاشا دن  
 ۱۵ محرم تاریخہ مؤرخا بعض اکابر دولته وارد اولان بحریرانک خلاصہ سندہ  
 (وہابیلر ابنای سبیلی حرمینہ کلوب کیتمکن منع ایتشلردر مکہ مکرمہ یہ جدہ دن  
 ذخیرہ جانب اولنغله اورادہ کلی مضایقہ یوق لکن مدینہ منورہ نك ذخیرہ سی  
 ینبوع اسکله سندن جلب اولنغله محتاج اولوب حالبوکه یولار مسدود وقافلر  
 منقطع اولدیغندن بوراسی قحط وغلادن مضایقہ اوزرہ در ایشک بو پرسہ یہ کلسنه  
 سبب شریف غالبدر مرحوم یوسف پاشانک نصیحتنی اصغالیتمیوب ایشی بودر جہلرہ  
 واردردی مرحومک حال حیاتندہ کتخداسی اولوب اتی دفعہ مرسولا وہابی  
 معلونک دیار خرابنہ سفارتہ کیدوب کلمشدر . بو مادہ نك حقیقتی رعنا معلومدر  
 یوسف پاشا حقیقت حالہ کسب اطلاع ایتدکده وہابی ایله محاربه کلی عسکر ومصرفہ  
 محتاج اولدیغی کورہ رنک صلحدن بشقہ چارہ بولمدی وبوصورتہ یدی سکر سنہ مدینہ  
 منورہ واطرافنک حالی امن واستراحت اوزرہ کچدی آنک وفاتندن صکرہ مکہ شریفی  
 فسخ صلح ایتمکده وہابی فرصت بولہ رق بتون عربانی ضبطنہ آلدی بوندن صکرہ  
 وہابی مسئلہ سی مکہ شریفارینک کورہ جک ایشلری دکدر قرق الی آدملہ  
 بن بورادہ نہ یاپہ بیلورم اگر جدہ والیسی کورر دیرسہ کز جدہ اسکله سنی محافظہ  
 ایدہ بیلورسہ دین ودولتہ آندن اعلی خدمت اولماز مدینہ منورہ دہ ینہ مدبر ومقتدر  
 بروزیرک محافظ بولنسی لازمدر وہابی قبرلر اوزرندہ کی قہلری حرامدر دیو  
 ہدم ایدیور بودہ طمعندن ناشیدر کچن سنہ کربلا وقعہ سندہ مال قارونہ مالک اولدی  
 شمدی تربہ سعادتک علم شریفنہ وحجرہ معطرہ ایچندہ کی مجوہراتہ طمع ایتمکده در  
 وبویلہ قالمورسہ اخذ ایدہ چکنندہ اشتباہ اولنمہ ) دیو محرر بولنمشدر . بو ائنادہ  
 جدہ والیسی شریف پاشانک دخی وفاتی خبری کلمکله احباب کفایتدن برزاتہ  
 جانب میریدن کلی اعانہ اولنہ رق حرمینک محافظہ سی ضمنندہ جانب حجازہ  
 کوندرلمسی لازم کلدیکندن کیفیت مجلس مشورتنہ لدی المذاکرہ بعض حضار  
 طرفندن عظم زادہ نصوح پاشانک اقداریلہ جدہ والیسی نصب وتعیین اولنسی  
 تنسیب اولنمش ایسہدہ نصوح پاشا براق دفعہ وزارتی رفع والنغالیلہ نفی واجلا  
 اولنمش وبالدفعات منفا سندن فرار ایلہ دولتہ امنیتسزک ظہور ایلمش اولدیغندن  
 بویلہ نازک برایشدہ استخدای او یہ ماز دیورد اولنہ رق اقدجہ اہالینک اشتکاسی  
 اوزرینہ سیواس والیلکندن عزل ووزارتی رفع ایلہ توقاددہ اقامتہ مأمور ایدلمش  
 اولان ابومرق محمد پاشانک قوہ کافیه ایلہ جانب حجازہ ارسالی تخطر وتصویب اولنغله  
 وحجازہ کیدہ بیامک ایچون لاقفل اوچیک عسکر استصحاب ایلمسی لازمہ خالدن  
 بولنغله مشارالیه عہدہ سنہ جدہ ایالتی بالتوجیہ جیب ہایوندن وواقفدن بیک وایراد

جدید خزینه سندن بشیوز کیسه آچه نقد و بشیوز کیسه دخی حواله اعطا و احسان و سریعا دآره سنک تنظیمنه معاونت اولمشی شام و ایلسنه اشعار و فرمان بیورلمش و در سعادتدن کندوسنه درت قطعه خفیف المؤمنه سرعت طوپلری کوندرلمش ایدی .

ایشته بومناسبتله محمد پاشا عکا اردوسنه و اروب سلیمان پاشایه قوۃ الظهر اولمشیدی آنجق اسماعیل پاشایه و دآره سی خاقنه کلیتو هدایا و عطایا تقدیم ایدرک جزارک بالجهه مخلفاتی تسایم ایتمک اوزره عفو یله صیدا ایالتنده ابقاسی استدعاسنده بولنوب بوجهته قپودان پاشا دخی آنک طرفنه میل ایله استدعاسنه مساعدده بیورلمشی در سعادتده انها ایتمش ایدی حالبوکه سلیمان پاشا دخی صیدا ایالتی عهده سنه توجیه بیوریلور ایسه جزارک بالجهه اموالی بولوب تسلیم ایده جکئی و فیما بعد امر و فرمان دولت علیه یه کردنداده انقیاد اوله جغنی تعهد ایتمش و در سعادتجه اسماعیل پاشایه مرجح کورنمکله عهده سنه صیدا یالتی بالتوجیه منشوری طرفنه کوندرلمش ایکن قپودان پاشانک تکرار تحریراتی کلوب اسماعیل پاشا امثالاً للامر مخلفاتک تسایم و اداسنه شروع ایله بر مقدار شی دخی و یرمش اولدیغنی اشعار ایلمش اولدیغندن ضروری صیدا ایالتی اسماعیل پاشا عهده سنده ابقا ایله سلیمان پاشایه منشوری کتوران تاتار اعاده اولمشدر .

بونک اوزرینه قپودان پاشا عودت و اوائل شعبانده در سعادتده مواصلت ایتدکه جزار پاشا مخلفاتی اولمق اوزره یمش بشیک یالیز آتونی ایله تخمینا بیک کیسه آچه لک قدر مرصعات و اشیای سآره کتوروب ایراد جدید دفتر دارینه تسلیم ایلمشدر .

و اسماعیل پاشانک صیدا ایالتنده تقرری مقابله سنده صدر اعظم و سائر اعظم دولت ایچون کوندرمش اولدیغنی مبالغ دخی آنلر طرفندن قبول اولنه میوب ایراد جدید خزینه سنه تسلیم ایتدیرلمشدر .

قپودان پاشانک بواجرا آتی نزد دولتده مقبول اولمیوب بلکه حقننده برنوع تهمت عد اولندیغندن همان صیدا ایالتی رتبه وزارتله مومی ایله سلیمان پاشا عهده سنه توجیه ایله اسماعیل پاشانک عکادن طرد و اخراجی امر نده کندوسنه معاونت ایتمک اوزره امیر بشیره و سائر لازم کلنلره اوامر علیه کوندرلمش و او اخر شعبانده قپودان پاشا عزل و وزارتی رفع ایله قورفدهده و مواقع سآره ده سبق ایدن خدمات مشکوره سنه حرمة کندو اموالنه طوقلمیوب فقط عکاده آدیغنی مالار جانب میری یه اخذ و استرداد اولنهرق بروسه یه نفی اولمش و یرینه بستانجی باشی اسماعیل اغا رتبه وزارتله قپودان دریا نصب و تعیین قلمشدر .

بوصورتله سلیمان پاشا صیدا و ایلسی اولوب عکاده اسماعیل پاشانی محاصره و اسماعیل پاشانک کاور طاغندن بحر آجاب ایلدیکی عسکر ساحل مقصوده چیقده میوب یاری

یولدن اعاده اولمغله اسماعیل پاشا قاعده کی عسکر یله چاقوب سلیمان پاشا اوزرینه هجوم ایتدکده واقع اولان محاربه ده اسماعیل پاشانک عسکری منهزم اولمغله شوخالده عکایه عودت ایده میه جکفی جزم ایله همان تبدیل قیافت ایدرک فرار ایتش و برقر به یه وصولنده اول قریه اهالیسندن اولوب اسماعیل پاشا ایله برلکده جزارک محبسسنده بولنانلردن بری اسماعیل پاشایی طانیغله طوتوب سلیمان پاشایه لدی الاخبار سلیمان پاشا طرفندن مأمور کلوب اسماعیل پاشایی اخذ ایله سلیمان پاشا نزدینه کتوردکلرنده در حال در سعادت کوندرلک اوزره برکمی بهارکاب ایدلمشدر یولده اعدام اولندیغی دخی سرویدر اسماعیل پاشانک اولوجهله فرارنده عسکری کافه سلیمان پاشایه تابع اولمغله سلیمان پاشا عکایه دخول ایله جزارک یرینه کچدی و بقیه متروکاتی ضبط ایتدی و جزارک یاننده رهن اولان امیر بشیر اولادیه امیر یوسف اوغانی صالحو یردی و عدالت مسلکئی طوتومغله جزارک تعدیسندن طانغامش اولان مشایخ ورعایا لرلو یرینه عودت ایدوب بوجهته اهل زراعت و تجارت چوغالدی امیر بشیر ایله مشایخ جبل دخی آنک او امرینه اطاعت ایدرک هر سنه علی جری العاده ویر کولرین و برر اولدیلر بوصورتله ایالت صیدا اهالیسی راحت بولمش و سلیمان پاشا دخی آز وقت ظرفنده پک چوق ثروت و مکنته نائل اولمشدر .

### \* وهابیلرک بعض احوال و حرکاتی \*

اول اثناده دولت علمه جه الک مهم مسئله وهابیلرک تأدیب و تربیه سی قضیه سی ایکن بوبابده اولنان تشبثاتک بر ثمره سی اوله مدی وهابیلر ایسه کوندن کونه تریدمکنت و توسیع مملکت ایتمکده ایدیلر و بو اوانده بصره اوزرینه هجوم ایدوب اولطرفده برشی پایه مدقارندن کلوب قصبه زبیری محاصره ایلدیلر وهابیلرک بو حرکتلری لدی الاستماع بغداد والیسی علی پاشا اولجانبه حرکت ایلمش ایسه ده وهابیلر طقوز کون قصبه زبیری محاصره ایتدکن صکره تسخیرندن مایوس اوله رق درعیه جانبه عودت ایتشلر ایدی .

علی پاشا درعیه سر عسکری نصب اولنهرق واروب وهابیلری قهر و تنکیل ایلمسنه انتظار اولنور ایکن یرندن حرکت ایتیبوده وهابیلرک عراق اوزرینه بو وجهله مهاجرلری ارکان دولتک انفعاله بادی اوله رق بوندن طولایی علی پاشا تویخ اولندی علی پاشا ایسه کتخدا ایکن لحسا اوزرینه کیتدیکنده چکدیکی محن و مشقتک هنوز آجیسنی اونوتامش اولدیغنه و درعیه یه وارنجیه دک کچله جک صوسز و ایصسز چولارک مشکلاتی درپیش ایدرک بر والی بوکا مقتدر اوله میوب دولتجه بر بیوک همته محتاج اولدیغنی بیلدیکنه منی بوسفرک درجه صعوبت و مشکلاتی و نقدر مصرف

و تکلفانه محتاج اولدیغنی در سعادتہ عرض ایله اعتذار ایتدکجه استانبولجه بو چولارک احوالی کرکی کبی معلوم اولدیغندن علی پاشانک بو مثللو اعذاری مقبول اولیوب هان وهابیلر اوزرینه حرکتی امر اولنوردی و بودفعه وهابیلرک قصبه زیری محاصره ایتلمی اوزینه بهمه حل درعیه اوزرینه حرکتی ایچون صادر اولان امر عالی برخصکی ایله کندوسنه ایصال اولندقدہ علی پاشا بوکا مقتدر اوله میه جغنی بیلور ایسهده بو امر قطعی اوزرینه چاره سز تدارکات سفریه یه ابتدار وهان بالنفس حرکت ایتک اوزره اولدیغنی بیانیله خصکی یی اعاده ایلدی و اوائل شعبانده اردوسیه بغداددن چیقوب حله جسرندن شامیه یقه سنه عبور ایله ایوب نبی علیه السلام حوالیسنده درت یچق آی قدر طولاشمش ایسهده درعیه یه کیتمک قابل اوله میوب فقط امر پادشاهی یرینی بولمق اوزره اربیل میرلواسی اولان همشیره زاده سی سلیمان بکک تحت قوماندہ سنده اوله رق برکزیده فرقه عسکریه ترتیب ایله جبل شمره طوغری سوق و تسریب ایلمش ایدی سلیمان بک بو فرقه ایله اول طرفری کشت و کدار و راست کلدیکی وهانی فرقه لرینی تارمار ایدرک خبلی اموال غنائم ایله عودت ایلمشدر انجق اوغرادقلری صوسز و اوتسز وادی و بیابانلرده عظیم مشقتلره دوچار اوله رق عسکرینک کیمی صاغر و اعمی و کیمی خسته و سرسام اولوب پک پریشان حالده عودت ایتمشدر .

وهابیلر ایسه جانب عراقه تعرض ایله برابر حرمن شریفین طرفنی تضیقندن خالی دکلر ایدی حتی خلال محرمده کلوب جده یی محاصره و مهاجمات متوالیه یه اجتسار ایتمشلردی لکن طوب و خبیره ایله مدافعه اولنمغه کلی نلفات و یردکدن صکره خائباً و خاسراً عودت ایتمشلردر .

امیرالحاج وکیلی اولان جزار پاشا کتخداسی سلیمان پاشانک مکّه مکر مه دن عودتنده شریف غالب افندی حضر تلی آندن بر مقدار عسکر ایسته یوب و سلیمان پاشا اعتذار ایلمش ایسهده قبول ایتیموب طلب و تکلیفده اصرار ایتمکله ناچار سلیمان پاشا دخی مکّه مکر مه ده برقاچ یوز کزیده ترک عسکری براقشیدی بو عسکرک وهابی محاربه لرنده فوق العاده بارارقلری ظهورده کمشدر و بر اراق وهابیلر کلوب ینبوعی ضبط ایتمشدر ایسهده شریف غالب افندی عرب و ترک عسا کرندن مرکب اوله رق برفرقه ترتیب و بجرأ جده دن سوق ایله ینبوعی وهابیلر یدندن استیخلاص ایلمشدر ینبوع محافظه سی ایچون مصر دن کوندرلش اولان عسکر دخی متعاقباً ورود ایله شریف غالبه قوت الظهر اولمشدر . کله لم مصرک احواله .



## \* وقایع مصریه \*

خورشید پاشا مصرده یرلشوب اداره امور جمهوره ابتدار ایتمکله مقتول علی پاشا برادری اولوب بالاده بیان اولندیغی اوزره رشیدده اخذ و گرفت ایله مصره کتورلمش اولان مشهور سید علی قپودان اوائل محرمد مکرّم و متلفت اوله برق رشید جانبنه کوندرلمش و بو ائنده خورشید پاشانک و الیلک امری کلوب قرانت اولدقدن صکره اوائل صفرده محمد علینک عسکری قلعه دن چیقوب خورشید پاشا قلعه یه صعود ایله و الیلک مقرینه قعود ایلمش ایدی .

کوله منلر بر طاقم عربانی استصحاب ایله اوائل محرمد مصری محاصره یه ابتدار ایلمش اولدقلرندن محمد علی انبابه یقه سنه کچوب متریس آلمش و محرّمک اون برنده کوله منلر متریس لر اوزرینه پک شدتلو هجوم ایدرک درت ساعت قدر تمتد اولان محاربه ده کوله منلرک مشاهیرندن بر خیل سی تلف اولمش ایسه ده ارناودلر متریس لر دن چیقوبده کوله من سوار یسیله میدان جنکی ایدمه دکارندن کوله من و عرب عساکری مزروعاتی اتلاف ایدرک اطرافه منتشر اولوب کویلولر اوزرینه آغر ویرکولر طرح و توزیع ایلدیلر و طرق و مسالکی سد ایله خارجدن مصره آمد و شد منقطع اولد یغندن اسعارده غلا پیدا و مال صندوقده زیاده مضایقه رونما اولدی .

بناء علی ذلک مصارف عسکریه یه قارشولق اولمق اوزره امرانک حرملری اوزرینه برر مقدار جریمه طرح اوله برق تحصیلی ضمننده قوناقلرینه قره غوللر وضع ایله تضییق اولندیلر .

حالبوکه بیوک الفی محمد بک ایله حسن بک ممالکیندن اولان عثمان بک مقدمجه عرض مطاوعت یولنده خورشید پاشا ایله مخبریه ابتدار ایتمی اوزرینه الفی یه جرجا و عثمان بک قبا متصرفقلری احاله اولمش ایکن بیوک الفی امرای حرملرینک بو وجهه تضییق اولدقلرینی بهانه ایدرک عرض دعواسی بشقه داعیه یه بکزه من بوکا نفوس بشریه تحمل ایدمه من بوفناقلره بر چاره بولمق اوزره عثمان بک ایله برلکده مصره کلمکه قرار ویردک بزم ایچون جیزه ایله قصر عینی تخلیه ایدیکز دیو خورشید پاشایه خبر کوندردکده خورشید پاشا طرفدن اطاعتکنر و ارایسه واریکنز جانب قبلیده حکومت ایدیکز و اورانک اموال میریه سنی کوندریکز بوراده ایشکنز بوق دیو جواب قطعی ویرلمکله خلال ربیع الاولده بر طرفدن ابراهیم بک ایله بر دیسی عثمان بکک عسکرلری مصری تضییق ایتمکده اولدقلری حالد بر طرفدن دخی بیوک و کوچک الفی بکلرک طاقلری جیزه یه قدر کلوب کیدر و اهالیدن ویرکو و سائره اخذ و غضب ایدر اولدیلر .

اوائیل ربیع الآ خرده واقع اولان بر میدان محاربه سنده کوله منلر محمد علینک سوار یسنى بوزوب طرا جهته هجوم ایله اوراده کی برج دیری ارناودلرک الدن آلدیلر و محمد علینک طاقنی مصردن چیقاروبده کندولریله بالاتفاق مستریحاً مصرده او طور مق اولی اوله جغنی خورشید پاشایه خیر خواهانه اخطار سیاقنده آنکله محرمانه مخابریه قیام ایندیله .

حالبوکه مصرک کوله منلر یندن تخلیصی اوتهدنبرو دولتجه ملتزم بر کیفیت اولدیغدن بشقه اول ائنده خورشید پاشا النده برشی اولمیوب ایش محمد علینک یندده ایدی و بوملابسه ایله محمد علی بر خدعه حربیه ترتیبه موفق اولدی . شویله که : اظهار عجز یولنده امرا ایله مخابریه ابستار ایدرک مصالحه طلبنده اولوب امرا دخی بوکا آلدانه رق محمد علی نی ضعیف کوروب احتیاطی الدن بر اقدقلمی حالده محمد علی درت بیک عسکرله کیجه طرا طرفنده کی کوله منلری بغته باصوب جمعیتلری تارمار ایلدی و ربیع الآ آخرک اون دردنچی کونی شبره جوارنده واقع اولان برخوزریزانه محاربه ده طرفیندن تلفات کثیره وقوعیله غالب و مغلوب تعین ایتمکسزین فریقین اردوگاهلرینه چکلمش ایکن کیجه محمد علینک عسکری شبخون ایدرک امرانک متریسارینه دخول ایله کوله منلری قیروب قاجر دیلر بونک اوزرینه کوله منلر اراق اورالرده طوره میوب پراکنده و پریشان اوله رق خانکه و ابوزعبل طرفنده طوپانوب و بعده طاع آرقه سندن کچوب جانب قبلی به کیتدیله .

امرای مصریه نك بوحر کتلردن غرضلری مصره تقر بلرنده طوائف عسکریه نك برخیلیسینی کندو طرفلرینه جلبله مصره کیرمک ایدی مصرده کی عسکر ایسه هپ محمد علی به مربوط اولدقلرندن بوامککاری برشیئی منتج اولدی .

بوصورتله مصر محاصره دن قورتلدی ایسه ده اوست طرفلری کوله منلرک النده اولوب مصرک انباری حکمنده اولان صعیددن ما کولات کله مز اولدیغی جهته درون مصرده حقط و غلاظهوره کلوب بر طرفدن دخی ارناودلرک مظلوم و تعدیاتندن طولای اهلای مصر قاهره عرض شکایت ایتمکده ایدیلر خورشید پاشا ایسه بونلرک دفعنه مقتدر اوله مدقندن بشقه عسکرک تعییناتی ویره بیلمک ایچون آنچه تدارکنه مجبور ایدی .

ایشته بوائنده ینبوعک محافظه سی ایچون مصردن بر باشبوغ ایله بر مقدار عسکر ارسال اولنق اوزره در سعادتدن امر عالی ایله باشبوغ اوله جق ذاتک اسمی طولدی برلق اوزره اسم محلی آچیق اوله رق بر قطعه میره یرانلق امری کلش ایدی . چونکه بالاده بیان اولندیغی اوزره بغداد والیسی درعیه اوزرینه حرکته اول طرفدن وهابیلری اشغاله مامور اولوب امیرالحاج ابراهیم پاشا دخی حرمین شریفینه حرکت

ایده جکی کبی جده والیسی نصب اولنان ابو مرق محمد پاشا قوه کافیه ایله کنڈک شام طرفندن حجازه عزیمت ایتمک اوزره اولوب انجق مدینه منوره نك ذخیره جه مضایقه سی اولدیغندن جانب مصر دن اورایه ذخیره وسائر ه سوق وایصال اولنق اوزره ینبوع اسکله سنک تحت محافظه ده بولنسی لازمه حال دن بولندیغنه مبنی مصر دن اورایه بر محافظ کوندرلسی امر اولنمشیدی خورشید پاشا بومأمور تی رؤسای عسکره تکلیف ایلدی و مقصد اصلسی بر تقریب ایله محمد علی بی مصر دن چیقار و بده حکومتی اله الملق خصوصی ایدی محمد علی ایسه مصری بنسه یوب و خلعت ولایتی قدینه چسبان کوروب انجق کمال وقار و تمکین ایله طاوران هرق ولایتک مقتضای مصلحت اولق اوزره طبیعتیله کندوسنه توجه ایلمسنه منتظر ایدی خسرو پاشای مصر دن چیقار و بده خورشید پاشای کتور مسی دخی بومطالعیه مبنی اولق کرک ایدی .

بناءً علیه محمد علینک مصر دن چیقاق احتمالی اولیوب طاهر پاشا برادر لری حسن بك ایله عبدی بك دخی آنکله بسه ایتمش اولدقلر دنن اکا مر بوط اوله رق آیرملری قابل دکل ایدی محمد علینک دیگر یار غاری اولان بهلشتلی احمد بك ایسه مصر ده کایتلو مال ایدنمش اولدیغندن بر تقریبله مصر دن یقینی صیرو بده مملکتته کیتمک امانده ایدی . بناءً علیه سر کرده لر ایچنده ینبوع محافظغه رغبت ایدر بولندیغندن خورشید پاشا کندو میراخوری علی اغای میره میرانلق ایله ینبوع محافظتی نصب و تعیین و مصر دن بر قاچ یوز نفر تحریر ایله ینبوعه کوندر دی بر منوال محرر ینبوعک و هابیلر یدندن استخلاص دن بر کون صکره علی پاشا بو عسکر له ینبوعه واصل اولمشدر .

سالف الذکر احمد بك بوئانده روم ایلی جانبنه کیتمش ایسه ده بر اراق تپه دلنی علی پاشا طرفندن مصادره اولنغانه مصر دن کتور مش اولدیغنی اموالی رفاه حال ایله صرف ایده مامشدر .

اوائل شعبانده در سعادت دن بر مأمور مخصوص ایله طاهر پاشا برادری حسن بکه ایکی توغ کیمکله قلعه یه چیقوب خورشید پاشا طرفدن کندوسنه میره میرانلق خلعتی کیدیرلش یعنی برادری طاهر پاشا یرینه کچورلش اولسنه نظراً محمد علی آنک معیتنه کیرمک لازم کلدی حالبوکه مصر ده تحشید و تغلب ایدن هیئت عسکر یه نك روحی محمد علی اولوب انجق اشبو حسن پاشا ایله برادری عبدی بك دخی ارناودلرک سر کرده لری اولق حسینیه آنک دودست بطش و بسالتی ایدی فقط حسن پاشا محمد علی کبی تدابیر جسمه نك عهده سندن کله میه جکی جهتله بویله بر بیوک طولانی چویره مزدی میره میران اولدیغنی جهتله دخی محمد علینک قومانده سی آلتنده بولنه میه جنی ملاحظه سنه کوره بوقوت بالطبع ایکی قسمه منقسم اوله رق خورشید پاشا بوندن استفاده ایله استقلال اوزره مصر ده حکومت ایلمک استردی حسن پاشا ایسه محمد

علی‌یه و یردیک‌ی بسه دن دونیموب کماکان آنک رفاقت و صداقتده ثبات ایله‌یک‌ی و آنک میر میرانلقیاه محمد علینک قوتنه قیصه کلمک ملحوظ ایکن معیتده میر میران استخدام ایدر اولدینی جهته شان و حیثیتی ترقی بولدی و اندن صکره حسن پاشایی و عبدی بکی آلوب صعید ایچنه عزیمت و امرای مصریه ایله جنکه مبادرت ایلدی .  
 کچن سنه کبی بوسنه دخی مصرده حج ترتیبائی اکیال اولنه مدیغندن محمل و صره سویش طریقیله کوندرلمشدر .

خورشید پاشا بروجه محرر علی پاشایی ینبوعه کوندردیکنی و سرچشمه محمد علی بی امرای مصریه اوزرینه اعزام ایتمکله طرق و مسالک آچیلهرق حر مینه مقدار کافی ذخیره دخی کوندره جکنی درسعادته عرض و انها ایلمش و باب عالیجه مصرک حقایق احوالی پکده لایقیله بیانه مدیکندن بو اجرا آته نظراً خورشید پاشا مصردن کوله مناری چیقاروب و ارناودلری تحت قومانده سنه آلوب استقلال اوزره مصرده والیک ایتمکله باشلادی ظن اولنه بوردی حتی مصرک واردات و مصارفه باقق ایچون بر دفتردارک نصبه لزوم کوریه‌رک مقصدما سویش کمرکیلیکی ایتمش اولان احمد افندی اوائل شعبانده مصر دفترداری نصب اولمشیدی حالبوکه مصرک آمر حقیقیسی محمد علی اولوب خورشید پاشا آنک عسکرینه تعیینات تدارک ایدر بر محصل حکمنده ایدی مع مافیله استانبولجه دخی محمد علی نامی بیانبوب وزارتق موضوع بحث اولمغه باشلامشیدی فقط مقصد آتی وزارتله بر محله کوندرمک ایدی آنک غرضی ایسه مصرده یرلشوب قالمق ایدی و دسترس اولدیغمز بر قطعه اسکی تشریفات دفترنده محمد علینک وزارتق بیک ایکی یوز اون طقوز سنه سی شوالنک یکریمی اوچی تاریخیه مؤرخ اولهرق مقیددر لکن بر مدت بونک اجرایی تأخر ایلمش اولدینی وقایع آتیه دن معلوم اولور .

بالاده اشعار اولدینی اوزره محمد علی صعید ایچنه کیدرک کوله منارله محاربه واکثریا غلبه ایتمکده اولوب هر کس نتیجه سنه منتظر ایدی بیچاره مصر اهالیسی فی الاصل کوله منلردن متفر اولدقلری حالده ارناودلردن دخی پک زیاده اذا وجفا کورمش اولدقلرندن قننی طرفک غلبه سنه دعا ایده جکلرینی بیلمیورلردی خورشید پاشا ایسه ایکی طاقتی دفع و تبعید ایله مصرده استقلال اوزره حکومت ایده بیلمک آرزوسنده اولهرق محمد علینک قوتی کسر ایتمک اوزره شام طرفندن بر مقدار دلیل عسکری جلبنه قرار و یرمشیدی .

\* بعض وقایع عربستان و احوال حجاج \*

مکه مکرمه قاضیسی فیض الله افندی واسط جمادی الآخرده وفات ایلمش اولدینی کبی

حاضر جواب و فن مطایبه و محاوره و وجودی نایاب اولان دیار بکر مولویتدن  
منفصل لطف الله ملازاده فیض الله افندی دخی بوسنه وفات ایتشد .

بالاده بیان اولندیغی اوزره رئیس و هابیان اولان سعود ایله مکالمه مأموراً جانب  
حجازه کوندر یلوب ایضای مأموریتدن صکره منصبی اولان قدس شریفه گلش اولان  
آدم افندی دخی بو اوانده فوت اولمشدر .

حجاج بوسنه جانب حجازده وهابی قورقوسی چکدکاری کبی پیاسدن کچرکن کوچک  
علی اوغلندن دخی خیلی اذا کورمشدر . شویله که : مرثه جی باشی شامدن عودت  
ایله اسکی شهر طرفلرینه ورودنده برکروه اشقا چیقوب کندوسنی نهب ایله عریان  
ایلمش اولدقلمری خبری آلدینیغی کبی بو کیفیت حکام و ضابطانک رخاوتلرندن نشئت  
ایتشد دیو بواشقیانک بهمه حال اله کچورلمسی ایچون او امر علیه نشر اولندیغی ائنده  
کوچک علی اوغلنک حجاجی پیاسده توقیف ایلدیکی خبر تأسف اثری آلمشدر .

تفصیلی بودر که عزیز سنجانغی متصرفی اولان کوچک علی اوغلی خلیل پاشا پیاس  
جاده سنی کسوب آره صره حجاجی تجریم ایتمکله ازاله وجودی لازم گلش ایسهده  
اوزرینه وارلدیغی حالد کاور طاغنه التجا ایدوب بو طاغنک ضبطی ایسه مشکل  
اولدیغندن تأدیب و تربیه سی ایچون بروقت فراغ و فرصت کوزهدلک اوزره براییکی  
سنه حجاج بشقه یولدن کوندرلکده طریق حجک تغیری موجب قیل وقال اولدیغی  
ائنده کوچک علی اوغلی دخی استغفای قصور سیاقنده در سعادت عرشحال تقدیم ایدرک  
فیما بعد حجاجی بلا اضرار آمناً و سالماً امرار ایده جکنی تعهد ایلمش اولدیغندن کافی  
السابق قافله حجاج پیاس طریقله کوندر یله رک پیاس و پیلان طرفلرندن معتاد اولان  
باجک اعطاسیله آمدوشد ایتمکده ایدیلر بوسنه حجاجک جانب حجازدن عودت ایله پیاسه  
ورودلرنده کوچک علی اوغلی ابتدا استقبال و ذخائر و سائر فر و ختمیه کویا تطیب  
ایتدکن صکره حرکت ایده جک اولدقلمرنده ادنه طرفه صاوشمش اولان قردلر  
عشیرتندن یوز بیگ غروش بقایا طلب و ادعا ایدوب بو آنچه ویرلمدکجه حجاجی  
صالیور میه جکی بیانیله صره امینی ادنه یه کوندرلکده ادنه متسامی مجرد حجاجی  
قورتارمق اوزره عشیرت مرقومه یی کوز مومنده پیاس سنجانغی داخلمنده واقع  
خواص طرفنده اسکان ایتک اوزره سوق ایلمک و مخالفت اولندیغی تقدیر جه یوز  
بیگ غروش ویرمک اوزره جعلی اوله رق برسند ویرمش اولسی اوزرینه کوچک  
علی اوغلی حجاجک سیلانی تخلیه ایلمش ایسهده رهن اوله رق حجاجک اشیاسیله مدینه  
منوره ملاسی دباغ زاده یی آیقومشدر حجاجه اصلا تعلق اولمان برعشیره تک پیاسدن  
ادنه صاوشمش اولسی بهانه سیله حجاجک اشیاسی رهن اوله رق آیقومه ق بروجهله

شرح و عقله صیغماز و دیانته یاقشماز بر حرکت و حشمانه اولدینی حالده کوچك علی اوغلی اوزرینه عسکر سوقله تأدیب و تربیه سنه مساعدۀ زمانیه اولمدیغندن ضروری عشیرت مرقومه نك خواص طرفنده اسکانی و بقایاسنك تحصیل ایچون اوامر شریفه اصدار اولمشدر .

\* روم ایلی وقایعی \*

عربستان جهتی منوال مشروح اوزره مختل و مشوش اولدینی حالده روم ایلی طرفنك اختلالی دخی هنوز بر طرف اولمیوب طاغلو اشقیاسیله اوغراشلمقده ایدی .

شویله که : بالاده بیان اولدینی اوزره اشقودره متصرفی ابراهیم پاشا روم ایلی ولی و سرعسکری نصب اولنهرق اشقیانك تأدیب و تربیه سی اکا حواله بیورلمش واشقیانك معین و یتاغی اولان کوملجنه اعیانی سلیمان اغا ایله فله اعیانی حسین بکک لزوم اعدام و ازاله لری دخی کندوسنه بیدیرلمش ایدی .

چونکه سلیمان اغا فی الاصل اشقیانکرو و هندن اولدینی حالده کوملجنه اعیانی مستان اغانك دائره سنه داخل اولوب کیدرک اکا بلوک باشی و مستان اغانك سیاستاً اعدامنده یرینه کچوب تغلباً کوملجنه اعیانی اولدقده دولته اظهار صورت اطاعت و اموال میریه نك اداسنه اعتنا و غیرت ایتمدیکنه الدانیله رق کندوسنه قوجی باشلیق رتبه سی دخی و یرلمش ایدی سلیمان اغا ایسه رفته رفته کسب ثروت و مکنت ایدرک دیگر بر قاچ قضانك اعیانلغنی دخی ضبط ایدوب کیدرک طورینی تغییر ایله مزاجنه او یغون کلیان اوامر دولت عامیه نك احکامنی عوق و تأخیر ایدر اولدی و ظاهراً دولته متقاد و باطنا طاغلو اشقیاسی ایله همدست اتحاد ایدی فله اعیانی حسین بک دخی بو حال و مشواره ایدی . بناءً علیه ایکسینکده اعداملر خفیاناً ابراهیم پاشایه امر و اشعار اولندی .

انجق شاید که سلیمان اغا بونیتی حس ایدوبده تکفور طغانی و چورلی طرفلرنده کندوسیه نهانی متفق اولان طاغلورلی تسلیط ایله دواتی اشغال ایدر ملاحظه سنه مبنی اشقیای مرقومه نك بر ولره تجاوز و تخطیلرینی منع ایچون چورلی طرفه معلم عسا کر شاهانه دن مقدار کفایه پیاده و سواری سوق اولنوب میر میران کر آمدن قرمان بکر بکسی عبدالرحمن پاشا دخی دائره سی خاقیه آر قه لرندن کوندرلمشیدی .

عبدالرحمن پاشا چورلی صحرا سنده نظام جدید عسکر یله برلشد کدن صکره ربیع الآخرک اون طقوزنجی کونی اورادن حرکت ایله ماغردیه و اورادن دخی جمع اشقیان اولان بلغار قریه سنه وارد قلرنده اشقیای مرقومه متریس و استحکام یاپوب مقاومت قیدنده بولمشلر ایسه ده نظام جدید عسکرینك آتشنه طیانه میوب بر قاچ یوز تلفات و یرد کدن صکره فرار و بلقانك اوته طرفه کدار ایلدیلر .

کیفیت روم ایلی والیسی ابراهیم پاشایه اشعار و اشقیانک استیصالی ضمننده و رانردن  
عسکر ار سالیله تعقیب اولملری اخطار اولندقدده بالقانک اوته یوزینه عسکر امراری  
ترسنکی اوغلی شبهه یه دوشوره جکندن ابراهیم پاشا اول جهته عسکر ارسانی مناسب  
کور میوب فقط امر استیصالری ایچون ترسنکی اوغله تحریرات کوندرمشدر .

بونک اوزرینه ترسنکی اوغلی دخی عساکر و افیه ایله هر ازغراد اعیانی مأمور  
ایدرک اشقیای مرقومه نیک یولارینی سد ایله بالدفعات وقوعبولان جنکارده اشقیانک  
برچوغنی تلف اولوب بقیه السیوفی پازوند اوغلنک دائره حکومتی اولان و دین  
ایالتی حدودینه داخل اولدقلرنده چونکه اول وقتک حکمنجه بو مثللو دره بکارینک  
بری دیگرک طیراغنه ایاق باصمق اکا اعلان حرب حکمنده اولدیغندن و کندولره  
دخالت ایدنلره صحابت بیدلرنده مقتضای مروت عد اولندیغندن ترسنکی اوغلنک  
عسکری و دین حدودندن عودت ایلمشدر روم ایلی والیسی طرفدن دخی اول  
طرفه عسکر سوق اولنسه یینه برودین سفری کشادینه سبب اوله بیله جکندن  
کیفیت باب عالییه عرض اولنمغله اشقیای مرقومه نیک استیصالری خصوصی مقام  
صدارتدن و دین محافظی پازوند اوغلی عثمان پاشایه امر و اشعار بیورلمشدر .

بوآناده ابراهیم پاشا ادرنه یه کلوب کتخداسی طاهر پاشانی مقدار کفایه عسکره  
کومانجه اوزرینه کوندردکده سایمان اغا مدافعه یه قیام ایلمش ایسه ده نهایت باشه  
چیقه میوب ماوای اصایسی اولان توقادجغه فرار ایتدی و اوراده دخی طوره میوب  
چرمنه ایکی ساعت مسافه سی اولان برقریه ده استقرار ایله باشنه برخیلی اشقیای جمع  
ایدرک مقابله یه قرار ویرمش ایسه ده هر طرفدن اوزرینه عسکر سوق اولنمغله  
اوراده دخی ثبات ایدمه میوب بالقانی مرور ایله طرنوی قضاسنه و رودنده ترسنکی  
اوغلنک عسکری اوزرینه هجوم ایدرک و برخیلی عونونه سی اتلاف ایله کندوسنی  
دخی حیا اخذ و گرفت ایله رنک برطاقم رؤس مقطوعه ایله برابر ابراهیم پاشایه  
کوندردیلهر انهای راهده کندوسی اعدام اولنهرق رؤس مقطوعی ابراهیم پاشایه  
وآنک طرفندن دخی استانبوله کوندرلمشدر .

بوآوانده فله اعیانی حسین بک و منکی عثمان بک و برادری ابراهیم بک ایله بعض  
هواداران تالیف و اشتمالت ایله نزد سرعسکری یه جلب اولمش اولدقلرندن  
توقادجقلی غائله سی برطرف اولدقدن صکره غره رجسده بونلر دخی اعدام ایله  
رؤس مقطوعه لری استانبوله ارسال ایدلمشدر .

معلم عسکر باشوغنی اولان سالف الذکر عبدالرحمن پشانک بووجهله اکمال مأموریت  
ایدرک استانبوله عودتنده حسن خدمتته مکافاته عهدده سنه رتبه وزارت احسان  
بیورلدقدن صکره بوآناده منصبی اولان قرمان جانبانه کیتدی .

بروقدنبرو روم ایلینک اصلاحاتنه چالشدجه اختلالی دوبالا اوله رق نهایت ته دلتلی علی پاشا مأمور ایدلده کنده دخی اثر موفقیت کوربا مایوب ارکان دولته حیرت الور مکه اشقودره متصرفی مشارالیه ابراهیم پاشا مأمور اولدقدده بوده علی پاشانک براشیدر آدن بر خیر اولدینی کچی بوندن دخی بر فائده کورلمز دیو بعض طرفردن اعتراض اولمشیدی بووجهله ابراهیم پاشا طاعلو اشقیاسنک جمعیتلرینی تارمار ایدرک سرکشانی ترهیب و کندو حسادینک سوزلرینی تکذیب ایله انظار خواص و عوامده بیوک شان و شهرت قزاندی و سعی مشکور و خدمتی مبرور اولدیغنه دائر کندوسنه فرمان مخصوص ایله تشریفات ملوکانه ارسال قلندی بونک اوزرینه ابراهیم پاشا کندوسنه ویرلمش اولان رخصت و استقلال ایجابجه لازم کلان موقعاره بشبوغارله عساکر کافیه براغوب اشقودره جاننه عودت ایتدی .

استانبول جوارنده بوجه مشروح طاعلو اشقیاسیه اوغراشدینی اثناده اوته طرفده دخی بلغراد دایمیرینک تعدیانندن ناشی صرپ رعایاسی عصیان ایتشلردی . شویله که : دایملر پوروز تکلیفیه و سائر تکالیف شاقه ایله صرپ رعایاسنی تضییق ایدرک برقاچ قوجه باشیلرینی ضرب و قتل ایتمش اولدقلردن صرپولور اجتماع واتحاد ایله برقاچ اهل اسلامی اعدام و قره یورکی نام سرکردنک تحت قومانده سنده برفرقه عاصیه تشکیل ایله بلغراد قلعه سنی محاصره دیه قیام ایتدیلر .

ینه بو اثناده قره طاع رعایاسی دخی عصیان ایدرک بودغورچجه اوزرینه یوریمش ایدی . صرپولور انجماکارک و خامتنی ملاحظه ایله نمچه لودن استمداد ایلمش اولدقلرینی در سعادتده مقیم نمچه ایلیسی اخبار ایتمکه ایشک برحسن صورتله تسویه سی بوسنه والیسی ابوبکر پاشایه حواله بیورلمش و صرپولوری تأمین ایچون روم پتریفی طرفندن نصیحتنامه یازدیرلمش ایدی قره یورکینک جمعیتی ایسه کوندن کونه تکثر ایدرک اگرچه بلغراد اوزرینه هجومنده خائباً و خاسراً عودت ایسه ده بو اثناده روسیه طرفندن صرپولورک جمعیتده مأمور مخصوص کوندیریلرک صرپولور عصیانه تشویق و تحریک اولمغله برابر روسیه نیک معاونتیه اطرافدن بر طاق اشقیای صرپستانه طویلا تمقده ایدی و بلغراد محافظی وزیر حسن پاشا پیر اولوب بو اثناده ایسه بلغراد یماقلرینه تمهیدینی ایقاعه مقدر برینک بلغراد محافظلغنه نصب و تعیینی الزم اولدیغندن مقدما بلغرادده محصلق ایتمش و بوجهتله سرحد احوالته کسب و قوف ایلمش اولان سایمان اغا رتبه وزارت ایله بلغراد محافظی نصب اولنهرق اول جانبه کوندیرلمشیدی .

بوسنه والیسی براییک بیک آدم ایله حرکت و بکوردن قلعه سنی پیشگاهنه مواسلت



ایدوب جواردہ بولسان صرپ کنز لری احضار ایله سبب جمعیتلری استفسار  
ایتدکده ایوم بلغراد قلعه سنده متحصن اولان درت نفر داییلرک ظلم و تعدیلرندن  
بیزار اولدقلری بیان ایتملی اوزرینه بوداییلرک استیصالنه مأمور اولدیغنی درمیان  
و صرپولر جمعیتلری طاعنمق و کماکان یرلرنده تمکن ایله رسم رعیتی اجرا ایتمک  
اوزره بووضع کستاخانه لری عفو و داییلرک طرد و یا اعدام ایله مضر تلمی دفع  
اولنه جغنی بیان ایتدکن صکره چونکه بوداییلر بلغرادده متغلب اولمغله قلعه دن  
جبراً اخراج لری مشکل اولدیغندن (قلعه ایچندن آنور) مثل مشهور یله عمل  
ایدرک مقدا داییلر طرفدن جم غفیر ایله قلعه یه آلمان ارناود سکا نلری رؤسا سندن  
قوشانجه لو خلیل اغا ایله نهانی مخبره ایدوب علوفه لری و یرلمک و جرائم گذشته لری  
عفو ایدلمک شرط یله فیما بعد مصطفی پاشا زماننده اولدیغنی کبی محافظلر معیتده  
استخدام اولنق اوزره ارناودلر اقتاع اولنه رق داییلرک قلعه دن اخراج یا اعدام لری  
خصوصی تعهد ایلدیلر .

بونک اوزرینه ابو بکر پاشا بلغراد اها لیسنه خطاباً درت نفر داییلرک قلعه دن طرد  
و تبعیدندن بشقه دولتک مطلوبی اولدیغنی بیان یله برقطعه بیورلدی تسطیر ایله بلغراد  
ارسال ایتمکین اهالی محضرنده قرائت اولدقده داییلر اهالی یه خطاباً بزم قلعه دن  
خروجزه راضی اولور میسکنز دیملریله اهالی دخی بزسزدن راضی یز و بو یولده  
بوسنه والیسی طرفنه محضر کوندریرز دیملری اوزرینه قوشانجه لی خلیل اغا اشاغی  
ویوقارو قلعه لری ضبط ایدیلرک داییلر یرلرندن صیچرا یوب ساحلده کی چنه  
قایق لری نه رکوب ایله همان آطه قلعه سنه فرار ایلدیلر کیفیت ابو بکر پاشانک معلومی  
اولیجق دردینک دخی اعدامی ایچون قلعه محافظنه خبر کوندرمکله در حال دردی  
دخی اعدام ایله رؤس مقطوعه لری خلال جمادی الاولاده در سعادت کوندرلمشدر .  
الحاصل سنین سابقه یه نسبتله بوسنه روم ایلی اصلاحاتی ایچمه ایلروله یوب هر طرفه  
آز چوق برانضباط حاصل اوله رق اهالی براز نفس آلمغه باشلامش ایسه ده صرپستانک  
اختلالی بو اصلاحات ایله بر طرف اوله میوب کوندن کونه تزیاد ایدرک بر طرفدن  
دخی روسیه لولر تحریک و تشجیعدن خالی اولدقلری جهتله صرپولرک دماغنه استقلال  
سوداسی صعود ایتمشیدی . و قره یورکی جمعیتی تکثیر ایتمکله برابر کندو  
حرکتته اک زیاده مانع اوله بیله جک پازوند اوغلی عثمان پاشا ایله باریشوب آنک طرفدن  
کسب اطمینان ایتدکن صکره وار قوتی جمعه دیرین نهری بوینه یوریمشدر  
قره طاغولردخی بتون بتون عصیان ایدرک روسیه باندره سی چکمه کباشلامش لرایدی .  
جزائر سبعة جمهوری اوچ سنه ده بر اداسنه متعهد اولدیغنی مال مقطوعی بوئانده

ارسال ایلمش اولدیغندن شعبانک دردنجی صالی کونی قپوقولارینک ایکی قسط  
مواجبی قبه آلتده ایفا اولدقدن صکره جمهور مذکورک وکیلی حضورهایونه چیقوب  
مظهر التفات اولهرق کرک کندوسنه وکرک رفقاسنه خلعتلر الباس قلندی .

\* بعض وقایع استانبول \*

اواخر جمادی الاولاده طوپخانیه ملاصق چبوقچی دکانندن ساعت درت بچقده  
ایکن آتش ظهور ایله طوپخانه قشله لری ودرت یوز قدر خانه ودکان محترق اولوب  
سائر محلاره سرایتی قطع ایچون ایکییوز قدر خانه دخی ضابطان معرفتیه هدم  
اولنهرق حریق هنوز اطفا اولندیغی ائنده خاصکویده بیوک اسکله جوارنده واقع  
بویاجی دکانندن آتش ظهور ایله آینهلی قواق پیشکاهندن سقار نام محله و آندن  
خبره جیلر قشله لری جوارنده طوغله خرمنلرینه منتهی اولنجه یه دکین بشیوز  
قدر خانه محترق اولمش و یوز الی قدر خانه دخی هدم ایدلمشدر .

اواخر شعبانده شیخ الاسلام اسبق مصطفی عاشر افندی وفات ایدوب نمازی سلطان  
محمد جامعنده بعدالادا بغچه قپوسنده واقع پدری کتبخانه سی حظیره سنده مقدا  
اعداد ایلمش اولدیغی مزارده دفن اولندی .

مرحوم مشار الیه دور محمود خانیده ایکی دفعه رئیس الکتاب اولان مرحوم  
مصطفی افندیکنک صلبندن بیک یوز قرق ایکی تاریخنده متولد و یوز الی یدی  
ذی القعدة سنده مدرس وطقسان بر ذی القعدة سنده بروسه وطقسان بش محرمنده  
مکه مکرمه ملاسی اولوب ایکییوز شعباننده استانبول قضاسیله و ذی القعدة سنده  
صدارت انطولی پایه سیله و ایکییوز ایکی جمادی الاولاسنده بالفعل انطولی صدارتیه  
و ایکییوز اوچ شعباننده صدارت روم ایلی ایله بکام قیلندقدن شیخ الاسلام حمیدی  
زاده استرقاب ایدرک کندوسنه حرص وطمع کی حاللر اسنادیله سنه مرومه شوالنده  
قسطنونی یه نفی واجلا اولمش ایسه ده حمیدی زاده ننگ عزلندن صکره اطلاق اولنهرق  
ایکییوز یدی سنه سنده مکرراً روم ایلی قاضی سکری واون اوچ ربیع الاولنده  
شیخ الاسلام اولوب بعد العزل بروسه یه نفی ایدلمش و برقاچ آی صکره اطلاق ایله  
در سعاده کتورلمش ایدی ساحلخانه سنده مقیم ایکن بوکره وفات ایلدی . صلاح  
وتقوی ایله مشار بالبنان و علم وادب وحسن خط ایله یکنانه زمان برذات جلیل الشان  
ایدوکی تاریخ واصفده مندر جدر .

\* ترسانه دفتر دارلغی احداث اولندیغی \*

دولت علیه استانبولک فتحندن صکره دونما تجهیزینه قیام ایله موقعک مساعدۀ

فوق العاده سندن استفاده ايدرك پك آزوقت ظرفنده دول بحريه اوروپاي تهديد ايدہ جك قدر دونما تدارك ايمش وساطان سلیمان زماننده قره دكر دولت عليه نك برحوضي مثابه سنده اولوب آقد كرده دخي غلبه سني اثبات ايتدكن بشقه هند دكز لر نده شان ونفوذني عامه عالميانه طاتمش ایدی .

بعده اوروپاده عمق زياده قاليونلر ايجاد اولنه رق يلكننجيك صنعتي ترقى بولغاہ دول بحريه اوروپا دونمالرينه غلبه قابل اوليوب بناء عليه كريدك فتحيه اوغراشلدیغی ائشاده دوشمن دونماسی كلوب آقدكز بوغازيني ابلوقة ايدر اولدی بونك او زرينه دولت عليه ده دخي قاليونلر ياپلدى وقاليونجی صنفی ترتيب ايدلدى وترسانه نك قديم عسكری اولان لوندلر ايتدالری اشبو نوظهور اولان قاليونجیباری استرقاب ايتديلر ايسه ده محارباتدن دائما قاليونلرك ايشه يرادیني كوريلنجه قاليونجیلر اعتبار بوله رق رفته رفته قدرغلر بتون بتون ترك ايله قوه بحريه دولت عليه هپ قاليونلردن عبارت اولمشدر .

لكن اوروپاده قاليونجیلق اسكى حائنده قالمیوب كوندن كونه ترقى ايدرك يتيشيه ميه جك درجه لره كلشیدی .

حالبوكه عقاب سلطنت سنيه نك اوج شوكت وسطوتده پرواز ايجون محتاج اولدیغی ايكي قنadden بری قوه بحريه در .

بناءً عليه وقایع تاريخيه سني يازمقدمه اولديغمز سلطان سلیم ثالث دورنده نظامات جدیدیه تشبث اولنديغی صره ده قوه بحريه نك اكانه و بوباده اوروپاجه مشهود اولان اسباب ترقينك استحصالنه سعی اولتمقدمه ایدی .

قوه بحريه نك تزیدی ايسه آچه صرفه محتاج اولدیغی جهتله اول امرده ترسانه عامره نك امور ماليه سنه نظام و یرمك لازمه حالدن اولسليه ترسانه امانتی الغا اولنه رق پارس سفارتندن انفصال ايله قریب العهدده در سعادت كمش و خیلی وقت فرانسه ده بولمغاہ اوروپانك اصول اداره سنه كسب وقوف ایلمش اولان سیدی علی افندی ذخیره ناظرينه مقدم اولق اوزره شق ثالث اعتباريله ترسانه عامره دفتر داری نصب وتعیین وقور آره سنده مستقلاً بر خزینه تشكيل ايله قوه بحريه نك درجه كفايه به ابلاغی امر وفرمان بیورلمشدر .

اولوقت دولت عليه نك سلامتی ايجون قوه بریه وبحريه نك اصول جدیده اوزره تنظیمدن بشقه چاره اوليوب سلطان سلیم خان حضر تلی امور ملكيه سنی ايجاب حال وزمانه توفیق وقوه حربيه سنی اوروپا اصول جدیده عسكریه سنی اوزره

تنظیم و تنسيق خصوصاً رينه فوالعاده همت ايدرك بو يولده خدمت ايدە جك خيلى ذاتلر دخى يتشدر مشيدى .  
 فقط اسكى او جاقلر دخى باقى ويكيچريلر كوندن كونه نظام جديد حقنده رقابت و عداوتلرى متزايد و مترقى اولديغىندن بر وجه آتى دولت عايه نك مشكلاتى آرتقمده ايدى .

\* احوال عسكريه حقنده بعض مطالعات \*

يكيچرى و دوشمره غلاملرى و عجمى اوغلانلرى تعبيرلردن دخى اكلاش ايدى و جهاه يكيچرى وقتيهه بر يكي عسكرو اولمق اوزره ايجاد اولنوب خريستان چو جقلردن طو پلانيلان نفلر لر عجمى قشله لر نده تر بييه و تعاليم اولدقدن صكره يكيچرى اور طه لر ينه آلنور و بو جهتهه يكيچريلر قول طائفه سى تعبير اولنور ايدى و جهاه سى بيكار و قشله نشين و مضبوط و منقاد بر عسكرايدى مؤخر آ خر ستيا نلردن دوشمره اصولى ترك اياه اهل اسلامدن يكيچرى تحرير يينه رخصت و يرلدى اهل اسلام ايسه سر بستلكه مألوف اولمق حسابيه ضابطارى طرفلردن كندولره قول معامله سى اولتمق مشكل اولدى و آرتق يكيچرى تأهلدن منع اولنه ميوب تأهل ايدنلره ايسه قشله لر دن طيشارو قالمغه رخصت و يرلك لازم كلدى و رفته رفته شيرازة نظامات عسكريه بتون بتون مختل و پریشان و قشله لر خان او طه لرى كى بعض بطالانه و ايشه ير اماز بيكارانه مقرر و مكان اولدى و كثر ت اوزره ظهوره كلان سفر لر ده سردنكچدى ير اقلرى كشاد اياه خار جدن هر كيم اولور ايسه اولسون تصحيح بدر كاه قانمق اصولى معمول به اولغله يكيچرى اور طه لرى بر طاق نيدوكى بلور سز اشخاص و اوباش اياه طولدى و بو طريق اياه طشره اهاليسنك چوغى يكيچرى نام و عنوانى آلدى . كرك استانبولك احباب حرف و صنايع و كرك طشره لر ده اولو جهاه تكثر ايدن يكيچرى طاسلاقلرى يكيچريلك عنوانيه كزیده مكاسب و تجار اتى ضبط ايدرك اصناف كيسه سندن كسب ثروت و سامانه آلشديلر اهل عرض صنفى دخى آنلرك مغلوب و مقهورى اولدقجه عرض و ناموسلر ينى محافظه اچون بالضروره يكيچرى سلكنه داخل اولديلر بعضيلر دخى علوفه آلمق و طور ناجيلىق و خاصكى تقاعدلىكى و قشله متوليدلىكى كى بر دير لكه نائل اولمق اوزره يكيچريلكه رغبت ايتديلر بو وجههه كيدرك هر كس يكيچرى نامنى طاقدى و اصنافدن اولنلر دكانلر ينه منسوب اولدقلرى اور طه لرك نشانى تعليق ايتدكلر ينه قناعت ايتيوب خلاف عقل و شرع اوله رق بو نشانلرى اكنه

و مرکب ایله بدنلرینه نقش ایندکاردن بشقه بعضیلری سنک مزارلرینه دخی نقش و نکار ایله رسوای عالم و اعجوبه روزکار اولدیلر .

الحاصل یکچریلک بر قوری نام و عنوان اولوب دولته عصیان ایتک اوزره بو عنوان اکر چه مدار اتحاد و اجتماع اولوردی . لکن سفرلرده بر ایشه یارامدقلری و یارامیه جقلری ثابت و معلوم اولمغله دیگر بر صنف عسکر تنظیمنه دولت علیه جه لزوم صحیح کوردلی و بوستانجی او جاغنه ملحق اولمق اوزره نظام جدید عسکری ایجاد و ابتدا لوند چفتلکننده بر او طه کشاد اولنه رق مذکور چفتاک اغاسی ولی اغا قوچی باشلیق رتبه سیله او جاق اغاسی نصب و تعیین ایدلدی بعده اسکدارده بر اورطه دها آچیلوب آکا دخی فی الاصل مدرسیندن بولنان عمر افندی اغا اولدی و علی الدوام عساکر مرقومه نك اوروپا اصولی اوزره تعلیملرینه اعتنا بیوردلی و در سعادتجه بوکا اقدام اولمغله برابر اناطولیده دخی پیدر پی پیاده و سواری نفرات جدیده تحریر ایله عدد و مقدار لرینک تکثیرینه چالیشلدی و بو باده جبار زاده ایله علائیه متصرفی اولان علائیه لی عثمان پاشا زاده قاضی عبدالرحمن پاشا طرفلرندن پک چوق آثار غیرت و معاونت کوسترلدی .

بو وجهله سلطان سلیم خان حضر تلی نظام جدیده زیاده اعتبار ایتمکله آکا مخلص و خیر خواه اولنلر دخی بوا مر اهمه اعتنا ایدوب حتی بغداد و ایسی مرحوم سلیمان پاشا ایکیوز اون درت تاریخنده هندستاندن (جون ریمود) نامنده بر انکلینز معاملی جلب ایله عسکر تعلیمنه باشلا تمشیدی .

بو طریق ایله عساکر معلمه نك مقداری کوندن کونه متراید اولمقده ایدی لکن آنلر تکثر و تراید ایتدکجه یکچریلرک دخی رقابت و عداوتلری تراید ایتمکله دولتک مشکلاتی ترقی بولمقده ایدی .

اولوقتک احوالی یکچری رؤساک عقلا سندن قوجه سکباناشی دیو معروف اولان ذاتک ( خلاصه الکلام فی رد العوام ) نام رساله سندن رعنا معلوم اولور سبب تألیفی بو ایشکله ولی عهد سلطنت اولان شهزاده سلطان مصطفی کندوسنه تذکره تحریر ایله عصرک اسباب اختلالندن ایضاحات ایتسته مش و علی روایه نظام جدید خصوصی رفته رفته یکچری او جاغنی احاطه ایده جکندن کندوسنک نظام جدیدی الغا آرزوسنده اولدیغنی دخی اشعار ایلمش اولوب قوجه سکباناشی ایسه یکچری او جاغنده مرعی الخاطر و عقل و درایت ایله مشتهر بر ذات اولدیغنی حالد نظام جدیدک غیرتی کودر دولت صادقی بر پیر روشن ضمیر اولمغله بو ائشاده رساله مذکوریه تنظیم ایله شهزاده مشار ایلهه تقدیم ایتمش و اشوب بیک ایکیوز اون

طقوز سنه سنده سڪسان سڪز ياشنده اولدينى خالد عالم عقبابه كوچوب كيتمشدر اول زمانك احوالى كوزلجه تفهيم ايچون رساله مذكوره نك بعض مواد مندرجه سى خلاصه الاخلاصه اوله رق و فقط مؤلفك تعبيرات عاميانه سى ممكن مرتبه ابقا اولته رق بروجه آتى بوحله درج اولنور .

قوجه سكبانباشى ديركه بيك يوزالى سنه سى اثناسندن سڪسان ايكي نارينخه كلنجه سفرلر منقطع اولديغندن سفر كورنلرك اكثرى سرحد عدمه كيتمش وسفر كورميوب احوال دشمندن غافل اولنلرك اكثرى آجى وطاطلى طاتمامش اولملريله بيك يوز سڪسان ايكي نارينخه آچيلان موسقو سفرنده عسكر مزك نظامى مختل ومشوش بولنديغندن اولوقدنبرو عالمك شيرازه نظامى بوزلمشدر حقيقت حال ارباب بصيرته على الخصوص اسكى وقتدن قالمش كرك باران ديده لره مكشوف ايسه ده مزايى عالمدن غافل اولان برآلاى ناس اوزرلرينه لازم اولميه جق سوزلر ايله دولت عليه يي فصل ومذمت ايدر اولوب بوئانده ايسه اوليى امورك مرحمتلرى وبعض ملاحظه لرى حسبيه كيمسويه سياست اولنديغندن جكرى برآچه اتمز وسفر وحضرده دين ودولت امورينه ياراماز همان دنيا بوش قالمسون ايچون يارادلمش برآلاى هيژبى تميز ميخانه وكارخانه وقهوه خانه لرده دولت عليه يي فصل ومذمتده امثال سابقه لرينه فائق اولديلر بومقوله مدبرلر ايسه اكرچه ظاهر ده مسلماندر آنجق مسئله طهارتلرندن يخبر مناو وبقال وقايتجى وبالآجى وحوال وامثالى اولوب دولت امورينه اغز آچدقلى ايچون تاديبلى وبلنكه نظام عالم ايچون سياستلرى لازمه دندر اليوم عوام ناسك طور سفينهانه وى ادبانه ايله ظهوره كلان واديلرني ولازم الانها اولان بعض ماده نك اصل وحقيقتى وقوعى اوزره ميين طرف شريفلرندن برساله طلب اولنغنه حجمى جزئى ومعانىسى كللى اوله رق اشبو رساله نك تحريرينه مبادرت قلندى نظام وانتظام دنيا نك بوزلسنه وروم ايلیده طاغلو اشقياسنك ظهورينه ايشته بونظام جديد سبب اولدى ديو نزاع ايدن عقلى دومنمز برآلاى بي شعور درد مند لره سؤال ايدوب بره جاتم نظام جديد نظام جديد ديو ايكيده بردير ايدوب قورى قورى يه دعوا ايدر سز بونظام جديد نه ديمكدر ابتدا بونك حقيقتى بيل صكره دعوى ايله اكر كلامك حق ايسه بنده مازم اولوب سكا اى والله ايدم ديدم جوابنده نظام جديد ديدكلى تعليم ايله اولان عسكردر وبوتعليم كاور صنعتيدر ديوب فروعاتندن برشى بيلمديكى اعلان ابتداى ارتقى بومقوله ناسه مزايى امورى تفهيم ايلمك دوه يه خندك صيچرا تمغه بکزه ديکندن همان ماقوع اوله رق براز سؤالار ايراد ايدوب ديدمكه بونظام جديدك ظهورندن مقدم دنيا نك فساد حالندن سكا

بر قاج شی دیهیم اناطولیده ظهوره کلان جلالیلر وقعه سی و سلطان محمود خان دورنده  
صاری بك اوغلی فقره سی و سلطان مصطفی خان عصر نده مستقلاً مصر ده سکه سی  
یوریدن بلوت قپان علی بك و طاهر عمر و ابوالذهب ماده لری و اناطولینك التی  
اوسته كتورن قپوسز لوند بلالری و بیك یوز سكسان ایکی سفر نده تمام یدی ییل  
اهل اسلام مظفر اوله میوب هر سنه بر کره بیوک اردو بوزغونلری و بونجه خسارات  
وقوعی معلومدر بونلرک ظهورینه عجباً نظام جدیدی سبب اولدی اولوقت نظام  
جدید یوغیدی بویله اصلندن انتظامی بوزلمش و مقدماتک چیویسی چیقمش  
دنیاك اختلائه نظام جدید سبب اولدی دیو دعوا ایدر سرز ایشته بنم سلطاتم دنیاك  
فسادینه نظام جدید سبب اولدی دیو ادعا ایدنلر ایله بویله اوزون اوزادی به محاوره  
و مناقشه لر من ظهوره کیشدر و بوضورتله چوغنك اسکاکی میسر اولمشدر اما حتی  
قبول ایتیبوده ینه دعوا سنده اصرار ایدن جهله زمان حضرت پیغمبر علیه الصلاة  
و السلام وقتنده بولنان خذله قریش کبی هر تقدیر امر حتی بیلورلر ایسه ده مقدمات  
نودیمش اولدقلرندن سوزلرندن دونمکه عار ایدوب عوعو کلاب کبی اغز لری نه یاقشمز  
و فکر لری نه صیغمز کلاملر ایله ظریلدار طور لرلر شویله معلوم صاحب اذعان اوله که  
بیك ایکیوز التی سنه سی مصالحه سنده خلاص اولان اسرای اسلامیه دن دشمنك هر  
حالی و کلاهی دولت علیه سرأ و علناً تفحص ایلردی مقدمات تبعه دولت علیه دن ایکن  
خدمتی سببیه روسیه دن پایه دار اولان شرمه نام خرسیتان بر کون روسیه  
ایمپراطور یچه سنك مجلسنده دیمشکه عثمانلو ایله نیچون دور و دراز جنك ایدوب زحمت  
چکر سز اگر مراد کز استانبولی آلمق ایسه غایت قولایدنر زیرا عثمانلو نظام تحتده  
دکلدر و استانبول اهالیسنك چونغی اصنافلقنه و طشره ده اولنلر چفت و چبونغی ایله  
مشغولدر عثمانلو تیز الدن عسکر تدارك ایده جك اولسه بر آیه محتاجدر حالبوکه بویله  
بر شهر عظیمك ایچه جك صولری طشره ده بنسدلر دن کلور همان آق دکزده تقدیر  
سفینه لر من و ارایسه قریمه جاب ایلر زویوک و کوچک جمله کیملر منده عسکر طولدیروب  
و قره دکز بوغازینك طشره طرفدن صو بندلرینك اولدینغی سمته عسکر منزی  
دوکوب صو بندلرینك دیوار لرینی طوپلر ایله بر ساعتده هدم ایدر ز مسقو عسکر ی  
بندلری ییقمش کیتلو عسکر ی کلوب استانبوله یوریه جکدر دیو تواتر بولدینغی آنده  
استانبوله برغانله ووا ویلا دشوب صوسز لقدن همان بر کونده حاللری دیگر کون  
اولور بزم غیر تمیزی چکن روم ماتی دخی بر طرفدن پریشانلق ویرمکه استانبولدن  
درمه چاتمه بوله جقلری عسکر دخی تیز الدن اوستمزه کلیوب کندو مالدار ملت لرینك  
و پادشاهلرینك مال لرینی یغما و اللرینه کچن شیرلی قایقاره و ماوندلره وضع ایله اناطولی به

وروم ایلیه فرار ایدر لر استابولده قالان بقیه اهالی دخی کندو باشلری غائله سنه  
 دوشر موسقو عسکری دخی آهسته آهسته استانبوله کیدوب ضبط ایلر \* شرمک  
 بوتربی ایمراتور یچه عندنده قرین قبول اولدینی دولت علیه نك مسموعی اولدقده  
 بو کیفیت هر تقدرشایان اعتماد دکل ایسه ده مکر دشمندن غافل طور مق بروجهله جائز  
 اولیه جنی و بروجه مشروح صو بندلرینه بقته براهاتی تحقق ایتسه مدافعه ایچون  
 حاضر و آماده عسکر مز اولدیغندن (علاج واقعه پیش از وقوع باید کرد) مفهومیجه  
 یانغین باجهنی صارمدن چاره سنه باقلمق لازم کله چکی واستانبولده عسکر موجود  
 اولسه ( و ندیکدن تریاق کلنجه یه قدر مصرده آدمی ییلان هلاک ایلر ) فحوا سنجه خبر  
 کلوب کیدنجه یه دک فرصت فوت اوله جنی جهتلرله صو بندلرینه قریب بر محله معلم  
 وطوپ و تفنک و جبخانه سی یاننده حاضر و آماده برار دو بولمق لازمه خالدن کورلدیکنه  
 مبنی لوند چقتلکنده نظام جدید عسکری ترتینه دولتجه قرار ویریلرک یکچیری  
 اوجاغندن بیك نفر کنج و کزیده عسکر مطالبه اولدقده اوتوز ایکی کونه آتش  
 ویریش ایله آشمش اولان قالدیرم شهبازلری و کوشه باشی قباداییلری و ویرانه  
 دلاورلری بیق و صقال فالنه واروب چونکه طوپ و تفنک تعلیمیه باشلری باغلانور  
 ایسه مألوف اولدقلری اوتوز ایکی درلواصنافلقدن و پاسقالیه و طکوز قیرمنده کوشه باشنه  
 سرکی اعتبار یله عباسنی سروب کلان کچن رعایادن برر ایکشر پاره و اوچ آیده  
 بردفعه خدمتسز و زحمتسز علوفه المقدن و حین محاربه ده اوجاق قاعده سندنر دیو  
 دالقیلیج بیراغی آچوب یوز و یوز یکرمی نفر تصحیح ایتدرو بده باد هوا اسامی  
 صاحبی اولمقدن و ضابطان دخی بوسرده بش اون اسامی قپاروزندن و اسامی آم  
 صامندن محروم اوله جقلرینی ملاحظه و اوتوراجقی او طه باشی و قولتو جقی بیراقدار  
 و دلال آشچی اوسته و چورکچی سقا و کوزله جی قلفه و بونلرک امثالی نیک و بدی  
 بیلمز و دین و دولته خیر و شری فرق ایتمز بهائم کبی اولان اورطه اسکیلری ایله  
 مذاکره ایدوب بونلر ایسه هر بری بر اورطه دن چیقمه کمی متولی و کمی ناظر  
 اولمق حسیله جمع اولنان اورطه آچه سندن حصه الموق و بعضی سنک اسامیسی اوجوز  
 بها ایله آوب طالبنه برقاچ غروش زیاده سیله صاتمق معتادلری اولدیغندن اول امرده  
 برقاچ بیك یکچیری نظام جدید قید اولمش ایکن اشبو اورطه اختیارلری  
 دیدکلری جاهل حریفلر کندو تعیشلرینی مصلحت دین و دولته ترجیح ایله بوتعلیم  
 مسلمان کاری دکلدر دائما تعلیم ایله مشغول اولوب ضابطلرک سوزندن طشره حرکت  
 ایده مز سز و ترک ایده لم دیرسه کز سزی اعدام ایدر لر لباسلره صورت ویردیلر  
 سزه شابقه دخی کیدر لر و دالقیلیج بیراغی آچیلوب سزه بش اون اسامی ویرمز لر



شمدی نه ویر یورلر ایسه اندن بشقه برشی ویر منزله دیویازیله جقلری منع ایته کدن  
 بشقه یازلش اولنلری دخی اغفال و اضلال ایتملریله اول بینسز و عقلی دومنسز  
 آحققلر دخی وهله اولاده (یکچیری قانوننده تعلیم یوقدر بز بومقوله نسنه بی  
 ایده میوز) دیملری اوزرینه هر تقدیر طور حکیمانه ایله اقساعلرینه چالیشلمش  
 ایسه ده فساده باشی اورطه اختیارلری اولغله سوز او طه باشی اغا سقا بابا آشچی  
 اوسته باش قره قوللقچی همت بشه حضر دای عیسی عمیجه رمضان اوغلی رجب  
 بیر اقدار کبی اسافله دو شمکه سز نه دیرسکنز نظام جدید تعلیم اوله جق ایتمش بوتعلیم  
 برصیقی خدمتدر بو باده یان چیزمک دخی زیاده صنعتدر اما بز ی سفره کوندر لرلر  
 ایسه الیزدن تفکی اهرز ودالقیلیج اولوب موسقو اردوسنی بر برینه قاهرز  
 و دشمنک جمله سنی اسیر ایدوب صانارز الله تعالی او جاغزه زوال ویر مسون مواجب  
 چیققدقه علوفه مزنی آلوب ذوقزه باقره ز دیو کویا حسب حال ایله کنایه قاریشقی  
 جواب بارد ایله ادبسنز لکلرینی بیان وجبر اولنور ایسه مألوف اولدقلری جمعیه  
 مبادرت ایده جکلرینی پس پرده ده عیمان ایته دیرلر بناء علیه لوند چفتلکنده مجدداً  
 کساد اولنان او جاغه بستانی نقراتی تحریرینه شروع اولندی و قره دکر بوغازینه  
 دخی مقدار کفایه طوپلر و هنرور طوپچیلر قونلدی بو صورتله دشمنک افکار  
 فاسده سی معطل اولدی و قوروفه و عکه واسکندریه و مصر سفر لر نده بر آوج معلم  
 عسکرک ثبات قلملرینی و خدمات برکزیده لرینی و یوما فیوما تکثر ایتمکده اولدقلرینی  
 کوروب ایشتدکجه دشمن دینک یورکلری یاغی اریمکه باشلامش ایکن و بو معلم عسکر  
 دولت علیه یه روح کبی اوله رق الی یوم القیام بقاسنه سبب اوله جق ایکن سفر  
 کورمیوب یکتلک همان کوشه باشنده بقال و سبزواتجی و درزی رعایاسنه قبادایلیق  
 ایتمکدن عبارت ظن ایدرک قنی اورطه نک یولداشی ایسه اورطه نشانی قولنه دو کوب  
 دشمن بوندن خوف ایدر قیاسیه نشانی کوسترمکی عادت ایدتمش اولان و قوری  
 لافرندن و بیهوده عنوانلرندن کچلمیان قالدیرم قباداییلری و کوشه باشی یاراشقلری  
 و میخانه میچوسنه یوردم صانان یکچیری دلاور و شهبازلری بو عسکر جدید نه  
 لازمدر آل عثمان عسکری دنیایی قلیج ایله فتح ایته دیرلر همان بزه دشمن کوسترسونلر  
 دالقیلیج اولوب دشمنی خراب ایدرز و قرالک تاج و تختی باشنه کچوروب قزل المایه دک  
 کیدرز دیو دعوی کاذبه ایدرلر بومقوله ساده دللر ایله هزار کره منازعه و مناقشه  
 ایدوب دیمشدرکه بره یولداشم سز بیلورسکنز که بن بیک یوز قرق الی سنه سندبرو  
 پدرم ایله یکچیری او جاغنده پشت ویا اوروب بونجه سفر لرده بولندم و کرم  
 و سرد عالمی کوروب روزکارک سله سنی یهرک فلکک چنبرندن کچدم دشمن دینه

دخی اسیر اولدم احوال عالمه و دشمنك اسباب غلبه سنه و توارنخدن فهم اولماز نيجه شيلره واقف اولدم سنم حالا سكسان يدى اولوب سكسان ايكي تاريخدنبرو مطلع اولديغ اسرار عالمك جمله سنى تحري ايتسم برقاچ جلد كتاب اولور ماهو الواقع اوله ورق برقاچ ماده بيان ايده يم كلامده غرض و عوض اولمديغندن ان شاء الله كوش هوشكزه كيروب وقتيله بنى دعای خير ايله ياد ايدرسز سلطان سليمان خان قانونى عصرينه كانجه دكين فرنگستان دولترينك برنده سرعت ايله طوپ آتمق و تفنگ قوللانمق و صنايع حربه تعليم اولتمق يوغيدى واكثريا عساكر اسلاميه مظفر اولوردى بحكمه الله تعالى نمچه سفر لرنده برقاچ سنه عساكر اسلاميه بوزيلوب بوايسه عسكرك نظامسز لغندن نشئت ايلديكي معلوم اولمغه او جاقلرك تشكيله طوائف عسكريه تنظيم اولنقدده درلكسز طائفه سندن بر آلاى بيشعورلر بوضع اولنان او جاق و عسكرو قانونى بكنميو ب دنيا فى الاصل يكيچرى ايله فتح اولمدي سكيان و كوكليان ايله فتح اولندي بونصل او جاقدر يازيلان عسكرك قيافترلى كورديكمز ايشنديكمز شى دكلدر چورباچى و او طه باشى قانانلرى ندر واشجى و قره قوللقجى قاقلارى نصل عجل عجايب مسخره شيلدر دريو كفتكو ايدوب يكيچرى يازيلان و يازيله جق اولان نفراتى اغفال ايدرك بركون مثلا يوز آدم يازلمش ايسه ايرتسى ايكي يوزى قاقغه باشلادى بناء عليه اول وقت حاجى بكتاش ولى اولادندن پوست نشين خليفه سى اولان ذات جلب ايله او جاغه كتورلد كده دعا و توجه ايتمكه آندن صكره يازيلانلر فرار ايتيوب بزلى حاجى بكتاش ولى كوچكارى اولدق ديوب دوام و ثبات اوزره اولديلر قالديلر بويه باشى باغلو و اولوقته كوره نظاملو عسكرو ايله دولت عليه منصور و مظفر اوله كلدى نصارى دولترى كورديلر كه عثمانلو بو عسكرو ايله بتون فرنگستانى ضبط ايده جك هان تنظيم عسكرو باشلاديلر و آتش بازلق علمنده و عسكرو اعمالنده و حيل حربيه احداثده مبالغه ايديلر و بتون كون جنك تعليمى ايش ايدينوب كندولره بر طريق ايله فرجه بولميه جق درجه لره كتورديلر آندن صكره و قوعبولان سفر لرده اعدا ايچنه قليج دوشوبده پريشانلقلى كورلمدى زيرا معلم عسكرو طابور طابور اولوب بوزلامق ايچون آهسته بسته اياق اياق كلورلر و طوپلرى مارقويد ساعتى كچي مجلا و كله لرى مصيقل اولمغه طوپ كاهلر ينى قورشون كچي ياغدير لر و طوپ و تفنگك ارديني آره سنى كسميوب كويا قيامت قوبار لرر و بلكه آتشدن بر طانغى يوريدر لر و اوزر لر ينه پياده يا خود سوارى هجوم ايده جك اولسه سسنى چيقار ميوب تمام مركز ينه كانجه برقاچ يوز ياره طوپلره و نيجه بيك تفنگه بردن آتش ايدوب اهل اسلامى صابر صابر دوكر اولديلر و دها يقين يورويش ايديلور ايسه

طوپلرینه طوبره ایله صالحم و زنجیر و میخ باشلری قویوب آتش ایتدکارنده دالقایج برآچیه  
 یارامیوب هرکس نیتیه ماجور اولور بوصولته عساکر اسلامک کوزلری بیومکه  
 باشلادی و مقابله بالمل بولمدیغدن اسلام عسکرینه نیجه قباحت بولور اسلام  
 طرفدن بیک تفنک ایتدیجه یه قدر اعدا طرفدن سکسان بیک صالقم وکله کلور  
 بوکا مقابله طاقت بشریه دن خارج بر معنی اولدیغی مسامدر تا سلطان مصطفی عصرینه  
 قدر بووجهه و قتلر کچوب غلبه اکثر یا اعدا طرفده ظهور ایدر اولدی اسلامک  
 مغلوبیتنه نظامسزلق سبب اولدیغی معلوم اولغله ( اصول الحکم فی نظام الامم ) اسمنده  
 بر رساله تألیف ایله سلطان محمود مرحومه عرض اولندقدنه موجبجه عمل اولمسی  
 امر ایتمشیکن عمری ختامه رسیده اولدیغی جهته اجرایی مقدر اولیوب بیک ایچی  
 یوز الی سنه سنده بالاقضا عسکر جدید تحریرینه شروع اولندی . تعلیم لازم دکل  
 همان بزه دشمنی کوسترسونلر دین کوشه باشی مهادر لرینه جواب ویریلورکه : سلطان  
 مصطفی عصرنده ظهور ایدن موسقو سفرنده دشمن ایله سزک آره کزه دیوارمی  
 چکدیلر یوخسه الکزی ایاغکزیمی باغلدیلر بر محله مأمور اولدیغکز وقت کرک  
 اولیای اموره و کرک ضابطلر یکره اطاعت ایتماک عادتکز ایکن شمعی دشمن ظهورنده  
 اطاعتی ایده جککز طودی اولوقت دشمن کورینوب طورر ایکن نیچون وارمیوب  
 ایچی یوز بیک آدم قیویرجق قویونی آتی و خاص اتمک ییوب تمام دشمنه مقابله  
 ایتاسنده علوفه و تعین و مانده غوغاسی چیقاروب اردوی همیونی یغما ایدرک  
 دوندیکز قاچدیکز ایرتسی سنه روم ایلبده و اناطولیده قوندیکر مسلمان ورعایا  
 خانلرینی یاقوب ییقوب و قاریسنه قیزینه ال اوزادوب نیجه فضاحتلر ایدرک اردویه  
 وصولکزه کذلک جنکده مهارتکز و بر محله آغز طایله مقابله یه قدر تکز اولدیغنی  
 بیلدیکز دن ینه سابق کبی علوفه و تعین و مانده غوغاسیله وقت کچوروب کیتدیکز  
 و اثنای راهده عباد الاهی صومق کبی افعال شایعه اجرا ایدرک خدادن حیا ایتدیکز  
 اثبات ایدک که نره ده یوز اغارتدیغکز یدی ییل حالکز بویله اولدیغدن موسقو  
 فرجه بولوب استدیکی کبی غالبانه عقد مصالحه ایتسنه و نهایت قریمک کیتسنه سبب اولدیغکز  
 صکره کی سفرده دخی موسقو کلوب اوزی بی محاصره ایتدکه بزدن دشمن استیان  
 شه ازلر مزو بکیتاک قولنه نشان دوکمک و باشنه اندازه بوی صارق صارق و شالوارینک  
 پاچه لرینی صفایوب استانبولده بالدیبری چپلاق ایتک و قوللق نفری اولوب قضارا  
 بر سر خوش ادب سزک ایتسه اوچی بشی اوزرینه هجوم ایدوب تسلیم اولدقدن  
 صکره بلا جرم دوکه دوکه حریفی قویوه کتورمک و استانبول رعایاسنی اخافه ایله  
 بر مقدار شیلرینی آلق ظن ایدن قبا دیلر منز قلعه ایچنده دیکلره صوقولوب میدانه

حقیقه مدیله و او یله متین و مستحکم برقلعه نك دشمن انه كچمسنه و اها لینگ اسیر اولسنه  
 باعث اولدیله سائر یرلرده دخی مقاومت ایده منکاری ظاهر در یکیچری عسکرینك  
 احوالی بووجهله شرح و بیان اولنجه حتی قبول ایدنلك كیمی سکوت و اعتراف ایله  
 و کیمی او جاقده بش اون آچم وار اکر نظام جدید چوغالوبده ایش کوررلر ایسه  
 قورقارمکه یکیچری او جاعنه دولت علیه نك اعتباری قالمیوب علوفه مزى آله میز  
 یوخسه ایرادمزه ضرر کیه جکنی بیلسك الله ویرسون بتون خلق نظام جدید  
 عسکرى اولسون دیو مافی الضمیرینی سویله اولدیله او قومق یازمق ساز چالمق  
 و سائر صنعتلری اجرا اتمك هپ مشق و تعلم ایله اولور جنك علمی ایسه جان  
 بازارنگی اولدیغندن زیاده تعلیمه محتاجدر . عکده واسکندریه و مصرده واقع اولان  
 فرانسز جنککلرنده بو قدر تعلیمسز عسکر وار ایکن لایقیله ایسه یارامدیله طوبجی  
 و پیاده معلم عسکر مز هر نقدر قابل ایسه ده ثبات قدمله جنك ایدوب اعدای قیردیله  
 و قیردیله برینك فراری کورلمدی غیرتلی جمله نك معلومی اولیجق طعن ایدنلك  
 چونغی انصافه کلوب اصل ایسه یارایه جق عسکر بونلر ایش مذمتله بوشنه کنه  
 کیردك دیو قصورلرینی اعتراف ایتدیله حتی جزار پاشا بونلرک جنکده ثبات قدملرینه  
 و حیل حربیه اجرا سیله متانتلرینه و بر فرد قاحیوب دلیرانه حرکته شهید اولنجه یه  
 قدر طور دقلرینه باقوب بن اصلندن بونلری بیلمز ایکن طعن ایدردم لکن فیما بعد طعن  
 ایدرسم دیلم قورسون دیدیکنی حضار مجلس اولنلر تقریر و افاده ایتدیله عقل ورشد  
 و انصافی اولنلر معلم عسکرک وجودی فرض مثابه سنده اولدیغنی و فی زماننا بوندن  
 ماعداسی هان اردوده بیهوده قلبه لقدن غیرى برشیئ مفید اولیه جغنی درك و اعتراف  
 ایدرلر سلاح قوللامغی مشق و تعلیم ایتیمانلردن بعضیلری باروت چوق اولنجه  
 قورشون اوزاغه کیدر دیو لزومندن زیاده باروت قوبوبده تفنکی پارهنه رق صقاتلق  
 ایتدکلرینی و سواریلرندن بعضیلری آت اوستنده کندوی قهرمان زمان بیلوب باباسنی  
 کورسه سلام ویرمکه تنزل اتمز ایکن جنك مخلنده قلیجلرینی چیقارکن بندینی کسدکلرینی  
 یاخود حیوانك باشنی یا قولاغنی صقاتلقلرینی کورنلرک ماشاء الله شهبازم دیو الاهی  
 چاغردقیرینی کوردم و ایشتم ساطان سلیمانك تنظیم ایتدیکی او جاقدر عسکرى  
 کچدکلری محللرده اغنیا و فقرادن بغیر حق بر آچقلاق نسنه آلامق و کمنه نك عرض  
 و مانله تعرض ایتماک اوزره تحت رابطه یه ادخال اولمش اولدقلرندن ضابطلرینك  
 امر و اراده لرینه اطاعت ونه محله سوق اولسنه لر بلا تردد عزیمت ایدرک قرقی  
 برقیل ایله یدیلور عسکر اولدقلری جهته سفرلرده مظفر اولورلردی و جمله عالم  
 آنلری ال اوستنده طوتوب سائر ناسدن زیاده اعتبارلری وار ایدی . بناءً علیه

خرسز و یان کسیجی و کارخانه جی کبی مذموم و ادبسر و نره دن کدیکی بلورسز  
 کیمسه لری ایچلرینه قبول ایتیوب بو جهته میانه لرنده جاسوس بوانه مازدی بعده  
 نظاملرینک اختلالی حسیله ایچلرنده اعدا طرفدن مسلمان قلعنده جاسوسلر پیدا  
 اولغه باشلادی و ضابطلرینه اطاعت ایتمز اولدیلر و یوز طقسان اتی اورطه  
 جسم واحد کبی ایکن صکره لری اورطه لر بینده عداوت و مبانیت پیدا اولدی .  
 و اوته دنبرو یکچریلر اورطه قزغانلرینی دشمنه و یرمیوب قزغانلری اوغرینه  
 بیک نفر شهید و یررلر ایکن شمدیکی یکچریلر جانلرینک قیمتی بیله جکلری  
 طوتوب قزغانی قزغانجی یاپر دیه رک یارم ساعت ظرفنده قزغان و چادر و چرکه  
 و سایر اشیانی طاقیله بر اقوب همان اردوی هایونی یغما ایدوب چارلر و مملکتلرینه  
 و استانبوله عودت لرنده عیلملری ستر ایچون کاورله بزى دوکشدرمدیلر و دوکشمک  
 استدک اذن و یرمدیلر یوخسه قرالک تحتی باشنه کچورمک ایشدن دکل ایدی دولت  
 رجالی مرتد اولدقلری جهته موسقودن وارلار ایله آلتون آلدیلر دیو درلو اراجیف  
 ایله وقت کچورر اولدیلر سلطان مصطفی عصرنده آچیلان روسیه سفرنده ایکیوز  
 بیک قدر مجهول الاحوال نظامسز عسکر مجتمع اولدی یکچری اورطه لرندن  
 یالکنز بر اورطه ده بر قاچ بیک آدم بر یره کلوب کیمسه کیمسه بیلمز و بابا  
 اوغانی اراسه بوله مز و بونلر نه مقوله آدملردر و نره دن کلشدر و کیمک نه سیدر  
 ضابطان دخی آریوب صورماز همان یولداشمز کلدی نفرات چوغالدى تعیینات زیاده  
 اولدی مانده دن خیل شی حاصل اولور و مصارف چیقدن نصکره نره ده برازشی  
 قالور دیو قپاروز فکرنده بولنورلر و یولداش لرینی تحقیق و تصحیحه اماله فکر  
 ایتدکاری جهته بویه قارمه قاریشق اورطه لر دن مرکب اولان اردودن کونده  
 بر قاچ بیک آدم آریلوب کیتسه نره ده کیتدیکی کیمسه بیلمز و بیاسه دخی تعیینی  
 مانده به قالسون دیو ضابطلری نره ده کیدیورسن دیمز و کیتمه او طور دیسه انلر دخی  
 اطاعت ایلمز ایدی بو جهته اردوی هایون جواسیس ایله مشحون ایدی اندن  
 صکره کی سفرده یوسف باشانک ایکنجی صدارتنده جمله او جاقلو ضابطانی و یکچری  
 اغاسی صدر مشار الیه کلوب بز لر بو دفعه یوز یکر می بیکدن متجاوز او جاقلو  
 عسکر می ایکن موسقوک سکنز بیک عسکر می طونه نی بری طرفه کچدی و اوزریمزه  
 کلوب جمله مزى تارمار ایلدی و اثبات مدعای صلابت ایتدی دشمنک بویه نظاملو  
 عسکرینه بزم نظامسز عسکرله مقاومت قدرتمز یوق همان مصالحه ایده جکلر  
 وار ایسه ایدک مادامکه بزم عسکر مز خیل حربیه جدیده نی بیامیه بویه قیامته قدر  
 نصرت اوله مز دیو جف القلم جواب و یردیلر مشار الیه حیرت کلوب بونی بن

پادشاه علمیناه افندمزه نیجه عرض ایده بیلورم دینجه بز لر عرض محضر یازهرز دیوب جواب ویردی لر و نفس الامرده عرض محضر ای تدیلر که بوقفیرک قلمیله اولدی وزیر مشارالیه تسلیم ایلدیلر اودخی پادشاهه ارسال ایدوب بونلردن فیما بعد خیر و نصرت اولیه جغنی تلخیص ایدنجه چار ناچار مسقو ایله مصالحهیه قرار ویردی لر استانبوله کلدکر نده تعلیم ماده سی یکچیری او جاغنه تکلیف اولندی قبول ایتیموب رد ایله قطعی جواب ویردی لر بناء علیه بستاننی نفراتسندن تفنگچی ترتیب ایله لوند چفتلکنده مجدداً پایلان قشایه قوندی بالاده بیان اولندیغی اوزره بو عسکر ایشه یارارسه یکچیری او جاغنه اعتبار قالماز دیو یکچیریلر بونلری تحقیره باشلادیلر و مسئله طهارت و شرائط اسلامییه بیلمیان نیجه جاهل و باطل کسنه لر بوباده مسلمانلق قیدینه دوشوب تعلیمک مسلمانلغه ضرری واردر دیو نظام جدید نفراتی ایردوب قاچرمغه اقدام ایلدیلر حالبوکه بو عساکر جدیده ایکی اوچ بیکدن عبارت ایکن فرانسه سفری آچیلوب جدید طوپچی و تفنگچی نفراتی مصره و عکبه تعیین اولندی ایکی اوچ بیک آدم استانبولدن حرکت ایلدکر نده کرک استانبولده و کرک سائر محللرده برکونه ادبسنزک ایتدی لر اول ائنده تعیین اولنان یکچیری و سائر عسکر ایشه استانبولده چارشوده و بازارده رعایا دکا نلردن شی قالمق و صراف و بازرگان طائفه سنی اخافه ایدرک پوستال اچقه سی نامیله جبراً اچقه استمک و اهل عرض خاتونلری و دلی قانلوری چویرمک کبی خاطر و خیاله کمدک فحشیاتی ارتکاب ایتدکر ندن صکره مثلاً اوچ بیک نفر تحریر اولنمش ایشه حین اخراجلرنده نصفندن زیاده سی اختفا و ائسای راهده دخی برر ایکشر فرار و اوغرادقلری قصبات و قراده حددن افزون ادبسنز لکبر اجرا ایلدیلر بقیه سنک دخی محل مأموریتلرنده بر ایشه یارامیه جقلری اکلاشدی و فرانسزلر عکبه محاصره ایدوب حتی برج علی نام محله قاعه درونته کیرمش و بتون بتون قلعه نی المریته بر دیکش قالمش ایکن نظام جدید عسکری یتیشوب عکبه نک خلاصنه سبب اولدی لر بعده مصر و اسکندریه ده دخی تعلیمسنز عسکر من فرانسزلره مقابله ایده میوب حتی برکون میدانده قاهره نظام جدید عسکرینه التجا ایله تهاکه دن قور تلمش لری ایدی و روم ایلیده ظهور ایدن طاغلو اشقیاسی بونجه وزرا و مأمورینه غلبه ایدوب شمعی یهدک هیچ بریده بو خنزیرلر کسنه دن یوز دوندرمدیلر کچن بیک ایکوز اون یدی سنه سنده اوزرلرینه نظام جدید عسکری مأمور اولدقده طاغلو اشقیاسی بونلرک بر دانه سی قالمشجهیه قدر قیروب و نظام جدیدک کوکنی قازیوب نام و نشانلرینی احاطتمک نیت فاسده سیله وار قوتلرین بازویه کتوروب بونلرله اللشدیلر نظام جدید

عسکرینک طوپلاری و خنبره لری و سواریلری یا نلرنده اولموب یالکز جه پیاده و آچیقده  
 دیزلرینه قدر چامور ایچنده و اشقیای ایسه برقریه دروننده ایکن واردیلر باصدیلر  
 اشقیایی اولمش ارمود کبی دوکوب خراب ایتدیلر اشقیادن النان دیلار دن منقولدرکه  
 اشقیای بربرینه چاغریشوب ایه بابام اوغلی بو نظام جدیدک آتشی ایشتدی کمز کبی دکل  
 ایش طارتلق ایشته بز دن اتی اوقه زیاده کلدی لر دیو سولشمرش عسا کر عتیقه یه  
 نسبتله عسا کر جدیده نك فضائل و محسناتنه نهایت یوقدر تفصیلاً یازلسه برقاچ جلد  
 کتاب اولور لکن عوام ناسک عقلاری یتیشه جکی قدر تفهیم ایدلم عسا کر جدیده  
 مطیع و فرمانبر اولوب هر زهیه مأمور اولسه لر در حال حرکت ایدر لر عسا کر عتیقه کبی  
 اسکمز وار یولداشلره خبر ویره لم دیو امرار اوقات ایتزلر و ایچلرینه جاسوس  
 کیره مز و البسه لری یك نسق اولدیغدن بری فرار ایده جك اولسه هان یوزك  
 طاشی کبی میدانده معلوم اوله دوشر و دشمن قارشوسنده نماز صافلری کبی صاف  
 باغلیوب قورلمش ساعت کبی اقتضاسنه کوره دوزر طورر عسکر عتیق ایسه سیر  
 محالرنده طوران قابه لقی کبی قارمه قاریشق طورر لر جانی استیان تفکدنی کیمی بر کره  
 کیمی زیاده طولدیروب آتار کیمسی دخی نه یادیغنی نه ییاجغنی بیلمیوب هان  
 یلانچی بهلوان کبی ایکی طرفه دوزر طورر واتی آیده ترتیب ایله جمع اولنان اردو  
 بر ساعت مقاومت ایدمیبوب طاغیلور ملل نصاری آتشی بازلقده مهارت کسب ایدوب  
 اوزاقدن ایش کورمکه مالوف اولملریه یقیندن اورده جق قلیج و پچاق و نجاقدن  
 قوقازلر هان تعلیملو عسکر دن و انسانی اوزاقدن هلاک ایده جك باروت او یونلرن دن  
 اور کر لر بناءً علیه مقابله بلمثل شروطنه رعایتله تنظیم عسکر ماده سی شرعاً و عقلاً  
 و تجربهً ثابت اولمشدر . بر آلا ی خروس عقلی سر ساملر بورالرینی خاطر لرینه  
 کتور میوب دنیا نك فسادینه نظام جدید سبب اولدی دیو دعوی ایدر لر بو مقوله  
 ابالهة دنیا پرستاندن برینی کچن سنه بر جزیره نك جزیه عاملکنه مأمور ایدیلر اننه  
 بش اتی بیك غروش قپاروز کچوب یکی سنه دخی کندویه احاله اولمغله مقدماً  
 نظام جدیده سبب اولنره سب و لعن ایدوب طورر کن بوسنه راست کلدیکی یاران  
 و یولداشنه برده یی قرداش بو نظام جدید ماده سی بر ضرر سز شی ایش بز بونی اصلندن  
 دخل ایدر دک لکن بأس یوقدر زیر از جریه مالی موسقو ولایتنه کیدن شر ابدن المنغله  
 موسقو کیسه سندن چیقاییور برکت ویرسون هله واقف اولدم استغفر الله بوندن صکره توبه  
 اولسون نظام جدیدک فضائی اغزیمه المیم و الممدن کلورسه کیمسه یه فصل و مذمت ایتدیریم  
 دیو سویلر اولدی ایشته نظام جدید ماده سی مرقومه برقاچ بیك غروش جق قز اندر مش  
 اولمغله اصلندن طعن ایدر کن صکره او تانمیوب مدح و ثنا ایلر اولدی هان جمله سی

بوحال اوزرده درلر. خلاصه کلام بویه خیر و شری فرق ایتمز و بلکه کندوی بیلمز  
 جهلای زمانه نك طعن و لغنه باقیلوبده بو عسا کر مرغو به جدیده نظامندن فراغت  
 لازم کلورسه اعدا بتون بتون فرجه یاب اولور و نظام جدیدی بکنمیان قلاشدر  
 و حرامزاده لر و زقاقلره صغیمیان قلتبانلر و یلقوانلردن بر آچکلك فائده  
 اولماز و معاذالله بر مصیبت ظهور ایلسه او مقوله سرسام و بینی صوغوق بهائم  
 کبی حریرفرك شجاعت کاذبه و جلادت لقا قیه سندن بر فائده اولیوب همان  
 خوشمدی مقدر بویه ایتمش اوله جغه چاره اولماز دیه رک هرچ و مرجه سبب  
 اوله جقلری بدیهیدر که حاللری نیجه کره تجربه اولمشدر او زمان او یلا و بکا  
 ایتمک فائده ویرمز او مقوله جاهل و سرسام طاقندن اولدجه سوز اکلا رطن اولنان  
 قلقلی قیافتلی قولاقلی ظر طلاقلی کویا دنیانک عقل خواجه سی اولوب کمنه نك عقل  
 و رأینی بکنمز و امور دولته دائر بر صحبت اولسه کیمسه یه لقردی سویلمکه نوبت  
 ویرمز لردن بعضیلر یله مصاحبت انساننده کندویه سؤال طریقیله عجباً دشمنه نصل  
 جواب ویر یله بیلور طریقی نه و جهله در مثلاسن وزیر اولسه ک نصل حرکت ایدردک  
 دینلر کده ابتدا یکیچری او جانغی یکیدن تظہیر اولنمیلدر زیرا فی الاصل بونلر پاک  
 عسکر اولوب بونلردن نیجه خدمت لر کورلمشدر اما شمدی ایچلرینه نیدو کی بلور سز  
 کیمسه لر طولمش و اکثریسی ایش باشنه کچمش بونلرک جمله سنی کوره لیوب یکی باشند  
 یاز یله جق عسکره قلیچ چالمق تعلیم قیلنمیلدر یوخسه یوغورتی کسه مز عسکره  
 اوله ماز و حالا موجود اولان عسکره هیچ اوله ماز دیو (شجاعت عرض ایدر کن  
 مرد قبطی سرفتن سویلر) مضموننی تلمیح ایده دوشدی و یوز الی سنه ده وجوده  
 کلیه جک و بلکه هیچ اولیه جق نسنه نی قاله کتوردی بن دخی بو قدر آدمک جمله سنی  
 بردن طرد ایله یرینه آخیری قویمق نیچون اولسون چونکه بونلر پادشاهک تعلیم  
 امرینی قبول ایتمدیلر بالضروره بوستانی یاز یلوب نظام قوی تحتہ ادخال اولندی  
 ایشته تمام سنک دیدیکندن زیاده سیده وارکه بونلر طوپ دخی تعلیم ایده یورلر  
 و آتش صاحبه یورلر دیدم جوابنده واقعا سوزیکز حقدر و جمله سی کر چکدر اگر  
 یکیچری طائفه سی مقدما بو تعلیم امرینی قبول ایتمش اولسه لر هم اولو الامر طاعت  
 ایتمش و همده کلی نصرته سبب اولمش اولور لردی دیو اعترافه مجبور اولدی بو مقوله  
 عقلا ی زمان کچینان یادکار لر قلیجه دعا سینمشدر قلیچی چکوب دشمنه یوریمی  
 لاقردیسنی بلله مش اولدقلرندن دشمنک طوپ و تفنگنی خاطره کتور میوب قلیچ  
 تعلیم اولنسنی رأی ایدر اما قلیچ ایله طوپ و تفنگه نصل جواب ویر یله بیلور  
 بوراسنی دوشونمز لر و همان یکیچری او جانغی غیرتی غیرت دین محمدی اوزرینه



ترجیح ایدر لر او مثللو اعتقاد باطلرینه و بو درجه جهالتلرینه نظر آ بونلردن  
دین و دولته خدمت مأمول دکدر همان حق قبول ایدن یاران باصفایه جناب حق  
دارینده سلامت احسان ایلیه .

قوجه سکیانباشینک افادات و اخطاراتی بوراده ختام بولدی (واعدوا لهم ما استطعتم من قوة)  
آیت کریمه سی حکمنجه اعدایه قارشو اسباب مقاومتی اعداد و تهییئه فرضدر بوآیت  
کریمه نك نزولنده سرور انبیا علیه ازکی التحایا حضر تلیری اوچ کره (الان القوة  
الرمی) بیور مشلر اولوقت رمی اوق آتمقدن عبارت ایدی زمانمزده طوب و تفنکه  
منحصر اولدی مقصد اوزاقدن دشمنی تلف ایده جک آلات و ادوات نه ایسه الدن  
کلدیکی قدر انلری تدارک و تهییئه ایتمکدر زیرا محاربه بی چوق آتان قرانور وقت  
سعادتده آلت رمی اوقدن عبارت ایکن الان القوة السهام دنیلمیوبده مطلقاً  
آتمق معناسنه اولان رمی لفظنک استعمال بیورلمسنده بودقیقه یه اشارت وارد ایشته  
قوجه سکیانباشینک پرکار خامه سی دخی بومر کزده دأر اوله رق تفصیلات مشروحه سنک  
خلاصه الاخلاصه سی اولوقت نظام جدید عسکرینک ایجادی کوریلان لزوم شرعی  
وعقلی به منی ایکن حقیقت خالدن بخیر اولان برطاقم خذله بو عسکری طمن و سبب  
اولنلره لعن ایده کلک لری حالده تأدیب اولناملری احوال عالمک اختلالنه و سیاه اولمقده  
ایدوکی بیاندن عبارتدر .

و فی الواقع دولتک تعلیم امرینی قبول ایتمکدن بشقه مدار سلامتی اولوق اوزره  
ترتیب ایتدیکی جدید عسکری دخی تحقیر ایدن اراذلک جزاسز قالمسی سلطان  
سلیمک رحم و شفقتنه حمل اولنور برحالت ایسه ده آتیمی ایچون بر ايو علامت دکل  
ایدی بناءً علیه اولوقت تنظیم امور و اصلاح مصالح جمهور ایله اشتغال اولمقده  
اولدینی حالده برفته و فساد استعدادی پیدا اولمقده و بویله قوجه سکیانباشی کبی  
منصف و اول وقت کوره احوال عالمه ایجه واقف اولان ذواتک بریاندن اکسلمسی  
ایله او مثللو خذله نك افکار فسادکارانه لری قوت بولمقده ایدی .  
بووانده ایسه افق پولتیقه اوروپا پک قراکلق اولوب ینه بر محاربه عمومیه فورته سی  
اماره لری کورنمکده ایدی . تفصیلاتی سرلوحه جلد آتی قنور .

{ ذیل } -

( ۱ )

\* یوسف ضیا پاشانک صدارتنه دأر صادر اولان خط هایون \*  
سنکه وزیر اعظم ممدوح الشیم و وکیل مطلق قوی الهمم یوسف ضیا پاشاسین طرف

کامل الشرف شاهانه مدن سنی سلام سلامت انجام ملوکانه مله تلطیف وقدر وشانکی  
 ترفیع ایلدیکمدن صکره معلوم صداقتک اولسونکه سلفک عزت محمد پاشانک طمع  
 وارتنکابی درجه کالده اولدیغندن رشوت وعبودیت ایله اکثر امور دولتی مختل  
 ایلیوب دائماً اتباع وقرنا مفسد لرینه مجبور وجر منفعتی مصالح مهمه دولته تقدیمه  
 وحق عدالته مراعات ایله مفظور و اساس نظام ملک دولت اولان سیاستی اجرا  
 ایلمیوب جمله سنده رخاوت و قصور برله هر زمان ریا ومدانه اوزره حرکت وقانونه  
 عدم رعایت و او جاقلو و سرحدات یومیه لرینی کمرک و مقاطعاته نقل ایلدیکندن  
 او جاقلم یومیه لرینک نقصان وضع لرینه و دوشن محولدن تقاصاً مجدداً توجیهندن  
 اموال میرینک تلف و سرفه بادی و تادیب و سیاستی لازم کلان نیجه اهل فساد  
 مساعده و تکاسلندن او مقوله لر فرصتیاب اولوب خلاف رضای هایونم حرکت لرینه  
 باعث و بونلر کبی نیجه مکارهه سبب اولغله مقام صدارتدن عزلی الزم اولدیغی  
 نزد هایونمده محقق اولوب عزل برله رینه عاقل وجسور ورعایا پرور و صادق وغیور  
 مدبر عسکر بروزیر فطانت شمیرک نصیبی واجب اولدیغندن سن وزرای عظامک  
 ایچنده اوصاف مذکوره ایله موصوف چراغ خاص الحاصم اولدیغندن بشقه ارضروم  
 و طرزون و حدود عجمده خصوصاً بو دفعه مأمور اولدیغک اکراد الحاد نهادک  
 اوزرنده ابراز ایلدیکک شجاعت و هر حالده صداقت واستقامتک عون حقله خدمت  
 صدارتده دخی دین ودولته لایق حرکاته موفق اوله جفک مجرب اولان اطوار  
 مستحسنه کدن ظاهر او لغله کسنه سوق ایلمدن قریحه صیحه ملوکانمدن مقام  
 وکالت کبرایه انتخاب واستقلال تام ایله نصب اولنمش سکدر ایدمی کافه امور دولتی  
 سکا احاله ایلدیکمی بیلوب و اول باول ممالک محروسه مک نظام حالی واشقیبا و ظلمه نک  
 تادیب و سیاستی و ظلم و غدرک دفع و رفعیه سکنه ممالک شاهانه مک امن و آسایش  
 واستراحتی سندن قطعی مطلوب هایونم ایدوکنی کوزلجه ادراک ایلیوب مستعینا  
 بالله تعالی تشمیر ساعد غیرت و اجرای احکام شریعت و ایفای قوانین دولت و عباد  
 اللهه صدقله ابراز خدمت ایلیه سین کوره یم سنی برآ و بجرأ امور سفریه به صرف  
 و تدارک مهمات حربیه و جمع و ترتیب عساکر و افره به کیجه و کوندز سعی موفور  
 ایلیوب فرانسز بیدنلرینی اراضی قاهره دن طرد و تبعید و برکون اول مصرک  
 اخذ و ضبطنه بذل ما حصل قدرت و سایر ممالک محروسه مک دشمندن محافظه سنه  
 بغایت دقت و اقتضا ایلیان محملره عجماله عسکر و مهمات ارسالنه و کلیتو دونما تجهیزینه  
 دقیقه فوت ایلمیه رک اهتمام و غیرت ایلیه سین رجال دوتم و او جاقلو قوللرمدن  
 صداقت ایله موصوف اولنلرینه اکرام و نااهل و صادق او لمیانلری تادیب و کوشمال

و هر مصلحتده اربابی استخدام بر له دائماً عباداللهك امن و راحتلرینی موجب و سائله و تادیب و سیاستده قطعاً مسامحه ایلمیوب آسایش علمه بادی اولور اسبابه تشبث و طریق حقایق و اتصافه سالک اولوب قانون و معتاددن زیاده برکسنه یه عبودیت الدر میوب کافه اموری حقایق و عدل اوزره رؤیت و اسعاره زیاده دقت و بیت المال مسامینی تلف و خسار دن صیانت ایلیه سین اتخاب و نصب دن مراد شاهانه انجق بونلره اقدام و خواب و راحتی ترك ایله دشمن دیندن اخذ انتقامه سعی و اهتمام اولمغله هر طرف دن ظلمه و اهل فساد ی قهر و سیاست بر له رفاه فقرای رعایا و عمار بلاد و قریه کورده ی نصل صرف ذهن و رؤیت و باعون باری عدودن اخذ انتقام ایله خدمات مبروره ابرازینه غیرت ایدرسین هر حالده رب العالمین سکا توفیقات علیه سنی قرین ایدوب سنک ایله خدمت ایلیانلری سعادت دارینه مظهر ایلسون آمین بحرمة طه و یس .

( ۲ )

\* شیخ الاسلام عاشر افندی یه اصدار و ارسال بیور یلان خط \*

\* هایون صورتیدر \*

سماحتلو شیخ الاسلام افندی داعیمز سالفکنز در ی زاده عارف افندی مسند مشیخته کلدیکی وقتدنبرو محافظه جاه و مسند قیدینه دوشوب هر کسه نما شاة و مداهنه بر له طریقه و اجرای احکام شرعیه ایده جک قضاة و نوابه باقیوب خلاف شرع شریف حرکتدن ممالک خراب اولوب لله الحمد بزم دولتقر ایسه شریعت غرای محمدیه ایله مؤسس و جمیع امور من حکم شرعله محکم ایکن بر مدتنبرو جاهل و ظالم و غدار قضاة و نواب ممالکه مستولی و حکام عرف شریعته تابع اوله جق ایکن معاذالله تعالی اجرای امور شرعیه یه مأمور قضاة افندیار ظلمه عرفه تابع اولوب ظلم و غدر دن بشقه کذب صریح اعلا مات و مزور و شقه لر ایله انهای شرعیه یه اعتماد قالمق در جه لرینه واروب بونلرک منع و دفعی و حق و عدل اوزره شرعشریفی اجرا واجبه ذمتی ایکن اغماض ایلدیکندن عزل ایلیوب جابکنزه حسن ظنمز مقتضاسی قریحه هایونمدن سزی شیخ الاسلام نصب ایلدم ایمدی خلاف شرع شریف حرکتک برکسنه دن صدورینه رضای باری اولمدیغنی بیلدیکنز کی رضای هایونم دخی اولمایوب عندمده شریعت غرادن اعز و احکام شرعیه دن ماتزم هیچ بر شی اولمدیغنی بیلوب و جمله سنی حق و عدل اوزره رؤیت اولنق طرف هایونمدن سزه حواله اولنوب دنیا و عقبا ده سزدن مسؤل اولدیغنی ادراک ایلیوب شو سن و سالدله خاطر و کوکله باقیه رق و کسنه یی التزام ایلمیه رک انجق رضای حق تحصیل ایچون اجرای احکام

شرعيه ايتدير مکه سعی واقدام وخلاف شرع حرکتده اولنلری تأديب وتکدير ايلسهرك دين محمدی احيا ومقتضای شريعت غرايی هر ماده ده اجرا ايتدير مکه همت وقضاة ونوابک حرکتلرينه بغايت دقت ايلسوب رضای باری ورضای ملوکانهم تحصيليله سعادت دارينه مظهر اوله سن جناب حق كافة امور کزده موفق باخير ايلسون آمين .

( ٣ )

\* دولت عليه ايله روسيه دولتی بيننده عقد اولنان اتفاقنامه اتفاق صورتيدر \*  
بسم الله الرحمن الرحيم \* الحمد لله الذي شيد قواعد الاسلام بروابط التعاون وضوابط الوفاق وعمر بلدان طوائف المسلمين بنواظم اتلاف القلوب والاتفاق ( ان في ذلك لعبرة لاولى الالباب ) والصلاة والسلام على نبيه الذي ارسل برفق المؤلفة قلوبهم لاطهار الصواب وعلى آله واصحابه الساعين الى احسن التعهد وحفاظ الميثاق مادار فلك الدوار وجرى الجوار المنشآت في البحار باعث تحرير كتاب صحت نصاب وسبب تنسيق حقيقت انتساب اولدرکه دولت عليه ابدی الدوام ايله روسيه دولتی بيننده تيمنا باقي وبرقرار اولان صلح وصلاح وحب وتواد وحسن وفاقک تحکيم وتقويمی طرفينک مطلوب خالصانه سی اولديغندن بشقه الحالة هذه مشهود اولان احوال شورش استماله بناء شوکتلو قدرتو مهابتو عظمتو ولی نعمتمز پادشاه آل عثمان وشهنشاه دارا دربان سلطان سليم خان ثالث افندمن حضر تلری وحشمتو مکتلتو منزلتو جمع روسيه لرك ايمپراطوری وپادشاهی فاولو جنابلری مجرد تأمين رعاياي طرفين وحفظ وحرست ممالک جانبين ايله اجل مواهب الهی اولان آسایش عامه يي تحصيل ايتک نيت خيريه سنه مبنی بينلرنده تدافعی اتفاق عقديه روابط ملكيه لرینک تشديد وتمديدینه قرار وير ملربله بزکه دولت عليه ابدی الدوام وساطنت سنیه معدلت ارسامک امضا مزده مسطور مراتب جليله سین حائر وبو خصوصه مرخص يز ايمپراطور مشار اليهک مستشار خاصي وآستانه عليه ده فوق العاده مرخص ايلچيسي اولان رتبتو اصلتو واسيلي طمارا ختمت عواقبه بالخير دوستمز ايله عقد مجالس مکالمه ورخصتنامه لریمز بربريمزه ارأه ايله مذاکره اولنوب ذکر آتی شروط اوزره ايکی دولتک اتفاقی عقد ايلمشردر .

اولکی ماده پادشاه آل عثمان حضر تلری وجميع روسيه لولرک ايمپراطوری وپادشاهی ودولتلی و رعایالری اراسنده کرک برده وکرک بجزده الى الابد صلح وصلاح وحب وتواد وحسن وفاق باقي وبرقرار اولوب بودفعه بين الدولتين عقد اولنان اشبوتدافعی اتفاق حسيبله بينلرنده حاصل اوله حق رابطه شول مرتبه ده قوی

و مستحکم اوله که بر طرفک دوستی طرف آخرک دخی دوستی و کذلک بر جانبک دشمنی جانب آخرک دشمنی اوله بنا برین پادشاه آل عثمان و روسیه امپراطوری وعد و تعهد ایدر لر که آسایش و امنیت جانبینه دأر اولان جمیع موادده خالصانه مخبره و مذاکره ایدوب کندو ملکلرندن هر کونه تعرض دفع و آسایش عامه نیک استحصالی چون بالاشترک و بالمدناکره اقتضا ایدن اسبابه تشبث ایدر لر .

ایکنجی ماده تاریخ هجرینک بیک ایکوز اتی سنه سی شهر جمادی الاولینک اون بشنجی کونی یعنی میلاد حضرت عیسانک بیک یدییوز طقسان بر سنه سی کانون اولک یکر می طقوزنجی کونی یاشده عقد اولنان مصالحه عهدنامه سی و اول عهدنامه ده مندرج سائر جمیع عهدنامه لر اشبو تدافعی اتفاقنامه ده لفظاً بلفظ مذکور کبی تماماً و کاملاً تصدیق اولور .

اوچنجی ماده دولتین معاهدتین اشبو اتفاقینه زیاده تقویت و یرمکیچون طرفینک زیر تملک و تصرفلر نده بولنان کافه ممالک ضامن و کفیل اولور لر . شول وجهله که روسیه امپراطوری جنابلری مصره ظهور ایدن تعرضدن مقدم دولت علیه نیک زیر تملک نده بولنان کافه ممالک بلا استثنا ضامن و کفیل اولوب کذلک پادشاه آل عثمان حضرتلری دخی الحاله هده روسیه دولتینک زیر تصرفده بولنان کافه ممالک بلا استثنا ضامن و کفیل اولور .

درنجی ماده دولتین معاهدتین اگرچه دول سائر ایله مذاکره یه و مصلحتلری ایجاب ایده بیله چکی معاهداتک ربطنه کالاول مختار در لر انجق احدها آخره صراحتاً تعهد ایدر که اومقوله معاهدات وقتنا من الاوقات و وجهها من الوجوه بری برینک ادنی ضرر و زیان و خسارتی مستلزم اوله جق یا خود تمامیت ممالک جانبینه نقصان ترتیب ایده جک نسنه یه قطعاً شامل اولیه و بلکه حسب المقدور احدها آخرک شان و امنیت و منفعتی وقایه و تحصیل ایتمکی طرفین وعد ایدر .

بشنجی ماده دولتین معاهدتیندن برینه یا خود ایکسینه مضر بر کونه فعل و سوء قصد ظهور نده حرکات خصمانه نیک دفعی خصوصنه بذل ایده جکلری مساعی کافی اوله مدینتی تقدیرده احد طرفین دولت متفقینک مصلحت مشترکه لری و امن و سلامت لری ایجاب ایده چکی وجه اوزره یا حرکتنده رفاقت صورتی و یاد یورسیدن طریقله جانب آخره قوت بریه یا بحریه ایله امداده یا خود نقدا اعانته مجبور اوله بویله بر حالت وقوعنده اولجه کمال صفوت ایله عرض مافی البال اولنوب در حال اقتضا ایدن اسبابه تشبث برله امهال بوشرطک مقتضای خالصانه ایفا اولنه .

التنجی ماده ذکر اولنان اعانتک عیناً یا خود نقداً و یرلمسی خصوصی

مظهر هجوم اولان دولتک يداختيارلرنده اولوب عیناً امداد اولنمسی یعنی بری  
عسکر یادونما مطالبه ایله کی حالدده مطالبه کونندن نهایت اوچ آی مرورنده ارسال  
اولنه لکن معاونت مالیه اختیار اولنور ایسه دولت صائنه نك اعلان حربی  
کونندن یا خود هجوم و تعرض ابتدا سندن بدأ اولنوب مصالحه انعقادینه دکن  
سنه بسنه معین تقسیطر ایله ادا اولنه .

یدنجی ماده دولتین فحیمتین معاهدتین بر منوال مشروح کرک مشروط  
اولان امداد لر و کرک وار قوتلری به محاربه ده مشترک اولدقلرنده احد جانین آخری  
مشترک قیامینجه و امنیتی تحصیل ایتمینجه مصالحه و متارکه عقد ایلمیه و ربط اولنان اتناقه  
واعطا اولنان امداد لر به بعضاً معین اولان طرفه بر کونه تعرض و هجوم و وقوعنده طرف  
دیگر حفظاله بو عهدک خالصانه و مدققانه ایفاسنه مجبور اوله .

سکزنجی ماده دولتین متفقینک مشروط اولان امداد لر یا خود قوت مجموعهری  
ایله بالاتفاق عمومی حرکتلری لازم کلد کده طرفیندن وعد اولنور که تدایر حربیه لرینی  
خلوص تام ایله بر برلینه افاده و اشعار و اجر لرینی تسهیله بذل اقتدار ایده لر و محاربه نك  
امتدادینه دائر و مصالحه نك شروطنه متدائر نیتلرینی بر برلینه کشف و بیان ایله لر  
و بوبابده اصول مصالحانه و منصفانه نك مقتضاسنه اقتداءً بینلرنده قرار ویره لر .

طقوزنجی ماده اعانه و یریه جک عساکرک عددیله متناسب طوبلری و جبهه خانهری  
و کافه لوازمی و وظیفه لری معین اولان دولت طرفندن اعطا اولنوب تعیناتلری  
ایچون اقتضایدن ذخائر و آرپه و صمان و اوتلق یاعیناً یا خود مقدمجه بالندا کره تعیین  
اولنه جق فیئات اوزره عساکر مرقومه نك حدودلرندن خروجلری کونندن بدأ  
اولنه رق نقداً مستعین اولان دولت اول عسکرک قوناقلرینی دخی تدارک ایستدروب  
هنکام محاربه ده کندو عسکری مظهر اوله کلدیکی و آنلرک دخی مألوف اولدقلری  
اسباب استراحت استحصال اولنه .

اونجی ماده کذاک مستعین اولان دولت اعانه سنه کلان دونمایه مستعین اولان  
دولتک خلیجی بوغازینه و رودی کونندن بدأ ایدرک مشترک دشمنک علیهنه اعمال  
اولندجه تعیناتلری ایچون اقتضایدن ذخائر بالندا کره ترتیب اولنه جنی و جهله  
اعطا ایده و بوندن بشقه دونما سفینه لرینک ترمیمی لازم کلد کده اقتضایدن لوازمی  
مستعین اولان دولت قطعاً تأخیری تجویز ایتمیه رک و هیچ بر کونه صعوبت اظهار  
ایلمیه رک جاری اولان فیئات اوزره ترسانه و مخزنلرندن آلیویره دولتین متفقینک  
جنک و مهمات کیملری مشترک اولان محاربه نك مدتده کرک قشلامق و کرک  
زده لشمس بولناتلری ترمیم ایچون بلا ممانعه لیمانلره دخول ایده لر .

اون برنجی ماده جن محاربه ده دشمندن اخذ اولنه حق ادوات حریسه و آلات جنک و اموال و امتعه متعوه بالجمه اخذ ایدن غامین عسکرک اوله .

اون ایکنجی ماده آل عثمان پادشاهی و روسیه ایمراطوری اشبو تدافعی اتفاقا توسیع ممالک داعیه سیله دکل بلکه مجرد وقایه تمامیت ممالک طرفین و تحصیل امنیت رعایای جانبین ایله دول سائر نک الی الان باقی اولوب آسایش عامه یه الزم بر موازنه ملکینه ک حصولی مستلزم اولان هیئت قویله رینی خللدن حفظ و حراست ایتک نیتیه ربط ایتدکار نندن نمجه ایمراطورینی وانکلتره و پروسیاقرالرینی و محضا خیره مبنی و تحصیل امن و سلامته مبتنی بوکونه معاهده یه اشتراکه خواهشکر اوله جق دول سائر یه دخی اشبو اتفاقه دخوله دعوت ایده جکلری مقرر در .

اون اوچنجی ماده دولتین فخمیتین معاهدتین بو معاهده نک ممکن اولدیغی مرتبه مدت مدیده حفظه صمیمی راغب ایسه لر دخی بعد زمان تبدل احوال روزگار حسیله بعض موادک تبدیلی لازم کلسی محتمل اولدیغندن اشبو تدافعی اتفاقه تصدیقنامه لرک مبادله سی کونندن اعتبار اولنه رق سکر سنه ک مدت تعیینه قرار ویرلدی مدت مذکور نک ختامی تقرب ایلدکده اولوقنک اقتضاسنه کوره اشبو اتفاقنامه لرک تجدیددی خصوصی دولتین معاهدتین بیننده دوستانه مذاکره اوله .

اون دردیجی ماده اشبو تدافعی اتفاقنامه آل عثمان پادشاهی و روسیه ایمراطوری طرفلرندن تصدیق اولنوب تصدیقنامه لر ایکی آیده و ممکن اولور ایسه آندن اقل مدتده آستانه سعادتده مبادله اوله .

خاتمه ذکر اولنان اون درت ماده نک شرط و ربط اولندیغی وجهله وقت مرقومده تصدیقنامه لری مبادله سی خصوصی بعون الملك العالم صدق تام جانبین ایله پذیرای ختام اولوق ایچون بز لر که دولت علیه سرمدی القیام طرفدن بارخصتنامه هایون مرخصلرز مقتضای ماموریت و رخصت کامله مز اوزره اشبو تمسک ترقیم و املا و کندو مهر و امضالریز ایله محتوم و ممضی قلوب ایلچیء مومی ایله طرفندن دخی رخصتنامه سی مقتضاسنجه محتوم و ممضی اوله رق طرفزه تسلیم اولنان فرنگی العبارة عینی برقطعه تمسک ایله مبادله ایلچیء مومی ایله اعطا اولندی حرر فی الیوم السادس والعشیرین من شهر رجب الفرد سنة ثلث عشر ومائین والف من هجرة من له العز والشرف فی بلدة القسطنطنیه المحروسه .

(۴)

\* دولت علیه ایله انکلتره دولتی بیننده عقد اولنان عهدنامه \*

\* اتفاق صورتیدر \*

الحمد لله الذی سیر فلک الافلاک فی محیط عجائب قدرته \* وارسل الریاح لواقع مبشرات

لاظهار امواج قزم عظمته \* وشيد نظام الكائنات بباهر سطوات الملوك من عباده  
اولى بأس شديد \* وايد الاسلام برجال ما هم من اهله حين قاموا على ساق واحد  
واتفاق سيد \* والصلاة والسلام على خير خلقه محمد الذي الف القلوب المتنافرة  
بالقوة القدسية القاهرة \* وشوى اكباد المتمردين بنيران بوارق السيوف الباترة \*  
وعلى آله واصحابه الذين قطعوا مرأر الفتن والنفاق بمدافع الشجاعة والبسالة \*  
واغر قوا سفائن الفساد بنكباء الصرامة في مرج البحرين من الحماسة \* مارعدت  
غيوم القياهب بالصواعق والبرق \* وتلاطمت امواج النصر لقهرا لاعداء بالفرق \*  
باعث تحريك كتاب سحت نصاب وسبب تميم حقيقت انتساب اولدر كه اوتهدنبرو  
دولت عليه ايله انكلتره دولتي بينده بلا انفصال باقى وبرقرار اولان حسن وفافه مبنى  
وفرانسه لونك لا ينقطع نقض عهد ايله برو طرفه هجومه تصدي لردنناشى كرك  
دولت عليه ايله وكرك انكلتره دولتي ايله الان محاربه اوزره بولند قلوبه مبتنى  
تشديد روابط محبت قديمه طريفندن رغبت تامه ظهوره كلكين و بودفعه دولت  
عليه وانكلتره دولتك دوستى ومتقى اولان روسيه دولتي اراسنده ضمان تماميت  
ممالك طرفين ايله آساشك استحصال واستمرارى ودولت سائر نك حفظ وحراستى  
اساسى اوزره عقد اولنان تدافى اتفاقك انكلتره دولتي دخى دعوت اولنه جنى شرط  
قلمغين شوكتلو قدر تلو مهابتلو عظمتلو ولى نعمتمز پادشاه آل عثمان وشهنشاه  
دارا دربان سلطان سليم خان ثالث افدمنز حضر تلى وحشمتلو مكنتلو انكلتره  
قرالى جورجوشى ثالث جنابلى كذلك امنيت ورفاه حال رعاياى جانبينى وآساش  
عامه نى ملتزم اوله حق وسائلك استحصال چون بين الدولتين عقد روابط اتفاقه قرار  
ويرمليله بركة دولت عليه ابدى الدوام وسلطنت سنه معدلت ارتسامك امضال بزمده  
مسطور مراتب جليله سنى حائز و بو خصوصه مرخص يز قرال مشار اليهك  
مرخصلى اولان رتبلو اصالتلو اوردره بيه تعير اولنور طريق قرال حرينك  
رتبه اوليسنده قواليرى ودونما باشبوغى وشرق دكزلرنده انكلتره عساكر  
بحريه سنك قوماندانى وبيام سونه اسميت وآستانه سعادتده مرخص ايلچيسى يوحان  
اسقر اسميت ختمت عواقبه باخير ايله عقد مجالس مكالمه ورخصتنامه لر يمز بر يميزه  
ارائه ايله مذاكره اولنوب ذكرى آتى شروط اوزره ايكي دولتك اتقاقى عقدا يلمشردر.  
اولكى ماده روسيه امپراطورينه اشد روابط اتفاق ايله مربوط بولنان  
انكلتره قرالى جنابلى بودفعه پادشاه آل عثمان حضر تليه امپراطور مشار اليه  
بينده عقد اولنان تدافى اتفاقه دولت عليه نك وانكلتره دولتك كيفيت موقعه  
شروطنك توافقى درجه ده اشبو اتفاقنامه ايله داخل اولور ومقابله شوكتلو پادشاه



آل عثمان حضر تلی دخی اشبو اتفاقنامه ایله حشمتلو انکلتره قریله بلمثل معاهده ایدر شول وجهه که دول ثلثه میاننده اشبو تدافعی اتفاقنامه و معقود بولنان اتفاقار و عهدنامه لر حسیله کرک برده و کرک بجرده صالح و صلاح و حسن و فاق و حب و تواد تام ایله الی الابد باقی و برقرار اولوب فیما بعد بر طرفک دوستی دیکر لرک دخی دوستی اوله و بر جانبک دشمنی آخر لرک عندنده دخی دشمن عد اولنه بنا برین دولتین فحیمتین معاهدتین وعد و تعهد ایدر لرکه آسایش امنیت جانینه دأر اولان جمیع مواده خالصانه مخاربه و مذاکره ایدوب کنیدی ملک لرندن هر کونه مقاصد خصمانه بی منع و دفع و آسایش عامه نک استحصالی ایچون بالاشترک اقتضا ایدن اسبابه تشبث ایده لر .

ایکنجی ماده دولتین فحیمتین اشبو اتفاقلرینه زیاده تقویت و یرمک ایچون بالمقابله طرفینک ممالکنه ضامن و کفلا اولور لر شول وجهه که انکلتره قرالی جناب لری فرانسه لونک مصره هجومندن مقدمجه دولت علیه نک زیر تماکنده بولنان کافه ممالکنه بلا استثناء ضامن و کفیل اولوب بالمقابله پادشاه آل عثمان حضر تلی دخی انکلتره دولتک بلا استثناء کافه ممالکنه ضامن و کفیل اولور .

اوپننجی ماده دولتین معاهدتین اکر چه دول سائره ایله مذاکره یه و مصالحتلی ایجاب ایده جکی معاهداتک ربطنه مختار در لر انجق احدها آخره وجه اکمل اوزره تعهد ایدر که او مقوله معاهدات وقتاً من الاوقات بر برینک ادنی ضرر و زیان و خسارتی یا خود تمامیت ممالک جانینه نقصان ترتبی مستلزم اوله جق شروطی قطعاً شامل اولیه بلکه حسب المقدور احدها آخرک شان و امنیت و منفعتی وقایه و تحصیل ایتمکی طرفین وعد ایدر .

دردنجی ماده احد جانینک ممالکنه بر کونه هجوم و وقوعنده جانب آخردن اعطا اولنه جق امداد لر وقت و حالک ایجاب ایده جکی وجه اوزره خلوص طویت قاعده سنه و بین الدولتین درکار اولان ود و محبت صمیمیه نک مقتضاسنه تطبیقاً تنظیم اولنه .

بشنجی ماده دولتین فحیمتین معاهدتین کرک وار قوتلریله و کرک اتفاق مقتضاسی اوزره احدها دن آخره اوله جق اعانتله محاربه ده مشترک اولدق لرنده احد جانین آخری مشترک قیلمینجه و امنیتی تحصیل ایتمینجه مصالحه ایتمیوب متارکه مدیده دخی عقد ایلمیه و اشبو اتفاقک شروطنه یا خود مقتضالرینه صدقله رعایت اولندیغنه بناءً بعضا احد طرفینه بر کونه هجوم و وقوعنده طرف دیکر مصالحت مشترک یه اوفق و نافع صورت ایله مقتضی اولان اعانتی اجرا ایله .

التجی ماده دولتین فحیمتین معاهدتین بینارنده رابطه وقرار ویردیلرکه دونمالری وکییر جنک سفینه لری وسائر سفائن حربیه لری لدی التصادف سلامشغه بدأ ایچون باشبوغلرک رفع وکشاد ایتدکلری باشبوغلق سنجاغندن مستبان اولان تفوق رتبه سنه طرفیندن دقت اولنه مساوات رتبه تقدیرنده سلامشمیه لر وابتدا سلام ویره جنک طرف نمقدار طوپ اتار ایسه طرف آخردن دخی اولمقدار طوپ ایله جواب ویره بنا برین لدی التصادف بو کیفیتی بالذا کره تنظیم وهر کونه سهو وقوعی منع ایچون طرفیندن صدالار ارسالیله مخابره اولنه .

یدنجی ماده حین محاربه ده دشمندن اخذ اولنه حق ادوات حربیه وآلات جنک واموال وامتعهُ متنوعه بالجمله اخذ ایدن غانمین عسکرک اوله .

سکزنجی ماده دولتین فحیمتین معاهدتین الحاله هذه دشمن مشترک ایله محاربه اوزره بولندقلرندن مشترکا محاربه یه قیام ایتک و بشنجی ماده ده شرط قلندینی اوزره طرفینک رأی منضم اولمقسزین مصالحه و متارکه عقد ایتامک اوزره قرار ویردیلر شول وجهله که دولت علیه الان ممالکنک مظهر اولدینی هجومک اندفاعندن صکره دخی ینه محاربه یه مداومت ایدوب کندوسی و متفقلری ایچون شانلو وحقانیتلو مصالحه نك انعقادینه دکن متفقلرندن مفارقت ایتیه وکذلک انکلتره دولتی دخی دولت علیه نك شان وامنیت ومصالحته موافق اولان حالاتی تحصیل ایتمکسزین دشمن مشترک ایله مصالحه ایلمیه .

طقوزنجی ماده دولتین متفقتین منوال مشروح اوزره محاربه ده مشترک اولدقلرندن وعد ایدرلرکه محاربه نك امتدادینه ومصالحه نك شروطنه متدائر نیتلرینی بربرلرینه کشف و بیان ایله لر وبوبابده اصول منصفانه نك مقتضاسنه اقتداء بینلرنده قرار ویره لر .

اوتنجی ماده اشبو محاربه ده اتقاقنامه نك مقتضای مفهومی اوزره طرفیندن اعطا اولنه حق امداد لر زیاده کارکر اولغیچون دشمنک علی الاطلاق وبتخصیص مصر جانبنده مقاصد رديه سی الفا وآق دکز وایچ دکزده تجارتنی محو وافنا ایتک مصالحتارینه اوفق اوله حق احوال حربیه ده دولتین فحیمتین معاهدتین بالذا کره بینلرنده رابطه ونظام ویره لر بوخصوص ایچون پادشاه آل عثمان حضرته لری تعهد ایدرکه دشمنک تجارتنه بلااستثا کافه لیمانلری مسدود اوله جغندن بشقه مقاصد حرص آلودینک حصولنی منع ایچون کندو ممالکنده اقلی یوز بیک نفر عسکرکی دشمن علیه نه اعمال ایدوب اقتضا ایدر ایسه مجموع قوتنه وارنجه اول عسکرک عددینی تکثیر ایده وبالاده مذکور دکزلرده متفقلری دونمالرله بالاتفاق حرکت

ایتمکچون قوت بحریه سنی تجہیز ایلہ و مقابلاً انکلترہ قرالی جنابلری دخی تعہد ایدرکہ کذلک متفقلمری دونمالمالیہ متفقاً دشمنہ ایصال ضرر وکزند واجرای مقاصدنی منع باخصوص دولت علیہ ممالکنہ ہرکونہ ہجومی دفع ایچون ذکر اولنان دکرلرہہ دائماً دشمنک قوتنہ معادل قوت بحریہ سنی اعمال ایتدیرہ .

اون برنجی مادہ انکلترہ دونماسنک آق دکر جانبندہ توقفندن مقصد اصلی ممالک عثمانیہ سواحلتک حفظ و حراستی اولدیغندن نفرائک فراری دونمانک ضعفنی مستلزم اولدینی بدیدار و مقصد اصلی اولان مصلحتہ مضر اولہجنی آشکار اولغله دولتین معاهدتین بو حالتی ہیچ برکونہ علت و بہانہ ایلہ قبول ایتمکمی تعہد ایدرلر .

اون ایکنجی مادہ دولتین فحیمتین معاهدتین بو عهدک ممکن اولدینی مرتبہ مدت مدیدہ دستور العمل طوتلمسنہ خواہشکر ایسہلر دخی تبدل احوال روزکار حسیلہ بعض موادک تبدیلی لازم کلسی محتمل اولدیغندن اشبو تدافعی اتقاقہ تصدیقنامہ لک مبادلہ سی کونندن اعتبار اولنہرق سکز سنہک مدت تعیینہ قرار ویرلدی مدت مذکورہ حلواندہ اولوقتک اقتضاسنہ کورہ تجدیدی خصوصی بین الدولتین دوستانہ مذاکرہ اولنہ .

اون اوچنجی مادہ اشبو تدافعی اتقاقنامہ آل عثمان پادشاهی وانکلترہ قرالی طرفلرندن تصدیق اولنوب تصدیقنامہ لری اوچ آیدہ و ممکن اولور ایسہ آندن اقل مدتہ آستانہ سعادتہ مبادلہ اولنہ .

(خاتمہ) بعون الملک العلام صدق تام جانین ایلہ ذکر اولنان اون اوچ مادہنک شرط و ربط اولدینی اوزرہ وقت مرقومہ تصدیقنامہ لری مبادلہ سی خصوصی پذیرای ختسام اولق ایچون بزلرکہ دولت علیہ ابدی القرار طرفسندن بارخصتنامہ هایون مرخصلرز مقتضای رخصت کاملہ من اوزرہ اشبو تمسک ترقیم واملا و کندو مهر و امضالریمزلہ محتوم و ممضی قلوب قرال مشارالیہک مرخصلری مومی الیہما طرفسندن دخی رخصتنامہ لری مقتضاسنہ محتوم و ممضی اولہرق طرفرہہ تسلیم اولنان فرنکی العبارة عینی برقطعہ تمسک ایلہ مبادلہ مومی الیہما طرفلرینہ اعطا اولندی حرر فی الیوم الثامن والعشیرین من شهر رجب الفرد سنہ ثلث عشر ومائین والفاء من ہجرۃ من لہ العز والشرف فی بلدہ القسطنطنیۃ المحروسہ .

(۵)

\* شریف غالبک پوسلیک نام فرانسز جنرالنہ مکتوبی \*

من الشریف غالب بن مساعد شریف مکة المشرفة الى عين اعيانہ وعمدة اخوانہ

بوسليك مدبر امور جمهور الفرانساويه مهمد بنان السياسة بسداد همته الوفيه وبعد  
 فانه وصل الينا كتابك وفهمنا كامل ما حواه خطابك مما ذكرت من وصول قبحتنا  
 وانك ارسلت محجاناً برفع العشور عن البن وبذلت الهمة في شان التصريف في نفاذ  
 بيعه وتاملنا في كتابك فوجدنا من صدق مقاوله ما اوجب تمسكنا بوثاق الاعتماد  
 عن تموه غياهب الشك في كل المراد ووجب علينا الآن تكوين اسباب المصادقة  
 والمبادره فيما ينظم مهمات تسليك الطرق بيننا وبينكم عن الوعث وزوال المناكره  
 وشهنا الآن الى طرفكم خمسة مراكب مشحونه من نفس بندر جددة المعموره  
 في هذه الاوان ولامكن لنا خروج هذه المقدار الا ابتد علاج مع ساب اطمينان  
 التجار لان كثرة اكاذيب الاخبار اوجبت لهم مزيد الارتياب والاعذار بحيث  
 ما بيننا وبينكم العربان المختلفة رواياتهم على ممر ازمان واما نحن فقد جائتنا منكم قبل  
 هذه المكاتيب التي اوجبت عندنا من خطاب كتبكم زوال تلك الظنون واكاذيب  
 فخطارنا مستقر بالطمأنينة من قبلكم لما ثبت عندنا من الفاظ كتبكم والمطلوب في حال  
 وصول كتابنا اليكم ارسال عسكر من لديكم الى بندر السويس لاجل حفظ اموال  
 الناس ويصلوا بالاتيان الى مصر ويبيعوا التجار ويزول وقف الاسباب والناس  
 وتهتموا في رجوعهم كذلك قبل باوان ليكون ذلك سببا في كثرة وقود الانبان  
 وعند رجوعهم بعد البيع من مصر الى السويس كذلك تصحبوهم بالعسكر من  
 طرفكم الوثيق ليكونوا محافظين لهم من شرور الطريق لان هذه المرة ما ارسل  
 اليكم هذا المقدار التجريه واستخباراً من اعيان التجار وعند مشاهدة الاكرام  
 واحتفال بهم في كل حال يرسلونه اليكم نفائس اموالهم ويهرعون بالجلب لطرفكم  
 ويزول الريب عن قلوبهم ورجوا الله بهمتنا تسليك الطرقات وتيجح المطالب وتحصل  
 المبرات باحسن مما كانت من امان واعظم مما سبق في غابر ازمان ويكثر بحول الله الوارد  
 اليكم من الاسباب الحجازيه لنا بن في المراكب فأمولنا منكم التواء النظر على خدامنا  
 وبذل الهمة على ما هو من طرفنا واتم كذلك لكم عندنا مزيد الاكرام في كل مرام  
 ولا يخفناك انه ورد علينا قبل بايام كتب من طرف امير العسكر الفرانساوى محبنا  
 پوناپارته فما كان لنا منها فتملناه وصار اليه الجواب توصاه اليه وما كان منها معول في  
 ارساله علينا في نواحي الهند وابن حيدر وامام مسكت ووكيلكم الذي في الخا جميعا  
 صدرناها مع من تعتمده الى اربابها وان شاء الله عن قريب ياتيكم الجواب والسلام  
 تحريراً في ثمانية عشر شهر ذى القعدة سنة ١٢١٣

بومكتوب مكة مشرفه دن يكرمي سكرت كونده مصره واصل اولمشدر .

\* مكتوب مذکورك ترجمه می \*

مكة مكرمه شريفى غالب ابن مساعد طرفدن عين الاعيان عمدة الاخوان مدبر

امور جمهور الفرانساویہ مہمد بنیان السیاسة بسداد ہمتہ الوفیہ پوسایک جنرالہ انہا اولنورکہ مکتوبک بزہ واصل اولوب قہوہنک عشرینک رفعی ایچون ہجان ارسال و نفاذ بیعی ضمنندہ حسن ہمتک ابدال اولندیغنی شامل اولان مفادی معلوم اولدی . بونک مفہومی تأمل ایتدک وثوق و اعتماد مزئی موجب اولہ جق حالہ بولدق . بناءً علیہ سزکلہ بزم ارہ مزددہ کی طرفک تأمینی ضمنندہ اسباب لازمیہ حاصل ایتک اوزریمزہ واجب اولدی و شمدی طرفکمزہ بش قطعہ طولو کمی کوندردک و عربانک امنیتی منسلب اولدیغندن بو مقدار دخی کوچ حال ایلہ چیقہ بیلیدی . زیرا اراجیفک کثرتی آنلرک ازدیاد اشتباہنی موجب اولمشدر سزکلہ بزم ارہ مزددہ کی خلق ایسہ اوتہ دنبرو روایتلری مختلف اولان عرباندر عبارتدر . وقتاکہ بوندن مقدم مکاتیبکمز واصل و مضمون صداقت مشحونندن کرکی کبی بزہ اطمینان خاطر حاصل اولوب ظنون و ریب مرفوع اولمشدر . بومکتوبک وصولندہ سزدن مطلوبمز اولدرکہ بندر سویشہ طرفکمز عسکر ارسال اولنوب اموال ناسی محافظہ ایلہ مصرہ ایصال و مصردہ دخی تجارہ بیع ایده لر و برآن اول عودت لرینہ اہتمام اولنوب حین عودتدہ دخی یولده محافظہ لری ایچون کذلک مصردن سویشہ قدر عسکر ترفیق ایلہ لر . سفینہ لر ایلہ بوقدر جق اشیا ارسال فقط بر تجربہ در اعیان تجار سزلردن مروت و اکرام کوردکاری کبی قبلرندن خوف و ریب زائل اولوب طرفکمزہ نفایس مال لرینی ارسالہ مسارعت ایدر لر . بزجناب خدادن استرکہ ہمت مز ایلہ یولرہ امن و امان و سلامت کلوب ازمنہ سابقہ کبی تعاطیء تجارہ سہولت و اسباب حجازیہ دن سزہ وارد اولہ جق اشیا بہ کثرت کاہ . کذلک کمیلرہ بزم قہوہ مز اولدیغندن مامول بودرکہ خدامزہ حسن انظار کز بیدریغ بیوریلوب امور لرندہ معاونت ایده سز بزدہ سزک ہر برامور و مرامکمزہ مزید اکرام ایلہ تقید ایدرز بوندن مقدم فرانمز عسکرینک امیری پوناپار تہ دوستمزدن بزہ مکتوب ورود ایدرک بز دخی لایقی وجہ اوزرہ جواب تحریر و ارسال ایلدک سزدخی کندوسنہ ایصال ایلیہ سز و اما بزہ ارسال اولنہ جق مکاتیب ہند و ابن حیدر و امام مسکت طرفلرینہ یا خود مخادہ و کیلکمزہ ارسال اولنور ایسہ انلر بزم اعتماد ایلیہ چکمز اربابی ایلہ بزہ ایصال ایدر لر و جوابی ان شاء اللہ عن قریب کلور تحریراً فی ۱۸ ذی القعدہ سنہ ۲۱۳

(۶)

\* سجلیاتین دولتیلہ عقد اولنان معاہدہء اتفاق صورتیدر \*

حضرت خداوند ممالک بخشا و جناب تنسیق فرمای امور کافہ الوری تقدست ذاتہ

عن وصمة الاضداد والاشباه وتزهت ساحة وحدانيتها عن شوب الشبه والمراتك  
ارادة باهره صمدانيه وغنايت ظاهره سبحانيه مبي وسيد اصفيا وسهسالار كتاب  
انيا حبيب خدا وشفيع يوم جزا اولو بيغمبريمز محمدالمصطفى عليه وعلى آله وصحبه  
ازكي التحايا حضر تليينك دستياريء معجزات حجة البركاتي واحجاب كزين وخلفاء  
راشدين رضوان الله تعالى عليهم اجمعين وحمله اولياي هدايت قرين واصفياي  
تقدس رهينك مرافقت ارواح طيبة جنت ماوراليه  
( محل طغرى )

بنكه اشرف البلدان والاماكن واسعد الامصار والمداين قبله جمه عالم ومحراب  
توجهات عامه امم اولان مكة مكبرمه ومدينه منوره وحرم مسجد اقصى وقدس شريف  
مبارك خادم وحاكمي واناطولى وروم ايلي وبحر فيدوسياه وحجاز وعراقده واقع رشك  
انداز قلوب سلاطين جهان اولان نيجه اقطار وايالات سبعة نك وقلاع وحصون  
وبقاع وبلدانك خليفة اعظم وشهريار سعادت دنار معظمي السلطان ابن السلطان  
واخلاقان ابن الخاقان السلطان سليم خان ابن السلطان مصطفى خان ابن السلطان احمد  
خانم طرف همايون خلافتهمقر ونمزدن افتخار امراء العيسويه مختار كبراء الملة المسيحيه  
مصلح مصالح جماهير الطائفة النصرانيه صاحب اذيل الحشمة والوقار صاحب دلائل  
المجد والاعتبار سجلياتين قرالى حشمتلو دردنجي فرديناندو دوستمز ختم الله  
عواقبه بالخير والرشاد والهيم اليه سبيل الصواب والسداده توقيع رفيع همايونمز واصل  
اوليجق معلوم اوله كه دولت عليه دائم القرارمله سجلياتين دولتي بيننده دركار اولان  
ود و تحاب وحسن وفاقك تقويت واستحكاي طرفينك مطلوبى اولديغندن بشقه  
فرانسه لونك لاينقطع نقض عهد ايله اطراف واكنافه تعرضه تصديلىر حسيبيه  
ممالك دولت عليه هجوملى دركار وسجلياتين دولته دخى سوء قصدلىر ظاهر  
واشكار وبوجهته بين الدولتين توافق مصلحت بديدار اولديغندن حفظ ممالك جانين  
وتامين رعاياي طرفين ايله دشمن مشترك اولان فرانسه لونك مقاصد حرص  
آلوديني ابطال ايجون بر معاهده مصرحه عقديه اشبو محاربه به متفقا قيامه قرار  
ويرلمش اولمقدناشي اولبايده عقد مجالس مكلمه وتنظيم مواد انفاقه طرف همايونمدن  
رخصت كامله ايله مأمور اولوب روم ايلي قاضي مسكرلكي پايه سى اولان اعلم العلماء  
المتبحرين افضل الفضلاء المتورعين ينبوع الفضل واليقين كشف المشكلات الدينيه  
حلل المعضلات اليقنيه مفتاح كنوز الحقايق مصباح رموز الدقايق المحفوف بصنوف  
عواطف الملك الاعلى مولانا ميرالسيد ابراهيم عصمت ادام الله تعالى فضائله وكذلك  
رخصت كامله ايله مأمور اولان رئيس الكتاب افتخار مهرة الكتاب جامع القنون

والآداب ذوالقدرالاتم والفخر الاسم المختص بمزيد غياية الملك الوهاب احمد عاطف دام علوه يدلرینه بشقه بشقه خطوط هايون پادشاهاتمه معنون رخصتنامه هايونم اعطا اولمغله قرال مشار اليهك دخى آستانه سعادتمده فوق العاده مرخص اورته ايلچيسى اولوب بار رخصتنامه اشبو اتفاقه تعيين اولنان قدوة امراء الملة المسيحيه قسطنطين لودولف ختمت عواقبه بالخير ايله محروسه قسطنطينهده بالدفعات بعد المكله تراضى طرفين ايله ذكرى آتى طقوز ماده اوزرينه عقد وربط وتنظيم وتأسيس ايدوب هجرت نبويه على صاحبها افضل التحية نك بيك ايكوز اون اوچ سنهسى شهر شعبان المعظمنك اون در دنجى كوفى شرفيافته صدور اولان خط هايون شو كتمقر ونمز موجبجه ختم وامضا ومبادله ايلدكرى معاهده تمسكك نده مسطور موادك قبولنى حاوى قرال مشار اليهك مرخص ايلچيسى مومى ايله وساطتيله تصديقنامهسى ورود ايلديكى دستور اكرم مشير افخم نظام العالم ناظم مناظم الامم مدبر امور الجمهور بالفكر الثاقب متمم مهام الانام بالرأى الصائب ممهذ بنیان الدولة والاقبال مشيداركان السعادة والاجلال مكمل ناموس الساطنة العظمى مراتب الاخلاقه الكبرى المحنوف بصنوف عواطف الملك الاعلى بالفعل وزير اعظم ستوده شيم ووكيل مطاق قوى الهمم الحاج يوسف ضيا پاشا ادام الله تعالى اجلاله وضاعف بالتأييد اقتداره واقباله طرفندن دركاه سپهر اشتباه شاهانه مزه عرض وتلخيص اولمغله اشبو مواد اتفاق طرف ملوكاتمزدن دخى مقرر ومعتبر طوتيلوب مقبول هايونمز اولمغين اشبو ماده لدر دكه عينه ذكر و بيان اولنور .

اولكى ماده فرانسه لونك مصر وايتاليا الكالرينه ومالطه جزيره سنه هجوم واستيلاسى دولت عليه نك وسجلياتين دولتلك امن وآسايشنه منافی برحالت ايدوكى جلى وآشكار اولمغله پادشاه آل عثمان حضر تلى وسجلياتين قرالى جنابلى صراحة وعد وتعهد ايدر لركه فرانسه عليه نه دركار اولان اشبو محاربه به متفقا قيام ايدوب كندو حقل نده اوله جق كافه مقاصد خصمانه يي منع وفرانسه لونك تسلطى دولتینه همحدود بولنان ولايتلك اوزرندن دفع ايجون بالاشترك اقتضا ايدن اسبابه تشبث ايدلر .

ايكنجى ماده دولتين معاهدتين بوجهه متفقا محاربه به قيام ايتدكرينه بناء وعد وتعهد ايدر لركه بربرلينك مصالحنى التزام ضمننده احدها اخرى مشترك قيلمينجه دشمن مشترك ايله مصالحه ومشاركه عقد ايلميه .

اوپنجى ماده دولتين معاهدتين وعد ايدر لركه حركات حربه لرينه موافقت تامه حاصل اولمق وجهى اوزره بالمذاكره رابطه ونظام ويرلر وبرمقتضای جواريت

طرفینک حرکاتی ایجاب ایده جکی و جانبینک احوال حاضره سی مساعد اوله جنی امداد لری کرک برآ و کرک بجرأ بر برلرینه اعطا ایلیه لر و سجلیاتین قرالی ایسالی سمتمده دشمن مشترکه وار قوتیله مقابله یه مشغول ایکن فرانسه لونک صدمات هجومه تاب آور اوله میوب امداده محتاج اولدقده پادشاه آل عثمان حضر تلی لدی المطالبه قرال مشارالیه ارنودلق طرفدن اون بیک عسکر ایله اعانت ایتمکی و سجلیاتین الکاسی مخاطره ده اولدقجه و متفقاً دشمن مشترک علیه نه اوله جق حرکات ایجاب ایتمکجه اقتضاسنه کوره کور فزده و ایچ دکرده بر قوی دونمائی اعمال ایلمکی وعد ایدر .

دردنجی ماده احد جانبینک ممالکی دشمن مشترک هجومه مظهر اولور ایسه طرف دیگر دشمنک هجومی دفع ایچون و جوهره اشغالنه قیام ایده جکندن بشقه کندو احوالی تجویز ایده جکی امداد لری مظهر هجوم اولان طرفه اعطا ایله واحد طرفین کندو ممالکنک آسایش و امنیتی ایچون دخی هر نه زمان استعانه ایدر ایسه طرف آخر کذلک امداد و اعانت ایده بشرط آنکه استعانه دعوت اولنه جق بری و بحری عساکری مستعین اولان طرف بسلیه و اعانته و یریه جک قوه عسکرینک امر ایچون اقتضا ایدن سفاین و ذخائر راهیه لری کذلک مستعین اولان دولت طرفدن اداره اولنه .

بشنجی ماده دولتین معاهدتین دشمن مشترک تجارتنه ممکن مرتبه ایصال خسار ایچون اقتضا ایدن اسبابه تشبث ایدوب فرانسه لونک کرک حربی و کرک تجار سفینه لرینه لیمانلرینی سد و فرانسه ایله هر کونه تجارتدن رعایالرینی منع ایلیه لر و کندو لیمانلردن فرانسه ایچون ذخائر و مهمات حرب نقل و اخراجنی قطعاً تجویز ایتمیه لر و بالعکس طرفینک دونماری دولتیله تابع لیمانلره بلا احتراز قبول اولنوب محتاج اوله بیله جکلری ذخائر و لوازم فیئات رایجه ایله اعطا اوانه لکن سفاین حربیه اسلامیهنک باشبوغلری سجلیاتین لیمانلرنده جاری اولان نظارت قواعدینه رعایت ایده لر .

التنجی ماده دولتین معاهدتین مصلحت مشترکه لرینه منی و بینلرنده درکار اولان و دو محبته و حسن جواریته رعایتلرینی نوبنوا سباته خواهشکار اولدقلرینه مبتنی آسایش و امنیت جانبینی مستلزم اوله جق فوآندی بر برلرینچون استحصاله و بو خصوص بینلرنده دوستانه و خالصانه مذاکره برله رابطه و یرمکه وعد و تعهد ایدر لر .

یدنجی ماده طرفینک قوتی بر مقصده مصروف اولمق و مشاغل اخری ایله مشغول اولماق الزم لوازمین ایدوکی جلی و آشکار و الحاله هده سجلیاتین قرالی و کذلک فرانسه ایله محارب بولنان غرب اوجاقلری اراسنده درکار اولان محاربه نک امتدادی مصلحت مشترکه یه مغایر اولدینی بدیدار اولغله دولت علیه حرب



اوجاقلرینی سجلیاتین قرالیله بلاتأخیر مصالحیه مجبور ایتک وامتدادینه ساعی اولمق اوزره متعهددر .

سکرنجی ماده دولتین معاهدتین رعایالرینک امور تجارتنه دخی صرف ذهن ودقت ایده جککرینه منبی هجرة نبویه علی صاحبها افضل التحیه نیک یوز الی اوچ سنه سی محرم الحرامنک اونجی کونی وتاریخ نصارانک بیک یدی یوز قرق سنه سی شهر نیسانک یدنجی کونی بین الدولتین منعقد اولان عهدنامه نیک تجارتنه دائر اولان شروطنی طرفینه انفع اولمق وجیبی اوزره آسایشک اعاده سی حصوله کلدکده تجدید ایتکی وعد ایدر لر .

طقوزنجی ماده اشبو عهدنامه پادشاه آل عثمان حضر تاری وسجلیاتین قرالی جناباری طرفندن تصدیق اولنوب تصدیقنامه لری الی هفتدهه وتمکن اولور ایسه آندن اقل مدتده آستانه سعادتده مبادله اولنه .

( خاتمه ) ذکر اولنان طقوز ماده نیک مشروط اولدینی وجهله وقت مذکورده تصدیقنامه لری مبادله سی ختام پذیر اولمق ایچون بز لکه طرف دولت علیه ابدی الدوامدن بار خصتنامه هایون مرخصلرز مقتضای مأموریتمز اوزره اشبو تمسک ترقیم واملو وکندو مهر وامضالریمزله محتوم ومضی قنوب قرال مشار الیه نیک مرخص ایلیجیسی مومی الیه طرفندن کذلک محتوم ومضی اوله رق طرفزه تسلیم اولنان فرنکی العبارة عینی برقطعه تمسک ایله مبادله واعطای اولندی دیو طرفین مرخصلرینک مبادله ایلدککری تمسکلرنده محرر ومسطور اولغله ایمدی دولت علیه مرخصلری مشار الیهما طرفلرندن ویریلان تمسک موجبجه فیما بعد مواد مرقومه طرف شاهانه مزدن دخی مقبول ومعتبر طوتیلوب کمالیله رعایت اولنه جفی بدیهی واطهر اولمق حسینیه مادامکه سجلیاتین دولتی طرفندن تأیید وتصدیق اولنان اشبو موادک خلافتنه برکونه وضع وحرکت اولنیمه دولت علیه جانندن دخی مغایری حرکت وقوعه کلیه جکی بی اشتباهدر حرر فی الیوم الثالث من شهر ذی الحیجة الشریفه لسنة ثلث عشر ومأتین والف من هجرة من له العز والشرف .

( ۷ )

\* اخراج مواجب حقنده قائم مقام پاشایه خطاباً صادر اولان \*

\* خط هایون صورتی \*

سنکه رکاب هایونم قائم مقامی ابو بکر پاشاسین .

سنی سلام سلامت انجم شاهانه مله تلطف ایلدیکمدن صکره معلومک اولسونکه

صدراعظم یوسف پاشا حسب الاقتضا سفره سبکبار عزیزت ایلوب درگاه معلوم قو  
قوللری او جا قلم رکاب هایونده قالمغه اشبو بر قسط محرم مواجیلرینی اخراج  
وتوزیع وتقسیم برله دورنی تکمیل ایلدیکنک موجب محظوظیت طبع ملوکانه اولوب  
خلع فاخره خسروانه مدن سکا بر ثوب سمور فائض السرور و برقبضه مجوهر خنجر  
رکابداری اغایله ارسال ایلدم کورکی دوش صداقتکه اکتسا وخنجری میان غیرته  
بند ایلوب دوام عمر و دولت شاهانه مه دعا و ذاتکده مر کوز اولان درایت و صداقت  
و کار اگاهی و حتی اجرا برله محول عهدۀ صداقتک اولان کافه امورده عاقلانه غیرت  
ولوازمات سفریه بغایت دقت ایلوب ترسانه و طو پخانه و باروت و سائر مهماتک  
تدارک و تهیه سنه و سکنه آستانه عایه مک اقوات یومیه سنه و ممالک محروسه  
شاهانه مک کید و مکر اعدادن محافظه و محارسه سنه کیجه و کوندز صرف همت و اسعاره  
دقتله عباد اللهه هیچ برشیده زحمت چکدر میوب تأدیب و تنکیل اشقیا و صیانت فقرا  
ورعایا ایلهرک هر کسدن دعای خیر آلوب دشمن دین و دولتمز اولان فرانسه لو  
خائن و غدار لرندن اخذ ثار و انتقامه و بعنایه الله تعالی اقلیم مصری قریباً وجود  
خبثت آلود مشرکیندن بالکلیه تطهیرینه موفق اولماز اسبابنه صوری و معنوی  
اقدام و غیرت ایله سین کوریم رکاب هایوننده اولان رجال دولتم و او جا قلم  
رجالیله حسن امتزاج ایلوب هر خصوصی کوکل بر لکیله طوتوب و دائماً اتفاق  
و اتحاد اوزره اولوب خدمات دوات علیه مده صادقانه و رضاجویانه حرکت ایده سین  
جناب رب العالمین سنی و سنکله برابر دین و دولت علیه مده صادقانه و رضاجویانه  
حرکت و غیرت ایلانلری دارینده عزیز ایلوب یوزلر یکزلی آغ ایلسون و دشمن  
دین و دولتمزی دائماً مقهور و مدمر ولوای اسلامی منصور و مظفر ایلوب هر حالده  
توفیق و سلامت احسان ایلسون آمین .

(۸)

\* دوبره و نیکو نیک رسم کمرکاری حقنده اصدار بیورلمش اولان \*

\* فرمان عالی صورتیدر \*

بو بدن اقدم دوبره و نیک بکلی و کنزلی مرحومون اجداد عظام انار الله تعالی  
براهینهم زمانلرنده صداقت و استقامتله اطاعت و انقیاد کو ستر دکاری اجلدن اللرینه  
عهدنامه هایون و یریلوب بعده جد امجد مرحوم سلطان احمد خان طاب ثراد زماننده  
عهدنامه لرینک تجدید اولنق رجا ایلدکلرندن قدیمدن اذا ایده کل دکلی اون ایکی  
بیک بشیوز سکه فلوریلرینی سال بسال عادت قدیمه اوزره ایلچیلر یله کونده ره لر

ذکر اولنان اون ایکی بیک بشیوز سکه فلوریدن زیاده خراج طلب اولنیه  
 و مزبورلرک ولایت و مملکتلرینه و حصارلرینه و کندولرینه و سائر بکلرندن  
 و صو باشیلرندن و ارباب تیماردن و بالمله سایه سعادتده اولان کمنه لردن بوجه  
 من الوجوه ضرر و زیان ایرشمیه و بوندن اقدم قلعه لری و ولایتلری نوجهله امن  
 و امان ایچنده اوله کلشلا ایه کیرو اول وجهله امن و امان ایچنده اوله لر و بونلرک  
 جوانبنده اولان ایلرندن باغی و ایلك اولسون قروندن و یاشدن اولسون مزبورلرک  
 قلعه لرینه کله کیده لر هیچ احد مانع اولمیوب دخل ایلمیه و بازرگانلری ممالک محروسه مده  
 تجارت ایده لر کلوب کیده لر رزقلرینه و طوارلرینه و سائر ائوابلرینه کمنه دخل ایدوب  
 زحمت و یرمیه و بونلردن باج طلب ایتمه لر و ذکر اولنان دوبره و نیک تاجرلری  
 ممالک محروسه مه متاعلرین کتوروب فروخت ایلدکلرنده اولدن یوزده ایکی  
 آچه کمرک انه کلوب صکره مزبورلرک صادقلری متاعلرندن یوزده بش آچه کمرک  
 النطق فرمان اولنمشیکن دوبره و نیک ایلیچیلری کلوب استانبول و ادرنه و بروسه دن  
 غیرى روم ایلی و لایتلرنده تاجرلریمزک صادقلری متاعلرندن برقرار سابق کمرک  
 ایکیشر آچه آئوب اوچ یردن غیرى صاتیلان متاعمزک کمرکی اوچ ییله اوچ یوزبیک  
 آچه مقاطعه ایله جانبزدن عامل بولالم و عاملمزه برر کفیل بالمال بوله لم نسنه ضایع  
 اولمیوب و آلتی آیده برالی بیک آچه خزینه عامر هیه تسلیم ایده لم آخردن امین دخل  
 ایلمیوب اوزریمزه حواله کلسون دیو التزام ایلدکلری اجلدن مزبورلرک بازرگانلری  
 ذکر اولنان اوچ یردن بکلری روم ایلی و ولایتلرندن قره دن و دکردن کتوروب  
 صادقلری متاعلرندن برقرار سابق یوزده ایکی آچه النطق امر اولوب بازرگانلری  
 متاعلرین صادقلری یرلده یوزده ایکی آچه کمرکلری کندو طرفلرندن کمرک  
 عاملی اولانه و یره لر و هراتی آیده برالی بیک آچه التزاملری اوزره خزینه عامر هیه  
 کتوروب تسلیم ایده لر و ایلیچیلری شویله شرط ایلدیلرکه ذکر اولنان کمرک عاملی  
 هان اوچ ییله اولیه بو اوچ ییل تمام اولدقدن صکره کیرو کندو طرفلرندن برر  
 عاملر و ماله بر کفیلر بولیوره لم دیو التزام ایبتدیلر و امین اولنلر کیرو دوبره و نیک  
 قپوسنده اوتوروب و بونلردن غیرى فرنکلرندن یوزده بش آچه اوزره جمع ایلیه  
 و بو وجهله شرط ایلدیلرکه حبله و تلیس ایدوب سائر فرنکلرک متاعی کمرکنی  
 و یرماملک ایچون کندو مزکدر دیو صورت ایدوب آلمه لر شویله : حبله لری  
 ثابت و ظاهر اوله اول متاع گرفت اولنه قره دن و دکردن استانبوله متاع کتوروب  
 صادقلرنده یوزده بش حسابی اوزره و ادرنه و بروسه مه متاع آلوب کیدوب  
 صادقلرنده یوزده اوچر آچه کمرک و یره لر ذکر اولنان اوچ شهرک کمرکی

بومقاطعه ده داخل دكدرد خزینة عامردیه ضبط و قبض اولنه و مزبور لرك تاجر لری  
 متاعلری صامیه جق اولور ایسه آلوب ایستدكاری یرده ایلته لركمسنه مانع اولیوب  
 والیمیری اولان یرلردن اكر شرعله ثابت اولور ایسه آله لرك و شاهد لری  
 دوبره و نیکده اولان كمسنه لرك شهادت لری مزبور لرك الیمیری اولانلر حقنده مسموع  
 اوله اكر الیمیری مسلماندن ایسه قاضی یه واروب شرعله ثابت اولور ایسه آله لرك  
 و آخرك بورجی ایچون دوبره و نیکدن کلانی طوتمیه لرك بلکه بورجلو کیم ایسه آنی  
 طوته لرسن اول یردن سین دیو رنجیده اتمیه لرك ممالک محروسه مدن كمسنه نك رزقی  
 آلوب دوبره و نیکه قاحسه لرك بیله كركدرکه عادت اوزره آنده دخی تفتیش اولنه  
 تا کیمسه نك رزقی ضایع اولیه دوبره و نیکدن بری کلوب ممالک محروسه مده مرد  
 اولسه رزقه بیت المالحی و قسام دخل اتمیه بلکه آندن وارثی کلوب رزقی طلب ایلیه  
 وعداوت اوزره اولان کفار ولایتلرندن بازركانلر مزبور لرك ایلرینه تجارته  
 کلورلر ایسه هیچ احد مانع اولیه و کندولره ممالک محروسه مدن كمسنه زیان ایدر  
 ایسه بكا عرض اولنه کرکی کبی حقندن کلنوب رزقلری تضمین ایتدیر یله دیو عهدنامه  
 هایون و یریلوب ذکر اولنان خصوصلردن غیری دوبره و نیک بازركانلری ممالک  
 محروسه دن آلدقلری متاعی استانبول و طونه و روم ایلیده واقع اسکله لرده کیلره  
 تحمیل ایتدکارنده كمسنه مانع اولیه و عادت قدیمه اوزره یوزده ایکی اچه کمرکاری  
 ادا ایلدکار ندنصره اولیکالنه مخالف رفت و مصدریه نامنه اچه آتمیه و شمدنصره  
 سائر بدعتلر احداث اولنغله جمله روم ایلی ولایتلرنده دوبره و نیک بازركانلرندن  
 نسنه طلب اولنیه و بازركانلری متاعلرین صامیه جق اولور ایسه ایستدكاری یره  
 آلوب کیدوب كمسنه مانع اولیه کمرکیلردن دخل و تعرض ایاویه دیو عهدنامه لرنده  
 درج اولنق رجا ایتدکارندن پایه سریر اعلایه مقدما عرض اولنقدقه ماتقدمدنبرو  
 اوله کدیکی قانون اوزره اوله دیو خط هایون ایله فرمان اولنوب اول عهد نامه یی  
 دوبره و نیک بکاری کوندروب جدا مجدم سلطان احمدخان طاب ثراه زماننده تجدید  
 اولنوب بعده عم بزرگوارم و بابام خداوندکار طاب ثراه دخی مقرر طوتوب مجددا  
 عهدنامه هایون و یریلوب دولت و اقبال و سعادت و اجلال ایله سریر سلطنت و تحت  
 خلافته جلوس هایونم واقع اولغین حالا ایلیچیلری فرانونودیری و بانال بر و قوی  
 ایله کوندروب زمان شریفمده دخی تجدید اولنق رجا ایلدکارندن بندخی مقرر  
 طوتوب مجددا بو عهد نامه هایونی و یردم و بیوردمکه ذکر اولنان دوبره و نیک  
 بکاری مادامکه جاده عبودیتده ثابت قدم و راسخدم اولوب وجه مشروح اوزره  
 صداقت و استقامت ایله خدمت لری و خراج لری ادا ایلیه بندخی عهد و یمین ایدر مکه

یرلری و کولکری خلق ایدن خدای متعال جل جلاله حقیچون و دینم ایچون و اجداد عظام و بابام انارالله تعالی بر اهنیم ارواح شریفه لریچون بوشر طردن عدول و انحراف کوسترلیه و اشبو عهدنامه هایونمه مخالف امر شریف دخی اخراج اولنور ایسه عمل اولنمیوب دائماً بو عهدنامه هایونم موجنبجه عمل اولنه تخریراً فی او اخر محرم الحرام سنه ثلث و سبعین والف .

(۹)

\* مصر جانبنه اولان قله بر نام فرانسه جنرالنک فرانسه جمهوری طرفنه \*  
 \* ۸ تشرین اول تاریخلو تقدیم ایلدیکی تخریراتنک ترجمه سیدرفی سنه ۱۶۱۴ \*  
 کچن ماه اغستوستک یکر می او چنده جنرال پوناپارته کمنسه یه خبر ویر مکسزین بو طرفدن فرانسه یه عزیمت ایدوب یوم مرقومک ایرتسی کندوسیه لاجل الملاقاة دمیاطه و رودم مطلوب ایدوکنی مقدم اخبار ایتمکدن ناشی محل مرقوم موعوده وصولنده ترک ایلدیکی بر طاقه تخریراتی بولدم جنرال مرسوم شاید صوب مقصوده مرور ایده مز ملاحظه سنه مبنی ذکر اولنان تخریرات ایله درونارنده مسطور مأموریتیزی مشعر کاغذک بشقه بشقه صورتلری و صدر اعظم حضر تلرینک شام شریفه وصولی رعنا معلومی ایکن آستانه سعادتده جناب حضرت صدارتپناهی یه ابعاث اولنق اوزره جنرال مرسومک کوندر دیک بر قطعه تخریراتنک صورتی منظور کنر اولق ایچون بو دفعه طرفکنزه ارسال و اول امرده عسکرک چکونکیء حال و کیفیتنک تحقیقی عند مزده اقدم امور اتخاذ اولنغله اولبایده بذل سعی بیهمال اولندی .

جنرال مرسومک مصر جانبنه حین ورودنده قوت و عسکری نه حالده اولدینی معلومکنر اولدیغندن بشقه بودفعه دخی تحقیقی آساندر شمیدی به قدر قوت مذکورہ نصفی مرتبه تنزل و تدنی بولوب باقی قلان عسکر ایله بویله بر اقلیمک نیجه نیجه محملری و بالجمله اطراف و انخاسنی محافظه یه مجبورز حالبوکه ایشمز مقدمکی کبی بعض فتور کتورمش مملوک طائفه سیله جنک ایتمک اولمیوب دولت علیه و انکلتره و روسیه کبی اولو دولتلرک بالانفاق اعمال ایتمکری قوتلرینه مقابله ایتمکدر عسکر مزده بردنبره ظهور ایدن بومقوله نقصان جسمیدن بشقه اسلحه و باروت سیاه و دوکمه تیمور و قورشون قلتدن دخی اضطراریمز درجه غایته رسیده و بو طرفده مهمات مرقومه تدارکنه نه قدر صرف همت اولنمش ایسه وجوده کلدیکی قید شکو کدن آزاده اولوب از جمله دوده جانبنده احداث ای تدیریلان باروت کارخانه سنک بوآنه قدر بروفق مطلوب فائده سی مشهود اولدیغندن بشقه بوندنضکره دخی چندان ثمره ملحوظ دکدر .

بودن بشقه عسکرک البسه سی قالمیوب بو طرفده ایسه علی الدوام زخیر ورمدم  
 عتلمری مستولی اولمغله ابدانک محافظه سی درجه و جویده ایدوکی و محن سفریه دن  
 کلان کتورمش طوائف عسکریه مزدن بوسنه علت زخیرک کثرت اوزره ظهورینی  
 ایجاب ایتمش اسباب قویه دن بری البسه نک فقدانی ماده سی اولدینی ظاهر اولوب  
 حتی بوسنه مبارکه ده عسکرده نقصان جسم درکار ایکن بودفعه خسته لک مقمداری  
 کچن سنه نک بوموسمنه نسبتله قتی کلی زیاده ایدوکی اطبا و جراحان تقریرلرندن  
 مستبندر فی الحقیقه مرسوم پوناپارته بو طرفدن عزیمتدن مقدم عسکره چوقه  
 البسه سی ترتیب و یلدرلمسی تنبیه ایدوب انحق سائر نیجه ماده لرده اولدینی کچی  
 بوباده دخی تنبیهی وجود پذیر اوله مدینی و علاوه مشکلات اوله رق بودفعه آچه  
 خصوصنده ظهور ایدن ندرت و احتیاج عظیم تقریبیله الزم اموردن اولان ترتیب  
 مذکورک اجراسی عقدۀ تسویف و تأخیره دوچار اولمق اقتضا ایلدیکی درکار اولمغله  
 بو محله آچه نک دخی درجه ندرتی بسط و اشعار اولمق اقتضا ایتدی .

جنرال مرسوم بو طرفه اوائل ورودمزده مصارف سفریه نامیله تکالیف عیدیه  
 طرح ایدرک مملکتک ادایه متحمل اولدینی مبغی اگرچه جمع ایتدیروب لکن  
 شمیدیکی حالدۀ خارجدن دأراً مادار اعدانک جمعیتنه نظراً تکالیف طرحنه اولوقنک  
 تدبیری اجرا اولمق مراد اولنسه بین الاهالی عصیان مقدماتی توطئه دن فرقی بوقدر  
 مرسوم جنرال دخی بو طرفدن حین عزیمتده خزینه ده حبه واحده ترك ایتدیکندن  
 بشقه وقته کوره بر سنه ک ایراددن متجاوز اولان تقریباً التی بیك کیسه آچه که  
 یالکز ایکی بیك کیسه آچه دن زیاده عسکرک گذشته علوفه سیدر دین صحیح ترك  
 ایلدی بر طرفدن نهر نیلک طغیاننه نظراً بر آیلق مصارف ضروریه لرینه مدار  
 اوله حق عسکرک گذشته علوفه و وفا ایده جک قدر آچه تحصیل بیله درجه استحالده  
 اولوب بو صورتده تحصیل ماده سی کله جک اغستوس شهرینه قدر تأخیر اولمق لازم  
 کله جکنی و اول موسمه بهر حال محاربه یه اشتغال تقریبیله امر تحصیل صرف ذهن  
 ممکن اوله میه جنی و الحاصل بوسنه مبارکه ده نهر نیل طغیانی مأموله موافق اولمیوب  
 تقدماً ادای تکالیفدن محزی نمایان اولان بعض ولایتلره صوری مساعده لازم کله جکی  
 بی اشتباه اولوب حالات مرقومه واقع حالک عینی اولدینی سندات معتبره ایله  
 طرفکنزه اثبات ممکندر .

الحالۀ هذمه مصر جانبنده ظاهر حاله کوره اگرچه آسایش و اطمینان صورتلری نمایان  
 اولوب انحق اهالینک عدم اطاعت و عصیانۀ استعداد و رغبتلری درکار و طرفزی دشمن  
 دین نظریله مشاهده ایدرک دلخواه لرینه موافق تبدلات ظهورینه دیده دوز انتظار

اولد قلمری آشکار در مملوکار بالکلیه مندفع اولیوب محل بمحل متشمت و پریشان اولد قلمری و مراد بک حالا مصرک اوست جانبنده اولوب بردقیقه آرام ویرلسه جمعیتی بردن بره متزاید اوله رق درون مصره قدر طرفزه ایراث خسار ایده جکی وهر نقدر مراسم تیقظه رعایت اولتمقده ایسه دخی درون مصردن میر مومی الیهه آقچه وسلاح ارسالیله لا ینقطع امداد یتشدیرلمکده اولدینی معلوم اولغله بالضرور اولطر فده کلیتلو عسکر من اشغال اولتمقده اولوب ابراهیم بک دخی ایکی بیگ نفر مملوک الیه غزه ده موجود اولدیغدن قطع نظر اردوی هایون و جزار پاشا عسکری اوله رق اوتوز بیگ مقداری عسکر غزه یه واصل اولدینی استخبار اولندی انکلتره لو دخی الیوم بحر سویشی ضبط الیه ساحل غریبسنده ابنه احدائی قیودنده اولد قلمردن بشقه اولطر فده واقع قوشیر نام محلك ضبط و تسخیری اسبابنه تشبث ایلدیر محل مذکورک فتحنه ظفر یاب اولور ایسه مصرک اوست جانبنده کل یوم اعدامز تکثری تقریبیله فیما بعد اول جانبدن دفع غائله سفر تصور اولنیمه جنی درکاردر . بو طرفده صورت حال بودرجه نی کسب ایتمش ایکن مرسوم پوناپارته بارکران مأموریتی اوزرمزه تحمیل ومصاحته عارض اولان حالات بحر انک و خامتی تقرب ایلدیکی جنرال مرسومک مشهودی اولمش ایسه دخی امرکره مبنی غائله نی برطرف ایده بیلدی لکن ذکر اولنان حالت بحران الیوم باقی و برقرار اولدینی طرفزه ارسال ایلدیکی تحریر اتندن و صورت تعلیماتدن و فتح باب مکالمه یه مبادرتندن ثابت اولوب بو حالت درون مصرده اولان فرانسه لونک نه وجهله معلومی ایسه نزد اعداده دخی محقق و مجزوم اولدینی کورینور .

جنرال مرسومک طرفزه ارسال اولنان تحریراتی مآئنده بوسنه جانب مصرده علت و باظهور یله عسکر دن بیگ بشیوز نفر سالتات تلف اولمق لازم کلسه آتی الحلول موسم صیفده سفره مداومت الیه اختیار خطر جائز اولیوب تکلیف اصلی مصر تخلیه سی اولسه بیله دولت علیه الیه عقد مصالحه یه رخصتکز درکاردر عباره سی مندرج و مسطور اولوب عباره مذکورده دن احکام عدیده استخراجی و بتخصیص الیوم بولدیغمز حالتک تحقیقی ممکن اولغله بعینها بو محله بسط و اشارت اولندی لازم الحافظه اولان بوقدر اراضی و اسعه نك مسافه سه نسبه وکل یوم طرف طرف مقابله یه مجبوریمزه نظراً بیگ بشیوز نفر سلطانک زیاده و یا خود نقصانندن نه حاصل اوله بیلور .

کذلک تحریرات مذکورده نك دیگر محلنده اسکندریه و عریش هر بری مصرک برکلیدی مثابه سنده اولدینی جنرال مرسوم تحریر ایدوب عریش قلعه سی چولده

درت قوناق مسافه ده واقع اولدینی جهندن اولطرفه ذخیره نقلنده کمال صعوبت درکار و بوتقریب محافظه سیچون ایکی یوز الی نفر دن زیاده عسکر تعینی امر دشوار اولوب حتی مملوک و عربان طائفه سی مراد ایتسه لر الی یوز نفر ایله قطیه دن عریشه یوللری سد و بنده قادر اولدقلری ظاهر و جنرال مرسومک بو طرفدن حین عزیمتده قلعه مذکورده انجق اون بش کونک ذخیره موجود اولغله اعدا طرفدن فرد تلف اولمیهرق همان حصر و تضیق ایله اولقدر کونده فتحی آسان ایدوکی نمودار و باهردر چولک شدت حرارتنه انجق عربان طائفه سی تحمل ایدوب بونلر ایسه بالدفعات وقت خدمتده فرار و اختفایتمش اولدقلری و الحاله هده اردوی هایونک تقریبی تقریبیه طائفه مرقومه نک عروق غیرت اسلامیه لری حرکت و برطرفدن جانب حضرت صدارتپناهیدن عرض اولنان عطایا و بخشیشانه میل و رغبتلری بهر حال طرفزدن یوز چویرملرینه علت اولمق اقتضایدر بونلر دن بشقه عریشه اوغرامیهرق برشامدن مصره واره جق و صوبولنه جق ایکی طریق اولوب حتی بریسنی خارجه چیقاردیلر اسکندریه دیدکاری محل دخی قلعه اولیوب اطرافی متریس چورلمش بر صحرای واسع و فی نفس الامر مقدمه وافر آغرتوپ و ضعیله استحکام و متاتی واقعدر لکن برشام جانبده مقدما ظهور ایدن وقعه تجیعهده ذکر اولنان طوپلر تلف اولدیغندن بشقه پوناپارته دخی معینه استصحاب ایلدیکی ایکی فرقتیلری مکمل طوناتمق ایچون اولطرفه موجود دو نما طوپلرینک مجموعنی اخذایتمش اولغله بوندن بویله محل مرقومه مدافعه یه مدار اوله جق استحکام قالدینی ظاهر در .

بوندن اقدم انجور جانبنده واقع فتوحاتدن ثمره مأمولنده پوناپارته نک ملاحظه سی عبشر فی الحقیقه محل مرقومه قره یه چیقان طقوز بیك اهل اسلام عسکری کلی مرتبه منهزم اولمش ایسه دخی بویله بر ملت عظیمه نک متصرف اولدینی ممالکدن احسن ملکی یندن نزع و غصب اولدینی جهندن ملک مذکور ی استرداد ایچون اخذ انتقامه مبادرت مصلحت دین و دولت و تکمیل عرض و ناموس سلطنت قیلندن ایکن طقوز بیك نفر عسکرک خسارتی نه بی مفید اوله بیلور بوکامینی تدارکات سفریه یه واردوی هایونک حرکت بر دقیقه موجب تأخیر اولمش دکلدلر کیفیت حال بو منوال اوزره ایکن بودفعه بن نوجهله حرکت ایتملیم و المدن نه کلور ظنمه کوره پوناپارته نک مباشرت ایلدیکی مکمله صورتی الدن بر اقیه رق بووجهله وقت قزائمق ممکن اولسه آندن اعلا تدبیر اولدیغندن اولسایده جانب حضرت صدارتپناهی به پوناپارته نک کاغدی صورتی ارسال ایله تحریر ایلدیکم مکتوبک بر قطعه صورتی منظور کر اولمق ایچون بودفعه طرفکره ارسال اولنور .



جانب مشارالیهدن بروفق مأمول جواب ظهوری لازم کسه مصرده طرف دولت علیه دن کفای السابق بروالی نصب اولنق و از قدیم مرتب اولوب بروقده دولت علیه طرفدن عیناً تحصیل اولنه میان اموال میریه والی مشارالیه ترک اولنق و مصر ایله برالشامک تجارتی آچلمق و فرانسه جمهوری ایله انکلتزه دولتی میاننده عقد مصالحه اولنجه قدر فرانسه لو مصرده قالب اول طرفده واقع قلعه لر ی ضبط و محافظه ایتمک و اموال میریه مرقومه دن ماعدا کافه رسوماتی و کمرک رسمی تحصیل ایلمک شرطیه اراضی مصرک ردی طرفدن تکلیف اولنه جق اولغله اساس اوله رق عرض اولنه جق شروط مذکورہ مختصره قبول اولنسه فرانسه یه کوره عظیم و جسم فتوحاته موفق اولمقدن زیاده بر خدمت جلیله اولمش اولور اعتقادنده یم انجق امر قبولده عثمانلونک غروری مانع اولسلیله بیه انکلتز لوندک نفوذی محذور قوی اوله جنی ملحوظ اولغله شروط مرقومه یه حواله سمع اصفا اولنق احتمالی مستبعد کورینور هر نه ایسه وقت و حالی مطالعه ایله اکاکوره عمل و حرکت ایتمکده تجویز قصور ایتم . اراضی مصرک ضبط و تصرفی نه درجده امور معتادان ایدوکی معلوم و فرانسه یه کوره چار اقطار جهان ایله اجرای تجارتیه مدار اوله جق بر مرکز قوی مثابه سنده اوله جنی عندمده دخی مجزوم و مقرر ایدوکی مقدا اور و پاده اولدیغ حالده اگر چه سویلمشیدم انجق بو مرکزده دوام ایتمک اول ائنده موجود اولان دو ننامزه استناد ایله حاصل اولور مواد دن ایدوکی ظاهر و اولوقدنیرو جمیع احوالده تبدل عارض اولدیغی نمایان و باهر اولوب بوصورتده ملحوظ اولان مرامی منتج اوله میه جق اشبو مصلحتدن شانلو وجه اوزره چکلنمک طریق انجق دولت علیه ایله مصالحه صورتی ایدوکی بی اشتباهدر .

الحالده هذه اور و پاده جاری اولان حالاته تطبیقاً خصوص مرقومک دولتجه نفع و ضرری تفصیلاتی وظیفه مدن خارج اولدیغندن بشقه بر طرفدن دوچار اولدیغ عجز واضطرابه بناء و بر جانبدن بعد مسافه تقریبیه وقایع روزمریه عدم وقوفه نظراً مأمور اداره سی اولدیغ عسکرک سلامتی و وقایه شان و ناموسدن غیری بر مصلحته صرف ذهن ایده م جناب حق بر طبق رضا حرکتیه موفق ایدرک تحصیل سرمایه فخر و مباهااته مظهر ایله .

محتاج اولدیغمز مهماتک بر قطعه مفردات دفتریله پوناپارته نک ترک ایلدیگی دیونک علی طریق الاجمال بر قطعه دفتری منظور کنز اولمق ایچون اشبو کاغده ملفوفاً طرفکزه ارسال اولنور .

\* تحریرات مرقومه نک ذیلی \*

اشبو کاغدک تحریری ائناسنده اون درت و یا خود اون بش قطعه عثمانلو کیلری

دیماط پیشکاهنه ورود ایتدکاری ویافهده لنگر انداز اولوب علی قول دروننده اون بش یکرمی بیك نفر قره عسکری اولان قبودان پاشانك دو نمانسنه منتظر اولدقلمری واون بشبیک عسکر غزهده موجود اولوب اردوی هایون دخی شامه طوغری گلک اوزره اولدیغی استخبار اولندی بوندن اقدم عربش جانبنده اسیر اولان برنفر فرانسه لو سلطانه صدر اعظم اردوی تماشایتدر دکن صکره کوردیککی واروب یولداشلینه وجزالکه نقل ایله دیوتنیه ایدرک بو طرفه ارسال ایلدی حالت مرقومه مشارالیهک عسکرینه استناد ویاخود مصالحه به استعدادینی ایما ایدر هله بکا کوره عسکر مزدن مقام مقابله ده دوام ایده جک بشبیک نفر دن زیاده عسکر جمعی عدم الاحتمال کورینور مع مافیله مکمله صورتیله امرار وقته دسترس اوله مدیغ حالد بختمی تجرب به ایتمک فکر ندهیم . جزار پاشا عسکرینی غزه دن قالدیروب عکایه نقل ایتدیردی معلومکنز اولمق ایچون اشارت اولندی .

( ی )

\* فرانسه نك مصر فرقه عسکریه سی اداره مأموری پوسلیج \*

\* طرفندن مدیران جمهوره تقدیم اولنان مکتوبك ترجمه سیدر \*

مخلصکنز فرانسه عسکرینك مصر جانبنه ورودندن بوآنه کلنجه کافه امور میریه نك ناظر ومدیری اولوب الحاله هذو جنرال پوناپارته فرانسه طرفنه عزیمت برله بو طرفك احوالی صورت بجرانده ترك ایتمکدن ناشی مأهورتیه متفرع اوله رق شمیدی به قدر دسترس استطلاع اولدیغ بالمله تحقیقاتی و بوندن متولد مطالعات و ملاحظاتك تفصیلی اصول صدق و سداد اوزره طرفکنزه بیانه مبادرت واجبه عهدۀ مأموریت اولغله بوجه آتی بسط کلامه مبادرت اولنور .

مقدما فرانسه جانبندن مصره کلان سیاحان و مخصوصاً ارسال اولنان مأموران اقام مصرک ثروت و مالیتنه دائر بالاتفاق روایت ایتدکاری حالات مبالغه دن عبارت اولغله اون بش آیدنبرو بو قدر هنرمندان تجارب عمیده ایله هر تقدیر حقیقت حالک استکنانه بذل لیاقت ایتمشله ایسه دخی روایت مفرطه مذ کوره حسبیله ضمایر ده قرار کیر اولان اعتقادات سابقه یی هنوز دفع وازاله ایتمک ممکن اوله میور .

روایت مذ کوره به نظر اراضی مصرک وارداتی رسم کمرکی داخل اوله رق سنوی اتوز و بلکه اتوز بشبیک کیسه آخچه به بالغ اولدیغی بیانور ایکن تحقیق اولندیغنه کوره وقت حضرده یالکنز اون ایکی بیك دیدیوز و امر تجارتده رواج اولدیغی حالد اون اوچبیک اوچبوز الی کیسه و بو دفعه اولدیغی کبی وقت سفرده آنجق سکیز بیك ویاخود سکیزبیک بشیوز کیسه به بالغ اولور .

( اراضی )

اراضی مصرک برکتی اولا نهر نیلک کفایت مقداری طغیانہ و بعدہ سولرک نظام اوزرہ تقسیمہ توقف ایتمکله ہزسنہ صویوللری تطہیر و بندلری تجدید و تعمیرندن بشقہ حین قطعارندہ جملہ یہ انفع اولہ جق موسمی کوزدوب تقدیم و تأخیرہ جواز ویرلامک اقدم اموردن والحاصل ہوا یکی مادہ کہ بری صویوللرینک حسن حالی و دیگر صولرک صورت تقسیمندن عبارتدر مصرک برکتی انجق ہونلرہ منحصر و منوط ایدوکی مسلمات قییلندندر زیرا نهر نیل مطالب اوزرہ طغیانی حالتدہ دخی بندلرک قطعی نظام اوزرہ اولمزسہ اراضی وافرہ زراعتدن خالی قالدینی معلوم و طغیان معتدل ویاخود قلت اوزرہ اولور ایسہ جمیع قرادہ ندرت ماء خوفی استیعابنہ مبنی قرب نیلہ ہونانلر بندلرک قطعی تعجیل و بعض مصلحت مخصوصہ لرینہ نظر آرای مخالفدہ اولان قرا تأخیر صورتی ترویج ایدرک بیدنرندہ منازعہ وجدال تحدیثیہ بیہودہ وافر صولتف ایتدیر بلوب بوتقریب ایلہ قحط سنہ لردہ بالطبع درکار اولان زیان اون قات زیادہ اولمش بوصورتدہ نهر نیلک قلت اوزرہ طغیانی سنہ لردہ واردادہ نقصان کلی ظاہر و زیادہ برکت اولدینی سنہ لردہ شمیدیکی صورت نظامہ نظراً فلو اراضی مصرک نلثانی ملک مخصوص اولسہ بیلہ مقدار مذکوردن زیادہ وارداتک تکثری ممکن اولدینی بدیہی و باہمدر .

مصرک صورت نظامہ نظراً کافہ اراضیسی مالکانہ صورتہ مر بوط اولوب اسحاب زراعت اولنلر محصولات اسحاب واقضایدن رسوماتی عیناً ویاخود بدلاً اسحاب اراضی یہ ادا ایدرلر رسومات مرقومہ دخی اوچ نوعدن عبارت اولوب بری اموال میریہ درکہ صاحب ارض محاندن تحصیل ایلہ طرف دولت علیہدن قبضنہ مأمور اولنلرہ ادا ایدر یکونی سنوی ایکی بیک کیسہ آچہ یہ بالغ اولور ایکنجیسی فائض نامیلہ اسحاب اراضینک جلب ایتدکری ایراد مخصوصلریدرکہ جانب میری یہ ویریلان فائض دخی داخل اولہرق طوبی ینہ ایکی بیک کیسہ آچہ ایدر اوچنجیسی زیادہ فائض نامیلہ ینہ اسحاب اراضینک ایراد مخصوصلری اولق اوزرہ آلتان و ظہورات اولہرق قرایہ عیناً و بدلا طرح ایتدیر یلان و عسکر مروری و یاخود قرادہ صاحب لرینک مدت اقامتدہ واقع مصارف و سائر ضبط و ربط و محافظہ بلاد مثللو امور ولایتہ تخصیص اولنلق اوزرہ جمع اولنلان برانی تعیر اولنور مارالذ کراصناف تکالیفدن سنوی درت بیک ایکی یوز الی آچہ و ہونلر دن بشقہ ضابطان بلادک عوائد مخصوصلری اولق اوزرہ آلدق لری سنہ دہ مجموعاً سکر یوز الی کیسہ آچہ اولغلہ بوصورتدہ ہر سنہ اہالی مصرہ تحمیل و نقداً جمع و تحصیل ایتدیر یلان آچہ اولبادہ

مأمور اولان قبطنی طائفه سنک کیتلو سرقی داخل اوله رق تقریباً طقوز بیسک  
 اوچیوز الی کیسه آچه یه بالغ اولور انجق مصرک ثلثی مقدراری جانب میری یه متعلق  
 املاک اولدیغندن بونلردن فائض و برانی نامیله تحصیل اولنان ایکی بیسک یوز اوتوز  
 کیسه آچه حساب مذکوردن فرو نهاده ایله ایراد اصلی یدی بیسک ایکویوز کیسه  
 آچه قالب زیاده آلتیق مراد اولنسه هر حال تضییقه و یاخود تداخل صورتنه  
 محتاجدر مصرک اوست جانبنده واقع ایالتده فائض و تکالیف سائر نقداً تحصیل  
 اولنیوب محصولاتدن عیناً جلب اولتمقدن ناشی میری یه عائد اولمق اوزره آلنان  
 اجناس ذخیره فیئات تقدیر یله بهاسندن حاصل اولان ایکی بیسک اوچیوز اوتوز کیسه  
 آچه دن مصارف تحصیلیه و درون مصره قدر اجرت نقلیه سیچون بشیوز التمش کیسه  
 آچه تنزیل یله باقی بیسک یدیوز التمش کیسه آچه بالاده مذکور ایراده ضم اولمق اقتضا  
 ایدر وقت حضرده رسم کمرک و سائر بونک مثللو خارج رسوماتک یکنونی دخی  
 تقریباً اوچبیسک اوچیوز اوتوز کیسه آچه و ضربخانه ایرادی بشیوز کیسه آچه اولوب  
 بوسورتده میری یه عائد ایراد سنوی من حیث المجموع اون ایکی بیسک سکنز یوز  
 کیسه آچه یه بالغ اولمش اولور قالدی که و قتمزده اولدیغی کبی سفر ائساننده رسم  
 کمرک و سائر بومثللو خارج رسوماتک مجموعی بیسک کیسه آچه دن زیاده اولدیغندن  
 بشقه مصرک اوست جانبنده ایالاتده حاصل اولوب محلامده فروختی و یاخود ایوم  
 اسباب سهولتک فقدانی حسیله اشاعی یه نقلی ممکن اولمان اجناس ذخیره بهاسندن  
 ضرر ترتیله انجق الی یدیوز کیسه آچه حاصل اولدیغی و صولرک ندرتی تقریبیله  
 بعضی قرادن بیسک کیسه آچه قدر تنزیل اقتضا ایده چکی و بوائنده حسب المصاحه  
 ابقاسی لازم کلان قتی وافر مناصب و وظائف و کچن سنه بر مقدراری مقدم ویرلمش  
 اولغله تکمیلیچون ادا ایتدی کمز حج شریف مصارفی و بوسنه کذلک حج شریف  
 ایچون کافه مصروفات معتاده و سائر ضبط و ربط ممالک بلدان و معینات دیوان  
 و یکیچری علوفه لری مثللو مواد عدیده ده تقریباً بیسک کیسه آچه مقدراری صرف  
 اولنور مصارف عسکره مدار اولمق اوزره تحصیلی ترتیب اولنان یالکزی الی بیسک  
 بشیوز کیسه آچه دن ایوم بقیه فلان تقریباً بیسک اوچیوز الی کیسه آچه نک تحصیل  
 آتی الحلول اولان ماه تشرین ثانی و اواخرینه تعلیق اولمق اقتضا ایدر بو طرفه اوائل  
 و رود مزده پونپارته جنرال ملل مختلفه و تجارت طائفه سندن خارج از معتاد اوله رق تقریباً  
 بیسک بشیوز و اصحاب املاکک سنوی واردات مخصوصه لرندن ایکی خمس اعتبار یله  
 سکنز بیسک کیسه آچه اگر چه تحصیل ایدوب لکن اون بش آی مقدراری آلیش  
 ویریشنده کساد کلی درکار اولان برولایتدن تکرار بومقوله محدث تکالیف تحصیل

غیر مأمول و طائفه نصارانک اصلاً آنچه سی قالیوب اهل اسلامدن آلتیق مراد اولنسه  
 اختلال درکار اولدیغندن بشقه الرندن آنچه چیقارمقدن ایسه نصاری مثللو حبس  
 و جبر و تضییق دکل بعضاً قلی دخی اختیار ایدیه کلدکارینه نظرراً مرقومودن دخی  
 نفع و ثمره عذیم الحصول ایدیکی مجربا بدن و پر نیچ یتاغی اولان محللارده تحصیلات  
 موسمی تشرین نائیده و حنطه و سائر اجناس ذخائر حاصل اولوب عیناً ادای تکلیف  
 ایدن محللارک تحصیلاتی وقتی کانون نائیده تخصیص اولنق اسباب سهولتدن معدود ایسه  
 دخی کویلو و چقنچی مقوله سی اهالی قصباتدن زیاده آنچه اعطاسنه طیانوب نهایت الامر  
 ادای رسوماتدن غیر ی چاره اولدیغی و اوقات معینهه بالطبع و الرضا ویره جکارینی  
 ادا ایتسه لر جبر و تضییقندن و ایکی قات خساره کرفقار اوله رق خرابیت حالدن مصون  
 اوله جقلری عندلر نده محقق ایکن ماللرینی نقد و اشیا و ذخائر هر نه ایسه دفن و اخفا  
 ایدرک غایت تضییق کور مدکجه خارجه چیقارمقلری و اوزر لرینه عسکر تعینیه تحصیل  
 تکلیف مراد اولنسه ورود عسکره مترصد کینکاه اولان قره غول مثللو کسنه لر معرفیه  
 خبردار اوله رق مدافعیه به مقتدر اولدقلری حلده جوارده واقع قرادن استمداد ایله  
 مخصوصه به ابتدار و الا اولاد و عیال و حیواناتلرینی استصحاب و مسکنلری اولان  
 قله لرینی خالیه الخالیه ترک ایدرک فراری اختیار ایدرلر بعضاً قریه نك کاشقلری اله  
 کتور یلوب مطلوب اولان اموال تحصیل اولننجیه قدر حبس و توقیف ایتدیرلمکله  
 بصورت بادئ بطاقت اولدیغندن فضله هر وقتده منتج مرام اوله مز اهالی قریه نك  
 حیواناتی اله کچور یله جک اولور سه اموال مطلوبه یی ادا ایله تخلیص حیواناتی قید  
 ایتیموب ضابطان اله ترک و فروخت ایتدیرد کدنصکره اچاقدن تلف اولمیرینی ترجیح  
 ایله سنه آتیله ترالرینی زراعتدن کف ید ایدیه کلدکارینه بناء مجرد جبر و تضییق  
 ایله آنچه تحصیلی ایچون مصرک اون اتی قضالرنده بشقه بشقه التمشر و سکسانر و یوزر  
 نفر عسکر تعینی اقتضا ایدوب بومقوله تحصیلداران دخی اکثریا جزئی آنچه ایله  
 مأمور یتلرندن عودت ایدرلر بونلرندن بشقه هر نه قدر لوازم ضبط و ربطه دقت  
 و ایقاع تهدید قاعده سنه رعایت اولنسه دخی اهالی قرا غصب و غارته تصدیقندن خالی  
 اولیوب نه کونا اختلال نظامه باعث و تمقوله خسار و تعدیباتی مورث اوله کلدکاری  
 ادنی ملاحظه ایله معلوم اولور شویله که : طغیان نهر بر طرف اولدقدن صکره سنه ده  
 سکز آی عربان طائفه سنک چاپوله چیققدقلری وقتی اولوب مدت مرقومه مصارف  
 موسمی ایکن هر طرفدن و اهمه حرب و قتال درکار و تحصیله مأمور اولان نفرات  
 عسکریه هنوز بر طرفی دور و سیاحت و ایفای مأموریته مباشرت لرنده آخر قراده  
 ظهور ایدن عصیان منع و کلان مملوک و عربان طائفه سنی طرد و دفع ایچون عود

ورجمته مجبور اولدقيرينه نظرأ موسم مرقومده امر تحصيلات عقدۀ اشكاله دوچار اولور . آچمه يرينه ذخيره ويريله جك محللردن ذخيره تحصيلي ماده سي دخي مارالذكر صورت تضييقه محتاج اولديغندن قطع نظر آلان ذخائر سواحل نيلده واقع انبارلره وآندن مصر جانبه نقل ايتديرملك اقتضا اتمكله يرلويرندن جمع وانبارلره وضع ايتديرلمسي هزار محنت ايله ميسر اولدقدنصكره مصره ايصالي نيلك طغياني موسمي اولان سنهده درت آيه منحصر وفرانسه عسكري مصره وصولندنيرو حطبك ندرتي تقریبيله احراق ايتديرلان نيل قايقلرينك يرينه شمدي آخر قايق ياديريله جق وقتلر اوليوب باقي قلان چند قطعه سي مراد بك اوزرينه مأمور عسكرك لايقتطع نقلنه مستخدم اولغله ذخائر مرقومه نك جابي خصوصي امر تحصيلنده دركار اولان بالاده مشروح موانع عديده نك مجموعندن اشدواعب برحالت اولوب حتى كچن سنه مصرك اوست جانبنده اولان اياتنده قتي كلي ذخيره موجود واداره مصارف ضروريه مزه نقود لازمه مفقود ايكن تعيينات عسكره مدار اولق اوزره يوزييك غروشلق حنظه مبايعه سنه مجبور وبوسنه دخي نيل قايقلري دخائر ميريدن غيري ذخيره نقل ايدمدكلرندن درون مصرده عباداللهك اقوات يومه لرينه قات عارض اولوب بين الاهالي صورت عصيان ظهور ايلدي . مع هذا كچن سنه تجارتك عدم انقطاعي حسييله نقوده هنوز قندان كلي عارض اولمش دكل ايكن پوناپارته نك وقت عزيمتنده عسكره يدى بيك كيسه آچمه قدر دين قالمشيدى . الحاله هذه نقودك وجودي قاليوب يوما فيوما تكثري دركار اولان مدين تعبير اولنورسكه دن غيري آچمه نابديد اولدي . ذكر اولنان سكه نك مالت اصليه سي سائر سكه لره نسبتله ثلثاندى جزيجه زياده در سفر دن اول اسپانيا جانبندن ريال كتور يلوب يرينه مدين كتور يلوب ايكن بواننده ريال قهويه بدل اوله رق ورود ايتدكجه قال ايتدير يلوب سكه ضرب اولمغله مدينك كثر ووفرتي حاصل والتون سكه نك ندرتي تقریبيله فيثاتي متزايد اولديغي مثللو ريالك فيثاتي دخي ترقى بولور بو حلت هم ذخيره نك غلاسنى موجب وهم نقودك رواجنه خلى مستوجبدر .

والحاصل امر تجارتك انقطاعي حسييله اراضى مصرده حاصل اجناس ذخائر محال سائر هه اخراج ايله فروخت ايتدير يلوب بر طرفدن سكان واهالي تكاليف معاده لريني تماما وكاملا ادايه مجبور اولدقيرينه نظرأ خرابيت حاللري دركار ومقدم نقودك وجودي حالنده عسكرك علوفه سي يتشديرلمكده عسرت وصعوبت مشهود ايدوكنه نظرأ بوندىن بويله بروجهله تأديه سي ممكن اوله ميه جفني نموداردر .

عسكرك خزينه سي متصل واحد خالى طور وب مصارف معينه نك اداره سي بهرماه

طقوز یوز کیسه آچیه محتاج ایکن آتی الحلول آیلرده یوز اللیشر ویاخود ایکشر  
یوز کیسه آچهدن زیاده تحصیلی مأمول دکدر .

اهالی مصر بالذفات علیهمزه ظهور ایدن عصیانلرندن صرف انظار اولنسه ذاتنده  
حلم و ملایمت ایله مألوف بر قوم اولوب فی الحقیقه بو آنه قدر مغلوب حقنده مسبوق اولماش  
طور و معامله مرقومون حقلرینه طرفزدن اجرا اولمش ایسه دخی ریایه استعدادلری  
حسییه جانب قلوبلریله طرفرزه میل و رغبتلری بوندن صکره دخی قتی کلی همته  
محتاجدر زیرا اخلاق و آداب مبانیت و اقدم اسباب موانست اولان لسانه مغایرت  
و تخصیص آیین و مذهب عدم موافقتمز درکار اولغله خلوص اوزره ربط شیرازه  
محبته موانع مرقومه نك هر بری بر محذور قوی اولور .

اهالی مرقومون فی نفس الامر مملوک طائفه سندن متفر و روگردان و دولت  
علیه تبعیته خواهشکر اولوب اولبایده خوف و مجانبتلی بدیدار و عیان ایسه ده  
فرانسه لو طرفه دخی جهت میللری ملل سائره نصاریه نسبتله زیاده ایسه ده قبول ربقه  
اطاعته اصلا خواهشلری اولدیغندن بو طرفده صورت ظاهرده بر دوستمز  
وارایسه جوانب اربعه مز بیک قدر خفی دشمن ایله محاط ایدوکی ظاهر و بوندن  
اولجه شریف مکه ایله کسب الفت و طرفدن کرک پوناپارته یه و کرک بو محاصره  
توارد ایدن مکتوبلری اهالی مصرک فی الجملة تأمین باللرینه وسیله و علت اولمش  
ایکن صدر اعظم حضرت تلرینک شاهه و صولدنبرو شریف مشارالیه درون مصره  
جاسوسلر ارسال ایلدیکنه نظراً بو حالت تبدیل نیته دلیل و غالباً بحر سویش جانبده  
کسب قوت ایدن انکلاتره لو نك القاسنه مبنی اعدامزه تمایلی مستبیط و باهردر .

بو طرفه حین ورودمزده صاغ و سالم اوتوز بر بیک نفر عسکر مز اولوب اول  
اشاده مملوک و عربان طائفه سندن غیری معارضمز یوغیکن ماه کانون ثانی او اخرینه  
قدر عسکر مذکور کل یوم حرب و قتاله مشغول اولمق اقتضا ایلدی الحاله هذه  
مملوک طائفه سی اطراف و اکنافه متشتت و پریشان اولوب انجق همان جمله سی حالا  
موجود و تلف اولمش درت بشیوز مقداری رؤسالرندن ماعد اقلان سائر اصل  
سرکرده لرینک قوت و اعتبارلرینه خالل کلدیکی مشهود اولغله عسکر مز خدمت  
آخره مشغول اولدیغی حالده بر دقیقه ایچنده جمعیتلری تمکندر عربان طائفه سنه  
دخی نقصان کلدیکندن بشقه بدوی و چرکه نشین بر قوم اولغله حین ورودمزده  
ایتدکلری کبی حالا بر طرفدن بزى ترك ایتمه درلر .

بوندن اقدم مصره چیقدیغمزده رضای دولت علیه ایله کلدک دیو سکان و اهالی یه  
تفهیم و بیان ایلدی کمزه مبنی تبعیته رغبت ایتمش اولدقلری ظاهر اولوب لکن

بودفعه خلافی کوردکبری جهندن ظاهر حاله خدمتمزده اولانلر دخی کذب و دروغزده مقابله خیانته حاضر وهان فرصت ظهورنده اجرای مافی الضمیر ایده جکبری قراین احوال دن مستدل و باهر اولوب حتی حزیران ایچنده انجور جانبنده قرهیه عسکر چقیدینی حوادثی مسموع اولدقده غایت مرتبه محظوظیتلری مشهود اولمش ایدی بو حال اوزره دشمن ایچنده ایکن بالذات صدراعظم حضر تلری مأمور معیتی اولان وزیرای عظام و وکلای دولت علیه بی استصحاب ایله جمع و تدارک عسکره قیام و آن واحده برأ و بجرأ محال عیدیده دن اوزرمزه هجوم و اقتحام اوزره اولدیغندن بشقه انکلتره و روسیه دخی ایفای لوازم اعانت و بر طرفدن صدراعظم مشارالیه کبار مصری و عموم سکنه و اهالی بی اوزرمزه تسلیط ایتدیرمکه دعوت برله طرفدار من اولق اوزره قالان بقیه عربان دخی بزدن روگردان اولنجه احوال دیگر کونمز درجه مأیوسیتیه رسیده اوله جنی ادنی ملاحظه ایله معلوم اولور حال اتدندر دوشمنمز بر طاقم عسکرینی تلف ایده جک اولور ایسه عقینده یرینه بر طاقم تدارک مقتدر اولوب مقدما تیر طاغنده و ایکی آیدن صکره آنجور جانبنده ینه بو اراقده بالاتره نام محله منهزم اولمش ایسه دخی ذکر اولنان محاربات عیدیده رهین تلف اولمش سلطاط نفرا تکز کزیده و منتخبلری یرینه آخر لری تدارک اولنه مدینی ظاهر اولغله بر کره دوچار هزیمت اولسق هیئات مجموعه مزله محو و نابود اوله جغمز امر مقرر و عسکر من هر نقدر جری و جسور ایسه دخی قریباً حالت مرقومه یه گرفتار اولماق غیر متصو در .

اثنای جنکده بیوک اوچیالاردن قفالری و پورناترن و بون و یامبول و پوپو کبی منتخب و بنام اوچیالار من ایله زمرة مهندسانک هان مجموعی و سواری و پیاده عسکر منک قتی چوق ضابطان و سرکرده لری تلف اولدیغندن فضله معتبر جنرالاردن چند نفر جنرال مقدما بو طرفدن عزیمت و مؤخرأ دخی بش نفری پوناپارته یه رفاقت ایتلریله اسلحه و مهمات و البسه و لوازماتدن عاری اوله رق ثلثانی مقدار دن دون قالمش عسکر من دن ایوم اون اوچ و اون درت بیک مقداری اکر چه خدمتده مداوم کورینوب لکن خسته و مجروح لک اکثری خسته خانلرده اقامت ایتمکن ایسه اردو خدمتی ترجیح ایده کل دکبری نمودار و محل مأه و وریتلری فی الجمله مسافه بعیده ده اولسه ضعف مزاجلری حسبله حرکتیه عدم اقتدار لری بدیدار اولمقدن ناشی دشمن ایله مقابل اولق اوزره موجود اولان یالکز اون بیک نفر عسکر مقدما متحمل اولدق لری مشاق سفر یه دن فتور کتور مش و بر طرفدن طبیعت اقلیمدن و یا خود سابقده دوچار اولدق لری جرایح و امراض دن ضعف و وهن عارض



اولش نفراتدن عبارت اولوب ماعداسی بعضاً مجروحیتلری تقریبی و بعضاً بو طرفده  
مستولی اولان رمد و زخیر علتلرینه ابتلا لری جهتیه سفره بر درلو مدار لیاقتلری  
قالمدی بو صورتده بشیوز ساعت مسافه بی استیعاب ایدر مملکتک محافظه سی و هر بری  
بر دشمنمز اولان اوتوز کره یوز بیک نفوس اهالینک ضبط وربطی واسکندریه  
ورشید و رحمانیه و چرچه و مصر و سویش و عریش و دمیاط و سائر مواقع که یکر می  
اوج قلعه و پلنقه در بونلرک حفظ و حراستی خصوصلری بالاده مذکور جزوی  
عسکر ایله اداره اولنق اقتضا ایتمکن ناشی صدر اعظم حضرتلری یالکز بش الی  
بیک عسکر تدارکیله ایکی طرفدن هجوم ایده جک اولسه بلا ممانعه مصره داخل  
اوله جغه اشتباه اولیوب آنجور جانبنده اهل اسلام عسکری چیقدیغی وقتلرده  
برشام طرفدن دخی هجوم ایتش اولسه لر حالت مذکوره یوناپارته حقنه ظهور  
ایتش اولور ایدی بالاده مشروح حالاته و حشیه اوج آی ایچنده ایکی دفعه ظهور  
ایدن علت و بایله سی دخی علاوه اولغله هر نقدر غیرت و جسارت اولسه فتور  
کتور ملامک عدیم احتمال و باخصوص نهایت کدر اوله رق بوسنه مبارکه ده نهر نیلک  
سرعت جریانه تقریبیله غایه الغایه قحط سنه سی اولوب بناء علیه صودن محروم قالمش  
قرادن ویرکو تحصیل امر محال ایدیکی و بو طرفده اولان جنرال و اوچیال و ساتاط نفراتی  
و ظنلرینه قطعاً فائده سی اولیه رق بیسهوده یرده تلف وجود ایتدکرین جزم ایله  
هر بری فردا فردا فرانسه یه عودتی اقدم آمال اتخاذا ایتدکری و فرانسه نک حل  
و کیفیته نظراً و اون بش آیدنبرو طرفزه امداد ارسالی ممکن اوله میوب موسم دریا  
دخی کذراتی ملاحظه سنه بناء فیما بعد ظهور امداد امیددی بر طرف اولدیغی ظاهر در .  
بو طرفده اولان عسکرک جمله دن زیاده قله بر جنرال حقنده اعتماد و اعتباری درکار  
اولغله یوناپارته یرینه باش جنراللق مأمورتی جنرال مومی الیه احاله قلمسی بین العسکر  
اگر چه مورث محظوظیت اولوب آنجق جنرال مومی الیه ذاتنده فرط غرور و حمیتله  
مجبول اولغله عهده سنه ترك و تحمیل ایتدیریلوب لکه دن خالی اولیمان مصلحتک  
درجه صعوبتی مطالعه ایتدبجه نهایت الامر حقنده جبالق تهمتی عزو و اسناد  
ایتدیرلمکن احترازا حسب الوقت و الحال ظهوره کلان محاذیره و یا خود عسکرک  
سلامت حالته صرف ذهن ایتیه جکی درکار اولوب آنجق نم بو صورت اوزره  
مسئولیم اولدیغنه بودغه حقیقت حال بی پروا طرفکره بسط و انهایه مبادرت اولمش  
ایسه دخی تفصیل کیفیت لسان قلم ایله شرح و بیان اولنق ممکن اولسه اشبو کاغده  
درج و تسطیر اولنان احوال واقع حاله نسبتله اخف و اقل ایدو کتی بیله رک اکا  
کوره امرار عین دقت ایلمکر لازمدر فی نفس الامر اراضی مصرک عدیل و نظیری

اولدینی ظاهر ایکن بو حاله کرفتار اولمز آنجق وقوعات معلومه تصادفدن نشأت ایدوب ورودمزده اختیار تعجیل وبوطرفده توطن واقامتز وقتی تأجیل اولنلق اقتضا ایلدیکنی ایما ایدر اراضیء مرقومه نك امن وآسایش اوزره ضبط و تصرفه دسترس اولمش اولسق علت وبا وطائفهء عربانك دسترازلغی مثللو خرایت مملکتی ایجاب ایدر نیجه مصائی چند سنه ظرفنده محو واحما وامر زراعت وتجارتی مجدداً احیا ایه مملکت مزبورده نك شهرت قدیمه سنی ارجاع واول جانبده فرانسه لو اسکانیله عهد قریبده مقسم ارزاق عالم اوله جق مثلئ نایاب برملك بیعدیلک ایداعی میسر اوله جغنه اشتباه اولمیوب قالدیکه اراضیء مرقوم ایکی دریا ایه چولار بیننده واقع اولدینی جهتمدن تأمین تجارت و منافع مطلق جلبنه مدار سهولت وبتخصیص آمد وشدایدجه سفاینه وسیله صیانت اولوق اوزره قوی بردونمانك وجودی اهم ایدوکی اجلائی بدیهادن والحاله فرانسه جمهورینك دونمائی اولمیوب بوندن بویه اعداسنه موازن اوله جق مجدداً سفن انشاسی دخی طول وقته محتاج ایدوکی مسلمات قییلندن اولوب بوصورتده مادامکه لوازمات متنوعه نك یتشدیرلمسیله اقتضا ایدن امداد بعث وارسال وبرطرفدن دخی ارسال اولنه جق امدادك اسباب امنیتی استحصال ممکن اولیه اراضیء مصرک ضبطی مراد اولنسه روسیه لو ویاخود انکلتروه فرانسه لوی طرفد ایتمک بهانه سیله مصری ضبط ویزی الی الابد بومصاحتدن چیقارمق صورتیله اولطرفده اقامتلیینه نظام ویرمک مصاحتنی ترویجندن فرقی یوقدر .

فرانسه لونك بوندن بویه جانبصرده توققلری انضمام رأی ورضای دولت علیه به متوقف برحالت اولوب آنجق اولطرفی قبل الاستیلا رضای دولت علیه نك تحصیل مستبعد کورندیکنه نظراً بودفعه دولت علیه روسیه وانکلتروه لونك اله دوشمش ایکن بوبابده مساعدده سی برقاندخی ناقابل ایدوکی ظاهر وعلی طریق الفرض بعض ملاحظاته مبنی فیما بعد رد شرطیه شمذیلک مصرده اقامتمز طرف دولت علیه دن تجویز اولنسه بیله انکلتروه لوی راضی اولیه جقلاری نمودار وباهر در .

مقدمامصر ترتیبی اجرا ایتدی کمز وقتده قرده سفر مزقالمیوب ایچدکرده بقیهء دونمانز موجود وایتالیا ایالتی وقورقه ومالطه جزیره لری ید حکومتمزده اولدیغندن بشقه دولت علیه بی رخصت دکل ایسه اغماض صورتیه ارضامأمول اولوب اولئشاده مرام اصلی انکلتروه نك هند جانبنده متصرف اولدینی املاکنه ایقاع رعب ودهشت ونهایه الامر مصر تخلیه سنی فرانسه نك انکلتروه لودن استردادی ادعا سنده اولدینی هر نه ایسه اکا بدل اولوق اوزره تکلیف ایدرک بروفق مطلوب مصالحه تنظیمنه تحصیل سهولت امنیه سندن عبارت اولدینی مسلم اولغله بومرامك حصولی مأمول ایکن انجوریشکاهنده

واقع محاربه ده دونم امر تلف اولمغله كافة مصالح نارمار اولوب مصر ترتیبی بقیه سی اولان عسکر کله مدیکی ودولت علیه بی اعلان سفره ابرام ایچون ایادیء اعدایه بر سر رشته اولدیغی ونمچه ایمر اطوریه هنوز کرکی کبی منطفی اولماش آتش محاربه نك تکرار اشتعالنه سبب اولدیغندن بشقه روسیه کیملرینک ایچ دکردن حدود مزه ورودلرینه وسیلهء رخصت اولدیغی درحال وایتالیا الکاسیله وندیک کور فزنده پوناپارته نك ضبط و تسخیره موفق اولدیغی حسن واطافت ایله شهرت شعار ممالک و بلدان ایادیء اعدایه گرفتار اولدیغی والحاصل واقعهء مرقومه دن صکره انکلتزه لونك هند جانبنده متصرف اولدقلری املاکده ایراث دهشت خیالندن تخلیهء دماغ ایتک اقتضا ایتکله تصور ایتدیکمز جمیع تدابیر و ترتیبات رهین تعطیل و دوست متفق ظن ایتدیکمز مصر خالق ناکاه اهل اسلام طرفه میل ایله بالضروره مقام تحفظ و تدافعه قیامز اقتضا ایتمکن ناشی سعی و همتمز یی حاصل و طائل قالدیغی درکاردر الحاله هذ عسکر مزده ظهور ایدن حالت تنزل و نقصان وضعف حاله نظراً انکلتزه لو علیه نه ذره مقداری ایراث خسار داعیه سنده اوله میه جغمز و فیما بعد طرفزه امداد ورود ایتماک اوزره انکلتزه بذل ماحصل وسع و مکنت ایتمکنه ایکن جاب امداده موفق اولدیغمز حالده بیله مادامکه اهل اسلام ایله محاربه یه اشتغالز درکار اوله انکلتزه لو طرفه اضرار ممکن اوله میه جغی و انکلتزه لونك رأی و رضاسی منضم و یاخود تخلیهء مصر ماده سی مصلحت مصالحه ده اساس نظام اولدقجه دولت علیه صلحه رغبت ایتیه جکی انکلتزه لونك رعنا معلومی اولمغله بوندن صکره انکلتزه مصالحه سی عهدنامه سنده تخلیهء مصر خصوصی حصولی ماترم مواد معتقدان عد ایتدیرمک مأمولی عبشر بوصولتده مصر ماده سی کرک فیما بعد انکلتزه یه طوقفور مقوله دن اولدیغنه نظراً و کرک تملیک و یاخود اسکان صورتیه اولطرفده قرار و ثباتمز ممکن اوله میه جغنه بناءً اولباده واقع تدبیرمز بوجهله منتج مرام اولماش اولدی قالدیکه دولت علیه ایله اصلاح ذات البین صورتنه بوندن بویله تجویز بطائت و تأخیر اولتمق لازم کلسه درجهء ضعف حاملزه نظراً نتیجه سنده بقیه عسکرمز بالکلیه تلف اولمق و یاخود بلا معاهده همان تخلیه یه قرار و یرمک شقلرندن برینی اختیار ایتک اقتضا ایده جکی مقرردر حالبوکه تخلیهء مصره بدل اوله رق دولت علیه و مرابط او جاقدر ایله تجدید صلح و مصافاة و تأیید روابط قدیمه حب موالاته ایدرک مقدما ممالک عثمانیه ده متمتع اوله کلدیکمز امتیازات تجارتک کما فی السابق ابقاسی ممکن اوله جغندن بشقه دولت علیه ایله عقد اولنه جق مصالحه عهدنامه سنده انکلتزه لو بیکانه صورتنده اولیوب مداخله سی لازم کله جکی

وانکلتزه دولتیه عقد مصالحه وقتى حلول ایتىش اولدینى ظاهر اولغله مار الذکر دولت علیه عهد نامه سی انکلتزه مصالحه سنه مقدمه مثابه سنده اوله جغندن فضله علی ایّ وجه کان روسیه دولتی طرفندن دولت علیه اعلان حربی مستلزم اوله رق اولخالده ایچ دکزده یادیء حکومتز دن نزع اولغش اولان ممالکک تکرار استردادى ممکن اوله بیلور ملاحظهء مرقومه نك صواب وصحتی بالوجوه عندمده مقرر اولوب از جمله بو ائنده کرک دوننامز و کرک بجرأ آورده قبضهء فتح و تسخیر قلنان کافهء ممالک هبا اولق ملاحظه سیله قره ده قلان قوتمز انکلتزه دولتنه موجب و اهمهء خوف و خشیت اولدیغندن روسیه لونک صورت تغایب دولت مرقومه یه بادیء خاطر اولق اوزره بهر حال خفاده خدشهء درونی مورث و غبطه و حسدی باعث برحالت اولق کر کدر .

تیز الدن روسیه لو دولت علیه یه اعلان حرب ایتک لازم کسه بو طرفده تجمع ایدن عساکر اسلام قلبگاه ممالک عثمانیه نك محافظه سنه سرعت شتاب برله دولت علیه دخلوا همزه موافق شروط اوزره عقد صلحه راضی اوله جغتنه نظراً بوندن بویله واقعهء مذکورده دن غیرى جانب مصرده توقف و قرار مزه مدار اوله جق بر وسیله اوله مز لکن فرانسه نك مصالحه ملکیه سنه ناموافق اوله رق یالکمز بر دقیقه لى فائده سی اولور ملاحظه سنه مبنی فرانسه جمهوریه روسیه دولتی بیننده عقد اتفاق اولدیغی حالده دولت علیه ایله فرانسه لونک مصالحه سی ختامندن مقدم دولت علیه اوزرینه روسیه لو سفر ایتماک کر کدر زیرا روسیه لونک اقصای مرامی دولت علیه نك خرابیتی مصالحتی اولوب بزم سفر مز باقی ایکن طرف دولت علیه دن اتلاف قوت درکار و بالعکس بو ائنده روسیه لو اعلان سفر ایتسه تیز الدن دولت علیه فرانسه جمهوریه عقد مصالحه یه مبادرت ایده جکی آشکار اولغله بزم سفره دوامز بیاغی روسیه لویه خدمت ایتمکدن لافرق اولمش اولور .

دول نصارا دولت عثمانیه یی مشرف خراب اولمش بر بنا نظریه مشاهده برله مدت و افره دنبرو مقاسمه سنی ترتیب و آشنایان امور دول اولاندر حالت مرقومه نك وقتى بغایت تقرب ایدوب ملاحظه لرینه کوره فرانسه یه حصه افرازی لازمه دن اولغله مصری تخصیص ایدر لر .

قالدیکه خصوص مرقوم اوروپانک اولو دولتلری و بلکه بوباده همدم وفاق اوله جق دول میاننده مناقشات عظیمه تکونتی مستلزم اوله جغندن بشقه فرانسه وانکلتزه و پروسیا قراللری و بلکه نمچه ایمراطوری حالت مرقومه نك علی الدوام منع و دفعنه سعی ایتک مقتضای مصالحت ملکیه لری ایدیکنه نظراً وقوعی مستبعد ایسه دخی

محققی فرض اولندیغی حالده اول وقتده فرانسه یه کوره مصرک ضطعی ممکن اولوب بوندن بشقه دولت علیه خصم جان عدایده کلدیکی روسیه لونک هجومی مشاهده ایدیجک بهر حال فرانسه لوی دعوت ایده جکنه اشتباه یوقدر فرانسه نک حسن ولطافتی درکار و سکان و اهالیسی کرک عدد و مقدار و کرک ثروت و یسار جهتی و دول سائره ممالکنه نسبت ایله موقی حسیه قوت و اقتداری آشکار اولمقدن ناشی اوروپاده بومثلو برکشته لاک وقوعه مبنی بر درلو فائده سی مشهود اولمدیغدن بشقه نتیجه سنده قوت و تغلب صورتنده بر دولت جدیده ظهوریله ایچ دکزده متمتع اوله کلدیکی فوآندن محرومیتی ملحوظدر .

خلاصه کلام بری بر رمز ایله غایت مرتبه بعید دوشوب بر طرفدن دخی و قوعات مشروحه یه نظراً و قتلر تنک اولغله طرفکنزدن مجدداً تنیهات ظهورینه انتظار من لازم کلسه جمهورک نقیصه شانی موجب و بو طرفده موجود عسکرک ورطه خجالت و تهلیکیه القاسنی مستوجب حالات ظهوری محقق اولغله بهمه حال مصرک تخلیه سیله بوکا بدل اوله رق دولت علیه و مرابط او جاقدر ایله مصالحه یی تجدید و حقوق قدیمه نک تحکیم و تأییدی اسبابنه تشبث واجب ایدیکی و مصر حقنه ملاحظه کن هر نه ایسه اجرایی انجق قلبه بر جنرالک ترتیب مکلمه یه موفق اولور ایسه برر بهانه ایجاد ایله امرار وقت ایستدیر مسنه منحصر قالدیغی و نهایت الامر طرفکنزدن ظهور تنیهاتدن مقدم تخلیه مصره قرار و یریه جک اولور ایسه ایجاب وقت و حالدن و بو طرفده وقایع روزکاره قطعاً و قوفز اولماق حسیه امر تخلیه فرانسه ایله دول سائره نک حالنه نظراً مصالح جمهورمزه موافق و اصول دور اندیشی و رویتسه مطابق عد اولندیغدن نشأت ایتمش اولدیغی عندکزده محقق بیلنه دیو مسطوردر .

( ۱۱ )

\* تخلیه مصر ایچون تنظیم اولنان عهد نامه نک صورتیدر \*

ممالک مصریه تخلیه اولمق اساسنه مبنی بین الانام مشتمل اولان نأره خصامک انطفاسی ضمنتده صالح و صلاحه طرفیندن خواهش و شوق تام کوسترلمکین سرعسکر قله بر جنرال طرفیندن مرخص ذره جنرال و پوسایج جنرال کذلک وزیر اعظم سامی مقام جانبندن مرخصاً مرسل دفتر دار شق اول مصطفی رشید افندی و رئیس الکتاب مصطفی راسخ افندی ینلرنده بروجه آتی یکریمی ایکی شروط اوزره عقد و تنظیم اولنان مواد مصالحه صورتیدر .

اولکی شرط درون مصرده موجود بالجمله فرانجه لواسلحه و آلات و امتعه لر یله اسکندریه و رشید و ابوقیر جانبلیینه نازل اولوب اوراده کندو سفینه لرینه رکوب

جائز اوله سفاین مز بوره بی تهیه و تجهیز ضمنده عقد صلحدن بر ماه مرورنده دولت علیه طرفدن الی نفر عسکر ایله بر کیمسه اسکندریه به توجه و ورود ایلیه .

ایکنجی شرط اشبو معاهده نك يوم تصدیق تاریخندن اعتباراً مصرده اوچ آی مدت ایله متارکه عقد اولوب بومدت طرفنده دولت علیه سفاینی دخی کرکی کی تجهیز اولنه مدت مذ کوره ده فرانجه لو مصلحتلرینی اتمام و اکیال ایده مدکاری تقدیرده اقتضاسنه کوره مدت مهل مد اولنه بو متارکه عساکر و اهالی طرفین ینلرنده اطمینان و راحت حصولی ایچون اولدیغندن استراحت مطلوبه نك حصوله طرفیندن اهتمام اولنه .

اوچنچی شرط فرانجه لو مصلحتلرینی تکمیل ایدنجیه دک دولت علیه و قله بر طرفلرندن مأمورین ماینلرنده خصومت و جدال اولماق ضمنده انکلتره قاعده سی اوزره امر ونهی صاحبی بر کیمسه بونلره رئیس نصب اولنه .

دردنچی شرط امضاء شروط مصلحدن اعتباراً سکر نهایت اون کونه دک فرانسه عساکری قطعیا صالحیه بی تخلیه ایله وینه تصدیق تاریخندن اون بش کونه دک منصوره و یکر می کونه دک دمیاط و بلیس تخلیه اولنه و تخلیه مصردن التی کون مقدم سویس تخلیه اولنه و ساحل بحر ده کائن اولوب نیلک جهت شرقیه سنده واقع محللر اشبو اون کون طرفنده بلا توقف بر بری آردنجه تخلیه اولنه دلطه تعیر اولنور جوانب ثلثه سنی نیل مبارک احاطه ایتمش اولان محلك دخی تخلیه سی مصرک تخلیه سی کونندن اون بش کون صکره اوله و جهات غربیه ایله ملحقاتی مدینه مصر تخلیه اولننجیه دک فرانجه لو یدلرنده مستمر اوله فقط بورالری فرانسه عساکری جهات سعید دن منحدر اولننجیه دک فرانجه لو یدلرنده مستمر اولمق لابد اولدیغندن اشبو جهات غربیه و متعلقاتی میعاد مذ کور طرفنده تخلیه اولنه مدیننی تقدیرده انقضاء مدته دک فرانسه لو یدنده قالمق جائز اوله و اشبو تخلیه اولنه جق محللرک کافه سی بولندقلری حال اوزره ترک اولنه .

بشنجی شرط مصلحه امضاسی ابتداسندن قرق کونه دکن مصر تخلیه اولنه ممکن اولمدیننی تقدیرده بش کون دخی مد اولنه .

السنجی شرط نیلک جهت غربیه سنده کائن فرانجه عساکری اموال و اشیا و حموله لری ایله بیسوک اردولرینه ملحق اولمق ایچون راهی اولدقلرنده کرک عثمانلو و کرک اهالی طرفلرندن اموال و امتعه لرینه مداخله و تعرض اولنیوب کندولرینه اصلا مشقت و تشوشه دائر معامله اولنیه .

یدنجی شرط خصام و معادات وقوعندن احترازاً عساکر اسلامه ایله فرانجه عساکری بر برلرندن متباعد اوله .

سکزنجی شرط شروط مذکورہ امضا و تقریر اولندقدنصرکہ فرانجہ ممالکنده یاخود مصرده کرک اسلامدن و کرک دولت علیه تبعه و رعایاسندن اسیر و ضبط اولنان اشخاص کیم اولور ایسه اولسون سیلاری تخلیه اولنوب دولت علیه ممالکنده محبوس فرانجہ قونسولوسلاری و تبعه لری دخی قاطبۀ اطلاق اولنله لر .

طقوزنجی شرط طرفیندن ضبط اولنان اموال تجارک یا عینی و یاخود ثمنی احبابنه رد اولنه تخلیه مصردنصرکہ بو خصوص ایچون ایکی طرفدن وکیلار نصب اولنوب استانبولده کرکی کبی مکالمه و تنظیم اولنه .

اونجی شرط فرانجه لونک مدت اقامتارنده اراضی مصریه ده موجود بالجه اشخاص و افراد قننی ملتدن اولور ایسه اولسون فرانجه لوی ایله اتفاق و اتحاد لری تهمت عد اولنیوب رنجیده اولنیه .

اون برنجی شرط فرانجه عساکری سفینه لره رکوب و بلده لری نه رجوع مراد ایتدکلرنده کرک دولت علیه و کرک انکلتره و مسقولو طرفلریندن اذن کاغدلری اعطا اولنه که سفینه لر امن و امان اوزره سواحل فرانسه یه رسیده اوله .

اون ایکنجی شرط الان مصرده کائن عساکر فرانسه یه سفینه لره راکب و بلده لری نه واصل اولنجه ده دکین دولت علیه و سائر ممالک متحده رجالی عساکر مزبور نه ک بر طریقله آزرده و رنجیده اولماملری نه تعهد ایله کدک فرانجه عساکری دخی دولت علیه نک رعایاسی و کرک بلدانندن بر بلده سی ضد و علیه نه بولنیه جقلری نه و معاداتی موجب اطوار و افعال صادر اولیه جفته و امر ضروری موجب اولمقسزین فرانجه سواحلندن ماعدا حدوده وارد و نازل اولیه جقلری نه سرعسکر عام قله بر جنرال دخی بالنفس تعهد ایلمشدر .

اون اوچنجی شرط مصرک تخلیه سی ایچون مصرده اولان فرانسه عسکر یله اوچ ماه مدت متارکه عقد اولمغله بوائناده مصرده اولان فرانسه عسکرینک معلومی اولمقسزین فرانسه ممالکی طرفندن برقاچ سفینه کلوب دولت علیه و متفق اولان دولتلرک سفائی ضابطانی خبردار اولمقسزین اسکندریه لیمانه دخول ایتدیکی تقدیرده در عقب صوینی آلوب لیمان مذکور دن خروج ایتک طرفیندن معاهده اولمغله بو مثللو سفینه لر خلقی حقتبه دخی شروط متارکه مرعی اوله .

اون دردنجی شرط سرعسکر قله بر طرفندن فرانسه یه مصرک تخلیه سی ایچون مکتوب کمیسی کوندر یله جک اولمغله بوکینک سالماً محلنه وارمی ضممنده امنیتی حاوی کاغذ ویریه .

اون بشنجی شرط فرانسه عسکرینک مصدرن خروج ایده چکی اوچ ماه مدته وسفینه لره رکوب ایله فرانسه یه وارملری ایچون تقدیر اولنان کذک اوچ ماه مدت ظرفنده عسا کر فرانسویه ایچون مرخصلر طرفندن تعیین اولدنی مقدار لحوم و بغدای و آریه و پرنج و صمان بالتام اعطا اولنه .

اون التنجی شرط فرانسه عسا کری یدلرنده موجود استر و مواشی و اشیای سائر سفینه لره نزول ایدنجیه دک ضبط و تصرفلرنده اولوب سفینه بعد ال رکوب نقلی عسیر اولان مواشی و طوپ و جبخانه امشالی اشیایه بها تقدیر اولنه کذک عسا کر مزبوره تحت تصرفلرنده موجود اشیایه دخی دولت علیه و انکلیز امرالی و قله بر طرفلرندن منصوب مرخصلر واسطه لریله اوچ بیگ کیسه آچه بها وضع اولتوب اشیای مزبوره هر تقدیر اشبو اوچ بیگ کیسه ایچدن دون و ناقص دوشمک احتمالی اولور ایسه دخی مبالغ مزبوره سلف طریق اوزره دولت علیه جانندن بالتام اعطا و تسلیم اولدنی مشعر قله بر طرفندن منصوب مأمورلر مهور تمسک اعطا ایله .

اون یدنجی شرط تخلیه مصارفه مدار اولق اوزره اداسی لازم کلان اوچ بیگ کیسه ایچده ذکری آتی تقسیطر ایله تسلیم اولنه یعنی امضاء شروط مصالحه دن اون بش کون صکره بشیوز کیسه ایچده او توز کون صکره بشیوز کیسه ایچده قرق کون صکره اوچ یوز کیسه ایچده الی کون صکره اوچ یوز کیسه ایچده التمش کون یمش کون سکسان کون صکره ینه اوچر یوز کیسه ایچده طقسانجی کون بشیوز کیسه ایچده ادا اولنه و اشبو مبالغ هر بر کیسه سی عثمانلی ایچده سیله بشیوز غروشدن عبارت اولوب دولت علیه طرفندن بومصلحته مأمور و کلایدلرندن سلف طریقله تسلیم اولنه و طرفیندن محرر شروط نامه لر امضا اولدقدن صکره مصالحت مزبوره مأمورلری بلاد مصریه یه ارسال اولنه .

اون سکرنجی شرط شهر ثلثه معینه مدتنده عسا کر فرانسویه حمله لری رشید و دمیاط و اسکندریه یه و اسکندریه دن رشید و دمیاط آمد و شد ایتمکه رخصت و یریله .

اون طقوزنجی شرط بلاد غربیه جهاتنده طاعون و قوعی مثبت و معلوم اولقدن ناشی سرایتدن احتراز لازم اولمغین طاعوندن خسته اولنلر و یا خود عاتی مشکوک اولان خسته لره سفینه دخولی تجویز اولنیموب شهر ثلثه مدتنده علل مزبوره ینه وزیر اعظم حمایه و امانی تحتنده فرانجه اطباسی مداوات ایلدکن صکره اون برنجی و اون ایکنجی شروط موجبجه عاجلاً بلده لرینه ارجاع اولنه و فرانسه



عسکرینک مدیری بونلری آخر برلیمانه چیقاره یوب طوغری لازارت ایچون تعیین اولنه جق محله نقل ایتملرینی اوچماللرینه مؤکداً تنبیه ایله .

یکرمنجی شرط کذلک بوخصوص ایچون کمی ضابطلرینه سرعسکر جانبندن اکید شدید اوامر اصدار اولنه که قرانته محلنده ایام معینه یی کچورمدکجه کیملرک بشقه محله یناشملرینه مساعده اولنیه .

یکرمی برنجی شرط خاطره کلان امور نافعہ یاخود لدی الاقتضا ظهور ایدن بعض حادثه ضمنده طرفین مرخصلرینک رأیله بعدالامضا شروط مزبورہ یه ذیل الحاقی ممکن اوله .

یکرمی ایکنجی شرط اشبو شروط انجق سکیز کون ظرفنده طرفین مرخصلری اقرار ومبادلہ ایلدکدن صکره نافذ اوله شویله که: فرانجه لسانیه محرر پوسایج ودزه جنراللرک سرعسکر قله بر جنرال تصدیقی حاوی مهر وامضالریله معنون نسخہ یی دولت علیه مرخصلری دفتردار شق اول مصطفی رشید افندی ورئیس الکتاب مصطفی راسخ افندی امضا وتصدیق ایلدکندن صکره وزیر اعظم سامی مقام طرفنده محفوظ قاله ودولت علیه مرخصلرینک دخی ختم وامضالریله معنون لغت ترکیه اوزره محرر نسخہ یی پوسلیک ودزه جنرالر بعدالامضا اشبو ایکی نسخہ طرفیندن مبادلہ وتصدیق اولندقدن صکره قله بر طرفنده محفوظ قاله والسلام .

جمهور فرانسه ویه نیک سکیزنجی سنه سی وتاریخ میلادک بیک سکیز یوز سنه سی کانون نائینسک یکرمی دردنجی کونی ومجرتک بیک ایکوز اون دردنجی سنه سی شهر شعبانک یکرمی سکیزنجی کونی صالحیه اردوسنده ختم وامضا اولنمشدر .

(۱۲)

\* بحرسویشدن انکلیز ایلچیسنه کلش اولان تحریرات \*

مکه مکرمه ده اولان شریف حضر تلرینک فیما بعد دوستلر مز زمهره سندن معدود اولماق درجه لرده حقمزده عدم توجهی مظنه سی مؤخرأ طرفکزه تحریرات مز ارسالدنبرو تحقق ایدر کبی اولوب بوندن بویله دخی بوحوالیده سفرك امتدادی اقتضا ایتسه مشارالیهک دوستلنی اهم مهمندن و بیطر فاقده طور مسی مخاطرات قیلندن عد اولمغله اخباره ابتدار اولتور .

شریف مشارالیه جده والیسی یوسف پاشانک ارتحالی فرصت عد ایله جده ده بولنان عثمانلوی قوزیر نام محله نقل ایتدردیکی باب عالیدن طرفکزه اخبار اولنه جفی

درکار اولغله بومخلده تفصیلی تجویز اولنمیوب انجق غرض اصلی مدت میددندبرو  
 مشارالیهک مطمح نظری اولان سربستیک تحصیلنه مقدمه مباحهسندله اولدیغی  
 ملحوظم اولمقدن ناشی معلومکنز اولمق ایچون افادهیه مبادرت اولندی امرای  
 مصردن مراد بک سعید ایالتک مستقلاً حکمداری اولمق اوزره فرانسهلو ایله  
 میرمومی ایله بیننده بالمقاوله نظام ویرلدیکنی شریف مشارالیه طرفره اخبار ایتمش  
 ایسهده الحاله هده مشارالیه دخی قوزیر نام محلك استحکام وبرطرفدن میرمومی ایله  
 ایالت مرقومهده حکمدار مستقل اولمق اوزره قبول ایتملی ایچون عربان طائفه سنی  
 ارضاً والزام قیدنده در مقدما عریش جانبنده انعقاد پذیر اولان شروط معاهدهیه  
 نظراً بندر سوشه واران ایکی قطعه یابنو سفینه سنک حوله لری فرانسهلو طرفدن  
 بعدالاشترا بودفعه فرانسهلو اذنیله عودت ایدوب بوندن بویله دخی سوش تجارتنه  
 معتاد اوزره مداومت اولنمسی خصوصی فرانسهلو طرفدن شریف مشارالیه  
 تحریر اولندیغی و مکّه مکر مهن کیدن قافله بودفعه مصر جانبنه واصل اولدیغی  
 مشارالیه جانبندن طرفره انها اولندی تجارت مرقومه فرانسهلونک کافه مالزمه  
 ضروری لری تدارکنه مدار کلی اوله جغندن قطع نظر عسکر وظائفی تدارکنه  
 عجز لری درکار ایکن درون مصرده آلس ویریشک عدم انقطاعی تقریبیه نفس  
 مملکتده حاصل اوله جق اچهدن مصارف سفریه سهولتی مستلزم اوله جغه نظراً  
 وجوهله مضر ایدوکنی ظاهر در برمدتدنبرو سفر تقریبیه حجاجک آمدوشدینه خلل  
 کلی عارض اولوب تخصیص بوسنه حجاجه قلت و نقصان عظیم ظهور و شریف  
 مشارالیه ایراد معینی حجاج عدادینه موقوف قالسه باعث محذور ایدوکنی ملاحظه  
 ایتمکدن ناشی تکالیف مقننه حجتی تکثیر ایلدی شریف مشارالیه کمال مرتبه صاحب  
 ثروت و یسار اولوب الحاله هده سعی واقدامی رؤسای عربانک افسادینه  
 مصروف اولمغله جلب قلوبلریله ترویج مصاحتی خصوصنده مال دریغ ایتمدیکی  
 تحقیق اولندی بوحوالیده مشارالیه دک و خدیعت و کذب و دروغ و خست طبع ایله  
 مشهور اولوب بو طرفه ورودنده احوال مرقومه مسموعم اولدجه ناسک اکثریا  
 مشرب حکمداری عدم تمیزیه غفلت لری معلوم اولمقدن ناشی اقوال ناسی اعتقاد  
 فاسده حمل ایله چندان شایان اعتماد عد ایتوب انجق اردوی هایونک پیشگاه  
 مصردن چکلمسی مغالطه و مبالغیه محتمل بر ماده اولمغله مشارالیهک مسموعی  
 اوله لیدنبرو اولکی طور و مسالکنه تغیر کلی رونما اولدیغنه نظراً فیابعد امنیت  
 منسلب اولمق اقتضا ایتدی مشارالیهک ترتیبی فرانسهلوی حدود معینه لری تجاوز  
 ایتدرمامک ممکن اولدیغی حالده مصرده ایبقا ایتمک و سعید حوالیلریله برشام ایالاتنه

سربسیت صورتی و یروب کندوسی رئیس عربان اولمق اوزره نفوذ و حکومتی تأیید ایتمک و دولت علیه تبعتدن بالکلیه اخراج اولنق صورتلرندن عبارت اولدینی امارات عدیده دن مستدلر و حالات مرقومه بووجهله رابطه ویرلدیکی تقدیرده قاهره مصر ایله بندر جده مجمع تجار اوله رق فرنگستان طرفیه تجارت مأمولنده اولوب حتی آتش ویرشده شمیدیکی کبی اوله رق ایوم جده ده ساکن ابراهیم جلاس نام کسنه تجارت مرقومه منافعی مبالغه اوزره کوستره رک مشارالیهی بوبابده تشویق و اغرادن خالی اولدینی و الحال هذمه مراد ایتسم بر دقیقه ایچننده جده نی و مشارالیهک سفینه لرینی تارمار ایلمکده اقتدارم درکار ایدوکی معلوم اولغله طرفره اعلان خصومت ایده میوب انجق مدت و افره دنبرو فرانسه لو ایله محرمانه مخبره دن خالی اولدینی و بالاده بسط و اشعار اولنان حدود و قیود ایله مصرده قالمیری املی جایگیر ضمیمی ایدوکی شک و شبهه قالمیه جق مرتبه لده موثوق الکام کسنه لر اخبارندن تحقیق کرم ایسه دخی بو مقوله دسائس و تدابیری الغا و تعطیل ممکن و قابل اولدینن ظن ایدرم شریف مشارالیه جده ده مقیم عثمانونک کافه اشیا لری فر وختی امر ایدوب آت و تفنک و باروت و سائر جده قریبنده واقع عثمانلوقاعه سی تعبیر اولنور عتیق قلعه ده موجود بو مقوله مالزومه نک اکثریستی مبیاعه ایتدکدن صکره بر مقدارینی قوزیر طرفه و ماعداسنی ینبعه ارساله مبادرت و کندوسی مکیه عزیمت ایلدی ذکر اولنان عثمانلوردن قوزیر طرفه وارمق اوزره برقطعه سفینه ره رکوب ایدنلرک لازم کلان ذخیره لری ویرلیوب تدارک اقوات یومیه ده اضطرابلری مسموعم اولدینی عقبنده صوب مقصود لرینه واصل اولنجیه قدر اثنای راهده تعیش لرینه مدار اولمق اوزره بر مقدار ارز ایله برقاچ رأس اغنام طرف لرینه ارسال ایلدم قوزیرده محافظ اولان حالا اولطرفه اقامت اوزره اولوب غالباً طرف دولت علیه دن مستحفظلرک مصارفی یتشدر ملک مأمولنده در .

( ۳۱ )

- \* هندستانی انکیزلرک اللرندن استخلاص ایچون برا عسکر ارسالی \*
  - \* ضمننده بیک سکزیوز تاریخنده روسیه امپراطوری برنجی پاولو \*
  - \* ایله باش قونسوس پوناپارته بیننده ویرلدیکی روایت اولنان قرار نامه در \*
- براً هندستانی استیلا ایلمک نیتی او ایله واسع وزنکین بلادی صورت دائمیه ده اوله رق انکله ره بیوندیر یغنده بولنمقدن تحلیص ایدرک اندن انکیزلری دفع و طرد . و اوربانک صنایع و تجارتته و دول متمدنه سنه وعلی الخصوص فرانسه ایچون یکیدن طرق کشاد

ایلمک خصوصه مبنی اولوب بوصولته کرک بوبله شان ومنفعتلو شیئه تشبث ایلمش اولان دولتسر وکرک اون طقوزنجی عصرک برنجی سی الی الابد نام وشهرت آلمش اولورلر .

فرانسه جمهوری ایله روسیه ایمپراطوری نهر هنده یتمش بیک عسکرسوق ایلمکی تصور ایدرلر و المانیا ایمپراطوری دخی طوبراغندن فرانسه عسکرینک مرورینی وطونه طریقیه قره دکر ساحلنه قدر سوقنی تسهیل ایلملیدر .

خصوص مذکوره قرار ویرلدیکی صورتده منتظم عساگردن یکر می بشیبیک وقزاقلردن دخی اون بیک آدمک همان اژدرهانده موجود اولسی خصوصه ایمپراطور پاولو امر وتنبیه ایتملی بعده عساگر مرقومه بحر خزر طریقیه استراباده نقل اولوب آنده فرانسه عسکرینک ورودینه انتظار اولتمق لازمدر . واشبو استراباد شهری دولتین عسکرینه مرکز عد اولته جغندن آنده مغازه لر بنا اولتهرق اسلحه ومهمات وارزاق وسائر ادخال قلملیدر ومحل مذکور هندستان ایله فرانسه وروسیه بیننده اولان مناسباته مرکز اعتبار اولتملیدر . فرانسه جمهورینک ارسال ایده جکی اتوز بشیبیک عسکری هر صنف عسکردن ترتیب قیلینوب قایقلره اراکبا طونه نک اغزلرینه تزییل وبجر سیاهه وصول بولدقلرنده روسیه نک تدارک وتهیه یتمش اوله جفی ترانسپورکیلر یله بحر سیاهدن و بعده آزاق دکرندن طیغانه ایصال اولوب اردوی مذکور تن نهرینک صاغ کناری بونجه (بیاقی ایزبیانقا) نام قزاق کوینه چیقوب نقطه مذکوره دن نهر مزبور ی عبور ایله ولغا نهری کنارنده واقع (چارچین) نام شهره قریب محله قدر نزول ایدر و آنده دخی تجار سفائنه راکبا بحر خزر طولنجه سیر وحرکت ایدوب ایرانده کائن مذکور استراباد لیماننه واصل اولور ولیمان مذکورده روسیه عسکر یله برلشهرک جمله سی حرکت ایدوب هرات وفراته وقدهار طریقیه نهر هند جانبنه عزیمت ایدرلر .

فرانسه عسکرینک محل مذکوره وصولنه قدر لازم اولان مدت بروجه آتی یوز یکر می کون یعنی اوچ ماهدر .

ایام

- ۲۰ طونه طریقیه بحر سیاهه قدر
- ۱۶ طونه اغزلدن طیغانه قدر
- ۲۰ طیغاندن بیاقی ایزبیانقاه قدر
- ۰۴ بیاقی ایزبیانقاندن چارچینه قدر
- ۰۵ چارچیندن اژدرهانه قدر

۱۰ اژدر خاندن استراباده قدر

۴۵ استراباددن نهر هنده قدر

۱۲۰

لکن احتیاطاً اوچ ماه یرینه بش ماه حساب اولتق لازمدر بصورتله اشبو بیک سکز یوز سنه سنک مایسی اوآلنده اردو سوق اولنه جق اولورسه ایلول اوآخرنده محل مقصودینه واصل اولسی مأمولدر واشبو مسافه نک نصفی قره ونصفی دخی صو طریقله قطع ایدلمش اولور .

\* صور اجرائیه \*

فرانسه عساکری طونه ایله کیدرکن خفیف طوپلری وصدقلری برابر کوتورماک لازم کلور ایسه ده چادر آلمق لازم کلز وسواری وطوپجیار دخی حیواناتی آلمیوب فقط حیوانات طاقی و بوکا مائل اشیا ایله اکتفا اولنه جقدر واشبو عساکرک اوکنده برقاچ قومیسر مسابقت و تقدم ایده جکدر .

طونه اغزینه وصولنده روسیه نک تهیه ایلیکی ترانسپورلره راکب اوله جغندن اشبو سفائنده اون بش یکریمی کونک ارزاق موجود اولمیدر . وعساکر کیلره بنر ایکن قره دن پوسته ایله متعدد قومیسرلر وارکان حربیه ضابطا نندن لازم کلنلر طیغان وچارپینه و اژدرهانه تعیین قلنه جقدر .

طیغانه مأمور قومیسرلر عساکرک برآ طیغانندن بیاقی ایزبیا نقایه قدر کچمسی ایچون لازم کلان تدابیری روسیه قومیسرلریله مذاکره و نزول یرلری تهیه و نقلیه ایچون لزومی اوله جق حیوانات و عربلر تدارک ایتدکن بشقه نهرتی مرور ایتمک ایچون نهر مذکور محل مزبورده پارسدن جریان ایدن سنا نهرندن براز دهها زیاده کنش اولغله اکاکوره لازم اوله جق قایق و سائر حاضر ایتمک اوزره اشبو قومیسرلر چاریچین ده مأمور قومیسرلر ایله مخبره ایده جکدر در لازم کلور بوملکتلر و چاریچین ده مأمور قومیسرلر تن ایله ولغانهرلری بیننده اوچ درت موقعده عساکره لازم اولان ارزاق و سائره ویرلشدیرلملری ایچون محللر تدارک وولغانهری اوزرنده مقدار کافی قایق و اژدر خاندن بولنان قومیسرلر دخی وافی مقدار سفینه واون بش کونک ارزاق جمع و تهیه ایلیه جکدر در .

فرانسه عساکری استراباده وصول بولدقده ایکی دولت قومیسرلری معرفتیه شهر مذکورده جمع اولنه رق حاضر اولسی لازم کلان شیر بروجه زیر بیان اولنور .

(۱) هر جنس مهمات حربیه ایله اغز طوپلر .

بومهمات اژدرخان وقران و ساراتوف مهماتخانه لردن جلب اولنه جقدر .

- (۲) ایکی اردونك مهمات و طوپلرینی نقل ایچون حیوانات .  
 (۳) کویری طاقی و نقل اشیا ایچون عربه و حیوانات .  
 (۴) فرانسه سواری عسکری ایچون حیوانات .  
 بو حیوانلر تن ایله و لغا نهرلری بینده بولسان قزاق و قالموقلردن اشترا اولنور  
 و کثرتی جهتهله اهنون آنور .  
 (۵) استر اباددن نهر هنده قدر فرانسه عسا کرینه لازم اوله جق چادر و سائره .  
 (۶) مقدار وافی چوقه ویز و انواب و ایاق قابلری و سائره .  
 بو اشیا روسیه ده کلیت اوزره بولنوب اوروپانك سائر محللرندن دها اهنون بها ایله  
 تدارك اولنه بیلور .  
 (۷) هر درلو ادویه نی حاوی براجزاخانه .  
 (۸) پرنچ ، فصولیه ، یاغ ، عرق ، و سائره .  
 (۹) صغر و قیون سوریلری .  
 (۱۰) اوت ، آرپه ، و سائره .  
 اژدرخان مملکتنده کلی ذخیره بولنور .

\* استر اباددن نهر هندکنارینه قدر ذکر اولنان ایکی اردونك \*

\* سوقی و تدابیر لازمه بیانی \*

روسیه عسا کرینك استر اباده تزیلندن اقدام فرانسه و روسیه اردولرینك مرور  
 ایده جککری مملکتلرک خانلرینه و ضابطلرینه کیفیتی اعلان ایچون دولتین قومیسرلری  
 ارسال اولنور .

و شو حالده اعلان اولنلی که دنیانك الك قوتلی دولتلرندن ایکی دولتك عسا کری  
 هندستانه کیتمك اوزره سزك مملکتکنزدن کچه جکدر و بوندن مقصدلری دخی انکلیزلری  
 اسارت تحتنه قویدقلری هندستاندن طرد ایلمکدر زیرامالك هند مقدمات قوت و ثروت  
 ایله مشهور اولدیغندن هر طرفك اهالیسی تجارته کلمکده ایکن انکلیزلر بویله ممالك  
 وسیعینی ضبط ایدرک اهالیسنی اسیر ایلمش اولغله روسیه و فرانسه بویله بچاره  
 ممالك و اهالی نی تخلیص ایلمک افکار خیره سنه مبنی قوتلرینی جمع ایستیلر اکا بناء  
 دولتین عسکرندن امین اولوب خوفه دوچار اولیه سکز بلکه بالعکس بو عسکرله  
 برلشمکزده و اتفاق ایلمکزده سزجه چوق شان و منفعت حصوله کله بیلور . مألنده  
 اعلاننامه لر ارسال قیلنمق لازم کلور . بو مملکتلر بربرندن متفرق و خانلری بینده  
 نزاع و میاینیت اولدیغندن دولتین اردولرینه مضر تلی اوله مز .

روسیه و فرانسه قومیسرلری ایله برابر مهارتلی مهندسار تعیین اولنوب اردولرک مرور ایده جکی موقاعک خریطه سی اخذا اولنوب خریطه اوزرنده عسکرک قنی محملرده قاله جنی و قنی صولردن و قنی شهرلردن عبور و مرور ایده جکی و مهمات و اشیانک و طوبلرک کیده جکی طریقری و تصادف اولنمی مأمول اولان مشکلاتک نه صورتاه بر طرف قلنه بیله جکی بیان و اراءه قلنمق لازم کله جکدر. و ذکر اولنان قومیسرلر ارزاق و عربیه و سائره تدارکی ایچون خانلر و والیلر ایله مقاوله ایدوب مقاوله لری امضا ایدرک انلردن دخی رهن اوله رق بر قاج کمنسه طلب ایده جکدر .

فرانسه عساکرندن برنجی فرقه نک استراباده وصولنده روسیه عساکرینک برنجی فرقه سنک اندن حرکت ایلمسی و دولتینک سائر فرقه لری بر برینی متعاقباً حرکت ایدوب شویله که: بر بردن بش اتی ساعت مسافه ده بولنلری و بولنرک بیننده مناسباتک دخی طوتلمسی ایچون قزاق عساکرندن مفرز بلوکارک استخدایم لازم کله جکدر .

آوانغاردی منتظم سواری عسکر یله درت بشیک قزاقدن ترتیب ایلمک بعده کوپر یلر کوندرلک لازم کلوب بو آوانغارد نهرلره اول کوپر یلری قوروب محافظه ایدرلر . فرانسه دولتی طرفندن اردو قوماندان آنشفنه مشهور و رسای فابریقه سنده معمول تفنک و قره بنا و پشتو و قلیچ کبی شیلر و مشهور شوره فابریقه سی معمولاتندن نفیس و ازولر و سائر پورسانا شیلر و پارس ایلی اوله رق تحف ساعتلر و کوزل آینه و آسیا اهلینک عندنده مقبول رنگلرده چوقه و قطیفه لر و سائره تسلیم اولنوب فرانسه نک درجه مدینت و قوتوتی اعلان ایچون اول مملکتلرک خانلرینه و سائرینه اعطا ایده جکدر .

اشبو استیلاده علوجه استحصال منافع ایچون بر طاقم عالم و مهارتلی کمنسلر مأمور قلنوب اول حوالینی استکشاف و مخصوص کتب تالیف ایده جکدر . و بر قاج بالونجی و صنایع ناریه یه واقف آدملر ترفیق اولنه جقدر .

فرانسه و روسیه نک شان و شوکتی بیلمک ایچون اردولرک استراباددن اخراجلرندن اول اشبو شهرده بر عظیم ضیافت ترتیب اولنمق و بعده بر بیوک تعلیم ایلمک لازم کلور .

اکر بالاده بیان اولنان طریق و اسلوب اوزره حرکت قلنور ایسه بوتشبتک حسن نتیجه یه وصولنده شبهه اولماز فقط ثمره سی دخی دولتینک تعیین ایده جکلری قوماندانلرک حسن اتفاق و جسارت و درایتلرینه توقف ایدر .

ایکی اردونک هندهری کنارینه وصوللرنده حرکات عسکر یه لری تعیین قلنور .

معلوم اوله که ایران وهنده اوروپا مسکوکاتندن تداول ایدن ونديک وفلمنک وروسیه مسکوکاتی اولديغندن سائر جنس سکه نقلی ایجاب ایتمز .

\* مطالعات مذکوره حفته پوناپارته نك سوألاری غالباً آتی الذکر \*

\* مواد اوزرینه وارد اولمشیدی \*

(اولاً) اوتوز بشبیک عسکری طونه اغز لرینه قدر نفاه کافی قایق بولنورمی .

(ثانیاً) دولت علیه فرانسه عسکرینک طونه دن نزولنه راضی اولماز وکندی

لیماندن کیلمره ارکاب اولملرینه ممانعت ایلمر .

(ثالثاً) بوقدر عسکری نقل ایتمک ایچون قره دکزده سفائن بولنه بیلورمی

وروسیه دولتی تدارک ایده بیلورمی .

(رابعاً) امیرال کیت انکلیز دونماسیله کلوب بحر سفید بوغازندن کهرک

قره دکزه فرانسه اردوسنک چیقمامسنه مانع اولمازی ویاخود اردویی پریشان

ایده مزمی .

(خامساً) استرآبادده اردولر براشوب هنده واصل اولنجیه قدر بریباندن

وچولاردن یعنی اوچیوز ساعت بویلو محللاردن نصل کچه جکدر .

\* روسیه ایمپراطوری پاولو طرفندن تحریر اولنان جوابلر زیرده \*

\* بیان اولنور \*

(اولاً) لزومی مقدار قایغک جمع وتدارکی آساندر ظن ایدرم لکن اوله مدینی

حاله عسکر قره دن ابراییله یاخود قلاصه قدر کلوب اندن روسیه طرفندن

کوندریله جک سفینه لر ایله ارسال قنور .

(ثانیاً) پاولو دولت علیه ایستدیکنی اجرا ایتدیرر .

زیرا قوت کثیره سی باب عالی پی اجبار ایدر .

(ثالثاً) روسیه دولتی قره دکز لیمانرینه بالسهوله هر بیوکلیکده اوچیوزدن

زیاده سفینه ارسال وجمع ایده بیلور .

زیرا روسیه نك سفائن تجاریه سی نه مرتبه تکثر ایلدیکی جمله نك معلومیدر .

(رابعاً) امیرال کیت بوغازدن کچمک مراد ایلدیکی تقدیرده عثمانولر مخالفت

ایلمز ایسه لر پاولوده مأمول اولماز مرتبه اسباب مؤثره موجود اولغله بو خصوصه

ممانعت ایلمکه مقتدردر .

(خامساً) ذکر اولسان مملکتلر چول وخالی اولیوب چوقدنبرو یوللر

آچیقدر . وهنددن استرآباده کروانلر اوتوز بش قرق کونده کلوب کیتمه کده در .



واراضی دخی عربستان کبی قوماق اولیوب هرآدیمده ماء جاری وچایلر بولنور .  
 اوت وپرنج کثرت اوزره موجود وانواع میوه و حیوانات بولمق آساندر . وانجق  
 قبول اولنه جق صعوبت یولک طولی اولوب بوایسه بوامره مانع اوله ماز . چونکه  
 فرانسه و روسیه عساکری محن و مشقته تحمل ایدر زیرا آنلر ایچون پک چوق  
 شان و افتخار واردر حتی بیک یدی یوز اوتوز طقوز و قرق تاریخلرنده نادر شاه  
 دهلی شهرندن کلیتلو عسکر ایله قندهار و فراه و هرات و مشهد شهرلرندن کچهرک  
 استرآباده کلشدر اکرچه اوزمان بوشهرلر عظیم و جسم ایدیلر لکن الحاله هده ینه  
 اولدجه بیوجک شهرلردر و اوزمان آسیا عسکرینک ایده بیلدکری شیئه شمده  
 فرانسه و روسیه عساکرینک موفق اوله جقلرنده شک و شبهه یوقدر .  
 آزمدت صکره روسیه ایمراطوری پاولو وفات ایلمکله مقصد مذکورہ تشبث  
 اولنه مامشدر .

حتی ( سنت الن ) جزیره سنده ایکن ناپایون چند دفعه بویله بر خصوصه قرار  
 ویرلدیکنی بیان ایلمشدر .

( ۱۴ )

\* بیک ایکیوز اوزن التی سنه سنده دولت علیه ترسانه سنده موجود \*

\* اولان صف حرب کیلرینک نوع و عدد و اسامیسی \*

نوعی	اسامی	قطعه	یکون
اوج انبارلی	سلیمیه	۱	۴
	منصوریه	۱	
	فتیحیه	۱	
	مسعودیه	۱	
قالیون	طاوس بحری	۱	۷
	سدالبحر	۱	
	ارسلان بحری	۱	
	هیبت انداز	۱	
	شهباز بحری	۱	
	صیاد بحری	۱	
	یشارت نما	۱	
		۷	۱۱
		فقل	

نوعی	اسامی	قطعه	یکون
نقلیکون .	.	.	۱۱
قالیون	بجر ظفر	۱	
	پرتو نصرت	۱	
	اژدر بحری	۱	
	آثار نصرت	۱	
	زیور بحری	۱	
	فیض خدا	۱	
	بدأ نصرت	۱	
	عنقای بحری	۱	
	منبع نصرت	۱	
	کلید البحر	۱	
	قپلان بحری	۱	
نعمت خدا	۱		
	بلا تسمیه ترسانه ده اعمال اولنیورمش	۱	
		۲۴	۲۴
فرقتین	مسکن غازی	۱	
	شهر ظفر	۱	
	شاهین دریا	۱	
	شوکت نما	۱	
	های ظفر	۱	
	بدأ ظفر	۱	
	شعار نصرت	۱	
	نسیم ظفر	۱	
	غزال بحری	۱	
	جیران بحری	۱	
	پولاد بحری	۱	
	بو الهوس	۱	
	تونس	۱	
بجر عمیق	۱		
	نقل	۱۴	۳۸

نوعی	اسامی	قطعه	یکون
نقلیکون	•	۱۴	۳۸
فرقتین	مرغ بحری	۱	
	حوریء بحری	۱	
	اسکندریه	۱	
	قورفهدن اقطارمه فرقتین	۱	
	صدر سابقه منسوب فرقتین	۱	
	ارکیده مجدداً انشا اولنان فرقتین	۱	
	ترسانه عامر ده مجدداً انشا اولنان فرقتین	۱	
	لیمیده انشا اولنان فرقتین	۱	
		۲۲	۴۶
قوروت	آتش فشان	۱	
	سائقه باد	۱	
	صلا بت نما	۱	
	ظفر کشا	۱	
	جنک آور	۱	
	رهرب نصرت	۱	
	سجاء بحری	۱	
	مدینه الملوك	۱	
	برج ظفر	۱	
	مشرب بحر	۱	
	عید نصرت	۱	
	ذوالعقاب	۱	
ثریا	۱		
ترسانه ده مجدداً انشا اولنان قوروت	۱		
خلیل بك قوروتی	۱		
		۱۵	۱۵
			۶۱



ووصایت و نسبت ماله متعلقه دعوا ده زید مسلم اوزرینه ذمیلر شهادت ایلسه لمقبوله اولور دیو فتوای شریفه ویرملکله بر موجب فتوای شریفه عمل و حرکت اولمق و طوائف عسکریه دن و سائر لردن افلاق درویننده تهمت ارتکاب ایدنلر جوار سرحدلره کوندر بلوب ضابطلری معرفتیه تأدیب و کوشمال اولمق و سرحدلردن و طونه قضالری اهاالیسندن بعضیلری مقدمات ویریلان نظامه مغایر بلاذن افلاق دروینه دخول وینلرنده غوغا احدائیه بر لرینی قتل وبعده دم و دیت طلبی و مزور دعوالره شروع ایله اشیا و نقود مطالبه و افلاق رعایاسنی تعجیز و اضرار ایلدنلری و بوندن اقدام ویریلان نظام موجبجه درون افلاقده احداث اولنان قشلاقلر و موشیله رهدم برله سرسری کشت و کنار ایدن اراذل اشخاصک طرد و تبعیدلری ایچون متعدد احکام مینفه ویرلمشیکن او باش و اراذل مقوله لرینک افلاقه دخول فکر نده اوله جقلری ملاحظه دن بعید اولماغین فیما بعد هر سرحددن معدود و معین تاجر لردن غیری افلاقه کمسنه کرمامک و آنلر دخی ضابطلرندن اذن تذکره لری اخذ و افلاق و یوه ده سنه ویاخود وکیلنه ابراز برله و یوه ده و وکیلندن ینسه اذن تذکره سی آلوب واردقلری قضالرده منزل تملک و زراعت و رعایایه تعدی ایلمامک و سلم آنچه سی ویرلمامک خصوصیلری نظامنی حاوی سابقلرده صادر اولان اوامر علیه ده محرر اولمغه بعینها مواد مذکوره ایفا و اجرا قلمق و بونلر امثالی مزور دعوالر ایچون وزرا و ضابطان و حکام افلاقه مباشر تعیینیه فقرای رعیتی اضرار ایلملرینه جواز و رخصت کوسترمامک و از قدیم مناسترلرینه و سائر شخصیته متعلق اولوب بغیر حق کندولرندن اخذ اولنان اراضی و املاک که رعایا اسمیله تسمیه اولنور حق و عدل اوزره دقت و تحری اولنهرق بغیر حق ضبط اولدنیغی تحقق ایتمکده اصحابنه استرداد قلمق و کندو امتعه لرینک کندو و لایتلرندن آخر محله و یاخود آخر محلدن کندو و لایتلرینه نقلی انفع و اهون اولمق ایچون کندولرک عتیق و مخصوص ایسکله لری اولان اوراش و فلوچ ایسکله سنی تکرار تجدید و ایفا اقتضایدرایسه و جوه سائر ایله دولت علیه مه مضرتی اولمیه جق صورتیه تجدیدینه افلاقلو مآذون اولمق و تجار طائفه سنک افلاق درویننده املاک و چمقلک طوملرینه و حیوانات رعی ایتملرینه جواز ویرلمامک و وزرای عظام و میرمیران کرامم منصبلرینه ایاب و ذهابلرنده طوغری یولدن عدول و افلاق مملکتته دخول و رعایادن مفت و مجاناً یم ویه جک و منزل بارگیری اخذی و مطالبات سائر ایله فقرای ازعاج ایلملری ممنوعانن اولمغه وزرا و میرمیران و اتباعی راه راستدن عدول و افلاقه دخول ایله رعایا بردرلو اضرار ایتملرلمامک و کذلک امور مهمه ایله بعض محللره آمدوشد ایدن اولاقلر طوغری یولدن صامیبوب و افلاقه اوغرامق ویدلرنده اولان

منزل احکامندن زیاده بار کیر طلب ایتمامک و مملکت مزبورده مأمور لر دخی منزل احکامنده مسطور اولاندن زیاده بار کیر طلبیه تکدیر ایتمامک تنیهاتی حاوی سابقدرده اوامر علیه ویرلمش اولمغله فیابعد موجبلری اجرا سنده و علی ای حال شروط مزبورده رعایتده دقیقه فوت اولنمیوب خلاف امر عالی حرکتده جسارت ایدر اولور ایسه بلا توقف تأدیبلری خصوصنه اهتمام اولتمق وطونه سواحلنده واقع قصبهت و قرا و بازار لره رؤیت امور و کار و کسب ایچون واران افلاق رعایا سنده محل مرقومه جزیه دارلری و سایر ضابطان طرفلرندن جزیه واسپتج تکلیفی و آخر بهانه ایله تعدی ایتدیرلیوب آدملری و قوچیلری یبأنجی رعایا ارارز بهانه سیله مملکت افلاقده کشت و کداردن منع اولتمق ایچون متعدد اوامر علیه صدور اتمش اولدیغنه بناءً اقتضا ایدنلره با احکام منیفه تنیه و او مقوله لره زجر و تهدید اولتمق و اهالی و رعایای مملکت زی و کسوه لری ماده سنده مقتضای معافیت سر بسیت مملکت اوزره کمسنه طرفندن رنجیده ورمیده اولتماق و افلاق رعایاسندن اسلامی قبول ایدنلر حصه ارثیه طلبنه قادر اوله میه جقلری ماده سی امور شرعیه به متعلق قضایادن اولدیغندن ماده مرقومه لدی الاستفتا (زید نصرانی شرف اسلام ایله مشرف اولدقندن صکره فوت اولسه زیدک باباسی عمرو نصرانی زیده وارث اولماز و هند نصرانیه نك زوجی زید نصرانی اسلامه کلد کد نصرکره هند کافرده ایکن فوت اولسه زید هنده وارث اولماز و زید نصرانینک اوغلی عمرو نصرانی شرف الاسلام ایله مشرف اولدقندن صکره زید نصرانی ایکن فوت اولسه عمرو زیده وارث اولماز و زید مسلم قولی عمرو نصرانی بی اعتناق ایلدکن صکره عمرو اسلامه کلدن فوت اولسه زید عمروه وارث اولماز) دیودرت قطعه فتوای شریفه ویرلمکله موجب و مقتضالری اجرا اولتمق و قصاب باشلر معر فتلریله بهر سنه افلاق مملکتندن مباحه سی فرمان اولنان معلوم المقدار اغنامک قصاب باشلرک سیاحیلری و آدملری یدلریله اشتراسی رعایایه خساری و ظلم و تعدی بی موجب اولدیغنی انها اولمغله رحما للفقرا اغنام مذکورده نك اولوجهله مباحه سی عفو اولنوب انجق تعینات میریه و دار السلطنة السنیهم سکاننک مدار معاشاری ایچون ممالک محروسه مدن قیون جلبی لازم و مهم اولمغین افلاق مملکتتک رعایاسی فروخت اولنه جق قیونلری کتم ایلمیوب سمر رایحیه تجاره و جلبارده فروخت ایدوب افلاق و یوه ده سی نظارتیه آستانه علیه مه بالغامبلغ قیون کوندرلمکده قصور اولتماق و اغناملرینی در علیه مه قیون کتوره جک تاجر لره و جلبارده و یروب محل آخره صاتمماق و مملکت افلاق آستانه سعادتک کیلاری مثابه سنده اولوب استانبوله اقتضا ایدن کیتلو ذخائر افلاق و بغداد مملکتلرندن

لکنکه محصور اولمق حسینیه رعایای افلاق بوندن اقدام مرجمه رفع اولنان  
 مقایسه مقابله سنده حراثت و زراعت لریله حصوله کتوردکلری محصولات لری  
 وحبوبات لرینی فوج فوج ایسکله لره نقل و سحر رایجیله قبان سفینی رؤسائنه فروخت  
 ایدوب محل آخره ویرمامک و مقایسه رفع اولمشدر دیو زراعت و حراثتی ترک  
 ویاخود احتکار داعیه سیله یدلرنده اولان ذخیره لرینی کتم و ادخار ایتمک و بوجمله  
 هم کندولری منتفع و همده آستانه سعادت سکنه سی امر تعیشده ضرورتدن وارسته  
 اولمق و افلاق و یوده سی و بویارلر بویابده علی الدوام اهتمام ایتمک و سفرلر اناسنده  
 افلاق و بغدادن بویارلرندن و رعایاسندن حسب الضروره هر نه کونه جرم و قباحت  
 صدور ایتمش ایسه جمله سی نسیانسیا عفو اولنوب حرکات سابقه لری ایچون مؤاخذه  
 و مجازات خصوصی خاطر کذار اولمامق و بوندن بویله مادام که مرکز اطاعت و انقیاد  
 و اجرای مراسم جزیه کداری و رعیتدن عدول ایلمدکجه لطف و عنایت و شفقت  
 و مرحمتدن غیری حالت مشاهده ایتمه چکلری امر محقق اولمق و انا طونه حدودینه  
 دائر سلسله ناظری ایله افلاق و یوده سی بیننده مقدما جریان ایدن نزاعک فصل  
 و حسمیچون یتیش یدی سنه سنده صدور ایدن او امر منیفه منظوقلری اوزره  
 مؤخرأ تکرار صادر اولان امر عالیشانک تنذینه اهتمام اولنمق و افلاق و بغدادن  
 مملکت لرنده اولان ولایتک منصب لری بویارلرک و روملرک بینلرنده منتخب  
 و اداره لرینه مقتدر و معتمد علیه اولان کمنه لره توجیه اولنمق خصوصی افلاق  
 و بغدادن و یوده لرینک اراده و اختیار لرینه موقوف و مربوط اولغله مملکتین  
 مزبور تینک بویارلرینه مخصوص اوله کلان مناسبلره ولایت بویارلرینک مستحق لری  
 ترجیح اولنه رق کرک روم و کرک یرلورلرک صادق و کار کذار لری مقتضای اوزره  
 استخدام اولنمق ماده سی و یوده لرینه احاله و تفویض قلمق و روم ایلی جانبنده واقع  
 قلاع ابنه سیچون اقتضا ایدن اجناس کراسته نک سابق اوزره افلاق و بغدادن جبالندن  
 قطع و نقل و بنا ایملرینک و یردکلری مهور تمسکات لری موجب لرنجه ایجاب ایدن  
 قطعیه و نقلیه اجرت لری و یوده لرینک عهده لرنده اولان افلاق و بغدادن جزیه لری  
 ماللرندن تماماً اعطا ایتمه یلوب بر اچله لری قطع و تنقیص ایتمه یرلمامک و منقلیه  
 اوسته لرینک ضبطنده اولان منقلیه ده واقع چقتلک حیواناتنک فیما بعد درون افلاقده  
 صیف و شتاده رعیلری منع و فقرای رعیت مضر تلرندن صیانت اولنمق باینده بیک یوز  
 سکسان سکر سنه سی اواسط شوالنده بالاسی خط هایون ایله موشحا ایکی مملکته  
 بشقه بشقه ایکی قطعه امر عالیشان اعطا اولندقدن صکره مملکتین مزبور تین رعایای  
 عهده لرینه لازم کلان شرائط عبودیتی ایفاده قصور ایتمدکلرندن فیما بعد دخی فریضه

ذمتلری اولان صداقت و عبودیتدن سر مو انحراف ایلمیوب و یوده لرینه کمال انقیاد و اطاعت ایدرک تسویه خدمات مهمه پادشاهانه مه دقت و اهتمام و مقدار ذره قصور دن اتقاء نام ایلملری شرطیه حقلرنده درکار اولان شفقت جلیله پادشاهانه مقتضاسنجه ذکر آتی شرائط دخی علاوه شروط حایتلری قلمغنه فیما بعد افلاقدن التی یوز اون طقوز کیسه اچقه و بغدادن یوز او توز بش کیسه و درتیوز قرق درت بحق غر وشدن زیاده مطالبه اولنمیوب ذکر اولنان ایکی مملکتک جزیه لری هر سنه نك ختامنده آستانه سعادتده و یریلوب حوالاته و یردیر لمامک و عیدیه ایچون افلاقدن نقد و اشیا طقسان بیک غروش و رکابیه ایچون فرق بیک غروش و بغدادن عیدیه ایچون نقد و اشیا طقسان بیک غروش و رکابیه ایچون یکر می بشیک غروش آلتوب زیاده بر شی مطالبه اولنماق و بکلر دن ابقایه آلمیوب و تحقیق اولنمش بر تهملری و قوعوبولدجه بکلر عزل اولنماق و مجدداً نصب اولنان بکلر دن قدیمدن بر پاره زیاده جوائز و عوائد مطالبه اولنمیوب اول دخی رعایادن آلتماق و انحق بکلره عائد اولان ملاحه و مقاطعات و کمرک رسمی و بونلر امثالی رسومات منافعدن بکلره راجع اموال دن و یرلمک و ذکر اولنان مملکتین حوالیلرینک پاشالری و قاضیلری و سایر ضابطانی طرفلرندن خاص ادعا اولنمی و ضرری رعایایه عائد اولور عوائد مطالبه اولنمی و مجرد آچقه و هدیه جایی ایچون طرفلر دن مباشر ارسال ایتملری طرف دولت علیه مدن تجویز اولنماق و دولت علیه مده مناصبه اولنلرک عزل و نصبی واقع اولدجه بکلر دن بر درلو جوائز و عوائد و یرلمسی لازم کلامک و مملکتین مر قومیندن حبوبات و سایر ذخائر دولت علیه مدن مملکتین مر قومینک اهلینسه مضایقه کتور میه جک در جهلرده آلتوب و طرف مریدن اشترا اولندقدنه عن نقد آچقه سی و یریلوب تقایه سی اهالی به تحمیل اولنماق و تجماردن مبیعه اولنور ایسه بهالری مملکتده رایج اولدینی اوزره نقد ادا اولنق و ذکر اولنان مملکتینه قیون مبیعه سی چون قصاب باشیلرک سایجیلری و آدهلری معرفتیه مملکتیندن اغنام مبیعه سی رعایایه ظلمی موجب اولدینی مقدملرده انها اولندیفندن اغنامک اولوجهله مبیعه سی عفو اولنوب لکن تعینات میریه و سکنه استانبول ایچون ممالک محروسه مده قیون جایی لازم اولدیفندن مملکتین رعایاسی فروخت اولنه جق قیونلرینی سعر رایجیه تجار و جلبلره فروخت و یوودلر نظار تلیریله آستانه سعادتده بالغاً ماباغ قیون کوندر لمکده قصور اولنماق خصوصی بالاده بیان اولنان ایکی قطعه او امر شریفه لرده مندرج اولغله فیما بعد دخی مقتضاسنک اجر اسنه کرکی کبی اقدام و ذکر اولنان ایکی مملکتدن کراسته و سایر بنا لوازمک آلتمی مراد اولندقدنه مقداری مقدم بکلره اخبار اولنوب اول وجهله حدود مملکته نقل ایتدیر یلوب قطعیه



و نقله لری رعایا فقر اسنه الویره جک و جهله عن نقد بو خصوصه مأمور مباشر طرفدن  
 ادا اولنلق و حدود لردن خارج محللره نقلی ایچون اهالیء مسفوره جور اولنماق  
 و مملکتین مزبور تین اهالیسندن عماله و عربیه مطالبه اولندقده اجرت عادیه لردن بر  
 آقچه لری تنقیص و تأخیر اولنماق و فرمانلو تجارتدن ماعدا اطراف سکنه سندن و بمقابلردن  
 هیچ برفردک اضرار رعایا داعیه سیله مملکتین مرقوم تینه دخول و کشت و کذار لری  
 و مملکتک اهالیسنه متعلق اولان اراضی نی زراعت و تصرف لری ورعی ایچون حیوانات  
 ادخال ایلماری تجویز اولنماق و اشبو نظامک خلاقی حرکته جسارت ایدنلر محکم  
 تأدیب اولنلق و مصالحه دن صکره ضبط اولنمش اراضیلری و ارایسه اسخانی اولان رعایایه  
 ردایتدیر مک و مملکتین مرقوم تینه اهم مهامدن بر حاجت مس ایلمدکجه طرف دولت  
 علیه مدن مباشر کوندر لمک و کوندر لدکده مباشر لر مباشر لری نی رعایادن ادعا ایتموب  
 علل و بهانه اختراع یله اقامت لری تطویل ایلمامک شر اطلک دخی شروط نظام سابقه یله  
 دستور العمل طو تلمق اوزره یدکده حفظ و حین اقتضاده قیدینه مراجعت و هر ماده نک  
 شرح و بیان اولندی فی اوزره مقتضای تنفیذ و اجرا و مخالفی حرکت ایدن لری ایان کان  
 حقلرندن کلنمک ایچون دربار عطف و تقرر مه تحریر و اعلامه مبادرت و دولت  
 علیه مه و و یوده لرینه انقیاد و اطاعت ایدن بویار لرك قبل السفر نائل اولدقلری  
 مراتب و مناصب اصلیه لری و موشیه تعبیر اولنور اراضیلری کندولره ابقا اولنسی  
 مقبدا فرمان اولنقله مواد مرقومه نک الی الابد مرغی طو تلمسنه و بویار لرك  
 کچم لری معمور یته منحصر اولان اراضینک اعمارینه و قاعده قدیمة مملکت اوزره  
 کندولره عائد فوآده و درجات اصلیه نیل ایله ذمتلرینه لازم کلان کمال اطاعت  
 و انقیاد واجبه یی و و یوده نک امر و رأینه مطابقت خصوصنی وجوده کتور مکده  
 مقدار ذره رخاوت ایتماری شرطیه حمایت و صیانتلرینه و استخدا ملرینه و امتیازات  
 ایله مترفه و آسوده حال اولملرینه اهتمام و دقت موجب عمار مملکت اولدینی جهندن  
 بر وقتدنبرو مغایر قاعده قدیمة مملکت بویاران مذکور نک مألوف اولدقلری  
 مطالبات ناسزا و علی الخصوص انشای سفرده مملکتک دوچار اولدینی خراجلق  
 سببیه رعایانک تحمل ایدمه جک لری تکلیفات و مطالبات نابر جادن کف ید و مجانبت  
 ایلملری تنبیه و متنبه اولیوب خلاف رضا رعایا فقر اسنی اضرار و تکدیر و کندولره  
 دوشیمان اموره مداخله و حدلرندن افزون ادعا و تکلیفات نابر جا ایله مطلوب  
 اولان نظام و انتظامه ایراث اختلالی موجب حالاته جسارت و تنظیم امور مملکت  
 و ترفیه قلوب رعیت ضمننده و یوده لرینک تشبث ایلدیکی تدابیر حسنه نک اجرا سنه  
 مخالفت و طرف دولت علیه مدن انتخاب و اوزرینه نصب و تعیین اولنان و یوده نک

رایندن طشره حرکته مجاسرت ایدری اولور ایسه اومثلولرک اقتضاسی اوزره تأدیبات لایقه لرینک اجراسنه علی وجه الاستقلال ویوده اولنر مآذون ومرخص اولملریله برسیاق محرر اومقوله لرک تأدیب وکوشماللرینه واستحصال آسایش فقرای رعیت ووقایه نظام مملکته نثار وسع ومکنت وبالجمله رعایانک حصه لرینه اصابت ایدن جزیه لری حق وعدل اوزره جمله سندن تحصیل اولنوب بعض وسائل بیهوده ایله برمقداری استننا اولنوب آنلرک حصه لری کندو جزیه سنی ویرن سائر رعایایه تحمیل اولنماق وبومثلو حمایتدن مجانبت اولنهرق اجرای حقانیت اولنمق خصوصه دائمآ دقت اولنمسی شامل بیک یوز طقسان سکر سنه سی اواخر ربیع الاولنده عم امجدم خداوندکار سابق مرحوم ومغفور له سلطان عبدالحمید خان علیه الرحمة والغفران زمان سعادت اقرارنلرنده مفصل ومشروح امر شریف مرحمت ردیف اعطا اولنمش اولدینی مسطور ومقید بولنمغین مواد مذکوره مملکت مزبورهنک آبادینی وعمارینی وسکان واهالیسنک وجوه مظالمدن مصون اولملرینی متضمن اولمقدنناشی خصائص ذات عدالت سمات داورانهمدن اولان شفقت عجزه ومساکن ومرحمت ودایع حضرت رب العالمین جمله حقنده بیدریغ ومبذول اولمقدنناشی مقدما بروجه مشروح نظام مملکتی حاوی اعطا اولنان امر عالی مضمونی زمان نصفت اقرارن شاهانه مده دخی دستور العمل طوتیلوب استحصال رفاه حال رعیته دقت اولنمق وعلی الخصوص رعایا وسکنه افلاق حققرنده درکار اولان مراحم واشفاق شاهانه مہ منی ایکی سنه معافیتی متضمن اصدار واعطا اولنان دیکر امر عالیشاتمک مفهوم منیفی اجراسیله وسیله آبادانی مملکتک استکمالنه مبادرت ومدت مذکوره ختامدن صکره دخی مملکت رعایاسنک ادا ایده جکبری جزیه وعیدیه ورکاییه ویوده لرک جوائز صداقله خدمت وعوائد قدیمه لری تأدیبه سی خصوصی بالاده مذکور شروط ونظامه تطبیق اولنهرق حمایت فقرایه دقت اولنمق باینده بالاده بیان اوزره بیک یوز سکسان سکر سنه سنده بالاسی خط هایون ایله مغنون صادر اولان برقطعه فرمان عالی وبیک یوز طقسان سکر سنه سنده ویریلان سند موجبجه صادر اولان حکم شریفی تجدیداً بیک ایکی یوز اتی سنه سنده ینه خط هایون ایله موشح ویریلان اشبو فرمان جلیل الشانمده درج واتسطیر اولنمش ایدی قالدیکه مرور زمان ایله بالاده مذکور بعض شروط فساد واخلل تطرق ایلدیکی بیدار ودولت علیه ایله روسیه دولتی بیننده جاری اولان شروط عهدنامه موجبجه روسیه دولتک مملکتین حقنه شفاعته صلاحیت واستحقاقی درکار اولمغه فیما بعد شروط مرقومه نک اجراسنه مدار تقویت اولمق ایچون درسعادتده مقیم روسیه

ایلچیسبی آتی الذکر موادک دخی علاوه سی مطلوب ایدوکن دولتی طرفندن  
 مأموراً باتقریر انها ایدوب فیما بعد ویوده لرك مدتی نصبری کونندن اعتبار ایله  
 تماماً وکاملاً یدی سنه یه تخصیص اولنه و مادام که ثابت اولمش تهمت ی ظهور ایتیه  
 مدت مرقومه دن اول عزلی اولنیه شویله که : مدت مرقومه ایچنده تهمتی ظهورنده  
 جانب دولت علیه دن روسیه ایلچیسنه اخبار اولنوب بو وجهله طرفیندن بعد  
 التحقیق ویوده مومی الیه فی نفس الامر متهم اولدینی ظاهر و متحقق اولور ایسه  
 یالکز اولخالده عزلی جائز اوله و بیک یوز طقسان سکز سنه سندن صکره احداث  
 اولنان ویرکولر و عواند و مطالبات لغو اولنوب اشبو اساس اوزره ویوده بویاران  
 دیوان ایله تکالیف سنوییه تعیین و تخصیص و احق وجه اوزره توزیع ایلیه و بونک  
 خلاقی حرکتدن ویوده لر مجانبت ایلیه لر و روسیه ایلچیسنک بوکا دائر و مملکتک  
 امتیازات و باخصوص اشبو فرمان عالیده مندرج شروطک و قایه سنه متدائر واقع  
 اوله جق افاداته ویوده لر اعتبار ایلیه و بویاران مملکتک سقوتینک تعبیر اولنور  
 معاف رعایا ماده سنده حلول ایدن فسادک دفعی و بار تکلیفک بو وجهله تخفیفی  
 ضمننده قدیمیسی اوزره و سیتاریه ده مقید سقوتینک عددندن ماعدا هیچ بر رعایا  
 تکالیفدن معاف اولیوب جمله سی مساوات اوزره بار تکالیفی تحمل ایدلر و ویرکو  
 تخصیص دارلری طرفندن رعایا حقنه بر درلو جور و تعدی و قوعی منع کلی ایله منع  
 اولنه و مملکت افلاقده عسکر شهر یه لرینک اداسیچون مملکت بغدادن دخی بشقه جه  
 ویرکو طریقه بر مقدار اعانه اولنسی لازمه دن اولدیغنه بناءً بو ماده یه دائر صادر  
 اوله جق دیگر امر عالی موجب جه حق و عدل اوزره تنظیم اولنه و مملکت افلاقک  
 سریعاً عسکر دن تخلیه سنه و شهر یه لرینک اداسیچون اقتضا ایدن اسبابک استحصالنه  
 سعی موفور ایتلری ویوده یه و بویاران مملکته امر و تنبیه اولنه و بوشهر یه لرك  
 اداسی لازم اولان مبالغتک تحصیلنه منوط اولغله ویوده بو فریضه یی ادا ایتدکن صکره  
 بر مقتضای اراده سنیه مملکت افلاق رعایاسی بر سنه ک جمع معافیت ایله مظهر احسان  
 اوله لر و کراسته و حبوبات و رغن ساده و اغنام و الحاصل محصولات مملکتدن عبارت  
 اوله جق دولت علیه ترتیباتنک مقداری صادر اوله جق اوامر علیه ده تصریح  
 اولنه و بو مقوله اوامر علیه دروننده بویارانه خطاب درج اولنوب دیوان افلاقده  
 علناً فتح و قرائت اولنه و مطلوب اولان نه ایسه مملکتدن تماماً و یاخود بعضاً تحصیلی  
 ممکنیدر دگنیدر بویاران مرسومون ایله مذاکره اولنه جق اولغله بو باده ویوده لری  
 معرفتیه بویارانک استدعاسی قرین اصغا اوله و ترتیبات مرقومه نك بهاسی عن نقدو بلا  
 تردد سعر رایجیه جانب میریدن ویریلوب جهت آخری ایله مبایعه اولنیه و مبایعه

اوله جق ذخائرک بهاسی بهر سنه ابرائیل اسکله سنده قطع اولنان فیات اوزره ویریه و ذخائرک نقلیه سی سخره طریقیله رعایاه بار اولماق ایچون اسکله مرقومه ده قطع اولنه جق فیات ذخیره نك نقایه سی حسبیه قطع و تخصیص اولنسی خصوصه و یوده لر صادقانه دقت ایلیه لر و مملکت مرقومه به متعلق صادر اولان اوامر عالیهم دیوان افلاقده علناً فتح و قرائت اولندقدنصکره قیود مملکتده حفظ اولنه و مناصب ولایت اهالیء مملکته ویریه و روم طائفه سندن اهل عرض و ارباب و قوف و بومناصبه لایق اولنلرک انتخابی دخی و یوده نك ید اختیارنده اوله و تعدیلری و قوعنده و یوده انلری بویاران مملکت متللو عزل و تأدیب و ظاماً الدقلری رده مجبور ایلیه و منزل خانلر اداره سی ایچون اقتضا ایدن مصارفی بهر سنه و یوه ده بویاران دیوان ایله تقدیر ایدوب تعیین اولنه جق مقداردن و یوده هیچ برهانه ایله زیاده آلیه و خسته خانه و مکتب و یوللر و سائر بومقوله ولایته مخصوص ماده لرك اداره سی و یوده لرك امر و تنهی ایله بویاران مملکته محول اوله و متره پولید و مناسترلره مربوط اولیمان رهبان طائفه سندن مرد اولنلرک املاک متروکه لری کمنه طرفدن طلب و ادعا اولنموب فقرا و ایتام و بومثالو خیراته متعلق صندوقلرک ایرادی اولق اوزره و یوده لر معرفتیه تخصیص اولنه و مناسترلره مربوط اولان رهبان دخی مرد اولدقلرنده اموال متروکه لری مربوط اولدقلری مناسترلرک ایرادی اولق اوزره ترك اولنه و اوته دنبرو مملکت محافظه سی ایچون استخدام اولنه ککش نفرانک کما فی الاول بقا و استخداملری خصوصی و یوده لر بویاران مملکت ایله بالندا کره تنظیم ایلیه لر و افلاق جانبنده یرکوکلی و ابرائیل و قله و اولت نهرینک اوته طرفدن و بغداد مملکتده خوشین ناحیه سنده رعایا اسمیه یاد اولنان محله غصب اولنمش افلاق و بغداد اراضیسی رد اولنه و بوکا دائر اقتضا ایدنلره خطا باصادر اوله جق اوامر عالیهمه تخصیص مدت اولنه و بالاده بیان اولندینی اوزره فرمانلو تجار دن ماعدا اطراف سکنه سندن و یماقلر دن و سائر لردن خلاف شروط مملکته دخول و تمکن و رعایای اضرار ایدنلرک منع و دفعلرینه اعتنا اولنه و فیما بعد مملکتینه ارسال اولنه جق اوامر علیه اشبو شرطه موافق و امتیازات و قواعد مملکته مطابق اولق و سایه همایه خسر وانه مده آسوده نشین امن و امان اولان اهالیء مملکتک حسن حال و رفاهیت و کمال استراحت و معموریتی موجب اوله جق وسائل و اسبابک استحصالی و اشبو فرمان عالیشامله عنایت و احسان بیوریلان امتیازات مملکته منافی حالانک عدم تجویزی اخص مطالب ملوکاتمدن اولدیغنه بناء سنکه و یوده مومی الیهسک مجبول اولدیغک صدق و استقامت و رضا جویی و غیرت لازمه سنجه کرک سن و کرک بویاران و اهالیء مملکت نائل اولدیغکنز امتیازات عدیده نك شکرینی ایفا و بالاده

مستور شروطه موافق اوله رق او امر عایه مله مطلوب اولان ترتیباتک تدارک و اجراسته دقت برله هر حالده ایفای لازمه اطاعت و رعیت و اجرای مراسم عبودیت و صداقته کمال سعی و غیرت و خلاف فرمان و منافی رضا مقدار ذره حالت و حرکت و وقوعی تجویز دن حذر و مبادعت اولمق فرمانم اولغین اشبو امر عالیشانم اصدار ایله ارسال اولمشدر ایمدی سنکه و یوده مومی الیه سن افلاق مملکتک باجمله متره پولید و بسقبوس و ارجمانه لری و غومنوس و عامه بویاران و یویاراش و قپودان و اهالی و رعایای مووجه لرنده فرمان جلالت عنوانی فتح و قرائت و مفهوم عدالت و رسومی اعلان و اشاعت ایلدکن صکره کرک بویاران و کرک رعایای افلاق مادامکه صداقت و استقامت و صفوت طوبیت ایله مراسم اطاعت و رعیتی اجراده احکام مطاعه شاهانه مه انقیاد و مطاوعت لوازمی ایفاده منهج سداد دن عدول ایلمیه و زمان عدالت اقتران شاهانه مده دخی رعایا و برایا و عجزه و ضعف احقرلنده مراسم و اعطاف خسروانهم من کل الوجوه مصروف و مبذول اولوب دائما و مستمر آا کتساب آسایش و راحت بیشمار ایده جککری و سن و اخلافک دخی دولت علیه مک عبودیتی و مکارم جلیله تاجدارانه مک شکرینی و بالاده مذکور تنبیهات مقتضاسنی تأدییه و اکمال ایلدجکه مادام که سندن عزل و تبدیلی ایجاب ایدر تهمت صریحه ظاهر اولیه عزل و انفصال غائله سنی چکمییه جککی و صداقت و استقامتده مستمر اولدجقه افلاق و یوده لغنده مستقر اوله جغکی و مواد مذکور نکه علی الدوام دستور العمل طوبیلوب جدا مجدم جنتمکان سلطان محمد خان صبت علیه سبحانه الغفران حضر تریسک زمان عدالت اقترانلنده مظهر اولدق لری امتیازات و رفاهیتلرینه دائما طرف ملو کانه مدن و وزرای عظام و وکلای فیخام جانبیلرندن اقدام و دقت اولنه جنی و سواحل طونه و سرحدات اهالیلرندن و سائرلرندن کبیر و صغیردن و یریلان نظامه منافی طور اجتسار ایدنلر خبر آلدینی ساعت حقرلندن کلنه جکی محقق و مقرر اولوب مفاد امر منیفی جمله بویاران و اهالی و رعایای افلاقه تفهیم و دوام عمر و دولت و قوام فر و شوکت ادعیه سنه مواظبت ایلملرینی توصیه و تلقینه بذل مقدرت و خلافندن حذر و مجانبت ایلمک باینده فی اواخر جا سنه ۲۱۷

(۱۶)

\* دولت علیه ایله فر انسه جمهوری بیننده عقد اولنان مصالحه نکه صورتی \*  
باعث تحریر کتاب صحت نصاب اولدرکه شوکتلو قدرتلو پادشاه آل عثمان ایده الله تعالی الی آخر الزمان حضر تلی و فرانجه ملتی طرفندن فرانجه جمهوری باش قونسلوسی جنابی دولت علیه ابدی الاستمرار ایله فرانجه جمهوری بیننده مدت میدیه دنبر و درکار

اولان روابط اصلیه دوستی و مصالحه‌یی تأییده اظهار خواهش و نیت ایلدکارینه بناءً طرف واضح الشرف حضرت پادشاهیدن دولت علیه‌لرنده حالادیوان هایون آمدجیلدی ایله ریاست امورینک مدیری اولان السید محمد سید غالب افندی و باش قونسوس جانبندن حالا فرانچہ جمهورنده امور خارجیه و کیلی منسترو شارل موریس طالیران مرخص تعیین اولنمق حسینیه حامل اولدقلری رخصتنامه لری بر برلیله بعدالمبادله ذکرى آتی موادی عقد ایلمشلدرد .

اولکی ماده دولت علیه و فرانچہ جمهوری بیننده دائمی صلح و صلاح کاملاً جاری اولوب بعدازین عداوت و خصومت کلیاً مندفع اوله .

ایکنجی ماده دولت علیه و فرانچہ جمهوری بیننده قبل السفر متداول اولوب طرفینک هر درلو روابطنی تصریح و تأکید ایدن عهد و شروط بودفعه دخی تمامها تجدید اولندی بنابرین اشبو تجدید واجرا اولنسان عهد قدیمه ده مندرج شرط نافع اقتضاسنجه دول سائره یه اولان رعایت فرانچہ لو حقدنه دخی مرعی و معتبر طوتلمسی مصرح و مذکور اولمقدنناشی فیما بعد قره دکره دخی فرانچہ پیراغی ایله فرانچہ تجار کیملرینک بلا مانعه آمد و شدی جائز اوله شویله که : دولت علیه ذکر اولنان فرانچہ تجار سفاینک بحر مذکوره کیروب حیقملرینی تجویز ایدوب بحر مذکوره آمد و شدلرینی تسهیل ایچون قره دکره آمد و شد استحقاقه نائل اولان ملل سائره نک تجار سفاینه هر وجهله تطبیق اولنه لر و دولت علیه و فرانچہ جمهوری مالکنک تجار سفینه لرینک آمد و شد ایلدکارى بحر لردن ازباندیلرک دفعی ضممنده اسباب و تدابیر لازمه یه برابرجه تشبث ایده لر و قره دکره دخی آمد و شد ایدن فرانچہ لو تجارینی دولت علیه ازباندیلردن حمایه تعهد ایلیه قالدیکه شرط مذکور منطوقنجه طرف دولت علیه دن فرانچہ لو حقدنه جاری اولان منافع دولت علیه نک تبعه و پیراقلری حقدنه دخی فرانچہ جمهوری نک بر و بحر لرنده جاری اوله .

اوچنچى ماده سالف الذکر عهد فرانچیه بناءً فرانچہ لونک قبل السفر دولت علیه نک ممالک سائره سنده نائل اولدقلری استحقاقات و امتیازات و منافع قره دکر سواحلنه ملاصق و قریب اولان ممالک دولت علیه ده دخی جاری اولوب کرک تجارتده و کرک ممالک مذکوره ده قونسوس و یا امور تجارتنی رؤیته مأمور اقامه سی فرانچہ تجارتنه اقتضایدر ایسه او مقوله مأمور حقدنه اجرا اولنه .

دردنجی ماده فرانچہ وانکلتره دولترى بیننده تاریخ هجرتک بیک ایکیوز اون التی سنه سی ذی القعدہ سنک یکرمی ایکنجی و فرانچہ جمهوری تاریخنک اونجی سنه سی ژوومینال آینک دردنجی کونی عامین شهر نده منعقد معاهده ده دولت علیه یه

متعاقب مندرج اولان مواد معلومه بی دولت علیه دخی قبول ایلیوب اول مواد تماماً اشبو عهد نامه ده رسماً تأیید اولنور .

بشنجی ماده دولت علیه و فرانچہ جمهوری بربرینک تمامیت اراضیسنه دخی تکفل ایدر لر .

التنجی ماده طرفیندن انهای سفرده سفرای جانبین و اهالی و توابع طرفینه عائد اموال اوله رق اخذ و ضبط اولنمش اموال و اشیانک عیناً یا ثمنناً استرداد ای ماده سی آستانه ده دولتین طرفیندن حق و عدل اوزره رؤیت و تنظیم اولنه .

یدنجی ماده رسم کمرک ماده سنه دائر نظامات جدیده نک طرفینک رأیله ر بطنه قدر باعث منازعه اوله حق حالاتی دفع ایچون بوبابده جانبین ممالکیندن عهدود قدیمه به تطبیق حرکات ایدر لر .

سکزنجی ماده طرفین ممالکینده دولتین معاهدتینه متعلق اسرا وار ایسه مجموعنک سیلاری بلا بدل تخایه اولنه .

طقوزنجی ماده دولت علیه و فرانچہ جمهوری اشبو عهد نامه ایله بربرینک ممالکینده احب اولان دولت کبی اولنجی مراد ایتملیله دول سائریه تجویز اولنان اوله حق منافعی اشبو عهد نامه ده مخصوصاً شرط اولنمش کبی بربرلینه تجویز ایلدکاری ظاهر اولور .

اوننجی ماده اشبو عهد نامه نک جانبین مصالحیندن اقتضایدن تصدیق نامه لری تاریخ تمسکین سکسان کون ظرفنده و ممکن اولور ایسه اندن اقل مدته پارسده مبادله اولنه .  
(خاتمه) اشبو اون ماده بی شامل عهد نامه تمسکی مقتضای رخصتمز اوزره عقد و املا و کندو امضا و مهر مز ایله ختم و ممضی قلوب بر معتاد مبادله و اعطا اولندی و تاریخ هجرتک بیک ایکیوزاون یدی سنه سی صفر اخیرینک یکرمی دردنجی و فرانچہ جمهوری تاریخک اوننجی سنه سی مسیدور اینک اون التنجی کونی پارس شهرنده ترقیم قلندی .

(۱۷)

\* صدور عظامدن مجالس مکالمه یه مأمور اولان عصمت بک افندی \*

\* طرفندن رئیس الکتاب افندی یه یازیلان تذکره صورتی \*

عنايتلو اقدم

کچن کون عقد اولنان مجلس سامیده بلا غرض نفسمزی فدا ایدرک تحصیل رضاء الله و ترضیه روح رسول الله ایچون براز کلمات سویلدم ولی النعم کثیر العفو والاکرم دولتو مرحمتلو صدر اعظم اقدمز بلکه انفعال بیور مشردر اما دقت بیوریلور ایسه اقدمزه

خدمت ایتم ظن ایدرم زیرا عزت محمد پاشا حضر تلمری فرانسه‌نی مصره دعوت  
ایتمدی و معرفتیه داخل اولوب مصری و یرمدی صکره وقت انفصالتده یوک اوزرینه  
تحمیل اولندی مصره تو جمعز حر مین شریفین ایچون ایدی شمدی حر مین شریفینک  
المنی نوجهله دفع ایدهلم بیلمیورم یارین مکّه مکرمه و مدینه منوره کیتدی خبری کلک کده  
خلقه نوجهله سوز اکلادرز و صکره اعانتده قصور اولندی حر یفک مذهبنی سؤال  
و قتال جائز میدر بقه لم دیمک لازم دکل ایدی دیو یرر طعنه نه جواب و یره ملی بیک  
قرق برسنه سنده مصر والیسینی ابراهیم پاشا حکومتده دور مراد خانیده مکّه مکرمه یه  
هجوم ایدن بغات ایچون علمای مصر دن حنفی المذهب شرنبالی حسن افندینک  
یادینیی رساله ده باغی و خارجی نه دیمک اولدینیی مقید (ومن دخله کان آمناً) آیت  
کریمه سنک تفسیرنده قاضی بیضاوی بیت شریفه سوء قصد ایدن هر جبار مقهور اولور  
دیوب اما عبدالله بن زبیر رضی الله عنه حضر تلمری ایچون حجاجک مرادی  
مجرد عبد الله ایدی ییتی تخریب دکل ایدی انک ایچون قهر اولندی دیو میندر عجا  
ایران سفر لرنده دور احمد خانیده عبد الله افندینک و یردیکی فتوا سنده اهل ایرانک  
فردا فردا اغز لرندن رفاضی ایشتمدی یوخسه خبر تواتر ایله عمل ایدوب فتوای  
و یردی بهجه فتوا سنده صور تلمری مقیدر ابو الذهب محمد بک شریف عبدالله ایچون  
مکّه مکرمه یه طوب آتدی و قتاله مبادرت ایلدی اهل مکّه سکوت ایدوب حر مده  
جنگ اولمز دیو عیال و اموال لرینی نه به و هتکه راضی اولدیلر می بوزمانمز ده اولان  
وقایع ندر خارجی امام المسلمینک اطاعتدن بغیر حق خروج ایدندر نجدی مقدما بیعته  
داخل میدر دیو سؤال لازم کلز یمن ایله حجاز بیننی فصل ایدن حد و دده ساکن اعراب بالجمله امیر  
مکّه یه تابعدر بیعتده داخلدر امیر مکّه دولت عالیه نک برات ایله نصب کرده سیدر اندن قطع  
نظر له ایکی دولت بیننده منعقد صلح ایرانی فسخ مرتبه سنده اهانتده نیجه نیجه سفک دما  
و مفاسدی متضمن اولغه بادی اولان حر یف باغیمیدر دیو سؤال وارد اولور می  
خطبه و سکینی کندو نامه حصر سودا سنده اولوب مصر و حلب و شامه ولایه  
نصنه براز کسنه لر می نام زد ایلمش دیو مسموع اولور ایکن هوای سلطنته دوشمش  
آدمک مذهبی حنبلی و شافعی میدر عجب بحق دعوای سلطنت ایدرمی دینور می و جمله  
مذاهبی ابطال ایدوب قبه سعادت می هدم ایدرم رسول الله میت اولدینیی کوستررم  
دین آدم شهیدا حقتده (احیاء عند ربهم) نص قاطعی انکار ایتم می و مرتبه  
شهادت مرتبه انبیا و خصوصاً فخر عالم افندمز مرتبه سی دو نمیدر شان نبوته نقیصه  
ایرات ایدن آدم شرعاً نه اولور فاتح مصر سلطان سلیم مرحوم شاه اسمعیله کیدر  
ایکن سدر اه اولان غوری اوزرینه واروب حلب و شام و مصری آلدقده اهالیسی



مسلمان دکلیدی زماننده کمال پاشا زاده وسعدی افندی و ابوالسعود کبی فحول علما موجود دکلیدی دور محمود خانیده صاری بک اوغلی باغی وزمانزده پاسپان زاده حقه مقدم ویریلان باغی فتوالری خاطر دن چیقیدی بیامدی کمدن رساله معهوددی دولتو افندمک طرف دولترینه ارسال ایلم هر حاله عفو و عنایتلری رجا ایدرم وقت خالیده اشبو ورقپاره بی ارأه وینه طرفزه ارجاعی خاصه سزدن متمنادر افندم الله عشقنه آخره تجاوز ایتمسون رجا ایدرم .

\* سعود طرفندن مکة مکر مه اها لیسنه کوندریلان اماننامه \*

بسم الله الرحمن الرحيم من سعود بن عبد العزيز الى كافة اهل مكة والاعوات والعلماء وقاضی السلطان السلام علی من اتبع الهدی اما بعد فاتم جیران الله وسكان حر مه آنون بامنه انما ندعوکم لدين الله ورسوله قل یا اهل الکتاب تعالوا الى کلمة سواء بیننا و بینکم ان لا نعبد الا الله ولا نشرک به شیئا ولا یتحذ بعضنا بعضا اربابا من دون الله فان تولوا فقولوا اشهدوا بانا مسلمون فاتم فی وجهه الله ووجه امیر المسلمین سعود بن عبد العزیز وامیرکم عبد المعین بن مساعد فاسمعوا له واطیعوا ما اطاع الله والسلام

(۱۹)

\* رئیس الکتاب افندیکن صدور دن مجالس مکالمه به مأمور اولان \*

\* عصمت بک افندی به تذکره سی صورتیدر \*

دولتو عنایتلو مروتلو مرحمتلو ولی نعمت بیتم و باعث مباهات و مفخرتم افندم جلب حوادث ایچون مقدمجه شامه ومدینه منوره به کوندریلان تانار لر بوکون کلدی مدینه منوره اها لیسندن وشیخ الحرم طرفندن تحریرات وارد اولوب مألرنده حجاج مسامینک مکة مکر مه دن خر و جبارینک فر داسی وهابی طاقی کلوب مکة مکر مه بی ضبط ایلدکری و شریف پاشا جدیه فرار ایلدیکی و وهابی طاقی طرفلری سد ایتمش اولدق لرندن ذخیره جهتیه مضایقه به دوچار اولمشار ایسه دخی اوچ ماهه قدر غیرت ایدرک مدافعه به ابتدار ایده بیله جکلری کیفیاتی مندرج اولغله رکاب هاپونه عرض اولتق اوزره در چیقده خاکیای دولترینه تقدیم ایدرم قالدیکه ایشلرک جمله سی قاریشق بیلم نصل اوله جق شام والیسنه و بغداد والیسنه سرعسکرک فرمانلری و تشریفات کوندریلایور اما شام ترتیبی ایچون آچه بولنه میور الله انجاهنی خیر ایلیه ولی نعمت بیتم افندم تقدیم ایلدیکم تذکره چاکرینک بعضیسنه ایکی حرف اولسون بر جواب اشارته رغبت و عنایت بیورلما سی قولکیزی مضطرب ایده یور

کر چه بوسؤال مغایر ادب عبودیت در انحق افندمک خاص بنده سی اولدیغمه اغتراراً  
جسارت ایلدم امر و فرمان ولی نعمت بیتم صاحب مرحمت افندمکدر .

\* عصمت بك افندی طرفندن تذکره مذکورہ نك بالاسنه یازلمش \*

\* اولان جواب صورتیدر \*

عنايتلو افندم

مصائب حرمین وجودمی خراب ایلدی تصور موتدن الذ واعلی عندمده برشی  
یوقدر بو حالت مقتضای دیانت یاخود غیرت هاشمیه یاخود جنوندن شعبه جبان  
نه دیرسکزر راضیم شعور یوق که جواب یازیم بوغازیمه برزلهه حاره ایندی آلان  
علاج ایدرم بو طور لرله تدبیر اولمز ماعبه صیان کبی امرار وقتدر نه بغداد والیسی  
امداد ایدر ونه شام طرفندن اعانت اولنور ونه مصر اله کیررکه عمده امداد اندن  
امیدی واردر ونه آنچه تدارکی ممکن رب تعالی هواری در عقب لدوس ایلدی  
هر کس عالمجکنده کیمسه ده اضطراب یوق بنده کز اشککمدن مضطرب اولدیغ  
بیلورم مدینه منوره یه کیتدی شبهه م یوقدر بش اون کونه قدر مشهد امام علی  
وقعه سنی استماعه حاضر اولم بغداد طرفندن امداد یرینه استمداد خبرلری کلور  
بدلیهلر بقلم عسکرلر یازم هله شوروم ایلی غائله سنه بقلم ایشته جواب بویله اولور  
یوخسه سزه والله العظیم ذره اغبرارم یوقدر دولتلو برادر جانبرارم کتخدایک  
اغایه دخی محبت در جه اخوتده در آنلره جوابمزی ارانه بیورک ظنمده تسلیم ایدرلر  
کیمسه یه اعتراض و تعریض مراسم دکدر والله شو زمان مصائب و فساد و نفاق  
ادراک ایلدیکمه متأسفم درونلر جمله فساد اوزره رسول الله صلی الله علیه وسلم بزدن  
رو کرداندر ذنوبمزه توبه و شریعت مطهره یه حرمت واجراسنه موفق اولمدیغه  
والله نصرت اولماز ساعت بساعت فسادلر افطار آفاده تولد ایدر دول نصارا بویله  
ولانمز بویله عسکر من بویله و بز بویله الله انجمنی خیر ایلیه بنده کزه کوره سلامت  
ایمان ایله بر ساعت اول کوچمه میسر ایلیه آمین کچن ماه خلف و عدلرینه احتمال  
بعید کبی اعتذاراً فقیره تشریف بیوررلر او وقت لساناً افاده یه تعلیق ایتش ایدم  
تعجیل و سوسه بیورلمش بر ب الکعبه کیمسه یه اعتراضم یوقدر حسب حال اوله رق  
جوابه ابتدار ایلدم عنایه و محبة اشبو و رقبارهی بعد القرائه ینه طرفره ارجاعی  
اثبات محبت برهاندر افندم .

\* رئیس افندی نك عصمت بك افندی یه دیگر برقطعه تذکره سی \*

دولتو عنایتلو مروتلو مرحمتلو ولی نعمت بیتم و باعث مباهات و مفخرتم افندم

مصدر دن کلان تحریرات رکابدن چیقمغله منظور ولی النعمیلری بیورلمق ایچون تقدیم ایلدم علی پاشا بو کون اخشام اوزری قوم قبو پیشکاهندن قالقوب کیده جکدر . افلاقدن کلان تحریرات رکابه عرض اولندی چیققدقه تقدیم ایدرم مناوطاقی حالا طوتراقانده ایمشله بر طرفدن افلاقه تعدی ایده یورلر فرانسه لو ایله انکلتزه محاربه سی تحقق ایلدی اما اعلان حربی مشعر بیان نامه لر نشر اولنماش فقط انکلتزه قرالنک پرلامتویه اولان افاده سی کدی ترجمه اولتمقده در . تکلمینده تقدیم ایدرم آرتق طرف طرف فسادلر چیقدی و بز شاشیردق الله انجانی خیر ایلیه امر و فرمان ولی نعمت بیمنتم مرحمتلو اقدمکدر .

\* عصمت بک افندی طرفندن بو تذکره نک بالاسنه یازیلان جواب \*

عنایتلو اقدم

مصائب حجازیه واهانت روضه مطهره دن صکره جمیع اکداری اونوتدم و تصور دخی ایتمیورم جناب خدای متعال بزم نصرتمزی ایسته میور هر نه امره شروع اولنور ایسه هزار موانع ظهور ایده یور مصرک بوصورته کیرمسی تمام اسباب امداد و اعانتی منع دکمیدر جناب حق ذنوبتمزی عفو ایلیه مرحمته شایان ایلیه .

﴿ انتهى الجلد السابع ﴾

در سعادت

﴿ مطبعة عثمانیه ﴾

۱۳۰۹



فہرست جلد ثامن

(۶)

صفحہ

- ۲ بقیہ وقایع سنہ ۱۲۱۹
- ۰ خلاصہ احوال دولہ
- ۵ ناپلیون پوناپارتنک فرانسیز ایمپراطوری اولدیغی
- ۸ نمچہ حکمدارینک اوستریا ایمپراطوری عنوانی الدیغی
- ۱۱ المانیانک تقسیم جدیدی
- ۱۲ روسیه ایله ایران بیننده محاربه ظهوری . وودین جانبہ دأر بعض خصوصات
- ۱۳ فرانسه وانکلتره دولترینک تدارکات حربیہ لری
- ۱۴ ناپلیونک تتوجی . اسپانیانک انکلتره اعلان حرب ایتدیگی . وناپلیونک  
تصورتی
- ۱۵ وقایع سنہ ۱۲۲۰
- ۱۸ دول اوروپانک فرانسه علیهنه اتفاقاری
- ۱۹ بعض وقایع دولت علیہ
- ۲۰ قرہ یورکینک غوسپودارنغی . بعض احوال کرجستان
- ۲۲ جبار زادہ نک وزارتی واسماعیل پاشانک صدارتی وتوجیہات اخری
- ۰۰ حوادث حجازیہ وعراقیہ
- ۲۴ محمد علینک مصر والیسی اولدیغی
- ۲۸ کولہ منلرک قهر وتنگیلی ووقایع حجازیہ
- ۲۹ وقایع متنوعه
- ۳۰ طیار پاشانک فراری
- ۳۱ روسیه اتفاقنک تأییدی
- ۳۲ بعض وفیات
- ۳۳ وقایع اوروپا
- ۳۴ فرانسزلرک اوستریا ولرہ غلبه لری
- ۳۷ ترافالغار محاربه سنده فرانسه دونماسنک مغلوبتی
- ۳۹ فرانسزلرک ویانه یه دخول لری
- ۴۱ اوستریلیج محاربه سی واوستریا لونک فرانسه لو ایله متارک سی
- ۴۳ فرانسه ایله بعض حکمداران المانیا بینلرنده عقد اتفاق اولندیغی
- ۴۴ پروسیا واوستریا ایله فرانسه نک مصالحه لری . وناپولی قرالیتک الغامبی  
وبارسده مصالحه عمومیہ مذاکرانه باشلاندیغی

حکیمه	
۴۷	احوال پولتیقیمه دولت علیه . محب افندینک سفارتی
۰۰	وقایع سنه ۱۲۲۱
۵۰	رؤس امتحانی و دیگر بعض توجیہات
۵۱	رفیع افندینک سفارتی و بعض وقایع عراق
۵۳	نابلیونک بعض اجرا آتی
۵۴	محب افندینک نابلیون ایله ملاقاتی
۵۶	فرانسزلرک را کوزہی ضیط ایلدکاری
۵۷	اوروپاده ینہ محاربه اماره لرینک ظہوری
۵۹	پروسیا ایله فرانسه اره سنده محاربه ظہور ایتدیکی
۶۲	ادرنه وقعه سی
۷۰	تبدل صدارت و مشیخت و بعض توجیہات
۷۲	صر پستانه دائر بعض مطالعات و بعض نظامات
۷۴	مملکتین بکلرینک عزلاری
۷۷	واصفک عزلی و راغب افندینک ریاستی
۷۹	وقایع عربستان و مصر
۸۸	صالح پاشانک قپودانلی
۰۰	حوادث و وقایع اوروپا
۸۹	فرانسزلر ایله روسیالولرک محاربه لری و نابلیونک برلینہ دخولی
۹۱	فرانسزلرک لهستانه کیردکاری و روسیه لولر ایله محاربه لری
۹۴	وقایع دولت علیه
۹۵	روسیه لولرک بغتہ بندر و خوتین و کلی واقکرمان قلعہ لرینی استیلا ایتدکاری
۹۸	اسماعیل جنکنده اهل اسلامک مظفرتی و پهلوان اغانک بسالتی
۱۰۱	روسیه یه اعلان حرب اولدینی و وحید افندینک نابلیون نزدیکه کوندرلدیکی
۱۰۳	تدارکات سفریه و بعض توجیہات
۱۰۶	پاسبان اوغلنک و فاتی و علمدارک وزارتی
۱۰۷	بکرش طرفده و اسماعیلده عساکر اسلامیه نک مظفرتی
۱۰۸	انکلیز دو نمانسک آقدکز بوغازدن دخولی
۱۱۵	سید علی پاشانک قپودانلی و انکلیز دو نمانسک عودتی
۱۲۳	احوال عربستان . و هایلرک مدینہ منوره نی استیلا ایلدکاری و طریق حجک انسدادی

- ۱۲۵ وقایع سنہ ۱۲۲۲
- ۱۲۶ انکلیز لڑک اسکندریہ بی استیلا ایتدکاری و بعض وقایع مصریہ
- ۱۲۸ انکلیز لڑک رشیدہ انہزاملری و بعدہ اسکندریہ بی ترک ایدوب کیتدکاری
- ۱۲۹ وفیات اعیان
- ۱۳۴ اردوی ہایونک حرکتی و بعض توجیہات
- ۱۳۵ اسماعیل ویرکوکی محاربہ لری
- ۱۳۹ سلطان سلیمک خلعنی موجب اولان مقدمات
- ۱۵۵ یماقلرک عصیان و قباجقی وقعه سنک ظہوری
- ۱۷۵ سلطان مصطفای رابعک جلوسی ووقایع سائرہ
- ۱۸۶ بعض وقایع اردوی ہایون
- ۱۸۹ چلبی مصطفی پاشانک صدارتی و بعض وقایع حربیہ و احوال سائرہ
- ۱۹۲ وقایع درسعادت . عزل و نصب و نفی و اعدام
- ۲۰۷ سلیمان پاشانک بغداد والیسی اولدینی ووقایع سائرہ
- ۲۰۹ بعض وفیات
- ۲۱۰ طلوع ذات الذنب
- ۲۱۲ وقایع شتی . اغا پاشانک اعدامی
- ۲۱۳ روسجق یاراننک بعض احوالی و غالب افندیکنک متارکہ مکالمہ سنہ ماہوریتی
- ۲۱۶ اردوی ہایونک ادرنیہ عودتی و بعض توجیہات و طیار پاشانک قائم مقامانی
- ۲۱۹ اوروپا و قوعاتی و دولت علیہنک دول اوروپا ایہ مناسباتی
- ۲۲۱ فرانسزلرک دانسقبی استیلالری اثناسندہ و حید افندیکنک ناپلیون ایہ ملاقاتی
- ۲۲۲ ناپلیونک غلبہ سی و روسیہ ایمپراطوریہ ملاقاتی و تیساسیت مصالحہ سی
- ۲۲۶ روسیہ متارکہ سی
- ۲۲۸ و حید افندیکنک پارسہ عزیمتی
- ۲۲۹ ناپلیونک تشبثات خارجیہ و داخلیہ سی
- ۲۳۲ محب افندیکنک مکالمہ یہ ماموریتی و و حید افندیکنک عودتی
- ۲۳۳ رفیع افندیکنک ایراندن عودتی
- ۲۳۴ محب افندیکنک تعایاتی
- ۲۳۶ دو بروونیک ایہ جزائر سبعہنک فرانسلو طرفہ کچدیکی
- ۲۴۴ حالت افندیکنک عزلی و جانب افندیکنک رکاب ہایون رئیس اولدینی
- ۲۴۵ فرانسلونک دول سائرہ ایہ اولان مناسباتی
- ۲۴۶ انکلیز لڑک دانیمارقبی اوردقلری و بعض وقایع خارجیہ

	تخيفه
فرانسزلك پورتكيزه واسپانيايه وبعده رومايه دخولارى	٢٤٨
نابليونك دولت عليه عاينه روسيه لويه اخباراتى	٢٥٢
روسيه لئونك فلانديانى استيلا ايتدكارى	٢٥٤
را كوزه حقتده بعض مباحثات	٢٥٥
وقايع سنه ١٢٢٣	٢٥٦
محب افندى به تعاليم جديده كوندردىكى وبعض حوادث اوروپا	٥٠٠
ارناودلغه دائر بعض حوادث	٢٥٨
اسپانيا وقوعاتى اوزرينه نابليونك طور وحركتى	٢٦٠
اجمال احوال حضره	٢٧١
مبادىء وقعه	٢٨١
علمدارك اردوى هايون ايه در سعاده عودتى اثناسنده قباچينك اعدامى	٢٩٧
اردوى هايونك در سعاده وصولى	٢٩٩
عارف افنديك مشيختى وعطاء الله افندى ايه بعض علمانك نفيلىرى	٣٠١
ومصطفى پاشانك حبسى	
سلطان سليمك كيفيت شهادتى	٣٠٨
سلطان محمود ناينك جلوسى وعلمدارك صدارتى	٣١١
لاحقه	٣١٣
تراجم احوال	٣١٦
وقايع متنوعه	٣٢٤
فذايكه	٣٣٧
ذيل	٣٣٨
روسيه اتفاقنامه سى	٥٠٠
حامى پاشانك صدارتنه دائر خط هايون ومملكتنه دائر سند	٣٤٧
روسيه به اعلان حربى متضمن بياننامه	٣٤٩
حامى پاشانك سردار اكر مملكته دائر خط هايون	٣٥٣
فاس حاكمه نامه هايون	٣٥٦
حجت غريبه	٣٥٩
فاس حاكمه نامه هايون	٣٦٠
علمدارك صدارتنه دائر خط هايون	٣٦١



ترتیب جدید

جَلَدِ ثَامِنٍ


(از)

تاج محمدی



معارف نظارت جلیله سنک رخصتنامه سیله

(ایکینجی طبعی)



در سعادت

(مطبعه عثمانیه)

۱۳۰۹

جلد نامن

(از)

بِسْمِ اللَّهِ الرَّحْمَنِ الرَّحِيمِ

بِسْمِ اللَّهِ الرَّحْمَنِ الرَّحِيمِ

بِسْمِ اللَّهِ الرَّحْمَنِ الرَّحِيمِ \* اللهم غبظا لا هبطا

تاریخی یازمقدمه اولدیغمز عصر لرك وقوعاتی و علی الخصوص اشبو جلد نامنک مندر جاتی  
جمله یه عبرت و یره جک و عصر هایونک صحیحاً قدر و مزیتی بیلدیره جک مباحث  
مهمه دن اولدیغنه منی هر میخنده اول عصر لرك مشکلاتی ایله عصر مزک محسناتی  
بالموازنه ادعیه خیریّه حضرت پادشاهینک تکراری ارباب مطالعه نک محول عهدّه  
اخلاص شعاری قیلنور .

( بقیه و قایل سنه ۱۲۱۹ )

\* خلاصه احوال دولیه \*

سنه سابقه و قایل صره سنده بیان اولدینی و جهله پوناپارته انکلتزه جزیره سنه گذار  
ایتمک اوزره تدارکات جسیمه یه تشبث ایلدیکندن انکلتزه دولتی تدابیر تحفظیه به ابتدار  
ایلمش ایسه ده یوزالی بیک فرانسر عسکری انکلتزه اطه سنه ایاق باصدیقی تقدیرده  
مقاومه مقتدر اوله جق قوه بریه تدارکی مشکل ودول بریه اوروپایی اول او انده

( فرانسه )

فرانسه علیهنه قیام ایستدرمک ناقابل اولدیغنی کوربچک انکلتره وکلاسی تلاش ایدرک درون فرانسه ده اختلال چیغارمغه سی ایستدیلر ایسه ده چاره سنی بوله مدیلر .

انکلتره ده بولنان فرانسه فراریلری رؤساسندن ژورژ قادودال نام فرانسیز دخی فرانسه ده قرالیت اصولنک اعاده سی چاره سنی جستجو ایدرک فرانسه ده بر اختلال چیغارمغه خیلی چالشمش ایکن بوکا مقتدر اوله مدیغندن بر تقریبله پوناپارته پی یولده کیدرکن اعدام ایلمک صورتی قرارلاشدیروب بیک سکر یوز اوچ سنه میلادیه سی اغستوس فرنکیسنک یکر می برنده خفیا پارسه کله رله یوز قدر ارباب اختلال بر کدرمش و جنرالردن بعضیلرینی دخی کندو طرفنه اماله ایستدیرمش ایدی انک بوتشبناتنه پارسک پولیس مأمورلری واقف اوله رق رفقا سندن اوچ کشتی اخذ واستنطاق اولندوقده ترتیب اولنان فسادی جمیع تفرعاتیه میدانه قومیشار ومدت قلیله ظرفنده ژورژایله دیکر رفیقلری دخی طوتیلوب بیک سکر یوز درت سنه میلادیه سی مارتنده جمله سی حبس وتوقیف اولمشار ایدی . بووجهله اجراسی تصمیم اولنان فسادک حیز فعله ایصالی اواننده پرنس لردن برینک فرانسه یه داخل اوله جنی اجرا اولنان استنطاقلردن اکلاشلمش وکله جک پرنسک کیم اولدینی معلوم اوله مامش ایسه ده بوآناد بوربون سلسله سندن (دوق دانکن) نام پرنس المانیاده باددوقه لنی مضافاتندن اولوب فرانسه حدودینه درت بش ساعت مسافه ده واقع و اوچ بیک قدر نفوسی شامل اولان (اتنیم) نام قصبه ده مقیم اولغله پوناپارته فرانسه یه کیره جک پرنس اشبو دوق دانکن اولمق زعمنه ذاهب اولدی دوق دانکن ایسه اوراده برقارینک شکار دام عشق و محبتی اوله رق قصبه کنارنده واقع برخانه جکده اقامت ایدوب واکثر ایامده کوکابی اکلندریمک ایچون صید وشکاره کیدوب دل افکننده سی آتش عشقیله پرداغ وکندوسی فرانسه حدودینه قریب ایسه ده سر سودازده سی فرانسه تاجنی کیمک داعیه سندن ایراغ ایدی لکن پوناپارته غایت تیز مشرب برذات اولدیغندن مجرد فرانسه یه قریب بولمسنه نظراً فرانسه یه جابی مصمم اولان پرنسک بو اولدیغنه ذهاب ایله هان حقوق ملل قواعدینک خلافنده و بیاغی حیدودلق طرزنده اوله رق قصبه مذکوره یه براییک بلوک عسکر ارسال ایله پرنس مشار الیهی آودن اوینه کلورکن طوتدیروب فرانسه ده کائن استراسبورغ شهرینه واورادن پارس کنارنده واقع (ونسن) قلعه سنه کتوردکده همان برکیجه نک ایچنده اعضا سی هپ پوناپارته نک آدم لردن عبارت اوله رق ترتیب اولنان دیوان حربده لدی الاستنطاق حقنده عزو اولنان تهمتی کایاً انکار و بوایده هر درلو شبهه دن وارسته اولدینی جهتهله پوناپارته پی کوروبده عرض حال ایستدیکی تقدیرده ازاله شک وشبهه ایده جکنده

اشتباهی اولدیغندن پوناپارته بی کورمک استه مش ایسه ده پوناپارته نظره اولاده واقع اولدیغی خطاده اصرار ایدرک مشارالیه کورنمیوب و بیچاره پرنسک بو خصوصه اولان نیاز واسترحامنه قطعاً التفات اولنمیوب همان اولکیجه پوناپارته نیک امریله قورشونه دیزلمشدر .

پوناپارته نیک صحیفه اعمالی سیاهلاندیران الک بیوک لکه لردن برسی دخی بوغدار لغیدرکه اورویا جه پک بیوک تأثری اولوب بتون اورویا قرالری پرنس مشار الیه ایچون یاس وماتم ایتدیله پوناپارته علیهنه تکرار منعقد اولان اتفاق دولینک باشلوجه برسبی دخی بوماده اولمشدر .

مقدجه پروسیا قرالی فرهدریق کلیوم بر بی طرفلق اتفاق تنظیمی روسیه ایمراطوری علیکساندری یه تکلیف ایتدکده علیکساندری قبول ایتدیکندن فره دریق منفعل اولغله فرانسه طرفه میل ایدرک اورویانک دوام آسایشی ایچون پوناپارته ایله براتفاق عهدنامه سی بالتنظیم همان امضا اولتیق اوزره ایکن دوق دانکنک اعدام اولندیغی خبری برلینه واصل اولدیغی کبی فرانسه ایله جریان ایدن مکمله ترک اولدی . برلینده مقیم فرانسه ایلچیسسی ایله کمسنه کورشمز اولدی و پروسیا قرالی درحال روسیه طرفه میل ایدرک میانه لرنده بر اتفاق معاهده سی تنظیمه مباشرت قاندى .

دوق دانکنک اولوجهله غدرأ اعدامی وقعه موحشه سی پترسبورغده ایشیدلدیکی کبی سرای ایمراطوری طاقی درحال یاس وماتم البسه سی کیدیلر وعلکساندری پترسبورغده مقیم فرانسه ایلچیسنه غایت صغوق معامله ایتکه باشلادی و المانیانک استقلالی خصوصه روسیه دولتنک دخی کفالتی اولدیغندن بختله باد دوقه لغنه عسکر ادخال اولنوبده ناموس و اعتباری شکست ایدلمسندن طولانی ایضاحات طلبنه قیام ایدی . پوناپارته ایسه بوکا غایت آغر جواب ویردیکندن در حال دولتین میانه سنده برودت و بیثونت پیدا اولدی .

المانیا داخلنده بولنان بر مملکته عسکر ادخالیه تعرض اولندیغندن طولانی اصل دعوی المانیا ایمراطوری اولان اوستریا حکمدارینه دوشمکله بو کیفیتدن نتیجه دولتی پک زیاده متأثر اولمش ایسه ده آچیقندن آچیغه پوناپارته یه خصومت ابرازینه جسارت ایده میوب فرانسر اردوسنک انکلتره یه کچرکن مانس دکزنده غرق وتلف اولسبی تمبی ایدر و پوناپارته دن کوردیکی خساراتک آجیسنی چیقارمق و المانیاده کی نفوذینی تأیید ایتک اوزره وقت فرصت کوزه در ایدی .

الحاصل دوق دانکن مسئله سندن طولانی بتون اوروپالو پوناپارته علیهنه دوشوب بویسه تمام انکلتره لونک ارادینی برصورت ایکن انکلتره دولتی بعض حکومت المانیا

نزدند بولان ایلیچیرینه فرانسه ده بر داخلی فساد احدائی امر ایلمش اولدیغندن انلر دخی ایفای مأموریتیه قیام ایلدکاری حالده پوناپارته خفیه مأمورلری واسطه سیاه بونلرک مکتوبلرینی طوتدیروب عیناً غزته لره طبع ایله نشر ایتدیردی سفیرلک مأموریت مهمه سنک بویله فساد پیشه لک یولنده استعمال اولدییغی کوریلنجه خلق غضبه کله رک سفرای مومی الیهم بولندقلری حکومتلر نزدنن طرف اولندیلر بوندن طولایی افکار عمومیه انکلتزه حقیقه دخی متغیر اولدی وانکابلرک بووضع نا هموارلری پوناپارته علیهنده غلبانه کلش اولان افکار عمومییه براز تخفیف ایلدی فقط بتون بتون ازاله ایده میوب پوناپارته علیهنه اوله رق تنظیمه باشلاشمش اولان اتفاقلره سکتته کلدی .

پوناپارته بوغوائل خارجییه ایله مشغول اولدیغی ائساده مصالح داخلییه دخی اعتنا واهتمام ایدرک بوقارغشه لقدمه مطمح نظری اولان ایمراطورانی تخصییه چالیشوردی وقرالیت طرفدارلرینک پوناپارته یی اعدام درجه سنه قدر حرص وتهالکاری پوناپارته یه بالورانه ایمراطورلق احاله اولتمشی افکارینی تولید ایلدی وژوررژک تشبثاتی پوناپارته نك اعدامنه سبب اوله جق یرده ترقیء نفوذینه وایمراطورلق درجه سنه قدر صعودینه سبب اولدی شویله که : فرانسه یی ارباب فسادک الندن قورتارمق اوزره حکومتک براساس قوی ودائمی اوزره تأسیس واحکامی آرزوسی بین الناس اظهار اولمغله باشلادی برطرفدن دخی پولیس ناظری بعض تشویقات اجرا واذهان ناسه بو افکاری القا ایدرک بوخصوصه خیلجه استعداد کتور مکده ایدی . بونک اوزرینه پوناپارته دول معظمه نك افکارینی یوقلمق وایمراطورلغنی قبول ایدوب ایتیمه جکارینی اکلامق اوزره نمچه وپروسیا دولتلیله مخبره ایتدکه ایکسندن دخی روی موافقت کوردی فقط نمچه لو بومقابله ده کندو دخی اوستریا ایمراطوری عنواتی القاب سائرهنه علاوه ایتک شرطنی درمیان ایدوب بونی دخی پوناپارته مع الممنونیه قبول ایدرک کرک اوستریا وکرک پروسیا دولتلیهنه عرض شکرانیت ایلدی ومتعاقباً اجرای ایجابنه تشبث ایدوب مجلس ملت اعضاسندن بری ایمراطورلغک وراثته پوناپارته یه احاله سنی تکلیف ایتدکه یالکتر اعضاسدن بری خلاف رأیده بولنوب سائر ی قبول ایتکله ( ۱۸۰۴ ) سنه میلادیه سی مایس فرنکیسنک اوچنه مصادف اولان اشبو بیک ایکی یوز اون طقوز سنه هجریه سی صفرنده پوناپارته نك فرانسرلره ایمراطور اولدیغی اعلان قلندی .

ایشته پوناپارته بووجهله ژوررژک سوء قصدندن طولایی مطمح نظری اولان مقامه کچدیسه ده دوق دانکنی بغیرحق اعدامندن طولایی افکار عمومیه اروپا کندو

عليه‌نهد ایدی وایمپراطورلق کیفیتی بتون عالمه حیرت ویرمشیدی زیرا فرانسزلر حریت وجمهوریت داعیه‌سیله قیام ایدرک بونجه دورلردن برو فرانسه‌ده سلطنت سورمش اولان بوربون خاندانی احما وقرالیت اصولی الغا ایچون بوقدر قانلر دوکشیکن آحاد ناسدن برینی تحت ایمپراطوری‌یه اقعاد ایله زمام اراده و اختیارلری انک یداستقلالنه تسلیم ایتملری عالمک ال غریب وقایع تاریخیه سندن بریدر واکر جمهوریتک تشککلندن برو برخیلی زمانلر کچمش اولسیدی نوع بنی آدمک تلون طبیعینه واحوال عالمک دائماً بویله تحوول وانقلاب اوزره جاری اوله کلمسنه بنا ایدیلرک بعض اسباب معقوله بولنه بیلوردی لکن پوناپارته‌نک ایمپراطورلغنه آلت اولان اکابرک اکثری جمهوریت اوغورنده نیجه قانلر دوکمش وبونجه جانلر یاقمش کیمسه لر اولدقلری حالده دفعهٔ حکومت استقلالیه افکارینه دوکیهرک پوناپارته‌نک ایمپراطورلغنه خدمت ایتملری اینانلماز وفرانسه‌دن بشقه یرده وقوعی تصور اولماز وقایع عجیبه‌دندر فرانسه‌ده بویله سرعت اوزره ظهوره کلان تلون وانقلابه هرکس نظر حیرت ایله باقوب ارتق فرانسزلرک اطوارینه کمنه امنیت ایلمز اولدی.

بروقدنبرو ایمپراطورلق عنوانی اوستریا حکمدارلرینه مخصوص اولمشیکن مؤخرأ روسیه چاری پترو تحکماً بوعنوانی الدقده بین‌الدول خیلی قیل وقال وقوعه کلوب برمدت بعض حکمداران طرفندن قبول وتصدیق اولنماش ایسه‌ده صکره‌لری هر طرفدن تصدیق قلمشیدی . لکن اوته‌دنبرو ایمپراطور عنواننک قرال عنواننه نسبتله تقدم ورجحانی وار ایکن اندن صکره بوتقدم ادعایی رد اولمشیدی هله صکره‌لری ایمپراطور ایله قرال عنوانلری بینده تقدم وتفوقجه هیچ برفرق قالمیوب ایکیسی دخی حکمدار دیمک اولمشدر فقط پوناپارته شارلمان کبی اوروپا حکمداراتی تحت نظارتنه المق داعیه‌سنده بولندیغندن بوکره اودخی بوعنوانی طاقمنغله اوروپاده اوچ ایمپراطور مجتمع اولدی شوقدرکه کندوسنه فرانسه ایمپراطوری دینلمیوب فرانسزلرک ایمپراطوری دینلدیکنسندن اوروپاچه معروف اولان ایمپراطورلق عنوانندن فرقی وار ایدی وپوناپارته ایمپراطور عنوانی حائر اولدیغی حالده فرانسه‌نک اداره‌سی جمهوریتیه بکزر برحکومت مشروطه شککنده ایدی .

فرانسه‌نک درسعادت ایلچیسى جنرال پرون پوناپارته‌نک بروجه مشروح مسند ایمپراطوری‌یه صعود ایلدیکنی باب‌عالی‌یه اخبار ایله تصدیقنی تکلیف ایتدکده چونکه فرانسه‌ده بویله نواچاد برعنوانک اتخاذه دول اوروپا طرفندن نه دینله‌جکی استانبولجه هنوز لایقیله معلوم اولدیغندن ودولت علیه‌نی متفق اولان انکلتره وروسیه دولتلری فرانسه‌دن بتون بتون تبرید ایتمک وفرانسه‌لو دخی انلردن

تفریق ایلمک داعیه‌سنده اولدقلری حالدہ دولتی علیہ دخی اقتضای سلم و مصافات اوزره فرانسه‌لونی دلکیر ایتمکده سعی ایله برابر متفق‌لریله اولان اتفاقک خللدن وقایه‌سنه اعتنا ایتمکده اولدیغندن وانکلتره دولتی حالا فرانسه ایله محارب اولوب روسیه‌لو دخی محاربه‌یه حاضر لمتقدمه ایدوکندن دولت علیہ پوناپارته‌نک ایمرطورلغنی تصدیق بختده متردد و دیگر دول اوروپانک نه دیه جکلرینه منتظر و مترصد اوله‌رق جنرال پرونه (دولت علیہ بوضورتله فرانسه اهلایسنک حصول آرام و استراحتلرندن نمون اولدی ایمرطورلق تعییرینک اطلاقنده دول اوروپا بینلرنده موافقت حاصل اولدینی حالدہ دولتی علیہ دخی مماشات ایدر) دیو جواب ویردکده جنرال پرون (دولت علیہ اوتهدنبرو فرانسه حکمداراننه پادشاه عنوانی اطلاق ایده کلمشدر ایمرطورک مغناسی دخی اودر و بوبابده اغیارک تصدیقه حاجت یوقدر) دیو اصرار ایلدی ایسه‌ده ایمرطور عنوانک اوروپاچه موقع استعمالی بشقه اولدیغندن ایکی لفظ بیننده فرق وار دینلرک و پادشاه تعییرنده دولت علیہ‌نک ینه ترددی اولدیغنی بیان ایدیلرک تکرار اعتذار ایله اوروپانک سیاق احواله انتظار اولندی .

بعده جنرال پرون ایمرطورلق تعییرینک رسماً تصدیقی امرنده اصرار ایدوب اگر چه روسیا و اوستریا دولتلرینک بونی قبول ایلمش اولدقلری تحققیق ایلدی و پوناپارته‌نک ایمرطورلق عنوانی المسنده دولت علیہ‌جه دوشونجه‌جک برشی یوغیدی لکن بوجه سابق دولت علیہ‌نک متفق اولان انکلتره‌لو فرانسه ایله محارب و روسیه‌لو دخی انکلتره‌لو ایله یکجهت اوله‌رق پوناپارته‌نک ایمرطورلغنی تصدیقندن آبی و محتنب اولملری دولت علیہ‌نک دخی ترددینی موجب اولمشیدی .

واگر چه روسیه‌لو هنوز جزاً سبعة‌یی تخلیه ایتمدیکندن بشقه ممالک دولت علیہ حقتده حرص و طمعی مجزوم و دولت علیہ‌نی برطاقم تکالیف طاقت فرسا ایله ازعاج ایتمکده اولدیغندن بشقه دولت علیہ‌نک خرسنیا تبعه‌سنی دخی برطرفدن تحریک و افساد ایلمکده اولدینی معلوم اولقدن ناشی سلطان سلیم خان حضر تلیری پوناپارته طرفه میال اوله‌رق انی قیرمامق استرایدیه‌ده مصر مسئله‌سی هنوز خاطر لرندن چیقمامش اولدینی جهتله انک و عدو و عیدینه امنیت و اعتماد اولنه‌مدیغندن وکلای دولت علیہ‌نک اکثری فرانسه علیه‌نده بولمغله دولت علیہ متفق‌لری دن چیقارماغنی ده‌ها اهم کوررک ایمرطورلغک تصدیقی بختده دولتین متفقینک پولتیقه‌سنه اتباعه مجبور ایدی .

جنرال پرونک اصل مأموریتی دولت علیہ‌نی روسیه وانکلتره علیه‌نه قیام ایتدیرمک مسئله‌سی ایکن باب‌عالینک بوطورندن منفعل اوله‌رق رسماً و صراحةً ایمرطورلق

عنوانی تصدیق اولنماز ایسه ترك سفارت ایله فرانسه یه عودت ایده جگنی قطعاً افاده ایلمش ایسه ده انکلیز و روسیه ایلیچیری دخی بو کره اکر دولت علیه پوناپارته نك ایمپراطور لغنی تصدیق ایدرسه انکلتره و روسیه دولتله یله اولان اتفاقی فسح ایتمش اولور دیملریله وکلای دولت بو یابده دوچار حیرت اوله رق خلیجه مطالعه و ملاحظه دن صکره نهایت باب عالیدن خلال رجیده ( دولت علیه ایمپراطورلق تصدیقندن اعراض واجتباب ایتمز انجق بومصلحتی کندو امور ملکیه سنه تطبیق ایله دفع قیل وقال فکر نده در ) مألنده فرانسه سفارتنه برقطه تقریر ویرلمش و بر صورتی دخی پارسده دولت علیه ایلیچیمی اولان حالت افندی یه کوندرلمشدر جنرال پرون بو تقریری قبول ایله ییموشایوب قالمشیکن خلال رمضان شریفده یرینه سرکاتبلرندن یرینی مصلحتکندارلقله براغوب کندوسی فرانسه یه عزیمت ایلمشدر .

و فرانسز لک بجز آ تجاوز لرینه انکلیز لر مانع مزاحم اولوب انجق شایدکه بر آنجه الکاسی ایچندن کچوبده ممالک محروسه یه تحطی ایده جک اولور لر ایسه اوستریا دولتک آنلره یول و یروب و یرمیه جکی خصوصی جای بحث و مطالعه اولمغله رئیس افندی روسیه ایلیچیمیله ملاقات ایدرک بومطالعهی ایما ایتدکه روسیه ایلیچیمی نمچه نك روسیه یه موافقت ایده جکنده اشتباه اولدیغنی و باب محاربه آچیه جق اولور ایسه کندو الکاسندن فرانسز لره یول و یرمیه جکی بیان و دولته عرض وانها ایله ایالیاده اولان فرانسز عسکرینک ممالک عثمانیه یه عبور لرینه مانعت ایچون مالطه ده موجود انکلیز دوغتماسندن مقدار کفایه سفان افزاز و تخصیص ایتدیره جگنی معرض تعهدده در میان ایتمشدر .

بالاده اشعار اولدیغنی اوزره نمچه دولتی المانیا ایمپراطور لغنی عنوانتی حامل اولدیغنی حالده انجامکاری ملاحظه ودریش ایدرک اوستریا ایمپراطور لغنی عنوانتی القابنه علاوه ایتمک شرطیله پوناپارته نك ایمپراطور لغنی تصدیق ایلمش اولدیغندن در سعادتده کی نمچه ایلیچیمی بوائنده دولتک اوستریا ایمپراطوری عنوانک طرف دولت علیه دن تصدیق اولنمنسی ایراد ایلدکه چونکه بوماده پوناپارته نك ایمپراطور عنوانتی المسندن نشئت ایتمش بر کیفیت اولوب پوناپارته نك ایمپراطور لغنی ایسه هنوز طرف دولت علیه دن تصدیق اولنماش اولدیغنی جهتله آنک تصدیقنده بودخی تصدیق اولنور جوابی ویرلدی و چونکه اوستریا دولتی ظاهراً پوناپارته یی اوخشامقده اولمسلیله برابر قلباً اضمحلانله سعی ایدرک علیه نه قیام ایتمک اوزره فرصت کوز تمکده اولدیغندن و اوستریا ایمپراطوری عنوانتی المسی دخی پوناپارته نك افکار تغلبکاریسی اوزرینه مجرد انجام مصلحت مطالعه سندن ناشی اولمسلیله نمچه ایلیچیمی بوجوابه قناعت ایله اصرار یوزنده بولنماشدر .



نمچه لونك المانيا ايماطورلوقى عنوانى حامل ايكن اوستريا ايماطورى عنوانه  
 رغبت ايدىشى بوندن ناشى ايدىكه اوروپاده پروتستان مذهبك حدوشندن متولد  
 و اوتوز سنه ممتد اولان محارباتك نتيجه سنده ( ۱۶۴۸ ) سنه ميلاديه سنده ( وستفاليا )  
 معاهده سنك انعقادندن صكره المانيا ممالكى برچوق بيوك وچوك حكومتلره منقسم  
 اولوب بونلردن بعضيلرى پستقپوساق مسندى اوله رق حكومت روحانيه ايدى  
 و بعضيلرى بىك پرنس و دوقه و هر سىك عنوانلر يله و سائر نام و عنوانلر يله جسمانى  
 حكمدارلرى اولوب بونلر بالوارنه حكومتنه نائل اولورلردى و بونلر ك خارجنده  
 قرق طقوز سربست و مستقل شهرلر اولوب جمهوريت صورتنده انتخاب اولنان  
 مجالس بلديه اعضاسى معرفتيله اداره اولورلردى و جمله سى بر ايماطورك تحت  
 نظارتنده اولوب ايماطورلوق ايسه انتخابى اولديغندن محلول اولدوقده الكتور  
 تعبير اولنور سىكز حكمدارك معرفتيله حكمداراندى برى ايماطورلوقه انتخاب  
 اولنوق مقتضاي قانون ايدى و بوالكتورلر ك اوچى روحانى حكمدارلر ايدى كه  
 مايانس و ترو و قولونجى ارخى پستقپوسلريدن و بشى جسمانى حكمدارلر ايدى كه  
 نمچه حكمدارى و پروسىيا و انكلتره قرالريه باويه را و ساقسونيا دوقه لريدن  
 هابسبورغ خانداندى اولان نمچه حكمدارى بالاستقلال بوهميا و مجارستان قرالى  
 و اوستريا آرشيدوقى و ميلان و قراتيا و ايستريا دوقه سى و ديكر برچوق عنوانلر  
 صاحبي اولديغى حالده بو انتخابه بوهميا قراليتى ايجون داخل اولديغى كى پروسيا قرالى  
 براندوبورغ هر سىكى عنوانيله و انكلتره قرالى هانوره حكمدارى اولوق حسيه  
 داخل اولورلردى و بروقتنبرو ايماطورلوق محلول اولدوقه هپ اوستريا حكمدارى  
 انتخاب اولنكلايكندى ايماطورلوق بيانغى هابسبورغ خاندانه مخصوص كى اولمشيدى  
 و بروقتنبرو پروسيا قرالى اوستريا حكمدارينه رقيب اوله رق نفوذجه اكا تفوق  
 و تقدم داعيه سنه دوشمش ايسه ده سىكز الكتورلر ك بشى قاتوليك اولوب المانيا ده ايسه  
 پروستانلر پروسىيا مائل اولديغى كى قاتوليكلر دخى بالطبع اوستريا طرفنه مائل  
 اولدولردن المانيا ده اوستريا ك نفوذى غالب ايدى .

و المانيا مصالحك مذاكره سى ايجون ( ديت ) تعبير اولنور بر مجلس اولوب  
 ( راتسبون ) شهرنده منعقد اولوردى بو مجلسك اعضاسى اوچ صنف اولوب  
 برنجيسى سالف الذكر الكتورلر ايكنجيسى سائر پرنس و پستقپوسلر و اوچنجيسى  
 قرق طقوز شهرك مبعوثانى ايدى و پرنس و پستقپوسلردن بعضيلرى داخل حوزه  
 حكومتلرى اولان ممالك اهميته كوره متعدد رايلره مالك اولدولرى كى بعضيلر ك  
 راي دخى يارم اعتبار اولنوردى و بو مجلسك مذاكراتى بك قاريشق بر حالده

جریان ایدردی زیرا اوچ صنف بر ماده اوزرینه بشقه بشقه مذاکره ایدوب  
 رأی ویرردی و بعض حکمدارانک هم برنجی صنفده و همده ایکنجی صنفده  
 مرخصلری وارایدی مثلا اوستریا دولتنک بوهمیا قرالیتی ایچون الکتورلر صنفده  
 و اوستریا ارشی دوقه لئی ایچون پرنسار صنفده و پروسیاقرالتنک براندوبورغ ایچون  
 هر سکر صنفده و انساغ و بایروت ایچون پرنسار صنفده و کذلک باویه رانک برر  
 جهته ایکی صنفده دخی مرخصلری بولنورایدی و صنفلرک درجه لری بر اولیوب  
 هله صنف ثالث اعضاسنک رأیلری هیچ قیلندن اولدینی جهته قوتلو حکمداران  
 مرخصلرینک رأیلری بالطبع غلبه و تقدم ایدردی.

ایشته المانیانک مصالح عمومی سی بو ( دیت ) مجلسنده مذاکره اولنوب امور  
 خصوصیه سی دخی منقسم اولدینی دواتر مجلسنده رؤیت اولنوردی شویله که : بتون  
 المانیا اون دائره یه تقسیم اولنوب هر دائره نک الکیو حکمداری اول دائره نک  
 ناظری مقامنده اوله رق داخلی دائره سی اولان حکمدارانن جمع ایله امور  
 خصوصیه یی مذاکره ایلردی .

جلد سادسده بیان اولنان ( قامپو فورمیو ) و ( لونویل ) معاهده لری ایجابجه رین  
 نهرینک اسویجره حدودندن فلمنک حدودینه قدر ساحل یساری فرانسه یه الحاق  
 اولندیغندن بر چوق المانیایر نسلری ملک و ایرادلرندن محروم اولمغه بونلرک ضایعاتی  
 تضمین اولنمق اوزره المانیانک تقسیمنده بعض تبدلات اجرایی لازم کلش و بو  
 کیفیت مقوله تحتته کیرمش ایدی و برده اوستریا فامیلیاسندن اولان طوسقانه  
 و مودینه دوقه لری ایستیلاده کی تملکترلرندن محروم قالمش و پروسیاقرالتنک اقراسندن  
 اولان ( اورانترناسو ) خاندانی دخی هولانده اسنات هولدرلرکنندن یعنی فلمنک  
 جمهوریتی ریاستندن چیقارلمش اولدقلرندن بونلره دخی المانیاده برکوسترلمسی  
 مذکور عهدنامه لرده مندرج ایدی بو تبدلات ایسه المانیاده بونجه سنه لردنبرو  
 یرلشمش اولان اصول و اشکال حکوماتک متسلسلا تبدل و تغیرینی موجب و اجرایی  
 کوچ بر کیفیت اولدینی حالد اوستریا خاندانی خیلی وقتدنبرو المانیا امپراطوری  
 اولمغه نجه دولتی المانیاجه حائر اولدینی نفوذینک دوام و استقراریله سائره تقدم  
 و تفوق ایتمک چالیشوب پروسیا دولتی دخی بو تبدلات مناسبیله تزید نفوذ و اقتدار  
 ایدرک نفوذجه اوستریا دولتنه غلبه ایتمک املنده ایدی بوناپارته ایسه انلرک بومباینتندن  
 استفاده ایدرک المانیایی کندو پولتیقه سنه موافق اوله جق برقلبه افراغ ایلمک  
 استردی و نهایت مافی الضمیرینی اجرا ایلدی .

شویله که : روحانی حکمدارلقلرک بتون بتون الغاسنه و فقط مایانس یسقیپوسنک

عہدہ سنہ مقدار کافی ایرادی اولان بعض نمالکک ادارہ سی احالہ اولنہرق (دیت) مجلسی ریاستیلہ راتسبونہ اقامت ایتسنہ قرار ویرلدی وبادن وھس وورتمبرغ پرنسلیرنہ الکتورلک عنوانی اعطایلہ الکتورلک عددی طقوزہ ابلاغ ایدلدی و سربست شہرلک یالکز سکز ی ابقایلہ باقیسنک دیکر مالکک الخاق قرار لاشدیرلدی وبادن ایلہ وورتمبرغ دوقہلرینک روسیہ خاندانسنہ قرابتاری جہتلہ ایمراطور علیکساندرینک توسطی اوزرینہ اشبو تقسیم جدیددن آنلرہ حصہ افراز اولندیغی کبی اوستریایلہ آنک حمایہ سندنہ بولنان پرنسارک دخی حصہلری تفریق ایدلمشیدی . فقط فی الاصل سکزر الکتورک بشی قاتولیک ایکن بو کرہ الغا اولنان روحانی الکتورلر قاتولیک مذہبندہ اولدقلری حالده بونلرک اکثر ممالکی پروتستان پرنسارینک حصہ سنہ اصابت ایتکلہ بو کرہ طقو الکتورک الیسی پروتستان مذہبندہ بولندی دیت مجلسندہ دخی قاتولیکلر الی درت و پروتستانلر قرق اوچ رایہ مالکک ایکن روحانی حکمدارلرک الغامی و پروتستان پرنسارینک تزیادی حسیلہ رایجہ اکثریت پروتستانلرہ کچدی واکرچہ اعصار جدیدہ اوروپاجہ منافع مخصوصہ داعیہ سی افکار مذہبیہ غلبہ ایتکلہ بعضاً قاتولیک پرنسارینک اوستریاہ و پروتستان پرنسارینک پروسیاہ معارض اولدقلری وار ایسہدہ ینہ قاتولیک و پروتستان تعبیرلرینک المانیاجہ خیلی تأثیر ی اولوب بری اوستریانک و دیکری پروسیانک طرفدارلری دیمک ایدی . بئاء علیہ بو تقسیمدن پروسیالو زیادہ استفادہ ایتمش اولدیسہدہ اوستریانک المانیاجہ ینہ پروسیاہ مقاومت ایدہ بیلہ جک قدر نفوذی اولوب شو قدرکہ اولکی کبی ہر ایستدیکنی یاہمیہ جق ایدی .

پوناپارته بو اجرا آتی کندو ذہندنہ قرار لاشدیردقندن صکرہ پروسیاہ و باویہرا دولتلیغی ارضا ایلہ سندنہ مقالولہ بی امضا ایتدیگی کبی روسیہ ایمراطوری علیکساندریہ تبشیر کیفیت ایدرک آنکلہ دخی بر مقالولہ نامہ امضا ایتدکدن صکرہ بو تریباتک ایکی آی ظرفندہ تصدیق و تسویہ سی آسایش عمومی ایچون الزم اولدیغی صورت قطعہدہ اولہرق دیت مجلسنہ بیان اولتمشیدی .

بالادہ اشعار اولندیغی اوزرہ انکلترہ لونک مالطہ آطہ سفی تخلیہ دن استکفافہ و فرانسہ جمہوریہ آرہ سنک بوزلمسنہ باشلوجہ برسبب دخی اشبو المانیہ مسئلہ سی ایدی .

اوستریالو کندو علیہندنہ اولہرق میدانہ قونلمش اولان اشبو تریباتی خبر آلدیغی کبی پک زیادہ حد تنوب منعنہ اہتمام ایلہ حربہ قیام ایدہ جک درجہ یہ کش ایسہدہ پوناپارته لدی الايجاب سلاح قوتیلہ اوستریایی الزامہ حاضر بولمقلہ برابر اوستریالویہ حق سکوت اولق اوزرہ توسقانہ دوقہ سنہ دخی الکتور عنوانی اعطاسیلہ الکتورک

عددی او نه ابلاغ اولته رق و پر نسلر صنفده بعض تغییرات اجرا قلنه رق و صنف  
 ناله اولکیدن زیاده نفوذ و یریله رك اوستریا ك بعض مطالبه دخی مماشات اولتمش  
 و (۱۸۰۳) سنه میلادیه سی شباطه مصادف اولان (۱۲۱۷) سنه هجریه سی  
 اواخرنده دیت مجاسی طرفدن دخی المانیك بو وجهه تقسیم و اداره سی تصدیق  
 قلمش ایدی .

بناءً علیه اوستریا و خواه و ناخواه بو تقسیمه اظهار موافقت ایدی و بو وجهه  
 المانیاده غائب ایتدیکی نفوذك اعاده سندن مایوس اولمغه ایلروده المانیا ایمپراطورانی  
 محلول اولدوقده اجرا اولنه جق انتخابده اوستریا خاندانی محروم براغلق احتمالی  
 درپیش ایدرك اوستریا ایمپراطوری عنوانه رغبت ایتدی .

نمجه دولتلك اوستریا ایمپراطوری عنوانی آلمسنه بوجه مشروح پوناپارته طرفدن  
 در حال موافقت اولندیغی کبی دولت علیه طرفدن دخی بونده ترده برسبب اولدیغی  
 حالده مجرد پوناپارته نك ایمپراطور عنوانی آلمسندن نشئت ایتمش برمانده اولوب اولوقت  
 ایسه بوجه سابق دولت علیه هنوز پوناپارته نك ایمپراطورلق عنوانی رسماً  
 و صراحة تصدیق ایتماش اولدیغی جهتله دولت علیه اوستریا ایمپراطوری عنوانك  
 تصدیقده دخی تردد ایتمشیدی لکن آره سی چوق کچمکسزین باب عالی جانبندن  
 اوستریا دولتلك بو عنوان جدیدی تبریک اولمشدر .

اشبو اون طقوز سنه سنده روسیه ایله ایران دولتلری بینلرنده دخی محاربه جریان  
 ایدرك ایران شهزاده سی عساکر کلیه ایله تفلیس اوزرینه یوریمش ایسه ده روسیه نك  
 معلم و منتظم عسکرینه قارشو برشی پایه میه جتی درکار اولدیغندن و روسیه نك اول طرفدن  
 ایلرولسی دولت علیه یه بشقه جه بادیء فکر و اندیشه ایدو کندن بو اوانده دولت علیه  
 اول طرفه دخی حواله سمع ایله بو محاربه نك نتیجه سنه مد نظر انتظار ایتمکده ایدی .  
 وینه بو اوانده روسیه دولتی عهداً نائل اولدیغی صلاحیته بناءً و دینده برقونسولوس  
 نصب ایتك ایستدی حالبوکه پاسبان اوغلی عثمان پاشانك تغلیب حسیلله و دینده نفوذ  
 دولت کما یغنی جاری دکل ایدی قالدیکه بالاده بیان اولندیغی اوزره صربستانده  
 درکار اولان اختلالك دفعه چالشمق بازوند اوغلك و وظیفه ذمتی ایکن بو ائنده  
 صرب عصاتانك سرکرده سی اولان یورکی ایله سلم و مصافات اوزره اولدیغندن حالی  
 مشکوک ایدی . شو حالده روسیه نك و دینه قونسولوس نصبی دولت علیه نك مطالعه سنه  
 هیچ الویرمدیکندن بونك وقت آخره تغلیق و تاخیری روسیه لویه دوستانه افاده  
 اولوب ایجاب وقت و حاله نظراً روسیه لودخی بو ائنده دولت علیه بی بوماده دن طولایی  
 ازعاج ایتك ایستمدیکی جهتله بو باده اصرار ایتدی کله م فرانسه نك احوالنه .  
 بوجه مشروح پوناپارته ایمپراطورلغه انتخاب اولدوقده قامبا سرز و تالیران کبی محب

صادق اولان بعض ذوات ایله اقربا و برادرلرینسه بیوک رتبه و منصبلر توجیه ایله برابر اون سکنز جنزاله دخی مارشاللق رتبه سی و یردی و ایمپراطورلق مسندینک عظمت شانی ایچون هر نه که لازم ایسه تمامیه اجرا ایتدی و انکلتره یی استیلاضمننده مانش دکیزی کچمکه قرار و یره رک هر طرفده و علی الخصوص اردو مرکزی اتخاذ اولنان پولونی پیشکاهنده در دست اولان تدارکات سفریه به برقات دها کر میت و یردی و شهر تموزده پولونی به واروب برجسیم صحرا ده یوزبیک نفر دن مرکب بر اردونک رسم معاینه سنی اجرا ایلدی . پوناپارته بو وجهله عسکرینی معاینه ایدرکن انکلیز بکلکری سواحله یناشوب فرانسه دونماسی اوزرینه کله یاغدر مقده اولدینی حالده فرانسزلر اصلا فتور کوسترمیوب رسم کچیک اجرا سنه دوام ایدرلر دی .

انکلیز غزته لری پوناپارته نک بوتدارکاتی استهزا و فرانسه دونماسنک قیلردن آریله میه جغنی ادعا ایدرلر دی پوناپارته دخی انکلیزلرک تدارکات بریه لرینه کولردی زیرا انکلتره و کلاسنک جمع ایتدکری اوچیوزبیک عسا کر بریه نک نصفی کولکلی اوله رق معلم دکل ایدی و بونلر ایرلانده و انکلتره نک مواقع متعدده سنده طاغلق بولمغریله و فرانسه اردوسنک قنبی موقعه چیقہ جنی معلوم اولنماسیله یوزبیک نفر دن مرکب بر مکمل فرانسه اردوسی هر نر یه چیقسه قارشوسنه انجق سکسان بیک انکلیز عسکر ی چیقہ بیله جکنه و انکلیزلرک اهیتلو بر جنزالی بولمغرینه نظر آ پوناپارته بواردو ایله انکلتره اطه سنه ایاق باصه جق اولسه انکلیزلرک مقابله و مدافعه ایده میه جکلری درکار ایدی فقط انکلیزلر دخی انشا ایتش اولدق لری سکسان طقوز قطعه قباق و یوز اوتوز ایکی قطعه فرقتین و کیتلو سفائن صغیره ایله بونلر ده مستخدم اولان یوزبیک قدر عسا کر بحر یه لرینه کوه نیورلر دی و انکلتره سواحلانی بی نه یاه طویلر وضعیله محافظه تحته الوب و لیل و نه یار قره غوللر بکلندیروب لاجل المخابره هر طرفده برطاق اشارات مخصوصه وضعله فرانسزلرک حرکتلرینه منتظر ایدیلر .

لکن بوندن طولانی انکلتره دولتک دوچار اولدینی مصارف جسمیه نک افکار عامه یه زیاده تأثیری اولنله انکلتره و کلاسی استعفا یه مجبور اولدی و مشهور (پیت) باش وکالته کتورلدی واقعا (پیت) عالمک اک مشهور دیپلومانلر دن بری اولوب ناپلیون کبی برجهانگیر ایله اوغراشمغه قابل وشایان بر ذات ایدی و باش وکیل اولدینی کبی بارلامتودن مصارف خفیه نامیه ایکی مایون درت یوز بیک لیرا ایستدکده بوپاردی نه پابه جق دیو پوناپارته دخی تعجب ایتشیدی حالبوکه متعاقباً اوستریانک اطوار پولتیقه سنده علامات تردد و تغیر کورلمکه باشلادی و بالاده اشعار اولدینی اوزره روسیه ایمپراطوریه پوناپارته میانه سنده جریان ایتمکده اولان مخابره منتج برودت

وینونت اوله رق نہایت روسیہ مصلحتگذاری پساپورتی آلوب وپارسدن چیقوب کیتمکله دولتین میانہ لرنده مناسبات رسمیه منقطع اولدی .

وبوائتاده فرانسه امیرالردن لانوشک وفاقی بروجه مشروح پولونیدہ دردست اجرا اولان تدارکاتک براز تأخیرینی ایجاب ایتمشیدی .

ویوناپارته نك حرص وطمعنه نہایت اولمیوب بو اوانده شارلمان کبی غرب ایمراطوری اولوق سوداسنه دوشمش اولدیغندن ایمراطور لغنی تقدیس ایچون اقدمجه پاپانی پارسه دعوت ایتسی اوزرینه رومده بولنان دول اجنبیه مأمورانی وقرالیت طرفدارانی پاپانک بوتکلیفی قبول ایتماسی ایچون خفیاً القات و تشویقانه اقدام ایتشلر ایسه ده پاپا یوناپارته بی الهالمقده کندو مسندنجہ فوآد آتیه ملاحظہ ایلدیکندن نہایت دعوتنه اجابت ایدرک اشبو اون طقوز سنہ سی رجبہ مصادف اولان بیک سکز یوز دوت سنہ میلادیہ سی تشرین ثانی فرنکیسنک ایکینسده رومہ دن چیقوب پارسه کیتدی وکانون اولنک ایکینسده رسم تقدیسی اجرا ایتدی فقط یوناپارته شارلمان کبی صقالتی پاپانک الہ تسلیم ایتک نیتده اولدیغندن رسم تقدیسک اجراسی حالتده تاج ایمراطوری بی پاپانک الندن الوب کیمش وزوجہ سی ژوزفینہ مخصوص اولان تاجی دخی کندو کیدرمش اولدینی مرویدر وپاپا بوندن صکرہ خلی وقت پارسده مکث وتوقف ایله حکومت روحانیہ سنک تقوی ایچون یوناپارته خلی ابرامر ایلمش ایسه ده برشیئہ نائل اولمقسزین رومیہ عودت ایتشدر .

رسم تتوجک اجراسندن طولانی فرانسه ده پک چوق شهر آیین وشنلکار یاپدی لکن بونلر یوناپارته نك احوال پولتیقیہ ایله اشتغاله اصلا مانع اولمیوب دائمًا پولونی پیشکاهنده کی تدارکاتی اکیال ایله انکلتراه آطہ سنہ حکمک افکارندن خالی دکل ایدی .

ایتالیا جمهوریتک برنجی ریاستی یوناپارته عہده سنده اولوب حالبوکه فرانسرلرہ ایمراطور اولدقدن صکرہ برجمهورک رئیس بولمق او یہ میہ جغندن ایتالیا جمهوریتنک دخی قرالیتہ تحویلی امور طبیعیہ دن اولماسیله ایتالیا جمهوری رئیس نانسی ملچی پارسه کتورلمشیدی .

ملچی ایتالیانک برادره مستقلہ تحتده اولوبده فرانسه عساکرینک مصرفندن قورتلسمنی طلب ایلمش ایسه ده یوناپارته اصغایمیوب همان ایتالیا جمهوریتنک قرالیتہ تحویلی قرار لاشدیردق اشبو اون طقوز سنہ سی اوآخرندہ آلائی ایله ملت مجلسنه کیدوب بوقراری بیان واسکی لومباردیا قرالرینہ مخصوص ومیلان خزینہ سنده محفوظ اولوب تیمور تاج دیو معروف اولان ایتالیا قرالیتی تاجی کیمک اوزره میلانہ عزیمت ایدہ جکنی درمیان و فقط ایتالیا قرالیتی عنوانی قبول ایلسمی وقت

برشی اولوب مصالحهٔ عمومی حصولنده اولاد یا خود اقر باسندن برینه ترک  
ایده جگنی اعلان ایلدی .

لدی الحاجه فرانسه سفن حربیه سنک اسپانیا لیمانلرینه صغنه بیله جکلری درکار  
اولمسیله انکلتره دولتی اسپانیا لیمانلرینی تحت نظارتنه الموق کبی اسپانیاچه  
اجراسی ناقابل اولان تکالیفه ابتدار ایلدیکندن بشقه اسپانیاک کמוש یوکل  
درت قطعه فرقتینی مکسیقادن کلور ایکن اوزرلرینه انکلیز دونماسی هجوم ایله برینی  
غرق و اوچنی ضبط ایتملرله انکلیزلرک بویله بر حقمسز معامله سی عموماً اوروپانک  
انفعالی موجب اولدی و اسپانیا دولتی انکلتره یه اعلان حرب ایتمکله پوناپارته نک  
پولتیقه سی قوت بولدی انجق اولوقت اسپانیا تصرفنده بولنان مکسیقاده پک زکین  
کמוש معدنلری اولدینی جهته پیدرپی اسپانیا یه بویله کمیلرله کמוש کلکده ایکن  
اسپانیا قرال و وکلاسنک سوء اداره لرندن ناشی فی الاصل قوت و جسامت ایله معروف  
اولان اسپانیا دولتی اول ائنده پک زیاده ضعف حاله دوچار اولدینی جهته آنک  
اتفاقندن پوناپارته نک منفعتی جزئی ایدی مع مافیله پوناپارته اسپانیا یه مأمورلر ارسالیله  
اسپانیا دونماسی اولدجه ایشه یارایه جق برحاله قویدی .

وبونک اوزرینه ارتق ایکی سنه دنبرو انکلتره لو عایهنه اجرا ایتمکده اولدینی تشبثاتک  
حیز فعله ایصالیه انکلتره آطه سنه عبور ایتمک اسبابنه قویاً تشبث و بوبابده شو وجهله  
برحیله حربیه تصور و ترتیب ایلدیکه میلانده رسم تتوج اجراسی ائناسنده  
برچوق شهر آیین و شئلکلره اراءه روی اشتغال و انکلتره یه هجوم ایتمک افکارندن  
واز کچمش کبی کورنمکله انکلیزلری اغفال ایلدیکی ائنده فرانسه دونماسنک  
برمقداری دخی امریقا جانبنه کیدرک انکلیزلرک اول طرفده کی ممالکنه هجوم  
ایتملری اوزرینه انکلتره دونماسنک برچوغی بالطبع اول طرفه کتدیکی کبی فرانسه  
سفائی دفعهٔ عودت ایله پولونی صولرینه طوغری کلکلری ائنده مانش دکزنده کی  
انکلیز سفائن حربیه سی حد کفایه دن دون قالمش اوله جقلری جهته پوناپارته  
یلدیرم کبی ایتملادن حرکتله پولونی یه واروب قوهٔ موجوده سیله انکلتره نی باصمق  
ترتیبی ایدوب بووجهله دونما امیرالرینه دخی تعلیمات و یرمشیدی .

\* وقایع سنه ۱۲۲۰ \*

بو تصورات ایله پوناپارته غرهٔ محرمده بارسدن چیقوب بوجه مشروح تیمور تاجی  
کیمک اوزره میلان کتدی و اواخر صفرده رسم تتوجی اجرا ایتدی و بومناسبتله  
عظیم شئلکلر اجرا ایلدیکی ائنده و یرمش اولدینی تعلیمات موجبجه فرانسه  
دونماسنک برمقداری امریقا طرفه عزیمت ایتمش و بونک اوزرینه انکلتره سفائن  
حربیه سنک دخی برخیلیسی اول طرفه سکر دوب کیتمش اولمسیله پوناپارته نک

تدابیری دخواهنه موافق صورته کيرمکه باشلادی وایتالیا قرالیتک اداره سی پوناپارته نك اوکی اوغلی (یعنی زوجه سی ژوزفینک اولکی زوجی بو حارنه دن اولان اوغلی) اوژن دوبو حارنه یه ویرلدی و فرانسه ایلیجیسنک اول ائنده واقع اولان تشویقیه جنوه جمهوری ایتالیا قرالیتیه برلشمکه آرزو کوستردیکندن ایتالیا قرالیتیه الحاق ایدلدی .

حالبوکه پوناپارته میلانده اولوجهله ایتالیا قرالیتی تاجنی کیمک وانکلتره لویه قارشو کوسترش ایتمک ایله مشغول اولدینی ائنده کندو علیهنه دول اوروپا میانهلرنده بر معاهدهء اتفاقیه پایلمقده ایدی شو یله که : روسیه ایمپراطوری علیکساندری فرانسه ایله قطع مخابره ایتدیکنه نادم اولمش ایکن منظور ومعتمدی اولان اوستروغونوف ونووزلتروف وقزارتورسکی مثللو نورسیده وکلاسی روسیه دولتک محافظه ناموسی لازمدر پوناپارته نك بو اطوار متعظمانه سنه سرفرو ایتمک روسیه نك شان وشهرته نیه تقیصه ویرر دیوایمپراطوری اقطاع ایله مصالحه عمومیه حصولی ضمننده روسیه نك دیگر دولتری تشویق ایدرک برتوسط جبری اتفاق عقد ایلمک خصوصه قرار ویردرمشل ایدی .

بوندن غرضلری روسیه دولتک تحت ریاستنده اوله رق دول اوروپایی برلشدری ویده محارب دولتری وعلی اخصوص فرانسه یی استدکاری شرائط ایله صلیحه اجبار واوروپایی یکیدن بر موازنه یه ربط ایله اصلاحات عمومیه اجرا ایتمک وحقوق ملل قواعدینه توفیقاً کافه دوله نظام ویرمک کبی تجربه سزلکدن نشئت ایتمه برطاقم تصورات بیهوده دن عبارت اولدینی حالده علیکساندری دخی بو خویلارله قایلوب اجرائنه تشبث ایتمش وانکلتره دولتک رأینی تحصیل ایچون نووزلتروف لوندره یه عزیمت ایلدیکی کبی انکلتره ایله اسپانیانک اره سی اصلاح ایله برابر پورتکیز ایله اسپانیایی اتفاق ایتدیررک ایکسینی دخی روسیه یه هم افکار ایلمک ایچون اوستروغونوف دخی مادریده وارمق اوزره اول امرده انکلتره یه کیتمش ایدی .

بوایکی نوهوس دیپلوماتلر (پیت) کبی فن دیپلوماتیده ماهر و بر یارماغیله جهانی تحریکه قادر اولان بر فیلسوف یکانه ایله مکالمه یه کیرشدکارنده (پیت) بونلرک خیالات پولتیقیه لرینی کوش استهزا ایله اصفا ایدر وبقی التندن کولر ایدی فقط بوتشبلرینی کندو پولتیقه سنه آلت ایتمک اوزره ظاهراً انلره موافقت و نمائش کوسترر ایدی بزه بومکالماتک تفصیلی لازم دکل فقط مسئله شرقیه دایر جریان ایتمش اولان بر مکالمه یی بیان ایدلم .

روسیه نك کرجستان طرفنده کی روش پولتیقه سی وطونه سواحلنده کی عصات وسرکشان ایله اولان معامله سی انکلتره دولتک نظر دقتنی جلب ایتمکله دولتعلیه نك



استقلال و تمامیت مملکتی حقیقده و قدحجه روسیه به بر قطعه تقریر کوندر مشیدی اندن طولانی نووزلتروف بوکره اشتکا یولنده انکلترونک بومانیتسزلکنی (پیتک) یوزینه اوره رق دولتعلیه حقیقده روسیه نك سوء قصدی یوقدر قالدیکه روسیه دولتی استانبولی ضبط ایتسه بیله انکلتره لو حقیقده خیرلو اولور زیرا اول حوالی بر باربار مملکت النده بولنمقدن ایسه بر متمدن دولت یدینه کچدیکی حالده قره دکز تجارتی ترقی بولور دیو زعمنجه مسئله شرقیه حقیقده انکلترونک پولتیقه سنی بر طاقم واهی سوزلرله تحویل ایتمک داعیه سنده اولدیغی تحققی ایدیجک (پیت) بوکا جوابا انکلترونک دولتک بوندن بویله روسیه به اظهار امنیت ایده جکئی و روسیه نك استانبولی ضبط ایدوب ایتماسی کندوسنجه مساوی و غیر ماتزم بر کیفیت ایسه ده انکلترونک اهالیسی بو خصوصده بعض اوهامه ذاهب اولمش بولندقلردن انلرک افکارینه رعایته مجبور بولدیغی و بناء علیه بومسئله نك میدانه چیقارلمسندن احتراز لازم کلدیکئی افاده ایلمشدر .

الحاصل موسیو (پیت) روسیه مرخصلرینک خیالاتنه الدامق صورتی کوستره رک انلری الدادوب بوتشبات غافلانه لرینی کندو پولتیقه سنه آت اوله بیله جک بر یوله قومیشیدی بوضورتله پترسبورغده کی مطالعهلر لوندره مکمله سنده تغیر ایلمش اولدیغندن پترسبورغده کی انکلز ایلچیسى لورد قاور ایله روسیه خارجه ناظری بیننده دخی مکمله به دوام اوله یوردی .

مع هذا مصلحتک نتیجه پذیر اولسی پروسیا و اوستریا دولتلرینک تحصیل رضا و موافقتنه موقوف اولدیغی جهته روسیه طرفدن مأموریت مخصوصه ایله موسیو ووتزن ژیرود دخی برلینه کوندلرش ایدی پروسیانو ایسه مقدا فرانسزلر هانوره نی تجاوز ایتدکجه معاملات حربیه به قیام ایتماک اوزره روسیه دولتیله بر مقاوله نامه امضالمش ایدو کندن بونک خارجه چیقمامق نیتنده بولدیغی جهته موسیو ووتزن ژیرودک تکالیفه باشدن صاومه جوابلر اعطاسیله کرک روسیه به وکرک فرانسه به مخالفت کوستره رک برینه بند اولمازدی بو جهته ووتزن ژیرود پروسیالودن مایوس اوله رق ویا به کیدوب فرانسزلر ایتلایده بولندقلری حدودی تجاوز ایدرلو یا خود مصر کی ممالک دولت علیه دن برحکک استیلاسنه قالقیشورلر ایسه اوستریا دولتی دخی حربیه قیام ایده جکنه دأر اوستریا دولتیله بر خفی مقاوله نامه امضا ایتمش ایدی .

اوستریا دولتی بو مقاوله نامه یی امضا ایتمش ایکن تدارکات حربیه تشبث ایتیب و قوعاتک کلیشه منتظر اولدیغی حالده پوناپارته نك بروجه مشروح کندو کندوبی ایتالیا قرالی نصب ایلدیکی خبرینی آلجق روسیه نك تکالیفه موافقت وانکلترونک ایله اتفاق ایتمک اوزره توسطی قبول ایله همان تدارکات حربیه به ابتدار ایتدیکنندن

پترسبورغ شهری فرانسه علیهنه عقد اولنان اوچنجی اتفاقه مرکز اولوب پوناپارته بوندن کاملاً بی خبر ایسه ده اوستریا لونگ تدارکات حربیه قیام ایلمسی نظر دقتی جلب ایتمکله اول طرفه جاسوسلر کوندرمش و اوستریا دولتندن ایضاحات طلبنه قالمش ایدی حالبوکه ایالیاده خود بخود برطاقم اجرا آته تشبث ایستدیکنه قناعت ایتمیوب جنوه جمهورینی دخی کندی حکومتنه الحاق ایلدیکی حوادی پترسبورغه واصل اولیجق دفعه افکار دکشمکله همان صورت قطعیه ده فرانسه علیهنه بر معاهده اتفاق یایلوب اوستریا دولتی دخی بو اتفاقه داخل اولدی .

شویله که : المانیا و ایتالیا کاملاً فرانسلرک تسلطندن تخلیص قلمق و اوروپا فیابعد فرانسلرک تخطی و تجاوز ایده میه جکاری صورتده بر حال موازنه به قونلمق و دول متفقه نك بشیوز بیک عسکری اولوب ایکیوز الی بیکی اوستریا دولتی طرفندن و باقی ایکیوز الی بیکی روسیه و انکلتره و هانورا و اسوج و ناپولی دولتری طرفلرندن ترتیب اولنق و انکلتره دولتی دول مشار الیهم طرفلرندن ترتیب اولنه جق عسکرک هر یوز بیکی ایچون بر ملیون ایکیوز الی بیک لیرا اعانه نقدیه و یرمک و کیفیت پروسیا دولته تبلیغ اولندقده دائره اتفاقه داخل اولماز ایسه بغته حقنده معامله جبریه تشبث ایتمک اوزره غایت محرمانه اوله رق بر اتفاق معاهده سی عقد اولندی و فرانسه لویه حس ایستدیر مکسزین روسیه نك قره دکز سواحلنده کی عساکری خفیا سفینه لره وضع ایله استانبول بوغازندن امرار اوله رق قورقه جزیره سنده بر جسیم روسیه اردوسی جمع و ترتینه ایتدار قلمدی .

پروسیا دولتی بو اتفاقی حس ایتمکده نه تدبیر قوللانه غنی بیلمزدی و اسوج دولتنک تدارکات جسمیه به تشبث ایلدیکی پوناپارته استخبار ایتمکده بوکا مقابل هانوراده بولنان فرانسلر دوسنه اوتوز بیک نفر علاوه ایده جکنی پروسیا لویه تبلیغ ایلدیکندن پروسیا دولتی اسوج دولتندن ایضاحات طلب ایتمکده اسوج لونگ هر دولت کندی ملکنده ایستدیکنی اجرا ایدر کیمسه نك مداخله به صلاحیتی یوقدر دیو جف القلم جواب و یرمسی پروسیا لویه کران کلش ایسه ده ارقه سنده روسیه لو اولدیغندن سکوت ایله کچشدر مکه مجبور اولدی و کندو بیطر فلغندن بشقه بر شیئه تعهد ایده میه جکنی پوناپارته به بیلدیردی .

بونک اوزرینه ارقق ابواب محاربه نك کشاد اولنه جغنده پوناپارته نك شبهه سی قالمدی مع مافیله انکلتره جزیره سنی باصوبده مصالحه عمومیه ایبقا و تقریر ایده بیله جکنی قویاً امید ایلردی حالبوکه فرانسلر امیرالی غانطوم هو الرک مخالفتی جهته بورست لیانندن حقیقه مامش ایدی امریقا جانبیه کیدن فرانسه امیرالی و یلتوف دخی ابراز

اهلیت و جسارت ایده میوب بر چوق وقت تردد ایله امرار اوقات ایدرک اورویایه عودت وانکلین بکلکریله برکوچک محاربه ایتدکن صکره کلوب وقدکس لیمانه کیروب قپاتمش ایدی فرانسه امیرالارینک بویله تردد وحشیتلری وانکلین امیرالارینک وعلی الخصوص مشهور نلسونک جسارت وسرعت اوزره حرکتلری پوناپارتهنک ترتیبانه کلی خلل کتوردی اوستریا دولتی ایسه علناً تدارکات جسمیه قیام ایلمش اولدیغندن پوناپارته ناچار انکلتریه عبور ایتمک افکارندن فارغ اولهرق پولونی اردوسنی قالدیروب دول متفقیه مقاومت ایتمک اوزره بروطرفده تدارکات لازمهیه مجبور اولدی وایکی سنه دنبرو انکلتریه قارشو ترتیب واکالنه صرف مجهود ایلدیکی اردونی قالدیرومق عجزینه دلالت ایدر برکیفیت اولمسلیه کندویه غایت کران کلدیکندن اخذنار ایله تشفیء صدر ایچون دول متفقیه قارشو تعریف اولنماز صورتده برسرعت فوق العاده ایله تدارکات بریهیه تشبث ایلمشدر .

### \* بعض وقایع دولت علیه \*

غرّه محرم مارت رومینک یکر میسنه مصادف اولوب بوموسملرده ارتق استانبولده قاریاغماز ونادراً یاغسه دخی چابوجق اریمکله یرده پایدار اوله ماز ایکن بوسنه مارتک اون یدنجی کونی ایام زمهر یرده کورلمدک درجه ده برصوغوق اولوب عقبنده برخیلی قاریاغدی وهنوز اریوبوده یرلر قوریمه دن مارتک یکر می ایکنجی کیجه سی تکرار کلیتلو قاریاغوب هر طرف بمیاض اولدی .

هوارک کیدیشی بویله خلاف عاده اولدیغی کبی بوسنه افق پولتیقه ده رونما اولان بولوظلرک دخی فوق العاده باران بلا یاغدی ره جنی علائم سماء احوال حاضره دن استدلال اولنمقده ایدی .

بروجه مشروح اوروپاده ینه محاربه عمومیه اماراتی رونما اولدقده دولت علیه بوکره دخی بی طرف طور مق نیتده اولوب انحق بی طرفلغنی محافظه ایچون دخی تدارکلی بولمق لازم کلدیکندن بالطبع محاربهیه حاضر لانور کبی اسباب سفریه نکل اکلنه چالشیوردی واول وقت حکمنجه تدارکات صحیحه نظام جدید عسکرینک تکشیر یله اسلحه ومهمات لازمه سنک استکمالندن عبارت ایدی حالبوکه بوخصوصه زیاده اعتا اولندقجه یکیکچریلرک رقابت وعداوتی زیاده اولهرق ارکان دولتی علناً ذم وقدح ایدر لرایکن بالاده اشعار اولندیغی اوزره بومقوله ادبسلرک هیچ بریسی نه مجازات کورردی ونه ده مسئول اولوردی ونظام جدید ایشلرنده مستخدم اولان مأمورین مقبل ومقبول اولدیغندن دیگر رجال وکبارک برطاقی تعصبلرندن وبر طاقی دخی مأمورین مومی الیهمک اقبال وحیثیتلرنی چکه مدکلرندن ناشی نظام

جدید علیهنده بولنهرق یکچیرک غیرتی کودرلردی بوجهته روم ایلیده طاغلو اشقیاسنک فرجه بولمسندن طولانی استانبولده ممنون اولنر چوق ایدی .  
 بوآناده ایسه صرپستان اختلالی دوام ایتمکده بولنمش ورئیس عصات اولان قره پورکی صرپ غوسپودارلنی عنوانی اله رق ادعای استقلال ایه دولت علیه صرپولرک استقلالنی طایمده ترک سلاح ایتیمه جکنی اعلان ایلمش اولدیننی جهته صرپستان اوزرینه بر قوه کافیه سووقله عصانک استیصالی لازمه دن ایکن احوال حاضره بوکا مساعد دکل ایدی بناءً علیه صرپولر عصیانده اصرار ایه بوسنه نواحیسنه ایصال خسار وبرطر فدن دخی از قدیم رعایای دولت علیه دن اولان قره طاغولر حرکات تجاوزیه به اجتسار ایتمکده ایدیلر کرک صرپ و کرک قره طاغ رعایانی بووجهله عصیانه تحریک ایدن روسیه لو اولوب بولنردن بشقه آقدکز سواحل و جزائی رعایانی دخی افساددن خالی دکل ایدی .

روسیه لو دولت علیه نک خرسیتان تبعه سنی بووجهله تحریک و اضلال ایه روم ایلی جهتی اخلال ایتدیکنه قناعت ایتوب کر جستان جهتندن دخی دولت علیه بی ازعاج ایده جک معاملاتن خالی دکل ایدی شویله که : نفلیس خانلنی گاه دولت علیه و گاه دولت ایرانیه حمایه سنده بولنه کلشیکن مؤخرأ ارکلی خان روسیه حمایه سنه کیروب بروجه بالا ایکویوز اون درت تاریخنده وفات ایدیحک زیر تصرفده بولنن ممالکی روسیه لو ضبط ایه کندو ممالکنه الحاق ایتدیکنی اعلان ایتشیدی دولت علیه بونی تصدیق ایتک شویله طورسون روسیه لونک بووجهله کر جستانه ایاق باصمسندن متوحش اولدیسده اولوقت فرانسه علیهنه روسیه دولتیاه متفق بولنننی جهته روسیه طرفنی قیرمق دخی ایشنه الویر مدیکندن چاره سز بونی سکوت ایه کچسدر مشیدی .  
 روسیه لو ایسه بوزهرلی شربت حمایه بی کر جستان خانلردن منکرل خانه دخی ایچروب بتون کر جستانی پنجه تصرفه کچورمک داعیه سنده ایدی بناءً علیه اولوجهله قفلیس ولایتک ضبطدن ایکی سنه صکره حدود اوزرنده کی اهالیء اسلامیه کر جیلره تعرض ایتمکده اولوب کر جستان ایسه روسیه تصرفده اولدیفندن پنجه بومثلو تجاوزاتک منعی ایچون بر فرمان عالی استدعا ایتد کده باب عالیده معاهده موجبنجه قفلیس خانی حکومتده اولان محللره تعرض اولنماسنی امر بر فرمان عالی قلمه آلوب روسیه لونک غرض اصایسی ایسه ضمناً قفلیس مسئله سنی دولت علیه به تصدیق ایتدرمکن عبارت اولمسيله قفلیس خانی سوزینی قبول ایتهرک فرمانده کر جستانک روسیه تصرفده اولدیننی تصریح ایتدرمک ایتوب دولت علیه دخی بولنن احتراز ایتدیکندن باب عالی ایه روسیه سفارتی بیننده خیلجه بحث و مجادله ظهور ایلمشدر .

و بر اراق روسیه لو فاش نهریله کر جستان اردوسنه نقل اولمق اوزره اوچ کمی ذخیره کوندردکده فاش محافظی طرفندن مرورلینه ممانت اولمغله قریمه عودت ایلدکاردن روسیه ایلچیسی رئیس افندی ایله ملاقات ایدرک (کر جستان ممالکتی روسیه حمایه سنده اولوب اکر چه کر جستان سواحلنده اقلیه و باتو و باطومی نام اوچ عدد اسکله وار ایسه ده فاش نهرندن صغیر سفینه لرله ذخیره نقلنده سهولت اولدینی جهته بو نهرندن ایچر و ذخیره نقلنه ممانت اولنماسنی روسیه دولتی استدعا ایدر قالدیکه بو محللر کر جستان اولوب کر جی دخی روسیه رعایاسی اولدیغندن بو باده روسیه لونک هر درلو دعوایه صلاحیتی درکار ایسه ده الیوم دولت علیه ایله جاری و معتبر اولان اتفاق و اتحاد مقتضای اوزره بویله دعوی ایله تصدیع جائز اولیوب دوستانه التماس ایلر و بورالری کر جستان اولوب حالی اوزره اهالیسنه احاله سی لازمه دن اولمغله بو باده مناسبی وجهله دولت علیه یه مقابله اولنور یعنی اراضی ایسترایسه اراضی و یریلور و اراضی ایستمز ایسه اچقه و یریلور) دیچک رئیس افندی نه دیه جکنی شاشر مش و باطومدن انابه یه وارنجه بالجمله ساحلر دولت علیه نک اولوب بو حوالیده روسیه لونک قطعاً علاقه سی اولمدینی حالدیه صورت دوستانه ده کر جستانی سواحلیده برابر ضبطه قیام ایلمسی و کلای دولته حیرت و یرمش ایدی لکن اولوقت میانده درکار اولان اتفاقه بناءً قطعاً جواب رد دخی و یریه میوب بردفعه لوق اولمق اوزره فاش نهرندن قایلقرله ذخیره امرارینه دوستانه رخصت و یرلمسی اوزرینه روسیه لور فاش طرفه کلی عسکر و مهمات دوکوب انقره قلعه سنی ضبط ایله کمحال بوغازینه استحکام و یردکر نده بو مثللو سلم و اتفاقه مغایر حالاتدن فراغت اولنسی روسیه لورله دفعات ایله افاده اولندیسه ده مفید اولیوب لیت و لعل ایله امرار اوقات و طوتدقلمی مسلک غضبکاریده اصرار و ثبات ایدر اولدیله و بوکا دائر مجالس مشورتده بک چوق بخشلر جریان ایدوب حتی بر مجلسده صدور عظامدن عصمت بک نه یاهلم ایکی سنکپاره ایچون اعلان حریمی ایده لم دیکله بعض ذواتک هدف طعن و تشنیعی اولمشیدی لکن بو مثللو مسئله لرده صوک جواب طوب آغزندن چیقمق لازم کلوب بوکا ایسه وقت و حال مساعد اولمدیغندن نهایت روسیه لور بورالرده یرلشوب استقرار بولدیله .

وینه بو اوانده و هابیلر دخی بر طرفدن حریمینی تضییق ایتمکده اولدقلمی حالدیه بر طرفدن دخی جانب عرافه تعرض ایلمکده ایدیلر بغداد والیسی علی پاشا ایسه داخل ایاتنده ظهوره کلان غائله ایله مشغول اولوب و هابیلرک برو طرفه تعرضلمی حوادثی آندجه تدافیی حرکتیه مسارعت ایدرک بوندن بشقه و هابیلر حقنده بر باشلو حرکتی کورلزدی شام طرفدن دخی برشی یایسه میه جنی معلوم ایدی حریمینک

محافظه سی امرنده معاونت صحیحه اجراسی جانب مصر دن اوله بیلوب مصر ایسه  
اختلالدن اختلاله دوشمکده ایدی .

وزیرده تفصیل اولنه جنی وجهله طربزون والیسی وجانیک محصلی بولنان بطلان پاشا  
زاده طیار محمود پاشانک بوئانده مشهود اولان حرکات سرکشانه سی برنوع عصیان  
شکلنه کیرمکده ایدی حالبوکه محرک اون دردنده جبار زاده سلیمان بکک اوغلی  
محمد جلال بکه رتبه وزارت ویرلمشیدی طیار پاشانک ایسه جبار زاده خاندانیه بیننده  
بیوک پدرندن موروث کین وعداوت اولدیغندن جلال پاشانک وزارتی آنک برمرتبه  
دها موجب انفعال ورعوتی اولمشدر .

صدر اعظم ضیا یوسف پاشا سیاق و سباق احواله نظر ایله بو حالاتک وخامت انجام  
وماآئی ودولت سلیمیه نك برورطیه اوغرامق احتمالی دوربین حدس ورویت  
ایله حس ورویت ایدوب ضعف شیخوخت واسقام بدینه سنی بهانه ایدرک تقاعد  
طریقیه شغل عظیم صدارتدن استعفا ایتدیکنه بناء بکلر بکی قربنده واقع  
ساحلخانه سنده آسوده نشین اقامت اولمق اوزره رجاسنه مساعده بیوریه رق  
اشبویک ایکیوز بکرمی سنه سی محرک یکر می دردنجی کونی عزل ایله یرینه قبودان  
دریا حافظ اسماعیل پاشا صدر اعظم وانک یرینه دخی بوستانجی باشی از میرلی حاجی  
محمد اغا قبودان دریا اولدی .

بوکونلرده ایسه یکچیری طاقی نظام جدید حقنده اولان عداوتلرینی برمرتبه دها  
اعلان و اظهار ایدر اولدیله افکار جدیدیه خدمت ایدنلردن وعصرک اک متفذلردن  
بری اولان ایراد جدید دفترداری حاجی ابراهیم افندی ربیع الاولک اون اوچنجی  
صالی کونی عزل ایله یرینه دفتردار بولنان فیض الله افندی ایراد جدید دفترداری  
وانک یرینه چالی افندی دفتردار نصب اولندی و ابراهیم افندینک عزلی یکچیریلر  
ایله انلرک غیرتی کوندن افکار عتیقه اصحابنه بونوع رضیه قییلندن اولدی وینه بو قییلدن  
اوله رق جمادی الاولانک سکننجی بازار کونی رئیس الکتاب محمود افندی عزل ایله  
یرینه وقعه نویس واصف افندی رئیس و آمدی خلفاسندن وخواجکان دیوان هایبوندن  
پرتو افندی وقعه نویس اولمشدر حالبوکه دولت وملتک سلامتی ایچون نظام جدید  
عسکرینک تکثیرینه بوقدر امکار صرف اولنوب طور رایکن خلا فکیرانک بویه آزر  
آزر یوز بولملری دولتک احوال آتیه سی ایچون علامت خیر دکل ایدی .

وکن اون طقوز سنه سی موسم حنده امیر الحاجر هزار محن و مشقتله مکه مکرمه یه  
واره بیلمشدر ایسه ده وهابی قورقوسیه اطرافدن حجاج کله میوب مکه اهالیسی دخی  
عرفاته حقیقه مامش اولدقلرندن وقفه محلی پک ایسسر برحالده اولوب حتی عرفه کونی

درد دکاندن بشقه صایحی بولنامش و امیرالحاج شامی ابراهیم پاشا و هابیلره نفر باشنه اوزغروش مروریه اعطاسیله عودت ایده بیلمش اولدینی خبرلری اقدمجه در سعادتیه واصل اوله رق ارکان دولتی داغدار ایلمشیدی .

بوخلالده بغداد والیسی علی پاشا کرستان سفریله مشغول اوله رق جزیره العرب طرفه احاله نظر ایده جک وقتی یوغیدی شویله که : شاورزاده مقتول محمد بکک اوغلی جاسم بک باشنده کی العید عشرتیه شامیه دن الجزیره طرفه عبور ایله ینه خابورده تمکن ایلمش اولدیغندن اوزرلرینه بابان متصرفی عبدالرحمن پاشانی مأمور ایدوب کوی سنجانی متصرفی محمد پاشانی دخی انک معینته تعیین ایتمشیدی عبدالرحمن پاشا ایله محمد پاشا اره سنده ایسه او جاغجه خصومت شدیدله اوله رق یکدیگری اعدام ایچون فرصت کوز تمکده ایدیلر بو کره کرکوک جوارنده برلشدکارنده عبدالرحمن پاشا فرصت دوشوروب محمد پاشانی اعدام ایله وقوع حالی باعریضه علی پاشایه اعلام ایتشدر عبدالرحمن پاشانک بو وضعیتدن علی پاشا دلکیر اولمش ایسه ده مقتضای حال ووقته کوره کندوسنی تو بیخ ایله برابر استالت یولنده تحریرات کوندرمش ایدی لکن عبدالرحمن پاشا مطمئن اوله میوب بیگانه و سرکشانه صورتده طاوراندیغندن علی پاشا غضبناک اوله رق کندوسنی عزل ایله بابان سنجانی مأمورا عمادیه طرفنده بولنان احمد پاشا زاده خالد بکک و کوی و حریر سنجاقلرینی ابراهیم پاشا زاده سلیمان بکک احاله ایدرک عبدالرحمن پاشا اوزرینه متهی حرکت اولمشدر بونک اوزرینه خالد پاشا بابان متصرفلغنی ضبط ایتک اوزره اول طرفه حرکت ایتمشیدی و عبدالرحمن پاشانک عسکر یله انهای راهده محاربه ایدرک منهزم اولمش ایسه ده مؤخرأ علی پاشا بغداد اردوسیه یتشوب و عبدالرحمن پاشانی دربندده بوزوب قاچر مش و خالد پاشا ایله سلیمان پاشانی محل مأموریتلرینه ارسال ایله کندوسنی دخی بغداده عودت ایتش ایدی لکن عبدالرحمن پاشا ایران شاهندن استمداد ایدوب اودخی عبد الرحمن پاشانی تصحبه قیام ایتدیکندن بغداد ایله طهران بیننده بوند لظولانی مخبرات جریان ایتکک باشلادیغنی ائشاده و هابیلرک حدود عراقه تجاوزلری خبرالمنغله علی پاشا اردوسیه حله طرفه کیتمشدر لکن جزیره العرب طرفه تجاوزی حرکتیه مقتدر اوله میوب مجرد مدافعه و محافظه حدود و انحاء ایچون برمدت اول طرفلرده کشت و کنار ایتدکن صکره ینه بغداده کمشدر .

الحاصل دولتک امید وار اولدینی وجهله و هابیلرک قهر و تدمیرینه بغدادجه امکان اولیوب شام دخی بو حالده ایدی مصرده ایسه یکیدن یکی به اختلالر ظهور ایتککده ایدی . شویله که : جلد سابعده بیان اولدینی اوزره محمد علی صعید ایچنده کوله منلر ایله محاربه ایتککده ایکن انک تحکم و تغلبنی کسر ایچون مصر والیسی خورشید پاشاشام طرفندن بر مقدار دلیل عسکری جلب ایتمشیدی بو عسکر کچن بیک اکیوز اون

طقوز سنه سی ذی الحجه سنه مصره واصل اولوب بونلر ایچون اشبو ایکیبوز یکر می سنه سی محرمنده شهریه التیوز کیسه تخصیص اولندی محمد علی بو عسکرک مصره ورودینی استماع ایله نه مطالعه یه منی جلب اولمش اولدقلرینی ادراک وتفظن ایدیجک همان حسن پاشا ایله برابرخلال محرمدده مصره عزیمت ایلدیکی خورشیدپاشانک معلومی اولدقده علما ومشایخی جمعه عقد دیوان ایدرک محمد علی ایله حسن پاشا بلارخصت جانب قبلدن رجعت ایشملر نیتلری شرفته اولمغله یا عدا ایله محاربه یه عودت ایدرلر ویاخود مملکتلرینه کیدرلر وایسترایسه انلره مصرک خارچنده ولایت ومنصب ویریرم طرف پادشاهیدن مأذون ومرخصم دیوب همان دلیل عسکر یله او جاقلینک طرا وجزیه ناحیه لرینه طوپ وجبخانه ایله چیقملری ایچون امر ویردی .

محمد علی ایله حسن پاشا عسکر لر یله طرا ناحیه سنه کلدرکنده دلیلار دفعه بونلرک اوزرینه هجومه جسارت ایده میوب اظهار تردد ایتدکری صرده محمد علی انلره خبر کوندروب بزعلوفه مزنی استمک ایچون کلدرک کمنه ایله برآلشمز ویریشمز یوقدر دیو اغفال ایتسی اوزرینه انلر دخی بربرینه او یله ایسه بونلره ایشمیکنر دیوب دیرالطین ایله قصر عینیده کی لرلرینه چکلدیلر محمد عاینک عسکری دخی مصره کیرمکه باشلادی خورشید پاشا کتخداسی دلیلاره کلوب تویسیخ ایده جک اولدقده بوآدملر علوفه استیورلر انلره تعرضه نه حقمنز وار بزده علوفه استدی کمز ده بویله می پایه جقسکز دیو رد جواب ایلدیلر .

بونک اوزرینه محمد علی مصره کوروب اوزبیکه ده کی خانه سنده ساکن اولدی خورشید پاشا مشایخی و او جاقلوبی محمد علی ایله اختلاطدن منع ایتمکله مصرده کفتکو چوغالدی محمد علی دخی ارتق خورشید پاشانک مصردن دفع وطر دی اسبابنه تشبث ایلدی بو ائنده الفی محمد بکک عسکری دخی جزیه قدر کلدی ودرون مصرده محمد عاینک عسکری اولوب دلیلار دخی دیرالطین وقصر عینی طرفلرنده اهالی به فوق العاده ظلم وتعدی ایتمکده اولدقلرندن غره صفرده انلردن اشتکاضمننده اسکی مصر اهالیسی جامع ازهره کلوب فریاده باشلادیلر ومصرده اختلال اماره لر ی پیدا اولدی بعده دلیلار قلیوب ناحیه سنه کیدوب اوراده فقرا یه ایتدکری قنالق قالمدی .

اقدمجه محمد عاینک جده وایلکی منشوری کلش اولدینی حالدده بووقوعات اوزرینه خورشید پاشا تأخیر وتوقیف ایتمکده ایکن محمد علی دخی بوکا کسب وقوف ایلمش ایدوکنه منی صفرک اونجی جمعه کونی خورشید پاشا قلعه دن شهره اینوب برخانه یه ورودنده حسن پاشا وعبدی بک موجود اولدینی حالدده محمد علی اورایه کلرک خلعت کیدکن صکره آتته سوار اولدینی ائنده عسکری طائفه سی هجوم ایله علوفه



استدکرنده ايشته پاشا بوراده در ديو جرکت وز قاقده خلقه التون و کش نثار ايدرك قوناغنه عزيمت ایده طورسون برو طرفده عسکر علوفه طلبيه خورشيد پاشانک اطرافنی الوب قلعه يه صالحویرمدیلر اهالی دخی اندن دلکیر اولغله بویله عسکری یدنده تضییق کورمسندن ممنون اولمشلر ایدی فقط حسن پاشا عسکری یوشادوب اخشامدن صکره بر تقریبه خورشید پاشانی قلعه يه چیقارمشدر .

فرداسی خورشید پاشا جامع ازهره خبر کوندره رک اعلان امان ایله دکانلرک آچامسنی امر ایلدی خلق ایسه اماندن نه اماره وار پاشا فقرای صویق استر مملکت هر ج مرچ اولدی دیدیلر وز قاقدرده علما و عوام و اطفال بو ظالم والینک الندن فریاد دیو چاغرشیدیلر و صفرک اون اوچنجه بازار ایرتسی کونی بر جوق خلق محکمه يه طوبیلانوب اورادن محمد علینک یانه کیتدیلر و جم غنیر اتفاق ایدوب بو مملکنده خورشید پاشانک والیلکینی استمیورلر ارتق عزلی واجب اولدی دیدیلر محمد علی یا کیمی استر سکز دیدکده سنی استرز زیرا سنده خیر و عدالت کوره یوروز دیملری اوزرینه ابتدا صورت امتناع کوستروب بعده راضی اولدی و کورک و قفتان کتوریلوب مشایخ طرفندن محمد علی به اکسا ایدلدی بونلر ایسه هپ محمد علینک ترتیب ایندیکی پوتلیقه مناوره لری ایدی .

کیفیت خورشید پاشایه تبلیغ اولندقدنه بنی پادشاه نصب ایتشدر فلاحارک امر یله معزول اولم و امر پادشاهی کلدکجه قلعه دن انیم دیو جواب ویردی بو ائناده النی محمد بک دخی منصوره يه کلوب بعض مشایخ ایله مخبره يه باشلامشیدی صفرک اون طقوزنده جمله اتفاقیه قلعه نک محاصره سنه قرار ویرلدی و محمد علی پاشانک عسکری بتون اهالی ایله بر لکده اوله رق قلعه نک اطرافنده مترس الوب حصر و تضییقه استدار ایدیلر بو ائناده محمد علی دلیل عسکرینی قلیوبدن جبله النی محمد بک اوزرینه سوق ایلدی خورشید پاشا بر مدت بویله محصور طور دقدن صکره شهر اوزرینه کله و خنبره آتمغه باشلادی فرانسزلرک زماننده اهالی بوکا الشمش اولدقلرندن هیچ تلاش ایتدیلر محمد علی پاشا ایسه بوکا اصلا اهمیت ویرمیوب و مقابله قیدنده اولیوب هان محاصره يه دوام ایلدی برآی قدر حل بومنوال اوزره جاری اولدقدن صکره محمد علی پاشا وزیر قپوسنه قارشو بریوک طوپ تعیه ایدرک قلعه يی دوکمه که بر طرفدن دخی جبل اوزرنده کی طوپلری ایشلمکه باشلادی .

بووانده دولت علیه جه اک مهم مسائلدن بری حر مینک محافظه سی قضیه سی اولوب بوایسه جانب مصر دن اجرا اولنه جق بر کیفیت اولغله متدبجه مصر ده رونما اولان صورت آسایشدن طولانی فوق العاده ممنون اولمشیکن بویله یکیدن فتنه ظهوری

ارکان دولته داغ درون اولدی . و هر نصل اولور ایسه اولسون بو فتنه بر طرف  
ایدیلوبده حر مینک محافظه می یولی بولمق فرائض حالیه دن اولدیغنه منی ربیع الاولک  
یکر منجی کونندن اعتباراً مصر ایالتنک سابقاً جده والیسی محمد علی پاشایه توجیهی  
مشعر و خورشید پاشانک دیکر مأموریته تعیینی مصمم اولمغله معززا اسکندر یه جانبه  
چیقارلمسنی امر بر قطعه فرمان عالی اصدار و قوجی باشی صالح اغا و صدر اعظم  
ساحدار ی ایله جانب مصره تسیار قلندی ربیع الآخرک اون برنجی بازار اترتسی  
کونی مومی الیهما مصره واصل اولدقده علما و او جاقلو اوز بکیه ده اجتماع ایله  
بوفرمان عالی قرائت اولندی بونک اوزرینه طرفین طوب و خبره انداختندن فارغ  
اولدیسده کیفیت صالح اغا طرفدن باند کره خورشید پاشایه بیان اولدقده قلعه دن  
چیقمق استمیوب بن خطوط هایون ایله والی اولدم او ایله بر ورقه ایله عزل اولم  
هله صالح اغا ایله ساحدار صدراعظمی کلسون شفاهاً بر لاقری ایدیم دیمکله و آنلرک  
قلعه یه چیقملرینه دخی برو طرفدن رخصت ویرلمکله امر محاصره یه حالی  
اوزره قالدی .

ربیع الآخرک یکرمی برنده قودان پاشا دونمای هایون ایله اسکندر یه یه کلوب  
خورشید پاشایه هان قلعه دن ایمنی ایچون خبر کوندرمشیکن خورشید پاشا عسکرک  
بنده گذشته علوفه دن طولانی پک چوق مطلوبی وار بنده ایسه آنچه یوق دیو بهانه  
ایدرک یه قلعه دن چیقمیوب کوله منلر ایچنده بولنسان بعض طرفدارانی ایله مخبره  
ایدرک محمد علی پاشایه غلبه ایده بیلمنک چاره سنی جستجو ایلردی و بوجه تله امرای  
مصریه چیزه یه قدر تخطی ایتمشرایدی محمد علی پاشا ایسه عساکر کافیه سوقیله آنلری  
دفع ایتمکله برابر بلافتور محاصره یه دوام ایلدیکندن ناچار خورشید پاشاجادی اولانک  
اونجی کونی قلعه دن چیقهرق بولاقدن سفینه یه سوار اولوب کیتمشدر .

بو وجهله محمد علی پاشا مطمح نظری اولان مصر والیلکنه نائل اولدیسده خار جده  
امرای مصریه رهنورد وادی عصیان اولوب بو ائساده جوار مصره قدر تخطی  
و تجاوز ایدرک کندویه راحت ویرمیورلردی و بونلر جری و چابکسوار بر طائفه  
اولدقلرندن سبکبار جه اوزر لرینه وارلمق قابل اولمیوب قوه کافیه ایله وارلدقده دخی  
در حال کیرو چکیلیویرمک و عسکر عودت ایتمدیکی کچی یه ایلروله مک عادتلری  
اولدیغندن محمد علی پاشا بر تقریبله بونلری اولامق اوزره بر غریب طوزاق  
قوردی شویله که : کندو ترتیب و تعلیمی اوزره ارنانود سر کرده لرندن بعضیلری  
امرای مصریه ایله مخبره ایدرک آنلره یاردم ایتمک اوزره تعهد ایدوب حتی بعضیلری  
بومقابله ده شو قدر آنچه اعطاسنی دخی مقاوله یه ادخال ایدرک امرای ایناندرمشلر

و محمد علی پاشا فم خلیجه چیققدده کوله منار علی الغفله کلوب مصره کیرمک و بلا مانع  
 مملکتی و برج و بارولری ضبط ایتمک و فلان سر کرده فلان یرده و فلان سر کرده  
 فلان یرده اعانهیه حاضر اولمق اوزره قرار و یرمشلر و اهل بلدن محمد علی به غرضی  
 اولنلر دخی الدانوب بو مخا برهیه داخل اولمشلر ایدی جمادی الاولانک یکر میسنده  
 وفاء نیل موسمی حلول ایتمش اولدینی دلال لرایله اعلان اولندی ناس علی جری العاده  
 تفرجه حاضر لاندی پاشا دخی جسر ناحیه سنده چادر قورلمسنی امر ایستی اول  
 کون ایسه کوله منارک برولره عزیمتی و بر فرقه سنک طاع اردندن حرکتی شایع  
 اولوب حتی سویشه کیده جک یو جیلر حقیقه مدی و کویلیر آمدوشدن منقطع اولدی  
 محمد علی پاشا بونلردن تمامیه تعافل ایدردی . سده کیجه لیلن کسنه نک خبری  
 اولمق سزین کسر ایله خلیجه ده صو جریان ایلمشیدی علی الصباح امرای مصریه نواحی  
 حسینیه واصل و دروازه بی قیروب ایچرویه داخل اوله رق باب فتوحه کلدکارنده  
 بکجیلردن کسنه بولندینی جهته بعضیلری آنلری کوروب طانیق لری کی قبولری  
 آچدیلر برخیلی امرا و کشاف ایله کوله من عساکری کیردیلر . اول جهته پاشانک  
 عسکرندن کسنه اولدینی جهته بتون بتون مطمئن اوله رق آلا ی ایله واحمال  
 و انفالاری ایله داخل و اشرفیه واصل اولدقلرنده خلق بونلری کوروب کمال  
 حیرت ایله سلامدیلر . آنلر دخی آرتق بلافتور عاطفه الخراطینه کلدکارنده ایکی  
 فرقه اولدیلر . بر فرقه سی که حسن بک ممالکسندن عثمان بک ایله دیگر بعض امرا  
 و برخیلی کاشفلردن عبارت ایدی بونلرک بر طاقی جامع ازهره و بر طاقی کعبین  
 ناحیه سنه طوغری کیتمشیدی فرقه آخری باب زویله دن چیقوب درب احمر طرفه  
 واردقلرنده اوزر لرینه اوراده بولنان عسکر طرفدن تنک آلمغه باشلانیق زویله یه  
 رجعت ایتمک لری کی اولطر فده بولنان مغاره به آتش ایدرک ایچلرنده برنجیه سی اوریلوب  
 دو شمله و هر طرفدن عسکر یوروش ایتمکله همان اورادن فرار ایده جک اولدیلر ایسه ده  
 هر طرفدن یاغمور کی قورشون یاغمغه باشلا دیغندن غوریه طرفه رجعت ایدوب اوراده  
 دخی قپوی قبالوبولدقلرندن نحاسینه کلدکارنده هر طرفدن احاطه اولندقلرینی کورملریله  
 اکثری آنلرندن اینوب و جامع برقوقه کوروب تحصن ایتمدیلر . و بعضلری عسکری  
 یارده رق باب نصر طرفه هجوم ایتمدیلر ایسه ده اول طرفه دخی قپو مسدود  
 اولدیغندن آنلر دخی آنلرینی ترک ایله یسان اوله رق سور عطفون صیجرا یوب  
 قاچدیلر . عثمان بک طاقی کیفیتدن خبردار اولدقلرنده در حال باب برقیه دن  
 صاویشوب کیتدیلر جامع برقوقه تحصن ایدنلر براز طیانه جق اولدیلر ایسه ده  
 بر طرفدن امداد کلک احتمالی اولدیغندن چاره سز تسلیم اولدیلر . ارناولر آنلری

بر کوزلجه صوبوب یانلرنده کی التونلر ایله اسلحه والبسه لرینی اغتنام ایتدکندنصرکه  
الی قدرینک باشلرینی کسوب باقیسنی یالین ایاق باشلری آچیق اولدقلری حالده  
دو کورک و سوزکلیه رک اوز بکیه یه کتوردیلر . ایچلرنده مشاهیر امرادن بش  
انتی کشتی و برخیلی کشف و ارایدی اکثری اعدام ایله رؤس مقطوعه لر ی صویلوب  
دریلرینک ایچنه صمان طولدیر یله رق اولوقتک اصولنجه علامت فوز و ظفر  
اولق اوزره استانبوله کوندرلدی .

کوله من او جاغنک ایجادندن بووقته قدر کوله منلر بویه حقارت و ردالته اوغرامامشدر  
و کوله منلرک نهایت انقراضی محمد علی یننده اولمغله بووقه اکا بر مقدمه اولمشیدی  
بووقعه ده خارجه ده بولنلر یاخود بروجه مشروح قاقچوب قورتیلانلرینه صعید  
ایچنه کیدوب اموال میره بی کوندرمک اوزره جرحادن یوقاروسنک کندولره  
ویرلسنی استرلردی . النی محمد بک دخی جیزه ده اقامت ایلمک و فیوم و بی  
سویف ایله ایکی یوز قدر قریه کندویه تخصیص ایلمسک اوزره عرض مطاوعت  
ایدیوردی بولنلر ایسه هپ صنیعه و فرصت کوزتمک اوزره وقت قرانمغه وسیله ایدی .  
بو ائنده معهود دلیل عسکری نواحی بی غارت و یغما ایدرک شرق طرفنه کچوب  
خانکیه کلر یله اوزر لرینه محمد علی پاشا عسکر سوقیه انلری شام طرفنه طرد ایتمشدر .  
جمادی الآخره ده محمد علی پاشانک قواله دن ایکی اوغلی کلدی و کچوک اوغلی طوسون  
بکی قلعه ده اقامه ایدوب کندوسی اوز بکیه ده کی قوناغنده ساکن اولدی .

الحاصل محمد علی پاشا اعداسنه غلبه ایدرک استقلال اوزره تنظیم مصالح مصر یه یه  
استدار ایلدی دولتک مطمح نظری دخی مصری حال اغتشاش و اختلالاندن  
قورتاروبده اورادن حجازه امداد ایلمک خصوصی اولدیغندن آنک بووجهله  
مظفریتدن طولانی باب عالی طرفدن اظهار ممنونیت قلممشیدی و فی الواقع بونک  
اوزرینه آرتق محمد علی پاشا حجازه امداد ایده بیله جک بر حال اقتدار حاصل ایتمشیدی  
وسر کر دهلرندن طاهر بک عهده سنه میر میرانلق توجیه ایله حجاز سفرینه نامزد قلمش  
ایدی . بناءً علیه طاهر پاشا جانب حجازه کیتمک اوزره حاضر لانه قدسه ایدی فقط  
طاهر پاشا واسطه رجیده خارج مصره چیقوب اردو قوردیغنی ائنده و هابیلرک  
مدینه منوره نی ضبط ایلدکاری حوادی مصره ورود ایله جمله یه شاشقناق ویرمشدر  
وارتق بویه تدابیر جزیه کار کر تأثیر اولیوب حجاز ایچون باشلو بر تدبیر اتخا دی  
لازم کلدیکی اکلا شلمشدر و مدینه منوره یولی بتون بتون مسدود اولمغله بوسنه  
کسوه و محمل مصر چاره سز سویش طریقیله بحر آ کوندرلمشدر .

اول او انده و هابیلر جده اوزرینه هجوم ایدوب اگر چه برخیلی تلفات ویردکن

صکره مایوسا عودت ایتشلر ایسه ده هر طرفدن مکه مکرمه بی حصر و تضییق ایتیلرله  
 اهالیسی غلای اسعار ایله دلفکار اولوب بوسبیدن ناشی بعض شرفا دخی وهابیلره  
 متابعت ایدیلر ونهایت مصالحه طریقله وهابیلر حج ایتک اوزره خلال ذی القعدة  
 مکه مکرمه داخل اولمشلردر وبوسنه شام والیسی وامیر الحاج اولان عظم زاده  
 عبدالله پاشا قافله حج ایله جانب حجازه کیدر کن حرب قیله سی اوکنه چیقوب یولنی  
 کسمکله ولدی المحاربه خیلی خسارات وقوعه ککله نهایت عبدالله پاشا بر مقدار اچقه  
 وروب مصالحه ایدرک مرور ایده بیامشلفقط حج مسامین اشوری مرتبه مشقت  
 وسفالت چکمشلردر نه حال ایسه موسم حجه مکه مکرمه وهابیلر وروب وها بیلر  
 دخی بر لکده حج ایتشلردر عبدالله پاشا یاننده بیک بشیوز وجده والیسی عبدی  
 پاشا یاننده یدی یوز الی کزیده ترک آتلوسی اولوب شریف غالبک عسکر یله  
 بر لشکر نده ایجه بر قوت حاصل اولمش ایسه ده وهابیلره نسبتله اقل قلیل ایدیلر  
 فقط وهابیلر ایچنه چیچک خسته لکی دوشه رک بوسنه پک چوغنی تلف اولمشدر .

\* وقایع متنوعه \*

دولت عایه بو اوانده بر طرفدن بروجه مشروح حر مینک کیدخوار جدن محافظه سی  
 ایله مشغول ایکن بر طرفدن دخی روم ایلی احوالنک اصلاحی چاره سنی ارا مقدمه  
 اولوب حتی صر پلره بعض امتیازات اعطاسیله عصیانک یانشدیرلمسنه موافقت ایتمشیکن  
 رئیس عصات اولان قره یورکی روسیدلونک تحریک واغواسی ایله بتون بتون استقلال  
 داعیه سنه دوشمکله جانب باب عالیدن صر پستانک کاملاً استقلالی طانندجه ترک  
 سلاح ایتیمه بکنی اعلان ایتمکده ایدی .

ایشته بوسره ده بالاده اشعار اولندیغی اوزره طر بزون والیسی طیار محمود پاشانک  
 وادیء استقلال واستبدادده رونما اولان طور وسلوکی بر نوع عصیان رنگنی آلمغه  
 اولطرفجه دخی باشلوجه بر تدبیر اولنق لازم کلدیکندن چند ماهدنبرو متقاعد  
 بکلر بکنده کی ساحلخانه سنده گوشه کزین استراحت وانزوا اولان صدر سابق  
 ضیا یوسف پاشانک توغلی اعاده ایله طیار پاشا اوزرینه مأمور وار سال بیورلدی  
 تدارکات کافیله ایله واروب ایفای مأموریتله لدی الابداری طیار پاشا تاب آور مقاومت  
 اوله مدیغندن صخوم محانظی کاشن بکه دخیل دوشوب اورادن دخی روسیه دیارینه  
 عبور ایله تخلیص جان ایلمشدر .

طیار پاشانک سرکشکنه سبب اصلی بو ایدی که قاضی پاشا ایله جبار زاده نظام جدید  
 اصولنی تلقی بالقبول ایدرک انا طولی قطعه سننده اجرا سنه سبب مستقل اولدقلری  
 جهته طرف شاهانه دن مظهر توجه والتفات اولمشلر ایدی جانیکی علی پاشا خاندانیله

جبار زاده خاندانی بیننده منافسه قدیمه اولدیغندن طیار پاشا جبار زاده نك خلافتده بولمغنی التزام ایله بوبابده رضای شاهانه یه توفیق حرکت ایتدیکنه بناء نظر شهر یاریدن دوشدی وجبار زاده لرك ملتفت ومنظور اولمسی کندوسنه زیاده تأثیر ایتدیکنندن بتون بتون دولته مخالفت یولنی طوتدی مع مافیه شهزاده سلطان مصطفی طرفدارانی دایما نظام جدیده مخالف اولنلری قوللایوب تحریک ایده کلدکارندن طیار پاشای دخی اولوجهله مخالفته تشویق ایلدکاری مرویدر .

فائق افندی مجموعه سنده دیرکه ( محمد کرای خانک برادری شاهینکرای سلطان سردار رجب پاشایه کوندردیکی کاغذنده جمله مز ترک وطن ایدر ایسک قریم دباری دشمن انه دوشر کفه وسائر قلعه لركر نصل اولور بومعنا لر هپ ظهور ایده جکدر دیومحرر ایدوکی نعیما تاریخنده مسطوردر یوز شوقدر سنه صکره ینه شاهینکرای نام برخان ظهور ایله انک یوزندن قریم الکاسی دست اعدایه گرفتار اوله رق اسکی شاهینکرایک یازدیغی کبی اولمشدر غریبدرکه طیور اسمنده برکسنه ظهور ایدرک پادشاه اولوب عالمه حکم ایده جک دیو بعض کهنه وجفار ومنجم مقوله سی استخرجات کاذبه لرنندن اولمق اوزره منتشر اولوب بوایکی شاهینکرای وقریب العهده طیار پاشا اول پادشاه بنم دیواوچی دخی وقت وقت خروچ تدارکنده اولدقلمی مشهوردر ملعونلر بیلمزلردی که بودولت علیه عثمانیه نك هر عصرده دشمنلری مقهور اوله ککشدراوچی دخی بلالرنی بولدیلر تفصیلی صداع ویرر طیار پاشا ملعونی پرورده دولت ایکن بوخیانته عزم ایتیمی استغراب اولنور نسنه در ) انتهى .

براصاسز منجم سوزینه باق که تقدیر فناقلره سبب اولمشدر علی الخصوص شاهینکرای خان بویله داعیه استقلاله دوشه رک آنا واجدادینک قدیم یوردی اولان اقلیم قریمک روسیه لوانه کچمنه سبب اولدی ونهایت کندو دخی بلاسنی بولدی . طیار پاشا کبی پرورده نعم دولت اولان برذاتک بومثللو خولیلاره ذهانی هیچ یاقیشق الماز برشیدر فقط طیار پاشا صخومه کلدکده طرف پادشاهیدن عفو ی خصوصه شفاعت اولمق رجاسیله اورادن بغداد والیسی علی پاشایه یازمش اولدیغی برقطعه نیاز نامه سنده کندویه اسناد اولنان تهمتدن تبرئه ذمت ایدرک بو کیفیت مجرد اعداسنک افتراسی اولدیغنی بیان واوزرینه کلان عسکره مقابله ایده بیلورکن اعداسنک عزویاتی تصدیق ایتمش اولمامق ایچون مقابله یه قیام ایتیب بغداده عزیمت والتجایتمک استه مش ایسه ده کندوسنجه کر دستاندن کچمک قابل اوله مدیغندن چاره سز صخومه ککش اولدیغنی درمیان ایلمشدر .

حقیقت حالده نتی نایدی صورت قطعیه ده برحکم ویریه مز ایسه ده بعض اوراق

اوزرنده یازمش اولدینی فقرات شتی منظور فقیر اولمشدر بونلرک اکثری بیک  
ایکیوز بکر می تاریخیه مورخ اوله رق روسیه طرفه کچدکن صکره یازدینی شیلر  
اولدینی سیاق کلانمدن اکلاشیلور بونلرده طریق عامیه اصحابی جاهل بد طینتر  
دیو یاد ووالده کتخداسی یوسف اغا وحاجی ابراهیم افندی وکوسه کتخدا کبی  
نظام جدید طرفداری اولان متفذان رجال دولت حقیقه مرتکب وپلید وشقی  
کبی الفاظ غلیظه ایراد ووالده سلطانی تعیرات شنیعه ایله قدح وطعن وضیا پاشایه پک  
فنا عزویات ایله لعن ایستدیکنه قناعت ایتمیوب دور سلطان عبد الحمید خانیده عوام  
ناس وبلکه خواص سلطان سلیم دیو جان ویروب جلوسنه دعا ایدر لر دی وقتا که  
جلوسی مقدر اولدیه کویا جهان تازه حیات بولمق امید ی وار ایکن فسبحان الله  
خاقت آدمدن برو مثلی مشهود اولمان بدع ومظالم نمایان وممالک محروسه خراب  
وویران اولدقن بشقه هر خصوصه فرنکه اتباع ایلیوب شریعت محمدیه فراموش  
اولمقی درجه لرینه واردی والسه فرنکیه تلبس اولتمغه باشلادی دیو سلطان سلیمک  
مساویسندن بحث ایله برطاق تعیرات بی ادبانه استعمال ایلدیکی کورلمشدر ایشته  
اولوجهله سلطان المسلمین حقیقه استعمالنه اجتناسر ایلدیکی بی ادبانه سوزلریله  
کندوسنک سوء نیت وقبح طویتنه استدلال اوله یلور .

بو اوآنده دولت علیه بی بر طرفدن پوناپارته دائره اتفاقه آلمق ایستیوب بر طرفدن  
دخی انکلتره وروسیه دولتری فرانسه لودن بتون بتون تبرید وتقریق ایله تجدید  
معاهده اتفاقه سعی ایدیه ورلر دی واکرچه ایکیوز اون اوچ تاریخنده روسیه  
ایله یاسیلان اتفاق معاهده سنده طرفین متعاهدین حرب وصالحه دائرنیتلرینی بررینه  
کشف و بیان ایتملی موعود ایکن روسیه لو دولت علیه خبر ویرمکمزین ایکیوز  
اون بش تاریخنده پارسه مرخص ارسالیله عقد مصالحه ایلمش اولدینی جهته امنیتی  
سلب وبالاده بیان اولدینی اوزره بر طرفدن روم ایلی رعایاسنی عصیان تشویق  
وبر طرفدن دخی کرجستانده یرلشه رک اناطولی حدودنی تضییق ایله دولت علیه نک  
نفرت وانفعالی جلب ایتمشیدی لکن دولت علیه انکلتره اتفاقدن آیرلمق استمیوب  
انک خاطری ایچون روسیه لویه دخی مدارایه مجبور ایدی علی الخصوص بویه فرانسه  
علیهنه اوروپاچه بر بیوک اتفاق یابلمشیکن جمهور دوله مخالفت ایدیه میوردی . حالبوکه  
دولت علیه ایله روسیه لو بیننده منعقد اولان معاهده اتفاق مدت بواننده ختامه قریب  
اولدقندن روسیه لو تجدیدنی استدعا وحقی دولت علیه نک خرسنجان تبعه سی فیا بعد  
روسیه حمایه سنده بولمقی کبی بعض شرائط مکر وهه نک سند جدید درجنی ادعا ایتمکده  
ایدی . لکن بودرجه لره قدر دولت علیه تحمل ایدیه میهرک بتون بتون فرانسه

پولتيقه سنه باغلانه جفتي جزم ايتديكندن اومثلو شرائط تحمل فرسادن فراغت ايله همان معاهده اتفاق تجديدي خصوصنده اصرار ايتسي اوزرينه صدور عظامدن عصمت بك افندي ايله برلكده اوله رق رئيس الكتاب واصف افندي روسيه ايلجيسيله مكله يه مأمور اولوب حكمي طقوز سنه تمتد و طرفين يكديكرك ممالكنه ضامن و كفيل اولمق شرطليني و شرائط سائرهي حاوي و اون بش ماده يي محتوي روسيه دولتيه برقطعه اتفاق تدافعي عهدنامه سي تنظيم و لااقل اوچ آي ظرفنده تصديق اولنمق اوزره اشوبوبيك ايكيوز يكرمي سنه سي جمادي الآخرة سنك يكرمي طقوزنده مخصصر طرفندن تمهير و تختم اولنمشدر .

ينه اول تاريخده اون ماده يي حاوي ديكر براتفاقنامه خفي دخي تنظيم قيلنمشدر . بو عهدنامه لك صورتلري زيرده (۱) رقميله ايراد اولنور .

سلطان سليمك روسيه طرفندن وسوسه سي زياده اولديني جهته فرانسه طرفنه متايل ايسه ده بوندن چند سنه مقدم پوناپارته نك ياننده غزته اوقور ايكن اميرال نلسونك اسمي كچمكله پوناپارته ( بو اسم بنم تاريخمده بريوك ير طوئدي بني عكبي المقدن منع ايتدي ديمكدر كه استانبول طرفيقيه پارسه كلكدن منع ايلدي لكن بن پارس طرفيقيه استانبوله كیده بيلورم ) ديمش ايدوكني روسيه لولر سلطان سليمه اسماع و بوجيته عقد مصالحه يه ارضا واقناع ايلمش اولدقاري مرويدر بوش بوغازلق فنا شيدر علي الخصوص بيوك ذاتلره كوره هر سوزي طاردوبده سويلمك الزمدر زيرا بك كچوك رسوز و قتيه بريوك مضرت كتوره بيلور .

رجبك يكرمي ايكنجي چهارشنبه كوني سلطان سليم خان حضر تلرينك والده مكرمه لري مهر شاه سلطان فوت اولغله عظيم آلاي ايله طوپقو سراي هايونندن النوب ادرنه قپوسندن اخراج ايله حضرت خالد رضي الله عنه جوارنده بنا ايتمش اولديني تره سنه دفن اولدي .

ماه شعبانك طقوزنجي كيجه سي استانبولده برعظيم فورتنه ظهور ايله درياده كي كميلري بربرينه قاتوب قارشديره رق بقچه قپوسيله يالي كوشكي اره سنه القا ايتدي و اول كيجه جب علي قپوسي خارجنده يانغين ظهور ايلمش ايسه ده فورتنه كچوب قار ياغمه باشلامش اولديغندن سهوات ايله باصديرلمشدر . و ينه شعبانك اوننجي جمعه ايرتسي كوني ساعت ايكي يي اون دقيقه كچرك حركت ارض وقوع بولمشدر . سواحل مصر يه ده دخي اوخر شعبانده بويله برعظيم فورتنه ظهور ايله اسكندريه لياننده اون برقطعه بيوك قاليون و برالشامدن دمياطه كيش اولان قرق سكر قطعه تجار سفينه لري غرق و تلف اولمشدر .



استانبول خاقی بومثللو مصائبك ظهورینی اوتهدنبرو بیوکاردن برینك شامت قدمنه عزو ایده گلشیر ایکن بواننده یکمچری غیر تکشیری هرندرلو فنالق وقوعه کاسه هب نظام جدیدك شامته حمل ایدرلردی .

شهر شعبانك یکر می برنجی چهارشنبه کونی اخشام اوستی رئیس العلما مشهور ولی افندی زاده محمد امین افندی عازم بزم بقا اولدی غایت متمول ودائما طالقو قتلر ایله اکنمکه مائل بر ذات اولوب بو یولده غریب حکمانی لری السنه ناسده دائر و بعض احوالی بین الناس مثل سائر در طرف سلطنته مخلص داعیاندن اولدینی مرویدر . کله لم آروپا وقایعنه .

### \* وقایع اوروپا \*

بالاده بیان اولدینی وجهه اوستریا دولتتك تدارکات حربیه به تشبث ایلمسندن ناشی پوناپارته طرفدن ایضاحات ایستلمسی اوزرینه اول امرده اوستریالو صورت انکارده بولنش ایسه ده شهر تموز ایچنده آچقندن آغغه نیتی بیان وفرانسه لونك جنوهی ضبط ایلدیکندن بحثله تمامیت ملکنگ تهلکه ده بولندیغنه بناء انکلتره ایله روسیه بیننده فرانسه علیهنه عقد اولنان اتفاهه داخل اولدینی برقطعه بیان نامه ایله اعلان ایلمشیدی . بناء عایه طرفین تدارکات عظیمه به ابتدار ایلدی .

دول متفقه درت طرفدن هجوم ترتیب ایتمشیر ایدی . شویله که : شمالدن یعنی بحر بالطق جهتدن اسوج و روسیه وانکلز عسکرلرندن مرکب براردو فلمنگ وهانوره اوزرینه وطونه طرفدن روسیه ایله اوستریانك برر بیوک اردوسی فرانسه نك رین نهری حدودینه ولومباردیا طرفدن براوستریا اردوسی وایتالیانك جهت جنوبندن روسیه وانکلز و ناپولی عساکری هجوم ایده جک ایدی .

پوناپارته ایسه باشلوجه هجومك طونه طرفدن واقع اوله جغنی کشف ایله او طرفه اهمیت ویره دك اول جهته سوق ایده جکی اردویه بالذات قومانده ایتمکه قرار ویردی . و اوستریالولرک باویاره نی استیلا ایله مشهور اولم قلعه سنی اله کچورمک تلاشه سنه دوشه رك استعجال ایده جکارینی و روسیه لولرک براز کچیکه جکارینی جفر عقلی ایله استخراج ایدرک روسیه اردوسی یتشمزدن اول اوستریالولری پریشان ایتدکن صکره روسیه لولری قارشوله مق تداییرینی ذهننده قرارلشدیردی بناء عایه ایتالیا اردوسی مارشال ماسینایه حواله ایدی . مارشال برنادوت دخی براردو ایله هانورده و جنرال مارمون دیگر براردو ایله فلمنگکه بولندقلرندن ناپلیون بونلرله برلشه رك اوستریا اردوسنك ارقه سنی کسمک و اولم قلعه سنی اللرندن الوب ویانه اوزرینه یوریمک و بوضورتله ایتالیاده بولنان اوستریا اردوسی دخی رجعته مجبور

ايدرك معيتمده بولنه جق يوز الى بيك نفره ماسينانك الى بيك نفرى علاوه ايدوبده ايكيوز بيك شجيع عسكردن مركب بر جسيم اردو ايله اوستريا وروسيه اردولرني پریشان ايتمك املنده ايدى . ويكرمى بيك عسكركله جنرال سنسبرى ناپولى اوزرينه تعيين ايدرك ناپولى دولتى طرفندن بركونه خصومت اماره لرى مشاهده اولنديكى كې ناپولينك استيلا اولمىنى امر ايتمشيدى . ناپولى قرالى محرمانه دول متفقه ايله هم افكار اولدينى حالده جنرال سنسبرك كوز حبسندن قورتملق ايچون انكليز وروسيه عساكرى ناپولى الكاسنه چيقارماق شرطيله برى طرفلق معاهده سى عقد اولتمق خصوصى ناپليونه منافقانه تكليف اوودخى قبول ايتكله خلال ايلولده بو وجهله برعه دنامه تنظيم ايله پارسده امضا اولدى .

پروسيا دولتى بو ائنده صحيحاً بى طرف قلمنه قرار ويردى وپوناپارته نك كندوسنه ويرمك استديكى هانوره بى زير دست تصرفنه كچورمكه جسارت ايدمه مديسه ده اتفاهه داخل اولمق اوزره روسيه طرفدن اولان تكليف وتهديددن خوف ايتديكى ارأه ايچون دخى سكسان بيك نفر دن مركب بر اردو تشكيل ايتمشيدى .

باوياره دولتلك يكرمى بشيك عسكردن مركب بر اردوسى اولوب بر طرفدن اوستريا و بر طرفدن فرانسه دولتلرى بوئى كندى طرفلرينه جلبه چالشبوب نهايت باوياره هر سكي پوناپارته طرفه ميل ايله بغمته مقر حكومتى ترك ايدرك اردوسيله برابر فرانسه حدودينه چكيليويردى . اولوقت اوستريانك الك مشهور مارشالى اولان آر شيدوق شارل بو ائنده سكسان بيك نفر دن مركب بر اردو ايله ايتلايه اديج نهري سواحلنده ايكن جنرال ماق دخى سكسان بيك نفر دن مركب ديكر بر اوستريا اردوسيله باوياره بيه كيروب اولم قلعه سى جوارنده فرانسرله مترقب ومنتظر ايدى .

بو ائنده اسوج وروسيه دولتلرى پومرانيا قطعه سنده واقع استراسونت شهري جوارنده بر اردو جمع ايتكمده اولدقلى حالده لهستانده دخى جنرال ميكلسون قوماندسيله ديكر بر روسيه اردوسى ترتيب اولتمده وروسيه ايمپراطورى علكساندرى خاصه اردوسيله ويستول نهري ساحلنده بولنه رق پروسيا قرالندن ملاقات استمكده ايدى جنرال كوستيوف دخى ديكر بر روسيه اردوسيله غاليجيا وموراويا ايلتلرينه كي رمشيدى . الحاصل روسيه ايمپراطورى المانيا اوزرينه يوز الى بيك عسكركه سوق ايدوب انجق بونك ترتيبى وپروسيا قراللك مكاله سى ايله شهر ايلولى كچوردى .

ناپليون ايسه بو باده اولان تدابير و تضيقاتى غايت مكثوم طوته رق نه يابه جغه دائر



و آغر و مترددانه حرکتلری حسبیه پوناپارته نك انكلتره نی استیلا حقهنده اولان  
 تصوراتی کیرو قالمش اولدیغندن قادکس لیمانه قیامش اولان فرانسر امیرالی ویلنوفه  
 پوناپارته نك امریه بجزیه نظارتندن طوقوناقلی توینخامه لر یازلمشیدی . ویلنوف  
 بوندن پك زیاده متأثر اوله رق حقهنده حاصل اولان سوء ظنی رفع ایتمک  
 و کندوسنك قورقاق اولدیغنی کوسترمک اوزره بردن بره تبدیل افکار و تحویل  
 اطوار ایدرک اولوقته قدر متخذی اولان مسلك حزم و احتیاطی ترك ایدوب  
 انکلیزلره غلبه دن مأیوس اولدیغنی حالده همان هرچه باد اباد بولنده انکلیز دونمسیله  
 دوکشمک اوزره تدارکات لازمه یه تشبث ایتمشیدی . تشرین اول فر نکلنک اوائلنه  
 قدر دونمسانک نقصانلری اجمال ایتدکدنصکره تحت قومانده سنده بولنان فرانسر  
 و اسپانیول سفائنی ایکی قوله تقسیم ایتدی بری یکریمی بر قباقدن مرکب اولوب  
 بونی محاربه قولی تسمیه ایدرک کندو قومانده سنه آلدی و دیگرى اون ایکی قباقدن  
 عبارت اولوب آنی دخی احتیاط قولی تسمیه ایدرک قومانده سنی اسپانیا امیرالی  
 غرابونیه حواله ایتدی و معینده کی ضابطانن مرکب تشکیل ایلدیکی دیوانده  
 دونمالرینک حال حاضرینه نظرا انکلیزلره مقاومت ممکن اولمه جغه قرار ویرلمش  
 اولدیغنی و ویلنوف کندودخی بوافکارده بولدیغنی حالده روزکارک ایلاک مساعدنه سنده  
 ملجی اولان قادکس لیمانندن چیقه جنی بیایله واقع حالی پارسه بیلدیردی .  
 امیرال نلسون ایسه اسپانیول جاسوسلری معرفتیه ویلنوفک قادکس لیمانندن  
 چیقه جغه واقف اوله رق اول صولرده کشت و کذار ایله آنک خروجنه مد نظر  
 انتظار ایتمکده ایدی و نلسونک معینده کی دونما اوتوز اوچ قباقدن عبارت اوله رق  
 مقدارجه فرانسه و اسپانیا دونمالرینک مجموعنه مساوی اولدیغنی حالده برچوق  
 و قتلردنبرو دکزلرده طولاشمش و اقدمجه امریه یه قدر کیدوب کش اولسی  
 حسبیه خیایجه یورغون ایدی . انجق انکلیزلر فن حرب بحریده ماهر اولدقلری کبی  
 امیرال نلسون دخی اول دورک الك جسور واک فطین امیرالی ایدی بناء علیه  
 امیرال نلسون کندو قوتندن اولقدر امین ایدی که بلا تخاشی بودونمادن بش قطعه  
 قباقی افراز ایله جبلتره یه کوندرمش و کندو دونمسی ویلنوفک دونمساندن عددجه  
 دها آز قالمش ایکن بالتردد ویلنوفک خروجنه منتظر ایدی . تشرین اول افرنجینک  
 یکر میسند و ویلنوف کافه دونمسیله قادکس لیمانندن چیقوب دکزه آچلدی و اخشام  
 اوستی انکلیز دونمسانه تصادف ایله جنکه حاضر اولدی . فرداسی علی الصبح  
 امیرال نلسون دونمسانی ایکی فیلو اوزرینه ترتیب ایله فرانسر و اسپانیا دونمالری  
 اوزرینه هجوم ایتمکله برقانلو محاربه یه باشلاندى و اخشامه قدر امتداد بولدی و نهایت

فرانسزلرله اسپانیولر بتون بتون مغلوب و منکسر اولدی ویدی سکز بیک نفر لری تلف و ضایع اولدقدن بشقه اوتوز اوچ قطعه قباقلردن یالکز اون بش قطعه سی قادکس لیمانه قاجوب قورتیلهرق باقی اون سکز قطعه سی انکلیزلر یدینه کچدی و میرال ویلنوف دخی انکلیزلرک انه اسیر دوشدی . انکلیزلرک یالکز اوچ بیک نفر قدر تلفاتی اولوب فقط امیرال نلسون دخی یاره لشمسیدی و بو عظیم مظفریتک لذتی کندوسنه اکر چه یاره سنک آجیسی حس ایتدیر میوردی لکن جرحی مهلاک اولدیغندن سفینه حیاتی دخی منکسر اولوق اوزره اولدیغنی کوره رک ختام مصلحتده همان لندر انداخت اولمنسی وصیت ایتد کدن صکره فوت اولمشدر . جانشینی اولان امیرال آنک بو وصیتی یرینه کتورمدی حالبوکه اخشام اوستی بر عظیم فورتنه ظهور ایه ایکی کون تمت اولدیغندن انکلیزلر پک چوق زحمتلره دوچار اولدیلر و اخذ و ضبط ایتمش اولدقلری اون سکز قطعه قباقدن اون درت قطعه سی اللرندن قورتیلوب یالکز درت قطعه سی جبلتره به کوندره بیادیلر .

بو محاربه قادکس لیمانی جوارنده واقع ترافالغار بورننه قریب صولرده اولدیغندن ترافالغار محاربه سی دیو مشهور اولدی . بو مظفریت عظیمه نکلتره جه ایراث ایلدیکی مسروریتی نلسونک وفاتی خبری امحا ایلدی . ویلنوفک کندو اللرینه اسیر دوشمسی دخی انکلیزلره تسلیت کافیه دکل ایدی . زیرا نلسونک یرینی طوته جق امیرال بولوق ناقابل ایدی .

یونانارته قوه بجزیه سنک بو وجهله انکسارندن خبردار اولیجق ارتق بجزا برشی یاهمه جغنی اکلایوب آند نصکره امور بجزیه دن صرف نظر ایلمشدر .

طونه سواحلندن ورود ایدن خبرلر فرانسه اهلینک مسروریتی موجب اولدیغنی کبی ترافالغار محاربه سی دخی عظیم کدر و تأسفلرینی جالب اولدی . مع مافیه ناپلیونک فطانت و کفایتی موجب اطمینان اولوب اولم قلعه سی مظفریتند نصکره اوستریا و روسیه اردولرینک کلیاً پریشان اوله جقلری قویاً امید اولنمده ایدی . فرانسه ده افکار عمومیه نکل بویله متسلی و مطمئن اولمسندنه ناپلیونجه عظیم محسنات وار ایدی . زیرا محاربه مناسبته اعتبار مالی قیرلمش و دولتک امور مالیه سنده مشکلات کثیره ظهوره کیش اولدیغنی حالده احوال آتیه جه اهلینک بو وجهله حسن ظن و اعتقادی مشکلات مالیه نکل حل و تسویه سنه بادی اولمده ایدی . بناء علیه هر کس طونه طرفدن کله جک مظفریت خبرلرینه قولوق طوتمده ایدی .

بوئانده ایسه پروسیا و دخی دول متفقه به التحاق ایتک اوزره ایدی زیرا پروسیا دولتک انسیاخ سنجانغی فرانسه و اوستریا ممالکی آره سنه کیرمش اولدیغندن مقدا

فرانسه‌لو ایله اوستریا بیننده ظهور ایدن محاربه‌ده بوسنجا ق دروننده جنک ایتمک اوزره طرفینک بورادن مرورینه پروسیا دولتی طرفندن رخصت ویرلمشیدی . بو محاربه‌ده اصلا پروسیا دولتندن استیدان اولنقمسزین فرانسه مارشالی برنادوت قومانداسنده اولان فرانسه عساکری بوسنجا قدن مرور ایدیورمش اولمی پروسیالونک انفعالنه بادی اولوب پروسیا قرالی ایسه طرفیندن وقوعه اولان اتفاق تکلیفلرندن برینی قبول ایتمک یا خود بی طرف طور مق شقارینک قنغیسنی اختیار کندوسنجه اولی اوله جغنی مطالعه ایله متردد ایکن فرانسرلرک بوحر کتندن حدتله نرک کرک فرانسه ایلیچیسلیه و کرک ناپلیون پوناپارته طرفندن ککش اولان مأمور مخصوص ایله قطع معامله ایتمکله برابر فرانسرلرک غلبه سی اوزرینه دوچار تردد اولمشیدی . روسیه ایمپراطوری علیکساندری ایسه بووقعه نی فرصت اتخاذا ایدرک پروسیا قرالنک ترددینی ازاله ایله دائره اتفاقه ادخال ایلمک اوزره هان بالذات پروسیا قرالی نزدیکینه واروب ملاقات ایله ایتمکی الحاح و ابراملرک نتیجه سنده مصالحنه حصولی ضمننده پروسیا دولتنتک فرانسه یه ایده جکی تکلیفلر برآیه قدر قبول اولماز ایسه روسیه و اوستریا وانکلتره دولتلرینک اتفاقه دخول ایله جنکه قیام ایده جکی تعهدینی متضمن تشرین ثانیء فر نکیتمک اوچنده بره مقاوله نامه امضاله مشیدی . مذکور تکلیفلر ایتالیا نک بر مقدارینک اوستریا یه ترکی وفلمنک واسویجره ایله ناپولینک استقلاللی کبی فرانسه نک اصلا قبول ایده میه جکی شیردن عبارت اولمسلیه حربی منتج اوله جغنی درکار ایدی . بو اتفاقک مذاکره سی پک مکتوم طو تلمش ایسه ده فرانسه ایلیچسی حس ایدرک پروسیا دولتندن ایضاحات طلب ایتدکده اوستی اورتیلو جوابلر ویریلوب فقط پروسیانک صلحه توسط ایده جکی و فرانسه عسکرینک انسیاخ سنجاغندن مرورینه مقابل روسیه اردوسنک دخی سیلر یا سنجاقلرندن کچمسنه مساعده اولنه جغنی و برده هانوره یه سوق عسکر ایدیه جکی بیان قلممشیدی .

پروسیانک بوحر کتته مقابل کندویه هانوره نک ترکنه انکلتره دولتنتک رضاسنی تحصیل ایتمک اوزره علیکساندری وعد ایلمشیدی . انکلتره لو کیفیته آشنا اوله رق هان پروسیالونک دخی دائره اتفاقه کیره جکنده شبهه سی قالدیغندن پروسیا روسی ایچون اعانه نقدییه تدارکنه تشبث ایله برلینه بره مأمور کونرددی . وهانوره نک پروسیا یه ترکی انکلتره و کلاسنجه قبول اولنیه جق بر ماده اولمدقندن بشقه دفع بلا قیلندن عدا یله کندولرنجه نمون اوله جق بر کیفیت ایدیه ده انکلتره قرالی بو افکارده اولیوب هانوره نک حقوق تصرفیه سی کندو عهده سنده قالمق خصوصنه آشوری اهمیت ویردیکندن هانوره نک ترکی قابل اوله میه جغنی و فقط فلمنکک پروسیا یه الحاقنه موافقت اولنه جغنی پروسیا دولتته اخطار اولندی .

ذکر اولئان تکلیف لک ناپلیونه تبلیغی ایچون پروسیا وکلاسندن دوغوویچ فرانسه اردوسنه کوندرلمشیدی . یوناپارته کیفیته مطلع اولدوقده بویه بغته بردشمنک ظهورندن ناشی دوچار تردد و حیرت اولق وخط رجعتک پروسیا لوطرفدن کسامسی احتمالی درخاطر ایدرک مقدا قورمش اولدینی ترتیبانه سکتک کملک لازم کلورکن اصلا قور کتور میوب هان پروسیا دولته اکر هانوره نک استیلاسنه قیام ایدرسه شدیداً مقاومت اولنه جغنی ییلدردی . وفوق العاده برجسارت ایله تدابیر سابقهسنه دوام ایلدی ومبدأ سفرده قورمش اولدینی ترتیباتی اصلا تغیر اتمدی .

بناءً علیه ایستالیاده ماسینا قوماندسنده بولنان الی بیک فرانسر عسکرینک قارشوسنده مشهور ارشیدوق شارل قوماندسنده سکسان بیک نفردن مرکب براوستریا اردوسی وار ایکن ماسینا اولم قلعه سنک ضبط واستیلاسی خبرینی الدینی کبی اوستریا اردوسی اوزرینه حرکت ایلدی . ارشیدوق شارل دخی پانتختک محافظه سنه یتشمک اوزره ایستیلادن چکلکمه مجبور اولدی . واول ائنده الی بیک نفردن مرکب بر روسیه اردوسی ایله جنرال قوتوزوف ائسای راهده فرانسرلره تعرض ایدرک وکوپریلری بیقروق والاصل فرانسرلرک حرکته ممکن مرتبه مانع اوله رق ارشیدوق شارله وقت قزاندرمق اوزره طونه نک صاغ طرفنده بولندیغدن بوناپارته طونه ایله الب طاغری ارسنده واقع برطار موقعدن حرکته مجبور اولدینی حالده ارشیدوق شارل دن اول ویانه یه وارمق اوزره سرعت ایدوردی وشارلک اردوسیه تیرول سنجاقلرنده بولنان یکر می بشیک اوستریا عسکری کندوسنک ارقه سنی کسمک احتماله مبنی تیرولی ضبط اتمک اوزره یکر می درت بیک عسکر ایله مارشال نی مأمور ایتمشیدی .

الحاصل ناپلیون هر درلو احتمالاتی درپیش ایدرک اصلا وقت غائب ایتمسزین یوله روان اولدی ویوله بر مقدار روسیه عسکرینه بالتصادف غلبه ایتدکن صکره تشرین ثانیء فر تکینک اون اوچنده ویانه یه وصول بولدی اوستریا دولتک ویانه ده موجود اولان ایکویوز بیک تفنک وایکی بیک طوب ایله کایتلو مهماتی فرانسرلرک الیه کچدی .

بو ائنده مارشال نی دخی تیرولی استیلا ایدرک ماسینا اردوسیه قاوشمش وارشیدوق شارل فرانسرلرک ویانه یه کیردکلری خبرینی الدینی کبی اردوسیه مجارستانه صاوشمش ایدی والاصل ناپلیونک ترتیباتی هب تصور ایتدیکی وجهله فعله کلش اولدی بو وجهله مظفر یتنک باشلوجه سبی ییلدیرم کبی سرعت اوزره حرکتی ایدوکی درکاردر .

پوناپارته و یانه په کیرد کدن صکره دخی توقف ایتیموب ارشیدوق شارل یتشمزدن مقدم مورایه ده تجمع ایدن روسیه و اوستریا اردولرینی اوروب طاغتمق تدایرینه قیام ایتدی . وهان تشرین ثانیء افرنجینک یکر میسندہ مورایه ولایتک مقرر حکومتی اولان بورون بلده سنه کیندی اولوقت روسیه و المانیا ایمپراطورلری دخی اولموجده برلشمشلر ایدی و یانلرنده یتیش بشیک روسیه و اون بشیک اوستریا عسکرلی اولوب بونلره مقابل بوناپارته نک معیتندہ دخی یتیش بشیک عسکر وار ایدی . بوانساده طرفیندن مأمورلر کیدوب کلهرک مصالحه صدلری درمیان اولمش و پوناپارته پروسیانک تدارکاتی مطالعه ایله صلحه میال بولمش ایدی . و روسیه عسکرلری بولدقلری شیلری یغما بولندقلری رلری خراب ایتدکلرندن مورایه ده قحط و غلا ظهوره کلدیکی جهتله اوستریا ولر دخی صلحی آرزو ایدرلردی .

لکن روسیه ضابطانی غایت مغرور اولدقلرندن همان فرانسز اردوسنک اوزرینه هجوم و حرکت قرار و یردیرمکله ایکی ایمپراطورلر برلکده حرکت ایدرک کلوب استرلیج قلعه سی پیشکاهنده اردولرینی قوردیلر پوناپارته دخی اردوسیه ایلرولیوب اورایه زیاده تقرب ایتیش ایکن روسیه لولرک غرورینی تزئید ایله انلره بریاککش مناوره ایتدیرمک اوزره گویا خوفندن ناشی کیرو چکلمش صورتی کوسترمک اوزره کیجه این اردوسنی قالدیروب اوج ساعت کیرو چکدرک بر موقع منیی اردوکاه اتخاذ ایلدی و روسیه ایمپراطوری طرفدن یانسه کلان مأموره اردوسنی پریشان حالده کوستردی بونک اوزرینه روسیه لولر فرانسه اردوسنی اوزرینه هجوم دکل همان اطرافنی قوشادوبده تمامیله اسیر ایتمک سوداسنه دوشدیلر اسکی اوستریا جنراللری ( برچوق حرب کورمش نفرات ایله فن حربده ماهر ضابطاندن مرکب براردونک اوزرینه بویله بی پروا کیتمک جائز دکلدر ) دیه کوردیلر مفید اولدقدن بشقه روسیه نک نوهوس ضابطانی انلرک بوسوزلرینی کوش تعجب ایله استماع ایلدیلر . بناء علی ذلک کانون اول افرنجینک برنجی کونی روسیه لولر فرانسه اردوسنک صاغ قولنی قوشاده جق حرکت ایتدار ایلدکلرینی ناپولیون کورینجک آشوری مرتبه مسرور اوله رق یارین اخشامدن اول بو اردو بنمدر دیو برقاچ کره سویلمش و روسیه لولرک بونیتده ثباتلری ایچون ینه اظهار خوف و تردد وادیسندہ خیلی کوسترشلر ایلمشدر .

ایرتسی یعنی کانون اول افرنجینک ایکنجی و شهر رمضانک اونجی کونی علی الصبح محاربه په شروع اولنوب روسیه لولر فرانسه اردوسنک ارقه سنی چویرمک نیتیه صاغ جناحنی قوشاتمق اوزره حرکت ایدرک بولندقلری تپه لری ترک ایتدکلرندہ مارشال



صوت در حال اول تپه لره یورویس ایدیجک روسیه لولر ایستکری خطایی اکلیوب فرانسزلی قارشولامشیر اول مهم موقی تکرار اله کچورمک اوزره ایکی ساعت قدر چالشمشیر ایسه ده مقتدر اوله مدقلرندن فرانسزلی دولتین متفقتین اردوسنک ارسنه کیروب ایکیه بولمشیر صولقولوده بولنان مارشال لان و مورا دخی بوآئنده دشمنلرینک صاغ جناحی اوروب غالب اولمشیر . بناءً عایسه دولتین متفقتین اردولری تعریف اولنمز صورته بر پریشانلغه کرتار اوله رقی وقت زواله غایت خونریزانه بر محاربه اولندقدنضکره روسیه و اوستریا عسکری فراره قرار ویرملریه فرانسزلی شدتلو تعقیب ایستدیلر و روسیه لولرک بر فرقه سی طوکمش کولارک اوزرندن کچر ایکن فرانسزلی کله ایله بوزلری قیرمغله روسیه لولرک چونخی بوکوللرده غرق اولدیلر .

بوچنکه اوستریلیج محاربه سی دینلوب بونده روسیه و اوستریا عساکرینک اون بش بیکی تلف ویکرمی بیکی اسیر اولدقدن بشقه پک چوق طوب و تفنگکاری فرانسزلی انه کچدی . بونک اوزرینه اوستریا ایمپراطوری سلاح ایله فرانسزلی غلبه دن مایوس اوله رقی ایکی کون صکره ناپولیون نزدینه کلوب برمتارکه امضا ایادی وانک التماسیله روسیه لولرک مملکتلرینه چکلماری ایچون پوناپارته طرفندن مساعده اولندی یوخسه فرانسزلیک تعقیبندن خلاص بوله مزلی ایدی و موسیو طالیران ایله اوستریا مرخصلری و یانه ده مواد مصالحه نیک مذاکره سیله مشغول اولدیلر .

ناپولیون ایسه اول بول متفقلری اولان باویاره وورتمبرغ و باد هرسلکریله شروط تحفظیه و تعرضیه بی حاوی بر اتفاق معاهده سی تنظیم ایله شهر شواله مصادف اولان بیک سکز یوز بش سنه میلادیه سی کانون اولنده امضا ایدلی و موجبنجه باویاره وورتمبرغ هرسلکرینه قرال عنوانی ویرلدکن بشقه المانیان باویاره قرالغنه بر ملیون وورتمبرغ قرالغنه یوز سکسان اوچ بیک و باد هرسلککنه یوز اون اوچ بیک نفوسی حاوی اراضی ترک و الحاقنه قرار ویرلدی .

وبرده باویاره قرالنک قزی پوناپارته نیک اوغلی و اینالیا قرال قائممقامی اولان پرنس اوژن دو بوچارنیه وورتمبرغ قرالنک قزی پوناپارته نیک برادری پرنس ژرومه و فرانسه ایمپراطور پچه سنک اقرباسندن اولان استفانی دو بوچارنه نام قیز دخی بادولی عهدینه عقد نکاح اولنقی خصوصلری قرارلشدیلدی .

بروجه بالابعض تکالیفک تبلیغی مأموریتیه پروسیا دولتی طرفندن ناپولیون نزدینه کوندرلمش اولان موسیو دوغوویج اوستریلیج محاربه سندن بر کون اول فرانسه اردوسنه کلدکده ناپولیون طرفندن روی التفات کوستریله رک فرداسی وقوع بوله جق اولان اوستریلیج محاربه سندنضکره مکالمه یه شروع اولنقی اوزره و یانه یه کوندرلمشیدی

ناپوليون اوستريليجن د ويانه يه عودتنده موسيو دوغوچه آخر معامله ايدرك دولتتک و فاسزلغتي يوزينه اورمش ايسه ده کندوسنک مظفريتندن صکره پروسيالونک تبديل افکار ايلديکني و کندو حقدنه اجرا ايلمش اولديني بيوفالني دول متفقه حقدنه دخي اجرايه حاضر بولنديغني کوره رک بعض شرائط ايله مصالحه يه راضي اولوب هان هانوره نک روسيايه و روسيا مالککندن انسباح قطعه سنک باوياره يه و (نوشاتل) پرنسليکيه (قيلو) دو قلغنک فرانسه يه ترکني و طرفين يکديک رک تماميت ملکنه متعهد اولمق شرطني متضمن برقطعه عهدنامه تنظيم ايله خلال کانون اولده امضا اولندي .  
 بواننده فرانسه خارجيه ناظري طاليران ايله اوستريا مرخصلري دخي عقدمه صالحه ضمانته مکاله ايتمکه اولوب انجق ناپوليونک قناعتسزلکي عظيم مشکلاتي موجب اولمده ایدی . ورده بالاده بيان اولنديغني اوزره ناپولي دولتي ناپوليون ايله بيطر فلق عهدنامه سي امضا ايتمشيکن ناپولي قراليجه سي طرافالغار محاربه سنده فرانسه دو نمانسک انهزام وانکساريني و پروسيانک اتفاقه داخل اوله جغني خبر الديغني کبي اون ايکي بيک روسيه والتي بيک انکلز عسکرينک بجرأ ناپولي يه کيرمسنه و فرانسزلرک ارقه سندن ايتالياني ايقلاندرمق اوزره قرق بيک ناپولي عسکرينک بونرله برلشمسنه مساعده ايلمش اولديغندن ناپوليون ناپولي قرالغنک الفاسني قرارلاشدرمغه اوستريا مرخصلري بونک منعه دخي خيلي چالشدیلر لکن برشيئي مفيد اولدی و برچوق مکاله و مباحثه جريانندن صکره پرسبورغ بلده سنده وينه کانون اول ايچنده برقطعه مصالحه نامه امضا ايلديلرکه انک موجبنجه اوستريا دولتي فرييون واستريه سنجاقلريه و نديک الکاسني تريسته و دالماسيا و قطارو دخي برابر اوله رق ايتالييه و تيروول سنجاغني باوياره يه ترک ايدوب بوکا مقابل مقدماتوسقانه دو قه سنه و يرلمش اولان ايکي پرنسک محللر اوسترياه کچمش ايسه ده بومبادله ده اوستريا دولتي درت مليون تبعه غائب ايتدکن بشقه قرق مليون فرانق دخي تضمينات حربيه اعطاسنه متعهد اولمشدر .

بونک اوزرينه روسيه لويه مصالحه تکليف اولمش ايسه ده ايمپراطور علكساندری بويه مغلوبانه مصالحه يي قبولدن ابا ايلمشدر ناپوليون ساتالنه آطه سنده يازديغني ترجمه حانده اوستريليجده کي مظفريتني بيان ايتدکن صکره ديرکه ( اوستريا ايمپراطوري نيم ايله ملاقاته طالب اولدقه بر خندق ايچنده کوريشيلوب استدعاي مصالحه ايتمکه مصالحه يه قائل اولوب انجق دشمنلري مي اضعاف ايله دوستلريه تقويت ويرمک اوزره و نديک الکاسي لومباردياه يعني ايتاليا جمهورينه و تيروول الکاسي باويه را مملکتته الحاق اولمق شرطلرني اوستريا ايمپراطورندن طلب و ادعا ايلدم معارضه و مجادله يه

وقت اولیوب هان مصلحه سندی امضا اولندقدن صکره روسیه لولره دخی صالحی تکلیف ایتم روسیه ایمپراطوری قبول ایتمدی وقبول ایتمش اولسیدی اوستریا دولتک تدلیل وتحقیرینی قبول وتسلیم ایدر کبی اوله جق ایدو کندن روسیه ایمپراطورینک بوتکینی شان وشهرته باعث برکیفیت اولوب کرک شدائد روزکاره قارشو متانت نیت وکرک بخت وطالغنه اعتماد وامنیت اظهار ایتمش اولمسیه اولوقدنبرو دینانک احوال مستقبله سی ایکیمزک احوالنه موقوف اوله جغنی فهم واستطلاع ایتمشیدم) انتهى .

اوائل ذی القعدیه مصادف اولان بیک سکنز یوز اتی سنه میلادیه سی کانون ثانی سنده ناپولیون پارسه عودت وامور مالیه واصلاحات ملکیه یه همت ایله برابر عقد ایلدیکی عهدوک تمامیه اجرای احکامنه نظارتدن خالی اولمامشدر .

حالبوکه پروسیا دولتی فرانسه یی صلحه اجبار ایچون میدانه چیقوبده صکره بونک بتون بتون خلافده وپوناپارته نک دلخواهه موافق صورتده برعه دنامه امضا ایتمی پروسیا ملتک کبرینه طوفونمش وفرانسزلرک المانیاده بودرجه غلبه لری عسکری طاقته پک اغر کلش ایدی باخصوص دولتین بربرینک تمامیت ملکنه متعهد اولوق شرطی برقاچ هفته اول متفق دولتله پروسیا دولتی بیننده وقوع بولان مقاولاته کایاً ضد ومغایر اولدیغندن روسیالوی نظار عمومیه ده مبتدل ایده جک برکیفیت ایدی فقط پروسیا قرالی بوعه دنامه یی تصدیق ایتمه جک اولسه حر به نتیجه ویره جکندن ومحاربه قوسوی آچاسه فرانسزلرک غلبه سی درکار اولدیغندن تمامیت ملک خصوصنه دائر اولان فقره لرنده بعض تعدیلات وتصحیحات اجراسیله تصدیق ایلدی پوناپارته نک غرضی ایسه پروسیایی بتون بتون دول متفقهدن تفریق ایله کندو دائره اتفاقنه المقدن عبارت اولمسیه بو تعدیلاتی قبول ایتمدی . بناء علیه موسیو دوغوویج بتکرار پوناپارته نزدینه ارسال ایله خلال ذی القعدیه واقعبیک سکنز یوز اتی سنه سی شباط فرنکیسنک اون بشنده دیکر برقطعه عهدنامه امضالیدی بوایسه پروسیالو حقنده ده اغر ایدی . زیرا بونده اتفاق خصوصی مصرح دکل ایسه ده پروسیا نهرلرینک انکلیزله قانمسی وفرانسه نک اورویاچه کافه اجرا اتنک تصدیق اولنمسی شرطلرینی حاوی ایدی .

بوعه دنامه تصدیق اولنق اوزره برلینه ارسال ایله جوابنه انتظار اولدینی اننده اوستریا وایتالیا قرالی قائممقامی اولان پرنس اوژنه وندیک الکسیله مباحقاتی تسامیم ایتمش وپوناپارته نک برادری ژوزف دخی ناپولی استیلا ایدرک قرالیچه سی اولان قارولینی بتون فاملیاسیله برابر فراره مجبور ایلمش ایدی .

پروسیا دولتی بوعهد نامه‌ی تصدیق ایله دوغوویچی باش وکیل نعب ایلمش ایسه ده  
پروسیا اهالی وعسا کرینک فرانسه علیهنده خصوصتلی مستمر وجمره قلمبرنده  
آتش کین وعداوت مستتر قالدی .

پروسیا قرالی بواطوار تلون کاریسندن طولانی روسیه عندنده پک زیاده محجوب  
اولدیغندن بیان معذرت ایله روسیه دوستاغنک بقاسنه چاره بولمق اوزره دوق دو  
برونسویق نام براختیاری تعایمت مخصوصه ایله پترسبورغه کوندردی . واسترلیج  
جنکی اوزرینه روسیه ایمراطوری علكساندری مایوسیت عظیمه یه دوچار اونغله  
پایتخته چکله رنک برمدت سکوت ایدوب بووقته قدر نه حرکت ایده جکنه هنوز  
برقرار ویرمامش ایدی . روسیه خلقی دخی بومصیتک ظهور نی برطاقم نورسیده  
وتجربه سز وکلا وقرانای ایمراطورینک تدبیرسز لکنه حمل ایتمکده ایدیلر . بوکره  
پروسیا قرالی طرفندن ویریلان ایضاحاتی علكساندری کوش قبول واذعان ایله  
اصغایدنک پروسیا دولتک فرانسه طرفنه تمایل مجبوریت تحتنده اولدیغنه قنوب  
پروسیایی جلب ایله ایلک فرصتده فرانسه علیهنه قیام ایتدرمکه سعی واقدام ایلدی  
ودوغوویج فرانسه بولتیقه سی طرفداری اولدیغندن اذن مکتوم اوله رق پروسیالو  
ایله برمکله قیوسی آجدی .

پروسیالو انکلتزه یه دخی مراجعت ایله هانوره نك ضبطه دائر عذر دیلده انکلتزه  
دولتی پرآتش غضب اوله رق غایت حدتلی بر بیاننامه نشر ایله پروسیایه اعلان  
حرب ایلدی .

حالبوکه واسترلیج محاربه سی انکلتزه ده افکار عمومیه یی مصالحه یه یاقلاشدیروب  
متعاقباً فرانسزلرک عن صمیم القلب دوشمنی اولان و فن دیپلوماتیده فوق العاده  
مهارتی حسابله بتون اوروپایی ایاغه قالدیران مشهور ( پت ) وفات ایدرک انک  
یرینه مصالحه طرفداری اولان موسیو فوقس انکلتزه باش وکیلی اولدیغنه نظراً  
اول ائنده انکلتزه ایله فرانسه ارسنده مصالحه احتمالی کسب قوت ایدوب حتی  
من غیر رسم پارسده برمکله قیوسی اچیله رق وهانوره نك انکلتزه یه تسایمی طرفیندن  
اساس طوتیله رق مذاکره باشلانمش ایدی .

وینه اول ائنده مصالحه احتماله قوت ویره جک بر ماده دخی ظهور ایتمش ایدی .  
شویله که : بالاده مذکور پرسبورغ معاهده سی حکمنجه فرانسزلر دالمجایه کیروب  
قطارویه طوغری حرکت ایتدکری هنکامده اوتهدنبرو روسیه لولردن عطیه آلفه  
مألوف اولان قره طاغ رؤسا وپسقبوسلری اهالی یی ایاتلاندریروب اول طرفده بولنان  
روسیه امیرالندن دخی استعانه ایتلری اوزرینه روسیه امیرالی بو حالی قطارو بوغازلرینک

ضبطه عين فرصت اتخاذ ايدرك سوا حله دو كمش اولديني بر قاج يوز روسيه عسكرى قره طاغلور لره برلشوب قطارو قلعه سنى محاصره واوستريا محافظلر ينك مبالا تميزاني ملا بسه سيه ضبط ايتمشلر پونا پارتته بووقوعا تدن خبردار اوليجق هان اوستريا دولتدن ياقطارونك ردني يا خود برفرقه اوستريا عسكرينك روسيه لولر اوزرينه سوق اولمسنى طلب وبو ايكي شقندن بريسي اجرا اولمديني تقدير جه حربه قيام ايده جكني قطعياً بيان ايتمكله اوستريالو عظيم تلاشه دوشهرك در حال پترسبورغه اشعار كيفيت ايله برابر قطارونك استردادى ايجون عسكركه سوقته دخى قيام ايتمش وروسيه اميرالى دولتلك امرى اولمقسز ين بويه برايشه تشبث ايلمش اولديغلك بيان وايضاحى فرانسه ايله عقد مصالحه و سيه اتخاذ اولنورق روسيه دولتي طرفدن دخى پارسه دو بريل نامنده بر مأمور مخصوص كوندلمش ايدى .

الحاصل دول اوروپا صلحه ميل ايله پارسده مصالحه مكالماته ابتدار اولنش ايدى . لكن پونا پارتته نك ذهنده بيوك بيوك ترتيبلر اولوب كندو حمايه سى تحتنده بر چوق حكومتلر تشكيل ايله شارلمان كبي بتون اوروپايي آوجنك ايجنه آلق سو داسنده بولنوب حتى اواسط ذى الحجه ده معتبر مارشاللردن مورايي المانياده واقع ( قيلو ) و ( برق ) غران دوقه سى نصب وتعيين ايلدى ناپليونك بويه بيوك قورنديلرى ايسه اوروپا جه آرزو اولنان مصالحه عموميه حصولنه مانع اوله جق بر كيفيت ايدى . كله لم دولت عليه نك احوال بولتيقيه سنه .

دولت عليه قينارجه معاهده سندن صكره پك زياده ضعيف دوشمكله برارالق روسيه واوستريا دولتلىرى بعض ممالك محروسه ني بينلرنده مقاسمه يه قرار و ير مشلر ايدى . دول سائر بونك منعي چاره سنى دوشونمكله برابر شايد او كي آله ماز ايسه بوتقسيمده حصه دار اولق داعيه سنه دوشوب فرانسزلرك مصرى استيلا لرى دخى بوندن منبعث بر كيفيت ايدى . دولت عليه ايسه حفظ صمداننده بولنورق دشمنلرك اغراض فاسده لرى فعله چيقمديني كبي فرانسزلر دخى بومصر مسئله سنده پك ضررلى چيقديلر . اندن صكره ناپليون تبديل افكار ايدرك بعض وكلاسى دولت عليه عليه نده بولنديني حالده كندوسى دولت عليه نك تماميت ملكنى التزام ايدر اولدى . سلطان سليم ثالث دخى اوته دنبرو اوروپا مدنيتها راغب اولورق فرانسه طرفه مائل اولوب حتى شهزاده لكننده بالدفعات موسيو روفن واسطه سيه فرانسه قرالى بولنان اون التيجى لويي ايله محرمانه مكاتبه ايلديكي مرويدر . بناءً عليه مصر وقعه سندن برو وكلاى دولت عليه نك اكثرى فرانسه بولتيقه سى عليه نده اولديني حالده كندوسى پونا پارتته طرفه مائل ايدى . فقط ناپليون دولت عليه ني بتون بتون متفق بولندن

تفریق ایله منحصر آکندو دائره اتفاقه آلمق آرزوسنده بولندیغندن بونی حاصل ایتک اوزره جنرالی بورونی سفارتله در سعادته کوندرلمش ایدی . دولت علیه ایسه روسیه طرفدن خوف و احتراز اوزره اولدیغنه مبنی ناپلیونک ایمپراطور لغنی بیله تصدیق ایدمه ماش اولدیغندن طولایی دولت علیه ایله فرانسه بیننده برنوع برودت حصوله کیش و بروجه بالا روسیه لونک اصراری اوزرینه دولت علیه ایله بینلرنده جاری اولان اتفاق معاهده سی دخی تجدید ایدلمش ایدی .

اول ائشاده ایسه اوستریلجده روسیه و اوستریا ردولری منهزم اولمغله اوروپا پولتقه سنک رنکی دکشدی و بووقه نیک دولت علیه پولتقه سنه دخی عظیم تأثیری اولدی حتی مذکور معاهده اتفاق تصدیق نامه لری باب عالیده روسیه ایلچیسى ایله مبادله اولندیغنی کونک فرداسی ناپلیونک بووجه له مظفرتی خبری وارد اولیجق وکلای دولت علیه حیرت کلدی و برکون اول بوخبریتش مش اولسه ایدی دوستانه بعض اعذار ملزمانه ایله امر مبادله تأخیر اولمق احتمالی وار ایدی زیرا سند اتفاق تنظیمی ائناسنده بالاده بیان اولندیغنی اوزره روسیه لونک لسانه کتورمش اولدیغنی تکالیف بارده سندن و مقدم و مؤخر رعایای دولت علیه یی عصیانه تشویق ایتک کبی معاملات تحمل فرساسندن طولایی دولت علیه نیک درونی انفعالی درکار ایدی بر طرفدن دخی فرانسه مصاحبتکداری روفن درلو القات ایله دولت علیه یی فرانسه طرفه اماله یه غیرت ایلر و مقدمات و قوعه کلان مصر و قعه سی مدیران جمهورک بریا کیش و یولمز پولتقه لری ایجابندن اولوب یوخسه ناپلیون کبی بر فیلسوف عصرک اثنای حکومتده او یله فرانسه ملتک منافعنه منافی حالانک و قوعه ککک احتمالی یوقدر و دولت علیه نیک حال اصلیسنه و نفوذ و مکننتک اولکی درجه سنه ارجاعی فرانسه نیک منافی اقتضاسندندر یوللو سوزلر سویلر ایدی .

ناپلیون ایسه اوستریلج جنکندن صکره اخبار مظفریت ضمننده استانبوله نامه رسالک ایله براوفچیل تسیار و ابراز خلوص ایله برابر روسیه لو صلحه یا تماز ایسه لهستانه هجوم ایده جکئی اشعار ایتدکده دولت علیه بی طرفلق مسالککنده ثبات و متانت کوسترمکله برابر ناپلیونه غایت نوازشلی و ایمپراطور عنوانی حاوی جوابنامه هایون یازلدقند بشقه اوفچیل ایله بر قاق دفعه خفی مجلس عقد اولنه رق دولت علیه تمامیت ملکی تعهد اولمق و افلاق و بغدادنه دائر مقدماروسیه لو ایله عقد اولنان شروط کر بیه ابطال قانمق کبی بعض موادک پونا پارتیه یدیه تنظیمی و طرفدن استانبوله ایلچی ارسالی خصوصلری محرمانه افاده و کندویه زیاده سیله انعام و اکرام اولنه رق اعاده اولمشدر .

روسیه ایلیجیسی بوندن شبهه لئه رك استكنه احواله قیام ایلدیكى ائنده رئیس الكتتاب واصف افندی بوش بوغاز بردات اولدیغندن افلاق ویوده سی ایسلاستی بك طرفنه بز ممالکتینك شروط کریهه سنی فرانسه لویدیله الغایه سعی ایدیوروز ان شاء الله میسر اولور دیو کشف راز ایدوب بوتقریبله کیفیت روسیه ایلیجیسنه عکس ایتمکدن ناشی روسیه دولتی سوء ظنه ذاهب اوله رق دولت علیه ایله فرانسه لونك معامله خفییه سی نه اولدیغنك تجسس و تحریسنه ابتدار و آندن صکره انکلتزه لوی ایله بر لکده کاه تهدید و اخافه صورتی اظهار و کاه بعض احوال دن شکایت سیاقده بسط مقدمات اغبرار ایدر اولدی حتی دولت علیه ایله انکلتزه لوی بیننده منعقد اولان اتفاق معاهده سنك انتضای مدتیه خیلی وقت وار ایکن هم دولت علیه نك فرانسه طرفنه اولان تمایلنك درجه سنی اکلامق وهم فرانسه لوی ایله اره سنی بوزوق ایچون بو اتفاقك تجدیدی دولتین مشار الیهما بالاتفاق استدعا ایله کل یوم وکلای دولت علیه نی تصدیعه باشلادیلر دولت علیه دخی پوناپارته نك انفالنه سبیت ویرمامك اوزره آنلرک بو استدعالرینه حسن مدافعه ایله مقابله ایدرک انجا مکاره انتظار ایله امرار وقت ایده یوردی . مؤخرأ پوناپارته لهستانه هجومدن صرف نظرله پارسه عودت ایلمش ایسه ده عساکرینی المانیا طرفنده بر اقمی ودالمالجانك ایتالیا یه الحاقی حسبیه فرانسه لونك ارناودلق طرفنده دولت علیه یه جار ماصق اولسی دولت علیه نك بر قاندها دقت نظرینی جلب ایتمکله ارتق انکلتزه اتفاقك تجدیدی خصوصنك ممکن مرتبه تسویف و تاخیرینه قرار ویردی .

ایشته بوسره ده فرانسه مصالحتکناری روفن دخی ناپلیون دولت علیه نك صحیح دوستیدر ایمپراطورلغك رسماً تصدیق ضمننده سفیر مخصوص کوندرلسه محظوظ اولور و دولت علیه نك روسیه دن نه مطلوبی وار ایسه بوکره روسیه لوی ایله عقد ایده جکی مصالحه ده رابطه ویرر اشتباه بیور لمسون همان ایلیچی ارسالیله ایمپراطوریمزه بیان ایدیکز دیمکده ایدی .

بناءً علی ذلك حالت افندی حالا پارسه سفارتله مقیم ایکن بو خصوص ایچون رجال دولت علیه دن السید عبدالرحمن محب افندی اواسط ذی الحجه ده نشانچی پایه سیاه فوق العاده پارس بیوک ایلیجیسی نصب اولندی .

( وقایع سنه ۱۲۲۱ )

وهان محرّمک اونجی کونی افلاق طریقیله فرانسه یه کوندرلدی و کندویه هدایای هایون ایله برابر ایکی قطعه نامه هایون تودیع ایدلدی که بری ایمپراطورلق تصدیقی مین و دیکری صورت مخصوصه ده اوله رق بیان موالات و مصافاتی متضمن ایدی .

بوسنه غره محرم نوروزه مصادف اولديغندن محب افدينك در سعادتن حر كتي  
مارت رومينك اون سكرنجي كوني ایدی .

محب افدينك اس اساس مأموریتی ناپولیونی جاب و تالیف ایدرك مصالحه عمومیه  
ویا خود روسیه ایله فرانسه بیننده مصالحه منفرده عقیدینه قرار ویرلدیکی تقدیرده سیاق  
و سابق احواله نظراً دولت علیه یه دائر مواد اولوب اولدیغنی کوزلجه تحقیق ایتدکدن  
صکره دولت علیه یه مضر اولان شرائط عهدیه نك الغاسنه چالشمق و موسیو بورونك  
سفارتله در سعادته بولدیغنی هنگامده ناپولیون طرفدن دولت علیه نك صورت محکومیتده  
بولنسی کندوسنه نقیصه شان اولوب علی الخصوص ضمان و کفالت نامیه مملکتین  
حقنده روسیه لولرک داخلی و خارجی مداخله لری و کذا قورفه حقنده دخی ینه ضمان  
و تعهدی و قره طاغ و آفدکز رعایانی تصحب و کر جستان طرفنی اخلال و افساد  
ایتملری کیفیاتی موضوع بحث ایدیلره رک دولت علیه بومضرانک رفع و ازاله سنه نیچون  
همت ایلمز یوللو مکرراً اخطارات و قوعبولمش ایدوکندن ایشه بونلرک صره سی  
شمدی کلدی دیهرک مملکتینک شروط محدثه سنی الغایله حالت اصایه سنه ارجاعی  
و جزا رسبه شرائطک مصلحت دولت علیه یه موافق صورته قونلمسی و روسیه لولرک  
کر جستان حقنده رونما اولان اجرات استیلا کارانه لرینک رفع و ازاله سی خصوص لرینی  
فرانسه لویه التزام ایتدیرمک و فرانسه و کلاسی دولت علیه یه عزو قصور ایده جک  
اولدقلرنده سوابق احوالندن یعنی دولت علیه مقدم و مؤخر فرانسرلر حقنده غایت  
خالصانه و مروتکارانه معامله ایده کلشیکن من غیر مأمول مصر و قعه سنک ظهوری  
یار و اغیار نظرنده پک چرکین برشی اوله رق هر کسه بادی حیرت و تعجب  
اولغله دولت علیه دخی ناچار تبدیل طور و مسلك ایدرك کندو بولتیقه سنه  
مغایر بعض دول ایله عقد اتفاقه مجبور اولدیغندن بخلله تبرئه ذمت ایدرك سببیتی  
فرانسه لو طرفنه تحمیل اتمک و دولت علیه روسیه اتفاقدن خشنود دکل ایسه ده  
خود بخود بونك الغاسنه ابتدار ایده میوب فی الاصل بوکاسب فرانسرلر اولدیغندن  
ینه آنلر دعوا جلیق ایدرك الغاسی مقتضای حال اولدیغنی اکلاتمق و برده مقدمه  
روسیه اتفاتی تجدید اولدیغنی کبی انکلتره لو ایله تجدید اتفاتی اولتمق اوزره در سعادته  
مقیم ایلیچیسنه رخصتنامه کلش اولدیغنی حالده بر وقتدنبرولیت و اعل ایله  
امرار وقت اولنمش و بوندن صکره دخی تأخیری متصور بولنمش ایسه ده شاید که  
انکلتره لو پک زیاده اصرار ایده جک اولور ایسه حسب الحال اودخنی تجدید اولتمق  
محمتمل اولدیغنی جهته شاید بوکا دائر فرانسه لو طرفندن سؤال وارد اولور ایسه  
بوشمدی یا بلمش برشی اولمیوب مقدمکی اتفاقی حکمی ایجابندن و مقدمه روسیه



اتفاقی تجدید اولمش بولوب بونلر ایسه یكدیكوره لازم و ملزوم قیلندن اولدینی افاده سیله ایجاب حال ووقته كوره لسان قوللانمق خصوصلرندن عبارت ایدی .  
الحاصل دولت علیه روسیه اتفاقیله باغلامش و حالبوکه ناپلیون غالب و مظفر اوله رق پارسده مصالحه مذاکراته باشلامش اولدیغندن ناپلیونه اظهار میل و مماشات ایدوبده اگر بومصالحهده دولت علیه یه دائر مواد وار ایسه بوصردهده شروط مضره نك الفا ایتدیرلمسی خصوصنه چالشمق اوزره محب افندی علی جناح الاستعجال پارسه ارسال اولندی . عاصم افندی ذاتاً دول نصارا ایله اتفاقی تجویز ایتیموب ابتدا روسیه وانکلتره دولتلیله اتفاق اولدیغنه اعتراض ایدر حالبوکه بالاده بیان اولدینی اوزره مصر مسئله سی اوزرینه دولت علیه نك بعض دول اوروپا ایله اتفاق ایتسی تحت مجبوریتده اولدینی کبی بو کره پارسه ایلچی کوندرمسی دخی حکم زمانه ایجابندن ایدی و بو خصوصک اثبات و ایضاحی ایچون یوقاریدنبرو درج و ایراد اولنان مقدمات مشروعه دن زیاده تفصیلاته احتیاج کورلمز فقط عاصم افدینک احوال دولیه یه اصلا و قوفی اولدیغندن بوبابده هر نه دیسه معلوماتسزلق ایله معذوردر .

محب افندی یه ویریلان تعایمت خفیه دن اکلاشلدینی اوزره دولت علیه مجرد فرانسه لونک و عدی اوزرینه بعض شروط عهدیه نك تنقیح و تعدیلی بوصردهده روسیه اتفاقینک دخی ابطالی املنه دوشوب انجق کندوسنی اورته یه آتمقدن و بادی امرده متفقلرینی قیرمقدن اجتناب ایدرک وقت وزمانی کلدکجه بر فرده افشا ایتامک و بر طرفه سر رشته ویرمامک اوزره محب افندی یه امر ویرلمشیکن رئیس الکتاب وقت اولان و اصف افندی بوخفایابی فرانسه مصلحتکنذارینه ترجمانلر دخی حاضر اولدینی حالده کشف ایدوب ترجمانلرک بک اوغلنده دولت علیه فرانسه لو طرفه میل ایتدیرلمشدر یولوو اشاعه لریله کیفیتک انکلتره و روسیه سفارتلرینه عکس ایتدیریه جکنی تأمل ایتماش دیو محب افندی سفارتنامه سنده و اصف افندی بی ایتام ایدر . عاصم افندی دخی و اصف افدینک تمدح و تفضیره مائل برذات اولدینی جهتله زوار و حضاره بزاق افشان افتخار اوله رق تقریر و تحریرینی قرائت و اراءه ایتک مراقی اولدیغندن (الکاتب کاتم) قضیه سنجه زمرة کتابه فرض عین منابه سنده اولان کتم اسرار کائندن بی وایه ایدوکنی بیان ایله محب افدینک کلامنی تأییدایلر . بالاده اشعار اولدینی اوزره روسیه لولرک تحریک و تشجیبی ایله صرپولرک عصیانی کندکجه مزداد اولوب انجق اوستریا و طرفدن دخی ذخیره و سائر اعطاسیه کندولره اعانه اولنمقده اولسیله بو کره محب افندی پارسه کیدرکن و یانه یه اوغرادقده اوستریا باش وکیلی ایله لدی الملاقاة بوندن طولایی تعریض و اشتکایا ایتمکله باش وکیل

( عصات صربیه آوستریا طرفنده کی صربلور طرفندن نهانی ذخیره ویرلدیکی بزم  
دخی مسموعمز اولمغله منع اولنمشیدی بوکره تکرار تنبیه و تأکید اولنور ) دیو  
وعد واعتذار ایلمشدر .

طاغلو اشقیاسی رؤس اسندن دلی قدری بفرقه اشقیا ایله بر غوس طرفنده کشت  
و کذار و اهالی به ایصال خسار اتمکده اولدیغندن ایکی باشلو برایش کورلمش اولمق  
اوزره صربستان اوزرینه مأمور ایدیلهرک سبروزی اسماعیل بک واسطه سیله فرمان  
دولت کندویه برطاقم وعد و وعیدلر ایله تبایغ اولندوقده اودخی ناچار قبول ایدرک  
معیتده کی طاغلو اشقیاسنی استصحاب ایله اواخر صفرده الاجه حصار متصرفی  
شهسوار پاشا معیتنه کیتمکله اهالی شر و مضر تلرندن مستریح اولدی و فیما بعد اشقیا  
طاقمک اول حوالی به اوغرادلما مسیچون بر غوس و جوارنده کی قضالر اعیانلرینه  
اوامر علیه اصدار اولندوقدن بشقه اسماعیل بکک انهاسی وجهله بو قضالره قیر  
سردارلری تعیین ایله اولدقجه انضباط الته آلدی .

روم ایلی والیسی ابراهیم پاشا دخی بو ائنده یکریمی بیک عسکرله صربستان اوزرینه  
اعزام اولندی .

ربیع الاولده رؤس امتحانی اولوب تلخیص المفتاحک مسند بابنده ( واما العطف الخ )  
عبارة سندن درس کوستریله رک اثبات لیاقت ایدن خواجه افندیلر رؤس تدریس ایله  
بکام اولدی تألیفات مشهوره صاحبی ارزنجانی مفتی زاده افندیکنک مأذونلرندن  
اولوب مؤخرأ دور عبدالمجید خانیده خواجه شهر یاری اولان اقشهرلی عمر  
افندی دخی بو امتحانده رؤس آلا نلردندر .

وان محافظی فیضی باشانک ظلم و تعدیسندن ناشی اهالی طوبلانوب اوزرینه هجوم  
ایله اعدام ایلمش اولدقلرندن وان محافظلنی خلال ربیع الآ خرده قره حصار صاحب  
متصرفی وزیر عبدالرحمن پاشایه قره حصار صاحب سنجاغی مقدمجه عهده سنه  
مرعش سنجاغی توجیه اولنان وزیر ابراهیم پاشایه بالتوجیه مرعش دخی شام بکار بکیسی  
و جرده باشبوغنی اولان قلندر پاشا عهده سنه الحاقاً احسان اولندی .

بالاده بیان اولندیغنی اوزره پوناپارته بحرأ انکلتراه لوایله باشه چیقه میه جغنی جزم ایله همان  
مظفریت بریه سندن استفاده ایدرک هر پرده فرانسه نفوذینی اجرا ایله انکلتراه نک هر  
طرفدن تجارتی کسمک املنه دو شمشیدی و بر و قندنبرو روسیه لولر کوه قافی مرور  
ایله داغستان و کر جستان طرفلرینک استیلا سنه ابتدار ایدوب بوندن ایسه دولت علیه  
کبی ایران دولتی دخی اورک مکله روسیه لولرک اول حوالیدن دفعنه تشبث ایتمش وبالاده  
اشعار اولندیغنی اوزره حکمران ایران اولان فتحعلی شاه روسیه دولتیله محاربه به  
کیرشمش ایسه ده ولی عهدی اولان عباس میرزا منهزم اوله رق روسیه عسکری

آذر بايجان قطعه سنه تجاوز ايتديکندن ايران دولتي روسيه لو طرفندن بتون بتون خوف وانديشه يه دوشمکله پوناپارته بو حالي فرصت اتخاذايدرك بعض مواعدايله ايران دولتي کندو طرفه جلبه قيام ايلدي عباس ميرزا ايسه احوال عصره واقف ومتيقظ برذات اوله رق انکلتريه دن وفرانسه دن معلم ومهندس جلبيله عساکر معلمه ترتيبه مباشرت ايلمش اولديغنه مني ايرانه کلان فرانسولره رعایت ايدر اولديغندن فرانسه ايله ايران بيننده اچجه الفت واختلاط پيدا اولمشيدي . ايشته بوسره ده ناپليون دولتعلیه و ايران دولتي ايله بر اتفاق مثلث تشکيلي صورت خیر خواهیده ايران دولته تکليف ايلديکي کي بومقصد اوزرينه طرف دولت عليه دن ايرانه بر ايلچي کوندرلمسني دخي باب عالی يه اخطار ايلمش اولديغندن خواجگان ديوان هايوندن سيد رفيع افندي بوأئنده سفارته ايرانه کوندرلمشدر انجق عودتنده تقدیم ايتمش اولديغي سفارتنامه ققلو بر قطعه لايحه سنندن اکلاشلديغنه کوره بو اتفاق حصوله سعی ايتيوب بالعکس ايرانلورک فرانسه يه اعتمادلريني سلب ایده جک شير اخطار ايلمشدر . حتی ايران وکلاسيله محرمانه مصاحبت ائناسنده روسيه لو بين الدول عهد شکنک ايله معروف ايسه ده ينه حرکتی في الجمله قانون دوله موافق ومستقل دولت ديمکه لايق اولوب اما فرانسه لونک قول وفعلمنه بر وقتده اعتماد جائز اولماز ديوب بومدعاسني تعداد وبيان مواد ايله اثبات صره سننده مصر وقعه سني دخي ايراد ايلمش اولديغي لايحه مرقومه ده مندرجدر .

بو خالده بغداد واليسي علی پاشا ايله ايرانلو بيننده برودت وخصومت ظهوره گلشيدی . شويله که : سنه سابقه وقايي صره سننده بيان اولنديغي اوزره بابان متصرفي عبدالرحمن پاشا دربندده منهزم اوله رق ايران طرفه کنار ايله ايران شاهندن استمداد ايتمکله دولت ايرانيه طرفندن عبدالرحمن پاشانک عفويه ينه کردستانده ابقاسي ايجون علی پاشايه تحريرات کلوب او دخي عبدالرحمن پاشانک مساويستدن بحثله جواباً بر قطعه اعتذار نامه يازمشيدي باديء امرده بيان ايتديکي اعذاره ايرانلو طرفندن نظر قبول ايله باقلمش يکن عبدالرحمن پاشا طهرانه ورود ايله شمديکي حالده بغداد واليسي وهابي غائله سيله مشغولدر بوأئنده ايران طرفندن هر نه تکليف اولنورسه رد ایده مز ديه رک وکردستان کندو عهده سنه توجيه ايتديرلده کليتو مال وعديله ايرانلوري طمعه دوشوره رک اغفال ايتمکله مسئله بر طرف اولمشيکن ايرانلو تکرار بو خصوصده اصرار ايدرك عبدالرحمن پاشاي جبراً کردستانه ابعاد ايلمک نيتنده اولديغي علی پاشانک مسموعی اوليجق دفعه حدتنه رک خلال ربیع الآخرده همان اون ايکي بيک عراق عسکريه بغداددن چيقوب ايران

سفرینه عزیمت ایله وقوع حالی باب عالی به عرض وانها ایلمشدر . ایران دولتک  
 کردستان ایشارینه مداخهسی قبول اولتور مواددن اولمیوب بوباده علی پاشانک  
 حقلو اولدینی جای بحث دکدر لکن اعلان سفره بروالینک حتی اولمیوب حرب  
 وصالح مجرد اراده سنیه پادشاهی به منوط مواددن اولدینی حالده علی پاشا غایت  
 حدیدالمزاج برذات اولدیغندن بودقیقه لری دوشونیمه رک همان ایران سفرینه عزیمت  
 ایتمسی کندو وظیفه سنک خارجنده بر کیفیت ایدی قالدیکه پوناپارته بروجه مشروح  
 روسیه عالیمنه بر اتفاق مثاک تشکیاتی ایکی دولت اسلامیه به تکلیف ایدوب بونک  
 اوزرینه ایران به برنامه رس دخی کوندرلمش اولدیغنه ودولتک داخلی وخارجی بونجه  
 مشاغلی وارایکن برسب صحیح اولمدقچه برده ایران سفری آجق مقتضای حال  
 ومصلحته منافی ایدوکنه مبنی جواباً علی پاشایه یازیلان امرنامه ده ایرانیان ایله معمود  
 اولان مصالحه نک نقضنه رخصت سنیه اولمدیغندن اکر حرکت اولمامش ایسه فسح  
 نیت واکر حرکت اولنش ایسه بو امرک وصولی آنده عودت ایلمسی کندوسسنه  
 امر و اشعار اولنمشیدی علی پاشا اثنای راهده بو امرنامه مینی الدیغی کبی کیرویه عودته  
 مجبور اولوب انجق بو ائساده بعض عشائر آتلموسی ایرانک بعض محمللرینی اوروب  
 غارت ایلمش اولدیغندن عبدالرحمن پاشا دخی حدود اوزرنده بولنان ایران اردوسنی  
 استصحاب ایله سلیمانیه اوزرینه یوریمش و خالد پاشایه امداد ایچون علی پاشا دخی  
 همشیره زاده سی وکتخداسی اولان سلیمان بکی بر مقدار عسکرله کوندرمش اولمسیه  
 حدود اوزرنده ندی الحاربه ایرانلو طرفنده کثرت اولدیغندن برو طرف عسکری  
 منهزم اولوب سلیمان بک دخی اسیر دوشدی بونک اوزرینه عبدالرحمن پاشا بالذات  
 علی پاشایه مراجعت ایله استعقای قصور ایتمکدن ناشی او دخی بحسب المصلحه  
 عبدالرحمن پاشانک خلعتی ارسال ایله بابان متصرفلغنده ابقا ایتمشدر . بعده ارضروم  
 والیدی و شرق سر عسکری اولان ضیا پاشانک توسیطله چند ماه مرورنده ایران  
 دولتی سامان بکک سیبانی تخلیه ایله بغداده کوندرمشدر . کله مینه اوروپا واقعنه .  
 ناپلیون بروجه بالا مارشال مورانی امرای المایا سلکنه ادخال ایتدیکی کبی متعاقباً  
 یعنی اوائل محر مه مصادف اولان بیک سکز یوز اتی سنه میلادیه سی مارت فرنکیسنک  
 اوخرنده کندوسنک بیوک برادری ژوزفی ناپولی وسیچلیا تین قرالی وهمشیره سی  
 پرنسس پولین وورکزی ایتالیا ده واقع ( غواستابله ) دوشه سی و مارشال برتبه نی  
 المانیاده واقع ( نوشاتل ) پرنسی وایکی آی صکره ینه کندو برادری لویی ناپلیونی  
 هولانده یعنی فلمنک قرالی وموسیو طالیرانی ایتالیا ده واقع ( بنون ) پرنسی نصب  
 وتعیین ایلدی .

و بر وقت دنیرو ناپلیونك تغلب و تحكمی حسیله المانیاده آوستریا و پروسیا دولتارینك نفوذاری جریان ایتمز اولدیغندن المانیا حکمدارانیا یکدیگره تعرض و بیوکاری کچوکارینی تصدیق ایدر اولوب حالبوکه اوستریلیج جنکندن صکره بونلر بتون بتون ناپلیونه بند اولدقلمینه مبنی انك تحت نظارت و حمایه سنده اولمق اوزره بر اتحاد یابلمسنى کندوسندن التماس ایتملری اوزرینه او دخی باویاره وورتمبرغ و باد ایلچیلریله بالاتفاق بر لایحه تنظیم اولمسنی طایرانه امر ایتمشیدی . بو ائاده اولایحه دخی یابلمش اولدیغندن موقع مذاکره یه قونیلوب المانیانك جهت جنوبیه سنده بولنان بر خیلی المانیا دوقه و پرنسلسری داخل اولهرق مجتمعه رین نامیله بر هیئت اتحادیه تشکیل اولمق و بو هیئت فرانسه نك تحت حمایه سنده اولهرق فرانسه دولتی ایله بینلرنده مؤبدأ اتفاق اولمق و بوکا داخل اولنلر مجتمعه المانیا هیئتندن چیقوب بونی راتسبون مجلسنه رسماً بیان ایتمك و ایلروده بو هیئته داخل اولمق اوزره دیگر المانیا حکومتلرینه دخی مساعده قلمق خصوصلرینه قرار ویرلدی و بونك اوزرینه بر عهدنامه تنظیم و تختم ایله اشبو یکر می بر سنه هجریه سی ربيع الآخرینك اولئاده نشر ایدلدی . و بو معاهده اون الی جرمانیا پرنسلسری طرفندن امضا اولنوب دیگرلری ایچون دخی قبو آچیق ایدی .

ناپلیون بواجراتی آوستریا و پروسیا دولتارینه بیان ایدرك جوابه منتظر اولدینی ائساده مصالح ملکیه یی الدن بر اقمیوب قنالمار و لیمانلر آچمق و کوپر یار و مکتب و خسته خانه یابمق کبی اصلاحات ملکیه ایله مشغول اولمشدر .

بونجه دورلر دنیرو بر ایمپراطورك نظارتی تحتنده بولنان المانیانك بویه بر یوک جزئی مجتمعه رین عنوانیه آیریلوبده ناپلیونك تحت نظارتنه کچمسی المانیا ایمپراطور لغنك الغاسی حکمنده اولمسایه بو عنوانی حامل اولان آوستریا ایمپراطورینك هیچ قبول ایده چکی شی دکل ایسه ده دوچار اولدینی ضعف و پریشانلغه نظراً پونا پارتته نك عمایه نه حرکتیه محالی اولدیغنه و بوندن صکره المانیانك اسکی صورته افرانغدن مایوس بولندیغنه مبنی چاره سز ( الحکم لمن غلب ) قاعده سنجه المانیا ایمپراطوری عنوانندن استعفا ایله مجتمعه رین مسئله سنی تصدیق ایتمشدر .

ایشته ( دوات رومیة مقدسه ) و ( جرمان ملتک دولت رومیة مقدسه سی ) کبی مختلف عنوانلرله یاد اولنان جرمانیا ایمپراطورلنی بو صورته محو اولوب بتمشدر . بودولت باقی اولدینی مدتجه تحت نشین ایمپراطوری اولان ذات ( قیصر ) و روما ایمپراطوری و ( اغستوس ) عنوانلریله یاد اولنور وسائر حکمدارانیه تقدم و تفوق ادعا سنده بولنور ایدی . بروقت دنیرو ایمپراطور عنواننك قرال عنواننه تقدمی

قبول اولنماز اولدینی جهتله بونلر برقوری عنوانلردن عبارت قالوب بوکره اومزیت اعتباریه دخی زائل اولوب کیتمشدر .

محب افندی ربیع الاولک ایکنجی کونی پارسه وصول بولمش فقط استانبولدن بیوک بیوک امیدلر ایله چیقمشیکن اورایه واردقده عکسی معاملهلر مشاهده سیله متأثر اولمش ایدی . شویله که : یوم ملاقاتده محب افدینک ناپلیون حضورنده ایراد ایده جکی نطق رسمی صورتی اولجه کورلمک اوزره طب اولنمغله نامه هایونده کی القابه موافق اوله رق قامه آلمش اولدینی نطقک بر صورتی ارسال اولندقده بونده ناپلیونک یالکتر ایمراطورلق عنوانی مذکور اولوب ایتالیا قرالغی مندرج اولمدیغندن بونک دخی درجی لازم کله جکی طالیران طرفندن اشعار اولنمش و حالبوکه ایتالیا قرالغینک تصدیقی دولتعلیه نک روسیه وانکلتره دولتلریله اولان اتقاقه مغایر اولمق ملاحظه سنه و کندو تعلیماتنده بوکا دائر برشی یازمامش اولمسنه بناء محب افندی بونی تفوهه جسارت ایده میوب شمدی یه قدر دولتین میانه لرنده جریان ایدن مباحثه ایمراطورلق عنواننه دائر اولوب ایتالیا قرالغنه دائر بر بحث کچمدیکی جهتله نامه هایونده مندرج اولان القابدن فضله برشی علاوه ایده میه جکی بیانیله اعتدال ایلمش ایسه ده اوته طرفندن اصرار اولنوب حتی اول اثنا ده ناپلیون طرفندن استانبول ایلجیسی نصب اولنان جنرال سسیستانی برقاچ دفعه بو خصوص ایچون محب افندی یه کلوب کیده رک نهایت ایتالیا قرالغی عنوانی علاوه ایتمز ایسه ایمراطور ایله ملاقات ایده میه جکنی و بلکه هان اعلان حزب ایله دالماجیاده کی فرانسه اردوسنک استانبوله یوریه جکنی بیان ایله محب افندی بی تهدید ایتمشیکن محب افندی مقام معذرتنده ثابتقدم اولیجق اندن فراغته غربک ییلدیزی و بالجمله مللک حامیسی کی عنوانلرک علاوه سی تکلیف اولنمش ایسه ده محب افندی نامه هایونده مندرج القابدن بشقه برشی علاوه ایده میه جکنی قطعاً بیان ایتسی اوزرینه بونلردن دخی اغماض اولنوب فقط آایده کیدرکن فرانسه تشریفاتیجیسی عربنه نک صاغ طرفنده و محب افندی انک صولنده اوتورمق و ناپلیونک حضورینه چیقلدقده اوطه نک اوچ محلنده تمنا ایتک کی شمدی یه قدر سفرای دولتعلیه طرفندن اجرا اولنماش معامله لرک اجراسی تکلیف اولنوب محب افندی ایسه اصول و رسوم قدیمه نک خارچنده برشی پایه میه جنی بیانیله برابر بو آای اکر تشریفاتیجی ایچون ایسه بزم آایده لزومز یوق فقط سیرینه چیقارز و اکر بزم ایچون ایسه تشریفاتیجینک عربده ایشی یوق هان نامه هایونی و ترجمانی آوب کیدرم دیو جواب و یرمکله تشریفاتیجینک صول طرفنده اوتورمسنه قرار و یرلیدیکی بیانیله دعوت اولنوب بیک درلو کشمکشلردن صکره

کوج حال ایله ناپلیونک حضورینه چیقوب نامه هایونده کی القابه موافق بر نطق رسمی ایراد ایدرک رسم ملاقات اجزا اولنه بیامشدر . لیکن فرانسه مأمورلری بونطقی فرانسه نك مونیتور نام رسمی غزته سنه مبحوث عنه اولان سالف الذکر عنوانلری دخی کندولکلرندن اوله رق علاوه ایله طبع ایترمشدر .

هدایای هایون ایچنده پوناپارته نك اوکی اوغلی اوژنه دخی بر قوطی اولوب انحق بو ائشاده اوژن ایتالیا قرالی قائمقامی بولمغله بودخی ایتالیا قرالیتی بحثی میدانه قویمغه وسیله اولور اندیشه سیله محب افندی بونی کتم ایله در سعادت عراض حال ایتمش ایدی . رئیس الکتاب واصف افندی ایسه اول ائشاده فرانسه طرفه مائل اولان طاقه پیشرو اولدیغندن محب افندی یه یازدیغی جوابنامه ده ایتالیا قرالیتک تصدیق ایچون بو قدر طیانق لازم کلز دیو اشعار ایلمش اولمسی او زریته مذکور قوطی دخی پرنس اوژنه ویرملک او زره موسیو طالیرانه تسلیم قلمشدر .

محب افندی کراراً طالیران ایله کورشدکده مقدم ومؤخر فرانسزلرک باب عالی یه ویردکلری مواعید سالفه الذکره دائر برشی آچمدن بشقه سز روسیه لویه مساعد اولدیغکلز قدر بزه دخی مساعد اوله جقمیسکلز دیو تعریض یوللو ایرادینه باشلامش اولسنه وسباق و سابق احواله نظراً فرانسزلرک مرامی دولتعلیه یی متقلرندن بتون بتون تفریق ایله حرب و صلحه استدکاری وجهله اعمالدن عبارت اولدیغی کرکی کبی اکلاشلمش اولدیغی ائشاده را کوزه مسئله سی ظهور ایلمشدر .

شویله که : بوجه بالا جزائر سبعة جمهوری دولتعلیه حایه سنه براغیلهرق بونده روسیه لونک یالکز ضمان و کفالت حق اولوب لدی الحاجه جزائر مر قومه یه عسکر ادخالی لازم کلدکده طرفینک اتفاق واشتراکیله کوندرملک عهداً مشروط ایکن روسیه لو قورفده کی عسکرینی چکمیوب جزائر مر قومه یی بیانی بنسه مش و قره دکزده کی روسیه دونماسنک ینه استانبول بوغازندن آقدکزه امرارینی استیوب بوایسه دولتعلیه نك التزام ایلدیکی بیطرفلق اصوله مخالف اولدیغی جهتله دولتعلیه بوکا مساعده ایتماشیکن اره صره قره دکزدن سفینه لرله قورفده عسکر امرارورعا یی دولتعلیه دن دخی بر چوغنی اطماع ایله بو عسکره الحاق ایدردی دولتعلیه روسیه لونک بو معامله لرندن دلگیر اولدیغی حالد قورفده طرفنده کی روسیه امیرالی کلوب قطاروی ضبط ایلمسی او زریته پوناپارته دخی دالماجیاده کی عسکرینی دو بروونیک جمهوری او زریته سوق ایله بغمه مقرر حکومت مملکت اولان را کوزه قلعه سنی ضبط واستیلا ایتردیکندن مجراً انکلیزلر و برآ بر قاچ بیگ روسیه عسکر یله کلیتلوقره طاغلولر کلوب را کوزه یی محاصره وتضیق ایتملریله اول جوارده بولسان جنرال

مولیتور درت بیك فرانسیز عسکر یله امداده یتیشوب قره طاغولوری پریشان ایلدی و بووقعه ده قره طاغولورک پک زیاده تلفاتی اولدیغندن ارتق طاغله چکلمه که مجبور اولدیله فقط روسیه لور قطارو طرفنده طیانوب قالدیلر .

بوسنه والیسی خسرو پاشا طرفندن کیفیت باب عالی یه عرض و انها اولندقده دولتعلیه پک زیاده منفعل و متأثر اولدی زیرا روسیه لو دولتعلیه ایله منفق ایکن بر طرفدن صربلوری عصیانه تحریک ایتدیکنه قناعت ایتیموب بر طرفدن دخی قره طاغ رعایاسنی اضلال ایله کندو عسکری کبی اعمال ایتسی شعار اتفاقه مغایر برحالت ایدی . ناپلیون دخی بروقدنبرو دولتعلیه نی ادعای دوستی و مصافات ایله جلب و تألیفه چالیشور ایکن دولتعلیه حمایه سننده اولان بر مملکتی بغته استیلا ایتسی بو ادعاسنه مغایر اولدقدن بشقه دو برو و نیک ایله دالماجیاره سننده هر سگ سنجاغنگ طولانی و قلیق لیمانه منتهی اولور بر قطعه سی اولدیغندن فرانسیز عسکری دالماجیادن دو برو و نیک مملکتنه مرور ایچون بو اراضیدن کچمشیدی . حالبوکه بلا استیذان بی طرف بر دولتک حدودینه عسکر صو قق عادتاً اعلان حرب عد اولنه بیله جک بر کیفیتدر . لکن دولتعلیه نك اول حوالیده بیطر فلغنی محافظه یه کافی قوتی اولدیغندن چاره سز ینه بی طرف طور مغه و فقط ایکی طرفه دخی سر تجه لسان قوللانمغه مجبور اولدی و بو یولده پارس ایلچیسینی محب افندی یه دخی تعلیمات کوندرلدی .

محب افندی ایسه اولجه بوماده بی غزته لرده کورده رک فرانسه دولتدن لدی السؤال روسیه لو قره طاغ اهلایسنه کیتلو اچقه ارسال ایله طرفنه جلب ایدرک بالانفاق دو برو و نیکی ضبط ایتلمی محتمل ایدی و روسیه لور ضبط ایتدکری یری بردها ترک ایتمز لر بو کاقریم و قورغه دلیل کافیدر و روسیه لو دولتعلیه نك دوستی اولیموب صربلوی مستقل و قورغه کبی دو برو و نیکی دخی زیر تصرفه داخل ایتدکدن صکره کوزی موریه ایاتنده در بوجهتله فرانسیز عسکری را کوزه یه کیروب اهلایسنی تأمین ایتدیله روسیه لو قورغه بی تخلیه ایتدیکی کبی دو برو و نیک کافی السابق دولت علیه نکر دیو جواب ویرلمسی اوزرینه محب افندی بوماده اصول سلم و صفوتک خلائی و حقوق ملله منافی اوله رق زیاده تأسفی جالب و بوسنه اهلایسنک وحشتنی موجب حالاتدن اولدینی بیانیله موسیو طایرانه سرزانتس یوللوخیلی سوز لر سویلیدیکی کبی در سعادتده دخی روسیه ایلچیسيله فرانسه مصداحتکذارینه خیل شدتلو لسان قوللانمش ایسه ده مفید اولیموب ایکی طرف دخی کندو پولتیقه لرینه کوره حرکتدن خالی اولدیله . و محب افندی طایران ایله تکرار کوریشوب بورالره دائر سوز آچیلدقده موسیو طایران گاه صربستان سر بسینتک مضر تندن بحث آچهرق و گاه دولت علیه بو قره طاغه



بر نظام و رابطه و یرمیلدر دیو نصیحت ایدرک کندولرینک یولسز و حقسز حر کتلیری  
ستر ایدر و عنان بجئی بشقه جهته صرف و اماله ایلر ایدی .

حالبوکه ناپلیونک پک چر کین ایشلرندن بریده بوماده در دینسله بیلور . زیرا  
دولت علیه نیک الی ابتدا و یرمش اولدینی حمایه امری اشبو دو برو و نیک جمهورینه  
و یریلان فرمان عالی اولوب بوقدر یوز سنه دنبرو دولت علیه بونک بر حرفتی تغییر  
ایتمدی بوجهته دو برو و نیک اهالیسی بحرأ و برأ دشمنلرندن امین اوله رق راحت  
و آسایش اوزره یاشادیلر . و مقدماتا ردوسده و مؤخرأ ماططه ده بولنان قوالیرلر اهل  
اسلام سفائننه و غرب و اجاقلری قورسانلری خرستیان کیملرینه تعرض ایده کلککلرندن  
آق دکزده برملتک سفائن تجاریه سی امنیت اوزره کشت و کذار ایده مزایکن  
دبرو و نیک سفینه لری حمایه دولت علیه ده بولندقلری ایچون اهل اسلام قورسانلرندن  
امین اولدقلری کبی اهالیسی خرستیان اولدقلرندن قوالیرلر طرفندن دخی امین  
اولملریله سبته بوغازینه قدر آق دکزده سربست اوله رق کشت و کذار ایدرلردی .  
بناء علیه دو برو و نیک بر کوچوک جمهور ایکن اولوقت ایکی بیک قدر تجار کیملری  
وار ایدی . بوجه مشروح ناپلیون بغیر حق بوراسنی ضبط ایتمکله مؤخرأ آوستریا  
دولتی یدینه کچوب حالادولت مرقومه یدنده در . ایشته دو برو و نیکلر بوججهله  
سربستی و استقلاللرینی ضایع ایتمدیلر و شممدی موجود اولان تجار سفینه لری ایکی  
یوزه بالغ اولماز . بونجه یوز سنه لر دنبرو حمایه دولت علیه ده بویله کوزل حالده  
یاشامش اولان بر خرستیان جمهورینی بعته کلوبده ضبط ایتمک تقدر حقانیت و انسانیت  
مغایر بر کیفیت اولدینی محتاج تعریف دکلدر . فقط ناپلیونک چشم انصاف و بصیرتی  
پرده کبر و تعظم قاپلامش اولدیغندن بویله شیلره هیچ اهمیت بیله و یرمیه رک اجرا  
ایدیورلردی .

الحاصل دولت علیه بورا کوزه ماده سنندن طولانی پک زیاده منفعل و متأثر اولوب  
انجق بوانشاده مصالحه عمومیه احتمالی کوندن کونه قوت بولمقده اولدیغندن بونک  
نتیجه سنه انتظار ایله تجرع داروی اصطبار ایلمکده ایدی .

وروسیه لو قورفه و قطار و ده کی اردولرینه تقویت و یرمک اوزره کافی السابق  
قره دکزده کی دو نمانسی استانبول بوغازندن کچورمک استدکجه دولت علیه ایکی طرفله  
دخی مصالح اولدینی بیانیه اعتذار ایتمکده و انکلتره لو اتفاق معاهده سنک تجدیدینی  
تکلیف ایلدکجه انی دخی لیت و لعل ایله آو و تمتمده ایدی . روسیه و انکلتره دولتری  
ایسه بوندن منفعل اوله رق انواع وعد و وعید ایله دولت علیه بی فرانسه یه تمایلدن  
کلیاً منعه چالیشیورلردی .

و ناپليون اوسترليج جنكندن صكره كندوسنك درجه اقتداري درك و تقدير ايله بويلا بارلاق وقتنده اوروپاچه جاكيكر ضميري اولان نياتنك مركز مظلومه ايصالي امرنده دولت عليهي دخي دائره اتفاقيه الوبده اعمال ايلمك ااملنده اولديغندن بوكره اك زياده كوونديكي جنرالاردن سباستياني بي در سعادت ايلچيسي نصب ايدوب دولت عليهي انكلتره و روسيه دولترلي عليهنه تحريك ايلمك اوزره كندوسنه تعليمات اكيده ويرمش ايدى . قطارو ايشلرينه اهميت ويرمسي دخي مجرد ايجابنه كوره دولت عليهي تهديد ايله دائره اتفاقيه الموق و لدى الاقتضا دولت عليهنك امدادينه يتشمك مطالعه سنه مبنى ايدو كندن اولطرفده جنرال مارمون معيتمده كي يكرمى بشيك نفر دن مركب اولان فرقه بي لازم كلان محله سوق ايتمك اوزره سباستياني به ماذونيت ويرمش و دولت عليهي كندوسيله اتفاقيه مجبور ايتمك اوزره روم ايلي بي بر حال اغتياش و اختلاله دوشورمكه چالشمسنى تنبيه و سلطان سليمه بر نامه يازوب لهستان دولتلك احياسندن و مكنت سابقه دولت عليهنك تجديدنن بحشه تدافى و تعرضى بر اتفاق عهدنامه سى تنظيمى تكليف ايتمش ايدى .

روسيه مرخصى دو بريل دخي خلال ربيع الآخرده پارسه وصول ايله همان مصالحه مكالمه سه ابتدار ايدرك آز وقت ظرفنده بر مصالحه نامه تنظيم و طرفيندن امضا اولندوقدن صكره لاجل التصديق پترسبورغه كوندرلديكي كبي فرانسه لو برآن اول نهدينه جك ايسه دينلوبيده مصالحه مكالمه سنه برتيجه ويرمك اوزره انكلتره لودن قطعى جواب استمكله بر وقتديرو فرانسه و انكلتره دولترلي بيننده من غير رسم جريان ايدن مكالمه صورت رسميه به تحويل اولنه رق كسب اهميت ايدى . حالبوكه بو ائنده انكلتره باش و كيلى موسيو فوقس وفات ايتمكله انكلتره ده ايش ينه حرب استين كروهك اننه كچمش اولمسي مصالحه نك حصولى حقدده پك چوق اشتباهى موجب ايدى . و دو بريل كندو تعليماتى اقتضاسنجه انكلتره مرخصيله بالاتفاق مكالمه به دوام ايتمكه مأمور ايكن طاليرانك لسانه الدانوب مذكور مصالحه نامه بي خود بخود تنظيم و امضا ايلمش اولديغندن انكلتره دولتى بونك روسيه ايمپراطورى طرفندن تصديق اولنماسى ايجون صرف مساعى ايتمكه ايدى .

پروسيا دولتى دخي مصالحه عامه حصول بولديغى تقديرده دول اوروپا نظر ننده پك حيثيتسز قاله جغنى تفكر ايتدكجه صبر و تحمل قالمبوب همان باش قالدرمغه باشلادى . و بوجه بالا رين مجتمعه سنك تشكيانده كندوسنه خبر بيله و يرلميه رك المانياچه بويلا تبدلات جسيمه اجراسى و انكلتره مرخصيله پارسده جريان ايدن مكالمه ده هانوره نك انكلتره قرالنه ردى فرانسه لو طرفندن وعد اولنديغى انكلتره لونك

خبر ویرمسی پروسیالونک صبر و آرامنی سلب ایدرک همان تدارکات حربیه به قیام ایلدی . و پروسیا اهابلیسی دولتک حربه میلیی اکلادقلرنده آشوری مرتبه ممنون اوله رق پروسیانک هر طرفده فرانسه به قارشو محاربه صدرلی ایشیدیلور اولدی . ناپلیون بو حاله لدی الاطلاع پروسیا دولتندن ایضاحات طلب ایلدکنه پروسیا اهابلیسنک حدتتی تسکین ایچون ترضیه یوللو معامله طاب اولندی دیگر طرفدن دخی انکلتراه لونک تحریکله بر وجه بالا دوریک امضاله مش اولدینی مصالحه نامه بی روسیه امپراطوری قبول ایتموب فرانسه نک قبول ایده میه جکی برطاقم تکالیف درمیان ایلدی و بوتکالیفده انکلتراه لو دخی شریک اولدی .

وناپلیونک فامنک قرالی نصب ایلمش اولدینی برادری هر وجهله آنک دلخواهنه توفیق حرکت ایتمک لازم کولور ایکن فامنک اهابلیسنک حسن توجهنی جلب ایچون برادرینک پولتیقه سنه مخالف حرکت ایدرک اول طرفده بیاغی آکا برانکل اولغاه بوندن طولاینی دخی بوناپارته منفعل و منزعج ایدی .

بوانتاده ناپلیون پارسده بولتان پروسیا مرخصنی زیاده تلطیف ایدرک تأمینات کافیه ویرمش ایسه ده پروسیا دولتی فرانسه عسکرینک همان رین نهرینک صول یقاسنه کچمنی ورین مجتمعه سنه مقابل المانیای شمالیده پروسیا دولتی دخی کندو ریاستی التنده اوله رق برهیئت اتفاق تشکیکنه قرار ویرمش اولدیندن بوکا فرانسه لونک ممانعت ایتماسنی امر یوللو طاب و تکلیف ایتمکله برمدتدنبرو هر کس مصالحه عمومی انعقادینه منتظر ایکن دفعه هوا دکیشوب افق پولتیقه بیینه محاربه بولو طبری قاپلادی و چند روز طرفین مکالمه دن فراغت ایله سکوت اوزره طور دقدنصره ایلول فرنیکنک یکر می برنده پروسیا قرالنک اردوسنه عزیمتی اعلان حرب عد اولنهرق بوناپارته دخی پارسدن حرکت ایلدی .

پروسیالو اوستریلیج محاربه سندن اول دول متفقه ایله برلشمش اولسیدی فرانسه اردوسنی عظیم مخاطرات و مشکلاته اوغراده بیلوردی اما شوصره ده فرانسه لو ایله جنکه کیرشمسی کار عاقل دکل ایدی . زیرا آوستریا دولتی ضعف حالی حسینله بی طرف طور مغه مجبور اولوب روسیه واسوج عساکری دخی کندی حدودلری داخلنه چکلمش اولدقلرندن وقت احتیاجده پروسیانک امدادینسه یتیشه میه جکلر ایدی و پروسیالور کندو قوتلرینه زیاده کونمکده ایدیسهرده بوناپارته نک قوته و انضباط و انتظام اداره سنه نظراً پروسیانک حالی پک اشاغی ایدی . وناپولیده واقع غایته نام قاعه مشهوره طیا تمقده وقلایر سنجاغی اهابلیسی حال عصیانده اوله رق فرانسه نک برفرقه عسکریه سنی خیلی وقت مشغول ایلمش ایسه ده بوانتاده قاعه مذکور

ضبط ایله بوعصیانک اوکی التوب امداد ایچون ساحله چیتان سکزیک انکلین  
 عسکری دخی دفع وطر د اولنه رق اول جهتدن فرانسزلر امین اولمش وبتون ناپولی  
 ممالکی فرانسه لویدینه کچرک سیجلیا جزیره سنک ضبطه تثبت ایلمش ایدی .  
 وپروسیا ایله قطع مخبره اولندیغی ائنده فرانسه نکرین مجتمعه سی ایله ایتالیا اردولردن  
 بشقه درتیوز بیک مساح عسکری اولوب یوز اوتوز بیک الپ طاغلیرنک اوتیه طرفده  
 ویوزیتمش بیک المانیاده ویشیک فلمانکه ویوز قرق بشیک فرانسه داخلنده ایدی .  
 دور بیک امضا ایلمش اولدیغی سالف الذکر مصالحه نامه ده دولتین متعاهدتین  
 دولت علیه نکر امنتی ایچون یکدیگره متعهد اولق وروسیه لو قورفهی تحلیه ایله  
 جزائر سبعة دولت علیه حکومتی تحت ادخال اولق فقره لری مندرج اولدیغندن  
 موسیو طایران محب افندی ایله ملاقاتنده روسیه ایمپراطورینک مصالحه بی تصدیق  
 ایتماسی شوایکی ماده ایچوندر دهرک دولت علیه بی روسیه عایهنه تحریک ایدوب  
 پارسده کی انکلتره مرخصی دخی روسیه لونک انکلتره دولتیله متحد وانکلتره لونک  
 هر وجهله دولت علیه خیر خواه اولدیغی بیانیله مصالحه نامه نکر امضا اولنماسینه  
 سبب بوایکی ماده دکدر دیو محب افندی یه تأمینات تحریریه ویرمشیدی . دولت  
 علیه ایسه ایکی طرفی دخی اسلوب حکیمانله ایله قوللانهرق بی طرفلقده دوام ایتمک  
 استر وامور عسکریه سی بک مشوش برحاله بولندیغنه مبنی محاربه یه کیرشمکدن  
 اجتاب ایلر ایدی . حالبوکه چاره سز ایکی طرفدن بری قیریله جق زمان یاغلاشمقده  
 اولدیغندن دولت علیه بر موقع مشکله ایدی .

شویله که : بالاده بیان اولندیغی اوزره قاضی پاشانک و جبار زاده نکر غیرتلیله نظام  
 جدید اصولی اناطولیده ایچه یرلشهرک بونک روم ایلی جهته دخی تعیمی سلطنت  
 سنیه نکر امل مخصوصی ایدی . حالبوکه نظام جدید عسکرینک کوندن کونه  
 تزیادی گروه مخالفینک کوزلری طولدرمش ویکچریلرک رقابت وعداوتی بر  
 مرتبه دها آرتمش وروم ایلی جانبنده دخی اجرا اولندیغی تقدیرده آرتق هر  
 طرف نظام جدید عسکرینک قبضه ضبط وربطنه کچرک اسکی اوجقلرک بالطبع  
 اعتباردن ساقط اوله جنفی مطالعه سی یکچری طاقنی تلاشه دوشورمش ایدی  
 چونکه اوجقلرک قوانین و نظاماتی کاملاً بوزلمش اولدیغندن یکچری اورطلری  
 لدی ایجاب نفیر عام صورتنده تجمع ایدرک محاربه لرده برایشه یارامز اولدقلری  
 حالده خزینة بیت المالدن مواجب نامیله شوقدر بیک کیسه لر صرف اولتمقده ایدی  
 نظام جدیدک تعیمی تقدیرنده بومقوله سوء استعمالانک بالطبع بر طرف ایدیله جکی  
 درکار اولمسیله نظام جدیدک نفراتنک تکثرندن یکچری گروهی دوچار فکر

واندیشه ایدیلر . بونکله برابر نظام جدیدک تعمیمی و دینده پاسبان اوغلی و روسجقده تر سنکلی اوغلی و ادر نه ده طاغ دویرن اوغلی کبی بر طرفده تعلب و تحکم ایدن دره بککرینک ایشلرینه الویرمه جکی جهته بونک روم ایلی به سرایتندن متوحش ایدیلر . بوجه بالا روم ایلی والیسی صر پستان اوزرینه اعزام اولندیغی کبی بوسنه عسکری دخی صرپ اوزرینه مأمور اولدیغی خالد روسیه لولر قره طاغلولری تحریک و اغوا و فرانسزلر دخی بوسنه اراضیسندن مرور ایله دوبرو ونیکی استیلا ایتلمی اوزرینه احتیاطاً بوسنه عسکرینک چونغی اول طرفه کوندر ملک لازم کلدی .

شوحالده دولت علیه نه یولده حرکت ایتک لازم کله جکنه دائر اتابکان دولت علیه نک لواج خاطر لرینی تحریراً بیان ایتلمی ایچون اراده سینه صادر اولغله هر بری برر لایحه قلمه آلب جمله سی بردن حضور هایونه لدی العرض کتخدای صدر عالی ابراهیم نسیم افندیکنک لایحه سی استحسان بیورلمشیدی . خلاصه مضمونی ( عساکر شاهانه باشوغی اولان قرمان والیسی وزیر قاضی عبدالرحمن پاشا عساکر و افره ایله روم ایلی به امرار و ظاهرأ صر پلر علیه نه اوله رق قرق الی بیکنک عسکر دن عبارت برارد و جق ترتیب ایله صوفیه یا خود ادر نه ده اقامه اولنوب اگر مسقولو نقض عهد ایله قلاع خاقانیه به تعرض ایدرسه دولت علیه اردوسی حاضر بولمغله مدافعه به ابتدار ایدملک و اگر فرانسهلو خیر خواهلق یولنده دولت علیه نک تسبیدن بحث ایدرسه سلطنت سنیه نک قوتی کالده در یالکزر کندو رعایایسندن اولان صر پلولر اوزرینه ادنی همتله بو قدر معلم عساکر ایله براردو ترتیب ایلدی لازم کلمورسه روسیه لونک مدافعه سی دخی قابلدر جوانی ویرملک و بو ایکی صورته دخی حاجت مس ایتز ایسه بواردو صر پستان اوزرینه سوق ایله عاصیلر تادیب اولنه رق یار و اغیاره قارشو قوت و سطوت کوستر ملک خصوصاً سندن عبارتدر .

بونک اوزرینه قاضی پاشانک عساکر و افیه ایله در سعاده کلیسی ایچون کندوسنه امر عالی کوندر لدی مع مافیه بو وسیله ایله نظام جدیدک روم ایلی به تعمیمی دخی مصمم ایدی . بناءً علیه بوستانجی باشی معزوللرندن کمشخانه امینی احمد اغا در سعاده جلب و ادر نه بوستانجی باشیسی نصب اولنه رق ادر نه به کوندر لمش و چونکه فی الاصل ادر نه سرای هایونی بوستانجی او جاغنک نفقاتی حد کفایه ده اوله رق اطراف و انجایی محافظه ایده کشلر ایکن رفته رفته نظام و رابطه لری خلل پذیر اولغله ایشه یرامن اولوب استانبول ایله ادر نه اره سنده بر طاقم حشرات و قطاع طریق پیدا اوله رق اهالی و اینسای سیله اطلاع دست مضرت ایدر اولدقلرندن بونلرک نفقاتی بیکنه ابلاغ و نظام لری ایشه یارایه جق بر قلب مستحسنه افراغ اولنلق اوزره احمد اغایه تعلیمات

ویرایش ایدی که مقصد خفی ادر نه‌ده دخی بوستانی نامیله بر اور طره عسا کر معلمه  
ترتیبی ایدی .

ونظام جدیدک روم ایلیجه ابتدا تکفور طاغنده اجراسی ایچون برقطعه فرمان  
عالی کوندر بلوب حاکم افندی فرمانی قرائت ایله مضمون منیفنه اطاعت فریضه  
ذمت اولدیغنی افاده ایدیجک یکچر یلر هجوم ایله حاکم افندی بی اعدام ایلدکرندن  
برقاج قالیون ارسال ایله بحرأ تکفور طاغی قصبه سنک تزییقنه ابتدار اولندی .

عبدالرحمن پاشا واسط ربیع الاولده عسا کر کلیه ایله اسکداره کلوب برمدت اکیال  
لوازمات ایله مشغول اولدقدنصرکه سواری وپیاده یکر می درت بیک عسا کر معلمه  
ایله ادر نه طرفه کیتمشدر وادر نه یه عزیمتدن مقدم چند دفعه حضور هایونه چیقوب  
هرقدر صدر اعظم اسماعیل پاشا دخی بو بایده مخالف رأیده ایسه‌ده سلطان سلیم خان  
حضر تلی بو خصوصه ثبات ایده جکی بیانیه عبدالرحمن پاشایه حسارت ویرمشیدی .  
حتی بر دفعه عبدالرحمن پاشایه خطاباً ( بو نظام جدید ماده سی مستلذات نفسانیه دن  
دکل که آنکله ذوقیاب اولیم بوندن مرام مجرد اعدایه مقابله بالمثل ایله اخذ انتقام  
ومالک مقصوبه بی استرداد ایله ینه دار اسلام ایلمکدر عوام ناسک بودقیقه دن غافل  
اولسی هله یگ غریب معنادر ) دیو بیورمش اولدیغی مرویدر .

انجیق ابراهیم نسیم افندی طقوز سنه دنبرو صدارت عظمی کتخدالغنده بولنوب  
فرط اقبال واستقلال اوزره فتنق ورتاق امور وحل عقد مصالح جمهور ایدرک صدر  
اعظملر برآت ملاحظه قیلندن بولندیغنه مبنی رقبسا وخصامسی چوغالوب بروجه  
مشروح بوکره دخی آنک لایحه سی تحسین بیورلمغه خصما سنک حسد وعداوتی  
برقات دها ترقی بولمشیدی . صدر اعظم اسماعیل پاشا ایسه استقلال داعیه سنده  
بولنورق متفندان رجال سلطنتک اقبال واعتبارینی وعلی الخصوص ابراهیم کتخدانک  
اطوارینی چکه میوب دفعارینه سعی ایتمکده اولدیغنی حالده طرف شاهانه دن صورت  
موافقت کورمدیکی جهتله مغبرالخططر و بوکره قاضی پاشا کر راحضو هایونه دخول  
ایله مظهر حسن قبول اولدقده آنی دخی استرقاب ایله منفعل ومتأثر اولمشیدی .  
وسالطان سلیم خان حضر تلی صدر اعظم ایله ابراهیم کتخدانک میانه لر نه کی میابته  
مطلع اولدقده برکون صدر اعظمه ( بزم ابراهیم کتخدایه غایت صادق ورشد  
ورویته وایشکذارلقده اقرانه فائقدر ) دیهرک حسن ایئتلاف وامتراجلرینی  
توصیه ایلمش ایسه‌ده مرکز مصالح دولت اولان باب عالینک نفوذینی پایلاشمق  
مشکل اولدیغندن کتدکجه اره لر ی آچلمش واسماعیل پاشا سبکمغز وحر یص جاه واقبال  
برآدم اولدیغندن ابراهیم کتخدای دوشورمک ایچون هر در لوفالقری کوزینه آمشیدی .

بناءً عليه اولوقت روم ایلی اعیانلرینک سرفرازی اولان روسجق اعیانی ترسنکلی اوغلی اسماعیل اغایه مخصوصاً آدم کوندروب دائرۂ سلطنت سینهده تنفذایدن رجالی افنا ایتدکنصکره برلکده دولته نظام ویرمک اوزره خیرخواهلق یولنده آنی اتفاقه دعوت و اودخی اجابت ایله روم ایلی اعیانلرینی اضلال و افساده مبادرت ایتمش قاضی پاشانک او یله بر مکمل اردو ایله ادرنه جانبنه حرکتدن ایسه روم ایلی اعیانلری ذاتاً متوحش اولدقلرندن ترسنکلی اوغلنک القاتنی در حال قبول ایله مستعد فساد و اختلال اولدیلر . وقاضی پاشایه سدممانعت اولمق اوزره هر طرفدن حرکتله ادرنه حوالیسینده تحشد و تجمعه باشلادیلر . و مقدماتیار پاشای عصبانه تحریک ایدن شهزاده سلطان مصطفی طرفدارانی اولوقت جزای سزالرین کورمامشی اولدقلرندن بوکره دخی فساده اجتسار ایدرک مشار ایله صدر اعظم میانه لرنده براتفاق و یکجهتی حاصل و خلافکیراندن اولان موالی و رجال ایله خفیف الذهن اولان یکچیریلری دخی بودائرۂ اتفاقه داخل ایدوب شهزاده مشار ایله لسانندن اوله رق یکچیری او جاغنه و روم ایلی اعیانلرینه انواع مواعیدی مخطر و نظام جدیدک رفتنی مشعر کاغدلر ارسال ایله دق باب فتنه و اختلال ایتمکده ایدیلر . و اول ائشاده صدر اعظم طرفدن دیکر ما موریتله روم ایلی یه کیدن خاصکیلر دخی صدر اعظم لسانندن و علی روایه آنک تعلیمی ایله جمله کزی قلیجندن کچوره جکاکر یوللو سوزلر ایله روم ایلی خلقنه دغدغه ویردکلرندن قصبات و قری اهلایسی دخی اورکوب عصبانه قرار ویرمشلر ایدی .

بناءً علیه آزوقت نظر فنده کلیتلو حشرات تجمع ایدرک درجنک اول ادرنه بوستانجی باشیمی اولان سالف الذکر احمد اغای و بابا اسکیمی نام قصبهده بولنان مبايعه جی یی و عبد الرحمن پاشانک بلغراد جانبنه عازم اولدینی بیانیله روم ایلی اعیانلرینه اطمینان ویرمک ایچون با تحریرات باب عالیدن کوندریلان تاتار اغاسنی اعدام ایدیلر . و عبد الرحمن پاشا سلوری یه واردقده اهلایسی عصبان ایله مقاومتی قیام ایتدکلرندن قوه جبرییه اعمالیله تربیه ایدلمشرا یکن ایلر و یه حرکت اولندقدده چورلی اهلایسی دخی عصبان ایتدی . و اگر چه بویله مکمل بر اوردویه دکل بو قضالرا هالیسنک بلکه ادرنه ده مجتمع اولان هیئت اشقیانک دخی مقاومت ایدمه جکی درکار ایدی و عبد الرحمن پاشا اردوسی ذخیره جه مضایقه یه دوچار اولوب بحرأ نقل ذخائر ایچون شاهراد اولان تکفور طاغنده دخی اختلال ظهور ایلمش ایسهده اردوی هایون استانبولک قرب وجوارنده بولمق حسیله هر طرفدن ذخیره جلی قابل اولور و تکفور طاعی قصبه سی بر طابور نظام جدید عسکریله اله آله بیلور ایدی . فقط استانبولده دخی یکچیری

کرومی فتنه و فساد اماره لرینی کوستر مکده اولدیغندن وهم وتلاشه دوشیله رکه بوبابده  
 قوه جبریہ اعمالنه ابدار اولدینی تقدیرجه برطام اطفال وعجزه نسوان پایمال اولور  
 بوکا دخی رحم و شفقت پادشاهی قائل اولماز دیو اردونک سلوری به اعاده سی امر  
 اولدی بوايسه کروه اشقیانک شمارسنه سبب اولوب حتی عبدالرحمن پاشا سلوری به  
 عودتنده مجلسنه داخل اولان سلوری اعیانی اشایی مصاحبنده پاشایی غافل اولوبده  
 اعدام ایدیور مک غرضیله یاننده کی چیفته قورشون ایله مملو طبانجه سنی پاشانک اوزرینه  
 صیقمش ایکن بحفظه تعالی قورشون اصابت ایتیه رکه پاشا قورتیلوب شقء مرقوم  
 درحال اعدام اولمشدر .

ایشته بواننده ترسنکی اوغلی اسماعیل اغا دخی چفتلکی بغچه سنده چنکی اوینادر  
 ایکن قتل و اعدام اولمشدر رینه کندو پرورده لرندن علمدار مصطفی اغا روسجق  
 اعیانی اولوب انجق زور بازوی قوتنه استناد ایله تبرطم ایتیه رکه عرض محضر تقدیمیه  
 برطور ملامانه اوزره تحصیل رضای دولته مسارعت ایله داب ادبه رعایت ایلدیکندن  
 بووجهله رضا جویانه حرکته مکافاة عهده سنه میر آخور اول پایه سی احسان اولمشدر .  
 وترسنکی اوغانک قاتلی اله کیمیوب فقط مقدا کندو خدمتده ایکن زخم خورده  
 رنج و آزاری اولان برفدایی اولدینی تحقیق اولمش و بیراقدار مصطفی اغا مؤخرأ  
 مقام صدرته کلدیکنده بوقاتلک مغنیسه اده اولدیغنی خبر آلهرق قره عثمان اوغلی  
 واسطه سیله کتوردوب روسجغه ارسال ایله محل قتلده اعدام ایتدییره رکه افندیسنک  
 انتقامنی آلمشدر .

ترسنکی اوغلی سرچشمه فساد اولمغله آنک بووجهله وقوع قتل و اعدامی کروه عصانه  
 بادی خشیت اولهرق ادرنه جمعیتنه خیلجه تزلزل کتورهش و سیروزی اسماعیل بک  
 دخی ادرنه به کاه رکه کاه لطف و کاه عنف ایله بونلری یرلو رینه اعاده ایچون خیلی  
 غیرت کوسترمش ایسه ده استانبولده کی خلافا کیران پیدرپی کندولرینه خفیاً تحریرات  
 ارسالله تحریکدن خالی اولدقلرینه مبنی کیتدکجه آتش فتنه و فساد علو کیر اشتداد  
 اولهرق هوا دیکشوب قرنای سلطنت و وکلای دولتن اون کشینک اسملرینی یادایله  
 بونلر اعدام اولمغجه طاغمییه جقلرینی ایراد ایدر اولدقلری و بر ایکی هفته خطبہ نی  
 اختصار ایله نام واجب الاحترام حضرت خلافتناهی نی اسقاطه اجتسار ایلدکلری  
 اخبار موحشه سی خیر خواهان سلطنت سنییه بادیء تلاش واندیسه اولدینی ائاده  
 کرک درون استانبولده و کرک جوارنده بولنان بونجه اوباش و طرار و قلاش وقتنه کار  
 مقوله لر ادرنه جمهوری نی استقباله حاضر و چار سو و بزازستان یغماسنه الویره جک  
 وقت فرصته منتظر اولدقلری جهته بتون سکنه دار السلطنه مکدر و متحیر ایدی .



اشته اول آئنده سلسره اياتندن انفصال ايله اناطولى منصبه عازم اولان اغرىبوزلى ابراهيم پاشا زاده بكر پاشا ادرنه دن كچر ايكن بو حال اختلالى لى المشاهده سىروزي اسماعيل بك وديكر بعض خير خواهان سر كر دكان ايله دور دراز محاوره ومذاكره ايدرك فتنه باغيه برطاق مطالب شنيعه لرندن واز كچمك اوزره معقول وموجه صورته اولان استدعاليه مساعده بيوريه جفى وعد وتعهد يله كندولر ينى ارضا واسكات وسبكار جه الغارايدرك درسعاده وصول وحضور هايونه دخول ايله مبادى ومقاصد جمعيتى كوزلجه عرض وافاده وبعض اجوبه ايله دونوب ادرنه يه كيدرك جمهورى اقناع ايله محللرينه اعاده ايتد كدن صكره استانبوله كلوب (مصراع) رسیده بود بلايى ولى بخير گذشت \* زمزمه سيله فتنه نك باصلمش اولديغى تبشيرايمكين كرك كندوسى وكرك اسماعيل بك مظهر التفات وتشريقات پادشاهى اولدى وبعده بكر پاشا ايله عبدالرحمن پاشا دخى منصبلى جانبى روان اولدiler .

عاصم افدى بووقه نك محاكمه سنه دائر اعتراض وجواب يولوب بر بحث يازمش اولديغندن بو محله درج اولنور .

(اعتراض) ادرنه ماده سى ظاهرأ بودرجه اعظام اولنه جق ماده دكل ايكن دولت عليه بوندن كشتى طوفان زده كى مضطرب وبى وكدادن امن وآسايش منسلب اولمق بويه بر كوه تمكين زمين وقار اولان دولت على مقداره لكه شين ونقيصه اولديغى بديداردر . زيرا دولت عليه فقط روم ايلي يه منحصر اولميوب بو جمعيتده ايسه روم ايلينك يالكتر صاغ قولى اهالى سى حاضر واقطار سائر اهالى سنك مدخللى اولديغى ظاهر اولوب خصوصاً استانبول واناطولى خاقي انلردن كناره كير عبدالرحمن پاشا ايسه يكرمى بيكدن متجاوز معلم عسكر ايله شاهين كى حواله لرنده كله كوب قهر وتدمير ايكن اول مقوله جمعيتدن بو قدر باك وپروا بيهوده برمغادر .

(جواب) واقعا وقعه مذ كوره ضمننده دائره بند جمعيت اولنلر صورت ظاهره ده همان قطر مذ كور سكانندن عبارت اولوب لكن فى الحقيقه روم ايلينك اقطار سائر سى وبوسنه وارناودلق واستانبوله درون وبيرون خاقلق اكتريسى وتامى اناطولى مسئوليان دولت عليه مظالمندن يزار اولملا يله وبوبابده اهل جمعيت ايله معنى متفق وبونلرك مافى الضمير لرى فرق جمعيت عندلرنده متحقق اولمغله قبلبرى يكديكره موافق اولديغندن كويا كه بتون روم ايلي واناطولى واستانبول خاقي بوهنكامه ده موجود اولوب بو دعواده يكدل ويكجهت اوله رق مباشر تلى رونمود اولمشدر قالد يكه عبدالرحمن پاشا معيتنده اولان عسكر جديد دخى اكترى كوكلسر زوراكى محرر اولمغله بو خصوصه دلخواه اوزره يارلق ويازارلق ايتمه جكلرى امره مقرردر . زيرا

اناطولیده جبار زاده وسائر تحریر عسکر جدید مأمور لری کیمندن بدل آله رق  
 و کیمنک اسلحه و مهماتی پدر و مادر لرینه چکدیره رک جریمه و مصادره کونه تحریر  
 و جبر و اکراه ایله ترتیب و تسییر ایدوب مصارف عسکریه نامیله معین اولان مال  
 میری بی و مصارف آلات و ادوات دیه رک نفر محررک صاحب لرندن اخذ ایتدکلرینی  
 کندولری اکل و بلع ایلدکن صکره مجدداً مصارف عسا کر مرتبه نامیله قضا لرینه  
 سالیانه ایدوب بو وجهه عبادالهی اضرار و تعذیب و ممالک محروسه نی تخریب ایلملریله  
 عسا کر مرقومه بلده لری اعیان لرینه سبب و بادی دیه رک دولت علیه نک رجال  
 و سرکار لرینه کینه درون لری درکار و او جا قلودن ازید بغض و عداوتله زوال لری  
 خواستکار اولدقلرندن بشقه او جا قلو خیئر لری دائماً اول ساده دل طاقتی فرنک  
 هیئتنه دخول و ترنپته مقوله سی خصائص کافریه بی قبول ایلدیلر . و ناله و فریاد لری  
 طنین انداز سبع شداد اولان مظالم دیده و مزاحم کشیده بر آلا ی ضعیفای عبادک  
 گرفتار دوشاخه جور و بیداد اولملرینه وسیله و مدار اولدیگر زمین لرنده هر بار  
 تضلیل و اکفار ایلملریله بولندقلری قیافت و شئونی عن صمیم البال استقال ایدر لر  
 ایدی و نیجه لری استانبولده و لایترنده ساکن زمره بکتاشیه ایله همسر و آشنا و اقربا  
 اولملریله او جا قلو طرفه قطعاً سوء قصد ایتیه چکلری قرآن حالیله و مقالیه لرندن  
 منتهم و هویدا ایدی حتی نیجه لرینک برادر و برادر زاده و عمی زاده و خاله زاده سی  
 کبی نزدیک و خویشاوندی یکچیری اولغله اول بکتاشیه قشله سنده و کندوسی برو قشله ده  
 اولوب یکدیگره همیشه تردد برله رعایت حق رحم ایدر لر دی خصوصاً بزغزا و جهاد  
 عسکر ی یز اهل اسلام ایله مناصبه و محاربه ایلمک دیمزه الویر مزیدیه رک انلر ایله  
 نزاع و کار زاری رأساً استنکار ایلملریله لدی الاقتضا مصاف ایلملرندن استنکاف  
 ایدیه چکلری آشکاردر و همیشه اندیشه لری دار و دیار لرنده و نشئت ایلدکاری چفت  
 و چبوق مثللو کار و کردار لرنده اولغله استانبولده قشله لر کندولره کرداب کلوب  
 بر تقریبه رهایاب اولمی تمی ایدر لر دی فلاجرم جمعیت مذ کوره برو جانبه خطوه  
 ریز توجه و ورود اولدقده البته استانبولدن و اناطولی کنار لرندن ابتدای وهله ده  
 اول فرقه بی استقبال ایدرک التحاق ایتدکلرنده بونلر دخی هیئت مجموعهلریله قامده  
 آنکیز التصاق اوله جقلری امر مسلمدر . نته کم ذکر ی آتی خلع مسئله سنده ایشه  
 یازامیه جقلری مشهود اولدی پس بودقیقه انیقه پادشاه دل آگاه حضر ت لرینک  
 و اکثر عقلای و کلانک معلوم لری اولغله اول درجده تلاش احداث و ترزل  
 بنیان دولتی ایراث ایدی . انتهی

خلافكيرانك تحريكات والقا آتی ايله تحدث ايتمش ديمك اوله بور وفي الواقع ياختده بر طاقم قهوه خانه ياراشغی اولان يکيجرى ارادلندن تا عصرک صدر اعظمه قدر چوک بيوک بر چوق خلق بويله طرف خلافة اولديغی حالده ايش بوره سهيه کلدکن صکره دها اينروسنه کيتمک مخاطردهن خالی دکل ایدی لکن حکومتک بويله بر امر خطيرده تلون ورخاوت کوسترمسی دهاييوک فناقلری دعوت ايلمشدر. زیرا بر طاقم ارادلک ايتدکری ادبسنلک اوزرينه حکومت اور کوبده يکرمی درت بيک عساکر معلمه يي اعاده ايديو رمسی کندوسنک يار واغيار نظر نده شان ووقارینی پست و بو عسکر جديدک ناموسنی شکست ایلدی بوندن صکره بو عسکرله دولت نه ايش کوره بيلور ويکيجرى ارادلک اوکی نصل آتور ايشته بعده ظهوره کلان خلع سلطانی وقعه خيعة سی حکومتک بومثالو تلون ورخاوتيله حادث اولان مقدماتک نتیجه طبيعیه سيدر و بلکه سلطان سليم بواردونک عودتی کونی معناً تختندن دوشدی دینه بيلور دولت پايه جغی ايشی اولجه عريض وعميق دوشونمليدر اما اجراسنه تشبث ايتدکن صکره کيروله مسی نقيصه شان ونفوذی موجب وانواع مخاطراتی جالب اولور مبادیء احوالده يکيجر يارک فسادندن خوف اولنسه يری وار ایدی اما نظام جديد عسکری بومرتبه تکثير اولندقدن صکره ارتق نچون قورقلی قاضی پاشانک اسکداره ورودنده کرک اسکدار يقه سنده وکرک لوند چفتلکننده موجود اولان سوارى و پياده عساکر معلمه نک مقدارى اوتوز بيکه بالغ اولمشیدی نظام جديد عسکری هنوز بومرتبه لرده بالغ اولما مشیکن عکا ومصر سفرلرنده اثبات لياقت ايتدکن بشقه بالاده بيان اولنديغی اوزره بونلرک بر چوک فرقه سی کيلتو طاغلو اشقياسنه غلبه ايله حدلرینی بيلدرمش اولدقلرندن بونلرک ايشه يارايه جقلرينه بشقه دليل استمزدي وعبدالرحمن پاشا اردوسنک ادرنده کی قارغه درنکنه مشابه اولان جمعيت حشراتی بر جمله ده برباد وپريشان ايدجکی بی اشتباه ایدی فقط اول باول استانبولده کی دولت خائنلرينک ترتيب جزالری الزم ایدی و بلکه ده اول زققلرده نظام جديد نفراتی تحقير وتکفير ايدن ارادلی تأديب ايدوبده ايشک بوره سهيه کلمسه ميدان ویرماملیدی و ايجلرندن برازی تأديب ايله سائره عبرت کوسترلمش و اويله دولت خائنی اولان اکا بردن بعضيلری دخی تأديب ايدلمش اولسیدی هرکس دها اولوقت ادبی طاقينور ایدی واحتمالکه بومثالو اجراآت شديده اوزرينه يکيجر يار برفته احداث ايدرلردی لکن نه اوله جق ايسه اولور بتر ونظام جديد اصولی دخی رلشور کيدر ایدی. اون طقوزسنه سی وقایعی صره سنده ذکر اولنديغی اوزره اولوقتک احواله کرکی کبی وقوفی اولان قوجه

سکبان باشینک خلاصه الکلام نام رساله سنک خلاصه مؤداسی دخی بودر قالدیکه تجدید اصول دولت کبی بر امر خطیرک اجراسی ایجون هر محذور دن سالم بر یول بولنه ماز و بر چوق محاذیر محتلمهینی کوزه کسدر مدکجه او مثللو خطوب جسمیه نک عهده سندن کله ماز ایشه شجاعت و جسارتک اخلاق حمیده دن عد اولتمسنک سر و حکمتی بودر . الحاصل بو نظام جدید عسکری دولت علیه نک بر کوزل سسلاحی اولوب بونکله هر استدیکنی پایه بیلوردی نه چاره که اولوقت دولته انی اعمال ایده جک بر ال یوغیدی بناء علیه بوقدر عسا کر معلمه وار ایکن دولتک روم ایلی جانبنده جکجه لره بیله حکمی کیمز اولدی و یکچیری طرفدارانی یوز بوله رق استانبولده فساد وقتنه استعداد لری کوندن کونه زیاده لشمکده ایدی .

حتی اسکدارده جامع سلیمیه نک بناسی ختام بولدقده ابتدا کی جمعه سنده سلطان سلیم خان حضر تلی کوبه ملوکانه ایله اورایه کیتمک مصمم اولدیغندن بالجمله رجال باب عالی وسائر حضوری لازم کلنلر چند روز مقدم تهیئه اسباب حشم و خدم قیدینه اشتغال و سیر جیلر دخی اسکدار یقه سنه کیمک اوزره استعجال ایتمشیکن یکچیر یلر یرینه نظام جدید عسکری صف بسته سلام اوله جق ایش حوادثی منتشر اولسبیه یکچیر یلر علی العموم سسلاحنوب باب عالی رجالتی تلف و نظام جدید نفقاتی دانه تفککه هدف ایتک اوزره بینلرنده اتفاق ایدرک اسکدار یقه سنه کذار ایتدکاری معلوم اولیجق آلایدن صرف نظرله سلاماق خصوصی کافی السابق یکچیر یلره منحصر اوله جفی و نظام جدید عسکری قشله لرندن خارج محله کورنیه جکی بیان و تأمین اولنه رق چند هفته صکره جامع مذکوره یالکنز بر دفعه لاق اولمق اوزره بر جمعه کونی سلاماق ایدلشیدی . بو ماده ارکان دولته بیوک بر داغ درون اولمغله برابر ( اسکی او جاقلر علی الخصوص زمرة بکتاشیه بوقدر یوز آغار تمشلر و بونجه یوز سنه لرنبرو دولته کوزل خدمت ایتمشلر بونلرک العاسی خاطره کلورش ی دکدر بیهوده و سوسه اولنسون مرام انجق برده صنف معلم پیدا ایدوب بر طرفدن شجاع تلی مسلم اولان قدیم او جاقلر و بر طرفدن دخی معلم عسکر ایله دوشمنه غلبه ایتمکدر ) یولوسوز لرله یکچیر یلرک اسکانه چالیشامش ایسه ده عسا کر معلمه مصمم اولان مقداره ابلاغ اولندقدن صکره بر طاق مفتخوارانه اولکی کبی بیهوده بره خزینه دن بر چوق آچهلر و یر یله میه جکنی در پیش ایدرک مطالعه انجام کار ایله یکچیر یلر دلفکار اولمقده ایدیلر . انلرک ظن و تخمین طوغری ایدی لکن انلره بوقدر میدان و یرمک پک یا کلش بر تدبیر ایدی . مادامکه اول کون علی العموم اسکداره کذار ایده جکاری اکلاشلی نظام جدید عسکر یله بونلرک اطراف قوشادیلوب ایچلرنده پک مضر اولنلری اعدام و بقیه سی

بعض مواقعہ نفی ایلہ عبرت انام ایدلمش اولسیدی دها اول وقت یکچری مفسد لرینک  
مضرتی دنیادن قالمش اولوردی . اما بودرلو اجرا آتہ جسارت اولنہ مدینغی خالدہ  
ارتق یکچریلرہ قارشو ایش کورمک ودولتہ نظام ویزمک قابل اولیہ جنغی بووقعہ  
ایلہ دخی ثابت اولمشیدی .

ہرنہ حال ایسہ سالف الذکر ادرنہ وقعہ سی ہر کسی خوف ودہشتہ دوشورمش  
اولوب ایشک اول مرتبہ کسب جساعت ایتمی ایسہ اسماعیل پاشانک متفندانہ  
وعلی الخصوص ابراہیم کتخدایہ اولان بغض وعداوتی حسیبہ اخذ انتقام داعیہ سنہ  
دوشمسندن نشئت ایلدیکی اکلاشلماغہ ومقام صدارتدہ بولنان برذاتک دفع وورفع  
خصما ورقبا سوداسیلہ بویلہ بر مخاطرہ لو آتش فتنہی کوروکلہ مسی آچیقندن آچیقہ  
دولتہ خیانت دیمک اولسیلہ عزل وتادیبی لازمہ خالدن وبلکہ غفلت وحقاقی مدار  
معذرت اولسہ بیلہ اعدامی اولوقتک اصولی اقتضاسندن ایسہدہ یالکز انک تادیبی  
کروہ متغلبہنک دقت نظرینی جلب ایدرک ینہ طرف سلطنتدن توحش ایتلمری  
ملحوظ اولدیغندن وبردہ طرف شیخ الاسلامیدن اشقیانک اعدا اوزرینہ عازم  
اولان غزات اسلامیہ بہ سد راہ ممانعت اولدقلمری ایچون ازالہ واستیصاللری حقدہ  
فتوای شریفہ ویرلمش دیو شیوع بولمسیلہ شیخ الاسلام افندی قالوبدہ یالکز  
صدراعظم عزل اولنسہ کروہ مخالفین بونکلہ دولتک اسکی نیتدہ نابتقدم اولہرق  
وقت فرصتہ مترقب اولدیغنے استدلال ایدہ جککرنندن دولتجہ تبدیل مسلك ونیت  
اولندیغنے علامت ومخالفینہ مدار اطمینان وامنیت اولہجق وجہلہ تبدلات اجراسنہ  
لزوم کوریلوب حتی شیخ الاسلام افندی کندوسنک عزانی دخی خالصانہ ومحرمانہ  
اولہرق اخطار ایلمش اولدیغندن غرہ رجبدہ اسماعیل پاشا عزل ایلہ بروسہ یہ نفی  
وشیخ الاسلام صالح زادہ احمد اسعد افندی خانہ سندنہ اقامت ایتک اوزرہ عزل ایلہ  
یکچری اغاسی ابراہیم حلمی پاشا صدر اعظم وسابقا روم ایلی قاضی مسکری وحالا  
نقیب الاشراف اولان شریف افندی زادہ السید محمد عطاء اللہ افندی شیخ الاسلام  
اولدی برمدت صکرہ اسماعیل پاشانک منقاسی بروسہ دن ساقز جزیرہ سنہ تحویل  
قلمشدر .

صدر جدیدہ خطاباً صادر اولان خط ہایونک صورتی ذیلدہ (۲) رقیبہ  
ایراد اولنور .

بووجہلہ یکچری اغالغی مقامی منحل اولدیغندن قول کتخداسی عثمان اغا یکچری  
اغاسی اولہرق یکچری او جاغندہ سلسلہ وقوعیلہ ضابطان بحسب الطریق بررتبہ  
قطع ایلدکارینہ بنسائاً جانب سلطنتدن متوحش اولان یکچری کروہنہ برنوع  
ترضیہ ویرلمش اولدی .

عطاء الله افنديك مشيختى دخى افكار تعصيه اخبايك وسوسه ووحشتى ازاله ايديه بيهلجك برماده ايدى زيرا عطاء الله افندى كابر عن كابر شيخ الاسلام زاده ومنيب افندين مدت مديده اخذ و تلقى علوم عاليه ايمكله درجه علم وفضلى جمله عندنده كلفت بياندن آزاده اولدينى حالده آرپه لقرينى التزامه ويرمز وقبولتى خرجى الماز عفيف ومتقى وهردرلو مكروه ومقدوح شيلردن مجتنب ومتوقى برذات اولمسيه برابر كندوسنى سلطان سليمه وانا بكان سلطنته نظام جديد طرفلوسى كوستر مكدده اولديغندن بويه افكار تعصيه غلبانى وقتنده مقام مشيخته كتورلمسى تمام ايجاب حال ومصالحته موافق كورلمشيدى بناء عليه اولوقت صدور عظامدن عصمت بك افندى خيلى وقتدنبرو مجالس مكلمه به مأمور اوله رق مهم امور دولته خيلى وقوف كسب ايلمش اولديغنه نظراً مشيخته انسب كورينور كن عطاء الله افندى ترجيح اوله رق آندن منحل اولان نقابت اشراف مسند شريفى دخى عصمت بك افندى به توجيه بيورلمش ايدى عطاء الله افندى ايسه غايت متعصب اولدينى حالده آشورى مرتبه ريكار اولديغندن طرف سلطنته نظام جديد طرفدارى كورنمكله برابر افكار عتيقه اخبايك ياننده دخى جبهه رياه بورينور وبشقه يوزله كورينور ايدى و برده آل فيضدن يعنى جامع الرياستين اولان مشهور فيض الله افندى نساندن اولوب بو خاندانك وقت اقباللر نده ايسه ذوات عليه عظيم ضرر لرله اوغرامش اولديغندن بعض ذوات بو كره عطاء الله افنديك مقام مشيخته كتورلمسندن دخى تشاؤم ايشمار ايدى حتى عاصم افندى بو خصوصى حكايه ايتدكن صكره ديركه بالآخره (عامه غلط ايمز) مثل مشهورى عيان وتشاؤملرى نمايان اولدى . وينه عطاء الله افنديك عصمت بك اوزرينه جهت ترجيحى بيان سياقنده ديركه سلطان سايم البال حضر تلى مشار اليه به غايت منجذب اولغله مسند مشيخته انى تقديم وحقنه ويريله جك فتوى قلمنى كويا كه يديه كفته تسليم ايدى .

ابراهيم نسيم افندى طقوز سنه دنبرو كمال نفوذ واستقلال ايله كتخدای صدر على اوله رق دلخواه حضرت پادشاهى به موافق وجهه فتق ورتق امور وحل وعقد مصالح جمهور ايمكله حيثيت واقبالنى چكهميانلر چوغالوب بو كره ادرنه ده فتنه كاران طرفندن ازاله سى طلب اولنان ذواتك دخى سر دفترى بولنديغنه مبنى بر مدت حال انزوا واستراحتده بولمغنى حقنده خيرلو كوروب بو باده تحصيل رخصت پادشاهى ايدرك رجبك او چنجى كونى عزل ايله كندوسنك تنسيبى اوزره غرس دست تربيه سى اولان مکتوبجى مصطفى رفیق افندی كتخدای صدر على نصب اولنديغندن يرينه سر خليفه محمد تحمسين افندى مکتوبجى وخلفادن رؤف بك سر خليفه اولدى

و بوسه داده شق اول دفتر داری مصطفی رشید افندی ایله ایراد جدید دفتر داری فیضی افندی دخی عزل ایله فضلائی رجالدن دفتر امینی بولنان مور ه لی پناه افندی زاده عثمان افندی شق اول دفتر داری و ایالتلو ناظری احمد بک شق ثانی دفتر داری و حسن تحسین افندی دفتر امینی و دهات علمادن اولوب خمبره خانه ناظری بولنان السید عبدالله رامز افندی ایالتلو ناظری نصب اولندی وینه اول کون بوستانچی باشی عزل ایله یرینه خاصکی اغا بولنان شا کر بک بوستانچی باشی اولدی و مقدمجه کتبخدا کتباتیه باب عالی یه آلمش اولان اسبق صره امینی اسعد افندی دخی عزل ایله یرینه مکتوبی او طه سی خلفاسنک قدما سندن نعمان ثابت افندی کتبخدا کتبی تعیین قلندی .

خلال شعبانده سالمه طمر قده ظهور ایدن حریقده بر خانه نك اطرافنی آتش صاروب بر او طه سنده بر بیچاره قادین دخی قوجاغنده بر طفل شیر خواری اولدینی حالد ه فریاد ایتمکده اولدیغنی یکچیری اغاسی عثمان اغا کور بچک صبر و تحملی یانوب هان خانه نك دیواری اوزرینه بر تاب ایدرک اول بیچاره لری تخلیص قیسندنه ایکن دیوار منهدم اولغله افتاده نأرة شعله ور و لمحة البصرده اوچی دخی خاکستر اولمشدر . بونک اوزرینه یکچیری او جاغنده ینه سلسله وقوعیله قول کتبخداسی پهلوان حسین اغا یکچیری اغاسی اولمش و سائر ارکان او جاق دخی طریقلرنجه بر رتبه تر فیع ایدلمشدر . الحاصل ادرنه وقعه سی اوزرینه وکلا و امورین سائر ه ایچنده تبدلات کثیره وقوعبوله رق تبدیل طور و مسالک اولندی دیمک اولمسیله و قباحتلی قباحتمسز ارا نلمیوب جمله حقنده مضی ماضی معامله سی اولمغله افکار عامه یه سکونت کلدی . لکن دولت علیه بونجه و قندنبرو نظام جدید اصولنک ایلرو لمسنه نیجه امکابر صرف ایتمش و طریق تر قیده خیلی مسافه قطع ایلمش ایکن بویله صورت رجعت کو ستر مسی کندوسنجه غایت مضر و وخیم بر کیفیت اولدیغنه مبنی عقلای عصر بوندن طولانی رنجیده خاطر و ایلروده بوندن نه فسالق ظهور ایده جکنه کمال تأسف ایله مترقب و منتظر ایدی .

بو ائنده نمچه و روسیه دولتری صر پستان ایشنه عرض توسط ایله نمچه لو فیما بعد صر پلو طائفه سی سر بست اوله رق حالا سر کرده لری اولان قره یورکی پرنس نصب و تعیین ایله بعدما اردل قرالارینک طرف دولت علیه یه ادا ایلدک لری منوال اوزره معین و مقطوع بر ویر کویه قطع ایدلمسی و تبدل یا حل و وقوعیله دیگر بر یسنک نصبی لازم کلد کده بالاتفاق رابطه ویرلمسی خصوصالری و روسیه لو دخی صر پستان افلاق و بغداد کبی بر بکلک اولوبده افلاق و یوه ده سی ایسلاستی سلسله سندن برینک بک نصب ایدلمسی تکلیف ایتمش ایدی الحاصل ایکیسی دخی ایشی کندو پولتیقه سنه

موافق صورته قویمق استیوب انجق ایکی تکلیفک خلاصه سی دخی صر پستانک استقلالنی تصدیقن عبارت ایدی فرانسه لو ایسه بونه اولیه جق ایشدر دولت علیه امور داخلیه سنه بشقه لرینی قارشدرمق جائز اولورمی دیو باب عالی بی ثبات وماتنه ترغیب وتشجیع اینر ودولت علیه حقوقنی محافظه به چالشسون واولکی قوت ومکنتنی تحصیله قالشسون دیو اخطاردن خالی اولمز ایدی .

بناءً علیه دولت علیه افلاق وبغدان از قدیم بکلك صورتیه اداره اولنه کلبشدر اما صرپ طائفه سی اوته دبرو رعایای سائره کبی اداره اولنه کشیکن شمعی نه ضرورت مس ایتشدرکه افزاز ایله اداره استقلالیه تحتنه قونیه دیو نمچه وروسیه دولترینه جواب رد ویرمشدر .

وبالاده اشعار اولندینی اوزره روم ایلی والیسی اشقودرملی ابراهیم پاشا عساکر کلیه ایله صرپستان اوزرینه یوریوب بر طرفدن دخی بوسنه والیسی خسرو پاشا حرکت ایتکله صرپلولر خوف واندیشه به دوچار اوله رق ایشه درسعا تبحه رابطه ویرمک اوزره استیمان یولنده درسعاده برما مور مخصوص کوندرمشدر ایدی لکن ابراهیم پاشا نیش صحراسنه ورودنده معینده کی عسکره کافی ذخیره بوله مدیننی جهتله بغته اشقودرینه عودت ایتیمی اوزرینه صرپلولر شماروب دشمنلر دخی اضلال وتشجیعدن خالی اولماملریله ینه ایشک رنگی دکشدی وبونک اوزرینه روم ایلی والیلکنک دیگر وزرادن برینه احاله سیله صرپستانک اوزرینه قوتلوجه حرکت ایدلمک لازم کلدیکندن اول امرده روم ایلیجه نفوذی درکار وکرک طاغلو اشقیاسی ایشلرنده وکرک ادرنه وقعه سنده صداقتی آشکار اولان سیروزی اسماعیل بکک رأی ومطالعه سی سؤال اولندوقده کندوسنک امین ومطمئن اوله جغنی بر وزیر روم ایلی والیسی اولدینی حالدۀ دائماً امرینه متابعت ایله جانسپارانۀ چالشه جغنی عرض وانها ایلدیکنه مبنی دفتردار شق رابع اولان ذخیره ناظری الحاج مصطفی افندیدن روم ایلی اعیانلرینک امنیتی اولمق ملابسه سیله روم ایلی والیلکنه تعیننی مناسب کوریلهرک اراده سنیه سی بالاستحصال اکسای خلعت ایچون باب عالی به دعوت اولندوقده دوش استعداد وقابلیتک بارکران وزارتۀ متحمل اولمدینی بیانیله خدمات سائرۀ ده بذل وجود ایده جکنی تعهد ایدرک استعفا واستعطاق ایتکله بوندن اقدام مورۀ مصلحتده حسن حرکتی مشهود اولان مورۀ والیسی وزیر عثمان پاشایه سرعسکرک عنوانیه روم ایلی والیلکی وخورشید احمد پاشایه نیش محافظه سی شرطیه مورۀ ایالتی بالتوجه مصطفی افندی دخی سوق عسکر ما موریتیه روم ایلی به کوندرلدی آندن منحل اولان شق رابع دفتردارلنی وحبوبات نظارتی دخی آرپه امینی ممش افندی به توجیه بیورلدی .



قونسولسار معتبرنده رعایای دولت علیه دن ترجمان استخدام ایلملری عهدنامه لر اقتضاسندن اولوب انجق رعایای دولت علیه دن بعضیلری دخی مجرد ترجمانلق امتیازاتی احراز ایله حمایه اجنبیه تحتمنده و صورت سر بستیده تجارت اتمک اوزره اصلا بر قونسولسک خدمتمنده اولمدینی حالده قونسولساردن برینه راز شی اعطاسیله کندونامنه ترجمانلق براتی اصدار ایتدیر لرلردی حتی در سعادت صرافلرندن بعضیلری یکی خاندنه اخذ واعطایله مشغول ایکن مثلا اینه بختی قونسولوسی معیتده ترجمانلق براتی الهرق حمایه اجنبیه کیرمشلر ایدی و بو صورتله کمرک اعطاسنده و تکالیف سارده نک اجرا سنده درلو مشکلات و صعوبات ایراث ایدر لرلردی و الحاصل حقوق عهدیه سوء استعمال اولنه رق دولت علیه نک امور ملکیه سنه خلل کتور لمکده و کمرک وارداتنه نقص و تدنی کلکده اولدیغنه مبنی سفرا ایله بعد المذاکره فیما بعد قونسولسارک بالذات خدمتمنده اولمیان رعایایه ترجمانلق براتی ویرلامک و او ایله سوء استعمال ایله التمش اولان براتلر استرداد ایدلمک خصوصلری بو ائنده نظام اتخاذا ایدلدی و کیفیت پارس ایلیجیسی محب افندییه دخی بیلدیرلدی .

و بر وقتدنبرو در سعادتده پک چوق بیکار و نیدوکی بلورسز اشخاص اولوب بو ایسه آسایشه خلل ویره بیله جک مواددن اولمسایله فیما بعد موجود بولنان خانلرک هیئت اصلیه لرندن فضله درونلرینه او طه و خار جدن عرصه علاوه اولنماسی و مجهول الاحوال کسانه مسکن و میبیت اولان خان و بیکار او طه لری و قهوه خانه و نعلبند دکافی صورتده قولتق تعبیر اولنسان خانلر یا بلنماسی و محال مذکوره نک برنده بر تهمت و نامرضی حرکت ایله بر کمنه اخذ اولندقدده ایچنده ساکن اولانلرک جمله سی اخراج و قپوسی بند و بر دخی بیکار ساکن اولماق ایچون محلات ارسنده ایسه متأهلین او طه لری و چارشو و بازارده ایسه اقتضاسنه کوره اصناف دکانلری شکلنه قونلمسی و دکا کین اوزر لرنده بیکار او طه لری بنا اولنماسی و جهاننما و تحت السما و الحق شه نشینلر و دکا کین اوکلرنده بیکه و مصطبه کبی نظامه مغایر شیلر انشا قلماسی خصوصلری دخی بو ائنده نظام اتخاذا اولنه رق دستور العمل طو تلمق اوزره لازم کلان مقام و مامورلره امر و تنبیه ایدلدی .

و بروقتدنبرو رعایای دولت علیه دن بعضیلری تجارتله روسیه دیارینه کیتدکلرنده بسا پورطه لرینه کندولرینی روسیه تبعه سندن دیوقید ایتدیروب بعده بونی روسیه پاتنته سی اخذینه و سیله ایدر اولدقلرندن بوندن بویله بو کرویوه فسادک سدیه شمعدییه قدر ویرلمش اولان او مثللو بسا پورط و پاتنته لر دخی رد اولنق خصوصی نظام اتخاذا اولندی .

فرانسه دولتی طرفدن درسعادت بیوک ایلیجیسی نصب اولنان سبستیانی جمادی  
 الآخره نك ایکنجی کونی درسعاده واصل وعقبنده روسیه مرخصی دو بریلک  
 برمنوال سابق پارسده امضا ایلمش اولدیغی عهدنامه ده دولت علیه نك تمامیت ملکی  
 و سربستی و استقلالی مندرج اولدیغی خبری ورود ایله دولت علیه جه ایچجه اطمینان  
 حاصل اولدی انجق سبستیانی غایت دسیسه کار برآدم اولوب درسعاده ورودی  
 اواننده دولت علیه نك مقتضای مصلحتی جمیع دول ایله دوست اوله رق بی طرفلقده  
 ثبات ایتمکدر بزده دولت علیه نك غیر تکس و خلوص کاری اولدیغمز دن یالکز بزه  
 مربوط اولسونده دول سائردهی ترک ایتسون دیمیز دعوا مز یالکز انکلتزه ایله  
 اتفاق تجدید اولمامسیدر دیو صورت حقدن کلهرک ظاهراً خیر خواهلق یولنده  
 کورنمش ایسه ده فعلاً دولت علیه بی متفقنندن تبرید و تفریق ایده چک تدایرک  
 اجراسنده اصلا قصور ایتماشدر شویله که : سالف الذکر روسیه عهدنامه سنده  
 دولت علیه نك سربستی و استقلالی مندرج اولوب بوتعیرلر ایسه افلاق و بغداد  
 شرائط مکروهه سی کبی مواد غیر مرضیه نك الفاسنی متضمندر زیرافما بعد روسیه لو  
 شروط مذکوره نك اجراسنی دعوا یه جسارت ایتسه فرانسه لو ایله معقود اولان  
 شرط مذکوره مغایر حرکت ایتمش اوله جغنه نظراً البته ایمراتورمز معارض  
 اولور دیهرک و پس پرده خفادن اعمال دسائس کونا کون ایدرک افلاق و بغداد  
 و یوده لرینک عزلارینه وکلای دولت علیه بی ترغیب و تشجیع ایلدی و افلاق  
 و یوده سی قسطنطین ایسلاستی بک روسیه طرفداری اولوب بغداد و یوده سی  
 علسکسندری موزورز بک دخی برمشکوک حال و افکارده بولنه رق مأموریتندن  
 استعفا ایله عرض ناز و استعفا ایتمکده اولدیغندن ایکیسنک دخی عزلی باب عالینک  
 افکارینه موافق ایسه ده بونلرک نصیلرنده یدی سنه دن اقدم عزل اولماملری  
 روسیه لویه قارشو تعهد اولنمش ایدوکنندن سبستیانینک ترتیب ایتدیگی مقدمات  
 و همیه یه استناد ایله صراحت عهدیه یه مغایر حرکت جائز دکل ایکن و یوده لرک  
 نصبنده وکلا وقرنایه برقاچ بیک کیسه ویره کلدکلرنده هپ ذهنلر او طرفه مائل  
 اولوب ایشک مأمور مخصوصی اولان رئیس الکتاب و اصف افندی دخی  
 سبستیانی یه بتون بتون الدانه رق بویولده سائره پشرو اولمغله جمادی الآخره نك  
 طقوزنجی بازار کونی و یوده لرک ایکیسی بردن عزل ایله بغداد و یوده لغنه دیوان  
 هایون ترجمانی اسکرلت قالما کی بک و افلاق و یوده لغنه سابقا بغداد و یوده سی  
 دراقوزاده عاقو سوچو بک و دیوان هایون ترجمانلغنه دخی چنچرلی بک زاده  
 علقو بک نصب و تعیین قانددن صکره روسیه سفارتنه اخبار کیفیت اولندی و یکی

و یوده لر یاش و بکرش طرفلرینه اعزام ایله سافلرینک در سعادت کلمری امر اولمغله  
 علسکساندری در حال استانبوله عزیمت ایلمش ایسه ده قسطنطین ایسلاحتی در سعادت  
 کلمکه جسارت ایده میوب کیفیته مطلع اولدینی کبی تمچه الکاسندن کذار ایله روسیه  
 دیارینه فرار ایلمشدر .

وینه اول اوآنده سبستیانی من غیر رسم حضور هایونه کیره بیلیمک مأذونیتنک  
 استدعاسنه اصرار ایتمکله بوکا دخی طرف شاهانه دن مساعدده اولندی انک بویه  
 من غیر رسم تلطیف بیورلمسی و یوده لرك عزل ایلمسی ایسه دولت علیه نك تبدیل  
 افکار ایلیکنه دلیل قوی اولمغله روسیه وانکلینز ایلیچیلرینه زیاده طوقدی حالبوکه  
 روسیه دولتی دو بریلک پارسده امضاله مش اولدینی سالف الذکر مصالحه نامه بی  
 تصدیقن امتناع ایله یکیدن فرانسه علیهنه سفر نیتنده اولدیغنه و بو حالده فرانسر لرك  
 لهستانه هجوم ایده جکبری درکار اولوب بویه و قتده دولت علیه نك فرانسه لو  
 رأیله حرکتی ایسه روسیه مصاحتنه اصلا الویرمیه جکنه منی مصاحتک تشنج  
 ایده جکی و دولت علیه نك بی طرف طوره میه جفی اکلا شلمغه باشلادی .

ایش بوراده لره کلدیکی ائشاده سبستیانی (روسیه بکلک کمیلرینک و مهمات و عسکرینک  
 قره دکردن آق دکره مرور ایتملری بی طرفاغه منافیدن) دیومعنی ادعایه قالقشدی  
 بو کیفیت ایسه دولت علیه ایله روسیه لو بیننده معقود اولان اتفاق معاهده سنک  
 احکامی ایجابندن اوله رق بروقتنبرو روسیه سفائی بلا مالمغه آمد و شد ایده کش  
 اولدقلمری حالده بوکره منعده صعوبت درکار اولدیغندن هر چند سبستیانی نك  
 اسکاتنه سعی اولندیسه ده (پیشگاه دار السلطنه دن سفینه و عسکر امراری ایچون  
 روسیه لویه رخصت ویرلدیکی حالده بزم دالملاچیا ده کی عسکر مزك ممالک محروسه ایچنده  
 طونه یالیسنه و آندن افلاق و بغداد طریقیه لهستانه مرور لرلی ایچون رخصت  
 ویرلیمک نصل اولور بی طرفاق قاعده سی جمله حقتده مساوات اوزره معامله  
 اولمقدر ) دیو یاغیره ایتمسی اوزرینه دولت علیه روسیه لویه افاده حال ایله (سز  
 دوست متفقسز فقط شمدی فرانسه جار ملاصقمز اولدی وعلله تغلی آشکاردر  
 بوکا بر سر رسته منازعه ویرلیمک ایچون بو اراق سفینه لر یکیزی امرار ایترمه کز  
 اولماز می ) یوللو تعیرات ملامیه و مقدمات دوستانه ایله الزامه قیام ایتمکجه روسیه لو  
 بویه اتفاقه منافی تکلیف نصل اولور دیو دولت علیه بی فرانسه لودن بتون بتون  
 تفریق ایچون جبهی قبه ایدرک عظیم شامته یه ایتدار ایتدکن بشقه افلاق و بغداد  
 و یوده لرینک بر وجه بالا عزلرینه نقض عهد نظر یله باقوب بوکا دائر روسیه  
 ایلیجیسی طرفندن پترسبورغه کوندر یلان تخریراته جواباً الدینی تعایات قطعیه

اوزره ایسلاستی ایله موزوروزك كجاكان ابقا اولمغلی و اولمقدقیری حالده بالجه سفارت مأمورلرینی استصحاب ایله عزیمته مأمور اولدیغی بیانیله باب عالی به برقطعه تقریر تقدیم ایتدکده هر نقدر بعض دلائل مازمه سردیله و یوده لردن باری بریسنك قالمسنه رضا و یرمك صورتی در میان و بوبابده انکلینز ایلچیسینی توسیط ایله سعی فراوان اولندیسه ده مقید اولیوب مدعی و متوسطك اصرار لرلی روز افزون و روسیه ایلچیسنك منتهیء حرکت اولدیغی رونمون اولیجق دولت علیه دفعاً للنزاع اسکی و یوده لرك ایکیسینی دخی ماه شعبانك اوچنجی کونی کافئ الساباق یرلرنده ابقا ایله علكساندری بی بغدادنه اعاده ایدوب قسطنطینك دخی افلاقه عودتی با امر عالی کندویه اشعار و یکی بکلرك در سعادت عودت لرلی ایچون امر عالی اصدار ایلدی .

بو خصوصه دائر روسیه ایلچیسنه و یرلمش اولان سند صورتی ذیلده (۳) رقیقه ایراد اولور . عاصم افندینك بیانته کوره بو خصوص ایچون روسیه ایلچیسینی باب عالی به کلدکده تا اوست پرده دن کلامه آغاز ایله (بزدن استیدان ایتمکسزین افلاق و بغدادن و یوده لرینك تبدیلی سزك نه حد کزدر بونه دیمکدر همان اولکی بکلری مقام لرینه اعاده ایدیکز یوخسه بش اون کونه قدر برأ و بجرأ هجوم ایله سزنی قونیه و شام دیار لرینه بیله حسرت ایلمك عند مزده بر ایچم صو کیدر سزنی شمدی به قدر محضاً مر و تمزدن و بعض کونه بیع و شرا معامله سنه لزوم کز دن ناشی ابقا ایدیورز) زمیننده بر طاقم تحمل فرسا سوزلر سویلمش عاصم افندی بونی حکایه ایتد کدنصرکه دیرکه دولت علیه حقیقه مشهود و مسموعمز اولان مکدراتك جمله سندن ازید ایکی کلام زهرناک پیکان خدنك جانستان کبی جکر کاهمه تأثیر ایلمکله حالاً زخمی مرهم پذیر اولما مشدر بری و یوده لرك تبدیلی عقبنده روسیه ایلچیسنك ذکر می مستهجن وجهله باب عالی به کلوبده اولیه تحمل اولغز سوزلر سویلمسی و دیگر می یونابارته نك عثمانلی دولتی جبریل کبی بن طوته یورم یوخسه چوقدن خاکسار وزیر و زبر اولوردی دیمسیدر . عاصم افندینك دیدیکی کبی اول کون روسیه ایلچیسنك مشهود اولان طوری واقعا تحمل اولغز بر صورتده ایمش نه چاره که اول ائشاده ادرنه وقعه سی ظهور ایله روم ایلی جانبی اختلالده و عربستانك اختلالی درجه کالده اولدیغدن دولت علیه نك حرکت مجالی اولدیغنه و بکلرك اولوجهله بقعه عزلی عهده مغایر اولق حسیله یولسز و یار و اغیار نظر نده حقسز بر کیفیت اولدیغنه مبنی فعلاً و قولاً مدار مدافعه اوله جق الده بر سند و قوت اولدیغی حالده سبستیانی دائماً یونابارته نك قوت حاسندن و دولت علیه نك آنکله اتقاقی کندوسنجه نقدر موجب شان و اقبال اوله جغندن بختله روسیه به قارشو عقد اتقاق اولغسینی اخطاردن خالی

اولیوب بوراسی دولت علیه نك دخی جائنه منت ایسه ده انكلكتره دولتیله بوزشحق ایستمزدی . و سلطان سلیم فرانسه لو طرفه ده ماثل ایسه ده وکلاسنك برخیلیسی انكلكتره لویه طرفدار و برطاقی دخی دولتك ضعف و اغتشاش احوالی مطالعه ایله یأس و فتوره دوچار اولماریله دولت علیه اولوقت پك قاریشق و قراكلق بر حالده اولدیغنه مبنی چاره سزاسکی بککری ابقا ایله شان دولته شین ویره جك برر ذات کوسترلمشدر . بو ائاده ایسه زیرده بیان اولنه جنی وجهله فرانسزلرك ایمرطوری ناپلیون پرورسیا اردولرینی پریشان ایدرك برلینه کیرمش اولدیغی حالده معزول و یوده لرك تکرار اولو جهله ابقالریخی لدی الاستخبار حدتله رك سبستیانی به کوندرمش اولدیغی تعایات موجبجه سبستیانی باب عالی به کله رك (ایدسلاتی ایله موزورز تکرار عزل ایله یرلرینه دولت علیه نك برر صادق بنده لری نصب اولمدهجه یعنی افلاق و بغدادن ایالتلری استقلال اوزره دولت علیه حکمنه کیرمدکجه ایمرطوریمز سلاخی لندن بر اقامغه قرار ویرمشدر ) دیمکله دولت علیه بر موقع مشکله بولنوب ماده نك صورت جریانندن و دولت علیه نك باشنده کی غائله لر ایله قوه عسکر به سنك پریشانلغندن بحمله مقام اعتذارده ناپلیونه بر قطعه نامه هایون یازلمشدر ناپلیون بوکا دخی اظهار انفعال ایده جك یرده پك ملایمانه اوله رق یازدیغی جوابنامه ده برچوق تسلیت آمیز سوزلر ایله سلطان سلیمه جسارت و یرمش و دالمالچیاده کی اردوسی و بر فرقه فرانسز دو نماسی ایله امداد ایده جکنی وعد ایتمشدر .

الحاصل دولت علیه مملکتین مسئله سننده روسیه لونك دلخواهنه تمامیه مساعده ایدوب بوندن طولایی روسیه وانكلكتره ایلچیلری عرض شکرانیت ایتمشلر ایسه ده پرورسیا اردوسنك انهزامی خبری الخمسی اوزرینه استانبول بوغازندن امرار سفائن خصوصنك مطلوب دوستانه اولمق اوزره تعویقنی دولتی طرفه تحریر ایلمسچیچون روسیه ایلچیسینه بر قطعه تقریر و یریه لرك بومسئله ده دخی فرانسه لو طرفه بر حمله کوسترلمش اولدیغندن روسیه وانكلكتره دولتلری ینه دولت علیه دن ناخشنود قالدیلر . و اصف افندی اوائل ریاستنده ایچه ممدوح اولمشیکن بومملکتین مسئله سندن طولایی ممدوح اولدیغندن بشقه سوء معده دن نامزاج اوله رق باب عالی به دوام ایده میوب حتی یکرمی کون قدر مقام ریاست خالی قالمغه اوائل شعبانده عزل ایله یرینه بیوک تذکره جی محمد غالب افندی رئیس الکتاب و آنک یرینه اناطولی محاسبه جیسی عوننی افندی بیوک تذکره جی اولوب افلاق و بغداد درد و بلاسی غالب افدینك باشنه قالدی و اصف افندی دخی خانه سننده دردینه دوا ایله مشغول اولدی انجق سنین عمری یتشی کچمش اولمق حسیده اطبانك ایتدیکی تداوی کارکر تأثیر

اوله میوب چند ماه صکره بوعلت مزمنه ایله وفات ایلمش اولدیغندن ترجمه حالی بو محله درج اولنور .

متوفای مشار الیه واصف افندی بغدادی الاصدر بغداددن چیقوب وان وقارص و حلب طرفلرنده تحصیل علوم و معارف ایچون کشت و کذار ایدرک دربند سر عسکری ایکن وفات ایدن کل احمد پاشا زاده علی پاشانک کتابچیاق خدمتنده بولندقدن صکره ابازه محمد پاشایه انتساب ایدوب یکی قلعه استیلاسنده اسیر اولمشیدی قبل المصلحه بروسیله ایله قورتیلهرق اردوی هایونه واندن درسعاعه کلوب اول وقت رکاب هایونده رئیس الکتاب و مرجع شیخ و شاب اولان رائف اسمعیل پاشایه تردد ایله خیلی اکرانه مظهر اولمشیکن بعض اسبابه مبنی رائف پاشا کندوسنی استیقال و عبدالرزاق افدینک مکتوبچیاق ایله آستانه یه کلوب اردوی هایونه عودتی وقوعنده معیتله دفع و ارسال ایتمکله بوکره اکا کسب تعاق ایدرک آمدی او طه سنه مأمور و خواجه لاق رتبه سیله مسرور اولدقدن صکره سکسان التی تاریخنده امر متارکه ایچون روسیه فیدمار شالته کوندر بلوب بعدالعوده عبدالرزاق افندی مصلحه یه مأموراً بکرشه عزیمتنده اودخی سر کتاتی خدمتله برلکده کیتمشیدی استانبوله کلر کده آمدی او طه سنه دوام اوزره ایکن حمید خلیل پاشا صدرتنده سفارتله اسپانیه یه کیدوب کلر کدن صکره دروزنامه جیلک و محاسبه جیلک کبی بعض مناصب دیوانیه دهه استخدام اولنش و ایکی یوز ایکی اردوسنده روسیه مرخصلیله مذاکره اساس مصلحه یه مأمور قلمش و بعده استانبوله عودتنده ینه اوفق تفک منصبارده بولنش ایسه ده رئیس الکتاب بولنان ذاتلر علیهنده بولنق حبسیله نمالوجه برمنصبه دسترس اولدیغندن چوقوقتی فقر و ضرورت ایله کچمشدر و برالاق رئیس راشد افدینک سعایتله نفی دخی اولنمشیدی . بعده وقعه نویساک و سیله سیله کاتب اسرار شهر یاری احمد افندی یه چاتوب همتیه بیوک روز نامه و نشانچی اولهرق یکر می سنه سی خلالنده محمود افندی یرینه رئیس الکتاب و اوتوز سنه دن زیاده حسرتکش اولدیغی امنیه یه نیل ایله مسرت یاب اولمشیدی بروجه مشروح بعدالعزل چندماه اسیر فراش اولدقدن صکره وفات ایتدکده ایوبده والده سلطان حظیره سنه دفن اولنمشدر .

فائق افندی دیرکه بریحق سنه مقداری مسند ریاستده قرار و اندازدن زیاده قماش دولتدن کندویه جامه لر بیچهرک مبالغ کلیه جلب و ادخارینه اجتسار ایلمشیدی علوم عقلیه و نقلیه ده شعر و انشاده اولان ماسکه و مهارتنک درجه سی محاسن الا ثار نام متداول اولان تاریخندن نمایان و حسن قریحه وجودت ناطقه ایله مشار بالنان وجیه و وقور و احبابی حقیقده همتی موفور برذات ذی شعور ایدی تجاوازلله عن سیئاته .

عاصم افندی دخی مرحوم مشارالیهک ترجمه حالی بیان صره سنده دیرکه دائماعرض فقر و احتیاج ایله جانب سلطنتدن و طرف عظامدن جر و استعطاف ایلمک عادتق اولوب اول خصلت دنیه و فاته دنگ منتهی اولمشیدی بعد وفاته هنوز اسپانیادن کتوردیکی یوز بیک غرشاق اسپانیا التونی مهریله چیقوب بعده انتقالنه قدر مدخری اولان سکر. یوز کیسه لک مقدار دینار تام العیار ظهوری حقتنده خیایجه کفتکونک باعث صدوری اولدی العهده علی الراوی .

حسن و سوء اخلاق بحثی بر طرفه براغلم واصف افندی فضالادن و شعردان برذات اولوب مدت مدیده امور دولت ایچنده بولنهرق نحوست طالعی حسبیله خیلی خیمازلهر چکدکن صکره اختیارلق وقتنده ریاست ایله کامروا و فرانسه طرفدارلرینه پیشوا اولهرق ایچه پارالیوب اول ائنده بروجه بالا اجنیلره و محمیلره دائر بعض نظامات یابلمش و روسیه سفن حربیه سنک استانبول بوغازندن اقدکزه مرورلری منع ایدلمش اولمق حسبیله بین الناس مقبولیت قزاتمش ایسه ده فرانسه طرفه زیاده تمایل اولندیغندن دولت علیه ایله روسیه وانکلتره دولتلری میانهلرنده برودت پیدا اولمش و نهایت مملکتین مسئله سی بروجه مشروح موجب تاسف و محجوبیت اوله جق برحاله قولمش اولدیغندن مدوح ایکن مقدوح اولمشدر .

واشبو مملکتین مسئله سی نهایت روسیه محاربه سنی وانکلز کیملرینک بوغازه کلمسی انتاج ایلمشدر انجق وقایع و حوادث حربیه نک بیانندن مقدم عربستان طرفنک وقایعنی بیان ایدلم .

### \* وقایع عربستان \*

وهابیلرک قهر و تدمیری ایچون شمیدی به قدر اجرا اولنان تدابیر کارکر تأثیر اولدیغندن باری حرمینک تسلط و هابیانندن محافظه سیله حجاجک سالما کیدوب کلمسی ایچون شام والیسی عظم زاده عبدالله پاشایه سرعسکرلک عنوانی ویرلمک خصوصی مطالعه و بوکا دائر کندوسیله مخبره اولمشیدی و هابیلر ایسه بتون جزیره العربی قبضه تصرفلرینه الوب حتی کچن سنه موسم حجه عبدالله پاشایه فیما بعد قافلده حجاجک اساجه ایله و محمل و طبل و زورنا و سائر رسوم نامشروعه ایله کلامسنی تنبیه ایتمشدر و محمل مصری سوبش طریقله کوتوروب کتورمکه مأمور اولان مصطفی چاوشه دخی محمل شریفه اشارت ایله بوکا بو قدر تعظیمکنز نیچوندر بورسم و عادتلر کنز ندر دیدکرنده قدیم الزماندنبو عادت اولمش بونی اجتماع حجاجه علامات قیلارلر دیو جواب ویرمسی اوزرینه فیما بعد بونی یامیکز و بردخی بونی کتورسه کنز قیرارز دیمشدر شو حاله کوره سنه آتیه ده حجاجی کوتوروب کتورمک برامر متعسر

ومدينه منوره محافطى زين العابدين پاشانك عجزى ظاهر اولمغله وزرادن مقتدر  
برذاتك حلب ايالتيه مدينه منوره محافظه سنه مأموريتى عبدالله پاشا طرفدن انما  
واخطار اولتمسيه حانيه محافطى حلبى احمد پاشا زاده عثمان پاشا عهده سنه حلب  
ايالتى توجيهيله وجده واليلى عنوانيله مدينه منوره محافظه سنه مأمور ايدلمشيدى  
عثمان پاشا ايسه بي وايه برذات اولوب حتى حانيه مأمور اولديغنده خر جراه  
ايمك اوزره بش كيسه اچمه تدار كنده خيلى زحمت چكمشيدى بناء عليه  
بومأموريتى ايجون كندوسنه مقدار كفايه نقود ومهمات كونده ريله جكي  
سؤال مقدره جواب اوله رق كندوسنه بيلد يرلمشيدى مع مافيه دائمى اداره سى  
ايجون عهده سنه حلب منصبى ويرلمش ديمك اولوب حلب ايسه اول ائشاده  
اشقيا يتاغى اوله رق بيتاغى مقتدر وزرا اوراده تفوذى يوریده مزدى شو حاله  
كوره حلبك محصوليله عثمان پاشانك حريمى محافظه سى قابل دكل ايدى نه چاره كه  
بووانده دولت عليه نك داخل و خارجى فوق العاده غائله لرى اولديغندن عربستان  
ايجون بشقه تدبير اتخاذه حال ووقتى مساعد دكل ايدى حتى صره امينك جانب  
ميريدن اقدارى مشكل ووالده سلطانك وفاتيله اقبالى منزل اولان كئخداسى يوسف  
اغايك متمول اولديغندن بوسنه صره اماتى مصلحتى مجاناً اكا كور درمك اوزره  
صره امانته اتخاب اولندوقده يوسف اغا ذاتاً حيج ايمك املنده ايسه ده مأموريت  
غائله سندن وارسته اوله رق كيمك نيتده بولنديغى وصره امانتدن عفو بيوريلور  
ايسه صره امينى تعيين بيوريله جق ذاته الى بيك غروش ويره جكنى تعهد ايله استعفا  
واسترحام ايتدكده موره لى بكر بك صره امينى نصب اولنوب يوسف اغا دخى اكا  
الى بيك غروش خر جراه ويرهش و كندوسى دخى افراد حجاج كبي برلكده جانب  
حجازه كيمش ايدى .

بو ائشاده ايسه شريف غالب حضر تلى وهايلىرك الندن عاجز قاله رق انلره مدارايه  
مجبور اولوب حتى اشبو يكرمى برسنه سى او ائنده محمد بن عبدالوهابك حفيدى  
عبدالناصر جده يه كلكه رك جدينك رساله سنى او قومتغه باشلامغله خلق دخى ايستر  
ايستمز استماع ايلردى وشريف غالب طرفدن مكه علماسى اشبو رساله وهاييه ينى  
او قومتغه مأمور وخلق دخى لاعن اعتقاد استماعه مجبور اولمشيدى وشريف غالب  
جده ده توتونك ايجلمسى وعلناً بيع وشرا سنى يساغ وكرك كندوسنك وكرك جده  
واليسنك نوبتى منع ايتدكدن بشقه حرم شريفده جماعتك تكر رينى منع ايله هر كسك  
برامام ارقه سنده نماز قيلمسى واذان ايله اكتفا اوله رق عقبنده صلات و سلام  
كتورمكدن فراغت اولتمسى كبي وهابى مذهبه مخصوص معاملاتى اجرا ايتديرردى



الحاصل جده و مکده بولنان اهل سنت و جماعت و هایلره مدارا ایچون شیعیلر کبی تقیه ایدرک مذهبیرینی کتم ایدیورلردی حتی عبدالناصر بولنری صحیح ظن ایدوب بورلرک اهللسی دخی ارتق مسلمان اولدی دیهرک درعییه کتمش و بووسیه ایله شریف غالب طرفندن انک رفاقیسه درعییه مأمور مخصوص کیدوب کلهرک امر مصالحه تا کد ایتشدیر .

شوحاله کوره حلب و الینسک حر مینی محافظه ایده بیلمسی شویله طورسون مدینه منوره یه کیده بیلمسی کوچلشمش و حر مینده نفوذ دولتک جریانی بریوک اردو سووقه محتاج اولمش ایدی .

حجازه بویه برقوه جسیمه سوقی ایسه جانب مصر دن اوله بیلوب مصر و الیسی اولان محمد علی پاشا کر چه امرای مصر یه غلبه ایدرک مستقلاً مصر ده اجرای حکومت ایتمکده ایسه ده امرای صعید طرفنی ضبط ایله جنک وجدال دن خالی دکل ایدیلر انکلترو لو دخی امرای تصحب ایدرک عفولری ایچون باب عالی نی تصدیع ایتمکده اولدینی حالده الفی محمد بک استدعای عفو و مرحت ضمننده کتخداسی محمد اغانی در سعادتیه کوندروب درون مصر ده ارناود حشراتی و خار جده کوله من عساکری بولنه رق یکدیگریله محاربه ایتمکده اولدق لردن بو حل اکر بر مدت ده دوام ایده جنک اولور ایسه ممالک مصریه سر ابا خراب اوله رق قریب العهدده بصره چوللرینه مشابه بر صورتیه کیره جکندن بخله امرای مصریه مظهر عفو پادشاهی اولدق لری تقدیر ده کرک حر مین شریفینک مرتباتی و کرک خزینه دولتک وارداتی تمامیه ایفایه متعهد اولدق لرینی عرض وانها ایتشیدی .

وا کر چه مصری کوله منسلرک دست تحکمندن قور تار مق اوته دنبرو دولتجه آرزو اولنور بر کیفیت اولوب حتی کوله من صنفی اساساً بتور مک اوزره اوچ سنه دنبرو مصره کوله کوتور یلوب صاتلمسی یساع ایدلش ایدی فقط مصرک منحصر آرانودلر النده قالمسی دخی بر خوش معنا اولدینی مطالعه ایدیلهرک و بو اوانده حر مینی و هایلرک دست تطاولدن خلاص ایتک هر ایشدن اهم اولسیله هر نصل اولور ایسه اولسون مصر ده صورت امن و آسایش رونما اولوبده اورادن حر مینه امداد و اعانه اولنق ایجاب حال و مصلحته اوفق و احری کور یلهرک امرای مصر یه نک تعهد ایتدکلری وجهله حر مینک مرتباتی و خزینه نک وارداتی ادا و ایفا و بالجمله او امر دولت علیه یه اطاعت ایده جکلرینه عامما و او جاقلو و وجوه و معتبران بلده کفیل و متعهد اولنق اوزره امرای نه مصره کیروبده و الینک کافی السابق قلعه ده اقامت ایللمسی خصوصنه قرار و یریلوب انجق محمد علی پاشا مصر ده ایکن بوضورتک اجراسی قابل اولمیه جغندن

مصر ایالتی سلانیک متصرفی موسی پاشایه و سلانیک منصبی محمد علی پاشایه بالتوجیه محمد علی پاشا و میر میران ارناود حسن پاشا معینترنده کی بالجمله عسا کر موظفه ایله برابر روم ایلی جانبنه کچرک محمد علی پاشا و اروپ منصبی ضبط ایلمسی ایچون فرمانلر اصدار ایدلمش و بو خصوصک اجراسی ایچون قبودان دریا حاجی محمد پاشا مأمور ایدیلر رک و معینه بر مقدار نظام جدید عسکری و یریلر رک خلال ربیع الاولده دو نهای هایون ایله اسکندریه مصر جانبنه کوندرلمش ایدی .

و مصرده کوله صالنامق حقنده اولان یساغک قالدیرلمسی کبی الفی طرفندن التماس اولنمش اولان بعض خصوصاته دخی مساعده بیورلمش و محمد اغا طرفندن دخی قبودان پاشانک اول طرفه مواصلتنده جانب میری ایچون بیگ بشیوز کیسه آچقه اعطا و تسلیم اولنمسی تعهد ایدلمش ایدی .

ربیع الآخرک اوننجی کونی قبودان پاشا دو نهای هایون ایله اسکندریه به و اروپ قره یه چیقده قده چونکه الفی بک اول ائنده اردوسیله بحیره اقلیمنده بولندیقندن کیفیته مطلع اولدینی کبی فوق العاده ممنون و منشرح اوله رق همان قبودان پاشایه بر چوق اغنام و ذخیره و هدایای سائر ارسال ایدی و کتخداسنک تعهد ایتدیکی بیگ بشیوز کیسه نک بشیوز کیسه سی کندو طرفندن و بشیوز کیسه سی ابراهیم بک و باقی بشیوز کیسه سی بردیسی طرفندن و یرلمک اوزره جانب قبلی یه یعنی سعید ایچنه مأمور مخصوص کوندردی .

مبلغ مرقومک بو وجهله اوچه تقسیمنه سبب بو ایدیکه خیلی وقتدنبرو امرای مصر یه نک رئیس و شیخ البلد ابراهیم بک اولدینی حالدیه مراد بک دخی آنکله شریک نفوذ حکومت ایدی و اگر چه بونزه معارض بر جداوی حسن بک و ارایدیده انلرک غلبه سی حسیلله حسن بک بک چوق وقت کروه مخالفین ایله سعید ایچنده امرار اوقات ایلمشدر و بویله طرف خلافته اوله رق سعید ایچنده بولنانلره کندو اصطلاحلر نجه امرای قبلیه دینلوردی جداوی حسن بک وفات ایتدکده یرینه کندو مملوکلرندن عثمان بک قائم مقام اوله رق اکا منسوب اولان امرابونک باشنه طویلانندی بوکاعثمان بک حسن دینلورکه جداوی حسن بکک امراسندن اولان عثمان بک دیمکدر مراد بکک وفاتنده انک یرینه دخی الفی محمد بک کچوب امرای مرادیه به رئیس و افندیسی کبی ابراهیم بک ایله شریک نفوذ اولدی و امرانک چوغی اکا منسوب ایدی فقط مراد بک غایت بر خشین آدم اولدینی حالدیه نصلکه ابراهیمه رعایت و احترام ایلر و الفی او بوب حضورنده ادیبانه او طورر ایدیسه الفی دخی اول وجهله ابراهیم بکه احترام ایدوب حتی او طورر دیمدکجه یاننده او طورر مزدی سائر امرادخی ابراهیم بکه کیمی پدر و کیمی بیوک

پدر معامله سی ایدر لردی الفی بوجه بالا انکلتزه به کیتد کده ینه مراد بک مملوکلر نندن  
 بردیسی عثمان بک امرای مرادیه به رئیس اولوب فقط الفینک امارت و یرمش اولدیغی  
 پشتک بک که کچوک الفی دیو معروفدر بردیسی به رقیب ایدی لکن کچوک الفی غایت  
 بد خوی بر آدم اوله رق ارقداشارینک رعایت خاطرینی قید ایتد کدن بشقه جدی  
 یعنی افندیسنک افندیسی مقامنده اولان ابراهیم بکه بیله لازم کلان احتراماتی ایفا  
 ایلمز اولدیغندن بالجمله امرای مصریه کندوسندن روگردان اولمغه امرای مرادیه  
 هپ بردیسنک ریاستی قبول ایدوب ایشته بودخی بردیسنک ترقیء شان ونفوذینه  
 وسیله اولدی و برده محمد علی ایله یکدل ویکجهت اولمسیله انک عسکرینی دخی کندو  
 قوتندن معدود بیله رک نفوذ حکومت مصریه بی منحصرأ الله الدی ایشته اول ائنده  
 الفینک انکلتزه ن عودتی خبری الندی حالبوکه الفی کلدیکی کبی امرای مرادیه نک  
 ریاستته تصدیر ایدرک بردیسی دخی انلردن بری اولمق لازم کله جکینی تذکر و بو قدر  
 نفوذ کسب ایتمشیکن الفینک معیتته کیرمک طبعنه کران کله جکینی تفکر ایلدیکی صره ده  
 محمد علی به الدانه رق منحصرأ ریاست کندوسنده قالمق اوزره الفینک طاقمی احما  
 ایتک داعیه سنه دوشوب بالاده شرح وایضاح اولنان وقایع ظهور ایله محمد علی  
 جمله سنی مصردن طرد ایتمکین ابراهیم بک ایله بردیسی امرای مصریه نک عادت  
 قدیمه لری اوزره صعید ایچنه چیقوب محمد علی ایله جنک وجداله باشلادقلری کبی  
 الفی دخی میدانه چیقوب امرا وکشافی یاننه اجتماع ایله برهیئت تشکیل ایلدیسه ده  
 بردیسی ایله میانه لرینه تخلل ایدن عداوت حسیلله جانب قلیده اقامت ایتیبو بجزیره  
 طرفنده کشت و کذار ایلردی و برده انکلیرلرله مخاربه وانلرک واسطه سیله استانبوله  
 دخی مراجعت ایده کلدیکنندن و هر حالده انکلیرلردن امداد امیدنده بولندیغندن  
 ساحله قریب بولمق استردی ایشته بوجهته امرای مصریه اوچ صنف اولوب  
 اگرچه برده سالف الذکر عثمان بک حسن ایله برابر دخی برخیلی کوله منار وار  
 ایدی لکن میرمومی الیه برشیئه قارشیمبوب صعید ایچنده برکوشه به چکیله رک محمد علی  
 ایله وقوع بولان محاربه لرده دخی بیاغی بیطرف کبی طوره یوردی بناء علیه الفی  
 اکا اعتبار ایتیبو کندو طاقندن بشقه ابراهیم بکه بردیسی عثمان بکی برر صنف  
 مستقل اعتبار ایدرک و یریه جک آچهنی اوچه تقسیم ایلمشیدی اولوقت استانبولجه  
 دخی امرانک احوالی لایقیله بیانمدیکنندن جمله سی یکدل ویکجهت اولدقلری حالده  
 جمله سنک حقدنه الفینک نفوذی جاری بیلنرک کتخداسنک سوزینه اعتماد ایله  
 انلری مصره ادخال ایتک اوزره قبودان پاشا بالذات دونمای هیاون ایله اسکندریه به  
 کوندولمشیدی .

حالبوکه مبلغ مرقومک بروجہ مشروح ایکی حصہ سنک امرای قبایہ دن تحصیل  
ایچون الفینک آدمی صعید ایچنه کیدوبده امرا اجتماع ایله کیفیت درمیان اولندقدہ  
بردیسی عثمان بک (مادامکه الفی دولتیر ایله مخاطبه ایده جک درجه یه کش وایشی  
اویدیروب قیودان پاشانی بورایه قدر کتورتمش بو آچھینی دخی کندوسی ویرسون  
بز لر ارتق بیوکمز و پدرمز مقانده اولان ابراهیم بک و عثمان بک حسن ایله برلکده  
انک خدام واتباعی اوله لم) دیمسی اوزرینه بین الامرا اختلاف کله وقوعه کلدیکی  
ائنده محمدعلی پاشادخی امرای قبایه یی هدیه لر ترتیب وارسال ایله تطیب ایدرک الفی  
ایله اتفاقلرینک منعه چالش یوردی بونک اوزرینه الفی بک زیاده صیقیلوب امرای  
قبایه یی افتناع و الزام ایچون انلرله مخابره ایده طورسون .

برو طرفدن محمدعلی پاشا کیفیته واقف اولدینی کبی سوزده مطاوعتکارلق  
کوستر مکله برابر قلعه یه مهمات و ذخیره ادخال ایدر و طوب عربه لرینک تعمیر  
کبی تدارکات احتیاطیه دخی اشتغال ایلر ایدی ورؤسای عسکری جمع ایله مشاوره  
ایدرک جمله سنه مصر دن چیقماق اوزره برقرار ویردرمشیدی زیرا محمدعلی  
بومقامه طاهر پاشا کبی بردن بره پارلایوبده چیقمامش وبلکه کمال تدریج و تائی ایله  
ایشک هر طرفی دوشونرک واسباب لازمه سنی حاضر ایدرک بوراده یه کش ایدی  
وبوقته قدر رؤسای عسکرک جمله سی انک سایه سنده نائل ثروت و یسار و کیمی  
اولنرک و کیمی متعدد خانه و دکان و عقارات سائر ایدینه رک بر جهته مصرده  
علاقه دار اولمش و الحاصل هربری برو جهله مصرده مقید اولدینی حاده عظیم  
ثروت و سامان بولمش ایدیلر بوسعدت حالدن آیرملق کندولرنجه جانلرندن آیرملق  
کیددی و بوحالک بقاسی محمدعلی پاشانک وجودیله مشروط اولدینی ایوجه اکلامش  
ایدی مصرک علما و اشراقدن دخی کندوسیه یکدل ویکجهت خیلی ذاتلر پیدا  
اولمشیدی بناء عایه خصوص مبحوث عنیه دائر صادر اولان فرمان عالی کندوسنه  
ایصال اولندقدہ نقیب الاشراف عمر افندی ایله سائر خواص جلب ایله کندولره  
ارائه و کندوسنک عزلیله موسی پاشانک نصبی و امرای مصریه طلب عفوایله عسکرک  
مصر دن خروجنه دائر در سعاده عرضحال تقدیم ایتش و خدمت دولت و حرمینک  
ایفاسنی و تأمین بلادی شرط ایلمش اولدقلرندن دولت عایه دخی بوشرائطی ایضا  
ایده جکلرینه علما و مشایخ و سائر وجوه و معتبرانک ضمان و کفالتی شرطیه بکلرک  
مسئولرینه مساعده بیورمش اولدینی افاده ایتدکن صکره واریکز دوشونکر  
رأیکز نه ایسه کلوب افاده ایدیکز دیو مجلسه ختام ویرمکله جمله سی طاغدی لر لکن  
ایش رؤسای عسکر ایله بعض خواص منسوبان ینلرنده قرارلشمش ایدوکی جهته

احتیاطاً طوب عربہ لرینک تعمیرینہ دوام اولتہ یوردی و محمد علی پاشانک دیوان  
افندیسی بر محضر قلمہ آلوب ابتدا نقیب الاشرافہ و مشاہیر علمای مصریہ دن شیخ  
شرقاوی یہ ارأہ ایتدکنصکرہ بویله محضر یایلوب درسعادتہ تقدیم اولتمسی مشایخہ  
امر اولتغله همان تبیض و تختیم اولندی .

محضرك خلاصه مضمونی بو ایدی که کمال خضوع و تذلل ایله ارادۀ سنیہ یہ صورت  
مطاوعت کوسترلکدن صکرہ امر انک توبه سی قبول بیورلمش فقط علما و او جاقلو  
ورؤسا و وجوه مصرک امرایه کفیل و متعهد اولملری امر ایدلمش سمعاً و طاعة  
لکن بزکفالتدن عفو مزی رجا ایلرز زیرا کفیلک اجرای کفالتہ مقتدر اولسی  
شرطدر بز لر ایسه بوندن عاجرز طاهر پاشا وقعه سندن صکرہ سیدی علی پاشانک  
غدر آقتلی و دیار رومدن کلان حجاجک اعدامی و کچن سنه وقت فخرده کوله منلرک  
مصره محمولری کبی قریب العہدہ ظہورہ کلان و فایع فیعیه جمله نک معلومیدر شو  
حالدہ بز نصل کفیل و متعهد اوله بیلورز عہدۀ اقتدار مزدن خارج اولان شیدنطولانی  
مؤاخذہ بیورلما مقاعمزی نیاز ایلرز بزم بورجز انجق طرف دولت علیہ دن مأموراً  
کلان والی یہ شرعہ مخالف اولمیان ایشلرده اطاعتدر شوراسیده وار که محمد علی پاشا  
ارباب طغیان و فسادک دفع و تأدیبی ضمتده دولت علیہ نک او امرینی انفاذ ایچون  
طوغریسی نہایت مرتبہ ده سعی و جهد ایلمشدر دیو کفالتدن ابا ایله ضمناً محمد علی  
پاشانک ابقاسی عرض وانها اولمشیدی .

متعاقباً قبودان پاشا طرفندن شیخ سادانہ و نقیب الاشرافہ وسائر مشایخہ بیورلدیلر  
تحریر ایله محمد علی پاشا و جرجا حاکمی حسن پاشا بالجمله عسکرلرینی استصحاب ایدرک  
مکرراً و معززاً دمیاط طریقہ کیتملری ارادۀ سنیہ اقتضاسندن بولندیغنه منی لوازم  
سفریہ لرینک تجهیزی ایچون جملهً معاونت ایدہ سکز دیو امر و اشعار ایتدکنده محمد  
علی پاشا طرفندن ویریلان تعلیمات موجبنجہ یازدقلری معروضات جوابیہ ده (او امر  
علیه کز کدی سمعاً و طاعةً لکن اهل مصر رعیه و قوم ضعیفدر شاید عسکر عصیان  
ایدوبده چیقمیہ جق اولور ایسه اهل بلده یہ ضرر ایریشور و خانہ لر خراب اولور  
و هتک عرض کبی فناقلر وقوعه کلور لطف و مرحمت سز کدر) دیمشملر ایسه ده  
قبودان پاشا بو عذرلری قبول ایتیبوب بهمہ حال محمد علی پاشا ایله حسن پاشانک  
عسکرلریہ بر لکده مصر دن چیقملری ایچون مصر ایله بخابره ایتدیکی ائنادہ محمد  
علی پاشا کوله منلری جوار مصر دن طردایتک اوزره تدابیر حربیہ ایله مشغول ایدی .  
بعده جمادی الاولانک اون برنجی کونی موسی پاشا اسکندریہ یہ اصل اولدقده  
دفتردار احمد افندی بی قائم مقام نصب ایدرک ایراد و مصرفی طوتمق اوزره کندوسنه

امرنامه کوندرمش ایسه ده دفتردارك انده برشی اولدیغندن قبول ایتمدی بو ائشاده ایسه محمد علی پاشانك عسکری رحمانیه طرفنده بیوک الفی ایله محاربه اوزره بولندیغندن اول طرفه امداد واعانه ایله مشغول اولدیغنه مبنی موسی پاشانك تحریراتنه اهمیت ویره جك وقتی یوغیدی .

وبرده قبودان پاشا امرای قبله نك الفی بك ایله متفق اولدقلرینی ومصر ك افكار عمومیه سی محمد علی پاشانك ابقاسی طرفنده بولندیغنی اكلا دقده الفی ایله مخابره ایتمكده ایكن محمد علی پاشا طرفنی بوشالامیوب انكله دخی محالست ومحبتی تازه ملك اوزره مخابره دن خالی دكل ایدی . نهایت مبالغ موعوده نك اعطاسنده امرای قبله نك الفی به اعانه ایتمیه جكاری تیقن ومبالغ مذكوره نك كافه سی الفی طرفندن ویرملك لازمكله جکی تعین ایدوب انجق بو حالدده جمله سنی بروجه پیشین ادا ایدده یه جكندن تدارك ایدده بیلدیکی قدر شی ویروبده باقی سنی مقسطا ویرمك اوزره قبودان پاشایه خبر کوندر دكده ایشك رنکی دكشمش اولدیغنی جهته قبودان پاشا منفعل ومحمد علی پاشا ایسه مبالغ موعوده نك برقاچ قاتی ویرمك وهر خصوصده اوامر علیه یه توفیق حرکت ایتمك خصوصلرینی تعهد ایلمش ایدو كندن قبودان پاشا دخی آنك طرفنه مائل اوله رق تبدیل افكار وخالل جمادی الاخره ده مکتوب بجیسنی محمد علی پاشایه ارسال ایله بر محضر ترتیب و اوغایله ارسال ایلمسنی اخطار ایتمکین محمد علی پاشانك ضعفا حقدده کور یلان رحم وشفقتی واحقاق حقوق عباد امرنده عدل وحقانیتی واحکام شرعیه به اطاعتی وعلما وفضالیه محبتی حسبیه وكوله منار وقتنده مشهود اولان مظالم وتعديات هنوز خاطر لردن چیقمیوب شمدی ایسه خلق مطمئن ویوللر امین اولمسلیه کافه عوام وخواص آنك والیلکندن خشنود اولوب بشقه سنی استمدک لردن مصر والیلکنده ابقاسی نیاز اولتور دیو برقطعه محضر یوللو عریضه یازیلوب بالجمله مشایخ واختیارلر وواجقلویه تختیم ایتدیرلدکنصکره محمد علی پاشا انی اوغلی ابراهیم بك ایله قبودان پاشایه کوندردی . وبوصره ده برچوق آت واقشه هندیه وهدایای سائره دخی تقدیم ایلدی .

ایشته بو اوانده مصر ملاسی بولنان حکیم اوغلی علی پاشا حفیدی محمد سعدا بك افندی عهدده سنه ایکویوز یکرمی ایکی سنه سی محرمی غره سنندن ضبط ایتمك اوزره مدینه منوره مولوتی توجیه بیور یلوب حامی زاده راشد افندی دخی خطیب زاده یرینه مکده مکرمه قاضیسی نصب اولدیغنی صره ده خلیل حمید پاشا زاده عارف بك افندی دخی مصر ملاسی اولمغله بو ائشاده مصره کلشیدی .

متعاقباً قبودان پاشا کتخداسی مصره کلوب برامر کتوردی خلاصه مضمونی (علما واشرافک شهادتیه ثابت اولدیغنی اوزره خواص وعوام محمد علی پاشان خشنود

اولدینى جهته مصر والیکنده ابقا اولندینى فقط اودخی قافله حاجی چیقارمق ولوازم حریمى ایفا ایلمک و نغر رشید و دمیاط واسکندریه وارداتی رسوم کمرکه مربوط اولهرق ترسانه عامریه عائد اوله جغندن بولره طوقونماق و مادامکه امرا عفو اولمشدر . آرتق آنلره محاربه دن فراغت ایدرک تعیشلری ایچون کندولره یرکوسترمک شرائطه رعایت ایتسی لازم کله جکی ) بیانندن عبارت ایدی . بونک اوزرینه قلعهدن و اوزبکیه دن و بولاقدن طوپلر آتیهرق شنک ایدلدى . و اوائل شعبانده قپودان پاشا موسی پاشا ایله برابر اسکندریه دن فک لنگر اقامت و محمدعلی پاشا زاده ابراهیم بکی دخی رهن اولهرق برلکده استصحاب ایله درسعادته عودت ایتدی و بوضورتله الفینک بونجه سعی و امکاری هبا اولوب اره سی چوق کچمکسزین محمد علی پاشایه ابقا فرمانیله قلیچ قفتان کیتدی و مصر مسئله سی بتدی .

و اوائل شهر رمضانده بردیسی عثمان بك ایله ینه دهات امرادن ابو دباب سلیم بك اجل موعودلریله فوت اولدیلر .

واکرچه الفی بك قپودان پاشانک بو حالده عودتی اوزرینه ینه انکلیرلره مراجعت ایله کندوسنه امداد ایچون بر مقدار انکلیر عسکری کوندرلمسنى طلب و التماس ایلمش ایسه ده انکلتره دولتیله دولت علیه مصالحه اوزره اولدیغندن خودبخود الکای مصره عسکر ادخالی اویه میه جنی بیانیله اعتذار ایتشلر ایدی . فقط زبرده بیان اولنه جنی اوزره متعاقباً دولت علیه ایله روسیه و انکلتره دولترینک اتقاقی خلل پذیر اولیجق انکلیرلر درحال الفی یه خبر کوندروب قریباً کندوسنه امداد ایچون بر مقدار انکلیر عسکرینک اسکندریه یه ارسالنی وعد ایلمش اولدقلرندن الفی بك بر قاچ آى قدر انکلیر عسکرینک ورودینه انتظار ایله بحیره طرفده طیانوب طوره رق محمدعلی پاشانک عسکر یله کارزاردن خالی اولیوب بر طرفدن دخی کندویه بر مرکز اولق اوزره دنهورک ضبطنه اقدام ایلمش ایسه ده آله مدیغندن و اول طرفده زاد و علف قالدینى جهته معیننده کی عربان طوره میوب تبدیل مکانه طالب اولدقلرندن چاره سز صعيد ایچنه طوغری کیتمک اوزره جیزه ناحیه سنه کلدکاده ذی القعدة نك اون طقوزنجی کونی وفات ایلمشدر کندو امراسندن کچوک الفی دیو معروف اولان پشتک بك دخی آندن اول فوت اولمشیدی .

الفی محمد بکک اولوجهله وفاتی مصرجه محمد علینک سعد طالعه دن دلیل اتخاذا اولمشدر واکرچه کندو وصیتی اوزره امراسی شاهین بکی کندولره رئیس ایتدیلر ایسه ده الفینک زماننده کی جمعیت قالدینى جهته متشتت و متفرق اولهرق صعيد ایچنه طوغری چکیلوب کیتمش اولدقلرندن مصرک جواری و بحریه جهتی بلا مانع محمدعلی پاشانک انله کچمشدر .

قبودان پاشا اسکندریه ده ایکن بروجه بالا ادرنه وقعه سی ظهوره گلش اولدینی جهته مصرده برغانه چیقاره قسزین ایشی بوجمله تسویه اتمسی اکثر وکلای دولتک دخی رأینه موافق اولمق لازم کلور دیسه ده محمد علی پاشانک ابقانسنده الفینک وعد ایله دیکی مبالغدن ده از یاده آچه آلمسی مصری مزاده ویرمک کی یار واغیار نظر نده پک چرکین برشی اولمش وقبودان پاشا مصر دن برچوق آچه لر ارتکاب اتمسیله ایشی بوشکله قوبدی دیو شیوع بولمش ایدی قالدیکه انکلیزلرک تعریضاتنه قارشو هر قباحتی قبودان پاشایه یوکلتمک اهون کوریلدرک اوائل شهر رمضانده در سعاده کلدکده بر قاج کون صکره عزل ایله یرینه میراخور ثانی صالح بک رتبه وزارتله قبودان دریا اولدی .

قبودان اسبق عبدالقادر پاشایه دخی بوضره ده ابقاء وزارتیه خانیه سنجانغی توجیه بیورلدی .

قبودان سابق حاجی محمد پاشا عهده سنه ده خوتین محافظتغی توجیه بیورلدی ایسه ده بی وایه اولدینی بیانیله اعتذار واستعفا ایتمکده ثروت و یساری وار ایکن بوجهته استغناسی باعث انفعال شهر یاری اوله رق رتبه سنک رفعیله بروسیه نفی اولندی . کله لم وقایع دولیه .

### \* حوادث و وقایع اوروپا \*

نابلیون پوناپارته تخت حکومت کچدیکی وقتدنبرو غلبه سنی صاعلامق اوزره اوروپاده کندوسنه بر متفق بولمق املنده اولوب ابتدا پروسیانی دائرة اتفاقه آبق اوزره جلبه چالشمشیدی واکرچه طایران پروسیانک ثباتسز لغندن بمثلله آوستریا دولتی بیودیلوبده آنکله اتفاق اولمق صورتی ترجیح ایلر دیسه ده آوستریانک بیومسی کندوسنه یایتالیان یر ویرمک ویاخود ممالک محروسه دن افلاق و بغان کی بعض ممالکی ضبط اتمسینه مساعده و معاونت ایدمک ایله اوله بیلور حالبوکه ایتالیان یر ویرمک پوناپارته نک ایشنه کلز و دولت علیه زیاده ضعف و تنزله دوچار اولدینی تقدیر ده برارالمق مترصد زمان فرصت اولان روسیه لونک تجاوز و اقتحامی احتمال و ملاحظه سنه مبنی دولت علیه نک تمامیت ملکی ملتزمی اولدیغدن ممالک عثمانیه دن آوستریا ویه یر ویرمک نابلیونک ملاحظه سنه هیچ الویرمز ایدی . بناء علیه پروسیا اتفاقی التزام ایلر ایکن اکا موفق اوله میوب بالاده اشعار اولدینی اوزره پارسدن حرکت ایله پروسیا اوزرینه عزیمت واشیو یکر می برسنه سی رجه مصادف اولان بیک سکز یوز التی سنه میلادیه سی ایلول فرنیکنسنک یکر می بشنده ورجبورغ شهرینه ورودنده اجتماع ایدن المانیا قرال و پرنسار یله ملاقات ایتمکدنصکره الاز یاده



صرف ذهن ابتدیی مسئله کندویه بر متفق بولمق خصوصی ایدی . شویله که :  
 آوستریا ایمپراطورینک برادری اولان ورجبورغ دوقهسی آوستریا اتفاقدن حاصل  
 اوله جق منافعدن بخت ایدرک ایمپراطور فرانسجقو ایله بوباده مکالمه ابتهدار اولنسی  
 ایچون پک چوق تشویق و ابرام ایتمکله پوناپارتهنک دخی ذهنی او طرفه میل ایدرک  
 بوکا دائر خیلیدجه صرف افکار ایتدکن صکره آوستریا دولتیله مذاکره به کیریشمک  
 اوزره ویانه ده کی ایلچیسنه تعایمات کوندرمش وبعده پروسیا اوزرینه حرکت ایلمشدر .  
 پروسیانک ایکی فرقه یه منقسم اولان قوه عسکر یه سی ساقسونیا قرالنک عسکری دخی داخل  
 اولدینی حالده یوزسکسان بشیک نفر دن عبارت اولوب بوکا مقابل ناپلیونک معیتنده یوز  
 طقسان بیک جنکاور فرانسز عسکری بولندیغه نظر آ پروسیا دولتی جانب شماله چکیله رک  
 و تحفظی . حرکت ایدرک روسیه دن کله جک امداده منتظر اوله جق یرده قوه عسکر یه سنه  
 کوه نهرک برآن اقدم مظفر اولمق آرزوسیه همان فرانسز لری شاشرمق اوزره سرعت  
 ایله حرکت تعرضیه ابتهدار ایلدیکندن اوائل شعبانده یعنی تشرین اول فر نکینک سکنزنده  
 فرانسز اردوسی اوچ قول اوله رق سال نهرینی عبور و ساقسونیا ممالکینه مرو ایله برقاچ  
 اوفق محاربه لر قزاندن صکره یینانام شهرک جوارنده پوناپارته معیتنده یوز بیک نفر اولدینی  
 حالده پروسیانک یتمش بیک نفر دن مرکب براردوسنه لدی التصادف پروسیا لولر  
 ناپلیون اردوسی اولدینی بیلمیوب اوتوز بیک نفر دن عبارت بر فرانسز فرقه  
 عسکر یه سی ظن ایدرک اوزرینه اقتحام ویدی سکنز ساعت حر به دوام ایله اون ایکی  
 بیک مقتول و مجروح و یرد کدن صکره پریشان اولمشلر و فرانسز لر کایتلو مهمات  
 ایله ایکی یوز پاره طوپ و اون بشیک اسیر براقشملر فرانسز لرک ایسه مقتول  
 و مجروح لری درت بیک قدر ایش .

اول کون دیگر طرف دن پروسیانک التمش بیکلک براردوسی پروسیا قرالی دخی برابر  
 اولدینی حالده یکر می التی بیک نفر دن عبارت بر فرانسز فرقه سنک اوزرینه هجوم  
 ایتمش ایسه ده فرانسز لر قوزن نام صرپ بوغاز لری اولجه طوتمش بولندقلر دن التی  
 ساعت محاربه تمتد اولدقن صکره پروسیا لولر رجعته مجبور اولمشلر و محاربه ده  
 دخی اون بیک قدر مقتول و مجروح لری اولدقن بشقه اوچ بیک اسیر و یوز الی  
 پاره طوپ براقشملر فرانسز لرک دخی یدی بیک قدر مقتول و مجروح لری اولوب  
 برقاچ جنرال لری دخی اولمش ایدی .

پروسیا قرالی بوجهته مظفر یتدن محروم اوله رق رجعتدن مکدر اولدینی حالده  
 در عقب دیگر یتمش بیکلک براردوسنک بوجه مشروح بتون بتون تار مار اولدینی  
 خبر الیجق ارتق ظفر دن مایوس اولدینی کبی عسکرینه دخی بر قورقو دوشه رک

پريشان اولدقلرندن وفرانسزلر پروسيا عسكرينه امان وزمان ويرميوب كمال سرعته تعقيب ايلدكلرندن پروسيا قرالى برلينه واورادن دخي شمال طرفه صاووشوب كيتمشدر .

بونك اوزرينه پروسيا نك بر چوق قاعه وبلده لري بلا مدافعه فرانسزلر يدينه كچمش وتشرين اولك يكرمي يديسنده پوناپارته آلاي ايله برلينه دخول وقرال سراينه نزول ايتمشدر .

شوراده بوراده متفرق بولنان پروسيا فرقه لري دخي كيمي تسليمه مجبور اولوب كيمي طاغلمش والحاصل برآي ظرفنده بتون پروسيا اردوسي نابيد اولمش ايدوكندن ناپليونك بومظفرتي بتون اوروپايه دهشت وحيرت ويرمشدر فقط بو مرتبه مظفريت مجرد ناپليونك مهارت وجسارتنه محمول اوليوب فرانسه جمهوريتنك احداث ايلمش اولديني مساوات قاعده سنك دخي بونده مدخل كليسي اولديني يعني عادي بر نترك سرعسكرلك مسندينه قدر چيتمق احتماله مني فرانسز عساكرينك كمال حرص وهوس ايله فوق العاده شجاعت كوسترمكه اولدقلري اكلاشديغندن دول اوروپا بوديقه يني تفكره باشلاديلر پروسيا قرالى دخي ممالكنك حدودنده طولاشمقده اولديني حالده اصلزاده لك امتياز لرينك رفاعيله پروسيا اردوسنده دخي بومساوات قاعده سنك اجراسي ايچون بر نظامنامه حاضر لمقده ايدى . ناپليون بو مظفريت اوزرينه ارتق كندوسني بر اوروپا اوزرنده هر شينه مقتدر كوروب فقط بجزراً انكلتره يه غلبه دن مأيوس اولديغه مني آني دخي تجارتيه تضيق ايله صاحبه مجبور ايلمك اوزره تشرين ثاني افرنجينك يكرمي برينه مصادف اولان اواسط شهر رمضانده برلندن نشر ايلديكي بياننامه ده انكلتره لونك محاصره يه تحته انديغني يعني اولا فرانسه ومتفقلري بولنان ايتاليا وفلمنك واسپانيا وبتون المانيا انكلتره ايله اولان معاملات تجاريه وسائر لريني كلياً قطع ايدجهك ثانياً انكلتره نك تحت حكمنده بولنان يرلك محصولاتي نزهده بولنورسه بولنسون مصادره اولنه جق ثالثاً انكلتره يه كيدن وانكلتره دن كلان وانكلتره يه يازلمش اولان مكتوبلر كافه سي طوتيلوب باقيه جق رابعاً فرانسه ده ومتفقلري ممالكنده طوتيلان انكلتره لر اسير حكمنده طوتيله جق خامساً دول سائر سفائن تجاريه لرندن انكلتره يه ياخود زير اداره سنده اولان ممالكه اوغرايانلر فرانسه نك ومتفقلرينك ليمانلرينه كيرميوب كيره جك اولورلر سه مصادره اولنه جق اولديغني اعلان ايلدى .

بوئناده پروسيا قرالى متار كه ومصالحه تكليف ايلديسه ده ناپليون شمدي مصالحه قابل اوله ماز ومتار كه دخي ساييز ياده وويستول نهري جوارنده واقع قاعه لرك تسليمه

موقوف در دیو جواب ویرمیشدی چونکه محاصره بریه اصولک اکملی روسیه لونک مغلوباً فرانسه بولتیقه سی دائره سنه التسنه موقوف اولدیغندن ناپلیون جانب شماله حرکت ایتک اوزره ایدی روسیا قرالی ایسه بوتکلیفه موافقت ایده مدیکندن امدادینه یتیشان روسیه لولر ایله برلکده حربه دوام ایتک اوزره قرار ویردی ناپلیون دخی ویستول ونین نهرلری سواحلتنه طوغری حرکت ایتک اوزره تدارکات سفریه ایله مشغول ایدی .

فقط مدت میدیده دنبرو لهستان فرانسه یی کندوسنه حامی بیلوب ابقاء استقلالنی اندن امید ایتدیکی جهتله فرانسه اردوسی اول جانبه تقرب ایتدکده لهلولر پک زیاده مسرور اوله رق فرانسه اردوسنه مهمات و ذخیره تدارک و تقدیم ایدر اولدیلر پوناپارته نك افکاری دخی انلرک آرزوسنه موافق ایسه ده لهستان مسئله سی میدانه قویدینی کبی اول ائساده دائره اتفاقه المق استدیکی آوستریا دولته طوقه جغنی درخاطر ایدرک اول امرده آوستریا ایله مذاکره مصلحته کیرشدی آوستریا لویایسه اولوقت فرانسه لو حقدده مشکوک و مجهول بر حال و طورده بولنوب بروجه بالا ناپلیونک ورجبورغدن ایلچیسنه کوندرمش اولدینی تعایمات اوزره ایراد اولنسان اتفاق تکلیفه آوستریا لویا باشدن صاومه جوابلر ویرمش و لهستان طرفنه سکسان بیك عسکر تجمع ایتدرمش اولدیغنه نظراً وقت فرصت الویردیکی کبی فرانسه علیهنه حرکت ایده جکنده اشتباه قالماملغه پوناپارته ارتق آوستریا انفاقدن مایوس اولوب یالکر لهستان دولتک تشکیلی ایچون آوستریانک موافقتنی التماس ایله غالیجیا قطعه سنک لهستانه ترکی واکامقابل ساینیا قطعه سنک آوستریا ممالکنه الحاقنی تکلیف ایلمشیدی .

و جانب شماله حرکتدن مقدم قوه عسکریه سنک التیوز بیکه ابلاغنی و بونک اوچیوز بیک فرانسه وایتالیا و فلمنک ممالکنک محافظه سنده بولنهرق باقی اوچیوز بیک نفرینک دخی حربه داخل اولسنی قرارلاشدیروب فقط فرانسه نك وارداتی بوقدر عسکرک اداره سنه کافی اولمیه جغندن فرانسه عسکرینک استیلا ایلدیکی روسیا و ممالک سائر وارداتنک استیفا سی ایچون بشقه جه براداره مالیه احداث ایلدی .

اول اوانده طاقم رومیه اردولری لهستانه طوغری یوریمکده اولوب انجق روسیا قرالنک معیتده کی عسکرله برابر روسیه لو ویستول نهری سواحلتده فرانسولری یوز یکرمی بیک عسکرله قارشولیه بیه جک اولوب پوناپارته ایسه معیتده کی اوچیوز بیک عسکرک هیچ اولماز ایسه یوز الی بیکنی روسیه لویه قارشو میدان حربه سوق ایده بیه جکندن روسیه اردولری کندوسنه تلاش ویره جک بر قوت دکل ایدی واقعا انکلتره لولر فرانسه و المانیا سواحلتنک بعض مواقعه عسکر

چبقار منی وعد اتمشیدی و دول متفقہ بر مظفریہ نائل اولدینی کچی آوستریا دولتک کندولریہ برلشہ جکی درکار اولدیغندن غالیجیا طرفندہ کی سکسان بیک آوستریا عسکرینی دخی کندولریہ مال ایدہ یورلر ایدی ناپلیون ایسہ کندو قوتنہ زیادہ سیلہ کوونمکده اولدینی جہتلہ بونلردن اصلا اندیشہ ایتیمرب هان هانورہ جہتتی محافظہ واسوج طرفندن وقوعی محتمل اولان هجومہ مدافعہ ایتک اوزرہ برفرقہ تعیین وسایزیا ایالتنی ضبط ایتک اوزرہ برادری پرنس ژروم قوماندہ سیلہ باویرا وورتمبرغ عسکرلردن مرکب دیگر برفرقہ سوق ایتدکدنصکرہ (داود) و (اوزرو) و (لان) نام مارشاللر ایلہ پرنس (مورا) اردولرینی لهستان اوزرینہ سوق ایتدی بونلرک جملہ سی سکسان بیک نلردن عبارت اولدینی خالدہ لهستانہ طوغری یوریوب مارشال داود اردوسی تشرین نئیء افرنجینک اون برینہ مصادف اولان اوائل رمضانده لهستانک باشلوچه شہرلردن اولان پوزینہ واردقده اهالی طرفندن فوق العادہ مسرتلہ قبول اولمشیدی .

چونکہ لہلولر کسب استقلال ایدہ جنککاری وقت کلدی ظنیلہ هر یرده فرانسر عسکرینی تعریف اولغاز صورتده ممنونیت ایلہ قارشولر ایدیلر . بناءً علیہ مارشال داود دخی انلرک حال پریشانہ آجیوب حقارندہ یوناپارتیہ شفاعت ایتکده ایدی . لکن مارشال اوزرو ایلہ مارشال لان لهستان بطاقلرندہ چکدکاری زحمتلردن متأثر اولہ رق بویلہ قابلیتسز برملکتده لہلولر کچی مسکین و ثباتسز بر ملتک دولت ہیئتہ کیرہ میہ جکنی یوناپارتیہ اخطار ایتشلر ایدی .

ناپلیون لهستان دولتک احیاسی افکارندہ ایکن مارشاللرک یکدیکرہ مابین اشعاراتندن ترده دوچار اولمسیلہ بو خصوصک قرار قطعینی بالذات لهستانہ کیدوبده معلومات کافیہ تحصیانه تعالیق ایدرک همان برلیدن حرکتلہ خلال شہر رمضانده یعنی تشرین نئیء افرنجینک یکرمی بشندہ پوزین شہرینہ موصلت ایتدکده بر مستقل حکومتہ نائلیتہ شایان حرکتده بولنوبده فرانسر اردوسنہ بر معاونت فعالیہ کوسرمدکچہ کندوسندن برشی امید ایتاملرینی لہلولرہ اعلان ایلدی . اول ائنادہ فرانسر جنراللری ائسای طریقده بولنان پروسیہ عساکری بقیدلرینی پریشان ایدرک وارشاو شہرینہ طوغری حرکت ایدوب اورایہ تقربلرندہ روسیہ عساکری ویستول نہرینی عبور ایلہ رجعت ایلمش اولدقلرندن فرانسلر بلامانع مزاحم وارشاوہ کیرمشلر وهان ویستول نہرینی عبور ایلہ ایلرولمکده باشلامشلر ایدی وکانون اول افرنجینک اون التیسنہ مصادف اولان اوائل شوالده ناپلیون دخی وارشاوہ کیتدی .

بوموسمده لهستانك ایصمزر و بطاقلق یرلرنده حرکت عسکر به پک مشکل ایسه ده پوناپارته شتایه کیرمدن روسیه لولرک نین نهرینه قدر طرد و دفعنی تصمیم ایلدیکندن بودرلو زحمت و مشقتلری قید ایتمه رک و سرعت اوزره حرکته واقع اولان برقاچ اوفوق تفک محاربه لرده روسیه لولره غلبه ایدرک قوشمین قصبه سنی ضبط ایتدکدنصکره اواخر کانون اولده عسکرینی مشتانشین اولمق اوزره وارشاوه اعاده ایتدی .

لهستانک هواسی صغوق و رطوبتلو اولدیغندن فرانسزلر خسته لکله دوچار اولوب علی الخصوص جنراللرک چونغی او طه لرندن چیقعه ماز ایدی .

بیک سکر یوزیدی سنه میلادیه سی کانون ناینسینک اوائلنه مصادف اولان اشبو بیک ایکیوزیکرمی برسنه هجریه سی شوالنک اواخرنده ناپلیون اولوجهله دوچار مشکلات اوله رق اردوسنک اداره سیله مشغول اولدیغنی انسانده برادری ژروم قومانده سنده اولان فرقه نیک ساینزیا قطعه سنی استیلا ایلدیکی خبرینی اله رق نمون و منشرح اولمشیدی .

روسیه لولر فرانسزلرک مشتایه چکلملرینی فرصت عدا ایله بغته اوروب پریشان ایتک اوزره حرکت ایتشار ایسه ده پوناپارته کیفیندن خبردار اولوب اول انسانده کوللردخی طوکمش اولدیغندن همان طاورانهرق روسیه لولرک اوزرینه هجوم ایتکله روسیه لولر رجعت ایلمش ایسه ده پوناپارته کمال سرعت اوزره تعقیب ایله خلال ذی القعدة ده یعنی شباط افرنجینک اوائلنده ایلونام محله یتیشه رک روسیه لولری محاربه به مجبور ایلمش ایسه ده پک زیاده سرعت ایله حرکت ایلمش اولدیغندن اردوسنک هر فرقه سی یاننده بولنیوب روسیه لولرک سکسان بیک نفریه درتیوز الی طوپونه قارشو انجق التمش بیک نفر و ایکیوز باره طوپ ایله جنکه حاضر اولمغین برکون علی الصباح محاربه به شروع ایله برقاچ ساعت طوپ جنکی اولدقدنصکره روسیه لولر هجوم واقتحام و فرانسزلر دخی شدیداً مقاومتیه قیام ایتدکلرندن پک شدتلو و قائلو بر محاربه وقوع بوله رق هنوز غالب و مغلوب تبین ایتکمیزین ظلام شب یتیشوب مبارزه به فیصل ویرمشیدی . فردای روسیه لولر هجوم ایتسه غالب کللری ماجحوظ ایکن انلرک دخی پک چوق تلفاتی اولوب طرفینه ییغیناق کلمکه روسیه جنراللری فرصتی اغتنام ایتیب چکیلیویرهش اولدقلرندن ناپلیون دخی اوائل ذی الحجه ده عسکرینی اعاده ایله ینه مشتایه چکمش و فرانسزلرک کلی تلفاتی اولدقدن بشقه ایام حربک بوقدر امتداد ایله پوناپارته نیک لهستانده خیلی مدت مکث واقاقتی برطاقم اراجیفک تکوننه باعث اوله رق اعداسنک امیدلری قوت بولمغه باشلامشدر و ناپلیون لهستانه عزیمتده له دواتک احیاسنی تصمیم ایتمشیکن ارتق بوافکاردن وضع کچمشدر .

و بواسطه پروسیا قرالی عقد مصالحه ضمننده ناپلیون ایله مخبریه کیریشوب اودخی دوچار اولدیغی زحمتلردن متأثر بولندیغندن اهون شرائط ایله مصالحیه اظهار موافقت ایتمشیکن حرب طرفدارانی اولان عظمای پروسیا که قرالیچه دخی اندرله برابر ایدی روسیه نك قوت و معاونته کووه نهرک قرال طرفندن اول شرائطك قبول اولمسنه مانع اولشاردر .

ناپلیون ایسه اوتهدنبرو دول معظمه اوروپادن بریله ربط پیوند اتفاق ایتک املنده اولدیغندن بو حالانک اوزرینه روسیه دولتیله عقد اتفاقی تصور ایدیوردی .

آوستریا دولتی دخی بو اوانده تدارکات حربیه به دوام ایتمکده اولوب اگر چه کندوسنک بیطرفلغنی و حرب به مداخله ایتک ایتمیدیکی و ایستسه بیله ضعیفی مانع اولدیغنی بیان ایلمکده ایسه ده ناپلیون بوسوزلره الدانیموب آوستریالویه فرصت الویردیکی کبی کندوسنک ارقه سنی کسمکه مسارعت ایده جکتی رعنا بیلیوردی و پروسیانک سلنیزیا ایالتی آوستریا به ترک اولنق اوزره براتفاق عهد نامه سی امضاسنی آوستریا دولته تکلیف ایتدکده بو یولده برعهد نامه امضالمق حرب به داخل اولق دیمک اولوب بو اوانده ایسه آوستریانک محاربه به مجالی اولدیغنی و فقط قبول اولنور ایسه دول متحاربه بیننده اجرای توسط ایده جکی جوابی ویرمشیدی بویله برتوسطی قبول ایتماک آوستریانک دول منفقه ایله برلشمسنه وسیله اوله بیله جکندن ناپلیون دخی بوکاروی رضا کوسترمسیله برابر آوستریا طرفندن تمامیه امین اوله مدیغنی جهتله یکیدن فرانسه ده و کندو متفقارینک ممالکنده عسکر تحریر و ترتیبی ایچون امر ویرمش و آوستریا دولتی طرفندن جزئی خصومت اثری کورلدیکی کبی بویکی اردولرک سریعاً ایلرویه یورویه جکلرینی آوستریالویه بیلیدیرمش ایدی . کله لم بواسطه ظهوره کلان وقایع دولت علیه به .

### \* وقایع دولت علیه \*

بالاده بیان اولندیغنی اوزره افلاق و بغداد بکلرینک بعد العزل ابقالیله روسیه لو ارضا و تلطیف ایدلمش اولدیغنه نظراً دولت علیه ایش بتدی ظننده بولنوب بنساءً علیه حدود اوزرنده کی قلعه لره ذخیره بیله جلب و ادخار ایتامشیدی . بواسطه ایسه روسیه ایله فرانسه دولتری بیننده محاربه مقرر اولدیغنه مبنی فرانسه نك دامالچاده کی اردوسی ممالک محروسه دن مرور ایدرک عسا کر عثمانیه ایله برلکده لهستانه طوغری حرکت ایلماک احتمالی ایله روسیه لو دلفکار اولدقدن بشقه اوروپانک بویله برقاریشق وقتنده شرقده قایدیغنی کار صایوب بناء علیه هم افلاق و بغداد ایالتلرینی الده ایتک و همده طورله و طونه نهرلری بوینده کی قلاع

و بقاع مهمه بی ضبط ایله دولت علیه بی تضییق و فرانسه لودن تفریق ایدرک استدیکی بولده حرکت ایتدیرمک اوزره التمش بیگ نفر دن مرکب براردو ایله مارشال میکلسونی مأمور ایتمشیدی .

ناپلیون بوندن خسرمدار اولدوقده پک زیاده ممنون اولمشیدی زیرا انک باشلوجه بر مقصدی دولت علیه ایله روسیه لوبیننده بر محاربه احدائی ایدی بوندن غرضی دخی اولار روسیه لویی بوجهتله اشغال ایتمک و ثانیاً آوستریا لویی تالاشه دوشورمک ایدی زیرا آوستریا لوی هر تقدیر فرانسه لویه ضد ایسه ده قره دکز سواحلنک روسیه انه کچمسنه ده راضی اوله مازدی .

مارشال میکلسون اردوسنی ایکی قول ایدرک برینی بندر و دیگرینی خوتین اوزرینه سوق ایتکله اواسط رمضانه روسیه عسکرینک بر فرقه سی بندره سکز ساعت مسافه اولان طومبصار نام محلدن طورله نهرینی عبور ایلدیکی لدی الاستخبار بندر محافظی وزیر حسن پاشاقاضی و مفتی و وجوه بلده بی احضار ایله بوبلای نا کهظهوره دائر رأی و مطالعه لرینی استفسار ایتدکده بوکا دائر کچمسنه ده برکونه معلومات اولیه اولمدیغندن هر کس متحیر قالب نهایت روسیه قوماندانندن سبب ورودی سؤال اولتوق اوزره قرار ویرلدیکی اوانده روسیه عساکری کورینوب و متعاقباً کلوب اردولرینی بندره قریب محله قوردقدن صکره جنرال طرفندن بر مأمور کلوب ناپولی طرفه کیتمک اوزره طرف دولت علیه دن مأذوناً روسیه اردوسی بوحوالیدن مرور ایده چکی جهتله عسکر خارج شهرده اقامت ویا لکز جنرال درون قلعه ده اوچ کون آرام و استراحت ایده چک دیو محافظ پاشایی اغفال ایتمک ایستدی ایسه ده دولتجه بویله برشی اولسه باب عالیدن برکونه اشعار و قوعوبولما مق احتمالی اولمدیغندن مجرد روسیه لونک برنوع دک و دسیسه سی اولدینی معلوم اولغله محافظ پاشا و سائر مأمورین و وجوه بلده دوچار کدر و اندیشه اوله رق کلان مأموره ترفیقاً محافظ پاشا طرفندن جنرال بر آدم ارسال ایله استکنانه حال اولندوقده جنرال کیدن آد مه کویا روسیه لولرک بندر و خوتین حوالیسندن فرانسه طرفه کچمک اوزره طرف دولت علیه دن ماذون اولدق لرینی متضمن بر مضع امر عالی ابراز ایله بز پادشاه اسلامک امر ایله کلوب کچه جکر بیهوده و سوسه ایتسونلر دیو امنیت ویرمشیدی حالبوکه عسکرینی لازم کلان محله ره تعیبه ایتدکدن صکره تکرار بر مأمور ایله بر قطعه مکتوب کوندر و بقلعه بلامدافعه تسلیم اولندیغنی حالده بندر اهالیسنک برخلالنه طوقونله قسزین استدکاری محله سالملاً ایصال اولنه جقلری واکر قلعه دن بر طوب آتیلور ایسه اوتنه نبرو مرعی الاجرا اولان ویره قاعده سنه رعایت ایدلیه رک صغیر و کیر جمله سنک اعدام

قلنه جقلری بیانیه تهدید ایدرک قلعه‌نک همان تسایمنی صورت قطعیه ده تکلیف ایتمکه محافظ پاشا کیفیتی جمعیت حضاره بیان ایتدکده چونکه و قیله تدارک کورلمدیکی جهتله قاعده اسباب مقاومت پک ناقص اولدیغندن بندرلور سلامت جان و مال سوزنی ایشدکاری کبی همان بالافتاق قلعه‌نک تسایمنه قرار ویرملریله شهر رمضانک یکرمی یدنجی کونی بندر قلعه‌سی روسیه لوره تسلیم اولدی و کویا ایام شستا اولمق حسیبیه نسوان و صبیانه مرحمه روسیه جنرالی طرفندن اهالی به طقسان کون مهمل ویریلوب برقوماندانک سوزی ایسه عهد حکمنده اولدیغندن بیچاره اهالی دخی الدانهرق همان شدت شتا مرورنده طونه سواحلنه ایتمک اوزره زوائد اموال و اشیارینک فروختیله تخفیف احوال و اطفال خصوصنه اشتغال ایلدیلر روسیه لونک مرامی ایسه بشقه ایدی . شویله که : بندرک استیلا سندنسکره عسکرینی طونه سواحلنه سوق ایله بعض قلاعتک اوزرینه هجوم ایتمک داعیه سنده اولوب سرحد اهالیسی دخی جنسکاور برحاق اولدیغندن طونه سواحلنده کی قلعه لر اهالیسیله برلشهرک قوت بولوبده بدافعه و مقاومت ایتملری ایچون بندر اهالیسی بو وسیله ایله برمدت توقیف ایلمک استردی .

روسیه اردوسنک دیگر بر قولی دخی شهر رمضانک یکرمی اوچنجی کونی سرحد روسیه اولان ایزوانجه نام محله تجمه و ایکی کون صکره طورله نهرینک اوتنه یقه سنده واقع اورقوب قریه سیله قارشوسنده کی اغا کویی نام قریه اره سنده کوپری انشاسنه باشلادینی خبرلری بربرینی تعقیب ایدرک خوتین محافظی وزیر قره محمد پاشانک مسموعی اولدقده خوتینده بولان روسیه ترجمانندن لدی السؤال اودخی اندیشه ایده جک شی یوقدر واقعا افلاق و بغداد و یوده لرینک تبدیللرندن طولایی دولتین میانه سنه برودت کیرمشیدی لیکن و یوده لرک ابقاسی اوزرینه برطرف اولدی و عسکرک بورالجه ایشی قالمدی فقط بوحوالیدن کچوبده فرانسرلر اوزرینه کیتمک احتماللری واردر یوللوسوزلر سویلوب بو ائناده ایسه فرانسرلر لهستانک طرف شمالیسنه حرکت ایلمش اولدقلری ایشیدلمش اولدیغندن روسیه عساکری فرانسرلر اوزرینه کیده جک اولسه (مصراع) بین تفاوت راه ازجکاست تا بکیجا \* مصداقجه بر و طرفه حرکتلرنده بر معنی اولیه جغندن بر نوع اغفال اولدیغی اکلشلمش وهنوز افلاقده بولان اسکرلت بک قریب العهدده در سعادتدن چیقمش اولدیغی جهتله دولتک نیاتنه معلوماتی اولمق لازم کله جککه مبنی سر یعاً اکاتحیرات ارسال ایله استکنانه حال اولدقده اسکرلت بک طرفندن دخی بو یولده برکونه معلوماتی اولدیغی بیانیه برابر قاعده احتیاطیه به رعایت اولنمسی توصیه ایدلمش ایسه ده اوچ بیک راده لرنده بولان خوتین اهالیسی روسیه نیک قوتنه تاب آور مقاومت اوله میه جغندن بشقه بندرکی خوتین قلعه سی دخی ذخیره



و مهماتدن خالی بولمغله محافظ پاشا و سائر مأمورین و وجوه بلده پریشان خاطر و کمال خوف و تلاش ایله انجامکاره منتظر اولدقلری حالده روسیه اردوسی طورله اوزرینه انشا ایلدکاری کوپریدن عبور ایله خوتین پیشکاهنه کلدکده اهالی مسلوب الشعور اولوب محافظ پاشا دخی وجوه بلده بی دعوت ایله قبولری قیامتق و برجلره طوب چیقارتمق کبی حرکت مذبحانه به مبادرت ایلدیکی ائنده روسیه قوماندانی طرفدن بر مأمور کلوب (بوکون قلعه بی تسلیم ایدرسه کز مال و جان کزله سلامت بولورسکز و الاجله کز پایمال خسار اولورسکز و برکوندن زیاده امهال تمتع الاحتمالدر) دیو تهدید ایله قلعه نك تسلیمنی تکلیف ایتسی اوزرینه محافظ پاشا جلادت و متانت کوستره رك امر محافظه ده ثبات ایتک یولنده آرای حضاره مراجعت ایلمش ایسه ده جمله سی اسباب مدافعه نك نقصانندن بختله تسلیم قلعه دن غیر ی چاره اولدیغنی بیان ایتلریله چاره سز خوتین قلعه سی دخی اوائل شوالده روسیه لویه تسلیم اولمشدر . روسیه قوماندانی خوتین اهالیسنه دخی کویا مرحمة طقسان کون مهل و یرمش ایسه ده من بعد برکونه آرام ایتماک اوزره قرار و یرره ک همان اسباب نقلیه لرینک احضاری ایچون جنرال خبر کوندرملکله اگرچه عربیه ولوازم سائره لرینی تدارک ایله قلاصه ایصال اولملری ایچون بر مقدار قزاق عسکر یله بر ضابط دخی تعیین ایدلمش و قره محمد پاشا دخی برلکده اولدیغنی حالده کافه اهالی ایام زمهر برده یوله چیقارلمش ایسه ده روسیه لولرک غرضی بوناری طونه قلاعی یماقلریله برلشدر مامک اوزره بر مدت او طر فلرده توقیفدن عبارت اولدیغنه مبنی صابه و طولاشق بولاردن کوتور یلرک و ائنا ی راهده تسویف و تعویق ایدیلرک خوتینه اون سکز مرحله مسافه سی اولان قلاصه کوچ حال ایله قرق بش کونده وصول ایله طونه نك برو طرفنه عبور ایله بیلمشدر .

بالاده بیان اولندیغنی اوزره افلاق و بغداد و یوه ده سی نصب اولتان علقو و اسکرلت بکلر هنوز مقر مأموریتلرینه وارمش ایکن انفصالی ری ظهور ایله عودته مأمور اولمشر ایدی . تکرار نصب و ابقا ایله بغدانه کوندریلان عسکسندر موزورزبک دخی قوقشاق قصبه سنه ورودنده روسیه لولرک طورله نهرینی عبور ایتدکاری خبرینی آغله اوراده توقف ایدوب بعده روسیه عسکرینک برو طر فلره تخطیسی تحقق ایدیلک همان در سعاده عودت ایلمشدر .

روسجق اعیانی و ترسنگلی اوغلتک جانشینی اولان علمدار . مصطفی اغا خوتین و بندر وقعه لرینی استماع ایلدیکی ائنده اسکرلت بک دخی روسجغه کلوب علمدار ایله کوریشهرک خوتین محافظتک کندوسیه اولان مخبره سنی حکایه ایتمکله علمدار

همان طونه سواحلتك محافظه سی اسبانك استكمالنه مسارعت ایله برابر وقوع حالی در سعادته عرض وانها ایلمش ایدی باب عالیجه کیفیت معلوم اولیجق اسکرلت ایله عاقو بکله ماهیه بشرکیسه معاش تخصیص ایله نتیجه حاله انتظاراً روسجقده توقف ایلملری امر و اشعار بیورلمش و روسیه لونك کایشی خصمانه اولدیغی سرحدلره بیلدیرلمشدر . انجق اولوقته قدر روسیه لولر کلی و آقکرمان قلعه لرینی دخی بویه دسیسه کارلقله استیلا ایدرک اسماعیله طوغری کلک اوزره بولندقلرندن اسماعیل و ابرائیل ویرکوکی قلعه لرنده بروجه آتی حرکات تدافیه یه قیام اولنه بیللمشدر . مارشال میکلسون بروجه مشروح خوتین و بندر قلعه لرینک ضبطندنصره اسماعیل قلعه سنی دخی استیلا ایتمک اوزره یکریمی التی بیک عسکردن مرکب برقول اردو ایله برجنرال کوندروب کندوسی دخی باقی عسکر یله یاش طرفنه کیتمش ایدی . علمدار مصطفی اغا ایسه بروجه بالاخوتین و بندر وقعه لرینی استماع ایله طونه سواحلتك امر محافظه سنه اعتنا ایتدیکی صرهدده کندوسنک اسکی قپو یولداش لرندن میدان بسالتك پهلوانی و عرصه شجاعتك قهرمانی اولوب اول ائنده طونه سواحلتندن قوزغون نام محله مقیم اولان پهلوان ابراهیم اغانی دخی برمقدار عسکرله اسماعیله ارسال ایتمش ایدی .

اسماعیلک استیلاسنه نامزد اولان سالف الذ کر روسیه اردوسی اسماعیله درت ساعت مسافه سی اولان صاحب قریه سی نام قریه جوارینه کلدکده جنرال طرفدن برما مور کلوب خوتین و بندر و تیره سی اوزره اسماعیل اهالیسنی دخی تهدید و اغفال ایله قلعه نك تسلیمنی تکلیف ایتدیکی صرهدده پهلوان اغا برق خاطر کبی یتیشوب قلعه یه دخول ایله کیفیته مطاع اولیجق روسیه مأمورینی طرد ایله امر مدافعه یه مبادرت ایتمک اوزره هرکسه جسارت و یروب اسماعیل محافظی بولنان میرمیران قاسم پاشا دخی بر بیرروشنادیده و کرک باران دیده اولوب پهلوان اغانک تشویقیله جانلانهرق نوجوانانه جنبش ایله استکمال اسباب مدافعه یه سعی و ورزش ایتدیکی ائنده جاسوسلر کلوب روسیه لولرک کثرت اوزره کلکده اولدقلرینی خبر ویرملر یله پهلوان اغا بش التی یوز آتو ایله بنوب کشف ایچون ایلر و یه حرکت ایلدکده روسیه لونك برقاچ بیک نفر دن مرکب بر طلیعه سنه لدی التصادف همان سل سیف ایله اوزر لرینه هجوم و اقتحام و طرفین بر ساعت قدر جنکه دوام ایتدکن صکر روسیه لولر برخیلی حیوانات و اشیا لرین ترک ایله رجعه مجبور اولمشلر ایسه ده عقبنده کیرودن قره بلوت کبی کثرت اوزره روسیه طابورلری کورتمکه باشلا دیغدن پهلوان اغا دخی عود و ققول و آلدیغی اموال غنائمه قلعه یه دخول ایلمشدر .

پهلوان اغانك بو كوچك مظفرتى اسماعيل خلقنه بيوك جسارت و ير مكله كافة سلاحانوب سيل منهمر كبي قلعه دن خروج ايله جنكه حاضر اولديلر روسيه اردوسى دخى موزيقه سنى چالارق و بجر مواج كبي چالقانه رق كلوب محاربه يه باشلاديلر روسيه لولره نسبتله اهل اسلامك قوتى پك آزوناقص ايكن قاسم پاشاييله ضابطانك و على الخصوص پهلوان اغانك غيرت و بسالت فوق العاده لرى آئارى و نصرت و عنایت جناب بارى اوله رق يدى ساعت تمتد اولان بر محاربه خونريزانه نك نتيجه سند فئه اسلاميه مظفر و منصور و رسيه لولر منهزماً رجعته مجبور اولدى هله پهلوان اغانك اول كون ابراز ايلديكى رزم رستمانه و بسالت قهرمانكارانه سى تعريف اولتماز صورتده اوله رق حقتده تحسين فراوان ايله لسان حال زمان ( فلک کر چه شديد صد قهرمان \* نديده ولى چون تويي پهلوان ) بيتنى كويان اولدى اشبو پهلوان اغا مؤخرأ وزير و بابا پاشاديو شهير اولان ذات شجاعت سميردر .

بو مظفريت قاسم پاشا طرفدن در سعادتة عرض و تبشير اولندوقده خوتين و بندر قلعه لرند نطولايي مكدور اولان اهل اسلامه مدار تسليت اولدى و غره ذى القعدة ده مكافاة قاسم پاشايه رتبه وزارت و يرلدى پهلوان اغانك مظهر مكافات اولمى دخى مراد حضرت پادشاهى اولوب انجق كندوسى علمدارك آدم لرندن اولديغى جهته بالذات علمدار اغا و بالواسطه پهلوان اغا عطا ياي جزيله و مواعيد جميله ايله تالطيف بيورلدى . خوتين اهاليلى بروجه بالا خوتيندن چيقوب هزاركد و مشقت چكرك قلاص قصبه سنه و صول ايله خلاص يقه سنه چيقديلر اما بندر لور روسيه جنرالنك سوزينه الدانه رق طقسان بر كون مهل ايله بندر واروشنده اقامت اوزره ايكن اشبو اسمعيل وقعه سند نطولايي روسيه مارشالى منفعل اولماغه اخذ نار يولنده و حقوق ملل وقاعده دول خارجنده اوله رق محافظ حسن پاشاي و دائره سى خلقنى و بندرك بالجمله رجال و نسوان و صيباتى بو ائانده استيلا ايلديكلى آفكرمان سكانيله برابر تحت اسارته الوب روسيه ديارينه تسيار ايلمش اولديغى خبرى و كلاى دولتى دلفكار ايلدى .

روسيه عساكرينك منوال مشروح اوزره ممالك دولتعليه يه تجاوز و تخطيلرى اخبارى پيدرپى توارد اينديكجه در سعادتده مقيم روسيه ايلچيسندن مكرراً استيضاح ماده اولندوقده ويوده لرك ابقا اولندوقلرني دولتى طرفنه بيلدير مش ايدوكى و مأموريتنجه ميانده بشقه سبب منازعه اولمديغى و بو حادثه لره دائر دولتى طرفندن كندوسنه برشى يازلاماش اولديغى جوابلريله متجاهلان امرار وقت ايدر . حالبوكه مارشال ميكسون طرفندن روم ايلي قضا لرينك قضا ت و ضابطاننه كوندريلان بياننامه ده بعض خصوصاتدن شكاي ت ايله برا دولت عليه نك مرامى ممالك اسلاميه يه فرانسه عسكرى

ادخال ایدوبده نظام جدیدی اجرا ایتدیرمکدر وادیسنده موجب فتنه وفساد اوله جق سوزلر مندرج اولدینی پیدرپی مصطفی بیراقدار طرفندن عرض وانها اولتمقده اولمسيله شوالک اونجی جمعه ایرتسی کونی باب فتوی پناهیده عقد اولنان انجمن مشورتده خوتین اهلینک بویله ایام شتاده یولاره دوشوب درلو زحمت وسفالت چکمکده اولدقلری اخبار مکدره سی هر کسک جکرکاهنه تأثیر ایتدیکندن وروسیه لو بغته حدودی تجاوز ایتمسيله نقض عهد ایلمش دیمک اولدیغندن هان طرف دولت علیه دن دخی اعلان حرب اولنسنه قرار ویرلدی .

انکلتره لونک ممالک عثمانیه ده زیاده تمتع تجارتی اولدیغندن اوتهدنبرو دولت علیه نک تمامیت ملکنی التزام ایدرک دولت علیه علیه نده حرکت ایتک استمز ایسه ده بالاده اشعار اولدینی اوزره پوناپارته هر طرفدن انکلیرلرک ابواب تجارتی سد و بند ایتمکده اولوب انکلیرلرایسه تجارت سایه سنده یشار بر ملت اولدقلرندن پوناپارته نک کسر نفوذ وشوکتی انلرجه هرشیدن مقدم ومهم بر مسئله ایدی بووانده ایسه میدانده پوناپارته یه اولدقجه مقاومت ایده جک یالکز برروسیه دولتی اولدیغندن انکلتره دولتی روسیه لو ایله اتفاقه مجبور اولدینی حالده ممالک عثمانیه تجارتدن محرومیت دخی کندوسنجه مشکل بر کیفیت ایدوکندن هر نصل اولورایسه اولسون دولت علیه یی فرانسه یه تمایلدن وازچکورمک کندوسنجه لابد اولدیغنه منی استانبولده کی انکلیر ایلچیسى دولت علیه یی روسیه لویه اعلان حربدن منع ایچون پک چوق اصرار وفرانسه لو ممالک عثمانیه یه هجوم ایده جک اولور ایسه بحرآ انکلتره لو محافظه یه متعهد وضامن اولدینی کبی برآ دخی یوزیبکک برروسیه اردوسیه امداد اولنه جغنی تعهد ایله برابر بر طرفدن دخی تهدید و اخافه یه ابتدار ایتدکجه جانب باب عالی دن مادامکه روسیه لولرک سرحدات خاقانیه یه تخطیری اخباری پیدرپی توارد ایتمکده در ارتق تحمل ومدارا کسنه نک لندن کز دیو دوستانه اعتذار ایله سفیر مشارالیه ک رفع خشونتته سی بی شمار اولندیسه ده مفید اولیوب دولت علیه نک فرانسه لویه میل والتفات ایلدیکنی وروسیه سفینه لرینک مرورینی منع ایتک وویوده لرک ابقاسنده ایکی اوچ هفته قدر تردد کوسترمک مثللو تبدیل اصولی ایما ایدر اطواری تجویز ایله متفقلرندن روگردان اولدیغنی صورت شکایتده انها ودر علیه دن سبستیاینک طردینی وانکلتره وروسیه اتفاقلرینک تجدید وانفازینی ادعا وبونلره مساعدده اولندینی تقدیرده روسیه عساکری برآ ممالک محروسه یه هجوم وصولت وانکلتره دونخامی دخی استانبوله کلوب اجرای خصومت ایتک اوزره بینلرنده عهد وپیمان ایلدکرینی بیان وانبا ایلمش ایسه ده اول اننده پوناپارته نک

پروسیا استیلاسی ایشی تکمیل ایله لهستانه طوغری حرکت ایلدیکی حوادثی آلدیغندن انکلیز ایلچیسینک تکالیفنه مساعدده اولنمیوب اعذار مرقومه نك تکرار ایله جواب رد ویرلمشیدی نهایت سفیر مشارالیه (اعلان حرب خصوصنده اون بش کون ونهایت اون یدی کون قدر صبر وتائی ایدیکز روسیه نك بو حرکتی واقعا نك فاشیدر لکن جزاله یازدم مؤثر اوله جغنی مأمول ایدرم عکسی جواب ظهور ایدر ایسه نه ایسترسه کز یاییکز اولوقت انکلتره دولتی سزه اعانه ایدر والاعتجیل ایدوبده شمیدین روسیه ایلچیسینی دفع ایدرسه کز حقلو حقسز بن دخی روسیه ایلچیسینه موافقته مأمور اولدیغمدن قالقوب کیدرم صکره انکلتره دولتی سزه خصومت واوزریکزه سفر ایدر چوق کچمز استانبوله قحط وپریرز اوتوز کونه دك مصری دخی کیتمش بیله سز) دیمکله اعلان حربك براز تأخیری طرفه ذهنلر میل ایتمش ایکن سبستیانی (انکلتره دولتی روسیه لونك خاطری ایچون ممالک عثمانیه ده اولان تجارتنی فدا ایده مز انکلیز ایلچیسینی کندولکنندن کیدرسه وارسون کیتسون فقط سز قوموش اولمیکز) دهرک روسیه لویه هان اعلان حرب اولنسی امرنده اصرار و دولت علیه یه فرانسه اتفاقدن حاصل اوله جق فوآدی تعداد و تکرار ایتمکده اولدیغنه منبی شوالک اون ایکنجی کونی حضور آصفیده تکرار مشورت عامه منعقد اولدقده قرار سابق وجهله اعلان حرب اولنسی و صدر اعظمک لوای شریف ایله روم ایلی جانبنه چیقمسینی قرار کیر اولدیغندن هان اعلان حرب اولنهرق روسیه لونك بغیر حق نقض عهد ایله بغته ممالک دولت علیه یه هجوم ایلمش اولدیغنی مین و بوبابده روسیه لونك حقسز لغنی اثبات ایده جک ادله بی متضمن برقطعه بیاننامه قلمه آلتوب برر نسخه می سفارتلره ویرلدی صورتی زیرده (۴) رقیله ایراد اولنور .

نابلیونک پروسیالویه غلبه سندن صکره روسیه اوزرینه حرکتی تحقق ایتدیکی هنکامده سبستیانی دولتی طرفدن مأموراً اتفاقه طالب اولغله درسعادتده مذاکره شروط اولتق صورتی کندوسنه تکلیف اولنمش ایسه ده وقت تنکدر ایمپراطوریمز نزدینه برمرخص ارسال اولنمایدر تا که هم اتفاقنامه بی بر ساعت اقدم امضایسون و همده دول سائر ایله عقد اولنهرجق معاهداتده متفق عنوانیه برلکده بولسون دیو مغالطیه ابتدار ایتدیکنه منبی تیزالدن نابلیونه برقطعه نامه هایون تخریر و دروننده فیما بعد متفقمر تعیری درج و تسطیر ایله تعیین مرخص خصوصی تأخیر اولنمشیدی پوناپارته نك ایسه دولت علیه کبی ایرانلوی دخی دائرة اتفاقنه آلمق املنده اولدیغندن مقدمار و بر نام ترجمانی نامه مخصوص ایله ایرانه ارسال ایتمش ایران دولتی دخی

روسیه لودن یدیکی زخم اوزرینه فرانسه لو طرفندن امیده دوشه رك میرزارضا نام ذاتی  
مرخص تعیین وارسال ایدوب انجق بو اوآنده پوناپارته برلینده بولمغله میرزارضا  
بوکره درسعدت طریقله برلینه کیتمش ایدی سبستیانی بونی وسیله اتخاذا ایدرك  
( ایشته عجم شاهی طرفندن عقد اتفاق ایچون سفیر مخصوص کوندرلدی طرف  
دولت علیه دن دخی برمرخص تعیین اولنمایدن ایمراطور یمز پروسایه غلبه ایتدی  
بوندن صکره عقد اولنه جق مصالحه یه دولت علیه یی ادخال ایله امنیتی خصوصی  
استحصال ایده جکدر هله افلاق و بغدادنك حدود قدیمه و امنیت کامله ایله دولت علیه  
حکمنه کیرمدکجه روسیه لو ایله عقد مصالحه ایتیمه جکنه سند و برهیلورم هان تعیین  
اولنه جق مرخص طوغری برلینه کیدرك ایران ایلیچسیله برلکده اتفاق ماده سنه  
رابطه ویرمک لازمدر ) دیو تشویق ایدوب بوآئاده بروجه مشروح روسیه لو دخی  
حدود دولت علیه یه تجاوز ایلمش اولدیغندن روسیه لویه اعلان حرب اولدیغنی  
کون دفتر امینی سید محمد امین و حید افندی بارخصتنامه ناپلیون نزدینه کیتمک  
اوزره مأمور بیورلدی و وحید افندی سریعاً درسعدتدن حرکت ایله برلینه عزیمت  
ایدوب انجق انشای راهده ناپلیونك لهستانه کیتدیکنی خبر آلمغله از قدیم له دولتتک  
دارالاماره سی اولان وارشاو شهرینه واروب عقد معاهده اتفاق ایچون تشمیرساق  
ایلمش ایسه ده بو اوآنده ناپلیون روسیه دولتیله عقد اتفاقی تصمیم ایلمش اولدیغندن  
طرف دولت علیه دن نزدینه مرخص جلمندن غرضی مجرد بووجهله برکوسترش  
ایدوبده او یوزدن دخی روسیه لویی اخافه ایدرك انکلتره لودن تفریق ایله  
مراومه موافق صورته مصالحه و اتقاقه مجبور ایلمکدن عبارت ایدوکی صکره دن  
ثابت اولمشدر .

اوتهدنبرو طرف دولت علیه دن قفنی دولته اعلان حرب اولنور ایسه ایلیچسی یدی  
قله ده توقیف اولنه کلورکن سفرانك و علی الخصوص سبستیانیك اخطاری اوزرینه  
بوکره اول عادت ترك اولنوب هان روسیه ایلیچسی دیتانینسکی باب عالی یه جلب  
اولنهرق طرز لین اوزره دولت علیه نك استیلا اولنن مالکی تخلیه اولنور ایسه ینه  
استانبوله کله بیلورسکز دیو کندوسی ایچون و روسیه تجاری ایچون اون کون مهات  
اعطاسیه مملکتلری جانبه کیتملری تنیبه ایله اکتفا ایدلدی و سلطان سلیمک  
اوروپا مدنیتته مائل اولدیغنه بر دلیل کوسترلدی .

اول ائاده بوزجه آطه یه اوچ قطعه روسیه قالیونی گمش اولدیغندن روسیه ایلیچسی  
هان برانکلینز کمیسنه راکبا اورایه روان اولدی .

دوات علیه دخی هان یکچیری و سائر او جاقدر عسکر ینک ترتیبه مسارعت ایدرك

اول بول تصحيح بدرگاه قلنان اون اورطه يکچرى طونه ياليسنه کوندرلدى  
 ومصطفى بيراقدارک معيته کلى عسکر ترتيب اولنهرق روسيه لولره قارشو چيقمسى  
 امر و اشعار ايدلدى و على جناح الاستعجال کرک اسماعيل محافظه سنه و کرک مصطفى  
 بيراقدار معيته خيلجه عسکر يتشديرلدى و ممالک محروسه نك هر طرفدن کلى  
 عسکر تحريرى امر و فرمان بيورلدى .

و بيوکدرهيه مقدار کافى سفن حربيه ارسال و قره دکر بوغازى قلعه لر ينک عسا کر  
 و مهماتى اکمال اولندقدن بشقه بوغازک خارجنده بجرأ عسکر دوکيله بيله جک محلا ره  
 طابيه لر انشاسنه شروع ايله قره غول بکلمک اوزره بر مقدار عسا کر معلمه دخى  
 کوندرلدى و درگاه على قوجى باشيلرندن اينجه محمد بکه ساستره منصبى و روم ايل  
 بکار بکلىکى پايه سيله رتبۀ ميرميرانى بالتوجه و ارنيه قدر سواحلك محافظه سى شرطيه  
 قره دکر بوغازى محافظى نصب و تعيين بيوريلوب مديه و انيه آطه کي مواقع  
 مهمه نك محافظه سى ايچون دخى روم ايلينک اول جهتنده مقدار کافى يکچرى نفراتى  
 ترتيب ايدلدى . آق دکر بوغازينک محافظه سنه دخى خادم اوغلى عثمان بک و معارض  
 کورفرينک محافظه سنه معلقره اعياى احمد اغا تعيين و اناطولى واليسى ابوبکر پاشا  
 سر عسکر لک عنوانيه بولايده قامت ايله هر طرفه نظارت ايتک اوزره مأمور اوله رق  
 معيته قيرجه لوردن دخى بر مقدار سکران تحرير ايله امر محافظه يه اعتنا اولندقدن  
 بشقه سابقا ايراد جديد دفتردارى فيض الله افندى دخى مأموريت مخصوصه ايله  
 و معيته مهندس ترفيقيله قلعه سلطانيه جانبه ارسال بيورلدى .

و صدراعظم حلمى پاشانک سردارا کرملکنه دائر برقطعه خط هايون صادر اولدى که  
 صورتى ذيل کتابده (۵) رقميله ايراد اولنور .

صدراعظمک اردوى هايون ايله عزيمتنده استانبولده قائم مقام قلعه حامل امانت کبرى  
 اوله جق ذاتک قابليت ذاتيه و حيثيت زمانيه اسخابندن و طور و مشوارى مجرب  
 و زرانک متحيزان صداقت نصابندن بولنسى لازمه حال و مصالحتدن ايکن قائم مقامغه  
 کوسه و قصير القامه برقتۀ منحوسه اولان سالانيک متصرفى موسى پاشا اتخاب ايله  
 در سعادتۀ دعوت اولندى موسى پاشا ايسه شمدى يه قدر جزاى عملى اوله رق  
 چکديکي چله لرى هپ اتابکان سلطنتک سله لرى بيلوب اخذ نار ايچون انلره ديش  
 بيلار و فرصت کوزه دير ايکن اول بي بختلر انک ملايم سوزلرينه و منافقانه مداهنه  
 و تبصبلرينه الدانوب سوق قضا و قدرله قائم مقامغه اتى مناسب بولديلر و (اذا جاء  
 القضاء عمى البصر) سرينه مظهر اولديلر .

و صدر اعظم بولنان ذاتک سردار اکرملک ايله عزيمتنده مناصب ديوانيه رجالى

دخی برابر کیتمک و در سعادتده بر رو کیلمری قلوبده رکاب هایونده ایفای مأموریت  
ایتمک دأب دیرین و آیین بهین دولت علیه اولوب انجق اتابکان سلطنت اولان اعظم  
رجال دولت ذاتاً در سعادتده اقامتله استراحتی زحمت سفره ترجیح ایدر اولدقلری  
خالده ادرنه وقعه سندنبرو روم ایلی اعیانلرینه و علی العموم یکچیری کروهنه  
امیتلری اولدیغندن در سعادتده قالملی مقرر اولدیغنه مبنی اردوی هایون ایله  
کیتمک اوزره کتخدای صدر عالی مصطفی رفیق افندی و رئیس الکتاب غالب  
افندی و مکتوبی صدر عالی محمد تحسین افندی ایله دیگر بعض مأمورین ابقا  
ویکیچیری کاتبی بولنان محمد عارف افندی به اصالة چاوش باشلیق و کچوک تذکره جی  
حمید افندی به سواری مقابله جیلکنه الحاقاً بیوک تذکره جیلک و داماد صدر عالی  
حمیدک افندی به سواری کتابی الحاقیه تذکره سانی و آمدی دیوان هایون عزت بک افندی به  
اصالة بکلکجیلک و بوزاوقلی مصطفی مظهر افندی به آمدجیلک توجیه اولدیغنی کبی  
رکاب هایون خدمتیه در سعادتده قاله جق بار و تخانه ناظری راغب افندی به کتخدای  
صدر عالی و کالتی و بکلکجی بولنان احمد صفی افندی به ریاست و کالتی و اصالة چاوش  
باشی بولنان سعیدالله افندی به چاوش باشی و کالتی و نوری بک زاده عبدی بکه  
مکتوبی صدر عالی و کالتی و حالت افندی به بکلکجی و کالتی و خلفان احمد عقیف  
افندی به آمدی و کالتی احواله و مناصب سائره دخی بو وجهه ابقا خود توجیه بیورلدی .  
اسمعیل جنکنده یازارلقی ظاهر اولان بهادر کرای سلطانه دخی بوانساده بو جاق  
قالغایانی پایه سی ویرلدی .

فی الاصل قاضی سکرک اردو قاضیانی دیمک ایکن بروقتنبرو دولت علیه نك مرتب  
او جاقلری چیغرنندن چیغمش اولدیغنی کبی طریق علمیه نك دخی وضع اصلیبی  
تغیر ایدوب قاضی سکرک بر پایه عالی اعتباری اوله رق قاضی سکر افندیلر در سعادتدن  
طشیره چیغه ماز اولدقلری جهته اردوی هایونک خروجنده مراتب علمیه امحبابی  
ایچندن ایشه یازار بری انتخاب ایله اردو قاضیسی نصب اولتمق عادت اولدیغندن بو کره  
دخی اول مأموریت مهمه ایچون برینک انتخابی لازم کلوب انجق شیخ الاسلام افندی نك  
ترجیح ایتدیکی باب عالینک ایشنه کلز و صدر اعظمک استدیکی طریقجه مناسب  
کورلمز اولدیغنه و هر نه که وضع اصلیسندن چیقار ایشه بویه مشکلاتی دعوت ایتمک  
امور طبعیه دن بولدیغنه مبنی بو کره صدر اعظم ایله شیخ الاسلام افندی ییننده برخیلی  
مخابره و مباحثه لر جریانندن صکره نهایت مکه مکره پایه لولرندن دیمتوقه لی سید محمد  
افندی بالانتخاب اردو قاضیسی نصب و تعیین ایدلدی بوضره ده حکیم باشی زاده  
مصطفی مسعود افندی دخی اردوی هایون حکیم باشیسی اولدی .



بالاده اشعار اولدینی اوزره افلاق و یوده لغندن عزنده روسیه دیارینه فرار ایتمش اولان قسطنطینک پدری دخی کندوکبی خونۀ دولندن عد اولندیغنه مبنی شوالک اون التنجی بازار کونی اعدام ایله اموالی مصارف سفریه به مدار اولمق اوزره مصادره قلندی .

فرداسی بازار ایرتسی کونی اردو قاضیسی ورجال دولت و او جاقدر اغالری و مشایخ جوامع سلاطین ایله تکایا و زوایا مشایخک بعضیلری باب عالی به احضار ایله منجم باشی طرفدن تعیین اولنان وقت مختارده سورۀ فتح تلاوت اولدقدن صکره مشایخ دعا ایدوب حضار دخی صوت بلند ایله آمین دهرک و قربانلر کسپله رک توغ آصفی محل معینه رکز اولنوب اسمعیل جنکنده روسیه دن آغمش اولان اسپرلرک درسقاده و رودی اول کونه تصادف ایدرک باب عالی به کتوریلوب حضاره تماشا ایتدیرلمکله فال خیر اتخاذا قلندی .

بو ائشاده صرستان اوزرینه مأمور اولان پاسبان زاده عثمان پاشانک بعض مرتبه یارارانی کورلمکده ایکن او اصر ذی القعدة ده حلول اجل موعودیه و فات ایلدیکی خبری وارد اولیجق و دین محافظه سی نیکبولی سنجاغنه الحاقاً اقدجه نیش محافظه سی شرطیه موره والیسی نصب اولنان خورشید احمد پاشایه توجیه اولنمش ایکن مؤخرأ خورشید پاشا عهده سنه صوفیه جانی سرعسکر لکیله روم ایلی ایالتی توجیه بیورلمغین و دین و نیکبولی دخی متوفای مشارالیهک خزینه داری اولان میر میراندن ادریس پاشایه احاله بیورلمشدر .

متوفای مشارالیه پاسبان زاده عثمان پاشانک پدری و دین یماقلرندن بازوند دیومعروف اولان برشخصدرکه فی الاصل اشاردن اولوب آره صره و دینده فتنه ایقاعنه اجتسار ایدر اولدیغندن سردار اکریم قوجه یوسف پاشا آنی اعدام ایتدکده اوغلی عثمان قاچوب و برمدت اختفا ایتدکدن صکره میدانه چیقوب و یماقان کر و هنه التحاق ایدوب ذاتاً درایت اصحابندن اولمسپله آز وقت ظرفنده یماقلر آره سنده شهرت بولمشیدی . اول ائشاده بلغراد قلعه سندن یماقلر طرد و ایالتلو عسکری اقامه ایله نظام جدید مرتبتاندن اولمق اوزره اول طرفده بعض واردات تأسیس اولنوب عثمان اغابونی بهانه ایدرک یماقان ایله ایالتلو بیننه القای شقاق ایدوب و کندوسنی اول حوالیده کی یماقانک رئیس و پیشواسی مقامنده کوستروب خیلی عربده لره سبب اولمشیدی . بو اطوار باغیانه سی باب عالینک نظر دقتی جلب ایتمکله رفع و ازاله سی تصور اولنمشیکن ایجاب وقت و حالدن اوله رق کندوسنه برمدت نوازشکارانه معامله اولمق لازم کلوب عثمان اغا ایسه کیتدکجه و دینده یرلشوب کواکشمکده اولدیغندن و نظام جدید مخالف رأیده

بولانلر دخی او مقوله لری استصحاب ایده کلدیکندن اطوار سرکشانه سی صد چندان  
 زیاده اولمسیله نهایت اوزرینه قبودان دریا کچوک حسین پاشا مأمور ایدلمشیدی . حسین  
 پاشا ایسه معیتده کی دره بکلرینی اسلوب حکیمانه ایله استفاده موفوق اوله میوب  
 اردوسی پریشانلغه دوچار اولمغه تلافی مافات قیدنده ایکن مصر سفری ظهور ایتمکه  
 بالاده تفصیل و ایضاح اولدیی اوزره و دین محافظلیغه برابر نیکبولی سنجانی دخی  
 عهده سنه احاله بیورلمشیدی . انجق آنک تحریکله یماقلرک واقع اولان حرکات  
 عصیانلری اوزرینه بلغراد محافظلری خیلی وقت برطاق ارناود سکاانلری استفاده  
 مجبور اولدی و کرک بویماقلرک و کرک صاحب ترجمه نیک مقاتاله نده برچوق آدمیر  
 تلف اوله رق اول حوالیده کی قوه اسلامیه خیلیدن خیلی ضعف کیش اولدییی حالده  
 صنوف متخالفه عسکریه دخی ایجاد مالم یکن قیلندن اوله رق رعایایه بک زیاده ظم و تعدی  
 ایده کلدکلر نده صرب رعایاسی جانلرندن یزار اولدقلری حالده روسیه لو طرفدن  
 تحریک اولغریله صربستانده براختلال عظیم وقوعه کلدی و طاقم طامعسکرلر تعیین ایله  
 بو اختلالک باصدیرلمس نه چالیشدقچه شدت بولدی بونک سبب اصلسی اراشدیریلور  
 ایسه صاحب ترجمه اولدییی درکار اولوب نهایت ازاله سی خصوصه مأمور اوله رق  
 تمام ایضای مأموریت ایده بیله چکی وقتده اجلی کلوب عزم دار جزا ایتدی الحاصل  
 دولته عظیم مضر تلی اولدییی حالده نهایتنده ملته یارایه جق برایشه موفوق اولندن  
 دار عقیابه کیتدی .

مرودیرکه بدایت نشئتده رمال و جفار تعلق جیلرندن بعض جرارلر کندویی جاب  
 ایچون بوتاریخلرده و دینده عثمان اسمنده برصاحب خروج ظهور ایله دولت علیه نیک  
 مجدد و مؤیدی اوله جنی حسب الفن مقرر در و علائم و امارات محرره سی کافه سزک  
 سیما کزده موجود در دیو بیچاره نی اغفال ایدوب اودخی امی و عامی بر آدم اولدیغندن  
 نتیجه سز دعوالره دوشه رک بونجه فناقلره سبب اولمشدر . تجاوزالله عن سیاته .  
 جلد سابعده بیان اولدییی اوزره صرپلور بلغراد دایلیرینک مظالم و تعدیاتندن  
 شکایت ایتمکه بوسنه والیسی اولطرفه حرکت ایدرک بلغرادده کی ارناود  
 سکاانلری سرکرده سی اولان قوشانجه لی خلیل انا معرفتیله دایلیر بلغراددن  
 اخراج و اعدام اولمشلر ایدی بوئانده دخی صرپلور قوشانجه لیدن شکایت ایتلریله  
 بلغراد محافظی سلیمان پاشا بر تقریبه قوشانجه لی نی و رفیقلرینی چام قایقلرینه ارکابا تکه  
 طرفه ارسال ایتدکن صکره رعایانک رؤسا و کتزلرینی و سوز صاحب لری جاب ایله  
 مراملرینی لدی الاستفسار قوشانجه لینک دفعندن بشقه مراملری اولمیوب بونک  
 اوزرینه ارتق عفو و اطلاقلری فرمانک و رودنده جمله سی یرلو یرینه طاغیلوب

اموال میرهنگ توزیع و تأدیة سنه دقت ایده جککری بیان ایتمکدن سلیمان پاشا بو خصوصاری اشبو یکر می برسنه سی ذی القعدة سنک بشی تاریخیله مورخاً برقطعه قائمه سیله برنوع موفقیت اولوق اوزره نیش محافظی اولان خورشید پاشایه تبشیر ایامشدر صر پلورک غرضی ایسه بو درلو دیسیسه لرله هم وقت قرانوق و همده بلغرادده کی قوه اسلامیه نی تقابل ایتمکدن عبارت اوله رق روسیه سفری ظهور ایتمدیکی کبی اولکیدن زیاده عصیان و اختلاله ابتدار ایتمشدر و قوشانجه لی غایت بهادر و نامدار بر سر کرده اولوب انک بلغراددن خروجی صر پلورک برهرتبه دها شمارسنه و امر محافظهنگ دوچار ضعف و قوتور اولسنه سبب اولمشدر .

احوال حاضره اوزرینه مقتدر و زرادن بری طونه سر عسکری عنوانیه سلستره و ایسی نصب اولموق لازم کیش ایسه ده والی مقری روسجق قصبه سی اولوب کیده جک والینک روسجق اعیانی اولان سالف الذکر مصطفی بیراقدار ایله امتزاج ایده بیلمسی امر مشکل و غرب او جاقلری بکیر بکیاکلری اوچر و مناصب سائر برر سنه مدتله توجیه اولنه کدیکنه نظراً برقاعده بیراقدار اغایه سلستره و ایلیکی توجیه اولنسه قبول ایتمی مأمول دکل ایدو کندن تأییداً رتبه وزارتله سلستره ایالتنک عهده سنه توجیهی دولتجه قرار کیر اولوب انجق ذاتاً وزارتتی قبول ایده جکی مشکوک اولدیغندن همشهریلک مناسبتیه کندونی اقاع و ارضا ایتمک اوزره خواجکان دیوان همایوندن محمد امین بهیج افندی مأمور اولوب عهده سنه باش محاسبه پایه سیله طونه یالسی مباحه جیانی احاله بیوریه رق ظاهرده بو مأموریت و سیله سیله سر یعاً روسجقه کوندرلدی اشبو بهیج افندی فی الاصل روسجقلی اولوب در سعادتله کله رک کاغذ اعمالی صنعتی احداث ایتمک اوزره برخیلی اچقه لر صرف ایله برکاغذ باریقه سی پامش ایسه ده ایرادی مصرفه وفا ایدر ایتمز درجه ده اولدیغنی کوروب متفکر و متحیر ایکن حقدده بو مأموریتک ظهورینی غنیمت بیلرک روسجقه واروب وزارتتی قبول ایتمک اوزره علمداری ارضا و کیفیتی بو ائناده در سعادتله انها ایلمش اولدیغندن منوال مشروح اوزره عهده مشار الیه رتبه وزارتله سلستره ایالتی بالتوجیه در حال منشوری اصدار و ارسال اولمغله بیراقدار بشه ایکن علمدار پاشا و بر اعیان ایکن سر عسکر ذیشان اولدی .

روسیه لولرک غرض اصلسی بکر شده تجمع ایدرک اورادن دخی الی بیکلک براردو ایله ایروولیوب و صر پلورله برلشوبده اولطرفدن دولت علیه نی تلاشه دوشورمک صورتی اولدیغندن بو ائناده بکر شه طوغری حرکته باشلا یوب بر فرقه عسکریه سی بکرش جوارینه کیش اولسیله علمدارک عسکریله لدی التقابل عسا کر اسلامیه

غالب و منصور و روسیه لو برخیلی تلفات ویره رك رجعته مجبور اولدینی و روسیه لولره نسبتله عساكر اسلامیه نك تلفاتی قلیل ایدوکی خبر مسرت اثری عیدانخانك برنجی کونی در سعادت و وصول بولدی .

روسیه لوردن آلتان قرق بش اسیر ایه بر قطعه طوپ دخی متعاقباً در سعادت و وصول بولمش و قورت پاشا دامادی ابراهیم پاشا اولونیه طرفده بر قطعه روسیه کیسی حرب و ضرب ایه تسخیر ایدرك التمش نفر اسیر آلدینی خبر مسرت اثری دخی بو ائنده واصل اولمشدر .

وینه بو ائنده درت بیکدن زیاده روسیه عسکری اسماعیله قریب صاحب قریه سی جوارینه کلوب قره غول اولق اوزره ایلرویه بره مقدار سواری سوق ایتمش اولدقاری جواسیس واسطه سیله لدی الاستخبار پهلوان اغا بر مقدار کزیده سواری ایه واروب بر مناسب موقعه در کین اولدینی حالد روسیه لونك اشبوسواری قره غولی پوصی محانه کلد کده پهلوان اغا در حال سل سیف ایه اوزر لرینه هجوم و اقتحام و کیمی اخذ و کیمی اعدام ایدرك اله کچوره بیلدیکی قدر روسیه البسه سنی کندو عسکرینه الباس ایه واروب قریه مر قومه پیشکاهنده روسیه آیلاری طرزنده صف باغلامش و روسیه طابورلری کورندیکی کبی عسکری قریه ایچنه چکمش اولدیغندن روسیه لولر اوزاقدن بونلری کندولرینك سواری قره غولی ظن ایدوب همان قریه کنارینه کلدکاری کبی پریشان اسلوب ایه ایچرویه کیر دکارنده عساكر اسلامیه بردن بره بونلرك اوزرینه هجوم و اقتحام ایه اساحه حاده اعمالنه قیام و چند ساعت تمتد اولان محاربه ده بر چوغنی اعدام ایتدکدن صکره استیمان ایدنلر اخذ و اسیر ایدلمشدر .

بو مثللو اخبار ساره نك تواردی ائنا سنده علمدار پاشا طرفندن ایکی یوز قدر روسیه اسیرلری و روسیه لودن التمش اولان طوپ و جیخانه عربه لری کبی آثار مظفریت دخی ورود ایه موجب مسارنا محدود اوله کیش ایسه ده بو ائنده انکلیز دو نئماسی آقدکز بوغازندن دخول و استانبول پیشکاهنه وصول ایه هر کسه دهشت ویرمش اولدیغندن بو مثللو اخبار و آثار مظفریت ایه ابتهاجه میدان بولنه میوردی .

تفصیلی بودرکه بالاده شرح و ایضاح اولدینی اوزره انکلتره دولتی فرانسه علیه نه روسیه لو ایه متفق اولوب دولت علیه نه دخی کما فی السابق دائره اتفاده طوتمق آرزوسنده ایکن دولت علیه روسیه لویه اعلان حرب ایتمکله دولت علیه نه تهدید ایچون سکز قباتی و بر چوق فرقتین و قوروت و بومبارده لردن مرکب بر بیولك انکلیز دو نئماسی بوزجه آطیه کیشیدی و روسیه ایلیچسی بوجه بالا در سعادتدن چیقوبده بوزجه آطیه کیتدکدن صکره انکلیز ایلیچسی (سیر آربود نوت) معاملات شدیدیه

باشلا یوب سبستیاینک در سعادتن دخی و دولت علیه ایله انکلیز و روسیه دولتری میانه لرنده مقدما منعقد اولان اتقاق معاهده لرینک تجدیدی وانکلیز و روسیه سفائن حربیه سنک بلا مانع بوغازلردن آمد و شد لرینه مساعده اولنمی خصوص لرینی تکلیف و قبول اولمدیقی تقدیرده بوزجه آطیه کیدوب و اوراده کی انکلیز دو نمانسی استصحاب ایله کلوب استانبولی اوره جغنی بیان ایتمکله وکلای دولت علیه تالاشه دوشه رک بوتکالینک قبولنه میل ایتمکری صره ده سبستیانی کرک بالذات و کرک بالواسطه انکلتره لویه بو وجهله سرفرو ایتمک شان و ناموس دولت علیه نکل انکسارینی موجب اولور و بو صورتله مملکتین روسیه لو و مصر انکلتره لو یدینه کچه بیلور پوناپارته ایسه بتون لهستانی ضبط ایتمدی پترسبورغه طوغری کیده جکدر و قریباً فرانسه طرفندن سزه بیوک امداد کله جکدر و دولت علیه نکل اسکی فرو شوکتی تجدید اولنه جقدر زمینلرنده سوزلر و قوتلو وعدلر ایله لازم کلنلری اقتاع و الزام ایدرک انکلتره ایلچیسینک تکالیف مشروحه سنه رد ایله جواب اعطاسنه قرار ویردیرمشیدی . چونکه دولت علیه نکل مراحمی روسیه لو دن اخذ انتقامه منحصر اولوب انکلتره و فرانسه دولترینی اسلوب حکیمانه ایله اداره ایدرک ایکیسینی دخی الدن چیقارماق صورتی ایکن بو کره ایکیسندن برینک ترجیحی لازم کلوب وکلای دولتک برخیلیسی انکلتره لو طرفنه مائل ایسه لرده روسیه لونک ازعاجاتی حددن آشمش و بو کره بغته ممالک محروسه یه تجاوز ایدیجک ملت اسلامیه نکل حوصله صبر و تحملی طولوب طاشمش ایدو کندن سبستیاینک انواع وعد و وعیدلری اوزرینه ذهنلر بالطبع فرانسه طرفنه تمایل ایشیدی . مع مافیه وکلای دولت علیه انکلتره لونک رشته مصالحه یی کسر ایده جکنه پکده اینامیورلردی .

انکلتره لو ایسه دولت علیه یی فرانسه لو دن تفریق ایچون هر درلو اسبابه تشبث ایده بیله جکندن وانکلیز ایلچیسینی غایت حدید المزاج بر آدم اولدیغندن ذی القعدة نکل یکر میسنه مصادف اولان بیک سکز یوزیدی سنه میلادیه سی کانون ثانی افرنجیسینک بکرمی طقوزنجی کیجه سی خفیه بر انکلیز سفینه سنه سوار اوله رق در سعادتن فرار ایلدیکی فرداسی معلوم و روسیه لو ایله برابر انکلیز لرک دخی حربه قیام ایده جکلری مجزوم اولیجق مسئله حربیه بر مرتبه دها کسب اهمیت ایلدی .

ومقدما روسیه و مؤخرأ انکلیز کمیلرینک بوزجه آطیه کلسی و بوغاز قاعه لری انکلیز دو نمانسک مرورینه مانع اوله بیله جک مرتبه مستحکم دکدر اکمال نقصانی لازمدر دیو سبستیانی طرفندن پیدرپی اخطار ایدلمسی حسینیه بالاده بیان اولندیقی اوزره فیضی افندی اشبو آقدکر استحکاماتک اکمال نقصاننه مأمور بیورلمش و بعده قبودان پاشا دخی یاپیلان طایه لری معاینه ایچون اول طرفه کوندرلمش ایدی .

بوغاز قلعه لرینک استحکاماتی مکمل اولسه دشمن دو نتماسی کچمک قابل اوله میه جنفی درکار ایسه ده بو استحکامات اسکی زمان دو نتمارینک منع مروری ایچون یاپلمش شیلر اولسیله اعصار جدیده ده انشا اولنان سفائن حر بیه نیک مرورینه مانع اوله بیلمک ایچون اصول جدیده اوزره استحکام ویرلمک لازم کلوب لکن بوغازدن دشمن دو نتماسی کچدیکنک امثالی اولدیغنه مبنی مرور زمانک ایجاب ایتدیکی تحولاتدن غافل اولان مأمورین دولت اولوقت بو خصوصه چندان اهمیت ویرمیورلردی بناءً علیه جنرال سبستیانی معینتده کی مهندس لری عملیاته نظارت ایتک اوزره بوغازه ارسال و بو باده پک زیاده استعجال ایله دولتک نظر دقت واهمیتی جلبه چالشمقده ایکن استحکام ایشاری سرعت لازمه ایله کورلیوردی و برده انکلیز ایلچیسی بوزجه آطیه وار دقده ممالک محروسه دن چیقماش اولدیغی جهتله مخبره و مکالمه یه دوام ایده جکی بیانیه باب عالی یه تحریرات کوندرمش اولدیغندن قپودان ایله فیضی افندی آنکله مخبره و مکالمه یه مرخص اولوب او دخی ترجمانی پیرانی چناق قلعه سنه کوندرمشیدی .

انکلیز ایلچیسی ایسه کچمک ایچون مساعد هوا یه منتظر اولوب اولوقته قدر در دست اولان استحکاماتی ممکن مرتبه تأخیر و امهال ایچون مأمورینی اغفال ایتک اوزره انکلتره دولتک نیات خالصانه و مصلحانه سندن بحث ایدرک ایشک صلحله بتور یله جکی شبهه دن عاری صورته کوسترمش و بو باده قپودان پاشا ایله فیضی افندی بی تاملیه قاندرمش ایدی ایشته عملیاتک آغر یوریمسنه باشلوجه بر سبب دخی بو ایدی حتی بوندن طولای فیضی افدینک واقع اولان بطائت و مسامحه سی حسیلله نعره بورنه وضع اولنان الی درت قطعه طوپک برازی رده و برازی قونداق اوزرنده بولنهرق هنوز یولو یرینه تعیمه اولنماشیدی و برقالیون و بش فرقتین ایله بر بر یقندن عبارت اولان دو نتمای هایون دخی نعره بورننک اوست طرفنه یامانوب تیمور اوزره طور دینی حالده عید انجی ملبسه سیله طائفه لرینک بر خیلیمی قر دیه چیقمشیدی . انکلیز دو نتماسی ایسه برلودسه منتظر ایکن شباط رومینک اولننده یعنی ذی الحججه نیک اونجی کونی برصیق لودوس اسمکک باشلا ییچ انکلیز امیرالاری (دوق وورت) ایله (اسمیت) ایکی قطعه اوچ انبارلو و بش قطعه قیاق و ایکی فرقتین و ایکی قوروت ایله بوزجه آطیه پیشکاهندن قالقوب و هر کس بیرام نمازنده ایکن بو سفائی طور نه قطاری کبی دیزوب بوغازه دخول ایله قوم قلعه و سد البحر حدالرینه وصولنده بو ایکی قلعه نیک آتشی انکلیز دو نتماسنه سد ممانعت اوله بیله جک درجه ده اولدیغندن بونلره اصلا تعرض و التفات ایتمکسزین کچوب کلید البحر ایله چناق قلعه پیشاهنه کلد کده

بوقلعه لرك استحکاماتی اولدجه ايشه يارار و دكزی طار ايدو كندن انكليز كيملىرى ايكي طرفه كله وصالغ صاعه رق سرعت ايله كذار ايدوب اگر چه بوقلعه لر دن و نعره بورنی طابيه سندن دخی طوپلره آتش ايدلدى وانكليز كيملىرينه بره مقدار ضرر و خسار و يرلدى ايشه ده مرورلرينه ممانعت اولته مدی اولوقت قپودان پاشا بر پاتاريه باشنده بالذات قوماندا ايتمكده ايكن انكليز كيملىرى شدتلو آتش ايتدكلىرى كچي فراره مبادرت و آنك فرارى طوپچيلره دخی سرايت ايتمكده طوپلر معطل قالمش اولديغى مرويدر .

الحاصل انكليز دونملى جزئى خسارت و التمش نفر قدر تلفات ايله بوغاز قلعه لر ينك او كندن كچوب آكسز ين نعره بورنك اوست طرفنده لنگر انداز اولان سالف الذكر دونملى هايون اوزرينه صولت و هجوم ايتدكده دونما عسكرينك اكثرى بيرام مناسبته قروده بولنديغندن تيمور آلمغه و يلكن آچغه وقت و حال مساعد اوليوب سفن هايون همان مدافعه يه ابتدار ايلمش و ايجلانندن بر فرقين فوق العاده شجيعانه مقاومت كوسترمش ايشه ده دونملى هايون انكليز دونماسنه بر وجهله معادل اولنديغندن مغلوب و منكسر اوله رق تماميله قره يه اوتوردلمش اولمسيله انكليز لر در دینی احراق و ايكيسنى دخی اخذ و ضبط ايلدیلر بو وقعه ده دخی انكليز لرك اوتوز قدر تلفاتی و قوعبولوب آندن صكره كندولرينك رخنه دار اولان كيملىرى تعمير ضمننده چند ساعت نعره بورنی جوارنده توقف ايتدكدن صكره كليولى پيشكاهندن كذار ايله استانبوله طوغرى عزيمت ايتديلر .

مگر دونملى هايونده كي بر يقك سواريسى اولان تنبك قپودان زاده انكليز دونماسنك كليشى نمايان اولديغى درك ايله اولجه يلكن اوزرينه قالمش و بو عر بده ده دكزه آچيله رق پوپه يلكن استانبوله يول و ير مش اولنديغندن عيد انجانك او چنجي جمعه كوني استانبوله وصول ايله وقعه يي خبر و ير دكده ارکان سلطنت تعريف اولتماز صورتده دوچار تلاش و دهشت اوله رق در حال عقد مجلس مشورت اولندقده سوا حلك محافظه سى ضمننده طابيه لر انشاسنه قرار و ير ملكه رئيس الكتاب غالب افدى آخور قپويه و دفتر دار عثمان افدى چاتلادی قپويه و ابراهيم كتخدا يعنى سابقا كتخدای صدر عالی اولان ابراهيم نسيم افدى قوم قپويه و سابقا ترسانه امینی احمد عزيز افدى داود پاشا ايسكله سنه و دفتر دار اسبق حسن تحسین افدى صاميه قپوسنه و حبوبات ناظری الحاج مصطفى افدى یدی قله يه و بار و تختاه ناظری راغب افدى ايله مقدمه بارتبه وزارت اردوی هايون چرخه جيسى نصب اولنان علی پاشا بار و تختانه لره و دفتر دار سابق مصطفى رشدى افدى اسكدارده واقع حرم

ایسکلهسی وقاضی کوبی وفسار بغچهسی سمتلرینه مأمور ایدیلوب متعاقباً صدارت عظمی قائم مقاملغنه دعوت اولنان موسی پاشا دخی درسعادتہ کیکله اسکدار سعی اکا حاله ومصطفی رشدی افدینک مأموریتی طویقپو ویالی کوشکی جهتنه تحویل ایله باروتخانلردن چوبلک تعمیر اولنور محله ومال تپه دن اسکداره قدر طایه لر انشاسته وقورشونلی مخزن ایله اسکداردن قره دکر بوغازنده واقع قلعه لره دک ایکی قارشولقلی طویلر وضعیله مواقع مهمه نک احکام وتقویتنه ابدار ایدلدی .

وانکلیز دونماسنک اولوجهله بوغازدن دخولی حوادثی بین الاهالی شایع اولغله صنوف اهالی سواحله دو کیلوب مرمره دکزینه مدنظر انتظار ایتمکده ایکن ایکنیدن صکره انکلیز دونماسی چکمهجه حداسنده کورینوب اخشام اوستی باروتخانه اچیقلرینه کله رک قزل اطه لر پیشکاهنده لنگر انداز اولدی .

استانبولده آجی بی طاتمامش وکرم وسرد روزکاری تجربه ایتمامش چلیلر وجهی قبه وقطره بی دریا ایدرک اعظام اموره ومبالغه نامحصوره مائل ویکدیگره ضد ومخالف درلو درلو اعتقاد وافکاره قائل لافز نلرک چوق اولدیغندن اومقوله لر گوشه باشلرنده کومه کومه طویلانوب وآغز آغزه ویروب برطاقم قاریشق رؤیالره بکرر اوهام وخیالات ایله یکندیگری توحیش ایدرک اویله بر عجیب حال حیرت ودهشته دوشدیلر که اول شب بوالعجبه استانبولک حالی روز قیامتدن بر نمونه ایدی بوصره ده بعضیلری دخی کتب جفریه به مراجعت ایله به جانم آخر وقت اولدینی بی شبهه در بی اصفرک غلبه سی مهدی خروجی درکاردر غالباً اولوقت منتظر کلدی دیرلر وبعضیلری دخی بوماده سوز کوتورمز اشراط ساعتدن اولدینی محققدر . حینا که قیامت بزم باشمزه قوبدی دیو تأسف ایدرلر ایدی .

طوایف عسکریه ایسه فرط غیرت وحیت ایله جوش وخورشه کله رک طویلیچیلر طویلرینه یاشدی ویکچیریلریتاغلرینی طاقوب وتفنگلرینی الوب سواحله طوغری قوششدی . بوصرده مدرسه نشین اولان طلبه علوم ایله بعض اسحاب شجاعت دخی سلاحلنوب زقاقلره دوشدی بوصورتله سائر خاق دخی غیرته کله رک سلاحلانمغه باشلادیلر .

سلطان سلیم خان حضرتلری انکلیز دونماسنک بوغازدن کچدیکنی خبر آلدقه فوق العاده اورکدی وانکلیز دونماسی باروتخانه اچیقلرنده کورندیکی کبی سرای هایونده کی قادینلر قورقوبده فریاده باشلایحق پک زیاده متأسر اولدی وانکلیز دونماسی بوجه مشروح قیزل اطه لر پیشکاهنده تیمور آتدقن صکره انکلیز ایلیجیسی درحال باب عالی به برقطعه تقریر ارسال ایله دونمای هایونک امانه کندولره



تسلیم ایدلمسی و روسیه لو ایله مصالحه اولمسی و انکلتره اتفاقک تجدیدنی حاوی برقطعه سند ویرلمسی خصوصلرینی یالکز برکون مهل ایله تکلیف ایدوب بوکا دائر میانه ده بعض مخبرات جریاندن صکره یالکز اوج ساعت مهل ایله بوتکلیفلری تکرار درمیان ایتدکن بشقه بوکره سبستیاینک طردینی دخی علاوه ایتمیدی . کیفیت مجلس وکلاده لدی الاستشاره انکلیز دوئمانسه مقاومت قابل اوله میه جنی جهته انکلیز ایلچیسنک تکلفنی قبول ایتک اوزره قرار ویرمشر ایدی . بناء علیه سلطان سلیم خان حضر تلری بوقراری سبستیانی به اخبار و نازکانه عودتی اخطار ایتک اوزره خواص قرنای شهر یاریلرندن اسماعیل بکی کندوسنه کوندردی . سبستیانی ایسه کندوسنک باب عالی نزدنده معتمد بر سفیر رسمی اولدیغندن بحثله علنی صورته کندوسنه تبلیغات رسمیه وقوع بولدیجه استانبولدن حقیقه میه جنی بیانله ایتدار یولنده جواب ویرمکله برابر رئیس افندی به کیدوب و ( بویه بش اون کمی به برایتختی تسایم ایتک نه دیمکدر بوندن صکره دولت علیه استقلال و تمامیت ملک سوزینی نه یوزله اسانه آله بیلور بودونماده عسکر یوق که قره یه دوکوبده مملکتی ضبط ایتسون یالکز سرای بورنه مقدار کافی طوپ قویسه کزانی خراب ایده بیلور سکز انلرک تهله که سی سزذن چوق زیاده در زیراهم سزک آتسکزذن قورقارلر و همده صودن و روزکاردن و قره یه دوشمکدن صاقنورلر بونلر کندولرینه مساعد اولوبده سزک آتسکزده دخی غلبه ایتسه لر نیپا به بیلورلر نهایت استانبولک بر قاچ محله سنی یا قوب کیدرلر استانبولده بوقدر حریق اوله یور فرض ایدیکز که بوکرده بر بیوک حریق وقوعه کلش اولسون یانان یرلرینه یاپیلور لکن ناموس دولت اساندن ییقلور ایسه صکره یاپیله ماز ( یوللو عروق حمیتی تحریک ایده جک سوزلره لر رئیس افندی بی اسکات ایدوب بروجه بالاصنوف عسکر به ایله سائر حرب وضر به یاریان اهالی اسلامیه نك اطوار شجیعانه و افکار فداکارانه لر دی دخی سبستیاینک اخطاراته موافق اولسیله لر رئیس افندی کیفیتی صدر اعظمه لدی الافاده حضور هایونده خواص وکلا و سبستیانی حاضر اولدینی حالده مجلس مشورت عقد اولدندقه سبستیانی اوراده دخی منوال مشروح اوزره غایت مؤثر بر نطق ایراد ایتکله افادات و اخطاراتی هر طرفدن قبول و تصدیق اولندی و بالتصادف ناپلیونک ویستول نهری کنارندن یازمش اولدینی برنامه دخی اول کون ورود ایله سلطان سلیمه تقدیم قیلندی .

خلاصه مضمونی بودرکه (ای سلطان سلیم حضرت محمد علیه السلام خلافتنه شایان

اولدیگی اثبات ایت ایشته سنی اسیر ایدن عهدنامه لردن قورتاره جق وقت شمدی  
 گلشدر سکا یا قلاشدم اسکی دوستک اولان لهستان دولتک احیاسیله مشغولم  
 اردولرمدن بریسی طونه یالیسنه اینک اوزره حاضر در سن موسقولری جهه لردن  
 اوردیغک وقت بنم اردوم دخی ارقه لرینی چویره جکدر دونمالریمک برفرقه سی  
 دخی طولوندن چیقوب و کیدوب پایتختکی وقره دکزی محافظه ایده جکدر .  
 ارتق جسارتان زیرا بردخی دولتکی قوتلندیره جک و ذکرینی شهر تلندیره جک  
 بویله بروقت فرصت بوله مازسین )

پوناپارته نک بوسوزلری سلطان سلیمه زیاده تاثیر ایتدی بروجه مشروح عامه نک  
 غیرت آتیشنی دخی کرک اکا و کرک و کلایه بیوک جسارت و یردی .

بونک اوزرینه و کلا اسکی قراری الغا ایله مدافعه یه قرار و یردیله واسباب مدافعه نک  
 استحضارینه سببستیانی مأمور اولدی و علی العموم هر دین و مذهبده اولان تبعه  
 دولت علیه بک زیاده غیرت و فوق العاده سرعت ایله استحکاماتده ایشلمکه باشلادی  
 اختیار آدملره و کوچوک چوجقلمه و ارنجه طوپراق و دمت طاشورلردی بوندن  
 بشقه ایکی یوز قدر فرانسز دخی برابر ایشلردی . سببستیانی عملیاتی تعلیم ایچون  
 معینده بولنان و دالماسچیان کلان فرانسز ضابطانی طابیه لره طاغیدوب کندوسی  
 دخی پیدربی طولاشه رق طوپجیاره و عمله یه بخشلر اعطاسیله تشویقات لازمه یه  
 دوام ایلردی و کلا دی دولت معیت مأمورلریله برلکده بالذات طابیه لرده بولنه رق  
 تسریع مصلحته نظارت ایتدکر نندن بشقه سلطان سلیم خان حضر تلری دخی آره صره  
 استحکام محللرینی طولاشه رق جمله یی تشویق ایدردی .

فقط مخبره و مذاکره ایله ده برقاچ کون اولسون وقت قزانق اوزره انکلیز  
 دونناسه کوندریلان دیوان هایون ترجمانی واروب انکلیز ایلیجیسی و امیرالی ایله  
 بالملاقات تکالیف واقعه نک جرح و تعدیل حقنده مباحثات کثیره جریاندن صکره  
 دونمای هایونک تسلیمی صددی کلیاً طی اولنه رق یالکز دولت علیه نک روسیه ایله  
 مصالحه سنه و انکلتره لو ایله اولان اتفاقک تجدیدینه دائر برسند و یرمک و انکلتره لو  
 روسیه لونک استیلا ایتدیگی قلاع و بقاعک ردینی باسند تعهد ایتک و بوسندلر قاعده  
 اوزره بلذاکره تنظیم اولنجیه دک انکلتره دوننامی عودت ایله چناق قلعه سنده  
 طورمق و انکلیز ایلیجیسی استانبوله کلوب او طور دقدن صکره سببستیانینک  
 در سعادتدن دفی ایچون بر زمان مناسب دوشونلمک خصوصلری مسوده اوله رق  
 قلمه التمش ایهده بصورت عینیه قبول اولنه ماز البته جرح و تعدیله محتاجدر دیو  
 استیذانه تعلیق ایله دیوان هایون ترجمانی اوچ درت کون دهامهلت الهرق باب عالی یه  
 عودت ایلمش ایدی .

استحکام ایشلری ایسه خارق العاده و تعریف اولنماز صورتده سرعت ایله اجرا اولنرق ابتداکی کون سواحله اوچوز قطعه طوپ وضع اولنش و بشنجی کون سواحله کی طابیه لره وضع و تمیه اولنان طوپلرک عددی بیك ایکی یوزی تجاوز ایتمش ایدی .

برکون سلطان سلیم خان حضرتلری آخور قویه و رودنده درگاه عالی قوجی باشیلرندن جزائرلی سیدی علی بیکی کوروب چکونکی احوالندن لدی السؤال سیدی علی بیك ( اقدم بوماده او قدر اور که جک شی دکدر قولکیزه برقاچ سفینه اعطا بیوریلور ایسه انکلیز دوئمناسنک حقندن کلورم ) دیو اظهار جلادت ایتمکله و کندوسی فی الاصل مشاهیر امرای بحریه دن بولمغله بویله جسورانه سوزلری سلطان سلیمه باعث انبساط اوله رق همان انی باشبوغ نصب ایدوب ترسانه لیاننده موجود اولان قالیون و فرقیقین و قوروتلردن یکریمی قطعه سی تجهیز ایله قومانده سنه ویرلسنی امر ایدی .

و صدر اعظم ایله یکچیری اغاسی پهلوان اغایی حضور هایونلرینه جلب ایله یکچیری اغاسنه خطاباً ( اغا سن نه دیرسن دشمنلر بزدن استانبولی ایستور ) دیدکده یکچیری اغاسی پر آتش غیرت اولوب ( شوکتلو پادشاهم اغور هایونکده بتون او جا قلودن بشقه عامه خلق منعدم اولدقجه برطاشی دشمنه ویرلمک نه احتمالدر جمله من جنکه حاضر وامر و فرمانکیزه منتظرز ) دیحک ( اویله ایسه همان بو کون در دست تجهیز اولان سفینه لره کافی دالقلیج تحریر اولنسون ) دیو اراده سنیه صادر اولمغله صدر اعظم و یکچیری اغاسی باب عالی یه کله رک دالقلیج تحریرینه مبادرت ایتدیلر و فی الواقع انکلیزلرک بو طورندن بتون خلق منفعل و علی الخصوص صنوف عسکریه پک زیاده آزرده دل اولدقلرندن همان اول کون یکچیریلردن یدی بیك بشیوز دالقلیج تحریر ایله سفائن حریبه یه وضع اولنه جنی ائنده قبودان دریا صالح پاشا منزل ایله برآ بوغازدن وارد اولیجق عزل ایله یرینه بروجه مشروح دوئنا باشبوغی نصب اولنان سیدی علی بیك رتبه وزارتله و جزائر ایالتی الحاقیه قبودان دریا اولدی بو صرده ترسانه ناظر و دفتر داری اولان سید علی افندی دخی عزل ایله یرینه الحاج ابراهیم افندی تعیین ایدلدی .

و آقدکر بوغازی مأموری فیض الله افندی نیک امور مأموره سنده تهاون و تقصیری رونما اولدیغندن عزل ایله قره حصاره نفینه قرار ویرلمشیکن متعاقباً اعدامی اراده بیورلدی .

بوغاز قلعه لرینک تقویت و احکامی ایچون اردوی هایون چرخه جیسی علی پاشا

ایله داود پاشا موقعه مأمور عزیز افندی و درگاه عالی قپوچی باشیلرندن امتعه کمرکی امینی حسن آغا و باشاقی قولی شیرین زاده اسعد بک و یکچیری کاتبی رشدی افندی و قره مرسل اعیانی از نبقی عثمان بک مأمور ایدیلهرک برطاقم فرانسر مهندسی و ضابطلری ایله برابر آفدکز بوغازینه کوندردلی و داود پاشا ایسکله سنه سلیم نابت افندی مأمور اولدی .

وانکلیز دو نمانسک بوغازدن ورودی خبر آندیغی کبی جوار سلطنتده بولنان قضالر منعیناتک سر یعاً در سعادت یتمملری ایچون او امر علیه کوندرلمش ایدو کندن شیله سرداری اوزون حسن و از نبق اعیانی مصطفی بک و آطه بازاری اعیانی قره عثمان و کبوزه اعیانی سمرجی بیر اقدار نفرات و افیه ایله کلدکلر نده اوزون حسن طاقی دونمای هایون سفینه لرینه مأمور اولوب دیکر لری دخی قاضی کوی و فنار بغه سی کبی موقعه یرلشدر لدی .

فنار بغه سنه مأمور اولان نفرا تندن بر مقصداری قارشو قنه لی آطیه کچوب برقاچ انکلیز صندالی دخی صو المق ایچون اورایه کلدکلر نده لدی المحاربه انکلیز لک یدی سکز نفری تلف و بر اولقدری اسیر اولوب دونما امیرالنک شاب امر د اوغلی دخی بو اسیرلر ایچنده بولنغله عساکر اسلامیه هان اسیرلر یله برابر عودت و ساحل سلامتیه مواصلت ایتدکلر نده امیرال زاده بی سرای هایونه تقدیم ایتلر یله کندولرینه طرف شاهانه دن قرقر التون بخشش ایله برر چلنک احسان بیور بلوب مرقوم چو جق دخی قبودان پاشایه تسلیم ایلمش وانک طرفندن خفیا انکلیز دو نمانسنه آشورلشدر .

غزات مرقومه نک بو وجهله نائل مکافات اولملری سائر تازیانه شوق و غیرت اولمغین بالقجیلر اوفق قایق لری ایله انکلیز دو نمانسک اطرافنده طولاشه رق برکمدن دیکر کمی به کیدن صندالری اخذ و توقیفه جسارت ایدر اولدی لر و قر نال قریه سی صو باشیسی الی نفر دلاوران و ایکی چقه لوز طوپو ایله قنه لو آطیه کچوب صویه کلان انکلیز لری ازعاج ایتمه باشلا دیغدن بونلرک اوزرینه انکلیز امیرالی ایکی قطعه طوپ ایله برقاچ یوز نفر سوق ایدرک انره غلبه و مذکور چقه لوز طوپلرینی اللرندن اخذ ایلمش ایسه ده انکلیز لک دخی ایچیه تلفاتی اولدقدن بشقه صو باشی عسکر یله ذروه جبله چیقوب و اوراده واقع مناستره کیروب پخچر لردن تفنک انداختیله مدافعه و انکلیز لر طوپ ایله بونلری تضییق ایتدکه ایچلر نده اعلی ششخانه آتار نشانجیلر اولمسیله انکلیز طوپجیلرینی اعدام ایلمشلر شو حالده کیجه ایریشوب مقاتله یه فیصل و یرلمش و صو باشی دخی قرا کلقده مناستردن چیقوب و آطه نک آرقه سنه مهیا اولان قایق لره بنوب سلامت یقه سنه کچمشدر .

الحاصل بش کون ظر فنده سرای بور نندن یدی قله یه وقیز قله سندن قاضی کوینه قدر بتون سواحل ایکی قارشولقلی طوپلرله طونادیلوب مملکتنه یانلاشیله میه جق بر حال وهیئته کیردی واهالی همان قایتلره بنوبده انکلیز دونماسنک اوزرینه هجوم ایده جک صورتده غیرت وحدته کلدی وقپودان دریا سید علی پاشا یکریمی قطعه سفن حربیه ایله بشکطاش پیشکاهنده لنگر انداز اوله رق همان انکلیز دونماسی اوزرینه هجوم ایتمک ایستدی لکن انکلیزلرک محاربه بجزیه ده درکار اولان مهارت فوق العاده لرینه مبنی اوزرلرینه هجوم ایتمک بک مخاطره لو بر کیفیت اولدیغندن بوصولت مناسب کورلیوب قپودان پاشا ایسه بوکا اصرار ایتمکده اولدیغندن کوچ حال ایله ضبط وتوقیف اولنه یوردی .

وبالاده بیان اولندیغی اوزره دیوان هایون ترجمانی انکلیز دونماسنه کیدوب کنجیه دک بر ایکی کون کچوب آندنصرکه دخی اوچ درت کون مهلت ویرلمشیدی بومهل ایچنده انکلیز ایلیجسیله تحریراً مخابریه ابتدار وکویا تسویه مصلحته اقدام وخواش اظهار وبوصورتله مهلدن ایکی کون دها امرار اولنوب بومدت ظر فنده ایسه طابیه لر تماماً یایلمش ومقدار کفایه طوپ وخبره لر ایله طونادلمش اولدیغندن انکلیزلر وقت فرصتی قاجیرمش اولدقلری جهتله هر نقدر تکمیل فرینی خیالیجه تخفیف ایتمش ایسه نه نهایت جانب باب عالیدن جواب رد ویرلدی .

بونک اوزرینه انکلیز دونماسی حرکت تعرضیه ابتدار ایده جک اولسه ضیق واقدیدسی چوق بردکز ایچنه دوشه رک روم ایلی وناطولی قییلرنده کی طابیه لرک طوپ وهاون وکله وخبره لر ایله دونمای هایونک آتشی آره سنده قاله جغندن بشقه بوغاز قله لرینه دخی تقویت واستحکام ویرلمکده اولدیغندن برآز وقت دها کچرسه چقیمق قابل اوله میه جغه مبنی انکلیز امیرالی استانبول پیشکاهنه کلدیکنک اوننجی وذی الحجه نک یکریمی ایکنجی بازار کونی کندویه مساعد برپویراز روزکاری اسمکله همان تیمور آله رق استانبول پیشکاهنده برقاچ ساعت اولطه اوروب عثمانولر مدافعه یه حاضر اولدقلرینی کوزیله کوردکنصرکه چناق قلعه سنه طوغری روان اولدی وطابیه لرده کی خلقک مسرت صدالریله تشییع ایدلدی وانکلیز دونماسی اولوجهله اولطه ایدرکن دونمای هایون دخی تیمور الوب لاجل المحاربه ایلرویه حرکت ایلمش ایسه ده انکلیز دنماسی اولوجهله آچیلوب کیتمسيله دونمای هایون دخی قومقبو آچیلرنده قالدی .

انکلیز دونماسی بوغازه قریب اکینک نام محله ایکی کون اقامتله صو ایدن کیمیلرینی ترمیم ایتدی وکلور ایکن دونمای هایونندن اخذ ایتمش اولدیغی ایکی کمی بی اوراره

براغوب کیتدی فقط بووقته قدر بوغاز قلعهلرینه دخی ایجه تقویت واستحکام ویرلمش ومقدما تهاون ایدنلرک ترتیب جزاسیله سائر عبرت کوسترلمش اولدیغندن بوکره انکلیز دونماسی بوغازدن چیقارکن آتیان کلهلردن انکلیزلرک ایکی فرقتینی باتوب ویووک کیلری دخی پک فنازده لتوب شکسته بستمه بوزجه آطیه واصل وخراب اولان کیلرینک تعمیریه مشتغل اولدی .

بوئانده روسیه امیرالی (سینیاوین) برقاچ قباق وبرمقدار اوفوق تفک کیلرله بوزجه آطیه کلوب تکرار بوغازی کچوبده استانبولی اورمق خصوصنی انکلیزلره تکلیف ایلدیسه ده بوغاز قلعهلرینک استحکاماتی اولکی رادهه قلامش وکوندن کونه ایلروله مکده بولنمش اولدیغندن انکلیزلر کوچ حال ایله قورتلمش اولدقلری کرداب مخاطرهیه تکرار دوشمکی اصلا تجویز ایتدیلر .

فقط بوزجه آطیه ضبط ایله آقدکز بوغازینی آبلوقه ایتدیلر وبرطاقم کیلری آطهلر آرسنده کشت وکذار ایله سفان اسلامییهی صید وشکار ایدر اولدیلر بوجهته استانبولده پرنج وقهوه کبی مجراً کلان شیلر غالی بهالره چیقدی .

بالاده اشعار اولندیغی اوزره وکلای دولت علیهنک چوغنی انکلتره طرفداری اولوب انکلیز دونماسنک بوغازدن دخول ایله استانبول پیشکاهنه وصولنده دخی انکلیز ایلچیسنک تکالیفنه همان موافقت اولنمق اوزره قرار ویرلمش ایدوکندن بعضیلر انکلیز دونماسنک اولوجهله استانبوله کلمی خواص رجال دولت علیهنک دعوت خفیه سنه مبنی ایدوکی اعتقادنده بولنمشدر ننه کیم عاصم افندی مزایای احواله واقف برذادن روایت ایدوب دیرکه طرف دولت علیهدن پوناپارتهنک ایمراطورلنی تصدیق وسفیر مخصوص ارسالیله طرفینک رابطه موالاتی توثیق اولندیغندن طولای روسیه ایله متفق اولان انکلتره دولتلری دولتعلیهیه اظهار خصومت ایلدیلر روسیه لونک دولت علیهیه صمیمی دوستلنی اولیوب بوکره اتفاق آرزوسنده بولنسی دخی مصلحت مخصوصه سنه وانکلتره لو ایله اولان اتحادینه مبنیدر اما انکلیزلر منافع تجارتلری ایچون اوتهدنبرو دولتعلیه ایله مساله اوزره اوله رق شمندییه قدر دولتعلیه ایله میانهلرنده خصومت وقوع بولمامشدر ومقدما کرید فتحنده وخصوصات سائرده ومؤخرأ مصر سفرنده هر نقدر کندو مصلحتلری ایجابندن ایسه ده معاونتلی انکار اولنه ماز بوجهته دولتعلیه دخی دول سائردهن زیاده انکلتره لویه رعایت ایده کمشدر وغایت دوراندیش برطائفه درلر دهات رجالدن ابراهیم کتخدا والحاج ابراهیم افندی ورفیق افندی وسرکاتبی وسائر دقائق آشنالر بورالرنی مطالعه ایله انکلتره اتفاقنک محافظه سی افکارنده بولنمشلر ایسه ده طرف سلطنتک فرانسه طرفه میلی اولوب

سبستیانی دخی بی محاسرای هایونه تردد ایله (ایمپراطور مزله الکاسنی استیلا ایدوب  
 پترسبورغه عازم اولدیغی معلوم و چند روز ظرفنده روسیه ایمپراطورینک طوتدیغی  
 خبرینک ورودی امر مجزومدر انکلتره لو ایله روسیه لونک بو مرتبه صلح و صلاحه  
 تهالکبری دخی اکا میندر شمدی انلره اماله روی قبول ایتمک پشمش آشیکزه  
 صوغوق صوقومقدر) زمینارنده جانب سلطنتی کاه تو حیش وکاه تأمین ایله انکلتره لو  
 طرفدن کلیاً تبرید و بنیان خصومتی ازسر نو تشیید ایدر ایدی رجال مومی الیهیم  
 کرچه فرانسه لونک ضرری موهوم وبر وکیلری قیرمقدمه مضرت محقق و مجزوم  
 اولدیغنی مطالعه ایله انلرک دوستلغنی ترجیح ایدر لر ایدیهده طرف سلطنتی بروجهله  
 اماله ایده مدکلرندن انکلز لره سز لر برصورت دهشت تما ایله بوغازدن کچوبده  
 استانبول پیشکاهنه کلورسه کز اتفاق و مصافاتک دوامی اغلب ملحو طدر دیمش لر  
 و بودقیقه بی محافظه یه مأمور اولان قپودان پاشایه فیضی افندی یه اشراب ایتملر یله  
 دونمانک حین مرورنده انلرک رخاوتلری اکا مبنی ایدی لکن بودقیقه بی سبستیانی  
 استنهام ایتمکله پیدر پی طرف سلطنته محافظلرک رخاوتی ورجالک افکار و نیتی  
 اشعاردن خالی اولماز ایدی حتی سبستیانی یکچیری اغاسی بولان یهلوان حسین اغایه  
 دخی بوسفینه لر رجال دولتک دعوتیه کلدی دیو اشراب ایدوب اودخی ساده دل  
 وایشک ایچ یوزندن غافل اولدیغنه بناء بشقه معالره ذهاب ایله دبوس بدست اوله رق  
 زققلرده کزر و مواقع عسکر یه پی طولاشور ایکن (انکلز و موسقوبزم ایچمزده  
 ایمش شوکتلو پادشاهمز بیهوده تلاش واضطرابه دوشدی بونلر استانبولی دشمنلره  
 ویردکده ظاهر کندولری قرال اوله جقلر در) زمینارنده رجال دولتی علناً دم  
 و قدح ایدردی انکلتره لو دخی مصالحه دن مایوس اولوب یکچیری اغاسنک بومقوله  
 کفتکوسنی ایشتمدکده غیظ و کینه لرندن ناشی (واقعا بزم ورودمز دعوت ایله در  
 قره دکنز طرفندن دخی روسیه لو کله جکدر و بوجنکلر مواضعه در اقصای مرام  
 بووسیه ایله استانبولده مجتمع اولوب بردن بره یکچیری او جانغنی رفع ایله قشله لره  
 نظام جدید عسکرینی یرلشدر مکدر لکن ینه او جاقولونک سعادت طالعلری سببیه  
 دلخواه اوزره اسباب متهی اولدی) زمینارنده کیزلوجه یکچیریلری تحریک ایلردی  
 و سفائنک ورودی واقعا دعوت خفیه ایله اولوب لکن صورتی تقریر ایتدیکنز منوال  
 اوزره ایدی حتی هنوز سفائن مذکوره بحر مرمره ده ایکن ابراهیم کتخدایکی قپو  
 محافظه سنه مأمور اولوب خواجه سی بوقفیره فرداسی کونی نقل ایلدیکه دونکی  
 کونه قدر بو حادنه دن بغایت مضطرب ایدم دونکی کون بعد الظهر ابراهیم کتخدانک  
 اقامتکاهنه واردم براوطه ایچره یالکنز جه چبوق دردهان مضطجعامتوسد و ساده امن

وامان اولوب و بریاغنی دیگر ایاغی اوزرینه آلوب دم تک نواز اوله رق بولدم و قنا که بشره مده غم و ملالت اثرینی مشاهده ایلد کده سببی سؤال ایدوب بن دخی دونما و قعه سنی در میان ایلدیکمده و افرجه خنده زن تعجب اولدقدن صکره خواجه افندی مجلس اماندر اصلا اندیشه ایلمه شمعی شوایاغمی برو طرفه اماله ایدرسم بو کیلر اول طرفه کلور و اوته طرفه تحویل ایدرسم کذلک اول جهته منصرف اولور سوزک مائله وار دیکز غم و تاسه بی درونکزدن اخراج ایله آخر محبته باقلم دیدکده مزایایه انتقال ایله بر طرف سازدغده بال اولدم دیدی محرر فقیرک دخی بو مضمونده و افرجه تنور سند اوله جق قضایا و قیاساتی وارد کذلک و قعه دن چند روز مرورنده قبودان سیدی علی پاشایه بر محرمی و بطانۀ اموری (دولتو انکلیز لک بر قاق سفینه ایله مدافعه سنی در عهده ایتمش ایدیکز مکر صوفی وزارتله قبوداناق اختلاسه چیقدی دیوناس بیننده ضرب مقال اولتمقددر) دیدکده مشار الیه یمین مؤکد ایدوب (حقیقت حال اول منوال اوزره ایدی لکن تجهیز سفائن تکمیل اولوب هجوم ایچون فک لنگره مبادرتم هنکامنده کیلر مزک پلامارلرینی یکی قپویه بند ایلدیلر نه یابیم تحریک سفینه یه اقتدار مز قالدی) دیو کنسایه و تلمیح ایله ماده بی افاده و بلکه تصریح ایلدی حتی فیض الله افدینک اعدامی باندۀ اول کون عجله امر قطنی صدور ایتمشکن کاه قره حصار و کاه بسط اعذار ایله استغفایه چوق سعی ایلدیلر لکن مفید اولیوب پادشاه اصرار ایلدی بو جهته مومی الیهک قاتلی اولدق لرینه ینلرنده پک تأسف ایلدیلر . انتهى عاصم افندی انکلتره دونماسنک استانبوله کلمسی مطلقا خواص رجال دولتک دعوت خفیه سنه مبنی ایدوکی و وجه مشروح اوزره بیان ایلمش ایسه ده فی الواقع اولجه انکلیز لری دعوت ایدن اولدیمی یوخسه آنلر پولتیه لرینی اجرا ایچون بویله بر مخاطره لی تجربه یه کیریشوبده بو غازدن دخول ایله استانبول پیشکاهنه لنگر انداز دهشت اولدق لری کبی ذاتا آنلرک پولتیه سنه مائل اولان رجال دولت دخی بونی فرصت اتخاذا یله همان اول طرفه اظهار تمایل ایدو بوردیلر می بورالری معین و محقق اولیوب بو باده عاصم افدینک روایاتی دخی ادله کافیه دکلدیر .

سیدی علی پاشانک هجوم و تعرضه مساعدۀ اولنماسی بحثه کلنجه آنک معینده کی سفائن حربیه ننگ چونغی فرقین و قوروت کبی کچوک کیلر اولدینی حالدۀ دکر خاندن بی خبر اولان کولکی دالتلیج نفراتی ایله تجهیز اولمشلر ایدی بودونما ایله انکلیزک محاربه بحر یه ده ماهر و پیشکین نفرات و ضابطان ایله مملو اولان اوج انبارلو و بیوک قالیونلرینه غلبه قابل دکل ایدی و قابل اولسه سبستیانینک سکوت ایتمک احتمالی یوغیدی زیرا اولوقت قوماندۀ آنک النده اولوب ایستدیکنی اجرا ایتدیر یوردی



فقط استانبول واسکدار سواحنه ایکی قارشولقی بیك بوقدر قطعه طوپ تعیه اولنوب بشکطاش آچیغنده دخی یکر می قطعه سفن هایون صف حرب اوزره طوررکن انکلیز دونمسی لیمانه کیرو بده استانبولی تهدید ایده میه جکندن اولوقت دونمای هایونک بویه قارشولقی طابیه لر آره سنده طورمسی ایجاب فن حربه موافق ایدی ونتیجه خیره سی دخی کوردلی که انکلیز امیرالی مایوس اوله رق رجته مجبور اولدی وسیدی علی پاشا انکلیز دونمسی اوزرینه هجوم ایتمش اولسیدی بوغازده کی دونما کی بوکیلردخی خراب اولمش وانکلیز لره بر مظفریت قراندرلمش اولوردی واقعا دونمای هایون خراب اولنجیه دک انکلیز دونمسی دخی خیلججه زده لئه رک بونک اوزرینه احتمال که بوغازدن صاعقله چیقه مازدی لکن بویه بر احتمال اوزرینه دونمای هایونی بر کرداب آتشین ایچنه آتقی موافق حال ومصلحت اولورمیدی بودقیقه لری سبستیانی پک اعلا بیلودی آنک ایچون انکلیز دونمسی اوزرینه هجوم قومانده سنی اخطار وتکلیف ایتامشدر اما دقایق حربیه بی بیلمیان عوام ناس سیدی علی پاشانک یکر می کمی ایله بشکطاش اوکنده طور و بده انکلیز دونمسی اوزرینه هجوم ایتامسندن طولای تعریض ایلدکر نندن اودخی انظار عامه ده اعتباردن دوشماک ایچون سببنی ابراهیم کتخدا اوزرینه تحمیل ایله عوام پسندانه براعتدار ایلمش اولدینی اکلاشیلور .

ایشته ایشک دولتجه اک مخاطره لو جهتی بوایدی زیرا بویه بوره لو وقتلرده ارکان دولت یکدل ویکجهت اولوبده سفینه دولتی لیمان سلامتیه ایصال ایچون ال برلیکه چالیشوب چباله مق فرائض حالیه دن ایکن یکدیگری اتهام ایله عوام لسانه دوشورملری وساطان سلیم خان حضر تری بر طرفدن نظام جدیدی ایلرولتمک و ابراهیم کتخدا کی او بولده ابراز حسن خدمت ایدنلره زیاده اعتبار ایتکله برابر بر طرفدن دخی خلاف فکیرانی لزومندن زیاده تلطیف ایتک حسیده یکچری کرو هتک فوق العاده یوز بولملری سفینه سلطنتی بر کرداب بلایه طوغری کوتورمکده ایدی . بو صره ده سبستیانی طرفندن بودونما رجال دولتک دعوتیه کلدی دیو ساده دلان یکچیریانه اعلان ایدلمسی واکا مخالف اولان طرفلردن دخی اوت مرام یکچیری او جانغنی قلدر مق ایدی دیو کیزلو خبرلر اولاشدیرلمسی یکچیری کرو هنی بتون بتون شهبانه دوشورمش اولمسيله فساد وفته استعدادلری کوندن کونه زیاده لشمکده ایدی فیضی افدینک یالکز نفی اراده اولنشیکن در حال اعدامی دخی بورالردن نشئت ایلمش اولدینی سیاق وسباق احوال دن اکلاشیلور .

فیضی افندی پکما دجی باشی احمد اغا نام بر شخصک او غلیدر . ایام جوانیسنده چراغ

اولدینی باش محاسبه قامی کتبه‌سی ایچنده کمال حسن و جمال ایله موصوف و دواتی کوزل فیضی دیو معروف اولوب دفتردار اسبق پپه‌کی حسن افندی برادری احمد افدینک آغوش تربیه‌سنده نشو و نما بولمش وانک وفاتنده متصرف اولدینی آرپه کتابتی تحصیل ایدوب بعده ذمت خلیفه‌سی وباش محاسبه کیسه داری ومؤخرأ ضیا پاشانک مصره عزیزمتمده اردو دفترداری واردو ایله مصردن عودتمده اره‌سی چوق کچمکمزین ایراد جدید دفترداری اولمش وادرنه وقعه‌سی اوزرینه گروه مخالفینی ارضا و تأمین ایچون عزلی لازم کلان اعظم رجال دولت صره‌سنده اودخی عزل ایدلمش ایدی وضع و طوری غایت متعظمانه اولوب حتی باشی وقورانه یوقارو دیکمک عادتق ایدوکنه واکین ترلاسنده کزن کلب اکینلرک بشاقلری کوزلرینه باتمسون دیو صوده یوزرکی باشی یوقارو دیکوب کیدر اولدیغنه مبنی بین العوام اکین ایتی فیضی دیو تلقیب اولمشیدی . یکچیری گروهی ذاتاً نظام جدید افکارنده اوللره عداوت ایتمکده اولدقلری حالده فیضی افدینک اطوار متکبرانیه‌سی برمرتبه دهانظر عداوتی دعوت ایتمکله و فی‌الاصل پست پایه برکاتب ایکن آز وقت ظرفنده بردن بره پارلیوب ایراد جدید دفتردارلنی ملاپسه‌سیله اعظم رجال دولت صره‌سنه کچمسی بر چوق قدمای رجالک کوجلرینه کیتمکله حقنده نفرت عمومی وار ایدی . بناءً علیه ابتدا نغینه قرار ویرلمشیکن متعاقباً افکار عامه‌یه اتباعاً اعدامی امرنده استعجال اولمشدر یوخسه یالکز انکلیز ایلچیسینک سوزلرینه الدانوب وعاصم افدینک روایتیه کوره ابراهیم کتخدا ایله سائر خواص رجالک اخطارات محرمانه‌سنه اتباع ایدوبده بوغازک استحکاماتنده اغر طوراندیغندن ناشی اعدام اولمش اولسه قیودان پاشا ده اول اعدام اوللق لازم کلوردی زیرا ایشک اک بیوک مأمور مسؤلی او ایدی .

هرنه حال ایسه سلطان سلیم خان حضر تلری انکلیز دونماسنی رجعتیه مجبور ایدرک ناموسیله بوغائله‌دن خلاص بولدیغنه زیاده‌سیله ممنون اولوب بوبابده تکاسلی ثابت اولنلر حقنده مجازات ایتدیکی کبی سعی وغیرتی مشهود اولنلری دخی مظهر مکافات بیور مشدر . سابقا سکبان باشی وبعده ادرنه اغاسی اولوب اشبو انکلیزلو وقعه‌سنده غلطه محافظه‌سنه مأمور اولان چلی مصطفی اغانک مقدم ومؤخر سعی واقدامی نزدشاهانه‌ده پسندیده اولمغله و اواخر ذی الحجه‌ده اجرا اولنان توجیهاتده عهده‌سنه رتبه وزارتله اناطولی ایالتی وآق دکر بوغازی سر عسکر لکی توجیه بیورلدی وینه بو توجیهاتده تپه‌دلنلی علی پاشا زاده میرمیراندن احمد مختار پاشایه لدی الاقتضاء عجالهً موریه امداد ایللمک شرطیه اینه بختی سنجانی احاله ایدلدی .

وبرمدت تبرو مرفوع الوزاره کلیبولیده مقیم اولان چلی عمر پاشانک دخی بووانده

وزارتی ابقایور به رقی لینی جزیره سی محافظی اولدی و بو ائنده قره دکتر بوغازینک دخی تقویت واحکامی لازمه خالدن اولمسيله روم ایلی جانبنه سایم ثابت افندی و اناطولی جانبنه سید محمد افندی بنا امینی نصب و تعیین و ایکی طرفه نظارتی شامل اولوق اوزره اورانک نظارتنه رئیس الکتاب اسبق محمود رائف افندی مأمور بیور یلوب بوغاز مذکور قلعهلرینک خارجنده چادرلرله اقامت ایتمک ولدی الحاحه حر به مهیا اولوق اوزره برقاچ بیک نظام جدید عسکری دخی کوندرلدی .

\* احوال عربستان \*

بو اوانده دولت علیه جه اک مهم مسائلدن بری حرمینک تسلط خوار جدن محافظه سی کیفیتی ایسه روسیه سفری ایله اوغراشلمه قده اولدیغندن حجازه دأر شام و مصر والیرینه امر عالی یازمقدن بشقه بر تدبیره تشبث اولنه میوردی حالبوکه بالاده بیان اولدیفی اوزره آقدکز بوغازی محصور اولوب آقدکزده دخی سفائن اسلامیه سرپست کزه مدکلرندن مصر ایله مخبره قره یولنه منحصر قالدی و انکلیرلر جانب مصره تعرض ایتمک داعیه سنده بولندقلرندن برده مصرک انلردن محافظه سی مسئله سی میدانه چیقدی .

رئیس وهامیان اولان سعود بن عبدالعزیز ایسه مدینه منوره نی استیلا و مراقده اولیا و صالحین قبلرینی هدم و احما و فقط اهالی مدینه نک نیازلری اوزره روضه مطهره نبویه قبه سی بقا ایتمکدن انصرکه روضه مطهره ده موجود ومدخر اولان بونجه درر و جواهری اخذ ایله در عیه یه کوندرمش و خطبه لر دن نام پادشاهی نی قالدرمش و اعتقاد باطلر نجه وهابی اولمیانلره مشرک نظر یله باقدقلرندن وهابی مذهبی قبول ایتمیانلری زیارت بیت اللهم دن منع ایچون ( انما المشرکون نجس فلا یقر بوا المسجد الحرام بعد عامهم هذا ) آیت کریمه سی دلالت واسطه سیله اعلان ایتمدرمش ایدی . برده کندو علاماسندن عبدالرحمن النبامی خطیب زاده یرینه مککه مکرمه واحمد بن ابوالنصری مدینه منوره قاضیسی نصب ایدرک خطیب زاده وسابق و لاحق مدینه قاضیلری حسن وسعدا بک افندیلر و خدام حرم نبوی اولان اغالر ایله مدینه محافظی زین العابدین پاشایه یول و یرمش و سلطان سلیم خان حضر تلرینه خطاباً تر به لر اوزرینه قبه بناسیله تر به لرده قربان ذبح اولتمق کبی مذهب وهابیده شرک عد اولنان موادک منعی مبین یعنی مذهب وهابی یه دعوتی متضمن برنامه کوندرمش ایدی . ایشته شمعی وهابیلرک اغراضی اکلاشامغه باشلادی مقدما قاضی زاده لی دینلان صوفیلره قیاساً مجرد تعصبلرندن ناشی بدعتلری قالدیرمق ایستیورلر یا خود شیعیلره عداوتلرندن طولانی سرکشک ایده یورلر دیو بحث اولنه یوردی . انلر ایسه اهل

سنت عندندہ مکروه عد اولئان و بآکھ حسناٲن معدود اولان بدعتلری شرک دیو  
اعتقاد ایتمکله بونجه اهل اسلامه مشرک نظریله باقیورلردی .

حرمینی ضبط ایله خطبه لردن نام شاهانهی اسقاط ایتمکرنده رئیس وهابیان مجرد  
خلافت ادعاسیله خطبه لری کندو نامنه حصر ایده جک ظن اولندی . انلرایسه  
خطبه لرده حکمدارانک اسمی اوقونمق بدعتدر دیو کندو رئیس لری دخی  
خطبه لرده یاد ایتمزلردی .

بو کره زعم باطللرنجه دینه دعوت ایدرجه سنه سعود مردودک سلطان سلیمه نامه  
کوندرمسی پک چرکین بر معامله اولدیغدن دولته غایت کران کلدی .

وبوسنه امیرالحاج شامی عظم زاده عبدالله پاشا قافلهء حاج ایله هدیه مرحله سنه واروب  
مدینه منوره یه تقرب ایتمشیکن وهابیلر قافلهء حاجی اورمق اوزره حاضرلنوب  
کترتلینه نظراً امیرالحاج پاشانک مقاومت ایده میه جکی معلوم اولسیله مدینه منوره  
مفتیسی و بعض وجوه و اشرافی سعودک یاننه واروب حجاج شامک بو دفعه اق سالماً  
عودت لری استدعا وبو باده رخصتی استحصالی ایتمکدن صکره سریعاً عیئلر ایله  
موکب حاجه کلوب کریان اوله رق وقوع حالی بیان ایلدیلر .

ومقدم ومؤخر حرمین اهالیسندن برچوق ذاتلر در سعاده تواردایدوب وهابیلرک  
کوندن کونه تعدیلری زیاده لشمکده اولدیغنی وبوایشه اهمیت ویرلمز ایسه عاقبتی  
وخیم اوله جغنی بیان ایله عرضحال ایتمکجه سرمست می اقبال اولان اعظم وکلاکه  
انلردن بریسی دخی والده کتخداسی یوسف اغا اولوب بالاده بیان اولندیغنی  
اوزره بو کره قافلهء حاج ایله برابر ایدی . اولوقت ندر بو عمر بلردن چکدیکمز  
پیدرپی کلوب راحتمزی سلب ایده یورلر دیو استقال ایدرلردی بو کره مدینه لولر  
بورالری یوسف اغانک یوزینه اوره رق سرزنش وادیسنده بز فریادمزی وکلایه  
اصفا ایتمیره مدک دیدیکمز ایشته شمعی ظهوره کلدی وسرک انخماض و مسامحه کرله  
ایش بورالره منجر اولدی دیو سویلدیلر .

بونک اوزرینه هدیه مرحله سنندن عودت لازم کلمکله حجاج مسامین بونجه تعب  
ومشقت چکدرک مدینه منوره یه بو قدر یا قلا شمش ایکن ارقه لرینه باقرق واشک  
اسف وحسرت دوکهرک جانب شامه عودت ایدوب شمعی یه قدر ملت اسلامیه ده  
مسبوق بانئل اولیان بروقعۀ غریبه وقوعه کلدی وحدود شامه کانجه یه دکن  
ذخیره سزلکدن عظیم زحمت وسفالت چکلدی وبوندن صکره طریق حج بتون بتون  
مسدودی اولدی .

(وقایع سنه ۱۲۲۲)

طریق حجک بووجهله انسدادی بتون مات اسلامیهنک عظیم کدر وانفعلانه بادی اولدی ووهایلرک بو مرتبه میدان المریخی وکلای دولتک تسیب و مساحهلرینه حمل ایله خلقک وکلا حقنده اولان بغض وعداوتلری برقاندھا ترقی بولدی .

سلطان سلیمک دخی طالهی دونوب اسبابی حاضرلتمقده اولان برقضایه تقرب ایتمکده ایدی که بو ائناده کچوک بیوک ظهوره کلان وقایعه دقت اولنسه هپ بر بیوک فتنه واختلالک اسبابی حاضرلتمده ایدوکی وجدان دقیقه دانه روشنا اولور .

نام شاهاندلرینک مقدمجه ادرنه وقعه سنده بر قاق هفتنه روم ایلینک بعض قصباتنده وبوکره وهاایلرک استیلاسی اوزرینه حرمینده خطبه لردن اسقاط اولنمی بتون بتون خطبه لردن سقوطنه سانکه مقدمه ایش .

بوسنیه (عام الفتره) ترکینک تاریخ دوشمسی دخی تصادفات نادره وغریبه دندر .  
بروجه بالا طریق حجک انسدادی اوزرینه اشبو یکر می ایکی سنه سی صفرینک اواسطنده عظم زاده عبدالله پاشا عزل ایله یرینه کنج یوسف اغا رتبه وزارته شام والیسی و امیرالحاج نصب اولندی .

اشبو یوسف اغا فی الاصل میللو عشرتندن اولوب کنجکلکنده شامده مشهور دلیل باشی ملا اسماعیلک یاننده پرورده اوله رق شجاعت و جلادت ایله شهرت بولمش و مؤخر عبدالله پاشایه دلیل باشی اولمش ایدی وچکن سنه عبدالله پاشا قافلده حاج ایله کیدرکن اتی شامده متسلم بر اقمشیدی بوکره شجاعتی حسیدیه وهاایلرک حقندن کلک اوزره والی اولدی و فی الواقع شجعاندن بر ذات ایدی لکن انک آتی عربستانک صوسز وایسوز چوللر نده ایشله مزدی وهاایلرک تدمیری دولتجه بیوک تدبیره موقوف اولوب والی تبدیلیله اولور بتر ایش دکل ایدی .

بالاده بیان اولندیغی اوزره انکلیز دونماسی استانبول پیشکاهنه قدر کلشیکن نتیجه مطلوبه به دسترس اولتمسزین اعاده اولندیغندن انکلتره لو اخذ نار ایچون مصری ضبط ایتمک اوزره قرق ایکی قطعه سفائنندن مرکب بردونما سوق ایشسیدی وبونلرک یکر میسی بیوک و باقیسی کچوک کیلر اولوب درونلر نده یدی سکنز بیک قدر عساکر بریه دخی وار ایدی و مقدا انکلتره لو الفی بکه امداد ایده جکنی وعد ایدوب اودخی برمدت بوکا انتظار ایله اسکندریه جه پهنده کشت و کذار اوزره بولندیغنه مبنی انکلتره لو کوله من عساکرینی دخی کندو اردوسنک اجزاسندن عد ایدیوردی حالبوکه الفی بک وفات ایدوب باشنده کی جمعیتی طاغلمش و محمد علی پاشا صعد ایچنده ابراهیم بک طاغیله امرای مرادیه والیهی

قهر و تدمیر ایتمکده اولدیغی حالدہ عثمان بک حسن دخی برخیلی کوله منلر ایله برلکده بو محاربه ده بی طرف طورہ رق صعیدک برکوشہ سنہ چکلمش ایدی بناء علیہ کوله منلردن انکلیزلرہ فائدہ اولہ جق وقت کچمشیدی .

سالف الذکر انکلیز دونمسی اسکندریہ پیشکاهنہ کلکدہ گویا فرانسزلر کلوبده مملکتی ضبط ایتسونلر دیو لاجل الحافظہ قرہ یہ عسکر چیقار مق ایستہ مش ایسہ ده حکومت محلیہ طرفدن امر سلطانی اولمدیجہ رخصت ویریلہ میہ جکی بیان اولنسی اوزرینہ طوب و خمبرہ ایله مملکتی دوکمه باشلیوب بر جنرک برازی منهدم اولدیغی کبی اهالی استیمان ایتمکله انکلیزلر محر مک اون ایکنجی کونی ویرہ ایله اسکندریہ بی ضبط ایدرک الفینک و فاتیہ جمعیتک طاغدیغنی لدی التحقیق ( بر شیخک و فاتیله بر جماعتک ایشی کیرو قلماز همان کلوب ایشیکزی کوریکز بر دخی بویله بروقت مساعد بولہ مازسکنز ) دیو امرای قبیلہ یہ خبر کوندر مشلر .

بو اواندہ ایسہ سیوطده وقوعبولان محاربه عظیمه ده محمد علی پاشا کوله منلرہ غلبہ ایدرک سیوطی اللردن المش و امرا و کشافک مشاہیر و بہادرانندن پک چونغی تلف و بقیہ سی بریشان اولمش و ( العفوزکاة الظفر ) وادیسندہ بعض شرائطہ ربطلہ باریشلمق اوزرہ محمد علی پاشا طرفدن کندولرینہ بر تکلیف وقوعبولمش ایدی واقعا انکلیزلر طرفدن کندولرینہ اول و جہلہ خبر کلمسی اوزرینہ بر چونغی انلرک طرفہ تمایل ایلمش ایسہ ده لاجل الاستشارہ عثمان بک حسنی دعوت ایتدکار ندہ ( بن مسلم مهاجرم فرانسز محاربه سندہ فی سبیل اللہ جہاد ایتدم خاتمہ عمر مدہ اللہ کوسترمسون فر نکلرہ التجا و اهل اسلام علیہنہ انلرلہ استظهار ایدہ یم بن بونی یابہ یم ) دیو جواب ویرمکله امرا بینندہ نشنت افکار و آرا وقوع کلمش اولدیغی حالدہ محمد علی پاشا انکلیزلرک اسکندریہ یہ کلکدرینی خبر ایجق دوچار تلاش و اندیشہ اولہ رق علمای مصر یہ دن صلحہ متوسط اولمق اوزرہ امرایہ کوندر مش اولدیغی ذواتہ هر نصل اولور ایسہ اولسون سربعا بر صورت صالحیہ یہ قرار ویرملرینی اکیداً تنبیہ ایتمکله انلر دخی امرانزدینہ واروب اهل اسلام علیہنہ اعدای دین ایله اتفاق ایتک جائز اولدیغنی آیات و احادیث ایله اثبات و میانہ ده فیما بعد خلل پذیر اولمہ جق بر مصالحہ مؤبدہ یانلمق اوزرہ بالاتفاق انکلیزلر علیہنہ جہاد و غزا ایتملری ایچون امرای الزام و اسکات ایتشلر ایدی .

انکلیزلر اسکندریہ ده یرلشدکن صکرہ رشیدی ضبط ایچون بر فرقه عسکر یہ کوندر مشلر ایدی لکن بو فرقه احتیاطسز اولہ رق لایالیسانہ درون بلده یہ کیروب موجود اولان عسکر و اهالی ایسہ متنبہ و حربہ متہی بولندقلرندن همان سل سیف

ایله انکلیزلر اوزرینه هجوم ایدرک کیمنی قتل و کیمنی اسیر ایدوب بقیه سی پریشان اوله رق دمنهور ناحیه سنه طوغری فرار ایتمشلر ایسه ده دمنهور کاشفی راست کله رک اودخی آنلرک اوزرینه هجوم ایله برازینی اعدام و بقیه سنی اسیر ایلمش ایدی . بونک اوزرینه انکلیزلر اخذ نار ایچون قوه کافیه ایله کلوب رشیدی محاصره ایتدیلر ایسه ده اوائل ماه صفرده محمد علی پاشا مصره کله رک طاقم سر کرده لر ایله رشیدک امدادینه عساکر وافیله سوق ایدوب شوپله که : ابتدا کتخداسی و عبدی بک کبی بعض سرکر دکان حرکت ایتدکن صکره لاز اوغلی احمد اداغنی عسکر یله مصر دن چیقده ترکر دن و مغار به دن پک چوق کولکلی دخی تجمع ایدرک آنکله برابر کیتدی بعده حسن پاشا دخی حرکت ایتدی اواسط صفرده کتخدای بک رشید جوارینه مواصلت ایلدیکی ائنده رشید و بحیره و دمنهور اهاالیسندن دخی برخیلی کولکلی تجمع ایدرک وارقه دن پیدر پی ارناود و سائر روم ایلی پکیتلری یتیشه رک کتخدای بکک اردوسی خیلدیجه جسامت کسب ایتمکله لدی التقابل انکلیزلر بریوک انهمزاهه دوچار ورشید متریسارینی ترک ایله فراره مجبور اولدیلر بو محاربه ده دخی انکلیزلرک کلی تلفاتی اولدقدن بشقه در تیوز التمش التی اسیر بر اقدیلر که یکر میسی ضابط ایدی .

انکلیزلرک اسکندریه بی استیلا ایتدکلی خبری مصره واصل اولدقده فرانسزلر کبی همان مصره هجوم ایدرلر دیو عامه ناس دوچاریم وهراس اولمشلر ایکن بووقه اوزرینه هرکس تسلی بولدی و عامه نك خوف و خشیتی زائل اولدی و متعاقباً مذکور انکلیز اسیرلری مصره کلوبده عیاناً تماشا ایتدکلی نده کندولرینه بتون بتون اطمینان کلدی و امراییننده اختلاف آرا و وقوعه کلکله هنوز طویلانوبده انکلیزلر اوزرینه کیتمدیلر ایسه ده انلرله دخی اتفاق ایتدیلر محمد علی پاشایه کوره دخی بودرجه سی کافی ایدی زیر انک انکلیزلره غلبه ایده جسک قدر قوتی وار ایدی فقط کوله منلر انکلیزلرله اتفاق ایتسه انی شاشیره بیلورلردی .

قالدیکه بورشید مظفرتی اوزرینه بتون اهالی جسارت الهرق سلاحلنوبده اسکندریه اوزرینه کیتمکه حرصلا تمشیدی و امرای قبلیه نك استدعاسی و جهاه شرائط صلحک تعیینی ایچون خللال ربیع الآخرده شیخ شرقاوی و شیخ امیر و سید عمر نقیب افندیلر اولجانبه کوندرلشدر .

و بو ائنده ابا هم بک کندو مملو کولر یله بی سویفه کلوب جهاده حاضر لنمقده اولدیغنی مصره بیلدیرمش و محمد علی پاشا ایله مخبره یه ابتدار ایدرک تأمینات و یرمش ایدی . بهر سنه ربیع الاولک بشندن سکزیته قدر حجاجک شامه و صوللری خبری ایله مژده جی باشی در سعاده وارد اوله کلورکن بوسنه اول کونلر انکلیزلرک اسکندریه بی استیلا

ایلمش اولدقلری خبری شیوعبولدی طریق حجت انسدادی اوزرینه اسکندریه نك استیلاسی خبری قات قات کدری موجب اولدی ودولت عالییه همان انکلتره لویه اعلان حرب ایله ممالک محروسه ده تقدر انکلیز مالی وارایسه تحت حمز وتوقیفه اندی وفرانسه لویه براتفاق معاهده سی عقیدینه تشبث ایدلدی .

شو حالده مصره معاونت اولنق لازمه حالدن کوریلوب انجق بوغازده روسیه دونماسی وسواحل مصریه ده انکلیز کیملری اولدیغندن بحرآ اعانه قابل اولدیغی کبی روسیه سفریله اوغراشامقده اولدیغندن برآ دخی مصره امداد ایلمک اوزره صیدا والیسی سلیمان پاشا ایله سالف الذکر کنج یوسف پاشایه امر عالی یازلمقدن بشقه برکونه تدبیر اولنه مدی . شامدن عریش طریقیله مصره واروبده امداد ایلمک ایسه تقدر مشکل برایش اولدیغی محتاج بیان دکلدز . زیرده بیان اولنه جنی اوزره متعاقباً فتنه ظهوریه استانبول آلت اوست اوله رق نتیجه سنده تجدد سلطنت وقوعبولغا ده دولتک جانب مصره عطف نظر ایده جک وقتی اوله مامشدر .

فقط مصر والیسی محمد علی پاشا دخی برو طرفدن امداده محتاج اولمامشدر . چونکه بالاده بیان اولنمدیغی اوزره انکلیزلر رشیدده منهزم اولدقدن صکره اسکندریه یه قیامغه مجبور اولوب محمد علی پاشا ایسه کوله من غائله سنی تخفیف وتعدیل وتدارکات لازمه سنی تکمیل ایدرک اوئل جمادی الآخره ده بالنفس مصر دن حرکت ایله واروب اسکندریه یی تضییق ایتدکده انکلیزلر تاب آور مقاومت اوله میوب همان اسکندریه نك تخلیه وتسایحی مکالمه سنه ابتدار ایتمشلر وواسط رجیده اسکندریه یی وه قدما اورایه ورودلرنده ضبط ایتمش اولدقلری اوچ قطعه دولت عالییه فرقتینی تسایم ایله کیملرینه بنوب کیتمشلردر .

ایشته بوکره محمد علی پاشا اقطار مصریه یی تمامیه قبضه تصرفه کچوردی زیرا مقدمه سواحل مصریه کمرکاری ترسانه عامره یه ربط اولنش ایدوکندن اسکندریه وملهقاتی انک تحت تصرفده اولمیوب طوغریدن طوغری یه استانبولدن اداره اولنوردی اما بوکره حرباً انکلیزلری اول حوالیدن طرد ایتدکن صکره اسکندریه وکرک دیگر اسکله لرهب انک تصرفده قالب ارتق مصرده استقلال اوزره حکومت ایده بیلمک اسبابنک استکماله صرف مساعی ایتدکده بولنمشدر واکرچه اورالقی طوائف عسکریه ایچنده بعض حرکات عصیانیه ظهوره کش ایسه ده دفع ورفعه موفق اوله رق هیئت عسکریه یی تمامیه اله الوب کندوسنجه کوله من غائله سندن بشقه بر ایلیشک قالما مشدر حالبوکه وقوعات سالفه ده کوله منلر خیایدن خیلی قیریلوب دوکیه رک اولکی سورت وقوتلری قالمامشیدی وبر باشلوجه فرقه لری اولان



امرای الفیه نك رئيسی شاهین بکی جلب ایله جیزه ده اقامه و بعض بلادك التزاماتی اكا احاله ایدرك انی بحریه جهتتک امر محافظه سنده کندو سر کرده لری کبی استخدام ایدر اولدی حتی امرای الفیه دن اولوب بو کره انکلز لر اسکندریه دن کتد کده اختفا ایتش اولان مشهور امین بك دخی ارقداش لرینک بو وجهله استخدام اولدق لرینی کوره رنک چند ماه صکره اودخی مصره کلوب و کندوسيله کوریشوب دائره انقیاده کیرمشدر و کندوسنک رهن صورتیه استانبولده بولنان اوغلی ابراهیم بك عهدده سنه بو ائنده مصر دفتر دارلغی توجیه بیوریه رقی مصره کوندر لمش اولدیغندن اودخی مصره ورود و خلال شوالده محاسبه ما مورین و کتبه سنی استصحاب ایله خراج اراضی دفتر لرینک تنظیمنه مباشرت ایلش و کوندن کونه محمد علی پاشانک حکومتی قوت و مصر مملکتی راحت بولمغه باشلامشدر .

حج یولنک کشادی دولت علیه جه بك نازک و مهم بر مسئله اولدیغندن محمد علی پاشا حرمینک ایادی و هابیانندن تخلیصنه ما مور قلنوب بوکا دائر کندوسنه مکرراً امر لر کوندر لکدن بشقه بو ائنده مخصوصاً قوجی باشی ارسالیله ما موریتی تا کید اولمش ایسه ده محمد علی پاشا هنوز مصرده یرلشوب تنظیم امور ایالتله مشغول اولدیغنه و بوجه بالا امرای الفیه یی اله المش ایسه ده دیگر کوله منلر ایله مواد مسالنه هنوز دردست مکمله ایدوکنه مبنی شو اراق جزیره العربه بر قوه کافیه سوق ایده میه جکی جهته ( بو ایش تعجیل ایله او ملاز ابتدا بحر سویشده کمیلر انشا و تدارکات لازمه یی ایفا ایده لده بعده و هابیلر اوزرینه کیده لم) دیواعتذار ایدرك دولت علیه یی قیر مقسزین اوایلان دیروب وقت قزاقمقدمه بولنمشدر .

### \* وفیات اعیان \*

اوائل محرمده دار السعاده اغاسی بلال اغانک و فاتیله یرینه خزینه دار شهر یاری مرجان اغا کبی برسیه روز و سیاه درونک دار السعاده اغاسی اولمسی دخی سلطان سلیمک بخت سیاهنه برادنا دلیل ایدی .

متوفای مشار الیه عوض محمد پاشا زاده صدر اسبق خلیل پاشانک دائره سنده پرورده اولوب دور مصطفی خانیده اندرون هایونه داخل و رفته رفته خزینه و کیلی و خزینه دار اولدقن صکره دار السعاده اغانغی مسندینه واصل اولمشیدی خیری سور و خیراتک اعمارینه سعی ایدر بر ذات ممدوح الصفات اولمغه و فاتی اندرونجه و بیرونجه باعث حزن و کدر اولدی عاصم افندی دیرکه مرحوم قوجه بشیر اغایه ثانی بر وجود بی مدانی ایدی رحمة الله علیه و وفاتنه سروری افندی نک سویلیدیکی تاریخدر ( محفل عدنی مقر ایتسون بلال )

ینه اوائل محرمدہ مکہ مکرمہ پایہ لولرندن سید محمد قدسی افندی ترك بزماہ فنا  
ایدوب کیتمشدر .

متوفای مومی الیه (رها) اور فہ علماسندن مظنہ کرامت حسن افندی نام ذاتک اوغلیدر  
غایت فطین و قوہ حافظہ سی متین برنوجوان ایکن بلده سی علماسندن تلمذ ایدرک  
آز وقت ظرفندہ علوم شتادن بہرہ مند اولوب فقط عیش و صفایہ مائل اولمق  
ملابسہ سیلہ فنون سائرہ دن زیادہ ادبیات و محاضراتہ منہمک و بو جہتلہ شعر و انشا  
بولندہ زیادہ معلومات و مالکیہ مالک اولمشیدی والسنتہ ثلثہ شعر و انشایہ مقتدر  
اولدینبی حالہ ذاتاً حسن بیان و طلاق لسان صاحبی اولہ رق مجلسی طاتلو و دلکشا  
اولدینندن ہرقنی مجلسدہ بولنسہ متکلم وحدہ اولوردی چند دفعہ درسعادتہ آمد  
و شد و اہل ذوق و شوق اولان بعض رجال دولتہ تردد ایلہ نائل ملتس و برارالق  
بلده سی مفتیلکنہ دسترس اولمشیکن وجوہ بلده سیلہ امتزاج ایدہ میہرک معزول  
اولمشیدی رجال دولندن مشہور سلیم افندی بیگ یوز طقسان ایکی تاریخندہ روم  
قلعہ یہ نقی اولندقدہ اورفہ دن صاحب ترجمہ بی جلب و مجلس کرم الفقیلہ آلام  
غربتی دفع و سلب ایدوب بعد الاطلاق برلکدہ درسعادتہ کتورمکلہ صاحب ترجمہ  
برمدت درسعادتہ مکث ایتدکن صکرہ حلب مقیسی اولمش و بالمناسبہ بغداد  
والیسی سلیمان پاشا التماسیلہ از میر پایہ سی المش ایدی و والدہ کتخداسی یوسف اغایہ  
منتسب اولمق حسیلہ حلب الشہبا نقابتی دخی علاوہ جاہ فتوی ایدلمشیدی حلب  
وجوہی و علی الخصوص حلبدہ مستبد بالرأی اولان جابری زادہ انک اطوار  
لا ابالیانہ سنی چکہ میوب حلبدن دفعنہ سی ایتمشر ایسہ دہ ارقہ سی والدہ کتخداسی  
اولدینندن ناچار سکوتی اختیار ایتکدہ ایدیلر مصر سفری اثناسندہ بش التی بیگ  
قدر حلبلوی تشویق ایلہ جلب و جمع ایدوب و اوزر لرینہ کندوسی باشبوغ اولوب  
سردار اکرم ضیا پاشا معیتہ واردقدہ خدمتی مشکور اولمغلہ مصرک فرانسرلرندن  
استردادندہ طرف سردار اکرم میدن مصر قضاسنہ تعیین بیوریلہ رق عہدہ سنہ  
بالفعل مصر مولویتک توجیہی دخی درسعادتہ انہا بیورلمش و کندو طرفندن دخی  
والدہ کتخداسنہ نیاز نامہ تقدیم ایدلمش ایکن شیخ الاسلام بولنان عمر خلوصی  
افندی اصول و رسوم طریقہ رعایتدہ فوق العادہ متصلب اولدینندن مساعده ایتیوب  
قاعدہ طریق اوزرہ مصر مولویتتی دباغ زادہ یہ توجیہ ایتدیر مکملہ صاحب  
ترجمہ مکدر اولمش ایسہ دہ اردوی ہایونک درسعادتہ عودتندن صکرہ صالح زادہ  
افدینک مشیختندہ بلاد اربعہ پایہ سیلہ و اون طقوز تاریخندہ بالفعل مکہ مکرمہ  
قضاسیلہ بکام بیورلدی مکہ مکرمہ دن درسعادتہ عودتندہ ضیا پاشا صادرندن منفضل

ووالده سلطانك وفاقى حسبيه يوسف اغانك اقبالى ادبارده متحول والحاصل استانبولج شرف  
اضافيسنك زائل اولديغنى كوروب اولكى دملرى ياد ايله متحسر ومقدمكى نشئه لرك  
خاريابه شيشه ذوق ونشاطى منكسر اولغله كدرندن برمدت نامزاج اولهرق نهايت  
بووانده ترك بزم فنا اتمكله سلطان بايزيد حظيره سنده دفن اولدى . عفاالله عنه  
شرف اضافى ثوب مستعار حكمنده اولغله انسان آتى كندويه مال ايتاملى واعتبار  
ذاتى دائره سنده يشامنك چاره سنه باقلىدر .

وينه بووانده رجال دولتن عاطف احمد افندى دخى محنت خانه فندان كوچوب كيتمكله  
بروجه آتى ترجمه حاله ابتدار اولنور .

فى الاصل كنفرى سكانندن وكروه درويشانندن اسكدارده عطارلق ايدن عثمان  
دده نام ذاتك اوغليدر . رجال دولتن لالهلى مصطفى افندى دائره سنه متردد  
وذاتنده مستعد اولغله مصطفى افدينك كتخذالغنده خزينه كاتبي اولهرق كتخدا  
كاتبي او طه سنه دوام وتحصيل فن كتاتبه اقدام ايتمكده ايكن راتب افندى آمدجى  
اولدقده ارباب استعداددن برينك آمدى او طه سنه مأموريتى لازم كليجك اورايه النمى  
وايكي يوز ايكي سفرينه كيدوب عودتنده برى افدينك عنائتيله آمدى راقم ابوبكر  
افدينك عزلنده آمدجى اولهرق يدى سنه عالم اقبال واعتبارده عمر سوروب ايكي يوز  
اون ايكي رمضاننده راتب افندى فوت اولدقده حسرة الرجال اولان منصب رياست  
كتاب ايله كامياب قلنمش ومتعاقباً مصر سفرى ظهورنده ركاب هميون رياسته تعيين  
اولنمش ايكن برمدت صكره بعض عوارض ايله خسته اولهرق مسند رياستدن دور  
وبعد ذخيره نظارتيله اوون يدى تاريخنده صدارت عظمى كتخذالغيله مسرور  
وسنه سنى تكميل ايدر اتمز كتخذالقدن دخى مهجور اولدقندن صكره اون طقوز  
شوالى توجيهاتنده چاوشباشلىق ايله نائل مأمول وسنه سنى ختامنده معزول اولوب  
بوئانده سنى الى التى به قريب اولدينى حالده وفات ايله ترك دغدغه كائنات ايتدكه  
اسكدارده شريف قويسى نام محله كائن صفه سنده دفن اولنمشدر .

نامق افندى ديركه متوفى مومى اليه صاحب حيثيت وفن انشا وكتابتده رسوخى  
رسيدة درجه نهايت ظريف نكته دان وهزل واستهزا ايله كويان ذوق وشوقه مائل  
ومى ومحبويه شيفته دل ايدى تجاوزه الله عن سيئاته اخلافة موجب عبرت وحرركات  
سيئه دن مستوجب مجانب اولمق ايچون حكاية آتية به ابتدار اولنور . شويله كه :  
ايكي يوز ايكي ركابندن مومى اليهك رياسته كلنجه اون بش سنه قدر بلكلجيك  
خدمتنده اولان ساحب افندى نحيفى افدينك فوتنده راشد افندى آستانه به اصل  
اولنجيهك برچق ماه كندو او طه سنده رياست وكالتى ايدوب كندو دخى ذاتنده

ریاسته اهل واریاب ایکن حسب القدر نائل اوله میوب بکلکجیاکده قالمش و امکدار اولمش بر آدم اولمغین صاحب ترجمه عاطف افندی مومی الیهی ریاسته استرقاب ایدرک سررشته ارارکن محمود رائف افدینک قبوده بر خدمته انتصابی لازم کله رک سوق و تعریفی ایله امکدار مومی الیهی ظلماً بلا منصب بکلکجیاکدن عزل و ابعاد وزماننده مالیه تذکره جیلکی ایله مجروح الفؤاد ایلدیکنه قساعت ایتیموب مالیه اوامریخی صح ایتمکن کنایه صاحب افندی دفتر دار قپوسنه رئیس ایلدک نکتہ سیله استهزا ایتمکه مومی الیه دخی طوراً و حالاً و فعلاً رئیس مومی الیه حقنده بر کونه اسانت ایتماش ایکن مجرد بلای استرقاب ایله کندویه خصم جان و عدوی بی امان اولدیغنه متکدر و بر کونه چاره استحصالندن دخی مایوسیتی جهته عاقبت اول الم جانکاهدن ناشی وجودی متأثر اوله رق خسته و دین کلی و ضرورت حال ایله دهمسته اولدیغی استماع ایله بر قاندخی تکدیر و تحقیر ایتک ایچون آل شونی طیبیه ویر یوللو رئیس مهترلندن بر یله ایکی یوز الی غروش کوندر مکله او حالنده بکاء ضروری ایله بدن بدتر اولسون دیو بددعا وانکسار و بر قاچ کون مرورنده عزم دارالقرار ایلدی عاطف افندی دخی چاوشباشیقندن عزلندن صکره خانه سی ایچنده اولان اشیا ایله یدی بیک بشیوز غروش فائضلو بر زعامتدن بشقه بر شیئه مالک اولیوب اول دخی دیوننه وفا ایتمز درجه ده ایکن بعض علل و امراضدن اسیر فراش اولدیغی کور یچک ارتق بووفات ایدر دهرک اتباعی دائره سندن طاغلمش و اوچ نفر امکدار آدمندن غیری کمنه سی قالمش اولدیغی خالدہ معاذالله تعالی بر کیجه بغتہ خانه سی طویشوب حرمنده بولنان طائفه نسوان هزار مشقتله مومی الیهی بر سجاده ایچنه قویوب آتشدن چیقارمش و اموال و اشیا سندن خلال چیقاره میوب جمله سی یاتمش اولمغله خانه سی جوارنده ایکی او طه خارجه لو جار به لرینک مقیم اولدقلری خانه یه کیدوب دکشه جک اثوابی اولدیغی بینلرنده معادات سابقه اولان ابراهیم نسیم افندی ایشیدوب محضا کندوی تحقیر ایچون بشیوز غروش ایله برقات اثواب کوندر مکله بعض احباسنه بو کیفیت صاحب افندی یه ایتدیکمک مجاز ایتدیر دیمش اولدیغی نقل ایدر لر (متقمدر بر آدی اللهم \* عامدر لطفی حق تعالی انک) انتهى .

حرمک اون یدنجی جمعه کونی دخی اسبق روم ایلی قاضی عسکری و حالاً نقیب الاشراف اولان السید ابراهیم عصمت بک افندی طی طریق حیات ایتمکه دری زاده السید عبدالله افندی نقیب الاشراف اولمشدر .

مرحوم مشارالیه رائف اسماعیل پاشانک اوغلی و کسریه لی احمد پاشانک حفیدیدر پدری ضربخانه امینی ایکن بیک یوز التمش درت سنه سی حرمک اون یدنجی کونی

تولد ایدوب سنهٔ حالیه محرمنک دخی اون یدیسنده وفاقی تصادفات نادره دندر .  
 عنوان شباننده تحصیل علوم وکالاته راغب اولغله پدری کندوسنه اول عصرک  
 نحول علماسندن ارضرومی نائب اسماعیل افندی نام ذات فضائل سماتی معلم تعیین  
 ایتکله اندن اخذ وتلقی علوم عالیہ ایتکده ایکن یتیم یدی سنه سی ذی القعدہ سنک  
 اون یدنجی کونی رؤس تدریس ایله بکام اولمش وکاکان تحصیل علومه مکب اوله رق  
 اسماعیل افندی دن اخذ اجازت ایتدکن بشقه مدنی مرحومدن دخی علم حدیث  
 اوقویوب اجازت المش و بوجهته اقران وامثالی بینده علم وفضل ایله شهرت بولمش  
 ایدی اکیوز ایکی تاریخنده مولویت ایله حلبه کیدوب عودتنده پیاس جاده سندن  
 کچرکن کوچک علی اوغلی بعض بهانه لر سرد ایدرک بلاموجب کندوسنی توفیق  
 ایله دوچار زیان و خسار ایلمشدر . در سعادتہ عودتنده ینه مطالعه کتب ایله  
 مشغول اولوب درجهٔ علم وفضیلتی کبی امور خارجیه ده رشد و فطاتی دخی  
 معلوم ارکان دولت اولغین اکیوز بش تاریخنده رئیس الکتاب عبدالله بری افندی  
 مرخص اول وصاحب ترجمهٔ مکه پایه سیله مرخص ثانی نصب اوله رق زشتوی  
 قصبه سنده نمچه مرخصلری ایله مکالمه ینه مأمور اولدیلر . مصالحه نک انعقادنده  
 صاحب ترجمه استانبول پایه سیله مکرم اولدقن بشقه هنوز روسیه محاربه سی باقی  
 اولدیغدن اردوی هایون قاضیسی نصب اولندی . و اکیوز اتی سنه سنده ینه  
 مشارالیهما مرخص اوله رق روسیه مصالحه سی عقد اولدقن صکره اردوی هایون  
 ایله در سعادتہ عودت ایدوب ایکی یوز یدی او اخرنده بالفعل استانبول قاضیسی  
 اولمشیکن اول ائنده حتی بک کتخدای صدر عالی بولتوب اکیسی دخی متعظم ذاتلر  
 اولغین امتراج ایده مدکارندن اوچ آی مرورنده صاحب ترجمه عزل ایله روسیه  
 نفی واجلاقلندی . فقط چوق کچمکسزین عفو واطلاق ایله در سعادتہ کلدیکنده  
 اولدیکن زیاده مقبول و معتبر اوله رق ایکی یوز اون سنه سی محرمنده اناطولی  
 پایه سی الدی . و تاتارجق عبدالله افدینک وفاتنده یرینه مجالس مکالمه ینه مأمور  
 اولدی . و مصر وقعه سی اوزرینه انکلتره و روسیه دولتلیله عقد اتفاق اولدقده  
 عهده صدارت روم ایلی پایه سی توجیه بیورلدی ومؤخرأً نقیب الاشراف  
 اولوب شرف وشانی بر مرتبه دها ترقی بولدی و بو کره وفات ایتدکده اسکدار  
 وراسنده چاملیجه جاده سنده خانداننه مخصوص اولان حظیره ده دفن ایدلدی .  
 حسب ونسبنه فضل مکتسی منضم و مهیب و وقور بردات محترم اولوب زمخشرینک  
 اساس البلاغه نام کتابنک مجازیاتی اختصار و اعجاز الایجاز فی اختصار المجاز دیو  
 نامدار ایتدکن بشقه بعض ابحاث غامضه ینه متعلق تعلیقاتی و مطالعه کداری اولان

کتابلرک هامشارنده بعض ملاحظات و تحقیقاتی واردر . فنون سائر دن زیاده ادبیاته توغل و محاضرات طرفه تمایل ایدوب السنه ثلثهده شعرسویلر و تقاریض و مقامات املا ایلرایدی و ذاتنده طلاقت لسان و سلاست بیان صاحبی اولمغله مجلسی خوش و محاورات و مفاکھاتی دلکش ایدی ( مات علامه الدهر ) ترکیبی تاریخ و فائیدر آخر وقتنده سلیمیه تکیه سی شیخی نعمه الله افندیدن اخذ دست انابت ایله طریقت نقشبندییه به سلوک ایتشیدی رحمة الله علیه رحمة واسعة نظام جدید حقنده افکار شاهانه نك خالصانه ترویججه سعی و همت ایدن ذاتلردن بریسی دخی مرحوم مشار ایله اولدیغندن بوانساده وفاتی ذات شاهانه جه بیوک ضایعاتدن معدوددر . عهدہ سنده بولنان مجالس مکالمه مأموریت مهمه سی علمادن کیمسه به احاله بیورلدیغنه دائر کرک و قعه نویس عاصم افندینک تاریخنده و کرک سائر تاریخجه و ضبطنامه لرده بر فقره کورلمدی فقط قوشمانی فذلکه سنده دیرکه عصمت بک وفات ایتدکن صکره استانبول قضاسنی یکچیر یلر میاننده نفس طور ناجیلنی و علمای رسمیه عندلرنده پایه تعبیر ایتدکاری لفظی مراد امر موهوم اعتباری ایله مرور ایدن سید محمد منیب افندی مکالمه افرنجیه به مأمور اولدی .

### \* اردوی هایونک حرکتی \*

سنه جدیده محرمنک غره سی شباط رومینک یکر می التیسنه مصادف اوله رق برآی صکره اردوی هایونک روم ایلی جانبنه حرکتی مصمم بولمغله محرمنک اون سکرنجی و مارت رومینک اون بشنجی جمعه ایرتسی کونی یکچیری اغاسی په لوان حسین اغا یکچیر یلر ایله دأب دیرین عثمانیان اوزره مرتب آلائی کوستروب نظرکاه هایونندن کدار و طوبوقودن چیقوب داود پاشاده منصوب اولان خیمه لرنده استقرار ایتدیلر فرداسی توغ صدارتنهای و جمله جبه جی و طوبوچی و عربه جی و خنبره جی او جاقلری کذلک آلائی والا ایله نظرکاه پادشاهیدن کچوب مخیم هایوننه کیتدیلر محرمنک یکر منجی بازار ایرتسی کونی دخی صدراعظم و سردار اکرم اولان حلمی ابراهیم پاشا و بالمله وزرا و علما و رجال دولت سرای سلطانی به دعوت ایله اورته قیو پیشکاهنده عقد جمعیت اولندینی ائنده سردار اکرم شیخ الاسلام ایله برلکده حضور هایوننه داخل اولدقلرنده سلطان سلیم خان حضرتلری سردار اکرمه سراسره قاپوسمور کورک اکسا و مجوهر سرغوج و خنچر احسان ایلدیکی صروده شیخ الاسلامه دخی فراجة بیضایه قاپوسمور کورک الباس ایلدکن صکره لواء شریفی یدأ بید سردار اکرمه تسلیم ایتدی بعده سردار اکرم اورته قیوده طرف شاهانه دن طوناندیرلمش اولان

اسب صبا رفتارہ سوار اولہ رق عظیم و محتشم آلائی ایہ داود پاشا صحرا سندنہ منصوب اولان خیمہ سنہ کیندی .

شویله که : ابتدا خواجکان دیوان هایون وقپوجی باشی اغالرایله موالیء کرام وبعده بعض رجال دولت ایله صدور عظام وبعده قائم مقام پاشا و تشریفاتی و مکتوبی و تذکره جی افندیلر وچاوشباشی کبی بعض مأمورین ایله رئیس الکتاب افندی و نهایت نقیب الاشراف افندی علی الترتیب البسۃ رسمیه لر یله کچدکدن صکره لواء شریف نبوی اطرافنده سادات کرام صلوات و سلام کنوره رک وبعده شیخ الاسلام ایله سردار اکرم یمین و یساره سلام ویره رک کتمشلردر .

بو اوانده روسیه دونماسی بوزجه آطه پیشکاهنده لکر انداز اوله رق آقدکر بوغازینی آبلوقه ایلمش اولدیغندن قپودان دریا سیدی علی پاشا محرک یکر می التتجی کونی اون سکر قطعه سفن حربیه ایله اول جانبه بادبانکشای عزیزت اولدی .

روسیه دولتی مقدجه حیلہ و خدعه ایله اناقره و کمال قلعه لرینی ضبط ایدرک اولحوالی یه بحر آکلی عسکر و مهمات کوندر مکده اولدیغنه مبنی طرف دولت علیه دن دخی سینوب و طربزون و فاش حوالیسنه مقدار وافی عسکر و طوب و مهمات کوندرلش ایسه ده تقلیدسه کی روسیه اردوسنک آخسخه وچلدر و قارص طرف لرینه تجاوز ایده جکی استماع اولمغله ارضروم والیسی صدر اسبق یوسف ضیا پاشا شرق سرعسکری نصب اولنهرق معیتنه دیاربکر و سیواس و قره حصار و ملاطیه و مرعش و چوروم و موصل عساکریله بالجله والی و میرمیران و اعیانلری مأمور ایدلدی . صفرک اوچنجی کونی اردوی هایون داود پاشا صحرا سندن حرکتله اون یدنجی کونی ادرنه یه واصل اولدی .

شق اول دفتر داری عثمان افندی بعض مقاطعات ایشلردن طولایی عزل ایله یرینه نشانجی فیضی بک زاده محمد بک دفتر دار اولمغله نشانجیلوق دخی عثمان افندی یه ویرلدی . ادرنه وقعه سندنبروروم ایلی اعیانلری زیاده یوزبولوب انلره قارشو اردوی هایونک صورت مطلوبه ده بر قدرت ذاتیه سی دخی اولدیغندن حسب الحال متغلبه کروهنه مدارا اولنلق لازم کلکله باشباقی قولی اسعد بک عزل اولنهرق یرینه ادرنه اعیانی داغ دویرن اوغلی باشباقی قولی نصب ایله امثاله حیلہ کوسترلدی .

وبالاده بیان اولنان ادرنه وقعه سندن طولایی روم ایلی اعیانلریله یکچیری کروهی قاضی پاشادن دلکیر اولدق لرینه مبنی آنلره امنیت واطمینان و یرمک ایچون مشار الیهک عزانه لزوم کوریلهرک رکاب هایونده کتخدای صدر عالی اولان شاملی

محمد راغب افندی بواشاده رتبه وزارتله قرمان والیسی اولمغله کتخدای وکالتی  
حبوبات دفتر داری ممش افندی یه احاله بیوردی .

سر پلورلی تأدیب ایچون خورشید احمد پاشا صوفیه جانبی سر عسکری عنوانیه  
روم ایلی والیسی و نیش محافظی نصب اولنمش اولدیغندن معینته روم ایلی وارناودلق  
وبوسنه امرا و اعیانلری مأمور ایدلدی و میر میراندن و دین محافظی ادریس پاشایه  
رتبه وزارت و یرلدی و روم ایلی بکلر بکی پایه لولرندن دلوینه متصرفی اولان  
تپهدنلی علی پاشا زاده ولی الدین پاشایه رتبه وزارتله موره ایالتی و میر میراندن محمد  
پاشایه کذلک رتبه وزارتله قارص ایالتی توجیه اولتوب جبهجی باشلیقدن نائل وزارت  
اولان سابقا روم ایلی والیسی عثمان پاشا دخی سالنیک منصبی ایله قایلردی .

بر طرفدن طونه یاللیسنه عسکر و مهمات کوندرلمکده ایکن بر طرفدن دخی خورشید  
پاشا اردوسنه طوب و مهمات کوندرلمک لازم کلدیکندن ایکی طرفک دخی ترتیب  
وارسال لوازماتی ایچون اردوی هایونک اون بش کون ادرنه صحر اسنده مکث  
و توقیفی لازم کلدی .

ایشته بواشاده طونه یاللیسندن پیدر پی اختیار ساره آلمقده ایدی . شویله که :  
بو وقته کلنجه روسیه لولر اون یدی دفعه اسمعیل قلعه سی اوزرینه هجوم ایشمکن  
محافظ بولسان غازی قاسم پاشا ایله قهرمان میدان و غا اولان پهلوان اغانک غایت  
شجیعانه و فداکارانه مدافعه لرندن ناشی هر دفعه سنده روسیه لولر زیان و خسران ایله  
رجعته مجبور و عساکر اسلامییه غالب و منصور اولمشلر ایدی .

ورده اقدمجه روسیه مارشالی میکلسون ایپسالاتی بک ایله برابر بکرشه کیرمش  
اولدینی حالده الی بیکلک بر اردو ایله کوچک افلاق طرفنه طوغری چیقهر رق  
صرب عصاتیله برلشمک داعیه سنده بولدیغنه مینی بوحر کتنده صول جناحنی تأمین  
ایچون اول امرده طونه ساحلنده کی قلاعک بعضیسی اله کچورمه محتاج اولدیغندن  
یرکوکی اوزرینه بفرقه سوق ایله یرکوکی قلعه سنی محاصره ایتدکده علمدار پاشا  
مقدار کافی عسکرله روسیقدن کچوب بش ساعت قدر تمتد اولان بر محاربه  
خونریزانه ده روسیه لولر کلی تلفات و یردکدن صکره مغلوباً بکرش جانبسه  
چکلمشدر ایدی .

بروجه بالا خورشید پاشا اردوسنه مهمات لازمه ارسال اولدیقدن صکره اردوی  
هایونک ادرنه دن سلستره جاننه حرکتی مقرر ایشه ده طونه یاللیسنده ذخیره جلب  
و تدارکی علمدار پاشانک همتنه موقوف اولوب حالبوکه اردوی هایونک اول جانبه  
حرکتدن کویا که علمدار پاشا بعضی شبهاته دوشه رک استئقال صدندده اولدینی



کوشزد اولیای امور و باعث افکار دورا دور اولمشیکن بر وجه بالا باش محاسبه پایه سیاه و طونه مباحه جیلغی بهانه سیله با تعلیمات مخصوصه روسجغه کیتمش و علمداری قبول وزارتہ ارضا ایتمش اولان بهیج افندی علمدارک کتخداسی ابو بکر اغایه برلکده ادرنیه چیقہ کلدارنده اردوی هایون ارکانک اذهانی مستریج اولوب ابو بکر اغایه میراخور اول پایه سیله قوجی باشلیق رتبه سی و بهیج افندی یه اصالة باش محاسبه توجیه و علمدارک تألیف و تأمینى خصوصى تعلیم و تنبیه اولنه رق اعاده اولمشلرایدی .

وبعدہ صفرك يكرمى التنجى كونى اردوى هایون ادرنه دن حرکتله اول کون آق بیکار مرحله سنه وارلدقده آمدجی مظهر افندی هر نصلسه رئیس افندی ایله اوپوشه مدیغندن عزل ایله آمدجیلک خدمتی دفترخانه کتبه سندن عامر بکه احاله اولمشدر فرداسی مرحلهء مرقومه دن حرکتله اوائل شهر ربیع الاولده پراوادی قصبه سنه قریب محله مواصلت اولندقده علمدار پاشا بش التی بیسک سواری ایله استقباله کلیجک ارکان اردوی هایون پک زیاده ممنون اوله رق کوزل ضیاقلر و طاتلی مصاحبتلر ایله معامله بالجامله ایدوب اول شیر و وحشت سمیر دخی رجال دولتک نازک و طاتلو طور و معامله لرندن خوشنود و شیرینکام و القتلرینه رام اوله رق اردوی هایون لوازماتی پیدرپی تدارک و ارسال ایتک تعهداتی انهای محبتده علاوه کلام ایلمش اولدیغنه مبنی طرف سردار اکر میدن کندویه لوای شریف سرعسکرلکی عنوانیه شرف و شان و یرلدکن صکره کندوسی روسجغه رجعت و اردوی هایون دخی سلستره یه طوغری حرکت ایتمشیدی .

ربیع الاولک اون التنجی کونی اردوی هایون طونه کنارنده و سلستره یه یارم ساعتک محله نصب خیام آرام ایتدکده طونه نک قارشو طرفنده روسیه چادرلری کورلیدیکندن کیجه عسا کر اسلامیه دن بعضیلری چته قایقلر یله قارشویه کچرک بر قاج یوز اسیر آلوب کتوردیلر بونلرک ایچنده براز روسیه لو واریدیه ده اکثری رعایا ایدی بعده اردوی هایون ایله خیلی مدت سلستره ده اختیار اقامت بیورلشدر .

بو اثناده ملت اسلامیه یی روسیه علیهنه تحریک ایچون مؤذن عثمان بر نام شخص موهومک اغزندن اوله رق فرانسه ده بر رساله تألیف و لسان ترکی و عربی یه ترجمه و پارسده طبع و تمثیل ایله نسخ عدیده سی ممالک محروسه یه نشر اولمشدر بالاسنه (مؤذن عثمانک کندو دیندا شلرینه خطاب اولنان نطقیدر) عباره سی یازلدقنصکره (یاغیرتلو مسلمانلر مکة مکرمه دن آستانه سعادته دکن خواب غفلتدن متیقظ اولک) دیو

سوزه بدأ اولته رق روسیه لونك ملت اسلامیه حقنده اولان سوء نیاتیه پترو زماندنبرو دولت علیه یه ایراث ایلمش اولدینی مضر تارندن و پوناپارته نك بونجه قوتو حاتیه دولت علیه یه خیر خواهلنی و آنکله اشتراك منافی جهتلرندن بحثله بتون ملت اسلامیه خواب غفلتدن او یانوب و سنجاغ شریف الته طوبلانو بده پوناپارته نك عسکر یله بالاتفاق روسیه اوزرینه حرکت و دولت عثمانیه نك اسکی فرو شوکت نك احیاسنه غیرت ایده جك وقت فرصت اولدینی اخطار قنمشدر .

اوله پارسده تصنیع ایله عربی و ترکی یه ترجمه اولنان بر رساله نك شیوه اداسی ملت اسلامیه نك مقتضای حال و افکارینه مطابق اوله میه جنی جهته ممالک اسلامیه ده بوندن پوناپارته نك امید ایتدیکی تأثیرك حاصل اوله میه جنی درکار ایدی . ناپلیونك بلاغت عسکر یه سی مسلمدر لکن آنك نطق فرانسز عسکر یه تأثیر ایتدیکی قدر ملل سائر حقنده مؤثر و متمر اولماز مصرده ایکن ایتدیکی نطقك ملت اسلامیه حقنده عکسنه تأثیر ایلدیکی بوکا دلیل کافیدر . برملته صحیحاً مؤثر اوله جق صورتده خطابت ایتك اول ملتك حال و مزاجنی بك اطرافلو بیلیمکه منوط و بودخی بك چوق وقت اول ملتك ایچنده بولمق ایله مشروطدر فقط رساله مذکوره بر چوقق اراجیفك تحذنه سبب اولمشدر . اولوقت ایسه یکچر یلر ایچنده فساد و فتنه استعدادی قوت بولمده اولدیغندن دولت علیه هراسن روزکاردن صاقینور و جزئی بر قیل و قالدن قوجینور ایدی .

بناءً علی ذلك بوکره روسیه سفرینك تحقیق عقبنده فرانسه ایلچیسى سباستیانی دالمایچاده کی فرانسه اردوسنك بوسنه ایچندن صرپستانه و اورادن افلاق یقه سنه مرور و عبور ایله لهستانه طوغری حرکته رخصت ویرلسی و طونه یالینده کی عساکر اسلامیه نك دخی بر لیکده دشمن مشترك اوزرینه سوق ایدلسی خصوصاً صرپنی تکلیف ایتدکده بوسنه دن لدی الاستعلا بوسنه لو طرفندن موافقت اولمدینی جهته تکلیف مذکور رد اولندقدن بشقه پوناپارته طرفندن پیدرپی کاغدلر ظهور ایله طوبچی و مهمات لازم اولوز ایسه و مالا معاونته حاجت مس ایدرسه طرفندن ویر یله جکی بیان اولتوب بونلره علی الخصوص فرانسه دن طوبچی و مهمات جلبنه دولت علیه جه اولوقت زیاده احتیاج واریکن افکار تعصیه نك غلبه و غلباندن ناشی اجنبی طوبچی و مهندس جلبی شویله طورسون کندوسنك نظام جدید عسکرینی بیله طونه یالینسه سوق ایده میوب یالکز بر مقدارینی قره دکر بوغازی محافظه سنه تعیین ایتش ایدی و اناطولیده بو قدر عساکر معلمه وار ایکن انلرک جلب وارسالندن صرف نظر ایدرک دره بکلرینك استخدا منه مجبور اولدی . و نفیر عام صورتده روم ایلیدن

وانا تولیدن کلی عسکر ترتیب ایلدیسه ده بویه درمه چاتمہ عسکر یله روسیه یه قارشو برشی یاپیله میه جفی اسفار سابقه ده ظهوره کلان تجربه لردن معلوم ایدی واکر چه بوئانده روسیه لولر لهستانده بونا پارتہ ایله واقع اولان محاربه لرنده زیاده صیقیشوب مارشال میکلسون اردوسنک بر مقدار نی لهستانه سوق وارساله مجبور اولمغله مملکتینده نهایت اوتوز بیک قدر روسیه عسکری قالمش ایدوکنه نظرا تمام اوزر لرینه هجوم اولنه جق بروقت فرصت ایسه ده نه چاره که دولت علیه یکچیر یلرک فسادندن تحاشی ایله عساکر معلمه سنی روسیه اوزرینه سوق ایدمه دیکی جهته سلستره ده تحشدایدن سردار اکرم اردوسی پریشان وضعیف اولوب ذخیره وسائرہ سنک تدارکی بیهه علمدار پاشانک همتہ محتاج ایدی . ایشته حال بومنوال اوزره جاری ایکن یکچیر یلرینه طرف سلطنتدن امین اوله میوب گروه مخالفین دخی بر اختلال چیقارمغه چالیشمقده اولدیقتن سلطان سلیمک خلغنی ایجاب ایدن فتنه نائمہ اویاتمق اوزره ایدی بونک اسباب ومبادیسی بالاده مشروح اولان مقدمات متسلسله درکه بومقامده انلرک بیان اجمالیسنه ابتدار اولنور .

### \* سلطان سلیمک خلغنی موجب اولان مقدماتک اجمالی \*

اوروپا اصولی اوزره معلم عسکر اولدقجه اعدایه مقابله قابل اوله میه جفی مقدم ومؤخر وقوعبولان نمچه وروسیه سفر لرنده ثابت اوله رق بوا مر ا همک حیز فعله ایصالی ارکان دولتک اخص آمالی اولدنی حالدہ یکچیر یلرک سرکشلیکی بونک اجراسنه مانع اولوردی . نهایت اکیوز ایکی سفر نده انلرک دخی بر دیه جکی قالیوب ناچار عسکر معلم اولدقجه اعدایه باشه چیقیله میه جفی کندو لسانلریله اقرار ایتلری اوزرینه سلطان سلیم خان حضر تلرینک اوائل جلوسنده اردوی هایوندن بوما آله بر محضر کککله بعد المصالحه بو خصوصه مبادرت وابتدا یکچیر یلردن بر مقدار نفرات تحریر ایله تعلیمه مباشرت اولنمشیکن یکچیر یلر اردوده ویردکری سوزدن ذهول و تعلیمدن نکول ایله یان چیز مکه باشلا دقلرندن لوند چفتلککنده بو ستانجی اوجاغنه الحاقاً نظام جدید عسکری ترتیب ویکرنک ویکنسق البسه مخصوصه اکسا ایله علی الدوام اصول اوروپا اوزره تعلیمارینه اقدام اولندی طویجی و خبره جی اوجاقلری دخی تحت انضباط وانتظامه الندی واسکی اوجاقلرک مصارفی باقی اولمغله اول امرده بوتأسیساتک اجراسی ایچون خزینهنک محصصات قدیمه سندن فضله اوله رق سنوی یکر می بیک کیسه واردات جدیدہ بولمغه احتیاج کورلدیکندن بر ایراد جدید خزینهنسی تشکیل ایله بعض رسومات احداث اولنهرق و بعض مقاطعات و تیمارات بو خزینهنه اله نه ره رق آزوقت ظرفنده خیلججه واردات جدیدہ بولندی .

حتی بیک ایکویوز اون ایکی سنه سنده ایراد جدید خزینه سنک وارداتی التمش بیک  
 کیسه به بالغ اولمشیدی بوا یسه اولوقتک حسابجه ایچه بر ایراد ایدی .  
 زیرا دور حمید خانی اواسطنده قطع اولنان غروش یعنی قرق پاره لق برسکه تام ایکی  
 فرانق قیمتده ایکن مؤخرأ سکه لر بر مرتبه دها مغشوش ایدلدیکندن بوا و انده بر غروش  
 بر فرانق الی طقوز سانیتم اولمغه بو عصرک اعتبارینه کوره یدی غروشه قریب اولور  
 واکرچه اولوقت قطع اولنان ایکیک شمدی ضر بخانه ده مسکوکات خالصه ایله اون  
 بر غروش یکر می درت پاره به مبیاعه اولتمقده اولدیغنه نظرأ اولوقتک بر غروشی  
 شمدی تقریبأ الی غروش اولمق لازم کلور ایسه ده چونکه بو ایکیلکده اوچ بچق  
 درهم خالص یعنی یوز عیارنده کومش اولوب اول عصر لرده خالص کوشک درهمی  
 ایسه تقریبأ اون سکنز یکر می پاره راده لرنده ایدوکندن بر ایکیک قیمت حقیقه سی  
 التمش بش ایله یتمش پاره اره سنده اوله رق قصور اون بش یا خود اون پاره سی قیمت  
 اعتباریه اولمسلیه شمدی ضر بخانه مبیاعه سنده زائل اولور بو قیمت اعتباریه ضم اولندیغنی  
 حالده اولوقتک بر غروشی بو وقتک حسابجه ینه یدی قاته قریب اولور بو حساب کوره  
 اولوقتک التمش بیک کیسه سی شمدی درت یوز اون بو قدر بیک کیسه اولوب بونکله  
 اولوقت خلیجه ایش کور یلوردی فقط مبیاعات خارجه ده بو قیمت اعتباریه ساقط  
 اولدیغندن و اروپا معاملاتنه واسطه اولان اجنبی صرافلری طرفندن پک چوق  
 سوء استعمالات وقوعبولدیغندن و اروپا مالی المقده و اروپا به آچه کوندر مکده  
 خزینه مالیه پک ضرر لرده اوغراردی حتی بیک ایکی یوز یکر می اوچ سنه سی جمادی  
 الآخره سنده محب افندی طرفندن رکاب هایونه یازیلان قائمه ده (بش بیک غروش  
 ایسی جنابلری طرفندن پولیچه اولندیغنی اشعار بیورلمش لکن ذکر اولنان بشیک  
 غروش مرسوم ایسی طرفندن آستانه ده مقیم روانه نام بر تاجر واسطه سیله  
 بو طرفده انطوان لویی نام بازرگانه بشیک فرانق اولمق اوزره پولیچه ایدلمش اولمغه  
 بزم غروشلر تمام یکر میشر پاره به کلش اولدیغنی ظاهر و بوصولته جانب میری به  
 ضرر و مرسوم طرفنه کلی فائده حاصل اولوب بش بیک غروشه نهایت الی بیک  
 فرانق پولیچه اولتمق اقتضا ایدردی ایشته زمانه بویه در مرسوم انطوانی جلب ایله  
 کیفیتی افاده ایلدی کمده بکا بشیک فرانق ویرلمسی ایچون پولیچه تمسکی کلشدر واقعا  
 پک نقصان پولیچه اولمش لکن رائج دائما بر سیاقده طورماز آستانه ده اولان شریکم  
 روانه طرفنه غروش یکر می التیشر پاره به اولمق و نقصان و زیاده به اولماق اوزره  
 اول طرفنه دخی بالذا کوره قرار ویرر لسه پولیچه کلدیکی کبی تسلیم ایدرم دیو افاده  
 ایتمکله بو کیفیتی اول طرفنه مرسوم لرله سویلشوب قرار مذکور اوزره یعنی

يکرمی التیشر پاره یه بزم غروشی قبول ایدر لرسه بو حساب ایله پولیچه اولندقده  
 جانب میری صیانت اولنمش اولور ) دیو محرر بولنمشدر . بزینه صده کله لم .  
 ایراد جدید خزینه سنک بو وجهله ایرادی چوغالدقجه نظام جدید عسکرینک دخی  
 افرادی تکثیر ایدیلوب لوند چفتلکندن بشقه اسکدارده قشله بنا وانا طولینک بعض  
 موقعنده تعلیم عسکره اعتنا اولنوب ایالتلو عسکری دخی تعلیم اولنغه باشلدی .  
 بو وجهله پیاده و سواری عسا کر معلمه کوندن کونه تکثر ایدرک عسا کر شاهانه  
 عنوانیله نامدار اولدیلر و فی الحقیقه عسکر دینمکه شایان ایدیلر و مقتضای انضباط  
 و انتظاملری اوزره فرد آفریده یه تعدی و بر کونه ادب سزلکه تصدی ایتمکسزین کرک  
 استانبول و کرک اسکدار طرفلرنده بو غازه قدر قول کز رک ضبط و ربطه باشلادقنری  
 کبی هر یرده امنیت پیدا اولغله عوام ناس دخی بونلرک محسناتی کوره رک تکثر لرینه  
 دعا ایدر اولدیلر .

واسکی کویده یکی عادت هر نقدر مقرون اصابت اولسه ده عوام ناسک اندن نفرتی  
 بو عالمک براسکی عادتی اولدیغندن اکر چه بر طاقم خیر و شری فرق ایتمز و دولت  
 و ملت غیرتی کویتمز نادان بی ادعانلر کیمی حاشا شرع جدید و کیمی کفار ه تقلید دیو  
 نظام جدید طعن و بر طاقم رسومات جدیده احداث اولنمش ایدو کندن طولای سبب  
 اولنره لعن ایدر لردی لکن حمیت کاران حقایق شناسان اسکی او جا قنر ایچون خزینة  
 بیت المالدن بیهوده یره بو قدر آچه صرف و اتلاف اولندیغنی تفکر و ایشک علت  
 غایبه سنی تذکر ایدرک نظام جدیدی استحقسان ایله حد کفایه یه بلوغلرینه نکران  
 ایدیلر حتی تعلم و آزمایش و هیئت کسوه و پوشش لرندن بشقه حین تعلیمده ترنپته  
 چالمیرینه رخصت و جوازی مین منیب افندی برساله تألیف و بونلرک وادیء  
 تشبهدن دور و آزاده محذور اولدیغنی بیان و تعریف ایلمشیدی نه چاره که تفضل  
 بانک بناسی نه ایچون اولدیغنی بیلمیوب و تشبه ایله مشابهت کله لرینک بیننده کی فرقی  
 اکلا یه میوبده (من تشبه بقوم فهو منهم) حدیث شریفنک حکمنی فهم و ادراک ایده میان  
 بر طاقم جهلاء عالم نما طائفه عنادیه کبی سوز لرنده اصرار ایله دین و دولتک سلامتی  
 ایچون مرتب و مخصوص و تام ماصدق (صفا کانهم بنیان مرصوص) اولان جنود  
 اسلامییه یی تحقیر و تکفیره جرات ایدر لر ایدی شانی زاده نارینخنده دخی (و اعدوا لهم  
 ما استطعتم من قوة) آیت کریمه سی (من کل ما یستقوی به فی الحرب) ایله تفسیر اولنغله  
 غزات موحدینه منفعت ضمننده تشبه و مقابله بلمثل عین عبادت ایکن (من تشبه بقوم  
 فهو منهم) عبارة لطیفه سی اغراض باطله ضمننده نشر اولنهرق زباز دة صغار و کبار  
 اولمش ایدو کی مصر حدر و اول وقت برچوق دولت کوسکونلری دخی نظام

جدید سایه سنده اقبال و اعتبار بولان رجالی چکه میوب مجرد انلره حسد و عداوت لرندن ناشی نظام جدید علیهنده بولنه رق یکینچری غیرتی کورد لر دی .

وعسا کر معلمه حد مصممه بالغ اولدوقده اسکی او جاقلر اعتباردن دوشه رک بر طاقم مفتخورانک بغیر حق جانب بیت المالدن آلدقلمی مبالغ کلیه ویرلمز اولور و او جاقلر الغا اولور دیو تخصیصات قدیمه عسکر یه بی کندولرینه ماکل ایتمش اولان یکینچری کروهی فکر و تلاشه دوشه رک عسا کر معلمه اولوجهله تکثر ایتدیکجه انلرک رقابت و خصوصتی ترقی بولمقده وهر نقدر کندولرینه او جاقلرک دولت علیه به بونجه خدمتلمی سبقت ایتمش بونلرک رفعی خیال و خاطر ه کلور شی دکدر مرهم انجق بر طرفدن معلم اولان نظام جدید عسکر ی و بر طرفدن شجاعتلمی مسلم اولان عتیق او جاقلر دلاور لری ایله دشمندن اخذ انتقامدر دیو رفع وازاله شبهه و وحشتلرینه سعی اولندیسه ده مفید اولمیوب کین و عداوتلمی کیندیکجه متزاید اولمقده ایدی حتی یکینچریلر دن برینه بر کون لطیفه اوله رق نظام جدید اولور میسکز دینلر کده حاشا مسقو اولورم نظام جدید اولمام دیدیکی عاصم تاریخنده مندر جدر .

رجال و کبار و مأمورین سائره ایچنده دخی بر چوق یکینچری غیر تکشلمی اولدیغندن استانبولده افکار عمومی ره رأی و فکر جه یکدیگره مابین ایکی قسمه انقسام ایله هر خصوصه انواع مشکلاتی استلزام ایدر اولدی .

ایشک بو پرسه یه کلسنه برنجی سبب بو ایدی که نظام جدیدک وضع اساسنده بر کوچک سقامت اولوب کیندیکجه بیودی (فساد اولسه اساسنده بنانک پایدار اولماز \* نیجه مسهار همت صرف اولنسه استوار اولماز) فحواستجه نظام جدید اصولی افکار عمومی ده یرلشه مدی واسکی او جاقلر عسکر ی نظام جدیده بر وجهله ایصنه مدقلمی کبی افکار عتیقه اصحابی کینن مأمورین دخی افکار جدیده اصحابیله بر درلو برلشه مدی . تفصیل حال بومنوال اوزره درکه نظام جدیدک اجراسنه تثبیت اولنه جنفی ائساده رجال و کبارک لوائج خاطر لرینی تحریر آ بیان ایتلمی امر اولمغله هر بری بر لایحه تقدیم ایتمش ایدی . حالبوکه بر یسننده ترتیبی مصمم اولان عسا کر معلمه یه دائر معلومات صحیحه یوق ایدی . و ایچلر نده عسکر لک نه ایدوکنی و سفر نه درلو اسبابه موقوف ایدوکنی بیلمیانلر چوق ایدی .

بناءً علیه بولایحه لرده بادی خنده واستهزا اوله جق غریب رأی و مطالعه لر وار ایدی لکن آنلر مأمور اولدقلمی جهته لایحه تقدیمنه مجبور ووقوفسز لقلری حسبیله معذور ایدیلر اولوقت قرنا و مقربان پادشاهی اولان نورسیدکان ایسه احوال عالمندن بی خبر و تجربه سز چولق چو جق مقوله سی بر آلا ی سبک مغز و سبک سرنو هوسان اوله رق

شهریار باوقاری کولدیروب اکلندرمک ایچون عرض اولنان آرای سقیمه بی لسانلرینه طولایوب بولایچه لری ملعبه صیانه دوندردیلبر وسیاق استهزاده هرکسک درجه استعدادی لایچه سندن معلوم وکشینک رتبه ادراکی زاده طبعندن مجزوم اولور ایتمش شایعه لرینی افواه ناسه دوشوروب بونجه دهات زمانه بی کوستردیلبر ودولتک اجراسنه چالش دینی نظام جدید علیه نه دوشوردیلر .

ایشته بو وجهه رجال وکباردن نیچه لری کوچوب بر طرفه چکلدیلبر بوصره ده ابن وقت اولان بعض ذوات دخی منافع شخصیله رینه حصر نظر ایدرک مماشات ومداهنه یوللرینه دوکلدیلبر .

صکره لری اومقوله نورسیدکانک دوری کچوب اندرون هایونده سرکاتبی احمد افندی کبی دهات احباب درایت وفطانتدن ذاتلر یتشددی لکن آنلر دخی وکلای عصر ایله برلکده جلب وجمع امواله حصر افکار ایلدیلبر واستانبولجه کورلمدک طرز وصورته بیوک ومزین خانه وساحلخانه لرنشاسیله زیاده سفاهت واحتمشامانه دوشدیلبر وباب عالی رجالی کبی بعدالعصر اولرینه کلوب صباحلین اندرون هایونه کیدر وباب عالی به مخصوص اولان ایشلری کندو اولرنده اجرا ایدر اولدیلبر وکیچه لری مقاطعات ملتزم لری ومملکتینک قیوکتخدالری کبی یدرشوت اولان کسان ویاخود اسافلدن برطاقم کسه لسان ایله هم بزم مصاحبت وکاه خانه لرنده وکاه قایلرله مهتابه چیقوب دکز اوزرنده بازنده وخواننده وسازنده لر ایله سیر آهنگ انجمن عیش وعشرت اولوب عالم آب کیفیله اسرار سلطنتی دخی اغیاره فاش ایدیورلردی سلطان سلیم خان حضرتلری ایسه قرناسنه پک زیاده امنیت واعتماد ایدرک آنلردن برشی کتم ایتمز اولدیغندن دولتک روحی مثابه سنده اولان سرآری مکتوم طوتیله میوب مانند مثل سائر افواه ناسده دائر اولوب کیدردی .

حتی بردفعه طوب قیو سرای هایونده غایت محرمانه بر مجلس خاص انخاص اولمشیدی که قائممقام پاشا بیله داخل دکل ایدی آره سی چوق کچمکسزین مجلسک صورت مذاکره وقراری عینیه پارسده مطبوع برفرانسز غزنه سنده کوریلهرک ارکان دولت پشت بدیوار حیرت اولمشیدی اشبو عظمای رجال اندرونه باقه ررق سائر خدام سرای هایون دخی لابلایانه طشره چیقوب کززلر ویرون ایله اختلاط ایدرلر ایدی ناس ایسه اسیرعادت وتعامل اولدیغندن بومقوله خلاف عاده وضع وطورلر انظار عمومیه ده پک چرکین کورینوردی حتی غلمان خاصه دن بعضیلری قهوه خانه وبازیجه کاه مثللو مجمع ناس اولان محللرده کورلدکجه خلق بوقدر قیدسزلق ندر وبومرتبه حیتسزک نه دیمکدر دیو سویلنوردی .

سلطان سلیم خان ذاتاً تنزه و اکنجہیہ مائل و انس و الفتہ شیفتہ دل اولدینی خالدہ قرناسیدہ آنی اشغال ایچون دائماً سیر صحرا و ذوق و صفایہ سوق ایدر لردی ناس دخی بودرلو شیلرہ میال اولدیغندن استانبولده سیر و صفا داعیہ لری چوغالدی و بوغاز ایچی سیرجی قایقرلیہ طولدی کیجہ لری مہتاب اکنجہ لری سلطان احمد ثالث زمانندہ کی چراغان صحبتلرینہ فائق اولدی و شعر و انشایہ و فن موسیقی بہ رغبت ہایونلری اولدیغندن ظرفا و شعر میدان آلدی و فن موسیقی پک زیادہ رواج بولدی .

الحاصل روسیہ سفری غائبہ سی بر طرف اولدقدن صکرہ چند سال عصر سلطنتلری سلطان سلیم ثانی دورینہ بر مثال و استانبول و کاغد خانہ و بوغاز ایچی و چاملیجہ مسیرہ لری سیر جیلر ایہہ مالامال اولوب اصحاب ذوق و تماشاچی دغدغہ کدر و بلاشابہ خوف و خطر کوندوزین بو مثللو جای فرحفرالردہ کزر و یاز کیجہ لری قایقرلہ بنوب خوانندہ و سازندہ لر ایہہ مہتاب سیرینہ کیدر و قیش کیجہ لرنده حلوا صحبتلریہ طاتلو طاتلو محبت ایدر ایدیلر ہیچ بریرہ ضابطان طرفدن سیر جیلرک اکنجہ سنہ کدر ویرہ جک و ذوق و صفا سنہ خلل کتورہ جک بر معاملہ ایدلزدی لکن بر طرفدن بر نعرہ مستانہ و عربدہ بی ادبانہ دخی ایشیدلزدی طوغریسی اکنجہ و ذوق و صفا جہ استانبولک پک کوزل بر عالمی و بوغاز ایچینک علی الخصوص مہتاب کیجہ لرینک اک پارلاق بر دور و دمی ایدی طائفہ رندان شویہ طورسون فرقه ریافروشان بیلہ بودورک نشئسنہ طیانہ میوب نیجہ الی اوپولہ جک مشایخ و الاجناب مستغرق نشئہ عالم آب و نیجہ صوفی صافی سیرت کچینان ذوات مقام بیر مغاندہ مراقب دورہ می ناب اولمشیدی .

وقتا کہ حادثہ ام دنیا مشیمہ قدر و قضادن رونما اولدی بتون احوال عالم دکشدی و سانکہ اول ایام صفانک ہنگام خماری ایرشدی و روم ایلی و اناطولی و عربستان اختلافاتی و مسائل اجنبیہ مشکلاتی متعاقب و صفا جفایہ و عشرت عسرتہ و سسور شورہ و سرور شرورہ مبدل و منقلب اولہرق بادہ اصلا یادہ گلز اولدی .

اتابکان سلطنت بو حالده دخی اکمال نظامات و اجرائی اصلاحاتدن کیرو طورمدیلر و مشکلاتدن اور کوبدہ یأس و ففور کتورمدیلر لکن نظام جدید ایشی جلب و جمع اموالہ و سیایہ ایدوب بر طرفدن کندولری اموال لآخصی ادخار و بر طرفدن کندولرینک لواحق و متعلقاتی تکثیر ثروت و یسار ایتدیلر و پک چوق اسرافات و احتشاماتہ دوشدیلر حتی ابراہیم کتخدا بر کون برینہ برآت و یروب طاولدہ (التمش آتم قالدی بوندن صکرہ پدرم مزاردن چیقوبدہ برآت ایستسہ ویرم) دیدیکی و بہر ماہ مطبخی مصارفہ الی بیک غروش کفایت ایتدیکی و سرکاتی ایہہ



والده كمتخدا سنك ثروت و غنایری ایسه حد احصا و تخمیندن خارج ایدوکی تاریخ عاصمه مذکوردر حالبوکه بالاده بیان اولندیغی اوزره اولوقك الی بیک غروشی بو عصرک حسابیه اوچ یوز قرق بوقدر بیک غروش صاخ اچقه دیمک اولور فلک کیسه سندن بوقدر مطبخ مصرفی ایتک دخی طوغریسی بیوک سفاهتدر .

ایشته نظام جدیدی ترویج ایدن رجال دولتک حالی بو وجهله اولوب کندولری جلب وادخار اموال ایله مشغول اولدقلری کبی هر برینک اتباع و متعلقاتی دخی علی الدوام کسب ثروت و غنایه اقدام ایتمکه اولملرینه نظراً نظام جدید مصلحتی کویا خلقدن برچوقق پارلر طوبلایوبده متنفذان زمانه بول بول صرف ایله سفاهت ایتک ایچون ایش کبی برصورتیه کیردی خلقک مألوف اولمدیغی نظامات جدیده نك اجراسنده ایسه فداکارانه حرکت ایتک و منافع ذاتیهی ترک ایله سائر حسن مثال کوسترمک لازم کلوب یوخسه سرکارده بولنانلر بر طرفدن کندولری و بر طرفدن خدمه لری بوجه بالا احتشام و سفاهته طالدقلری حالده او جاقلو دخی ماکل ایدنمش اولدقلری علوفه و طیارانک اللرندن کینامسی ایچون نظام جدید علمهنده بولملری امر طبیعی ایدی و ناصح غیر متصحک نصح و پندی مؤثر اولمدیغی کبی اومقوله سرکارانک دخی نظام جدیدک ترویجی حقنده سوزلری مشر اولیوب هر نه دیسه لر غرضه محمول اوله جنی بدیهی ایدی .

بناءً علیه نظام جدید طرفداری اولنلرک دخی چوغی اتا بکان سلطنت علمهنه دوندی و مسکوکات معشوشه دن و رسومات محدثه دن طولای ارزاق و اشیانک بهالری زیاده لشدی بر طرفدن دخی سفاهت و احتشاماتک تکثری جهته هر کسک مصرفی ارتدی و هر کس امر تعیشده دوچار مضایقه اولدی خلقک بو وجهله اضطرابی و کلاویه محرمانه اوله رق افاده اولندجه اصلا اهمیت و یرمیوب کیمی تمام خلقی اشغاله بوندن اعلا و سیله اولماز تعیشلری غائله سنه دوشسونلرده دولت امورینه قارشمسونلر دیرلر و کیمی بوراسی اغنیا بلده سیدر بورایه فقرا قسمی یاقشماز و دولتمندان آره سنده مفلس کروهی صیغشماز دیو جواب و یررلر ایدی حالبوکه اوتهدنبرو حکومت سنیه استانبولک اداره سنی درعهده ایده کدیکنندن بردن بره بویوله کیدلمسی جمله نك کوچنه کیده یوردی و اتا بکان سلطنتک ثروت و احتشامی خلقک دیکن کبی کوزلرینه باتیوردی و خدام سرای هایونک بیله چوغی متنفذان قرنانک وضع و طورینی چکه میوب سائر ناس ایله برابر انلرک علمهنده بولنه رق زوال اقبال و اعتبارلرینی تمنی ایده یوردی .

طشره لرده دخی مجدداً احداث اولنان و یرکو و رسومات ذاتا اهالییه آغر کلدکن

بشقه صورت استیفا سنده ظهوره کلان سوء استعمالات مستلزم انواع تعدیات اولمغه  
طشره اها لیسیده بو حالدن شاکی ایدی لکن شکایتلری مفید ومؤثر اولمازدی  
زیرا نظام جدیده متفرع اولان شکایتلره قطعا قولاق اصلمازدی .

قالدیکه وکلادن هر بری اعظم قرنادن برینه مربوط و مستند وجهه سی بر بریله  
متشک و متحد اوله رق اندرون و بیرونی احاطه و استیلا ایلمش اولدقلرندن انلرک  
علم و خبری اولمدقجه طرف سلطنته بر شیدک اخطار و افاده سی قابل اوله ماز  
وانلرک رأی و معرفتی اولمدقجه برایش حصول بوله ماز ایدی حتی صدر اعظم  
بو ایکی صنف رجالک اره سنده عمل مانده و کمنام اولوب عزللرندن خوف ایدرک  
برقوری عنوان صدارتله اکتفا ایدرلر و فقط ایچ یوزندن انلر دخی سائر خلق ایله  
برابر بو انا بکان سلطنت حقدنه کین کودرلر ایدی .

بو جهته سلطان سلیم خان حضر تلی احوال عالمه دائر بشقه طرفدن معلومات  
صیححه اله میوب لدی الایجاب قرناسدن سؤال ایلردی انلر دخی وادیء مدهانه ده  
اطلاق عنان و زمان سلطنتی و جوه عدیده ایله ازمئه سالفهیه ترجیح و ( حسب الاقتضا  
اهالی اوزرنده بعض تکالیف وار ایسه ده عن قریب نظام جدید ماده سی اکمال ایله  
دولته قوت کلور خلقده راحت بولور ) دیو حسن عاقبتی تلمیح ایله توشیح بیان  
ایدرلردی و مزاج هایونلری پک نازک اولمغه آرشیدن چوق متأثر اولدیغنه مبنی  
بر طرفدن دخی والده سلطان حضر تلی ضمیر منیر پادشاهی متکدر اولسون دیو  
مواد مشکله ظهورنده بین الوکلا ایشه بر صورت ویریلوبده طرف شاهانه یه افاده ایله  
ذهن هایونک اشغال اولتماسی خصوصی کرک صدر اعظم لره و کرک سائر لره تنبیه  
و توصیه ایدردی ایشلر ایسه کوندن کونه صار په صار مقدمه و خلاق و کلا حقدنه  
اولان عداوتلری آرتقده و عاقبت اندیش اولان ظر فادخی انجام کاری در پیش ایدرک .  
شاه واقف کر کدر احواله \* و کلا یه فالور سه وای حاله

بیتنی تکرار ایتمکده ایدی .

اسباب مشروعه دن طولانی اعلا و ادنا انا بکان سلطنتدن متنفر و بالواسطه طرف  
سلطنته دخی مغبر الخاطر اولوب مع مافیه پادشاهمزدن خشنودز لکن حسن قرینه  
موفق اوله مدی دیو تأسف ایدرلردی .

و بر ارا لقی سلطان سلیم مراق کتورهش یوق کندویه مس جن مقوله سی بر حالت  
ردیه عارض اوله رق دماغه خلل کلوب پریشان سوزلر سویلیورمش دیو بر شایعه  
نشر اولندی و اندرون و بیرون طرفندن تلاش کوستر یله رک و طرف بطرف  
خاصکیلر کز دیر یله رک اطبا و عزائمخوانانه مراجعت و جسمانی و روحانی معالجات

ومداواته مسارعت قلندی عاصم افندی دیرکه بونک اصلی اولیوب ذات شاهانه  
 حجتجه پک ابي حالده وعقل وشعوری کالده ایدی فقط بعض دلائل عقلیه وامارات  
 خارجیه ایله جهانک شوریده حال وشرکای دولتک تسلط واستیلا لری متجاوز  
 حد واعتدال اولدیغنی تفرس ایتملر ایله مراق ایدرک بر کون آکسزین باب عالی یه  
 بر قطعه خط هایون اصدار وارسال ومضموننده وکلای دولتک عباد وبلاد اوزره  
 تسلط وتعديلینی مجملأً تعداد وانلرک بو کونه اوضاع واطوارینه رضای هایونلری  
 اولدیغنی ایراد ایله هر کسک وبالی بویننه دیو واقع حالک کندویه عرض اولمسنی  
 استعجال بیورمشیدی صدر اعظم بو خط هایونی میدانه چیقاره میوب همان خواص  
 وکلا ایله در میان ایدرک کویا جمله حضورنده قرائت ایله اعلان واشاعت اولندی دیو  
 جواب یازلدی لکن شاید بوماده شیوعبولور دیو ایشی کورلدی یه کتوروبده  
 اونوتدیر مق ایچون اول پادشاه عظیم الشانه اختلال دماغ ایله افترا ایتدیلر (العلم عندالله)  
 عاصم افندی کب دیدیکی کبی خط هایون حوادثی الفعا ایچون وکلانک پادشاهه افترا  
 ایتملری عقلاً مستبعددر فقط هر نصلسه سرای هایوننده بولنان بر طاقم تربیه سز  
 خلقک زوزکلکی آزارندن اوله رق او ایله مستعد اختلال اولان وقتلرده بودرلو  
 اراجیفک بین الناس اشاعه سی پک یولسز و او یغونسز بر کیفیت اولمشدر .

یکچیری کروهی عسا کر معلمه نک کوندن کونه تکثرندن ناشی شبهه واندیشه یه  
 دوشوب عیجا دولت علیه نوقت اسکی او جاقلری سوندر مکة قالقیشه جق دیو مضطرب  
 ومستشعر ایکن افکار عمومیه نک اعظم ارکان سلطنت حقدنه منقلب ومتغیر اولدیغنی  
 کوروب متسلی ومستشعر وموقتاً لیمانه مش دکز کبی سکوت وسکونت اوزره  
 طوروب بر بوره لی هوانک ظهورینه مترقب ومتنظر اولمقده ایدیلر .

وبرده نظامات جدیده مناسبتیه اوروپادن معلم ومهندس جلبی لازم وعسکرک  
 اوروپا اصولی اوزره تعلیمی امر متحتم اولدیغنی حالده سلطان سلیم خان حضر تلی  
 ذاتاً تحف وطرائف ومخترعاته راغب اولدیغندن استانبولده لوازم مدنیتدن اولان  
 بر جوق اوروپا کاری بشیلر ونیجه آلافرانغه ابشار ظهور ایتدی عادات واصولک  
 تبدیلی ذاتاً انسانه کوچ کلوب اتابکان سلطنت ونوهوسان مأمورین دولت ایسه حد  
 معرفتی تجاوز ایدرک بتون بتون بر آلافرانغه یوله دوکلدیلر ولزوملی لزومسز  
 هر خصوصه اوروپا اصولنه توفیق حرکت ایدر اولدیلر بو افراطلرندن عامه  
 اورکوب انلری تفسیق وتکفیره ابتدار ایتدیلر و (افراط تفریطی دعوت ایدر)  
 قاعده سنجه بتون بتون تفریط یولنی طوتدیلر و (الحکمة ضالة المؤمن اخذها ایما  
 وجدها) مضموننی انکار ایدرجه سنه بر طاقم مخترعات مستحسنه دن بیله مجرد  
 آلافرانغه در دیو نفرت ایدرک طریق تعصبک تا اوته اوجنه کیتدیلر .

ایشته بوسرده استانبولده برده الحاد و زندقه افکاری ظهور ایلدی . شویله که :  
 سلطان سام خان حضرت تری جهانگیرک سوداسنده اولمغله قرناسی دخی اکا مداهنه  
 ایچون کیمی قائمی منظومه سندن و کیمی جفر کیر شیخ اکبردن و کیمی بعض اهل  
 کشف و کرامتدن معنار نقل و اتیان ایله مجدد دولت اولدیغنی وجه تحقیق اوزره  
 حضور هایونلرنده درمیان ایدرلردی بو ملابسه ایله متصوفه کروهندن کچینان  
 وارنر شویله یادی بویله یاهه جق کبی یلان یا ککش سوزلر ایله خلقتک جینندن پاره  
 جر ایدن برطاق ماجدلر دخی اندرون هایونه تردد ایدوب اولوقتک اکثر رجالی  
 ایسه جاهل و علی الخصوص اندرون هایون طاقمی جهالتلیله برابر پیرونده جاری  
 اولان افکار عمومیه دن غافل اولدقلری حالد نظر اهل شرعده کفریات صرفه دن  
 معدود اولان برطاق کلمات صوفیه استعمالنه باشلادیلر و اگر چه یکچیری پیرداشلری  
 اولان بکتاشی دربدرلرینک روزمره ایتدکلری هذیانلر انلرک تفوهاتندن دهه  
 اشع ایسه ده انلرک بومقوله تفوهاتی بتون ادیانی انکار ایدن فرانسزلره تقلید  
 و تبعیت ائناسنده ظهور ایتمکله نظر دقتی جلب ایدرک خلق انلرک بویله ظاهر شرعه  
 اویمان اطوار و کفتارلرندن اورکدی علی الخصوص کتب فرعیانده مصرح اولان  
 مسائلدن بشقه شی مطالعه ایتیمان علما گروهی رجال اندرون و بیرون حقدنه عظیم  
 شهناته دوشدی .

عاصم تاریخده بیان اولدیغنه کوره سلطان سلیمک جهانگیرک املنه دوشمنسنگ  
 سبب اصلیمی بو ایش که اوائل دور سلیم خانیده منجم ثانی اولان یعقوب افندی به  
 سلطان عبدالحمید خان حضرت تری طرفندن ویرلش برمجده ده خلفای راشدین ایله  
 سلاطین عثمانیه نك زایجه طالع لری مضبوط و محرر اولوب سلطان سلیم ثالث حضرت تری  
 امام علی کرم الله وجهه حضرت تریله هم طالع بولمغله اکثر ایام سلطنتلری شورش  
 و اختلال اوزره کذار ایدرک انجام کار رحیق حیدریدن نشئه دار اولوق احتمال غالبی  
 ویکرمی ایکی تاریخنده طالع شوکتلری سرزده ذنب قطوع اولوق سریره سنی یعقوب  
 افندی شرط کتمان ایله محرمانه اوله رق بیان ایتشیدی نهایت ایش آنک دیدیکی کبی  
 اولدی دیو عاصم افندی غرابدن اولوق اوزره حکایه ایتدکن صکره ینه غریبه  
 اولوق اوزره یعقوب افندی دن روایت ایدوب دیرکه شیخ اکبر قدس سره حضرت تری نیک  
 شجره کبراسنده سلطان مصطفای ثالث حضرت تری (نجم السلاطین) و اوغلی سلیم  
 خان ثالث حضرت تری (زین النجم) عنوانیله محرر اولوب سلطان مصطفی فن نجومه  
 اعتبار واعتنا و کندو دخی انده مهارت کلیه پیدا ایلمشیدی و معارف جزئیه و علوم  
 غریبه خفیه اربابنه اعتبار و التفات ایدرلردی . بناءً علیه اکثر اعمال و اطوارلرینی

اوضاع کواکبه تطبیق و مناظم امور ملکیه لرینی معالم حرکات فلکیه اوزره تنظیم  
 و تنسیق ایلمک دأب و عادت لری اولمغله سلطان سلیمک رحم مادره دوشدیکیی ساعتی  
 ضبط ایدوب امارهٔ حمل متعین اولدوقده منجم باشی به ساعت مضبوطهٔ سقوط نطفه یی  
 بیان و اول آندن زایجه نصبی فرمان ایتمکله اودخی نصبهٔ مطلوبه یی تصویر و ادله  
 و مدلولاتی بسط و تحریر ایلدی انقضای مدت حمل ایله علامت و ولادت بدیدار  
 اولدوقده وضع حمل ایچون یوم معهودده بر دم خجسته اختیار و سابق الذکر سقوط  
 نطفه طالعنه متفرع اول دقیقهٔ مختاره ده تولد ایدن شهزاده نک بر مقتضای اوضاع  
 فلکیه قابلیت فطریه انضمامیله جهانگیر عظیم النظیر اوله جغنی اشعار ایلدیکندن ساحهٔ  
 خدمته اولان قوایل و پیشکاران بر تقرر بیله وضع حملی اول دقیقه به ایصال ایتمکله  
 کر چه سعی فراوان ایدوب لکن (رأی و تدبیر ایله دونمز امر تقدیر صمد \* سیل  
 کوه انداز اولورمی خار و خاشاک ایله سد) جریانی اوزره لحظهٔ سیره تأخیرک  
 امکانی اولوب ضروری سلطان سلیم تولد ایتدیکیی کبی ساعت بدست قبو اوکنده  
 طوران حکیم باشی افندی پاره غیله ساعتک میانی چوروب وقت مختاره کتور مش  
 بودقیقه به واقف اولنر واقع حالی هپ کتم و اخفا ایتملرله سلطان مصطفی اوغلی  
 سلطان سلیمک ولادتی اول وقت مختاره وقوع بولدی ظنیه جهان مسرور  
 و شادان اولوب حتی کاه بیگاه اخص قرنايه شهزادهٔ مشارالیهک اسکندر کبی جهانگیر  
 اوله جغنی تبشیر ایدردی . مرض موتنده بیله بوقضیه یی حضاره تکرار ایدرک تخت  
 سلطنتک سلطان عبدالحمیددن انصرافیله سلیم خانه ولی عهد شیوه سیله توصیه ایتدکاری  
 بونکته به مبنی ایدی . سلطان سلیم بیویوب حد تمیزه واصل اولدوقده شیوهٔ مزبور  
 پدرلری لسانندن کوشزدی اوله رق پدرلری کبی اول امنیه به دلبند قرار اولمغله  
 نظام جدید خصوصنده اصرار لرینه بر طرفدن دخی بوماده تازیانهٔ شوق اولدی .  
 و دور عبدالحمید خانیده قفص نشین انزوا ایکن کوزی باغلو شاهین کبی جو هوای  
 اختراعاته پروازه اوزه نور و خیره طرزنده مجوف قورشون مهر لری دوکک کبی  
 اختراعات و سلاطین سالفه سک لری جمع و معاینه ایله کندو سکه سنک رسمی انتخاب  
 ایتمک کبی تصورات ایله اکنور و دولت علیه به بورخاوت ندن اقتضا ایده یور کیتدکجه  
 رونق سلطنت عثمانی کیده یور بن شمدی سلطنتده اولسم شوبله یباردم بوبله بچردم  
 دیو سولنور ایدی . حالبوکه عبدالحمید خان حضر تلرینک وفاتی اوزرینه جالس  
 تخت سلطنت اولدوقده بحسب ضروره بعض واردات هواییه بولمق ایچون ابتدا  
 سکه یی بر مرتبه ده مغشوش ایتمکله مجبور اولدی و لسان حال زمانه دن (هل یصاح  
 العطار ما افسده الدهر) جوانی آلدی .

مع مافیه ذهنی جهانگیرك سوداسی صارمش اولدیغندن رونما اولان مشکلاته قارشو طورهرق همان نظامات جدیدیه همت ایدردی و آز وقت ظرفنده خیلی ایشلر کوردی و پك كوزل شیر وجوده کتوردی كرك استانبولده و كرك اناطولیده طوبجی و خمبره جی و لغمبجی و پیاده و سواری اوله رق ترتیب ایتدیکی عساكر معامله نك مقدار ی پكده صحت اوزره معلوم دكل ایسه ده باجمله عساكر منتظمه نك الی التمش بیکی متجاوز اولدیغی بعض تواریخنده مندرجدر هله قاضی پاشانك ادرنه یه کتیمك اوزره استانبوله کلدیکی وقت كرك انك معینه و كرك اسكدار ولوند چقلکی قشاه لرنده موجود اولان عساكر معامله نك مقدار اوتوز بیكبالغ ایدی . لکن رفق و ملائمت طبع شاهانه لری افراط اوزره اولدیغندن اولوقت دولتک حالی اسلحه استعمال ایده مدیکی حالد کوزل سلاحله اوطنی تزیین ایدن نازك چلبیاریک حالتیه بکزرردی . بناءً علیه بوعسکرک حسن اعمالنه موفق اوله میوب ادرنه یه عازم اولان قاضی پاشانی چورلیدن کبرو چوریدی بوجهته نظام جدید عسکرینک انظار عمومیه ده قدری قالمیوب متغلبه کر وهی ایسه فوق العاده شماردی و ادرنه سفرینک بوصورتی کسب ایتسی نظام جدید ایشلرینی بتون بتون مشکلاته دوشوردی .

حلم و شجاعت کبی اخلاق فاضله بر کیفیت متوسطه اولوب افراط و تقریط جهتلری انسانه و علی الخصوص حکمدارانه کوره تقیصه و مستازم محاذیر عظیمه اولدیغی کتب حکمییه ده مسطوردر سلطان سلیم ایسه غایت حلیم و سلیم مروئی چوق و رحم و شفقتنه نهایت یوق دریادل و کریم الخصال و بالطبع عفو و صفحه مائل و رقت قلبی درجه افراطه واصل اولوب ایشته بویه فوق العاده اطوار ملائمانه و نازکانه سی درلو محاذیری موجب اولدی .

اولاً افکارنده ثباتی اوله میوب صوکی هر طرفه آقار و قوه دافعه سی اولیوب قرناسی نه دیرسه یلار و متناقض رجالیته مساعده ایدر اولدیغندن تردد افکار و تلون مزاج و اطوار اینه شهرت بولدی .

ثانیاً کیمسه بی ایجتیمک استمز و عزلی لازم کلناری محزون و منکسر الخاطر اولورلر دیو قولایقله عزل ایده مز اولدیغندن کسنده جزا و سیاست قورقوسی قالمدی . مجازات و مکافات ایسه ترازوی اداره نك ایکی کفه سی حکمنده اولوب بری ناقص اولسه امور دولتک موازنه سنه خلل کلک امر طبعییدر .

ثالثاً امن و قرناسی بوجه مشروح دولتی استیلا ایدرجه سنه یوزه چیقوب مستی اقبال اینه نه یابه جقلرینی شاشردیلر و سفاهت و احتشاماتی حددن آشوروب طاشردیلر

و بوجهته افکار عمومی بی حکومت سنیه علیهنه دوشور دیلر واکر چه ولی نعمتارینک فرط حلم و نزا کتته باقوب و کندولری تعقل و انصاف ایدوبده غایت حکیمانہ و معتدلانہ حرکت ایتملری لازم ایدی لکن انسان بین الخوف و الرجاء طوتملق لازم کلوب کلیاً قورقو بر طرف اولدینی کبی حرکتی موازنه و اعتدال اوزره اوله مز و کشتی مست می اقبال ایکن اکثریا ایاغنی دنک آلهماز .

( للمورخ الفقیر )

( بزم میده قصوره باقه صادق \* عالم آب بشقه علمدر )

( می اقبالی هضم ایدن اما \* مشر بمجه صحیح آدمدر )

رابعاً یکچریلر دولت و ملتک سلامتیی چون ترتیب اولنان نظام جدید عسکرینی تحقیر و تکفیره جرأت ایده کلدگری حالده حکومتدن اصلاً اثر عنف و شدت کور مدکلری جهته کیتدکجه کم الماز اولدیلر .

خامساً شهزاده سلطان مصطفی سلطنته غایت حر یص اولوب طرفدارانی دخی سلطان سلیم رجالتکیرینه کچمک آرزوسنده بولدقلرندن دائماً برفته احداثه چالیشوب حتی طیار پاشانک عصیاننه سبب اولدقلری کرک شهزاده مشار الیهک و کرک طرفدارانک اله کچن کاغدلریله ثابت اولمشیکن سلطان سلیم خان حضر تلی کندوسنه اظهار عنف و شدت دکل طرفدارانی بیله مسؤل و معاتب ایتیه رک اختیار سکوت ایله کندو خیر خواهان سلطنتلرین متحیر و مبهوت ایتشیدی .

کروه مخالفین ایسه بر مرتبه ده جاسار تله رک و صدر اعظم اسماعیل پاشا و موالی و رجالدن بر طاقم دولت کوسکونلری ایله اتفاق ایدرک بر طرفدن استابولده کی یکچریلری و بر طرفدن روم ایلی اعیانلرینی تحریک ایله ادرنه وقعه سنه سبب اولدیلر و بو کره دخی بر جزا کور مدکلرندن بر اوچنچی فتنه احداثه حاضر لانه میدان بولدیلر و قاضی پاشا اردوسی چورلیدن کورو دوندیکی کبی حکومت سنیه دخی بروقتدنبرو سالک اولدینی مسلک تر قیدن کورو دونمش اولدی و بور جعت قهقریه حسینیه افکار تعصیبه احجابندن بر چوق کیمسه لر میدان الدی و او صره ده نظام جدیدک عدو عوام پسندی اولان طوپال عطاء الله افندی دخی مقام مشیخته کلدی ( اذا اراد الله شیئاً هیأ اسبابه ) .

ایشته حال بویله بر منوال فتنه و اختلال اوزره جاری ایکن فرانسیز ایلچیسینی سبستیانی دخی دولت علیهنی بر غائله یه اوغرادوبده فرانسه دن استمداده مجبور ایتک و بو وسیله ایله ممالک اسلامییه و بلکه استانبوله عسکر ادخال ایده بیلمک اوزره کندو یساحیلرینه متعلق اورته متعینلرینه اره صره عطایا و هدایا و یروب و محرمانه صحبت کیریشوب

(سزك وكلا كرك نظام جديد وضعندن غرضلری یكیچری او جانغی الغایله بو قدر مواجی كندولرینه تخصیص ایتدیرمكدر ایمراطورمن بوندن خردار اولوب سزك حالكزه تأسف ایده یور و دولت علیه نك اصول قدیمه سنه خلل كتورلما می املنده اولمغله حالا عسکرمن حدود اوزرنده اولوب لدی الاقتضا همان امداد ایچون استانبوله جلب اولنه جنی درکاردر) یولو سوزلره او جاقلوبه قیل ویرمگده ایدی . و بر منوال مشروح انکلیز دونماسنك استانبوله ورونده بوکیچرلر بورایه رجال دولتک دعوتیله کلدی دیو یکیچری اغاسی پهلوان اغای الدادوب اینانیدردی انکلیز و روسیه طرفولرینک بر طاقم القاتی دخی یکیچریلرک برقاندها معدلرینی بولانیدردی اول ائنده ایسه یکیچریلردن بر خیل دال قلیج یازملق مناسبیله خلیجه یوزه چقمش ایدی . و پهلوان اغا خالی الذهن و ساده دل بر آدم اولدیغندن دشمن بزم ایچمزده ایش دیو زقاقلرده علناً وکلای دولتی ذم و قلدح ایدوب کزردی بونک اوزرینه کندوسنه مجوهر خنچر و عطا یا وهدایا احسان و اعطا بیوریلهرق بر پارچه آغزی قیادلدی . و سردار اکرم ایله روم ایلییه چیقارلدی ایسه ده اردوی هایونده دخی ارکان سلطتی لسانندن بر اقیوب انلره تعریض یولنده دشمن بزم ایچمزده در کبی سوزلر سویلردی .

استانبوله قالان اصحاب فساد گروهی دخی اتابکان سلطنتک اردوی هایون ایله کیتیموبده در سعادتده قالدقارینی وسیله اتخاذا ایله کیمی بو سفر مواضعه اولوب غرض یکیچریلری قیردیرمق ایش حتی سلطان سایم بن یکیچریلری جنس آخر ایله تربیه ایده حکم دیمش و کیمی سفر مناسبیله استانبول یکیچریلردن تخلیه اولمغله قشله لره نظام جدید عسکری قونیه جقمش و جمعه کونی خنکار سلامغه نظام جدید البسه سیله چیه جقمش و کیمی نظام جدید عسکری کیجه لین استانبوله دخول ایله قوللق نفراتی و سائر محملرده کی یکیچریلری اعدام ایدوب اردوده کی یکیچریلری دخی سردار اکرم تلف ایده جقمش دیو نشر اراجیف ایلردی .

قهوه خانهلرده و محال سائرده بو مثللو اراجیف مو حشه تکثر ایدیجک اصحاب فطنت و خبرت اور کوب بر کوشه یه جکلدیله اما اتابکان سلطنت استانبولک ایچنده یکیچریلرک ازالدینی و اطرافنده نظام جدید عسکرینک کثرت اوزره اولدینی افکار تسلیت کاری ایله کج کلاه عز و نخوت و بو مثللو اراجیفک منشئی تحقیق و تحری به تنزل ایتیه رک اولکندن زیاده مستی اقبال ایله مصبطه نشین غفلت اولدیله و بو مثللو کفتکولر ایسه بر باشلوجه هیئت فسادیه نك نشریاتی و بر بیوک فتنه نك مقدماتی ایدی .

شویله که : ادرنه وقعه سی اوزرینه عطاء الله افندی شیخ الاسلام و بعده صدر



اعظمك اردوى هايون ايله كيمسى اوزرينه موسى پاشا قائم مقام نصب ايله ايكي بيوك ياكشلاق وقوعه كلدى عطاء الله افندى ريبايشه براعرج وموسى پاشا فساد انديشه بر كوسج اولغله سويرته و صورتده يكديكيرينك شيبه بوايكي مقدمه موجبه الفسادك بر بيوك فته يي انتاج ايده جكي بديهى ايدى هله موسى پاشا حضرت موسى عليه السلام زماننده سامرى ديو معروف وفساد پيشه لك وفته انديشه لك ايله موصوف اولان موسايه بس اخلاف دينكه سزا بر شخص بدلقا اولوب حتى مقدما طرابلس شاهه مأمور اولدقده جزار پاشا ( ادى موسى بوي قيصه صقالى كوسه بويه آدمدن خير كلز ) ديو اول حواليده وجودى استقال ايتشيدى سوق قضا وقدر ايله بوكره قائم مقام اولوب اردوى هايونك خر و جندن صكره باب عايله يرلشدى واورته لغى خالى بوله رق همان عطاء الله افندى ايله او يوشوب دائما بر فته احدائه چالیشان شهزاده سلطان مصطفى طرفدار ايله دخى برلشدى وهان ال التندن يكيچرى كروهنى تحريكه چيقتشدى بر طرفدن دخى فته نائمك او ياتمنه باعث اوله بيله جك حوادث نشر ايتديرمه كة قالقشدى وسركاران دولت بروجه مشروح نوم غفلته طالمش وبرغريب عالم بي قيديده قالمش اولدقنندن فرصت بولوب بتون كروه مخالفينى اله الدى واول ائساده اندرون هايون طرفدن دخى بر يلان شيوع بولدى كوياسلطان سليم بوستانجى باشى شاكركه ( سن بوستانجى نقراته نظام جديد البسه سى كيديره بيلورميسين ) ديمش اودخى ( امر ايدرسه كز بن آنره شابقه بيله كيديريرم ) ديو جواب ويرمش بو سوز افواه ناسه دوشوب بوستانجى لرك دخى يكيچر يله ايله اتفاق ايدوبده بالذات شاكرك بك وبالواسطه حكومت سنيه حقنده خصومتلرينه سبب اولدى .

يچاره سلطان سليم كوسه موسى ايله طوپال عطانك نظام جديد علمينه اتفاقنندن غافل اوله رق نظام جديد نقراتنك تكثيرينه چاليشيوردى . بنساء عليه اقدجه طربزوندن برايكي بيك نفر جابله قره دكر بوغازنده واقع قلاغ سبعة يماقلارينه علاوه اولوب يماقلارك علوفه لرى ايسه ايراد جديد خزينه سندن ويرملك مالبسه سيله بوجه بالا بوغازك ايكي طرفنده خيمه نشين اقامت اولان نظام جديد نقراتيله اختلاط ايتديريله رك رفته رفته تأليف ايله نظام جديد ساكنه ادخاللرى تدبيرينه تشبث اولمش وبوستانجى باشى شاكرك بك اره صره صندال ايله بوغازه عزيمت وبوغاز ناظرى انكليز محمود افندى ايله بوخصوصه دائر مشورت ايلمكده و يماقلاردن بعضيليله محرمانه كور يشوب ( بهى جانم سزك بو يرلرده كللى علاقه كز وباغ وبوستانكز وار راحت اوزره كينيورسكز بونكله برابر نظام جديد عسكرى

اولسه کز و کسوه کیسه کز نولور یومیه واسامه کز زیاده و تعیینانکز مکمل اولوب  
 اسکی متمکز دخی یانکزه قالور بونده نه باس وار) دیو سویلمکده بولنش ایدی .  
 موسی پاشا ایسه بوتدیری سلطنت سنیه علیهنه چوروب قوردینی فسادک اجراسنه  
 آلت ایدی چونکه درون استانبولده اشعال نأره فساده قیام ایتسه شاید اولجه  
 اتابکان سلطنت طویوب و طوارانوبده آتش اختلالی باصدرملری ملحوظ اولدیغندن  
 فساد آشی خارجده پیشرونده بعده یکچری قزغانلری میدانه چیقارمق یعنی  
 نأره اختلالی ابتدا یماقلا اچنده اشعال ایدوبده اورادن شراره سنی دفعه استانبوله  
 صیچراتمق صورتی افکار فساد کارینه دها او یغون کورمکله برطرفدن یکچری  
 اوجاغنه فساد براغوب برطرفدن دخی یماقلا اچنه برقاچ آدمی ارسال و (سز لر  
 یکچری یلردن معدود ایکن فرنک قیافته کیروبده دیندن چیقمش اولان عسکرله  
 اختلاطکز یاقشورمی) دیو یماقلا اذهاننی اخلال ایتش و یماقلا ره نظام جدید  
 البسه سنی کیمک و حر بهلی تفنک استعمال ایتک مخصوصی تکلیف اولنوبده قبول  
 ایتمدکاری حالده علاقه کله لری اولان بوغاز قلعه لرندن طرد اولنه جقلر ایش یوللو  
 القآت ایله اول ساده دلانی اورکتش ایدی بوجهته یماقلا رجاججامعیت و میانه لرنده  
 کیزلوجه مشورت ایدرک بزقول اوغلی قولز و ابا عن جد یکچری یوز نظام جدید  
 البسه سنی کیموز دیو بینلرنده قرار ویردکاری ائنده سلطان سلیم خان حضر تلی  
 یازید جامعی سلاملغنده سکبان باشی عارف اغایه (آغا اردونک عزیمتی حسیه  
 استانبول خالی و قوللقرده یکچری آزقالدی نظام جدید عسکرندن هر قولغه  
 اوچر بشر آدم قویسم مناسب اولمازمی) دیو بیوردقلرنده عارف اغا دخی (امر  
 وفرمان افندیمز کدر لکن یکچری اغاسی اردوی هایونده در بن بوراده بروکیل  
 قولکزم اراده بیور یلور ایسه بوخصوصی یکچری اغاسنه یازیم) دیمسی اوزرینه  
 (یوق یازمه طورسون استم) بیورمش اولدینی یکچری یلر اچنده خفی حوادث  
 وقشه لرده جمعیت خفیه ایله مشورته باعث اوله رق اوجاق طرفندن سالف الذکر  
 یماقلا ره تعلیم فتنه ایچون کیزلوجه قره قوللقتجیلر کوندرلمشیدی .

بوسبیلردن ناشی یماقلا ایله نظام جدید نفراتی اره سنه برودت و عداوت کیروب  
 جاجا بینلرنده منازعه ظهور ایتکه باشلامش و موسی پاشا اوراده جزئی بروسیله  
 ایله فتنه عظیمه حقیقه بیه جکنی اکلامش و فسادک ظهورینه مبدأ اولمق اوزره  
 یماقلا ره نظام جدید البسه سنک اکساسنی دخی بوغاز ناظری انکلیز محمود افندی به  
 امر ایلمش ایدی .

اقدجه عهده سنه قرمان ایالتی توجیه اولنان شاملی راغب پاشا که منصبه

کیتک اوزره اسکداره کدار ایتشیدی اتابکان سلطنته بر نوع خلوص کوسترمک اوزره عساکر شاهانه به مخصوص نشانلر ایله مزین قپودلر یاپدیره رق قواسلرندن برقاچ نفرینه کیدرمک استیوب آنلر ایسه لاز کر وهندن وقاعه لولردن بولملر یله اکتسادن امتناع ایله بوغازه واروب قضیه یی یماقره خبر ویرمشلر قلعه لولر ایسه بروجه مشروح وجوهله فساده مستعد اولدقلرندن پادشاه بتون دنیایی نظام جدید ایتک ایچون راغب پاشایه طوغ ویرمش اوده شمیدین نشان وضعنه باشلامش دیو پر آتش کین و غضب اولدقلری حالدده محمود افندینک یماقره نظام جدید البسه سی کیدیره جکی و مجار طابیه سی ضابطی اولان خلیل خاصکی دخی بونک اجر اسنی تعهد ایلمش اولدینی حوادی بروجه آتی آتش اختلاک اشتعالنه بادی اولدی .

\* یماقلرک عصیانی و قباچی وقعه سنک ظهوری \*

اشبو بیگ ایکی یوز یکر می ایکی سنه سی ربیع الاولنک اون یدنجی و مایس رومینک اون اوچنجی بازار ایرتسی کونی قره دکز بوغازی ناظری سالف الذکر محمود افندی روم ایلی قواغنده یماقلرک معاشلرینی ایفا ایدوبده بعده آنلره نظام جدید البسه سی کیدرمک تصورنده ایکن ناکاه زیر پرده خفاده مستور اولان فتنه سرنمای ظهور اولمشدر .

شویله که : اول کون هر طرفدن یماقلر اجتماع ایله مشورت خفیه به ابتدار ایلدکلری اغالری اولان سالف الذکر خلیل خاصکینک مسموعی اولیجق یانلرینه واروب سبب جمعیتدن لدی السؤال محمود افندی ایله بزم ایچون استانبولدن نظام جدید اثوابی کاش و سننده الباسی خصوصی تعهد ایتمش سن قبول ایتیموز و خلاف اوجاق قیافته کیرمیوز دیو فریاد ایله شراره پاش شر و فساد اولدقلرنده خلیل اغا اثواب کلدیکنک اصلی یوقدر دیو تا مینات اعطاسینه طاغلملرینی امر ایدوب تنور فساد ایسه کرکی کبی قیز مش اولدیغندن همان خلیل اغانک اوزرینه هجوم ایدرک بیچاره یی اعدام ایله بغی و طغیان قیام ایتمشدر .

بو حادئه فاجعه محمود افندینک پرده در سامعه سی اولیجق عقلی باشندن کیدوب همان ایسکله دن قایقه را کباً استانبوله طوغری روان اوله جق ایکن کیرودن یماقلر قایقاره بنه رک تعقیبه مسارعت ایلدکلرینی کورمکله بیوک دره اوجاغنه التجا ایتک اوزره اورایه کیدوب قره یه چیقدینی وقت یماقلر دخی یتیشه رک آتی دخی یاننده کی برنفر خدمتکار یله برابر اعدام ایلدیلر .

متوفای مومی الیه رائف محمود افندی خواجکان دیوان هایوندن متوفی انبار امینی اسماعیل افندینک مخدومی اولوب عنفوان شبانده مکتوبی صدر عالی او طه سنه مداوم

اولدینی حالد بر مقتضای حکم نوجوانی ظنور زنگ تحصیلیه فن موسقیده ممتاز  
 و ذاتنده صدا و اداسی خوش و دلنواز اولدیغندن ظنبوری محمود دیو معروف اولوب  
 واردینی دأره لرده ملتفت اوله رق نهایت رئیس الکتاب اولان راشد افدینک  
 دأره سنه تحصیل منسوبیت ایلدیکی ائنده یوسف آگاه افندی انکلتره سفارته  
 مأمور بیورلمغه اودخی معینه سرکاتی تعیین اولغشیدی بوصورتله لسان افرنجی  
 تحصیل ایله در سعادت عودتنده انکلز محمود افندی دیو شهرت بولدی بعده قورقه  
 اوزرینه روسیه دونماسیله برلکده سوق اولنان دونمای هایونه مستشار اولدی بعد  
 اتمام المأموریه استانبوله کلد کده قورقه ننگ بر کوزلجه رسمنی یایوب برقطعه تقریر ایله  
 رکاب هایونه تقدیم ایتمسی اوزرینه باب عالیده بر خدمت ایله بکام اولسی حنقده اراده  
 سنیه صادر اولمغه بالاده بیان اولدینی اوزره ساحب افندی یرینه بکاکچی و بعده  
 فی الاصل مستندی اولان ابراهیم کتخدانک سوقیله مصره کوندریله رک اوراده  
 رئیس الکتاب اولوب اردوی هایون ایله مصر دن عودتنده دخی درت بیجق سنه دن  
 زیاده مقام ریاستده قالدی دولت علیه انکلتره و روسیه دولتریله فرانسه علیهنه متفق  
 ایکن اول ائنده فرانسه طرفه تمایله باشلا دیغندن استانبوله آزار فرانسز پولتیقه سی  
 اوج کوستر مکة باشلا یوب بو مناسبتله محمود افندی عزل ایتدیر لمشدر اردوی هایونک  
 در سعادت دن خروجی ائناسنده قره دکز بوغازینک امر است حکامنه مأمور اوله رق  
 ایضای مأموریتله مشغول ایکن بروجه مشروح یماق لر یدنده مقتول اولمشدر .

محمود افدینک مهر داری استانبوله کلان قایقچیلر دن کیفیته مطلع اوله رق واروب  
 ابراهیم کتخدایه خبر ویرد کده ابراهیم کتخدا تلاش ایدرک همان باب عالی به کیتدی  
 و کیفیت رکاب هایونه عرض اولمغه برابر اخشام اوستی ارباب شوری باب عالیده  
 اجتماع ایله عقد مجلس مشورت ایتدی .

دور و دراز جریان ایدن مباحثاده قاتلرک تحری و تأدیجی خصوصی در میان اولمش  
 ایسه ده منبع فتنه و فساد اولان قائم مقام موسی پاشا بر قضا در اولمش یماق لرده اطاعته  
 کلک اوزره بولنه یور یوللو سوز لر ایله او قدر ارقه سنه دوشلماسی رأینی اوتیه  
 آتمش ورکاب هایونه ایشی خفیف کوستر دیکندن سلطان سلیم حلیم دخی تدایر حکیمان  
 ایله اشقیانک تقریق جمعیت و دفع مضر تلرینه اقدام اولمسنی امر ایتمش اولدیغنه بناء  
 یماق لرک تألیف و استمالت ایله تسکینه قرار و یر یله رک فر داسی صالی کونی کندولرینه  
 نصیح و پند ایتک اوزره یکیکچری او جاغنک اورته متولی و اختیار لری و اشجی اوسته لریله  
 یاز یحیلر دن مرکب بر جمعیت کوندردی .

و بو وقعه قرمان والیسی شاملی راغب پاشانک سوء تدبیر دن نشئت ایلمش دیو وزارتی

رفع و کوتاهی به نفی ایله عصاته برنوع ترضیه یولنده روی استمالت کوسترلدی .  
 وینه صالی کونی موسی پاشا و ابراهیم کتخدا و قره دکز بوغازی محافظی میرمیراندن  
 اینجه محمد پاشا و دیگر بعض خواص و کلا لاجل الاستشاره چارطاق تعیر اولنان قولغه  
 نزول و سکیان باشی ایله بعض اغوات بکتاشیه بی مسؤل ایتدکرنده سکیان باشی  
 ( مسموعمه کوره یماقلرک دماغنده فساد اولوب استانبوله کلهرک بر فتنه احداث  
 ایلمک نیتنده ایمشر لازم کلان تدیرک اجراسی رأی دولته منوطدر ) دیوتوریه لو  
 وایهاملو بر جواب و یروب بوندن ابراهیم کتخدا مقصد خفی به انتقال ایتمک لازم  
 کلور ایکن تهور ایدرک ( اومقوله خذله نک جمعیتی قرغه در نکیدر چندان مهمسه نه جک  
 ماده دکلدر اطاعت ایتمکری تقدیرده جبراً دائره انقیاده آثور و تأدیب اولنورلر )  
 دیمکله و سائر دخی آنی تصدیق ایتمکله ماده استخفاف اولنورق مجالس طاغلدی  
 و ابراهیم کتخدانک حالامستی اقبال و غرور ایله بی باک و بی شعور اولدینی اکلشادی  
 موسی پاشانک ارادینی دخی بوایدی زیرا ال التندن اشقیایی کندو تحریک و تشجیع  
 ایتمکده اولدیغندن آتش اختلال هنوز کرکی کبی اشتعال بولمن طویلو بده  
 باصدیریلور دیو خوف و اندیشه اوزره ایدی و فی الواقع بوغازک ایکی طرفنده  
 موجود اولان نظام جدید عسکریه یماقلرک تأدیبی امر سهل ایدی لکن ایشک ایچ  
 یوزی بشقه اولوب اشقیایه نهانی تعلیم فتنه اولنمقده و بروجه بالا بوغازه کوندریلان  
 جمعیت دخی آنلره نصیحت یرینه غیرت و جسارت و یرمکده ایدی .

بناءً علی ذلك اشقیایا جسارتنه رک بیوک دره چایرنده لدی الاجتماع ایچلرندن قباچی  
 مصطفی چاوشی کندولرینه رئیس و باشبوغ و ارناود علی و بایبوردی سلیمان و ممش  
 نام چاوشلری سر کرده ایدوب کرک اهل اسلام و کرک خرستیان هر کیم اولورایسه  
 اولسون هیچ بر کیمسه نک عرض و جان و مالنه طوقونلماق و طوقونان اولورایسه  
 اعدام اولنق و باب شیخ الاسلامیده تصدیق اولنمدقجه برشی مطالبه اولنلماق وات  
 میدانده تجمع ایله باب عالیدن واقع اوله جق طلبلرینه مساعدده اولنمدقجه طاغلماق  
 اوزره ینلرنده عهد و میثاق و انعام اوپمک و قلیچ آتلامق کبی ایمان جاهلیه ایله شد  
 نطاق اتفاق ایلمشر و فرداسی چهارشنبه کونی درث بش یوزنفر دن عبارت اولدقلمری  
 حالده بیوک دره دن اشانغی طوغری دکز کنار یله حرکت و راست کلدکلری  
 سر سر بلری دخی استصحاب ایله تکثیر جمعیت ایدرک طرابیه یه و اصل اولدقلمرنده  
 طقوز یوز نفره بالغ اولمشر ایدی فقط نظام جدید عسکرینک هجومندن خوف  
 و اندیشه اوزره اولدقلمرندن حرکتلرنده متردد اوله رق کاه ایلر و کاه کیر و  
 کیده یورلر ایدی و بر طرفدن سونکی پارلیدیسی کورلسه جمعیت اشقیانک در حال

طاغیبه جنی درکار واشقیاباطه لیمانی و بیک کبی بر حبلدن کچر ایکن لونند چفتلکنندن  
براورته نظام جدید عسکری ایندیرلسه بریسنک قورتیه میه جنی امر آشکار ایدی  
ونظام جدید عسکری طاقم طاقم حر کته آماده وحاضر وادنی اشارته مترقت ومنتظر  
ولکن آنلر یرلرندن حرکت ایتسونلر دیو قائم مقام پاشا طرفندن ویریلان امر  
اوزرینه بر طرفه حرکت ایتویوب یرلرنده ثابت ومستقر ایدیلر .

جمعیتک هنوز طاغلاماسندن طولایی سلطان سلیم خان حضر تری مراق ایدوب  
چهارشنبه کونی موسی پاشایی سرای هایونه جلب ایله (پاشا بونه خالدور بوقره دکز  
بوغازنده کی فتنه نه ایچون دفع اولمور بونه دن اقتضا ایدیور) بیوردقلرنده موسی  
پاشا تلغم منافقانه یه ابتدار ایدیچک شهر یار مشار ایله (بوایشلره سبب بنم حلمدر  
صیحیحاً بو حاللر بنم حلمدر نشأت ایده یور) دیو بیور مشار موسی پاشا هر نه دیدیسه  
دیوبینه فساد آشنی پیشورمک و فتنه ایشی بجرمک اوزره باب عالی یه عودت ایتشدیر .  
انابکان سلطنت حالا حقیقت حالدن آگاه اوله میوب فقط بروجه بالا اشقیایه نصیحت  
ایچون کوندریلان جمعیتدن بر ثمره کورلمدیکنه منی باب عالیده لدی الاستشاره  
یماقلرک اکثری لاز طائفه سی اولوب یکر می بشتیجی بلوک متولسی اولان قزغنجی  
حاجی مصطفی اغا دخی فی الاصل لاز طائفه سندن اولدینی حالده او جاقلو میاننده  
نافذالکلام بولندیغندن اشقیانک اسکات و تسکینی ایچون آنک بوغاز طرفه کوندرلمسی  
بعض سرکاران طرفندن اخطار ودرمیان اولنمی اوزرینه قزغنجی مصطفی باب  
عالی یه جلب اولنهرق انواع مواعید ایله بو امر خطیر اکا تودیع اولندی .

قزغنجی مصطفی ایسه باقر جیلق و قزغنجیلق تجارت وضعی ایله خیلی ثروت  
وسامان قزاقمش و بوتجارت استانبولده کندویه منحصر کبی بولنش ایکن نظام جدید  
ملا بسه سیاه وکلای دولتک بومثلو حرف و صنایعه مداخله سی آنک معاملات تجاریه سنه  
دخی طوقتمش ایدوکنه منی نظام جدید دشمنلرندن و بوکره فتنه قزغنجی قایناندانلرک  
اک ایلرو کانلرندن بری وغایت متعصب بر یکیکچری اولدینی حالده اصل فتنه او جانی  
وحقیقت حالده باغی اولان موسی پاشا ایله دیگر بعض حضارک اوضاع واطوارندن  
تراش مزایا ولسان حاللرندن استنباط معنی ایله غرض خفیلرینه آشنا اولمشیدی فقط  
سوزابه سی برحیله کار حریف اولدیغندن کوز اشارتیه موسی پاشا طرفنی اداره  
ایدرک هر دره دن صوتوروب و بوایشک تسویه سنی قولای کوستروب لسانیه  
دخی هیئت وکلای آلدادی و حرام لقمه کبی بوغاز طرفه کیدوب یکی کویده  
قباقچی جمعیتنه چآدی .

اشقیاولوقت یکی کویه قدر ایش ایسه ده بر وجه مشروح نظام جدید عسکرینک

قورقوسندن تردد اوزره بولنه رق برآدیم ایلو و آتار لر ایسه ایکی آدیم کیر و چکلکمک ایستور لر ردی قزغالبجی مصطفی آناری تشجیع ایله برابر یماقلر حسب البشریه قواق اغاسی خلیل خاصکی ایله محمود افندی بی اعدام ایتمکدیرینه نادم و کنه لر نندن تائب و مستغفر اولوب انجق عساکر شاهانه بوغاز سمتنده اولدقجه کندولره امنیت کله میه جکنندن عساکر مرقومه نك اولطر فدن قالدیرلمسی تمناسنده اولدق لرینی و عساکر قالدیقینی کبی آنلرک دخی تفریق جمعیت ایله یرلرینه رجعت ایده جکلرینی باب عالییه انها ایتمکله موسی پاشا در حال رکاب هایونندن استیذان ایله اصدار ایتمدیردیکی فرمان عالی موجبجه نظام جدید عسکری بوغاز ایچندن قالقوب لوندچفتککنده واسکدارده واقع قشله لرینه چکلدی لر رجال دولت دخی ایش بتدی صانوب باب عالیدن قوناق لرینه عودت ایله بسط بساط تنفس و استراحت ایلدیلر .

غرض خفی ایسه جمعیت عصیانیه بی استانبوله نقل ایله دورک تحویلی ایدی حتی اول ائنده شهزاد سلطان مصطفانک آدم لر نندن عبدالرحمن اغانک تبدیلا قلعه لره کیدوب و بعض اجله علمای طرفندن جمال اوغلی مصطفی افندی نام کمنه نك یماقلر ایچنه واروب انلره عقل خواجه لنی ایتمکده اولدیقی مرویدر بونک بشخص کیمک طرفندن کوندرلدیکی مثبت دکدر فقط خواجه منیب افندی طرفندن کوندرلمش ایدوکنی عاصم افندی روایت ایدر و سلطان مصطفانک جلوسندن صکره منیب افندییه ضربخاندن سنوی اوچ کیسه معاش تخصیص اولنش اولمسیله تأیید ایلر لکن پکده ظن غالب افاده ایده جک بر دلیل دکدر زیرا منیب افندی علما و فضلالی عصرک ممتاز و سرفرازی اولدینی حالده استانبول پایه سنی حائر و مجالس مکمله مأموریتیه متمیز و شیخ الاسلام بولنان عطاء الله افندینک خواجه سی اولمق حسبیله متمیز بر ذات اولدیغندن کندویه سنوی اوچ کیسه معاش تخصیصی استکثار اولنه جق مواددن اولدیغنه نظراً بونکله مصطفی افندی انک طرفندن کوندرلمش اولمسنه استدلال اولنه ماز شوقدرکه مقدما عطاء الله افندی سلطان سلیمه نظام جدید طرفداری کورندیکی ائنده خواجه سی منیب افندی دخی نظام جدید عسکری نك تعلیم لرینه و ترنپته چالم لرینه جواز شرعی اولدیغنی مبین رساله تألیف ایتمشیدی عطاء الله افندی مقام مشیخته کلوب وبعده موسی پاشا ایله هم آهنک اولوبده بشقه هوالر دن دم اورمغه باشلادقده بالطبع منیب افندینک دخی اکا پیرولک ایتمکده اولدینی سیاق حالدن اکلاشیامور لکن بو خصوصده درجه معلومات و مداخله سی کرکی کبی معلوم دکدر .

هر نه حال ایسه یماقلرک تألیف و استمالتیه اختلالک باصدیرلمسی حقننده اولنان تدابیر هپ

عکس قضیه‌ی منتج اوله رق قباجینک جمعیتی ایاق ایاق ایلرولمکده ایدی هله نظام جدید عسکرینک بوغاز ایچندن قشله‌رینه چکلمسی اوزرینه یماقلر مأمون الساحه ومصون عن الغائله اولوب روم ایلی حصارینه طوغری حرکت و اوکلرنده منادیلر (یا عبادالله بزم مراسم نظام جدید بلیه‌سنی قالدیرمقدر بشقه نیتمز یوقدر مسلمان اولانلر کندولرین او جاقلو بیلنلر بزمه برابر اولسون) دیو ندا ایدرک رهگذرلرندن و اطراف و اکنافدن التحاق ایدن حشرات ایله تکثیر جمعیت ایله کیجه ساعت درت راده‌لرنده طوپخانه‌یه کلشیر .

طوپچی او جانغی اولدقجه انضباط و انتظام تحتیده بولمغله اشقیایه مماشات شویله طورسون مدافعه‌لرینه متهی ایکن موسی پاشا و سکیبان باشی طرفلرندن طوپچیلره (صاقوب مخالفت ایتسونلر بوایش جمله اتفایله در) دیو خبر کوندرلمش ایدو کندن ناچار طوپچیلر دخی قرغانلرین طوپخانه میداننه چیقاروب قباجی جماعتته تابع اولمشیر .

موسی پاشا کیجه سرای هایونه واروب کیفیتی عرض ایتدکده سلطان سلیم خان حضرتلی ذاتا این الجانب وقان دو کسکدن متجانب اولدیغی حالده شردمه قلیله دن عبارت اولان یماقلرک خود بخود بورتبه امر جسم و خطب عظیمک ایقاعنه جسارت ایدهمیه جککری درکار اولدیغندن بوقاش اختلاک اوستلر النندن چیقمش اولدیغی تفرس ایتکله بشقه کونه معاملیه راضی اولیوب همان نازکانه و حکیمانیه صورته عصانک تسکینی خصوصنی موسی پاشانک دوش خیانتنه حواله ایلدی .

واقعا ایش بوکره بر مرتبه ده‌اغرلشمش ایدیه‌ده لوند چفتلکندنه واسکدارده اون اوچیک قدر نظام جدید عسکری وار ایدی سلطان سلیم اگر موسی پاشانک بوینی اوروب و عطاءالله افندیکنک دخی صاریغنی بوغازینه کچوروب و کندو دخی ایشنک باشنه کچوبده نظام جدید عسکرینک شجیعانه اعمال واستخدامنه قیام ایتمش اولسیدی بتون عاصیلری تأدیب و تربیه و مصالح دولتی دلخواهنه موافق صورتده تسویه ایده بیلوردی لکن کندوسنده او جسارت اولدیغندن سررشته مصالحتی بتون بتون خاسلرک الله ویردی کندوسنک بو مرتبه ملایمت و تسلیمیتی اوزرینه ارتق انلر دخی انصاف ایدروایشی تسویه یولنه کیدر ظن ایتدی بوایسه پک بیوک خطا ایدی بودرلو فسادلره جسارت ایدنلرده فتوت و انسانیت اولماز و آتش اختلال بر کره اشتعال بولیبجق صکره انی علولندیرن دخی اطفا ایده مز شراره ایکن سوندیرلک لازمدر و چونکه بر طرفدن علو کورنمکه باشلادی ارتق قیریلانه ییقلاانه باقیوب همان اطرافنی صارمدین اطفاسنه غیرت اولملیدی سلطان سلیم حلیم ایسه چند نفر خاسلرک قاننه کیرمکدن اجتناب ایله هم کندو تختی و همدیه نیجه عزیز وجودلرک حیاتی مخاطره‌یه بر اقدی .



موسی پاشا اختلاک ایچہ میدان الدیغنی وایشک کندو الندہ قالدیغنی کورنجک همان باب عالی یہ کلوب نصف الیلدہ شیخ الاسلام وصدور عظام ورجال دولتہ تذکرہ لر تحریر ایتدی ررک دعوت ایلدی وجمہ سی علی السحر باب عالی یہ کلوب بر معتاد قدیم سرا ی ہایونہ وارملق اوزرہ طرف شاہانہ دن استیدان اولنمش ایسہدہ سلطان سلیم خان حضر تلی بروجہ مشروح ایشی بتون بتون باب عالی نک رأی وقرارینہ بر اقمش اولدیغندن باب عالیجہ تدبیر اولنشق اوزرہ ارادہ سنیہ صادر اولمغلہ همان عقد انجمن مشورت ایلہ مذاکرہ مصلحتہ ابتدار ایتدی لر .

اول خللالہ اشقیاء طاقم قایق لرلہ چارطاق وچان دقیق اسکله لرینہ کچوب یکچیری قشله لرینہ کیتمکدہ وغلطہ واسکدار طرف لرندن قایقچی وحمال وبیکار و سرسری کروی طاقم طاقم استانبولہ کچوب اشقیایہ التحاق ایتمکدہ ایدی بر قاچ یوز قالیونجی دخی انلر ایلہ بر لشوب استانبول طرفنہ کچمش ایدی .

بوصورتلہ قباچینک جمعیتی کثرت بولوب اسواق و بازاردہ کمنہ یہ ضرر من یوقدر دیو خلقہ تأمینات ویررک وبتون او جاقلو یی اتفاقہ دعوت ایدرک ( میدان لحم ) ات میدانی دنیلان فضای شقاوت اقتضایہ واردی لر .

قباچینک اولوجہلہ طوبخاندن استانبول یقہسنہ عبور ایتدی کی لدی الاستماع یکچیری اختیار لری وسوز صاحب لری علی الصباح سلیمانہ جامع شریفنہ طوپلانمشلر ایدی او جاق باش چاوشی قہوہ جی مصطفی اغا کلوب انلری اغا قپوسنہ دعوت ایتمکله وارد قارندہ یکچیری اغاسی وکیلی اولان سکبان باشی بو اختلاک دفعنہ چارہ ندر دیو کندولرندن لدی السؤل شیخ الاسلام ایلہ صدر ین افندی لر اغا قپوسنہ کلوبدہ مشورت اولنمشنی تنسیب ایتمشلر آنجق شیخ الاسلام افندی نک اغا قپوسنہ کلمسی قانونمیدر ووقوعی وارمیدر دیو تردد اولنشدقده اوت وقوعی واردر وقانوندر دیو جواب ویرملری اوزرینہ باب عالی یہ خبر کوندر یلرک شیخ الاسلام ایلہ صدر ین دعوت اولنمغلہ شیخ الاسلام عطاء اللہ افندی و صدر روم ایلی احمد مختار افندی و صدر اناتولی عاشر افندی زادہ محمد حفید افندی واستانبول قاضیسی مراد زادہ محمد مراد افندی باشلری شال ایلہ اورتیلو اولدق لری حالہ اغا قپوسنہ ورود ایلہ ہنوز مشاورہ و براز ادارہ اقتداح محاورہ اولندقدہ مرقوم او جاق اختیار لری ہلہ بزہ رخصت ویریکز قشله لر مزہ کیدہ لم ویولداشلرلہ بر لشوب بو ایشہ بر تدبیر ایدہ لم دیوب سکبان باشی دخی ہایدی کورہ یم سزی بر فردہ ضرر وزیران اولسون دیو تنبیہ ایدرک عزیمت لرینہ رخصت ویرمکله قشله لرینہ کیتمشلر .

ایشتہ اول انسادہ قباچینک طاقتی دخی قشله لرہ کیرمک اوزرہ اولدیغنہ مبنی اغا

قوسندن کلان سالف الذکر اختیارلر وسوز صاحبیری ایله سائر سرگردانی آلائی  
ایله قارشولوب ات میداننده سکر دم آشجیلرینک هر کیجه آرامگاه ومیتی اولوب  
تکله تعبیر اولنان محله جمله سی تجدید اتفاق و تأیید عهد و میثاق ایله یکجیری  
قزغانلری میدانده چیقاردیلر و ر بلوک عسکر کوندروب جبهجی اوجانجی قزغانیله  
نفراتی دخی اشبوات میدانده کتوردیلر .

واهل عرض کروهی کیفیتن خیر و آگاه اولیجق خانهلرنده کیزلنمش واهل سوق  
دکانلری سد و بند ایله مشغول بولنمش ایکن منع فساد اولان کبرانک تعلیمات خفیه سی  
اوزینه بر بیراق عسکر افزاز ایله استانبولک هر طرفی کز دیروب و سوبسو قره  
قوللقجیلر چیقاروب (دکانلر آپاسون کسنه ایشندن قالمسون کیمسه یه ضرر مز یوقدر  
بزم خر و جز انحق عباد اللهک راحتی و دولتک نظامی ایچوندر) دیومنادیلر واسطه سیله  
ندا ایتدیره رک خلقه امنیت و یردیلر و بالجمله یکجیلری ای ات میدانده دعوت ایتدیر دیلر .  
بونک اوزینه کافی السابق دکانلر آچلدی و نسوان و صبیان سر بستجه اسواق و بازاره  
کیدوب کاور اولدی وات میداننده جمعیت چوغالوب انحق بر فالغه تصدی و اصنافدن  
آخه سز برشی المق کبی بر کونه تعدی ایدر اولمایدغندن ات میدانی سیرجی صاحبی  
ایله طولدی کیفیت موسی پاشا طرفدن سرای هایونه عرض اولندقدده سلطان سلیم  
خان حضر تلی زیاده قورقوب سرای هایونک قولری سد و تحصین ایتدیر مکله  
برابر نظام جدیدک الغاسی حقدده باب عالی یه بر قطعه خط هایون کوندرمش  
و (علما دعا جیلرم بنم امین و خلوص کارلر مدر شیخ الاسلام ایله صدرین اقدیلر  
نظام جدیدک مرفوع اولدیغنی افاده و جمهورک جمیع ملتسارینه مساعدده اولنه جغنی  
درعهده ایدرک جمعیه سعی و غیرت ایلسونلر) دیو بیورمش ایدو کندن شیخ  
الاسلام اقدی جمعیت اشقیایه نظام جدیدک رفعی اعلام و بوندن ماعدا مراملری  
استعلام ایچون سکباباشی ایله فتوی امینی و وقایع کاتبی اقدیلری ات میدانده لدی  
الارسال چونکه جمعیت اشقیایه هر نقدر کثرت و قوت بولمش ایسه ده نظام جدید  
عسکرینک حرکتی قورقوسیه خانجان درونلری هنوز زائل اولمامش اولدیغندن  
نظام جدیدک رفعی ایشتمدکاری کبی ممنون و مستریخ اوله رق همان موسی پاشا  
طرفندن ترتیب ایله خفياً قبایجی یه کوندرلش اولان دفتر اسامی بی اورته یه قویوب  
ایشته بونده مسطور اولان اون بر کیمسه ملکی خراب ایتدی بونلری حیا و میتاً  
پادشاهز دن استرز دیدیلر .

بو دفترده مسطور الاسامی اولان ذاتلر رجال دولت علیه دن مستشار دولت و سلطنت  
مقامنده بولنان و ابراهیم کتخدا دیو معروف اولان ابراهیم نسیم اقدی و بحریه

ناظری حاجی ابراهیم افندی و رکاب هایون کتخداسی ممش افندی و رئیس الکتب و کیلی صفی احمد افندی و ایراد جدید دفتر داری احمد بک و ضربخانه امینی ابو بکر افندی و والده کتخداسی یوسف اغا و اندرون هایون و رجالتدن سرکاتی احمد افندی و ماینچی احمد بک و بوستانچی باشی شاکر بک ایله مدرسیندن قپان نائی لطف الله افندی ایدی .

اشقیایه اطمینان تام کلوبده طاغلملری ایچون نظام جدیدک رفع اولدینی استانبولک هر طرفده منادیلر واسطه سیله اعلان اولتمقده اولوب لکن بونک بر فائده سی اولدقدن بشقه اشقیانک بر مرتبه دهها شمارسنه سبب اوله رق بزم ایشیمزات میدانده کوریه میه جک آت میداننه کیده لم دیو سلطان احمد جامعی طرفه عزیمت ایتمک اوزره بیراقلرین قالدیروب حرکت ایتملریله ینه ایچلرندن بعضیلری اوکلرینه کچوب عیدر ایتمک یولداشلر نه ایشکنز وار ایسه بوراده کوریز دیملری اوزرینه او یله ایسه بزم شرعه کوریه جک دعوا موز وار شیخ الاسلام ایله قاضی عسکر لر بورایه کلسونلر دیملریله دفتر مذکور اغا قوسنه تسمیار ایله برابر شیخ الاسلام افدینک جمعیه کلسی دخی اخطار اولنمش اولدیغندن شیخ الاسلام افندی طرف شاهانه یه بر عریضه تحریر و بالاسنه مذکور اون بر ذاتک اسملرینی ثبت ایله ات میداننده تجمع ایدن یکچیری قوللری نظام جدید عسکرینک رفعنه اظهار ممنونیت ایدوب لکن بالاده مسطور کمنه لک جزالری ترتیب اولنور ایسه هر کس محانه کیدوب خدمت لازمه لرنده قیام ایده جکلرینی درج و تسطیر ایتمکله سلطان سلیم خان حضر تلیری احباب فته و فسادک جانلرینه قیه ماز ایکن جانی کبی سودیکی ذواتک اعدامنه ضروری مساعده ایتمش و شیخ الاسلام افندی ذکر اولنان دعوت اوزرینه صدرینی و سکا نباشی معز وللری کبی او جاق اسکیلرینی استصحاب ایله مجمع اشقیایه کیتمش ایدی .

شیخ الاسلام افندی صدرین و استانبول قاضیسی ایله بر لکده ات میداننه کلوب میدان تکیه سنده اقامه اولدقلری ائناده یماقلردن بردلی قانلو شیخ الاسلام افندی یه خطاباً (سز شریعتی طوغری سویلمیوبده بزم کبی بالدیری چپلاقلره سوز دوشوره یورسکنز ادرنه وقعه سنده فتوی ویرن سن دکلیسین) دیومواخذه ایدیجک شیخ الاسلام افندی (بن اولوقت شیخ الاسلام دکل ایدم بدن اولکی افندی فتوی ویرمش بن بیلیم) دیو نزد اشقیاده تبرئه ذمت ایلمشدر .

بر اراق شیخ الاسلام افندی خواجه سی منیب افندی بی دخی یاننه جلب ایتمکله سائر صدور و موالی رجال دولت ایله بر لکده باب عالیده قلوب ایشک بر فایول الدیغنی تفرس ایله دلفکار و انجامکاره انتظار ایله دوچار اندیشه و افکار ایدیلر .

موسی پاشا ایسه بویله ال التندن فتنه قزغاتی قینا مقده اولدینی حالدہ مشورت بهانه سیله علما و رجال دولتی باب عالیده آوودوب او یالامقده ایدی .

رجال دولت کوردیلرکه ایش ایشدن کچور ارتق برتدیر سریع التائیرک اجراسندن بشقه چاره یوق همان ابراهیم کتخدا عسا کر شاهانه ایله اشقیایه مدافعه تدبیری ایدهیم دیرکن روم ایلی صدارتندن معزول شمس الدین افندی ( بره قجه سفیه و کافر خیدلر دولتی بر باد ایتدیکز شمدی بزده آق صقلازی قانهمی بویامق استرسکن ) دهرک سب و دشنام ایله بر طاقم ترهاته قیام ایدیجک چونکه ابراهیم کتخدایه کمسنه اکری باقعه جسارت ایده مزکن شمس الدین افدینسک بوجر آتی حالک بتون بتون تغیر ایلمش اولدیغنه دلیل واضح اولدیغندن سرمستی می اقبال و غرور اولان ابراهیم کتخدا او یقودن او یانور کبی بردن بره آییلوب او ولوقت قضیه یی اکلا یوب ( او یله ایسه بوراده بزده متعلق ایش قالمش یرلرمزه کیده لم ) دیو بحریه ناظری حاجی ابراهیم افندی ایله برلکده مسلوب الشعور اوله رق قالمقوب ابراهیم کتخدا قوناغنه و حاجی ابراهیم افندی ترسانه یه کیتدیلر .

مکرکه اولجه موسی پاشا اشقیانک مطلوبی اولان سالف الذکر ذاتلر اعدام اولندیجه تفریق جمعیتاری ممکن اولیه جغنی حضور هایونه عرض اتمش اولدیغندن سلطان سلیم خان حضر تلی ( سرکاتی احمد افندی ایله ماینچی احمد بکه سزیده استرلر ایش شاید المدن الورلر وارک باشکنزک چاره سنی کورک ) دیو رخصت و یرمش و موسی پاشایه دخی ( ابراهیم کتخدا و حاجی ابراهیم افندی و سرکاتی احمد افندی ایله بینمزده معاهده واردر انلرک اعدامندن صرف نظر ایله باقیسنک تخلیصی ممکن اولدیغنی صورتده قیدلری کوریله ) دیو امر و اشعار بیورمش ایدوکنه مبنی ابراهیم افندیلره سد ممانعت اوله میوب اما سالف الذکر ممش وصفی و بکر افندیلری الیقویوب بونلر باب عالیده و بوستانچی باشی شا کر بک سرای هایونده مخنوقا اعدام ایله سرمق طوعاری مجمع اشقیایه کوندرلدی .

ممش افندی فی الاصل سالانیکلی اولوب حاجی نعمان بکک دخان کمر کچیلککنده صندوق امینی و بعدده سالانیکلی عثمان اغا محلولندن دخان کمر کی امینی اولوب و مطبخ وارپه امانتلی و حبوبات نظارتی وقت بوقت عهده سنه الحاقاً احاله اولنه کلوب بوکره بروجه مشروح اردوی هایونک خروجنده رکاب هایون کتخداسی اوله رق هنوز وکلای دولت صره سنه کچمشیکن متعاقباً اشبو قباچی وقعه سی ظهور ایله مقتول و مغدور اولدی .

صفی افندی دیوان قلمی کتبه سنندن ایکن ایکی یوز اون اوچ سنه سننده ظهور

ایدن مصر سفر نده بکلکجی اوله رق اردوی هایون ایله مصره کیدوب کلدکن صکره دخی بومأمورینده مستقر اولشیدی علوم عربیه وحکمییه واقف وعفت و صداقت ایله متصف اولغین بوکره اردوی هایونک خروجنده رکاب هایونده رئیس وکیلی اولوب اعرابدن محلی وبرمادهه صنع ومدخلی یونیکن موسی پاشانک برخصوصدن طولانی کندویه بغض درونی اولدیغندن بوکره اول دردمندی دخی صیغه مطرده نفسانیه چکوب اسمنی اول دفتر فلاکته قید ایتدیرمکله نقطه وجودی بلاموجب کزک غدر ایله صحیفه عالمندن قالدیرلدی .

ابوبکر افندی فی الاصل زعفرانبولی قضا سندن اولوب درس عاده ورونده همشهر یلری دلالتیه ضربخانه عامره حالغه دخول ایش و اسمنی اوقویوب یازه جق قدر یازو بیلور و آخره محتاج اولیه جق قدر قره جمله درجه سنده رقم پایه بیلور ایش اولوقت هر صنفده اوقور یازار کسنه نادر اولدینی حاله حال صنفده ایکن بو قدر جق اولسون یازو ورق بیلمک غرابدن کورلمسیله و کندوسی هر کسک مزاجنه کوره تملق ومدارات ایدر برآدم اولمسسیله ضربخانه مأمور لرینه ادینی او کر دوب کندوی سودیره رک حاملقندن قورتیلوب ضربخانه خدماتنده استخدام اولنغه باشلادی برمدت مرورنده کفجه ناظری وبعده صاحب عیار وایکیوز اون اتی تاریخنده دامادی احمد شاکر افدینک عزلنده ضربخانه امانتیه کامکار اولدی وبوقته قدر بلامعارض اول مأموریتده قالدی صوفی ومرائی بریر فانی اولدینی حاله نظام جدید طرفلوسی کورنمکله اودخی بودفعه کروه مظلومینه قالدی .

شاکر بک میرمیراندن احمد پاشانک اوغلی اولوب پدرینک وفاتندن صکره بی وایه قالمغه خاصه خاصیکلری زمره سنه داخل ومتحیزان رجال اندرون ایله حسن مواسست ایدرک باب عالیده قره قولاق ویولیه خاصی افا اولدقدن صکره ارهسی چوق کچمیوب بوندن طقوز آی مقدم بوستانجی باشلیق منصب جلیله نائل اولشیدی برقاچ دفعه طرف هاشانه دن ماموراً بوغازه کیدوب کلش اولدیغه بناءً یماقره نظام جدید البسه سی کیدیره جکمش دیو لسانه کلش اولمسسیله اودخی اشقیانک مطلوبلری صره سنده بولنه رق ضروری اندرون هایونده بوستانجی باشی یرنده اعدام ایتدیرلدی .

مومی الیهمک بروجه مشروح اعداملری اوزرینه حسن تحسین افندی کتخدای رکاب وحالت افندی رئیس رکاب وسید محمد افندی ضربخانه امینی اولوب حالت افدین منحل اولان بکلکجی وکالتی دخی آمدی خلفا سندن سیدا افندییه توجیه بیورلدی .

اشقیانك مطلوبری اولان اون بر ذاتدن دردی بووجهله اعدام اولندیسهده  
غرض اصلی اتابکان سلطنت اولان رجال اندرون و بیرون اولدیغندن بقیه سنك  
تجسس و تحریمی ایچون ات میداننده بر مقدار عسکر و شهر قپولرینه یکچریلر  
تعین اولنهرق طرف دولتدن دخی دسترس اولنلره بشر بیك غروش وعد  
اولنمشدی .

موسی پاشانك اول باول هدف سوء قصدی اولان ابراهیم کتخدا یعنی ابراهیم نسیم  
افندی بروجه بالا باب عالیدن قوناغنه وارمش ایکن تپه دلی علی پاشا قپوچوقداری  
حسین شوقی افندیسنك تشویقیله آنک دالطبان چشمه سی سمتده واقع خانه سنه  
واروب بحرأ بر طرفه صاوشمق اوزره لنقه یکی قپوسنه قایق اصهارله دقندن صکره  
تبدیل جامه و هیئت ایدرک اورادن دخی بش اون اتباعیله دولکر قافله لرندن کلابی  
زاده اغوب قافله نك خانه سنه وارمش ایسهده اشقیایه تابع اولان کورجی و حمال  
کر و هندن بعضیلری طانیوب و ابراهیم کتخدا قاجیور دیو سائر اشقیایه طاقنه خبر  
ویزه رک آرقه سنه دوشوب ایچرویه کیردیکی کبی خانه نك اطرافنی احاطه ایتمشلر  
حالبوکه باب عالیدن قوناغنه کیتدیکنده بر طرفه صاوشماق ایچون موسی پاشا طرفندن  
آرقه سنه جاسوس تعیین اولنمش ایدوکنندن کیفیت درحال موسی پاشا طرفنه اخبار  
اولنغله باب عالیدن محضر آغا یازیجیسی کوندرلمش اولغین یازیجی اول خانه یه واروب  
ابراهیم کتخدای محتی اولدیغی محزندن اخراج ایله لنقه قولغنه تسلیم ایتدکه  
آنده کی اشقیای ابراهیم کتخدای الوب انواع حقارتله ات میداننه کوتوررکن مهر  
باشیسی علی آغا نام مرد صداقتکار دخی یانندن آیرلیوب وات میدانی قپوسنه  
کلکارنده امان یولداشلاز افندیمه قیمیک دیو اوزرینه قپانوب اگرچه اشقیای مطلوب  
اولان ذواتدن بشقه بر فرده تعرض ایتمامک اوزره بینلرنده عهد و میثاق ایتمش  
اولدقارندن مرقومی افندیسندن آیرمغه چالشدیلر ایسهده بروجهله آیرمق قابل  
اولدیغندن اشقیای خنجر و قلیج اوشوروب ایکسینی دخی پاره پاره ایلدیلر .

ابراهیم کتخدا لاجل الاحتیاط بر کیسه دروننده بر مقدار ذقیمت جواهر ایله  
وافر التون و بر مجوهر و کرانقیمت خنجر استحصاب ایلمش اولدیغندن بووجهله  
اعدامنده کیسه دوشوب ایچنده کی دنایر و جواهر اطرافه منشر اولمشیکن اشقیای  
جمله سنی جمع و کیسه سنه وضع ایله بردانه سنی کتم ایتمه رک خنجر ایله برابر موسی  
پاشایه تسلیم ایتمشلر اولوقنك اصولنجه اودخی بیت الماله تسلیم ایتمک لازم ایکن  
ابراهیم کتخدایه وارث اولمش کبی قبولنمش اولسیله ات میداننده کی اسافلدن ده  
الحق بر شخص اولدیغی ثابت اولمشدر .

برمنوال مشروح نظام جدید عسکرینک الغا اولدنی اعلان اولدوقده لوند چقتلیکی  
 واسکدار قشاهلرنده کی عساکر شاهانه طاغیلوب هریری برطرفه کیتمش ایسه ده  
 خونه اشقیانک درونلرنده جایگیر اولان نظام جدید قورقوسی هنوز زائل اولمامش  
 ایدو کندن ابراهیم کتخدا های وهوی ایله ات میداننه کتوریلور ایکن نظام جدید  
 عسکری میدانی باصدی دیو شایعه ظهور ایتمکله کرک یماقلر و کرک سائر یکیمچریلر  
 کمال خوف وتلاش ایله یکدیگرینی چکنه بهرک کیمی میدانک دیکر قوسندن چقمغه  
 و کیمی قشاهلری دروننه قاچغه سکر دوب میدانده برغریب قارغشلق پیدا اولدی  
 سیرجی وصایجی کر وهنه دخی شاشقنلق کلدی بو ایسه ابراهیم کتخدانی کتورنلرک  
 کورلدیسی اولدنی تحقق ایدیکم میدان اغالری صوبه لر ایله جبر وزور ایدرک  
 عسکری ینه میدانه طوبلادیلر ایشته بو حادته دخی دلالت ایدرکه نظام جدید  
 عسکرینک بر مقدار ی باب هایونه جلب اولنوبده سلطان احمد جامعی پیشکاهنده واقع  
 ات میداننده جزئی برسونکو پارلدیسی کوسترلمش اولسیدی یکیمچریلرک شقاوتکده سی  
 اولان ات میداننده کی اشقیانک کتور کتورینه پریشان اوله جقلر ایش نه چاره که  
 مدیر امور جمهور اولان قائم مقام خیانت اتسام بویه برتدیره محل قالماق ایچون  
 اول بول سلطان سلیمی اغفال ایله نظام جدید عسکرینی الغا ایتدیرمشیدی .

واندرون هایون اغالری طرفندن بو باده سلطان سلیم حلیمه خیلی اخطارات  
 خیر خواهانه دخی وقوع بولمش ایسه ده بنم ایچون قان دوکسون بنم یوزمدن امت  
 محمده ضرر کلسون دیو اصلا مقاومت ومدافعه داعیه سنده بولنماشدر .

مرحوم مومی ایله ابراهیم نسیم افندی که عربجه باشی زاده دیومعر وفدر فی الاصل  
 سرحد خوتینده برجامع شریفک امامی اولان احمد افندی ک اوغلیدر فقط والده سنک  
 پدری خوتین عربجه باشیسی محمد اغادر و پدرینک وفاتنده پک کوچک بولنمغه  
 محمد اغانک حجر تربیه سنده قالب بیک یوز سکسان ایکی صفرنده محمد اغا درگاه عالی  
 عربجه باشیسی اوله رق سکسان درت تاریخنده در سعادت کلمکه مأذون اولدوقده  
 ابراهیم افندی ایله والده سنی دخی برلکده در سعادت کتورمش وسن رشده بلوغنده  
 یعنی سکسان سکر سنه سنده مکتوبی صدر عالی او طه سنه مأمور ایتدیرمش ایدی محمد  
 اغانک وفاتنده ابراهیم افندی ک والده سنی عربجه باشی اولان محمد اغا نامنده برذات  
 تزوج ایلدیکندن عربجه باشیاق لقبی بوجهته دخی تا کد ایتمشیدی .

غایت فطین برذات اولدیفندن قلمجه تمیز ایدرک بیک ایکی یوز ایکی سنه سنده اردوی  
 هایونک خروجندن صکره رکاب هایون کتخداسی اولان ابراهیم افندی به مهر دار  
 وبرمدت صکره مکتوبی او طه سنده سر خلیفه لک وعزت پاشانک صدارتنده مکتوبجیلیق

ایله کامکار وایکیوز اون اوچ تاریخنده صدارت عظمی کتخدالغیله بلند اعتبار اولمش و متعاقباً ضیا پاشا سردارلغله اردوی هایونک مصر اوزرینه حر کتنده رکاب هایون کتخدالغیله درسعادته قالمش ایدی اون التی سنه سنده اردوی هایونک درسعادته عودتنده خدمتی ختام بوله رق طبیعی انفصال ایله خانه سنده بسط بساط استراحت ایدوب انجق اونیدی تاریخنده ثانیاً کتخدای صدر عالی اولدی بعده بکخان سلطان حضر تلیرنک کتخدالغی خدمتی کندویه علاوه مأموریت بیورلدی و بوسیه ایله اراقده حضور هایونه کیروب چیقهرق قدر و نفوذی بر مرتبه دهه ترقی بولدی لکن حافظ اسماعیل پاشا صدارته کلد کده آنک شهرت شایعه سیله ذهنی طولمش ایدو کندن آنک نفوذینی کندو استقلالنه مغایر کورمکله نظر شاهانه دن دوشورمک ایچون بر جوق فساد و افتزالر تصنیع و ایجاد ایتشیکن مؤثر اولدیغندن حقنده افکار عمومی بی تغییر ایله او یوزدن دوشورمک سوداسنه دوشوب نهایت ادرنه وقعه سنی احداث ایتد کده کتخدا دخی آنک عزلیله برابر کندوسنک دخی عزلی مقتضای مصالحندن اولدیغنی عالم بالایه اخطار ایتمکین اسماعیل پاشا عزل و نفی اولنهرق فر داسی اودخنی عزل اولتمش ایسه ده حقنده اعتماد ملوکانه برکال اولدیغندن هر کون یاخود کون آشوری باب عالی به واروب جمیع امور دولت علیه نظارت ایتک اوزره مأمور اولوب بوضورت ایسه مومی الیهی بتون بتون السنه ناسه دوشوردی و نیک و بد هر نه یاپیلور ایسه اکا عزو اولتمغه و اسماعیل پاشانک ا کدیکی تخم فساد نشو و نما بولغه باشلادی ایشته اول ائنده روسیه سفری ظهور ایدیجک مهمات سفریه نظارتی دخی افندیء مومی الیهک نظارت عمومی سی تحتده بولتمغه قائم مقام اولان موسی پاشا ابراهیم کتخدا ناظر دولتر شایعه سنی نشر ایله برابر فوق العاده تبصص و تملق ایدرک آنی اغفال و بتون مصالحی آنک اوزرینه بیقهرق ایسه بوغوب شویله که: حقوق دعوالرینه وارنجیه قدر بالجمله موادی اکا حواله ایله اشغال وال التندن اسماعیل پاشانک ا کدیکی تخم فسادک محصولی بیچمکه سعی بیهمال ایتمکله افندیء مومی الیه تیز فهم و دوراندیش بر ذات اولدیغنی حالد کثرت اشغال ایله بحر افکاره طالمش و بر طرفدن دخی نشئه اقبال ایله بیخبرک عالمنده قالمش اولدیغنی جهته موسی پاشانک قوردیغنی فسادلری اکلایه مدی و افکار عمومی نك تغیری نصل خاطره کلدک فناقلری انتاج ایده بیله جکنی تصور ایده مدی توجهات سنیه به پک زیاده اعتمادی اولوب حتی مقدمجه بعض خیر خواهانی کندوسنی ارشاد ایچون نصیحت ایتدکجه بزم ایانغز می ایصرر یوقدر دیر ایش حالبوکه کوندیگی نظام جدید عسکری آن واحده طانیلوب برر طرفه کیتیلر و بر طاقم کلاب اشقیا کندوسنی کشان بر کشان میدان لجه کتوروب



پاره پاره ایتدیلر خوش لهجه و خفیف اللحیه دقایق اموره واقف و اخلاق حمیده ایله متصف سریع القلم و بدیع الهمم خاطر نواز و کریم چاره ساز بر ذات جمیل الصفات ایتمش رحمة الله علیه رحمة واسعة

انک اعدامیله موسی پاشا برنجی درجده اولان غرضی اجرا ایتمش اولدی و ارتق عصیان بتون بتون میدان الدی یکیکچر یلکدن دم اوران بر طاقم اراذل دخی اجرای غرض و نضمانته فرصت بولدی .

حتی بولی و یوده سی اولوب نظام جدید عسکرینک تربینده دولته حسن خدمت ایتمش اولان حاجی احمد اوغلی ابراهیم اغانک در سعادتده امورینی رؤیت ایدن محمد نام بر عاجز و بیچاره نی بولی قاقچقنلرندن بر قاچ نفر اراذل اشخاص طوتوب و ایشته بوده حاجی احمد اوغلینک قبو کتخدا سیدر دیه رک ات میداننه کوتوروب پاره دلایلر بو ایسه احباب اغراضه پک فنا بر مثال اوله رق بویله کیدرسه بر ایشده الی اولمیان نیجه بیکناهرک بر طاقم اسافل النده کشته و احوال دولت و مملکت بتون بتون بر کشته اوله بیله جکنندن میدان اغالری و او جاق اختیار لری بونه دیمکدر هر کس اجرای غرض ایچون ایتدیکی آدمی میدانه کتوروب پاره له مق اولور ایشمیدر فیما بعد بزم علممز اولدجه بر کسنه یه بر فسکه اورلمسون هر کیم خلافنه جسارت ایدر ایسه پاره پاره ایلرز دیو سو بسو دلالر ندا ایتدیر دیلر و بوضورتله فسالفک اوکی الندی یوخسه بو اوغورده پک چوق آدملرک بلا موجب دوچار فلاکت اوله جقاری درکار ایدی .

بو وجهه نائره فترت کرکی کبی شدت بولغله اطفاسنه تشبث اولغق اوزره جههورک بوندن صکره دخی مراملری نه ایدوکی باخط هایون طرف قائمقامیدن سؤال بیورلدقده ایراد جدیدک قالدیرلمسیدر دیو جواب ویرلمکله ( ایراد جدیدی رفع ولغت ایتدم میدانه خبر کوندروب اسواق و بازاره دلالر چیقاره سن ) دیو خط هایون صادر اولغین اولوجهله طرف طرف منادیلر سوق اولندی ایسه ده غرض بشقه اولدیغندن بونک دخی هیچ فائده سی اولمدی و آتش فتنه و فساد کیتدکجه مشدد و مزداد اوله رق شهزاده لرک محافظه سی بحی میدانه چیقدی .

شویله که : اولوقت سلاله عثمانیه دن یالکز جتتمکان عبدالحمید خان حضرتلرینک سلطان مصطفی و سلطان محمود نام ایکی شهزاده لری اولوب سلطان سلیم خان حضرتلرینک ایسه اولادی اولدیغندن بو ایکی شهزاده یه بر حال اولسه سلاله طاهره عثمانیه انقراض بولمش اوله جغندن بونلرک لزوم محافظه لری اهم واقم اولدیغنی مطالعه سی در میان اولغله ایکندی اوستی ایدی که طوائف عسکریه

شهزاده لری کیمسه یه ایناموروز طرفزدن امین ومعمد آدملر قویوب محافظه  
ایده جکر دیملری اوزرینه کیفیت سلطان سلیمه عرض اولندقدده علمای عظامدن  
بریه او جاقلودن بری سرای هایونه کلوب محافظه شهزادکانه قیام ایتسونلر دیو  
اراده بیورمغله شیخ الاسلام افندی طرفندن برینک انتخابنه لدی الابدتار صدور  
علما استنکاف و ابا ایدوب فقط روم ایلی پایه لولردن امام اول شهر یاری اولوب  
آیغر امام دیو ملقب اولان حافظ درویش محمد افندی بومأموریتی قبول ایدرک  
اسبق سکنا باشی عثمان اغا ایله برلکده سرای هایونه کوندرلدیلر حالبوکه بو خدمتک  
قبولی هر کسدن زیاده چراغ مخصوص پادشاهی اولان درویش افندی یه کران کلک  
لازم ایدی وشیمه انسانیتدن حصه دار اولسه قبول ایده میه جکی درکار ایدی زیرا  
ایاصوفیه خطیبی ایکن امام ثانی وبعده امام اول اولوب بوندن بشقه برمریت  
ودگری اولمدینی حالده مجرد عنایت مخصوصه پادشاهی اوله رق منتهای مراتب علمیه  
اولان روم ایلی قاضی سکرلکی پایه سنه قدر چیقمش اولسنه نظراً ولی نعمته قارشو  
اشقیا طرفندن بویله برمأموریت مخصوصه ایله سرای هایونه کیتیمی انسان اولانه  
کوره نه قدر کوچ برایش اولدینی بیانه محتاج دکلدر وبوماده هرشیدن زیاده سلطان  
سلیمه تأثیر ایتشیدی حتی بوندن طولانی آشوری مرتبه متأسف اوله رق باب عالی یه  
برخط هایون کوندروب ( بنم ذریم یوقدر شهزاده لر بنم اولادم ونور عینمدر  
معاذالله بن انلره سوء قصد ایله ساسله پاکیزه عثمانیه نك انقراضه ودولت آل عثمانک  
اضمحلالنه سبب اولمق هیچ خیال وخاطره کلور شیمیدر الله او کونلری کوسترمسون  
جناب باری انلرک عمرینی روز افزون ایلسون ) دیو بیورمش ایدی وبوخط  
هایون باب عالیده قرائت اولندقدده موجود اولان علما هپ اغلامشدر ایدی امام  
بدنام ایسه انسانیتدن بی بهره برنادان حریف اولمغله کویا مستحق اولمدینی طریق  
عامیه دن برمنصب ضبط ایتمش کبی منبسط اوله رق بی پروا سرای هایونه ورود ایله  
حضور هایونه دخولنده اوست پرده دن سوزده آغاز ایدرک ( سن اسماعیل پاشا کبی  
وزیرک قدرینی بیامدک ابراهیم کتخدایه اعتبار ایتدک ابراهیم کتخدا جهانی خراب  
ایتدی بن انک شردن ایکی سنه در توقات ارپه لغنی الزام ایده مدم سن همان اکا  
تسلیم زمام ملک ایتدک انک سوزیله اسماعیل پاشا کبی صادق وزیر ی آزقالدی اعدام  
ایده یازدک ) دیهرک آحاد ناسه خطاب ایدر کبی سلطان سلیم خان حضر تلرینه  
عتاب ایدیجک انک بو ادب سز لکندن عثمان اغا اوتانوب طشره چیقمغله شهر یار  
مشار ایله حضر تلری افندی بی کوتورک راحت ایتسون دیو نازکانه حضور  
هایونلردن دفع ایتشدردر .

عصر كنه فاحاله كمش اولديغنه ايسته بودخى بردليلدر كه اويله تربيه سز بر آيغر حريف قاضيسكرلك رتبه سنى احراز ايله اربهلر اوله رق كندويه ويرلمش اولان بر قضانك حكومت شرعيه سنى التزامه ويره مديكى ايجون شكايه ايلبور و اوتامدن ابراهيم كتخدانك قدح و ذمى سياقنده حضور هايونده دخى بونى سويليور حالبو كه مناصب شرعيه نى التزامه ويرمك شرعاً و عقلاً پك چركين بر كيفيت اولديغندن بونك منى ابراهيم كتخداه ذخر آخرت و باديء ممدوحيت اوله جق مواد دندر و ايجاب وقت و حال ايله دولتجه يابلمش اولان قصور لر تعداد اولنه جق اولسه ابتدا اويله بر عارسز و تربيه سز جاهل شخصك بويله بر بيوك رتبه علميه ده بولندير لمسيدير اولوقتك حكمنجه بويله ايام اختلالده ميدانه چيقوبده عوامه سوز اكلاده جق علما طريقه او مقوله اسافل ناس داخل اوليجق ارتق ديكر طريقرلك حالى اندن قياس ايله اكلاملى .

شوحاله نظراً سلطان سليم بالذات نظام جديد عسكر ينك باشنه كچوبده در حال عصائى تاذيب ايله دولتى اساسندن اصلاح و تنظيم ايتمك لازم ايكن معتادى اولان نزاکت و ملايمت يولنى طوندى و بونجه امكار صرفيله وجوده كتوردىكى عساكر معلمه نى برآنده محو ايتدى دولته مدار سلامت اوله جق اويله بر منتظم قوت پك بيهوده يره الدن كيتدى بونك اوزرينه ارتق ايش بتون بتون خونه دولت المارنده قالدى و بوه مثللو كشا كشر ايله اخشام اولدى .

اول كيجه شيخ الاسلام ايله معيتمنده كى علما تمش بشك قشله سنده و باب آصفيده كى افنديلر دخى رئيس العالم عرب زاده عارف افندى خانه سنده قالديلر اهالىء استانبول دخى يارين نه اوله جق و اختلال نه رنك اله جق ديو متفكر و متحير و صباحه منتظر اولديلر و كيجه ساعت درت راده لرنده شهزاده سلطان مصطفىانك آدم لرندن عبدالرحمن اغا خنيا قشله يه واروب سر كر دكان اشقيا ايله محرمانه مصاحبت ايتدك دن صكره عودت ايلمشدر .

سياق و سباق احواله نظراً زوربارك مرامى مجرد نظام جديدك رفييله رجال و كباردن مطلوب ايتدكلى كسانك اعدامى خصوصاً لرندن عبارت اولوب حتى شيخ الاسلام ايله علما ابتدائات ميدانه كلوبده زوربالرله عقد مجلس ايتدك لرنده قباچى مصطفى اغا قوينندن ساعتى چيقاروب ( پادشاهمز ايسته بوساعت كيدير دائماً چرخى يويله دوزكن خارچدن بريجه بوجكلى كوروب اوكنه حاجز و دورانه مانع اولمشدر ) ديو طرف سلطنتك برى الذمه ايدوكنى تلميح و مرام انجق مطلوب اولان رجالك ازاله لرندن عبارت اولديغنى تصريح ايتمشيدى لكن عالم بالادن تخر يكا تده دوام و خلع سلطانى قضيه سنى انتاج ايتدير مكه سعى و اقدام اولنه يوردى .

بناءً عليه فر داسی یوم جمعہ کہ ربیع الاولک یکرمی برنجی کونی اولوب قر دخی  
 برج حوتده ایدی علی الصباح سکیانباشی عارف اغا وسکیانباشی معزولاری وسر  
 طور ناجیلر و اوجاق اختیارلری وسوز صاحبلری حضور شیخ الاسلامی به واروب  
 مشاوره به لدی الابتدار ( ارتق بر مصاحت قالمدی نظام جدید رفع اولندی جمهورک  
 سائر استدکالرینه دخی پادشاه مساعده ایلدی رجالدن مطلوب اولنلرک بعضیلری اختفا  
 ایتمش ایسه ده تجسس اولنه یور بولندجقه قیدلری کور یور جمعیت طاغلسون وهر کس  
 یرلو یرینه چکلسون بوغاز سر کرده لرینه خاعتلر کیدیرلسون ورتبه و بخشلر  
 ویرلسون) دیند کده چونکه ایش طانیشق دوکشی اولدیغندن دلی به طاش آتق  
 قیلندن اوله رق شیخ الاسلام افندی ( وارک بر کره دها باشوغلره وسر کرده لره  
 سؤال ایدک دها بر مسؤللری وارمیدر تمامیدر ) دیمکله اختیارلردن اوچ درت کمسنه  
 سر کرده لرک اولدق لری محله واروب افاده ایتملری اوزرینه سر کرده لر دخی وارلم  
 بر کره نفراتمز ایله سویلشهلم دیوب عسکری آت میداننده نمازگاه تعیر اولنان محله  
 جمع ایله رؤسا مذاکره و محاوره به کیرشدیلر بونک اوزرینه سوز ایاغه دوشمکله  
 هر قفادن برسس وهر سسدن برترانه ناساز هوس وهر هوسدن یکدیگره منافی  
 انواع ملتس ظهوره کیمکله خارج از دائرة تحمل وامکان اولنلرینه طرف  
 شیخ الاسلامیدن ردایه جواب ویرلمک واشقیاکروهی اقتاع ایدلمک لازم کلوب  
 وشیخ الاسلام افندی سکوتی واسبم ومختار افندی مبتلای علت صم اولوب استانبول  
 قاضیسی مراد زاده ایسه نطوق بر آدم اولدیغندن متکلم وحده منزله سنده اوله رق  
 گاه اوجاقجه وگاه دولتجه سوز اکا قالدی والعهده علی الراوی مراد زاده غرض  
 خفینی اکلامغله جمع صناید اشقیا اولان او طیه ورو دایه من بعد بو پادشاهک  
 طرفندن امنیت منصور میدر دیمش یا خود بشقه برسوز سو یلمش هر نه ایسه سر کرده لر  
 ایله نهانی مصاحبت ایله عودت ایتدکن صکره ایش بشقه رنک الدی .

شویاه که : کروه اشقیا اظهار خشم و غضب ایله شیخ الاسلام عطاء الله افندی نیک یانه  
 کلوب سلطان سلیمک سلطنتده استقلالی بوق زمام دولتی بر طاقم ظلمه نیک اللرینه ویردی  
 کندوسی مذاق نفسانی وهوای شهوانیسی ایله مشغول اولوب مستولیان دولت اولنلر  
 دخی فقرا ورعایه انواع ظلم و تعدی ایده یورلر دیهرک ودها بونک کچی خارج از ادب  
 افترالر ایدرک خلافتک صحت وعدم صحتی استفتا وحضار دخی بونلره موافقتدن  
 غیری چاره اولمدیغنی ایما ایتملری اوزرینه عطاء الله افندی سلطان سلیمک خلغنه فتوی  
 و یروب انجق باب عالیده بولنان علمایی دخی طلب ودعوت ایلمش اولدیغندن انلر  
 دخی آت میداننده کلدیلر .

ایشته اول ائنده صدور دن مصطفی عزت بك و حفید افندی ایله منیب افندی و مراد زاده افندی خلع مسئله سنده سر کرده لر ایله مباحثه و محاوره یه مبادرت و (بولایق دکدر پادشاه هر مسئولکنزه مساعدته ایتدی ارتق خاهی سوداسندن فارغ اولکنز) دیو نصیحت ایتدکری صر ده قزغانجی مصطفی دخی مواضعه اوله رق کویا بو خصوصه زور بارك اقلعنه دائر سوز سویلر و قباچینک ارقداش لردن بایوردلی سلیمان (پادشاه ایله قول اره سنه نفسانیت کیردی شمدن صکره نه او بزه پادشاهاق ایده بیلور ونه ده بز اکا قوللق ایده بیلور ز همان بوماده یه رابطه ویره لم) دیو مجاوبه و محاوره ایلر ایکن خار جده آت میداننده سلطان مصطفانک جلوسنه فاتحه او قونوب عسکر بر او غوردن آمین دیو چاغر شمعغه جلوس ایشی قرار بولیحق عطاء الله افندی (بوکا نه یابه لم) دیمش سر کرده لر دخی (سز علما افندیلرله بر لکده واروب اجلاس ایدر سکنز) دیمش (بن یالکنز کیده مم عسکر استرم) دیمش (بشیوز آدم اولسونمی) دیمش (دهاز یاده اولسون) دیمش (بك کوزل معیتکنزه ایکی بیک عسکر ترفیق ایده لم سرای هایونه وارنجیه قدر یکر می بیک آدم اولور) دیمش .

بونک اوزرینه ایکی بیک نفر اولق اوزره ایکی بیراق عسکرله سکبانباشی معزولاری وسائر او جاقلو شیخ الاسلام و علمای اعلامی آوب آلی ایله آت میدانندن حرکت ایتدکلر نده عسکریدن برفردک سرای هایونه کیر مامسی ایچون طرف شیخ الاسلامیدن صیقی تنبیه اولمغله عسکر سرای هایون پیشکاهنه واروب و بیراقلرینی باب هایونک ایکی طرفنه دیکوب طور دیلر شیخ الاسلام دخی رفقاسیله بر لکده باب عالی یه کلدکده موسی پاشاکال بشاشت ایله قادمه جنبان استقبال وا کدیکی تخم فسادک محصولی رؤیت ایله فریح البال اولدی باب عالی رجالی دخی عادی کسوه ایله بولندقلرندن البسه دیوانیه تدار کیه مشغول اولدیلر .

عطاء الله افندی منیب افندی یه خطاباً (سکبانباشی اگا ایله بر لکده اندرون هایونه واروب و سلطان سلیم افدمزی کوروب جمله قولاری افدمزک استراحتی و سلطان مصطفی افدمزک سلطنتی مطلوب ایتدکلرینی افاده ایدک) دیدکده منیب افندی (لطف و کرم ایدیکز بنی بو خدمتدن عفو بیوریکز) دیمکله دونوب بو خدمتی اناطولی قاضی عسکری حفید افندی یه تکلیف ایدجک (علی الرأس والعین) دیوب سکبانباشی ایله بر لکده سرای هایونه کیتدیلر فقط قپولر مسدود و فتح و کسادک اسبابی مفقود اولمغله عودت ایتدیلر بناءً علیه سلطان مصطفانک جلوسیه امر بیعت اتمام اولندجه عسکرک طاغلمیه جغنی مبین دارالسعادة اغاسنه تذکره یازیلوب وزیر قره قولاغی یدیه صغوق چشمه قپوسندن اندرون هایونه ارسال اولندی دارالسعادة اغاسی بوزهرلی تذکره نک مهرینی فک ایتمکسزین سلطان سایم سنت او طه سنده

ایکن یدینه تسلیم ایتمکله آچوب او قود قده (ذک تقدیر العزیز العلیم) دهرک کوشه کزین فراغت اولمقدن غیری چاره قالدیغنی ادراک وناچار حرم هایونه واروب تاج و تختی سلطان مصطفایه تبریک ایتمکله

کیجه پرانلرله زمی کرما کرمایدی شمعک \* سحر کوردن نه شمع مجلس آراوانه پرورانه بیتک مآلی اندرون هایونک موافق حالی اولمشیکن طیشارونک ایچرودن خبری اولدیغندن شاید سرای هایون قپولری آچلماز ایسه قلع ایچون قائم مقام پاشا لغمچی تدارکیله مشغول ایدی .

اولوقته قدرات میاننده کی غلبهک هپ بر طرفه طویلا تمش اولدیغندن سرای هایون باب عالی وایا صوفیه طرفلرنده کی زقاق و میدانلر طولمشیدی و کروه اشقیانمانی تعلیم اولدقاری اوزره سلطان سلیمی استمیوز سلطان مصطفی افندی زمی استرز دیو فریاد ایتمکده ایدیلر باب عالیده کی علما ورجال بو حاله نظر حیرت ایله باقوب طوره مقدمه ایکن اشقیانک برفرقه سی بونلر دهانه طوره یورلر دیو باب عالییه طوغری حرکت ایتدیلر چونکه موسی پاشا خائن دولت و دشمن انتظام مملکت اولدیغندن معلم و منتظم عسکر ایستمزدی اما بویله نهانی اشقیان تعلیمنده ماهر و هر درلو فتنه و فساد مناوره لرینک اجر اسنه قادر اولدیغندن ال التندن اشقیانی بویله استدیکی کی قوللانور ایدی اشقیانک برفرقه سی اولوجهله باب آصفیه و رودایله قوم میداننه غلغله انداز اولدقارنده چاوشباشی و کیلی حمدالله بک شیخ الاسلامک یانه کلوب نه طور بیورسکیز دهه توقف اولنور ایسه ایش فنا اوله جق بیوریکز سرای هایونه کیده لم دیمکله همان قیام و حرکت ایله سرای هایونه عزیمت اولدنیغنی هنکامده آلائی کوشکی پیشکاهنده برغلغله پیدا اولدی .

مکر مابینجی احمد مختار بک طویلوب پاشا قپوسنه کتوریلور ایکن درزیلر کارخانه سی اوکنده عسکری طائفه سی خنچر و غداره او شوروب پاره لمشلر .

میر مومی ایله خزینه کتخدالغندن چیقوب خوتین محافظی ایکن وفات ایدن خلیل پاشانک اوغلیدر پدرینک وفاتسده برادری اسماعیل بک ایله برابر بیکس قالوب سلطان مصطفای ثالث دورنده اندرون هایونه چراغ اوله رق شهزاده سلطان سلیمک خدمتده بولمشلر ایدی سلطان حمیدک جلوسنده اقبالدن دوشوب حتی اسمعیل بک اندرون هایوندن طشره اخراج اولتمشیدی بعده سلطان سلیمک جلوسنده احمد بک قرناهی شهر یاری عدادینه داخل و مابینجیلک خدمت رفیع سینه نائل و نزد شهر یاریده غایت مقبول و مقبل اوله رق اعظم رجال اندروندن بولمغله اسمی دفتر معهودده مندرج اولدیغندن تبدیل زی و هیئت ایله بر طرفه صاوشمق اوزره قوم قپوده بر خانه ده اختفا ایتش ایسه ده تجسس سینه مأمور اوللر باب عالییه کتورلر ایکن بروجه

مشروح صوغوق چشمه قپوسى پيشكاهنده اشقيا اوشوب پاره پاره ايديلر واحدا العين  
اسمر اللون دنواز كار ساز بر ذات ممتاز ايمش رحمة الله عليه .

\* سلطان مصطفى رابعك جلوسى ووقايع سائر \* \*

ايشته مصطفى رابعي اجلاس ايجون بوجه بالا ربيع الاولك يكرمى برنجى و مايس  
رومينك اون يدنجى جمعه كوني باب عاليدن باب هايوننه عازم اولان جمعيت احمد بكك  
نخش پاره پاره سنى تماشا ايدرك و يكيچريلرك سلطان مصطفى افنديمزي استرز ديو  
ايتدكرى صيحه مدهشانه لرني ايشيده رك باب هايوننه وارد قلنده قپوجيلر شيخ الاسلام  
وقائم مقام پاشا ايله علما ورجال دولتي كوردكارى كبي قپوي آچاريله كيروب اورته  
قپو دخى بو منوال اوزره كشاد اولمغين باب السعاده يه وارد قلنده يالكز  
شيخ الاسلام ايله قائم مقام پاشا ايجرو دخول وصفه تعبير اولنان محله وصول ايله  
قدوم شهر يار جديده منتظر اولديلر .

عطاء الله افندى ( توتى الملك من تشاء وتنزع الملك ممن تشاء ) آيت كريمه سنى تذكار ايله  
كيفيت نامرضيه يي سلطان سليمه اولقدر نازكانه وور ياكارانه تبليغ و اشعار ايتشيدى كه بيجاره  
سلطان سليم حالا كندوسنك باش دشمنى عطاء الله افندى اولديغنى اكلايه مدن ( آن  
مصر مملكت كه تويدى خراب شد \* وان نيل مكرمت كه شنيدى سراب شد )  
بيتك مالى كندوسنك حسب حالى اوله رق كوشه انزوايه شتابان بو ( كيتدى طوي  
بريكا سرودلارا بريكا ) و قفنجه سلطان مصطفى دخى حرم هايوندن طشره خرامان  
اولدوقده ابتدا شيخ الاسلام ايله قائم مقام پاشا بيعت و خرقة شريف او طه سنه كلوب  
روحانيت نبويه يه توسل ايله استعدادى موفقيت و متعاقباً اندرون هايون اغالرى ايفاي  
بيعت خاصه يه مسارعت ايتدكدن صكره باب السعاده پيشكاهنده آماده اولاتخت  
هايوننه ساعت بشى اتوز بش دقيقه مرورنده سلطان مصطفى رابع جلوس ايله  
بيعت عامه اتمام اولدى و وقت ظهر كلش و بلنكه براز كچكمش اولديغندن همان  
اياصوفيه جامعه سلامق ايديله رك جمعه نمازى قلندى ( كل نعيم الى نفاذ و كل كون  
الى فساد كل مالك الى زوال والله هو الباقي لايزول ولايزال ) .

اول كون خاص او طه دن سليمان اغا و طيفور پاشا زاده على بك و طيفور بك  
ماينجياك خدمتيله بكام اولوب طيفور بكة سر كتابتى خدمتى دخى علاوة  
ماموريت بيورلمشدر .

بعد البيعه علما و عسكر هيتت مجموعه لرى ايله ات ميداننه عودت ايتدكرنده امور  
بحريه ناظرى حاجى ابراهيم افندى طوتياوب اعدام ايدلمشدر .

افندى مومى اليه ايكينوز ايكي تاريخنده اردوى هايونك روم ايلي جانبته خر و جنده

دفتردار اولان اسماعیل بك افدینك مخدومیدر عنفوان شبانده مکتوبیء صدر عالی او طه سنه دوام اوزره ایکن رئیس الکتاب بولنان پناجیحیلر امامی زاده الحاج مصطفی افندی یه قرابت صهریه پیدا ایتک ملاسه سیله دفعه سرخلیفه وبعده مکرراً مکتوبیحی اولمشیدی. دفعه ثانیه مکتوبیحیانی سفر مذکورهنکامنه مصادف اوله رق روسجق مشتاسنده ایکن درسعاده عودت ایله رکاب هایون کتخداسی اولمش ایسه اوته دنبرو خصم جانی اولان غازی حسن پاشا متعاقباً صدر اعظم اولیجق انک النسنن یقه سنی قور تارمق اوزره صره امانتی استحصال ایله جانب حجازه واروب حسن پاشا ایسه آره سی چوق کچمکسزین وفات ایتمکله صاحب ترجمه ایفای فریضه حج ایدوب کلدکدن صکره باش محاسبه منصبیله اردوی هایونه کیدوب کلدی وملك پاشا صدارتنده بالاصاله کتخدای صدر عالی اولدی .

بعد الانفصال مکرراً دفتردارلق و ترسانه امانتی و ایراد جدید دفتردارلقی و حبوبات نظارتی منصبلرینی دور ایده کلدیکی حالده انکلیز دونماسنک درسعاده ورودنده ترسانه عامره لوازماتک نظامسزلغی امور بحریه ناظری بولنان مورهللی علی افدینک لیاقتسز لکنه حمل اولمغله عزل اولنه رق یرینه صاحب ترجمه امور بحریه ناظری نصب اولندی فن اکتابنده ماهر و تدبیر امورده مثلی نادر اصیلزاده و فطین و صاحب وقار و تمکین اولوب نظام جدیدک بدایتدن برو اکثر مصالح متفرعه سنک مدیر و مدبری و یجه اجرا آت جدیده نك مشکل و مصوری اولمق حسبیله سلطان سایم خان حضر تلرینک مظهر کمال حسن نظری اولان اعظم رجال دولت عایه دن اولوب فقط غدارلق و مرحتسزلك ایله مقدوح و معیب و بین الناس کیزلی ستمه دیو مقاب ایدی بوکره اودخی برطاق بی رحم اشقیما یدنده مقتول و مغدور اولدی .

شوبله که : بوجه بالا یماقارک درسعاده عبورلری اوزرینه باب عالی دن ترسانه یه کیتد کدن صکره خواجکان دیوان هایون دن اولوب سفارته آوروپا جانبنده بولنان وحید افدینک ایوب سمتنده واقع ساحلخانه سنده اختفا ایتمشیکن انده ثبات ایدمه یرک باشنه شال اورتوب براختیار قایقجینک برچفته قایغنه را کبا بکلر بکی نهایتنده واقع ساحلخانه سنه متصل زقاق ایسکله سنه چیقدیغنده طبعاً بخیل و تمسک بذات اولدیغی حالده کویا سلامت یقه سنه چیمش اولدیغنه تشکراً خلاف معتادی اوله رق قایقچی یه بر مقدار التون اعطاسیله اعاده ایتد کدن صکره ارقه طرفدن یالیسنه کیروب بانچوانی اولان برذمی معرفتیه درون ساحلخانه ده موجود اولان سردابه کیزلنمش و تجسس مأمور اولنلر قوناغنی و یالیسنی ارا یوب بوله مدقلرندن سو بسو تحریاته ابتدار ایتلریله قایقچی اوله جق یرنا بالغ ( فلان ایسکله یه شوقیافتده ملبس بر شخص مستور الحال چیقاردم حتی بکا



خیلدیجه التون ویردی) دیو خبر ویرمیسی اوزرینه تکرار یالی یه واروب باغچوانی  
تصدیق ایتدکلی کی نهان اولدیغی سردابی ارانه ایتمکه طوتوب باب عالی یه  
کتوردکلرنده چونکه بو مقوله فترتارده جلوس هایون وقوعندن صکره آدم  
پاره له مق مسبوق بالمثل اولدیغندن موسی پاشا کندوسنی چاوشباشی او طه سنه مسافر  
ویروب ( قورقما سونلر کندولرینه برشی یوقدر بر مقدار استراحت ایتسونلر  
قوناقلرینه عودتلی ایچون رخصت ویریلور ) دیو خبر کوندرمکه برابر برنجی  
درجه ده قانتی ایچمکه تشنه اولدیغی رجال دولتدن بری اولدیغندن قباقچی یه دخی  
( کیزلو ستمه طوتلدی قوده در کلسونلر جبراً الوب قیدینی کورسونلر ) دیو  
کیزلوجه خبر ایرشدرمکه کندوسنی دیوانده ایکن قباقچی طرفندن برکروه اشقیا  
کلوب وچاوشباشی او طه سنی باصه رق بیچاره بی الوب وائشای راهده صقانی یولوب  
( بوکا کیزلو ستمه دیرلر هرکی طوته جق اولورسه خلاص ممکن دکلر . فقط  
صقالتک قیلی کندو مضرتی دافدر ) دیه رک و قیللرینی شوکا بوکا ویره رک انواع  
حقارتله بازیدده یمنیجیلر پشکا هنه قدر کورتور مشلر ایسه ده نحیف البینه وضعیف  
الوجود اولدیغی حالده حدیث سندن بروییان یوریمکه الشماش اولدیغندن اوراده  
یتاب وتوان دوشوب قالمش واندن ایلرویه حرکت ایدمه جکی اکلاشلمش اولسینه  
درحال اشقیا یچاق اوشوروب پاره له مشلر وهان سر مقطوعنی ات میداننه  
ایصال ایلمشدر .

وینه اول کون سرکاتی احمد افندیگ دخی سر مقطوعنی ات میداننه کتورلمکه  
بروجه آتی ترجمه حاله ایتدار اولنور .

افندی مومی الیه براوچینگ اوغلی اولوب سلطان سلیم خان حضرتلری کناکشلمکه  
هوس ایتدکلرندن فن تیراندازیده مهارتی بکنمکه اندرون هایونه الوب قرنا  
عدادینه الحاق ایتش ایدی سرکاتی وژکا ورویت صاحبی اولوب وزد پادشاهیده  
فوق العاده اعتبار بولوب صدر اعظم اولنلر بیله کندویه مدارا و مداهنه ایلردی .  
وقعه ظهورنده تبدیل قیافت ایدرک کندو آشچی باشینک بوز طغان کمری سمتده  
واقع خانه سنده اختفا ایتش ایکن تجسسینه مامور اولنلر اول خانه نک اطرافنه  
کلرکلرنده نه یاپه جغنی شاشرمغله طامدن طامه انالیوب قورتلوق اوزره اول خانه نک  
طامندن قارشوکی طامه آتلدقده زقاقه دوشه رک خرد وخاش اولمغله اوراده بولنان  
عجمی اوغلانلرندن بری مردار اولسون دیه رک عجماله باشنی کسوب ات میداننه  
کورتور مشدر اول عصرک بعض شعراسی

اوچدی طامدن ایتدی طاموی مقر \* بو کوپکه بو قدر اوچق یتر

بیت قدیم مشهورینک حروف منقوطة سنی حساب ایله تاریخ دوشورمشدر .  
 مقدمه وقعه نك ظهورنده صاحب ترجمه وخامت انجاسی ملاحظه ایدرك تخلص  
 نفس ایچون طریق علمایه دخول ایله اندرون هایوندن قطع علاقه صورتی تدبیر  
 حسن کورمکله باخامسه عهده سنه رؤس هایون اعطاسی ایچون برقطعه خط هایون  
 اصدار ایتدیرمش وهمان لویه سنی صالیورمش ایسه ده خط هایون باب عالیده قالب  
 اجرا سنه وقت مساعد اوله مامش ایدی . بو کره سر مقطوعنده صقال باشی  
 کورنلر (صقال باشه فدا) مثانی (باش صقاله فدا) کلامنه قلب و تحویل ایله هزل  
 واستهزا ایتمشلر .

بوایکی وقعه ایله اخشام اولوب امور عسکرینه نك تنظیمی ایچون فرداسی ینه ات  
 میداننه کیمک اوزره شیخ الاسلام و علمای اعلام اول کیجه خانه لرینه کیتدیلر .  
 و فرداسی جمعه ایرتسی کونی علی السحرینه ات میداننده تجمع ایدوب و اوجاقلو ایله  
 برلشوب عقد مجلس ایدرك (التماسکز نه ایسه مساعدده شاهانه ارزاندر) دیو بوغاز  
 سر کرده لردن استمزاج ایتدیلر .

چونکه قره دکر بوغازی محافظی اولان میر میراندن اینجه محمد پاشا وقعه ظهورنده  
 فرار ایله خانه سنده اختفا ایلمش اولدیغندن قباجقی مصطفی اغا روم ایلی قلعه لری  
 نظارت و اغالغی استمکله بروجه التماس طورناجی باشلیق پایه سیله مطلوبی اجرا  
 بیوردلی سر کرده لردن ارناود علی دخی انا طولی طرفنده واقع قلعه لر نظارت  
 و اغالغی التماس ایتمکله اکا دخی انا طولی قلعه لری اغالغی و دیگر سر کرده لردن  
 بایوردلی سلیمان اغایه التماسی وجهله ترسانه عامره سنجاق قپودانغی ویرلدی دیگر  
 سر کرده ممشک مراحمی استفسار اولندقده بیک التون ایسترم بشقه شی ایستهم دیمش  
 ایسه ده سننده یوللو بررتبه و ما موریت ایسته دینلوب براز محاوره دن صکره  
 یوز یکریمی اچقه یومیه ایله خاصکی تقاعد لکنه راضی اولدیغندن انک خاطرلی دخی  
 اولوجهله خوش ایدلی و مومی الیهم باشبوغ و سر کرده لرك رفاقتلرنده بولنان  
 اون یدی چاوشه علی مراتبهم التمشر والیشر و قرقر اچقه یومیه لر ترتیب و تنظیم  
 اولندقدن صکره یماقارک نفراتی دخی یکر میشر اچقه یومیه ایسته دکلرنده سکبانباشی  
 عارف اغا (باقک اغالراختیارلر بن دین و دولت خانی دکم بونلرک ایستدکلی یومیه لر  
 سنوی بیک کیسه اچقه یه بالغ اولور حالا سفر هایون وار بیت المال مسلمینک حالی  
 معلوم بن بواهایی ایده مم هم بونلرک اسامه لری طولغوندر شوکتلو اقدیمز بونلره  
 بخشش احسان بیورسونلر بن اسامه عرض ایلیه مم) دیو ثبات ایلیه رک و سر ادخی  
 اوجاقلونک قولاغنه (الله ایچون اولسون بومادهی دفع ایدیکز) دیو سویلیه رک

بيت المسالك محافظه سی امرنده طوغریسی کوزل همت ایلمشدر . لکن بوندن طولای یماقلر کروهی کندوسنه اضمار غیظ ایتمشیدی .

زوربالرک زعنجه شیخ الاسلام سابق صالح زاده اسعد افندی دخی نظام جدید مروجلری صره سنه کیرمش وادرنه وقعه سننده یکیچر یلر علیهنه فتوی ویرهش اولدیغندن کرک آنک و کرک اندرونه متخصص اولان بعض علمانک دخی طلب وازاله لری میدانه قونلایسه ده بوماده علما حقه ده بر سوء مثال اولور وسائر دخی سرایت ایده بیلور مطالعه سیله شیخ الاسلام افندی بوبابده ثبات ومثانت کوسترمکله اول داعیه دن صرف نظر ایتمکدن بشقه اول ائنده دفتر مطلوبده داخل اولوبده وقعه ظهورنده اخفا ایتمش اولان قبان دقیق ناچی مدرسیندن عبداللطیف افندی آنک بولنوب طولایغی خبری ات میداننه واصل اولدقده میدان اغاری ( قبان ناچی علمادندر میدانه کتورلمسون تأدیجی شیخ الاسلام افندی یه حواله اولنسون ) دیوب رجال دولت کبی میدانده پاره لیمسنی تجویز ایتمدیلر فقط تاویل ایله یعنی طریقی تبدیل ایله اعدامی مقرر اولدیغندن اول امرده قبان نیابتندن طولای حسابنک رؤیتنه ابتدار اولندی .

اول ائنده ترسانه چاوشلرندن بری ات میداننه کلوب و مجلسه کیروب ( حاجی ابراهیم افندی اعدام اولمق حسینیه ترسانه خالی وایشلر معطل قالدی جمله ترسانه خالق سلام اییدی مصطفی رشید افندی بی ترسانه امینی ایستلر ) دیدکده حضارک جمله سی مناسبدر دیمکله همان اول کون باب عالیده رشید افندی یه خلعت کیدیرلدی فقط محدثانک رفعی ماترم اولمغله امور بحر یه نظارتی شق ثالث دفتر دارلغندن بالتفریق کافی السابق ترسانه اماتی عنوانیه مصطفی رشید افندی یه توجیه اولنه رق شق ثالث دفتر دارلغنی خواجکان دیوان هایوندن عونئی افندی یه وایکی کوندنبرو خالی قلان ضربخانه اماتی دخی خواجکان دیوان هایوندن سید محمد افندی یه احاله بیورلدی .

مصطفی رشید افندی کوسه کتخدا دینمکله معروف اولوب نظام جدیدک بدایتده نظام جدید دفتر داری اولمش و نظام جدیدک اکثر متفرعاتی آنک دستیار یه همیتیه حصول بولمش اولدیغندن یکیچر یلر جمله دن زیاده آنک دشمن جانی اوله رق و ( مصیبت کوسه کتخدا خوشمدی یل ) دهرک اکا دیش بیله یوب حتی بردفعه روم ایلی طرفدن اناطولی یقه سنه عسکر امرار اولنورکن ساحلخانه سنه تفنک آتمشلر ایدی . شو حاله نظر آ وقعه ظهورنده جمله دن اول آنک اعدامنه قیام ایتملری ملحوظ ایکن بالعکس ترسانه امانتیه میدانه چیقورمسی بادی تعجب اولمشدر مکر که مصر سفرنده یکیچر یلر اکرام واعانه ایله کندوسنی سودیرهش و نظام جدیده خدمت خصوصنده کندوی

مجبور ومع الكراهه محكوم قضیه (المأمور معذور) کو سترمش وطوبخانه به مأمور بتده  
 طوبخچیلری دخی خشنود ایتدکن بشقه حر یقلر وقوعنده وایام معدوده ده وسیله  
 بولدجه اطعام واکرام ایله طوائف عسکریه نك جلب وتالیف خاطرینه اهتمام ایتمش  
 والحاصل نظام جدیده حسن خدمت ایتمکه برابر دأئماً افکار عتیقه طرفولرینی دخی  
 کوزتمش ایدوکنه و بو کره دخی هر نصلسه یول بولوب متغلبه نك ایش ار لرینه یناشه رق  
 ایشنی یولنه قویمش اولدیغنه مبنی اقران وامثالنك زورچقه وجودلری پاره پاره  
 اولدینی برشدتلو فورتنه هنکامنده کمیسنی قورتاروب و خلعت امانت ایله ترسانه به  
 یناشوب سلامت بولمشدر .

اقر باسندن سابقا اناتولی قاضی عسکری امین پاشا زاده محمد امین بك افندی دخی  
 ( محقق و دیندار آدمدر کلسون بزمله میدانده معیت ایلسون ایشیمزه یارار ) دیو  
 اغالر طرفدن براییکی دفعه افاده اولمغله شیخ الاسلام افندی قوناغنه آدم کوندروب  
 دعوت ایلمش ایسه ده اختفا ایدرک ایام اختلالده میدانده حقیق مامشیدی .

ات میداننده بومثللو ایشلره اشتغال اولدینی ائنده اصحاب اغراضدن باشی شاللو  
 برکسنه کلوب قباجچینک انه بر پوصله و یردی و بونلریده میدانده کتوروب اعدام  
 ایدیکز دیدی دروننده صرافانندن یهودی شانطو و شابجی وارمنیلردن صراف  
 ظنغر اوغللری و کلانلی اوغلی کبی اون قدر ذمی مسطور ایدی بونلرایسه قباجچینک  
 دفتزنده اولدیغندن پوصله بی یکیکچری کاتبلرندن علی افندینک اینه و یروب  
 ( نه پاهلم بونلریده پاره لیه یممی ) دیو سؤال ایتدکده علی افندی ( بهی جانم بویله  
 شی اولماز بونلرجه نك ایشنه یارار بازرکانلردر دولت علیه نك دخی خدمتی ایدرلر  
 بر آلائی بی جرم رعایا و ذمی مقوله سنی بلاموجب اعدام ایتمک اولورمی بو حریفک  
 آنلره دعواسی و ارایسه ایسته پاشا قپوسی ایشته حاکم قپوسی وارسون عر فحال  
 ایتسون حقنی آلسون بویله مناسبتمز ایش اوله مز بو حریفک پوصله سنی یرت  
 و کندوسنی دفع ایت ) دیمکله قباجچی دخی همان پوصله بی یرتمش و چیق طیشارو  
 دیو عنف ایله اول شخصی طرد ایتمشدر .

ممالک محروسه ده بولنان یهودیلر دأئماً اخذ واعطا ایله مشغول اولوب اصلا خور  
 ایشنه قارشمدا قیلرندن بومثللو اختلالاتک آثار و خیمه سندن دخی حصه دار اولمازلردی  
 کذلک ارمنیلره استانبولک تجار و اصنافدن بولنان روملری دخی پولتیقه ایشلرنده  
 بولمدا قیلرینه مبنی هر وقت آزاده سر اوله رق ایام اختلالده دخی برکونه ضرر  
 کورمز لردی اما استانبولک فاملو تعبیر اولنان اصلزاده لری دولت علیه نك امور  
 دیپلوماتیکه سنده مستخدم اولدیلرندن وقت آسایشده بیله ملت اسلامیه دن اولان

مأمورین کبی بعضاً قضایه او غرار لر دی بو اصول مقرره موجبجه سالف الذکر  
 صرافلری دخی بر علی افندی پک قولایقله تخلیص ایلمشدر .  
 اول کون بعد الظهر شیخ الاسلام وعلماخانه لرینه عزیمت ایله مجلس طاغدیغی  
 اوانده نظام جدید دفترداری احمد بک طوتمش ایسهده یوزنجی جماعتک قتمله سنه  
 دخیل دوشمکله تخلیص جان ایلمشدر .  
 تفصیلی بومنوال اوزره درکه برمنوال سابق مجلس شوراده ایکن زور بالرک ات  
 میدانته تجمعلری اوانده کندولری ایچون سلامت حال بعید عن الاحتمال اولدیغنه  
 مبنی حضور قائم مقامیدن خروجنده چوقدار لرینه ( بن براز کتخدا بکک او طه سنده  
 توقف ایده حکم بارگیری رئیس قپوسندن کتخدا بکک بنکک طاشنه طولاشدیریکز )  
 دیو صاوبو یاننده یالکز مهتر باشیمی قالمش اکا دخی ( بن بورادن پیاده کیدرم  
 سن افندی کتخدا بکک یاننده در دیو اوشاقلری بر چاریک قدر اویالاندر صکره  
 بارگیری آل قوناغه کیت ) دیوب و کندوسی پیاده ویالکز جه رئیس قپوسندن  
 چیقوب باب عالی جوارنده دوستارندن برینک خانه سنه دخول واختفا اتمش  
 ایسهده متعاقباً بعض رجالک اعداماری اوزرینه صاحب خانه دن بوی تلونوبی  
 وفای استشمام ایتدیکنه بناء کیجه لین اول خانه دن چیقوب صابه یولاردن طولاشه رق  
 کتخدا سنک سایمانیه جوارنده واقع خانه سنه کلوب کیزلمش حالبوکه اول خانه  
 کندو قوناغی جوارنده بولمغله محله لو کندوسنک سنه آشنا ایمش . بناء عایه  
 اراقده او کسوردیکندن جار ملاصقی اولان برکیمسه نک ولد مادر بخطایمی  
 کندوسنک اوراده محتی اولدیغی استدلال و اتفاقاً اورادن برکروه اشقیامرورنده  
 نظام جدید دفترداری بوراده صاقاودر دیو اخبار ایتمکین اشقیاقیوبی چالملیله  
 ارتق اختفانک فأنده سی اولیه جغنی تیقن ایدرک بالذات قیوبی آچوب نه ایستر سکر  
 دیدکده ( نظام جدید دفترداری بوراده مخفی ایمش ارایه جغز ) دیملری اوزرینه  
 ( ایشته ارادیغکر بنم لکن نه ایشده مدخلم وار ) دیر دیمز ( کل سنی میدانه  
 کوتوره جکر ) دیه رک طوتوب یوله دوزلمشلمر مکرکه افندیء مومی ایله مقدا  
 یکچیری قشله سنه بنا امینی اولدقده اوجاقلودن بعضلریله کرم الفت اولدیغندن آنلر  
 سوز باشلرینی قضیه دن آگاه ایدرک آنی حمایه ایتمک اوزره اول طرفه قوجیلر تعیین  
 ایتمشلمر بوکره اشقیای آنی طوتوب کوتورر ایکن اول قوجیلر تصادف ایدرک  
 ( بو افندی بزم یولداشمزدر ویکچیری اوجاغنک خیر خواهیدر بزانی قشله یه  
 کوتورررز ) دیو اول اشقیانک اللرندن آلوب قشله لرینه کوتورمشرلر اوجاق اختیارلری  
 دخی ( اوجاغه دوشدی چاره یوق برشی دینله مز ) دیه رک قباچیدن عفونی التماس

ایتمشدر اودخی عفو ایتمکله اوکیجه قشله ده بیتوتت ایتدیر یلوب فرداسی قوناغنه کوندرلدی دفتر معهودده مسطور الاسامی اولان ذوات ایچنده آندن بشقه خلاص بولان یوقدر .

اول کیجه قزغانچی مصطفی معرفتیه قشله لره پرنج ویاغ ویریه رک زوربالره طرف شاهانه دن ضیافت واکرام اولمشدر .

بوصورتله اسحاب فساده اغراضی حصول بولمش وایش آرتق تمام اولمش دیمک اولمسیله جمعیت طاغیلوب وعسکرینک الی چکیلو بده موسی پاشا مقامنده مستقل قالمق ایستردی فقط شایدکه ایلروده دوچار مؤاخذه اولمق اندیشه سی بالمله زوربالرک جایکیر ضمیرخیانت سمیرلری ایدی .

بناءً علیه ات میداننده کی جمعیت طاغله قدن صکره صدر روم ایلی مختار افندی ونقیب الاشراف دری زاده عبدالله افندی و صدر اناطولی حنفید افندی واستانبول پایهلولرندن منیب افندی وبالفعل استانبول قاضیسی مراد زاده افندی شیخ الاسلام قوناغنه دعوت اولنه رق قائم مقام موسی پاشا دخی حاضر اولدینی حالدله حضور شیخ الاسلامیده عقد اولنان مجلسه سکبانباشی عارف اغا وواجقونک ایلر وکلنلری احضار ایله اجرا اولنان مکالماتک نتیجه سنده حسب القدر ظهوره کلان حادثه دن طولانی یکینچر یلردن هیچ بری مؤاخذه اولتماق و فقط انلرک طرفندن دخی فیما بعد امور دولته مداخله قلنماق خصوصلری طرفیندن تعهد وتأمین اولنوب بومالده منیب افندی نیک اثر قلم جاحظی الرقلمی اولمق اوزره ایکی نسخه اوله رق برحمت یازیلوب برنسخه سی شیخ الاسلام وقائم مقام ایله سالف الذکر علمای اعلام طرفلرندن بعد التمهیر بالاسی خط هایون ملوکانه ایله توشیح بیورلدقدن صکره فرداسی بازار کونی رئیس وکیلی حالت افندی بونی الوب ایکی الریله کوسندن یوقاروطوته رق باب عالی دن تشریفاتی و محضر اغانی بعضی مامورین و طرف شیخ الاسلامیدن منیب افندی ودیکر بعضی خدمه شرعیه برلکده البسه رسمیه لر یله آتله راکباً آلائی ایله اغا قپوسنه واردقاری کی جمله ضابطان زقاق قپوسندن سلامیوب بنک طاشنه وادقارنده منیب افندی حجتی قرائت ودر ونسنده مندرج اولان آیات کریمه واحادیث شریفه یی واعظانه تفسیر وایضاح ایتدکدن صکره حالت افندی یه ویروب اودخی بالاسنده کی خط هایونی قرائت ایتدیکی عقبنده سلیمانیه واعظی بردعا ایدوب بعده حالت افندی جمهوره خطاباً (اغالر یولداشلر تهمتدر دیو خوف ایدرک سند ایستدیکز ماده یی شوکتلو پادشاهمز وجمه علما ورجال دولتری سزه خدمت صایتمشدر در شمعی قلیکز مطمئن اولدیمی) دیمسی اوزرینه (های های مطمئن

اولدق الله تعالى شوکتلو پادشاهمزك قلیجینی کسکین ایلسون) دیودعا ایدرک یکیکچری  
 او جاغنده حفظ اولنق اوزره حجتی الوب سکباناشی عارف اغا و محمد و عثمان و حاجی  
 محمد نام سکباناشی معز وللری اغالر و او جاق چاوشی سلیمان و متولی حاجی سلیمان  
 و باش چاوش و کیلی مصطفی و او جاق باش کاتبی عبدی افندی و سائر طرفندن محتوم  
 و ممضی اولان دیگر نسخه سنی دخی نزد دولتیله ده حفظ اولنق اوزره حالت  
 افندی به تسلیم ایندیله و بو وجهه سندلر مبادله و لازم کناره خلعتلر الباس  
 اولندقدن صکره یماقار قلعه لرینه و سائر یکیکچریلر یولو یرینه کیتدیله .

کرك حجتك و كرك بالاسنه كشيده بيور يلان خط هايونك صورتاري ذيلده (۶)  
 رقمه ايراد اولنور .

بو مقوله فترتلك نتیجه سنده مضی ماضی معامله سیله تأمینات و یرمك عادت اولمش  
 ایسه ده بویه آلائی ترتیب اولنهرق زوربالر ایله معاهده سندلری مبادله اولنق  
 امثالسر بر بدعت اولدیغندن اول عصرک عقلاسی بونی تقبیح ایتشیرایدی فی الواقع  
 بدع و محدثاتی رفع و ازاله داعیه سیله میدانه چیقان دولتولرک بویه دولته مسبوق  
 بالمثل اولمان برزدالت احدائیله ایسه باشلاملری غرائب و قایع عصریه دندر .

بو وقعه مهارتلو فساد پیشه لرك ایشی اولدیغندن اوان اختلالده ضابطه بلدیه یه سگسته  
 کلدی و اهالیجه هتک عرض و غضب و نهب اموال کبی فناقلر وقوع بولدی  
 و بدایت وقعه ده اهل عرض طاقی پک زیاده تلاشه دوشمش ایکن امنیت عمومیه  
 اصلاخلدیز اولدی اویله برقتنه عظیمة نك بویه ضرر سزجه کچشدیرلمش اولسنه  
 عامه ناس متشکر اولمشیدی لکن بوندن دولت علیه ترتب ایدن انواع خسار  
 و زیان قابل تعداد و بیان دکدر .

از جمله روسیه سفری ایچون اولنان بونجه تشبئات و ترتیبات کاملاً هبا اولدی  
 و یار و اغیار نظر نده دولتک شان و نفوذینه خلل کلدی هر کس و ناکس بروفق .

(بیت)

در چشم کندخانه مکس را چودهی روی \* باسقله همان به که مدارانه کندکس  
 ایسه قاریشور اولدی و گروه اسافل پک زیاده یوز بولدی اعدام اولنان رجال  
 دولت نیجه زمانلر دنبرو مصلحت ایچنده یوارلنهرق یتشمش اولان اصحاب معلومات  
 و نادر الوجود ذوات ایدی بویه محاربه زماننده و آوروپانک پک قاریشق او اننده  
 او مثللو ایش ارلری اولان دولت رجانی الدن چیقارمق دولتجه بیوک ضایعات ایدی  
 زیرا دفعه لر لرینه آدم بولمق مشکل ایدی عطاء الله افندی نك معلوماتی و منیب افندی نك  
 تالیفاتی ایله دخی عصرک حل مشکلاتی قابل دکل ایدی هر عصرده نفوذ استیان

و منصب ارايان چوقدر لکن ايش آدمی امداد وقت ايله ايش ايچنده يتيشوب بشقه مکتبی يوقدر الحاصل بو وقعه دن دولتک مادی و معنوی کوردیکی ضرر لر حد عد و احصادن خار جدر .

هله بونجه امکار صرفيله وجوده کتورلمش و پک چوق محسناتی کورلمش اولان نظام جدیدک دفعه الغاسی عظیم تأسف اولنه جق موادندر که انک اوزرینه دولت علیه بیوک بیوک غوائل و مخاطرات صاوشدیر و ب نهایت یکيچری اوجاغنی رفعله عساکر نظامیه ترتینه موفق اولمشدر لکن بواره ده مادی و معنوی پک چوق ضرر لرله اوغرامشدر و اکر اره یه بویله بروقت فترت کرمیوبده سلطان سلیمک وضع ایتدیکی نظام جدید اصولی بلافاصله اولوقدنبرو متصل و مسلسل کلمش اولسیدی دولت علیه بشقه یول آلور و شمدی مکت و سطوتی دها زیاده اولور ایدی و اعا سلطان سلیم رجالی آزتدیلر و اسراف و احتشاماتده پک ایلر و کتیدیلر و شرع و عاده مغایر حرکتله بیهوده یه خلقی کندولرندن متفر ایتدیلر . بناء علیه تأدیب و تربیه یه مستحق اولدیلر دیلم لکن دولت و ملتک سلامتی ایچون وضع اولنان نظام جدیدک الغاسیله دولتک بوقدر رخنهدار ایدلمسی دکل بر پره ایچون بر یورغان یاقق بلکه بر قاچ فاره ایچون بر شهرده بر بیوک یانغین یاقمقدن دها اشعدر بوکا سبب اولنلرک دولت و ملت نه بیوک اهانت و خیانت ایلمش اولدقنری بیان ایچون بوندن زیاده تفصیله حاجت کورلمز .

ربیع الاولک یکر می دردنجی بازار ایرتسی کونی خداوندکار سابقک بعض احوالی و رجال و قر ناسنک اطوار و افغانی مذکر و بعض اوامر و زواجری مشعر و قائم مقام پاشانک مقامنده تقریر و ابقاسنه دائر بر قطعه خط هایون صادر اوله رق باب عالیده علناً او قوندی و یکيچریاره جلوس بخششی اوله رق طرف شاهانه دن یوز سکمان بیک و همشیره لر ی اسم سلطان طرفندن یکر می بیک غروش احسان اولندی و قلاع سبعة نفراتنه بشقه جه یوز بیک غروش احسان هایون اولوب اوجاغ باش چاوشی مصطفی اغا دیدله قره دکز بوغازینه ارسال قلندی فرداسی صالی کونی سلطان مصطفی خان حضر تارینک شهزاده لکنده لالاسی اولان فودله کاتبی محمد افندی والده سلطان کتخداسی اولدی و فرداسی چهارشنبه کونی قهوه جی باشی حسین اغا دخان کمرکی امانتیه اندرون هایوندن چیقوب سر قهوه جی ئانی بلبل حافظ دخی دارالسعاده اغاسی یازیحیلنی ايله چراغ بیورلدی .

ویکر می یدنجی پنجشنبه کونی شهر یار مشارالیه ارسال لویه ایدوب دعاسی اصول مرعیه سی اوزره اندرون هایونده ایفا ایدلدی .



وینہ اول کون قائم مقام پاشا مہر داری اولان رجائی زاده جلال بك كتخدا كاتبي اولوب سانی صادق افندی یہ دخی طوپخانہ نظارتی ویرلدی .

ربیع الآخر ك غره سی اولان بازار کونی والده سلطان حضرت تاری عظیم آلائی ایله اسکی سرایدن سرای هایونه نقل اولنوب سلطان مصطفی خان حضرت تاری والده لرینی اورته قیو پیشکاهندن استقبال بیورمشدر .

وماه مرقومك بشنجی پنچشنبه کونی قلیج آلائی اولوب سلطان مصطفی آلائی والایله ابتدا جد امجدلری ابو الفتح جامع شریفه واروب تر به لرینی زیارت ایتدکن صکره ابو ایوب خالد بن زید حضرت تلرینك تر به شریفه لرینه کیدوب وقت سفر اولدیغندن قهر اعدا نیتته جد اعلا لری سلطان عثمان غازی حضرت تارینك قلیجینی ساعت بشی براز کچهرک شیخ الاسلام و تقیب الاشراف افندی لریك مباشرت لریله میان شوکتته بند و تقاید ایله عودت و دفتر دار اسکله سنه قدر آلائی ایله کلوب اورادن صندال سوار اوله رق بحر آ سرای هایونه عزیمت بیوردی .

اخبار جلوس هایون ضمنده بعض دوله نامه لر یازلدیغی صروده غرب اقصى یعنی فاس حاکمی مولی اسماعیل قبلنده دخی خواجه منیب افندی نك انشاسیله برقطعه نامه هایون کوندرلشدر صورتی زیرده (۷) رقیله ایراد اولنور .

مقتول اولان رجال دولتك علی الخصوص ابراهیم كتخدا ایله سرکاتبنك بك چوق نقود و مجوهراتی و اسهام و مقاطعاتی ظهور ایدوب اولوقتک اصولنجه بونار هپ جانب میری یه عائد اولدیغندن مصارف سفری یه خلیججه مدار اولور دینیلور ایکن کشتکانه بس الخلف اولان نوجاهان کر سنه چشمان خفی و جلی نیما کر لکه قویولدیار و خار جده باش یغماچی موسی پاشا ایدی چونکه سلطان مصطفی خان حضرت تاری ذاتاً صاف درون و آزاده سرواحوال زمانه دن بی خبر و حجر و کهر عنندنه برابر اولدیغی حالده نیجه وقتار دنیرو آرزو کش اولدیغی سلطنته موسی پاشانك دسیسه کار لغیله نائل اولدیغنه بناء زمام دولتی بتون بتون انك دست خیانتته تسایم اتمش اولدیغندن اودخی کشتکانه خانه و ساحا خایه لرندن و مال صاقلامش اولدقاری مغازه و محزنارندن طاقم طاقم توارد ایدن نقود و مجوهراتك و بعض صرافان ذمترنده اولان تحویلاتك بعضیسنی آشور هرق و بعض جواهر ثمنی بی جزئی قیمتله قیاده رق کلی نقود و اشیا اختلاس ایدوب سائر متنفذان دخی درجه نفوذ و نسبتارینه کوره بو یغما کر لکدن حصه آلدیلر اندرون هایوننده کی قرنا و سائر متعینانندن اولان نو دولتان دخی آج قورت کبی هر طرفه هجوم ایله خیلی شی چالوب چارپدی لره له بعضیلری (امسیت فقیراً اصبحت غنیاً) مآلنه هم حال اولدی لر اولو جهله بونجه اموال

واشیانک چوغی شونک بونک الرنده قالدقندن بشقه سلطان سلیم زماننده اسهام ومقاطعات سکنر ییلغنه آنوب ویریلور ایکن بوکره ظهور ایدن محلولات اوچر سنه لکنه قدر قبادلمشدر اول یغماجیلر بوکا دخی قناعت ایتیه رک مقتولینک خانه وساحلخانه لرینی میراث پدر کی بینلرنده تقسیمه ابتدار ایله ابراهیم کتخداسا ساحلخانه سی طرف شهر یاری یه تعلق مخصوصی اولان میراخورشمس الدین بکه وماینجی احمد بک قوناغی سکبانباشی عارف اغایه احسان بیورلدینی صرده چونکه شیخ الاسلام افدینک قوناغی سلطان سلیم جوارنده بولنوب بواوانده ایسه شیخ الاسلام افندی برنجی درجده نافذ الکلام ومرجع خواص وعوام اولدیغندن مرکزه قریب بولمق اوزره اکا دخی سرکاتبک سلیمانیه ده کائن قوناغی احسان بیورلدیسه ده مقتضای مسلکی اوزره بو خصوصه دخی تورع واتقا صورتی التزام ایدوب ورثه مقتولدن ماهیه ایکیوزالی غروش ایله استیجار ایدرک مذکور قوناقدن فرش سجاده استقرار ایلمشدر .

وربع الاخرک اون یدنجی کونی اقدجه ساجدار شهر یاری اولان سلیمان بک وچوقدار ارنبود احمد اعا وخزینه کتخداسی صالح رفعت بک وباش چوقدار محمد بک اندرون هایبندن اخراج اولنوب رکابدار رشید احمد بک ساجدار شهر یاری اولغله طریقلرنجه سلسله وقوعبوله رق ماینجی سلیم اغا خزینه کتخداسی وماینجی عبدالفتاح اغا باش چوقدار اولمشدر .

### \* بعض وقایع اردوی همایون وتوجیہات \*

بواثانده اردوی هایبونده دخی اختلال ظهور ایتکله یوم مرقومده بروجہ آتی تبدل صدارت وقوعبولمشدر .

اردوی همایون سلستریه واردقندن صکره قارشویه کچوبده بکرشی روسیه لودن استخلاص ایتک صورتی تذکر اولمش ایسه ده دشمن اولجه سلستره قارشوسینده واقع قره لاش آطه منی ضبط وطایبه لر انشاسیله احکام ایلمش اولدیغندن اول امرده بونی ضبط ایدوب قره لاش یقه سینده بر موقع طوتوبده بعده ایلر حرکت اولمق لازم کلکله بوکا دائر بعض تدابیره تشبث اولمش ایکن روسیه لورک بکرشه طوغری چکیلوب کیتمش اولدقارینه مبنی یکیکچری اغاسی پهلوان اغا بر مقدار عسکرله قره لاش یقه سینده امرار ایله مترس النمش وپهلوان اغا اره صره تبدیلاً ساسترده اقامت کزین اولان اردوی هایبونه کلوب کیتمکده واجبابنه کوره سردار اکرم ایله کوریشوب مذاکره مصلحت ایتکده بولمش ایدی .

بروجه بالا قره دکز بوغازنده یماقلم جمعیت ایتدکلرنده پهلوان اغا سلطان مصطفی طرفدارلرندن اولسیله شایدکه انک دخی بوقضیه ده مدخلی اولمق مطالعه سنه ویاخود

یما فلك فتنه سنی لدی الاستماع اودخی اردوده بر فساد احدائنه جرأت ویا او جاقلوبی  
 اوبده استانبوله عزیمت ایتك كبی بر کار ناهمواره قیام ایلمسی احتمال و ملاحظه سینه  
 مبنی عزلی خصوصی نزد سلطنت سینه ده قرار کیر اوله رق بارده سینه اجراسی  
 سردار اکرم ابراهیم حلمی پاشایه امر و اشعار بیورلمش ایدو کندن اودخی هان  
 قول کتخداسی ایوب اغانی علی الصباح اوتاغ آصفیلرینه جلب ایله یکچیری اغالی  
 خاعتی اکسایلمش ایسه ده اول کون پهلوان اغا ساستره متسلمنك قوناغنده بولنه رق  
 کیفیتی لدی الاستماع هان قره لاشه خبر کوندروب ( نه طور بیورسکنز بنی عزل  
 ایتدی لر لکن غرض بنم عزلم اولیوب بلکه یکچیری بی قالدرمقدر ) یوللو فساد  
 آمیز سوزلر ایله بر طاقم سبکمزانی اغفال و تحریک ایتکله آنلر دخی ( بز اغامزدن  
 خشنودز ابقاسنی استرز ) دیو فوج فوج ساستریه عبور ایله تجمع و تحشد ایدوب  
 کیده رک صدر اردوی هایون یغماسنه منقلب اولدیغی تحقق ایدیجك اوتاغ آصفیده  
 عقد مجلس ایله لدی الاشتشاره مکتوبیء صدر عالی تحسین افندی ایله فی الاصل  
 مدرسیندن ایکن مصر سفرنده خواجکان دیوان هایون طریقه ادخال اولنان محاسبه  
 اول رامنر افندی بوبابده ثبات و متانت اولتق رأینده بولنمشلر ایسه ده اکثریت  
 آرا دفع غائله ایچون پهلوان اغانك اغالنده ابقاسی صورتنده بولندیغندن در حال  
 ابقاسی ایچون لازم کلان خلعتی او جاق یازیحیسی ایله ساستریه کوندرلمش وبوصورتله  
 جمعیت طاعیدلمش وبونك اوزرینه پهلوان اغا وسوسه یه ذاهب اوله رق ارتق  
 قره لاشدن ساستریه یقه سینه کچمز اولمش ایدی .

حتی متعاقباً سلطان مصطفانك جلوسی وقوع بوله رق اخبار جلوسی حاوی سردار  
 اکرمه خطاباً اصدار و ارسال بیوریلان خط هایون ساستریه لدی الوصول قرائت  
 اولتق اوزره پهلوان اغا اردوی هایونه دعوت اولندقدله کلکدن امتناع ایتمکین  
 کوچ حال ایله وهزار تکلف ایله جلب اولنه رق خط هایون اوقونمشدر .

استانبوله کی افکار غرضکاری اردوی هایونه دخی ساری اوله رق سلطان سلیم  
 طرفداری بینان رجالك ایشدن چیقارلملری امر طیبی اولوب تحسین افندی ایله  
 رامنر افندی ایسه سلطان سلیمه مخلص و متخصص اولدقلرندن بشقه مجلس  
 سالف الذکرده پهلوان اغا علیهنه ثبات و متانت کوسترمش اولدقلرندن زور بالره  
 جمیه کوسترملك اوزره مذکور خط هایون اوقوندیغی کبی اول باول بوایکیسی  
 عزل اولندقدن بشقه رامنر افندی افخم علمادن ودهات عصر دن بردات اولدیغنه  
 بناء یالکیز عزلیله اکتفا ایدلمیه رک بعدال عزل قوالیه نفی واجلا قلنمه غله محاسبه اول  
 منصبی ممش افندی یه توجه و بیوک تذکره جی حمید افندی مکتوبیء صدر عالی

وچوڪ تذكرو جي حميد بك آنڪ یرينه بيوك تذكرو جي و مکتوبیء صدر عالی  
خلفاسندن عارف افندی چوڪ تذكرو جي نصب اولمشدر .

استانبولڪ اویله هرج ومرج اولدینی اردوی هایون ارکانک معلوماری اولیجق  
درونی مکدر و محزون اولمشار ایسهده فرمان قدر وقضایه تسلیم کردن رضادن  
غیری چاره اولدیغنه مبنی هان ایضای مراسم بیعت و تجدید سلطنتدن طولایی جعلی  
اولهرق اظهار مسرت ایتدکبری ائنده یکیچری زوربالری بووقعهینی گاه حاجی  
بکتاشک سرروحانیتنه وگاه اوجاغک فیض وکرامتنه حمل واسناد ایله دلشاد  
و نمون و حاجی بکتاش دمنه هو دیهرک کلبانک شطارتله طنین انداز کنبد کردون  
اولمقده ایدیلر .

یکیچری اغایی بهلوان اگا ایسه فی الاصل نظام جدیدک دشمن متجبری و ساطان  
مصطفایی اجلاسه چالیشانردن بری اولدینی حالده زوربالگی سایه سنده یکیچری  
اغایی مسندنده پایدار اولدینی ائنده استانبولده کی یولداشلیری فتنه احدائیه سلطان  
سلیمی خلع ایتیلرله آنکدخی غرضی حصوله کلش ایسهده کندوسی استانبولده  
بولنوبده زوربالره پیشوا اوله مدیغندن حرصینی یکمیوب و بووسیله ایله قبایچی کبی پست  
پایه آدمک میدانه چیقوبده شهرت بولدقلیری چکه میوب حتی استانبولده کی اوجاقلو  
یماقلره پیرو اولدقلیری ایچون ناموس و حیثیتلیری ضایع ایتدیلریدیکی مرویدر بناء  
عایه باری کندوسیده اردوده بروقه چیقاروبده هر ایشی انه آلق و بووجهله  
زوربالر اره سنده نامدار اولمق اوزره همان یکیچریلری تحریک و اضلال ایدرک  
برکون بغته بر طاقم زوربالرله سلستریه کچوب قول ایاقلانندی سردار اکرمی  
ایستیمورلر دیوارکان دولتی و اوجاق اغالیری دعوت ایدرک اوتاغ آصفی به هجوم صدنده  
بولنسی اوزرینه سردار اکرم بر تقریبه صاوشوب روسجق جوارنده واقع علمدار  
پاشا چقتلکنه فرار و التجا ایدیکندن اردوی هایونده بولنان وزیر ابوبکر پاشا  
لوای سعادت قائمه قاملغنه انتخاب و تعیین ایله کیفیت باعرض و محضر در سعادت بیلدیرلمشدر .

ابراهیم حلمی پاشایه در سعادتدن مهر جدید هایون ارسال بیورلمق اوزره ایکن  
اولوجهله مقام صدارتدن تنزیل ایدلمش اولدینی مذکور محضرک و رودیله معلوم  
اولیجق زورباباشیلرینک تصویب و تسبیلیری اوزره ربیع الاخرک اون برنجی کونی  
فی الاصل یکیچری اوجاغندن چیقمه اناطولی والیسی و آفدکنر بوغازی سرعسکری  
چلبی مصطفی پاشا صدر اعظم و سردار اکرم نصب اولنهرق همان بوغازدن طوغری  
اردوی هایونه عزیمتی اراده بیورلدی بوغاز سرعسکرلکی دخی قرمان ایاتی الحاقیه  
ساقزده منفیاً مقیم اولان صدر اسبق حافظ اسماعیل پاشایه اناطولی ایاتی قره حصار

سنجانی متصرفی وزیر علاءالدین پاشایه توجیه ایدلدی . صدر اعظم عزل و نصی پادشاهك حقوق مقدمه سندن اولدینی حالدہ ضروری زوربالرہ مامشات اولنہرق بووجهلہ دخی ناموس سلطنت سنہیہ عظیم نقیصہ کتورلمش اولدی .

ویونک اوزرینہ اردوی هایونده دخی سوز ایاغہ دوشوب یکچریلر اولیای اموری مانده و تعیینات غوغاسیله بیزار و ( استانبولده کی رجالی اوراده کی یولداشلر تلف ایتمشر بزده بوراده کیلری بتورلم ) یوللو کلمات مدہشہ ایله خوف و تلاشہ دوچار ایتمکده اولدقلمی حالدہ یکچیری اغاسی دخی ذاتاً بدخوی برحر یف اولدیغندن ( استانبولده کی رجال دولت بتورلمش بوراده کیلرک ازالہ سی دخی غزات بکتاشیہ نک وظیفہ ذمتیدر ) دیردی رجال دولت انک بووضعنه باقوب ایچلرندن قان کیدردی لکن اللرندن برشی کلیوب چاره سز هر بری بوجهله کندوسنه تملق و مندارا ایدردی . بناءً علیه یکچیری اغاسی اردوی هایونده تفرد و تمر دایله هر ایشی انہ آلوب امور توجیہاتہ دخی مداخله ایدرک شق اول دفتر داری فیضی بک زاده محمد بکی عزل و مهمات نظارتی عنوانیله ادرنہیہ ارسال و یرینہ ذمت خلیفہ سی چاوش زاده امین افندی بی دفتر دار نصب ایترمش ایدی .

رجال دولت اردوی هایونک بو حالته وضابطه عسکریه نک انحلالته باقوب اورک رک علمدار پاشانی دعوت ایتملی اوزرینہ اودخنی سریعاً بش بیک کزیده سواری ایله سلستریه دہشت انداز ورود اولیجق زوربالر بر کوشیہ سینوب و ادبلینی طاقینوب طور ملریله اردوی هایون تحت انضباطہ الشمس و یونک اوزرینہ ارتق مهر هایونک علمدار پاشایہ ارسال بیورلمسی طبیعت مصلحت ایجابندن کورتمش و فی الواقع اردوی هایونک ضبط و ربطنه اولوقت اندن بشقہ مقتدر بروزیر سطوت سمیر اولدینی مطالعہ سیله کندو دخی بوامل و امیدده بولتمش ایکن مهر هایونک چابی مصطفی پاشایہ احسان بیورلمسی اوزرینہ مغبر الخاطر و ربیع الآخرک یکرمی دردنجی کونی سردار اکرمک سلستریه ورودنده وقع صدارت مقتضایی اوزرہ ابراز ایلدیکی اطوار متعظمانہ سندن دلگیر و متنفر اولغله اودخنی طونہ یالیسی خلقدہ فطری اولان عناد و وقار اقتضاسنجہ سردار اکرمہ صوغوق معاملہ ایدرک اردوی هایونی کندویہ تسلیم ایتمش واردوده بیکانہ قالان مکتوبی سابق تحسین افندی بی استصحاب ایله روسجغہ کتمشدر .

چند روز صکرہ سردار اکرم قره لاش یقہ سنده کی یکچیری اردوسنه کیدوب یکچیری اغاسی پہلوان اغایہ رتبہ وزارت و دیگر بعض ضابطانہ رتبہ و مأموریت اعطا و سائر لرینہ بذل عطایا ایله جملہ سنی تلطیف ایتمشدر .

انجق اردوی هایونک اداره سی علمدار پاشانک همتنه موقوف اولدینی حالدہ بوکره بروجہ مشروح منفعلاروسہ جغہ عودت ایتدکن صکرہ اردوی هایونہ ذخیرہ وسائرہ تدارک وارسالی خصوصندہ مساحہ ایدر اولدی . سردار اکرم ایسہ او جاقدن یتشمہ بزات اولہرق مدارا ومدانہہ یوللرینی بیامدیکندن علمدار پاشا حقتندہ عنف ایله معاملہیہ و علمدار دخی بلوکباشیلقدن نشئت ایتہ جسور و عنود بر آدم اولدینی حالدہ بروجہ بالا سلستردیہ ورودندہ اردوی هایونی تأسف اولنہ جق بر حالدہ بولمش و صدارتک کندویہ توجیہ اولنہ جقتندہ هیچ شہبہ ایتمز ایکن تخلفندن طولایی دلگیر اولمش ایدوکندن بونک اوزرینہ سردار اکرمک او مثللو واضعنی هضم ایدہ میہرک ایکی قات زیادہ درشتانہ ونادرستانہ اطوار ایله مقابلہ یہ قیام ایتمکین اردوی هایون ذخیرہ جہ مضایقہ یہ دوچار اولوب حالبوکہ روسجغہ عودتندن صکرہ یکیکچریلر بتون بتون کم المزوروز مرہ طلب مواجب و تعیینات و خارج از امکان تکلیفات ایله وکلای دولتی تصدیع و تضییقندن خالی قالمز اولدیلر .

ایشته بو ائنادہ روسیہ لولر قارشو طرفدہ تحشد و تکرہ باشلادقلندن اوزرلرینہ بر مقدر عسکرلہ چرخجی علی پاشا سوق اولندقدہ منہزم اولمغله بودخی اولیای امورہ بشقہ جہ بادیء خوف و تلاش اولمشدر . زیرا چرخجی پاشا فرقه سی پریشان اولوب اصل اردوی هایون ایسہ روسیہ لویہ قارشو طور مق شویله طورسون یرندہ کندو کندویہ طورہ میہ جق بر حال عجز اشمالده ایدی برکت و یرسون روسیہ لویہ یونابارته ایله حرب اوزرہ اولدیغندن طونہ سواحاندہ کی عساکرینک چوغنی لهستان طرفہ کتمشیدی یوخسہ او یله بروقت اغتشاشدہ بر طرفدندی روسیہ لولر برو طرفہ هجوم ایتسیدیلر علمدار پاشانک عسکرندن بشقہ طونہ یالیسندن موقعنی طونہ جق بر قوت بوغیدی .

وربدہ روسیہ لولر فراری ایسلاقی بک یدیلہ ساخته فرمانلر ارانہ ایدرک بوسفر بالمواضعه یکیکچری نی تأدیب ایچون ایمش کبی اراجیف اشاعہ ایدہ کلدکارندن بشقہ خدمتہ دولت علیہ قیافتہ قونلمش بر طاقم آدملرینی کویا مقدمجہ بیع و شرا اولمش خوتین و بندر کبی قلعه لک حاشا اچقہ سنی قبض ایدر صورتندہ بر محله قویوب و اسرای اسلامیہ دن بعضیلرینی دخی بر تقریبہ سانکہ تصادفی اولہرق اورایہ کوتور و بدہ برکناردن کیزلوجہ ارانہ ایله ایشته فلان قلعه نک اچقہ سی صایلیور واردودن فلان و فلان افندیلر کلوب قبض ایدہ یور دیدرتمک و بعضیلرینہ دخی بزعمانلو پادشاهنک فرمانیلہ انجق اشقیاسنی تأدیب و دولتی نظام جدید ہیئتہ تقلیب ایچون کلدک سز نیچون بویله اصرار ایدہ یورسکنز یوللو سوزلر سویلتمک کبی

در لو در لو حيله و خدعه لر ايله ساده دلان يکچر يانی اغفال و اضلال ایده کلمشدر در  
یکچر یلر ایسه اردوی یغما ایدوبده طاغلمغه بهانه اراهمدن خالی دکالم ایدی  
علی الخصوص سردار اکرم ايله علمدارك اره سنه برودت کیرمکله اردوی هایون  
ذخیره و تعییناتجه مضایقه یه کرفتار اولیجق بتون بتون ضبط و ربطنن قالدیلر .

رجال دولت کوردیلر که علمداره التجادن غیر یی چاره یوقدر همان کندوسننه  
نوازشنامه لر کوندروب و در سعاده اخطار ايله جانب ملوکانه دن خطوط هایون  
و تشریفات سنیه ارسال ایتدیروب انی کافی السابق یومشاندیلر و سردار اکرم ايله  
بارشدر دیلر ایسه ده ( بیت ) کناد ایتسه کینه عیب شکاف کاسه باقیدر \* اولور قصد  
نوازش بی تمک آزاردن صکره ) مؤداسنجه طرفینک عداوت قایمه لر یی باقی قالمشدر .  
قالدیکه مقدا طونه یالیسی مایعه جیلانی بهانه سییه روسجغه کوندلرش اولان بهیج  
افندی انوار دولت سایمیه دن اقتباس انوار عاطفت ایدنلردن بر ی اولمسلیه اره صره  
علمدار پاشا یاننده سلطان سلیمک محاسن و مکارمنی بیان و نظامات موضوعه سنک  
الغاسندن طولانی رونما اولان ضرر روزیانی در میان ایتمکده ایکن تحسین افندی دخی کلوب  
بو باده اکا همزبان اولدقندن بشقه ایکیسی بر لکده علمدار پاشایه رامنز افندینک فضل  
و کالی ثنا و تعریف ایتلر یله اودخ ی رامنز افندی یی روسجغه دعوت ایتمشیدی رامنز افندی  
ایسه اول ائنده منقاسی اولان قواله یه کیتمک اوزره قلبه یه واروب علمدارك اتباعندن  
کوسه کتخدا دینکله معروف اولان احمد افندی ايله ملاقات ایدوب حیثیت ذاتیه  
و فضائل مکتسبه احجابندن اولمسلیه کندوسنه احمد افندی حرمت و رعایت و ترتیب  
لوازم مهمانوازی یه همت ایتمکده ایکن علمدارك دعوت امری وارد اولیجق رامنز  
افندی در حال اجابت و قلبه دن حرکت ايله روسجغه لدی الورود مزاح آشنا و نبض  
کیر و حسن بیان و طلاقت لسان صاحبی بر ذات فطانت سمیر اولمسلیه عامدار پاشایه  
کسب اختصاص نامحدود ایدرک یکچر یلرک غلبه سی دولت و ماتجه تقدر فساد  
باعث و سلطان مصطفی طرفندن بوتدر یوز بولملری نه در لو محاذیر ملکیه یی مورث  
اولدیغنی تهفیمه بذل مقذور و علمدار پاشایی سلطان سلیم طرفنه اماله ايله تکرار  
اجلاس صورتی مطالعه یه مجبور ایلدی .

بو صورتله روسجقده سلطان سلیمک تحت سلطنته اعاده سی مسئله سی موضوع بحث  
اولمغه و بر یکی وقعه نك اسبابی حاضر لائمه باشلادی استانبول ایسه هنوز کرکی کبی  
اختلالدن قورتلمامش و سفینه سلطنت ساحل سلامتیه واصل اولمامش ایدی .  
ایشته بواشناده آقدکنز بوغازی خارچنده بر محاربه بجزیه و قوعه کلمشدر . شویله که :  
یکرمی ایکی قطعه سفینه دن مرکب بر روسیه دونمسی بوزجه آطه ده اقامت ايله

چناق قلعه بوغازینه نظارت ایتمکده اولدیغندن قپودان دریا سیدی علی پاشا اون سکرز  
 قطعه سفن حربیه ایله اقدمجه اول طرفه حرکت ایتمشیدی روسیه دونمائی مقدارجه  
 دها چوق اولدقدن بشقه ضابطائی اصحاب معلوماتدن اولوب بزم ضابطان بحر به من  
 ایسه انلره نسبتله معلومانسز و بعضیلرینک تجربه سی ناقص و نفرا تمزک اکثری دکرز  
 حالندن یخبر و عجمی اولدقلری جهتله امرای بحریه تعرضی حرکتی مناسب کورما مشر  
 ایکن قپودان دریا سیدی علی پاشا معتادی اولان حویرات بهادرانی ایله او اخر  
 ربیع الاخرده بی محابا روسیه دونمائی اوزرینه هجوم ایله روزکار التنده قالدق  
 قپودانه هایون اولان ابو بکر بک سوار اولدینی کینک آرمه لری کلیاً بودانمغله ید  
 اعدایه گرفتار اولدی و دیگر برقاچ کئی یانوب برقاچی دخی دیر کسز و آرمه سز  
 باشند قره یه اوغرادی و ایچلرنده کی عسکر چیقوب فرار ایتدی بونک اوزرینه  
 قپودان پاشا بوغازه عودت ایدرک کندوسنی مسؤلیتدن قورتارمق ایچون حسین پاشا  
 زماندنبرو بینلرنده عداوت اولان پترو نه کیریدی ( شیر مرد ) شرمه مت بک ایله  
 دیگر برقاچ قپودانی اتهام ایدوب ارکان سلطنت ایسه بو ائنده هنوز مستغرق بحر  
 اقبال اوله رق پوصله بی شاشرمش اولدقلرندن او مثلوموادده عطف نظر دقت ایدمجه  
 وقتلری اولدیغنه مبنی بلی اوله در قپودان پاشا مسلمان آدمدر یلان سویلمز و صالح  
 آدمدر الاهدن قورقار کیمسه یه غدر و افترا ایلمز دیه رک همان تصدیق ایدوبور ملریله  
 بیچاره شرمه مت بک ایله دیگر برقاچ قپودان معذوراً بوغازده قتل و اعدام اولندیلر  
 رحمة الله علیهم حالبوکه بو محاربه ده روسیه دونمائی دخی پک زیاده زده لئش  
 اولدیغندن روسیه امیرالی ارتق او صولرده چوق طوره میوب آره سی چوق  
 کچمکسزین کیملرینی تعمیر ایچون قورقه جانبته کیتمکه مجبور اولمش و بوضورتله آقدکرز  
 بوغازی ابلوقه دن قور تلمش اولدینی جهتله دونمائی هایونک بو مغلوبیتی بر نوع  
 مظفر یته مبدل اولمشدر .

\* وقایع در سعادت \*

بالاده بیان اولدینی اوزره اگر چه ارکان سلطنت سنیه استانبولده کی زور بالر ایله  
 اموردولته قارشاملری ایچون معاهده یاپوب طرفیندن سندلر مبادله اولمش ایسه ده  
 بر کره سوز ایاغه دوشدکن صکره معاهده نک فائده سی اولیوب زور بالر هر ایشه  
 مداخله ایدر اولدیلر و ربیع الآخرک اون یدنجی کونی ینه زوربالغه قیام ایدرک  
 سکبانباشی عارف اغایی عزل ایله یرینه او جاق باشی چاوشی مصطفی اغایی سکبانباشی  
 نصب ایتدیلر .

تفصیل حل بو منوال اوزره درکه بروجه مشروح یماقره احسان بیوریلان یوزبیک



غروش مومی الیه مصطفی چاوش ایله بوغازه کوندرلدکده یماقلر ( بومبلغ بزه آذر بز یومیه استرز ) دیو عربده ایتملری اوزرینه اودخی ( بن سکبانباشی اولسم سزه یکرمی بشر آچه یومیه لو اسامه ویرردم ) دیو آغز لرینه بر بال چالمش اولدیغندن یماقلر آنک طرفه میل ایتمشیدی اوجاقلو یه احسان بیوریلان جلوس هایون بخششندن دخی عارف اغا التمش بیک غروش افراز ایله بشیک غروشنی یکچیری اغاسی قره قولاغی عبدالله اغایه لدی الاعطا عبدالله اغا بونی آز کوروب زیاده ایستدکده عارف اغا ( بومبانی کلیاً بن اکل وبلغ ایده جک دکم بوندن کارخانه لی یه وکوشک بکجیلرینه ومیانه یاز بچیلرینه وقپو خدمه سنه حصه چیقاره جغم بکاده آنجق بش اون کیسه قالوز ) دیو اعتدار ایتمش ایسه ده عبدالله اغا زیاده طلبنده اصرار ایتمکله بینلرنده برودت واغبرار پیدا اوله رق اغای مومی الیه مصطفی چاوش ایله اتفاق ایتدکدن صکره اوجاق اختیار لرینه وسوز صاحب لرینه ( نه طور بیورسکز سکبانباشی پادشاهک سزه احسان ایتدیکی مبالغدن التمش بیک غروشنی کتم وبلغ ایتدی ) دیو تحریک واطماع ایتسیله آنلر دخی بینلرنده مشورت ایدرک درمیان ایتمکه وسیله اولمق اوزره اول امرده ( سکبانباشی اورطه لرک اتنه اکمکنه باقیور و بلاط وقومقپو کبی نمالو قولقلردن جائزه ورشوت آلیور ) دیو شکایته ابتدار ایتدکلرنده عارف اغا ( بن یولد اشلرک اتنه واکمکنه وهر ایشنه دقت ایلرم آنجق قولقلردن آچه المسم نه ایله تعیش ایدهیم بونی بن ایجاد ایتدم قولقلر سکبانباشیغک ایرادیدر ) دیو جواب ویرمش ایسه ده غرضلری بشقه اولدیغندن سلیمانیه جامعنده جمعیت ایدرک ( قولقلردن جائزه ویرمیوز وجلوس بخششندن کتم اولان مالیده استرز ) دیو اغا قپوسنه خبر کوندرمشلر بونک اوزرینه عارف اغا ( بن مال کتم ایتدم التمش بیک غروش فلان وفلان محللره توزیع ایچون افراز ایلدم لکن مراملری فساد وملغنت ایسه آنی سویله سونلر ) دیو خبر کوندرمکله ( بز بومالی ایسترز همده آنی سکبانباشیلقده استمیوز ) دیو فریاده باشلامشلر ایش ایسه اولجه یماقلرله سویلشوب قرار ویرلمش و برو طرفه اون درت اوطنه باشی یه برر کیسه رشوت وعد ایدلمش اولدیغندن عبدالله اغا جمعیه واروب ( بن سزه برشی سویلیهم اکا راضی اولکزم مصطفی اغایی سکبانباشی ایتدیرم هم ایشکره دقت ایدر همده مال مکتومی الیورر ) دیجک مرقوم اوطنه باشیلردخی بر آغزندن ( های های استرز ) دیر دیمز عبدالله اغا بحالّه باب عالی یه کلوب ( ایش ایشدن کچدی سویله اولدی بویله اولدی ) دیو کوردلی ومغالطه ایتمکله موسی پاشا درحال رکاب هایونه عرض کیفیت ایدوب صادر اولان اراده سینه

موجبنجه عارف اغا بروجہ بالا کندویہ احسان بیورلمش اولان احمد بک قوناغی هنوز تملک وتصرف ایتمدین عزل ایله مصطفی چاوش سکبانباشی نصب اولندیغی عقبندہ سالف الذکر اوطہ باشیلر اغا قوسسنہ کلوب موعود اولان بشر یوز غروشلرینی آملر و عارف اغانک حسانی کوریلوب مذکور التمش بیک غروش دخی کندوسندن تحصیل ایله اوجاقلویہ اعطا اولندقدنصکرہ بروسه یه نفی اولندی . عارف اغانک اولوججهه عزلی کونی والده کتخداسی یوسف اغانک سر مقطوعی درسعادتہ کلمکله باب هایونده تشہیر قلندی .

مرحوم مشارالیه کرید جزیره سنده بر فقیرک اوغلی اولوب یدی سکز یاشنه واصل اولدقدہ پدری آنی سر حد کرید اغاسی سلیمان اغایہ آخرت اوغلی اولوق اوزره ویرمکله آنک دائره سنده نشو ونما بولہ رق سلیمان اغا کرید اغاغندن عزل ایله درسعادتہ کلوب یولیلہ یکیچری اغاسی اولدقدہ یوسف اغای مہردار وبعده قائممقام پاشا اولدقدہ خزینہ دار وقائم مقامدن انفصال ایله طشرہ مناصبندہ بولندیغی اواندہ کتخدا ایتمشیدی یوسف اغا برارالق افندیسنک بعض امورینہ باقق اوزره درسعادتہ کلوب ثروت ویسار ایله اشتهارینہ بناءً بغدادہ مأمور ایدلمکله اورایہ کیدوب کلدکن صکرہ اسماعیل قصاب باشیسی اولوق ملبسہ سیلہ بعض رجال دولتہ کسب تعلق ومناسبت ایدرک کلیولی بار و تخانہ سی ناظری وبعده مطبخ عامرہ امینی واسما سلطان کتخداسی وضر بخانہ امینی نصب وتعیین بیورلمش وجلوس سلیم خانیدہ والدہ سلطان کتخداسی نصب اولنان محمد بک وفات ایتدکدہ بعض طرفدارانک سوق وتعرفی ایله والدہ سلطان کتخداسی اولوب اسما سلطان کتخدانی دخی کندوسنک برادری عمر اغایہ ویرلمش وبعده رفته رفته صاحب ترجمہ زمام دولتی بتون بتون قبضہ تصرفہ آلوب حل وعقد امور سلطنت موقوف رأی وتصویب وفتق ورتق مصالح دولت مفوض ید تنسیبی اولہرق مستشار دولت ومؤمن سلطنت اولمش ایدی اکیوز یکریمی برسنہ سنده والدہ سلطان وفات ایتمکله انک دخی مہر اقبالی زوالہ قریب اولمغین خلاف فیکرانک شردن خلاص ایچون حجه کیدوب انجق بالادہ بیان اولندیغی وجہلہ وهایلرک مانعی اوزرینہ جوار مدینہ منورہ دن عودت ایله اثنای راهدہ ایکن استانبولده وقعه ظهور ایله انک اسمی دخی دفتر معہودہ درج اولتمشیدی .

حالبوکہ دور سابقدہ والدہ کتخداسی ایکن احتیاطہ رعایہ سلطان مصطفی طرفتہ دخی کسب تعلق ایلمش ایدوکنہ ودرسعادتہ بولنان متعلقاتی سکبانباشی یه وسائر ایش ارلرینہ خلیجہ آچقلر اعطاسیلہ آغزلرینی قلاتمش اولدقلرینہ منی عفو ونفییلہ اکتفا اولنہرق بروسدہ اقامتہ مأمور بیورلمشیکن موسی پاشانک کندوسنہ غیظ قدیمی

اولدقدن بشقه مقتول اولان رجالك مخالفتندن کلی مال چالوب چارمقدمه ایدو کندن  
 ویوسف اغا ایسه فوق العاده ثروت وغنا ایله معروف اولدیغندن آنکدخی ترکه سنه  
 طمع ایدرک اعدامی التزام ایتمکله زوربالردن برجم غفیر بشقه مصلحت ایچون  
 باب عالیده تجمیع ایستیکی کون اتفاقا قرناى شهر یاریدن دخی بریسی باب عالی به کد کده  
 موسی پاشا زوربالرک بوجعی کویا یوسف اغانک عفویخی استماع ایله منفعل اولدقلرندن  
 نشئت ایلمش اولدیغنی ایما و اغانی مومی الیه اعدام اولتماز ایسه ایشک فنا اوله جنی  
 بیانیله سرأ خاکبای شاهانه به عرض و افاده سنی رجا ایتمی اوزرینه یوسف اغانک  
 اعدامی ایچون اراده سنیه صادر اوله رق مخصوص خاصکی کوندر بلوب بروسه ده  
 اعدام اولمشدر .

انسان نصل پک یوزلی ونقدر آچ کوزلی بر مخلوقدرکه اوکنده اسلافنک قانلری  
 ریزان اولدیغنی کور و بده عبرت اله جق یرده مالار بنه کوز دیکور و کندو دخی  
 هنوز انلرک مزلقه فلاکتیه ایاق باصمش اولدیغنه احاله نظر دقت ایده میوبده همان  
 ترکه لرندن بر شی قامغه سعی و اقدام ایده یور (ان فی ذلك لعبرة لاولی الابصار)  
 مشار الیه یوسف اغا عاقل و کامل بر ذات اولوب فقط اوراقی ایچنده ظهور ایدن  
 بر حجت غریبه عقل و درایتنه یاقشدر یله مامشیدی . شویله که : کویا حضرت آدم  
 علیه السلام عمرندن بر مقدایینی حضرت شیت علیه السلامه هبه ایلمش اولدیغنه قیاساً  
 سعدالله اغا نام بر ذات دخی عمرینک یدی سنه سنی معلوم الاسامی شاهدلر محضرنده  
 یوسف اغایه هبه و اودخی آتهاب و قبول ایلمش اولدقلرینه دار اولوقت غلطه قاضیسی  
 بولنان شیطان امین افندیکنک ختمیله محتوم بر قطعه حجت شرعیه ظهور ایتمشدرکه  
 صورتی ذیل کتابده (۸) رقیبه ایراد اولنور .

بو حجتک ظهورنده امین افندی مکء مکرمه پایه سنی حازر بولندیقی حالده امثالی  
 ترهیب ایچون کلیبولی به نفی و تعریب ایدلمشدر .

مصطفی نجیب افندی تاریخچه سنده دیرکه بوماده مشار الیهک رشد و ذکاوتنه ویرلمز  
 ایسه ده ابالسء ناسک حیمه و مکیدتاری نیجه نیجه اذ کیانی اغفال و فریفته ایده جکی  
 نزد اولی النهاده معلوم اولوب حجت مذکور هنک شیطان لقیبیه ملقب قاضی و وسیع  
 المذهبک امضاسیله محضی اولسی دخی بونی مصدقدر .

عاصم افندی دیرکه حجت مرقومه نك مناسبی اولمق اوزره حضرت آدم علیه السلامک  
 عمرندن بر مقدارینی لئن سلم شیت علیه السلام حضرت تلرینه میدر یوخسه دواد  
 علیه السلام حضرت تلرینه میدر هبه ایستیکی بعض توارینجده علی الاختلاف رسیده نظر  
 و کوش اولوب لکن حق بودرکه بر محل موثوقده مرئی و مضبوط اولدیغنی خاطر  
 نشاتمز دکدر بعد التسلیم خصائص انبیادن اوله رق نیجه امور غریبه واقعدرکه آحاد

امده ممکن اولمديني وارسته قيد تفهيمدر و بيضی زاده نك رجم ماده سی کبی زمان سعادتدن بوآنه قدر بونك دخی وقوعی اولمديني ونقص وزیاده عمر مسئله سی علم كلامك مسائل مخصوصه سندن اولوب نه كونه اختلافات و توجیهاتی مشتمل اولديني معلومدر قرآنده واحديشه واجتهاد باینده هبه عمر ماده سی واقع اولمديني امر مجزومدر هله بوماده غایت اغرب و تاریخه یازيله جق حادثه عجب اولديغنه مبنی اتعاب جواد قلمه ابتدار اولندی مشار الیه یوسف اغا حد ذاتنده بومقوله مسائل ادراك ايدر اولوب حاكم مومی الیه دخی خیلجه دهاتدن ایکن بوسفسطه ظاهرأ جهالتدن ناشی بر معنادر واهب العمر اولان سعدالله اغا مصاحب زمره سندن بغایت موسیقی شناس و خوش آواز و ذاتنده عقل و درایت صاحبی و (پنه خازه) شریکسنك ناظم و مرتبی اولوب هله اول یادكار بوتقریبه بر مقدار مبلغ المی غرضیه ارتکاب ایلدیکی تاویلنه صلاحیتی واردر نته کیم عربلر ( برحیله یاپ بیک اچقه آل ) دیرلر لکن غرابت اول ایکی دهاتدن اولان دولتولرک قبول و امضالرنده در حتی مقابلنده اغای مشار الیهك سعدالله اغایه یدی کیسه اچقه ویردیکی رسیده سختدر و غرابدنرکه بش آی قدر مدت مرورنده سعدالله اغا وفات ایلمشدر مورخ فقیر دیرکه یوسف اغا اگرچه فی ذاته علم و معرفتن ساده اولوب لکن همیشه اهل علم و معارف الیه هم الفت و صاحب ذهن و فطانت اولغله او مثللو مسائل و مباحثی ادراك ايدر مقوله دن بولنوب و فی ذاته ملاحظه یه مائل و مزاح و ارتباحه شیفته دل اولوب کذلک افندی مومی الیه دخی فی ذاته دانا و دقائق آشنا اولغله سالف الذکر حجت ماده سی محضاً ملاحظه کونا اولمق اغاب ملحوظدر انتهى

یوسف اغانك مخلفاتی فوق العاده و حساب و تخمیندن زیاده ظهور ایدوب سائر کشتگانك مخلفاتی کبی موسی پاشا الیه دیگر متنفذان الیرینه دوشهرک چوغی بینلرنده تقسیم و باقیسی جانب میری یه تسام اولمديني صروده قونانغی دخی فودله کاتبی ایکن والده کتخداسی اولان محمد افندی یه احسان بیورلش و یوسف اغانك روح اضافیسی مقامنده بولنان راغب افندی الیه دیگر متعلقاتی ده اموال مکتومه وار ایسه میدانه چیقارلمق و آز چوق انلر دخی تجریم قلمق اوزره باشباقی قولغنه قالدیر یاهر ق توقیف ایلمشدر . زوربا واشقیبا دیدیکمز یکیکچریلر دکل شونك بونك مالنه پاره لککری رجال دولتک بیله برپاره سنه و برخلالنه طوقونماشرا ایکن وکلای دولت و مقرران سلطنت نامنه اولان آچ کوزلی و قاتی یوزلی نودولتان بواطوار اهانتکارانه لریله سلفلرینه رحمت او قوتدیلر و (رحم الله النباش الاول) دیدر تدیلر بو حال و هیئت الیه اداره دولت قابل اوله میه جغندن خیر خواهان سلطنت دوچار حیرت اولدی و بو انقلابات الیه اصلاح احوال اولنور امیدنده بولنان متعصینه بیله یأس و قنورکلدی .

بویغما کر لکده موسی پاشا قیاس و تخمین اوله میه جق مرتبه ثروت و غنا کسب ایدوب انجق بوقدر مال و منالی فلکه هضم ایتدرمک مشکل بر کیفیت اولدیغندن بونک چاره سنی دوشونمکده اولدیغی حالده بر طرفدن اندرون هایونده یکی یتیشن قرنای شهرداری و بر طرفدن دخی خارجه کسب نفوذ ایدن نور سیدکان و علی الخصوص یکجیری او جانغی متفذلری مصالح دولته مداخله ایدرک انخوکه عالم اوله جق تدبیرلر ظهوره کتورلمکه و هر ایشده رشوت النوب و یرلمکه باشلادیغندن و در دست اولان روسیه سفیرینک انجای نامعلوم و اتلافات و اسرافات واقعه به نظر آ قریب العهدهه فوق العاده مضایقه مالیه ظهور ایده جکی امر مجزوم اولدیغندن و طشره لرده سلطان سلیم طرفداری اولان جبار زاده و قره عثمان زاده لر کبی شدید الشیکمه ذاتلرک وادی سرکشی یه سلوک ایتلری ملحوظ بولندیغندن انجام کاری مطالعه ایله موسی پاشا مضطرب و بی حضور و یوتدیغی بیوک بیوک لقمه لری هضم ایتمک و نهایت مشکلات ملحوظه ایچنده بو غولمدین سلامت یقه سنه کچمک اوزره دق باب استعفا یه مجبور ایدی حالبوکه ذاتاً نحیف البنیه و ضیق صدره مبتلا اولوب بو مثللو افکار دورا دور ایله ضعف و عاتی تزاید ایدرک بعض مجالسده کندوسنه تواتر نفس کش کبی کورلمش و بر قاچ دفعه حضور هایونده بایلمه درجه سنده نفسی طوتلمش اولوب خسته لکی صحیحاً بو مرتبه زیاده میدی یوخسه بر ازده تصنع و تمارض علاوه سی وار میدی و غرضی صحیحاً ایشدن چکیلوبده اختلاس ایلدیکی اموال لاتحصای عالم فراغ و استراحتده یمکی یوخسه تمارض ایله نبض دولتی یوقلامتمی ایدی بوراسی لایقینه معلوم دکدر زیرا دلکو کبی غایت دساس بر حریف اولدیغندن افکارینی کرکی کبی اکلامق مشکدر الحاصل ظاهر حاله نظراً عزلی ایجاب مصالحته موافق کورینوب قالدیکه قباجی وقعه سنی انتاج ایدن هیئت عصیانیه یی تشکیل و دوری تحویل ایله سلطان مصطفای منتدار ایلمش ایسه ده زیر بار منتهه طور مق طبع سلاطینه کران کلور مواددن اولدیغی جهتله بر اراق عزلی پادشاه نوجاه حضر تلرینک دخی مزاجنه موافق ایدی اندرون هایونده یکی یتیشن ذاتلر ایسه بو مقوله لر دکشوبده کندولری میدان المق استرلردی .

بناءً علیه ربیع الآ خرک یکر می ایکنجی کونی بروسه ده اقامت ایتمک اوزره موسی پاشا عزل ایله یرینه چاوشباشی شهنسوار زاده حمدالله بک وزارتله قائم مقام صدر عالی اولدی و رکاب هایون کتخداسی حسن تحسین افندی چاوشباشیغله نقل ایله رکاب کتخدانی دخی سابق حبوبات ناظری الحاج مصطفی افندی یه توجیه بیورلدی .  
 قپان دقیق نائی عبد اللطیف افندی دخی بروجه بالا اعدامی مطلوب اولنلردن بریسی

اولدینی حالدہ مدرسیندن اولمق حسینیه اجرایی تأخیر اولمش و حسابی رؤیت اولنهرق عهدہ سنہ میر میرانلق توجہیله طریق علمیه دن اخراج اولندقدن صکرہ بروسدہ اعدام اولنوب سرمقوعی ربیع الآخرک یکر می دردنجی کونی عبداللطیف پاشا عنوانیله باب همایونہ وضع و تشہیر قلمشدر .

مرحوم مومی ایله عبد اللطیف افندی صدور عظامدن متوفی کیچه جی زاده صالح افدینک دامادیدر ذخیرہ مادہ سنک ابتدای تنظیمندہ متوفای مومی ایله جوبات ناظری اولغله صاحب ترجمہ دخی قبان دقیق نیابتی تحصیل ایدوب مزاج آشنا ودقیقہ دان برزات اولدیغندن اتابکان سلطنت سنیہ یه کسب انتساب ایله نیابت مذکورہ ده مستقر و مدرسیندن بولمق حسینیه گروه موالینسک کندویہ رقابت وعداوتلری کوندن کونہ متزاید ومتوافر اولهرق ظهور وقعه ده فرصت بولوب ازاله سنی امضا ایتلری اوزرینہ بروجه مشروح طریق تبدیل ایله تاویل اولنهرق بروسدہ اعدام اولنمشدر طویل القامہ وعذب اللسان بشوش الوجه وظریف ونکته دان ستوده تدبیر برزات فطانت سمیر ایش رحمة الله علیه .

جمادی الاولانک اوچنجی کونی صالح جانب افندی مهمات ناظری وعزیمی افندی بکیخان سلطان کتخداسی نصب اولندی . وفرداسی جمعہ کیچه سی غلطہ ده حریق ظهور ایله اون التی ساعت قدر متمد اولدی . ویدنجی بازار ایرتسی کونی شیخ الاسلام عطاء الله افندی عزل ایله یرینہ صمانی زاده عمر خلوصی افندی نصب اولنمشکن فرداسی صالی کونی عمر خلوصی افندی عزل ایله ینہ عطاء الله افندی نصب وابقا قلندی .

تفصیلی بو وجهه درکه متوفی خیری افندی برادری مدرسیندن معهود سیدا افندی اوتہ دنبرو طالقواق ایله مجالس کبراده بولنهرق شونی بونی قدح ومذمت وبالخاصه هم جنسی اولان موالی نی لسانہ طولایوب استهزا وتزیفہ جسارت ایدہ کلدیکی حالدہ حریمی سلطان سلیمک والده سی طرفنہ متعلقه اولمق حسینیه برطرفدن کندویہ برشی دینہ مدیکنه منی شرینه لغت دیهرک بعض رجال وکبار (دهن سک بلقمہ دوختن به) فحواسنجه کندوسنہ هدایا وعطایا ویره کلدکار ینہ منی بو وجهه شوندن بوندن خیالیجه شی قاپار وفصاللق وطالقواق سایه سندنہ دبدبه ودارات ایله کزوب موالی یه ظفره ساتار ایدی انک بو اطوارندن طریق علمیه اصحابی متفر و بو ایام انقلابانده برمصیبتہ اوغرامسنہ منتظر ایدیلر او دخی بوراسنی مطالعه ودر پیش ایدرک متلاشی ودریش ایسه ده اقرار بندن اسماعیل اغا مقدا بوغاز ناظری ایکن قبایجی مصطفی دخی انک خدمتکاری اولدیغندن سیدا افندی

اولوقت قباجقی ایله هم قدح بزم الفت اولمسیله بو ایام فترده اکا طیانوب طور مقده  
ایدی فقط دور سابقده ذم ایتدیکی ذواتدن بریسیده شیخ الاسلام عطاء الله افندی  
اولمسیله بالخاصه انک طرفندن دوچار خوف وانیشه اولغین برتقریبله انی مسندن  
دوشورمک خولیا سنه دوشه رک قباجقی ایله بر قاچ نفر همپاسنی بر اخشام خانه سنه  
دعوت و بسط بساط عیش وعشرت ایدوب تناول کاسات الفت اتناسنده (عطاء الله  
افدینک خلع ماده سنده صمیمی رضاسی یوغیدی ات میداننده سکوتی طور مسی  
دخی اندن ناشی ایدی خداوندکار سابقک لطف دیده سی اولدیغندن بهر حال انک  
غیرتی کودر ونهایت سزک حقکزده بر ایش ایدر حالبوکه استانبولده صدر اعظم  
بولندیغندن باب فتوی جمله نک مرجعی اولمق حسبیله شیخ الاسلام دخی او جاقلونک  
نصب کرده سی اولمق لازمدر) دیه رک قباجقینسک ذهنی اخلال ایتدکدن صکره  
برکون قباجقی بی ابو ایوب انصاریده متقاعداً مقیم اولان مصطفی پاشا مجلسنه کوتوروب  
وانک یاننده دخی بو بجی طرز آخر اوزره در میان وشیش الاسلامک عزلی گویا  
بالجمله او جاقلونک املی اولدیغنی آورده زبان ایتدکه مصطفی پاشا دخی صحیح نظیله  
ماده بی اعظام ایدرک والده سلطان طرفنه تذکره تحریر ایدوب مقربان ساده لوحان  
دخی انی تأیید ایتکله بالاده اشعار اولندیغنی اوزره عطاء الله افندی عزل ایله یرینه  
عمر خلوصی افندی نصب اولمش ایسه ده عمر افندی غایت عقیف ومستقیم  
وهر حال وطوری موافق شرع قویم اوله رق مدح وستایشه سزا وحقیق و فقط  
اسم سعادت لری اقتضاسنجه معلوم اولان شدت وصالبتاری حسبیله مظهر سر  
(مارک الحق لعمر من صدیق) اولدیغندن اکثر صدور وموالی وعلی الخصوص  
عطاء الله افندی منسوباتی انک ینه مشیخته کلسندن ناخشنود اوله رق شمس الدین  
ومنیب ومراد زاده افندیلر ایله دیگر اعیان علمادان بعضیلر اسکی سرای حداسنده  
واقع کریم بک زاده درویش بکک خانه سنده اجتماع ایله او جاقلو طرفنه تذکره  
تحریر وبوحادثه نک البته تفرقه بی موجب و او جاقلو جقنده وخامتی جالب اوله جغنی  
تذکیر ایتشلر وبرده رئیس الکتاب رکاب اولان حالت افندی عطاء الله افدینک  
لالا زاده سی و پدرینک پرورده سی اولمق حسبیله انک غیرتکشی اولوب حتی  
قائم مقام پاشا محرمانه اوله رق کیفیتی کندویه افاده ایتدکه منغنه چالشمش ایسه ده  
مفید اولیوب برکون صکره عزلی واقع اولیجق سکبانباشی وقره دکز بوغازی  
سرکره دلریله بر قاچ معلوم ومتعین او طه باشیلرک اسامیسنی درج ایله بر دفتر تصنیع  
ایدوب قباجقی طرفنه ارسال و( بودفترده اسملری مسطور اولنلرک ازاله لری  
ایچون عطاء الله افندیدن فتوی استندکده ویرمدیگندن عزل اولندی خانی

ایسه فتوی و یرمکه اعدامکنز مقرر در) دیو اخافه واغفال ایتدکن بشقه اول  
کیجه تبدیلاً سلیمانیه سمتده مدرسیندن بورناز بک زاده درویش محمد اسعد افندی  
خانه سنه کیدوب نهانی سکبانباشی مصطفی اغایی جلب ایله آئی دخی بو وجهله  
توحیش ایلدیکندن سکبانباشی کیجه لین مقدا کندوسنک سکبانباشیغه اتخابنده  
رشوت خواری اولان اون درت اوطنه باشی یی اغا قوسنه جلب ایله کیفیتی افاده  
وینه برر کیسه رشوت اعطا ایتدکن صکره (علی السحر قشله لر دن جمع ایده بیلدیکنر  
قدر یولداش جمع واستصحاب ایله سلیمانیه جامعی حویلسنده تجمع ایده سکر) دیو  
تنیسه ایتمکه علی الصباح سلیمانیه جامعنده یکچر یلر اجتماعه باشلادیغی ائنده  
سکبانباشی دخی قائم مقام پاشا ایله بالخابره تبدیلاً بایزید تر به سننده کوریشوب  
(سلیمانیه جامعی او جاقلو ایله تولدی بر وجهله شیخ الاسلام جدیدی ایستیمور لر  
ینه معزول افندی یی ایستیمور لر) دیدکده قائم مقام پاشا (بهی اغا بو یله مسخره لقی  
اولور می دولت علیه نك اعظم مراتبندن اولان مشیخت کبرای اسلامیه ماعبه  
صیاتیدر دون عزل اولنوب بو کون نصب اولنق نفوذ پادشاهی یی محو ایدر  
ودولتک رونق ومهابتی کیدر بو اولور ایش دکدر و او جاقلو امور دولته مداخله  
ایتمک اوزره معاهده ایتمشکن شمدی بو خطب جسمیه مداخله لری شرط معاهده یه  
مخالفدر) دیه رک دفع واقعاچه چالشمش ایسه ده سکبانباشی (امان دولتو ایش  
ایشدن کچور شمدی بر فتنه عظیمه ظهوره کلور استانبول نیغا اولنور صیان  
ونسوان ایقلا آئنده قالور قالدی که او جاقلو نامه بر قاق مفسد چیقوبده شیخ الاسلامی  
عزل ایتدیرملری او جاغ عامر نك ناموسنه طوقور بو ماده رابطه بولمایدر) دیو  
اصرار ایتمکه ناچار قائم مقام پاشا سکبانباشی ایله برلکده باب عالی یه کله رک رکاب هایون  
کتخداسی مصطفی افندی ایله حالت افندی یی دخی جلب واحضار ایدوب و برلکده  
سرای هایون کیدوب حضور هایون چیقداقلزنده ابتدا سکبانباشی (او جاقلو یینه  
معزول شیخ الاسلام افندی یی ایستیمور لر) مقدمه سیله فتح کلام ایدرک (بزه صورمدین  
شیخ الاسلامی عزل ایله صمانی زاده یی کیم نصب ایتدی) دیو وقاحت وهتک حرمت سلطنت  
ایدیجک سلطان مصطفی ارتق جساته کله رک (شیخ الاسلامی بن نصب ایتدم) دیوب  
بوراده قائم مقام پاشا دخی سکبانباشی یی الزامه چالشمش ایسه ده کالاول الحاح و ابرام  
ایله (شمدی بر فتنه عظیمه قوپار استانبول هر ج ومرج اولور) دیه رک اخافه یه قیام  
ایتدیکندن چاره سز عطاء الله افدینک مقام مشیخته اعاده سنه قرار و یر لمشدر  
فقط رسماً اولسون شان دولتی محافظه ایچون صمانی زاده یه استعفا ایتدر مک صورتی  
تسیب اولنمغله حالت افندی نزد مشار الیهه عازم اولوب مشار الیهک ایسه استانبولده



قوناغی او لمدیغندن دامادی اولان مکی زاده عاصم افندیك قوناغنه نقل ایدرك ترتیب خدمه ایتمکده وعلما ورجال فوج فوج تبریکنه کلوب کیتمکده ایکن حالت افندی ورود وحرمانه کندوسنه مادهی افاده ایله استغفانامه یازدیرمش واول کون عطاء الله افندی حضور هایونه جلب و تکرار شیخ الاسلام نصب و تعیین بیورلمش و منشأ عزلی نه اولدینی تحقیق اولمغله سیدا افندی همان طرسوسه نفی و تغریب ایدلمشدر .

الحاصل عطاء الله افندی زور بالر سایه سنده مقام مشیخته عودت ایدرك اولکیدن زیاده نفوذ و استقلال بولدی و سلطان مصطفانك ارتق سرایدن طیشارو امری کچمز اولدی شویله که : قفسده ایکن دها شانلو ایدی .

طریقت نقشبندیه مشایخندن مشهور بروسه لی امین افندی که سلطان سلیم عصرنده رجال و کبارک اکثری اکا انابت ایدوب اودخی کیمنه قلیچ کسمز وفقی و کیمنه قورشون ایشلمز نسخه سی ویرمش ایدی بروجه بالا و قعهده اول مرده نك اکثری اشقیای دنده اعدام اولندقلرنده یانلرنده ظهور ایدن لوحه لر اوزرنده کی اشکال و هیاکل مطلسمه رونما اولیچق عوام ناس فلانك پازوسنده باغلو خاچی ظهور ایتدی و فلانك و فلانك قوینندن پت چیقدی دیو کفتکو ایدرك بك چوق اراجیف وقوعه کدی عقلای زمان بوقدر و قسدنبرو دولاب دولتی اداره ایدن و عقلا دن بیلننن ذانلرك بومثللو افکار سخیفه یه ذهاب ایله امور دولتی دوشونه جکلرینه بقای جاه و اقباله حصر آمال ایدرك وفاق و جفار ورمال مقوله لرینك اکاذینه الدانمش اولدقلرینه تأسف ایلدیلر حالبوکه دورک تجددی حسبیله مریدلرینك کیمی بویه فلا کته گرفتار و کیمی فلکدن سهله لر بیوب چله کش ادبار اولان شیخ افندی یه دخی سیاحت و یرمک لازمه خالدن کورلمکله بواننده امین افندی دخی بروسه یه نفی اولندی .

دور سابقده برچوق کیمسه لر شفاعت ایله رؤس اله رق آیقیریدن طریق علمیه یه کیرمش و طفرات غیر معتاده ایله خیلوجه ایلروله مش اولدقلرندن ممکن مرتبه طریقک تطهیر و تحقیق ضمننده شیخ الاسلام افندیك اشارت علیه لری اوزره اون طقوز نفر مدرسک رؤس لری حک و ترقین قلدی .

مرحوم سلطان عثمان مابینجیسی ایوب اغا زاده سید محمد اغانك پادشاه نوجاه حضر تهرینه نسبت قدیمه سی اولق ملا بسه سیله مسروریتی ملتزم عالی اولدیغندن جمادی الاولانك اون او چنجی کونی میراخور اول شمس الدین بك عزل ایله انك یرینه میراخور اول اولدی . ویکرمنجی کونی حکیم باشی بهجت افندی دخی عزل اولنه رق یرینه طوغجی زاده عبدالقادر افندی حکیم باشی نصب و تعیین بیورلادی . وینه اول کون سابق باش چوقدار محمد بك ایچ ایله و ماه مر قومك یکر می التنجی کونی سابق خزینه کتخداسی صالح بك بعد المصادره قبرس جزیره سنه نفی ایدلدی .

غریبدرکه مولوی تیلر بررسنه لك اوله رق توجیه اولتمق طریق علمیه جه رسم و عادت اولدیغنه مبنی مکه مکر مه و مدینه منوره یه هر سنه برر قاضی نصب وارسال اولته کلدیکندن بالاده بیان اولدینی اوزره وهابیلر حرمین شریفیندن ملا افندیلر ایله برابر سائر مأمورین دولتی دخی طرف ایشلر ایکن بو ائنده اجرا اولنان توجیهات علمیه ده مکه مولوی شام شریف قاضی آخسته لی خلیل افندی یه و مدینه مولوی مصر ملاسی خلیل حمید پاشا زاده عارف بك افندی یه توجیه بیور لمشیدی لکن مصر والیسی محمد علی پاشا عارف بکی صالیور میوب بعد الیوم حر مینه موالی ارسالی تلفلرینی موجب و دولت علیه حقدنه تقیصه شانی جالب اوله جغنی باب عالی یه انها و اخطار دخی ایلمشدر .

ودها غریبی بودرکه بروجه مشروح قبرسه نفی اولنان سالف الذکر صالح بك انئی راهده ایکن بعض شفعا توسطیله عنفو و در سعادتیه اعاده و اموالی رد اولنه رق غره جمادی الآخره ده عهده سنه درگاه عالی قوجی باشلیغی رتبه سیله صره هایون امانتی توجیه بیورلدی حالبوکه صره هایون امینك منتهای سفری شام اولوب اندن ایلروسی ایچون یول یوغیدی فقط رسم و عادت یرینی بولسون دیو بوسنه دخی اوله بر صره امینی نصب اولنه رق کویا شام والیسی اولان کنج یوسف پاشا وهابیلری اوروب طاغیده رق قافله حجی کوتوره جک یوللو برکوسترش ایدلدی یوسف پاشا ایسه شام والیسی اولدقن صکره بروقتنبرو حال عصیانده بولنان طرابلس شام متسامی بربر مصطفی ایله جنك ایدوب اکر چه چند ماه طرابلسی حصر و تضییق ایستدک نصره مصطفی اغا صیدا والیسی سلیمان پاشا یانه فرار والتجا ایدرک یوسف پاشا طرابلسی ضبط ایله اولطر فجه غائله دن قور تلمش ایسه ده وهابیلره قارشو چول طرفنده حرکته مقتدر دکل ایدی .

قائم مقام صدارت عظمی حمدالله پاشا اختیار و ایجاب حال وعصره کوره حل و عقد اموره عذیم الاقتدار اولدیغندن بشقه بروجه بالا در سعادتیه تفر د ایدن شیخ الاسلام عطاءالله افندیك قائم مقام سابق موسی پاشا ایله درکار اولان اتحادینه مبنی انك قائم مقامغه اعاده سنی التزام ایلدیکندن جمادی الآخره نك ایکنجی پنجشنبه کونی حمدالله پاشا ماهیه بیك غروش معاش ایله متقاعداً قاضی کوینده اقامت ایتمک اوزره عزل اولنه رق یرینه موسی پاشا ینه قائم مقام نصب اولندی .

جمادی الآخره نك اون اوچنجی بازار ایرتسی کیجه سی ساعت بش صولرنده بال قباتی نام محله واقع قاضی خانی درونندن حریق ظهور ایله یدی ساعت و اون بشنجی کیجه سی شهزاده باشنده عجم اوغلانلری قوللغی گوشه سندن کدلك بر حریق ظهور

ایله اون ساعت قدر متمد اوله رق پک چوق یرلر یاندی ونجه او جاقلر سوندی .  
 وینه جمادی الآخره نك یکر می ایکنجی کونی قره دکن بوغازی یماقلرینه او چوز الی  
 کیسه عطیه سنیه احسان وتوزیع بیورلدی وصدور وموالی یه توزیع اولتمق اوزره  
 طرف شاهانه دن شیخ الاسلام قوناغنه مکمل بوغچه لر کوندرلدی .

اردوی هایون قاضیسی محمد امین افندی ختم سبجل حیات ایتمکه جمادی الآخره نك  
 یکر می دردنجی کونی سابقا از میر قاضیسی صدقی زاده احمد رشید افندی اردوی هایون  
 قاضیسی اولدی .

رجب شریفک اوننجی کونی چابی مصطفی رشید افندی رکاب هایون کتخداسی  
 وانک یرینه یوسف آگاه افندی ترسانه امینی اولدی .

واون ایکنجی کونی بر معتاد حضور هایونده صره حرمین شریفین چیقارلدی وینه  
 بواننده جرده باشبوغانی الحاقاً شام والیسی کنج یوسف پاشایه ورقه ایالتی کدلاک  
 الحاقاً حبس ایالتی والیسی ملک احمد پاشا زاده عثمان پاشایه توجیه بیورلدی لکن حجاز  
 یوللری مسدود و جرده باشبوغلنک وجه استخدای مفقود ایدی یاصره کیملره  
 یر یله جک ایدی بیلیم .

قره دکن بوغازی یماقلری جلوس هایوندنبرو پک زیاده یوزه چیقهرق بوغازا یچنده  
 واستانبولده مساحاً کشت و کدار و قلعه لرده فاحشه آتمغله اعلان فسق و فجور ایتدکلرینه  
 قناعت ایتیموب اهل عرض قادینلره طاقلمق و علناً عشرت ایدرک سرخوش اولوب  
 زقاقلرده و میدانلرده نعره اورمق کبی بی ادبانه حرکاته اجتناس ایدر اولدیلر و طرف  
 شاهانه دن معامله لطفیه کوردکجه دهها زیاده شمار دیلر حتی همشیره پادشاهی اسماسلطان  
 تبدیل هوا ضمننده کلشن آباد دینیلان چراغان ساحل سر اینده بولتمق ملابسه سیله ذات  
 شاهانه دخی رجبک اون او چنجی چهارشنبه کونی تبدیلاً اورایه تشریف بیورمشیدی  
 و بشکطاش مولویخانه سنک کونی اولمق حسیلله یچی افندی میدانی مزدهحکاه رجال  
 ونسا ایدی ایشته اول کون یماقلردن ایکی نفر سرخوش اولدقلری حالد سرایک  
 قیوسی او کندن کچر کن اوراده بولنان بوستانخیلر ایله برغوغا چیقاروب اوزرلرینه  
 پشتو آتدقلرنده یچی افندی ساحه سنده بولنان چند نفر یماقلر پشتوسسنی ایشیده رک  
 اورایه کلوب اطرافده بولنان بوستانخیلردخی تحشد وتجمع ایله جنکه لادی اببتدار  
 بوستانخیلردن چند نفری مقتول و مجروح اولمش ایسه ده اشقیای مرقومه دخی مجروح  
 اولهرق طوتیلوب زندانه ارسال ایله کیجه اعدام اولمشلردر .

ایشته اسافله زیاده یوز ویرلمکه ایش نه راده یه وارمشکه سلطان مصطفی سر اینده  
 ایکن قپوسنده بکلیمان و کندوسنک عساکر خاصه سی حکمنده بولنان بوستانخیلرک

اوزرلرینه بر طاق شقاوت پیشه لر هجوم و اقتحام و حتی چند نفری اعدام ایتشار بونک اوزرینه آرتق مساحه جائز اوله میه جغنه و یالکنز بذل عطایایله ادبسر لرك ضبط و ربطی قابل اولیوب آسایش عمومینک محافظه سی ایچون سیاست اجرایی لازم کله جکنه سلطان مصطفی دخی قانوب هان اول کیجه بومقوله اشقیانک تأدی ایچون بر قطعه فرمان عالی اصدار ایتکله فرداسی پنجشنبه کونی کارخانه لی و او جاق و اختیار و سر کرده لری سلاحلانه رق و قلعه قپولرینی قپاده رق استانبول ایچنده بولدق لری یکر می اوچ نفر یماق لری بوغوب لاشه لرینی دکزه آدی لیر .

بغداد و بصره و شهر زور ایالت لری و الیسی اولان علی پاشانک کوله لری طرفندن اعدام اولدنیغی خبریله یرینه کوله لرندن کتخداسی بولنان سلیمان پاشانک نصب و تعیینی استدعاسنه دائر محلمندن تنظیم و تقدیم اولنان عرض و محضر رجب معظمک اون یدنجی کونی درسعاده واصل اولدی حالبوکه بغدادک کوله منلر یدندن استخلاصی اوتدنبرو دولتجه ملتزم بر کیفیت اولدیغنه بناء بوقعه بروسیله مناسبه اتخاذا و نوب سلیمان پاشانک صرف نظر اولنه رق ملاحظاتیله بغداد ایالتی ارضروم و الیسی صدر اسبق ضیا یوسف پاشایه توجیه بیورلدی .

لکن متعاقباً فرانسز ایلیچسی سباستیانی بغدادک حال اختلالده و سلیمان پاشانک قوت و مکتبی کمالده اولدیغندن بحثله عهده سنه بغدادک توجیهنی دوستانه اخطار سیاقده باب عالییه بر قطعه تقریر کوندر مکله واجبی سوزیله والی نصبی قطعاً جائز دکل ایسه ده و قتل پک طار وزیرده بیان اولنه جنی اوزره بواننده فرانسز لرق قطع مخبریه بهانه ارامقده اولدق لری درکار اولدیغندن سباستیانی کوجنامسی دخی لازمه حالدن بولنسیله تحقیق ماده ایچون بغداده بر مامور ارسالنه قرار و یرلدی . وقایع بغدادک تفصیلنه کلنجه بغداد و الیسی متوفی علی پاشا سلفی سلیمان پاشانک بیوک دامادیدر و فی الاصل انک کوله لرندن اولوب ادیب ولیب و جسور و وقور بر ذات اولسیله سلیمان پاشا آنی خزینه دار ایتدکن صکره بر اراق کندوسنه داماد ایتک ایستدکده کتخداسی احمد اغا مانع اولمش ایدی . اولوقتلر ایسه بغدادده کتخدا بولنان ذات و الینک ایکنجیسی اولوب هرایش انک النده ایدی و کتخداد اتره سی آرو اولغله هر کون علی الصباح بر بلوک عسکر کیده رک کتخدای دائره سندن آلب پاشا قپوسنه کتورر و قپوجیلر کتخداسی قولتوغنه کپروب نردبان باشنه و اورادن خزینه دار آلب پاشانک یانه کوتورر و کتخدا دونکی اجرا آتی بیان و اولکون یابه جنی ایشلری استیدان ایتدکن صکره قالقبوب ینه ترتیب مشروح اوزره دائره سنه کیدروارده برایش اقتضا ایتدکده بالواسطه مخبره ایدرایمش و بغدادجه کتخدان

صكره قوجيلر كئخداسى عد و اعتبار اولوب خزينه دار رتبه انك دخى مادونى ايسهده پاشانك عساكر خاصهسى مقامنده اولان يدى سكر يوز قدر كوله منلر هپ خزينه دارك قوماندهسى تحتنده بولنورمش و بروقتد نبرو كوله منلر بغداد حكومتى بنسيوب احمد كئخدا ايسه يرو و فرومايه اولدينى حالده كئخداق مقامنه كلش اولديغدن كوله منلر انى ذاتاً چكه منلر ايكن بوكره خزينه دار على اغانك دامادلغنه مانع اولسندن طولايى حقهده على اغا اضمراكين ايله فرصتى كوزتمكده اولدينى حالده بيك ايكيوز اون سنهسى اواخرنده احمد كئخدا بركون پاشانك يانندن چيقوب كندو دائره سنه عودت ايدركن زردباندن اشاغى ايندكده صاحب ترجمه كوركى التنده اخفا ايلمش اولدينى قايجله ارقه سندن اوروب و ديكر كوله منلر دخى قايچ او شوروب احمد كئخدا نك كارىنى تمام ايتمشلر بونك اوزرينه صاحب ترجمه دفعه خزينه دار اقدن كئخدا و متعاقباً افنديسى سايمان پاشايه داماد اولمش و در سعادتن استدعا ايله عهده سنه ميرمير انلق رتبهسى دخى توجه بيورلمش ايدى . احمد كئخدانى اولوجهله اعدام ايتمى سايمان پاشانك امر ايله اولدينى كلشن خلفا زينده مندر جدر . لكن سايمان پاشا اول عربده يى طويدىنى كې حرم دائره سنه كيدوب آرت قپودن مشايخ عربان قپو كئخداسى اولان شاوزاده يى جلب ايله مشاوره ايتدكده شاوزاده (شمدي يرو عسكر ايله كوله منلر ك تادينه قيام اولنسه بريوك عربده ظهوره كلور و استانبولجه سوء تاثيرى اولور سز بو ايشى على اغانم امر ايله يابدى ديهرك انى كئخدا ايتمكدن بشقه چاره يوقدر ) ديوب سايمان پاشا دخى همان صاحب ترجمه يى كئخدا نصب ايلمش اولدينى و حتى صاحب ترجمه كئخداق خلعتى كيمك اوزره پاشانك حضورينه كيردكده احتياطاً بلنده طبانجه بولندينى و پاشا كندوسنه ( سن بو ايشى فنا ايتدك صكره سنكده باشكك كلور ) ديمش ايدو كى ثقه دن منقولدر و فى الواقع كئخدالغى زمانى خوش كچوب بالاده بيان اولندينى اوزره ايكيوز اون يدى سنه سنده سايمان پاشا وفات ايتدكده يرينه والى دخى اولمش ايسهده نهايت افنديسك ديدىكى كې اولمش و قرق بش ياشنده اولدينى حالده احمد كئخدا يه ايتديكى بولمشدر .

شويله كه : ابتدالرى كندوسنه معارض و مزاحم ظهور ايتديسهده جمله سنه غلبه ايدرك ايلت بغدادى كر كى كې قبضه تصرفه المش و همشيره زادهسى سايمان بك اون طقوز سنه سنده كندويه كئخدا ويكرمى ايكي سنه سنده عرض و انهامى اوزرينه ميرمير انلق رتبه سسيه كامرو اولمش ايدى . حالبوكه كندينك باجناحى اولوب افنديلرى مرحوم سايمان پاشا زماننده كندو كئخدا ايكن قوجيلر كئخداسى بولنان نصيف اغا اولوقتد نبرو قوجيلر كئخدا لغنده استقرار ايله وظيفه مأموريتى ايفا

ایتمکده بولنش ایسهده بروجه بالا همشیره زاده سی سلیمان بك كتخدا اولوبده كندوسنك اوست طرفنه كچمسی ومیرمیرانلق ایله کسب تعین ایتمسی کوجنه کیتمکله حال حاضرک تحول واتقلا بئی تمی ایتمکده و کندیوه مساعد برزمانده میدانه چیقماق اوزره فرصت کوزتمکده و حکومت حالیه دن ناخشنود بولنان کوله منلر دخی بالطبع انک غیرتمی کوزتمکده ایکن بوندن اوچ سنه مقدم باطوم اصیل زادکاندن اولوبده بغداده کله رک علی پاشا دائره سنه انتساب ایله مظهر مکارم بی حساب اولان مدد بك نام نمک بحرام علی پاشایی اعدام ایتمک اوزره ابازه مصطفی ودیگر سکر طقوز نفر کوله لر ایله اتفاق ایدرک جمادی الآخره نك اون دردنجی صالی کونی علی پاشا بر معتاد جماعت ایله صباح نمازی قیلر ایکن ابتدا مدد بك خنجر ایله پاشایی ودیگر لری طبانجه ایله مهر دار عباس اغایی اوروب قیوجیلر كتخداسی سالف الذکر نصیف اغانک قوناغنه کیتمشلر عباس آغا در حال و پاشا بر ساعت قدر یاشادقن صکره وفات ایتمشلر كتخدا سلیمان پاشا قضیه دن آگاه اولیجق واروب علی پاشانک حال نزغنده یتشمش و تسلیم روح ایتمکده تکفین و دفنی خصوصنی لازم کلنلره احاله ایله کندیوسی ضبط مسند. حکومت مسارعت ایلمشدر . و علی پاشانک نعشی کندیو انشا کرده سی اولان مدرسه ده دفن ایلمشدر .

اولوقت بغدادده كتخدالقی والیلکه مخرج دیمک اولمسیله سلیمان پاشانک قائم مقاملغه انتخاب واقعادی امرطیبی ایسهده نصیف آغا علی پاشانک قیویولدایی و باجنایی اوله رق سلیمان پاشایه نسبتله قدملی و حیثیتلو بولندیغنه نظراً و طرفداری اولان کوله منلره وسائر مجلوبی اولنلره استناداً والیلکی کندیوه منحصر کبی بیله رک همان طرفداری اولان برکروه غفلت انبوه ایله قوناغندن قالقوب سرایه طوغری حرکت ایتمشیدی اهالی ایسه كتخدا سلیمان پاشانک اطوار و رفتارندن خشنود اولمغله وقعه دن خبردار اولدقلری کبی سرایه شتابان اوله رق جمله علما و اعیان بلده اكا انقیاد ایله اولجه انی قائم مقاملق مسندینه اقعاد ایلمش اولدقلرندن نصیف آغا سرای جوارینه واصل اولدقده کیفیت معلوم اولیجق باشنده کی جمعیت پریشان اوله رق او دخی بر طرفه فرار ایلمش ایسهده مدد بك و ابازه مصطفی ودیگر قفادار لری طوتیلوب جزالری اجرا اولدینی کبی نصیف آغا دخی اله کچوب سرایه کتوریلور ایکن اندرون اغالری یتشه رک پاره لمشلر لازم کلنلر اجتماع ایله بغداد ولایتنک سلیمان پاشا عهده سنه توجیهی حقنده بر قطعه محضر تنظیم ایله باب عالییه تقدیم ایلمشدر .

بونک اوزرینه بروجه مشروح در سعادتده اول محضره اعتبار ایلدیله رک بغداد

والیلکی ضیا پاشایه توجیه بیورلمش ایسه ده سببستیانینک مداخله سی اوزرینه تحقیق ماده اولنسون یولو مصاحبت آصندیده براغلدینی ائنده ینه بغداد والیلکنک سلمان پاشایه توجیهی استدعاسیله برقطعه محضر دها کلدیکندن اولکی توجیه کیرو انهرق بغداد و بصره و شهر زور ایالتلری سلمان پاشا عهده سنه توجیه بیورلمش و بغداد ینه کوله منلرک دست تحکمنده براغلمشدر .

بغدادک کوله منلر یندن تخلیصی اوتهدنبرو دولتجه آرزو اولنور بر کیفیت ایکن عجا بو ایکنجی محضرک ورودی اوزرینه باب عالی کوله منلرک عصیاندنمی اورکدی یوخسه سببستیانینک مداخله سی اوزرینه می بو آرزوسنک اجرا سندن هان و ازکدی بوراسی لایقوله کسدریله مز ایسه ده بغدادده کی کوله منلرک عددی بیکه بالغ اولمدیغنه و دیگر طوائف عسکریه و اهالی دخی انلرک خاطر ی ایچون قولایلقه عصیان لکهنی قبول ائیمه جکلرینه نظراً ضیا پاشا عمالاً بغداده وارمش اولسیدی ایاتی قبضه تصرفه اله بیلوردی و ایکنجی محضرک درسعداته ورودنده بغداد تجارندن بعضیلری سلمان پاشا طرفندن اولمق اوزره بش اتی بیک کیسه اچهلر ویرمش اولدقلری و اندرون و بیرون متفذلرینک بو مبالغدن حصه دار اولدقلری مروی اولوب انجق نصل تقسیم ایدلدی و کیتلوسی زده یه ویرلدی بیلنه مز وزیرده بیان اولنه جنی و جهله اول اوانده فرانسه و روسیه ایمراطورلری کندو بینلرندره روم ایلی قطعه سنک مقاسمه سنه قرار ویرمش اولدقلرندن سببستیانینک روم ایلی ایشلرینه مداخله سی دولتینک پولتیقه سی اقتضاسندن اولسون اما بغداد والیسی نصبنه مداخله ایله بونک ایچون باب عالییه تقریر کوندرمسنه دخی برطوغری معنا ویریه مز .

سلطان سلیم خان حضر تارینک و اواخر ایامنده روسیه لولر اخلاکک قلعه سی اوزرینه هجوم ائتمشلر ایسه ده پک فنا حالد منهزم اولوب پک چوق تلفات ویره رک عودت ائتمشلر ایدی بعده شرق سرعسکر ی و ارضروم والیسی بولنان صدر اسبق ضیا یوسف پاشا اردوسیه روسیه اوزرینه حرکت ایدوب قارص والیسی محمد پاشانی دخی بر فرقه ایله ایلرو سوق ائتمشیدی اولوقت شوره کل طرفنده بولنان روسیه اردوسی ایسه دها اول طاورانهرق بقته کلوب و محمد پاشا فرقه سنی باصوب پریشان ایلمشدر چونکه ضیا پاشا روسیه لولرک حرکتی خبر الویده ایلرویه حرکت ایده جکی وقت سلطان سلیمک خلی خبر دهشت اثری وارد اولیجق نه یاپه جغنی شاشیروب بر تقریبله عسکر ی کیرو المق ایسته مش ایسه ده بو قارغشه لقدمه عسا کر اسلامیه منهزم اوله رق بر قاچ یوزی شهید و بر قاچ یوزی اسیر اولمشدر ایشته بو هزیمته محمد پاشا سبب اولدی دیو اتهام ایله اعدام اولنغین سر مقطوعی رجبک اون سکننجی کونی استانبوله کلدی .

دیوان هایون ترجانی علقو بکک وظیفه سندن خارج ایشله مداخله ایتدیکی سمع پادشاهی به القا اولمغله اعدامی ایچون اراده سنیه صادر اولوب علقو ایسه دور سابقده پک چوق ایسه یرامش ایدوکنه و در دست اولان مسائل پولتیقهده وجودی الزم اولدیغنه مبنی رکاب هایون رئیس حالت افندی ایله کتخدابک بر لکده عفوینی نیاز ایتلریله بوکادائر قائم مقام پاشا طرفندن رکاب شاهانه به مخصوصاً تقریر تقدیم اولمشیکن مشر اولیوب اعدامی باینده تکرار اراده قطعیه صدور ایتمکله رجبک اون طقوزنجی کونی اودخی باب هایون پیشکاهنده اعدام ایدلدی .

حالبوکه بوئانده فرانسر ایلچیبی سبستیانی دولت علیه یی از عاج ایچون وسیله ارامقده اولدیغندن وزیرده بیان اولنه جنی وجهله بالخاصه حالت افدینک علیهنده بولندیغندن علقو بکک فرانسر حمایه سننده ایدوکنی ادعا وحالت افدین اشتکا ایله باب عالی یی پک زیاده تضییق وتصدیع ایلمشدر چونکه فنار لولرافلاق وبغدان سایه سننده پک زنکین اوله رق وکلادائر لر نده دخی فوق العاده مظهر اکرام واحترام اولمقده ایکن روسیه لونک مملکتینه مداخله سی ومؤخرأ بورالینی استیلاسی حسینله انلرک دخی منبع غنا و ثروتلری منقطع اوله رق دوچار مضایقه اولملریله ایچلرندن صوچو وقالمایکی فامیلاری کبی بعضیلری فرانسه لو طرفنه تمایل ایتش ایسه ده سائر هی روسیه طرفدارغنی التزام ایتشلر ایدی سبستیانی ایسه بونلری هی فرانسه پولتیقه سنه جلب ایتک ایتردی . بناء علیه دیوان ترجانبک اعدامندن طولایی بویه کورلدی ایتشدر یوخسه بالاده بیان اولندیغنی اوزره روسیه طرفداری بولنان فراری قسطنطنین بکک پدری ایکی یوز یکر می بر سنه سی اواخر نده اعدام اولندقده بوکاسبستیانی اعتراض ایتدکن بشقه بلکه بونی کندو پولتیقه سنجه بر نوع مظفریت قیلندن عد ایتشیدی جای تعجب شوراسیدر که حالت افندی دیوان ترجانبک تخلیصنه سی ایتمشیکن اعدامندن طولایی سبستیانبک عداوتی بلاستی ینه اوچکیوردی ایشته رجال باب عالی بر طرفندن بویه جانبک اعتراضنه هدف و بر طرفندن مقر بنبک یولسز حرکتلرندن ناشی دوچار کدر واسف اوله رق نه یاه جققلرینی شامیر مشلر ایدی و اولوقت دولت علیه نیک باشلوجه بر بلاسی دخی بوایدیکه مصالح خارجیه سی فنار لولر یندن اولوب انار ایسه قنی دولتک پولتیقه سنه میال ایسه لر دولتی اولطرفه سوق وتشویق ایدرلر وارکان دولتی حیرت وترده دوشور لر ایدی .

شروان اطرافنده پک چوق معدنلر اولدیغنی حالده بورالری وان و دیار بکر ایالتلری داخنده اولوب اهالیسی ایسه کیمی یزیدی وطانغی و کیمی عاصی و بانغی اولمغله بومعدنلری ایشتمک قابل اولدیغنی ومیر میراندن یورتلق و او جاقلق وجهله موش



متصرفی اولان مراد پاشانك اولحوالیده کی طوائفی تأدیبا یله معادنی ایشلتدیره بیله جکی تحقیق اولغنین عهدہ سنہ روم ایلی بککر بکیلیکی پایه سیله دیار بکر ایالتی بالتوجیه صورت مأموریتی مقدسجه طرفنه بیلدیرلمش اولمسیله بو ائسنادہ ایقای مأموریتہ تشبث ایتمک اوزره ایکن وفات ایتمکله اشبو معدن ایشی دخی حالی اوزره قالدی .

قرمان والیسی واقدکز بوغازی سرعسکری صدراسبق حافظ اسماعیل پاشانك وفاتی خبری دخی ماه شعبان معظمک اون بشنجی کونی درسعدتہ واصل اولدی .

متوفای مشار الیه شهر استانبول اها لیسندن و خاصکیان خاصه دن زر نشانلی خاصکی نام ذاتک صلبدن بیک یوزیتمش بر سنه سننده تولد ایتمشدر . سن تمیزه رسیده اولدقدہ مکتبه دوام ایله کلام قدیمی حفظ ایتمکدن صکره خاصکیان خاصه زمهره سنه التحاق ایله سرای هایونه کیروب یاوروی بخت ایله یول خاصکیسی ویکچیری اغاسی قره قولغنی و تبدیل خاصکیسی و خاصکی اغا اولدقدن صکره سلطان سلیمک حسن نظرینه مظهر اولمقدن ناشی بوستانجی باشی اوله رق یدی سنه قدر کمال اقبال ایله بو مأموریتده مستخدم وبعده رتبه وزارتله قبولدان دریا و چندماه مرورنده صدر اعظم اولمشیدی اولوقت ابراهیم کتخداکی منظور پادشاهی اولان اتابکان سلطنتک دفع وازاله لرینه تشبث ایتمکده طرف شاهانه دن مساعده بیورلمیوب صاحب ترجمه ایسه غایت خودین و عنود و مهین بر شخص اولدیغندن دفع رقبا و خصما داعیه مکر و هه سیله کفران نعمت و اجرای خیانت یولنه سلوک ایدرک ادرنه وقعہ سنک حدوشنه سبب اولدیغندن عزل و نفی اولمش و سلطان مصطفانک جلوسندن صکره اقدکز بوغازی محافظه سنه تعیین قلنمش ایدی بر ایکی آی مرورنده وفات ایله عزم دار مجازات ایلدی .

بروجه بالا بغداد والیکی ضیا پاشایه توجیه اولندقدہ عهدہ سندن منحل اولان ارضروم ایالتی بر اراق مرفوع الوزاره حق پاشایه ابقای وزارتیه و بر اراق ضیا پاشا کتخداسی درگاه عالی قپوچی باشیلرندن عثمان اغایه مجدد آرتبه وزارتله و حافظ اسماعیل پاشانك وفاتنده اقدکز بوغازی محافظی وزارتدن متقاعد یمنجی زاده یوسف پاشایه ابقای وزارتیه توجیه بیورلدینی ائسنادہ سابقا چلدر والیسی اولان مرفوع الوزاره شریف پاشایه دخی ابقای وزارتتی و فیما بعد شان وزارتیه منافی حرکتن اجتناب ایتمک تنبیه و نصیحتی ایله قارص ایالتی توجیه اولنمشیکن مراد پاشانك وفاتی اوزرینه مأموریتی دیار بکر و متعاقباً رقه ایالته بالتحویل دیار بکر ایالتی دخی معدن امینی عبدی پاشایه رتبه وزارت ایله توجیه بیورلمش و مؤخرأ حق پاشا اقدکز بوغازی سرعسکری و ضیا پاشا قرمان وبعده حلب والیسی اولمش و سالف الذکر عثمان پاشانك مأموریتی ارضرومدن سیواس ایالته تحویل اولنمشیکن اره سی چوق کچمکسزین عهدہ سنه شرق جانبی سرعسکر لکیله ارضروم ایالتی توجیه بیورلمشدر .

شعبانک اون دردی تاریخیه اجرا اولنان توجیهات علمیهده خواجه شیخ الاسلامی  
 منیب افندی به صدارت اناتولی پایه سی ویرلمشدر همپایه لرندن سلیمان ملا افندی  
 تهینه سنه کیدوب اننای مصاحبتده ( هر پایه به بر کتاب تالیفیه نائل اوله یوردیکز عجا  
 بو پایه ده بر تالیف تقدیمیه می میسر اولدی ) دیو استفسار ایتدکده خواجه افندی  
 دخی لطفه یولو ( بودفعده بر شیخ الاسلام تالیف ایلوب دولت علیه به وبالجمله  
 ممالک عثمانیه یادکار ایلدم ) دیو جواب ویرمش اولدیغی عاصم افندی مقام قدح  
 و تزییفده حکایه ایتدکن صکره ( تالیفی اولان یادکارک العیاذ بالله تعالی دین و دولته  
 فائده عأده سی نمایان اولدی اللهم اعصمنا من الزلل ووقفنا الی خیر العمل ) دیو  
 ختم کلام ایلمشدر .

ینه بو ائنده اقدمجه رکاب هایون کتخداسی نصب اولنان کوسه کتخدا یعنی  
 چلبی مصطفی رشید افندی کتخدالقدن آقدکز بوغازی نزل امینی نصب اولنوب  
 یرینه تذکره اول وکیلی مصطفی افندی رکاب کتخداسی و بوز اولقی مصطفی مظهر  
 افندی تذکره اول وکیلی نصب و تعیین بیورلمشدر . بو صرده اکیلی حاجی مصطفی  
 افندی نشانچی وکیلی اولمشدر .

قباقچی وقعه سنده محرک فساد اولنلردن معهود قزانجی مصطفی دخی برارالق قپوجی  
 باشلیق رتبه سیله کمشیخانه امینی نصب اولنوب آرده سی چوق کچمسزین اوراده کاری  
 اتمام ایله دولت برداهیه دهیادن قورتلمشدر . او مللوق وقایع اختلالیه به سبب  
 اولنلر برر خرجه سورملک بو عالم اسبابک اصول معتاده سنندن اولغله بو بایده بشقه  
 سبب ارامغه حاجت کورلمز .

### \* طلوع ذات الذنب \*

رجبک یکر می ایکنجی کیجه سی غرب شمالی سمتنده بر قویروقلی یلدز طوغوب  
 قویروغی شرق طرفنه متوجه ایدی قطب شمالی طرفنه طوغری سیر و حرکت  
 ایدرک اوچ ماه مدت کورندکنصکره محتفی اولمشدر بوکا دائر سروری افندی  
 تاریخ معجم اولوق اوزره ( اختر دنباله دار آسمان قیلدی طلوع ) مصراعنی  
 نظم ایلمشدر .

بعضا بویه دنباله دار یا کسودار و یا خود دیگر صورتده نمودار یلدزلر طلوع ایدوب  
 شکل و صورتلرینه کوره ذوات الاذنب و ذوات الذوائب کبی اسملرله تسمیه اولنورلر  
 حقیقته نه اولدقلری بین الحکما مختلف فیهدر بونلر بعضیلر عندنده نجوم سائره  
 کبی اون ایکی بر جده سیر و حرکت ایدوب درجات بروجی علی خلاف التوالی یعنی  
 معکوساً قطع ایدرلر و بعضیلر عندنده نجوم اولیوب کائنات الجو قیلندن یعنی شهب

کبی بخارات محترقه دن اوله رق صور مختلفه ده کورینور و ثوانی النجوم تسمیه اولنور لر . شویله که : ماده سی لطیف و سرعتله منطقی اولورسه شهاب تعیر اولنور و نیزه کبی ظهور ایدوب ماده سی کشفته مائل و براز مدت صکره منطقی اولور ایسه نیزک دینلور نته کیم شاعر دیمشدر .

\* بیت \*

ترحل وان ضاقت عليك الممالك \* الى بلد لم تبد فيه النيازك  
واکرچه برچوق ایام و شهوور باقی قالور و اشکال مختلفه ده کورینور ایسه ذوات الاذنب کبی اسملرله تسمیه قنور و علی کلا القولین اهل نجوم عندنه علامت محسندن معدود اولوب بونلرک اشکال و اوضاعنه و طالع اولدق لری بوجه کوره حوادث آتیه دئر برطاقم احکام فلکیه استخراج ایدر لر مثلا انلردن بری حمل برجنده نمایان اولسه حمل منسوب اتدن اولان عراق و فارس و آذربایجان و بلاد افرنج و یمن و فلسطین کبی نمالکده قن و حروب و استعلاء اشرار و هلاک رؤسا و ملوک مثللو حوادث کونیه ظهور ایدر و شرق طرفنده نمایان اولورسه اثر لری تیز و غرب طرفنده نمایان اولورسه اثر لری کیچ لایح اولور دیر لر سائر ی دخی بوکا قیاس اولنه بو مثللو علامت لر خلفای عباسیه دن متوکل و مکتفی عصر لر نده ظهور ایتدیکی کبی یلدرم بایزید خانک و اواخر عهد سلطنتنده دخی ظهور ایتشیدی .

متأخرین اهل هیئتک بیانیه کوره ذوات الاذنب دخی شمسک اطرافنده دور ایدر و اکثرینک حرکتی معکوس اولوب اما بعضیلرینک حرکتی علی التوالیدر و حبه لری سیسه مشابه اولان موادک برمحله زیاده تراکم و تراحمی ایله تکون و قویروقلری سیمک کشفتنک بالتدریج تناقصی ایله تحصیل ایتک کر کدر بناء علیه دائما برشکاده ظهور ایدمزلر و سرعت سیر لری جوهر لرینک مقدارینه کوره تزیاد و تناقص ایتدیکندن شو قویروقلی ییلدز فلان و قنده ظهور ایدر دیو کس دیر یله مز و بونلرک مدار ی حقنده اختلاف اولنوب بعضیلر قطع مکافی منحنیمی و بعضیلر قطع زائد منحنیمی رسم ایلدکارینه ذاهب اولمشلر ایسه ده بعض حکمای متأخرین دخی قطع ناقص اولدیفنی کشف و استخراج ایلمشدر کرک کوزله و کرک دورین واسطه سیله التیوزدن متجاوز قویروقلی ییلدز کشف اولدیفنی مثللو بهر سنه یکیدن یکیه قویروقلی ییلدز لر پیدا اولمقده در فقط شمسی یه دک یالکز درت دانه سنک مدت دور لری کشف و استخراج اولنه بیلمشدر .

و متأخرین اهل هیئت احکام نجومه اعتبار ایتیموب اکرچه سلطان سلیم دورنده استانبولده دخی هیئت جدیده ایجه شیوع بولدیسه ده زایحه وزیر چهلر دخی

اعتباردن دوشمیبوب بلکه دها زیاده رواج بولدیندن علم نجومه آشنا کیین بعض ذوات بوکره ظهور ایدن قویروقلی ییلدیزه نیجه احکام فلکیه ترتب ایتدیروب استانبول خلقی اندیشه وانتظاره دوشورمشلر ایدی عاصم افندی بومبجده دیرکه بعض فن آشنایان نجوم کوکب مذکورک برج اسدده طلوعنی تقدیر ونیجه احکام تقریر ایدوب باذن الله تعالی بالتدریج هویدا اولدی انتهى العلم عندالله والعهده علی الراوی .

\* وقایع شتی \*

بالاده مسرود اولان مقدماندن استنتاج اولندیغی اوزره استانبولده سوز شیخ الاسلام عطاءالله افندیه اولوب اسافل ایسه پک زیاده یوزه چیقمش اولدیغندن ضابطه بادیه هنوز لایقینه یولینه قونیه مدینی جهتهله نوبنو حادثه لر ظهوره کلدیکی ائشاده اردوی هایونک حالی دخی کوندن کونه فالشهرق دولتعلیه نک مشکلاتی آرتقمده ایدی .

تفصیلاتی بووجهله درکه یکچیری اغاسی په لوان پاشا فی الاصل بلغراد سنجاغنده واقع صوقول قضاسنه تابع برقریه اهالیسندن ایکن رهبری هدایت خدا ایله درسعاده کاوب الی الی بلوکک یولداشغیله یکچیری کروهنه التحاق ایتدکنصکره اوجاق بازرکانسه جمله جی وایکی یوز سفرنده یساقچی وبعده الی طقوز بلوکک چورباچیانی محلول اولدقده بازرکان مرسومک وساطت شفاعتیه مذکور بلوکک ال اوپوب چورباچی ورفته رفته یولیه طورناچی وسکسونجی وزغرجی باشاقدن قول کتخداسی ونهایت یکچیری اغاسی اولمش واغالی مدتنده صلابت وشجاعت وضبط وربطه لیاقت ایله شهرت بولمش وعلی الخصوص انکلیز دونماسنک درسعاده ورودنده واردهی هایونک خروجنده درون استانبول انواع طوائف عسکریه ایله طولمشیکن بونجه حشراتک ضبط وربطی امرنده یدطولی کوسترمکله بین الناس بیوک اغا نام وعنوانی المش ایدی فقط بالاده بیان اولندیغی اوزره سلطنت سنیهنک کندوسنه امنیتی اولمدینی جهتهله برارالق عزل اولندقدده اردوی هایونده فتنه احداث ایدرک جبراً کندوسنی یکچیری اغالغنده ابقالیستدردیکنه قناعت ایتیبوب تکرار یکچیری افساد ایدرک سردار اکرمی مسند صدارتدن تنزیل ایتمکله مستحق مجازات اولمشیکن متعاقباً وزارت المش وبونک اوزرینه عظمتی ارتیروب ارتق کندو قومنه دخی بارد معامله ایدر اولمش ایدی وقول طائفه سنک دیزکنی کندو النده اولوب انلری ایستدیکی کبی اغفال ومرامی وجهله اعمال ایده کلدیکنه مبنی او یوزدن بی باک وبی پروا ایدی واستانبولده زور بالقهله نیجه

اسافلک نفوذ و اعتبار بولدیغنه و حتی مصطفی چاوشک سبکناشی اولدیغنه باقهرق اردوی هایونده دخی قپوروز المق ویکچری اغامی اولمق و هیچ اولمز ایسه کندوسنک اطوار نحو تکارانه سندن قور تلمق سوداسیه اختلال چیقار مغه چالیشانلر اوله بیه جکنی هیچ دوشونموردی حالبوکه زور بالقه در سعادتده جلوس هایون واردوی هایونده تبدل صدارت کبی ریب المنون وقوع و ظهوری ایله اسافل پک زیاده شماروب فوق العاده یوز بولدقلرندن ویکچری زور بارلی فلکه کلک و سیمرغه سینک و بلکه کندو ضابطارینه کوپک دیمکه تنزل ایتمز اولدقلرندن ایش انک ائندن دخی چیقمش ایدی پهلو ان پاشانک خلا فکیرانی ایسه ای بشقه درلو یکمک قابل اولدیغنی کوره رگ غافل آولایوبده کندو او یونندن دوشورمکه ویکچری اسافلنی تحریک ایله انک باشنه اوشورمکه نهانی سعی و اقدام ایتمکده اولوب یکچریلر ایچنده دخی بروقعہ احداث ایله اردوی یغما ایتمک وبعده صاوشوب مملکتارینه کیتمک ایستیان خلیجه اسافل بولندیغندن جزئی تحریک ایله قیام ایدیور مشلردر .

شویله که : اردوی هایونک روسیه اوزرینه حرکته مجالی اولدیغنی حالده متارکه و مصالحه رایحه سی استشمام اولندیغندن ( حاضر اول جنکه اکر صالح وصلاح ایسترایسک ) فحوا سنجه جنکه حاضر ومهیا کورنمک اوزره جمادی الاولانک یکر می دردنجی کونی لوای سعادت سی سلستره ده ترک و ابو بکر پاشالوای سعادت قائمقامی نصب ایله سردار اکرم غایت سبکبار اوله رق سلستره ایله قره لاش اره سنده کی اطه یه گذار ایتشیدی ایشته اولوقت قره لاش یقه سنده بولان او جاقلو ایچنده اغا پاشاعلیهنه اوله رق زیر خاکستر خفاده بر عصیان آتشی پیدا اولوب انجق کندوسی قول طاقه سندن غایت امین اولدیغنی جهتله پارلامدجه خبردار اوله مامش و اوائل رجبده کروه اشقیها مان کندوسنک چادرینه هجوم ایتدکده قول طاقه سنک عنان اداره لرینی دائمآ کندو النده بیلدیکنندن معقادی اولان حویراد بهادرلغنی ایله بی محابا اول حشراتک دفعی قیدنده ایکن سؤال و جوابه وقت قالمق سزین مجروح نیش آزاری اولان نفرات نفرت آیات بردن بره اوزرینه آتش ایتملر یله یره دوشدیک کبی بر بکشتاشی یتیشوب النده کی تبریله باشنی بدنندن جدا ایتمشدر . بونک اوزرینه یکچیری اردوسی بر برینه کیروب قره لاش اطه سنه عبور ایله سردار اکرم اردوسی یغمایه قیام ایتمشلر ایکن هله متوسطلر ظهور ایدرک قلم مضی ماضی ایله عاصیلرک صحیفه سیناننه خط عفو و مسامحه چکلمش وقول کتخداسی سلیم اغا اطه یه جلب ایله اغالق خلعتی اکسا وکیجه مشعله لر ایله یکچیری اردوسنه اسرا اولنهرق آتش عصیان باصدیرلمش و فرداسی پهلو ان پاشانک نعشی سلستره یه نقل ایله مقابر مسلمینده دفن ایدلمشدر .

اغا پاشانك بووجه ازالهء وجودى رجال دولتك ايجه امن واطينان قلوبنه بادى اولديسهده كتخدائى صدر على مصطفى رفيق افندى ايله رئيس الكتاب غالب افندى سلطان سليم رجالتدن بولندقلرى جهته كندولرينه امنيت اولنه مديغنه مبنى اعداملىرى ايچون اولجه سردار اكرمه خط هايون كلوب انلردنخى هر نصلسه بر سرى احساس واستراق ايتدكلرندن آگاه و متيقظ بولنهرق تخليص كريبانه چاره ارامقده ايكن اشبو اغا پاشا وقعه سنى فرصت اتخاذايدرك وهان فرداسى بغته اردوى هايوندن صاوشه رفق روسجغه واروب و علمدار پاشانك حماى حمايته كيروب روسجق ياراننه قارشديلر .

سلطان سليم طرفدارى اولان بو قدر دهات برلشوبده علمدار پاشاياننده مظه نشين التفات اولجق كمال اهميت واولكيدن زياده كرميت ايله اعاده جلوس مسئله سنك مذاكره سنه كيريشديلر .

بوصورتله اردوى هايوننده كتخدالق ورياست مقاملى خالى قالدوغندن صدارت عظمى كتخدالغى دفتر امينى عثمان افندى به ورياست منصبى چاوشباشى عارف افندى به وچاوشباشىق سپاه اغاسى يكن ابراهيم اغايه ودفتر اماتى مورهللى على افندى به وسپاه اغالى باشباقى قولى اولان طاغ دويرن اوغلى محمد اغايه وباشباقى قولغى ادرنهلى محمود اغايه توجيه بيورلدى .

لكن اردوى هايونك ذخيره وسائره جه اداره سى متعسر ويكيچرى زوربالرينك ضبط وربطى متعذر اوله رفق سردار اكرم مضطرب و متعير اولدغى حالده هله متاركه صدرلى امدادينه يتشى .

شويلاهكه : زيرده تفصيل اولنه جغى وجهله بو اوانده ناپليون تياسيتده روسيه ايمراطوريه عقده مصالحه ايدرك دولت عليه ايله دخى متاركه نى شرط ايلمش اولدوغندن رجال دولتن برينك مكالمه مأموريتى لازم كلديكى سفرا ايله مكالمه ايسه وقوف ومارسبه موقوف اولدوغندن ازالهء وجودلى آرزو اولنان سلطان سليم رجالتدن برينك تعييننه احتياج كورلدى بو جهته غالب افندى مكالمه مأمور اولدى .

اما رفيق افندى روسجقده قلوب ديكر رفقاسى اولان رامز و تحسين وبهيج افنديلرله عناصر رابعه كى امتزاج و اتحاد ايليه رك نتيجته مطلوبه نى توليد ايده جك مبادى ومقاماتك ترتيبه دوام ايتديلر .

واردوى هايونك طونه ياليسنده طوره بيامسى علمدار پاشانك ذخيره وسائره جه اعانه سنه متوقف اولوب علمدار ايسه بروجه بالا منفعلاً سلاستره دن عودت ايتدكلدن صكره اولكى كى اردوى هايونه اعانه اتمز اولدوغندن على الخصوص بو ائنده ذخيره

تدارکی مشکل اولدینی بهانه سیله اردوی هایونک طونه یالیسنده وجودینی استقال ایلدیکندن سردارا کرم دوچار اضطراب اولدینی خالده جمادی الاخره نیک یکر میسنده متارکه سندلری امضا اولغله ارتق طونه یالیسنده برایش قلمدی دیوادر نه ده مشتانشین اولق اوزره اردوی هایون ایله ماه ربیع کونی سلستره صحرا سندن حرکت واون کون شمنیده استراحت ایله ماه مرقومک یکر می برنجی کونی ادر نه به موصلت و خارج شهرده نهر مریچ کنارنده نصب خیام اقامت ایلمشدر .

آمدی دیوان هایون خلفا سندن وخواجگان دیوان هایونندن وقعه نویس سید محمد پرتو افندی ده سلستره ده ایکن نامزاج اولوب بوکره اردوی هایون ایله ادر نه به وصولنده ختم جریده حیات ایتمکله سزایی تر به سی نزدنده دفن اولمش ویرینه عامر بک وقعه نویس اولوب عهده سنده بولنان بلوکات اربعه کتابتی دخی مکتوبی صدر عالی خلفا سندن تاریخچی علی رائف افندی به و تاریخچیک یینه خلفا دن صالح نامق افندی به توجیه قلمشدر .

انجق عامر بک کیجه کوندوز عرق نوش و عالمک نیک وبد وقوعا نندن چشم پوش اولق حسپیله اوچ بش آی صکره وقعه نویس لکدن استعفا ایتمی اوزرینه وقعه نویسک ماموریتی استانبولده مدر سیندن و افخم عامدان تألیفات مشهوره صاحبی عینتابی عاصم افندی به توجیه بیورلمش و کرک عامر بکک کرک سلفی پرتو افندی نیک یازمش اولدقاری وقایع جریده سی عاصم افندی به ویرلمک اوزره ادر نه دن استانبولده کوندولمش ایسه ده جریده مرقومه ده بروجه آتی قائم مقام اولان طیار پاشا حقه ده ذمی مشعر فقره لر اولغله بولنری بکلکچی عزت بک محو و اثبات ایله یکیدن قلمه الهرق جریده به اوله جه درج ایلمشدر .

اوتنه دنبرو اردوی هایونک خر و جنده سائر مناصب دیوانیه اصحابیله برابر وقعه نویس بولنان ذات دخی کیدوب یرینه استانبولده بروکیل قالدور ایکن بود فعه اردی هایونک خر و جنده وقعه نویس دخی بر لکده کیش ایسه ده یرینه استانبولده بروقه نویس وکیلی تعیین اولنماشیدی بوکره دخی بالاصاله وقعه نویسک استانبولده عاصم افندی به توجیه اولغله اردوی هایونده ضبط وقایعه مأمور کیمسه یوق ایدی فقط علی رائف افندی کندولکنندن اوله رق اردوی هایونک خر و جندن تا در سعادتیه عودتنه قدر اولان وقایعی ضبط ایله مصطفی نجیب افندی به ویرمش اولدیغندن ضبط ایتمدیکی وقایع نجیب افندی تاریخچه سنده مندر جدر وقعه نویسک ماموریتنک اسکی اعتبار و اهمیتی قالماش اولدیغنه ایسته بو کیفیت دلیل کافیدر .

مرحوم مومی ایله پرتو افندی سلطان احمد موقتی چایی افندی نیک اوغلیدر اوائل

حائده اناطولی محاسبه‌شی قلمنه دوام ایدوب برارالق رئیس‌الکتاب اسبق عارف افدینک دائره‌سنه انتساب ایله اوراده حالت افندی‌یه پاداش وانیس وبعده بکلکچی عزت بک دائره‌سنده فرش قالیچه اقامت ایدرک آنک اعانه‌سیله آمدی قلمنه مأمور اولدقدن صکره واصف افندی رئیس اولدقده اودخی آنک یرینه وقعه نویس اولمشیدی خواجه نشئت افدینک شاگردانی بیننده فائق الاقران ومشار بالبنان بدیع البیان وصاحب دیوان برذات ستوده صفاتدر فی الاصل مخلصی نوری اولوب بعده پرتو تخلص ایتمشدر زاده طبعی ونقش خاتمی اولان (پرتو کدای لمعه نور محمد) مصراعنده مخلص سابقنه دخی تلمیح ایلمشدر وفاتنه سروری افندی تاریخ معجم اوله‌رق (شاعرانک شمع امیدنده پرتو قلمدی) مصراعنی سویلیمشدر .

حسب الموسم علامات شستا بلورمکه باش‌الایوب صولر دخی طغیان ایتمکه اردوی هایونک نهر مریچ کنارنده اقامتی دشوار اوله‌رق ارتق مشتایه کیریله‌جک موسم کیش دیمک اولدیغندن رجبک یوم سلخنده ادرنه‌یه دخول ودرون شهرده تدارک اولنان خانلره نزول ایله هرکس راحت و ارمشدر متعاقباً طرف شاهانه‌دن تبریک مشتا ضمننده باش چوقدار اغا ایله سردار اکرمه تشریفات سنیه کلشدر .

اردوی هایون دیدیکمز سردار اکرمک تبعه‌سی واقلام هایون کتبه‌سی ایله رجال دولت نامنه اولان ذوات معدوددن عبارت اوله‌رق اردوی هایونک یالکز نامی وسردار اکرمک برقوری عنوان واحتشامی وار ایدی یوخسه دشمنه ابراز سطوت شویله طورسون روم ایلی اعیانلرینک کوزلرینی طولدیره‌جق قوت یوغیدی . شو‌حاله نظراً سالف الذکر روسجق جمعیت خفیه‌سنک قرارینی اجرا ایچون علمدار پاشا مقدار کافی عسکرله روسجقدن حرکت ایتسه کندوسنه استانبوله قدر کیمسه سدراه اوله‌ماز واستانبوله کی یکیچریلر دخی قارشو کله‌مز ایدی لکن یکیچریلر سلطان مصطفی طرفداری اولوب یکیچریلک ایسه دولت علیه‌نک ایلکنه ایشلمش وعروق واعصابنه سرایت ایلمش اولدیغنی حالدده سلطان سلیم بی یار ویاور تنهانشین قفس خوف وخطر اولدیغندن ادنی سر رشته ویریلور ایسه حیاتی تهلکه‌یه اوغرا دلمش اوله‌جغنی جهته ایشک نزاکت واهمیتی درکار اولدیغنه بناء جمعیت مذکورده بوراسی عریض وعمیق مطالعه وتدقیق اوله‌رق نهایت مقربان سلطنته عرض اخلاص وتملق وسطان مصطفی طرفنه ادعای اختصاص وتعلق ایله جمله‌سنی بالاغفال علمدارک در سعاده کتمسی ایچون رخصت سنیه استحصال ایتک اوزره رفیق افدینک اولاد وعیالی کورمک بهانه‌سیله استانبوله کتمسینه قرار ویرلمش اولمسیله بوجه بالا اردوی هایونک ادرنه مشتاسنه عزیمتدن صکره رفیق افندی دخی معجون حیه





بشقه منصب ریاسته ادرنیه ورودی اثناسنده غالب و تحسین افتدیلر دخی اورایه  
ککش وروسجق جمعیتی اورایه ده برپقول صالمش اولدیغندن مسئله معلومه اوزرینه  
اردوی هایونده دخی مذاکرات خفیه اجرا اولمغه و علمدارک استانبوله جایی  
ایچون دیگر وسیله وواسطه لر اراتمغه باشلامشدر .

سلطان مصطفی مقرر بلری ایسه سلطان سلیمی اعدام ایتدیرمک فکر فاسدینه دوشوب  
بونو قائم مقام و شیخ الاسلامه و او جاقلو و سائر متشخصانه اشراب و ایما ایتدکجه انلر  
دخی وقت آخره تعایق اولتمق کبی بین الرد و القبول اجوبه حکیمانه ایله صاوشدیرمقده  
ایکن بو ائنده مقررین مشار الیهم اول خصوص ایچون موسی پاشایه زیاده ابرام  
ایتمکده ایدیلر حالبوکه موسی پاشا ثانیاً قائم مقام اولدقده ایشلری اولکیدن دها آغر  
بولمشیدی زیرا حمدالله پاشانک ضعف حالنه بناء مقررین پادشاهی اولکیدن زیاده  
میدان الهرق هرایشه متحکمانه مداخله و ساطا نلرک باش اغالرینه وارنجه بالمله متنفذان  
و منسوبان ابواب ارتشایی کشاد ایدرک لیاقت و مناسبتدن قطع نظرله شوکا بوکا رتبه  
و مأموریت و مقاطعات و التزامات آلیویرمک اوزره اولیای اموره درشتانه معامله  
ایتمکده اولدقلری حالده او جاقلونک بیقلرینی باله کسمز و اطوار نابجالرینه تحمل  
کلز اولدیغندن دولتک اداره سی پک مشکل اولمشیدی الحاصل کرک اندرون هایون  
طاقمی و کرک یکیکچری کروهی پک زیاده حدلرینی آشوروب طاشرمش و باب عالی  
نه پایه جغنی شاشرمش ایدی .

موسی پاشا روش حالی بکنمیوب ینه بر تقریبه قائم مقاملقدن یقینی صیرمق افکارنده  
ایکن اولوجهله کندوسنه سلطان سلیمک اعدامی امرنده ابرام اولندقده اولکی  
قائم مقاملغده آلت اولدیغنی جنایات معلومه اوزرینه برده بویه یار و اغیار نظرنده  
جالب نفرت و روز قیامته قدر موجب لغت اوله جق بر جنایت عظیمه و اهانت و خیمه یه  
جسارت ایده مدیکندن ( صدر اعظم و عظمای رجال دولت و اصل او جاقلو هپ  
اردوی هایونده در بوایش ایسه جمله نک انضمام رأیله اوله جق بر ماده عظیمه در  
رکاب هایون رجالی بوکا خود بخود جسارت ایده مز ) دیو باشدن صاومه بر جواب  
ایله دفع ایتمشیدی .

ایشته اول ائنده فراراً روسیه دیارنده بولنان طیار محمود پاشا علی روایه خود بخود  
و علی روایه دعوت ایله قریمدن برسفینه ره را کباً شعبانک اون یدنجی کونی در سعادت  
بالوصول قپوکتخداسی عمر اغانک یالسنه نزول ایتدکده در حال جانبیک مقاطعه سیله  
طر بزون ایالتی کافی السابق کندوسنه احسان و بر قاچ دفعه حضور هایونه چیقوب پک  
چوق الثفات و تعظفات سنیه به شایان بیورلمش و رمضانی در سعادتده چیقار و بده بعد العید

طر بزونه کیتمک اوزره بوغاز ایچنده قالمش ایدی حالبوکه رمضانہ بیله قالمیوب او اواخر شعبانده طرزون ایاتی کماکان عهده سنده قالمق اوزره موسی پاشا رینه قائم مقام صدر عالی و (کدو افتاد و بادنجان برآمد) مالی ماصدق حالی اولدی و موسی پاشا بعد العزل استانکوی جزیره سنه کوندرلمش ایکن مؤخرأ استدعای اوزره محل اقامتی از میره تحویل اولمشدر .

سلطنت سنیه نك مشکلات داخلیه سی بووجهله تزايد ایتمکده اولدینی حالدہ اوروپا پولتیقه سی دخی کوندن کونه آغر لشمقده ایدی .

\* اوروپا وقوعاتی و بعض دول ایله دولت علیه نك مناسبات و معاملات \* بالاده بیان اولدینی اوزره فرانسه ایمپراطوری ناپلیون اوروپاچه منویاتنک اجر اسنده دولت علیه ایله ایران دولتی قولالانمق غرضیله ایکسنه دخی کندوسیله روسیه علیهنه براتفاق مثلث عقدینی مبرمانه تکلیف ایتمکدنناشی رفیع افندی نامه هایون ایله ایرانہ کوندرلمش و دولت ایرانیه طرفدن ناپلیون نزدینه مرخص تعیین اولسان میرزا رضا در سعادت طریقہ لهستانہ کچوب کیتدکده فرانسه ایلچیسی سباستیانی نیک ابرام واستعجالی اوزرینه عقده معاهده اتفاق ایچون وحید افندی دخی علی جناح الاستعجال رخصتنامه هایون ایله ناپلیون نزدینه ارسال بیورلمش ایدی .

حالبوکه ناپلیونک امل مخصوصی دول معظمه اوروپادن بریاه عقد اتفاق و یکجهتی خصوصی اولوب ابتدا پروسیایی اتحاب ایتمشیکن اندن مایوس اولدقده اوستریا دولتیله براتفاق معاهده سی تنظیمنه تشبث ایلمش ایسه ده اوستریالو اتفاقه یناشمیوب فقط مصالحیه عرض توسط ایتمش و بوکا ناپلیون دخی موافقت کوسترمش ایسه ده اوستریا اتناقیدن مایوس اولیجق روسیه ایمپراطوریه اتفاق تصمیم ایتشیدی انجق اوستریالونک توسطی مشمر اوله میه جغنی تظن و روسیه لوی کرکی کبی ازمدکجه ایستدیکی کبی دائره اتفاقه اله میه جغنی درک و تیقن ایتمکدن ناشی همان روسیه لو اوزرینه حرکتہ مسارعت ایدرک برقاچ دفعه روسیه اردولرینه غلبه ایتمش ایسه ده هنوز برطرفده غلبه کامله تحقق ایتمکسزین روسیه لو کندو حدودینه چکیلوب فرانسز عسکری دخی مشتایه کیرمش و لهستانده مدت مدیده مکث و اقامت فرانسز عسکرینه خیلججه یأس فتور و یرمش اولدینی حالدہ اوستریالونک توسطی دخی فی الواقع مشمر اولیوب شویله که انکتره دولتی بو توسطی قبول ایلمش ایسه ده روسیه ایمپراطوری اردولرینک نقصانی طولدرمش و جنرالرینک و یردیکی تأمینات اوزرینه فرانسز اردوسنه غلبه ایده جکنده شبهه سی قالمش اولدیغندن مصالحه طرفداری اولان پروسیا

قرانی دخی قاندروب ایکسی برلکده توسطک قبولندن مقدم ناپلیونک نه اساسا بر اوزرینه مصالحه ایتک ایتدیکنی بلممز لازم کلور دیوجواب ویرمشلرشو حاله کوره اوزون اوزادی به مخا بره و مکالمه ایتک لازم کلوب اول ائنده ایسه محاربه دوام ایده جکندن اجرا اولنه جق مکالمه لرده براهمیت قالمه جغه مبنی آوستریا دولتی انلرک بوجوابی باشدن صاومه و دفع لین قیلنندن کوروب دلکیر اولمش و ناپلیون دخی آوستریا لونک بوتقربیله هیچ اولمز ایسه بیطرف قاله جغندن حظ ایتمش ایدی .

ومشاده ایکن تدارکات عظیمه به ابتدار ایله ایام بهارده پیدرپی فرانسه دن المانیاه عسکر جلب ایدرک و متفق اولان فلمنک و ایتالیا و مجتمعه رین ممالکندن دخی عسکر الهرق فرانسه اردوسنی التي یوز الی بیك و متفقاری عسکریخی یوز بیک نفره ابلاغ ایتمش ایدی اورو پا حکمدارلرینک هیچ بری بووقته قدر او یله برجسیم قوه حربیه به مالک اولما مشیدی .

وبرده اسپانیالو برمدت برحال تردد و تذبذبده ایکن بروجه بالا پروسیالو فرانسه به اعلان حرب ایتدکده اسپانیا باش و کیلی استقلال دولتک تهلیکده اولدیغندن بجناه اسپانیا اهالیسنی سلاح الته دعوت ایدوب بوندن غرضی پروسیالولرک غلبه سی قویاً مأمولی اولدیغندن پوناپارته نیک برنجی انهزامنده بر طرفدن دخی اسپانیا عسکریخی فرانسه اوزرینه یورتمک ایدی امر بالعکس اولیجق پوناپارته نیک نزدنده تبرئه ذمت ایتک اوزره بوتشباتک فرانسه به امداد ایچون اولدیغنی بیان ایتدکده پوناپارته دخی اقرارینه باصوب و کویا انک بو اعتذارینه اینانمش قامش کبی کورینوب او یله ایسه حدودده کی عسکر کزی معیتمه و یریکز دیبجک اسپانیالو بوکا موافقتدن غیری بر دیه جک بوله مدیغندن بو صورتله اون بشیک اسپانیا عسکری دخی پوناپارته نیک قومانده سی الته کیر مشیدی .

وبر فرانسز اردوسی برمدت نبرو ( دانسیق ) دانسقه قلعه سی محاصره ایتدکده اولدیغندن بر مقدار روسیه وانکلیز عساکری استرالسونت حوالیسنده بولنان اسوچ اردوسیه بر لشهرک اولجهتدن فرانسزلر اوزرینه بر هجوم ترتیب اولمش ایسه ده فرانسزلر ده اول طور انوب اسوچ اردوسنه غلبه ایتمشلر و مایس افرنجینک یکر می التنجی و ربیع الاولک اون سکرنجی کونی دانسقه قلعه سی التمشلر ایدی .

وحید افندی بروجه مشروح سیر سریع ایله کیدوب سنه سابقه ذی الحجه سی او اخرنده لهستانک مقر حکومتی اولان وارشاوه شهرینه وصول بولمش ایسه ده اول ائنده ناپلیون مواقع عسکریه بی طولاشمقده و کیدوب کوره می دیدکجه طالیران بو کون یارین کلور دیو صاومقده اولسیله وحید افندی اوچ آی قدر وارشاوه ده بیهوده افاته

اوقات ایلدیکه ائشاده سبستیاینک استانبولده طاتلو طاتلو ساتدیغی وعدلرک چاشنیسینی اکدی ره جق طاتلو سوزلر بیله ایشیده میوب بالعکس حاجا طالیران ایله ملاقات ایتدیکه دالماجیاده کی فرانسز اردوسنک صر بستانه کچورلمسی واستانبوله فرانسز عسکری ادخال ایدلمسی کبی دولت عالیه نیک اصلا قبول ایدمه چکی موادی تصدیق ایتدیرمک تکالیف بارده سنی استماع ایله تلخکام اولمقده ایدی .

چونکه ناپلیون بروجه مشروح روسیه ایمپراطوریه یكدل ویکجهت اولمق صورتی اولجه ذهنده قرارلشدرمش اولمسيله مطلوبی اوزره روسیه ایله غالبانه اوله رق عقد مصالحه ایدجهک اولمقده دولت عالییه فدا ایدجهکی درکار ایدی فقط روسیه ایمپراطورینی هروجهه صلح واتفاقه مجبور ایتمک اوزره دولت عالییه دخی کندی ائده کبی کوسترمک اوزره نزدینه طرف دولت عالییه دن دخی برمرخص جابنی پوتیقسه سنه موافق کورمش ایدی ایشته سبستیاینک بو باده استعجالی دخی اکامبنی ایدی مع مافیله طالیران دخی وحید افندی ایله ایران ایلچیسینی میرزا رضایی الدادوبده فرانسه پوتیقسه سنه الویره جک بعض موادی امضا ایتدیرمک ایستردی و بو ائشاده میرزا رضا ایله مکمله ایدرک کندوسسنه ایستدیکه کبی روسیه وانکلتره دولتلری عالیهنه اوله رق برمقاوله نامه امضا ایتدیرمشیدی وحید افندی ایسه اول وقته کوره ایچه احوال دوله آشنا اولدیغندن طالیرانک کلمات ایله فریبانه سنه الداتمدیغی جهته خیلی مدت وارشاوده ناپلیونک ورودینه انتظاراً مکث و توقفه مجبور اولدی .

نهایت ناپلیون طرفندن واقع اولان دعوت اوزرینه ریزنبرخ ایله استرورقصبه لری میاننده واقع فنکشتن قریه سنه واروب اوراده ربیع الاولک یکر می بشنجی کونی ناپلیون ایله ملاقات ایدرک حامل اولدیغی نامه ساییمی پی تسلیم و برساعت قدر مصالح دولت عالییه دائر مصاحبیدن صکره ناپلیون طرفندن مرخص مخصوص ایله مکمله یه باشلایوب حالبوکه چند روز مقدم سلطان سلیم خلع اولتمش اولمسيله استانبولجه حال وافکار بشقه لشمش ایدی .

وحید افندی نیک اولوجهه ملاقاتی دانسقه نیک ضبط و تسخیری ایامنه تصادف ایتدیکندن ناپلیونی تبریک ضمنده تاریخ میلادی اولمق اوزره ( دانسقا شهرینی آلدی فرانسزلر روسیادن ) مصراعنی نظم ایله ناپلیونه تقدیم ایلمشدر و ناپلیون ایله برلکده واروب دانسقه بی تماشای ایتدکن صکره اورادن ناپلیون اردوسسنه کیتمش و او دخی کویا مکالمه مواد عهدیه ضمنده وارشاویه کلوب ایکی آی قدر ده اوزاده بیهوده امرار اوقات ایتمشدر .

دانسقه نیک ضبطدن صکره ارتق فرانسزلرک ارقه لرنده کندولرینی اشغال ایدجهک

برشی قلمدیغندن ناپلیون روسیه اوزرینه حرکت تعرضیه تدارکنده اولوب حالبوکه مقدهما روسیه ایمپراطوری بالنفس اردوسنه عازم وپروسیا قرالی دخی او طرفه قادم اوله رق (بارنستن) بلده سنده بالاجتماع اتفاقاری مؤبد اوله رق بونک خارجنده بریمی دشمن ایله اصلا مخاربه ایتمیه جکله رینه یکیدن آند ایچمشلر و روسیه اردوسنک تدارکاتی مکمل اولدیغندن روسیه لولر ده اول طور انوب حزیران فرنکینک بشنده فرانسه لونک (آل) نهری قییلرنده بولنان مقدمه الجیشی اوزرینه شدتله هجوم ایتمشله فقط فرانسلر متیقظ بولندقلرندن برقاچ اوقق تفک محاربه لردن صکره روسیه لولری رجعتله مجبور ایلمشله ردر .

واکرچه اولوقت ناپلیون المانیاده ولهستانده موجود اولان درت یوزبیک عسکرندن الی التده انجق یوز التمش بیک مقدارینی بولندیره بیله جک ایدیه ده بوکا قارشو کله جک روسیه بیوک اردوسی دخی یوزالی بیک نفردن عبارت اولمسیله ناپلیون ارتق توقف ایتموب همان بتون اردوسیه ایلوو حرکت ایدرک حزیران فرنکینک اون دردنده آل نهری اوزرنده واقع (فرایدلاند) بلده سی پیشکاهنده روسیه اردوسیه لدی التقابل واقع اولان شدید ومدید بر محاربه خونریزانه ده یدی سکر بیک مقتول و مجروح ویرمش ایسه ده روسیه لولر بک فنا حالده منهزم اوله رق بکر می بش بیک قدر مقتول و مجروح لری اولدقدن بشقه سکسان قطعه طوب براغوب کیتمشله و فرانسلر ایلوو لیوب حزیران فرنکینک اون سکرنده (نمین) نهری سواحلنه مواصلت ایتمشله .

بوهزیمت روسیه ایمپراطوری علیکساندری یه بک زیاده تأثیر ایدرک بوبله کیدرسه فرانسلرک روسیه ممالکنی پایمال ایده جکله رینی تفکر و حالبوکه حربک دوامندن یالکیز انکایزلرک مستفید اوله جغنی تذکر ایله تبدیل افکار ایدوب اول اثناده ناپلیون اردوسنی (تیلسیت) بلده سنده قورمش اولدیغندن در حال متارکه ایچون اورایه بر مأمور مخصوص کوندر مکله ناپلیون بوتکلیفی قبول ایتدکن بشقه پروسیا قرالیله دخی بر متارکه سندی امضالمش و برقاچ کون صکره یعنی حزیران فرنکینک بکر می بشنده (نمین) نهرنده برصال اوزرنده علیکساندری ایله کورشد کد نصرکه علیکساندری تیلسیت بلده سنه عزیمت ایله ناپلیونه مسافر اولدقده ایکی حکمدار کیجه کوندوز کوریشوب قونشهرق بینلرنده فوق العاده محبت قینامش ایدی . برقاچ کون صکره بیچاره پروسیا قرالی دخی تیلسیت وارد اولدقده ناپلیون طرفدن احترامات ایله قبول اولمش ایسه ده ایکی ایمپراطور اده سنده واقع اولان مکالمه لر هپ کندو علیهنده اجرا اولتور ایدی . و بوجه بالا علیکساندری آنکله اتفاقی تأیید ایچون ایچدیکی آند اوزرینه بوکره ناپلیونک عشقنه باده ایچور ایدی .

ناپلیونك غرض اصليسى علىكساندرى بي قطعى وصمىمى اوله رق دائره اتفاقيه المق  
 خصوصى اولوب بوايسه خيلى وقتدنبرو انواع مواعيد ايله طرفنه جلب ايتمش  
 اولدينى دولت عليه بي فدا ايتمه موقوف اولديغندن سلطان سليمك وقوع خلغنى  
 بومواعيدك العاسى حقه فده فرصت وعلىكساندرينك اغفانسه آلت اتخاذايدرك  
 علىكساندرى ايله مصاحبت اثناسنده (حكمت نوعندن اوله رق بر وقعه بنى دولت  
 عثمانيه دن قورتاردى متفقم و محب صادق اولان سلطان سليم خلغ وحبس اولندى  
 ظن ايدر ايدم كه براز آرقه اولغله عثمانلورى آدم ايتمك وشجاعت فطريه لرينك  
 استعمالنى كندولره اوكرتمك قابدر مكر بو برخوليا ايتمش كندو كندويى اداره  
 ايدمىان برهيت دولتى محوايدوبده پارچه لرينى انكليزله قاپديرمامق دهاخيرلودر)  
 ديوتمهيدكلام وروسيه دولتتك فرانسه اتفاقدن نه بيوك ايولكار كوره جكنى  
 وفرانسه نك كسب جسامت ايتسندن روسيه لولر متضرراوليوب اما انكلتره اتفاقدن  
 زيان كوره جكلرينى وانكلتره نك حقوق عموميه تختنده اولان دكزلرده استقلاله  
 قالمشمسى حقسز ايدوكنى برتفصيل بيان وافهام ايله علىكساندرى بي اقتناعه  
 بذل جل اهتمام ايدوب والحاصل علىكساندرى بي دوست احبى اولان پروسيا قراليه  
 انكلتره لودن واز كچورمك وبوتقريبه كندو ايشنى بچرمك اوزره اول امرده  
 كندوسى دولت عليه بي فدا ايتمكه برجهيله كوستروب علىكساندرى دخى بومقدماى  
 قبول واقرار ايله اتفاقه قرار ويرمشدر .

شويله كه : عقد مصالحه دن صكره علىكساندرى فرانسه ايله انكلتره لولره سنه توسط  
 ايدرك هانوره ايله مالطه نك انكلتره يه تركى واكا مقابل انكلتره لونك دخى اسپانيا  
 ايله فلمنكدن المش اولدينى يرلى رد واعاده ايتمى خصوصى لرينى تكليف ايدوب  
 انكلتره دولتى بونى قبول ايتمز وفرانسه نك حال حاضرى تصديق ايلمز ايسه  
 علىكساندرى دخى انكلتره لولره اعلان حرب ايلمك وپوناپارته روسيه ايله دولت  
 عليه آره سنه توسط ايدوبده قبول اولمدينى تقديرده او دخى روسيه لولره ايله برلشهرك  
 دولت عليه اوزرينه يوريمك واول وقت ممالك عثمانيه بي مقاسمه ايتمك خصوصى لرينه  
 ناپليون ايله علىكساندرى كندو بينلرنده قرار ويرمشلرايدى فقط وقت وصورت  
 تقسيمده اتفاق ايدمىورلرايدى علىكساندرى افاته اوقات اولمقسزىن وبرسبب  
 اراقمقسزىن هان امر مقاسمه نك اجرا اولمىنى ايترايدى ناپليون ايسه ايشك جسامت  
 واهميتنه نظر اتعجيل ايدليوبده تأمل وتانى اولنه رق ومناسب وسيله لر بولنه رق اجراسى  
 رآينده ايدى كه دولت عليه توسطى قبول ايتمديكى تقديرده تمام وسيله اتخاذاولنه جق  
 ايدى علىكساندرى هر حالده يعنى دولت عليه توسطى قبول ايتسون ايتسون بسارابيا

و بغداد و افلاق ایالتلری ضابط ایلمک املنده ایدی ناپلیون دخی بوکا موافقت  
ایتمشیدی لکن اجراسنی آورو پاچه روسیه لودن کوره جکی معاونتدن صکره یه  
براقش ایدی و برده مقاسمه یه لدی الابدتار بو ایالتلره برابر بلغارستان قطعه سی  
روسیه یه وارنبودلق و مورده ایالتلری یه کرید جزیره سی فرانسه یه و بوسنه ایله  
صربستان ایالتلری حق سکوت اوله رق آوستریا یه ترک اولتمق خصوصنده ایکسی  
دخی اتفاق ایتمشلر ایسه ده استانبوله کمنجه اتفاق ایده میورلر ایدی زیرا علیکساندری  
کوزینی استانبوله دیکوب عثمانلوری بتون بتون آورو پا قطعه سندن چیقارمق اوزره  
استانبول ایله برابر روم ایلیک سائر لرینی و بالجه آق دکنر آطه لرینی دخی بو تقسیمه  
ادخال ایتک ایسترایدی ناپلیون ایسه بوکا اصلا موافقت ایده مز ایدی و علیکساندری  
بونک ایچون ناپلیونک آرقه سنه پک چوق دوشمش ایسه ده استانبول نقطه سنده  
اتحاد ایده مامشدر ایدی حتی برکون ایکسی برلکده کزینوب قونشور ایکن کتاب  
اوطه سنه دخول ایدرک پوناپارته ممالک عثمانیه خریطه سنی آچوب پارمغنی استانبولک  
اوزرینه وضعله (استانبول استانبول هیچ بروقت سنی ترک ایده م سن مرکز  
حکومت عالمین) دیمش اولدینی مرویدر .

الحاصل ایکی ایمپراطور ممالک عثمانیه نک مقاسمه سنه بیئرلنده قرار ویرمشلر ایسه ده  
استانبولک موقعی قابل تقسیم اوله مامشدر زیرا روسیه ایمپراطورینک مطمح نظری  
استانبول اولوب ناپلیون ایسه بوکا بروجهله موافقت ایده مامشدر و ناپلیون اولوجهله  
دولت علیه نی فدا ایدرک برمدتدنبرو جلب و تألیفی ایچون ایتدیکی مواعیده نظراً  
کندوسنه عارض اوله بیله جک اثر محجوبیتک رفع وازاله سنه سلطان سلیمک خای  
وقعه سنی بهانه اتخاژ ایتمشدر آنک بو فداکارلغنه مقابل علیکساندری دخی دوست  
احبی اولان پروسیا قرالیسه برابر دیگر متفقلرینی ترک و فدا ایدرک ناپلیون ایله  
یکدل و یکجهت اولمشدر بو ائساده پرسالو ایله دخی مکالمه اجرا اولنوب زوالی  
پروسیا قرالی محب یارغار و مخلص وفادار بیلدیکی روسیه ایمپراطورینک معاونتدن  
محروم قالجیق محاربه نک بارکران خساری بتون بتون کندی اوزرینه تحمیل  
اولنش و تخفیفی چاره سنی بوله مدیغندن هرشینه بیون اکمکه مجبوریت حالنده  
بولنمشدر .

مکالمات مشروحه اساس اتخاژ اولنهرق ناپلیون روسیه و پروسیا دولتلریله برر قطعه  
مصالحه نامه تنظیم ایله تموز فر نکینک سکرنده تیسلیتده امضا قلمشدر بو ایکی عهدنامه  
اعلان ایله دول تله طرفدن ترک جنک وجدال ایدلمش و فقط بو عهد نامه لرک  
بعض موادی اولوقت خفی طوتلمش ایدی .



عانی ماده لری ( روسیه امپراطورینک خاطری ایچون اسکی پروسیا و پومرانیا و براند و بورغ و یوقارو و اشاغی ساینک پروسیا قرالنه اعاده سی و البا نهرینک صول طرفنده کی سنجاقلر هس دوقه لغی ایله برلشدیریله رک ناپلیونک الکچوک برادری اولان ژروم بوناپارت ایچون وستفالیا قرالیتی نامیله برقرالاق تشکیلی و پوزن و وارشاوه دوقه لقری پروسیا اداره سندن چیقوب وارشاو یاغران دوقه لغی عنوانیله برحکومت تشکیل اولتهرق صاقسونیا قرالنه احاله ایله المانیان لهستانه کچمک اوزره ساینزیدان بر طریق حربی کشادی و روسیه و پروسیا دولتلری طرفندن لوی بوناپارته نک فلمنک قرالیتی و ژوزف بوناپارته نک ناپولی قرالیتی و ژروم بوناپارته نک وستفالیا قرالیتی صفتیله ورین مجتمعه سنک حال حاضر یله و ناپلیون بوناپارته نک احداث ایلمش اولدینی سائر حکومتلرک تمامیله تصدیقی و اولدمبورغ و مکلمبورغ برنسلری حکومتلرنده ایقا اولنوب فقط محاصره بریه نک اجراسی ایچون مملکتلرنده فرانسه عسکری اقامه سی و فرانسه ایله انکلتزه اره سنه روسیه نک توسطی و روسیه ایله دولت علیه اره سنه فرانسه نک توسطی ) خصوصلری اولوب خفی ماده لری دخی ( قطار و بوغازلرینک فرانسه یه ردی و جزائر سبعة نک کذلک فرانسه یه ترک و تملیکی و ناپولی قرالی بولنان ژوزف سیجلیامی ضبط ایدوبده اکا بدل ناپولی بوربونلرینه پالئار ( اسپانیاد کزلرنده بر آطه درکه اولوقت فرانسه یدنده ایدی ) یاخود کزید آطه سی ویرلدیکی تقدیرده روسیه لونک تصدیق ایتمسی و هانوره ایله وستفالیا قرالیتی برلشدیکی تقدیرده البا نهرینک صول یقه سنده اوچ درت یوزبیک نفوسی شامل بر مملکتک پروسیایه ترکی و حکومتلرندن محروم قالان هس و پرونسویک و ناسووا و رانز حکمدارانته معاش تخصیصی ) خصوصلرندن عبارت ایدی .

بوصورتیه پروسیالونک لهستانده متصرف اولدینی اراضی سندن بشقه المانیا طرفنده دخی برچوق یرلرلندن چیقدی و اولکی قوت و اعتبارندن خلیجه اشاغی دوشدی . بونلرندن بشقه ناپلیون ایله عکساندیری بیننده بشقه جه بر خفی اتفاق معاهده سی دخی یا پلمشیدی که شمیدی یه قدر میدانه چیقمامشدر فقط روایت اولندیغنه کوره خلاصه مالی ( فرانسه ایله روسیه تدافعی و تعرضی متفق و هر نه مسئله ظهور ایدر ایسه حلی ایچون متحد اوله رق قوه بریه و بحریه لرینی برلکده اعمال ایلملری و انکلتزه لو روسیه لونک توسطنی قبول ایله بالاده مذکور شرائطه راضی اولمز ایسه کندییه اعلان حرب اولتمسی و کذا دولت علیه فرانسه نک توسطنی قبول ایتمز ایسه اکادخی اعلان حرب ایله آوروپا قطعه سنده کی ممالک مذکوره سنک مقاسمه سی و استانبول ایله دیگر روم ایلی سنجاقلرینک خارج براغلمسی و دولتین متفقین طرفندن کندونیترینی

اجرا ایچون اسوچ و دانمارقه و پورتکیز و آوستریا دولتلری معاونه دوت یعنی بو دولتلردن انکلتراهه لیمانلرینی سد ایله اعلان حرب ایتملرینک طلب اولمسی ( ماده لرندن عبارت ایمش .

دولت علیه نك بو محاربه یه کیرشمسی ناپلیونك خاطرری ایچون اولدینی حالده بو کره روسیه لو ایله منفرداً مصالحه ایتسی دولت علیه یه بادیء اغبرار اولمش ایسه ده بو اتانده دولت علیه نك دوچار اولدینی مشکلات داخیه دن ناشی تمید سفره وقتی مساعد اولدیغندن هر نصل اولور ایسه اولسون غوائل حربیه دن قورتلحق آرزوسنده بولندیغنه مبنی ناپلیونك بو وفاسزلغنی اغماض و مسامحه ایله کچشدرمک ایجاب وقت و حالدن اولمسیله همان توسطنی قبول ایدرک بالاده اشعار اولدینی اوزره غالب افندی بی مکله یه مأمور ایلمش اولمغین یرکوکی جوارنده واقع اسلابوزی قریه سنده غالب افندی و روسیه مرخصی سرچو و متوسط اولان فرانسه لو طرفندن مجلس مکله یه مأمور قولونل ژونان و کینو اجتماع ایدرک برقطعه متارکه سندی تنظیم ایله جمادی الآخره نك یرکمنجی کونی طرفیندن امضا اولمش و یرکمی دردنجی کونی ساستره سحر اسنده سردار اکرم طرفندن تصدیق قلمشدر .

شویله که : اولاشبو متارکه سندی نك تصدیقی عقبنده هر یرده دولت علیه و روسیه عساکری بینلرنده حرکات خصمانه ترک اولتق اوزره لازم کلنلره امرلر و یریه ثانیاً مواد مصالحه نك مذاکره سیچون همان طرفیندن مرخصلر تعیین و محل مکله تخصیص ایله مذاکره ابتهار اولنه رق شایدکه بعض مشکلات ظهور یله مصالحه یه قرار و یریه مزسه مدت متارکه ایام بهاره قدر یعنی تاریخ هجرینک بیک ایکی یوز یرکمی اوچ سنه سی صفرینک غره سنه و تاریخ عیسوینک بیک سکنز یوز سکنز سنه سی شهر نیشانک اوچنجی کوننه دک تمتد اوله ثالثاً روسیه لو بوسفرده دولت علیه دن المش اولدینی قلاع و ممالکی و افلاق و بغدادن مملکتلرینی متارکه عقیننده حین استیلاده بولندقلری هبت و اشیا و طوب و مهمات ایله ترک و تخلیه یه ابتهار و نهایت او توبش کونده امر تخلیه بی اجمال ایله اولکی حدودینه چکیله و محال مرقومه تخلیه اولندجقه قلعه لرک تسلیمی ایچون طرف دولت علیه دن مأمورلر تعیین ایدیه فقط عقد مصالحه یه قدر مملکتین مرقومتینده دولت علیه عسکری اقامت ایتوب و اسماعیل و ابرائیل و یرکوکی قلعه لرنده دخی مقدار کفایه دن زیاده عسکر قلمیوب طرفیندن بالخباره روسیه عساکری چکلدکجه عساکر دولت علیه دخی برابر چکیله رک طونه نك صاغ طرفه مرور ایده لر و روسیه طرفیندن تخلیه اولنه جق قلعه لره عقد مصالحه یه قدر اهلیندن بشقه دولت علیه عسکری ادخال اولنیه رابعاً روسیه لو بوزجه آطه بی

ومتارکه خبری آق دکره وارنجه قدر استیلا اولمش محللر بولنور ایسه انلری دخی تخلیه وتسلیم ایله برابر آق دکره بوغازی یولنی کشاد ایچون اولطرفده کی دونماسنی قالدروب مقدا اثنای محاربه ده روسیه طرفنده قالان دولتعلیه قالیونی واسیرلری وسائر بومقوله طوتمش سفینه واشیا وار ایسه انلری دخی ترک ایلیه وکیدرکن دولتعلیه رعایا سندن کسنه نی استصحاب ایلمیه ومحاربه مرقومه ده طرف دولتعلیه دن النمش روسیه شفاعتی وار ایسه کدک رد اولنه خامسآسنه دن وسائر طونه بوغازلرندن دولتعلیه سفائنک مرورینه مانع اولماق اوزره روسیه نک طونه نهرنده اینجه دونما طاقیدن معدود قایقلری وار ایسه جمله سنی بوغازدن طشره اخراج ایلیه سادسأ طرفینده ذکور وانات نقدر اسرا وار ایسه روسیه لودن دین اسلامی قبول وعثانلودن تنصر ایدنلردن ماعداسی قننی رتبه ده اولور ایسه اولسون بلائمن ولاعوض همان سیلاری تخلیه اولنه والیوم روسیه ده بولنان دولتعلیه مأمورلری وقعه محافظلری وسائر اهالیسی متارکه عقبنده بولندقلری یرلردن بلا نقصان اخراج و کوچ واشیالری ایله طرف دولتعلیه یه ارسال قانیه سابقاً اشبو متارکه سندی جانب سردار اکر میدن و روسیه قوماندانی میکلسون طرفندن تصدیق اولنه دیو طرفیندن تعهد قلمشدر .

اولوقت واپور وتلغراف اولدیغندن طونه یالیندن آق دکره حالی اوکر نمک وقته محتاج اولدیغنی جهتله اشبوسندک درنجی ماده سنده بعض شرط وقیود احتیاطیه درج اولنمشدر یوخسه بالاده بیان اولندیغنی اوزره بوزجه آطه پیشکاهنده واقع اولان محاربه بجزیه اوزرینه روسیه آمیرالی ارتق بوغازک ابلوکه سنده دوام ایده میوب کیمارینی تعمیر ایچون قورقه جانبنه عزیمته مجبور اولمشیدی .

روسیه مرخصی دولتعلیه ایله صرپلو بیننده دخی عقد متارکه اولنسنی تکلیف ایتدکه صرپلو رعایای دولتعلیه دن اولوب افلاق وبغدان اهالیسی کی برکونه امتیازلری دخی اولدیغنی حالده اقدمجه عصیان ایلمش اولدقلرندن وبر دولتک کندو رعایاسیله عقد متارکه اتمسی خلاف اصول اولدیغندن بشقه روسیه لولر افلاق وبغدان کی بووسیله ایله صکره صرپستان حقنده دخی مداخله یه یول بولورلر دیو بوکا موافقت دولتعلیه جه جالب مضرت اوله جغه منی غالب افندی طرفدن جواب رد ویرلمش ایسه ده صرپلرک ایچنه براز روسیه لول دخی قارشیمش اولدیغندن صرپلر اوزرینه حرکت اولندوقده روسیه لولرله دخی حرب ایدلمک لازم کله چکنه بناء بو باده روسیه مرخصی اصرار ایلدیکندن (الیوم و دین ایله فتح الاسلام اره سنه تجاوز ایدن صرپلر ایچنده روسیه عسکری بولنسنی جهتله مصالحه مرخصلرینک ورو دینه قدر اول

جانبه دخی ترك حرکات خصمانه اولنسی) بشقه جه سنده ربط اولنهرق سالف الذکر  
متارکه سندیله برابر امضا و تصدیق اولنشد .

بروجه مشروح تیلایتده ایکی امپراطور برلشوبده مصالحه صدرلی میدانه چیقدیغی کبی  
وارشاودهده مقیم اولان وحید افندی دخی اسکی عهدک تعدیل و تخفیفنه دائر ناپلیونک  
مقدم ومؤخر مؤکد و مکرر ویرمش اولدیغی وعدلرک انجازی زمانی کلمشدر دیو  
کندوسنک دخی محاس مکالمه ده بولنسی لازم کله جکفی تذکیر و اخطار سیاقنده  
بالدفاعت طالیرانه تقریرلر تسیار ایلمش ایسه ده ناپلیون دوستانخی ادعاسنده بولندیغی دولت  
علیهنی اوموزدن آتمش و اوروپا بولیتقه سی بستیون تبدل ایتمش اولدیغندن تیلایتده دعوت  
اولنق شویله طورسون تقریرلرینه وقتیه جواب بیله اله میوب بروجه بالا تیلایتده  
مصالحه منعقد اولدقندن صکره ناپلیون اورادن طوغری پارسه عودت ایتمش و طالیران دخی  
روسیه لو ایله عقد مصالحه اولدیغنه دائر کندوسنه تحریرات ارسال ایدرک و ارشاویه  
اوغرامقسنزین کچوب کیتمش اولدیغندن بیچاره نه یاپه جغفی شاشیروب همان اوائل  
جمادی الاولاده و ارشاوهدن حرکت ایله ویانه یه کلهرک واقع حالی دولت علیه یه  
عرض ایله وارد اوله جق امره انتظار آقرق بش کون دخی اوراده قالمشدر .

انجق اول ائنده سلطان مصطفی نک اخبار جلوسی حقنده ناپلیونه برقطعه نامه همایون  
یازلمش و لاجل التسلیم وحید افندی یه کوندرلمش اولدیغنه مبنی ویانه دن حرکت ایله  
پارسه واروب ناپلیون ایسه اول ائنده پارسه اون بش ساعت مسافه سی اولان فوتتبلو  
قصبه سنده کی سراینده بولنغله یکر می کون قدر دخی پارسه توقفه مجبور اولمشدر .  
چونکه تیلایت مصالحه سندن صکره ناپلیون فرانسه یه عودت ایله بیک سکر یوزیدی  
سنه میلادیه سی تموز فرنیکنسک یکر می یدسنده مظفر آ پارسه موصلت ایتدکه  
پک چوق شهر آیین و شلککری یا بلمش و اهالی طرفندن پک زیاده ممنونیت کوسترلمش ایدی  
انجق فرانسزلر محاربه دن اوصاتمغله بومظفریتک اوزرینه برمصالحه عمومیه امید  
قویسنده اولوب بناء علیه ناپلیونک سرکاره کچدیکی زمان فرانسه نک اسهام عمومیه سی  
یوزده اون ایکی یه قدر نزل ایتمشیکن بوکره یوزده طقسان ایکی یه قدر چیقدی  
وفی الواقع ناپلیون بو بازیچه کاه عالمده آزوقت ظرفنده قرآتمش اولدیغی قوت و قدرته  
قانع و راضی اولوبده حکومتک تأسیس و احکامنه و ممالکنک اعمارینه حصر نظر  
ایتش اولسیدی هم کندو حقنده و همده فرانسه حقنده غایت شانلو و فائده لو  
اوله جغنده اشتباه یوغیدی و اهالینک اولوجهه صاح و آسایشه میلی اکلادقده  
کندوسی دخی او یوله میل کوسترمش و کندوسیله محارب اولان دولتردن آلدیغی  
تضمینات حریده دن طولایی فرانسه یه خارجدن کلیتو نقود کیرمکله اهالیسنده بیوک

ثروت پیدا اولوب دولتك امور ماليه سی دخی یولنه کیرمش و بوجهته بیک سکنز یوز یدی سنه سی بودجه سنده ایرادی مصرفدن فضله کورند کدن بشقه اردوخزینه سنده تراکم ایدن مبالغ دخی اوچوز ملیون فرانقه وارمش ایدی و ناپلیون ذاتاً امور نافعه یه هوسکار اولدیغندن اول ائشاده تجارت قانوننامه سنی میدانه قویمغله برابر قنالر آچلمق و یوللر و کوپریلر یالماق کبی مواد نافعه یه تشبث ایتمش و ورتمبرغ قرالنگ کریمه سیله کوچک برادری ژورمک رسم ازدواجی دردست بولندیغنی جهته اوروپانک هر طرفدن توارد ایدن پرنسار ایله کوز موسمی کچورمک اوزره فوتنبلو سراینه کیتمش ایدی .

حالبوکه اره سی صوغمدین تیاسیت مقاولاتندن مأمول اولان نتایجک استحصالی وانکلیرله امان دیدرمک اوزره محاصره بریه اسپانک استکمالی افکارندن برآن خالی اولیبوب اسوچلوبی جبراً ودانیمارقه بی نوازشله و پورتکیزی اسپانک توسطیله و اوستریایی برتقریبه دائراً اتفاقه الهرق قرو نشتاددن قادکسه و اورادن ترسته یه قدر برخط محاصره چکمک خصوصه سرعت اوزره تشبث ایله روسیه طرفندن اسوج دولته اولنه حق توسطدن ثمره حاصل اولماز ایسه اسوچلونک المانیا طرفنده مالک اولدیغنی پومرانییا قطعه سیله استرالسونت سنجاغی و روکن جزیره سی استیلا اولنمق اوزره لازم کلانلره امر ویرمش و دانیمارقه بی طرف اولدیغنی حالده فرانسه یه مائل کورندیکنه رعایه ابراز حرمت والتفات ایله برابر اتق بیطرف طور مق قابل اوله میه جنی جهته آچیقندن آچیغه بر طرفه میل ایتسی لازم کله جکنی بیلدیرمش و اسپانیا دولته لیمالینک انکلیرله قیاسی و پورتکیز دولتی دخی بو وجهله محاصره بریه اصلونه رعایت ایتک اوزره کندویه اخطار اولنسی و قبول ایتدیکی تقدیرده فرانسه اردوسیله برابر پورتکیز ممالکنی استیلا ایتک اوزره اسپانیا اردوسنک دخی حاضر لنسی خصوص لرینی تکلیف ایدوب پورتکیز دولته دخی پارسده کی ایلچسی واسطه سیله بش اون کون طرفنده دائراً اتفاقه داخل اولماز ایسه اوزرینه سفرایده جکنی تبلیغ ایتدیرمش و اسپانیا حدودنده واقع یابون شهرنده براردو ترینه تشبث ایله برابر ایتالیا سواحلنک انکلیرلردن محافظه سی اسپانک استکمالنه دخی اعتنا ایدرک اولوقت فلورانسه طرفنده یکی تشکیل اولنان آهروریه قرالیتی داخننده کائن لیغورنه شهرینه براردو کوندرمش ایدی و مقدما پایا پارسه کیدوب و ناپلیونه تاج کیدر و بده مأمول ایتدیکی محسناندن برشیئه نائل اولمق سزین رومایه عودت ایده لیدنبرو فرانسه دولتی حقتده اظهار خصومتدن خالی اولمدیغنه مبنی کیتدکجه ناپلیون ایله اره لری آچلمقده اولدیغندن بو کره ناپلیون پایا به بعض اخطارات تهدیدیه تبلیغ ایتدیرکدن بشقه انک دخی سواحلی محافظه ایله داخل خط محاصره ایتک اوزره بشقه جه برفرقه عسکریه سوق ایتمشیدی .

واسپانیا قرالی احمق بر آدم اولوب دولتک اداره سنی زوجه سنه او دخی علاقه کرده سی اولان پرنس دو لاپه نی باش وکیل نصب ایدرک انک دیدنه تسلیم ایدوب دولابه ایسه جاهل و سفیه بر شخص اولدیغندن ایکنجی فلیب و شارلکن زمانلر نده بتون اورویا به حکم ایدن و یوز سنه دنبر و خیلیدن خیلی ضعیف دوشن اسپانیا دولتی بو اننده تعریف اولنه ماز بر قریشقاغه کر قنار و امور داخله و خارجیه و قوه بریه و بحریه سی بر عجیب و غریب پریشانلغه دوچار اولدیغندن ناپلیون اورا به دخی طمع ایدرک بوربون خاندانک طرفه قرداشلر نندن برینی اسپانیا قرالی ایتمک خولیا می دهندنه طولاشیوردی .

و ترافالغار محاربه سنه نبرو دو نمانا مر اقدن و از کچمشیکن تیلایتدن عودتنده فرانسه دو نمانسیله فلامنک و اسپانیا و ایتالیا دو نمانلری بر لشدی و بده بحر ا دخی انکلیر لره او غرا شفق هوسنه و انکلیر لک دست محافظه سنده بولنان سچلیا جزیره سنک تسخیری داعیه سنه دوشهرک تدارکات بحریه به اعتنا ایتمکده و دالماسیا ایالتک تهمسی اولان قطار و سنجاغیه جزائر سبعة فرانسه دو نمانسک ایچ دکرده حکومت ایتمسنة و روم ایلیک مقاسمه سی تقدیر نده فرانسه به اصابت ایده جک حصه نک ضبط و محافظه سنه کلی مدار اوله جقلر نندن قطار و ایله جزائر سبعة امورینه پک زیاده اهمیت ویرمدکده اولدینی حالد روم ایلیک صورت مقاسمه سی آشوری اعتنا ایله دوشونمکده ایدی .

بناء علی ذلک اغستوس افرنجینک دیدینده روسیه عسکری قطار و بی تخلیه ایدرک جنرال مارمون بر فرقه فرانسیز عسکری ایله قطار و به کیروب انکلیر ل طرفندن تعرض اولتمق احتماله مبنی خفیا جزائر سبعة به دخی مقدار کافی فرانسیز و ایتالیان عسکری کچوریلهرک محافظه سنه جنرال برتیه مأمور ایدلمش و تخلیه و تسلیمه مأمور اولان روسیه امیرالی سینیاوین ذاتاً فرانسیز لری - و میوب انکلیر طرفاداری اولدیغندن جزائر سبعة نی مع الکراهه فرانسیز لره تسلیم ایتدکدنصکره اوراده کی روسیه عساکرینی قره دن روسیه دیارینه کیتمک اوزره ناپولی الکسانسه براغوب کندوسی دخی دولتیله انکلتره لو بیننده خصومت میدانه چیمدین بحر بالطقه قباغی آتمق اوزره دو نمانسیله جبلتره به طوغری روان اولمش ایدی .

و بونک اوزرینه ناپلیون هوالر مساعد اولمدجه جزائر سبعة به کلیتو ذخائر و مهمات کوندرلمسی ایچون ناپولی قرالی ژوزف و ایتالیا قرالی و کیلی اوژن ایله جنرال مارمونه امر لر ویرمش و بوبابده سرمو قصور اولنمامق ایچون بوتدابیر شمیدیکی حالد سزه بیسانی قابل اولیان ترتیبات جسمیه نک بر پارچه سیدر شو قدر جق معلومکنر اولسونکه قور فوالدن کیدر ایسه فرانسه به بیوک کدری موجب اولور دیواخبار ایتمش ایدی .

چونکه مصالح شرقیه در اولان مذاکرات یالکز ناپلیون ایله عسکساندری میانه لرنده اجرا اولنه رق روم ایلیک مقاسمه سنه قرار ویر مشلرایسه ده بوندن کمنه یه معلومات ویر میوب حتی تیلست عهدنامه سنی مذاکره ایدن طالیران بیله بو مسئله یه لایقیه واقف دکل ایدی و عسکساندری بونک اجرا سنده استعجال ایدوب ناپلیون ایسه تائی طریقنی التزام ایلمش اولدیغندن شرقیه اولان پولتیقه سنک نصورت کسب ایده جکنی هنوز بیله مدیکی جهته ایلروده روم ایلیدن حصه سنه اصابت ایده جک سنجاقلرک قولایقله ضبطی ایچون لازم کلان اسبابی حاضر بولندیر مغه چالیشور ایدی بو جهته روم ایلی قیسنده واقع پروزه و پارغه و وووچیه و پوتر نیتو ناحیه لرینی دخی دولت علیه دن المق ایستردی بونواحی اربعه ایسه فی الاصل جزائر سبعة کبی ملغا و ندیک دولتندن ایرلمش ایسه ده جزائر سبعة جمهوریتک تشکیلیه دولت علیه حمایه سنه ادخالنده بو ناحیه لر روم ایلی یقه سنده بولتمق حسیله طوغریدن طوغری یه ممالک عثمانیه یه الحاق اولمش و الحاله هده یانه متصرفی تیه دانلی علی پاشانک ید اداره سنده بولمش ایدی و علی پاشا اشقودره متصرفی کبی بر خاندان قدیمدن دکل ایسه ده اسحاب فطانتندن اولدیغی جهته فی الاصل افراد عسکر یه دن ایکن رفته رفته بیویوب میر میران و وزیر اوله رق یانه ده بر حکومت قویه تشکیل ایله اولوقتک خاطر ی صایلور متغلبه سنندن اولمشیدی و ارنادولغک کغهلوق قسمی اشقودره متصرفی ابراهیم پاشایه تابع اولدیغی کبی طوسقه لوق قسمی دخی علی پاشاینده ایدی و ایکیسی دخی یرلرنده اغر و یرلرینی محافظه یه قدر ایدی و یرلری صعب و منیع و یرلور ی صرپ و شجیع اولدیغندن ناپلیون بو یرلرک ضبطنه قیام ایسه کندوسنه پک اغر اوتوره جفی ظاهر ایدی و کغهلر ایله طوسقه لر یکدیگره ضد اولدیغی کبی بو ایکی متصرف اره سنده دخی اره صره منازعه اکسک دکل ایدی لیکن بردشمن خارجینک هجومنده بالاتفاق دفع صائله قیام ایده جکلری درکار ایدی قالدیکه ایکیسی دخی فرانسرلرک قطار و بوغاز لرنده و جزائر سبعة ده کی تدارکات عظیمه لرنندن اورکوب بعض مواقع و سواحلک تقویت واحکامنه قیام ایله تدارکات احتیاطیه یه اهتمام ایتمکده ایدیلر بناءً علیه ناپلیون اول باول انلری عزل ایتدیرمک اوزره ایکیسنک دخی اطوارندن زیرده بیان اولنه جفی و جهله بث شکوایه باشلامشیدی که عزل لرنده اطاعت ایتمیه جکلری و بو حالده اوزر لرینه طرف دولت علیه دن عسکر سوق اولتمق لازم کله جکی جهتلرله ظهور ایده جک محاربه داخلیه اره سنده ارنادولغه عسکر ادخالنی تصور ایدردی یعنی دولت علیه نک بر عضونی کندو ایله کندوسنه کسدرمک ایستردی . عاصم افندی دیر که ارنادولقده بر وجه تخمین اوچیوز بیک قدر جنکاور عسکر ظهور

ایده جکی امر مقرر در بوجهتله فرانسه لو انلردن دائماً احتراز اوزره اوله رق بر تقریبه  
ضعف و تفرقه لرینه چاره ساز اولمق اوزره تپه دلنی علی پاشا حقنده افک و بهتاندن  
خالی اولمازلر . انتهى

نابلیونک منویات مشروحه سی هپ صکره دن آثار یله ثابت اولمش شیردر بونلردن  
بشقه کیم بیلور ذهننده دهانه خولیلار وار ایدی هله آمال واغراضنه حد ونهایت  
اولدینی درکار ایدی بروجه مشروح اجراسنی تصمیم ایلمش اولدینی ماده لر ایسه  
حصول آسایشه حائل وهپ حللی مشکل مسئله لر ایدی شو حوالده فرانسه اهالیسی  
بیهوده یره بروجه بالا مصالحه عمومیه امل و امیدینه دوشمشلر ایدی .

قالدیکه بو قدر اغراضک حصولنه فلک مساعده ایتز بخت و طالع دخی اودر جه لره  
قدر انسانه رفاقت ایلمز لکن نابلیون بختنه پک زیاده کوو نوب کوزینه اصلا موانع  
کورنمز و او مرتبه ایلو کیدر و اقبالنه او قدر زور ایدر ایسه بختی دخی کندوسنی  
ترک ایده جکنی دوشونمز ایدی .

و خارجاً بونجه تشبثات جسیمه ارسنده نابلیون امور داخلیه یی دخی اله آله رق  
برادرلردن بری منتخب اعظم و دیگری سردار اکرم اولدیغندن خارجیه ناظری  
طایرانی منتخب اعظم ثانی و حریبه ناظری پرنس برتیه یی سردار اکرم ثانی  
ایدوب شانپانی یی خارجیه ناظری و جنرال قیلارقی حریبه ناظری نصب ایتمک کبی  
برحوق توجیهات و جمهوریت زمانلردن قالمه سربستلک آثارینی احصا ایله کندو  
حکومت استقلالیه سنه قوت و یرمک اوزره شرطنامه دولتک تعدیل و اصلاحنه قیام  
ایله بعض مجالسی الغایتمک کبی برطاق تبدیلات اجرا ایتمکده ایدی .

ایشته اول ائنده وحید افندی پارسه کیدوب نامه هایونی تسلیم ایچون ملاقات  
ایستمکده ایدی نابلیون ایسه خاندان ملو کدن اولمیوب پست پایه بر شخص ایکن  
یاوری بخت ایله جالس تحت اولوب آز وقت ظرفنده نائل اولدینی بونجه مظفریتلر  
ایله حاصل ایتدیکی کبر و عظمت اوزرینه کندوسنی نوع بشرک فوقنده طوتار  
و علی الخصوص تیلست مصالحه سی اوزرینه ذروده اقباله چیقوب سائر ملوکه  
یوقارودن اشاعی قوش باقی بر نظر ایله بقار و بناء علیه سلطان مصطفانک نامه سنی  
قبول و تسلیمده آغر طاورانوب بیاغی کندوسنی نازه چکر ایدی .

حالبوکه دولت علیه ایله روسیه لو بیتنده فرانسه لونک توسطیله عقد اولنان سالف الذکر  
متارکه حکمنجه همان طرفیندن مرخصلر تعیین و محل مکمله تخصیص ایله مذاکره  
مواد صالحیه به مبادرت اولتمق لازم ایکن فرانسه نک در سعادت ایلچیسینی سباستیانی  
( محل مکمله پارس اولمیدر زیرا دولت علیه نک تمامیت ملکی و حریت و استقلالی  
ایمپراطور منک ملتزمیدر و مکمله کندوسنک کوزی اوکنده اولدینی حوالده دولت



عایه به مضر ماده لری تنقیح ایتدیرر ) دیمکله و بوبابده پک زیاده اصرار ایتمکله مواد مصالحه نك پارسده مذاکره و مکمله سنه قرار ویرلایکندن کرک روسیه مصالحه سی و کرک و حید افندینک مأموریتی یعنی فرانسه لو ایله اتفاق معاهده سی ایچون پارس بیوک ایلچیسى محب افندی مرخص نصب و تعیین اولنهرق ایکی خصوص ایچون دخی کندوسنه بشقه رخصتنامه و تعلیمات کوندرلمش و وحید افندینک در سعادته عودتی امر و اشعار بیورلمش اولدیغنه مبنی و حید افندی هان در سعادته عزیمت اوزره اولدیغنی فرانسه خارجیه نظارتنه بیان ایتمکین و قوعبولان دعوت رسمیه اوزرینه قوتتیلو قصبه سنه واروب و کوچ حال ایله شعبانک اونجی کونی ناپلیون ایله ملاقات ایدوب نامه هایونی تسلیم ایتدکن صکره برآ عودت ایله خلال شوالده در سعادته مواصلت ایلمشدر .

چکن سنه و حید افندی ناپلیون نزدینه اعزام اولدیغنی وقت کرک سبستیانی و کرک انک القا آته الدامش اولان ارکان دولت و حید افندی به نهایت اوج آیده کیدوب و ناپلیون ایله معاهده اتفاتی عقد ایدوب کلورسین دیمشدر ایکن ناپلیونک طرف دولت علیه دن نزدینه مرخص مخصوص ایستمسى مجرد روسیه لویي صلحه اجبار ایچون بویوزدن دخی بر کوسترش ایتمک غرضنه مبنی اولدیغندن بیچاره و حید افندی بیهوده یره شوراده بوراده سورینه رک کوچ حال ایله برسنه ظرفده استانبوله عودت ایده بیلمشدر .

اول اوانده رفیع افندی دخی ایراندن عودت ایدوب ایران شاهی طرفندن سفارتله در سعادته کوندریلان خوی مقتیسی اغا ابراهیم نام آخوند دخی بر لکده کلرک قائم مقام و شیخ الاسلام ایله کوریشوب اخراج موجب دیواننده حضور هاپونه دخول ایله نامه سی تقدیم ایتمش و روسیه علیه نه ایکی دولت اسلامیه نك متفق اولملری مذاکرات و مصاحباتی ایله در سعادته بر ایکی آی وقت کچوردکن صکره اشبو یکر می ایکی سنه سی اواخرنده بغداد طریقله ایرانه کیتمشدر .

رفیع افندینک ایرانه کیتمسى ناپلیونک تکلیف ایلدیکی اتفاق منک ایچون اولوب بوايسه بروجه بالا ناپلیونک بردیسسه پولتیقیه سی اولدیغنه مبنی کرک انک و کرک اغا ابراهیمک سفارتلرندن بر نتیجه حاصل اولمامشدر و ناپلیونک ایرانولوری دخی الدامش اولدیغندن انلرده روسیه لو یدینه چکن مملکتلرینی آنک معاوتیله قورتارمق ایچون بیهوده یره طولاشمقده ایدیلر و حالا ناپلیونک دولت علیه کبی ایرانلویي دخی الدادوب آووتمقده و فقط کندوسی مقدما ایتدیکی وعدلره مخالف اولهرق منفرداً روسیه لو ایله عقد مصالحه ایلدیکندن ایکسنه دخی یالکر انکله ره لو علیه نه عقد اتفاق اولنمسی تکلیف ایتمکده ایدی بوندن غرضی دخی انکله ره لویه قارشو

اتخاذ ایلدیکی محاصره بریه اصولنک آسیایه دخی تعیمی خصوصی ایدی حالبوکه ایرانلو هند جوارنده بولدییغندن فرانسه لودن زیاده انکلتروه ایله مناسباتی اولوب روسیه لویه قارشو معاونت کورمک ایچون ناپلیون ایله اتفاق خولیا سنه دو شمشلر ایدی .

دولت علیه نك دخی انکلتروه لو ایله دول سائر دن زیاده مناسباتی اولوب بناءً علیه از قدیم یکدیگره دوست خالص ایکن بو کره مجرد روسیه سببیه بوز شمشلر ایدی تیلست مصالحه سی اوزرینه بوسبب زائل وانکلتروه لو بروجه بالا اسکندریه مصری ترک ایتدکن صکره طرفین یکدیگره مائل اوله رق انکلتروه کمیلرینی برالشام سواحلندن وآق دکز اطه لرندن چکوب جزائر وسواحل دولت علیه به تعرضدن ودولت علیه یی اغضاب ایده جک حال وحرکتته تشبندن فراغت وبوکا مقابل دولت علیه دخی انکلیز لک انکسار خاطرینی موجب اوله جق طور و معاملهدن بجانب ایتدکه وعقد مصالحه ایچون فرصت کوز تمکده اولدقلرندن هنوز میانه لرنده مصالحه منعقد اولماش ایسه ده معنوی برتارکه حاله کبشلر ایدی .

بو ائنده فرانسزلرک باب عالی دن و علی الخصوص رکاب هایون رئیس اولان حالت افندی دن شکایتلرینه باشلوجه برسبب دخی ایشته بو کیفیت اولمشدر قالدیکه ناپلیون بونجه وعدلر ایله دولت علیه یی یکجهتک دائره سنه المشیکن تیلستیده منفرداً مصالحه ایدیجک دولت علیه نك امنیتی منساب اولدیغندن برتقریبه انکلتروه لوی اله المق مقتضای مصالحتی ایدی و برده وحید افندی نك مأموریتی روسیه علیه نه فرانسه لوی ایله بر معاهده اتفاق یایمق اولوب تیلست مصالحه سی اوزرینه اساس مصالحت دکشمش اولدیغنه مبنی شمدی فرانسه لوی ایله اتفاق یایمق لازم کلسه بیله روسیه مصالحه سنک انعقادندن صکره در میان اولنه بیله جکندن مصالحه منعقد اولدن فرانسه ایله اتفاق بحثه کیریشلما مک خصوصی محب افندی نك تعلیماته درج ایدلشیدی .

فقط دولت علیه تیلستیده جریان ایدن مقاولات خفیه یی بیلمدیکندن محب افندی به کوندر دیکی تعلیماتی ناپلیونک مواعید سابقه سنه کوره قلمه الیرمشیدی .

شویله که: محب افندی به رکاب هایون دن واردوی هایون دن ارسال بیوریلان تعلیمنامه لرده بونا پارته نك مقدم ومؤخر وقوعبولان وعدلری اوزرینه نك معاونت ومظاهرتی ایله تمامیت ملک واستقلال وسرستی سلطنت سنیه اساس اتخاذ اولنه رقر روسیه لونک مملکتین حقنده نظارتی وسائر وجهه امور داخلیه دولت علیه به مداخله سی رفع ومملکتینه دائر مقدما بویولده ویرلمش اولان بعض اوامرک قیدی رتقین وصر بویه دائر مصالحه نامه به برشی درجندن اجتناب ایدلک واوتدنبرو آق دکز وقره دکز بوغازلری دول سائر نك جنک کمیلرینه مسدود ایکن روسیه لوی ایله عقد اتفاق اولندقده

بحسب الضروره روسيه دولتي كميلرينك قره دكز دن آق دكزه وآق دكز دن قره دكزه كچميرينه رخصت و يرلمش اولسيه كما في السابق بوغاز لرك جنك كميلرينه مسدود اولسي و تجار كميلرينك يوقلا نسي خصوصلري مصالحه نامه يه درج ايتدير ملك و روسيه لو بوسفرده قاعده دول اوزره اعلان و اخبار ايتكميزين ممالك محروسه يه هجوم ايتمش اولديغندن تضمينات حربيه ايتنمك و نهر قوبان دولتين بيننده حد فاصل ايكن بروقندنبرو روسيه لولر نهر مذكورك صول يقه سنه مرور و تجاوز ايدر اولدق لردن فيما بعد بو مثللو تجاوزاته جواز كوسترلامسي ايجون مصالحه نامه يه برفقره مناسبه درج اولتمق و قينار جه عهد نامه سي حكمنجه كر جيلر دولت عليه رعاياسي ايكن سابقاروسيه ايمپراطوري پاولو زماننده تفليس و ديكر بعض الويه و نواحى كر جستان حقنده واقع اولان تجاوز و استيلا اصلا قبول ايدلميه رك بوحوالينك هيئت اولاسنه ارجاعندن بشقه اقدجه روسيه لولرك بغير وجه استيلا ايلدكارى اناقره و كمحال مثللو قلاع و بقاع دخى استرداد قلمق و اثنائى متاركه ده انايه قلعه سنك استيلا و هدم اولنديغى استخبار اولنمغله واقع ايسه روسيه لو طرفندن مصارف انشائيه التمق خصوصلري مندرج ايدى .

نابليون ايسه روم ايلينك صورت مقاسمه سنى دوشونمكده و روسيه ايمپراطوري علكساندرى طرفندن مملكتينك ضبط و تماكي مسئله سنده استعجال اولتمقده ايدى .

(مصراع)

\* بين تفاوت ره از كجاست تا بكجا \*

اولوقت تيلسيت مصالحه سنك مواد خفيه سى هنوز ميدانه چيقمامش ايسه ده بوجه بالا بعد المصالحه جزائر سبعة دن روسيه عسكرى چيقوبده فرانسر عسكرى دخول ايله فبا بعد جزائر سبعة فرانسه نك ملكى اولديغى و كذا دو برونيك اراضيسنك ايتاليا قرالغنه ضم و الحاق اولنديغى اعلان اولتمغين دول متعاهده ميانه لرنده تيلسيت مصالحه سنك مواد عليه سندن بشقه برطاق تعهدات خفيه اولديغى اكلاشيله رق دول سائر درلو شهبانه دوشدى دولت عليه ايسه سبستيانينك رسماً و من غير رسم كراراً و مراراً واقع اولان تعهداته و نابليونك سلطان سليمه كوندرمى اولديغى نامه لرك مندرجانه اعتماداً فرانسه ايله روسيه بيننده عقد اولنه حق مصالحه ده اسكى عهدنامه لر اصلاح قلمق و روسيه لونك مملكتين حقنده اولان نظارتى رفع اولتمق و بلكه قريم كيرو التمق كى بيوك بيوك اميدلره دوشمشيكن از قديم حايه سنده بولان دو برونيك جمهوريتى ايله قريب العهده ده تحت حايه سنه كيرمش اولان جزائر سبعة يي الدن چيقارمسي عظيم كدر و انديشه سنى موجب و فرانسه لو طرفندن بتون بتون امنيتى منسلب اولدى .

و فرانسزلر دو برو و نیکی ضبط ایده لیدن برو تملك داعیه سنده کور نیومب نه وقت روسیه لو قطاروینی ترك ایدر و جزائر سبعه دن چیقوب کیدر ایسه دو برو و نیکی کما فی السابق دولت علیه نکدر دیمکده بولنش و مقدا طالیران طرفدن بو بولده محب افندی یه تأمینات قویه اعطا اولنش ایدو کندن اول امرده سباستیانی دو برو و نیکیه دائر برشی سویلمدیسسه ده جزائر سبعه نك فرانسه لو طرفنده قالدیغنی باب عالی یه خبر ویرمش و مؤخرأ بر مکالمه مجلسنده دو برو و نیکی دخی فرانسه لویه کچدیکنی بیان ایدویرمشدر .

دولت علیه ابتدا جزائر سبعه ماده سنی سباستیانیدن و دو برو و نیکی خصوصی خار جدن استماع ایتدکده لا ونعم برشی دیموب فقط روسیه مصالحه سنک پارسده مذاکره سی ائناسنده شایدکه بولنرک تصدیقنه دائر بر ماده درج ایتدیر ملک ایستیلور ایسه فرانسه دولته متعلق اولان بر ماده نك روسیه مصالحه نامه سنه درجی مناسبت آماز دیو فرانسه اتفاقنامه سنک تنظیمی زمانه تأخیر ایله کچشدرمسی خصوصی محب افدینک تعلیماته درج ایدلشیدی . ناپلیون ایسه بولنری رسماً ضبط و تملك ایتدکن بشقه سالف الذکر پروژه و بارغه و وویجه و بوتریتنو نام درت ناحیه یی فی الاصل و ندیکدن مفرز اولدقلری بهانه سیله ادعایه ویرلرنده احتیاط اوزره طاورانان اشقودره و یانیه متصرفلرندن رسماً اشتکایه باشلادی .

حتی سلطان مصطفی طرفندن محب افدینک سفارتی تقریر و تجدید ایچون اصدار بیوریلان اعتماد نامه هایون کندویه واصل اولدقده ناپلیون بروجه مشروح قوتنبلو قصبه سنده بولندیغندن کیفیتی خارجیه ناظرینه لدی الاخبار واقع اولان دعوت رسمیه اوزرینه اورایه واروب برکرا خانه ده اقامت ایله بیان حال و ملاقات ایچون رخصت استحصال ایدرک رمضانک ایکنجی کونی ناپلیون حضورینه دخول ایله اعتماد نامه سنی تسلیم ایتدکده ناپلیون ( یانیه و اشقودره متصرفلرندن چوق شکایتلرم وار بعض مواقع و سوا حله استحکام ویرمکده درلر قورقه جزیره سنده کی فرانسز عساکر مستحفظه سنه ذخیره اعطاسندن امتناع ایده یورلر علی الخصوص یانیه متصرفی علی پاشا جزائر سبعه نك ضبطدن برو فرانسزلره فنا معامله ایده یور کرک جزائر سبعه و کرک الیوم صاحب و مالکی اولدیغ و ندیک اراضیسندن معدود اولان پوترنیتو و سائرلری بحق ملکمدر بولنری روسیه لولر جبراً ضبط ایتشیدی بن دخی انلردن جبراً استرداد ایلدم و بوبایده اولان استحقاقی روسیه دولتی طایدی شممدی جزائر سبعه ایله بودرت ناحیه ید آخرده قالمسنی تجویز ایده م بن طمعکار و محرک قومشولرک اطوار ستمکارانه لرینی مسامحه ایله کچشدرم دولت علیه بوباشلاری بنه

حسن معامله به ارضا ایتمز ایسه یوز بیک عسکر کوندروب مملکتلرینی ضبط ایدرم  
 سلطان مصطفی بکا اخبار جلوسنی چوق کجکدردی ایلچیمه دخی استانبولده رعایت  
 اولنیور ایتمش بن تیلست مصالحه سنده دولت علیه صاحب چیقدم و شمدی به قدر  
 دولت علیه بنی بن طوتیورم یوخسه چوقدن ییقیلوردی سلطان مصطفی مملکتک  
 ضبط وربطنه اقدام و اعتنا ایتسون و بکا دوست اولدیغنی اثبات ایلسون نته کیم سلطان  
 سلیم بکا دوست اولوب بن دخی انک خالص دوستی ایدم و تیلست مصالحه سی  
 هنکامنده تخت سلطنتده بولنسیدی یاخود خلفنک صحیحاً حسن نیاتی بیلسیدم ده  
 بیوک فائده لره و بلکه قریمک استردادینه نائل ایدردم ( دیو محب افندی به بر چوق  
 سرزنش ایتمشدر .

و مؤخرأ سبستیاینک باب عالی به ویرمش اولدیغنی برقطعه تقریرنده دخی دولت علیه  
 و روسیه وانکاتره عساکر متفقه سی طرفدن جزائر سبعة وملحقاتی ضبط  
 اولدقدن فرانسه لو بونارک ترکی اعتراف و تصدیق ایتمش اولدیغنی تصریح ایله  
 پروزه و بارقه و وونچه و پوترنتو ناحیه لرینک فرانسه به عائد اراضیدن اولدیغنی  
 تلمیح ایلمشدر حالبوکه جزائر سبعة جمهوریتهک تشکیل ایله دولت علیه حمایه سنه  
 ادخلنده بونواحیء اربعه دخی طوغریدن طوغری به ممالک محروسه به الحاق اولمش  
 و عامین مصالحه سنده جزائر سبعة جمهوریته قبول قلمش و اول مصالحه ده دولت  
 علیه به عائد موادک فرانسه لو طرفدن قبول اولدیغنی پارسده منعقد فرانسه  
 مصالحه سنده مندرج بولمش و تمامیت ممالکه فرانسه دولتک ضمان و کفالتی معاهده  
 منفرده اوله رق کذلک پارسده بشقه جه سنده ربط اولمش اولسیله کرک جزائر  
 سبعة جمهوریته و کرک بونواحیء اربعه کیفیتی فرانسه لونک تحت تصدیقه کیرهش  
 دیمک اولدیغندن بشقه بوناحیه لر فرانسه لونک ضمان و کفالتی تحت داخل اولدیغنی  
 جوانی ویرلمکین آندن صکره فرانسرلر بونواحی بی عهداً مطالبه دن فارغ اولوب  
 فقط قورقه نک قارشوسنده بولان پوترنتو ناحیه سی قورقه نک محافظه سنه مدار  
 اوله جنی جهته دوستانه مطالبه ایدر اولدیله .

بروجه بالا محب افندی فرانسه ده محقر و ناپلیون طرفدن التفاتنه بدل بر چوق  
 تویخانه مظهر اولدیغنی ائنده روسیه دولتی طرفدن پارس ایلچیمی نصب اولنان  
 تولستوی پارسه کلده ناپلیونک برادری ژروم ایچون اشترا اولنان سرایه  
 ایندیریلهرک و بوکره محب افندی فوتتیلو قصبه سنده ایکن اورایه ورودنده دخی  
 کندوسنه سرای امپراطوریده بر دأره تخصیص ایدیلهرک حقنده فوق العاده اکرام  
 و احترام اولنقدن ایدی .

دول متحابه نك يكد يكره حرمت و رعایتي مكنت ذاتيه لرینه كوره اوله كلوب اولوقت ايسه دولت عليه بك قاريشيق بر حالده وضعفی كالمده اولديغندن روسيه سفر نده ايشه يارايه جق بر حرکت ايدمه ماشيكن ناپليونك بر طاقم اصلمز وعدلرینه آلدانوبده مجرد فرانسزلرك ثمره غلبه سی اولان مصالحه ده اسكي معاهده لرك تعديل واصلاح ايتديرلسی وبونجه سنه لردنبرو روسيه لو ينده قالمش اولان قريمك استرداد ايديليويرمسی کبی املره دوشمك بيوك خطا وبيهوده خوليا ایدی لکن ناپليونك دولت عليه حقنده اولان معامله سی دخی انصاف وانسانيتك خار جنده ایدی زیر سلطان سليمان زمانده دولت عليه ايکی دفعه فرانسزلره امداد ایچون شارلکن علیهنه قوه کافیه سوق ایتمیشیدی غرض کفران نعمت ايسه بوايکی ايسلکه قارشولق ايکی کملک اولمق اوزره ناپليونك مقدما مصری استیلا ایتمی ومؤخرأ دوبروونيك قطعه سنی یوتمی کافی ایکن بو کره خوشابق اولمق اوزره جزأ سبعة یی خوره کچوردیکنه قباعت ایتمه لرك سالف الذکر نواحی اربعه یه دخی طمع ایتمی ایچون نه دیملی طوغریسی بوکا حق تعبير بولنه ماز قالدیکه انواع مواعید ايله طرفه جاب ایچون دولت عليه یی اغفال ایدوبده روسيه وانکلتره محاربه لرینه کیریشدیرن کندوسی واستانبوله ظهور ایدن اختلاک اسباب موجبه سندن بری دخی کندو ایلچیسى اولدیغنه نظراً هیچ اولماز ايسه بو وعدلرندن اوتانوبده ینه بر طاقم دیل ايله تسلیت ویرمک لازمه حقانیت وانسانیت ایکن زبونکشک یولنی التزام ايله بر پادشاه نوجاهک اعتماد نامه سنی تقدیم ایدن ایلچیسى ایلک آغز دن بوليه زهر تهديد وتوبیخ ايله تلخکام ایتک سلوک وسیرت ملوکه یاقیشماز بر کیفیت ایدی .

نه چاره که دولت عليه ناپليونك خاطر یی ایچون کندو متفق اولان انکلتره وروسيه دولترنی الدن چیقارمش ومتعاقباً بر طاقم اختلالات داخلیه اوغرایوب نه یاپه جغنی شایریمش اولدینی جهتیه ناپليونك قوجاغنه دوشمکدن غیر یی چاره سی قالمشیدی . حالبوکه دولت عليه فرانسه نك توسطنی قبول ایتدیکی تقدیر ده روم ایلینک مقاسمه سی خصوصنه تیسایتده قرار ویرلمشیکن دولت عليه نك توسطنی قبول ایدویرمسی اوزرینه عقد اولنان متارکه حکمنجه اوتوز بش کون ظرفنده روسيه لونك مملکتینی تخلیه ایتمی مشروط اولوب عالیکساندری ايسه مملکتینی بنمسه یه لرك تخلیه شویله طورسون او طرفده کی عسکرینی تکثیر ایتکده وبر طرفدن دخی مملکتینی ضبط وتمک ایچون ناپليونك موافقتنی استحصاله چالیشمقده ایدی مقدما ناپليون دخی بوموافقتی وعد ایدوب فقط روسيه اتفاقدن استفاده ايله اورویاجه بعض منویاتی اجرادن صکره یه بر ایش ایکن بو طریقله روسيه لونك استانبوله یاقلاشمش اوله جغنی دوشوندکجه

مطالعه سنه الویر میوب علیکساندری بی دخی قیره مدیغندن بوبابده ذهننی ترددندن قورتاره مدیغنه مبنی نه یابه جغنی شاشیروب محاوله ایله امرار وقت ایتمکده و طرف دولت علیه دن حکم توسطک ایفاسی طاب اولدنججه مجهول جوابلرایله آوودوب آلداتمقده ایدی .

بناءً علیه متارکه سندنده معین اولان مدت مرور ایتدی روسیه لوهنوز مملکتینی تخلیه ایتمکدن بشقه اوراده کی عسکرنی تزید ایده یور دیو محب افندی فرانسه خارجه ناظرینه بیان حال و متوسط اولدینی جهتهله سببنی سؤال ایتمکده گاه مدت متارکه نیسانه قدر تمدید اولنش اولوب حالوکه اولوقته قدر دولتعلیه تدارکاتی اجمال ایلمش و روسیه لو اولوقته قدر بیهوده یره سرحدلرده کلی عسکر بسله مش اوله جغندن بوشرط یالکز دولتعلیه نافع اولدیغنه و سند متارکه ده دولتعلیه قالیوننک ردی شرط قینوب محاربه هنگاننده النان سفینه لک ردی ایسه اصول وقاعده به منافی ایدوکه بناءً و متارکه سندینی تصدیقه مرخص میکسون ایکن اول ائناده وفات ایتمکله دیگر برجنرال بلارخصت تصدیق ایلمش اولدیغنه استناداً روسیه ایمراطوری بومتارکه نی قبول ایتماش و بوکره ورود ایدن روسیه ایلچیسینی تولستوی مکالمه به مرخص دکل ایمش روسیه مرخص نصب ایتمکجه دخی فرانسه لو توسط ایده مز فقط پترسبورغه یازلمشدر باقه لم یوللو واهی سوزلر سویار وکاه بوماده دن طولانی ایمراطوریمز دخی منفعل اولدی حتی روسیه ایلچیسینه شدتلو لسان قوللانونب سکانچون رخصتنامه کوندرمدیار دیمش اودخی پترسبورغه یازمش جوابی کلدیکی کبی خبر ویریلور دیو امرار اوقات ایلر ایدی .

بوجهته محب افندی اوراجه جهت استناد والتجا بوله میوب ویکمکله مذاکره و مکالمه اولنه جغنی بیله میوب مضطرب و متحیر و فرانسه پولتیقه سنک رنکی بتون بتون دیکشمش اولدیغنی کوره رک روسیه ایلچیسینه رخصتنامه کلو بده مکالمه به مباشرت اولنه جق اولسه دخی سیاق و سباق احواله نظراً نه درلومشکلات عظیمه ظهور ایده جکنی فهم و ادراک ایتمکدن ناشی پیدرپی باب عالی به عرض و بیان حال ایله وارد اوله جق جوابه مترقب و منتظر اولدینی حالد بر طرفدن دخی روسیه ایلچیسینه نه وقت رخصتنامه کله جک دیو صوروب اراشدیر مقده و بر جواب شافی المق اوزره صیق صیق فرانسه خارجه ناظرینی صیقشدر دنججه اودخی لیت ولعل ایله صاوشدیر مقده ایدی .

نهایت اوائل ذی القعدة ده روسیه ایلچیسینک رخصتنامه سی کلش دینامکله محب افندی فرانسه باش وکیلی شامپانی ایله ملاقات ایدرک ناپلیونک مواعید سابقه سنی

تذکار ودولتعلیه حقنده خیرلو وشانلو بر مصالحه عقد ایله انجاز وعد اولنق زمانی  
 ککش اولدیغنی اخطار ایتدکده شامپانی (ایمپراطور منک دولتعلیه حقنده محبت  
 وخیر خواهانی ظاهر در لکن روسیه لو مملکتیندن حقیق ایستمیور دولتعلیه دخی  
 بعض مطالبنی اجرا ایچون دشمن قارشوسنده قوتلو بولنق لازم ایکن ایوم صدر  
 اعظم اردوسنده نفراتدن کمسنه اولمیوب طونه یاللسنده موجود اولان عسکرک  
 دخی مجموعی درت بیگ نفره بالغ اولدیغنی رعنا بیلورز روسیه لو ایسه دولتعلیه  
 علیهنه اعمال ایلدیکی عسکری اولدقاری محالرده توقیف ایتدکن بشقه بر طرفدن  
 دخی کلینلو عسکر سوق ایتدکده در محاربه یه آغاز اولنق لازم کسه همان حاضر در  
 بو حالده دولتعلیه نک داخلی نظامسزانی وعسکرینک پریشانغنی باعث تأسفدر)  
 دیوجواب ویرمشدر وفی الواقع بالاده بیان اولندیغنی اوزره روسیه لو حرکت  
 ایده جک اولسه قارشوسنه علمدار پاشادن بشقه چقه جق بر قوت یوغیدی شو حالده  
 شانلو مصالحه امیدی بیهوده ایدی .

ایکیوز اتی تاریخنده روسیه لو ایله مصالحه مکمله سنه مأمور اولان عصمت بک  
 افندی دن مرویدر که مجلس مکمله ده مارشال (پوتمکین) طرفندن بعض مواد ثقیله  
 تکلیف اولنسی اوزرینه عصمت بک بوتکالیفک قبولندن ایسه عندمزده اعاده  
 محاربه اهنودر دیجک پوتمکین هزل واستهزا یولنده (شوجبار زاده عسکر یله می  
 حرب ایده جکسکر) دیدکده عصمت بک (محمد تعالی دولتعلیه نک عسکری جبار  
 زاده عسکرینه می منحصر در) دیسنه مقابله (اندن بشقه دهانه کونه عسکر کزوار)  
 دیسیله عصمت بک (اناطولی وروم ایلی شو یله طورسون بر اقلیمه کافی بوسنه  
 عسکری و بر مملکتنه وافی ارناود دلاور لری وارد در) دیسنه جواباً پوتمکین (بلی بلی  
 انلره سوزیوق و دیدیکک کبی بر اقلیمه مقابل اوله جق لری عندمزده وسأر اورپا  
 دولتری عندلرنده دخی مسلمدر وعد دلری حد احصادن چوقدر لکن دولتعلیه نک  
 اطاعتده دکلردر بوتقدیرجه البته غالب اولان دولتک حین مصالحه ده تکالیف  
 ثقیله سی اوله کلکله قبولدن غیر ی چاره یوقدر) دیوقطع رشته مقال ایلمشدر .  
 بوکره شامپانیک محب افندی یه اولان سوزی دخی اوقیلدندر وجواب مسکتدر  
 نه چاره محب افندی مقتضای مأموریتی اوزره قاعده منطقیه ایله بحقی قرانق ایستیوب  
 روسیه لونک خرسزکی بغته کلوبده خوتین و بندری استیلا ایتدیکنی و حقوق ملل  
 قاعده سنجه دولت علیه نک حقی اولدیغنی اثبات ایله مطالب سابقه ی تکرار ایتدکده  
 شامپانی (بک ایی اما روسیه لو راضی اولماز ایسه فرانسه نک مصالحت مخصوصه سی  
 اولدیغنی جهته یالکیز بز محاربه ایتیز دولت علیه ایله بر لکده محاربه ایتمز لازم کلور



دولت علیه محاربه به مقتدر میدر) دیو (الحکم لمن غلب) قاعده سنک سائر قواعد فائق وغالب اولدیغنی تصریح درجه سنده تلمیح ایتمشیکن محب افندی (روسیه لو محاربه ایدرسه تیسلیت مصالحه سنه مغایر اولمازمی) دیجک شامپانی (تیسلیت مصالحه سنده مجرد روسیه لونک افلاق و بغدادندن چکلمسی مشروطدر اما مصالحه ده کیمک یدنده قاله جنی مصرح دکدر) دیو مملکتینک روسیه لو یدنده قالسنه فرانسه نک مساعد ایدوکنی تلمیح و فرانسه لو توسطدن وازچکوبده دولت علیه روسیه لو ایله باشلو باشنه عقد مصالحه ایتسنی تصریح ایلمشدر محب افندی ایسه متارکده سزک توسطکرله عقد مصالحه اولنسی مشروطدر بنم مأموریتیم دخی بو مرکزده در دیهرک شامپانینک یقه سنی بر اقدیغندن ذی القعدة نک یکرمی دردنده شامپانی یاننده محب افندی تولستوی ایله بالاجتماع رخصتنامه مبادله اولنمش ایسه ده تولستوی هنوز تعلیماتم کلدی افنیدین برازمهلت ایسترم دیوب برشی مذاکره اولنمقسزین مجلسدن قالقلمش واندن صکره دخی پترسبورغدن تعلیمات کله جک دیو امرار اوقات ایدلمکده بولنمشدر و محب افندی اره صره شامپانی به مراجعت ایتدکجه بوکون یارین تعلیمات کلوردیو آوومغه برابرگاه تپه دلتلی علی یاشادن شکایت وکاه سباستیانی به استانبولده رعایت اولنمدیغنی مقام تعریضده حکایت ایده کلمشدر .

سباستیانیکن اطوار و حرکاتنه کنجه بر وجه بالا ناپلیون دولت علیه ایله دوستلق یوزنده کورندیکی و قتلر سباستیانی دخی باب عالی یی متصل بر طاقم اصلسز و عدلر ایله اغفال ایدرک دولت علیه نک اعتمادینی جلب و استانبولده نفوذ و اعتبار کسب ایدرک و قتلی و قستز سلطان سلیمک حضورینه چیقار و استدیکنی سویلر ایکن وقعه معهوده اوزرینه سلطان مصطفی تخته جلوس ایتدکن صکره او مثللو معاملات فوق العاده اجرا اولنه میوب آنک حقنده دخی دول سائره ایلیچیلری کبی معامله اولنمه باشلادیغندن ذاتاً دلکیر اولدیغنی حالده تیسلیت مصالحه سندن صکره فرانسه پولتیقه سی عکسنه دونوب ناپلیون روم ایلینک مقاسمه سنه بهانه ارامقده اولمسلیله سباستیانی دخی تبدیل طور و مسلک ایدرک دور سابقی ثنا و سلطان سلیم رجانی مدح ایله طرف سلطنتی اغصاب ایده جک سوزلر سویلمکه وغایت مزعج و تحملمدن خارج معاملات نابجایه قیام و جزئی ماده لری اعظام ایله بو بزه حقارتدر بن کیدرم پساپورتلیمی ویریکز بویله کیدرسه دولت علیه محو اوله جقدر یوللو تفوهات ایله دولتی ازعاج ایلمکه باشلادی .

از جمله جلوس هایون اثناسنده برطویچی ضابطی برشخصی اعدام ایله کندوسنه لدی الاتجا تصحب ایتمه رک دولته تسلیم ایتدکده قاتل اولدیغنی ثابت اولدیغنه

و هنگام اختلال اولمق حسبیله اجرای جزاسی لازمه خالدن کورلدیکنه مبنی قاتل مرقوم قصاصاً اعدام ایدلمش وارده سی ایکی آی کچوب ماده اونودلمش ایکن صکره دن بکا التجا ایدن طو پوچی ضابطنی سز قتل ایتدیکنز بو بی وایمپراطورمی تحقیردر دیو ادعایه وینه جلوس هایون عقبنده فرانسه طرفندن جایی مقرر اولان طو پوچیلرک توقیفی کندوسنه بیان اولندقده واقعا عسکرک غلیانی وار شاید طو پوچیلره بر سوء معامله ایدر لر ممالک محروسه یه کلبری مناسب دکدر دیو توقیفلرینی کندوسی تنسب ایله بو ماده جنراللرینه مکتوب ویرمش وایمپراطورمن دولت علیه یه اصلاً بار اولمق ایستمز عسکر مطلوب ایدر سه کز ویرر ایستمز ایسه کز تکلیف ایتمز دیمش ایکن اوچ آی صکره طو پوچیلرک رد اولندیغنی موضوع بحث ایدرک دولت علیه تبدیل طور و مسلک ایدهور دیو اشتکایه قیام ایلدیکی مثللو بالاده بیان اولندیغنی اوزره دیوان تر جانی عاقبو بک اعدام اولندقده تر جان بک فرانسه لویه متعلق وهر وجهله فرانسه سفارتی طرفندن ماترم ایکن فرانسه ایلچیسنه حوادث ویرمک تهمتیه قتل اولنشدن بن کیدرم پاسپورتلم ویرلسون دیو عریده یه ابتدار و مکالمه یه دعوت اولندقده خلاف قاعده اوله رق مکالمه یه کیتیم دیو اصرار ایتیمی اوزرینه کوچ حال ایله کتخدا بک قوناغنه کتور یلهرک اوراده بالاجتماع ایضاحات کافی اعطاسیله اقتاع اولنوب حتی روملر دولتین بیننه القای برودته سعی ایدیور لر فیما بعد او مقوله مفسد لرک سوزلرینه اعتماد ایتیم وروملری یانمه اوغراتیم دیمش و آنک بو مقوله معاملات ناجحاسنه مقابل برو طرفدن دائماً نازکانه و نوازشکارانه معاملات ایله جاب و تألیفنه اعتنا و سررشته مناسبانک قوماسنه سعی اوفی اولنه کیش ایکن ینه بر کون قائم مقام پاشانک یاننه کله رک حالت افندی افلاق قپو کتخداسی قسطا کی قتل ایتدیره جکدر بو ایسه فرانسه دوستلغنی احما دیمکدر زیرا قسطا کی فرانسه حمایه سنده در دیو بر قطعه مفصل تقریر ویردکن صکره استدعاسی وجهله حالت افندی اورایه جلب اولندقده کندوسنه بالمواجهه سن فرانسه لونک دولت علیه علیه حراکت ایده جکی شبهه سنه ذاهب اولمش سین و قسطا کی قتل ایتدیره جکسین کرک قسطا کی و کرک افلاق و یوه ده سی فرانسه حمایه سنده در صیانت اولنلی و صیانت اولنه جقلمرینه دائر تقریر ویرملی دیه رک کستاخانه اطوار ایله مقام ریاستک قدرینه طوقونه جق خیاییدن خیلی بارد سوزلر سویلمش و چاره سز حالت افندی دخی مقابله ایلمش اولدیغندن بتون بتون اره لری آچلدی و سببستیانی دائر ریاسته کلز اولدی .

بونک اوزرینه ینه تلطیفی التزام بیوریله رق بر کون باب عالیده منعقد اولان مجلس

مکالمه به خواص مقریندن امیرآخور اول اغا کلوب طرف شاهانه دن (ایلچی بکک  
خاطری عند شاهانه مده مرعیدر و جمه طرفدن خاطرینه اعتنا اولنسی مطلوب  
هایونمدر) دیو بیورلمش اولدیغنی تبلیغ ایله تلطیفی ضمننده کندوسنه برالمس یوزک  
کتورمش وینه بر دفعه بر مجوه قوطی و دیگر بر دفعه بر آت طاقی اهداسیله  
بالذات طرف هایوندن تلطیفی خصوصه اعتنا بیورلمشدر .

وینه بر کون سلطان مصطفی کاغد خانه به بنش ایوب سباستیانی ایله اسپانیا  
ایلچیبسی دخی اوراده بولمغله طرف شاهانه دن استفسار خاطر ضمننده  
کندولرینه قهوه کوندرلمش و مرصع ظرفلریله برابر قنجانلر کندولره احسان  
بیورلمشدر .

سباستیانی طمعکار بر آدم اولدیغندن بو مثللو هدایا ایله یومشایوب براز سرکشکی  
ترک ایتسه ده غرض بشقه اولدیغندن اره سی چوق کچمکسزینینه بر بهانه ارار  
بولور و بر عریده چقارار و طرف سلطنت سنیه دن اجرا بیوریلان بونجه معاملات  
لطفیه حکمسز قالور ایدی . بناء علیله بر وجه مشروح حالت افندی به انفعالی  
اوزرینه طرف شاهانه دن تلطیف ایله تسکین و تألیف اولنمشیکن متعاقباً اسکدارده  
بر باباسی قتل ایدن ایکی خروات بوستانچی باشی طرفندن اخذ و حبس اولندقده  
بومقوله معامله لر ایله فرانسه تبعه سنه اذا و جفا اوله یور غلطه ده دخی بر حاجبی  
برفرانسزی شتم ایتمش و بر نفر برفرانسزی سردسته ایله اورمش بن کیدرم  
پسپورتلم و یرلسون دیو اصرار ایتدکدن بشقه فلمنک و اسپانیا ایلچیلرینی  
کندوسنه اویدوروب آنلر دخی فرانسز ایلچیبسی کیدرسه بزده کیدرز دیو باب  
عالی به تقریر لر و یردیلهر وکلای دولت علیه طرفندن چاره سزینه جلب و تألیفنه  
صرف مساعی اولنوب بونک اوزرینه رضیه ایستدکده کندوسنه باب عالی دن  
رضیه یوللو بر تقریر یازیله رق کوچ حال ایله الیقونادی ایسه ده یینه ازعاجاتدن  
و بروسیله بوله ماز ایسه مقدماتکش کچمش مواد جزئییه یی تازه لیه رک شکایاتدن  
خالی اولمازدی .

حتی جلوس هایون ائناسنده یماقردن بری سرخوش اولدیغنی حالدله الی طمانجه سی  
اوزرینه قویوب سباستیانی بی اخافه ایتمکله ضابطلری در حال نفر مر قومی طوتوب  
کندوسنه کوتوردکار نده بو آدم سرخوشلق بلاسیله بوخلطی ایتمش طوقونمیکز  
دیو سیلانی تخلیه ایتدیرمش و بونک ایچون مخصوصاً چاوشباشی اغا فرانسه سفارته  
ارسال ایله رضیه دخی ویرلمش ایکن یدی سکز آی صکره فرانسه خارجیه ناظری  
حج افندی به دولت علیه نک اطوارندن شکایته دائر تعداد ایتدیکی سبئر صره سنده

استانبولده سبستیانی به حقارت اولنه یورمش و اوزرینه بریمی پشتو چکمش دیو بوماده بی دخی ایراد ایلمشدر .

غریبدر که مقدا سبستیانی دولت علیه امور داخله سنه نیچون روسیه لوی قارشیدیره یور دیو دولت علیه بی روسیه علیه تحریک ایلر و تمدح مقامنده بز بشقه دولتک امور داخله سنه قارشمق ایستیمز دیو سویلر ایکن دولت علیه فرانسه لو ایله یکجهت اولوبده روسیه لویه اعلان حرب ایتمکدن صکره سبستیانی روسیه ایلیجیسندن زیاده امور داخله به مداخله ایدر اولدی واقعا بوا یکی مداخله بیننده برفرق وار ایدی روسیه لو تکلیفی یولو یولسز هر نه ایسه عهد و شرطه بنا ایتمک چالیشوردی سبستیانی ایسه دوستانه اخطار دیو اولور اولماز ایشلره مداخله یلردی فقط ایستدیکی اولماز ایسه پساپورتلر نی ایستیوب ینه دیدیکی اجرا ایتمیرردی هله صکره لری افراط ایدرک بروجه مشروح ترجمان وقبو کتخداسی مثللو مأمورین دولت علیه بی علناً حمایه ایتمکدن بشقه وزرا توجیهاتنه بیله قارشمغه باشلادی حتی بالاده اشعار اولندیغی اوزره بغداد والیسی علی پاشانک وفاتنده ضیا پاشا بغداد والیسی نصب اولنهرق بغداد ایالتک کوله منبر یدندن تخلیصیله تنظیمی دولتجه تقرر ایتمشکن بوکا دخی مانع اولدی .

الحاصل تیسیت مصالحه سنندن صکره ناپلیون قوت و اقبالی سوء استعمال ایله دولت علیه حقدنه انصاف وانسانیته یاقنماز معامله لر اجراسنه قیام ایتمدیکی وقتدنبرو سبستیانی نیک و کلای دولت علیه به ایتمدیکی اذا وجفا قالمدی .

بونک اوزرینه حالت افندی سبستیانی نیک معاملات تحمل فرسانندن بجهت بالذات ناپلیونه عرض شکوا ایتمک اوزره خلال رمضانده محب افندی به مفصل و مشروح برقطعه تعلیمات کوندرمش ایدی محب افندی ایسه سبستیانی نیدن شکایت شویله طورسون کندو حالی حکایت ایده جک یر بوله میوب و سیاق و سباق احواله نظراً ناپلیون طرفندن مظاهرت مأمول ایده میوب اساس مصالحتک ینه استانبولجه چاره سنه باقلمسی لازم کله جکنی اخطار ایلمشدر .

قالدی که دولت علیه فرانسه لودن احترازاً هنوز انکلترو لو ایله عقد مصالحه ایتماش ایسه ده میانه دن آثار خصومت بر طرف ایدلمش اولدیغنه مبنی حالت افندی نیک ال التندن انکلیزلرک جاب و تألیفنه صرف مساعی ایتمدیکنی سبستیانی استراق ایدرک حالت افندی بی انکلیزلر ایله کیزلو مخبره سی وار دیواتهام و عزل و تأدیبنی التزام ایتمکدن ناشی چاره سز خلال شوالده حالت افندی عزل و کوتاهییه نفی اولنهرق رکاب همیون ریاستی جانب افندی دیو معروف اولان دفتر امینی صالح افندی به توجیه بیورلمشدر .

کلمه بوائساده دیگر دول اوروپا ایله فرانسه لو میانه لرنده جریان ایدن احواله . ناپلیون برمنوال مشروح دارات وحشمت ایله قونتنبلو سراینده اقامت وتیلسیت عهدنامه سی حکمنجه روسیه لونک اجرا ایده جکی توسطک نتیجه سنه حواله سمع دقت ایلیکی ائساده دائیما رقه دولتی بیک سکر یوز برسنه سنده امیرال نلسون کلوبده پایتختی اولان قوپنها کی اوردینی وقتدنبرو انکلتزه لویه ابراز خصومتدن خالی دکل ایسه ده تکرار انکلتزه دولتی کوچندیرمکدن خوف واحتراز ایلیدیکنه مبنی بی طرفلقدن بشقه حرکته بولنه میه جنی جهته ناپلیوندن عذر دیله مکده وپورتیکر دولتی ناپلیونک تکالیفنه چاره سز روی رضا کوسترمک اوزره انکلتزه لودن رخصت ایستمکده واسپانیا دولتی فرانسه طرفدن خوف واندیشه اوزره اولدیغندن نه پولتیقه قوللانجغنی بیله میوب ناپلیونک تحصیل رضاسنه چاره ارامقده ایدی .

اوستریالو دخی تیلسیت مصالحه نامه سنک مواد خفیه سی اقتضاستجه افلاق وبغدانک روسیه طرفنده براغلمش اولسی طننه ذاهب اوله رق شو اون بش سنه ظرفنده بونجه مملکتلر ضایع ایتدکدن صکره اطرافنی برطرفدن فرانسه وبرطرفدن روسیه احاطه ایلمش اولدیغنی نظر تأسف ایله کوروب ایلو و فرایدلاندر محاربه لری ائساشنده حربه مداخله ایتمدیکنه ندامت چکمه کده ایدی .

اما پروسیا دولتی کندو ممالکندن فرانسر عسکرینک چیقیمی تضمینات حربیه نیک اعطاسنه موقوف اولدیغندن پروسیا قرالی تضمیناتی ادا ایدوبده ممالکنی تخلیصه اقدام ایله برابر قوه عسکریه سنی بریکی اساس اوزره بنا وتظیمه سعی واهتمام ایتمکده ایدی که عصر مزده جمله یه حیرت ودهشت ویرن پروسیا هیئت عسکریه سنک اصول تنظیمه سنه اولوقت وضع اساس اولته یوردی .

روسیه ایمپراطوری علیکساندری فرانسه اتفاقندن عظیم منفعت امیدنده اول بول مملکتینی قبضه تملکنه کچوروبده ملتی خشنود ایتک واوزرنده کی عار مغلوبیتی بونکله ازاله ایلمک املنده اولوب روس ملتی ایسه فرانسرلرک مظفریتندن متأثر اوله رق افکارجه ایمپراطورلرینه مخالف ایدیلر حتی ناپلیون طرفندن سفارته پترسبورغه کوندریلان جنرال ساواری علیکساندری طرفندن فوق العاده احترامات ایله قبول اولنش ایکن علیکساندرینک والده سی وروسیه اصلیزادکانک اکثریسی طرفندن صعوق معامله کورمش ایدی . علیکساندری بوکا واقف وکبار قومک کندویه مخالف رأیده بولندوقلرندن متأسف اوله رق سواری یه باقه لم انکلتزه لوه نه پایه حق ونه مسالک اتخا ذ ایده جک اکلاشاسونده صکره بن انلرک جمله سنی تکدیر وتادیب ایله استدیکم یوله قورم دیو تسایت ویروب تیلسیت مصالحه نامه سی حکمنجه

توسطه دائر و مصالحه عمومیه حقیقده اولان آرزوسنی مشعر انکلتزیه کوندرمش اولدیغی تقریرک جوابنه منتظر ایدی و یالکیز اودکل بتون اوروپا انکلتزه دولتمک نه پولتیقه قوللانه جغنه قولاق طوتمقده ایدی و بادی امرده انکلتزهدن هنوز برسس چیقمدیسه ده علكساندرینک تقریری لوندزیه واصل اولدقده بردون اعتبار ایله قبول قلمش اولمسی هرکسه بادی فکر و اندیشه اولمقده ایدی بونک اوزرینه بردن بره دانیمارقه وقعه غیر ماموله سی ظهوره کلدی .

شویله که : ( پیت ) ایله ( فوقس ) ک وفاتلرندن صکره انکلتزیه ای اداره ایدن وکلان لورد غرانویلیک تحت ریاستنده بولنوب کندو پولتیقه لرینه یالکیز طوغریدن طوغرییه انکلیزلره عائد اولان منافع مخصوصه سی اساس طوتهرق اکا توفیق حرکت و دکزلرده کندو دونمالرینه قارشو کله جک برقوت اولدیغی اتحاد فرست ایله امید بوروننی فلمنکدن الدقزلی کبی افریقا وامریقا ساحلرندن ایشلرینه کلان یرلری اوروب استیلا ایدرک بوارده دول آوروپایی فرانسه علیه نه تشویقندن خالی اولدیلر ایسه ده برطرفدن قریه عسکر چیقار ماملری و اعانه تقدیه دن بشقه صورتله معاونت قیدنده بولن ماملری بعض مرتبه متفق لرینک انفعاله بادی اولمش ایدی .

بو حال بیگ سکیز یوز یدی سنه میلادی سه سنه قدر سوردی اول ائساده ایرلاندا اهالیسنک جلب و تالیفی ضمننده عسکری رتبه لرینک انکلیزلر کبی انلره دخی توجیه نه دائر برقانون یاییلوب ایرلاندا لور ایسه قاتولیک اولدق لردن کندولرینه مراتب عسکریه توجیهی انکلتزه قرالنک تعصبنه طوقونمغله و کلاسی سنه مرقومه مارتنده استغفایه مجبور اولملری اوزرینه یرلرینه لورد قاتیق و قاستلراق و پرسوال کبی هپ پیتک پرورده لری اولان ذوات کچدی و بونلر فرانسه محاربه سی تشدید و تدارکات حریه یی تزید ایله اسوچک استرالسونت سنجاغنه براردو چیقاردیلر ایسه ده فرایدلاند محاربه سی و تیلسیت مصالحه سی انلری شاشرمغله انکلتزه نک عظمتی و پارلمنتوده رقبالیینه قارشو اعتبار و حیثیتی محافظه یه مدار اوله جق بروقه فوق العاده وجوده کتورمک اوزره یکریمی بش قپاق و قرق فرقتین و اوچیوز یتش یدی نقلیه سفاینه یکریمی بیگ عسا کر بریه طولدیروب قونپها که کوندر دیلر دانیمارقه دولتمک برشیدن خبری اولدیغی جهته بودونما بلانمانعت سونت بوغازندن مرور ایله قونپها که قریب قرونمبورغ قاعه سی پیشکاهنه ورود ایله دانیمارقه دولته خبر کوندروب انکلتزه قارشو عقد اولنان اتفاق برینک شرائط خفیه سی حکمنجه دانیمارقه نک دخی خواه و ناخواه بو اتفاقه ادخال اولنه جغنه دائر انکلتزه دولتمک معلوماتی اولدیغندن بخته مدار تأمین اولق اوزره دانیمارقه دونماسنک انکلیزلره

تسليمی تکلیف ایتدکده بویله برخام و حقمز تکلیفه دانیمارقه لو رد ایله جواب ویریک انکلیزر قریه عسکر دوکوب مترس الهرق برأ و بحرأ قوپنهاکی محاصره وکله و خبره ایله تضییقه مبادرت ایتدکاری ائنده استرالسونده بولنان انکلیز فرقه سی دخی یتشوب مملکتی تخریبه مباشرت ایتلریله دانیمارقه دولتی تسلیمه مجبور اولمغین انکلیزر دانیمارقه نك دو نمانسی و ترسانه سننده کی ادوات و مهماتی الوب انکلتزه کو توردیلر .

بو حادته بیک سکز یوزیدی سنه میلادی سی ایلول افرنجیسنک سکزنده وقوعبولدی و روسیه نك تکلیف ایتدیکی توسطه پک حرارتلی بر جواب اولدی انکلتزه و کلاسنک حقوق ملله قارشو بویله حقمز برحر کتدن بتون آورویله دهشت و نفرت کلدی و بوجهتله ناپلیونک پولتیقه سی آوروپاچه اولکیدن زیاده قوت الدی و دانیمارقه دولتی بالطبع کندوسیله متحد و مال سائره دخی انک طرفدارلغنه مستعد اولدی انکلیزر دخی دولترینک بوحر کتدن ناخشنود قالدی لکن پارلامنتو بواجرا آتی تصدیق ایتمکله انکلتزه و کلاسی بووقعه دن طولای پترسبورغده وویانه ده تبرئه ذمت ایله برابر روسیه و آوستریا دولترینی فرانسه علیه نه تخریکدن غیری برشی دوشونم دیلر وهان مأموریت مخصوصه ایله پترسبورغه کوندردکاری جنرال ویلسون دانیمارقه وقوعاتی امور طبیعه دن اولدیغنی بیان و روسیه دولتک افلاق و بغدانی ضبط و تصرف ایتسنه انکلتزه لونک مانع اولیه جفنی و فرانسه اتفاقدن روسیه به برخیر کلیه جکنی درمیان ایدرک علیکساندری بی اقناعه چالشمش ایسه ده علیکساندری عن صمیم القلب ناپلیون ایله متحد اولدیغندن بوسوزلره قانمقدن بشقه انکلیزر لرك بوتکلیفدن دلکیر اوله رق اولادانیمارقه علیه نه اولان تعدیادن طولای ایضاحات کافیه و ثانیاً مصالحه عمومیه نك بقاسی حقنده واقع اولان توسطنی انکلتزه لونک قبول ایدوب ایتیه جکنه دائر جواب قطعی ایتدی انکلتزه لو ایسه بونلره رد ایله جواب ویرمکله ایکی دولت بیننده قطع مخابره اولتمق لازم کله جکی اکلاشلدیغندن علیکساندری ارتق افلاق و بغدانی ضبط و تملکی امرنده ناپلیونک موافقتی تحصیله مسارعت و ناپلیونک رضاسنی تحصیل ایچون و کلاسنی عزل و تبدیل ایله فرانسه طرفداری اولتلی نصب و تعیینه مبادرت ایلدی .

انجق ناپلیون شرق مسئله سنک اجراسنی برازدها تأخیر ایتک فکرنده بولندیغندن علیکساندری بی اشغال ایچون اسوچلونک تمرندن بختله روسیه عسکرینک فلاندریا به کیرمسنی تکلیف ایتدی و محاصره بریه اصولنک استعمالی ضمننده بیطرف دولترینی جلبه قیام ایلدیکی صره ده آوستریا دولته تامینات اعطاسیله حقنده فرانسه لونک

برکونه سوء نیتی اولمدقن بشقه شرقه بعض اجراءات وقوعه کله جک اولورسه کندوسنک دخی حصه دار اوله جغنی اشراب ایلدی اوستریالو وقتیله فرانسه علیهنه حرکت ایتماش اولدیغنه ندامت چکمهکده ایسهده شو حالده باشلو باشنه فرانسه ایله اوغراشمغه نه عسکری کافی ایدی ونهده مقدار کفایهده اچمسی وار ایدی . بناء علیه ناپلیونک بوتلیغاتی ابراز مسرت ایله قبول ایدرک ال التدن تدارکات حریبه یه دوام ایله برابر اول اراقق فرانسه ایله دوستلق اوزره کچنمکه قرار ویرمش ایدی .

واغستوس افرنجینک اوائلنده فرانسز عسکری استرالسونتی استیلا وانکلز عسکرینی طرد ایله روکن جزیره سنی ضبط ایلمش ایدوکندن دانیمارقه وقعه سی اوزرینه ناپلیون دانیمارقه دولتیله تدافعی وتجاوزی براتفاق عقد ایدوب سونت بوغازینی قیامتق وموسم شتاده روسیه لولرک فنلاندا ییه کیردکلری صروده اسوچه سوق عسکر ایده یلمسی ایچون سلانت وفیونی جزیره لرنده برر فرقه عسکر بولندیرمق شرطنی دخی معاهده اتفاقه درج ایتمشیدی .

پورتیکز دولتی هرجهته انکلتره طرفداری اولدینی حالده ناپلیونک آثار غضبندن قورتلحق اوزره نهانی انکلتره لو ایله اتفاق ایتدکن صکره ناپلیونه انکلتره لو ایله قطع مخبره ولدی الاقتضا محاربه ایده جکینی والحاصل محاصره بریه اصولنک اجراسنی تعهد ایدوب فقط برشرطنک اجراسنه یعنی انکلز تجارینک توقیفیه ماللرینک مصادره سنه پورتیکز دولتنک انصاف وعدالتی راضی اولیه جغنی بیلدیرمشیدی وبوندن مرامی انکلتره لو ایله اولان دوستلغنه خلل کتورمیه رک ناپلیونی او وتمقدن عبارت ایدی لکن ناپلیون بوکالق اولیوب لیز بونده کی ایلدچیسنی اعاده وپارسده کی پورتیکز ایلدچیسنک بسا پورتلرینی اعطا ایتمکه یکر می بش بیک نفره بالغ اولان بایون اردوسنک سریرعا واروب لیز بونی ضبط ایلمی امرینی ویردیکی ائنده اسپانیالو ایله فونتنبلو عهدنامه سنی دخی امضا ایتمشیدی . شوبله که : فرانسه ایله اسپانیا میانه لرنده پورتیکز ممالکی مقاسمه ایدمک ویکرمی بشیک پیاده واوچیک سواری فرانسه عسکرینی اسپانیا ایچندن کچوب پورتیکزه کیتمک وسکنز بیک پیاده واوچیک سواری اسپانیا عسکرینی دخی انلره رفاقت ایتمک شرأطنی حاوی فونتنبلو قصبه سنده فرانسه واسپانیا دولتلری بیننده بر معاهده اتفاق تنظیم وتشرین ثانی افرنجینک یکر می یدیسنده طرفیندن امضا وتختیم ایدلمشدر .

ناپلیونک مرامی ایسه اسپانیادن دخی بوربون خاندانی طرد ایتمک ماده سی اولدیغندن بووسیله ایله اسپانیایه عسکر صوقه رق ایاق الشدرمق وروش وقوعاته نظر ایله فرصت کوزتمک خصوصارندن عبارت ایدی .



ناکمان اسپانیا قرالندن برنامه ورود ایله اوغلی وولی عهدی اولان فردیناندک کندوسنی خلع ایچون فتنه وفساده سعی ایتدیکندن بجنه بو بایده ناپولیونک رأی و مطالعه سنه مراجعت و برطر فندسخی فردیناندک مکتوبی کلوب ناپولیون فاملیاسندن برپرس ایله تزویجی استعدعا سیله برابر طلب حمایت اولنغله ارادینی فرصت بر صورت غیر مترقبه ده یوز کوسترمش اولدی .

تفصیلی بودرکه : اسپانیا قرالیچه سنک علاقه کرده سی اولان باش وکیلی پرنس دولاپه ایله رذالتی عیوقه چیقوب بتون اهالی بوندن متفر او لمشر ایسه ده اسپانیا اهالیسنک نظرنده مسند قرالی مقدس اولوب قراله طوقونمق عند لرنده پک آعر بر مسئله اولدیغندن سکوت ایله کچشدیروب مملکتک زمان مستقبله سعادتتی پک زیاده سودکری فردیناندن امید وانتظار ایتمکده ایدیلر فردیناند دخی والده سنک رذالتدن و پرنس دولاپه نک مذموم ویولسز حرکتدن بیزار اوله رق دولاپه یه اظهار خصومت ایتکه باشلامشیدی بونک او زرینه دولاپه قرالیچه ایله بالاتفاق فردیناندی وراثتدن اسقاط ایله برادرینک ولی عهد ایدلمسی اسبابنه تشبث ایلدکرندن فردیناند خبر آلدینی کبی اودخی بوتشبتانک منغه چاره بولمق اوزره طرفدارانی ایله لدی المذاکره ناپلیونه التجا وانک فاملیاسندن برپرس ایله عقد ازدواج ایتکه قرار ویروب نهانی مادریده کی فرانسز ایلچیسيله خفی مخابره ایدرک آنک وساطتیه ابتدای تشرین اولده ناپلیونه برقطعه نامه کوندرمشیدی وقرال پک اختیار اولدیغندن شاید بو ائنده وفات ایدیوررسه ایجابی وجهله حکومتی اله ایده بیلمک اوزره فردیناند بعض تدابیره تشبث ایله برابر والده سیله پرنس دولاپه نک حرکاتی اوزرینه پدرینک دقت نظرینی جلب ایده جک بر لایحه دخی حاضر لامقده ایدی قرالیچه ایسه جاسوسلر واسطه سیله بوکا آگاه اولیجق هان فردیناندسنک علیه فساد ترتیب ایده یور دیوقرالی قانیدیروب ولی عهد ایله طرفدارانک توقیفنه قرار ویرمشر ایدی ایسته اولوقت قرال دخی ناپلیونه سالف الذکر نامه یی یازمش و اوغانی محاکمه ایتدیره رک ولی عهدلکدن اخراج ایده جکنی بیلدیرمش ایدی . بوا یسه ناپلیونک ارا یوبده بوله مدینی بر فرصت اولدیغندن هان المانیاده و لهستان حدودنده اولان عساکرینی بالتدریج رین نهری سواحله جلب ایله اسپانیا حدودنده التمش بیك نفره بالغ اولمق اوزره ایکی فرقه عسکریه ترتیبه مباشرت ایلمشدر واکر چه اسپانیا اهالیسی ولی عهدده اولان حقارتدن خبردار اولدقلری کبی حدتله رک عادتاً عصیان اماره لری ظهوره باشلامدیغندن پرنس دولاپه اریه کیروب قرال ایله ولی عهدی بارشدرمش و بوضورتله دفع قیل وقال ایدلمش ایسه ده ایلروده یینه باطلاق ویره جکنده ناپلیونک شبهه سی اولدیغندن بوترتیباتی تبدیل ایتما مشدر .

پورتکیز اوزرینه سوق اولمش اولان فرانسز فرقه سی کال سرعت وشتاب ایله لیزبون اوزرینه حرکت ایتمکده اولدیغندن بواننده پورتکیز قرالی فامالیاسی دولت خزینه سنده موجود اولان نقودی و سرائیک ذی قیمت اشیاسی دونمایه تحمیلا انکلیز لرك معاوتیه امریقاده الیوم بر مستقل ایمراطورلق اولان اولوقت پورتکیز دولتنک یدنده بولنان بر ازلیا ممالکنه فرار ایلمش اولدیغندن تشرین ثانیء افرنجینک اوتوزنده فرانسز عسکری لیزبون شهرینه کیرمشلر آز وقت ظرفنده فرانسز واسپانیا فرقه عسکریه لری بتون پورتکیز ممالکنی استیلا ایتمشلر در .

وناپلیون لیزبون شهرنده کی فرقه یه معاونت بهانه سیله کویا پورتکیزه کچمک اوزره اسپانیا قرالندن رخصت استه مکمزین اسپانیا ایچنه بر فرقه عسکریه ده اداخال ایتمکله پرنس دولابه تلاش ایدرک ناپلیونک غرض ونیتی نه اولدیغنک کشف و تحقیقنه مبادرت ایتمکده ناپلیونک اطواری اسپانیا حقنده شبهه یی دعوت ایتمکله واسپانیا اهاالیسنک ولی عهدیه محبتی و پرنس دولابه یه خصومتی اثری اوله رق اسپانیاده حالا بر قاریشیمقاق موجود اولمسیله قرال طرفندن دخی ناپلیونک حسن توجهنی جلب ایچون ولی عهدینک بوناپارت فامالیا سندن بر پرنس ایله تزوجی ضمننده مکرراً ناپلیونه نامه یازمش ایدی ناپلیون ایسه اول ائنده اسپانیاه ممکن اولدیغی قدر عسکر ادخالنه چالشمقده اولدیغنه مبنی انکلیز لرك جبلتره حوالیسنه عسکر جمع ایتمکده اولدقلرندن بحثله اول طرفه کوندر لمسنی اسپانیا قرالنه اخطار ایتمش و قرالک نامه لرینه مبهم و مجهول جوابلر ویرمش اولدیغندن قرال ایله کندوسنک عقل خواجه سی اولان قرالیچه وباش وکیل تلاش ایتمکده و پیدرپی فرانسز عسکری مادریده طوغری ایلر ولدکجه تلاشلاری آرتقمده اولدیغی حالده اسپانیا اهاالیسی ناپلیونی ولی عهدک حامیسی بیلدکلرندن فرانسز عساکری هر محله نمونیت و مخالفت ایله قبول اولتمقده ایدی . و چونکه ناپلیونک مقدا اعلان ایتمش اولدیغی محاصره بریه یه مقابل انکلتره لو دخی بی طرف دولتلرک کیملرندن هر قنغیسی انکلتره یه اوغرا یوبده یوزده یکر می بش رسم کهرک ویرمز ایسه مصادره اولنه جغنی تشرین ثانیء افرنجینک اون برنده اعلان ایتمش اولدیغندن و بوضورته ایسه آوروپانک تجارت بحریه سی انکلیز لره منحصر اولمق لازم کله جکندن ناپلیون حدتانبوب کانون اولک اون یدیسنده بر بیاننامه نشر ایله فرانسه یه تابع یاخود متفق ممالکدن هر قنغی سفینه انکلتره یه اوغرار ایسه مصادره اولنه جغنی اعلان ایلدی بو صورتله انکلتره و فرانسه بیننده دوام ایتمکده اولان محاربه کوندن کونه کسب شدت ایدرک عالمک منتظر اولدیغی مصالحه عمومیه کیتدکجه کسب صعوبت ایتمکده ایدی .

و ناپليونك مطمح نظرى اسپانياك استيلاسى خصوصى اولديغى حالده بتون اوروپايى كندوسنه چوجق اويونجاشى كى برنوع اكلانجه ايتسنه مساعد اولان اقبالنه پك زياده كووه نوب كندو قوتنه حائل و مانع برشى اوله مامق اعتقادنده بولنديغندن اسپانيا مسئله سيلاه اوغراشدغى ائشاده بر طرفدن دى ايتاليا نك حال استقلال اوزره قالان پارچه لرغى قبضه تحكمنه المق داعيه سندن خالى دكل ايدى .

حالبوكه مقدا پايه ايتديكى اخطار اناك هيچ تاثيرى اولميوب پايپاكان ناپليونك دشمنلرغى التفات ايله قبول ايتديكندن ناپليون حدتلوب ايلچيسى واسطه سيلاه پايه ( بنده شارلمان كى كليسانك حاميسى اولان بر ايمرا طورم اتحاد اوروپا نك ترتيبات و نظاما تنه توفيق حركت ايتمه و ممالسكى دشمنلرغى قياتمه مجبور سين ) ديو بليغ ايتدكه پايه اصلا قيد و تحاشى ايتمه رك ( ريوزنده بندن بيوك هيچ بر حكمدار طائيم و اكر حكومت روحانيه نك هيچ تاثيرى قالماشدر ظنيله حقمده معامله جبريه اجراسنه تشبث اولنورسه باش اكميوب نفوذ روحانيك يكي يتشمه و المله تقديس ايتمش اولديغى بر حكمدار حقمده تاثيرى اوله بيله جكنى كوستره جكم ) ديو جواب ويريجك ارتق ناپليون محاوره طريقتى ترك ايله هان كانون نانى افرنجينك يكرمى يديسنده بر جنرال معيتيله رومايه سكر بيش عسكر كوندروب اداره دولته مداخله ايتامك و فقط رومادن فرانسه دشمنلرغى طرف ايله پوليس نظارتى اله المق اوزره امر ايلمشدر .

و فرانسز عسكرينك پورتكيزه دخولى اوزرينه انكليز لر قوه بر يه لر ينك بر خيليسىن جيلتره طرفنه نقل ايتدكارى جهته سچليا محافظه سنده انجق سكر بيش قدر انكليز عسكرى قالد يغندن ناپليون بونى فرصت عد ايله سچليمانى ضبط ايتك اوزره بحر اوقيانوس سواحلنده كى فرانسز و اسپانيا كمپارينك ايچ دكزه مرور ايله اميرال غانطومك معيته التحاقلرغى امر ايتمش ايسده بونلر كى مرورينه انكليز لر مانع اوله رق بر مقدارى كوچ حال ايله طولونه ورود ايد بيلمشدر وانلر كى ورودندن سكره اميرال غانطوم شباط افرنجينك اوننده طولوندى حركت ايله قور فيه واروب جزائر سبعه يه ذخيره و مهمات نقليله مشغول اولمشدر و چونكه ناپليونك اسپانيا حقمده جاكيكر ضميرى اولان تصور اناك ميدانه قونيله جق وقتى كيش اولديغندن اول ائشاده كندوسنه اوروپاچه بر باشلو غائله چي قمامق اوزره بو اوانده روسيه لوايله اولان اتفاهقه قوت ويره جك بعض مخبرانه دوام ايتمكه ايدى .

شويلاه كه : روسيه ايلچيسى تولستوى پترسبورغدن كتوردىكى تعاميات اقتضاسانجه ممالك عثمانيه نك شمديلك تقسيمى قابل اولمديغى تقديرده روسيه دولتشك افلاق

و بعدانی ضبط و تملک کنه و برده فرانسه عسکرینک پروسیان چقمسینه ناپلیونک موافقت و مساعدت سنی تخصیصه مأمور اولوب انجق تولستوی بوبابده پک زیاده استعجال ایله کرک ناپلیونی و کرک و کلاسنی آشوری تصدیق و ازعاج ایدوب ناپلیون ایسه اولوقت بر حکمدارک واصل اوله مدیننی اقبال و اقداره نائل اولدیننی خالد بر ایلچینک معجز لکنی چکه مدیکندن تولستویه سر تجه معامله ایتمش و پروسیانک تخلیه اولنماسی تضمینات حربیه نك هنوز ایفا اولنماسندن ناشی ایدو کتی بیان و روسیه عسکرینک حالا مملکتینی تخلیه ایتماش اولدیننی در میان ایلمش اولدیغندن تولستوی پارسه و رودندن برو فوق العاده احتراماته مظهر اوله کلور ایکن بونک اوزرینه کندوسیه فرانسه دولتی ااره سنده نوعاً برودت حاصل اولمشیدی علكساندرینک پترسبورغه کی فرانسز ایلچیسى ساواری ایله الفت و مناسبتی بالعکس پک زیاده کر میت اوزره اولوب مؤخرأ ساوارینک پارسه عوتنده یرینه تعیین و ارسال اولنان قولتقور ایله میان لرنده جاری اولان مناسبات و محرمیت دخی صورت مخالصته ایدی فقط افلاق و بغدادک ضبطنه ناپلیونک مساعد اولیه جفنه دائر تولستویک و یردیکی معلومات و فرانسه خلاف کیرلری طرفندن ناپلیوندن بر فائده کورلیه چکنه و روسیه نك اکا الدانوب قابل مسمی انک اغراضنه آت اولمقدن بشقه بر شیئه یارامیه جفنه دائر اولنان افادات علكساندری به بادی اندیشه اولمغله بورالره دائر بیک سکز یوز سکز سنه میلادیه سی کانون نانیسنده قولتقور ایله حسب حال طرزنده خلیجه محرمانه مکالمه لردن صکره ناپلیونک شو مملکتین ایشنه مساعدت ایدوبده روسیه ملتک محبت و اتفاقی قزاقسنی رجا ایتکله کیفیت قولتقور طرفندن بالتفصیل ناپلیونه انها اولمش و ساوارینک افاداتی دخی علكساندرینک آرزوسنه موافق بولمش اولدیغندن و عثمانولر تیلست مصالحه سندن اول جان و کولدن فرانسه ایله متفق ایکن بردن بره و بلاموجب ترک ایله دشمنلری اولان روسیه لونک قارشوسنده یالکن براغملرندن ناشی منفعل اوله رق فرانسه طرفنه ابراز خصومه باشلادیلر دیو سباستیانی طرفندن انها قلنمش ایدو کندن ناپلیون مملکتینی فدا ایتدکن بشقه ممالک عثمانیه نك مقاسمه سنه قرار و یروب شباط ایچنده علكساندری به یازمش اولدیننی نامه سنده شرق مسئله سنک حلی کندوسنجه قرار لاشدیرلش اولدیغندن بحثله دولت علیه نك مقاسمه سی ضمنده مکالمه به مبادرت اولسنی تکلیف و بوتقسیمده آوستریا لونک حصه مند اولسنی و برده فرانسز و روس و آوستریا عسکرندن مرکب براردونک بر آ هندستانه سوق اولنسنی شرط ایلمشدر .

بونامه نك پترسبورغه وصولنده علكساندری تعریف اولنماز صورتده نمون اولمشدر .

شویله که : قولنقور آئی کندوسنه تقدیم ایتدکه (آه ایماطور ناپلیون بیوک برآمدر ایشه تیلستیده بیان ایلمش اولدیغی افکاره عودت ایلدی کندوسنه بیلدرکه زمام اختیاری می کندو یدینه تسلیم ایتشمدر عمرم اولدجه اردولرم هپ اکا تابعدر روسیه ملتک تسکین حرص و غروری ایله استفای حظ ایتک اوزره کندوسندن بعض شیر طلب ایدرسم هوس شان ایچون دکدر بلکه اکا کندم کبی بوماتی دخی بند ایتک ایچوندر افندیکنز دولت عثمانیه نک تقسیمندن آوستریا لوی دخی حصه دار ایتک استیور حتی وار بویله یولنده اولان افکارینه بنده مشترک هندستان اوزرینه بر هجوم ایستر بوکا دخی راضیم تیلستیده واقع اولان فوق العاده مکالمه مزده بو خصوصه اولان مشکلاتی بیان ایلمشیدم کندوسی موانعی هیج رینه قومغه الشمشدر لکن بونده هواجه و مسافه جه عقل و فکر دن خارج موانع واردر مع مافیه راحت اولسون بنم تدارکاتم مشکلاته کوره اوله جقدر شمدی ترک باربار لغنک لندن قویاره جغمز ممالکک صورت تقسیمی امرنده اتفاق ایتلیز بوکا دائر رومانجوف ایله مذاکره ایدیکنز انحق شوراسنیده در خاطر ایتلیز که بومسئله قطعی و فائده لو صورتده تصویر و تسویه اولنه بیلیمک ایچون ناپلیون ایله باش باشه و یروب مطالعه ایتمز لازمدر شمدی ماده نک هرجه تتی مطالعه ایدلم مصلحت کرکی کبی پیشدکن صکره پترسبورغدن چیقوب ایماطوریکز زرده ایستراسیه کندوسیله کوریشورم پارسه قدر کتمک ایستردم لکن اولماز قالدیکه ملاقاتمز تزه ودارات ایچون اولیوب مجرد ایش ایچون اوله جقدر المانیاده ویمان بلده سی اولسه ایو اولور کندو فاملیم ایچنده بولنش اولورم حالبوکه اوراده تعجیزدن خالی قالمیز ار فورته دهاتنها و سربست اوله بیلورز بوراسنی افدیکنزه تکلیف ایدیکنز قبول ایتدیکی صورتده همان یوله چیقارم و تانار کبی قوشارم ) یولو سوزلره درجه ممنونیتی افهام و تولستوی عزل ایله فرانسه بولتیقه سنه مخالف اولان وکلانک تربیه سنه قیام ایتشدر .

بونک اوزرینه قولنقور روسیه خارجیه ناظری رومانجوف ایله کوریشوب مصاحبتیه قویلمشدر فقط مسئلهء مقاسمه نک حائنه کلیجک عظیم مشکلاته دوچار اولمشدر بو دخی امور طبیعه دن ایدی زیرا اوروپانک موازنه سنه اساس اولان بر دولتی بلا سبب مقاسمه یه کیرشمک ایکی طرفی دخی شاشیره حق بر مسئلهء عظیمه اولمسئله خلی مشکل و بویله بر بیوک لقمه یی یودوب هضم ایتک ذاتاً قولای دکل ایدی . بناءً علیه دفعهٔ بر برینه آچیله میوب زمین وزمان ایله مسئله در میان اوله رق جریان ایدن مباحثاتک نتیجه سنده ایکی صورت میدانه چیقمشدر

«برنجیسی» افلاق و بغداد ایله بالقانہ قدر اولان بلغارستان قطعہ سی روسیہ لویہ وارناوودلق و مورہ و کرید فرانسه لویہ و بوسنه قطعہ سی اوستریا لویہ ترک ایلہ صربستان دخی اوستریا خاندانندن برپرنسه ویرلمکدن عبارت ایدی «ایکنجیسی» دولت علیہ نیک بتون بتون محاسی صورتی ایدی کہ روسیہ بالقانردن تجاوز ایلہ اوتہ دنبر و مطمح نظری اولان استانبولی و اناطولینک دخی بر قطعہ سی ضبط ایدہ جک و اوستریا لویہ بوسنه و صربستان ایلہ برابر روم ایلینک بر مقدارینی الهرق سالنیکه قدر اینه جک وارناوودلق و مورہ و کرید ایلہ سائر جزائر بحر سفید و بر الشام و مصر دخی فرانسه لویہ یدینه کچہ جک و بوتقدیر جہ عثمانلور دخی فرات نہری قیبلرنده بر حکومت تشکیل ایدہ بیله جک ایدی فقط بوضورتده فرانسه لویہ کلبولی بوغازینک کندوسنده قالمسی شرط ایدوب حالبوکه قرہ دکیزک مفتاحی اولان بوغاز مذکور فرانسه لویہ یدینه کچدیکی حالدہ استانبولک تملکنده چندان قیمت قالمیہ جغنه منی بوراسی فرانسه لویہ یدینه کچمکدن ایسه دولت علیہ یدنده قالمق روسیہ پولتیقه سنہ دها و فوق اولدیغندن صورت ثانیہ ده اتفاق حاصل اوله مامشدر مع مافیہ بینلرنده اساس مصاححت قرار کیر اوله هرق رومانخوف مذاکرات واقعه بی خلاصه و جہله قلمه الوپ انحق طرفیندن امضایہ جسارت اولنه مدیغندن بعده ایکی امپراطورک ملاقاتلرنده قرار قطعسی ویرلمک اوزره اشبو خلاصه نیک بر صورتی ناپلیونه کوندرلمشدر .

ناپلیون بو وسیله ایلہ علیکساندری پی پیوند اتفاقه بند ایدوب بو اتفاقی بر مرتبه دها تأیید و روسیہ ایلہ انکلتزه میانلرنده کی برودتی تزید ایچون علیکساندری پی فنلاندیا ایالتک ضبط و تملکنه تشویق ایدی .

اسوچ قرالی ایلہ علیکساندری بیننده قرابت اولدیغی و اقدمجه کندوسنک متفق بولندیغی حالدہ بلا موجب انک مملکتی استیلا ایدوبیرمک پک چرکین و مغیار حقانیت بر کیفیت اولدیغندن بادیء امرده علیکساندری آغرجه طاور اتمش ایسه ده روسیہ لولرک فتح ممالک خصوصنده درکار اولان حرص وطمع لرندن ناشی بویله یانی باشندہ بر مملکتک ضبط و تملکنه فرصت الویرمشیکن ارتق کیرو طوره میوب هان شباط ایچنده یکر می بشیک نفر دن مرکب براردو ترتیب ایلہ فنلاندیا اوزرینه کوندردی . ناپلیون بر قاچ آیلر علیکساندری پی فنلاندیانک استیلاسی و دولت علیہ پی مقاسمه اتمک مذاکره سی ایلہ اوایلاندره بیله جکینی جزم ایلہ اول طرفدن امنیت حاصل ایتدکدن صکره مجموع قوتی اسپانیا مسئله سنه صرف ایتکه قرار ویردی و اسپانیا ایچنه بر طاقم جاسوسلر ارسال و بر طرفدن دخی پیدرپی عسکر ادخال ایدرک اسپانیاده کی عساکرک عموم قومانده سنه پرنس مورایی مامور ایتدی و سالف الذکر روسیہ اردوسی برآی

ظرفده فنلانديا ايلتى ضبط ايدوب بو ايسه فرانسه اتفاقك ثمرسى اولديغندن روسيه لولرك فرانمزلر حقنده اولان نفر تلى مبدل محبت اولمغه باشلامشدر .  
 برمنوال مشروح ناپليونك دولت عليه حقنده اولان سوء نيأتى شدت و روسيه ايله اولان رابطهسى قوت بوليچق پارسده محب افندى حقنده فرانسه خارجيه نظارتك واستانبولده باب على ايله سباستيانينك معاملهسى دخى بالطبع تبدل ايدرك بر مرتبه دها اغر لاشمشدر .

اول اوانده سباستيانى انكلتره لو دشمن مشترك اولديغندن دولت عليه دائماً انكلتره لو عليهنه فرانسه لو ايله همدم و همراز اولمق تعبيرىنى حاوى باب عايدن بر قطعه تقرير استيوب فرانسه اتفاقى ايسه روسيه مصالحه سنك تنظيمندن صكره درميان اولنه جق بر مسئله اولديغى حالده فرانسه نك توسطيله عقد اولنان متاركيه علكساندرى تصديق واحكامنى اجرا ايتامش ومدت متاركة نك انقضاسنه آز بر مدت قالمشيكن هنوز روسيه مصالحه سنك مكاله سنه مباشرت اولنه مامش ودولت عليه هنوز انكلتره لو ايله عقد مصالحه ايتمديسه ده خصوصتى تزويد ايدجك طور و حر كتنن اجتناب اوزره اولوب بو تعبير ايله فرانسه لويه سند اعطاسى ايسه انكلتره لونك آتش خصوصتى علوكير ايدجكنه مبنى باب على دائماً انكلتره لو عليهنه فرانسه لو ايله همدم و همراز اولمق تعبيرينك تقرير رسمى يه درجندن احتراز ايدرك دولت عليه حالا انكلتره لو ايله محار بدر و فرانسه دولتتكم علمى اولمديجه انكلتره لو ايله عقد مصالحه ايتيمه جكي دركارد شمدى او ايله بر تقرير اعطاسنده نه فائده وار ديو امرار وقت ايله پارسده محب افندى دخى اويولده لسان قوللانمق اوزره ركاب هايون طرفندن كندوسنه تعليمات كوندولمشيدى .

حالبوكه دو برو و نيك اهالىسى كما فى السابق دولت عليه حمایه سنده بر سر بست جمهور قالمق آرزوسنده اوله رق دولت عليه يه قارلو ناتالى نامنده بر ايلچى كوندر مش اولملى يه بو ائنده قارلو ناتالى مشتای اردوى هايون اولان ادرنه يه كلوب وكلاى دولت عليه ايله مكاله مصلحت ايتمكده واقديجه بصره و بغداده قونسولوس طرفنده برر انكليز كلوب اقامت ايتدكردن و بغداد واليسى طرفندن برشى دينلميوب من غير رسم مظهر رعايت اولدقردن بر طاقم انكليز تجارى دخى ديار عراقه كلوب كيتمكده اولمغين ذى القعدة نك اون برنده سباستيانى طرفندن باب على يه ويريلان بر قطعه تقرير رسميده ( دو برو و نيك جمهورينك ايتاليا اراضيسنه الحاق اولديغى بوندن اقدام بيان و اعلان اولمش اولمسنه نظراً دو برو و نيك ايلچيسى صفتيله اردوى هايونه كمش اولان ناتالى فرانسه امپراطورينك عصيان ايتمش تبعه سنندن

دیمک اولدینی حالد وکلای دولت علیه طرفدن مکالمه یه قبول اولدینی صحیحدر و طرف دولت علیه دن انکلتره لو حقدنه معامله خصمانه وعد وتعهد اولنمشیکن بودفقه خلافی مشاهده اولنه یور زیرا بر نفر انکلز قونسولوسی ایله بر طاقم انکلتره تجاری آلآن بغداد جانبنده موجود اولدقن بشقه دیگر بر نفر قونسولوسی دخی بصره ده اقامت ایتمکده اولدینی مسلمدر فرانسه دولتک انکلتره دولته اظهار موالات ایدن دول ایله محارب اولق اصولی اختیار ایلدیکی سلطنت سینه نک معلومیدر . بناءً علی ذلک فرانسه ایمرطورینک تبعه سندن اولان مارالذکر قارلو نالی هان حبس وتوقیف ایله تحت الحفظ دالماسچیا قوماندانه ارسال وتسلیم ایلمدیکی و بغداد و بصره طرفلنده اولان انکلتره قونسولوسی وتجارینی توقیف وتحت الحفظ استابوله ارسال اتمک اوزره سریعاً بغداد والیسنه برقطعه امر شریف کوندردیکی صورتده ترک سفارت ایدوب کیتمکه مجبورم ) دیو محرر بولمغله بو تقریرک بر صورتی رکاب هایوندن محب افندی یه کوندرلمش وفرانسه وکلاسنه لساناً هر درلو تأمینات اعطاسیله برابر بو خصوصه دائر شاید که بر تقریر رسمی استیلور ایسه اسلوب حکیمانه ایله صاوشدیرلمسی لازم کله چکی باتحیرات مخصوصه اشعار واطظار ایلمش ایدی .

تحیرات مرقومه ذی الحجه نک طقوزنجی کونی محب افندی یدینه واصل اولمشدر اول کون ایسه محب افندی فرانسه خارجیه ناظری شامپانی طرفدن دعوت اولمغله واروب ملاقات ایتمکده شامپانی طرفدن ( جزائر لور فرانسرله فنا معامله وجزا رده کی ایلچیمزی تحقیر ایده یورلر ایش کیفیت سباستیانی یه یازیه جقدر اگر دولت علیه در حال اقتضاسی اجرا ایتمز ایسه ایمرطوریمز عسکر کوندروب جزائر ی ضبط ایده جقدر ) دیو سویلمش و محب افندی روسیه ایلچیسنه مکالمه ایچون نه وقت تعلیمات کله جک دیو منتظر اولوب بوکا دائر شامپانیدن صدره شفا ویره جک بر جواب آلق امیدنده ایکن بو مثللو سرت معامله لر اوزرینه بتون بتون مایوس و متحیر اولمشدر .

( وقایع سنه ۱۲۲۳ )

محب افندی بر منوال مشروح احوال پولتیقه نک بتون بتون متغیر و منقلب وفرانسه لودن امیتک کلیاً منسلب اولدینی کور یجک شاید که روسیه ایلچیسنه تعلیمات کلوبده مواد مصالحه مکالمه سنه شروع اولنه جق اولور ایسه شو حاله کوره نصل حرکت اولنق لازم کله چکنه دائر تعلیمات جدیده ایستمش ایدو کندن اوائل محرمد اردوی هایوندن کندوسنه ( تعلیمات بر سوزدن عبارتدر مقدما کیدن تعلیمات ایله تنظیم



مصلحت ممکن اولور ایسه فبها اولدینی تقدیرجه اشبو سفردن اولکی عهد و شروط نه ایسه آنک اوزرینه تنظیمه راضی یز ) دیو اشعار اولمشدر .

روسیه متارکه سنک مدتی ختامه قریب اولدیغندن محب افندی فرانسه خارجیه ناظری شامپانیدن دولت علیه نوجهله حرکت ایلسون دیو سؤال ایتدکده شامپانی ( دولت علیه شمندی به قدر متشبث اولدینی اصول وتدابیره بر شی علاوه ایتسه کوزل اولور ) دیو جواب ویرمشدر .

وروسییه مصلحه سنک نتیجه سی نه اوله جق دیو فرانسه لودن سؤال اولنه کلمسیله بوکا جواب اولوق اوزره ( روسیه لو افلاق و بغدادنی ترک ایتک ایستیمور دولت علیه بونلری ترک ایدرمی یوخسه محاربه نی ترجیح ایلرمی ) دیو سؤال اولتمی اوزرینه طرف دولت علیه دن اظهار تعجب وانفعال اولندقدده فرانسه لو طرفدن ( الآن سزک حدود کزده روسیه لونک یوز الی بیک عسکری وار بومثللو مصلحک اجراسی دشمن قارشوسنده کلیتو عسکر بولندیرمغه موقوفدر ) جوابی ویرمشدر .

وایام متارکه نك انقضاسنه پك آز بر شی قالدقدده محب افندی فرانسه خارجیه نظارتدن بر جواب قطعی ایستمکله خارجیه ناظری ( روسیه لولر دولت علیه ایله محاربه ایتمزلر زیرا بز تیلایت مصلحه سی حکمنجه ترک سلاح ایتدک دیورلر و محاربه ایتیه جکلرینه ایمپراطوریمز کیفیلدر ) دیو جواب ویرمش و شهر صفرك حلولیه مدت متارکه منقضی اولدقدده تکرار محب افدینک استمزاج ایتسی اوزرینه ( روسیه لو محاربه ایتمز فقط مدت منقضی اولدی دیو سز دخی جنکه شروع ایتمیکز ) دیش اولدیغندن دولت علیه ایله روسیه لو بیننده سند سز بر متارکه صورتی رونما اولدی .

بوآننده فرانسه ایله انکلتزه بیننده مصلحه ماده سی در دست ایدوکی استماع اولندقدده فرانسه لو انکلتزه لو ایله دخی عقده مصلحه ایدرک ایشنی بجر و بده دولت علیه نی آچیقده براتق قورقوسی دولت علیه به باعث اندیشه اولمغله فرانسه لودن لدی الاستمزاج انکلتزه لو ایله عقد مصلحه اولنه جق اولدینی حالدده دولت علیه نك دخی مصلحه به ادخال اولنه جغنده شبهه یوقدر دیو فرانسه لو طرفدن تأمینات ویرلمش ایسه ده شمندی به قدر ناپلیون هیچ برسوزنده طور مامش اولدیغندن بوتأمیناته دخی اعتماد اولنه میوب دولت علیه کندو باشنک چاره سنی آرامغه مجبور اولدیغنی برقات دها درک واذعان ایتشیدی .

وینه اول ائنده بوسنه قطعه سنک آوستریالو یه ویریه جکی حوادثی منتشر اولمغله دولت علیه آوستریا طرفدن دخی اورکمه که باشلامشیدی .

واقدجه بوسنه والیدی خسرو پاشانک مأموریتی سلانیک سنجاغنه تحویل اولنهرق

بوسنه ایالتی دخی سالنیک والیسی صدر سابق حلمی ابراهیم پاشایه توجیه بیورلمش ایدوکندن بو ائنده فرانسه خارجی ناظری محب افندی ایله ملاقاتنده خسرو پاشانک بوسنه دن عزانه اعتراض مقامنده خسرو پاشانک عزلی اوزرینه بوسنه لولر فرانسزلردن یوز چویروب (فرانسزلر بزم مملکتلری میزلی ضبط ایده جکلر مش آرتق آنلردن امنیتمز یوقدر مجموع اهل اسلام حاضر اولسون دیه رک قپانلر استحکامدن خالی دکلامر مش) دیمسیله محب افندی خلفی حلمی پاشانک حسن امتزاجندن ومدت مدیده خدمات سلطنت سنیه ده استخدام اولنمش ومقام صدارتده بولنمش حیثیتلو بر ذات اولدیغندن بختله مقابله ایلمشدر .

بروجه بالا روم ایلینک مقاسمه سی تقدیرنده ارناودلق فرانسلو طرفنده قاله رق بوسنه نك آوستریالو طرفنده براغامسی ناپلیونك منویء ضمیری ایدوکنه نظراً بوسنه والیسنک عزل ونصبه فرانسه خارجی ناظرینک سوز قارشدر میس معقول وموجه دکل ایدی فقط فرانسزلر بو اوانده دولت علیه ایله بر طارغیناق چیقاره جق بهانه ارامقده اولدقلرندن امور جزئییه یی وسیله اتخاذا ایدیورلردی وبرده ناپلیون بومقاسمه نك کورلدیسزجه اجراسنی ایستردی حالبوکه بومقاسمه یه مباشرت ایش اولسیدیلر اول طرفلرده علی الخصوص ارناودلقده نصل قیامتلق قوپه جق وارناودلق طاغلیرى نقدر فرانسز یوده جق ایدوکنی اللهدن بشقه کیمسه بیلمزدی لکن ناپلیونك بصر بصیرتی پرده کبر ونخوت بوریمش اولدیغندن عالی نظر حقیقت ایله کوره میوردی .

برایکی آی مقدم سلطان مصطفی طرفندن ایمراطور ناپلیونه اون رأس آت وایمراطور یچه یه شال واقمشه نفیسه دن مرتب بر بوغچه کرانها اهدا وبرأ ارسال اولمغله بو اوانده پارسه بالوصول محب افندی معرفتیه تقدیم اولمشدر .

بومقوله هدایا تزید حب وموالات ایچون اولوب ناپلیون ایسه دولت علیه نك مقاسمه سنی علكساندری ایله قرارلاشدرمش اولدیغندن بوهدایانك هیچ برحسن تأثیری اوله مامشدر .

واقدمجه سببستیانی طرفندن باب عالی یه ویریلان بر قطعه تقریرده انکلتروه لونك قورفهی محاصره ایتمک احتماله مبنی ارناودلقدن قورفهیه مقدار کافی ذخیره کچورملک ودالماجیا اردوسندن افراز اولنه جق درت بیک فرانسز عسکری ارناودلق ایچندن برأ قورفه حداسنه اورادن قورفهیه امرار ایدملک اوزره اولطرفه بر قوجی باشی مأمور بیورلمسی استدعا اولندقده چونکه اولوقتلر طشره لره دولتجه بک مهم اولان ایشلر ایچون قوجی باشی کوندرملک عادت اولدیغندن شایدکه ارناودلغه قوجی باشی

کیتدکده دولتعلیه بورالینی فرانسه لویه ویرمش کی بعض حوادث مدهشه ظهور ایله بین الاهالی فساد و اختلالی موجب اولمق احتمالی ملاحظه اولمقده ایکن تپه دللی علی باشادن وارد اولان تحریراتده قورفدهده کی فرانسه قوماندانی طرفندن کیندوسنه پوتریتونک تسلیمی تکلیف اولمش ایدوکی بیان اولمغله قپوجی باشی ارسالندن صرف نظر اولنه رق قورفه قوماندانک مذکور تکلیفندن شکایتی متضمن و بوجه التماس قپوجی باشی ارسالی خصوصنک تأخیرینه بو تکلیفک سبب اولدیفنی مسین سلطان مصطفی طرفندن بو ائنده ناپلیونه برقطعه نامه هایون کوندرلدی .

برو طرفده سبستیانی پوتریتونک ایستنامسی قورفهنک محافظه سنه مدار اولمق ایچوندر همده مقدهما بوراسی بزم ایدی نه وار بوندن دولتعلیه وازکیویورملی دیو باب عالییه دوستانه نصیحت ایتمکده اولمسیله برابر قورفیه ذخیره وعسکر امرار اولمق ایچون قپوجی باشی کوندرلمسی امرنده اصرار ایلمکده ایدی نهایت قورفیه روم ایلی یقه سندن اون ایکی بیگ کیله خطه و اوچ بیگ کیله یولاف ایله التیوز رأس بقر امرار اولمق اوزره صلحه یادی فقط یته تپه دللی علی پاشا فرانسه لرله حیلله آمیز دوستلق عرض ایتمکده اولدیفنی حالده انکلیرلر ایله دخی مخبره ایددیور دیو شکایتدن خالی دکل ایدی .

اول اوانده دالمایچیا قوماندانی جنرال مارمون قورفیه امرار اولمق اوزره برآبار طرفنه برخیلی جبهه خانه کوندروب بونارک محلنه ایصالی ایچون حکومت محلیه یی تضییق ایتمکده اولدیفنی ائنده تحریرات ایصالنه مأمور اولان چند نفر فرانسه اوغچیلرله برنفر ترجمان بار قصبه سنه کلدکلرنده منازعه چیقاروب اهالی اوزرینه میچ چکمش اولدقنندن انلر دخی سلاحه طاور اتملرله واقع اولان مقاتله ده ترجمان مجروح ودرت نفر اوغچیل مقتول اولمسیله واقدهجه اشقودره متصرفی طرفندن باره قرق بیگ فشنک تسیار واهالینک التون وکמוש کی ماللرینی امین محلارده حفظ و اخفا ایلملری اخطار اولمش ایدوکی حوادثی ایشیدلمکله بوندن صکره ظهوره کله جک وقوعاتدن اشقودره متصرفنک مسؤل طوتلمسی ویاخوداشقودره سنجانغی سواحلنده واقع بعض مواقعک طرفزه تسلیم ایدلمسی لازمدر دیو جنرال مارمون طرفندن دولته انها اولتمشیدی .

بو وقعه سبستیانی طرفندن باب عالییه انها ایله بث شکوی اولندقدده بعده ایجابنه کوره ترضیه لازمه اعطا اولمق اوزره محلندن استعلام اولندی .

بو ماده ناپلیونه اجرای مافی البال یعنی ارناودلغه عسکر ادخال ایتمک ایچون تمام ارادیفنی بروسیله ایدی لکن بو ائنده اسپانیا طرفنه حصر نظر ایلمش اولدیفنه منی بونی

رسمی مکالمه له کچشدرد کدن بشقه مذکور درت بیک عسکرک ارناو دلقدن امراری داعیه سندن دخی واز کچمشدر و سباستیانی دولتی طرفدن عودته مآذون و مأمور اولغله ایراندن عودت ایدن باش سرکاتبی موسیود و بلائشی وکالته یرینه براغوب خلال ربیع الاولده پارسه کیتدی و قبل الحرکه رکاب هایون رجانه شفاهاً و اردوی هایون رجانه تخریراً مصالحه ماده سنک دولتعلیه یه شانلو و انفع اوله رق تنظیمنه ایمر اطورینک تعهد و اقدامی تکرار و حتی بنم پارسه و صلوم مصالحه عقدینک تاریخی اولور دیو افاده و تذکار ایدرک و اولوقته قدر سو یلدیکی یلانر و ایلدیکی هذیانلر اوزرینه بو وعد و عهد لری دخی علاوه ایلهرک استانبولدن رفع ثقلت ایتدی .

نابلیونک دام تزویرینه طو تلمش اولان و روسیه لو یندنه کی ممالکنی بالاده مشروح اتفاق مثک موهوم سایه سنده استرداد ایتمک آرزو سنده بولنان ایران دولتی طرفدن پارس ایلچیبسی تعیین قلنان عسکر خان افشار خلال ربیع الآخرده در سعادت و ورود ایله سلطان مصطفی حضورینه چیقوب تبریک جلوس حقدنه کتورمش اولدینی نامه سنی بعد التقدیم چندروز مرورنده فرانسه جانبنه کیتمش و نابلیون ایسه بو ائنده اسپانیا مسئله سیله فوق العاده مشغول بولند یغندن عسکر خان مأمور اولدینی مصلحته دائر هست و نیست بر جواب شافی اله میوب اودخی محب افندی کبی بر چوق وقت پارسده بیهوده مکث و توقف ایتمشدر .

اسپانیا و قوعاتنه کلنجه بالاده بیان اولدینی اوزره نابلیون پوناپارته پورتکیزه براردو سوق ایله پونکیز قرانی قاجیروب اسپانیاده حکومت ایدن بوربون خانداتی دخی اسپانیادن طرد ایلمک املنده بولنهرق خیر خواهلق وادیسنده اسپانیاه بر مقدار عسکر ادخال ایتمشیدی .

اسپانیا قرالی نابلیونک سوء نیتنه مطاع اوله رق فاملیاسیله برابر اول اسپانیاده واقع اندلس ایالتنه و بعد ضرورت مس ایدر ایسه امریقاده کائن ممالکنه چکلمک اوزره تدارکات لازمه یه تشبث ایتدکده اهالی سرایک بو نیتدن خبردار و بو تقدیرجه کندولری باشسز قاهره فرانسزلرک الیرینه تسلیم اولنجه قلمری مطالعه سیله دوچار آلام واکدار اولدقلمری حالد بو او یغونسزلقدن طولانی پرنس دولاپه یی مسؤل طوته رق قوناغنی محاصره و یغما ایتدکلمری ائنده دولاپه صاوشمش و اهالی انی طو توبده پاره پاره ایدمه مدکلمری ایچون دهها زیاده حرصانوب عصیان و اختلاله قالمشش اولغین دفع اختلال ایچون قرال در حال دولاپه یی عزل ایله تحت محاکمه یه النسنی امر ایتمش و بونک اوزرینه دولاپه میدان چیقدینی کبی اهالی ینه پاره ملک استدکر نده ولی عهدک شفاعتیه قور تارلمش ایسه ده قانلو قاتالار محبسنه قونلمشدر

بونکله برابرینه اختلال برطرف اولدیغندن قرال هم کندوسنی وقایه وهمده قاریسنک علاقه کرده سی اولان دولایه نی تخایص ایچون محرک اون ایکسینه مصادف اولان بیک سکز یوز سکز سنه میلادیه سی مارت افرنجیسنک یکر منجی کونی قرالیتدن استعفا ایتشدرد .

بونک اوزرینه درحال ولی عهد بولنان پرنس فردیناند پدرینک یرینه اسپانیا قرالی اولیجق ناپلیون نزدیکه مرخصلر ارسال ایله فامیلیاسندن بر پرنسس ایله تزویجی التماس ایلمشدر .

اهالی اسپانیا فردیناندک قرالیتدن فوق العاده ممنون اولدیلر ایسه ده دولایه حقننده اولان خصوصتلی زائل اولمیوب بلکه دهها زیاده مشتمد وافزون اولدیغندن سابق قرال وقرالیچه دخی اصحاب فساددن خوف ایدر اولدققرینه بناء وسيق حاله نظراً قرالیتدن استعفايه نادم اوله رق اول ائنده مادریده برکونلک مسافه ده بولنان فرانسز اردوسی قوماندانی پرنس مورایه مراجعت ایله حمایه طلب ایتسی اوزرینه مورامارت افرنجینک یکر می اوچنده اردوسیه مادریده وصول بولدقده فردیناندک قرالیتی طانییوب کندوسنه عادتاً بر پرنس معامله سی ایتمکله برابر پدرینی دخی استعفا سی جبری اولدیغندن بحثله بر پروتستو نامه یازمق اوزره تشویق ایدرک خفياً لندن اومالده پروتستو نامه المش ایدی .

اول ائنده ناپلیون بایون شهرنده ایکن بووقوعاتدن خبر الیدی کبی مادریده ایله مخا بره یه بالابتدار فردیناندی قرالیتی تصدیق ایتدیرمک وکندو فامیلیاسندن بر پرنسس ایله تزویج ایلمک وپدرینی دخی قرالیتده ابقا ایله اوغنلک ظلمندن قورنارمق کبی وعدلر ایله اغفال و مادریده کی آدملی واسطه سیله درلو دسیسه لر اعمال ایدرک ایکسینی دخی نزدیکلک اوزره اقتاع ایتمکله ابتدا فردیناند بایونه واروب ناپلیون ایله ملاقات ایتدکده کندوسنی قرال طانییوب حقننده بر پرنس معامله سی ایتمکله بیچاره نه یه اوغرادینگی اکلامش ایسه ده چه فائده کندو ایاغیاله کلوب دامه طوتلمش اولدیغندن انجام کاره انتظار ایله تجرع کاسه اصطبار ایتمکده بولنمشدر . ارقه سندن پدری دخی غائب ایتمش اولدینگی تاجه تکرار نائل اولمق اوزره فامیلیا سی وفرانسز عسکری معرفتیه محبسدن چیقارلمش اولان پرنس دولایه ایله برابر سکیردوب بایونه کیتمش ومتعاقباً اسپانیاده نقدر قرال متعلقاتی وار ایسه جمله سی بایونه ارسال قلمشدر .

ناپلیون بو وجهله اسپانیا قرالیله بالمله فامیلیا ومتعلقاتی یاننه جلب ایتدکدن صکره سابق قراله فرانسه خزینه سندن سنوی یدی بیجق ملیون فرانق اعطا ومتعلقاته

معاشر تخصیص اولمق شرطیله تاجنی کندوسنه ترك ایتمنی تسکیف وانواع وعد ووعید ایله افتناع ایدرک بومآلده کندوسنه برسند امضا ایتدیرمش و اوغلی فریدینانده حق وراثتدن فراغت ایتمنی تکلیف ایتدکده هر تقدیر امتناع ایتمش ایسه ده الی باغلو و جگری داغلو بی یار ویاور قالمش اولدیغندن چاره سز اودخی سنوی کندوسنه برملیون فراتق ویر ملک اوزره استعفا نامه سنی ویرمشدر .

ایشته ناپلیون بویله دسیسه کارلقله اسپانیا تاجنی دخی اننه الوب ناپولی قرالی اولان برادری ژوزفی اوائل جمادی الاولاده اسپانیا قرالی نصب ایله بایونده تجمع ایتدیردیکی اسپانیا معبران متی مجلسنه تصدیق ایتدیردکن صکره برفرانسز اردوسیله برابر مادریده کوندرمشدر .

حالبوکه اسپانیا متی فرانسز لری ولی عهدک حامیسی بیلوب فرانسز عسکرینی نمونیت ایله استقبال ایدرلر ایکن بر وجه بالا فریدینانک مجبوراً بایونه کیتدیکنی کوردکارنده دوچار اندیشه واضطراب اولوب متعاقباً بایونده اسپانیا نیک استقلالی حقتنده سوء قصد اولندیغنه واقف اولدقلری کی فرانسز لره وعلی الخصوص ناپلیونه فوق العاده حدتلمشدر و اسپانیا نیک اصیلزادکان و اصناف طاقلری کندو ملتلی حقتنده اجرا اولنان بویله بر معامله خود بینانه اوزرینه منکسر انخاطر اولملریله برابر افراط اوزره اظهار مخالفتدن دخی تحاشی اوزره بولتمشدر ایسه ده افراد اهالی رهبان کروهنک تشویقیله پر آتش غضب اوله رق وطن و مذهب وقرالری نیک محافظه سی ایچون هر نوع فداکارلغه حاضر لاندیلر .

و بر وجه بالا فریدینانده ایله پدرینک عزیمتلرندن صکره بتون قرال فاملیا سنک بایونه اعزازملری ناپلیونک سوء نیاتی میدانه چیقارمغله مایس افرنجینک ایکسینده مادریده اهالیسی ایاقلا نوب فرانسز لره اوزرینه هجوم ایتدکلر نده بر قاچ ساعت محاربه تمتد و بش الی یوز قدری تلف اولدقدن صکره قتنه باصلمش ایسه ده اسپانیولاردها زیاده حدتله نیک اندنصکره تنها بولدقلری فرانسز لری قتل و اعدام ایدر اولدیلر .

نهایت ناپلیونک باشنه انک بیوک بلا اولان اسپانیا مسئله سی ایشته اوزمان میدانه چیقدی . شویله که : مادریده دو کیلان قانلرک سوزشلی خبری هر طرفه منتشر و فرانسز لرک بتون اسپانیایی استیلا و اسپانیولارک سربستی و استقلالی احما ایده جکلری حوادثی قلوب اهالی یه بر صورت مده شهده مؤثر اوله رق هر طرفه بر عصیان عمومی اماره لری رونما اولمش و فرانسز لرک بولندقلری محللرده کی اسپانیا اردولری چند روز ظرفنده اهالی ایله بر لشمک اوزره طاغلمش ایدی .

بو عصیان عمومی نیک اوکنی المق ایچون اسپانیاده سکسان بیک فرانسز عسکرلی موجود

ایسه ده بونلرک عموم قوماندانی اولان پرنس مورا اسپانیا قرالیتی کندویه ویر یله جک ظنیه ابتداری فوق العاده غیرت کوسترمش ایکن صکره دن ژوزفک اسپانیا قرالی نصب اولنسیله بو امیدینک بوشه چیقدیغنی کوروب مایوس اوله رق خسته لمغله فرانسز اردولرینک حسن انضباط واداره سی بر درجه تنزل ایتمشیدی . مایس افرنجینک یکر میسنده اسکی اسپانیا قرالیله اوغنک استعفا نامه لری نشر اولندقده اهالی به تعریف اولنماز صورتده سوء تأثیری اولدی وهان آستوریا ایالتنده بالجه اهالی ایاقلنه رق بر حکومت موقته تشکیل ایله مذکور استعفا نامه لرک هیچ مقامنده طو تلملرینه قرار ویرلدی و فرانسه لویه اعلان حرب ایله صیقی صیقی به تدارکات حربیه به تشبث ایلدی و مواقع مهمه طوتیلوب یولار کسلدی وانکلتره دولتیه عقد انفاق ایچون لوندره به مر خصلر کوندرلدی و عسکری صنفی دخی اهالی ایله برابر اولدیغدن عصیان در حال قوت بوله رق پک آز وقت ظرفده بتون اسپانیای قاپلادی و مایسک او اخرینه طوغری سراپا اسپانیانک هر طرفنده فرانسزلر عیهنه محاربه صدالری ایشیدلمکه ورحم وشفقت بر طرف ایدیله رک فرانسزلر زرده یالکنز بولنور ایسه بلاسؤال اعدام ایلمکه باشلادی .

حزیران ایچنده ناپلیون بابونده ایکن بو حالره آگاه اولوب بغیر حق و بلاسبب بر ملتک استقلال وحریتنه طوقومغله بیوک خطا ایتدیکنی بووادیده پک یا کلش بر یوله کیتدیکنی اکلادی لکن کیرو دونمکه عار ایدرک ظهور ایدن مشکلاته غلبه ایتکی شان و ناموسی اقتضاسندن عد ایلدی بونک اوزرینه اسپانیاده کی جنرالرینه تعلیمات متعدده کوندردی واله کچن عساکر عصاتک همان قورشونه دیزملری ایچون امر ویردی .

فرانسز جنراللری دخی مرکز عصیان اولان بلده لره دهشتلو هجوملر ایتدیله و سیل کی قانلر اقتدیله ایسه ده نلرک بویه شدتلری آتش عصیان ده زیاده علولندیردی و اسپانیولار بیوک میدان محاربه لرنده فرانسزلر له باش ایده میه جک کربنی درک ایدرک اوفاق اوفاق فرقه لره انقسام ایله فرصت بولدقه فرانسزلری اوروب اعدام ایتک و فرانسزلر قوتلو کلورسه بر طرفه صاوشوب کیتمک مسالکنه دوام و فرانسزلر دخی بر نوع جنکیزلک یولنده وحشیانه خونریزک اصولی التزام ایدوب انجق بو حالک امتدادی فرانسزلی پک زیاده شاشیردی .

ناپلیونک برادری ژوزف مادریده واردقدن صکره عموماً اهالینک نفرتی واقچه و عسا کرجه اعانه و امداده محتاج اولدیغنی ناپلیونه بیدیرمش و اهالینک محبتی جلب ایتک اوزره فرانسز جنرالرینک مرحتسز لکنندن شکایت ایلدیکنه منی اردو ایله

کندوسنک اره سنه برودت و مبانیت کیرمش ایدی ناپلیون دخی ظهور ایدن عصیان عمومی به قارشو اسپانیاده کی قوه عسکر یه نك کافی اولدیغنی اکلامش ایسه ده ایتالیا و دالماسیا و لهستان و المانیاده کی اردولره طوقو تمق هیچ ایشنه الویرمدیکندن عظیم اندیشه واضطرابه دوچار اوله رق همان ژوزفه جسارت و یرمک و جنرالرینه صیقی تعلیمات کوندرمک ایله مشغول اولدی عصیان و اختلال ایسه کوندن کونه شدت و قوت بولدی و طرفینک یکدیگره خصومت و عداوتی ارتوب اول مرتبه دهشت انکیز مقاتله لر و اول قدر و حشیانه معامله لر وقوعه کدی که برقاچ جلد کتاب یازمغله تعریف اولماز و یالکیز فرانسز عساکرینک مشهور قرطبه شهرینی نصل غارت و تخریب ایتدکاری و دائره اطاعتدن و حدود انصاف و انسانیتدن چیقوبده و حشیانه و غدارانه نقدر جانلره قیدقلری و اهالیسنک عرض و ناموسلرینی نه درلو شکست و عجزه و صبیانی نه و جهله پایمال قیدقلری اجمالاً بیان اولنسه یورکلر طیاتماز .

باق شوحریت و مدنیت دعواسنده اولان فرانسزلره که انلرک اطوار و حشیانه لرندن ناشی بویه نیجه خانلر خراب اولدی و نیجه معمور بلده لر آتسه یاندی و الحاصل اسپانیا سرتاسر قانه بو یاندی .

ناپلیون اسپانیانک قوه بحریه سنه زیاده اهمیت و یردیکندن بروجه بالا اسپانیا قرالی استعفا ایتدیکی کبی قادقس ترسانه سنی ضبط ایتمک و اسپانیا دونمسانی اله کچورمک اوزره اول جنبه بر فرقه دونما سوق ایتمشیدی بونلرک قادقسه و صولی او اننده ایسه اسپانیانک هر طرفی اختلال قاپلامش اولدیغندن اسپانیولر ساحلدن طوب ایله مقابله ایتدکاری ائنده انکلین بکلککاری دخی کلوب آچیقندن ابلوکه ایتمکله فرانسه دونمسانی اسپانیولره تسلیمه مجبور اولدیغنی او انده فرانسزلر اسپانیانک جنبه شالیسنده مظفر ایدیه لرده جنبه جنویسنده یعنی اندلس جهتنده بایلن نام بلده پیشکاهنده وقوعه بولان بر بیوک محاربه ده مغلوب اوله رق یکر می بیگ نفر دن مرکب بر فرانسز اردوسی تموز افرنجینک یکر می ایکسینده اسپانیولره تسلیمه مجبور اولدی .

بووقه اسپانیولره نقدر جسارت و یردیسه فرانسزله دخی اولقدر یأس و قنور و یرمکله فرانسز اردولری هر طرفدن فرانسه حدودینه طوغری چکلمکه باشلادیلر قرال ژوزف دخی ارتق مادریده طوره میوب حدوده قریب میرانده بلده سنه چکلی .

اسپانیوللرک اولو جهله ثبات و مقاومتلرندن پور تکیز اهاالیسی دخی جسارت الهرق ایاقلامغه باشلادقلری ائنده ایکی فرقه انکلین عساکر بریه سی اسپانیولره امداد ایچون اسپانیا سواحله نیجه جق اولدقلرنده اسپانیولر درون مملکته اجنبی عسکر صومق ایستیموب انکلینلردن مهمات و ادوات حریبه اخذ و قبولی ایله اکتفا و بو فرقه لرک پور تکیزه



سوق اولمغرینی اخطار ایتملی اوزرینه بو ایکی انکلیز فرقه لری اون بشیک نفره بالغ اولدقلری حالده پورتکیزه چیقوب اهالی ایله برلشهرک فرانسزلر اوزرینه هجوم ایستیلر بو ایکی فرقه دن برینک قوماندانی مؤخرأ و اتلروده مظفر اولوب دوق دوولینکطون دیو شهرت بولان جنرال ایدی برقاچ اوافق تفک محاربه لردن صکره دیرو نام محله واقع اولان برحاربه جسمیمده فرانسز جنرالی ژونو مغلوباً رجعته مجبور اولدیغنه اول ائنده لیزبون لیمانده بولان روسیه امیرالی سنیاویندن استعانه ایستدکه اعانه دن امتناع ایتمش اولوب بشقه طرفدن امداد امیددی دخی اولدیغنه مبنی جنرال ژونو اغستوس اوخرنده انکلیزلر ایله عقد ایلدیکی مقاوله موجبجه پورتکیزی تخلیه ایدرک عسکر واساحه و مهمات حربیه سی ایله برابر انکلیز کیلرینه راکبا فرانسه ساحلنه چیقوب قورتلمشدر بو ائنده اسپانیا دخی کاملاً تخلیه ایلمش اولمسیله ایریا شبه جزیره سنده یعنی اسپانیا و پورتکیز قطع لرنده هیچ برفرانسز قالماشدر .

اسپانیولرک بو وجهله دلیرانه حرکت ایله استقلال و حریتلرینی محافظه یه موفقیتلری ملل سائریه عبرت اوله رق بر حکومت اوزرینه حرکت ایله بر مات اوزرینه حرکتک ییننده نقدر بیوک فرق اولدیغی و برملتک اتحادی نقدر بیوک قوت ایدوکی بومسئله ده پک کوزل اکلاشلدی و فرانسزلرک مظالم و تعدیاتندن بیزار اولان المانیا خلقی بوندن درس آلوب جسارتلنهرک ناپلیونک بیوندیریغی التندن چیقوب قورتلماق افکاری ذهنارنده قوت بولدی .

واسپانیا قرال فامیلیاسی حقنده اجرا اولنان معامله اوزرینه و یانه مجالس و محافظنده ( ایشته اوروپانک اسکی قرال خاندانلری حقنده ترتیب اولنان نیاتک نمونه سی کورلدی اسپانیا قرالی کبی فرانسه ده بر سرایک گوشه سنده اسیر قالمق ایستیمان حکمداران ارتق کوزلرینی آچیلدر ) یولو سوزلر ایشیدیلور اولدی .

اول ائنده فرانسز عسکرینک رومایه کیرمه سی و پایا مالکندن بعض محله لرک فرانسه ممالکنه الحاق ایلدی و پایا برسرایه قنوب پیدرینی فرانسزلرک تعدیاتندن اشتکا ضمننده پروتسو ایتمی دخی اوستریالولرک انفعالی آرتمشیدی .

واوستریا دولتی بروقدنبرو ناچار ناپلیونه دوستلق یوزنده کورینوب حتی دانمارقه وقعسنگ اوروپاچه انکلیزلر علیه نه ایجاب ایلمش اولدیغی انفعال عمومیدن حصه دار کبی کورینه رک انکلتزه دولتیله قطع محاربه ایلمش ایسه ده ینه خفياً انکلتزه لو ایله متحد و فرانسه علیه نه قیام ایتمک اوزره زمان فرصته مترصد ایدوکندن بوکره آچیقندن آچیغه تدارکات حربیه باشلادی و موقع اجرا یه قویمش اولدیغی برقاعده جدیده اقتضاسیجه عساکرینک عددینی یدی سکز یوز بیکه ابلاغ ایلدی .

ناپلیون تموز افرنجینک یکر می برنجی کونی یابوندن چیقوب بعض موافقی طولاشه رق  
 واسپانیا ایشلرینک معکوس و منکوس کیتمسندن طولای حاصل اولان تأثر و انفعال  
 درونسنی مکتوم طوته رق اغستوس افرنجینک اون دردنده پارسه کلوب فرداسی  
 یوم ولادتی اولق حسیله بتون سفرائی نزدیکه قبول ایتدی و روسیه دولتی  
 طرفدن آلدینی خبرلر هپ اتفاقک بر کمال اولدیغنه دلالت ایتمکده اولدینی حالد  
 اوستریا دولتنک بو حاضر لقدن مرامی نه اولدینی اکلامق اوزره اول کون سفرای  
 سائر ایلر برابر تبریکه کلان اوستریا ایلچیسى متریکه خطاباً (ینه بزمله جنک ایتک  
 نیتنده سکز یاخود بزى آلداتمق ایسترسکز) دیجک متریک کندو دولتنک بویه  
 بر نیتی اولدینی بیان ایتسی اوزرینه (اویله ایسه بوقدر تدارکات حربیه ندرکه  
 بتون اورویایی تلاشه دوچار و امر مصالحه یی مخاطره یه گرفتار ایده یور مالیه کز  
 دخی خراب اولوب کیده یور) دیسنه جواباً متریک بو تدارکاتک تحفظی اولدینی  
 بیان ایتدکده دخی (دیدیکک کبی تدارکات حربیه کز یالکز تحفظی اولسیدی اوقدر  
 تعجیل اقتضا ایتدی یکی بر قاعده ایجادینه آشیت اولدینی حالد تلاشدن عاری  
 اوله رق وقت مناسبی کوزه دلمک لازم کلور و آهسته آهسته یامیلان شیده ائی اولور  
 اما مهمات و ذخیره تدارکی و عسکر جمی و حیوان علی الخصوص طوپ آتلی  
 اشتراسی کبی تدایره مسارعت اولغاز اردو کز در تیوز بیک نفر دن عبارتدر بر  
 اوقدرده احتیاط عسکر یکز وارد سزدن اورنک آله جق اولسم موجود عسکریمه  
 در تیوز بیک نفر دها علاوه ایتلی یم بوده عاقلانه بر حرکت اولماز و بوقدر عسکره  
 محتاج دکلم بیوک اردومی بر هیئتلو هیئتمده طومتق و اسپانیا یه یوز بیک نفر معلم عسکر  
 کوندرمک ایچون اکیوز بیک نفرات جدیده تحریر ایلامک کافیدر بناء علیه سزدن  
 اورنک آلمه جقم زیرا سزک قاعده کزه رعایت اولمق لازم کسه چوق کچمز قاریلری  
 و چوققلریده سلا حلالدر مغه مجبور بولنوروز و باربارلق زمانلرینه عودت ایتمش  
 اولوروز بونکله برابر مالیه کز پریشان اولمده و قامیولر یکز تنزل و تجارتکز تدنی  
 ایتمکده در بونلره سبب ندر سزدن برشی ایستدی سنجاقلر یکزک بر یسنه کوز  
 دیکدمی پترسبورغ عهدنامه سی ایکی دولت بیننده اولان معاملات بر نظام ویرمشدر  
 افدیکزله اولان ملاقاتمه بکا سویلمش اولدینی کلاملر ایکی حکمدار میاننده هیچ  
 بر غرض و دعوی بر اقامشدر یالکز بر اونو و ایزو نزو قضالری کیفیتلری قالمشیدی  
 آنلرده ۱۸۰۷ سنه سی تشرین اولنک اوننده یامیلان فونتبیلو مقاله نامه سی ختام  
 ویردی راحت و امنیت بخش اوله جق معامله دن غیرى سزدن برشی ایسته نم  
 آره مزده هیچ بر کونه مشکلات واری وار ایسه سویلیک که در آن حل ایده لم)

دیگله متریک ینه تبرئه ذمه قیام و دولتک حرکت تعرضیه نیتنده اولمدیغنی اثبات ایچون هیچ بریده عسکر تجمعی واقع اولمدیغنی بیان ایتمکین ناپلیون تکرار کلامه آغاز ایله (یا کیلورسکنز غالیجیاده و بو همیاده جسم ار دولر تجمع ایندیرلمکده در نهایت بن دخی مجدداً اردولر تشکیله و سیزلیاده کی قلعه لری هدم ایده جک ایکن احکام واکماللرینه و مجتمعه رین اردوسنک جلینه و الحاصل حال سفری یه دوکلمکه مجبور اوله جغ بیلورسکنز که بنی غافل آولایه مازسکنز هر آن تدارکلی می بلکه روسیه ایمراطورینه کووه نورسکنز لکن یا کیلورسکنز زیرا مشارالیهک بکا موافقتی و سزک تدارکاتگری تصویب ایتمدیکنی و بوکا دائر اولان تصمیماتی بک اعلا بیلورم واکر بو خصوصه بر شبهه م اولسیدی در حال سزه و روسیه یه حرب اچاردم زیرا مصالح بریه اوروپایی شبهه التنده براقق ایستهم یالکنز تدابیر احتیاطیه ایله قناتم اوروپانک حالندن و روسیه نیک نیتلرندن کاملاً امین اولدیغ ایچوندر فرانسه اوزرینه هجوم ایده جک وقت فرصتدر دیو ظن ایدرسه کز بیوک خطایتمش اولورسکنز و سزک و ایمراطور کزک و عاقل آدملر کزک حرب ایستمدیکلرزه اینانورم لکن المانیا اصلزادکانی وقوع بولان تبدلاتدن منفعل اولوب بتون المانیایی افکار غرضکارانه ایله طولدر مقده درلر سزک ایسه اندن متأثر اوله رق هر کسلی سلاحلندیروب اضطرار بکنزه خانی حصه دار ایدرسه کز بو کیدشله بر حاله واره جقسکنز که اول حالده طور مق قابل اولیوب نتیجه سی محاربه اوله جقدر احوال حاضره کزدن قورقوم بودر تکرار دیرم که سزدن برشی طلب ایتم محافظه مصالحه و معامله مصلحانه دن بشقه سزدن برشی ایستهم فقط تدارکاته دوام ایلر سه کز مقدمکی محاربه لرده مشاهده اولنان تفوق و تفاضلمک باقی اولدیغنه اصلا شک و شبهه بر اقامق ایچون بنده تدارکات عظیمه یه تشبث ایلم کیدرک ابقای مصالحه ضمننده حربی دعوت ایتمش اولورز) دیو ختم کلام ایتمشدر و اوستریانک نیت حقیقیه سنی کلامق و برادری ژوزفک اسپانیا قرالیتک تصدیقی اوستریالویه تکلیف ایلمک اوزره و یانه ده کی ایلیچیسنه تعلیمات کوندر مشدر .

اول وقته دک پروسیانک اکثر ممالکی فرانسه عسکرینک ضبطنده بولنوب تخلیه سی تضمیناتک ایفاسنه معلق ایکن اسپانیا و قوعاتی اوزرینه قوه حربیه سنک طوپلانسی لزومنی درک ایله ناپلیون تضمینات حربیه نیک بر مدت معینه ظرفنده ایفامی و پروسیا قرالینک قرق سکنز بیک نفردن زیاده عسکر بسامامسی و اوستریا ایله محاربه ظهورنده فرانسه ایله متفق اوله رق اون ایکی بیک نفردن مرکب براردو و یرمسی شرائط خفیه سیله فرانسه عساکرینک پروسیا ممالکنی تخلیه ایلمسنه دائر اشبو ( ۱۸۰۸ ) سنه میلادیه سی اغستوس فر نکینسک او اخرنده بر مقاله نامه امضالمشدر .

ودولت عليه نك صورت مقاسمه سنه قرار ويرمك اوزره روسيه ايمراطورى  
 علكساندرى كندوسيله كورشمك آرزوسنده بولنديغندن ناپليون بوكره پارسه  
 عودت ايتدكده شهر ايلول ايچنده ارفورت بلده سنده علكساندرى ايله ملاقات  
 ايتك اوزره قرار ويرمشدر .

چونكه ناپليون دولت عليه نك بقاسندن نااميد اولدينى جهته بوجه بالا ممالك  
 عثمانيه و هيچ اولماز ايسه روم ايلي قطعه سنى ايتديكى كى مقاسمه يه قرار ويرمشدى  
 و فى الواقع دولت عليه اولوقت بك مخاطر لو بر حاله گرفتار اولمشدى حالبوكه  
 صون صمدانى ايله اولوقت قدر يك چوق ورطه لر كچورمش اولدينى كى بوتلهكلو  
 حالى دخى آشوره جق ايدى و اولوقت روم ايلده كى قوه اسلاميه قولايقله پايما  
 ايدياه مز ايدى .

اول عصر لرده عثمانلوك درجه قوت و مكنتنه شودليل كافيدر كه روم ايلده سرسرى  
 كزن عثمانلوك بر مقدارى مصره واروب كوله منلره غلبه و سواحل مصريه دن  
 انكازلرى طرد ايله محمد على پاشانك مصرده بر حكومت قويه تشكيل ايتسنه سبب  
 اولديلر و روم ايلده بويه فداركار و جنكاور بك چوق يكتسار وار ايدى  
 فقط دولتك گرفتار اولدينى انتظام سزلق انلوك حسن اعمالنه ميدان ويرميوردى  
 روسيه لولر طونه نك برو طرفه كچدكلى كى بو مثللو عثمانلور هپ علمدارك باشنه  
 طوپلانوب محافظه وطن اوغورنده بذل جان ايده جكلر و بوتقديرجه بر محاربه  
 دينه آچلمش اوله جغه مبنى انطوليدن دخى دين اوغورنده غازى ياخود شهيد  
 اولمق نيتيه بك چوق فدايلر روم ايلي به كيده جكلر ايدى .

بو حالده روسيه لولر طونه خطى ضبط ايتدكدنصكره بالقان خطى دخى كر كى كى  
 استيلا ايدنجيه دك خارج از تخمين تلفاته دوچار اوله جكلر و نهايت طونه ايله بالقان  
 آره سنده بر معمور كوى بيله قالموب بورالرينى سراپا بوش و خراب بوله جكلر ايدى  
 آوستريالوك بوسنده دوچار اوله جكلرى مدافعه و مقاتله لر دخى بو طرز اوزره  
 اولوردى و اك بيوك بلايه فرانسلر اوغرايه جق ايدى و روملوك كندولره اتباع  
 و اعانه سيله موره ايالتى استيلا ايدى و بر سه لرده ارناودلقده اوغرايه جكلرى طاغ  
 محاربه لرندن چيقوب قور تلملرى مشكل ايدى زيرا اوروپا عساكرى او قدر صرپ  
 طاغرده لايقيه ايش كوره مز و فن حرب اوزره ترتيب ايده جكلرى مناوره لر  
 اوبله طاغ محاربه لرنده بوجه مطلوب ايشه ياراماز ايدى واقعا ناپليون يوز بيك  
 عسكر كوندرونده ارناودلنى ضبط ايدر م ديو مقدا محب افندي يى اخافه ايتمشدى  
 لكن بونده ياكشى وار ايدى مواقعك احوالى و اطوار و افكار اهالى معلومى

اولمديغندن ارناودلغی ایتالیا نك برقطعه سنه قیاس ایده یوردی بوايه قیاس مع الفارق ایدی ملتدن ملته ومملکتدن مملکته تقدر چوق فرق وتفاوت اوله بيله جگنی صکره کندوسی دخی اسپانیا وقوعاننده تفهم ایدر اولدی ظن ایدرم .

حتی بواوانده سباسبستیانی استانبولدن پارسه عودت ایتدکده ناپلیونه تقدیم ایتمش اولدیغی لایحه سنك خلاصه سنده دیرکه دولت عثمانیه صحیحاً جان چکشمکده دینلسه جائز در فقط بوحال پک اوزون سوره بیلور شهرت عتیقه وعادات قدیمه ومسلمانلرک مرکز روحانیلرینه اولان تبعیت طبیعیه لری روحانی براختلاف اولمدخه تمتد اوله رق ایالتلرده کی باشالر مستقل اوله مازلر وحکومتی کندو فاهلیلرینه کچوره مزلر وروسیه وفرانسه دولتلرندن قفقسی اولسه ترکستانی استیلا ایده بیلور لکن تملک وتصرفی قولای دکلدز زیرا دین اسلام عثمانلوری خرسیتیانلردن تفریق وتبعید ایلمشدر . غیرت دینه بی شهادت در جه سنه کوتوررلر وکرك ضبط اولنان یرلرک وکرك مجاور اولان ایالتلرک اهل اسلامی عسا کر مهاجه ایله جنک وجدالندن خالی اولمازلر . بناءً علیه انلری بتون بتون محو ونابود یاخود ترک دیاره مجبور ایده جنک مرتبه ازملک لازم کاور فی الواقع دینجه ومذهبه ایچلرینه اختلاف واختلال دوشوروبده سائر ملتله آرهلرنده کی سد وپردلر قالدیرلسه اول حالده اله التملری قابل اولور لکن ظنمه بوده پک کوجدر . انتهى

شوحاله کوره مصمم اولان مقاسمه نك اجرانسه قیام اولندیغی کبی روم ایلیده اسپانیا محاربه سنه شبیه ودها شدید ومدید وتیجه سی مجهول محاربه ومقاتله لر ظهور ایده رک هر طرفدن حسابسز آدملر تلف اوله جتی درکار ایدی بوصورتده روم ایلی قطعه سی هرج ومرج اولوب بودخی هر فصل اولورسه اولسون استانبوله یا قلاشمق امانده اولان روسیه لونک پولتیقه سنه اویار ایدی اما فرانسه پولتیقه سنه اومیه جتی امر آشکار ایدی بناءً علیه ناپلیون روم ایلی نك مقاسمه سنه قرار ویرمش ایکن ینه ترددن قورتیه میوب تائی اوزره کیتمکده ایدی علی الخصوص اسپانیا وقوعاتی اوزرینه دها زیاده ترده دوچار اولدقن بشقه آوستریالونک تدارکات جسمیه سی پولتیقه نك رنگنی خیایجه دکشدرمش ایدی .

بروجه بالا ناپلیون بایونده ایکن محب افندی اره صره روسیه مکمله سنه نه وقت باشلانہ جق دیو فرانسه لو طرفدن سؤال ایتدکجه قریباً ایمپراطور کلور ومصالحیه قرار ویریلور دیو آوودلقده ایدی حالبوکه ایکی ایمپراطورک اره سنده جریان ایدن متاواتل ومخابرات خفیه معلوم دکل ایدیه ده سیاق وسباق احواله نظراً دولت علیه حقنده سوء نیتلری اولدیغی اکلاشدیغندن ایمپراطور ناپلیون پارسه کلسه دخی

روسیه ایلیچینسک تعلیقاتی کلدی پترسبورغ ایله مخبره اوزره یز یوللو سوزلرله استدکاری قدر اصرار اوقات ایله جکلری درکار و کوزتدکاری وقت فرصت الو یردیکی کبی بهانه بولمق (مثلاً بارقبه سنده اوچیالارک اتلافی) کبی بر مادهی وسیله اتخاذا یتمکن کندولرنجه سهل اولدیغی امر آشکار اولمقدن ناشی دولت علیه جه وار قوتی بازویه کتور و بده کندوسنی محافظه ایچون اسباب ممکنه یی تدارک واحضاره چالشمقدن غیری چاره وجهت نجات اولدیغنی محب افندی اکلامش و دولت علیه به دخی اشعار ایلمش ایدی عقلای و کلا دخی بودقائقی تفهم ایدوب مع مافیله طرف دولت علیه دن برسرشته ویرلماکه چالیشلوردی فقط روسیه لو مملکتینده فعلاً متارکه نیک تمیدینی اعلان ایله برابر بغدادن جاننه یکیدن یکبی به عسکر سوق ایتمکه اولمسیله بویله سندسز بر متارکه صورتی رونما اولدیغنه بر حکم ترتب ایتدیر یله میوب کیفیت محب افدیدن لدی الاستعلام (آوروپانک اصولی شمیدیکی حالده نه صورت کسب ایتدیکی یعنی مقدملری معلوم اولان موازنه دول و قانون ملل و حقوق بشر کلیاً مانعا عن العمل اولدیغنی بوماده ایله دخی ظاهر در بویله مسبوق بالمثل اولیان بر مادهیه نه حکم ترتب ایتدیر یله بیلور) دیو جواب یازمشدر . و بو ائنده محب افندی شامپانی ایله لدی الملاقاة هنوز روسیه مکمله سنه مباشرت اولنه مامسندن طولانی شکایت ایتدکده شامپانی (بو او انده دولت علیه نیک انا طولیدن ایچه عسکری گلش ایسه ده طونه یالیسنده قلعه مستحفظلرندن بشقه انجق یکر می بیک عسکری واردر روسیه لونک ایسه اول حوالیده اولان درجه قوتی رعنا بیلورز حال بویله ایکن امپراطور یز روسیه لوی محاربه ایتمامک اوزره ارضا ایلدی ایشته مصالحه بونک ایچون تأخر ایتمشدر) دیو جواب ویرمشدر .

اسپانیا مسئله سنک ظهور ندنبرو فرانسزلرک دولت علیه حقنده اولان معاملهری بر مرتبه ملایمت کسب ایتدیکندن محب افندی ناپلیونک تکثر غوائلنه دعا ایتمکه ایکن بروجه بالاتبیریک ولادت کونی ناپلیونک مترنیکه حرارتلی حرارتلی سوزلر سویله دیکنی کوروب آوستریا دولتیله میانه لرنده مابیت اولدیغنه استدلال ایله بر پارچه منشرح البال اوله رق استکناه حال ایچون مترنیک ایله روسیه ایلیچینسک اغزلرینی یوقلامش ایسه ده سر رشته اله مدیغندن هم اغزار اوق همده کندوسنیجه مقصدا صلی اولان مصالحه ماده سنی صور مق اوزره شامپانی ایله کوریشوب ایشک تأخرندن شکایت ایتدکده اودخی تبه دللی علی پاشا حقنده اولان شکایتلرینی تکرار ایله برابر (روسیه لوسزندن افلاق و بغدادنی و دیگر بعض بلدانی ایستیور بونک ایچون پترسبورغه قوریر چیقارلدی باقلم جوانی کلسون) دیوینه لیت ولعل ایله امرار وقت ایتمه یولنی طومشدر .

اول ائناده ايسه استانبولده ينه بروقه جسيمه ظهور ايله تجدد سلطنت وقوع بولهرق احوال وافكار بتون بتونه تبدل ايتشيدى بونك تفصيلاته كيرشمزدن مقدم اجمالا اول وقت دولت عاليه نك نه وضع وطورده بولنديغنى بيان ايدلم .

\* اجمال احوال حاضره \*

دولت عليه فى الاصل برهيتت عسكريه اولوب مات اسلاميه دخى على العموم عسكرو اولديغندن هر زره فرمان كوندرلسه الى سلاح طوتان اهل اسلام دين اغورينه جهاد وغزائيتيله سكر دوق موقع حربيه كيدرلردى واسلاف سلاطين عثمانيه بالذات اردوى هايون ايله سفر ايدرلردى صكره لرى صدر اعظملىر سردار اكرملك عنوانى الهرق اردوى هايون ايله كيدر اولديلىر وسردار اكرم ايله هيئت دولت حركت ايدر ك ركب هايونده يعنى استانبولده وزيران برى صدارت عظمى قائممقامى اولوب قالدېغى كېي مناصب ديوانيه رجالنك دخى برر و كيللرى بولنوردى فقط هر ايش اردوى هايونده كور يلوردى صكره لرى بووكلتلىر كسب اهميت ايدر ك اكثرثيا و كيللر اصلارندن دهانفوذلى اولمغه واردوى هايون ماموريتلرينك اعتبارى تنزل بولمغه يوز طوتدى .

بو طريق ايله سردار اكرم اردوسنك معنوى اعتبارى تنزل ايتديكى كېي رفته رفته ماده دخى قوتى بك چوق تنزل ايتشيدى . زيرا سردار اكرم اوامرى ممالك محروسه نك هر طرفنده جارى اولهرق هر سنجاعك عسكرى ايتديكى محله سوق ايدر وباجمله واردات دولت النده اولديغندن اداره عسكريه اچون بر طرفه مراجعته محتاج اولماز ايكن صكره لرى ممالك محروسه نك چوق يرلرى متغلبه النده قالمغله اردوى هايونه ايتنلديكى قدر عسكركلر ومرتبات خزينه تحصيل ايديله مز اولدى .

شويله كه : غرب اوجاقلرى فى الاصل ايالات ممتازه دن اولهرق بولردن خزينه بيت الماله چندان فائده اولمازدى .

مصر ايالتى كوله منلرك ايدى تغلبنده اولوب بوائناده محمد على پاشا انلره غلبه ايدر ك بروجه بالا امراى الفيه يى جلب ايله معيتنده استخدام ايدر اولدقدن بشقه اشبو يكرمى اوچ سنه سى اوائلنده ديكر فرقه لرى ايله دخى باريشوب بعض شرائط ايله انلرك صعيد اچينده اقامتلىرينه رضاء طرفين ايله قرار ويرلشيدى حتى امرادن مرزوق بك ايله محرمه جى سايم بك مصره كمشلر ايدى وخلال ربيع الاولده امراى مراديه نك رئيسى اولان شاهين بك فوت اولمغله يرينه بو فرقه يه رئيس اولمق اوزره محمد على پاشا طرفندن سايم بكه خلعت كيدرلدى

و مرزوق بکه صعيد امارتی و يرلدى الحاصل مصرده امنيت عموميه عودت ايلمش  
 و صعيد يولى آچيلوب مصرک ذخيره جه مضايقه سى بر طرف اولمش و محمد على  
 پاشانک قوتی کوندن کونه تزايد ايتمکده بولمش ايسه ده بتون بتون کوله من  
 غائله سى بر طرف ايديله مامش ايدى قالدیکه امرای مصر يه ضعف کدکجه آنلرک  
 يرينه محمد على پاشانک سر کرده لری کچوب بوندن جانب ميرى اچون مطلوب  
 اولان فائده حاصل اوله ميوردی و برده محمد على پاشا استکمال قوت ايتسه دخى  
 و هابيلر اوزرينه مأمور اولديغنه مبنی روم ايلده کی اردوی هايونيه بر فائده سى  
 اوله مازدی حالبوکه هنوز و هابيلری تاديب ايده جک قدر قوت بوله مامشیدی .  
 قالدیکه و هابيلرک حر مبنی استیلا سیه طريق حجک انسدادی ملت اسلاميه نك عظيم تأثر  
 و انفعاله بادی اولمشیدی و حر مین اهاليسندن بر چوق ذوات کرام ترک وطن ايدرک  
 کیمی شام و مصره و کیمی استانبوله کلوب و هابيلرک سيئاتندن بختله بث شکايت  
 ايده کدککلرندن دولت عليه مضطرب و متحير ايدى مع هذا غرب حجاجی مصر دن  
 کچوب کيدر و ايفای حج ايله عودت ايدر اولدقلرندن گروه متعصين اچننده  
 و هابيلرک غيرتی کودن خيليجه کسان بولنوردی چونکه جلد سابعده بيان  
 اولدینغی اوزره مذهب و هابيلنک اساسی شرعاً منهی ویا مکروه اولان بر چوق  
 شيلری شرک جلی اعتقاد ايتمکدن عبارت یعنی امر دينده غلو و افراط تعصب  
 بولنده بر ضلالت اولديغندن و غرب حجاجی مالکی المذهب و سنی الاعتقاد ايسه لرده  
 اکثری حال بدويتده بولنمق حسيله کندولرنده چندان و هابيلرک بدعت ديو  
 اعتراض ايده جکلری آثار و تجملات مدنيت اولمديغندن انلره ثمانعت ايتيورلردی .  
 بعض ناس و علی الخصوص عربستان عالماندن بر خيل ذوات تعصب استيناس دخى  
 و هابيلرک اعتقادجه درکار اولان ضلالتلرندن قطع نظر ايدرک مجرد فرط تعصب  
 بولنده مشهود اولان حرکتلرينه باقوب اجراءات واقعه لرينی تحسین ايلردی بوراسنی  
 ايضاح اچون عبدالرحمن جبرتينک اشوب بيک ايکيوز يکرمی اوچ سنه سى و قايعنی بيان  
 سياقده و هابيلره دائر يازلمش اولدینغی فقره ني خلاصه وجهله بو مقامده ايراد ايدلم .  
 مورخ مومى اليه جبرتی ديرکه رکب الحاج شامی و مصری و هابيلر ناسی حجدن  
 منع ايديه بور ديو تعليل ايدرک منقطع اولدی حقيقت حال ايسه بويه دکدر زيرا  
 و هابيلر طريق مشروع اوزره حجه کلنلری منع ايتديلر انجق محمل و طبل و زورنا  
 و حمل اسلحه کی شرعک تجویز ايتدیکی بدعتلره کلنلری منع ايديه بورلر حالبوکه  
 مغاربه حجاجی کرک کچن سنه و کرک بوسنه کلوب کيتديلر و هابيلر انلره تعرض  
 ايتدی و قوافل حج مصری و شامی حجه کيتمز اولدقلری جهتله مدینه و مکه  
 اهاليسنک مدار تعیشلری اولان صدقه و علوفه و صره لری منقطع اوليجق يالکر



بو یولده ایرادلری اولیانلر قلوب سائری اولاد و عیالار یله وطنلر ندن چیقدیله و مصر و شامه کلدیلر بعضیلر دخی استانبوله کیدوب و هایلردن شکایت و فریاد و اولکی ایرادلرینه و فراشت و کالتی کبی خدمت و وظیفه لرینه نائل اولمق ضمننده حریمیک و هایلر لندن استخلاصی ایچون دولتدن استعانه و استمداد ایدر اولدیله و هایلرک حجره شریفهده کی مجوهرات و مدخراتی الوب کورتور دکلری نی سویله و بونی کبائر دن اولمق اوزره حکایه ایلر ایدیلر بونلری ایسه اغنیا و ملوک و سلاطیندن عقول ضعیفه اسحابی یادنیا حرصی ایله خلفلرینه قالماق ایچون یاخود حوادث روزگار دن مصون و محفوظ قالموبده وقت حاجتده امر جهاده صرف و استعمال اولمق ایچون اورایه ارسال و وضع ایتمشر مرور سنین و اعوام ایله بونلر تزیاید ایتمکده اولدیغی حالده حقیقتی اولیان بر معنی حادث اولدی کویا بونلر نبی علیه الصلاة والسلام حضر تلرینک مالی اولوب ارتق آنلرک بورادن اخذ و استعمالی جائز اولماز دیو ذهنلرده استقرار بولدی نبی علیه الصلاة والسلام ایسه بوندن مبرادر حیاتنده ایکن دخی ادخار امواله اصلا تنزل و رغبت بیور مامشر ایدی واکر بوشیلری رسول علیه السلامه محبة صدقه اوله رق اورایه قوممشر ایسه بو دخی فاسددر زیرا نبی مکرم صلی الله علیه و سلم صدقه آل محمد لایق اولماز زیرا صدقه اموال ناسک اوساخیدر دیو بیوردیلر و نبی هاشمی صدقه المقدن منع ایتدیله مراد ایسه حال حیاتده انتفاعدر یوخسه حیاتدن صکره انتفاع دکلدر زیرا مالی جناب حق امور دنیادن اولمق اوزره یراتمشر و دنیاده قبایح و خبائث هپ مال سببیه حادث اولور فقط مال فی حد ذاته خبیث و قبیح اولیوب محانه صرف اولنور ایسه آخرتده دخی معین اولور و محبت رسول آنی تصدیق و شریعت و سنته اتباعلدر یوقسه آنک او امرینه مخالفت ایتمک و مالی آنک حجره سنه وضع و ادخار ایدوبده فقرا و محتاجیندن مستحقلر نی محروم ایلمک ایله دکلدر واکر بونلری اورایه وضع و ادخار ایدن کیمسه لدی الحاجه امر جهاده استعانه اولمق اوزره حفظ و ادخار ایده یورم دیرسه بوکا جواباً دیرزکه عصر من ملوکنک شدت احتیاج واضطرار لرینی کوردک اعدایه تضمینات اعطاسیله مصالحیه مجبور اولدیله و تحصیل اموال ایچون تجار و رعایایی فقره دوچار ایدنجیه دک تصدیق ایتدیله ینه اول مدخراتدن برشی المدیله بلکه بو حالده دخی اللرنده کی بعض جواهر نفیسه نی حجره نبویه یه هدیه اوله رق کوندروبده امور مهمه لرینه صرف ایتمک لری واقع اولدی بو مدخراتدن اغوات حرم دینلان طواشینک اختلاس ایتمک لرندن ماعداسیله کمنه منتفع اولیوب حالبوکه اولاد رسولدن و علمادن نیجه فقرا آچاقدن اولمکده ایدی نهایت وهابی

مدینه بی استیلا ایتدی ومدخراتی آلوب کوتوردی مرصعاتی بتون صدقلرله  
ظاشیدقلری مرویدر ایچلرنده الماس ویاقوت وزمردایله مزین نیجه قلیجلر وفوق  
العاده آغر قیمتلوشمعدانلر دخی وار ایدی . جبریتینک کلامی بوراده نهایت بولدی .  
الحاصل بو وهابی مسئله سی ماده<sup>۱</sup> ومعنا دولت علیه یه بر بیسوک غائله اولوب شام  
والیلرینک عهده سنده بولنان امارت حاج منصبنک حکمی قالمدی بو وجهله شام  
والیلکننک اسکی اهمیتی زائل اولدی جزار پاشانک خانی اولان سلیمان پاشا دخی  
صیدا ایالتنده یرلشوب کواکشمک ایله مشغول ایدی .

حلبده امیرلر ایله یکیکچریلر ومرعش طرفنده ذوالقدریه ایله بایزیدلیلر غوغالرندن  
ناشی بر وقتدنبرو بورالرک اهلایسی یکدیگری اعدام ایله مشغول اولوب دولت  
وملتک ایشنه یرامازلردی کاور طاغنده وقوزان طاغلرنده ایسه اوتهدنبرو دولتک  
حکمی جاری دکل ایدی .

بغدادده بر وقتدنبرو کوله منلر پیدا اوله رق والینک وفاتنده ایچلرندن بر یسی  
والی اولمق عادت اولغله اوراده دخی تمامیه دولتک نفوذی جاری اوله مازدی  
مع مافیه بغداد والیلرنده دخی اسکی نفوذ واقتمدار قالمیوب بو جهتهله وهابیلر علیه نه  
اوطرفدن دخی بر حرکت قویه کوریه مدی .

ارضروم والیلکی اولوقت پک مهم بر منصب اولوب والیلر دخی جانب باب عالیدن  
عزل ونصب اولنور وا کثریاشرق سرعسکری عنوانیه ممتاز بولنور ایدی . انحق  
بوراسی سرحد اولغله والیلرینک قوتی منحصرأ محافظه موقییه یه مصروف ایدی .  
اناطولینک دیگر طرفلری اوچ خاندان بیننده منقسم اولوب طربزون طرفی  
جانیکلی علی پاشا خانداننده واورته قولی یعنی اماسیه وانکورلی طرفلری جبار  
زاده لرده وغرب طرفی آقوکنر سواحلنه قدر قره عثمان اوغلارنده ایدی بو جهتهله  
اناطولی وقرمان والیلرینک دائره حکومتلری پک طار ایدی قره عثمان اوغلار یله  
جبار زاده لر نظام جدید خصوصنده سلطان سلیم ثالث افکارینه خدمت ایدرک  
نظام جدید عسکرینک خیلیدن خیلی تمکثرینه سبب اولمشلر ایدی لکن بر وجه بالا  
بوسفرده یکیکچر یلردن خوف واحتراز اولسه رق اردوی هایونده نظام جدید  
عسکری بولندیر یله مدیغندن آنلرک دائره حکومتلرنده بولنان عسا کر معامله دخی  
روسیه سفرینه سوق اولته مامشدر جانیکلی علی پاشا حفیدی طیار پاشا ایسه نظام  
جدید دشمنلرندن اوله رق بویولده بیاغی عصیان ایتمکدن ناشی اوزرینه عسکر  
سوق اولغله روسیه دیارینه فرار ایتمشیدی سلطان مصطفی نک جلوسندن صکره  
درسعاده کلوب پک زیاده اعتبار بولدی وبر وجه بالا قائممقام صدرعالی اولدی  
لکن کندو خاندانیهله جبار زاده لر میانه لرنده عداوت قدیمه اولدیغندن آنک

قائم مقامی اوزرینه بوز اوق سنجانچی متصرفی جبار زاده سلیمان بك توحش ایدرك اطاعتدن خروج ایله عصیان ایتمه راده سنه كلدی .

اولوقت روم ایلی دخی باشلوجه درت حكومهته منقسم اولوب قطعه شمالیه سی یعنی طونه یالیسی عامدار پاشا یدنده وجهت جنوبیه سی یعنی مكدونیا قطعه سی سرزلی اسماعیل بكك حكمنده وارناودلنگ بوجه بالا طوسقهلق قسمی تپه دنلی علی پاشانك و كغهلق قسمی اشقودره متصرفی ابراهیم پاشانك زیر دست تحكملرنده ایدی وعلمدارك قوتی جمله سندن زیاده اولوب طونه دن استانبوله قدر حكمی جاری ایدی و یكرمی اوتوز بیک قدر جنكاور و بهادر عسكری وار ایدی واسماعیل بك دخی آنك دائرة اتفاقده بولندیغدن روم ایلینك اكثر اقطارنده علمدارك نفوذی یورردی بوراده چرمن و سالانك و ترحاله كبی الویه متصرفلرینك هیچ اهمیتی یوغیدی و اگرچه اسماعیل بك اختیار برآدم اولوب حرب و ضرب اصحابندن دكل ایدی لکن رعایای خوش طوتار و اعمار ملكه سی ایدر برذات اولدیغنه مبنی اطراف و اكنافدن خرستیان تبعه آنك سایه حمایه سنه التجا ایله زراعت و تجارتی سی اونی ایستكردن زیر حكمنده بولنان بلده لر معمور اولوب بوجهتله كندو دخی بك زیاده غنا و ثروت و روم ایلیجه رأساً بر حكومت صاحبی اولدیغی حالده سائر اعیان و امراذن زیاده اوامر دولت علیه یه حرمت و رعایت ایده كلیكندن نزد دولت علیه دخی زیاده اعتباری وار ایدی .

و كرك موره و كرك آطه لر روملری اوتهدنبرو اتحاد مذهب حسینیه روسیه لویه مائل اولمیرلیه سكسان ایکی سفرنده روسیه لونك تخر بیکله عصیان ایتمشلر ایكن بعد المصلحه ینه دولت علیه یدنده براغلمش اولدقلری و بوكره روسیه لوجزائر سبعه ده یرلشوب روملره بر چوق و عدلر ایتش ایكن جزائر سبعه یی فرانسه لرله ترك ایدرك روسیه دونمسانك بتون بتون آقدكزدن چیقوب كیتیمی جهتلره انلر دخی بو اوانده فرانسه لوطرفه میل ایتمشلر ایدی فقط تپه دنلی علی پاشا انلرك اوزرنده بر بیوك باصقی ایدی مع مافیه خارجدن قنغی دولت اولور ایسه اولسون كندولرینه قوه الظهر اوله جغنی اكلا دقلری كبی عصیانه مستعد و متهمی ایدیلر اما اسماعیل بكك دائرة حكومتده بولنان روملر كندوسندن بك زیاده خشنود اولدقلری جهته دولت دخی او طرفدن امین و مستریج ایدی .

و چونكه مقدما طونا یالیسی ایکی حكومهته منقسم اوله رق بر طرفی ترسنكلی اوغلك حكمنده و دیگر طرفی بازوند اوغلینك النده اولوب نیکبولیده حاجی ایش اوغلی علی اغا دخی ایكینسك اره سنده بر حد فاصل كبی بولنه رق بر طرفدن صیقه شدیر یلورسه

دیگر طرفدن استظهار ایدر اولدیغندن ولوغجه قضاسی اوتهدنبرو کندو کندویه اداره اولنور برحال بی طرفیده بولندیغندن طونه ساحلنده نیکبولی و بلقان جهتده لوغجه قضالری بوایکی قوتک یکدیگریله چاتشمسنه مانع اولوردی . و اولوقت ودین والیلکنک دخی پک بیوک اهمیتی وار ایدی .

ترسنکی اوغلندن صکره علمدار پاشا میدانه چیقوب دها زیاده قوت الدی و دائره حکم و نفوذی وسعت بولدی آنک بووجهله ترقی نفوذ و اقبالی و برطرفدن دخی صرپستانک عصیان و اختلالی حسبله و دین ایالتک دائره سی کوچلدی و پازوند اوغلنه خلف اولان ادریس پاشاده دخی آنک قدرلیاقت و کفایت اولدیغندن ودین والیلکنک اولکی اهمیتی زائل اولدی و اگرچه پازوند اوغلی بقیه سی اولوق اوزره ادریس پاشا یاننده اوچ بیکی سواری و بشیکی پیاده اوله رق سکز بیک کزیده عسکر وار ایسه ده بوقوت منحصر آو دینک محافظه سیله مشغول ایدی زیرا و دیندن بلغراده قدر اولان یرلر عصات صربییه النده قالب روسیه لو دخی و دین قارشولرینه برفرقه عسکریه سوق ایدرک صرپلوره جسارت و یرمکده و بووانده برطاقم پاپاسلر دخی صرپستان ایچینه یاییلوب ( ارتق اهل اسلامک حکمی بتدی بوندن صکره بتون دنیا خرستیان یدینه کچه جکدر اسکی کتابلرده بویله یازیلودر ) یولو مضع و مزور سوزلر سویلیهرک و خرستیانلری محاربه دینه یه دعوت ایلیهرک ساده دلان رعایانک اذهانی اخلال ایله تشدید عصیان و اختلال ایتمکده ایدو کندن ودین جهتی خلیجه دوچار خوف و اندیشه اولمشیدی .

بوسنه ایالتی یرلو بکلر و قتانلر لرنده اولوب والیرک اوامری کاینجی نافذکل ایدی حتی سرای بوسنه شهری ایالتک مرکز طبعیسی ایکن جسامتی حسبله ضبط و ریطنده صعوبت اولدیغندن بوسنه والیرلی اوراده اوتوره میوب تراونیکده اقامت ایتمکده ایدیلر و بوشناقلر علی الخصوص سرحدلر اهالیسی جری و جنکاور آدملر اولوب خرستیانلری ایسه بلغارلرکی مدت مدیده محکومیه مألوف و مجرد زراعتلریله مشغول اولدقلری جهتله اولوقت آنلردن اوقدر خوف و اندیشه اولتماز ایدیسه ده برطرفدن صرپلرک و دیگر طرفدن قره طاغولرک عصیان واره صره بوسنه طرفه تجاوز ایله بعض قصبات و قرانک تحریبنه اجتسار ایتملری حسبله بوسنه ایالتک سار ایالات ایله مخبره سی منقطع کی اولدیغندن و فرانسزلرک دالمایاده تکثیرقوت ایتملری و راکوزه جمهورخی ضبط ایدیورملری دخی بوسنه لوره شبهه و تلاش و یردیکندن اول ائنده بوسنه نک اهل اسلامی علی العموم و طنلرینی محافظه اندیشه سنه دو شمشلر ایدی .

الحاصل ولات و متصرفینک چونغی داعیه استقلالده و برازی یالکز برنام و عنوان

صاحبی اولوب حکمسز و قوتسز برچالده و بوجهتله دولت علیه نك امور ملكيه سی پك زیاده اغتشاش و اختلالده اولدیغندن امور مالیه و عسکریه سی دخی پك ضعیف و قاریشق برحاله دوچار اولدی واکر چه سلطان سلیمك فرط حلم و رخاوتی حسبله آنک دورنده دخی حکومت سنیه پك ضعیف ایدیه ده عقل و فطاتی حسبله ینه قاعده حکمته موافق بر حکومت واری ایدی و هر طرفده او امر سنیه به حرمت و رعایت اولنوردی اما سلطان مصطفانك جلوسندن صکره بو دخی قالمدی و استانبولك حکمی یالکز جوارنده کی قضالرده جاری اوله بیلوب سائر ایالات و الویه دن عسکر النهماز و آنچه تحصیل اولنه ماز اولدی استانبولده دخی ایش شیخ الاسلام عطاء الله افندی ایله چند نفر منفذ متغلبلر النده اولوب سلطان مصطفی پایتختنده دخی امرینی انفاذ ایده مزدی حتی اسکدارده بیوک اسکله نك بعض نظاماتنه نظارت ایتمک اوزره بر خصکی تعیین اولنمشیدی خلال محرمدہ اسکدار او باشندن چند نفر اشته یولداشیر بو نظاماتک اجرا سندن طولانی غوغا چیقاروب بی محابا خصکی بی پاره پاره ایتمشلر در خصوصات و نظامات سائرہ دخی بوکا مقیس ایدی .

سلطان مصطفای ثالث حضر تلی ( اجداد عظامزدن بایزید خان حضر تلی هریری وقف ایلمش سلطان سلیمان خان حضر تلی دخی هر کسی یکچیری ایتمش ) دیو شکایت ایدر مش . بعده سلطان عبد الحمید خان حضر تلی نك عصر نده سرعت طوبیجیلری قشله سی انشا و ( سرعت طوبیجیسی ) نامیله بر مقدار عسا کر جدیده جمعنه اعتنا و ترسانده دخی بر جسم قشله بنا اولنه رق مهما امکان عسا کر بحریه نك ترسانده موجود و مهیا بولمیر ینه سعی اوفی اولنمشیدی مؤخر سلطان سلیم خان ثالث حضر تلی طوبیخانه ده و بک اوغلنده ولوند چقتلکننده و اسکدارده و ترسانده مجدد آقشله لر انشا و عسا کر جدیده ایله املا ایتمشیکن بروجه بالا خلعی انناسنده نظام جدید الغا اولنغله دولت ینه یکچیری النده قالدی و دولت اردوسنک پیاده سی یکچیری در بدرلرندن و سوار یسی بر آرز سپاهی و اسحاب تیماردن عبارت قالوب برده یدی بیک قدر طوبیجی و ارایسه ده بونلر آقدکز و قره دکز بوغازلری محافظه سنده بولنور و زمان حریده ایچلرندن بر مقداری اردو ایله اعزام اولنور ایدی و طوبیخانه عامر ده سلطان سلیم عصر نك معمولاتی اوله رق بر قاچ اردویه کافی طوب و مکمل طوب طاقلری موجود ایه ده جسم اردوی تشکیل ایده جک عسکر هم آرز و همده رابطه سز ایدی .

کچن سنه سردار اکرم حلمی پاشا استانبولدن اون بشیک عسکرله چیقوب استانبول وادرنه جوارندن دخی اون بیک نفر طوپلانندی اناطولیدن کلان

کوکلو نفرات ایله بعض ولات و متصرفینک کوندر دکری عساکرک دخی مجموعی اون بشبیک اولغله اردوی هایونک موجودی کوچ حال ایله قرق بیگ نفره ابلاغ اولندی انلره دخی برایش کوریه مدی و کوریه میه جکی اکلاشدی زیرا درینتی و در بدر مقوله سی اشخاصدن عبارت اوله رق اله آووجه صغر برهیئت عسکریه دکل ایدی وروم ایلیده سردارا کر مک امری نافذ اولدیغندن اردوی هایونک اداره سی علمدار پاشانک همتته موقوف اولدیغی حالده سردارا کر م اولان چلبی مصطفی پاشا ایله میانه لرنده ظهور ایدن برودتد نناشی علمدار پاشا طرفندن وقوعبولان استیقال اوزرینه سردارا کر م سنجاغ شریفی و اردوی هایون رجال و کتبه و خدمه سی بالاستصحاب ادر نهیه عودت ایله اوراده مشتاتشین عجز و مسکت اولدی و بوسنه جرات اره سنده و اواسط مارته امشالی کورلمدک صورتده شدت شتا اولغله استانبولده فوق العاده اودون و کمور صقندی می چکلدیکی کبی ادر نهده دخی خط و غلا اولدیغندن کرک اهالیسی و کرک اردو خلی عظیم مشقت چکمکه اولدقلری حالده ایام بهار کلدی و مدت متارکه منقضی اولدیغندن برآ و بجزاً تدارکات حربیه به تشبث اولتمق لازم کلمکله هر طرفه اوامر اکیده یازلمشیکن مایس اوائلنده هنوز از نیکمید و شیله کبی استانبوله قریب محللردن جزئی عسکر امرار اولغله باشلادی و ادر نهده اردوی هایونک موجودی اون بش بیگ نفره بالغ اولدیغی حالده روسیه نک مملکتینده کی عساکری یوز بیگه قریب ایدی .

اولوقت ترسانه عامر ده طرز جدید اوزره کوزل و مکمل انشا اولمش یکر می ایکی قطعه جسم قالیون و اون ایکی فرقتین و اون ایکی قروت موجود اولدقن بشقه بروقتد نبرو در دست انشا اولان بر قالیون دخی بو ائناده اکمال ایله جمادی الاولانک التنجی کونی بجزه ایندی رلمشیدی و ترسانه جه بونلرک ادوات و مهماتی تدارک دخی قابل ایدی چه فائده که مقدار کافی عساکر بجزیه اولدیغندن یکر می بش قطعه سنک تجهیز و اعمالی مشکل ایدی انلر دخی دوشر مه و ز قافلردن طویلامه و اکثری دکنز حالندن بی خبر نفرات ایله تجهیز اولتمق لازم کلوردی بونکله برابر انلره قومانده ایده جک اصحاب تجربه و معلوماتدن ضابطان بجزیه یوغیدی یعنی دولت عامه نک قوه بریه سی کبی بجزیه سی دخی پک فنا حالده ایدی .

قالدی که معلم نفرات و ضابطان بولنسه بیله هر شینک موقوف علیهی اولان اچقه یوغیدی زیرا بوجه بالا ایالانده نفوذ حکومت سنیه جاری اولدیغندن مراتب خزینه تحصیل ایدیه میوردی و جلوس هایون اوائلنده اعدام اولنان رجال دولتک مخالفتندن التمش بیگ کیسه اچقه قدر حاصل اولمش ایسه ده میراث یدی بکلر کبی

بیهوده یرہ اچھلے صرف ایدیلہرک و پیدرپی زوربالرہ عطیلہر ویریلہرک مبلغ مزبور خرچ اولندقدن بشقہ سلطان سلیمک احتیاطاً ادخار ایلہ وقت حاجت ایچون حفظ ایتمکده اولدینغی یکرمی بیسک کیسهک یالذ التونی دخی بوخلفاتہ الحاق ایلہ خورہ کچورلمش اولدیغندن خزینتہ بیت المال فوق العادہ دوچار مضایقہ و اشکال اولمشیدی .

حتی امور سفریہ بہ صرف اولنہجق اچھ تدارکی قابل اولدیغندن ناچار فاس حاکمندن یکرمی بیسک کیسه اچھہ استقراضنہ قرار ویرلمش و بوکا دائر یکرمی ایکی سنہسی رمضانندہ برقطعہ نامہ ہایون قلمہ الیرلمش ایدی کہ صورتی زیردہ (۹) رقمیہ ایراد اولنور .

بعده کتخدای صدرعالی عثمان افندی اردودن آستانہ کلوب و خانہ فتواپناہیدہ منعقد اولان مجلس مشورتہ داخل اولوبدہ امور مالیه دائر مذاکراتہ شروع اولندقدہ اشبو مخلفات بحثی در میان ایدرک یوسف اغانک ترکہسندن شوقدر فلان و فلانک ترکہ لرندن بوقدر نقود چیقمغلہ مجموعی التمش بیسک کیسه بہ بالغ اولوب کذلک فلانندن شوقدر و فلان فلانندن بوقدر مقاطعہ لر محلول اولمغلہ من حیث المجموع یوز یکرمی بیسک کیسه پی تجاوز ایدر ایکن ایکی ماہ مرور ایتمدین مصارف سفریہ ایچون دولت علیہنک جبل کشادینہ مجبور اولسی ندن نشئت ایلدی دیو وادیء تعریضدہ میدان اعتراضہ بر بیوک طاش یوارلامغلہ ہرکس مہوت و فقط منیب افندی قلنسوہ جنبان تعجب اولہرق واقعا سؤال عظیمدر دیدکدن صکرہ او دخی سر بکر بیان سکوت اولمشدر دوزخیان بکتاشیان ایسہ ہرنہ ویرلسہ طویمبوب (ہل من مزید) کوپان و تکالیف متوالیہ لری حوصلہ سوز تحمل وامکان اولہرق سلطان مصطفی رجالی دخی انلردن بزمش اوصانمش ایدیلر حتی مقر بین مصطفویہ دن بریسی (آہ بوکافرلردن بزدرک بونلرک معاملہ لرینہ طاقت کلز اما برغیری عسکر مز یوق کہ مقابلہ ایدلم بویلہ کیدرسہ پادشاہمز یالکنز بونلرک دفع مضر تلری ایچون برطاقم جدید عسکر تدارکنہ محتاجدر) دیوب بک اوغلندہ واقع طوپچی قشلہ سنی معلم طوپچی تفنکجیسنہ تخصیص ایتمک صورتی دخی صحیحاً جایکیر ضمیرلری اولدینغی منقولدر .

و چونکہ زوربارک ہر ایشہ مداخلہ لری و درلو درلو سوء معاملہ لری حسیلہ احوال دولت پریشان و مطالعہ انجام و عاقبت ایلہ اصحاب رشد و رویت حیران اولدقلر ندن عصر سابق ایلہ دور لاحق بینندہ کوندوز ایلہ کیجہ قدر فرق اولوب سلطان سلیم طرفدارانی شویلہ طورسون سلطان مصطفی بیلہ بونی اعتراف سیاقندہ سلطان سلیم

رجالدن سرکاتبی احمد افندی ایله حاجی ابراهیم افدینک رشده و فطانتلرندن بختله  
ایکیندن بریسی حیاتده اولسه صدر اعظم ایدردم دیدیکی شفاهاً استماع ایدنلردن  
مرویدر و سلطان سلیمک علیهنده بولنمش اولنلردن بعضری دخی نهایت انصاف  
و شهر یار مشار الیهک اوضاع و اطواری قانون حکمته مطابق و حرکات و رفتاری  
مزاج مصلحته موافق ایش دیو کندو خطالرین اعتراف ایدر اولدیله .

دولت علیه نك بویه ضعیف کالده و امور ملکیه و عسکریه سی پک زیاده اغتشاش  
و اختلالده ایکن فرانسلرک ایمپراطوری ناپلیون ایله روسیه ایمپراطوری  
علکساندری بینده ممالک عثمانیه نك مقاسمه سی تصمیم اولنمش و بوحاله نظراً اولوقت  
دولت علیه داخله بحال خطر و مزلقده و خارجاً پک قورقولی بر موقع مخاطره  
و مهلکه ده بولنمش ایدی .

الحاصل دولت علیه داخله و خارجاً پک قاریشق و آتیبی قراکلق برطور منکوس  
و دور معکوسده بولنوب علی الخصوص سلطان سلیمک خلغندن صکره هر طرفی  
امشالی کورلمدک صورتده خوف و خطر بولوتلری استیعاب ایدرک افق پولتیقه  
سلطنت سنیه اولقدر قرارددی که انک عصرندن شکایت ایدنلر اول عصر محاسن  
حصری موم ایله اراردی و سیاق و سباق احواله باقوب هر کس متالم و خلغنه سبب  
اولنلرک چونغی نادم ایدی بناء علیه روم ایلیده کی جمعیت خفیه ارکانی یعنی روسجق  
یارانی ینه سلطان سلیمی اجلاس ایله دولتی مخاطره دن قورتارمنک چاره سنی  
ارامقده ایدیلر .

خیر خواهان سلطنت سنیه نك الك بیوک برکدری دخی بو ایدی که سلطان سلیمک  
اولادی اولدی سلطان مصطفانک دخی جلوسی بر سنه بی تجاوز ایشیکن حرم هایونده  
هنوز حمل اماره لر ی کورلمدی اول ارهلق شهزاده سلطان محمود دخی صرعه علتته  
مبتلا ایش کی خار جسده بعض اراجیف ایشیدیلوردی حالبوکه ملتک اولانجه  
امیدی اکا محصور ایدی و اکا بحال اولورسه یا خود انک دخی اولادی اولمازایسه  
سلاله مسعوده عثمانیه انقراض بوله جق و ملت بیضای اسلامیه بر قراکلق حاله  
دوچار اوله جق دیوهر کس گرفتار یأس و قنور ایدی حالبوکه سلطان سلیم فی الاصل  
انی سلطان مصطفانک زیاده سور ایکن بو کره مبتلا اولدیغی تنهالق و حشتنی دفع  
ایچون انک انس و مصاحبتی سرمایه خاتمه حیات بیلدیکندن و دولتک خلاصنه  
سلطان مصطفاده قدرت و کفایت کوره مدیکندن بو باده اودخی شهزاده مشار الیه  
ربط قلب و حصر امل ایدرک اکا کندو سرگذشتلرینی حکایه ایله قواعد لازمه  
حکومت و سلطنتی او کر تمکده و شهزاده مشار الیه دخی هر درلو عارضه دن سالم



وآزاده وقفصده شاهین کبی پروازه آماده اوله رق معلومات لازمه بی سلطان سلیمدن  
اخذ وتعلم ایتمکده ایدی .

اویله حوادث کاذبه اشاعه سی ظن ایدرمکه سلطان مصطفی مقر بلرینک تصنیعاتی ایدی  
زیرا افکار عامه نك بروجه بالا سلطان سلیم طرفه تمایلنی کوروب و اوبرحیات  
اولدقچه سلطان مصطفی سلطنتک تأسس وتقرر ایده میه جکی اکلا یوب هان سلطان  
سلیمک اعدام وازاله سنی امل و بونک ایچون هر درلوسی وعمل ایتمکده اولدققری  
حالده افکار عامه بی شهزاده سلطان محمود طرفه تمایلدن دخی منع ایچون یارواغیاره  
قارشو دولت علیه حقتنده اویله باعث مایوسیت اوله جق حوادث نشرینه جرأت  
ایتمکده ایدیلر حالبوکه صحیحاً دولتی قورتاره جق انحق شهزاده مشارالیه حضر تلری  
ایدی ( لادافع لقضائه ولامانع لعطائه )

الحاصل برجهتدن سلطان سلیمک حیاتی و برجهتدن سلطان مصطفانک سلطتی  
مخاطره ده ایدی .

### \* مبادئی وقعه \*

بالاده بیان اولندیغی اوزره سلطان مصطفانک مقرینی سلطان سلیمی اعدام ایتدیرمک  
داعیه سنده اولوب بوبابده ابتدا رکاب هایونده کی ارکان سلطتی اقاغه اقدام ونهایت  
موسی پاشایه زیاده ابرام ایتدیرندن اودخی یقه بی قورتارمق اوزره اردوی هایون  
ارکانک معرفی منضم اولدقچه بوایشک اجراسنه جرأت اولنه میه جفی جوابیله  
صاوشدرمشیدی انک اوزرینه از قدیم سلطان سلیمک دشمنلرندن اولان طیار پاشا  
قائم مقام اولدی مقرین خباثت قرین انی کندولرینک بیلوب و بلکه اردوی هایونده  
رئیس الکتاب بولنان رفیق افندی بی کندولرینه مجلوب صانوب همان سردار اگر می  
دخی قاندرمق سوداسنه دوشدیلر .

شوایه که : اشوبیک ایکیوز یکر می اوچ سنه سی محرمی اوائلنده کرک رکاب هایونده  
و کرک اردوی هایونده (لذذ) مواجی ویرلش اولدیغندن سردار اکر مه تشریفات  
سنیه واردوی هایون مصارفی ایچون بیک کیسه آچه کتورمک بهانه سیله و ( بالاتراز  
سیاهی رنگ دیگر نباشد ) زمزمه سیله مقریندن و حرم هایون اغارلندن زنجی نذیر  
اغا ادرنه یه کتیدی و سردار اکر م ایله لدی الملاقاة سلطان سلیمک ازاله وجودی  
ایچون کویا رکاب هایونده اندرون و بیرون رجالتک اتفاقرینی و اجراسی هان  
اردوی هایون ارکانک موافقتلرینه قالدیغنی درمیان بوبابده توافق حاصل اولور  
ایسه صدارت عظمی مسند جلیلتک قیدحیات ایله عهده سنده قاله جفی و فیما بعد

فتق ورتق امور دولته مستقل اوله جغنی طرف شاهانه دن اولوق اوزره وعد  
 و بیان ایندی سردار اکرم دخی علمداری استرقاب ایتمکده اولدیغدن تأیید  
 صدارت خولیا سیله شوریده دل واول غراب الین مشئوم القدمینک سوزینه متائل  
 اولمش ایسه ده بوماده سرکارده اولان رجالک دخی موافقتلرینه محتاج اولمغله  
 انلرکده قلوبنی صید و زنجیر تسخیره بند ایتمک اوزره خنزیر نذیر اولا کتخدای  
 صدر عالی بولنان مورده لی عثمان افندی به بوسری کشف و ایضاح ایله موافقت سوزینی  
 آلمق اوزره الحاح ایدیجک عثمان افندینک عقلی باشندن کیدوب انحق اصلا سر رشته  
 و یرمیه رک آنک مزاجنه موافق مقدمه لرتمهید ایتمکدنصکره (رجال دولت دیدکاری  
 ذوات اوته دنبرو خدمه دولدر و جمله سی امر قویدر و وظیفه لری صادر اولان  
 امری اجرادن عبارتدر موضوع مطالعه اولان ماده ایسه مسبق بالمثل اولان  
 مواددندر بویله مصلحتلرده صدر اعظم و شیخ الاسلام ایله صدور کرام اتفاق  
 ایتمکدن صکره او جاقلونک دخی معرفتی منضم اولوق لازمدر و او جاقلونک موافقتی  
 اولمغجه بومثلاً ایشلر تمشیت بولماز و الا هیچ بریمز ایچون نجات متصور اولماز اما  
 آنلر اتفاق ایتمکدن صکره رجال دولت ایچون تبعیتدن بشقه چاره قالماز) دیو  
 حکیمانله ایشی او جاقلو طرفنه طولاشدره غله نذیر دخی او جاقلونک جلبنه قیام ایلمش  
 ایسه ده آندن اول عثمان افندی یکچیری اغاسیله سائر سوز صاحب لری کوروب محرمانه  
 کندولره ماده نی تقریر و (الحذر ثم الحذر سلطان عثمان وقعه سندن طولانی اوزر یکرده  
 اولان لکهنی هنوز ازاله ایده مدیکر معاذ الله تعالی بوایشه موافقت ایدر سکر او جاغکز  
 لغت ابدیه به مظهر وقهر و غضب الهی ایله زیر وزیر اوله جغنی مقرر در) دیو تحذیر  
 ایتمش اولدیغندن نذیر اهانت سمیر او جاقلو به مراجعت و انواع مواعد ایله کندولرینی  
 بو خصوصه اتفاقه دعوت ایتمکده جمله سی یکر بان اوله رق (حالا دیدیکمز نعمت  
 و کیدیکمز کسوت سلطان سلیم افدمزک آثار عنایتی و دور سلطنتک فیوضات برکتیدر  
 معاذ الله تعالی برقیلنه طوقونمق شوپله طورسون طرفنه بد نظر ایدنلرک خصم جانی  
 اولورز خلی خصوصی دخی جایکی رضه یریمز دکل ایکن هر نصلسه قضارا برشی اولدی  
 هله بوماده قاله دکل قلبه کتوره جک مواددن دکلدر) دیو قطعاً جواب رد و یرملریله  
 نذیر طوکه قالدی و چند روز ادرنه ده اقامتدن صکره مأیوساً استانبوله کلدی فقط  
 آره سی چوق کچمکمزین خزینه دار شهر یاری بشیر اغا فوت اولوب یرینه قاسم اغا  
 خزینه دار اولمغله آنک یرینه دخی بونذیر اغا خزینه و کیلی اولدی .

روسجق یارانای ایسه اعاده جلوس اماننده اوله رق بومقصد خفیلرینی وجوده  
 کتورمک اوزره علمدار پاشانک در سعاده کلسنه رخصت سنیه استحصالی ایچون مقدا

بیان اولدینگی اوزره رفیق افندی بی درسعاده کوندرمشلر ایدی ورفیق افندی درسعاده کلدکده مطلوبی انتساج ایده بیله جک خیلی مقدمه لر ترتیب و تهیه ایتش وریاست کتاب منصیبه دونوب اردوی هایونه کیتمش ایسه ده مقصد اصلی حصوله کلدکن بشقه اول ائنده قائم مقام اولان طیار پاشانک مزاجی معلوم اولمغله سلطان سلیم حقنده سوء قصد وقوعی محتمل و بوجهته آنک قائم مقامی خبر آئدینگی کبی خیایجه خدشه و خایجان درون حاصل اولدیغندن بهر حال آنک درسعادتدن طرد و اخراجی الزم کوریه رک بوکا دائر روسجق یارانای ایه رفیق افندی اره سننده مخبرات خفیه جریانه باشلامشیدی و بونک اوزرینه رفیق افندی صدر اعظم ایه طیار پاشانک اره سنی بوزمغه قیام و (طیار پاشا برآی قائم مقاملده قالورسه صدارته کله جکینده اشتباه یوقدر همان استانبولدن دفعی چاره سنه باقلملیدر) دیو صدر ساده درونی الزام ایدرک فی الاصل قضاتدن ایکن طریق خواجکانی به دخول ایه رئیس کیسه داری اولان سنبل زاده عبدالباقی افندی او جاق طرفنه محرمانه مکتوب و طرف سلطنته تلخیص خدعه اسلوب ایه استانبوله کوندرلمش و اودخی کندو مصالحتی کورمک بهانه سیله استانبوله کلدکده شیخ الاسلام عطاء الله افندی ایه طیار پاشا اره سنده مبانیت و عداوت و وقوعی هنکامنه تصادف ایلمش ایدی .

شویا که : عطاء الله افندینک زوربالره استناداً بیاغی زور ایه مقام مشیخته طورمسی وقع و نفوذ سلطنته طوقونمغین آنک عزلیله رینه متحیزان صدور عظامدن عثمان پاشا زاده عزت بک افندینک نصبی اندرون هایونجه ملتزم اولدینی حالده عطاء الله افندینک او جاقلو ایه اتحادی تردد شاهانه به بادی اولمغده ایکن طیار پاشا دخی عطاء الله افندینک تحکمدن قورتلماق و مقامنده مستقل قالمق املنده بولندیغندن بو باده بعض تسهیلات کوستره رک میل و موافقت شاهانه حاصل ایتمشیدی .

اول ائنده لاز طائفه سندن و یوباز کروهندن بری سلطان محمد قولانی نفراتیله فاحشه غوغاسی ایدرک مدرسه سنه فرار و یکچریلر کندوسنی طومتق اوزره مدرسه به کیرملریله ایچلرندن بریسنی اعدام ایتدکن صکره قاقچوب فاتح جامع شریفنه دخیل دوشدکده بر قاقچ یوز یکچیری جامعی احاطه ایدوب عطاء الله افندی دخی کرک طلبیه و کرک خدمه جامع شریفه اکید و شدید امرلر ارسال ایه مرقومه قطعاً معاونت و صحابت اولنماسنی تنیه ایتمش اولدیغندن اودخی مؤذن محفلنه چیتوب جامعک هر قنغی قپوسندن بر یکچیری باش کوسترسه نشانه دانه تفنک ایدرک مدافعهده اصرار ایتسی اوزرینه یکچریلر فاتح مرحومه حرمة جامعی ایچنه قورشون اته میوب مجرد حصر و تضییق ایه مرقومی تسلیمه مجبور ایلمک تدبیرینه قراو ویرمشلر ایکن

عطاء الله افندی حد تلنه رك هان جامع ایچنه هجوم واقتحام ایله مر قومك اعدام اولمسی ایچون بالذات سكبانباشی بی اورایه اعزام ایلمش اولدیغنه مبنی هر طرفدن مر قومك اوزرینه قورشون یاغدیریله رق بر قاج یرندن یاره لشمشکینینه مقام مدافعه ده ثابت قدم اولوب نهایت جبخانه سی تمکله مجروح اولدیغی حالده دال خنجر اولوب وبرقودن اوغرایوب یکچیریلری یاره رق طیشارو فیرلامش ایسه ده صوبه ومطر قه لرله دوشوروب اعدام ایتمش لدر .

اولوقت یکچیری قشله رینه وسائر اوجاقلره دخیل دوشن جانیلر قور تلمق عادت ایکن فاتح جامعنه انلر قدر رعایت اولنماسی وجانی مر قوم مدت مدیده آجلغه طیانه میوب نهایت تسلیمه مجبور اوله جفی درکار ایکن دشمن طایبه سی اوزرینه حرکت اولتور کبی جامع شریف ایچنه قورشون اتیله رق حرم فاتحه حرمتسزك ایلمسی عطاء الله افدینک حمتسز لکندن ناشیدر دیو مدرسه نشین اولان علما وطلبه گروهی کوجنوب کفتکو ایتمکده اولدقلرندن بودخی عطاء الله افدینک علیهنده قوللامق اوزره خصامی النده بر سلاح ایدی .

انجق طیار پاشا ایله عزت بکک جهت وحدت وفاقلری روم ایلی قاضیه سگری شمس الدین افندی ایله صدر اناتولی یاهولرندن خواجه منیب افدینک معلوملری اولیجق واروب عطاء الله افندی یه اخبار وهان طیار پاشانک عزلی چاره سنه باقسنی مصرانه اخطار ایلمش لدر .

ایشته اول اراتق عبدالباقی افندی در سعاده وارد وهر طرفك علت غایه سی بشقه ایسه ده بر مطلبده متحد و طیار پاشانک قائم مقاملغدن جبار زاده لرك توحش ایتمی جمله نك دعواسنی مؤید اولغین هر طرفدن واقع اولان ابراملره سلطان مصطفی دخی خواه وناخواه موافقت و مساعدیه مجبور اولغله محرمك اون اوچنجی جمعه کونی سلامق رسم عالیسنک اجرا سندن صکره طیار پاشا دیمتوقه ده اقامت ایتمک اوزره عزل ایله یرینه رکاب هایونده نشانجی بولنان آکینلی حاجی مصطفی افندی قائم مقام صدر عالی اولدی .

عبدالباقی افندی دخی اتمام مأموریتله ادر نه یه واروب مکافاة عهدیه سنه کوچک تذکره جیلک توجیه بیورلدی واندن منحل اولان کیسه دارلق رئیس افندی مهر داری مصطفی صفوت افندی یه احاله ایدلدی وهر طرفك برر جهته املی حصول بولدی .

فقط طیار پاشا حقنده توجه پادشاهی بر کمال بولندیغدن دائره سیله منصبه کیدر کبی معزاً دیمتوقه یه کوندرلش وارقه سندن خیلی عطایای سنیه ارساله تطیف بیورلش

اولمی خصمانه موجب فکر و اندیشه اولدیغندن ینه سردار اکرم ایله شیخ الاسلامک اثر سعی و اقدامی اولمق اوزره باشنده کی غلبه لکی طاغیدوبده حاجی اوغلی بازارنده اقامت ایلمسی ایچون کندوسنه محرمک یکر می ایکنجی کونی مباشر مخصوص ایله خط هایون کوندرلدکده اناطولی به کچوب و مملکتته واروبده محافظه نفسنه تقید ایلمسی بعض خیر خواهانی طرفدن کندوسنه اخطار اولمش ایسه ده طرف سلطنته اعتماد تامی اولدیغندن هان باشنده کی عسکری طاغیدوب و حاجی اوغلی بازارینه کیدوب ظهوراته تابع اولمشدر .

بومثللو کشا کشرله اوغراشدیغنی ائنده تدارکات سفریه به اهتام و اعتنا اولنه میوب متارکه مدتی ایسه ختامه قریب اولدیغندن بویله کیدرسه ایشک صوکی وخیم اوله جنی اکلاشلمغله حضور سردار اکرمیده لدی الاستشاره وکلای دولتدن برینک رکاب هایونه واروبده شفاهاً عرض و افاده حال ایلمسی امور لازمه دن کورلمکین کتخدای صدر عالی عثمان افندی بو اوانده اردوی هایوندن درسعاده کوندرلمشیدی عثمان افندی ایسه سردار اکرم ایله علمدار پاشانک یکدیگره اولان خصوصتلیرینه ویکچریلرک یولسز حرکتلیرینه باقوب روش حالی بکنمدیکندن ینه بر مخالف روزکار اسر و بر فتنه فورتته سی ظهور ایدر ایسه ساحل سلامتده بولنق اوزره کتخدالقدن استعفا ایدوب قورتلمق داعیه سنده ایکن اول ائنده همشیره پادشاهی اسما سلطانک کتخداسی و مقتول یوسف اغا برادری عمر اغا فوت اوله رق عثمان افندی سلطان مشار الیهابه کتخدا اولوب رکاب هایون دفتردارلغی دخی عهدسنه تفویض ایله تلطیف و بوجهتله درسعاده توقیف اولندیغنه بناءً صفرک اون طقوزنجی جمعه کونی صدارت عظمی کتخدالغی رئیس الکتاب رفیق افندی به وریاست اسبق رئیس الکتاب غالب افندی به توجیه اولندیغنی صرده اردوی هایونجه بعض توجیهات و قوعبولمش و سابقا مکتوبی صدر عالی اولوب جلد سابعده بیان اولندیغنی اوزره روسجق ارنازینه قارشمش و مؤخرأ مشتای اردوی هایونه کلش اولان تحسین افندی بالاصاله چاوشباشی و علمدار پاشا متعلقا تندن و خواجهکان دیوان هایوندن سید افندی اردوی هایونه قصاب باشی اولمشدر .

رفیق وغالب و بهیج و تحسین افندیلر ایسه هپ جمعیت خفیه اعضا سنندن اولدقلری حالده اردوی هایونده بر مهم مقام و ما موریته کچوب و اردوی هایونی او جلرینک ایچنه آلوب علمدار پاشا دخی رامنز افندیکننده اولغله بوجمیت ارتق ایکی طرفی دخی ایستدیگی کی قوللانه بیله جک بر حال واقتدار کسب ایتدیکندن هان اردوی هایونده کیلر رامنز افندی ایله کیز لو مخابره ایتمکده واصطیاد تخجیر مراد ایچون

ینه ایچلرندن برنی استانبوله کوندرمک اوزره فرصت کوزتمکده ایکن سردار  
اکرم کندو ضعفندن غفلت وطونه سرعسکری علمدار پاشا کبی قوتلو وشدید  
الشکیمه برآدم ایله مخاصمه یه جسارت واکا غلبه خولیا سیله ییلق اوغلی وکاور حسن  
وابرائیل ناظری کبی برطاق ضعیفای اقویا نما ایله اتفاق ایتمک اوزره انلری ادرنه یه  
دعوت ایتمکله رفیق افندینک محرمانه اشعاری اوزرینه علمدار پاشا صید و شکار  
صورتنده اون بیک قدر کزیده عسکر له ادرنه حوالیسنه دهشت نمای عزیمت  
اولدینی سامعه خراش وکړک ادرنه ده وکړک استانبوله هرکسه بادیء تلاش اولوب  
حتی سلطان مصطفی خان حضرتلری برکیجه ایکی دفعه شیخ الاسلام ایله قائم مقام  
پاشایی سرای هایونه احضار ایله استشاره وبو دردنا که ظهوره جستجوی علاج  
وچاره ایتمش ایسه ده ایکیمی دخی حقیقت حالدن بی خبر اولدقلری جهته بر جواب  
شافی ویره میوب اردوی هایون ایله مخابره یه مجبور اولدقلری صره ده علمدار  
پاشا طرفدارانی اولان رجال دولتدن صورت خیر خواهیده وارد اولان اورا فده  
( سردار اکرمک ضعیف درکار اولدینی حالده ییلق اوغلی کبی بعض کسانى ادرنه یه  
دعوت ایتمکله علمدار پاشا منفعل اوله رق کمی آزی یه آلدی و آو بهانه سیله ادرنه یه  
عازم اولدی شمیدین چاره سی کورلمزسه اوکی المنقذن قالور و صوکی یمان اولور )  
یوللو کلمات مده شه مندرج اولدیغندن در عقب طرف ملوکانه دن علمدارک مبغوضی  
اولنلرک ادرنه دن طردی ایله باب فتنه نك سدی ایچون سردار اکرمه خطاباً مؤکد  
خط هایون کوندرلمکله ییلق اوغلی و امثالی کیمسه لر بوغاز محافظی حق پاشا معینه  
مأمور وبو طریقه علمدارک تحصیل رضا سنه بذل مقدر ایدلمکده ایکن رفیق افندی  
سردار اکرمک یانته دخول و شیطان کبی عروق و اعصابنه حلول ایدرک ( بعض  
مواد سفریه مذاکره سی ضمننده متحیزان رجالدن بری علمدارک یانته واروبده  
دفع تسلطی ایچون اصلاح ذات الینه سی ایتیمی موافق حال و مصاحتدر ) دیدکه  
سردار اکرم دخی بورأی استصواب و کیم مناسبدر دیو استجواب ایدیجک رفیق  
افندی ( فی الاصل انکله بهیج افندینک معارفه سی واردر و بو مقوله ایشلرده استخدما مه  
لیاقتی درکاردر ) دیمکله در حال بهیج افندی جلب ایله صورت مأموریتی کندویه بیان  
و نتیجه سننده مظهر مکافات اوله جفی در میان اولندقدده بهیج افندی بادیء امرده  
امتناع و بو خدمتک عهده سندن صرف و تحویلی امرنده رفیق افندینک استشفاع  
ایتمکله سردار اکرم انک بونکولنی صمیمی برکیفیت صانوب طانیشق دوکشی  
اولدینغنی درک و تظنن ایده مدیکمندن تکرار تکلیف و ابرامه ابتدار ایتدکه همان  
رفیق افندی سردار اکرمه مماشات سیاقنده سوق کلام و ایضاح بحث و مرامه آغاز

و نتیجہٴ مصلحتہ دفتر دارلق و عدیلہ تنویر سند رجا و نیاز ایله گویا بهیج افندی بی  
 الزام و اسکات ایتمش و بونک اوزرینه بهیج افندی علمدار اردوسنه کیتمش ایدی  
 و اروب رامنز افندی و علمدار پاشا ایله کورشد کده ایشک یولنه کیردیکنی سویلیوب  
 و مقصد خفیہ دائر اولان موادی مذاکره و مشاوره ایلیوب بعده گویاکه سردار ایله  
 علمدارک اره لرینی بولمش و طونه یالینسک امر محافظه سنی علمداره تعهد ایتدیرمه  
 موفق اولمش و ادیسنده عودت ایله ادرنه به کادی .

بهیج افدینک اولوجهله اردوی هایونه عودتندن صکره صفرک یکر می التنجی جمعه  
 کونی حضور سردار اگر میده عقد اولنان مجلس عمومیده (مدت متارکه ختام بولدی  
 هنوز مصالحه قرار کیر اولمدقن بشقه روسیه لویکیدن یکیه بغدادنه عسکر سوق ایدیور  
 بویسه اعادهٴ حربه مقدمه اولدیغندن برآن اقدام دشمن قارشوسنده بولمق الزم  
 و صرپستان غائله سنک دفعنه اهتمام اولمق اهم اولمغین لواء شریف ایله اردو هیئتی  
 ادرنه ده قالب طونه سواحانی محافظه ولدی الاقتضا اعدایه مقابله ایچون سر عسکر  
 یعنی علمدار پاشا معیتنه مقدار وافی عسکر ارسالیله حین اقتضاده سردار اکر دم دخی  
 قوسی خلقی و لزومی قدر عسکر ایله سبکبارجه صوفیه جانبه عزیمت ایتک صورتی  
 تذکر اولنه رق کیفیتک سر عسکر پاشادن استعلامی ضمننده اقدجه بهیج افندی آنک  
 طرفه کوندرلمشیدی بوکره عودت ایتدی واقع اولان افاده سنه کوره سر عسکر  
 پاشا دخی بورایی قبول ایلمش سز نه دیرسکز ) دیو حضاردن استفسار اولندقده  
 جمله سی بوضورتی استحسنان ایتلریله بوکا دائر طرف سردار اکر میدن یازیلان  
 عرض و انها بهیج افندی ایله رکاب هایونه کوندرلمش و مقدمجه کندوسنه و عد  
 اولندیغنی اوزره دفتر دارلغنه دائر اولان تلخیص دخی یدینه ویرلمش در .

و اردوی هایونک صحرا یه خروجی موسمی کلش اولدیغندن ربیع الاولک اوچنجی  
 جمعه کونی اردو محانسه چادرلر قورلمش ایسه ده طونجه نهری بردن بره طغیان  
 ایدرک چادرلرده بولنان خیلی عکام و یکیچریلری غرق و تلف ایتمش و برقاچ یوز  
 چادر و چرکه بی الوب کوتورمش اولدیغندن و برهفته قدر بر طرفه حرکت قابل  
 اولدیغندن کوچ حال ایله ماه مرقومک او تنجی جمعه کونی لوای شریف اردو محانسه  
 اخراج ایله خانه لردن خیمه لره نقل اولنه بیلمشدر .

بوسنه بین الجمرات هر یرده شتا شدید اولوب طاغله پک چوق قارلریاغمش اولدیغندن  
 بو انساده هوالر کسب ملایمت ایتدیکی کبی قارلر اریمکله هر طرفه صولر بویله  
 طغیان ایدرک دره لر برر نهر جسم و نهرلر برر بحر عظیم اولدی و بوجهتله حکم  
 بهار کجیکوب روز حضرده خضروات یتیشه مدیکنه مبنی اندن صکره

دها بر خیلی کونلر آتلر چایره چیقار یله میوب آخور لرده قالدی و شدت شتادن ناشی حیوانانده پک چوق تلفات وقوعبولدی و بو جهته روز حضرده استانبوله پک آز قوزی کلدی حالبوکه برمدتدنبرو استانبوله روز حضر دن اول قوزی کسمک یساغ و اول کون مبدأ ایام مساغ اولدیغندن هر کس روز حضرده خانه سته آز چوق هر نه ایسه بر مقدار قوزی اتی کتور مک عادت اولمشیکن تاریخ عاصمه بیان اولندیغی اوزره بوسنه روز حضرده علی السحر بر قاچ قصاب دکاننده پک آز قوزی اتی بولنه بیلوب هر لقمه سته هزار مشتری اولغله یکدیگری جکینه یرک چند نفری مجروح و تلف اولدقدن بشقه چونکه اولوقت استانبولک قادیترلی بومقوله عادتله رعایتدن بشقه برشی بیلمز و دوشمنز اولدقلرندن نیجه سی قوجه لریله روز حضرده قوزی اتی کورمدک دیو غوغا ایدوب حتی بعضیلری بوشامشدر .

الحاصل بوسنه افق معنوی نصل قراکلق ایسه افق مرئی دخی اویله بولانق اولوب کویا ظاهر باطنه توافق و تبعیت ایدیوردی واحوال پولتیقیه ده موازنه اولدیغی کبی هوالر دخی پک اعتدالسز کیده یوردی .

هله ربیع الاولک اون ایکنجی کونی استانبوله ظهور ایدن باد صرصر قیامت اثر خیلجه زیان و ضرر و یرمش و خالق عظیم خوف و دهشت کتور مشدر شو یله که : اول کون ساعت اوچ راده لرنده ایکن کاغذخانه طرفدن هوا قراروب کیجه کبی هر طرف قراکلق اولدیغی حالده هبوب ایدن بر دهشتلو قاصرغه روزکاری اوکنه کلان ابنیه و اشجاری قلع و وقع ایدرک و قاسم پاشا و ترسانه نی و قارشوقیه ده بلاط و نثار قیلرندن خلیجی صیروب کچرک بر چوق قایق و کیمیلری زیر و زبر ایتدکن بشقه نیجه محکم بنالری خاک ایله یکسان و نیجه قورشون پوشیده لری سوکوب هواده پران ایتمکله عامه ناس دوچار دهشت و هراس اولمشلر و چونکه سلطان سلیمک او اخر سلطنتنده دخی بویله بر بوره ظهور ایلمش ایدوکندن بعضیلر تشام ایدرک عجبا بو دخی اویله بر حادثیه علامتمیدر دیو بحر افکار و اندیشه یه طالمشلردر .

بعده جمادی الاولانک اون دردنده نازل اولان شدید و مدید برمطر دخی مورث انواع خسار و خطر اولمشدر . شو یله که : اول کوندن بدأ ایله الی ساعت قدر تمتد اولان باران عظیم کرک استانبوله و کرک بوغاز ایچنده بر چوق ابنیه یی خراب و بتون باغ و بستانلری محو و نایاب و عموماً خلقی دوچار چار موجه اضطراب ایتمشدر کویا چشم عاقبت بین آسمان بر وجود نایابی غائب ایده جکینه کریان اوله یوردی بزشمی صده کله م .

بهیج افندی در سعاده وصول و مجالس مقربینه دخوله یول بولدقده فتاح و نذیراغالر



ایله محرمانه مصاحبتہ کیریشوب رفیق افندی وادیسنده اطلاق زبان و علمدارک طرف پادشاهی به کمال اخلاص و خصوصیتی موضوع بحث و بیان ایدرک (رونق افزای تاج و تخت و پادشاه جوان بخت افندمن حضرتلری برطاق متغلبه النده عاجز قالوبده شیخ الاسلام و سائر اصحاب مناصبدن برینک عزلی لازم کلدکده سکناباشی اولان قهوه جی مصطفی کبی اسافلک تغلب و هتک پردهء تأدب ایدرک سلطنت سنیه ایله مجادلہسی و قباچی مصطفی کبی بر قلاشک و قعه دن اول آج و فلس احمره محتاج ایکن قره کوزک اغالنی کبی بردن بره اگا اولدیغنه قناعت ایتیموبده امور دولته مداخلهسی سرعسکر پاشانک سامعه خراش حمیتی اولدجه منفعل و متأثر و مظله نشین عنایتی و سقاطه چین خوان عاطفتی اولدیغمز ولی نعمت عالمیان پادشاهمز افندیمز حضرتلرینک بزم کبی سایه سنده استحصال قوت ایله قهر اعداسنه اکتساب قدرت ایتمش قوللری وار ایکن اللهدن قورقماز و پیغمبردن اوتانماز بر آلائی طانغی و باغیلرک ایادیء تغلب و تحکمدن خلاص بولمده و بر شیخ الاسلام عزله دخی قادر اولدجه حقمزده ابنای زمانه بونلرک اوزاقدن سیرجی اولسی نه دیمکدر دهرک لوم و لعن و بلکه مضبوط اقلام مورخین اوله جفی جهته قیامته دک بونلر ولی نعمت لرینه خیانت ایتمشلر دیو قرنا بعد قرن شتم و طعن ایدرلر دیو تأسف کنان وریش کنان مضطرب و پریشان خاطر و بولکه لردن تطهیر جامهء ناموس ایتک اوزره اراده سنیه صدورینه مترقب و منتظر ایکن بواننده عقده مصالحه ایچون بالواسطه موسقولو مکالمه به دعوت اولندقده قباچی اگا ایله حی صالح اولهلم بویله پریشان دولته مصالحه نیجه یول بولهلم دهرک باص بیانغی هزل واستهزا وادیسنده ضعف دولتی ایما طریقیله مکالمه دن ابا ایلدیکی مسموعی اولیجق بتون بتون عقلی باشندن کیدوب شوکت مآب افندیمزک رخصتی اولسه بیله بن ارتق طیانه میوب بش اون بیک آدمه کیدرم و دولت علیه منی تغلبه الندن خلاص ایدرم زیرا عالم خراب اولدی و آتش فتنه و فساد ایله خلقک جگر لری کباب اولدی قدرتمآب افندیمز بنی قتل ایدر سه ده جانم فدا اولسون تک امور دولت علیه نظام بولسون دهرک اظهار سوز و کداز و طرف سلطنته اخلاص و عبودیتی ابراز ایتکده در) دیدکده عبد الفتاح دیدکلری محروم فلاح پرده پی یرتوب و غرض نهانلرین میدانه آتوب (چونکه پاشا حضرتلری افندیمزه خدمت ایتک ایستر دیورسکز اولاسلطان سلیمی اعدام ایتلدر) دیدیکی کبی بهیج افندینک افکاری پریشان اولوب انجق ایپ اوجی ویرمامک ایچون وادیء اغفاله تجاهل العارف یولنه کیدرک (اوت سلطان سلیمک ازالهسی بین اللزوم و او بر حیات اولدجه شوکتلوا فندیمزک راحت و حضور بولیه جق لری امر مجزومدر لکن مادامکه

او جاقولو و باجمله استانبول خلقی و روم ایلی اعیانلریله سرعسکر پاتا آنک خلافتده در  
 وجودی کالعدم و برشی یاهمه جغنی مسامدر اعدامی ایسه بعض محاذیری موجب  
 و خاطره کلیه جک مفاسدی جالب اولور از جمله فرانسه ایمپراطوری ناپلیون کبی  
 برجهانگیر ایله بینلرنده محبت جایگیر اولدیغندن خلع اولدینگی وقت استانبولده  
 ایلیچسی سباستیانی مجلس مکلمده رسماً ایمپراطورک انفعالی درمیان و سلطان  
 مخلوع حقتده سوء قصد وقوعه کلورسه فرانسه ایله دولت علیه ارسنده کی  
 دوستلغک محو اوله جغنی بیان ایتمشیدی قالدیکه اون طقوز سنه سریر سلطنتده  
 بولنان پادشاهک نیجه بیک طرفداری بولنه جغنی مسلم اولمغه بو خصوص شمذیلک  
 متروک و طریق حزم و احتیاط مسلوک اولمق انساب و اسلم کورینور وقتی کلد کده  
 سرعسکر پاشا بر موجب اراده سنیه حرکته متعهددر البته بو خدمتمده دخی  
 بولنور) یوللو اقاویل ابه فریب ایله کندولرین الزام و (شوکتلو افندیمزه  
 برقدرتلو بنده سی بویه وقت اضطرارده لسان صداقت ایله عرض خدمت ایدوب  
 طوررکن رغبت ایتامک بالا آخره باعث ندامت اولور بوراسیده دوشونلمک لازم  
 کلور) دیو ختم کلام ایدجک ندامت سوزی کندولره تأثیر ایتمکله (نه یاهم نصل  
 تدبیر ایدلم) دیملری اوزرینه (بوماده ادنی همتله صورت پذیر تمشیت اولور .  
 فقط بغایت کتم و اخفاسی لازم و معاذ الله تعالی او جاقولو طرفنه ادنی سر رشته  
 ویرلمسی خطر عظیمی مستلزمدر) دیوب ماده نک کتم و اخفاسنه طرفین تعهد  
 و ایمان مغلظه ایله یکدیگری تأمین ایتدکن صکره بهیج افندی تشبثات لازمه نک  
 بیاننه شروع ایله (طرفکزدن علمدار پاشایه تحریرات کوندرملک کافیدر طرف  
 ملوکانه دن خط هایون اصداری تأخیر اولنسون بزلر پاشایی امرکز اوزره اردوی  
 هایونه واندن برمناسبتله استانبوله کتوریرز کروه متغلبه طرفندن سؤال و استیضاح  
 کیفیتده الحاح اولنه جق اولور ایسه بن خط یازمدم دیو یمین ایله انلری تأمین  
 بیورر حقیقت حالدن ییخبر اولنلر بادیء امرده سوء ظنه ذهاب ایله ایشی تقبیح  
 ایدرلرسه معذور درلر فقط ظاهری حاله نظراً بعض کبرا مادهی بشقه صورتلره  
 کیدروب قوشاده رق و بعض مفتریات دخی علاوه ایلهرک افندیمزی اغضاب ایتمک  
 قیدینه دوشرلر ایسه افندیمز انلرک اقوال مموه لرینه قولاق آصمیوب اظهار تجلد  
 ایله حکیمانانه حال حاضری اداره بیورسونلر بشقه تدبیره حاجت یوقدر) دیو کلام  
 دسیسه انجمنه ختام ویرمکین فتاح اغا طرفندن علمداره (اقتضاسنه کوره حر کته  
 اذن هایون ارزان بیورلمشدر) ماننده برمکتوب یازلمش و بهیج افندی دفتردارلق  
 ایله مبتهج اولدینگی حالدده اردوی هایونه اعاده بیورلمشدر .

بهیج افندی به رکاب هایونده دفتر دارلق خلعتی اکسا اولنش ایدوکی خبری  
ربیع الاولک اون التنجی کونی اردوی هایونه واصل ودفتر دار سابق چاوش  
زاده امین افندی بالطبع مقام استفادن ساقط و منفصل اولغله بهیج افدینک  
ورودینه قدر امور دفترینک اداره سی رئیس افندی به حاله و بهیج افندی  
عهده سننده بولنان باش محاسبه منصبی دخی تذکره اول نعمان افندی به توجیه  
اولمغین اردوی هایونده متسلسلاً بعض توجیهات وقوعه کلمشدر . و بصره ده  
آمدجی عامر بک مالیه تذکره جیسی وهنوز استانبولدن کلمش اولان حسنی بک  
آمدجی اولمشدر و مقدمه الجیش اولمق اوزره التی اورته ترتیب وسمسونجی  
باشی اغا باشوغلانی ایله صوفیه جانبیه کوندریلوب جبه جی وطوبجی و عرب جی  
و خبره جی ولغمجی اوجاقلرندن دخی صوفیه و سلاستره قوللرینه اورته لر ترتیب  
وارسال ایدلمشدر .

متعاقباً بهیج افندی اردوی هایونه ورود ایله رفیق افندی به ماجرای حکایه  
ایتدکن صکره ایکسی بردن کیفیتی روسچقده بولنان رامز افندی به تحریر  
واشعار وفتح اغادن علمداره اولان مکتوب معهودی تسیار ایله علمدارک اردوی  
هایونه جلبی ایچون وسیله ظهورینه دیده دوز انتظار اولمشدر .

اول اراق استانبولده یینه بر وقعه اختلالیه ظهوره کلدی . شویله که : قره دکر  
بوغازنده واقع قواق قلعه سی یماقلرندن چند نفر سفیهارک فوق العاده بی ادبانه  
حرکتلرندن اهل عرض گروهی بیزار اولغله اغاری اولان امین اغا کندولرینی  
توقیف ویانلرینه براز آدم ترفیق قایقلمره ارکاب و تأدیب و تربیه لری ایچون بر  
قطعه تقریر ایله سکبانباشی مصطفی اغایه ارسال ایتدکه کندولرینک وادی  
فسادده یولداشی و طریق شقاوتده پاداشی اولان مجار قلعه لی عبد الکریم واکا  
معادل برقاچ شقی لیم قایقلمری توقیف واعاده ایچون مجار قلعه سندن طوب آتمشدر  
ایسه ده کله لر اصابت ایتیموب قایقلمر اشاغی طرفه مرور ایتمکین بونلر دخی قایقلمره  
رکوب ایله تعقیب ایتمشدر . لکن یتشه میوب انلر اولجه استانبوله وصول ایله  
محبوسلری چارداق قوللغنده الی التی بلوکی نفراتنه تسلیم ایلمش اولدقلرندن  
متعاقباً اشقیا گروهی قره به ایاق باصدقلرنده عوعوه سکا نه و عربده سرکشانلرینی  
ایشیدن برچوق اوباش دخی ایاقداش اوله رق جمعیتلری چوغالب والی التی  
نفراتیه فی الاصل بینلرنده درکار اولان جهت وحدت فساد دخی باعث اتفاق  
واتحاد اولوب همان چارداق قوللغندن محبوسلری اخذ ایله متجبران و متفخرانه  
غلطه جانبیه گذار ایتدیلر .

استانبولدن بویله جبراً محبوس الملق ایسه امثالمرز بروقعۀ غریبه وامنیت عمومییه سلب ایده جک و یکدیجری اوچاغنک ناموسنه خلل ویره جک بر کیفیت عجیبه اولدیغندن او جاق اختیارلری سکیانباشی حضورینه جلب ایله مشاوره اولندقده الی الی بلوکنده باش یساجچی اولان حسن اغا فی الاصل اخسخهلی اولمق حسیدیه یماقلرک همشهریسی و ذاتاً بومقوله فساد پیشه لرک پیشروی اولدیغنه نظراً یماقلرله بویله اتحاد دخی آنک باشی آلتدن چیقمش بر فساد اولمق کرکدر فقط اخشام تقرب ایتدی یارین بالتحقیق کرک کندوسنک و کرک قفادارلرینک جزاسی ترتیب اولنور دیو طاغیلوب کیتدیلر .

حالبوکه مصطفی اغا قریب العهدده اومقوله اشقیانک همپاسی اولدیغی حالده سرکشک یوزندن سکیانباشی اوله رق آز وقت نظر فنده کسب ایتدیکی احتشام وعظمتی آنره کران کلوب امثال واقرانندن بر چوغی سکیانباشی اولمق املنه دوشمشیدی ومرقوم حسن اغا دخی بولردن بریسی ایدی بناءً علیه ایش فردایه قالیوب همان اول کیجه عبدالکریم ایله قفادارلری چارداغه کلهرک واللی الی نفراتی ایله بر لسه رک حسن اغانک دلاتلیه اغا قپوسنه بالورود اغا افندیمرک امر ایتدکرلی محبوسلری کتوردک دیو قپویی آچدردقدن صکره ایجرویه دخول ایله بر طاقی قده قولاق عبدالله اغایی اویقوده ایکن الهچورمش و دیگر فرقهسی زندان یازیجیسی قالدیروب و جبراً اکا اغا افندیمرک امرلری اولان محبوسلر کلدی دیهرک حرم قپوسنی چالدیروب اغا دخی مجلسده ذکرلی کچنلر طوتمشدر ظنیله طیشارویه چیقهرق یقهنی الهویرمش اولمغین ایکسی دخی سهله توقات ییه رک چارداغه کوتوریلوب باش یساجچی او طهسنده توقیف اولمشلر .

فرداسی که ربیع الاولک اونالتنجی ونیسانک غایتی نجشبه کونی ایدی اندرون و بیرون رجالی بووقعه دن ناشی متلاشی اولدقلرندن بشقه چونکه بوماده دن طولانی او جاقلونک اولانجه ناموس واعتباری زائل اولدیغندن اغا قپوسنده عقد جمعیت ایله کیمی اغالرینک استخلاصی امرنده استعجال و کیمی زور بالرک اوزرینه هجوم ایله جمله سنی استیصال ایتمک کیی مطالعات متباینه ایله اشتغال ایتدکرلی ائشاده طرف دولدن زور بالرک جمعیتنه آدملر ارسال ایله مراملری سؤال اولندقده سکیانباشینک عزلی استدعا وعزل اولندیغنی تقدیرده اعدام ایده جکلرینی ایما ایتلریله مؤللرینه مساعدده لازمه خالدن کوریه رک اغا قپوسنده کی جمعیتدن اغالغه کیمی ایسترلر ایسه انتخاب وعرض ایتسونلر دیو استعلام اولنمی اوزرینه اراده دولت علیه نکدر وتعیین شخص اولنمق اوچاغمزک قانونه مخالفدر دیهرک رسم ادبه رعایت ایتدکرینه مبنی محضر اغا وکیلی

اولان خیره بوللی محمد اغا سکنباشی نصب اوله رقی اغا قوسنه کوندرلد کدن صکره مصطفی اغا ایله عبدالله اغا زوربالک حبسندن تخایص ایله بروسه یه نفی اولندیلر ترکه جی ابراهیم اغا دخی قره قولاق اولدی بو وجهله فته بر طرف ایدلدیسه ده ضابطه بلدیه یه خلل ککش و ایش بتون بتون اسافل و اوباش انه دوشمش دیمک اولمسیله بو وقعه دن دخی اغماض عین اولنور ایسه ارتق اسافلک ضبط وربطی قابل اوله میه جنی جهته بین الناس کفتکو حادث و بودخی تخدیش اذهانه باعث اولمقدن ناشی شیخ الاسلام قوناغنده منعقد اولان مجلس مشورته سکنباشی معرفتیه او جاغک سوز صاحبلی احضار و بوماده یه سبب اولنلرک تأدیبیه او جاغک اعاده ناموسی لزومی اشعار و اخطار اولندی صره ده اجلاء صدورک آتش زبان حمیت نشانلردن عزت بک افندی او جاقولویه خطاباً (اوتنه دبرو ایشدی کمزه کوره قوللق او کندن قندیل سرقتی او جاغک ناموسنه طوقونمغله ضابطک بوینه قندیل آصیلوبده تشهیر اولنق قانون ایش عجباً اغا کر اوله جق شخص غافلک قوده ایکن کیجه لین کور قندیل کی انوب کورتورلمسی دودمانکزه موجب عیب و عار اولمازمی) دیو او جاقولونک کانون تهورلری شراره پاش حمیت ایله جک و خنچر کی جکر لرینه ایشلیه جک سوزلر سویلیجک او جاقولو آنک بویه مؤثر سوزلردن آتش آله رقی همان مجاسدن قیام و اغا قوسنه واروب سائر او جاقولوی جمعه کیفیتی اعلام ایتدکر نده جمله سی پر آتش غیرت و حمیت اوله رقی همان اورته آشجیلرینی چارداغه کوندروب سالف الذکر باش یساقجی حسن اغایی اغا قوسنه جلب و احضار ایتدکر نده موجود اولان یکچیریلر اوزرینه هجوم و اطاله زبان لعن و شتوم ایله اعدامی امرنده اصرار ایتدکر ندن کیفیت باب عالی یه تقریر ایله صادر اولان فرمان عالی موجبجه در حال حسن اغا خنق ایله اعدام اولندقدن صکره بوغاز ناظری قباچجی مصطفی مأمور ایدیله رک مجار قلعه سنده عبدالکریم و رفیقاری دخی اعدام ایله عبرت نام قلندیلر .

الحاصل عزت بک افندی نک تأثیر نطق بلیغانه می ایله کروه اشقیاء مظهر تنکیل و جزا اولدی و افکار عمومی یه سکونت کدی بو جهته بین الخواص عزت بکک شان و اعتباری ترقی بولدی لکن مقدا مشیختی سویلنوب حتی طیار پاشا بوکا دائر مساعدت شاهانه بیله استحصال ایتمشیکن آنک قائم مقاملقدن عزلی حسیله عزت بکک مشیختی دخی پسمانده اولمشیدی بویه نطوق و جری اللسان بر قاضیه سکرک استانبولده بولنمسی ایسه عطاء الله افندی طرفدار آنک را حتلرینی سلب ایتدکه ایکن بوانتاده طرف شاهانه دن استفسار خاطر سیاقنده عزت بکه عطیه بهیه ظهوری بتون بتون مراقلرینه طوقوندی حالبوکه بوجه بالا طیار پاشا حاجی اوغلی بازارینه نفی اولنق ملا بسه سیله اول

طرفه علمدار پاشا ایله کورشدکه گرفتار اولدینی فلاکت محضا سردار اکرمک  
غرضکار لغدن نشئت ایلمش بر معنی اولدینی حکایت ایله بت شکایت ایدوب علمدار  
ایسه فی الاصل سردار اکرمدن دلگیر اولدیغنه مبنی اکار غمآنوز مصالحه مصلحتنه  
دائر بر خبر و اثر ظاهر اولدینی جهته استیناف محاربه احتمالی درکار اولدیغدن بجهه  
طیار پاشانک وارنه محافظه سنه تعیینی خصوصی رکاب هایوندن نیاز ایتسی اوزرینه  
طیار پاشا وارنه محافظه سنه تعیین اولندی ایشته عطاءالله افندی بونی وسیله ایدرک  
استابولده عزت بک تک طور میوب طیار پاشانک صدارتنه سی ایده یوردیو خفیه  
سردار اکرمه ایشعار ایتمکله سردار اکرم دخی عزت بک نفینی رکاب هایونه  
تلخیص ایتدیکنه مبنی بواوانده عزت بک مغنسیاه نفی اولنوب بعده استدعاسی وجهه  
منفاسی از میره تحویل قلندی .

عطاءالله افندی بوکره دخی او ایله بر تقریب دلفریب ایله دفع رقیب ایدرک پدرمانده  
مالکانه نظریه باقدینی مسند مشیخته پایدار وز عنجه کلزار دولت کندوسنه خالی  
ازخار زار اغیار قالدی .

اول اووانده ایسه روسجق یاراننک کمال مهارت و صنعت ایله وادی خفاده آشیلادقلری  
یبانی فدانلر نشو ونما بولمش واقطفان ثمره موسمی کش اولدیغدن چوق کچمدین  
عطاءالله افندینک او جاغنه انجیر دیکسله جک وباغزار دولت یکیدن تارلا ایدیلوب  
اکیله جک ایدی .

شویله که : مدت متارکه منقزی و حرب ایشلری صاریه صاروب بشقهجه تدارکات  
سفریه بی مقتضی اولمقدن ناشی اردوی هایونده رجال دولت اراق اراق مشورت  
ایتدیجه روسجق جمعیت خفیه سی اعضاسندن اولنلر (ایکی جهتک دخی احتیاجاتی  
چوق اردوی هایونده ایسه اسباب اقتدار یوق دلیک بیوک یامه کچوک بویه قالورسه  
حالیله فنیاه منجر اولور) دیو سردار اکرمی اخافه و توهیم ایتدیگری ائساده ینه  
کندولرینسک تعلیم و تلقینی اوزره علمدار پاشا موجود معیتی اولان اعیان بلدان  
ویش التی بیک قدر سبکان ایله کویادور و تفتیش ولایت ایتک اوزره روسجقدن  
چیقمش اولدینی لدی الاستماع (سر عسکر پاشا روسجقدن چیقوب برو طرفه طوغری  
حرکت ایتش اردویه دعوت و امور سفریه به دائر کندوسیه مشورت اولنسه عظیم  
فائده سی اولور) دیو سردار ساده دلی اغفال واقاع ایتلریله مقام صدارتدن دعوتنامه  
ارسال اولنسی اوزرینه علمدار پاشا همان کلی عسکر استصحاب ایدرک یرندن حرکت  
وجادی اولانک او چنجی صالی کونی ادرنه بحر اسنه مواصلت ایله بر طرفه اردوسنی  
قوردی و فرداسی او تاغ آصفیه کلوب سردار اکرم ایله کورشدی بعده ایکی کونده بر

سردار اکرم ایله رجال دولت انك خیمه سنه كیدوب طونه و صوفیه جهتلرینك تقویت واحکامی مذاکره ایدیلور اولدی و بومذا کراتك نتایجندن اولوق اوزره سلحدار اغاسی و قیرجه لی عسکری باشبوغنی اولان احمد اغارتبه وزارتله و باشبوع عنوانیه طولجی جانبنه مأمور ایدلدی و سلحدار اغالنی شیرین زاده عزت بکه توجیه بیورلدی . و چونکه علمدارك بویله بغته اردوی هایونه کلمسی خصوصه استانبولده هر کس برر معنی ویرمکله طرف قائم مقامیدن استعمال اولدقدقه تمشیت مهام سفریه ایچون کیش اولدیغنی جوابی ویرلشیکن ینه استعمال حال ضمنده مقرین پادشاهیدن تبدیل خاصیکسی بغدادلی حاجی علی اغا خط هایون ایله ادرنه یه کلوب کیتدی .

و علمدار پاشا اردوی هایونه کلدکلدن صکره کویا سردار اکرم ایله یکدل و یکجهت وارهلرنده کی اختلاف و خصومت مبذل ایتلاف و مخالصت اوله رق هر خصوصی بالاتفاق مذاکره و اجرا ایدر اولدیلر بو ایسه رامز و رفیق ایله رفیق لرینك صنیعه سی اولوب سرداری استدکاری کبی اعمال ایتمکده و علمداری تعلیم ایله پیغان کبی سویلتمکده ایدیلر . حتی برکون عقد انجمن مشاوره و سفر احوالی موضوع بحث و مذاکره ایدیلر رک روسجق یارانندن بعضلری (فرانسه امپراطوری تیلسیت مصالحه سی حکمنجه دولت علیه ایله روسیه لو بئینده متارکبه صورت ویردکن صکره مصالحه ماده سنی پارسه جلب ایتدی و ایشی اوزاتدی صورلدقجه کاه لسان حال و قال ایله نم دولت علیه طرفی التزام مجرد سلطان سلیمك ذاته مخصوص اولان محبت و حرمتنه مبنی ایدی دیو وقعته خالی اوکزه سدچکیور و کاهیدجه روسیه لونك رعوتنی بهانه ایدیلور متارکبه غیرمحدوده عنوانیه برصورت غیرمعهوده میدانه چیقیدی صوکی نه اوله جق) یوللو بختلر درمیان ایتدکده ینه یاران ماران ایچندن بری دیل اوزادوب (اوت بیهوده ادرنه ده اقامت ایله شهریه بر قاق بیک کیسه آچه اتلاف ایدیلور) دیحک رفیق و بهیج افدیلر دخی (آچه تدارکنده نه مرتبه عسرت چکلدیکی جمله نك معلومیدر بووجهله افاته اوقات ایتمکدن ایسه جمله درسهاته کیتسک ازهر جهت خیرلو اولور مصالحه صورت پذیر اولورسه فیها اولمز ایسه استانبولده تنظیم مهمات ایله عزم جهاد و غزا هر حاله ایجاب مصلحته اوفق و احراذر) دیو نیجه اقاویل ملزمانه ایراد ایتدکلرنده چوسکه افراد سائرده رد و اعتراضه مجال و سردار اکرمك قوه مدبره سنده برمال اولدیغندن جمله سی بو رأی تصدیق ایتملریله هان چندروز ظرفنده درسهاته متوجهاً ادرنه ححراسندن حرکتیه قرار ویرلمسی اوزرینه علمدار پاشا (ایله ایسه بنده برابر کیدوبده افدیتمك دیدار هایونلرین کورهم و خاکپای شاهانه لرینه یوز سوره میم) دیر دیمز اطرافدن همدستان اولان یاران

آنک دخی اردوی هایون ایله برابر بولنسنده وجوه محسنات بیانیه سوزه ختام ویردیلهر وخیلی وقتدنبرو ترتیب وتدبیر ایتدکلری مقدمات مکر ومکایدہ نتیجه ویردردیلهر .

وسردار اکرم اردوی هایونک بووجهله درسعاده حرکتی ایچون طرف شهر یاریدن استیدان اولنسنی آورده زبانیلمش ایسه ده چونکه طرف شاهانه دن استیدان اولنسه مجلس مشورته قونیه جنی امر طیبی و بوضورته ایسه عطاء الله افندی ایله همزبان اولان صدور علما وار دونک طیشاروده بولنسنی مناسبتیه تنفذ ایدن وکلا وواجقوله ایله اتفاق ایدرک بوخصوصه مانع اوله جقاری بدیهی اولدیغندن رفیق افندی صدر اعظم ایله مخفیجه ملاقات ایدرک (ذات شاهانه اردوی هایونک خارجه بولنسیله بغیر وجه امور دولته وضع ید استیلا ایدن اشخاصک اوضاعندن متفر اولوب استانبوله ورودکزی تمی ایتمکه و جلبنزه فرصت کوزتمکه اولدیغی بعض محرماندن مسموعمز اولمشدر جناب دولتکزک استانبوله ورودی پادشاهک موجب مسار نامحدودی اوله جغنده اشتباه یوقدر بو بایده امین اولکز بن ضامن و کفیل اما استیدان اولنسه ایش کشا کشه دوشر) دیهرک سردار اکرمک استانبوله ورودنده ذاتجه ودولتجه اولقدر محسنات درمیان ایتمش که آنی کندولردن زیاده سرعت اوزره حرکته حرصلاندرمش اولدیغنه بناء استیدان خصوصی ترک اولندقدن بشقه اولجه استانبوله شیوع بولماق ایچوق طرق ومسالکی سد ایله استانبوله کیده جکلری صالیورمامک اوزره لازم کلان یرلره مباشر لر تعیین واستانبوله قدر بش قوناق ترتیب وخیمه وخرکاه وسائر ائقال واحمال یرلرنده ترک ایله غایت سبکبار اوله رق جمادی الاولانک یکرمنجی نجشبنه کونی اکثر رجال دولتک بیه خبری اولمقسزین علی السحر علمدار پاشا سردار اکرم ایله چرخه جی علی پاشایی وبهرام پاشایی اوکنه قاتمش وار دوی هایون ایله برابر استانبوله متوجهاً حرکت ایتمش وکندوسنک بر جسم فرقه سی دخی برابر کیتمش ایدی .

اردوی هایونده کی مأمورین وکتبه نک اکثری بوحرکتدن بی خبر اوله رق خواب غفلتده بولملر ایله یتاقدن قالقوبده صباح کیفیله کیفیتی ایشتلکلی کبی سراسیمه اوله رق یکدیگره یا هو اردو قالمش دیورلر اصلی وارمی دیو سؤال ایتدکده اوته طرفدن کیمی خلاف مأمول بر کیفیت اولدیغنه مبنی اهمیت ویرمیه رک قهوه سنی ایچوب کیف یتشدیرمکه وکیمی او یله شی اولمز وار سن کندیکی بابو جی بیسوکه اوقوت دیو جواب ویرمکه ایکن صحیحاً اردوی هایونک حرکت ایلمش اولدیغی تحقق ایدیجک بویله حرکت نابهنگامه هرکس برر معنی ویره رک تهیئه اسباب سفریه



ایله پاشا دو کندیسی کبی یوله چیققدقلری ائشاده اردوی هایون برنجی مرحله یہ تقرب ایتشیدی .

وبر وجه بالا مقدما خط هایون ایله ادرنه یہ کلوب کیتمش ومؤخر آینه خط هایون ایله اردوی هایونه کلوب بوکره برلکنده عودت ایتمش اولان بغدادلی حاجی علی اغا دخی ( بر مقتضای متارکه اردوی هایونک ایلرویه حرکتی لازم کلیوب ادرنه ده اقامتی دخی بیهوده مصارفی موجب اولدیغندن اتفاق آرا ایله در سعادتہ عودتہ قرار ویرلدی ) دیو سردار اکرم طرفندن رکاب هایونه یازیلان تحریرات ایله ائشای راهده در سعادتہ اعزام ایدلمش ایدی .

واردوی هایونک حرکتدن چند روز مقدم علمدار پاشا طرفندن بوغاز ناظری معهود قباجی مصطفی اغانک اعدامی ایچون بوکار حصاری اعیانی حاجی علی اغایی دخی بر مقدار سواری ایله طوغری قره دکر بوغازنده واقع روم ایلی فنار قلعه سنه کوندر مشیدی . جمادی الآخره نک اون طقوزنجی چهارشنبه کونی بوکار حصاری اعیانی مومی ایله حاجی علی اغا علی السحر روم ایلی فنار سنه وصول و قباجینک خارج قلعه ده واقع خانه سنه نزول و حقدنه امر وار دیه رک حرمنه دخول ایله جامه خوابنده طاش یاتور بولوب باشنی قطعله علمداره ارسال و فنار قلعه سنی قبضه تصرفنه ادخال ایلمش اولدیغندن اردوی هایون چورلی مرحله سننده ایکن قباجینک سر بریده سی صو قباجی کبی غلطیده خاک مذلت اولمش و حاجی علی اغایه امداد ایچون اورادن طوغری فناره بر مقدار سواری دها کوندر لمشدر .

بو وقعه ناکه ظهور یماقلری مختل الشعور ایتمکله ایلروکنلرندن بعضیاری استانبوله کلوب واقع حالی باب عالی یہ اخبار و اغالرینک قتلی اراده سنیه ایله میدر دیو استفسار ایتدکلرنده چونکه بوکا دائر باب عالیجه اصلا معلومات اولدیغندن کیفیت قائم مقام پاشا طرفندن رکاب هایونه عرض و اعلام ایله بوکا دائر اراده سنیه اولوب اولدیغنی استعلام اولنسی اوزرینه ( بو باده اذن هایون یوقدر فقط اردوی هایون جانبندن اولسی خاطره کلور تحقیق اولنسون ) دیو بیورملغه در حال فناره مأمور لر ارسال و کیفیت بروجہ بالا بغتہ کلش اولان عسکر دن سؤال اولندقدہ اردوی هایوندن کلش اولدقلرینی و سرکرده لری بوکار حصاری اعیانی اولدیغنی بیان ایتملریله در حال رکاب هایونندن سردار اکرمه ( بونصل اولماز ایشدر سزک بوندن خبرکز واری ) دیو استعلامنامه یازیلوب استانبولده بولنان او جاقولو دخی تحقیق ماده اولنجه یہ دکن توقف و انتظار ایتک اوزره قرار ویردیلر ایسه ده یماقلر فار قلعه سنی محاصره یہ شتاب ایدوب بلا استیدان بویله بر امر خطیره اجتسار دولتجه

دخی بادیء انفعال و اغرار اوله رق طائفهٔ مرقومه نك قهر و تدمیری امر و فرمان بیورلمغه هر طرفدن فنار قلعه سنه طوپار حواله اولنه رق تضییقه قیام اولندی اعیان اغا ایسه ایشنی بجرمش و حاضر طوپ و جبخانه سی مکمل بر قلعه ایچنه کیرمش اولدیغندن بر شیئه قولاق آصمیوب و بر شی دیمیوب یالکز محاصرینه طوپ و تفنك ایله مقابله ایتمکده ایدی .

استانبول و بوغاز ایچی اها ایسی طوپ صدرلندن اورکوب انجق غوغانك اصلی ندر و کلنلر کیملردر نیچون کشار قباچینك سطوق دنیایی دتره در ایکن بو حریفلر اندن قورقیوبده نصل کله بیامش لر بورالری بیلنمدیکی جهته هر کس برر معنا ویره رک و کیمی زور بالره تعرض اولتماق عقب و قعه ده طرف دولتدن و یریلان و شیقه ده مندرج اولدیغندن بوماده او جاقولیه بادیء انفعال اولمازمی و کیمی خروج علی السلطان قضیه سنه دلالت ورهبریء عصیانه جسارت ایدنلر نهایت بلاسنی بولمازمی دیره رک درلو قیل وقال و بیهوده بسط مقال بی مال اولنمقده ایکن بغدادلی حاجی علی اگا کلوب اردوی هایون ایله علمدار پاشانك در سعادتته متوجهاً کلك اوزره اولدیغنی خبر یریحك کیجه بین العشائین شیخ الاسلام و قائم مقام پاشا سرای هایونه دعوت ایله ماده در میان اولنمقده بو حادثهٔ بوالعجب ایکیسنکده انسلاب عقل و شعورینه سبب اوله رق (خود بخود بویله بر حرکته جسارت جالب انواع مضر تدر اما صدور اذن هایون ایله اولمش ایسه بشقه کیفیتدر ) دیو طرف پادشاهیدن رخصت اولوب اولدیغنی استفهام ایتملری اوزرینه پادشاه صفوت قرین مقدا بهیج افندینك در سعادتته و رودنده تعلیم و تلقین اولدیغنی اوزره خط یازمدم دیو یمین ایله انلری تأمین ایتدکن ذکره ( یارین صدور علما و او جاقولیا یله سکبانباشی و سائر وکلا دعوت و عقد انجمن مشورت اولنوب نه وجهه تدبیر اولنور ایسه طرف هایونه تقریر اولنسون ) دیو امر ایتمکله فرداسی جمعه ایرتسی کونی اصحاب مشورت شیخ الاسلام قوناغنه دعوت اولنمقده هر کس چند روز مقدم ظهوره کلان قباچی ماده سنیدن طولایی استشاره اولنه جق ظنیله اکا کوره سوز حاضر لیوب کیش ایکن خلاف مأمول اردوی هایونك علمدار پاشا ایله برلکده عود و وقول ایتدیکی در میان اولنوب بو ورود نا کھانی مانند بلای آسانی حضارک قرین درك واذغانی اولیجق پشت بر دیوار حیرت و سبابه کزای دهشت اوله رق هر بری برر درلو افکار دلفکاره ذاهب و علی الخصوص اردوی هایون طیشاروده بولمق تقریبیله وایه دار نفوذ اولنلر بو بازارلقدن زیان کوره جکلری مطالعه سیله مضطرب اولدقلری جهته اوضاع شتر کر بهیه آغاز و درلو مالا یعنی و برچوق کلام بی معنی ایله دهان هنیانی یاز ایدوب کیمی خط هایون ایله اعاده لرینی تدبیر و کیمی

بویله خلاف رضای عالی حرکت ایدن اصحاب شقاوتہ ارأئہ رخصت مغایر قانون دولت اولدیغنی تذکیر و کیمی عسکر تعینی ایله دفع واستانبولک قبولی سد ایله ایجرویه دخولدن صد و منع اولغلمری لزومنی تقریر ایتمکده ایکن قائم مقام مصطفی پاشا بوکون سلووری به کله جککر و صالی کونی استانبوله کیره جککر دیمکله تدبیره مجال اولدیغنی مجزوم اصحاب قیسل و قال اولدیغنی کبی دفعه تحویل لسان و سمت آخره عطف عنان بیان ایدرک بعضاری ( البته اقتضا ایلمسه کلزلر و حاجت مس ایتمسه اختیاركلفت حرکت ایتمزلر ایدی ) دیوب بعضیاری دخی ( اوت اوت او یله یا لکن بر قاعده سنجاغ شریف دعوتی ایچون آدم کوندرلک لازم کلور ) دیمکله بونک اوزرینه قرار و یریلرک کیفیت رکاب هایونه لدی العرض همان اول کون طرف هایوندن خزینه و کیلی نذیر اغا دعوت ایچون کیتدی و بازار ایتسی کونی عودت ایتدی .

فرداسی یوم صالی که تموز رومینک یدیمی و جمادی الاولانک یکرمی بشیدر اردوی هایونک در سعادتہ دخولی مقرر اولدیغندن اول کون شیخ الاسلام و قائم مقام و بالجه صدور و موالی و رجال دولت لاجل الاستقبال انجیرلی چفتلکنه کیدوب سردار اکرم ایله ملاقات ایتدکن صکره علمدار پاشا طرفنده تبریک قدوم ضمنده روان اولوب علمدار اگرچه رسوم و تشریفات دولتی لایقيله بیلمز ایسه ده قوه مدبره سی مقامنده بولنوب کوسه کتخدا دیومعروف اولان احمد افندیکنک دلالت و تعریفی ایله خیمه سندن چند خطوه ایلرو حرکت ایدرک اناری استقبال و کمال توقیر و ابجال ایله خیمه سنه ادخال ایتدکده شیخ الاسلام افندی علمداره زیاده تعظیم قصدیله صدر مجلسدن منحرفه اوتوره جق اولمسیله علمدار پاشا ( بیورک افندی بیورک سزلر هم باشی بیوک هم ایشی بیوک زمهره سندن سکیز سزه رعایت ایتمکده هر کس مجبور در ) دیهرک ابرام ایله صدر مجلسه اجلاس و چند دقیقه محاوره و استیناسدن صکره قیام ایتمار یله ینه منوال مشروح اوزره تشییع ایلدی .

انجق باشی بیوک ایشی بیوک تعیرندن شیخ الاسلام افندی متأثر ورنک روی متطائر و بعض نکته شناسان دخی ( فیه مافیه ) دیوب هر بری بر محله ارجاع ضمیر ایله انجام کاره منتظر اولمش ایدی .

سلطان مصطفی خان حضر تلری دخی سنجاغ شریفی انجیرلی ایله داود پاشا ارسنده کی محل معینه استقبال ایدوب تسلیم و تسلیم قاعده سی اجرا بیورلدی و صدر اعظم ایاق اوپوب کندویه طرف شاهانه دن بر معتاد سرغوج و یرلدی بعده علمدار پاشایه دخی ایاق اوپویدرلدی و معیتنده کی اعیانلر ایله برابر چرچی چایرنده معین اولان اردو کاهنه کوندرلدی و بوندن صکره عموم اوزره حرکت اولتهرق داود پاشا قصرینه وارلدی

و داود پاشاده معتاد اولان ضیافت رسمی بوکره عفو ایله یالکنز برقهوه ایچله رک اورادن دخی حرکت ایدلدی و آلائی ایله سنجاغ شریف طوبوقودن داخل و دیوان یولیه سرای هایونه واصل اولدقدن سلطان مصطفی دخی بشقه طریقدن گلش اولسیله تکرار سنجاغ شریفک رسم تسلیم و تسلمی اجرا بیوردقدن صکره ساعت طقوزی یکر می دقیقه مرور ایدرک محله قونلدی .

بعده صدر اعظم ایله بالجه ارکان سلطنت و مأمورین دولت باب عالی به کیتدی و عمومی رسم تبریک قدوم اجرا سندن صکره هر کس یرو یریته عودت ایتدی .  
 یاقباچینک اعدامی دعواسی زدهه قالدی بونک ایچون یماقلر روم ایلی فناری قلعه سنده بوکار حصاری اعیانی حصر و تضییق ایتمکده ایدیلر بونک نتیجه سی نولدی ) اوت بومسئله واقعه پک مهم بر ماده ایدی لکن علمدارک امر بابه اولدینی تحقیق ایدیجک مسکوت عنه قالدی متعاقباً علمدار اردوسیه کلوب اسواق استانبول بر طاقم شاکی السلاح و آماده کفاح اولان روم ایلی عسکر لریله طولدی آنلرک هر کون بویه هیئت مسلحه و کندولرینه مخصوص قیافت غریبه لری ایله استانبول ایچنده کزوب طولاشملرندن قلوب عامه به اولقدر خوف و دهشت کلدی که بوغاز ایچنده دکل طوبوخاندهه طوب آتلسه کمسنه نک قولاغی ایشتمز و یماقلر او دعوائی در میان ایتک شو یله طورسون کمسنه عجا قباچینی نیچون اعدام اولمش و اعدام ایدن کیم ایش دیو سؤاله جسارت ایتز اولدی و روم ایلیدن برچوق اعیانلر گلش اولدینی جهته بوکار حصاری اعیاننک دخی اسمی اونودلدی .

قباچینی ماده سی ضمننده او جاقلودن ایکی بنام او طه باشی اعدام اولدی بر طرفدن بر دعوی و وقوع بولدی بلکه سبب اعداملرینی صورن اولدی کدی کبی خلقک یوزینه آتیلان یماقلر کدی کورمش فاریه دوندی کویک کبی زقاقلرده اهل عرضی بیزار ایدن زور بالر قوزی کبی ملایم اولدی بو جهته عامه ناس امن و استراحت بولدی زیرا علمدار پاشا اوته دنبرو جلادت و شجاعته شهیر و طونه یالیسنده مناقب حرور و شجاعتی مسموع هر صغیر و کبیر و بو جهته مهابتی اذهان خواص و عوامده جایکیر اولدیغندن بویه ناکهان عسا کر کلیه ایله استیلا صورتنده دار سلطنته وارد اولیجق عامه نی خوف و دهشت استیلا ایش اولدیغندن استانبولده قورت ایله قیون برابر کزردی و کمسنه دولت ایشنه قارشق شو یله طورسون نه اولمش نه اوله جق ایش دیو صور مقندن حذر ایدردی .

جمادی الاولانک یکر می یدنجی پنجشنبه کونی علمدار پاشا عظیم کویکه ایله باب عالی به کدی لکن کویکه سی البسه رسمیه زیبایشی و رسوم و تشریفات آلاشی اولیوب بلکه بش التی بیک قدر کزیده و اسلحه سی مکمل عسکرک نمایش و دبدبه سی ایدی .

بویله حشمت ودهشت ایله باب عالیده چند ساعت اقامت ایتدیکی ائشاده اولدن تصمیم اولندیغی اوزره سابقاً روم ایلی قاضی عسکری عرب زاده عارف افندی سرای هایونه دعوت و حضور هایونده اکسای فروه بیضای مشیخت بیوریلوب و عطاء الله افندی بیکده کی ساخنه سنده اقامته مأمور ایدیلوب بعده علمدار پاشا اردوسنه عودت ایتدی و زور با قورقوسی قلمدیغندن شورایه بورایه دوشمک و یکیکچری بی تحریک ایتمک کی فسادلرک تأثیری اولمیه جنی معلوم اولمغه عطاء الله افندی طرفدارانی قوربانلق قویون کی نوبته یاتدی.

وایکی کون صکره روم ایلی قاضی عسکری محمود چاوش زاده شمس الدین افندی بروسیه و صدر اناتولی لومی علی افندی زاده محمود نورالدین افندی کوتاهییه و صدر اناتولی پایه لورندن خواجه منیب افندی انقریه نفی و تغریب ایله امشالی تریب ایدلدی و بالاده بعض اطوار سیئته سی بیان اولنان و ایغر امام دیو معروف اولان امام اول شهر یاری درویش محمد افندی امامتدن عزل ایله یرینه امام ثانی شهر یاری تاتار حافظ احمد افندی امام اول و مؤذن باشی عبدالکریم افندی امام ثانی اولدی .

اولوجهله متغلبه نك رفع وازاله لرینه تشبث اولندیغی ائشاده طرف سلطنتدن هدیای بهیه ایصالی و رسم خوش آمدی اجرایی ضمننده علمدار پاشا اردوسنه کیدوب کلان قرناى شهر یاری کرکی کی اغفال اولنمش اولدقلرندن علمدار پاشانک طور و حرکتی اندرون هایون طاقنک موجب ممنونیتی اولمقده ایدی .

بیرون خلقنک دخی چوغی اردوی هایون ایله علمدارک بویله ورود ناکهانینسندن مراد مجرد شیخ الاسلام ایله طرفدارلرینی طرد و ابعاد ایدوکنه ذاهب اوله رق بواجرات ایله ایش بتدی دیو ظن و اعتقاد ایده یورلردی .

امادور اندیشان زمانه دن بعض اصحاب رشد ونها اومقوله امر جزئی ایچون بورتبه لرده کلفت منافی عقل و رویت اولدیغی مطالعه سیله \* چون اسکی مثلدر دینور الیلله حبلی \* سیر ایله نلر طوغره جقدر زن دنیا \* بیتتی کویا و انجماکاره مد نظر انتظار ایله دیده کشا ایدیلر .

صدراعظم چایی مصطفی پاشا دخی بوتشبتاندن ممنون اوله رق برآن اقدام حیز فعله کلسنه اقدام و اعتقاد ایده یوردی زیرا استانبولده کی متغلبه نك کندو حقه نه مودت و توجه لری اولدیغی بیلدیکنندن رفع وازاله لرینی هر ایشدن اهم و اقدام کوره یوردی واقعا سلطان سلیم عصرینک اصولی دخی انک افکارینه موافق اولمیوب بوجهته سلطان سلیمک تکرار جلوسنی ایستمزدی لکن ایشک ایچ یوزی کندوسندن

مکتوم طو تلمش اولدیغنه مبنی او دخی ساده دلان عوام ناس کبی علمدارک استانبوله گلکسندن مقصود انجق بینلرنده جریان ایدن مقاله حسینیه کریبان دولتی متغلبه لندن تخلیصه بذل مجهود ایتمکدن عبارت اولدیغی اعتقادنده بولنسیله برکون اقدام مصاحبت بتسون و علمدار مملکتته کیتسونده کندوسی مقام صادرته مستقل قاهره ایستدیکی کبی آتوب طوتسون دیو اجرا آتده مسارعت ایده بوردی روسجق یارانای طرفندن دخی بویولده آلقشلا تمقده اولدیغنه مبنی اجراءات واقعه مجرد علمدارک قلبیجی سایه سنده ایکن بوراسنی ذهنندن چیقاروب کندوسنی کو پر یلیء ثانی ونظام المملکه مدانی عدایدرک عالمه ظفره فروش کبر وعظمت اولغنه باشلادی .

حالبوکه سلطان مصطفی سنجاغ شریفک استقبالنه چیققدقه هان داود پاشا قصرنده توقیف ایله طوغری سرای هایونه واریلوب تهلمکه سزجه سلطان سلیمک اجلاس اولنسنی رامز افندی رأی وتدبیر ایتمشیکن علمدار پاشا ( بویله تحبه لکله ایش کورمک مردلکه یاقشماز ) دیوب دیگر یاران روسجق دخی ( شمدی بتون خلق ایقده در وسنجاغ شریفک استقبالنه کلان پادشاهک توقیفی ثقیل اولور چند روز ظرفنده متغلبه نك رفع وازاله سیله ابراز خدمت اولندیغی صروده مقر بین شهر یاری دخی کرکی کبی اغفال وتغلیط اولنور بعده دردست اولان صالح وسفر خصوصری ایچون حضور هایونده بر مجلس ترتیب اولنهرق بو وسیله ایله غائله سزجه سلطان سلیم اجلاس ایدیلور ) دیملریله بینلرنده بوضورته قرار ویرلمشیدی .

بروجه بالا متغلبه نك ایلرو کلنلری اره دن چیقارلیدی وحضور هایونده عقد مجلس ایده جک وقت کلدی فقط قپودان دریا سیدی علی پاشانک زور بالزله اختلاطی معلوم اولدیغندن انک دخی عزلی اهم واقدم کورلیدی واجراسی صدر اعظمه تکلیف ایدلیدی او دخی تنسیب ایله عرض ایلدیسده سیدی علی پاشا الده تسبیح بلده مسواک وظاهراً صوم وصلاته انهماک ایله ظاهر بینان اندرونی اغفال ایلمش ووجوه معاصی ومظالمی برده ربا ارقه سنده کیزله مش اولدیغندن اکثر مقر بان سلطنت انک صلاح حالته شهادت و بعضیاری دخی عزلی تقدیرنده قپودانلق باش چوقدار فجاج اغایه موعود اولدیغندن انی استرقاب ایدرک بر مقتضای ( لالحب علی بل لبغض معاویه ) مجرد انک قپودانلغنه مانع اولوق داعیه سیله سیدی علی پاشا اوزرینه بسط اجنحه صحابت وحمایت وجزائر غرب اوجاغنده یتشمش یکتلردن واجلاف و اوباش اره سنده پاله سوریمش خاطر ی صاییلور ایتلردن اولدیغنه مبنی لدی الاقتضا طرف سلطنتک محافظه سنه مقتدر اولور خولیا سیله سلطان مصطفی دخی عزلندن مجانب ایتدکن بشقه والده سلطان دخی صلحادن آدمدر واوغلمی محافظه یه قدرتی مسامدر

دیو عزلندن فراغت اولنسی ایچون صدر اعظمه حکمنامه کوندرمش اولسمله عزلندن صرف نظر اولنق لازم کلوب روسجق یاران ایسه متغلبه نك رفع وازاله لری حقدنه سبق ایدن مقاوله یی اخطار ایله بوبابده اصرار ایستدکر ندن صدر اعظم مضطرب و متحیر اوله رق علمدار پاشایه (مقاوله مز اوزره متغلبه نك دفعنه طرفزدن نه رتبه لرده اهتمام اولدینی درکاردر فقط مقتضای حاله نظرأ بعض خصوصانک تأخیرینه لزوم واردر کندولری سلامتله عودت بیورسونلر بن بوراده ایستدکر ندن اعلی نصل ایشه نظام ویریرم کورسونلر بوندن بویله ارتق بو طرفلردن اقامت لری موجب بر حال قلمدی) دیو خبرلر ارسال و تکلیف عودت و ارتحال ایله عاداتا استثقال ایلدکده علمدار پاشا (یوق عفو ایدرلر بزم قول و قرار مز دواتی متغلبه لندن قور تار مق ایله مشروطدر وعودتمز بونک تمامیله اجر اسنه منوطدر) دیو لسانی تحویل ولهجه ملائقی خشونت و عناده تبدیل ایدیک صدر اعظم بویله مأمول اتمدیکی برطور و معامله دن متأثر و ایشک رنگنی بکنمیوب و نه تدبیر ایده جکی بیله میوب متحیر ایکن جمادی الآخره نك اوچنجی کونی بعض خیر خواهانی طرفدن مرام خفی اعاده جلوس کیفیتی اولدینی کندویه اخطار اولنوب بو ایسه انک ایشنه الویر میه جکندن در عقب بعض مقر بین واسطه سیله کیفیتی سلطان مصطفایه عرض ایلدکده چونکه مقدما اندرون هایون طرفی اغفال اولنمش ایدو کندن سلطان مصطفی صدر اعظمک بو اخطارینه اهمیت ویرمدیکنه مبنی صدر اعظم خواص قرنادن بعضیلرینی جلب ایله (ایش ایشدن کچور شوکتآب افندیمز بکارخصت احسان بیورسون شمعی درون استانبولده بولنان رفیق افندی ایله رفیق لری ایدم ایدیم خارجه یالکیز علمدار ایله رامز قالور استانبول قولرینی قیاز و او جاقلو ایله بالاتفاق آنلرک دخی چاره سنه بقارز والا صکره ندامتی چکیلور) دیو تبلیغ مرام ایستدکده نذیر اغا و سائر خواص قرنا (علمدار پاشانک طرف هایونه خدمت و بازوی سطوت شاهانه یی تقویتدن بشقه مرادی اولدینی جهانک معلومیدر صاحب دولت حضر تلی بیهوده راحتسز اولمشلر اوله بر طاقم اوهامه تبعیله سدی ناقابل اولان ابواب فساد کشاد ایتک کار عاقل دکدر) دیو جواب ویرملریله صدر اعظم کندوسنک فریادی (لقد اسمعت لونا دیت حیا \* ولکن لاحیاه لمن تنادی) بیتک موافق مفادی اولدیغنی کوروب تأسف ایتدکده ایکن رفیق افندی ایله رفیق لری بو مخبره خضیه و واقف اولدقلری کبی واقع حالی بیان ایله رامز افندی به تذکره تسیار و هرچه باد اباد یولنده حرکتیه مسارعت اولنماز ایسه نتیجه سی وخیم اوله جغنی اخطار ایتلری اوزرینه فرداسی یعنی جمادی الآخره نك دردنجی پخشینه

کونی علمدار پاشا علی السحر اون بشیکدن زیاده عسکر ایله استانبوله کیروب  
 وباب عالی به ورود ایله طوغری عرض او طه سنه کیدوب چونکه منافسه سابقه به  
 محاصمه لاحقه منضم اولدیغندن صدراعظم چایی مصطفی پاشایه لوم و نفرین و اظهار  
 خشم و کین ایله ( بره حریف مهر هایونی ویر ) دیدیکی کبی چایی مصطفی پاشا  
 کندوسنی شاشیروب و دست رعشه داری گاه جینه و گاه قولتوغنی التته کیدرک نهایت  
 مهر هایونی چیقاروب تسلیم ایتدکده چونکه علمدار پاشا مهر هایونی نه یایمق لازم  
 کله جکنی بیامدیکندن مهر هایون الندہ قالبوب فقط رفیق افندینک تعلیمی ایله  
 چاوشباشی تحسین افندی به تسلیم ایتدکدنصکره چایی مصطفی پاشایی معیتده کی  
 اعیانلردن بوشناق اغایه تسلیم ویالکنز جه بر بار کیره ارکاب و بر مقدار سوارای ایله  
 چرپیچی چاپرنده کی اردوسنه تسیاری و مستشار خاصی اولان رامز افندینک دلالتی  
 ایله همان شیخ الاسلام ایله صدور عظامی دعوت و احضار ایلدی .

شیخ الاسلام عرب زاده عارف افندی هنوز مقام مشیخته کلش نازک و چایی بردات  
 اولوب جبراً صدر اعظمک یدندن مهر هایون استرداد ایدلمش و بر قوجی باشی پایه سنده  
 مباشر تعیینی ایله باب عالی دن قالدیریلوب سر عسکر اردوسنه کوندرلمش اولدیغنی  
 او کرونوب و کندوسنی دیو کبی بر چوق روم ایلی اعیانلری ایچنده کوروب  
 اور کهرک متحیر و مدهوش و عرض او طه سنه کلور کلز علمدار پاشا ( دین و دولته  
 دائر ایشلر مز و اردر نزد هایونه وارمق لازم کلدی قالدی کیده لم ) دیجک دقیقه بی  
 فهم و ادراک ایله بتون بتون بیهوش اوله رق قیام و قعودی فراموش ایتدی علمدار  
 ایسه آنک بویله آغز جه طاورانمسنندن تهور ایدرک ( عرب او غامیسین نه سین  
 قالدی ) دیو بلند آواز ایله نعره زن مهابت اولیجق بیچاره افندی بتون بتون کندوی  
 شاشر مغله تجدید ایمان ایدرک قالدیوب و یخود اوله رق هم رکاب اولوب کیتدی .

علمدارک بو حرکتی اندرون هایونه منعکس اولدقده بر عظیم غلغله پیدا و هرج  
 و مرج علامتلی هویدا اوله رق آیانه ایشلسه ک عجبا نه تدیر ایلسه ک دیرکن علمدار  
 پاشا صفوق چشمه قپوسندن سرای هایونه کیروب و اورته قپوده طوروب دارالسعاده  
 اغامی یعنی قیزلر اغامی اولان مرجان اغایی جلب ایله ( عموماً علما و رجال دولت  
 و روم ایلی اغاری و اناطولی خاندانلری سلطان سلیم افندی مزک جلوسنی مطلوب  
 ایدیهورلر آنکچون بو محله کلک هایدی سلطان سلیم افندی مزی چیقارک اجلاس  
 ایدلم ) دیو افاده و اعاده و آرقه دن شیخ الاسلام افندی بی دخی سلطان مصطفایه بیان  
 حال ایتک اوزره ارسال ایلدی .

شیخ الاسلام افندی حضور هایونه چیقوب علمداردن ایشتدیکنی افاده به ابتدار



ایدر ایتمز سلطان مصطفی آتش فشان خشم و غضب اوله رق ( بو فساده سنده پاشا ایله متفق ایتمش سین که اوکنه دوشوبده بی خلع ایتمکه کلک شمدی سی پاره پاره ایدرم ) دیو تهید ایتسی اوزرینه شیخ الاسلام افندی عرض معذرت ایدهم دیرکن ( بیقل کیت فلان و فلان حریف شمدی بودرنکی طاغت و پاشایی اعاده ایت یوخسه سنی شو یله بویله ایدرم ) دیمکه شیخ الاسلام افندی طیشارو چیقوب قرنا یادکارلری دخی کویا بوماده نک موجود و مروجی مفتی ایتمش کبی الفاظ شیعیه ایله سب ایدرک اعاده ایلمش اولدقلرندن افندی سراسیمه اوله رق چیته کلوب کمال تلاشندن سروبی یوق سوزلر سویلمکه باشلا ییچق علمدار پاشا غضبه کلوب ( بره منافق حریف سن ایچروده ایشی بشقه قابله دوکدک تیز وار بوایشه برصورت ویر ) دیو انواع تهدیدات ایله اعاده ایتدکده زوالی افندی ایکی آتش ااره سنده قلش و پوصودن پوصویه اوغرامش کیک هراسان کبی نه یاپه جغنی بیلمیوب ( نه جای سستیزونه سمت کریز ) دیهرک وایکی قواره سنده شکار نیم بسمل کبی مأیوسانه و متحیرانه کشت و کذار ایلیهرک هله براز عقانی باشنه دوشیروب ینه عودت ایله تاثیر نصیحتدن مأیوس اولدیغنی علمداره افاده ایتدیکی ائنده آق اغالر قپوسی سد اولندیغندن علمدار پاشا سکر دوب بالطه و قازمه لرله قپونک کسر و هدمنه سعی مزید و مهیب صیحه لرله ایچروده کیلری تهید ایده کورسون کله اندرونک حالته . سلطان مصطفی قرناسنی حضورینه جمع واحضار ایله بودردک چاره سی نه اوله بیلور دیو استفسار ایتدکده ( سلطان سلیم ایله سلطان محمود اعدام اولنور ایسه بالطبع تخت سلطنتده پایدار اولور سکر هان رخصت ویر حرم هایونه کیروب انلری اعدام ایده لم فقط اولوقته قدر باب السعاده مسدود طوتلسون ) دیملریله شهریار صاف درون حضر تلری دخی رخصت ویرمش و آق اغالر قپوسی سد ایتدرمش اولدیغنه مبنی مقر بین مومی الیهمدن باش چوقدار اولان عبدالقتاح عدیم الفلاح و خزینه کتخداسی ایه سلیم نام لئیم و حرم هایون اغالرندن دنیا و آخرتده یوزی قاره نذیر نام خنزیر و امیر آخور اوله جق دلی ایوب اوغلی محمد نام شخص واجب التدمیر و تبدیل خاصکیسی بغدادلی حاجی علی و اوادان بوستانجیلرندن دلی مصطفی نام کشتیلر و مستحفظ سرای سلطانی اوله جق دیگر بوستانجیلر ایله بالطه جیلردن برطاقم بی امان و بی ایمان خانلری استصحاب ایله یکر می قدر کشتنی اولدقلری حالده حرم هایونه عزیز میترنده کیفیت حرم اغالری دائره سنده معلوم اولمش ایسه ده بیوک اغا یعنی قیزلر اغاسی مرجان اغا دخی بوکشتیلر ایله هم افکار اولدیغندن کویا خوف و تلاش ایله نه یاپه جغنی شاشرمش کبی دائره سنه چکلشمش و صورت مساعده ده ازوا صورتی

اختیار ایله قارشودن سیرجی اولمش ایدی حالبوکه هنوز علمدارك یاندن کلوب سلطان سلیمی سالماً حرم هایوندن چیقارمغه اوامور ایدی و دارالسعادة اغاسی بولدیغی جهتله اندرون هایونده جمله نك بیوکی اوله رق کافه اندرون هایون اغاری و علی الخصوص کندو قومی اولان طواشی طاقی حقنده نفوذی جاری اولوب حرم هایون ایسه بالخاصه انک نظارتنده اولسیله انک رخصت و موافقتی اولدقجه حرم هایونه کسسنه نك دخولی قابل اوله میه جغندن بوایشده برنجی درجده مسؤل ایدی لکن کمال بلاهتدن ناشی صکره علمدارك پنجه سندن یقه سنی قور تاره میه جغنی تذکر ایتیموردی و بوجه بالا علمدار پاشا آق اغار قپوسنی بالطه وقازمه لرله دوکمه کده و مهیب صیحه لر ایله ایچروده کیلری سوکمه کده ایکن فرط غباوت و قساوت قابیه سندن ناشی بوقدر قورقونج صدا و کورلدیلری دخی ایشتمیوردی .

و بوستانجی باشی علی اغا علی روایه بوحر کته مانع اولمق ایستدکده مرقوم خائنلر کندوسنی ضرب ایله بیتاب ایتدکن یاخود اولجه کندویه بیان کیفیتله تهدید ایلدکدنصکره بوجنایتک اجراسنه مباشرت ایشلدردر .

و چونکه بیوک اغا بوجه مشروح خونیه مساعد اولوب ولی نعمتی و سبب دولتی اولان برذات ملکومات حقنده بواهانته جواز کوستردیکی کبی دیگر لرك منعی مشکل اولدیغندن سائر خدمه طرفندن دخی اول خائنلره ممانعت ایدن اولمیوب فقط حرم اغالردن شهزاده سلطان محمودك لالاسی اولان عنبر اغا ایله برکرچی جاریه بوایده فوق العاده فدا کارلق ابراز ایله اثبات مدعای صداقت و علمدار آق اغار قپوسنی قیرونده ایچرویه کیرنجیه دک سلطان محمودك محافظه و اخفاسنه غیرت ایشلدردر .

اولوقت باش لالا بولنان طیار افنیدن روایت اولندیغنه کوره اول کشتیلر حرم هایونه طوغری عزیمت ایتدکنرنده طیار افندی فتاحک یانته یناشوب ( زده یه کیدیورسکیز بوسودادن واز کچیکیز بونک و خامتی کوریلور نتیجه سنده ندامت چکیلور ) دیو نصیحت ایتیمی اوزرینه ابتدا شو سلطان سلیمیلیری بتورهلم دیوسل سین ایله اوزرینه هجوم ایتدکنرندن طیار افندی فرار ایدوب نذیر دخی براغکنز انکله اوغراشمغه وقت مساعد دکدر بزایشمزه باقهلم دیوانلری دوندرمکله همان جمله سی خانه خاصیه جوار اولان رم هایون قپوسندن ایچرویه دخول ایله ساطال سلیم دائره سنه هجوم ایشلر طیار افندی ایسه یم جان سفرلی دائره سنه طوغری قاچوب فی الاصل سلطان محمودك لالاسی واولوقت سفرلی کتخداسی بولنان رجب پاشا زاده محمد بکه بیان حال ایتدیکی ائنده امام اول شهر یاری تاتار حافظ احمد افندی یانلرینه کلوب میانه لرنده لدی الاستشاره چونکه علمدار پاشا

آق اغالر قوسنی قیرمق اوزره بولندیغندن هر نصل اولورسه اولسون حرم هایونه کیریلوبده سلطان سلیم ایله سلطان محمودک حرم هایون باجه سندن قوشخانه به محاذی و عرض اوطه سنه ناظر اولان طام اوزرینه چیقارملری خصوصه اقدام اولمق فرائض حالدن کورلمکله سلطان سلیم چراغلرندن اولوب قوشخانه نام محله نوبتچی بوانان سالف الذکر عنبر اغا ایله رفیق حافظ عیسی اغایه افاده حال ایتدکرنده انلر دخی سر یعاً حرم هایونه عزیمت ایتمشلر ایسه ده مرقوم خائنلر اولجه سلطان سلیمک کارینی اتمام ایلمش اولدق لرینی اکلا یوب اندن مایوس اولملریله باری سلطان محمودک استخلاصی چاره سنه باقق اوزره انک دائره سنه واردق لری عقبنده قاتلر دخی اورایه هجوم ایدمک ایکیسی بردن سل سیف ایله مدافعه و محافظه یه قیام ایتدک لری صرده اول جاریه محمودة العاقبه خارق العاده برجسارت کوستر مشدر شویله که : سلطان سلیم دائره سنده کی کورلدی پی طویوب و سلطان محمود دائره سنه دخی نوبت کله جکی مطالعه سیله اسباب مدافعه تدارکی قیدینه دوشوب فقط بشقه برشی بوله مدیغنه مبنی حمام کلخانندن برکاسه کول آلوب حاضرلمش ایدو کندن بو کره قاتلرک هجومنده هان کوزلرینه کول سرپوب وانلر کوزلرینی سیلوب آچیم دیدکجه تکرار کول سرپه رک انلری مشغول ایدوب عنبر و عیسی اغالر دخی بونی فرصت اتخا ذ ایدرک سلطان محمودی طام اوستنه چیقارمشلر .

بوانشاده ابه سلیمک آتدینی خنجر سلطان محمودک برقولنی صیروب کچهرک جزئی جریحه دار ایتدیکی کبی تلاش ایله چیتارکن جبهه سنی قونک سوه سنه چار پمغله صاغ قاشنک اوستی دخی برپارچه پاره لشمش ایدی .

ایشته اول جاریه بعده جوری اوسته دیو شهرت بولان و سلطان احمد جامی میدانه قارشو کار کیر سبیل و چشمه و مکتبک بانسی اولان خزینه دار جوری اوسته در ( علیها رحمة الرحمن وصبت علی مضجعها سجال الغفران ) .

سلطان محمود بروجه بالا ایکی یرندن یاره لی و برملی اولدینی حالده صون صمدانی ایله اول خونین و خائن کشتیلردن قورتیله رق بالای طامه چیقوب مانند هلال عید اعلا ی طاقدن ظاهر و بید اولیجق اشاعیده مترصد و منتظر اولان سالف الذکر امام حافظ احمد افندی و محمد بک و طیار افندی و اشعارنده سابق تلخیص ایدوب قویون بیان عارف اغا دیو معروف اولان عارف اغا قوشخانه و مشفقخانه دن تدارک ایتدک لری نردبانلری بلارنده کی قوشاقلریله یکدیگره ربط ایدرک مشار ایله حضر تلرینی اشاعی الملق ایله مشغول اولدق لری خلاصه قاتلر کویا علمداری مایوس ایدوبده ادعا سندن واز کچورمک خیال فاسدیله سلطان سلیمک نعش لطیفی برشلته

اوزرنده اولديغى حالده چيقاروب هنوز عرض او طه سنك باب السعاده محاذى اولان بيوك قپوسى او كندهكى صفهيه قوميشلر ايدى كه علمدار پاشا دخى قپويى قپروب در عقب اچرويه كيردى .

سلطان سليم شهيدك وجود سعيدى سراپا قانه بويامش واعضاسى هپ ياره لشمش وبره لشمش وصاغ شقاغتك دريسى حليه مباركه سيله برابر چكه سنه قدر اشمش اولديغى سن علمدار پاشا انى بو حالده كوريجك جكرى سوزان وكوزلى كريان اوله رق ( وای افندم سنى اجلاس ايجون بو قدر يردن شد رحل ايدوب گلشيكن شو كوزلم سنى بو حالده كوردى شو اندرون خالق ديدكلى خانلىرى قتل عام ايله انتقام الهيم ) ديه رك نعش مباركه صاريلوب يره قپانديغى كبي بونجه وحشى اعيان وسكبانلر شاكى السلاح اوله رق جوش وخروشه كلوب ايشيدلمك غاغله دهشت فزا واستانبولجه كورلمك اعجوبه قيافت واشكال حيرت نملرى ايله سراى اچنده توج ايدر اولديلر .

لكن كمنه نه اوله جغنى وايش نده نتيجه بوله جغنى بيله ميوب هر كس بو حال دهشت ماله نظر حيرت ايله باقوردى وعلمدارك كو ك كبي كورله مسى وقليج ويتانلرك شمشك كبي پارله مسى ارده سنده سلطان سليمك حال پرملانى كورنلرك كوزلرندن ياغمور كبي ياش اقيوردى دنياك صوك دقيقه سى كلش ظن اولنه يوردى وفي الواقع اول ارالق دولت عليه بر بيوك تهلكه ده بولنه يوردى زيرا علمدارك عسكرى بر كروه وحشت انبوه اولوب نه اندرون طاقتى بيلورلردى ونده بيرون خلقنى تميز ايد بيلورلردى بلكه چونغى پادشاهك نوع بنى آدمدن اولوب اولديغنى بيلمىوب فقط بروجود مقدس اولديغنى بيلورلردى يولنه جان ويردكلى علمدارك بويه پادشاه جنازه سى ديو كريان اوله رق اوزرينه قپانديغى كوروبده انتقام لاقرديسى ايشتكلى كبي صبر واختيارلرى الم دن كيدوب بولدقلى خالق اولدرمك شويه طورسون سرايك ديوارلرني خاك ايله يكسان ايتسهر كندولرنجه تشفى صدر حاصل اوله مازدى ارتق كيم قاله جق وكيم اوله جك جناب حقدن بشقه برفرد بيله مزدى بو تقديرجه معاذالله تعالى سلاله عثمانيه انقراض بولمق وبوسيله ملت اسلاميه پریشان اولمق احتمالى وبرعجب ومهيب هرج ومرج حالى كلوب كورندى هله رامنر افدى يتيشوب ( امان افندم شمدى اولمشه اغلانه جق واولمشك انتقامى اله جق وقت دكلدر شمدى غايت تنك وتتك برآندر دولتى تهلكه دن قورتاره جق پك نازك زماندر تختك صاحبنى بولوبده اجلاس ايتلىز مبادا كه سلطان محمود افنديز ده دخى بر كزند وزيان ايرشميه ) ديچك علمدارك عقلى باشنه

کلیکله برابر جان باشنه صیچرایوب (امان سلطان محمود افندیمزه باقک طاملره چیقک شوراسنی بوراسنی بیقک) دیو صیحه و فریاد ایتمکله عسکر حرکته کلوب انجق اندرون خاقی تفرق ایله کیمی برر کوشه و بوجاغه سینمش و کیمی محزنلره و سردا بلره قاچوب کیزلتمش اولدقلرندن و علمدارک عسکری ایسه هنوز روم یالیدن ککش غریب آدملر اولملریله سرای هایونک قوسنی باجهسنی بیلمدکلرندن کیمی یالین قلیج ویتاغانلر ایله اوته برو طولاشور و کیمی طاملره چیقمغه چالیشور اولدقلری جهته اورته ده برغریب قارغشلق پیدا اولدی .

ایشته اول شاشقنلق ودهشتلو برقاریشقلق اره سنده امام اول شهریارى حافظ احمد افندی ایله رفیقلىرى سلطان محمودى کوچ حال ایله بالای طاقدن ایندیروب حافظ احمد افندی اوکنه دوشهرك و محمد بك ایله طیار افندی برر قولتوغنه کیرهرك کلیکله اولدقلری علمدار پاشانک مشهودى اولوب غایت قورقونج برسس ایله بوکیمدر دیجک جمله دهشت واول غلبه لکه سکونت کلدی وهر کسک چشم وکوشی اولطرفه منعطف اولدی .

بونک اوزرینه امام احمد افندی ایبر ولیوب (ایشته سلطان محمود افندیمز بودر نوبت خلافت کندولرینکدر بن بیعت ایلدم مصلحت خیره نك اتمای سزک همتکنزه قالدی) دیدکده علمدار پاشا سلطان محموده خطاباً (آه افندم بن عموجه کی تخته چیقارمق ایچون ککشیدم کور اوله سی کوزلرم انی بو حالده کوردی باری سنی اجلاس ایله متسلی اولهیم لکن اکا قییان و آنی بو حاله قویان اندرون خاقیدر انلری کافه قلیجدن کچوره جکم) دیمنه مقابله احمد افندی (افندم اندرون خلقنک نه قباحتی وار بو جنایتی ایشلیانلر معلومدر افندیمز انلری بولدیروب اجرای مجازاتلری ایچون سزه کوندرر) دیسی اوزرینه سلطان محمود خان دخی علمداره ایلك امری اولمق اوزره (پاشا بن انلری بولدیروب سکا کوندریرم سن عسکرینی طاغت و سلاحلریکی چیقار خرقة سعادت دائره سنه کیدم) دیو امر ایتمکله علمدار پاشا عسکره خطاباً طیارو چیقک دیدیکی آنده جمله سی طیارو چیقوب میدانده غلبه لکدن اثر قالدی یالکیز یاننده چندنفر آدمی قالدی و بر موجب فرمان سلاحلرینی چیقاروب فقط بلنده کی مرصع پالیه نظر ایدرک افندم عموجه کک یادکاریدر بونی چیقارم دیوب سلطان محمود دخی رخصت ویرمکله پاله بلنده اوله رق برلکده خرقة شریفه دائره سنه روان اولدیلر .

اول قدر وحشی طوائف عسکرینه نك علمداره بو مرتبه اطاعتلری و عساکر نظامیه کی بر اشارتیه بر موجب اراده حرکتلری اولوقته کوره شایان دقت بر کیفیت

ایسه ده اندن دها زیاده شایان اهمیت بر ماده وارد که سلطان محمود خان حضر تلی اولوقت یکر می درت یاشنده اولوب انجق بویله بر غلبه لك ایچنه دوشامش واعصار سالفه حکمنجه اولوقته قدر خدمه خاصه سندن غیري کمسنه ایله کور شامش اولدیغنه وجلادلر اندن هنوز خلاص بولدیغنه نظراً بویله بردن بره دوچار اولدیغی بر حال دهشت اشمال ایله کندوسنی شاشرمق لازم کلورکن اصلا فتور کتور میهرک ویاره وبره سنه اهمیت ویرمیهرك ارسالان کبی میدانده جلادت و بسالت کوستر میسی و علمدار کبی تهدیدینی ایقاعه مقتدر بر آدمه ابتدا کی کلامی اولوق اوزره عسکرینی طاغت و سلاحلر یکی چیقار دیو امر ویرمیسی فوق العاده بر شجاعت فطریه به دلیل و اشارت ایدی و اولوقت دولتعلیه نك دخی بویله جسور بر پادشاه شدت احتیاجی اولدیغندن بو جساتی ملته بر کوزل بشارت ایدی علمدار پاشادن منقولدر که (خنکارک بویله برنجی اراده سی بکا او قدر دهشت ویردی که عمر مده اول قدر متأثر اولدیغمی بیلمم) دیر ایش بزینه مانخن فیه مزه کله م .

سلطان محمود خان حضر تلی خرقة سعادت او طه سنه کیروب علمدار پاشا دخی طاتلو و قهوه رسمنک اجراسی ضمننده ارسالانخانه تعبیر اولنور طیش. دائرة ده آرام ایتدیرلدی .

ارسالانخانه خرقة شریفه او طه سنک طیش طرفی دیمک اولوب اسلاف سلاطین عثمانیه حضراتی تلخیصلری بوراده قبول ایله فتح و قرائت بیوررلر و لازم کلان امرلری ویررلر ایدی بو جهته عرضخانه دیو تسمیه اولنوب بعده غلط اوله رق ارسالانخانه دینامشدر .

علمدار پاشا بوراده کوکره مش ارسالان کبی توقف و آرام اوزره ایکن ساطان مصطفی سنت و صارق او طه لری اوکنده و حوض اوزرنده اولان بغداد کوشکی صفه سنده کزینهرک ( بن تختدن ایتمم محمودی کیم چیقاردی ) دیو سویلنمکده اولدیغندن علمدار پاشا ( بوکیم سلطان مصطفاهی سویلیک اکا بو جاغه کیتسون یوخسه المدن قیامته قدر لغتلمه اوله جق بر ایش صدورینه سبب اولور ) دیمسیله امام احمد افندی و دیگر بعض رفقای یانه و اروپ ( اقدم تحت عالیده قسمتکنر بو قدر مش بر ازده حرم هایونی تشریف ایله استراحت بیوریکنر ) دیهرک حرمة اعزاز ایتدکاری اننده والده سی مابین هایون قبوسنه کله رک برچوق فریاد ایله عریبه ایلمش و تویخیخ و دشنام سیاقده خیلی سوزلر سویلمش ایسه ده چونکه روم ایلی اصلونجه قادینلره سلاح چیکله مز و اغرظالاشندن بشقه برشی یایله میوب بویوله دخی انلره باشه چیقیه ماز اولدیغندن علمدار پاشا کدی کبی سینوب و بو کورلدی به

قارشمیوب فقط امام افندی انی دخی اسکات واقناع ایله حرم هایونه ارجاع ایلمشدر .  
 علمداره طاتلو و قهوه و یرمک اوزره قهوه جی باشی ارا نیلوب بولنه مدیغندن و سراسی  
 هایونجه بومثلو مراسمک اجراسنه زیاده اعتنا اولنه کلدیکندن طیار افندی طاتلو  
 حقه سنی بولوب کندویه ارا نه ایتدکده تسمیم اولنمق خوفیه رغبتدن ابا ایده جکنی  
 چین جینندن اکلامغله هان حضورنده طاتلو قاشغیله حقه بی دائراً مادار قارشیدر ورق  
 کندوسی بر قاشق اخذ و تناول و دلبند ایله قاشغی تطهیر ایتدکدن صکره عرض  
 ایدنجه (آفرین اختیار آبه سن نه عقللو آدم ایمش سین) دیو تلظیف ایتدکدن صکره  
 بر قاشق طاتلو اخذ و تناول ایتمک معناد ایکن استانبولک رسم و عادتتی بیامدیکندن  
 قاشقوله برابر حقه بی دخی الوب و ایچنده کی طاتلوی تماماً ییوب بتور مشدر .

بو طاتلو ایسه عنبرلی بر معجون اولوب شو حقه ده بر قاق مثال عنبر اولمق کرک ایدی  
 بونک بر قاشغی اعصابی خلیجه تحریک و تهییج ایتدیکنه نظراً دفعه بر حقه سی اکل  
 اولندقدن اعصابه نه درجه لرده هیجان کله جکی بیاندن مستغفیر بعده طیار افندی  
 قهوه بی فتجانه قویوب حضورنده بر یو دم ایچدکدن صکره صونمغله علمدارینه خط  
 ایدرک الوب قهوه بی ایچر کن (آبه سن اما عقلی آدم ایمش سین هاسنی ساجدار ایتلی)  
 دیدکده طیار افندی (نم ستم تمشی تجاوز ایتدی خدمت ایده جک و قم کچدی بوندن  
 صکره بکا افدی بک تقاعدیه احساندن عبار تدر ساجدار لق اهلی ایشسته بودر) دیو  
 محمد بکی کورتمش و علمدار انک بوجوابندن دخی حظ ایدرک کندوسنه اون بیک  
 غروش عطیه و یرمشدر .

بوصورتله طاتلو و قهوه رسمنک اجراسی براز اوزادی باب السعاده پیشکاهنده ایسه  
 تحت عالی قوریلوب هر کس بیعت عمومیه رسمنک اجراسنه منتظر ایدی بومثلو مصالح  
 مهمه بیه شروعده وقت مختار کوزتمک دخی رسم و عادت اولمش ایسه ده بویله بر هر ج  
 و مر ج کونی اندرون هایونده علمداره قهوه و یرمک ایچون قهوه جی باشی بولمندی  
 حالده بیرونده منجم باشی بولمق مشکل و علمداره وقت مختاری آکلاتمق ناقابل  
 اولدیغندن سلطان محمود خان ثانی حضر تلی علمدار پاشایی خر قه سعادت او طه سنه  
 جلب ایله براز مذاکرات خفیه اجراسندن صکره قالقوب متوکلاً علی الملك المنان  
 باب السعاده خارجه خرامان اوله رق تحت عالی بخت عثمانی اوزره جلوس ایتدی  
 و علمدار پاشایی مقام صدارته کتورمش و عرب زاده عارف افندی بی مقام مشیخته  
 ابقا بیورمش اولدیغندن ابتدا علمدار پاشا و بعده شیخ الاسلام ایله سائری رسم  
 بیعتی اجرا ایتدیلر .

اول کون ایسه جمادی الآخره نك دردنجی و تموز رومینک اون التنجی پنجشنبه

کونی اولوب حین جلوس هایونده ساعت طقوزی قرق دقیقه مرور ایتمکله دقیقه  
 بدأ بیعتده افق دار الساطنه ده بیت سعد اکبر اولان برج قوسک یکر می سکننجی  
 درجه سی طالع اولغله منجمین حقایق اکتناه (الخیر فیما اختاره الله) دیدیلر .  
 پادشاه مشار الیه حضر تلری بیک یوز طقسان طقوز سنه سی رمضان مبارکنک اون  
 اوچنجی چهارشنبه کونی غروبی ساعت ایله دردی اوتوزالتی دقیقه مرورنده تولد  
 ایتمکله طالع مولود مسعود ملوکانه لری دخی بیت ناهید سعید اولان برج میزانک یکر می  
 ایکنجی درجه سی ایدی (والله یفعل ما یشاء ویختار) .

جلوس هایون انناسنده دار السعاده اغاسی مرجان اغا علمدارک کوزینه ایلشدکده  
 بروجه بالا باب السعاده کلوبده بوقدر صیحه لر ایتمشیکن آنک قپوی آچدر مامسیله  
 سلطان سلیمک شهادتیه سبب اولمسی خاطرینه کله رک پراآتس غضب اولوب حضور  
 هایونده ایکن مرجان اغای شتوم غلیظه ایله شتم و تکدیر و توبیخ ایتدکن بشقه  
 بیعت عموم رسمنک اجراسی عقبنده شهید مظلومک یعنی سلطان سلیم مرحومک  
 شهادتیه سبب اولان خائنلرک کافه سنی قلیجدن کچورمک اوزره استیدان ایتدکده  
 پادشاه نوجاه حضر تلری پاشا (العجالة من الشیطان والتانی من الرحمن) فحواسنجه صبر  
 ایت دیو بیورمغله علمدار پاشا دخی آتس غیظنی تحت رماد تامل و تأنیده صاقلامغه  
 مجبور اولمشدر .

بعد البیعه هر کس کماکان ما موریتیه دوام ایتمک اوزره اذن عام صدورندن صکره  
 پادشاه عدالت پناه حضر تلری دخی قیام ایله اندرون هایونه خرامان اولدی .  
 واول بول جانیرلرک اجرای جزای سزالری ملتزم اولدیغندن همان فرار و اختفا  
 ایدنلرک اخذ و کرفقلریله لاجل الاستنطاق بوستانجی باشی محبسند حبس و توقیف لری  
 ایچون اکید و شدید امر لر ویرلدی .

وقائلردن باش چوقدار فتاح قبا طاشده چشمه اوزرنده واقع صالح اغا ساحلخانه سنه  
 متصل برخانه ده و خزینه و کیلی زنجی نذیر اسکدرده و بوستانجی مصطفی صوغوق  
 چشمه او جاغنده اله کچورلدی و جمله سی لاجل التذیق بوستانجی باشی محبسند  
 ویرلدی میر آخور اول محمد دخی باب عالی یه جلب ایله خزینه او طه سنده توقیف ایدلدی .  
 و او کون سلطان سلیمک دفته وقت مساعد اولدیغندن باب السعاده خارجه سایبان  
 قورلدی و نعشی اول کیجه آنده قالدی .

علمدار پاشا اخشامه چاریک قاله رق برهیت پرهیت ایله باب عالی یه کلدی فقط وقت  
 پک کچ اولدیغندن یالکیز باب عالی رجالنک بعضیسنه لباس خلعت اولنه بیلدی و باقیسی  
 فر دایه براغدی .



اول کیجه بتون قبو رجالی باب عالیده قلوب فر داسی جمعه کونی علی السحر صدر اعظم و شیخ الاسلام و موجود بولنان وزرای عظام و صدور و موالی فخام بر معتاد سرای هایونده اجتماع ایله ساطان سلیمک جنازه نمازی بعد الادا نغش شریفاری لالهلی جامع شریفنده پدر جنت مقر لری تر به سنده دفن اولندی ( نورالله قبره )

## لاحظه

اول عصرده ظهوره کلان فتنه و فساد لک اسبابی بر خیل سنه لردنبرو تسلسل ایدوب کلان مبادی و مقدمات اولوب تفصیلاتی یوقارولرده علم تاریخک و وظیفه سی اولدینی وجهله بیان اولمش ایدو کندن تکراره حاجت یوقدر فقط بعضیلر فتن سابقه نک حدوشی مقتضای احکام فلکیه او لمق اوزره اعتقاد ایدوب بومقامده شانی زاده دخی اول اعتقاد و افکاره کوره بر مقاله یازمش اولدیغندن بروجه آتی عینیه ایراد اولنور . شانی زاده دیرکه : حضرت فاعل مطلق عادت الهیه و مشیت ازلیه سی مقتضاسنجه وقوعات عالم کون و فسادی اسباب خفیه بعیده و اسباب ظاهره قریبه به متبع و معاق ایده کلدیکی اهل تحقیق عند لرنده مسلم و متفقدر فعلی هذا الاسلوب تاریخ سابقده مقید و مکتوب اولان انواع فتن و آشوب و فترت و حر و بک اسباب بادیه بعیده سی او لمق اوزره العهده علی من یعتقد احکامیون ادعا ایدر لکه بیک ایکیوز اون الی سنه هجریه سنده وقوع بولوب مثلته ناریه دن خاکیه انتقالنه مبدأ اولدینی اجلدن ایکیوز قرق بش سنه قدر حکمی اجرا ایده جک قران اوسط علونیک سال قران تعبیر اولنور سنه مذکوره ماه ذی القعدة سنک نوروز سلطانی اولان اون التتجی احد کونی که بیک یوز اوچ سنه میلادی مارتنک طقوزنجی کونیدر یوم مذکورده طلوع آفتاب جهانتابدن اوچ ساعت یکر می الی دقیقه مرورنده زنج رصد جدید قسینی موجبجه دار سلطنت قسطنطنیه کوره محسوب زایجه طالع مبدأ سال قرانده سائر طوالع دولت و ملت و احکام جزئیه قیام سلطنت مناسب لریله احوال مزبور نه نک جمله سی موعود و مقذور اولوب شوقدر که بحسب التسمیرات و الاتصالات آهسته آهسته تحصیل استعداد ایدرک هربری وقت مرهونده سر زده میدان ظهور لکن اوقات ظهور لرنده ناکهان برر سبب ظاهریه قریبه تحدی دخی مقتضای عادت و مشیت رب غفور اولغله معتقدین تقدیر خدا (اذا اراد الله شیئا هیأ اسبابه) قول صادقیه اکتفا ایدوب ظاهر بینانک ایسه کیمی بغیر حق پادشاه زمان علیه دهن کشا اوله رق خارج طور ادب کلماته اجتر و کیمی وکلای دولت و مدیران سلطنته من غیر وقوف عزو قصور ایدرک شویله اولمو ایدی بویله استبدیل ایدی دیو طعن و افترا ایدر ل .

شانی زاده نک کلامی بوراده نهایت بولدی بیان استدیکی قرانک تاریخنده یا کاشاق

اولدیغندن بروجہ آتی انک تصحیحیله برابر بعض ایضاحاتک علاوه سنہ ابتدارقنور .  
 احکامیونک اعتقادنجہ علویونک یعنی زحل ایله مشتریونک قراناتی درت قسمدر یعنی  
 اعظم واکبر و اوسط و اصغر در . شوویله که : اون ایکی برجی عناصر اربعه  
 اعتباریله شووجه اوزره درت مثلثه یه تقسیم ایدر لر .

مثلثه ناریه	مثلثه تراپیه	مثلثه هواییه	مثلثه مائیہ
حمل	ثور	جوزا	سرطان
اسد	سنبله	میزان	عقرب
قوس	جدی	دلو	حوت

اشبو برجلرک ابتدارلنده واقع اولان قرانلره قران اوسط و فقط بروج ناریه نیک  
 ابتدارلنده واقع قرانلره قران اکبر ویالکتر بروج ناریه دن حملک ابتدا سنده کی  
 قرانه قران اعظم یاخود قران اقدم و بو اون ایکی برجک درجات مختلفه سنده واقع  
 قرانلره قران اصغر دیر لر و قران اعظم ایکی بیک طقوز یوز قرق سنه ده و قران  
 اکبر طقوز یوز سکسان سنه ده و قران اوسط ایکی یوز قرق بش سنه ده و قران اصغر  
 یکر می سنه ده تکرر ایدر زیرا مثلثه ناریه دن اول حملده قران اعظم واقع اولدقده  
 یکر می سنه صکره ینه او مثلثه دن قوسک ایکی بچق درجه سنده و یکر می سنه صکره ینه  
 او مثلثه دن اسدک بشنده و ینه یکر می سنه صکره حملک یدی بچق درجه سنده و یکر می  
 سنه صکره قوسک اوننده و یکر می سنه صکره اسدک اون ایکی بچق درجه سنده و هکذا  
 تقریباً ایکیشر بچق درجه تفاضل ایله هر یکر می سنه ده بر کره حمل قوس اسد برجلر نده  
 قران واقع اوله رق ایکی یوز قرق بش سنه ظرفنده اون ایکی قران وقوع بولور ایشته  
 بونلره قران اصغر دینلور و مثلثه ناریه دن فلان برجک فلان درجه سنده واقع قران  
 تعبیر اولور بعده مثلثه ناریه دن مثلثه تراپیه یه انتقال ایله اول ثورده قران اوسط  
 وقوع بولدق دن صکره ینه منوال مشروح اوزره تقریباً ایکیشر بچق درجه تفاضل  
 ایله هر یکر می سنه ده بر کره ثور جدی سنبله برجلر نده اون ایکی قران اصغر  
 وقوع بوله رق ایکی یوز قرق بش سنه مرورنده مثلثه هواییه یه نقل ایله اول جوزاده  
 قران اوسط واقع اولور و ینه منوال مشروح اوزره جوزا ، دلو ، میزان برجلر نده  
 قران اصغر لر و ایکی یوز قرق بش سنه صکره مثلثه مائیہ یه نقل ایله اول سرطانده  
 قران اوسط و سرطان و حوت عقربده ینه منوال مشروح اوزره قران اصغر لر  
 وقوع بوله رق ایکی یوز قرق بش سنه صکره ینه مثلثه ناریه دن اسد برجک ابتدا سنده  
 قران اکبر وقوع بولور و بوقته قدر طقوز یوز سکسان سنه کچمش اولور بعده اسد  
 حمل قوس برجلرینک درجات مختلفه سنده منوال مشروح اوزره ایکی یوز قرق بش سنه

ظرفنده اون ایکی قران اصغر وقوعندن صکره ینه مثلثه ترا بییه به انتقال ایله سنبله  
 ابتداسنده قران اوسط وسنبله ثور جدی ده یکر میشر سنه فاصله ایله قران اصغر لر  
 وبعده مثلثه هوائیه دن میزان ابتداسنده قران اوسط ومیزان جوزا دلوده قران  
 اصغر لر و صکره عقرب ابتداسنده قران اوسط وعقرب سرطان حوت برجلر نده  
 قران اصغر لر وقوعیله طقوز یوز سکسان سنه ده تمام اولدقدن صکره قوس ابتداسنده  
 قران اکبر وایکیشر یوز قرق بشر سنه فاصله ایله جدی ودلو وحوت برجلر ینک  
 ابتدلرنده قران اوسط لر نده یعنی قوس ، اسد ، حمل و جدی ، سنبله ،  
 ثور ودلو میزان ، جوزا ، برجلر ینک درجات مختلفه سنده وبعده حوت عقرب ،  
 سرطان ، برجلر نده ینه منوال مشروح اوزره قران اصغر لر وقوعیله اوچنجی  
 طقوز یوز سکسان سنه دخی ختام بولور وقران اعظم دن بووقته قدر ایکی بیسک  
 طقوز یوز قرق سنه کچمش اولور وبعده ینه اول حملده قران اعظم وقوعه کاور  
 فقط بروجه مشروح ایکی بچق درجه تفاضل سبر وسطی اعتباریله در یوخسه  
 حرکت تقویمیه اعتباریله زیاده وناقص اولور بناءً علیه بعضاً بر مثلثه ده اون اوچ  
 قران اصغر وقوعبولور وطقوز یوز التمش سنه ده قران اکبر تکرر ایدر وبعضاً  
 ایکیوز قرق سنه دن وبعضاً اوائل بروجدن بر قاچ درجه مرورنده قران اوسط  
 واقع اولور .

نتکیم موضوع بخدمت اولان قران اوسط بیسک ایکیوز اون یدی سنه هجریه سی  
 ربیع الاولنک اون یدیسنده مثلثه ناریه دن مثلثه خاکیه انتقال ایله برج سنبله نک  
 بشنجی درجه سنده وقوعبولمشدر ودرت آی مقدمنده واقع اولان نوروزده یعنی  
 بیسک ایکیوز اون التی سنه هجریه سی ذی القعدة سنک اون التجی و بیسک سکر یوز ایکی  
 سنه میلادیه سی مارتسک طقوزنجی بازار کونی زیج قسینی یه کوره شمس اوچ  
 ساعت یکر می التی دقیقه ده اول برج حمله تحویل ایتدکده افق دار سلطنته نظراً  
 اولوقنک طالعی جوزانک اون دردننجی درجه سیدر بوکا طالع سال قران اوسط  
 دیر لر و آنی دخی مبدأ اتخاذ ایدر لر ومؤسس بنیان سلطنت عثمانیه اولان  
 عثمان خان غازی حضر تلر ینک زمان استقلال لر ندن مقدمه واقع نوروز دقیقه سنده کی  
 طالع ساله طالع دولت دینلور که زیج الغ بک حسابجه سر طانک سکر درجه او توز  
 یدی دقیقه سیدر ومولد شریف نبوی قیلنده واقع نوروز دقیقه سنه میزانک  
 یکر می ایکی وعلی قول یکر می اوچ بچق درجه سی طالع اولغله آکا دخی طالع ملت  
 دینور و پادشاهلرک زمان ولادتلرنده کی طالعه طالع ولادت هایون وجلوسلری  
 زماننده کی طالعه طالع قیام دینلور بوقران اوسطک ایکیوز قرق بش سنه قدر

حکمی اولوب آندن صکره کی قران اصغر لر ایله طالع سنه وادله سائر نك احکامی قران مذکور احکامی مؤید اولدجه آثار مضمونه سی ظهوره کلور .  
 شویله که : طالع سال قران و طالع دولت و طالع ماتک احکام کلیه لر ایله طالع جلوس هاپونک احکام جزیه سی امتزاج ایدرک نتیجه آثاری تسیرات و انتهایات و اتصالات واسطه سیله ظهور ایدر دیر لر تسیرات اعظمه بیک و اکبرده یوز و اوسطده اون و اصغرده بر سنه ده موهورماً بر درجه سیر و حرکتدن عبارتدر . مثلاً قران علویین سنبله نك بشنده اولدیغی حالد ایرتسی سنه یا اون سنه صکره التنجی درجه سنه حرکت ایتمش دیو اعتبار اولنور انتهایات کدک بیک یا خود یوز و یا اون و یا بر سنه ده حرکت فرضیه ایله بر برج حرکت ایتمکدر . مثلاً قران علویین سنبله نك بشنده ایکن ایرتسی سنه میزانک بشنده اعتبارینه انتهای قران تعیر ایدر لر جزء قرانک یا خود طالع سال قرانک تسیری و یا انتهای تسیری قننی سنه ده ایسه اول سنه نك طالعنه و یا طالع جلوسه مقارنه و یا مقابله و یا تر بیع ایله نظر و اتصال ایدر ایسه اول سنه حکم قران ظاهر اولور دیر لر ودها بونک کی بر چوق ادله و اماراته نظر ایله حکم لر ویر لر بو بجزئله وظیفه علم تاریخدن خارج ایکن شانی زاده یه اقتفاء صددن چیققدق ارتق ما نحن فیهمزه عودت ایدلم .

\* شهید سعید مشارالیهک ترجمه حالی \*

سلطان سایم خان خان حضرتلری بیک یوز ایتمش بش سنه سی جمادی الاول سنک یکر می یدنجی پخشنه کونی ساعت برده ایکن تولد ایدوب ایکیوز اون اوچ سنه سی رجبک اون برنجی صالی کونی بالارث والاستحقاق جالس اورنک آسمان رواق اولدی و جلوسی هنگام سفره تصادف ایتکله دولتی پک دغدغه لو بر حالد بولدی عسکر و اهالی سفردن بیتمش و معلم عسکر اولدجه ایش کورمک قابل اولیه جفی کرکی کی میدانه چیقمش ایدی بناء علیه بعد المصالحه تعلیم عسکر املنه دوشدی باشنه زنبور بلا اوشدی بو عسکر مسئله سنک تفصیلاتی بالاده مندرج اولدیغندن تکرار باش اغریسی ویر میه لم و اصحاب حیتک دردنی تازه لیه جک بجزئله کیر میه لم بوراده یالکیز بعض آثار جلیله و اوصاف جمیله لرینک بیانه ابستار ایلیم .  
 ابوایوب انصاری رضی عنه الباری حضرتلرینک تر به سی اطرافه سیم خالصدن شبکه یاپدیروب التون قسیدلرر تعلیق ایله تزیین و نرزدنده واقع فاتح جامع شریفی مجدداً تعمیر ایتدیردی طویجی و عربی نفقاتی ایچون طویحانه ده و بک اوغلنده و نظام جدید عسکری ایچون لوندجه تککنده و اسکدارده قشاهلر و ترسانه ده حوض

کیر و قربنده قالیونجیلر ایچون مجدداً بر قشله و خاصکویده هندسه خانه واسکدارده  
 جسیم انبارلر یایدردی خبره خانه قشله سی دروننده کی جامع شریف ایله  
 اسکدارده سایمه قشله سی جوارنده کی جامع لطیف و سائر ابنیه خیریه و میریه دخی  
 آثار جلیله لرننددر دها بونلر کی پک چوق آثار حسنه لری واردر عصر نده یابیلان  
 ابنیه نك ظرافتی نزاکت طبعه دلیدر اصول جدیده اوزره طوب اصاغه سی و کی  
 انشاسی و آورو باکاری باروت اعمالی کی ادوات حر بیه یه و استکمال قوه بریه  
 و بحر یه یه عظیم همتر ایتدیکی ائنده اقمشه هندیه و افرنجیه دن استغنا حاصل اولمق  
 ایچون اسکدارده قماش کارخانه لری بنا و نشر علوم و معارف ایچون دارالطباعه انشا  
 ایله صنعت طباعتک ترقیسنه سعی اوفی بیسوردی هله علوم ریاضیه نك ایلر و لمسنی  
 اولمقدر التزام ایلردی که رامن افندی بی خبره خانه ناظری ایتدکده هندسه خانه بی  
 دخی آنک نظارتیه و یروب خواجه لر تعیینی و درسارک ترتیبی حقه نده کندوسیه دائماً  
 محرمانه مخبره ایتدیکی صکره دن ثابت اولمشدر .

الحاصل محاسن آتاری چوق و دولتک سعادت حالی ایچون سعی و همتنه نهایت یوق  
 ایدی عالی همت و اهل مکرمت خوب صورت و پاکیزه سیرت کوزل تعلیق یازار  
 و فن موسقیده بهره سی وار الهامی تخلص ایدوب جابجا شعر سویلر و عالما و شعرا یه  
 زیاده رعایت ایلر ایدی .  
 اک صکره سویلدیکی شعر بودر .

\* قطعه \*

( کیمدر اول کیم می شادیله اولوب شیر نیکام \* اکا خمیازه غم اولیه عارض انجم )  
 ( مست صهبای مسرت اوله نك حالی بودر \* کاه پیمانه چکر کاه خمار آلام )  
 مرویدر که بوقطعه بی نظم ایتدکده زیرینه ( کلام ختم اولدی ) عباره سفی تحریر  
 بیورمش ولدی الحساب ( ۱۲۲۲ ) چیمش درکه خلعی سنه سیدر اون طقوز سنه  
 یدی آی اون کون سریر سلطنتده بولندی بعده قره دکر بوغازنده ظهور ایدن  
 قباجقی وقعه سنده خلع اولندی متعاقباً شیرازة نظام دولت منحل و احوال ملک  
 و ملت مختل اولیجق اولوقت قدری بیلندی .

واقعا آنک عصر نده دخی بر خیلی عاصی و باغیلر وار ایدی لکن مرکز سلطنتده  
 امری نافذ اولوب ایالات و الویه نك دخی مرکزه ارتبساطی و مقام خلافته انقیاد  
 و احترامی درکار ایدی حتی جزار احمد پاشا بیاغی عاصی و باغی ایکن سلطان سلیمک  
 نامی یاد اولندجقه قیام ایدردی و فرمانی کلدجکه بنک طاشته قدر اینردی و اعز

احباسندن بریسی کندوسنه ( وکلای عصره بوقدر اظهار غیظ و مخالفت ایتسه کز اولمازمی ) دیدکده ( اهل اسلام اولدیغمز حبسیله پادشاهک امرینه اطاعت واجبۀ ذمتمزدر حالا بوینم سلطان سلیمه قیلدن ایجه در بلا واسطه قتل و اعدام مراد پادشاهانه لری اولدینی معلوم اولسه الله علیم بر دقیقه توقف ایتیموب باشمی قلیجه تسلیم ایلم ) دیوجواب اعطاسیله مخالفت یوزنده بولنسی مجرد وکلای دولته قارشو بر حرکت اولدینی بیان ایتشیدی و مورخ عاصم افندی پیاسده رهنلک و قطع طریق حجاج و زوربالق ایله شهرت بولان کوچک علی اوغلی خلیل پاشا ایله بر دفعه ملاقات ایدرک کندوسنه ( جنابکر بحمدالله تعالی اختلاط علما سببیه احکام شرعیه به واقف ایکن دولتعلیه طرفه اطاعتدن کردنکش اولما کزه باعث ندر ) دیوسؤال ایتدکده ( افندی برادر دولت دیدیککز یالکز طرف سلطنتمیدر یوخسه وکلای امور دولتیدر یا خود ایتکسندن مجتمع بر هیئتمیدر یالکز طرف سلطنت ایسه ( واولی الامر منکم ) امر شریفی موجنبجه امرینه منقادز معاذ الله تعالی سرموعصیانده بولانلرک نماز و نکاحی صحیح اولماز شق ثانی به کوره بر مملکتده متعدد پادشاه اولمق ممکن دکدر زیرا پادشاهی بر ذات مخصوص بیلورز انجق انلرک طرف عالیبرینه معامله ایلر شق ثالث دخی بومنوال اوزره در خلاصه اهل اسلام اولدیغمز حبسیله دستداده بیعت اولدیغمز امام المسلمینه اطاعتمز درکاردر اما بورسمه سرکشلمکز یوسف اغا و ابراهیم کتبخدا کیلره در ) کبی سوزلرله اغلایه رق جواب ویرمش اولدینی عاصم افندی تاریخنده بیان ایدر .

الحاصل طرف بطرف ظهور ایدن عاصی و باغیبر هپ سلطان سلیمه اظهار اطاعت ایله مجرد وکلایه قارشو مخالفت ادعا سنده بولنورلردی اما آنک خلعتدن صکره ایالات والویه نک مرکز سلطنته ارتباطی منقطع حکمنه کیردی و مقام خلافت اولکی اطاعت و حرمت قلمدی و سلطان مصطفانک دکل یالکز ایالاتده بلکه پایتختده بیله حکمی کچمز اولدی عوام ناس بویله ناسازی ایام ایله الم و نخرتده و خواص حقایق شناس مطالعه انجام ایله اسف و حیرتده قالدی بونک اوزرینه دهات رجال دولتدن بعض ذوات تکرار سلطان سلیمک تحت سلطنته اجلاسی امل ایدندی و بوجه بالاتدایر حکیمانه و دور اندیشانه ایله اجر اسنه تشبث قلندی نه چاره حکم قضایه قارشوکنمز و سر نوشت ازلی سینمز استانبولک حالندن علمدارک غفاتی و رامنز افندینک رأینه دیگر رفیقلرینک مخالفتی شهر یار مشارالیه حضر تلرینک بادیء شهادتی اولدی لکن اکا اهانت ایدنلر شویله طورسون کچ نظرله بقانلر بیله برر برر جزای سزالرینی بولمشلردر .

حین شهادتده ( کندوالمه یاره کسوب ویردیکم قلم \* فتوای خون ناحقیمی یازدی ابتدا ) بیتک جیب هایونده بولندینی مرویدر .

نظامات جدیدہ صرہ سندنہ طریق علمیه نك دخی اصلاحی ایستدیسده قابل اولدی .  
 شویله که : حکومتک برنجی وظیفه سی احقاق حقوق مسئله سی اولدیغندن دولتعلیه  
 بوکا فوق العاده دقت واهتمام و بوظیفه نظیفه نك ایفاسنه مأمور اولان طریق عامیه  
 اصحابنه پك زیاده اکرام واحترام ایده کلمشدر فقط انلر دخی جلد اولده بیان اولدیغنی  
 اوزره مدارس مرتبه ده علی الترتیب درس کوروب طور ومشواری بیلمش  
 ودولتجه طانمش اصحاب علم وفضیلتدن ذاتلر ایدی .

مؤخرأ طریق علمیه نك اصول وانتظامی پك زیاده بوزلمش اولدیغندن نظامات ملکیه  
 وعسکریه صرہ سندنہ طریق علمیه نك دخی بالتدریج اصلاحنه قرار ویرلمشیدی .  
 ابتدا بوایشه حمیدی زاده تشبث ایتمدی لیکن پك چوق یرلره طوقندیغندن بدخویلقله  
 مدخول ونهایت معزول اولدی عمر خلوصی افندی بوندن درس المی لازم کلورکن  
 صلابت دینیہ سی حسدیله برچیش ایتمدی بتون طریق اصحابی کندوسنه دشمن جان اولوب  
 نهایت اودخی مسندنن دوشدی سلطان سلیم خان دخی اول داعیه دن وازچکدی  
 وار دولره مهندس یتشدرمک اوزره هندسه خانه نك تنظیمنه اعتنا ایدرک امرام  
 قضانک اصلاحی حکم قدره حواله ایلدی .

بعده سلطان مصطفی دورنده شیخ الاسلام عطاءالله افندی زوربارک سایه سندنہ تنفذ  
 وتغلب ایتمکده کویاطریقک تطهیرینه قیام ایله اون طقوز مدرسک رؤسارنجی ترقین  
 ایلدی . لیکن اغراض ایله معال ورسوم عادیه بی تأیید یولنده برعمل اولوب یوقسه  
 حقیقهٔ اصلاح دکل ایدی . مثلاً کشتکان رجالدن والده کتخداسی یوسف اغانک  
 اوغلی صادق افندی پدرینک نفوذی سایه سندنہ زیاده جه طفره ایدرک معتاد اولان  
 مدت استثنائیه دن اولجه موصلاه سایمانیه یه کلوب هم رتبه رقابتی وعلی الخصوص دیگر  
 اصیلزاده لرک عداوتی جاب ایتمش اولدیغندن بوکره عطاءالله افندی انک درجه سی  
 موصلاه حخنه تنزیل ایتمدی . حالبوکه اگر صادق افندی موصلاه سایمانیه ده تدریسه  
 مقتدر اولدیغنی حالده غصباً بودرجه دن رؤس المش اولدیغنی جهته کیرو التحق لازم  
 کلدی دینلور ایسه بتون بتون رتبه سنک رفعی لازم کلوردی . فقط بومعامله نك  
 سائرلره دخی تعمیمی لازم کلوب بو حالده ایسه طریق تدریسده پك آز ذاتلر قالوردی  
 یوق مرام بالفعل تدریسه اقتدار ارامق اولیوب فقط صادق افندی معتاددن زیاده  
 طفره ایتمدی ومسافهٔ وهمیه ده پك ایلرو کتدی انکچون اعاده سی لازم کلدی  
 دینور ایسه بصورت اموال مغصوبه نك تقسیمنده سائرندن زیاده حصه آلا نه طاریلوبده  
 بر مقدارنی کیرو المی کبی برکیفیت وصادق افندی نك تقدم ایتمش اولدیغنی مدرسینی  
 خشنود ایتمکدن عبارت اوله رق اصلاحاتدن عد اولنماز قالدیکه منتهای مراتب

طریق علمیه اولان صدارت پایه لوری ایچنده بعض احوالی بالاده مذکور اولان و بالفعل روم ایلی قاضی مسکری بولنان آغیر امام کبی برنادان هنوز موجود ایکن بر قاج کشی زاده چامیلرک طریق تدریسده زیاده جه طفره ایستدیلر دیو تنزیل رتبه لری یولسزاق ایچنده بر طوغری یول اراق قیلمندن ایدی .

\* سلطان سلیم زماننده کی صدر اعظم ایله شیخ الاسلامر \*

جلوس سلیم خانیده سردار اکرم قوجه یوسف پاشا و شیخ الاسلام کامل افندی ایدی اده سی چوق کچمدین ایکیسی دخی عزل ایله جنازه حسن پاشا دیو معروف اولان کتخدا حسن پاشا سردار اکرم و اسعد زاده محمد شریف افندی ثانیاً شیخ الاسلام اولدی لکن شریف افندی ضعف پیری و انحراف مزاجی حسبیله ایکی آی مرورنده عزل ایله یرینه حمیدی زاده شیخ الاسلام اولدینی کبی اول اوئنده ظهور ایدن بوزده بوزغونی اوزرینه حسن پاشا دخی عزل ایله غازی حسن پاشا سردار اکرم اولدیسده چندماه مرورنده وفات ایتمکله روسجقلی حسن پاشا سردار اکرم اولوب اودخی ایفای مأموریتده موفق اوله مدینی جهتله اعدام اولنهرق قوجه یوسف پاشا ثانیاً سردار اکرم نصب و تعیین بیوردقدن صکره حمیدی زاده عزل ایله یرینه شیخ الاسلام اولان یحیی توفیق افندی اون اوچ کون ظرفنده فوت اولوب مکی افندی ثانیاً مقام مشیخته کتورلدی بعدالمصالحه یوسف پاشا استانبوله کلوب بیگ ایکیوز التی سنه سنده عزل ایله یرینه ملک محمد پاشا صدر اعظم و متعاقباً مکی افندی دخی عزل ایله دری زاده محمد عارف افندی ثانیاً شیخ الاسلام نصب و تعیین بیوردلی ملک پاشا ایکی یچق سنه یه قریب صدارتده بولندی بعده عزل ایله یرینه عزت محمد پاشا نصب اولندی اودخی درت سنه یه قریب صدارتده بولندقدن صکره فرانسرک مصری استیلا ایتملری اوزرینه دری زاده افندی ایله برلکده عزل اولتملریله ضیا یوسف پاشا صدر اعظم اولوب مشیخت اسلامیه دخی عاشر افندی یه و برسنه اون بر آی صکره عمر خلوصی افندی یه توجیه قلندی عمر خلوصی افندی تام عدالت و حقانیت و کمال عفت و استقامت یولنده بولندی لکن زمانه نك اول مرتبه عدالته تحملی اولمدیغندن (ماترک الحق لعمر صدیقاً) مفادینی تصدیقاً ایکی سنه اون بر آی صکره عزل ایله یرینه صالح زاده احمد اسعد افندی نصب اولندی بر مدت صکره ضیا پاشا روش حالی بکنمیبوب استعفا حالنده کورندی بناءً علیه یکر می سنه سی اوئاننده عزل ایله یرینه حافظ اسماعیل پاشا تعیین قلندی اودخی دفع رقبا ضمننده مسالک اهاتی اختیار ایله سمت خلافه مائل و ظهورینه سبب اولدینی ادرنه و قعه سنک نتیجه سنده اسعد افندی ایله برلکده منفصل اولدی و مقام صدارته ابراهیم حامی پاشا و مقام مشیخته عطاءالله



افندی کلدی متعاقباً روسیه سفری ظهور ایتمکله حلمی پاشا سردار اکرم اولوب روم ایلی جاننه کیتدی عطاءالله افندی دخی اسماعیل پاشانک دیکدیکی شجره فسادک ثمره مضره سنی اقتطاف ایچون قائم مقام موسی پاشا ایله اتحاد ایتدی و آنلرک زمان نحوست اقترانلرنده سلطان سلیمک عصر سعید سلطنتی بتدی .

غازی حسن پاشا و روسجقلی حسن پاشا ایله شریف و توفیق افندیلرک ترجمه حاللری جلد رابعده و حمیدی زاده نک ترجمه حالی جلد خاسمده و مکی افندی نک ترجمه حالی جلد سادسمده و قوجه یوسف پاشا و ملک پاشا و حافظ اسماعیل پاشا ایله کامل و عارف و عاشر افندیلرک ترجمه حاللری جلد سابعده مذکور در .

سلطان سلیمک خلعدن صکره اردوی هایونده یکچیری زور بالری غلو و طغیان ایله حلمی ابراهیم پاشایی مقام صدارتدن تنزیل ایتدکلرنده یرینه چلبی مصطفی پاشا سردار اکرم اولدی .

عطاءالله افندی سلطان مصطفی دورنده زور بالرله انیس و گروه متغلبه یه رئیس اولدیغندن برارالق عزل ایله یرینه عمر خلوصی افندی دفعه ثانیه اوله رق نصب اولندیسه ده زور بالرک تصاحیبیه برکون صکره مشیخته اعاده ایدلدی بعده طیار پاشا قائم مقاملغنده ینه عزلنه قرار و یرلدی ایسه ده هنوز موقع اجرایه قونیه میوب حالی اوزره براغدی و مستحق اولدیغی انواع تعذیره محسوب اولوق اوزره هله علمدارک درسمعاده و رودنده عزل و دائره دولتدن طرد ایله امثالنه عبرت کوسترلدی .

چلبی مصطفی پاشا دخی بروجه بالا جمادی آخره نک دردنجی کونی باب عالی دن قالدیریلوب علمدار پاشا اردوسنده محبوس و موقوف قالدی لکن اول کون سلطان سلیم خان حضر تلرینک دخی شهادتی وقعه مؤلمه سی ظهوره کلدی .

\* متهملر حقلرنده اجرا اولنان مجازات و دیگر بعض اجراءات و توجیها ت\*  
 بروجه بالا جمادی آخره نک بشنجی جمعه کونی سلطان سلیمک جنازه سی آلی ایله پدینک لاله لی جامعنده کی تر به سنه کورتورلدی ایاضوفیه جامعنه دخی سلامق اولدی بونجه سنه لر تخت سلطنت و خلافتده بولنه رق دولت و ملتک سعادت حالنه چالیشوب چبالامش اولان بر ذات مراحم سناک نهایت خاع ایله بر مدت خمبازه کش خلوت و ازوا اولدقدن صکره بر طاقم کشتنی جلادلر الارنده مغدوراً شهید اولسی هر کسک جکرینه تاثیر ایلدی و باجمله صنوف اهالی یانوب آغلدی سلاملقده سلطان محمودک شقاغی یاره لی کورلمکله خلق آندن دخی متأثر اوله رق بر قاندها اندرون طاقنه کین باغلادی . صدر جدید علمدار پاشا ایسه سلطان سلیمی تخته چیقارمق نیتیله روم ایلیدن کلوبده شهادتیه سبب اولدیغندن طولای فوق العاده

متأسف وداغدار و بوجنایته كرك مباشرت و كرك معاونت اید نارك همان اجرای جزالری افکار یله بی قرار ایدی .

بناءً علیه سلامق رسم عالیسنك اجراسی عقبنده دارالسعاده اغاسی مرجان اغا عزل و بوستانجی باشی معرفتیه بالقخانه یه نقل اولندی . ویرینه خزینه دار قاسم اغا دارالسعاده اغاسی وانك یرینه لالای شهر یاری عنبر اغا خزینه دار نصب و تعیین قلندی . و سر کتابتدن مخرج بلبل حافظ دیومعروف اولان فیض الله افندی ینه سر کتابتیه اندرون هایونه الندی .

و كرك اول کون و كرك فرداسی جمعه ایرتسی کونی اندرون هایونجه دیگر بعض توجیهات دخی وقوع بولدی . شویله که : سفرلی کتخداسی سالف الذکر محمد بك سلحدار و چوقدار ارناود احمد اغا میرآخور اول و سقا زاده سید محمد اغا خزینه کتخداسی و جوان عارف اغا سفرلی کتخداسی و سید عمر اغا باش چوقدار و باش چاوش عثمان اغا قهوه جی باشی اولدی و چوقدار شهر یاری حسین اغا والده سلطان کتخداسی نصب و تعیین بیورلدی .

و ینه جمعه ایرتسی کونی جانیرك اجرای مجازاته مباشرت اولنه رق آنف الذکر مرجان بدیمان بالقخانه ده اعدام ایله سرمقطوعی اورته قیو پیشکاهنده طبله عبرته قونلدی و سالف الذکر باش چوقدار عبدالفتاح باب هایون خارجنده و خزینه و کیلی نذیر ایله میرآخور اول کور محمد آلائی کوشکی پیشکاهنده و اوادان بوستانجیسی سالف الذکر دلی مصطفی یالی کوشکی خارجنده اعدام ایله عبرت انام ایدلدی .

مرجان اغا دور سلیم خانیده مشهور و خیر ایله مذکور اولان بلال اغانك وفاتنده یرینه دارالسعاده اغاسی اولمشیدی دارالسعاده اغاسی بولنان ذات ایسه اندرون هایونده الك بیوک آمر اولوب اوته دنبرو صدر اعظم ایله شیخ الاسلامدن صکره جه و بلکه انلرله هم درجه اعتبار اولنه کلمش و حرم هایون خاصه آنک نظارتنه مفوض بولتمش اولدیفی حالده سلطان سلیمك لاجل الاجلاس حرم هایوندن اخراجی اندن طلب اولتمش و کندوسی محافظه سنه مقتدر بولتمش ایکن باب السعاده نك سدیله جالدرلك حرم هایونه هجومنده مساعده یولنده مسامحه ایتمسی بك بیوک بر جنایت اولدیغندن جزای سزاسنی بولمش اولدی .

كرك مرجان اغا و كرك نذیر افریقادن کتورلمش و اندرون هایونده تربیه ایدیلر كک یولیه بویله بیوک مقام و مرتبه لره کچورلمش طواشیدن اولملریله ترجمه حاللاری بختنده بوندن زیاده تفصیله حاجت کورلمز .

عبدالفتاح في الاصل :

( بیت )

اب وجدك ديماش اجد وهوز كلن \* ای بهاسن کف میزنده کورمش کوله من  
 ما لئه ماصدق اولان کرچی کوله لر نندر صدر اسبق حاجی عزت پاشا طوبخانه امینی  
 ایکن انی بش اتی یاشنده اولدینی حالده الوب دیگر بعض اطفال ایله برابر اندرون  
 هایونه چراغ اینتیر مشیدی سلطان مصطفانک شهزاده لکنده خدمتنده بولمش  
 و سلطان سلیمک خلعی ایجاب ایدن اسبابک استکمالی امرنده خلیجه پویان اولمش  
 ایدو کندن جلوسنده باش چوقدار اوله رق حل و عقد امور سلطنتی قبضه نفوزینه  
 کچوردی و بوکره سلطان سلیمک اعدامنه اک ابتدا مباشرت ایدن اوایدی دنیاده  
 جزاسنی بولدی بقیه مجازاتی یوم جزایه قالدی اسمرالون اصغرالعین اهدب  
 الجفنین مکشوف العینین سریع البیان ریکک اللسان بر شخص شامت نشان ایدی  
 جورى اوسته نک صدیقی جوارى صنفه تقدر موجب شان و افتخار اولدیسه بونک  
 اهاتی دخی ابنای جنسنه او قدر جالب شین وذل و عار اولمشدر .

میراخور محمد دلی ایوب اغانک اوغلیدر اشبو ایوب اغا فی الاصل سلطان مصطفای  
 نائک شهزاده لکنده چوقدار لرندن ایکن اندرون هایوندن اخراج اولمش اولدینی  
 حالده بعض سیئاتنه مبنی مشار ایله مصطفی خان کندوسنی اعدام ایتدکده نانیاره سی  
 اولان زعامتله اوغلی محمد چراغ بیورلمش و کویا سیلان اولدیریلوب یاوریسى پادشاه  
 مشارالیهک اوغلی سلطان سلیمی صوقق ایچون براغلمش ایدی بونک اوزرینه  
 مرقوم محمد ایوبده واقع خانه سنده اقامت اوزره ایکن اردوی همایونک خروجی  
 ائناسنده اجرا اولنان توجیهاتده بعض کبرانک وساطت شفاعتیه غرباء یسار اغاسی  
 اولوب اردوی همایون ایله روم ایلی به کیتمشیدی . متعاقباً سلطان مصطفانک جلوسنده  
 استانبوله دعوت اولمغله و صولنده بیوک امیراخور اولدی و فوق العاده نفوذ بولدی  
 بو اقبالی محافظه ایچون قاتلر له اتفاق تحقق ایتمکله بوجه بالا نذیرک یانی باشنده  
 باشی کسلدی و اوچ کون لاشه سی میدانده قالدی .

مقتول مرقوم دلی مصطفی اوادانچیلردن و اسافل اشخاصدن بر کشتنی ایدی .  
 اوادانچی اولوقت ایکی صنفه اطلاق اولتوردی بری صنفه او جانغی اسکیلرندن  
 سنت و صارق او طه لر یله بونرک صنفه سنی سوپوروب تمیزلیان و سنت او طه سی  
 حامینی تسخین ایلیان وذات شاهانه نک آبدست لکن و ابریقی صاقیلانلردر صنف  
 ثانی اوادان بو ستانچیلریدر بونلر اون ایکی کتشی ایدی که التیسی نوبت بکلیوب  
 بر طرفه تشریف همایون وقوعنده بوالتیدن اوچی باش چوقداردن اوق طاقیرنی

الوب کو تورلر و دیگر اوچی تفکیجی باشینک ز دینه کیدوب و تفنک آتلق اراده بیورلدینی حالده برابر بولنمی لازم کلان ششخانلر ایله باروت و قورشون و ادوات سائرہی یوکنوب طاشیرلر ایتمش صکرہ لری بوصف تائینک اسملری تبدیل ایله مابین همایون بوستانجیلری دینامشدر ایشته مرقوم دلی مصطفی بو اون ایکی اوادان بوستانجیلرندن بریمی اولدییی حالده سلطان سلیمک اعدامنه مباشرت ایدنلردن بری اولمغه دیگر جانیرک اعدامی صرہ سنده اودخی جزای سزاسنی بولدی .

سرکاتبی عارف بک ایله مابینجیلردن فرید ابراهیم بک دخی بو یولده اتهام ایله بوستانجی باشی محبسندہ استنطاق اولمقده ایکن ایکسیده کشی زاده و شعرادن نازک چلبیلر اولملریله حبس و استنطاق زحمتی کندولره غایت کران کلدیکندن هنوز استنطاقلری دردست ایکن عارف بک بو اذایه طیانه میوب علمدار پاشانک استنطاقه کلان آدمنه ( وار پاشا که سویله نه یابه جق ایسه یاسون ارتق جانمه کارایتدی ) دیمکله و حریف دخی اولدییی کیبجه واروب افاده ایتمکله علمدار دخی کندو اصطلاحنجه ( وار آنک پاچه سنی کتور بروکنیده دفعه ایت ) دیمش اولدیغندن اشبو جمادی الاخره نک یدنجی بازار کونی عارف بک آلائی کوشکی پیشکاهنده اعدام ایدلدی و فرید بک صالیورلدی وینه اول کون معتبر و متحیز طواشیدن جوهر و عنبر نام ایکی متهمک دخی باب همایون پیشکاهنده باشلری کسادی .

فرداسی بازار ایرتسی کونی شهریار نوجاه حضر تلری ارسال لویه ایتمکله بر معتاد اندرون همایون خلقنه خلعتلر اکسا و عطیهلر احسان و رکاب همایون اولوب خرقة شریفه او طه سنده ساعت بشه چاریک قاهره طرف شاهانه دن علمدار پاشایه مهر جدید همایون یداً بید تسلیم ایله التفات فراوان بیورلدی .  
علمدار پاشانک صدارتنه دائر صادر اولان خط همایون صورتی ذیلده ( ی ) رقمیه ایراد اولنور .

جلوس همایونه دائر شعرای عصر بک چوق تاریخ سوبیلدیلر علی الخصوص سروری افدینک و عزت ملا افندی ایله عاصم افدینک کوزل تاریخلری واردر فقط اندرون همایون اغالردن قورشونجی باشی عارف اغانک تاریخ تام اولان ( اولدی عدلی خان محمودک جلوسنده عیان ) مصرعی تواریخ سائرہه فائقدر زیرا سلطان محمودک عدلی تخلص بیوردقلرینه توریه و ایهای متضمندر بو ایسه جلوسلرینه قدر بیرونجه معلوم اولیوب اولوقت تخلص همایونلری عیان اولدی .

شهر جمادی الاخره نک طقوزنجی صالی کونی دیوان اولوب رجیح مواجی اخراج اولندقدن صکره شیخ الاسلام سابق عطاء الله افندی قزانلق قصبه سنه و صدر روم

سابق مختار افندی ایله خلع سلیمیده استانبول قاضیسی بولنان و میدان لم ار لرینک اشبهلرندن اولان مراد زاده افندی برر محله نفی ایله سائره عبرت کوسترلدی .  
 بوستانجی باشی صاری یولی علی اغا حقنده برجنایت ثابت اولمیدسه ده سوء ظنه محل اولدیغنه ومعیتی نفراتندن بر چوق اشخاصک جنایتلری ثبوت بولوق حسیدیه ارتق کندوسنده ضابطلق شرف و حیثیتی قالمدیغنه منی اودخی یوم مرقومده عزل ایله یرینه خاصکی اغا اولان عمر اغا برقاعده بوستانجی باشی نصب ایدلدی و قپواغاسی حافظ مصطفی چیقوب یرینه سلفی صالح افندی کتورلدی و فرداسی چهارشنبه کونی صقالو مصاحب اغالردن بعضیری مصاحبلکدن اخراج اولندقلری صره ده نیزن مصطفی بک دخی چیقارلدی .

ینه مذکور چهارشنبه کونی قائم مقام اسبق مصطفی پاشانک بالمله خواصی و ایرادات و مقاطعاتی رفع و الغا ایله فلبیه و رکاب هایون کتخداسی اولان مصطفی افندی حرمی ایله برابر ساقز جزیره سنه و راتب احمد پاشا زاده اسبق امیر آخور اول شمس الدین بک ردوس جزیره سنه نفی و اجلا اولدیلر .

مشار ایله مصطفی پاشا سلطان سلیم خان حضر تلرینک همشیره سی مرحومه شاه سلطان حضر تلرینک زوجی اولوب گاه مدینه انی ایوب انصاریده کائن ساحلسمر اینده و گاه رامی چقلکننده خواص وزارتله متقاعداً اقامت اوزره اولدینفی حالده افکار فاسده احبابیه اختلاط ایدرک صدق و اخلاصه منافی طور و حرکتلرده بولتوب حتی جلد سابعده بیان اولدینفی اوزره خیری افندی برادری سسیداکبی بر عارسزک سوزینه قاپیلهرق و قباجچی کبی بر زور باباشی ایله هم بزم عشرت اولهرق بر کونلک شیخ الاسلام نصیبی کبی بر ماده کر بیهیه سبب اولمشیدی بوندن بشقه سلطان سلیمک فلا کتزه اولمسنه اظهار ممنونیت ایلدیکی مروی اولوب بوایسه اکا کوره بک بیوک کفران نعمت دیمک اولدیغندن بو صره ده اودخی بروجه بالا نفی ایله جزا کوردی .

مومی ایله مصطفی افندی کتخدالق مقامنه چیقه جق مرتبه لیاقت و کفایت احبابندن اولدینفی حالده مجرد حرمنک حرم سلطانی به تعلق و مناسبتی اولوق حسیدیه رکاب کتخداسی اولمش ایسه ده سبکسر و شیوه عصر دن بی خبر اولوب پیغان کبی بلله دیکنی سولیمکده و حرمی واسطه سیله بعض افکار مضره نی حرم هایونه تبایغ ایلیمکده اولمسنه نظر آرانیلورسه سلطان سلیمک شهادتی وقعه سنده بو واسطه ایله جریان ایدن مخبر اتنده دخی دخلی اولوق کرک ایدی ایشته حرمنک دخی کندوسیه بر لکده نفی اولنسنک حکمتی بودر .

شمس الدین بک و قتیله سلطان سلیمه ایکنجی لالا اولمش و جلوسنده بک زیاده اعتبار

بولمش و حتی اولوقت روسحق صحرا سنده بولنان سردار اکرم قوجه یوسف پاشایه  
خط هایون ایله کوندرلش ایدی مکر یوسف پاشایه غیظ قدیمی وار ایش یوسف  
پاشا دخی بونی بیلورمش بناء علیه یوسف پاشا پک چوق اعتذار ایلمش ایسه ده قلب  
کینه دارینه کار ایتیموب استانبوله عودتنده غمز و نفاق ایتمکله اردوی هایون همان دشمن  
اوزرینه حرکته متهی ایکن یوسف پاشا عزل ایله برینه جنازه حسن پاشا سردار  
اکرم نصب اولدوقده قلوب عساکره فتور کلی کله رک میت متحرک کبی ایلر و یه حرکت  
ایدلش و یکیچری و سردار اکرم و چرخه جی و سر عسکر اردولری یکدی بکر ایله  
مختلط اولدقلری حالده دشمنه لدی المصادفه مشهور بوزه بوزغونی ظهوره کش  
والحاصل شمس الدین بک ایله برتنک و تنک و قنده سردار اکرمک تبدیلنسه  
وبالاخره ایله بریوک هزیمت و قوعنه سبب اولمش ایدوکی جهته اندن صکره  
سلطان سلیم انک هر سوزینه اعتماد ایلمز وانی ایله نازک ایشلرده قوللانمز  
اولدی مع مافیسه تعلق مخصوصنه رعایه قوجیلر کتخدانی و بیوک میرآخورلق  
کبی خدمتلرده استخدام ایلردی میرمومی ایله ایسه شانی زاده تار یخنده بیان  
اولدیفنه کوره کیمسه بی بکنمیوب قبودان دریا سیدی علی پاشا طورنده تعظم و تهور  
ایله موصوف و راستکویلق یولنده وکلای عصره زباندرازلق ایله مالوف اولدقدن  
بشقه کفران نعمت یولنده سمت خلافه میل ایش و سلطان سلیمک خلغنند نصکره انک  
علیهنده دخی سوزلر سویلوب بو وسیله ایله سلطان مصطفی متعلقاته چاتمش ایدی ایشته  
بوسیدن ناشی بک بغچه سی قربنده واقع ابراهیم کتخدا ساحلخانه سی کندوسنه احسان  
بیورلمشیدی لکن عوام و خواص بیننده و فاسزلق و انسانی سزک ایله شهرت  
بولمشیدی بو مثللو اطوار نایجاسنه جزا اولق اوزره بو کره بروجه مشروح نفی  
ایدلدی و سالف الذکر ساحلخانه عهدۀ تصرفدن فک ایله صاحب مشروعی اولان  
ابراهیم کتخدا زاده عبدالقادر بکه ویرلدی .

بونکله برابر اسبق والده کتخداسی یوسف اغانک و ارثلرینه دخی سابق والده  
کتخداسی تصرفنده بولنان قونانی رد ایتدیرلدی و عبدالقادر بک ایله یوسف اغا  
زاده صادق افندیکن رتبه لری ابقا بیورلدی .

شانی زاده تار یخنده دیرکه مقدا جلوس مصطفی خانی عقینده رؤسلی حک و الغا  
اولنان اون طقوز عدد مدرسین لفظیدن بو ائنده بعض بابا دوستلری بولنانلرک  
رؤسلی ابقا و اولاد کشتکان رجال دور سلیم خانیدن اکثر وززاده بولنمین درجه لرده  
ایرادات و مقاطعاتی اولنلرک اول ائنده ایرادلری کلیا مصادره اولندیقندن بلا ایراد  
قالملرک بعضیلرینه بر مقدار اسهام عنایت و اعطا بیورلدی از جمله ایکینوز طقوز

تاریخنده طریق تدریسه داخل و طقوز سنهده یکر می بش سنهك قدر طریق قطع ایله موصله سلیمانیه مدرسه سنه هنوز شاب امر دایکن واصل اولمش اولدیغندن رتبه سی یکر می ایکی سنه سنهده موصله سخنه تنزیل ایله ناموس علما تکمیل اولنان والده کتخداسی اسبق یوسف اغا زاده صادق افندی باهت صدر اعظمی ینه موصله سلیمانیه دن کماکان اعتبار اولنهرق مسموعمره کوره کندویه سنوی اون بشبیک غروش قدر فائضو اسهام عنایتیه پدر مانده اولان ادخاری اکثار اولندی شانی زاده نك سوزی تمام اولدی .

کشتکان رجالک خانه وساحلخانهری وار ثلرینه رد ایدلمک عین عدالت ومصادره اولنان حسابسز ماللر ینه نسبتله دریادن قطره قیلندن اولهرق وار ثلرینه برمقدار اسهام ویرلمک مقتضای مرحمت اولمسیله جای تعریض اوله ماز رؤسلاک اقباسی بختنه ککنجه طریق علمیه نك وضع اصلیمی وبعده عرف وعادت حکمنجه نهرسمه کیردیکی بالاده مفصلاً بیان اولمغله بوراده تکراره حاجت یوقدر . شوقدرکه : بروجه بالا نابالغ چوجقلمه رؤس هایون اعطاسیله رسماً قدوة العلماء المحققین دینلمک وچوقدار وقایقچی مقوله لرینه توجیه منصب قضا ایدلمک عادت اولوب علمای عصر بونلری قید ایتدکلی حالده سلم اعتباری طریقک درجات موهومه سنهده اول چوجقلمدن بریسنک معتاددن زیاده جه سرعت ایله ترقیسی ندن اولقدر بادی انفعال اولوبده انک برآز کیرولدلمسیله ناموسلری رینه کلیمویرور اشته بوراسی جای سؤالدر فقط علمای رسمیه بیننده حادث اولان امور اعتباریه اوزرینه بر بحث اولدیغنه مبنی بوندن زیاده تفصیل اقتضایتمز بزینه صدهده کالم .

علمدار پاشا ایله سانی چلبی مصطفی پاشا میانه لرنده خصومت سابقه ولاحقه واریسهده علمدار پاشا ذاتیاتی ترک ایله بویامده مجرد سلطان سلیمه اهانت ایدنلرک ترتیب جزالرینه حصر افکار ایلمش اولدیغندن بوکره مشار ایله چلبی مصطفی پاشانک برخلالنه طوقونلمقسزین اسماعیل قلعه سی محافظی نصب اولمشدر .

سلطان مصطفی والده سنک قهوه چی باشیسی عبدالرحمن افندی اوتهدنبرووظیفه سندن خارج ایشلره قاریشور ومفسدک یولنده اوتیه برویه کیدوب طولاشور اولدیغندن بشقه سلطان سلیمک شهادتی مسئله سنهده رأی اولدیغنی تحقق ایتکله جمادی الآخره نك اون برنجی پنجشنبه کونی آلائی کوشکی پیشکاهنده اعدام اولندی .

فرداسی جمعه کونی سلطان مصطفی قهوه چی باشیسی سلیمان اغا که کرجی الاصل اولوب زاغلی سلیمان اغا دیو معروفدر اودخی باب هایون پیشکاهنده وتبدیل خاصکیسی بغدادلی حاجی علی اغا آلائی کوشکی پیشکاهنده اعدام اولندیلروسر اطبای

شهر یاری اولان طوغچی زاده عزل ایله یرینه نعمان افندی زاده مصطفی مسعود افندی سرابطا نصب وتعیین قلندی و فرداسی جمع ایرتسی کونی سردستاری حافظ یوسف افندی شهر امینی و محمد ندیم بک توتون کمرکیسی نصب اولندیلر .

شهر مرقومک اون بشنجی بازار ایرتسی کونی والدۀ شهر یاری نقش دل سلطان حضر تلی بر موجب رسم وقانون سرای عتیقن مرتب آلائی ایله سرای جدید هایونه نقل اولندی پادشاه علمپناه حضر تلی دخی والدۀ محترمه لرینی اورته قبوده استقبال ایله ( الجئۀ تحت اقدام الامهات ) حدیث شریفنک مقتضاسنه امتثال بیوردیلر سلطان مصطفانک والدهسی شممدیلک سرای هایونده دائرۀ مخصوصده ابقا بیوردی فقط اول کیجه سلطان مصطفانک مستفر شه لرندن اولوبده سلطان سلیمک شهادتی وقعه سنده جلادان بی امانه کیمی معاونت و کیمی مقرر سلیمی به دلالت ایلدکلی ثابت اولان اون نفر قادین و جاریه لر قایققره وضع ایله قیز قلهسی آچغنده بوغدیریلوب دکزه القا اولندیلر و فرداسی صالی کونی اون یدی نفر بوستانجی ینه تهمت مرقومه دن طولایی اعدام قلندیلر .

سلطان مصطفی والدهسی بعده کوزلری ناینا اولدینی حالدۀ یکریمی ایکی سنه قدر معمره اولوب قرق درت تاریخی اواسطنده وفات ایدر حضرت خالد تر بهسی خارجنده مشبک تر بهده دفن اولمشدر .

سابق خزینه کتخداسی ابه سلیم که جلادلرک سر کرده لرندن بریسیدر جلوس هایون انساننده سرغوج هایون و دیگر بعض مجوهرات شاهانه نی الوب قفتانجیسی نصفت ایله برلکده فرار ایله قندقلیده برخانه ده اختفا واندن داود پاشا سمتده واقع ثایه او جاغنه التجا ایتمشیدی حالبوکه علمدارک قورقوسندن هر کس لرزان اوله رقاومقوله متهملری تصحبه کسنه نک زهرهسی اولمدیغندن کیفیت ضابطله اخبار اولمغله ایکسی برلکده اخذ اوله رقا اشبو یکریمی اوچ سنه سی جمادی الآخره سنک اون یدنجی چهارشنبه کونی آلائی کوشکی پیشکاهنده باشلری کسادی .

کرک سلطان سلیمه اهانت و کرک نثر اراجیفه جسارت ویا خود سائر درلوجنایت ایدلرندن بو انشاده همان هر کون برر ایکشر وزیاده آدم اعدام ایله عبرت انام ایدلمکده ایدی هله سلطان سلیم وقعه سن دن طولایی چند روز ظرفنده اوچ یوز قدر نفوس اتلاف اولمشدر و متهمیندن بعضیلری فرار و اختفا ایتشلر ایسه ده انلردخی برر براله کتور یلهرک اعدام اولمقده بولمشدر چونکه سلطان محمود خان حضر تلینک اشخاصی بلله مکده فوق العاده قوۀ حافظه سی اولوب عمرنده بر کره کوردیکی آدمی نیجه سنه لر صکره اوزاقدن کورسه طانورمش حتی



اول وقعه ده بولنان قاتلاردن بریسنی خیلی مدت صکره کندو صدالنده کوروب  
بکز تمکله تحقیق ایدرک بوستانجی باشی معرفتله اعدام ایتدیرمشدر وایچارندن  
بش نفری فرار ایله قسطمونی شهرنده چند سنه آرام ایتدکن صکره طویلوب  
شیخصرینی بیلور برخاصکی یدیه اولوقت قسطمونی والیسی اولان صالح پاشایه امر  
عالی کوندریله رنک انلر دخی اوراده گرفت ایله جزالری اجرا قلنمشدر .

الحاصل وقعه معلومه مزبورده فعلاً یا قولاً جزئی وکلی مدخلی اولنلهپ جزالری  
کورمشدر فقط سلطان سلیمک ابتدا خلعه باشلوجه بر سبب دخی تعصب و افکار  
عتیقه اصحابنک غلو و غلبه سی اولدیغنه مبنی تعصبی قیر مق اوزره اصحابی تحقیر ایتمک  
وسلطان مصطفی دورینک عکسنه کیتمک دخی بودور جدیدک احکامی اقتضاستدن اولدی .  
اسبق کتخدای صدر عالی و حالاً اسما سلطان کتخداسی اولان مورهللی عثمان افندی  
ایسه قدما طرزندن آیرلیوب افخم علما و فضالادن بر ذات اولمسویه تعصبی دخی  
کندو سنه یا قشدرمش و جریء اللسان بر ذات اولدیغندن وکلای عصری برر  
صورتله کوجندرمش ایدی خصمسی بوسره ده اتی دخی اعدام ایتدرمک ایستدیلر  
ایسه ده متعصبر یا افکار عتیقه اصحابندندر دیو آدم اولدرمک مجرد اغراض  
نفسانییه خدمت دیمک اوله جغندن علمدار پاشا بوکا مساعده ایتوب فقط  
جمادی الآخره نک اون یدنجی چهارشنبه کونی اودخی روسجغه نفی اولدی .

ماه مرقومک اون سکرنجی پنجشنبه کونی پادشاه نوجاه حضر تلری تقلید سیف رسم  
عالینک اجراسی ضمننده دیوان یولیه حرکت ویول اوزرنده کی مراقدمینه اجداد  
کراملرین زیارت ایدرک ابو ایوب انصاری رضی عنه الباری حضر تلرینک تربئه  
مبارکه لرینه واروب و نقیب الاشرف دری زاده عبدالله افندی یدیه قلیج قوشانوب  
بعده بجرأ سرای هایونه عودت بیوردیلر .

وماه مرقومک یکر منجی جمعه ایرتسی کونی سابقا ترسانه امینی عزیز افندی صدر اسبق  
قبو کتخدالغندن طولای بعض جنجه ایله بالچغه نفی اولنوب انجق صکره اسماعیل  
قلعه سنه نزل امینی نصب و تعیین اولنمشیدی .

فرداسی بازار کونی معهود موسی پاشانک سر مقطوعی کلدی و کشتکان رجالک  
مخالفاتندن اخذ و اختلاس ایتمش اولدینی اموال لتحصیای میدانه چیقارمق اوزره  
هان اول کون خزینه داری اخذ ایله بوستانجی باشی محبسونه ویرلدی .

مقتول مشار الیه موسی پاشا صدر اسبق موروی اعرج عثمان پاشا کریمه سنک حفیدیر  
و پدری دیوان افندیکی ایله وزرای عظام خدمتلرنده بولنمشدر کندوسی یکیشهر  
فارده تولد ایدوب کیدرک قضای مذکور و جوهندن معدود اولمق ملا بسه سیاه

قوجی باشلیق رتبه سی المشایدی بعده در سعادتده توطن ایتمکله طشره مأموریتلرنده  
 وصاربه صارمش تحصیلات ایشلرنده قوللانیلور اولدی طرابلس شام ایالتک  
 تحصیلاتنه زیاده طور غونلق کلدکده بعض مجالس کبراده ایالت مرقومه کندوسنه  
 ویراسه کایتلو مال تحصیل ایدیوره جکنی در میان ایتمکله ایکی یوز طقوز سنه سنده  
 رتبه وزارتله وجرده باشوغانی مأموریتله طرابلس شام ایالتی عهده سنه توجیه  
 قیلندی . اورایه واروب تعهدی وجهله تحصیلاتی یولنه قویه مدیغندن بشقه طمع  
 وارتنکابی حسبیه حقدنه شکایتلر وقوعه کلکله عزل ووزارتی رفع ومالی مصادره  
 وقبریس جزیره سنه نفی اولندی برمدت صکره وزارتق ابقایله پاسبان اوغلی  
 اوزرینه مأمور اولدی وبعده سالانیک سنجاغنه نقل ایددی ایسه ده اول ائشاده  
 حقی پاشا ثانیاً روم ایلی سر عسکری اولوب کندوسنی برقوقجه محافظه سنه تعیین  
 ایتدکده قدرتسز لکندن بئنه اعتذار ایلدیکندن حقی پاشا دخی بایورلدی وزارتق  
 رفع ایله کیفیتق باب عالی یه عرض ایتمکله بر موجب بیورلدی سر عسکری ایضای  
 مأموریته اقدام ایتمدیکی حالده لمنی یه نفی فرمان اولنمغین خواه وناخواه برقوقجه  
 محافظه سنه شتابان اولدی فقط اراسی چوق کچمکسزین حقی پاشا عزل اولنمغله  
 اودخی برقوقجه محافظه سی قیدندن قورتلدی ایسه ده متعاقباً اینه بختی محافظه سنه  
 مأمور ایددی بوندن دخی یقه نی صیرمق ایچون خیلی چالشدی مفید اولدی  
 درت سنه اوراده قید محافظه ده قالدی و برارالق مصر والیسی اولوب اسکندریه یه  
 واردیسه ده مصره کیره مدی ومصرینه محمد علی پاشا عهده سنده ابقا اولوب  
 اودخی سالانیکه عودت ایددی اردوی هایونک روم ایلی جانبنه خروجی تقرر  
 ایتدکده سوق قضا وقدرایه قائممقام صدر عالی نصب اولنق اوزره در سعادتده جلب  
 اولندی اذن صکره استانبولده نصل خبائتلر وندرلو اهانتلر ایتدیکی بالاده مفضلاً  
 بیان اولنمش ایدوکندن تکراریله ارباب مطالعه یه صداع سروریمه لم .

غایت شیطنت کار بر شخص مکار اولوب منصبده بقاسی ایچون ایتدیکی فالقلر  
 وارتنکاب ایلمدیکی حیله کارقلر قالدی سرکرده اصحاب قتنه وفساد اولان معهود  
 قباجقنی بومقوله خصوصارده آلت فساد ایتمش ایدی اره صره قباجقنی باب عالی یه  
 کلوب کندوسیله کورشدکجه کاه قباجقنی شویله بر ماده تکلیف ایددی هله اسلوب  
 حکیمانیه ایله تعدیل ایلدم دیو کندوسنک لزوم واهمیتی حضور هایونه عرض ایدر  
 وکاه فلان ماده یی بوغاز ناظری استدعا ایددی رد اولنسه معاذالله تجدد سلطنتی انتاج  
 ایدر دیو طرف سلطنتی توحیش واخله ایله کندو اغراضی یورتدیرر ایدی  
 فقط سلطان مصطفی دورینک فالقلرندن خلق متکدر ومتالم اوله رق دور سلیمی نی

آرزو ایدر اولدقلرندن انجام کاری مطالعه ایله در حال تبدیل لسان ایدرک کویا خلغ  
 وقعه سننده بالتصادف قائم مقام بولنوب چاره سز حل عقد امور کندو الندن کچمش  
 اولق صورتنده کورنمکه واستعفا وادیلرنده کز نمکه باشدی وبرارلق قائم مقاملندن  
 عزل اولندیسه ده بازار مفسدنده شریکی اولان عطاء الله افدینک ابرامیله ینه قائم مقاملق  
 مسندینه کتورلدی وبوکره عطاء الله افدی ایله بینلرنده قرابت دخی پیدا  
 اوله رق بر مرتبه ده قوت بولدی جزئی منفعل اولدینی کیمسه لردن انتقام الملق  
 داعیه سنی درپیش وانواع فسادات ایله امور دولتی رهین اختلال وتشویش ایدر  
 اولدی هله ایکی آی صکره ینه عزل ایله الندن دولت قورتلدی دفعه اولی وثانیه  
 قائم مقامنی مدتی اون آیه بالغ اولور زماننده دولت پک بیوک مضرترله وخلق پک  
 چوق مشقتله اوغرامش اولدیغندن بوکره سر مقطوعی کلویده سرای هایونده  
 میدان سیاسته قونلدیگی کبی عامه خاق فوق العاده مسرور اولمشدر ضعیف الجته  
 وسط القامه زشت چهره عبوس الوجه ابو الفساده وغداری داد مشئوم القدم وکافر  
 النعم نصاب نصفت وانسانیتدن عاری وعاطل واصلاحی ناقابل برکوسه باطل ایدی .  
 (عصمنا الله من شرور انفسنا)

جلوس مصطفی خانیده دفتردار بولنمق حسبله کشتکان رجالک اموالی تمهیر وتحریر  
 ایدرک آشکار ونهان اولان اموال کثیره نك جلب وتحصیلنده مهارت کوسترمش  
 وبو وسیله ایله کندوسی دخی ایله خیلوجه مال کچورمش اولان سعداالله افدی یه  
 اول اموالک بر مقدارینی میری ایشلرنده صرف ایتدیرمک اوزره جمادی الآخره نك  
 یکریمی برنجی بازار کونی ادرنه سر اینک تعمیرینه مأمور ایدلدی ینه اول کون  
 عبدالله رامز افدی عهدسه رتبه وزارتله سلستره ایاتی توجیه بیورلدی .

اشبو رامز افدی فی الاصل قریم خانی قاضیسکرینک اوغلی اولوب پدریله برابر  
 قریمدن استانبوله کلدکده تحصیل علوم ومعارفه صرف مساعی ایله بالامتحن طریق  
 تدریسه داخل وبعض محاکمه کتابت ونیابت خدمتلیله مشغول اولوب مصر  
 سفرنده اردوی هایونده بولنمغه اردوی هایون قاضیلنی منحل اولدوقده دباغ زاده  
 یرینه برمدت نیابت وارباب دیوان ایله آمیزش والفت ایدرک حیثیتی معلوم اولمغین  
 سوق سرکاران ایله طریق خواجکانی یه ادخال اولنمشیدی در سعادتیه عودتنده  
 خبره خانه نظارتی کبی بعض مناصب ایله کامران ویکرمی بر سفرنده باش محاسبه چی  
 اولوب اردوی هایون ایله روان اولدی بعده بالاده بیان اولدینی اوزره علمدارک  
 نزدنده کسب نفوذ واعتبار تام وبوکره رتبه وزارتله احراز دست مایه مرام وسایه  
 صدر اعظمیده قوکتخداسی نصب اولنان بهیج افدی معرفیه چند روز ظرفنده

لوازم وزارتتی اتمام ایله منصبی جانبه کیتمک اوزره داود پاشا سحر اسنده منصوب  
خیمه لرده آرام ایلدی .

مکالمه لرده بولنان قضاة عساکردن عرب زاده عارف افندی مفتی و عثمان پاشا زاده  
عزت بک افندی متدما و منیب افندی مؤخر آ منفی اولمغه علمادان امور خارجه یه  
وقوفلی برذاتک منیب افندی یرینه مجالس مکالمه یه مأموریتی لازم کلوب کوستندیلی  
طاهر افدینک اکر چه معلومات خارجه سی و علی الخصوص بو اوانده فر نکستانک  
احوال مشوشه سنه و قوفلی یوق ایسه ده نطوق و جسور و عوام مشرب اولوب روم ایلی  
اینانر یله دخی معارفه سی اولمق ملایسه سیله بو کره مجالس مکالمه یه مأمور ایلدی  
و در حال منیب افندی کبی او دخی کسب تعین ایدرک قپوسی مرجع شیخ و شاب  
اولدی . شیخ الاسلام عرب زاده عارف افندی درویش نهاد و خالص القواد برذات  
نوازش اعتیاد اولوب انحق بر وجه بالا یوم جلوس هایونده سلطان مصطفی ایله  
علمدار پاشا بیننده متردد اوله رق ایکی طرفدن دخی عمر تده کسنه دن کور مدیکی  
و ایستمدیکی معامله تحقیریه و شتوم غلیظه یه مظهر اولمغه سراسیمه اولمش و بوجه تله  
اعتبار و حیثی قیرلمش اولدقدن بشقه سلطان سلیمک شهادتی انک مشیخته ده  
وقوع بولدیغی جهته یلین الناس مشؤم القدم و طالعی معکوس و منکوس دیو اراجیف  
اولمغه ارتق مقام مشیخته بقاسی موافق حال و مصاحت کور یله مدیکندن  
جمادی الاخره نک یکر می ایکنجی بازار ایرتسی کونی عزل ایله یرینه صالح افندی  
زاده احمد اسعد افندی ثانیاً مقام مشیخته کلدی .

بر وجه بالا رامز پاشا سلستره یه کیتمک اوزره بولنش ایسه ده علمدار پاشانک عمری  
بره ایجه کچمش اولسیله مهم امور دولیه دن بی خبر اولوب علی الخصوص استانبولک  
احوالنه اصلا و قوفلی اولدیغندن و رامز پاشا ایسه مزاج شهر و دهری بیلور اصحاب  
معلومات صحیحه دن برذات اولدیغی حالده استقامت رأی علمدار پاشا نزدنده مجرب  
اولمغه آتی یانندن آیرمق ایستمدیکندن و قپودان دریا سیدی علی پاشانک عزل و ابقاسی  
بحی علمدار پاشا ایله سلفی بیننده برمنوال مشروح باعث قیل و قال اولمغه ارتق  
قپودانلنده ابقاسی جائز اوله میه جغندن دریا قپودانلی رامز پاشایه و سلستره ایالتی  
سیدی علی پاشایه و قونیه ایالتی قره حصار صاحب سنجاغی متصرفی اولوب اردوی  
هایون ایله عودت ایدن بهرام پاشایه بالتوجه غره رجده باب عالی یه دعوت ایله  
حضور صدر اعظمیده خلعتلری الباس اولندقدن صکره قعود ایتدکننده چونکه سیدی  
علی پاشا طرف صدر اعظمیدن مسلوب الامنیه اولوب سلستره ایالتی ایسه صدر اعظمک  
یوردی اولمغه کند و سنجه اورایه کیتمک قپانه طو تلمق دیمک اوله جغنی ملاحظه سیله

همان صدر اعظمه متوجهاً ( سر کر چه بزه ساستره ایالتی توجیه بیوردیکز لکن بنم اوتد نبر و نشئت والقم بحرانی اولوب برانی معامله سنه قطعاً و قوف و معرقم خصوصاً روم ایلی حوالی سنده حکم وزارت اجراسنه بروجهه استعداد ولیاقت یوقدر سر بوخلعتی بر اهله الباس بیورک دیو یرندن قیام و خلعتی قیوجیلر کتخداسنه تسلیم ایله چیقوب کیتمکله همان وزارتی رفع و بروسه یه نفی اولندی رامز پاشا ایسه فروحشمت ایله ترسانه طاقنی الوب عطیه صدر اعظمی اولان التونلری نثار ایدرک آتیه را کباً ترسانه سمتنه کیتدی بهرام پاشا دخی داراتیله وزیر اسکله سنه کلوب زورق سوار اوله رق اسکداره عودت ایتدی قرمان والیسی بولسان عبدی پاشا عهده سنه دخی ارض روم ایالتی و شرق سر عسکر لکی توجیه بیورلمشدر .

بو ائنده استانبولده عسکر غلبه لکی اولمق حسینیه اسعار مصاحتی کسب اهمیت ایلدیکندن استانبول قاضیسی هدایت افندی امر اداره دن عاجز قالدیغنه و کوستندیللی طاهر افدینک مأموریت جدیده سی ملباسه سیله صیق قیور رجالیله آمیزشنه وسیله اوله جق برمنصبده بولنسی لازمه خالدن کورلدیکنه منی ینه غره رجیده هدایت افندی عزل اولنهرق اناطولی پایه سیله استانبول قاضیانی طاهر افندی عهده سنه توجیه بیورلدی .

اردوی هایونک در سعاده و رودندن برکون صکره یکیکچری اغاسی فجأة فوت اولمغه یرینه قول کتخداسی نصب اولندیسه ده ایجاب وقت و حاله کوره او جاغ عامره امورینی اداره یه کافی کورلدیکندن بوکره عزل ایله یرینه قول کتخداسی اولان مصطفی اغا یکیکچری اغاسی نصب اولندی .

بالاده بیان اولندیغی اوزره طیار پاشا قائم مقاملقدن عزل ایله نفی اولندقدن صکره علمدار پاشانک شفاعتیه وارنه محافظی نصب اولمشیدی انجق دور سایم خانیده نظام جدید امرینه مخالفت و سلطان مصطفی طرفدارغنی التزام ایله عصیانه جسارت ایتسی و بعده اوزرینه سوق اولنان عسکره مقاومت ایده میهرک قاچوب روسیه دیارینه کیتیمی شعار صدق و عبودیتک خلاقی و سیاق احوال مشروحه یه نظراً کندوسنک افکاری ایجاب عصره کوره اجراسی لازم کلان نظامات جدیده منافی کورلدیکندن بو ائنده او دخی اعدام اولمغه رجیک ایکنجی کونی سره قطوعی در سعاده کلدی .

سابقاً صدر اناطولی حفید افندی میدان لحم افدیارندن اولدیغنه نظراً رفقاسیله برابر بر طرفه نفی اولنسی امر طبیعی ایکن صدر اعظمک عقل خواه سی مقامنده بولنان و کوسه کتخدا دیو معروف اولان احمد افندی یه یناشوب آنک و ساطتیه صدر اعظمه

بری پیکر و پرزیب و زیور بر جاریه رعنا پیشکش ایدوب او دخی ذاتاً زندوست مزاج برآمد اولدینی حالد بویله عمرنده کورمدیکی و خیال و خاطرینه بیله کستورمدیکی برقزی کور یجک حفید افندی حقدده روی مساحه کوسترمش ایسهده رامز پاشا ایله رفقاسی میدان لم ارلرینک نفی واجلاسی امرنده اصرار ایتملیله رجبک سکزنجی صالی کونی حفید افندی دخی قسطمونییه نفی واجلال ایدلدی .

الحاصل دور سابقده تنفذ ایدن صدور علما صیغه مطردهیه چکیلوب و حفید افندی اردهه شاذ کبی قالمشیکن اودخی قاعده متخذیه توفیقاً نفی اولنوب بقیه علماء رسمیه اسم جامد کبی طونه قالدی و جمله سی امثله مختلفه اجرا آتدن عبرت آلهرق آرتق کسنه تصرفات دولته دخل و اعتراض ایده مز اولدی .

بو اوانده امور عسکریه جه بعض اصلاحاته تشبث اولمق مقرر اولدیغندن او جاغک محاسبات عتیقه سنه بالابتدار او جاق بازرکانی یهودی دلی چلموندن صورلدجه اصلا سر رشته ویرمامک اوزره هر خصوصده انکار یولنی التزام ایتمکدن بشقه قوه مالیه سیله او جانچی استیلا ایتمش اولدیغندن شایدکه یکچیری او جانچی نظام الته آینور ویا خود دیکر برعسکر ترتیب اولنور ایسه اختلاسات سابقه میدانه چیقار دیو او مثللو تشبثاتک اجرا سنه مانع اولمق اوزره سرکاران عسکری تحریکه قیام ایلدیکی تحقق ایتمکله رجبک اون او چنجی صالی کونی اغا قیوسی پیشکاهنده اعدام اولندی بووقته قدر او جاق بازرکانی اعدام اولدیغنک وقوعی اولمغله او جاغک وضعندن برو مسبوق بلئل اولمان برعبرت کوسترلمش اولسیله او جاقولویه زیاده تأثیر ایلدی .

سلطان سلیم زماننده احداث اولنان امور بحریه نظارتی عنوانی بدعتدر دیو سلطان مصطفانک جلوسنده الغا ایله ینه ترسانه اماتی عنوان عتیقی اعتبار بولمشیددی بوکره نظامت سلیمیه نك اعاده سی مصمم اولمق حسبیلله ترسانه اماتی عنوانی ینه امور بحریه نظارتی عنواننه تبدیل اولنهرق دفتر خاقانی امینی وباروتخانه ناظری بولنان موردهلی علی افندی رجبک اون طقوزنجی کونی امور بحریه ناظری نصب اولندی ودفتر اماتی کچوک راشد افندییه وباروتخانه نظارتی الحاقاً چاوشباشی تحسین افندییه توجیه قلندی .

مقدمه سرکاران اشقیادن ایکن یکچیریله ایچنده فته احدائیه عارف اغالی عزل ویرینه کندوسنی سبکان باشی نصب ایستدیروب بعده دیکر برفته وقوعیه عزل ونفی اولنان سابق سبکان باشی مصطفی اغا بو ائنده اعدام اولمغله سرمقطوعی شعبانک او چنجی کونی در سعادت کلوب نظرگاه عبرته قونلدی .

حمال اوغلی حافظ مصطفی اغا سلطان سلیمک بندکانندن اولدینی حالد رفقاسیله

عربده چقاروب بوجهته اندرون هایوندن اخراج اولنش ایدی بناء علیه ارباب فساد ایله هم زبان اوله رق سلطان سلیمک خلی و قعه سنده ایجه سعی و عمل ایدوب مطمح نظری سرکتابتی ایله اندرون هایونه کیرمک خصوصی اولدینی حالده دور مصطفی خانیده دخی نائل امل اولمق سزین بو کره سلطان محمود خان ثانی حضر تیرینک جلوسنده نفی و تغریب اولنمشیکن او دخی اعدام ایدلمش اولدیغندن سر مقطوعی آنف الذکر سکبان باشی مصطفی اغانک سر مقطوعیله برابر بر کونده در سعاده کلدی و (یحشر المرء مع من اخب الیه) سری ظاهر اولدی .

اسبق سکبان باشی عارف اغانک سر مقطوعی دخی شعبانک بشنجی کونی استانبوله وصول بولدی مقتول مومی الیه فی الاصل ارمنی قومندن اولدینی حالده کچوکاکنده اهتدا و یکیچری کر وهنه التحاق ایدرک یولیه سکبان باشی اولوب خلع سلیم خانی وقعه سنده موسی پاشایه رفاقت ایتدکن صکره شوکا بوکا سرکاران سنک حقنده شویله بویله دیورلردی سنی شو و جهله تخلیص ایلدم یاخود ایدرم دیو بر چوق کیمسه لری تجریم ایتدکن بشقه فلان کیجه فلان محله بر طاق سلیمی کروهی عقد جمعیت ایدوب همان شوکونه بر فتنه احداثه مباشرت اوزره اولدق لری جاسوسلرم خبر ویردی در عقب واروب جمعیتلری پریشان ایتدم یوللو تصنیعات ایله سلطان مصطفای دخی اغفال ایدرک اره صره مجوهرات و عطایای و فیره آلدیغنه قساعت ایتیموب او جاقلوبه احسان بیوریلان عطایانک دخی بر مقدارینی کتم و اختلاس داعیه سنه دوشمکله یکیچریلر ایچنده ظهوره کلان اختلال اوزرینه عزل ایله بروسه یه نفی اولنمشیدی بوکره او دخی اعدام ایله امثاله عبرت کوسترلدی .

سلطان مصطفی متعلقانندن جوچه مصطفی دخی صفر زاندا کبی خونۀ مقهوره عدادینه داخل اولدیغندن بو اوانده آنک دخی نقطه صغیره وجودی شمشیر سیاسته صحیفه هستیدن حک و ازاله اولدی .

واستانبول قاضی محضر باشی احمد اغانک اصنافه دائر بعض فساداتی استخبار و تحقیق اولنمغه بر چکدیرمه یه ارکاباً مرمره آطه سی پیشکاهنه کوتوریلوب دکزه القا قیلندی .

بو وجهله متهمین حقلرنده اجرای سیاست اولدینی ائنده مغیلان وادی طغیان اولان یکیچری زور بالرینک کیمی علناً علف دهان شمشیر و کیمی جوف لیده بوغیله رق وجود مضرت آلودلریله حیوانات بحریه دلیر اولوب سائر اصحاب محکم و تغلبک دخی کیمیمی منفی و کیمیمی برکوشده محتفی ایدی معهود قره دکز بوغازی یماق لری ایسه بتون بتون رفع و البغا ایله اسملری اونودلدی و یکیچری غیر تکشلیکله

معروف اولان روم ایلی اعیان و اغاری بالعکس یکچریلره عداوت و مقدمات سلطان سلیمک نظاماتنه مخالف رأیده بولدقلرینه اظهار ندامت ایدر و برر عالی قوناقده اسکان اولمغریله هر کون اوچر بشر یوز روم ایلی ارلریله باب عالی یه کلوب کیدر و بوروم ایلی عسکرلری هیئت پرهیتلریله گروه گروه اسواق و بازارده کزر اولدقلرندن درون استانبول بر قشله صورتنه و باب عالی بر دیوان حرب هیئتنه کیردی اقسرایده و پارمق قپوده و اوغیلر باشنده و بالیق بازارنده آدم لاشه سی اکسیک اولمزدی بر ایکی آی ظرفنده بو وجهله اعدام اولنانلرک عددی بیکه بالغ اولدی درون استانبولده صدر اعظمک اراده سنه قارشو سوز سو یلمکه و یا خود امور دولندن بحث ایلمکه کسنه جرأت ایده مازدی سلطان سلیمک نامی او قدر حرمت ایله یاد اولنوردیکه بر حیات اولوبده تخته چقمش اولسه بو قدر تاثیر نفوذی اوله مزدی بو جهته یکیچریلر هر طرفده محقر و سلطان سلیم کبی بر پادشاه عالمنهاک قدرینی بیلمدیلر دیوهر کون سرزنش و تویخیه مظهر اولمقده ایدیلر و اولکی کبی اولور اولمازایشلر مجالس مشورته سورنمیوب مواد جسمه هان عرض و تلخیص ایله اراده سینه سی بالاستحصال سریعاً اجرا ایتدیرلمکده و مواد سائره اراده علیه صدرتپناهی ایله اجرا ایدیلیورمکده و صدر اعظمک متهملر حقدنه اصلا رحم و رأفتی اولمیوب جرم و جنایت اسحابی در حال جزالینی کورمکده اولمغین درون استانبولده عمومی آسایش و امنیت پیدا و امثالی کورلماش بر سکوت و سکونت هویدا اولدی .

فقط اوزون اوزادی یه تدقیقانه وقت اولمدیغندن جزئی بر جنحه ایچون شدتلو جزا کورمک کبی غدرلر دخی و قوعه کلور ایدی . حتی خلال شعبانده بر تازه یکیت بر انعام شریف سرقتی ایله متهماً قپویه کتور یلوب در حال اقسرای سبلی اوکنده اعدام ایدلکده کیجه اوزرینه جانب سمانن نور ایندیکنی قره غول نفری کوروب خبر ویرمکله کیفیت صدر اعظمه لدی الافاده اصلا اهمیت ویرمیوب ( اوده لازم وارسون آخرته بکا شفاعت ایتسون ) دیدیکی مرویدر .

دور سابق منتیمیلرندن بعض مشایخ طریق و قضاة ایله بر قاج وزیر قپوکتخدالرینک بو انشاده بعض تفوهات ناسزایه جرأت ایتدکلری مسموع اولمغله هر بری بر طرفه نفی اولندینی صروده سنی یوز اوتوزه قریب و یکانه عصر اولان فیومی افندی نام فقیه فاضل دخی با حکمت خدا مغنیسایه اجلا اولندی افندی مومی ایله سلطان احمد مرحومک اون بش تاریخنده جلوس هایونلرینی مبشر خطبه فرمانی فیوم شهرینه واصل اولدقده هنوز اون سکر اون طقوز یاشنده بولندینی حالده خطیب



اولدینی جامعک متبرنده الك اول کندوسی اوقومش ایدوکی لسانندن مسموع اولوب  
حالا خود بخود قیام و قعود و رکوع و سجوده مقتدر و جمیع حواس و قواسی  
نقص و خللندن سالم و کیجه کوندز کوزلکسز مطالعه کتبه مشغول و مداوم ایدی  
دیو شانی زاده تاریخنده محرردر .

بالاده بیان اولندیغی اوزره خیری افندی برادری سید اافندی مقدا طرابلسه  
نفی اولمشیکن خلال راهده جبار زاده یه التجا ایتکله یوزغاد قصبه سنده مکک  
و توقف ایدلکینه دائر دردولته تحریراتی کلدی امنای دولتک مرادی مومی الیهک  
درساعتدن طرد و ابعادی اولغله حقننده ( هر کجا باد آنجا بر باد ) مضمونی  
ایراد ایدلدی .

## فَذْلِكْهُ

بالاده شرح و بیان اولندیغی اوزره سلطنت سنییه یه قوه الظهر اوله بیله جک نظام  
جدید عسکری و قعه خلع سلیمی اثناسنده الغا اولغله و روم ایلی و اناطولی طرفلری  
ملوک طوائف حکمنه کیرمش اولان دره بکارینک ایدایء تحکم و تغلیبونده بولغله  
دولت علیه پک غریب و مشوش برحاله دوچار اولوب استانبولده ایش زوربالرانده  
قالدی طشره لرده دخی استانبولک حکمی یوریمز اولدی .

محمد علی پاشا کوله منلرک محاسنه حصر افکار ایتکله مصر ایالتی نتیجه سی مجهول  
بر حالده و حلب جهتی اسکی حال اغتشاش و اختلالده و بغداد کوله منلری داعیه  
سرکشی و استتقلالده اولوب و هابیلر ایسه جزیره العربی ضبط ایله حرمینده  
خطبه لر دن نام خلافتیناهی بی اسقاط ایتدکن بشقه حدود مصر و شام و عراقه تعرض  
ایدر اولدقلمی جهته اولطر فدن دولت علیه یه بر یکی غائله سفریه اچلدی .

بونجه غوائل داخلیه اره سنده دولت علیه روسیه و انکلتره دولتله محارب اولوب  
اول عصرک جهانگیر بی نظیری عد اولنان ناپلیون دخی روسیه امپراطوری عکساندری  
ایله برلشهرک بینلر ننده ممالک محروسه نك صورت مقاسمه سنی تذکر و مطالعه ایتکده  
اولدقلمی حالده دفع سائل ایچون دولت علیه نك اولدقجه کوه نیله بیله جک قوه بریه  
و بحریره سی یوق و امور ملکیه و مالییه سی غایت بوزوق ایدی .

الحاصل هر بری بر دولتک انقراضی موجب اوله جق نیجه سبیلر اولوقت دولت علیه ده  
موجود و احوال طبیعیه یه نظراً هر برینک چاره سی مقفود ایدی . تاریخ شناسانه خفی  
دکدر که دول سالفه ایچنده بعض مشکلاته اوغرایوبده صاوشدیران اگر چه چوقدر  
لکن بر دولتک بزمانده بوقدر مهالك و متنوع مخاطره لر ایچنه دوشوبده خلاص  
بولدینی بوقدر .

ایشته سلطان محمود خان عدلی حضرت تبری بویله بر مخاطره لو زمانده یاره لی وبره لی اولدینی حالدہ جالس تحت سلطنت ولا بس خامت خلافت اولدی وانی اجلاس ایدن علمدار پاشانک یوزندن دولت علیه ایجه قوت بولدی لکن اودخی متغلبه دن یتشمه بر مرد بوالفضول اولدقدن بشقه بوقوت انک ذاتی ایله قائم برامر عارضی اوله رق هیئت دولتجه امنیت بخش اوله جق بر کیفیت دکل ایدی .

دولت علیه بوقدر مشکلات داخلیه ومخاطرات خارجیه دن نصل قورتلدی ونه درلو اسباب ایله شمیدیکی حال ودرجه اقتدارینی بولدی یعنی سلطان محمود خان حضرت تبری اول قدر مشکلات ومخاطراتک دفعنه نوجهله موفق اولدی ودرون و بیرونده یرلشمش وکوکلشمش اولان بونجه زوربا ومتغلبه کر وهنک حق لردن کلو بده تکرار نظام جدیدی نه کونه وجوده کتوره بیلدی .

بورالری طوغر یسی خارق العاده حالاتدن اولوب اکر اسکی وقتلرک وقایعی اولسه مبالغه یه حمل ایدردک لکن مقدم ومؤخر رسمی وغیر رسمی محرر بونجه لوائج وتواریخ وسائر اولوب بونلردن بشقه اول وقته یتیشن خیلی ذواتدن دخی تحقیق ماده اولنمش ایدوکنه نظراً مواد مبحوث عنها مبالغه یه حمل اولنه ماز وجناب حقک ملت اسلامیه حقنده برنوع عنایت مخصوصه سیدر دیمکدن بشقه جواب شافی بولنه ماز . بناءً علی ذلك روایات مشروحه نك صحتده اشتباه ایتموب انجق بوانقلابات وترقیات بتقدیره تعالی نصل اسباب ومقدمات ایله حصوله کلمش اولدینی اراملی یز ایشه بوراسی علم تاریخک وظیفه سیدر وساطان محمود خان حضرت ترینک احوال تاریخیه سی مطالعه اولندقده بودقیقه لر اکلاشیلور وانک نه بیوک پادشاه ذیشان اولدینی معلوم اولور .

احوال مزبورہ نك اولیاتی و بوفذلكه نك بعض تفصیلاتی زیور صحائف جلد آتی قنور .

شمدی سایه هاوایه هایونده مستغرق اولدیغمزا نواع الطاف جلیله حضرت پادشاهینک ایفای شکر ومحمدتہ ابتدار ودعای باخیر جناب ظل اللهی به تکرار ایده لم .

### ذیل

( درون کتابده موعود اولان صور اوراق )

عدد

\* روسیه اتفاقاتمه سی \*

برنجی ماده پادشاه آل عثمان حضرت تبری وجمیع روسیه لولرک امپراطوری

پادشاهی و دولتری و رعایای اراسنده كرك برده و كرك بحرده بالخیر والمیمنه مؤسس اولان صلح و مسالمت و حسن وفاق و مخاندنه مبنی طرفینك حسن حال و امنیتی ایچون بینلرنده اشتراك و موافقت و مصالحت و كمال مصافات و مودت رابطه لری علی الدوام اشبو تدافعی اتفاق حسیه شولر تبه قوی و مستحکم اولا كه بوندنبویه بر طرفك دوستی طرف آخرك دوستی و كذلك بر جانبك دشمنی جانب آخرك دشمنی اوله بنا برین پادشاه آل عثمان و روسیه ایمر اطوری و عد و تعهد ایدر كه آسایش و امنیت جانبته دائر اولان جمیع مواده خالصانه مخابره و مذاكره ایدوب كندو ملكار ندن بر كونه تعرضی دفع و آسایش عامه نك استحصالیچون بالاشترك و بالمذاكره اقتضا ایدن اسبابه تشبث ایدلر .

ایكنجی ماده دولتین فیخیمتین معاهدتیندن برینه و یاخود ایكینسه مضر آخر بر دولت طرفندن هر قغیسی اولور ایسه اولسون بر كونه سوء قصد ظهورنده معاهد و متفق اولان دولت بر كونه مقاصد خصمانه نك پیش از وقوع دفعی خصوصنه بذل مساعی جمیه ایدوب فاما سرزده ظهور اولان معارضه یی دفع و فسخ صلح حالتی قبل الضرور منع ایتك ضمننده توسطی مفید و كار كر اولمز ایسه و مظهر هجوم اولان طرفلر دخی حقتنده و قوعی مظنون اولان حرکات خصمانه یی اوزرندن صرف ایله منع و رفع ایتك كندونك مساعی و اسباب اقتداری و افیه دكل ایسه اولخالده متفق اولان دولت قوت بحریه و بریه ایله امداده مجبور اوله قالدیکه موقع ممالك و یاخود بعد مسالك حسیه ذكر اولنان امدادك عیناً و یرلمسی ممكن اولدینی حالد اشبو عیناً و یریه جك امدادك ایجاب ایده جك مصارفی بمقدار ایسه بدلاً عن نقد و یریه و قوت بحریه استمداد اولندقدقه اقل التي قطعه صره كیلری و درت قطعه فرقتین و قوت بریه استمداد اولندقدقه اقل اون بیک پیاده و ایکی بیک سواری عسکر اعطا اولنه و لكن بری و بحری امدادلك دفعه اعطاسی اولجه بالمذاكره قرار و یرلمدكجه جائز اولیه .

اوچنجی ماده ذكر اولنان اعانتك عیناً و یاخود نقداً و یرلمسی خصوصی مظهر هجوم اولان دولتك ید اختیارنده اولوب عیناً امداد اولنسی یعنی بری عسکر یادونما مطالبه ایلدیکی حالد مطالبه كونندن نهایت اوج آی مرورنده ارسال اولنه لكن اعانت مالیه اختیار اولنور ایسه دولت صائله نك اعلان حربی یاخود هجوم و تعرضی ابتداسندن اعتبار اولنوب مصالحه انعقادینه دكین سنه بسنه معین تقسیمطلر ایله ادا اولنه .

دردنجی ماده اعانۀ و یریه جك عساكرك عددینه مناسب طوبلری وجهه خانه لری و كافۀ لوازمی و وظیفه لری معین اولان دولت طرفندن اعطالاولنوب

تعییناتلری ایچون اقتضا ایدن ذخائر و آریه و صمان و اولتق عسا کر مرقومه یه هنکام عادیه ده کندو دولتلری طرفندن ویریه کلان اجناس و مقدار مثللو پاک و منقح اولمق اوزره اول عسا کرک حدودلرندن چیقدقلری کوندن بدأ اولنه رق مستعین اولان دولت طرفندن اول امرده متفقیه بالذا کره تخصیص ایلیه و بوندن بشقه مستعین اولان دولت اول عسا کرک مألوف اولدقلری و کندو عسا کری دخی مظهر اوله کلدیکی اسباب استراحتلرینی استحصال ایلیه .

بشنجی ماده مستعین اولان دولت اعانه کلان دو نتمایه کرک خلیجی بوغازینه و کرک لاجل الاستخدام تعیین و تخصیص ایده جکی صولره و رودی کوندن بدأ ایدرک دشمنک علیه اعمال اولندجه تعییناتلریچون اقتضا ایدن ذخائر بالذا کره ترتیب اولنه جنجی و جهله اعطا ایده و اشبو امداد بحریده اقتضا ایدن تعییناتک عیناً ویرلسی ممکن اولمدینی صورتده مقاوله اولنه جنق فیئات اوزره بدل اعطا اولنه و بوندن بشقه دو نتمایه سفینه لرینک ترمیمی لازم کلد کده اقتضا ایدن لوازمی مستعین اولان دولت قطعا تأخیری تجویز ایتمه رک و هیچ برکونه صعوبت اظهار ایتمه رک جاری اولان فیئات اوزره کندو ترسانه و مخزن لرندن آلیوره و اشبو معامله دولتین متفقیتینک دو نتمایه سفائنندن بشقه اتفاق مدتی انساننده مصلحت مشترکه ضمننده و سائر جنک و نقل کیملری حقلرنده دخی جاری اولوب اشبو جنک و نقل کیملری کرک قشلاق و کرک ترمیم اولمق ایچون طرفین لیمانلرینه بلا مالمعه دخول ایده .

التنجی ماده اشبو معاهده نك ایکنجی ماده سنده مصرح اولدینی و جهله منفرداً یا مجتمعا لاجل الاعانه ویریلان قوت بریه و بحریه ایله معاً مظهر هجوم اولان دولتک مساعی و تدابیری دشمنک هجوم و اقتحمانی دفع ایتمک کافیه اولمدینی حالده معین اولان دولت مادامک کندو متفقنک دشمنی علیه یاراً ویا بحرأ حسب الموقع آچیقدن آچیغه محاربه یه قیام ایتمک ممکن اوله انعقاد مصالحه یه دکن و ار قوتیه وجه مشروح اوزره محاربه یه مداومت ایلیه فاما ممالکک زیاده بعد مسافه سی تقریبیه معین اولان دولت طرفندن متفقنک دشمنی علیه آچیقدن آچیغه اعلان حرب و جدال و قوت مجموعه سی اعمال اولمق متمتع و محال ایسه اوزرینه هجوم اولنان دولت امداداً ویریلان قوت بریه ویا بحریه نك مقدارینی تکثیر ایتمک خواهشنده ایسه اولخالده معین اولان دولتک اولکی امدادینه ضمیمه و علاوه اوله رق ویره جکی امدادلرک کمیت و کیفیتنی دوستانه بینلرنده بالذا کره مقاوله ایلیه .

یدنجی ماده دولتین فخیمتین قوت مجموعله ریه بالاتفاق حرکت و یاخود اشبو معاهده ده مشروط اولان امدادلرک صورت ترتینه مبادرت ایلملری لازم

کله کده وعد و تعهد ایدرلر که کافه تدابیر حربیه لرینی خلوص تام ایله بربرلرینه افاده  
 و اشعار و اجر لرینی تسهیله بذل اقتدار ایدرلر و محاربه نك امتدادینه دائر و مصالحه نك  
 شروطنه متدائر نیتلرینی بربرلرینه کشف و بیان ایله لر واحد جانبین آخری مشترک  
 قلمینجه و ممالکینک امنیتنی تحصیل ایتدکجه مصالحه و متار که عقد ایلمیه لر .

سکزنجی ماده دولتین فخیمتین معاهدتین بینلرنده رابطه و قرار و یردیلر که  
 دو نملاری و کبیر جنک کیملری و سائر سفان حربیه لری لدی التصادف سلامه بعداً ایچون  
 باشوغلرک رفع و کشاد ایتدک لری باشوغلق سنجاغندن مستبان اولان تفوق  
 رتبه سنه طرفیندن دقت اولنه باشوغلرک رتبه سی مساوی بولندیغنی تقدیرده  
 سلاملاشمیه لر و ابتدا سلام و یره جک طرف نمقدار طوپ آتار ایسه طرف  
 آخردن دخی اولمقدار طوپ ایله جواب و یره لر بنابرین لدی التصادف بو کیفیت  
 بلندا کره تنظیم و هر کونه معارضه و سهو و قوعنی منع ایچون طرفیندن صدالار  
 ارسالیه مخابره اولنه .

طقوزنجی ماده حین محاربه ده دشمندن اخذ اولنه جق ادوات حربیه  
 و آلات جنک و اموال متنوعه بالجمله اخذ ایدن غایمین عسکرک اوله .

اونجی ماده دولتین فخیمتین معاهدتین اگر چه دول سائر ایله مذاکره  
 و مصلحتلری ایجاب ایدیه جکی معاهداتک رابطه کالاول مختاردرلر انجق احدها  
 آخره صراحتاً تعهد ایدرکه او مقوله معاهدات وقتاً من الاوقات بربرینک ادنی ضرر  
 و زیان و خساراتی مستلزم اوله جق یا خود تمامیت ممالک جانبیه و تجارتیه دائر امتیازات  
 و منافع رعایای طرفینه خلل و نقصان ترتب ایدیه جک نسنه یه قطعاً شامل اولیه  
 و بلکه حسب المقدور احدها آخرک شان و امنیت و منفعتی و قایه و تحصیل ایتدی  
 طرفین وعد ایدرلر .

اون برنجی ماده آل عثمان پادشاهی و روسیه ایمپراطوری اشبو تدافعی اتفاقی  
 توسیع ممالک داعیه سیله دکل مجرد وقایه تمامیت ممالک طرفین و تحصیل امنیت رعایای  
 جانبین ایله آسایش عامه یه الزم اولان موازنه مالکیه نك وقایه سنه مدار اولمق اوزره  
 دول سائر نك هیئت لرینی خللدن حفظ و حراست ایتک نیتیه ربط ایتدکارندن  
 انکلتره قرانی و محضا خیره منبی بو کونه معاهده یه اشتراکه خواهشکر اوله جق  
 دول سائر منی دخی اشبو اتفاقه دخوله دعوت ایدیه جک لری مقرردر .

اون ایکنجی ماده تاریخ هجرینک بیک ایکیبوز اتی سنه سی شهر جمادی  
 الاولانک اون بشنجی کونی یعنی میلاد حضرت عیسانک بیک یدیوز طقسا برسنه سی  
 کانون اولک طقوزنجی کونی یاشده عقد اولنان مصالحه عهدنامه سی و اول عهد نامه ده

ذکر اولنان سائر معاهدات و سندات و كذلك تاریخ هجرینك بیک ایکی یوز اون درت سنه سی شهر ذی القعدة الشریفه نك سکنزنجی کونی یعنی بیک سکنز یوز سنه عیسویه سی مارتنك یکرمی برنجی کونی عقد اولنان معاهده سندی عهد مؤخره و بو اتفاق نامه ایله بالاده مذکور معاهداته راجع اوله رق عارض اولان تعدیلاته بالاعتبار اشبو اتفاقنامه ده تصدیق اولنور .

اون اوچنجی ماده دولتین فحیمتین اشبو اتفاقلرینه زیاده تقویت و یرمک ایچون الان بولندینی هیئت اوزره طرفینك زیر تملک و تصرفلرنده بولنان کافه ممالکنه یکدیگری ضامن و کفیل اولورلر .

اون دردنجی ماده دولتین فحیمتین بو معاهده نك ممکن اولدینی مرتبه حفظنه صحیحی راغب ایسه لر دخی بعد زمان تبدل احوال روزکار حسبیله بعض موادك تبدیلی لازم کلسی محتمل اولدیغدن اشبو تدافعی اتفاهه تصدیقنامه لرك مبادله سی کونندن اعتبار اولنه رق طقوز سنه نك مدت تعیینه قرار و یرلدی مدت مذکور نك ختامی تقرب ایتد کده اولوقك اقتضاسنه کوره اشبو اتفاقنامه لرك تجددی خصوصی دولتین معاهدتین بیننده دوستانه مذاکره اولنه .

اون بشنجی ماده اشبو تدافعی اتفاقنامه آل عثمان پادشاهی و روسیه امپراطوری طرفلرندن تصدیق اولنوب تصدیقنامه لر اوچ آیده و ممکن ایسه آندن اقل مدتده آستانه سعادتده مبادله اولنه .

(خاتمه) ذکر اولنان اون بش ماده نك شرط و ربط اولندینی وجهه وقت مرقومده تصدیقنامه لری مبادله سی خصوصی بعون الملك العلام صدق تام جانین ایله پذیرای ختام اولوق ایچون بزرکه دولت علیه سرمدی القیام طرفندن بار خصتنامه هایون مرخصلرز مقتضای مأموریت و رخصت کامله مز اوزره اشبو تمسک ترقیم و املا و کندو مهر و امضالریز ایله مختوم و ممضی قلمنوب ایلچئی مومی ایله طرفندن دخی رخصتنامه سی مقتضاسنجه مختوم و ممضی اوله رق طرفنزه تسلیم اولنان فرنکی العبارة عینی برقطعه تمسک ایله مبادله ایلچئی مومی ایله اعطا اولندی و بو طرفین مرخصلرینك مبادله ایلدک لری تمسکلرنده محرر و مسطور اولغله ایمدی دولت علیه مرخصلری مشار الیهما طرفلرندن و یریلان تمسک موجبجه فیما بعد مرقومه طرف شاهانه مزدن دخی مقبول و معتبر طویلوب کالیله رعایت اولنه جنی بدیهی و اظهر اولوق حسبیله مادامکه روسیه دولتی طرفندن تأیید و تصدیق اولنان اشبو موادك خلافت برکونه وضع و حرکت اولنیه دولت علیه جانندن دخی مغایر حرکت وقوعه کلیه چکی بی اشتباهدر . حرر فی الیوم السابع شهر شوال المکرم سنة عشرين و مأتین و الف من هجرة من له العز والشرف .

## \* اتفانامه خفی صورتی \*

اولکی ماده پادشاه آل عثمان حضر تبری و روسیه ایمپراطور و پادشاهی جناببری الیوم اوروپاده جریان ایدن احوال و کیفیاتی کرکی کبی مطالعه و فرانسه لونک حرص و طمعه مبنی توسیع ممالک داعیه سیله اصول حقانیتیه مغیر اولان و نظام و موازنه ملکیه نک انحلاله بادی و تجاوزات خصمانه سنه دوچار اولمق اوزره مخوف اولان جمیع ممالک هیئت متابعتده قالمغه مؤدی اوله رق مشاهده اولنان معاملاتنی و باخصوص ممالک محروسه یه درکار اولان نیت و مقاصدینی تأمل و ملاحظه برله ایکی پادشاه بیننده مستقر و پایدار و بودفعه تجدید اولنان تدافعی اتفانامه ایله فیما بعد دخی حفظ و دوامی مسلم و بیدار اولان اکمل محبت و اتم صفوت مقتضاسنجه اشبو مواد مهمه یه دائر هر کونه قید احترازدن عاری اوله رق مخبرات خالصانه نک طرحنی ذمتلرینه واجب عدایتدیلر اشبو مقدماته نظر اطر فیندن شرط قنورکه فرانسه لونک فیما بعد توسیع ممالک مقاصدینی منع و ابطال و کرک موازنه ملکیه نک حصولی و کرک فرانسه لو طرفندن حقنده سوء قصد مظنه سی درکار اولان جمیع ممالکک امنیت و استراحتی اسبابنی استحصال ایچون دول معظمه اوروپانک بعضیسی قوتلرینی بریره کتوروب بالاتفاق حرکتی قرار و یرلر ایسه اول حالحه حشمتلو روسیه ایمپراطوری جناببری کرک متفقلرینک و کرک جمیع اوروپا دولتلرینک خیر و منفعلر ایچون اصل اصولنه نظر اتحفظی اولان بویله بر حرکت متفقانه یه فعلاً اشتراکه بر وجه قطعی عزیمت ایدر ایسه دولت علیه دخی سالف الذکر تحفظی اتفاقدن ملحوظ اولوب هم علی العموم اوروپانک حسن حالی مستلزم و همده خاصه ممالک محروسه فرانسه لونک مقاصید موحشه لرندن مصون اولمغه کلی مدار اوله رق لازم اولان آثار خیریه نک حصولنه معاً سعی و همت ایتمک نیت خالصه سیله اولا متفق اولان روسیه ایمپراطوری جناببریه بالا اشتراک دعوائی مصلحتی التزام ایده و یاخود هیچ اولز ایسه اشبو تدافعی اتفانامه نک ایکنجی ماده سنده مذکور اولان امداد و اعانتی شروطنه تطبیقاً بتمامه اجرا برله روسیه دولته اعطایه مسارعت و بویله بر محاربه نک مدت امتدادنده روسیه ایمپراطورینک ایچ دکر جانبیه لدی الحاجه ارسال ایده جکی سفاین حربیه نک و مهمات و ذخایر کمیلرینک استانبول بوغازندن امرارینی تسهیله اعتنا و دقت و متفق اولان ایمپراطور مشار الیهک نیت خیریه سنه موافقت ایلیه .

ایکنجی ماده حشمتلو روسیه ایمپراطوری و پادشاهی نمنجه و پروسیا و اسوج و دانیمارقه دولتلرینی و دول سائره بی دعوت ایتمک نیتده درکه اوروپاده موازنه

ملکيه نك حصول واستقرارينه وآسايش واستراحت عامه ايله حقوق مرعيه ملكك حفظ ووقايه سنه مدار اولان بر اصول ونظامك وضع وترتبه ميل ورغبه ايتك اوزره فرانسه دولتي تضييق واجبار امرنده بالاتفاق اقدام ايچون روسيه وانكتره دولتريله سالف الذكردولدن بري بيننده ترتيب اولنه بيله جك اتحاد دائره سنه دخول ولحوق ايله لر واولو متفق اولان آل عثمان پادشاهي دخي اشبو تدافعي اتفالك آثار خيريه سي حصوله بذل سعی وهمت ضمننده روسيه دولتيه بالاتفاق دعواي مصاحتي التزام ايله جكن ايمپراطور مشاراليه جنابلري سالف البيان دولتره اخبار و اشعار ايتك خصوصي درعهده ايدر و پادشاه آل عثمان حضر تلري دخي اشبو دعوتلر واجبارلر امرنده ايمپراطور مشاراليه طرفندن اعمالی واجب عد اولنه جق اسباب و تدابير ايچون مشاراليهك درايه و فطالته اعتماد تام ايلر .

اوچنجي ماده بوندن اقدام و نديكدن منفك اولوب سلك ممالك محروسه يه منسلك و ملحق اولان ارنودلنده كائن املاك و قصباته دائر مقدما منعقد اولان معاهده نك حاوي اولدغيني عهد و شروطه و جوهله رعایت و رعایانك حسن حال وآسايشي موجب و حسب العهد نائل اولدغلي امتياز و مساعداتك استقراريني مستوجب اوله جق اسباب و وسائلك استكمالنه همت و دقت اولنق دولت عليه نك مطلوب و ملتزمي اولوب يعني سالف الذكردعهد و شروطه مغل اوله رق همجوار اولان ايالاتك و لاه و اعيان و دونمائي هايون قبودان و قوماندانلري طرفلرندن مارالبيان املاك و اراضي و درونلرينه سلاحلي آدملر ايصالی و تسهيل و اهاليدن و يركوطلب و تحصيل قلمسي و مدير و ضابطلري اولان و يوده و آدملري طرفلرندن محدث شي تكليف اولنمسي مثللو بعض كيفيات و اهالينك معافيت و امتيازلرينه و حقلرنده ربط اولنان مواثيقه منافي حالاته وقتاً من الاوقات جواز كوسترلامك و بين الدولتين دركار اولان عهد و شروط مقتضاسنجه اهاليء مذكوره بوندن اقدام و نديك جمهورينه تابع اولدغلي او انده نائل اوله كلدككري جميع امتيازاته كافي الاول مظهر اولق اوزره طرف دولت عليه دن وعد و تعهد اولنور الحاصل بيك ايكي يوز اون درت سنه هجر يه سي ذى القعدة سنك سكرنجي كوني يعني بيك سكر يوز سنه عيسويه سي مارتنك يكرمي برنجي كوني منعقد اولان معاهده سندی اشبو اتفاقنامه ده لفظاً بلفظ مندرج اولمش كي تصديق قننور و اشبو ماده خفيه بخالف اوله رق و نديكدن منفك اولان اراضيء مذكوره اهاليسي حقلرنده دولت عليه نك مأمورلري و سائر تبعه لري طرفلرندن يركونه تعدي و يا خود ضرر ظهور ايدر ايسه سلطنت سنیه روسيه دولتي ايلچيسنك افاداته مبنی متصدي اولنلري ايفاي تضمينات لايقيه اجبار ايله .



دردنچی ماده تاریخ هجرینک بیک ایکی یوزاون درت سنه سی ماه ذی القعدة سنک سکزنجی یعنی بیک سکز یوز سنه عسویه سی مارتنک یکر می برنجی کوننده پادشاه آل عثمان حضر تلیله روسیه ایمراطوری جنابلری بیننده عقد اولنان معاهده نک اولکی ماده سی موجبنجه ایمراطور مشارالیه جنابلری کرک کندو و کرک اخلاف واعقابی جزائر سبعة مجتمعه جمهورینک تمامیت مایکنه ضامن و کفیل اولمق اوزره تعهد ایتمکله والحاله هذه ایتالیانک احوال و کیفیاتنه نظراً سالف الذکر جزائرده روسیه عسکرینک بولنسی لازمه احتیاطدن اولغله اقامه عسا کره بادی اولان حالات برطرف اولنجیه قدر عسا کر مذکوره اعاده اولنماق اوزره عهد و شرط اولنمشدر بو تقدیرجه روسیه دولتک مشهود اولان اشبو آثار مودت و محادثته مقابله دولت علیه روسیه عسکرینک جزائر سبعة مدت اقامتلرنده اولطرفده بولنان روسیه دونمائی جلب ویرینه دیکری بعث وارسال ویاخود تعیین اولنان عسا کر استبدال و سایر لوازمات و ذخایر ایصال اولنمق ایچون تعیین اولنه حق روسیه جنک سفینه لرینک استانبول بوغازندن مرور لرینی تسهیل ایلیه .

بشنجی ماده دولت علیه تبعه سنندن اولان جزائر سبعة جمهوری ایتالیا جانبدن ممالک محروسه یه سد مدافعه مثابه سنده عد و شمار اولمق لازمه دن اولغله جمهور مذکورک کندو مدافعه لرینه کافی اوله حق و جهاله کسب تقویت و اقدار ایلمسی لازمه دن اولدیغی پادشاه آل عثمان حضر تلی درک و تعقل و قطان و سکانی جلب ایله تاریخ هجرینک بیک ایکی یوزاون درت سنه سی ذی القعدة سنک سکزنجی کونی یعنی بیک سکز یوز سنه عسویه سی مارتنک یکر می برنجی کونی دولتین فخیمتین معاهدتین بیننده عقد اولنان معاهده موجبنجه جمهور مذکور نائل اولدیغی هیئت ملکیه سنک حفظ و وقایه سنه مقتدر اولمق خصوصنه بذل ماحصل مکنت ایتمک مقتضای شان و حقانیتی لازمه مصالحتی ایدوکی اثبات ایلمک خواهشیه توغل ایلدیکنه بنساء دوات علیه و عهد و تعهد ایدرکه بوندن اقدام جمهور مذکور اعطا اولنان نشان هایونده عهد و مرقومیه تطبیقاً تعدیلنه همت و جمهور مذکورک کسب اعتبار و استقرار امرنده اقتضا ایدن اسباب و وسائلک استحصالنه مساعی جمیله سنی اظهاره مبادرت ایلیه .

التنجی ماده الحاله هذه دولتین بیننده عقد اولنان اشبو اتفاقدن وبری برینه برای معاونت مشروط اولان امداد دن مقصد و مرام یکدیگرک خیر و منفعتی و تحصیل امنیتتی اولدیغندن دونماملانک عسا کر معینه نک فراری امداد مشروط مذکوره ایراث ضعف و نقصان ایده جنک برحالت اولغله دولتین فخمتین معاهدتین تعهد ایدرلرکه بری برینک بری و بجزری عسا کرینک تذلرنندن ماعدا فرار یلرینی هیچ

رکونه علت و بهانه ایله قبول و توقیف ایتمه لر و فی الاصل روسیه دولتی رعایاسندن اولان مسلمانلر فرار ایدرلر ایسه کیرور اولوب اصل روسیه لول اولنلردن دین اسلامی قبول ایدر اولور ایسه برای معاونت اعطا اولنان عساکر بحریه و یابریه معین اولان دولتک مالکنه اعاده اولنه حق و قته دکن روسیه دونمسانده و عسکر نده استخدام اولوب ختام وقت مذکورده او مقوله لر حقلر نده یاش معاهده سنک سکنزنجی ماده سی اجرا اولنه .

یدنجی ماده دولتین معاهدتین قره دکزی مسدود عد ایدوب هر قغنی دولتک اولور ایسه اولسون بکلک سفینه لری و جنک ایچون تجهیز اولنش کیمیلرینک اول دکزه ورودینه رخصت ویرمامکه قرار ویردیبلر و دولدن بری اول طرفه ادوات حربیه ایله وروده تصدی ایتدیکی تقدیرده دولتین فحیمتین معاهدتین تعهد ایدرلرکه بوکونه مقصدک دفعی مقتضای اتفاقدن عد ایدرک تأکید آسایش جانبین حصرآ اکا توقف ایتمکله مجموع قوت بحریه لریله ممانعت ایله لر .

سکنزنجی ماده روسیه دولتک ممالک شمالیه سنده کثیر النفع والنما اولان تجارتک برنوع مخرجی و روسیه دونمالرینک سواحل بعیده ایصال و تسیارلر ایچون کذرکاه ضروریسی اولان بحر بالطقده کائن سوند بوغازینی بوئانلرده فرانسه دولتی اشبو اتفاقه اغبرارآ وانفعالآ الحاله هده دانیمارقه دولتی اطرافه ملاصق اولان فرانسه عساکریله ضبط واستیلا ایدرک روسیه دولتیله فرانسه بینده حالت محاربه واقع اولور ایسه مصالح سلطنت سنیده حشمتلو روسیه ایمراطورینک غیورانه و مقدمانه اظهار ایلدیکی التزام و مساعیسنه مقابله دولت علیه بو باده بوجه پشین روسیه دولتی ایله بالندا کره یاروسیه دولتیله بالاشترک دعوی مصالحتی التزام و یا خود مشروط اولان امدادی اعطا ایلمک اوزره وعد و تعهد ایدر .

طقوزنجی ماده شروط جلیله نک اوچنجی ماده سنده مذکور اولان امداد مالیه نک مقداری شووجهله ایضاح اولورکه او مقوله اعانت سنه ده بهر پیاده نفره یوز الیشر غروش حسابی اوزره تقدیر اولنه واشبو مبلغ مظهر هجوم یعنی مستعین اولان دولتک طلبنه مبنی اعلان حربک ابتداکی ماهندن بدأ اولنه رق مصالحه انعقادینه دکن بلا تخلیف بهر اوج ماه بوجه پشین معین اولان دولت طرفندن ادا قلنه واشبو شروط خفیه نک اولکی و سکنزنجی ماده لرینک اقتضالرینی اجرا لازم کدیکی تقدیرجه امداد مالیه بووجهله اعانتی ایجاب ایدن سببک دفعنه دک ینه تقاسیط مذکورده ایله ویریه .

اوننجی ماده اشبو مواد خفیه دول سائره دن مکتوم طوتیلوب قطعاً

سررشته ویرلیه فقط دائرهٔ عهود اتفاقه دخول ایده جک دوله طرفینک انضمام رأی ایه ابراز اولنه و تصدیقنامه سی اوج آیده و ممکن اولور ایسه آندن اقل مدته آستانهٔ سعادتده مبادله اولنه .

## خاتمه

ذکر اولنان اون ماده نك شرط و ربط اولندیغی و جهله وقت مرقومده تصدیقنامری مبادله سی خصوصی بعون الملك العلام صدق تام جانبین ایه پذیرای ختام اولمق ایچون بزلرکه دولت علیهٔ سرمدی القیام طرفندن بارخصتنامهٔ هایون مرخصلرز مقتضای مأموریت و رخصت کامله من اوزره اشبو تمسک ترقیم و املا و کندو مهر و امضالریز ایه محتوم و ممضی اوله رق طرفره تسلیم اولنان فرنیکی العبارة عینی برقطعه تمسک ایه مبادلهٔ ایلیچیء موخی ایهه اعطا اولندی دیو طرفین مرخصلرینک مبادله ایلدکری تمسکارنده محرر و مسطور اولمغله ایمدی دولت علیه م مرخصلری مشار الیهما طرفلرندن و یریلان تمسک موجبجه فیما بعد مواد مرقومه طرف شاهانه مزدن دخی مقبول و معتبر طوتیلوب کمالیه رعایت اولنه جنی بدیهی و اظهر اولمق حسبیله مادام که روسیه دولتی طرفندن تأیید و تصدیق اولنان اشبو موادک خلافه برکونه وضع و حرکت اولنیه دولت علیه جانندن دخی مغایری حرکت وقوعه کلیه جکی بی اشتباهدر حرر فی الیوم السابع من شهر شوال المکرم سنه عشرين و مائین والف .

(۲)

\* ابراهیم حلمی پاشانک صدارتنه دائر صادر اولان خط هایون \*

\* صورتیدر \*

سنکه صدر اعظم قوی الهمم و وکیل مطلق ستوده شیمم ابراهیم حلمی پاشاسین سنی سلام سلامت ارتسام ملوکانه مله تلطیف ایلدیکمندن صکره معلوم صداقت مرسومک اولسون که سلفک حافظ اسماعیل پاشانک مسند صدارتعظمی و مقام وکالت کبرایه نالایق و رضای شریفه غیر موافق بعضی اوضاع و حرکاته ابتداری تقریبیه عزلی لازم کیلکه سن اوته دنبرو مأمور اولدیغک خدمات سنیه مده صادقانه و جانسپارانه سعی و غیرته مفظور اولدیغندن بشقه یکچیری اغالی خدمته مأمور اوله لیدنبرو و دیعهٔ جناب باری اولان عباد اللهک آسایش و راحت و سکنهٔ دارالسلطنهٔ السنیه مک آرامش و امنیت خدملرنده و باخصوص اوجاغ عامره نك شانتی اجراده کیجه

و کوندوز صرف تاب و توان ایلدیککه بناء اوضاع و اطوارک مقبول هایونم اولوب  
سندن هر وجهه خشنود اولدیغمدن استقلال ورخصت کامله ایله مهر وکالت  
مطلقه می سکا احسان ایلم کوریم سنی سندن مأموم اوزره اشبو خطب جسیم  
و کالتمه دخی صادقانه چالیشوب کرک دارالسلطنه السیه مک آسایش و امنیتی و کرک  
طشره فقراسنک آرامش و استراحتی خصوصالینه دقت و دفع اختلال ممالکه  
سعی و غیرت برله ذات خلاقاً بیه و دیعه ربانی اولان عباد اللهک رفاه و راحتته  
صرف مقدرت ایلیه سن .

(۳)

\* افلاق و بغداد و یوده لرینه دائر طرف دولت علیه دن روسیه \*  
\* ایلیچیسنه ویریلان سند صورتیدر \*

حالا افلاق و یوده سی قسطنطین ایسلاندی و بغداد و یوده سی علسکساندر موروزی  
و یوده لر بیک ایکیوز اون یدی سنه سنده باخط هایون ویریلان نظامده مندرج  
شروطه مغایر و شروط مذکورنک و قایه سنه دائر درکار اولان اراده شاهانه یه  
منافی بوندن اقدجه عزل اولندقلرینه بناء جانب سلطنت سنیه دن و یودکان  
مومی ایهمانک کماکان ابقالرینه مسارعت اولندی بوصولته مومی ایهمای قسطنطین  
ایسلاندی و علسکساندر موروزی و یوده لر بلا توقف مملکتینه عودت و مضمون  
خط هایون اوزره یدی سنه مدتلری تماماً منقضی اولنجه یه قدرکماکان امر و اداره یه  
مداومت ایلملری خصوصی کندولره تنیه قانندی . شویله که : مومی ایله قسطنطین  
و یوده ده تاریخ نصبی اولان بیک ایکیوز اون یدی سنه سی جمادی الاولینک ایکنجی  
کونندن ایکیوزیکرمی درت سنه سی جمادی الاولینک ایکنجی کونته و علسکساندری  
و یوده دخی کذلک تاریخ نصبی اولان بیک ایکیوز اون یدی سنه سی جمادی  
الآخرینک دردنجی کونندن ایکیوزیکرمی درت سنه سی جمادی الآخرینک  
دردنجی کونته وارنجه و یوده لقرنده دوام ایده لر قالدیکه ذکر اولنان ابقایه نظراً  
عالمقو واسکرلت و یوده لرک مملکتیدن تحصیلتلری هر نه ایسه ابقا اولنان مومی ایهما  
بینلرنده تنظیم ایلملری دخی طرفینه تنیه اولنغله دولت علیه مقتضای عدالتی  
بویاده ایفا اتمش اولدیغندن فضله افلاق و بغداد مملکتلری حقنه جاری اولان  
شروطی و خصوصاً و یوده لرک مدته دائر اولان شرطی تماماً و کمالاً محافظه و وقایه  
ایتمک و ایبتدیرمک و سایر روسیه دولتیله معقود کافه شروط و عهدوک مضمونی  
کلیله اجرا ایلمک خصوصالرنده خلوص و ثبات اوزره نیت و قرارینی متفق اولان

حشمتلو روسیه ایمراتوری و پادشاهی جنابلرینه اثبات ایتمش اولدی . بناءً علیه اشبوسند معتبر و معمول به بار اراده سنیة شاهانه کتب و املا و ایمراتور مشارالیه طرفه ارسال اولمق اوزره روسیه دولتی ایلیچیسنه رسماً تسلیم و اعطا اولندی .

فی ۱۹ شعبان سنه ۱۲۲۱

( ۴ )

\* روسیه یه اعلان حربی متضمن بیاننامه صورتی \*

ما تقدمدنبرو ملل مونسه نك امنيت حال واستراحتلری بين الدول معقود اولان عهد و شروطك وقایه سنه موقوف و بوضابطه معتبره نك فسخته سبب اولنلر اختلال احوال عامه یه بادی اوله جقلمرینه مبنی جمیع حکمداران حقانیت عنوانك کمال دقت واعتنالی مصروف اوله کلدیکی امر بدیهیدر . انجق روسیه دولتی همجوارلری بولنان دول حقه دائماً تسلط و تغلب صورتیه ارتکاب ایده کلدیکی عهد شکنی و طمع و خبائت شیرازة مذکورده نك اخلاقی مستلزم حالاندن اولوب ممالک اسلامیة حقه دخی بالوجوه سوء قصد و نیت فاسده سی جهانة معلوم و مشهور و دولت علیه نك مقتضای مسلك و فاداری و حقانیتی اوزره هر حالده ابراز ایتدیکی مراعات و اعتدالك قدرینی بیلیمیوب اول معامله یی کوردکجه اظهار اسائن ایه مقابله و حاصل اولان همجوارلری اوضاع متغلبانه اجراسنه وسیله ایلدیکی ابصار حق شناسانه غیرمستور اولوب از جمله بیك یوزسکسان سکر سنه سنده معقود عهدنامه موجبجه روسیه نك قریم حقه بر درلو استحقاق و حکومتی یونگیکن درلو درلو شیلرله قریمك شروط سر بسینه مغایر تصنعات و فساداتی علناً اختیار و نهایت الامر کلیتو عسکر سوق ایه بویله بر اقامیم عظیمك وقت مصالحه و مسالمة ده غضب و استیلاسنه ابتدار ایلدیکی و کورجستان حقه دولت علیه نك ماتقدمدنبرو استحقاقی مسلم انام ایکن برمدت دسایس کونا کون ایه مداخله دن صکره نهایت کار الکای مر قومی آچقندن زیر ضبطنه ادخاله سعی ایلدیکی و ممالک اسلامیة ده تعیین ایلدیکی قونسولوسلری دولت مأمورلرینك حال و شاننه لایق اولیمان صورتده ملکی تلویث ایه محل اقامتلرنده بولنان رعایادن قتی وافر نفوسی اضلالاً و افساداً تجارت ایه آمدوشده مساعدده اولنان سفینه لرینه ارکاب ایه دیارلرینه نقل و درون ملک خاقانیده دخی پاتنه کاغدلری نشر و آق دکر آطه لرینك سفینه لرینه بیراق اعطاسیه سفاین و رعایا استصجابی مثللو کارنا همواره متجاسر اولوب مقدما دولت علیه ایه روسیه بیننده علاوهً مصالحه اولان اتفاقك انعقادندن صکره ذکر اولنان حرکت ردیسه دن کف ید اولنه جنی مأمول ایکن دولت مر قومه اول رابطه جدیده یی تمام تعمیم فسادده وسیله سهولت

اتخاذ ايله متفقنك ملكي ايجنده برغانه پيدا ايتديرمك زعم باطلنه مبني عموماً صرب رعایاسی اغوا و نقود و مهمات اعطا برله بغی و عصیانلرینه معین ورهنا اولدینی و تفلیس جانبنده بولنان عسکرینه یالکیز بردفعه اوله رق ذخیره امرار وارسالنه استیذان ایتمکن ناشی اتفاقه حرمة اذنی حاوی اقتضا ایدن فرمان عالی ویرلدکده ناکاه فاس جانبنده عسکر و طوب و مهمات اخراج و اناقره قاعه سنی جبراً ضبط و استیلا و کمالده استحکامات احدائیه اعلان سوء قصده ایتدار ایتمکله درسعادتده مقیم روسیه ایلچیسینه کرة بعد اخری تقریر اعطاسیله حرکات مذکوره نك بحق دفعی ادعا اولنمشیکن هر بار اجتناب صورتیه بررکونه جواب ویره رک الی الان ترضیه لایقهبی اجرا ایتدیکی و خصوصیه اتفاقدن مطلوب اصلی اولان صورمرعیه به مغایرکونا کون حرکات ايله سند اتقاقی نقض و الغا قیلندن عد اولنه جق صورتلره دخی اجترایتمش اولدینی و دولت علیه به تابع اولان جزائر سبعة مجتمعه جمهوری حقنده ضمان و کفالتدن ماعدا روسیه دولتک حسب الشروط بردرلو استحقاقی یوغیکن و جمهور مذکوره لدی الحاجه وضع عسکر اولمق اقتضایدرایسه طرفیندن بالاشترک تعیین اولمق و جمهور مذکورک نظام داخلیسی طرفیندن قبول اولندقدن صکره اجرا ایتدیرمک مقتضای شروطدن ایکن روسیه دولتی جزائر مرقومیهی ملک مخصوصی کبی قوللانهرق درونلرینه دغواهی اوزره عسکر ادخالی و پیره بورقدده تحریر و ترتیب اولنمش قوانین و نظامات داخلیهی مخصوص ابعاث ایلدیکی مأمورین معرفتیه اجرادن قطع نظر جزائر سبعة به قریب و جوارده کائن روم ایللی قضالری اها لیسنک خفياً و جلیباً جلب و اضلالنده مرکز اتخاذیه ارباب شقاوتدن اول طرفه التجا ایدنلری دخی استصحاب ایدرک اولحوالیده بولنوب تعطیل فساداته سعی ایدن مأمورین و بتخصیص یانیه متصرفی علی پاشا حضرت تارینک علیهنه ایتدکلری نفاق قالدینی و برمدتدنبرو آوروپاده ظهور ایدن محارباتده دولت علیه نك ملتزمی اولوب دول محاربین حقه کمال تحری و دقت ايله مراعات ایلدیکی بیطرفلق اصولی اخلاص ایتمک فکریه مقدما یالکیز جزائر سبعة مجتمعه نك حقنده مصروف اولمق اوزره قره دکزدن مرورلرینه رخصت و یریلان بکلك سفینه لری بیطرفلق قاعده لرینه عدم اعتبار ايله لایتنقطع امرار وارنبودلق و سائر محالردن خفياً ارسال ایلدیکی مبعوثلر معرفتیه اطماع ایتدیردیکی نفراتی سفاین مرقومه ايله کتوردیکی عسکره الحاقاً دولت علیه نك علم و خبری یوغیکن ایتالیا اوزرینه تعیین ایلمک و فی الاصل سلطنت سینه نك رعایاسندن اولان قره طاغلوبی پیانی مبعوثلر تعیینیه دائره اطاعتدن اخراج ایتمک مثللو بادیه زاع اوله جق اطوارکونا کونی اجرا قیلنده اولدینی و مارالذکر تحریر نفرات ماده سنی مؤخرأ نفس دارالسلطنه ده اجرا ایلمک مرتبه لرده آداب

معتبره دولی علناً فسخ ایلیکی و افلاق و بغداد مملکتلرنده پاتنه اعطاسی و کونا کون اعذار واهی ابرازیله استصحاب ایلیکی رعایاسنک حد و حسابی اولیوب مملکتین مرقومتینی بیانی کندو ملکی عد ایدرک قونسلوسلری اداره مملکته مداخله و دولت علیه نك نصب ایلیکی و یوده لردن رضاسنه تبعیت ایتمانلرک دائماً علیه یینه شکایت و عداوت و کندولرینه میل و رغبت ایدنلری آشکارجه التزام و صحابت ایتمکدن ناشی مملکتین مرقومتینده طرف دولت علیه دن و یوده او تورمق بیانی درجه استحاله یی کسب ایلیکی و مغایر شروط اوله رق دولت مرقومه نك متصدی اولدینی مواد مذکور نك هر بری نقض عهد حکمنده عد اوله رق منتج سفر اولمق واجب ایکن سلطنت سینه طرفدن اختیار صبر و تحمل اولنمق حاشا بر درلو عجز و ضعفدن ناشی اولیوب مجرد اراقه دماء عباداللهدن احترازاً و طرفین رعایاسنه شفقه هر ماده نك دوستانه مذاکره ایله لایق وجه اوزره تنظیمنده سعی بلیغ اولدینی حتی بوندن اقدمجه دولت علیه وجوب مصاحبت ملکیه مقتضاسندن اوله رق افلاق و بغداد و یوده لرینی عزل ایلدکده بالکنز عدم اخبار و سیله سیله روسیه لو ادعایه اجترایدوب مع هذا افلاقده و یوده بولنان خان و جوهر متعدده ایله متحقق الثبوت اولان اهاتی سببیه برساعت تأخیری مضر و اخبار اولنسه همه حال تیزالمن کندویه عکس ایدوب زیاده فساده سبب اوله جنی ظاهر اولدیغندن روسیه لویه عقیب تبدیله دوستانه افاده حال اولنمشیکن برمدت مرورنده آستانه ده مقیم روسیه ایلیچسی و یوده لرک ابقاسنی دولتی طرفدن اعاده و بوبایدن تعدیل و تسویه اولنیه رق عاجلا اجرا اولنمز ایسه در سعادتدن سفارت طاقیه عودته مأمور ایدوکنی قطعاً آنها و تهیی تجار و سائر اعلان و انبا ایلیکی ائشاده روسیه دولتک دولت علیه یه سفر مرامی اوله رق بو خصوصی و سیله اتخاذ ایلدی ظن اولنسون بوندن غیر برمرامی بوقدر ابقایه بروفق مطلوب مساعده اولنور ایسه بین الدول هیچ بر درلو برودت قالمز و بن بوماده نك قرین حصول اولوب اولدیغنی حدودلره بیانه مأمور اولدیغمدن در حال تحریر ایدرم دیو رسماً افاده ایتمش ایسه ده مجرد بوماده یی روسیه دولتی لاین اصل و سیله اعلان سفر اتخاذ ایده جکنی دولت علیه تیقن و بومقوله امر جزئینک اعطاسی ایله من عیرحق ادعایه مبادرتدن مرامی منوی ضمیری اولان سوء قصدینی اجرا ضمننده سبب تعرضی دولت علیه اوزرینه تحمیل ایتمکدن عبارت اولدیغنی استطلاع و تفتن ایتمکدن ناشی روسیه نك اروپا دولتری غندنه ذره مقداری اعتذارینه محل قلامق ضمننده ابقا ماده سنه مع الکراهه رضا و برلمش ایدی و بوتقریب ایله دولت مرقومه هیچ اولنزه دول

سأزهدن حجاب برله جانب دولت عليه به اعلان خصوصتدن توقي ايدہ جي مأمول ايکن سبب وحق تدارکی وقواعد مرعيه دوله حرمتی اصلا خاطرينه کتورميه رک ماده مرقومه دن ايکی بچق آی مرورنده ميانده شيرازہ سلم ومصافات و رابطه اتفاق وموالات باقی وبرقرار اولديني هنگامده روسيه عسکری ناکهان حدود اسلاميه به پانهاده تعدی واولجانبده کافه ممالک خاقانيه اهايلسي ويندر وخوتين قلعه لرینک مستحفظلری عهود وشروطه اعتماداً من کل الوجوه مأمون البال ايکن عسا کر مرقومه سرکرده لری بوکونه حال اطمینان وامینتی تمام اجرای خصوصته فرصتیاب اولق حیل و دسایس کونا کون اعمالی ايله قلعتين مرقومتينک ضبط واستیلاسنه متصدی اولسی بین الدول مرعی ومعتبر طوتیلان استحقاق ملله ندرجه منافی اولديني قبل الظهور تحریراً وتقریراً بردرلو خبر ویرلمديکندن وبعدالظهور کیفیت مرقومه درسعادته مقيم روسيه ایلچيسي طرفدن سؤال اولندجقه کندوسی ابقا ماده سنی حین اجراسنده دولتی طرفه اشعاردن بشقه مقتضای مأموریتی اوزره طورله جانبده دخی تحریر و اخبار ایتش اولديغندن روسيه عسکرينک مروری اولکی مأموریتندن ناشی اولديني مجزومی ایدوکنی وجزئی وکلی سبب منازعه اولیوب دولتی طرفندن دخی کندويه بوکا دائر برخبر ویرلمديکنی تکرار افاده ایلديکندن مستدلدر والحاصل بودغه دولت مذکوره ناکهان حدود اسلاميه به عسکر امراريله ایقاع تعرض وتعدی وضبط قلاع وممالکه تسلط ایلديکی خبری ظهورنده بلاتوقف روسيه ایلچيسي درسعادتن دفع اولتمق وجبره جبرایله مقابله به مسارعت قنتمق واجب ايکن مجرد شاید سفرينه دن عبداللهی محافظه ایتک مطالعه حقایق ایتناسنه مبنی ابتدای امرده کیفیت حال ایلچیء مرقومدن استشعار وروسيه دولتی صلح وسفرده دولتجه حرکت ایدر وقواعد دول وملله هیچ اولماز ايسه سأزهدن حجاباً فی الجملة رعایت ایلر تصویريله استکناه حال برمدت اختیار اولنوب ایلچیء مومی الیه ايسه وقوع تعرضدن اتوز کون مرورينه قدر جزئی وکلی بوخصوصدن برکونه خبر وآکاهی اولديني جوانندن غیری برنسنه بیان ایتيوب دولت عليه طرفندن منتهای درجه حقایق واعتدال اوله رق ترقب وانتظار کیتدجکه مضر اولديني وبرطرفدن دخی روسيه عسکری سرکرده سی میکلسون نام جنرال روم ایللی قضا لرینک قضاة وضابطانه مفسد ومکاره عديده دن عبارت بیاننامه لر نشر وارساليله زعم باطنجه اهل اسلامی دخی تغلیط وبوتقريب ايله درون ملک خاقانیده تخم فتنه وشقاقی القا ایتک مثللو بردولتک ارتکاب ایدمه به جي وقیود دولتده امثالی بولتميه جي اوضاع مکروهه به ابتدار ایلديکی وبرطرفدن روسيه



عسکرینک تخطی و تجاوزی تبین ایتمکدن ناشی بویه بردشمن مکیدت آلوددن اخذ نار انتقام ملت اسلامیه نك فریضه ذمت و دیانت و حتی اولوب شرعاً و قانوناً اعلان سفر اولنق و حضرت منتقم قهارك توفیقات صمدانیه سیله دفع صولت اعدایه مبادرت و بری و بحری دولت علیه نك قوه کامله سنی مقدمانه و مجدانه اعماله مسارعت ایتمك لازم کلدی بوصولت بالاده بسط و بیان اولندیغی اوزره سلطنت سنیه هیچ بردولتک تحمل ایده میه چکی مرتبه ده اظهار ایلدیکی اعتدالی روسیه نك تزاید تغلب و تعدیسندن غیرى فائده نی منتج اولمدیغندن سفرى اختیار ایلدیکی آشکار اولمغله دولت علیه نك وجوه له حق یدنده اولدیغی و دوکیله جك قانلره و وقوعه کله جك شاید سفریه یه سبب انجق روسیه دولتی اولدیغی و مادامکه شروط و عهد اتفاق عندنده معتبر اولمهرق دولت مرقومه طرفندن هیچ بردولت حقه مدار امنیت اوله جق برشی قلمدیغی نصف و حقانیتلری آشکار اولان باجمله دوست دولتلرك تسایم کرده منصفانه لری اوله جغی جزم ایله اشبو بیاننامه تحریر و املا و هر تقدیر بالاده بسط اولنان موادك مجموعی عالمك بیلدیکی وقوعات صریح بدن اولمق جهتیه افاده دن مستغنی ایسه ده مجرد رسم و قاعده یه مراعاة برر قطعه صورتلری دولتلری طرفه کوندلرك ایچون در سعادتده مقیم ایلیچیلری دوستلریزه اعطا اولندی .

(۵)

\* حلمی ابراهیم پاشانك سردار اگر ملکنه دائر صادر اولان خط \*

\* همايون صورتیدر \*

سنکه وزیر اعظم قوی الهمم و وکیل مطلق ستوده شیم سن حضرت الله عظیم الشانك عون و توفیق الهیسی كافة امورده یاور و دستگیر و امداد روحانیت جناب رسالتپناهی و اعانت حضرت اهل الله معین و ظهیر اولسون کچن کون وزرا و علما و وکلای ذوی الاحترام و او جاقلم رجالیه عقد اولنان مجلس شوراده بیان اولندیغی اوزره مسقو کفره سی بغته تقض عهد و بلا موجب علی الغفله اراضی دولت علیه مه و سرحدات ممالک محروسه مه هجوم و ایچنده غافل بولنان خوتین و بندر قلعه لرینه استیلا ایله اوته دنبرو ملت اسلامیه یه اولان سوء قصد و خیاتی دفعه اظهار ایلدیکنه مبنی قبل شرع انوردن و یریلان فتوای شریفه موجبجه کفره مسفوره اوزرینه شرعاً سفر اولنق فرض عین اولوب اتفاق آرایله قراردادده اولمش اولمغله جمله مزى عدمدن واریدن و معین دین مبین اولان اول اولو اللهدن استمداد و استرحام و صاحب دین و شریعت اولان سبب رفعتمز پیغمبرمز حضرت محمد المصطفى صلی الله تعالی علیه و سلم افندمزدن

استغاثه ایله انجق عون و نصرت الهیه به استناداً مسقولو اوزرینه سفرمه قرار ویرلمشدر مسقولونک قدیمی بیضه بیضای اسلامه اولان عداوت و اهاتی جمله معلوم اولوب بودفعه دخی بووجهله خیاتی اجرا ایلمش اولغله ارباب حرب و اهل ایمانه فی سبیل الله جهاد و غزای لازم اولوب قرار بولدینی اوزره سریعاً و عاجلاً سرعسکر اردولرینه تقویت و یرلمک اوزره لوای سعادت احتوای حضرت فخر العالمین سایه میمنت و ایه سیله اردوی هایونم اخراجی ترتیبه دخی مباشرت اولمش اولدیغندن سنی بالاستقلال سردار اکرم نصب ایلمشمدر و جمله اموری فیاض و قادر اولان حضرت خدایه تقویض ایدوب سنی و سنکله بواصر دینده برابر اولان وزرا و علما و رجال و او جاقولورم و اعلی و ادنی جمله سنی حضرت اللهمک و حدایتته امانت ایلدم اجداد عظام بموملکتتری وزرا و رجال و او جاقولو و صنوف عسکریه نیک غیرت اسلامییه اجرا و کوکل بر لکیه اتفاق آرا و اطاعت و دین مبین یولنده دشمن قارشو سنده ثبات و متانتلر یله کفر و ضاللتدن تطهیر و تسخیر ایلمشدر کوره سنی سندن مجزوم اولان دیانت و صداقت و خلوص قلب و حمیت مقتضاسنجه دامن درمیان اهتام ایدوب تیزالدن کفره یه قریب بولنان قلاع و ممالکده مقابله و غزای ایتمکده اولان دین قرنداشلریمزه پیدرپی امداد و اعانت و سرعسکر و مهماتله سرحدلره تقویت و رعایای مظلمدن حمایت و مهمات سفریه و لوازم عسکریه یی بالندا کره کیجه یی کوندوزه قانه رق بر طرفدن تکمیله غیرت و وزرا و او جاقولردن تعیین وارسالی و کرک اردوی هایونمله استصحابی اقتضایدنلری بر جانبدن انتخاب و مأمور ایدوب دونمای هایونمک تجهیزیه وقت کچور مکسزین جمله مأمورین و لوازم سفریه یی مقتضای استقلالک اوزره تنظیم و اتحاد قلوبله اتمامه صرف مقدرت ایله سن دشمن قارشو سنده یرارلنی ظهور ایدنلری لایقیله تلطیف و رخاوت و بطاقت ایلانلری تأدیب ایدوب هر خصوصه لایقیله نظام و یره سن حق تعالی هر حالده سلامت و فوز و نصرت احسان ایله آمین .

(۶)

\* زوربالره و یریلان حجت ایله بالاسنه کشیده اولنان خط هایون صور تلی \*

( صورت حجت )

سبب تحریر کتاب شریعت نصاب و باعث تسطیر حقیقت انتساب اولدرکه : دولتعلیه دامت فی الحماية الربانیه ده خواص اندرون هایون و رجال دولت ابد مقرر و نندن بعض دور اندیش اولیان کیمسه لر بوندن اقدام مأمور اولدقلری خدمات دولت علیه ده نظام جدید تعبیریله مثل نامسبوق و بدعت عظیمه و ایراد جدید نامیه مظلالم کثیره

( احداث )

احداث و نتیجه سی انجق جلب منافع و اجرای سفاقتلرینه انبعث ایله هر بری ابنیه و البسه و کافه امور لرینی کفره یه تقلیددن بشقه دولت علیه یی دخی دول نصاری قواعدینه ارجاع و اولوجهله عامه مسلمینی تکدیرو دولت علیه نك از قدیم انواع فتوحات علیه و اصناف خدمات جلیه ایله مقبول و معتبری اولان بالجهله او جاقلرینی تفسیر و خداوندکار سابق سلطان سلیم خان حضر تلرینی بعض محاسن مزوره بیانیه اغفال و مجموعی اغراض نفسانیله نردن عبارت اولان تدابیر من خرفه لرینی ساحه حصوله ایصال ایلمش اولمیر ایله دولت علیه نك از قدیم غیر تکشلی اولان او جاغ عامره اغالی و نقراتی مجرد اصلاح عالم نیت خالصه سیله قیام و بالجهله علمای اعلام رجال دولت علیه نردن سائر ارکان صداقت اتسام اتفاق و التیام و موجب شرع و قانون اوزره خداوندکار سابق مشار الیه حضر تلریدن قطع رشته تبعیت و حالا اریکه پیرای تحت و اجلال و رونق افزای شوکت و اقبال اولان شوکتلو مهابتلو قدرتلو عظمتلو پادشاه منز افدمن سلطان مصطفی خان ابن السلطان عبد الحمید خان حضر تلرینه (ان الذین یبایعونک انما یبایعون الله یدالله فوق ایدیهم) وجه مسنون و طریقۀ حقانیت نمونی اوزره مدیادی بیعت اولوب (واذا اردنا ان نهلك قرية امرنا متریفها ففسقوا فیها حتی علیها القول فدمرناها تدمیرا) نص کرامت فصنک اسرار حکمت مختصی ساحه زیب ظهور و مارالذکر خونۀ دین و دولت دنیاده مخذول و مقهور و بقیۀ عقوبتلری وابسته یوم نشور اولوب بحمد الله تعالی دولت علیه برمدت نبرو دور اولدینی حسن نظامه موصول و او جاغ عامره نك بوحر کتلی تقصیر و تهمته غیر محمول و کرک نزد شاهانده و کرک عامه اهل اسلام عندلرنده معتبر و مقبول اولمشدر انجق بوندنبوبله او جاغ عامره نك علی وجه الالتزام التماس ایلدکری ماده که (الفقهاء امناء الرسل) حدیث بلاغت تحدیثی اوزره علمای اعلام دخی لازمه دیانت ارتساملری اولان امر معروف و نهی منکره قیام و رجال دولتن خلاف شرع و قانون بعض حر کتلی رونمون اولدقده کله حتی تکلمده سعی و اهتمام ایلملری استدعاسنی بسط و اتمام ایلد کدنصکره کندیلرینک دخی ضابطان و نقراتی اوتنه دنبرو عهدۀ صداقتلرینه احاله اولنان امور لازمه نردن ماعدا اوورد دولت علیه یه مداخله ایتموب هر بریسی اوتنه دنبرو شریعت زاهره و قاعده او جاغ عامره اوزره مأمور اولدقلی خدمات صادقانه لرنده قیام و تحصیل رضای باری و تکمیل ارتضای شهر یاری ایلمک مصالح صالحه لرنده سعی و اهتمام ایده جکلرینه تعهد و التزام و بو کفتار و رفتار لرنده صدق و استقامت لری بدیدار اولوب خلافسه وضع حرکت ظهور ایلمدکجه طرف باهر الشرف ملوکانه دن و کرک و زرای عظام و وکلای کرام و ضابطان ذوی الاحترام طرف لرندن

خصوص مرقومه كرك ضابطان و كرك آحاد و افرادندن بر فرده مقدار ذره بر خطاب و عتاب و سرزنش و عقاب توجه ائمه جكنه اولاشهر يار عدالت شعار شوكتلو قدرتلو مهابتلو عظمتلو پادشاهمنز افدمنز سلطان مصطفى خان خلدالله خلافته الى يوم الميزان حضر تلى و ثانياً وكلاى دولت و ضابطان صداقت منزلت طرفلرندن دخى عهدالله و عهد رسول اللهى ياد و تكرر و بو عهد استقامت عقد اوزره ثابت و پايدار اوله جفته عن صميم البال قضى الّا نار اولدنى ثابت و استوار و بالاسى مبارك خط هايون كرامت نثار ايله زيتمدار و ذيلى حالا شيخ الاسلام سماحتلو فضيلتلو سيد عطاءالله افدى و قائم مقام عالمقام سعادتلو عطفوتلو سيد موسى پاشا و حاضر بالحلس كبار علمای اعلام حضر اتنك امضا و خاتملىه ر و تقدر و بلا نزاع و بلا جدال ابدى الّا باد دستور العمل قلوب محاكم شرعيه ده تسجيل و باش محاسبه و ديوان هايون قلملىنه قيد و تكميل و اوجاع عامره طرفه سند شرعى اولمق اوزره اشبو وثيقه تسليم و اعطا و اولوجهله ختام مصلحت تميم و ايضا اولدى تحريراً فى الثالث والعشرين من شهر الربيع الاول لسنة اثنين وعشرين ومأتين بعد الالف .

\* صورت خط هايون \*

اشبو حجت شرعيه ده درج و تسطير اولنان كافه شرايط معتبره حرف بحرف منظور و معلوم شاهانه م و ذيلنى ختم و امضا ايدن شيخ الاسلام سلمه السلام و قائم مقام عالمقام و علمای اعلام ختم و امضالىه مقبول پادشاهانه اولمشدركه : مادامكه اشبو سند معتبره ده اولان شرايطه يكيجرى قوللرم طرفدن رعايته مقتضاي تعهدلى اوزره بوندن صكره جزئى و كللى امور سلطنت سنيه مداخله ايتيوب اجداد عظام زمانلرنده اولدنى كى هر بر خصوصه امر و فرمان شاهانه م انقياد و مطاوعت و ضابطلىنه هر حاله متابعت ايدلر بندخى عالملىرى بوقدن و ارايدن الله عظيم الشانك اسم پاكنى و ايكى جهان سرورى بيغمبريمز عليه افضل الصلوات و ازكاهها حضر تلىنك روح تابناكنى ياد ايله تعهد ايدر كه بو خصوص ايجون كرك طرف خلافتناهيمن و كرك و زراى عظام و وكلاى فخام و ضابطان دولت ابد قيام طرفلرندن فرد آفريده هيچ بر وقتده مؤاخذه و مسؤل اوليه .

( ۷ )

\* سلطان مصطفىاى رابعك جلوسنده فاس حاكمه كوندريلان \*

\* نامه هايونك صورتى \*

بسم الله الرحمن الرحيم

ان اغلى درر يرصع به تيجان الكلام واعلى زهر يتضوع به افنان الاقلام حمد مالك الملك

والملكوت وشكر صاحب العظمة والكبرياء والجبروت فالحمد لله الذي جعلنا خلائف  
 في الارض ورفع بعضنا على بعض وعززنا نسباً ونسباً وآتانا من كل شيء سبباً حتى فضلنا  
 على كثير ممن خلقه تفضيلاً وانعم علينا بعدد وعدد ان عددناها لا تحصيها اجمالاً ولا  
 تفصيلاً والصلوة والسلام على ساطان الانبياء والرسل ومحافظ الشرايع والسبل قائد الغر  
 المحجلين وامام المجلين والمصلين والتالين المصطفى من نسل عدنان والمحجبي المحجبي  
 من آل قحطان وعلى آله واصحابه الذين جاهدوا في الله حق الجهاد وتجاهدوا في اعلاء  
 كلمته بطى الوهاد والجهاد مانجم نجم في الحضراء بنصرته وبسم نجم في الغبراء بحضرته اما  
 بعد فما بلغ الى حد الايقان عند ذوى الملكة والاتقان ان الله زين هذا العالم بالانسان  
 ويميز المسلمين منهم بانواع المكرمة والاحسان وعدل امزجة المسلمين بمراحم مراحم  
 الملوك والسلاطين كما قوم الكعبة العليا بقوام الاعمدة والاساطين وتودبتواد ملوك  
 الاسلام سلامة المساكن والمساكين في بلاد المسلمين ووطد بتعاضدهم سعادة الممالك  
 والممالك من الموحدين فللا حراز لهذه الغنائم البادرة الشاردة والاحتياز لتلك  
 المكارم الواردة الفاردة انتصب نفساً لان اهدى نفائس تحية يطيب بطيب عرفها انفس  
 الصبا ويرتاح بريح روحانيتها ارواح الصهبا واهدى عرائس تسليمة بحار عند محاورة  
 انبها حوراء الجنان ويغار عند محاورة لمسها مقصورات الخيام من الحسان باخلاص  
 اخلاص من جنى النحل واصفى من ماء المفاصل واشتياق اتقى من لية القدر وابقى من  
 الدهر المتناول الى الاخ الماجد الاعز الاغر والصند الناجد الاكرم الابرساطان ممالك  
 الغرب بجذا فيرها وقبة اقبال اقبال العرب بجماهيرها \* كبرت حول ديارهم لما بدت \*  
 تلك الشموس وليس فيها مشرق \* وهو التأمم بتقويم الشريعة الغراء الذى اقام سوق  
 المعالي والعوالى على ساق الجهاد والغزاء والحافظ لحدود الملة البيضاء الذى انام المغانى  
 والغوانى تحت ظل سيوفه البيضاء ورماحه السمراء \* بنيت حصونا تصون العلى \* اذا  
 مابناء الانام انهدم \* حصون من العدل فى حولها \* خنادق فيها مياه الكرم \* وهو الفرع  
 الاصيل من الشجرة العدنانية التى اصلها ثابت وفرعها فى السماء والتبل التبل من الكنانة  
 الكنانة الذى يخرج به يد الله ماتكن صدور الاعداء من البغضاء \* نسب تحسب العلى  
 علاه \* قلدتها نجومها الجوزاء \* وارث المناقب العلوية العاوية ومستأثر المآثر المرضية  
 المرضوية فكأن ابانواس قدعناه حين قال مقال محب الاهل البيت غير قال \* من لم يكن  
 علويًا حين تنسبه \* فماله من قديم الدهر مفتخر \* الله لمسيرى خلقا فاتقنه \* صفاكم  
 واصفاكم ايها البشر \* فاتم الملاء الاعلى وعندكم \* علم الكتاب وما جاءت به السور \*  
 سلافة سلاله ملوك المغارب وضوء اشتها عدلهم فى مشارق الارض غير غارب \*  
 بهليل فى الاسلام سادوا ولم يكن \* كاولهم فى الجاهلية اول \* هم القوم ان قالوا اصابوا

وان دعوا \* اجابوا وان اعطوا اطابوا واجزوا \* اعنى به شقيقى الشقيق وخليلى  
الجليل المولى بن المولى لزال عرف عرفانه ومعروفه متضوعاً كالمسك السحيق فى  
كل بلد سحيق ولا برج جود جوده واجياد جواده غيثا لحرث احبابه وعيئنا لنسل  
اضداده آمين ثم انبى الى ذلك الجناب الرفيع والنباب الشاىخ المنيع ( ان الله مالك الملك  
يؤتى الملك من يشاء وينزع الملك ممن يشاء ) وان الملوكة كلهم عبيده الخاضعون لسلطانه  
يتصرف فيهم كيفما شاء والقصد من نشر ديباج هذا الديباجة ونثر ادراج هذه الدرر  
الوهادية ان ابن عمى السلطان سليم خان بن السلطان مصطفى خان وان كان فى نفسه من  
خير الملوكة فى اخلاقه الحسان الا انه منذ تحمل اعباء الدولة ثقلاً عن تخفيف اقبال  
اهل الملة فحدث خلوه الميئدان بعض الظلمة من احداث الرجال الراجلين فى العدل  
والاحسان والفارسين فى الظلم والعدوان وثاروا على الناس ولم يرعوا رحماً ولا جواراً  
وجازوا حدود الله واصروا واستكبروا واستكباراً ومن رعى غنماً فى ارض مسبعة \* ونام  
عنها تولى رعيها الاسد \* فلما بلغ السيل الزبى واحاط سرادق الويل بالوهاد والربى  
هاج الهياج والمياج من العسكر كالبحر المواج فارسلوا على تلك الطائفة طوفان الخوف  
ببوارق الخناجر وصواعق السيوف فاخذتهم الصيحة مصبحين ( فقطع دابر القوم الذين  
ظلموا والحمد لله رب العالمين ) تهدى الامور باهل الراى ماصلحت \* وان تأبت فبالجهال  
تتقاد \* لا يصلح الناس فوضى لاسرارة لهم \* ولا سراة اذا جهالهم سادوا \* فادى ذلك  
الشان الى انحلال الناس خاصتهم وعامتهم عن خلعة البيعة لابن عمى السلطان سليم خان  
قال الله تعالى ( واتقوا فتنة لا تصين الذين ظلموا منكم خاصة ) فيخصنى الله تعالى بالخلافة العظمى  
وجعائى ما مناً لتلك الامانة الكبرى فاعتليت بحول الله تعالى وقوته على السرير السلطانى  
بلا مشقته ولا شقاق وتوجت بلطف الله تعالى وعنايته بالتاج الخمر وانى مع الارث  
والاستحقاق ناوي الاقامة قوائم قواعد العدل والاحسان ومتوكلا فى ذلك على ربي القادر  
المستعان ( ومن يتوكل على الله فهو حسبه ان الله بالغ امره قد جعل الله لكل شىء قدراً )  
وكان ذلك وقت الظهر من يوم الجمعة الحادى والعشرين من شهر ربيع الاول من سنة اثنين  
وعشرين ومائتين والنف فاقتدرت الى تحرير تبشير هذا الجلوس الى تلك الحضرة المحفوفة  
بسدود السعود منهاياً الى ذلك الجناب الرفيع الشان الصاعد فى الميكانة الى اعلى مكان  
ان والدى المترع فى مراتب الجنان السلطان عبد الحميد خان بن السلطان احمد خان اتخذ  
والدكم المجاور فى جوار رحمة ربه الجليل المولى محمد بن المولى اسماعيل اخا مخلصاً فى الله  
وتوختى ووداده ورضاه وقد جرى بينهما من الموانسة والمواساة والمهادنة والمهاداة ما يعجز  
عن حصره انامل الانام وقوادم الاقلام فاتم حينئذ ابن عمى وابن عم المرء اخواه بل اصطفيتكم  
اخاً نسيناً وليس اخ المرء عند اساه الامن يواسيه ويأسوه \* اخاك اخاك ان من لا اخاله \*

كساع الى الهيجاء بغير سلاح \* واعلمكم اننا نحن الان صارفون الجهد في الجهاد على كفرة  
المسقو والانكليس نكسهم الله تعالى بسيوف المؤمنين على اقطع التنكيس فترجوا منكم  
العون والامداد والاسعاد والانجاذبان تساعدونا بالتوجهات الظاهرة والباطنة والدعوات  
البارزة والكامنة لتثبيت اقدام الموحدين في الاقدام على وطى رؤس المشركين فاتم  
معاشر اهل البيت آل الله وعتره الله وصفوة الله وخيرة الله يستسقى بوجوهكم انداء الغمام  
ويستشفى بوجودكم ادواء الغموم والآلام واسأل الله تعالى ان يوفقني للتمسك بمجمله المتين  
والتمسك بشرعه المبين وان يستعملني في اعلاء كلمته التي هي العليا وحياء السنن التي هي الحجة  
البهراء والحجة البيضاء وينصرنى على الاعداء في كل آن واين كما نصر نبيه المصطفى  
ببدر وحين كل ذلك بما من انفاكم القدسية وميامر هممكم الانسية جعلنا الله تعالى  
واياكم من الذين دعواهم فيها سبحانهك اللهم وتحييتهم فيها سلام و آخر دعواهم  
ان الحمد لله رب العالمين .

( ٨ )

\* يوسف اغا ترکه سنده ظهور ايدن حجت غريبه نك صورتى \*

محرر وسه غاطه مضافاتندن بشكطاش ناحيه سنده پاشا محلله سنده كائن مهدهاى سلطنت  
دولتو عنایتلو والده ساطان علمية الشان حضر تليرنك كتحداى على قدر لرى  
سعادتلو عطوقتلو يوسف اغا بن المرحوم اسماعيل اغا حضر تليرنك ساحلخانه لرنده  
معقود مجلس شرع انورده الحاج سعدالله اغا بن احمد اشبو باعث الكتاب مشاراليه  
حضر تلى محضر نده بالطوع والرضا اقرار تام وتقرير كلام ايدوب ابتداى خاقت  
ارواحده تقدير ولوح محفوظه ثبت وتحرير اولنان اجل موعودمدن عمره كيدى  
سنه كامله سنى مشاراليه يوسف اغا حضر تليرنه هبه ايدوب انلر دخى حضرت آدم  
عليه السلام عمر شريف مقدر لرنندن معلوم المقدارينى شيت عليه السلامه هبه بيوروب  
شيت عليه السلام دخى آتهاب وقبول بيوردقلى قضيه بي عالم اولدقلى اجلدن مجلس هبهده  
آتهاب وقبول بيورديلر ديديكنى مشاراليه اغا حضر تلى دخى شفاهاً تصديق ووجاها  
تحقيق بيوردقلى نده حاكم موقع صدر وكتاب طوبى له وحسن مأب ( يمحوا الله مايشاء  
ويثبت وعنده ام الكتاب ) نظم جليلنك مفاد شريفى تفكر بيوردقلى نده حفظا للمقال  
اولكده واقع الخالدر بالطلب كتب واملا اولندى حرره فى اليوم السابع والعشرين  
من شهر ربيع الآخر لسنة احدى عشر ومأتين بعدالالف .

مافيه من الهبة والآتهاب

خفاف زاده محمد امين القاضى بمحرر وسه غاطه

شهود الحال

عمران زاده بهارا	کتخدای مشارالیه	قپو چوقداری
عارف افندی	احمد افندی	عمر اغا
مصاحب شهر یاری	وغیرهم	
صادق اغا	من الحضار	

( ٩ )

\* اچہ طلبنی حاوی فاس حاکمہ خطاباً قلمہ النمش اولان نامہ ہایونک \*

\* صورتی \*

بِسْمِ اللّٰهِ الرَّحْمٰنِ الرَّحِیْمِ

حمد الله الذي جعل المؤمن للمؤمن كالبنيان والصلوة والسلام على سيدنا محمد الذي جعل المسلمين يداً واحدة على من ناوهم من اهل العدوان وعلى آله واصحابه الذين (جاهدوا باموالهم وانفسهم في سبيل الله) بلاتان ولاتوان فانهم الى الاخ الامجد في الله والصديق الصادق في ولاء من تولاه ان الله تبارك وتعالى قد استخلفني على عباده المسلمين وفوض الى مقاليد مصالح الدولة والدين وهذه نعمة سابعة ربانية وكرامة نابغة صمدانية لا يفي لشكر ساعة منها عبادة الف شهر ولا يكفي لحق برهة منها قيام الدهر وصيام الدهر الا اني لما اعتليت على سرور السرير الساطاني وارتقيت الى شرف الشرف الخاقاني وجدت الدولة العلية قد قامت الحرب فيها على ساق وهجم عليها كفره مسقو وانكليس بالاتفاق فاحاط بالليس جيوشهم بحدود الاسلام بانواع البسوس والباس وظهر الفساد في البر والبحر بما كسبت ايدي الناس فاستقبلهم ابطال الموحدين لابطال سحرهم وقابلهم صمصام المجاهدين لتصميم سحرهم ونجرهم فافلح جزب الله بنصره العزيز الان حزب الله هم المفلحون وباء حزب الشيطان بخسران ميين الان حزب الشيطان هم الخاسرون لكن ازدياد ايام المضارب والحروب ادى الى انتقاص اعداد الخزائن واجتماع اقسام المتاعب والخطوب انتهى الى انتقاص جموع الدفائن فالجأنا تتابع المصارف والصروف الى الاستقراض من بعض الملل على ماجرى به عادة الملوك واصحاب الدول وقد عرض علينا بعض ملوك الافرنج ان يعطونا قدر ما يكفيننا ويكفنا عن الضيق الذي فينا فاستعصمنا عن التلبس بشين دينهم كاعصمنا الله تعالى عن التدنس برين دينهم قال النبي صلى الله تعالى عليه وسلم لا تستضيئوا بنار المشركين وقد علمنا انه قد اجتمع عندكم من مال الله شيء كثير اكثره الله تعالى ببركاته النامية كل تكثير فنستدعي منكم ان تقرضونا عشرين الف كيس من خزانكم الحاضرة على ان تفضيها بعد ختام



الغزو من واردات ممالكنا العاصرة فان ساعفتمونا في بعيتنا فقد ساعدتمونا على  
 الخصاء ان عدوتم عن معوتتنا فقد اعدتكم علينا الاعداء قال الله تعالى ( وتعاونوا  
 على ابرء والتقوى ولا تعاونوا على الاثم والعدوان) وقال النبي صلى الله تعالى عليه وسلم  
 ( من اعان مجاهدا في سبيل الله او غارماً في عسرتة او مكاتباً في رقبته اظله الله في ظله يوم  
 لا ظل الا ظله) وقال الشاعر لمن تجمع الدنيا اذالم ترد بهاسرور تحب او اسائة مجرم  
 وقد بعشنا الى معالى حضرتمكم هذا الكتاب الكريم المختوم بمسك خاتمتنا المبارك الفخيم  
 لتتخذوه على الدين حجة قوية وعلى الاداء محجة سوية الى ان تقضى حق الدين ونوصل  
 الاثر الى العين فتدوه عند ذلك علينا وتكونوا في الحالين محسنين لنا فاعلى المحسنين  
 من سبيل والله على ما نقول وكيل .  
 حرر في اليوم الثالث عشر من شهر رمضان المبارك لسنة اثني وعشرين ومأتين والف  
 من هجرة من له العز والشرف .

(١٠)

\* علمدارك صدارتته دأر اولان خطهايون صورتى \*

الحمد لله رب العالمين والصلاة والسلام على محمد سيد الاولين والآخريين وعلى آله واصحابه  
 الطيبين الطاهرين اما بعد سننك وزير اعظم ووكيل مطلم مصطفى باشاسين معلوم  
 اوله كه نستعيد بالله ( انا جعلناك خليفة ) آيت كريمه مضمون شريفى اوزره تقدير  
 سببى ايه جلوس هايونم وقوع بولوب عنابت اللمدن احسان بيور يلان دولت  
 محمدى وسلطنت احمدى اولديغندن اولان تنبيه هايونم بودر كه : وديعه جناب مستعان  
 اولان جمله امت محمدك وسائر رعايا وبرايايك ودولت عليهك باجمعهم امور وخصوصا رينى  
 شرع شريفدن استفتا واحقاق حق ايدوب شريعت غرابى اجرا ده شولقدر دقت  
 واهتمام ايدو سننك دولت عليهك وجميع عباد اللهك اوزر لرينه شر يعتك نورانيتى  
 ظاهر وباهر ايدوب عامه موحدين مستر بح الحال اوله لر وعلماى عظام ورجال دولتم  
 واوجاقلو قوللرم ايه اتفاق واتحاد اوزره امور دولتمى رؤيت ايدوب اجساد  
 عظامك قانونتى اجرا واهل مناصبك خدمت معينه لرى هر نه ايسه هر كس كندو  
 امور رينى رؤيت ايدوب ماده خلاف ونفاقه سبب عادى اولان ماده لر دن بغايت اجتناب  
 وعساكر اسلامك وغزاة موحدينك ويكيچرى اوجانم وجبه خانه وطو پخانة  
 عامره وسائر اوجاقلر يمك انتظام حاللر يله معموريتنه اهتام ومقابله اعداده اولان  
 عساكر نصر تمارمك زياده رفاه حاللر يله سبب اولان ذخائر وجب خانه وسائر برأ  
 وبحراً لازم اولان ادوات سفريهك اضعاك مضاعف ترتيب وتكميلنه صرف مقدور  
 وقالونجى عسكرك يلك وطو يچيلرك تعليم ايه آماده بوللملرينه جد موفور وبادىء

آسایش عبادالله اولان نرخ جاری به دائماً دقت وهر شیئی دکر بهاسیله فروخت  
 ایتدیروب زیاده به رخصت ویرلیه و فقر اوضعیله مرحت ایله حاللرینی تفتیش و تفحص  
 ایلدوب احوالردن خبردار اولوب خلاف شرع وقانون تکالیفلرینی تنزیل و دفع  
 و رفع مظالمه مقید اوله سین و ممالک موروثه شاهانه مده بربریه محاصمه و محاربه ایدوب  
 بو قدر امت محمد تلف و شهید و قصبات خراب اولدیغی مسموع هایونم اولمشدر بومثلاو  
 آسایش عباده خلل و یرن حالاتی دفع و رفع ایتدیکه مقید اولوب ابتداء اوزره اوله سین  
 و آستانه علیه مده ساکن عباداللهی اوقت خمسّه مفروضه جماعته مداومه تشویق  
 ایدوب هر کیجه یازوقیش اوقات معینه ده هر مناره ده الصلوة و هر جمعه صلا و یریلوب  
 و صباح نمازینی هر کس اولدیغی محله نك جامع شریفنده ادا و فتح شریف تلاوتیه  
 دوام دولتمه دعاده اوللرینی تهید و سائر انوار اسلامیه به باعث و بادی اولان  
 حالتک اجراسیله سلطان انبیا حبیب خدا و شفیع روز جزا علیه افضل الصلوات  
 و اکمل التحایا اقدمن حضرت تلینک و انتخاب کرام رضوان الله تعالی علیهم اجمعین  
 و سلف صالحینک اثر لرینه اقتفا ایله مساعی مشکوره ظهوره کتورمکه و دنیا و آخرت  
 سعادتیه مظهر اوله سین حضرت خدا جمله به توفیق احسان ایلیه آمین .

\* بو جلدک برنجی طبعنده مصححی الحاج ابراهیم افندی طرفندن \*

\* سویلنمش اولان تاریخدر \*

(جناب ذی الکریم و الاشیم عالی هم اول کیم \* وزیر افضل و اعلم مسلم جودت طبعی)  
 (اوتخون بر زمان بر منبعی فیض و علومدر کیم \* معارف جولری سیراب ایدر افضالتک نبی)  
 (تالیف جلیل قدری لاتحصار از جمله \* مجلات تواریخی تجاوز ایلدی سببی)  
 (تمامنده دیدم تالیء قسم سابعه تاریخ \* بحول حق مقدر اولدی جلد نامنک طبعی)

سنه ۱۲۸۸

﴿ انتهى الجلد الثامن ﴾

در سعادت

(مطبعة عثمانیه)

۱۳۰۹



